

**MAJEPACU JŪMENIJICU
YÁVAIYE MAMAENE
COYŪITUCUBO**







©Wycliffe Bible Translators, 2009

El Nuevo Testamento
en el idioma cubeo de Colombia

Segunda edición
©Wycliffe Bible Translators, 2009

Primera edición, ©Sociedad Bíblica Internacional, 1989

Licencia Creative Commons

-  Usted es libre de copiar, distribuir y comunicar públicamente la obra bajo las condiciones siguientes:
-  Reconocimiento. Debe reconocer los créditos de la Liga Bíblica (pero no de una manera que sugiera que tiene su apoyo o apoyan el uso que hace de su obra).
-  No comercial. No puede utilizar esta obra para fines comerciales.
-  Sin obras derivadas. No se puede alterar, transformar o generar una obra derivada a partir de esta obra.
 - ▶ Al reutilizar o distribuir la obra, tiene que dejar bien claro los términos de la licencia de esta obra.
 - ▶ Alguna de estas condiciones puede no aplicarse si se obtiene el permiso del titular de los derechos de autor
 - ▶ Nada en esta licencia menoscaba o restringe los derechos morales del autor.

<http://creativecommons.org/licenses/by-nc-nd/3.0>

Índice

San Mateo	Mt.....	1
San Marcos.....	Mc	67
San Lucas	Lc	105
San Juan.....	Jn	169
Hechos.....	Hch.....	219
Romanos.....	Ro.....	282
1 Corintios.....	1 Co.....	315
2 Corintios.....	2 Co.....	348
Gálatas	Gl	371
Efesios	Ef.....	383
Filipenses	Flp.....	395
Colosenses.....	Col.....	403
1 Tesalonicenses.....	1 Ts	411
2 Tesalonicenses.....	2 Ts	417
1 Timoteo	1 Ti.....	421
2 Timoteo	2 Ti.....	429
Tito.....	Tit.....	435
Filemón	Flm.....	439
Hebreos	Heb.....	441
Santiago	Stg.....	473
1 San Pedro	1 P.....	481
2 San Pedro	2 P.....	490
1 San Juan.....	1 Jn	496
2 San Juan.....	2 Jn	503
3 San Juan.....	3 Jn	505
San Judas	Jud	507
Apocalipsis	Ap.....	510
Ñaradaviva yávaicamuaque		542

San Mateo

Mamabuinore coyuiyebu Mateo bácu ũi toivaiye báquede Jesucristorã. Mateo bácu barejaquémavu judíovacacu, Galilea âmicurijoborôcacu, aru Jesús ũi yávaiye méne beorí coyucôjeimaracacu. Leví âmícucu barejaquémavu Mateo bácu, ñai jabovare tãutũra ícaipôecu bácu, Roma âmicurô jaborôre memenu mácu, Jesús ũi órejaquiyi jipocare ũ mácure. Majidivũ ne dápiayepe iye coyuiyede Jesucristorã toivarejaquemavu ũ mácu cucu bácu Israel bácu pãramena ne curijoborô. Pôecu cubebi majicu ye uju ũi toivaiju bácarôre diede, ũbenita obedivũ majidivũ ne dápiayepe añiũu bácarôre 70 d.C. jipocare.

Mateo bácu jáðovarejaquemavu Jesúre yópe jabocupe. Toivarejaquemavu judíovare, ne majinajiyepe ayũ Jesúre Jũmenijicui daroimũ macuyãre, yópe ũi coyucôjeiye báquepedeca ũre coyucaipôeva mácvãre aru ne toivaiye báquepedeca Majepacu Jũmenijicui yávaiye javequede coyuitucubore. Coyurejaquemavu 1:1 David bácu aru Abraham mácu Jesús ũi jipocacavu bácvãre, dápiare ðacuyũ Jũmenijicu “Yópe ðarãjare”, ũi aipe báquepedeca na mácvãque (Gn 15:18, 2 S 7:8-16). Jáðovarejaquemavu Jesúre yópe bueipôecupe máre. Cũinãpũrũpe paiye Jesús ũi coyuiye báquede toivarejaquemavu Mateo bácu: (1) Jũmenijicui jaboteinore coyũno (caps. 5-7); (2) Jesús ũi yávaiye méne beorí coyucôjeimarare cõjeiyede coyũno (cap. 10); (3) jári dápiari ne ðarãjiyepẽ ainore coyũno (cap. 13); (4) aipe ðaiye jaurôre Jesúre ju aipôevare coyũno (cap. 18); aru (5) ijãravũ cũiyede aru Jũmenijicui jaboteino buiyede coyũno (caps. 13-24).

Jesucristo ũi jipocacavu bácvãre coyũno (Lc 3.23-38)

1 ¹Yũ toivaquijivũ ne âmíãre ina Jesucristo ũi jipocacavu bácvãre, ũi jipoca põeteivũ bácvãre. Ũtame ñai jabocu bácu David bácu pãramecu, aru Abraham mácu pãramecu máre.

²Abraham mácu Isaac bácu pacu barejaquémavu. Isaac bácu Jacob bácu pacu barejaquémavu. Jacob bácu Judájã mácvũ népacu barejaquémavu. ³Judá bácu Fares bácu aru Zara bácu népacu barejaquémavu. Aru Tamar bácu népaco barejaquémavu. Fares bácu Esrom mácu pacu barejaquémavu. Esrom mácu Aram mácu pacu barejaquémavu.

⁴Aram mácu Aminadab bácu pacu barejaquémavu. Aminadab bácu Naasón mácu pacu barejaquémavu. Naasón mácu Salmón mácu pacu barejaquémavu. ⁵Salmón mácu Booz bácu pacu barejaquémavu. Aru

Rahab bácu jípaco barejaquémavu. Booz bácu Obed bácu pacu barejaquémavu. Aru Rut bácu jípaco barejaquémavu. Obed bácu Isaí bácu pacu barejaquémavu. ⁶Isaí bácu David bácu pacu barejaquémavu. Ñai David bácu Israecavu bácvũ ne jabocu barejaquémavu. David bácu Salomón mácu pacu barejaquémavu. Aru Urías bácu márepaco jípaco barejaquémavu.

⁷Salomón mácu Roboam mácu pacu barejaquémavu. Roboam mácu Abías bácu pacu barejaquémavu. Abías bácu Asa bácu pacu barejaquémavu. ⁸Asa bácu Josafat bácu pacu barejaquémavu. Josafat bácu Joram mácu pacu barejaquémavu. Joram mácu Uzías bácu ñecu marejaquémavu. ⁹Uzías bácu Jotam mácu pacu barejaquémavu. Jotam mácu Acáz bácu pacu barejaquémavu. Acáz bácu Ezequías bácu pacu barejaquémavu. ¹⁰Ezequías bácu Manasés bácu pacu barejaquémavu. Manasés bácu Amón

mácui pacu barejaquémavu. Amón mácu Josías bácu pacu barejaquémavu. ¹¹Josías bácu Jeconíajā mácavu néñecu marejaquémavu. Dinumhare, ne curinumhare, ina Babilonia amicurōcavu bācavu ne buorī nūvaimara marejaquémavu maja Israecavu maje jipocacavu bācavu. Na mácavure nūvarejaquemavu pū Babilonia amicurōita.

¹²Na mácavure ne buorī nūvariburu yóboi, Jeconías bácu Salatiel bácu pacu barejaquémavu. Salatiel bácu Zorobabel bácu pacu barejaquémavu. ¹³Zorobabel bácu Abiud bácu pacu barejaquémavu. Abiud bácu Eliaquim mácu pacu barejaquémavu. Eliaquim mácu Azor bácu pacu barejaquémavu. ¹⁴Azor bácu Sadoc bácu pacu barejaquémavu. Sadoc bácu Aquim mácu pacu barejaquémavu. Aquim mácu Eliud bácu pacu barejaquémavu. ¹⁵Eliud bácu Eleazar bácu pacu barejaquémavu. Eleazar bácu Matán mácu pacu barejaquémavu. Matán mácu Jacob bácu pacu barejaquémavu. ¹⁶Jacob bácu Joséi pacu barejameda. Nai José Maríai márepacu barejameda. Aru María Jesúi paco barejácoða. Nai Jesús Jūmenijicu ũi epeimū, Cristo, barejameda.

¹⁷Que baru Abraham mácu curinumure, pū David bácu curinumūita, catorce paiyajuboa bācavu curejaquemavu. Aru David bácu curinumure, pū ina Babilonia amicurōcavu bācavu ne buorī nūvaiyeta maja Israecavu maje jipocacavu bācavure Babiloniaita, apavu catorce paiyajuboa bācavu curejaquemavu. Aru maja Israecavu maje jipocacavu bācavure ne buorī nūvaiyede, pū nai Cristoi pōteiyeta, apavu catorce paiyajuboa bācavu curejaquemavu.

Jesucristo ũi pōeteino

(Lc 1.27, 31, 2.1-7, 21)

¹⁸Yópe barejávūya Jesucristo ũi pōeteino mácarō. Jípaco bacodó María amicūco barejácoða. Joséi márepaco bacodó barejácoða. Óre ũi nomicūbedata

cāreja, javeta ō micatedejaquemavu nai Espíritu Santo ũi paruéque. ¹⁹José boropatebecu barejameda Jūmenijicu jáinore. Que baru María ōi juedojícure eaiyede coreóvarī, judíoiva ne daicōjeiyepedeca daiyurī, óre jarūvacayū barejameda. Ūbenita Josécapūravu ye jarūvaiyūbedejameda óre pōeva ne jáiyede, “Cuyoje tede daquijichūvu yū óre” ayū. Que baru óre pōeva ne jámene jarūvaiyūridurejameda nai José. ²⁰Ūi nópe dápiarīburu yóboi, cūinácu ángele, Jūmenijicu darioimū, earejameda vuorūmūi José yebai. Aru yópe arī, coyurejameda ũre:

—Mū, José, David bácu pāramecu, jidūbecuva Maríare nomicūjacu mū. Espíritu Santo ũi juedojímo mácotame ō. ²¹Ūmū juedojícure cūvacodome ō. Ū macuyūme meadacuyū ũi pōevare, ne ámeina teiyede jarūvarī. Que baru ũ macuyū Jesús amicūcuyūme ũ, arejameda nai ángele Joséde.

²²Caiye iye nópe vaidéjavūya cūinátrū Jūmenijicu ũi coyūcōjeiye báquepedeca cūinácu ũi yāvaiyede coyūcaipōecu bācure. Yópe arī, toivaicōjenejaquemavu ũ mácure Jūmenijicu:

²³Nomió ũmucubecova juedoearī juedocūvacodome ō. Emanuel amicūcuyūme ũ macuyū, arejaquemavu nai Jūmenijicu yāvaiyede coyūcaipōecu bācu. Emanuel aiyrō, “Jūmenijicu majaanu cubi”, aiyrōtamū. ²⁴Que teni José coedarī, ángele ũi aye báquepe darejameda. Maríare nūvarejameda ũi cūrami. ²⁵Ūbenita óque cūbedejameda cāreja, pū ōi mácure juedocūvarīburu yóboita. Aru ōi juedocūvaede, “Jesús bājacu mū” arī, amidorejameda José.

Abíacovare bueipōeva

Jesúre ne járanūino

2 ¹Belén amicuriimaroi, Judea amicurijoborōi, pōetedejameda Jesús. Ūi pōteiyede dijaborōcavu ne jabocu Herodes amicūcu barejameda. Ū curejameda Jerusalén amicuriimaroi.

Dinũmre aviá dainocavũ, abiacovare bueipõeva, earejaimada Herodes yebai.

²Earĩ, yópe arĩ, jēniari járejaimada:

—¿Muja judíova muje jabocu bacuyá, ári põetecuba ũ? Cũinácu abiacoru ũi põeteiyede jádovañure jári, daivubu ñuja, jínajivu mearore úre, arejaimada ina abiacovare bueipõeva.

³Apevu diede ne coyuiyede jápiarĩ, ãmei cãrijiñũ marejámeđa ñai jabocu. Ũi jabocu bae boje, apecu jabocu ũi põeteiyede jápaiyubedejaquemavu. Aru obedivu Jerusalécvũ máre cãrijiñũ barejáimada. ⁴Cãrijiñũ, úre memecaivure órejaicõjenejameđa Herodes apevu sacerdotevare jaboteipõevare aru Jũmenijicui yávaiye báquede bueipõevare máre. Ne eaiyede, yópe arĩ, jēniari járejameđa ñai jabocu:

—¿Ári põeteyuba Jũmenijicui epeimũ ijãrvui, ñai Cristo? arejameđa náre.

⁵Yópe arĩ, coyurejaimada úre:

—Belén ãmicurĩimaroĩ, Judeacarõĩ, põetecuyume Jũmenijicui epeimũ, ñai Cristo. Yopedeca toivaicõjenejaquemavu Jũmenijicui yávaiyede coyũcaipõecu bácvare:

⁶Judea ãmicurijoborõcarõ imaro, Belén ãmicurĩimaroĩ, põetecuyume ñai, Israecavũ ne jabocu bacuyá, náre jipocatecuyũ. Que baru diĩmaro quĩjinoavacari, parũrõ maquiyébu, arĩ coyurejaquemavu Jũmenijicui yávaiyede coyũcaipõecu bácvare, arejaimada ina judíovai jabova Herodede.

⁷Ne coyurĩburu yóboi, úre memecaivure yavenina órejaicõjenejameđa Herodes ina abiacovare bueipõevare, põeva ne jápiabenoĩ. Náque boroteni, coreóvarĩ majidejameđa aipiye bajure abiacoru ũi járorõ mácarõre. ⁸Majicũ bácvũ, náre jarorejameđa pu Belén ãmicurĩimaroĩta. Yópe daicõjenejameđa náre:

—Vorãñjara muja juedojicure. Vorĩ eaiyvũ bácvũ, coyurãdajarã yure cojedeca. Yũ máre nucuyumu ũi yebai, mearore jicuyũ úre, arejameđa borocucu ñai Herodes.

⁹Jápiavũ bácvũ ũi coyuiyede, ina abiacovare bueipõeva mái nurejaimada, yópe ñai jabocu ũi aiye báquepedeca. Que teni abiacoru, ne jáimũ mácu aviá dainocapũrvui, náre jipocateni nurejameđa pu ũi eaiyede juedojicui curiñamine. Aru diñami pũenoĩ mautedejameđa. ¹⁰Ne jáiyede abiacoru mauteyure cuibeda diñami pũenoĩ, urarõ torojurejaimada ne ũmei. ¹¹Diñami cũrami jívui ne ecoiyede, járejaimada juedojicure jipaco Maríaque. Nuatutarĩ ũi yebai, jídejameđa mearore úre. Que teni ne cvue imaritõcuare voarĩ, úrure, olíbano ãmicue mumijuede, aru mirra ãmicue mumijuede máre jídejameđa úre. ¹²No yóboi, vuorũmũ, Jũmenijicui copainuicõjemenejameđa náre Herodes yebai. Que baru ma apemamata copainurejaimada ne curõita.

Jesúĩ bucũva Egiptoĩ ne dupini nuino

¹³Ina abiacovare bueipõeva ne nuriburu yóboi, cũinácu ángele, Jũmenijicui daroimũ, cvetedejameđa Joséde vuorũmũ. Yópe arĩ, coyurejameđa úre:

—Coedarĩ, nacajari, nuvajacu juedojicure, jípacore máre, Egipto ãmicurijoborõita. Dupini nujara muja. Juedojicure vorĩ, boarĩ jarũvaicõjecuyume Herodes. Que baru mautejarã muja nore pu “Nujara”, ji aiyeta cojedeca, arejameđa ñai ángele Joséde.

¹⁴Coedarĩ, juedojicure, jípacore máre, nuvarejameđa José. Diñamimareca Egipto ãmicurijoborõita dupini nurejaimada na. ¹⁵Aru nore, Herodes ũi yaiyéde cãreja, mautedejaimada na. Caiye iye nópe vaidéjavũya cũináturu Jũmenijicui ũi coyuiicõjeiye báquepedeca cũinácu ũi yávaiyede coyũcaipõecu bácvare. Yópe arĩ, toivaicõjenejaquemavu ũi mácvare Jũmenijicui: “Jĩmacure cutucacu yũ, ũi etaquiyepe ayũ Egipto ãmicurijoborõre jocarĩ”, arejaquemavu Jũmenijicui.

Herodes ũmũ juedojinare ũi boarĩ jarũvaicõjeino

(Mr 1.24; Lc 2.39; Jn 1.45)

¹⁶Ina abiacovare bueipõeva, ne copainumene Herodes yebai yópe ũi

cōjeino mácarōpe, Herodecapūravu jorojinejameđa, ne ju abe boje ũre. Ne juovaiyede coreóvayu b́acu, jorojĩn, churaravare boarĩ jaruvaicōjenejameđa caivu ina ũmu juedoĩna púcaũja cuvabevure cāreja. Yópe ũi corevaiyepene ina abiacovare buaipōeva ne coyũie báquepe, mamarumure ne jáiye báquede abiacovure, Herodes boarĩ jaruvaicōjenejameđa caivu ina ũmu juedoĩnare, Belén āmicurĩmaroĩ curivure aru no ĩmaro joabenoĩ curivure máre. ¹⁷Yópe Raquel báco òi oiye báquepe, nopedeca ina Belécavu máre orejaimađa. Caiye iye nópe vaidéjavũya cūináturu Jūmenijicu ũi coyũicōjeiye báquepedeca ũi yávaiyede coyũaipōescu bácu Jeremías bácu. Yópe arĩ, toivaicōjenejaquemavu ũi mácu Jūmenijicu:

¹⁸ Ramá āmicurĩmarore

jápurateavũya urarō ne chĩori oiye. Ico Raquedecabe odo mamara mácvure boje. Nárecabu yaivu b́acavu. Que baru orĩ dajocabebico ò, arejaquemavu Jūmenijicu yávaiyede coyũaipōescu bácu.

¹⁹ Apenũmua vaiyede, Herodes bácu ũi yainĩburu yóboi, José ũi cuede Egipto āmicurijoborōi, bediõva cojedeca vuorũmũi cuetedejameđa ũre cūinácu ángele, Jūmenijicu daroimu. Yópe arĩ, coyurejameđa ũre:

²⁰—Coedarĩ, nacajari, nũvajacu juedocure, jípacore máre. Muje joborō, Israel āmicurijoborōi, nũjara cojedeca. Nái boaiyucu bácu juedocure jave yaibĩ, arejameđa nái ángele Joséde.

²¹ José coedarĩ, nũvarejameđa juedocure jípacoque. Aru copainurejaimađa Israel āmicurijoborōita. ²² Israecarō Judea āmicurijoborōi nájurorivu barejáimada na. Ũbenita Herodes bácu mácu, Arquelao āmicucu, Judeacavure jaboteyu barejámeđa jípacu bácu yóboi. Aru die borore jápiarĩ, jiducu, Josécapūravu cuiyubedejameđa noi. Bediõva cojedeca vuorũmũi, Joséde

nore nũicōjemenejameđa Jūmenijicu. Que baru apeno Israecarō, Galilea āmicurijoborōi, nũrejaimađa Joséjá. ²³ Nazaret āmicurĩmaroĩ nuri, earĩ, curejaimađa na. Nópe vaidéjavũya cūináturu Jūmenijicu coyũicōjeiye báquepedeca ina ũi yávaiyede coyũaipōeva mácvure. Yópe arĩ, “Nái Cristo Nazarecacu bacuyũme”, arejaquemavu na mácvu.

Juan Bautista ũi coyũino Jūmenijicu yávaiyede pōescubenoĩ

(Mt 4.17, 7.19, 12.34, 23.33; Mr 1.1-8, 15; Lc 3.1-9, 15-17; Jn 1.19-28, 8.33)

3 ¹ Obediũja yóboi, Juan Bautista coyũĩ búrejameđa Jūmenijicu yávaiyede. Judea āmicurijoborōcarō pōescubenoĩ, pōeva vaivure coyure curejameđa nore. ² Yópe arĩ, coyurejameđa:

—Chĩori dāpiarĩ muje āmeina teiyede, oatũvajarā muje ñaiyede. Muje nópe ñaiyede, maumena nũjare jabotecuyume Jūmenijicu, arejameđa, coyũyu náre.

³ Nái Juan Bautista barejaquemavu Jūmenijicu yávaiyede coyũaipōescu bácu Isaías ũi coyũimu mácu. Javede yópe arĩ, Isaías bácu coyũicōjenejaquemavu Jūmenijicu Juan Bautista bacuyũrā:

Jūmenijicure coyũaipōescu coðoboboyure jápiarājarama pōescubenoĩ: “Meađajarā muje ũmene copu etaburĩ maje jabocure, nopedeca muje meađaiyepene daimare nái ũmu, muje pueđaimu, ũi daquiye jipocai. Que ñarĩ dajocajarā muje āmeina teiyede Jūmenijicu daroimu macuyũ ũi daquiye jipocai, Jūmenijicu copu etaquiyepe ayu nũjare”, arejaquemavu Isaías bácu, coyũyu Juan Bautista bacuyũrā.

⁴ Juan Bautista dorejameđa camello āmicucu podaque ñaicajede ũi cuitótecaje. Aru ũi jarióicava máre āimacajequede ñaicava marejávũya.

Ë ãre curejameða mujuñuvare aru mumicorore máre, yópe apevu nó cavu cãve cuvabevure. ⁵Obedivu pøeva, Jerusalén ãmicuriĩmarocavu, Judea ãmicurijoborõcavu, aru Jordán ãmicuriya jia êcaruacavu máre jápiarãnurejaimaða Juan Bautista yebai. ⁶Aru jiai, Jordán ãmicuriyai, na coapa “Ãmecũbu yu” ne arĩburu yóboi Jũmenijicure, ne chĩori dápiaye boje ne ãmeina teiyede, jáðovarejameða Jũmenijicuque.

⁷Obedivu judfõvai jabova, fariseo ãmicuriyajubocavu aru saduceo ãmicuriyajubocavu máre, jáðovaranurejaimaða Jũmenijicuque jiai. Æbenita na eavũre jári, yópe arejameða Juan Bautista:

—iMujã jujovai vubu, muje ðaiye boje mearape! iAru ãðavape paivubu mujã, muje ãmeðaiye boje apevure! Jũmenijicui jorojĩquijãravu eaiyede, jáve dupini buojabenamu mujã.

⁸Ðajarã mujã yópe pøeva chĩoivũ ne ãmeina teiyede, oatuvai vũ ne ðaiyepe. ⁹Yópe arĩ, “Majeñecu Abraham mácu meacu barejaquémavu. Jũmenijicu yóvarejaquémavu ã mácure. Que baru meara bajutamu maja Jũmenijicui jáinore. Aru ãi jorojĩquinore dupini buojarãjaramu maja”, arĩ dápiabejarã mujã. Jáve coyũyubu mujãre: Mujã oatuvabevũ baru, Jũmenijicui jorojĩquijãravu eaiyede dupini buojabenamu mujã. Jápiajarã. Jũmenijicu ucũ baru, buojaibi oatuvayũ iboã cũraboare Abraham mácuĩ pãramena márajivũre ðacũyu, ne ðarãjĩyepe ayũ yópe ãi urõpe. ¹⁰Yópe jiore memeipõecu ãi jáiyede jocũcua jẽidũa mearũa cũbecure ãi jioi, ãi jarũvajũroepẽ dicũãre toaboi, nopedeca Jũmenijicu jáñũ mujãre mearo ðabevũre, jarũvacũyũme mujãre toabo cũimẽboi.

¹¹Yu jáve mujãre jáðovai vũ Jũmenijicure ocoque, muje chĩori dápiaye boje muje ãmeina teiyede. Æbenita dacũyũme ji yóboi cũinãcu, ji pũeno parucũ. Æ macũyũme jáðovañũ mujãre Jũmenijicuque Espĩritu

Santoque, ãi cũquiyepe ayũ mujãque aru ãi cadatequiyepe ayũ mujãre máre. Aru ã macũyũme jáðovañũ mujãre Jũmenijicuque toaque máre, muje meara tenajiyepẽ ayũ yópe pøeva ne meadaiyepe tãure toaque, aru ãi ñãjine ðaquiyepe ayũ mujãre, meara tebedu. Que baru caivũ pũeno meacu bajube ã. Yũcapũravũ pare ãi cãchinocacũbu. Que baru ãre cadateni buojabevũ yũ. Pũ oarĩ buojabevũ yũ pũvacayũ ãre ãi curaidoare. ¹²Yópe oteiyẽ memeipõecu ãi veoyepe jaraboque, oteiyede epecũyũ ãi epeĩñami, aru oteiyẽ cajeãre juacũyũ, nopedeca Jũmenijicu ãre ju aivũre epecũyũme ãi jaboteinoi aru ãre ju abevũre jarũvacũyũme toabo cũimẽboi, arĩ buedejameða Juan Bautista.

Juan Bautista ãi jáðovaino Jesũre Jũmenijicuque

(Mt 12.18, 17.5; Mr 1.9-11; Lc 3.21-22, 9.35)

¹³Dinũmure Jesũs nurejameða, etacũyũ Galilea ãmicurijoborõre jocarĩ, pũ Juan Bautista yebaita, Jordán ãmicuriya jiai, ãi jáðovaquiyepe ayũ ãre Jũmenijicuque. ¹⁴Juan Bautistacapũravũ ãre jáðovai vũbedejameða. Que baru arejameða Jesũre:

—Yure javũ mi jáðovaino ocoi Jũmenijicuque, ji ãmeina teiyẽ boje. Mũrecabu meacu baju. Que baru mũre javbevũ ji jáðovaino ocoi Jũmenijicuque, arejameða Jesũre Juan Bautista.

¹⁵Æbenita Jesũcapũravũ arejameða: —Yópe Jũmenijicui ðaicõjeiyepẽ ðaiye javũvũ majare. Que baru mũre javũvũ mi jáðovaino yũre ocoi Jũmenijicuque, arejameða ãre Jesũs.

Que baru Juan Bautista jáðovarejameða Jesũre Jũmenijicuque no jiai. ¹⁶Æi jáðovariburu yójiõboi, maumena marejameða Jesũs jiare jocarĩ. Dinũmũmiareca vorĩ nurejavũya cavarõ mearo Jũmenijicui cũrõ. Aru Jũmenijicui Espĩritu jurecope êmeni tubacodaðore ãi pũenora járejameða Jesũs. ¹⁷Aru ina cũrivũ noi jápiarejaimaða apeno yãvainore, cavarõ

mearo Jūmenijicui curōque aiyede yópe: “Ñainecabe jímacu, jí umu. Me torojuvu yu úre”, arejamedá Jesúre Jūmenijicu.

**Abujuvai jabocu úi Jesúre
jūjovariđuino**

(Mr 1.12-13; Lc 4.1-13; He 2.18, 4.15)

4 ¹Dinumure ñai Espiritu Santo nuvarejamedá Jesúre pōecubenoí, ñai abujuvai jabocu úi jūjovariđuquiyepé ayu úre. ²Aru cuarenta paijāravua, cuarenta paiñamia yéde amenejamedá Jesús. Que baru no yóboi ávúé ijidejavūya úre. ³Ñai jūjovayu, Satanás āmicucu, earí, Jesús āuyaiyure coreóvarí, arejamedá úre:

—Jāveneca Jūmenijicui mácu baru, āiye dajacu iboá cūraboare, arejamedá.

⁴Ūbenita Jesús arejamedá ñai abujuvai jabocure:

—Mí aiyepé dabevu yu. Jūmenijicui yāvaiye úi toivaicōjeiye báque coyuvu yópe: “Pōeva cubenama ne āiye matuiyeda. Qué Nora curājarama caiye Jūmenijicui yāvaiyeque máre”, arejamedá Jesús.

⁵Que aríburu yóboi, ñai abujuvai jabocu nuvarejamedá Jesúre Jerusalén āmicuriímaroi. Úre muri nure darejamedá Jūmenijicui cūrami puenora.

⁶Aru arejamedá úre:

—Jāve Jūmenijicui mácu baru, turí nujacu yore jocarí, pu joborōita. Que baru Jūmenijicui yāvaiye úi toivaicōjeiye báque coyuvu mi borore yópe: “Jūmenijicu jarocuyume úi ángelevare, ne coreñaiyepé ayu nure. Jānuórajarama nure ne puruáque mi ijíe tebequiyepé aivu mi cubobare cūraboque”, arí toivarejaquemavu. Que baru mi turí nuru, yu jāñu buojacuyumu Jūmenijicu dayure yópe úi aiyé báquepedeca, arejamedá Jesúre ñai abujuvai jabocu.

⁷Aru Jesúcapūravu arejamedá úre:

—Mí aiyepé dabevu yu. Jūmenijicui yāvaiye úi toivaicōjeiye báque coyuvu yópe: “Jūjovabeyacu mi jabocu Jūmenijicure. Jāđovaicōjemejacu úi parúede”, arí toivarejaquemavu. Que

baru yéde dabevu yu, jāđovaicōjeyurocu úi parúede. Majivu yu parucure, arejamedá Jesús.

⁸Aru bediōva cojedeca ñai abujuvai jabocucapūravu nuvarejamedá Jesúre. Cūracū ūmujuricū puenoi jāđovarejamedá caiye ijāravucarōa ĩmaroare aru caiye die cūve méne máre. Aru arejamedá úre:

⁹—Caiye iye jabocubu yu. Que baru jíquijivu nure caiye iyede, mi ñuatutarí mearore jídu yure, arejamedá Jesúre ñai abujuvai jabocu.

¹⁰Dinumure Jesúcapūravu arejamedá úre:

—Mí aiyepé dabevu yu. Aru mu, Satanás, maumena nujacu mu yure jocarí. Jūmenijicui yāvaiye úi toivaicōjeiye báque coyuvu yópe: “Mearore jíjacu mi jabocu Jūmenijicure aru úre cūinácura memecajacu yópe úi urōpe”, arejamedá Jesús.

¹¹Que baru ñai abujuvai jabocu nurejamedá Jesúre jocarí. Aru ángeleva coreni cadatedejaimada úre.

Jesús Galileai úi bueni buino

(Mt 3.2, 14.3; Mr 1.14-15, 6.17;
Lc 3.19-20, 4.14-15; Jn 2.12)

¹²Dinumure Herodes āmicucu jabocu buicōjenejamedá Juan Bautistare. Die borore jápiayu bācu Jesús, nurejamedá Galilea āmicurijoborōi. ¹³Nazaret āmicuriímarore dajocarí, nuri apeno joborōi, Zabulón aru Neftalí āmicuriyajuboa pōeyajubocavu ne curijoborōi, nurejamedá Jesús. Capernaum āmicuriímaroi cūcūnurejamedá, macajitabu urabu écarui. ¹⁴Nópe vaidéjavūya cūináturu Jūmenijicu úi coyucōjeiye báquepedeca úi yāvaiyede coyucaipōecu bācure, Isafas āmicucure. Yópe arí, toivaicōjenejaquemavu ū mácure Jūmenijicu:

¹⁵Zabulón aru Neftalí āmicurijoborōai, Jordán āmicuriya apeduve, jia uradacapūravui, Galilea āmicurō, judiōva ānevú ne curōtamu.

¹⁶Ina pōeva ñeminoi dobarivu

bácavũ Ƴrarõ mearo miadãrore jáđama. Ina põeva bõtainope painoi dobarivũ bõcavũre, ne õme yaijuroede, miadãe tuivũ náre, arejaquemavũ Jũmenijicũ yãvaiyede coyucaipõecu bõcũ.

Nõpe ãi coyũiyede, yõpe aiyũrejaquemavũ: Ina judõova ãnevũ Jũmenijicũ yãvaiyede jávene majibedejaquemavũ aru járavũ cũiméjãravũ baquinõre cõvabedejaquemavũ Cristoi daquiye jipocai.

¹⁷Dinumumiata bueni bãrejamedã Jesús. Yõpe arĩ, coyũre curejamedã: —Chĩori dápiarĩ mũje ãmeina teiyede, oatũvajarã mũje ðaiyede. Mũje nõpe ðaiyede, maumena mũjare jabotecũyũme Jũmenijicũ, are nũrejamedã Jesús.

Jesús ãi “Dajarã” aino yõvaicũvaivũ moa boaipõevare

(Mt 9.35; Mr 1.16-20, 39; Lc 5.1-11)

¹⁸Que teniburu yõboi, Jesús cuyũ macajitabũ Ƴrabũ Galilea ãmicurijitabũ ěcarũ, járejamedã pũcarã ãmũvare, Simõre aru Andrés ãmacũmaquevũre. Moa boarĩ bojedãipõeva marejãimada na. Que baru ðuvaivũ barejãimada ne pápicũ Ƴracũre dibũ macajitabũ. ¹⁹Ne que teiyede, Jesús arejamedã náre:

—Dajarã yũque. Epequijivũ mũjare, mũje davarãjiyepe põevare ji yebai, yõpe mũje moare davaiyepe pápicũque, ji meadaquiyepe náre, arejamedã Jesús.

²⁰Que ayũre jápiarĩ, ðajocarejaimada ne pápicũare, nũrajivũ Jesúque. ²¹Aru cuyũ cãreja, jipocai járejamedã apevũ pũcarã ãmũvare, Zebedeoi mårare, Santiago aru ãmacũ Juan. ãmarejaimada népãcũque ne jiãdocũi, meadaivũ ne pápicũare. Jãrina, cuturejamedã náre. ²²Quénora cũinã ðajocarejaimada ðicũre aru népãcũre mãre, nũrajivũ Jesúque.

Jesús ãi bueino obedivũ põevare
(Lc 6.17-19)

²³Jesús bueyũ barejãme Jũmenijicũ yãvaiyede caino Galilea

ãmicurijoborõi judõovai cõjijiñamiai. Coyũyũ barejãme iye yãvaiye méne Jũmenijicũ jaboteiyede põevare. Aru meadayũ barejãme põevare caiye ðuica ijie coapa aru caino ijignore mãre. ²⁴Que baru caivũ põeva Siria ãmicurijoborõcavũ jápiarejaquemavũ Jesũi borore. Aru obedivũ põeva névũ ijimarare meadarãnũvarejaima Jesũ yebai. Ina ðuica ijie ðe cũvarivũre, ijie ðe ñãjivũre, ijignore cũrivũre, abujuva ãmamarare, bidivũre aburi ne jijecãmure etaiyeque, aru nacajaiye majibevũre mãre meadarejame Jesũ. ²⁵Aru obedivũ põeva nũrejaima ãi yõboi, Galilea ãmicurijoborõcavũ, Decãpolis ãmicurõcavũ, Jerusalén ãmicurĩmarocavũ, Judea ãmicurijoborõcavũ, aru Jordãn ãmicurija jia apedũvecavũ mãre.

Jesús ãi bueino obedivũ põevare cũracũi

(Lc 6.20-23; Hch 7.52; 1 P 3.14, 4.14)

5 ¹Jesús jáñũ ina obedivũ põevare, mũri nũrejamedã cũracũi. Noi ãi dobacũnũiyede, buecũyũ ãi bueimarare, ina põeva nũrejaimada ãi yebai. ²Nãre yõpe arĩ bueni bãrejamedã Jesús, ne majinajiyeye ayũ aipe ãrojarivũre ina põevare, Jũmenijicũ jaboteimara mãrajivũre. Yõpe arejamedã:

³—Torojũrãjarama ina cõmaje ãrojarivũ ne õmei, ne coreõvaiye boje ne baju ãmeina teivũ. Jũmenijicũ ãi cadatebedu náre, buojabema ðaivũ meare. Nárecabu Jũmenijicũ jaboteimara. ⁴Torojũrãjarama ina chõioivũ ne baju ãmeina teiye boje, aru ijãravũcavũ ne ãmeina ðaiye boje mãre. Nárecabu Jũmenijicũ torojure ðaquimara. ⁵Torojũrãjarama ina “¿Meara mãrica ñũja?” abevũ, ne coreõvaiye boje Jũmenijicũ jiyũre caiye náre jauéde, ne cũvarãjiyepe ayũ méne, aru ne ðarãjiyepe ayũ mearore. Mamajãravũ edaquijãravũ baquinõre, nárecabu Jũmenijicũ mearore jícaquimara. ⁶Torojũrãjarama ina teiyurivũ boropatebevũpe Jũmenijicũ

jáinore, yópe áuyaiñv ne áiyuere aru náre cüñóiyede ne úciyuere. Nárecabu Jümenijicui boropatebende ñaquimara. ⁷Torojurájarama ina cõmaje ároje jáivv arevure, ne coreóvayie boje Jümenijicui náre cõmaje ároje jámenu, na máre ñájijmrorivure ne ámeina teiye boje. Nárecabu Jümenijicui cõmaje ároje jáquimara. ⁸Torojurájarama ina pucañmea cñbevñ, ne ñaiyue boje caiyede yópe Jümenijicui urõpe, ne baju urõpe ñaiyubevñva. Nárecabu Jümenijicure járajivñ. ⁹Torojurájarama ina cãrijimene ñaiyv arevure, ne baju cãrijimevñva cue boje Jümenijicucñque. Nárecabu Jümenijicui “Jímaramu”, ñi aquimara. ¹⁰Torojurájarama ina põeva arevñ ne ñájine ñaimara, ne ñaiye boje mearore yópe Jümenijicui urõpe ñajocabevñva. Nárecabu Jümenijicui jaboteimara. ¹¹Torojurájaramu mñja põeva Jümenijicure ju abevñ ne jaraiyede mñjare, ne ñájine ñaiyede mñjare, aru ne borocñí ámeina coyuiyede mñjara máre, mñje yóvayie boje yure. ¹²Me torojurájaramu mñja. Que teni boje urarõre cñvarájaramu mñja cavarõ mearo Jümenijicui cñrõi. Nopedeca ina javecavñ bñcavñ, Jümenijicure ju abevñ bñcavñ máre, ñájine ñarejaquemavñ ina Jümenijicui yávaiyede coyucñpõeva mñcavñre, mñje jipocavñ bñcavñre, arejameña Jesús.

“Yuquirare” aru “põibure” jári dápiaiñ ne ñaräjijeye aino
(*Mr 4.21, 9.50; Lc 8.16, 11.33, 14.34-35; Jn 8.12, 9.5; 1 P 2.12*)

¹³Bedióva Jesús, yópe arí, buedejameña náre:

—Mñjarecabu yópe yuquirape paivñ ijáravñi. Meañavñbu maje áiyede yuquiraque. Nopedeca mñja meara ñavñbu põevare. Yuquira maje áiyede meañavñ. Ñbenita yuquira ejué bñjaru, áiyede meañarí buojabevñ. Quédata põeva jarvñvadama diede mára, ñimai cuivñ ne cñraräjijeye aivñ diena.

¹⁴Mñjarecabu yópe miadãrope paivñ ijáravñi. Cüñáro imaro cñracñ pñeno

cñrõ maru, ye yaveni buojaino ámevñ. Que baru caivñ põeva járajarama ñiimarore. ¹⁵Põecñ pñõibure pñõiriburu yóboi, ñõmemi ñibure pñebñ cñchinoi. Quénora ñõimi ñibure jocñve pñenora. Que baru caivñ ñiñami cñrami cñrivñ járajarama me. ¹⁶Nopedecabu mñje cue põeva ne jáinore. Ména cñjará mñja ijáravñi, yócvñ ne járajijeye aivñ mñje mearore ñaiyede. Diede jári, coreóvarájarama aipe árojacñre majepacu cavarõ mearocacñre. Aru “Meacñbu mñ”, arájarama ñre, arejameña Jesús.

Jesús ñi bueino Jümenijicui jaboteiyede aru ñi ñaicõjeyede
(*Lc 16.17*)

¹⁷Cojedeca Jesús, yópe arí, buedejameña náre:

—“Jarvñvacñdayñbe”, arí ñapiabejará yñre iye ñaicõjeyede Jümenijicui coyñiye bñquede Moisés bñcñre, aru ina Jümenijicui yávaiyede coyucñpõeva mñcavñ ne coyñiye bñquede máre. Diede jarvñvacñdabevñ yñ. Quénora mñjare jáñovacñdayñbu aipe aiyñrõre, aru aipe ñaiye jañrõre caiye diede jañbevñva.

¹⁸Que baru jáve coyñyñbu mñjare: Cüññájavñv yo cavarõ aru yo joborõ máre cñiquiyebu. Ñbenita caiye iye Jümenijicui yávayie, ñi toivaicõjeyie bñque, ye cñiméquiye. Quénora caiye vaiquiyebu yópe Jümenijicui toivaicõjeyie bñquepedeca ñi yávaiyede. ¹⁹Caiye iye Jümenijicui yávayie, ñi toivaicõjeyie bñque, jañvñ majare. Que baru caivñ põevare ju are ñaiye jañvñ caiye diede.

Ñbenina yávabecñbe Jümenijicui. Ácñ pñecñ aipeñe ñi yávaiyede ju abede ñabecñ baru, aru arevñre máre bueyñ baru ne ju abede ñabenajijeye ayñ, ñrecabe jaboteimñ ámeçñyñ cavarõ mearo Jümenijicui cñrõi. Ñbenita ácñ pñecñ caiye Jümenijicui yávaiyede ju are ñayñ baru, aru arevñre máre bueyñ baru ne ju are ñaräjijeye ayñ, ñrecabe Jümenijicui jaboteimñ me pueñaimñ macñyñ cavarõ mearo Jümenijicui cñrõi.

²⁰Que baru coynuybu mujare: Mearore ðaiye jauvu mujare ina Jūmenijicui yáviaye báquede bueipōeva pūeno aru ina fariseova pūeno máre. Ne pūeno Jūmenijicui urōpe ðarí, mearore ðabevu baru muja, ye Jūmenijicui jaboteimara āmenajaramu muja, aru cavarō mearo ūi curōi cubenajaramu muja, arejameða Jesús.

Jesús ūi bueino pōeva ne jaraiyede
(Lc 12.57-59)

²¹Yōpe arí, buedejameða Jesús:

—Jápiadavū muja ina javecavu jápiaivu bācavure iye coynuiye báquede yōpe arí: “Pōevare boarí jaruvabejarā muja. Ácu pōescu apescure boarí jaruvayū baru, ūrecabe nājicuyū”, arejaquemavū. ²²Ūbenita yúcarpūravū coynuybu mujare yōpe: Ácu pōescu jarayū baru apescure, ūrecabe nājicuyū. Ácu pōescu “Ārumecūbu mu” ayū baru apescure, ūrecabe nājicuyū. Aru ácu pōescu “Jūmenijicure coreóvabecubu mu” ayū baru apescure, ūrecabe nājicuyū toabo cūiméboi. Pōeva nópe āmeina yávaivu apescure āmeina ðavūbu, yōpe ne boarí jaruvajuroepe ūre.

²³⁻²⁴Que baru mu nūvañū maru mi Jūmenijicure jácaquiyede ūi cūrami, aru nore earí, dápiayū baru apescu chíōñure mi āmeina ðaiye boje ūre, epeni ðajocajacu mi Jūmenijicure jácaquiyede iva ūre jácaiyede juaiva jipocai. Nūjacu ñai mi āmeina teimū yebai, jēniacuyū ūi ārumetequiyere ayū iye mi āmeina teiye báquede ūre corū. Mi cārijimene ðaríburu yóboi ūque, copainuri Jūmenijicui cūrami, mi jácaquiyede jíjacu ūre.

²⁵Apescu ūi āmecororu mure, aru ūi nūvaiyuru mure jabova ne āmeina teivure jēniari jáiñami, maumena “Meadarājarevū” ajacu ūre, ūi nūvamequiyere ayū mure jabova ne āmeina teivure jēniari jáipōescure, aru ūi jēni jíbequiyere ayū mure churaravare, aru ne jaruvabenajiyere aivu mure āmeina teivure jēni jacoñami jívūi.

²⁶Jāve coynuybu mure: Ne buoru

mure āmeina teivure jēni jacoñami, etabescuyumu mu caiye iye mi bojecūbe ðaiyede bojeðayuta, arejameða náre Jesús.

Jesús ūi bueino pōeva ne āmeina ðaiyede apevū nēmarebucūvaque
(Mt 18.8-9; Mr 9.43, 47)

²⁷Bediόva Jesús buedejameða, yōpe arí:

—Jápiadavū muja ina javecavu jápiaivu bācavure iye coynuiye báquede yōpe arí: “Āmeina ðabejarā muja apevū nēmarebucūvaque”, arejaquemavū.

²⁸Ūbenita yúcarpūravū coynuybu mujare yōpe: Ácu pōescu jáñū maru nomióre, jēiyurí dápiayū baru óre, ūrecabe āmeina ðayū óque ūi que dápiayē boje.

²⁹Que baru mu āmeina teyū baru mi jáiyede yacorū mearpūravucarūque, ĩni jaruvajacu didure. Meaquiyebu bíjaru mure cūinárū yacorū, Jūmenijicui jaruvabequiyere ayū mi baju caibajure toabo cūiméboi. ³⁰Aru mu āmeina teyū baru mi ðaiyede pūru mearpūravucarūque, burarí jaruvajacu dípūrūre. Meaquiyebu bíjaru mure cūinápuru, Jūmenijicui jaruvabequiyere ayū mi baju caibajure toabo cūiméboi, arejameða náre Jesús.

Jesús ūi bueino nomi jaruvainore
(Mt 19.7, 9; Mr 10.4, 11-12;
Lc 16.18; 1 Co 7.10-11)

³¹Bediόva Jesús buedejameða, yōpe arí:

—Jápiadavū muja ina javecavu jápiaivu bācavure iye coynuiye báquede yōpe arí: “Ácu pōescu jaruvayū baru jímarepacore, óre jíjacurí cūináyoca ‘Mure jaruvayūbu yū’ aiyocare”, arejaquemavū. ³²Ūbenita yúcarpūravū coynuybu mujare yōpe: Ácu pōescu jaruvayū baru jímarepacore āmeina ðabecoreca apescuque, ūrecabe āmeina ðare ðacuyū óre, ūi jaruvaríburu yóboi cūco baru apescuque. Aru ácu pōescu pūrubūoyū apescu ūi jaruvaimo mácoque, ūrecabe āmeina ðayū óque ōi mamarūmūcacūre jaruvarí, arejameða Jesús.

Nópe ayu, “Nomi jaruvainore ubevu yu”, aiycu barejaquemavu Jesús.

Jesús ñi bueino pöeva “Jäve ðacuyumu” ne aiyede
(Mt 23.22; Stg 5.12)

³³Yópe arí, buedejameda Jesús:
—Jápiadavü muja ina javecavu jápiaivu bácvure iye coyuiye báquede yópe arí: “Borocurí, ‘Jäve ðacuyumu yu ji coyuiyepé’, abejará muja. Quénora ðacajará Jümenijicure caiyede yópe muje coyuiye báquedeca úre”, arejaquemavu. ³⁴Ûbenita yúcapüravu coyuyubu mujare yópe: Muje yávaiyede ye jëniamejara apecure, ñi jáðovaquiyepé aivu muje coyuiye jávene. Cavarõ mearotamu Jümenijicui dobarõ mearo curõ. Que baru jëniamejara cavarõ mearocacure, ñi jáðovaquiyepé aivu muje coyuiye jávene. ³⁵Ijáravutamu yópe Jümenijicui cuboba tuoinope, ñi cuedaiye báque boje ijárvure aru ñi purucvae boje caiyede. Que baru jëniamejara ijárvucacure, ñi jáðovaquiyepé aivu muje coyuiye jávene. Jerusalén ámicurímarotamu Jümenijicu, ñai jabocu parucu baju, ñi imaro. Que baru jëniamejara Jerusalécacure, ñi jáðovaquiyepé aivu muje coyuiye jávene. ³⁶Muja oarí ðabevu cüináme muje poðamene boede aru ñemiéne máre. Jümenijicu cüinárecabe oarí ðayu diede. Que baru jáðovamejara muje coyuiye jávene mi jipobuque. ³⁷Que baru muje yávaiyede ju ajará aru bi ajará quénora. Aprejéne coyüivu baru, ámeina ðajebu. Ina borocurí yávaiyure jëniaiye javu apecure, ñi jáðovariduyepé aivu ne coyuiye jávene. Ûbenita muja jávene yávaiyure jaubevu diede, arejameda Jesús.

Jesús ñi bueino pöeva ne ñájine ðaiyuede ne mauvare
(Lc 8.29-30)

³⁸Bedióva yópe arí, buedejameda Jesús:
—Jápiadavü muja ina javecavu jápiaivu bácvure iye coyuiye báquede

yópe arí: “Ácu pöecu ñi ámedaru apescu yacorure, ñi yacorure máre ámedajará muja. Aru ácu pöecu ñi ámedaru apescu cõpiyore, ñi cõpiyore máre ámedajará muja”, arejaquemavu. ³⁹Ûbenita yúcapüravu coyuyubu mujare yópe: Maucuvabejará ina mujare ámedaivure. Quénora cüinácu pöecu ñi pëvaru muje meapüravucaviobure, copedini pëvaicõjeyara muje cãcopüravucaviobure máre. ⁴⁰Aru cüinácu pöecu ñi nuvaicõjenu mujare jabova ne ámeina teivure jëniari jáñiami, aru ñi ámecororu mujare, jabocu ñi jícõjequiyepé ayu mujare muje camisare ñai pöecure, ñi nuvaicõjequiyepé jipocai, úre jjárá dicajede aru muje puenocacajede máre. ⁴¹Cüinácu churara ñi nuvaicõjenu mujare ñi cavede cüinákilometro, yópe Romacavu ne jabova ne cõjeinope, nuvacajará diede pucakilometros, diede ðaiyubevuvacari. ⁴²Ñai mujare jëniañure jjárá ñi jëniaiyede, bojedabecureca mujare. Aru ñai mujenore “Jjárá cãreja” ñi aru, ju arí jjárá mujare ñi jëniaiyede máre, jacopaiyovabecureca mujare muje jíye báquede úre, arejameda Jesús.

Jesús ñi bueino maje urõre maje mauvare
(Lc 6.27-28, 32-36)

⁴³Jesús buedejameda cojedeca:
—Jápiadavü muja ina javecavu jápiaivu bácvure iye coyuiye báquede yópe arí: “Ûjará mujevure aru ubejará muje mauvare”, arejaquemavu. ⁴⁴Ûbenita yúcapüravu coyuyubu mujare yópe: Ûjará muje mauvare. Ina mujare ñájine ðaivure jëniacajará Jümenijicuque, ñi mearo ðacaquiyepé aivu náre. ⁴⁵Que ðaivu baru, majepacu cavarõ mearocacu ñi mára marajáramu muja. Úpe paivu barajáramu muja, muje mearõ ðaiyede mearare aru ámenare máre. Úrecabe aviáre bóre ðayu ina mearare aru ina ámenare máre, aru ocare ðayu ina boropatebevure aru ina boropateivure máre. ⁴⁶Muja, Jümenijicui pöeva, muje aru náre ina urivure mujare, Jümenijicu

ye bojedabecuyume ména pōevare ne que ðaiyede. Ina máre, jabovare tātura ícaipōeva, ámeina ðaivuvacari, nópe ðaðama. ⁴⁷ Mũja, Jūmenijicui pōeva, jacoyuivũ baru mũjevũ quévũra, mearore ðabevũ mũja. Ina máre, judíova ámevũ, ámeina ðaivuvacari, nópe ðaðama. ⁴⁸ Que baru mũjacapūravũ, cōmaje āroje jári, mearore ðajarā arevũre jaubevũva, yópe majepacũ cavarō mearocacũ ũi ðaiyepe, arejameða Jesús.

Jesús ũi bueino aipe ðaiye jaurōre pōevare, ne cadatenajiyeye cōmaje ārojarivũre aino
(Mt 23.5)

6 ¹ Bedíova cojedeca Jesús, yópe arí, buedejameða:
—Me jájara mũja mũje ðaiyede mearore, cadatenajivũ ina cōmaje ārojarivũre. Náre cadatedu, jáicōjenajivũ arevũre mũje ðaiyede mearore. meamejebu. Nópe ðaru, majepacũ cavarō mearocacũ ye bojedabecuyume mũjare.
² Que baru cainũmũa mũje jícaiyede cadatenajivũ ina cōmaje ārojarivũre, jíbejarā caivũ ne jáinoi, yópe ina mũjovaivũ ne jíyepe. Nácapūravũ jíyaima maje cójijiñamiai aru mái máre, jáicōjenajivũ arevũre, ne mearo yávarājiyepe aivũ nára. Jáve soyũyũbu mũjare: Nácapūravũ javede cuvama ne boje caiyede. Arevũ pōeva ne mearore jíye náre, diebu ne boje matuiye. Majepacũ cavarō mearocacũ ye bojedabecuyume náre.
³ Ũbenita mũjacapūravũ, mũje jícaiyede cadatenajivũ ina cōmaje ārojarivũre, ñamene soyũbejarā mũje ðaiyede.
⁴ Quénora cainũmũa jíjarā yavenina, arevũ ne coreóvabenajiyeye aivũ. Nópe ðaru, majepacũ cavarō mearocacũ, ñai jáñũ mũje ðaiyede yavenina, bojedacuyume mũjare ména, arejameða Jesús.

Jesús ũi bueino aipe ðaiye jaurōre pōevare, ne jēniarajiyeye Jūmenijicũque aino
(Mr 11.25-26; Lc 11.2-4, 18.10-14)

⁵ Yópe arí, buedejameða Jesús:

—Cainũmũa mũje jēniaiyede majepacũ Jūmenijicũque, ðabejarā yópe ina mũjovaivũ ne ðaiyepe. Nácapūravũ jēniadaima Jūmenijicũque, núrivũ maje cójijiñamiai aru tãibũai máre, jáicōjenajivũ arevũre, ne ména yávarājiyepe aivũ nára. Jáve soyũyũbu mũjare: Nácapūravũ javede cuvama ne boje caiyede. Arevũ pōeva ne mearore jíye náre, diebu ne boje matuiye. Majepacũ cavarō mearocacũ ye bojedabecuyume náre. ⁶ Ũbenita mũjacapūravũ, mũje jēniaiyede Jūmenijicũque, ecorí mũje cāramiai, jedevacobede bieniburu, arevũ ne jámenoi, jēniajara majepacũque mũja coapa. Nópe ðaru, majepacũ cavarō mearocacũ, ñai jáñũ mũje ðaiyede yavenina, bojedacuyume mũjare ména.

⁷ Mũje jēniaiyede majepacũ Jūmenijicũque, cúpecare numejara cūináromia borore mũje soyũiyede. Nópe ðaðama ina judíova ámevũ, Jūmenijicure coreóvabevũ, “Ũrarō ñũje soyũru Jūmenijicure, jápiaquijichubi ñũjare”, ne ũbenina arí dápiaiye boje. ⁸ Ne ðaiyepe ðabejarā mũja. Mũje jēniarajiyeye jípocai javeta coreóvaibi majepacũ cavarō mearocacũ aipe jaurōre mũjare. ⁹ Que baru yópe arí, jēniajara majepacũ Jūmenijicũque:

Mũ, ñũjepacũ, cavarō mearocacũ, meacũ bajubu mũ. Que baru caivũ pōeva mũre pueðarí mearore jíjarāri. ¹⁰ Búre ðajacũ mũ mi jabotequiyede pōevare. Caivũ ijāravũcavũ ðajarāri mearore yópe mi urōpe, yópe ina cavarō mearocavũ ne ðaiyepe mi urōpe cainũmũa. ¹¹ Jíjacũ ñũjare jāravũa coapa ñũje áiyeva. ¹² Aru ārumetejacũ ñũje ámeina teiyede, yópe ñũja máre ñũje ārumeteiyeye caiye arevũ ne ámeina ðaiyede ñũjaque. ¹³ Ñai abujuvai jabocũ ũi mũjovajuroede ñũjare vainí tuicōjemejacũ ñũjare, ñũje ðabenajiyeye ámenore. Quénora ñũjare ámeðare ðaicōjemejacũ ñai abujuvai

jabocure, arejameđa Jesús, náre
bueyu Jümenijicuque jëniayede.

¹⁴Aru yópe arí, coyure nurejameđa
Jesús:

—Mujacapuravui árumetedu pöevare ne
ámeina teiye báquede mujare, majepacu
cavarō mearocasucapuravui máre
árumetecuyume muje ámeina teiyede.

¹⁵Ûbenita mujacapuravui árumetebedu
pöevare ne ámeina teiye báquede mujare,
majepacu cavarō mearocasucapuravui
máre árumetebecube muje ámeina
teiyede, arejameđa Jesús.

**Jesús üi bueino aipe ðaiye jauröre
pöevare ámevva áiyede ne
jëniarajiyepa Jümenijicuque aino**

¹⁶Yópe arí, buedejameđa Jesús:

—Muje ámene áiyede jëniarajivui
Jümenijicuque, chiore cubejarā pöeva
ne jáinore, ne coreóvarājiyepa aivui muja
ámevure áiyede, muje jëniarajiyepa
aivui Jümenijicuque. Nópe ðaðama
ina jajovaiyu. Nácapuravui chiore
cuyama, jáicöjenajivui apévure ne
ména yávarājiyepa aivui nára, ne áiyede
áme boje. Jáve coyuyubu mujare:
Nácapuravui javede cuvama ne boje
caiyede. Apevu pöeva ne mearore jíye
náre, diebu ne boje matuiye. Majepacu
cavarō mearocacu ye bojedabecuyume
náre. ¹⁷Ûbenita mujacapuravui, muje
áiyede ámene jëniarajivui Jümenijicuque,
chiore cubejarā. Quéhora vaivéni muje
poðare, cüitútujara muje jivare. ¹⁸Muje
nópe ðaru, apévui pöeva coreóvabenama
muja ámevure áiyede. Quéhora
majepacu cavarō mearocacu cünácura
coreóvacuyume muja ámevure áiyede.
Aru ñai jáñu muje ðaiyede yavenina,
bojedacuyume mujare ména, arejameđa
Jesús.

**Jesús üi bueino maje cuvarájiyede
mearo bajure cavarō mearoita**
(Lc 12.33-34; Stg 5.2-3)

¹⁹Cojedeca yópe arí, buedejameđa
Jesús:

—Vobejarā muja urarō muje cuvae
méne ijáravui. Diede bocomiva áinomui,

cura etainomu, aru ñavacurivui ecorí
ñavainomu. ²⁰Ûbenita vojarā muja
urarō muje cuvae méne cavarō mearo
Jümenijicui curöi, bocomiva ne ámenoi,
cura etabenoi, aru ñavacurivui ne ímenoi
máre. ²¹Que baru muje cuvae curöre
dápiarājaramu muje úmeque máre,
arejameđa Jesús.

**Jesús üi bueino pöeva ne ðainore ne
dápiainope**
(Lc 11.34-36)

²²Cojedeca Jesús buedejameđa náre,
úque curivure:

—Pöeva ne yacorua, pëoinope, járe
ðaiyu náre, ne memenajiyepa aino aru
ne majinajiyepa aino ári ne nuiyede.
Pöeva ne yacorua ijetedu náre, ye
ne memeyede aru ne nuiyede máre
majibenama. Aru pöeva ne úme,
yacoruape paino, pëore ðaiyu ne
dápiayede. ²³Que teni pöecu cainumua
dápiayu baru ijáravuquede, ijetede ðaibi
üi úmene, üi dápiabe boje cavarō mearo
Jümenijicui curöquede. Aru ñai pöecu
üi úme bíjacuyume. Que baru pöeva
ne jámenu ne yacoruaque ámenotamu.
Ûbenita püeno ámenotamu ne úme
ñemino maru, arí buedejameđa Jesús.

**Jesús üi bueino táuturare uröre aru
ubenore Jümenijicure**
(Lc 16.13)

²⁴Yópe arí, buedejameđa Jesús
cojedeca:

—Jümenijicure aru táuturare máre
árumejara muja. Cünácui pöecu
Jümenijicure árucu baru, pare árumemi
táuturare. Aru táuturare pare árucu
baru, árumemi Jümenijicure. Que baru
ñai táuturare ucui baru, Jümenijicure
ubecuyume, arejameđa Jesús.

**Jesús üi bueino Jümenijicui coreiyede
üi pöevare**
(Lc 12.22-31; 1 P 5.7)

²⁵Bedióva yópe arí, buedejameđa
Jesús:

—Que baru coyuyubu mujare: Muja
árurivui baru Jümenijicure, cárijimejara

muja apurivü muje ārājijede, muje ūcurājijede máre. Aru cārījimejara muja muje bajure, muje dorājijede máre. Jūmenijicui apure daiye boje mujare, jāve muje āiyede máre cūvare đacuyume. Aru ūi cue daiye boje muje bajuáre, jāve muje doiyede máre cūvare đacuyume. ²⁶Jārjide apa muja ina mǫjinaré. Majepacu cavarō mearocacu jíbi náre ne āiyeva, na otebevureca, aru oteiyede imevureca, aru diede máre epebevureca oteiyede epeiñama jívui. Aru caivu mǫjina obedivü püeno bojecurivutamu muja, Jūmenijicui püeno ūe boje mujare. Que baru mujare jauéde jícyume ū. ²⁷Aru mujacacu cārījijū maru, cūináora cūre đarí majibebi ūi cuede ijāravui. Que baru cārījijē meamevü mujare. ²⁸Que baru, ¿aipe teni cārījivurū muja muje dorājijede? Jārjide apa muja iye cōvure, đacarōre. Die bucuiyavū, mememevacari, aru ne cuitótcajeare máre naremevacari. ²⁹Ūbenita coyuyubu mujare: Iye cōvua métamu, caiye icajea ñai jabocu bācu Salomón mácu cuitótcajea bojecuricajea püeno. ³⁰¡Muja pare quíjino ju aivubu Jūmenijicure! Jūmenijicu nópe mearo đaibi iye cōriáre, caride dái cuede aru javenare pōeva ne juarājijede. Nopedeca Jūmenijicu jícyume mujare muje cuitótcajea meacajeare caiye iye cōvua püeno. ³¹Que baru cārījimejara muja yéde muje ārājijede, muje ūcurājijede, aru muje dorājijede máre. ³²Ina judíova āmevü, Jūmenijicure ju abevü, cārījini vođama caiye iyede, ne ārājijede, ne ūcurājijede, aru ne dorājijede máre. Aru majepacu cavarō mearocacu majibi caiye iye mujare jauéde. ³³Ūbenita vojarā muja iye Jūmenijicui jaboteinoquede, muje daiyue boje mearore yópe ūi đaicōjeiyere. Aru Jūmenijicu jícyume muje ārājijede, muje ūcurājijede, aru cuitótcajeare máre. ³⁴Que baru cārījimejara iye vaiquiyede mujare javenare. Caijāravua coapa pōeva ñájijñama āmenore. Que baru đápijarā carí jāravuque āmenore, apejāravu edaquijāravuque āmenore

đápiabevüva, arí buedejameđa náre Jesús.

**Jesús ūi pōevare apevure
āmeoroicōjemeno**
(Mr 4.24; Lc 6.37-38, 41-42)

7 ¹Jesús, yópe arí, buedejameđa náre cojedeca:
—“Āmenatamu” arí, āmeorobejarā muja apevure. Muje nópe aru, majepacu Jūmenijicu āmeororí, “Āmenatamu muja” acuyume mujare. ²Yópe muje āmeoroiyere apevure, nopedeca mujare āmeorocuyume Jūmenijicu. Nópe muje apevure jíyepedeca, jícyume mujare Jūmenijicu. ³Ūrarō āmeina teino muje cūvaru, āmeoroiyere jaubevü apevü quíjino āmeina teivure. Nópe daiye yópe bájebu: Me jáivubu muja mujecu ūi docujē cūrōre ūi yacorui. Ūbenita jámevü muja muje ūrarō docucūrōre muje yacorui. ⁴Aru jámevüvacari muja ūrarō docucūrōre muje yacorui, mujecure “¿Mi docujēne inaji mi cūvaede mi yacorui?” arí buojabevü muja. ⁵¡Jūjovavutamu muja! Mamarumu ijara muja muje ūrarō docucūrōre muje yacorure. No yóboi mearo jáivuta, ijara mujecu ūi docujēne ūi cūvaede ūi yacorui. ⁶Jūmenijicui yávaiye püeno me bajure coyubejarā ina pōeva āmenare, diede jápiarí eabevure. Nópe đaru, yópe pōeva ne jíjūroepebu jiaruare yavimivare. Jiarua méne aru āmene máre coreóvabeni, copedini cūñaima náre jívure. Nopedeca ina pōeva āmena, Jūmenijicui yávaiyede jápiayubevü, āmedarājarama mujare diede coyuridivure náre. Aru ji yávaiye méne, püeno bojecuede pōevare ne ūmei, buebejarā ina pōeva āmenare, diede jápiarí eabevure. Nópe đaru, yópe pōeva ne đuvajūroepebu cūrajiboa bojecurijiboa perla āmicurijiboare vāriva ne jipocai. Nijiboare coreóvabeni, curadaima nijiboare jobo jívui. Nopedeca ina pōeva āmena, ji yávaiye méne jápiayubevü, āmedarājarama mujare diede buenidivure náre, arí buedejameđa Jesús.

**Jesús ùi bueino aipe jèniaiye jaurõre
Jūmenijicūque aru aipe ðaiye jaurõre
apevure**

(Lc 6.31, 11.9-13; Jn 14.13-14, 15.7,
16.23-24; 1 Jn 3.21-22, 5.14-15)

⁷Jesús coyurejameða náre yópe:

—Jèniare nūjara Jūmenijicūque, aru jícuyume mūje jèniainore úque. Vore nūjara úre, aru earājaramu. Mūje órejare nūiyede jedevacobei, Jūmenijicu voacacuyume mūjare. ⁸Que baru caivu jèniaivu Jūmenijicūque cavama ne jèniainore. Caivu voivu eadama ne voimure. Aru caivu órejauvure jedevacobei voaibi náre Jūmenijicu, arí buedejameða Jesús.

⁹Aru cojedeca Jesús, yópe arí, buedejameða náre:

—¿Mūja juedocuarivu, mūjemacu úi jèniaru mūjare páubore, jíje bárica mūja úre cūrabore? ¹⁰¿Aru mūjemacu úi jèniaru mūjare moacure, jíje bárica mūja úre áðare? ¡Que ámevu! ¹¹Que baru mūja ámena méne cavaede jíni majiépedeca mūjemarare, majepacu cavarõ mearocacu pueno méne cavaede jíni majibi mūja jèniaivu úre.

¹²Que baru ðajarā ajevure yópe mūje ñepe ðaivu mūjaque me. Nopedeca ðaicójenejaquemavu Jūmenijicu pòevare úi coyūiye báquede úi yávaiyede Moisés bácare aru ina Jūmenijicu yávaiyede coyūcaipòeva mácavure máre, arejameða Jesús.

**Jesús ùi bueino jedevacobe
quíjicobede
(Lc 13.24)**

¹³Yópe arí, náre buede nūrejameða Jesús:

—Ecojarā Jūmenijicu jaboteinoi, yópe mūje ecoiyepede jedevacobe quíjicobei. Yópe jedevacobe uracobepe aru urama maiyójabe ne cuimape, obedivu pòeva nūivubu, ne bíjarājiyede toabo cūiméboi. ¹⁴Ubenita yópe jedevacobe quíjicobepe aru quíjima maiyójae ne cuima, obebejina nūivubu, ne meadarājiyede cavarõ mearo Jūmenijicu curõi, arejameða Jesús.

**Jesús ùi bueino maje majinore
jocūca jèidūare**

(Mt 3.10, 12.33; Lc 3.9, 6.43-44)

¹⁵Cojedeca Jesús buedejameða náre, ne majinajiyepede ayu aipe árojarivure bueipòevare:

—Me jájara ina Jūmenijicu yávaiyede coyūcaipòevape teivu, ùbenina ne buenajiyepede aivu borocuede. Námu yópe áimara jíjecurivu lobova ámicurivure paivu. Ovejavape teni ina lobova ecodama ne yebai, boarājivu náre. Nopedeca ina borocuede bueivu, Jūmenijicure ju aivure yávaðama, ecorājivu mūje yebai. Ubenita ámeðaiyurivubu mūjare mūje úmei.

¹⁶Náre coreóvarājaramu mūja ne ðaiyeque, yópe maje coreóvayepede jocūcare ðicu jèidūaque. Miuñna jèmevu úyaiboare. Nopedeca jèmevu higo ámicuridua miuñnare. ¹⁷Jocūcu meacu cūvavu jèidua mearuare. Ubenita jocūcu ámeacu, ámeðare cūvavu. ¹⁸Jocūcu meacu cubevu jèiye ámene jícu. Aru jocūcu ámeacu cubevu jèiye méne jícu.

¹⁹Caíye jocūca jèidua mearua cubedu, jiore memeipòescu coení jaruvajebu toaboi. Nopedeca Jūmenijicu ina borocuede bueivure ñájine ðacuyume.

²⁰Nopedeca coreóvarājaramu mūja ina borocuede bueivure aru ina yávaiyede jávene bueivure máre ne ðaiyeque, arejameða Jesús.

**Jesús ùi bueino caivu ne
ecobenajinore Jūmenijicu
jaboteinore
(Lc 13.25-27)**

²¹Bediõva buede nūrejameða Jesús:

—Caivu ina yure aivu “mū, ñūje jabocu”, ubenita ðabevuvacari yópe jípacu, cavarõ mearocacu, úi urõpe, ecobenama úi jaboteinore. Quévura ina úi urõpe ðaivu ecorājarama nore. ²²Ánijāravu daquijāravu baquinóre obedivu pòeva, yópe arí, coyūrajarama yure: “Mū, ñūje jabocu, ñūjarecabu Jūmenijicu yávaiyede coyūcaivu bácvu, aru jaruvaivu bácvu abujavare,

aru ure pōeva ne đarī majibede máre đaivu b́acavu mi ámiái, mi paruéque”, arājarama. ²³Dinumu maquinóre náre soyucuyumu yu: “Jívu ámevu muja. ¡Que baru caivu muja ámeina teivu nujara yure jocarí!” acuyumu, arejameđa Jesús, náre ecoicōjemecu J́amenijicui jaboteinore.

**Jesús ũi soyuino ṕacađ́amia ćuramia
đaivu b́acavure**

(Mr 1.22; Lc 4.32, 6.47-49)

²⁴Cojedeca Jesús, yópe arí, buedejameđa náre:

—Ina jápiaivu yure aru đaivu ji cōjeiyere đaivuđu yópe ñai ćuramine đayure jājaroi. ²⁵Ocarí, jia yaborí, oco eaquemavu diñamine. Úrarō japuquemavu úmevu. Úbenita ćujibetequemavu diñami, jājaroi núe boje. ²⁶Úbenita ina jápiaivuvacari yure, đabevu baru ji cōjeiyere đaivuđu yópe ñai ćuramine đayure jājamenoi. ²⁷Ocarí, jia yaborí, oco eaquemavu diñamine. Úrarō japuquemavu úmevu. Aru tuquemavu diñami. Úrarō b́jaino matequémavu, arí buedejameđa Jesús.

Úi nópe aiyede, yópe aiyucu barejaquémavu Jesús: Ina đaivu yópe ũi urópe b́jabenajarama, ubenita ina đabevu yópe ũi urópe b́jarājarama.

²⁸⁻²⁹Aru Jesús ũi buení buojaiyede, ina obedivu pōeva, ũi soyuiyede jápiaivu b́acavu urarō d́apiarí cuicumarejaimađa, ũi bueiye boje náre yópe parucupe ina J́amenijicui yávaie báquede bueipōeva pueno.

Jesús ũi meadaino pojeyure

(Mr 1.40-45; Lc 5.12-16)

8 ¹Jesús ěmeñu mácure dicú ćuracure jocarí, obedivu pōeva nuřejaimađa ũi yóboi. ²Aru nuřejameđa Jesús yebai ćuinácu pojeyu. Nuatutarí, arejameđa úre:

—Mu, ji jabocu, ucu baru, meadajacu ji pojeiyede. Buojaivu mu meadayu yure, arejameđa.

³Dinutnure Jesús, ũi puquque jabióvarí tuoyu, arejameđa úre:

—Úvu yu. Caride meatejacu mu, arejameđa Jesús.

Aru maumejiena Jesús ũi que aiyede, meatedejameđa. ⁴Jesús soyucōjemecu apevure arejameđa:

—Ćuiná, nuri Jerusalén ámicuríimaroí, jáđovajacu sacerdotede. Aru jíjacu mi meateiye boje, yópe J́amenijicui đaicōjeiyede ũi soyuiye báquepe Moisés b́acure, pōeva ne coreóvarájiyere ayu mi meateinore, arejameđa úre Jesús.

**Jesús ũi meadaino churaravai jabocu
yebacacure**

(Mt 22.13, 25.30; Lc 7.1-10, 13.28-29)

⁵Jesús ũi ecoiyede Capernaum ámicuríimaroí, ćuinácu ũmu, cien paivu churaravai jabocu, nuřejame ũi yebai. Yópe arí, jéniáñu marejáme, ũi cađatequiyere ayu:

⁶—Mu, ji jabocu, ćuinácu ji yebacacu ćubi ćurami, parayu, nacajaiye majibecu. Aru pare nájíñume ũ, arejame Jesúre ñai jabocu.

⁷Aru Jesús arejame:

—Yúvacari úre meadacudaquijivu, arejame Jesús.

⁸Úbenita ñai jabocu arejame Jesúre:

—Mu, ji jabocu, meacubu mu. Úbenita yúcapuravu ámecutamu. Que baru đarí ecobejacu ji ćurami. Quénora soyjacu mi cōjeinore. Aru ji yebacacu meatecuyume. ⁹Yurecabu ćucu ne cōjeiyequé ina ji jabova. Aru ćuvavu churaravare, ji cōjeimarare. Nácacu ćuinácu “Nujacu” ji aríburu, nuimi ũ. Aru “Dajacu” ji aríburu, daibi ũ. Aru ji đaicōjenu apejiene ji yebacacure, đaiibi ũ, arejame Jesúre.

Úi que aiyede, “Íjiéde cōjeipōecubu mu” aiyucu barejaquémavu Jesúre.

¹⁰Que ayure jápiarí, pare d́apiarejame Jesús. Aru jári ina nuivure ũi yóboi, arejame:

—Jáve soyuyubu mujare: Eabevu ćareja majacacure, Israecacure, me ju ayure yure yópe ñai churaravai jabocupe.

¹¹Soyuyubu mujare: Darājarama pōeva cainoa joborōacavu, yure ju airpōeva. Dobarājarama tuoiva yebai, ārąjivu

Jūmenijicui jaboteinoi ũi pōevaque, Abrahāque, Isaaque, aru Jaoque máre. ¹²Ūbenita obedivũ mujacavũ, judíoiva, ina cūjurorivũ bācavũ noi, jarũvaimara marajárama ñeminoita, ne ju abe boje yũre, ne coatenajiyepẽ ayũ yũre jarũvarĩ. Chioivũ orĩ mautenajarama nore. Aru jararĩ cõpi cūrajarama na, arejame Jesús.

¹³Dinũmũ ñai jabocũre arejame Jesús: —Copainujacu mũ mi cūrami. Jave ñacavũ yũ yópe mi jēniaiyepẽ. Jave mi yebacacũre meadavũ yũ, mi ju aiyẽ boje yũre, arejame Jesús.

Aru dinũmũmareca meatedejameda ũ.

Jesús ũi meadaino Simón Pedroĩ vácõre
(Mr 1.29-31; Lc 4.38-39)

¹⁴Jesús nurejameda Simón Pedroĩ cūrami. Ecoyũ bācu noi, járejameda Pedroĩ vácõre, moimo paradõre. ¹⁵Ōi yebai nuri, óre tuorejameda Jesús ũi pũrũque. Aru dajõcarejavũya moino óre. Dinũmũmia nacajari, āiyede meadarĩ jídejacoda ina noi curivũre.

Jesús ũi meadaino obedivũ ijimarare
(Mr 1.32-34; Lc 4.40-41)

¹⁶Dinainũmica ñamijie baji, jabuóvaujāravũ vaiyede, ina ĩmarocavũ nũvarejaimada Jesús yebai obedivũ abujuva ne ĩmamarare. Ina abujuvare yávarĩ jaetovarejameda Jesús. Aru caivũ ina ijimarare máre meadarejameda.

¹⁷Caie iye nópe vaidéjavũya cūináturu Jūmenijicui coyũicõjeiye báquepedeca ũi yávaiyede coyũaipõescu bācu, Isaías āmicũcu, ũi aiyẽ báquede Jūmenijicui epequimũra: “Ūrecabe maja parũbevũre meadavũ, aru majare ijidé jarũvayũ”, arejaquemavũ Isaías bācu Jesurã.

Apevũ Jesúque ne nũiyurĩduino
(Lc 9.57-62)

¹⁸Jesús ina obedivũ pōevare jáñũ ũi yebai, jataicõjenezame ũi bueimare.

—Járica, macajitabũ urabũ apedũvei nũrevũ, arejame Jesús.

¹⁹Dinũmũ cūinācu Jūmenijicui yávaiyẽ báquede bueipõescu ũi yebai nuri, arejame:

—Mũ, bueipõescu, máque nũquijivũ yũ caino mi nũinoita, arejame Jesurẽ.

²⁰Aru Jesús arejame ũre:

—Macayavimiva cũvama ne cobeá. Aru mĩjina cũvama ne juaiboa. Ūbenita yũ, Jūmenijicui daroimũ mácu ũmũpe, ji curõ cũvabevũ, arejame Jesús.

²¹Apecũ, ũi bueimũ, arejame ũre:

—Mũ, ji jabocũ, mamarũmũre jarũvaquijivũ cāreja jipacũre cūracobei, ũi yaiyede. No yóboi máque nũquijivũ, arejame Jesurẽ.

²²Ūbenita Jesúsapũravũ arejame:

—Dajacu yáque. Ina yavũ bācavũpe pavũ, ne járiabe boje Jūmenijicui jaboteinoque yávaiyede, jarũvajarãri ina yavũ bācavũre, arejame Jesús.

Jesús ũmevũre ũi bĩjaroino
(Mr 4.35-41; Lc 8.22-25)

²³Jesús jatuyũ jiadocũi, ñũjare ũi bueimara máre jaturejagarã. ²⁴No macajitabũ urabũre jataivũre japurejavũ ũmevũ parurõ baju. Aru pācaĩboa coiyede jiadocũi, buidéjavũ dicũre oco. ²⁵Ūbenita Jesús cāñũ marejame. Que baru ũi yebai nuri, yópe arĩ, coedavarejagarã ũre:

—iMũ, ñũje jabocũ, meadajacu ñũjare! iCoivũbu maja! iBĩjarājivũbu maja! arejagarã ñũja.

²⁶Aru Jesús arejame ñũjare:

—¿Aipe teni jidũrivũrũ mũja? ¿Aipe teni “Jesús meadacũyũme ñũjare”, abevũrũ mũja? arejame ñũjare Jesús.

Dinũmũre nacajari, jararejame ũmevũre. Iboá uraboa pācaĩboa bĩjarejavũ. Aru cārijimene ñarejame ũ.

²⁷Cuecumari, urarõ dápiarejagarã. Aru arejagarã ñũje bajumia:

—¿Yécũba ñai, yópe cõjeñũ ũmevũre aru macajitabũre máre ju aimũ? arejagarã ñũja.

Jesús ũi meadaino ũmũva abujuva ne ĩmamarare
(Mr 5.1-20; Lc 8.26-39)

²⁸No macajitabũ urabũre jatarĩ nuri, apedũvei Gadara āmicurõĩ earejagarã ñũja. Nũje maiyede jiadocũre jocarĩ, pũcarã ũmũva, abujuva ne ĩmamarã, Jesurẽ copũ nurejaima.

Cūracobeai, pōeva ne yaivū bācavūre jarūvainoi, curivū barejaquémavū na. Ne pare jijecue boje, pōeva ye oabedejaquemavū vaivū nore. ²⁹ Aru bujijé cođoboborejaima:

—Mu, Jesús, Jūmenijicui mácu, ¿yéde ucūrū ñujaque? ¿Ñujare ñájine đacuyurū Jūmenijicui abujuvare ñájiovaquijāravū jipocamia? arejaima.

³⁰ Joabenoí āivū barejāima obedivū oteivāri va. ³¹ Aru jēniarejaima ina abujuva Jesúre:

—Ñujare jaetovayū baru, coicōjējacu ina oteivāri va, arejaima.

³²—Corāñujara nára, arejame Jesús.

Aru etarī, corejaima ina oteivāri va. Cúyarī nūri, tūrejaima cūracū ēmeinoi, macajitabū urabūi. Turī, corī, bijarejaima na. ³³ Aru ina oteivāri va mácvūre coreipōeva cúyarī nūrejaima, coyurājivū uraimarocavūre caiye iye vaiye báquede ina pūcarā abujuva ne ímarara mácvūre. ³⁴ Caivū no ímarocavū copū nūrejaima Jesúre. Aru úre járī, “Nujacu mu” arī parūrōque, etaicōjēnejaima úre ne curōre jocarī.

Jesús ūi cure đaino nacajaiye majibecure

(Mr 2.1-12; Lc 5.17-26)

9 ¹ No yóboi Jesújā jiadocūi jaturī, macajitabū urabūre jatarī, earejaimada ūi ímarore. ² Apevū ūmūva nūvarejaimada ūi yebai cūinácu ūmū, nacajaiye majibecure, ūi parainoque. Coreóvayū bācu Jesús náre ju aivūre úre, arejameda ñai nacajaiye majibecure:

—Mu, jī ūmū, chíomejacu. Mí āmeina teiyede jarūvarī, diede ārūmeteivū yū, arejameda Jesús.

³ Apevū Jūmenijicui yāvaiye báquede bueipōevacavū nore curivū, “Ñai ūmū Jūmenijicui ūbenore đai bi. Jūmenijicupe pāyū teibi ū”, arī dāpiarejaimada na ne ūmei. ⁴ Ūbenita Jesús járī, coreóvarī ne dāpiayēde úre, jēniari járejameda náre: —¿Aipe teni āmeno dāpiaivurū muja? ⁵ Maiyójabevū yópe aru apecure, “Mí āmeina teiyede jarūvarī, diede ārūmeteivū yū”, jī parúede jáđovame

boje, jī que coyūiyede. Ūbenita maiyójarótamu nacajari cuicōjenu nacajaiye majibecure. Úre cure đayū baru, jáđovaquijivū jī parúede. “Mí āmeina teiyede jarūvaivū” jī aiyede, coreóvabevū muja Jūmenijicui ārūmeteinoe diede. Ūbenita ñai cūvacū Jūmenijicui majié parúede, úrame yópe đarī jáđovaiye majicū. Quécūra Jūmenijicūvacari meadarī majibi ijimarare. ⁶ Que baru muje majinajiyēpe ayū Jūmenijicui daroimū mácu ūmūpe, yū, parúede cūvacure ijāravūre, jarūvacayū āmeina teiyede, yópe đaquijivū yū, arejameda Jesús.

Dinūmū arejameda nacajaiye majibecure:

—Nacajari, mi parainore íni, nujacu mi cūrami, arejameda úre Jesús.

⁷ Dinūmū, yópe Jesús ūi đaicōjeiyepedeca đarejameda. ⁸ Ina obedivū pōeva diede járī, cūcumari, mearore jídejaimada Jūmenijicure, ūi nópe parūre đaiye boje ūmūre.

Jesús ūi “Dajacu” aino Mateore

(Mt 12.7; Mr 2.13-17; Lc 5.27-32, 15.1-2)

⁹ Jesús ūi vaiyede járejame yūre, Mateore, dobacure jī memeitucubūi, pōeva ne Roma āmicūrō jaboteino bojedainoi. Aru arejame yūre, “Dajacu yáque”. Que baru nacajari, nūrejacacu úque. ¹⁰ No yóboi, Jesús ūi ācūnuyēde jī cūrami, obedivū jabovare tātūra ícaipōeva, āmeno đaipōeva, aru ūi bueimara máre dobarejaima, ārājivū úque. ¹¹ Apevū judfova, đaicōjeiyede đaiye cōmajivū, fariseo āmicūriyajubocavū, cūrejaima nore. Ina fariseovacavū, Jūmenijicui yāvaiye báquede bueipōeva, Jesús āñūre járejaima ina jabovare tātūra ícaipōevaque aru āmeno đaipōevaque. Aru arejaima ūi bueimarare:

—¿Aipe teni āñūma jabovare tātūra ícaipōevaque aru āmeno đaipōevaque máre? jēniari járejaima ñujare.

¹² Que aivūre jápiarī, Jesús arejame:

—Meara pōevare juoipōecūi cadateiye jaūbevū. Quénora ijimarare ūi cadateiye

jañvñ. ¹³Buejarā mña, coreóvarājivñ me cūinácñ Jāmenijicūi yávaiyede соуñсаирōесñ básñi toivaiye báquede. Yópe arī, toivaicōjenejaquemavñ Jāmenijicū ñ mácsñre: “Ûvñ yñ mñje cōmaje āroje járajeyere ayñ arevñre, mñje yñre jícaiyere pñeno”, arī toivaicōjenejaquemavñ. Dabedejacacñ yñ ijāravñi, cutucñyñ mearare ne baju dápiaiñore. Quénora darejacacñ yñ, meadacñyñ āmenare, ne chīorajeyere ayñ ne āmeina teiyede, Jāmenijicūi ārumetequiyepe ayñ diede, arejame Jesús.

**Pōeva āmevñva āiyede ne jēniaino
Jāmenijicūque**
(Mr 2.18-22; Lc 5.33-39)

¹⁴Dinñmñ Juan Bautistai bueimara, Jesús yebai nuri, jēniari járejaima ũre judíoiva ne đarī cōmajiyede, ne jēniayede Jāmenijicūque āmevñva āiyede:

—¿Aipe teni ñña aru ina fariseova máre āmevñba āiyede, ũbenita mi bueimara āmevñ āmema āiyede? arejaima.

¹⁵Jesús jēvari coyurī, arejame náre:

—Ina pñrubñoyñ ñi cutuimara ne torojñve tenajeyere ayñ ñi pñrubñoyede, ye chīomenama ñi cñede cāreja náque. Que baru āmevñ āmema āiyede. Nopedeca ji bueimara torojñrivñ ji cñede náque, āmevñ āmema āiyede. Ûbenita ji mauva ne nñvarajiyede yñre, ji bueimara chīoivñ āmenajarama āiyede, arejame Jesús.

¹⁶Cojedeca Jesús buedejame náre:

—Pōeva jēomema cuitótecaje mamacaje joabecajei javecarōre. Nópe đaru, no jēoicajeva mamacaje jađevajebu javecarōre. Que đaru, pñeno baju járojebu codeicobe. Quédecā ñame buojabema jñ aivñ ji bueiye mamaene aru javeque bueiye märe. ¹⁷Pōeva yuabema vino ũyaicorore mamacorore āimacaje curubñ javcacurubñque. Que đaru, codeóvajebu dicurubñre. Yurī bñjajebu dicoro. Aru bñjajebu dicurubñ märe. Ûbenita ne yuaru mamacorore

mamacurubñque, bñjabe bu dicoro aru dicurubñ märe. Quédecā ñame buojabema đaiyvñ yópe ji bueiye mamaere, đare nñivñ baru yópe ne jave đaiye báquepe, náre arī buedejame Jesús.

**Jesús ñi nacovaino Jairoi máco
bácore aru ñi meadaino nomió
ñájññore jiveque**
(Mr 5.21-43; Lc 8.40-56)

¹⁸Jesús ñi coyuiyede náre, cūinácñ maja judíoiva maje jabovacacñ darī, puedarī, ñuatutarejame Jesús jipocai. Que teni yópe arejame:

—Carijñe yaibíco jímaco. Ûbenita yúque darī, tñojacñ óre mi pññque, ñi apñcojiyepe ayñ, arejame Jesúsre.

¹⁹Ûñi que aiyede, Jesús nacajari, nñrejame ũque, ñña ñi bueimaraque. ²⁰Ññje vaivári nñiyede, obedivñ pōeva jēneboi cñrejaquemavñ cūinácñ nomió, ijimo doce paiñña baju jive yuiyeque. Jesús yóboi nuri, jēni járejaquemavñ ñi doicaje tñrñvarā. ²¹Yópe arī dápíarejaquemavñ ñ: “Yñ jēni jádo maru ñi doicajede, quénora ũmedacođomu yñ”, arejaquemavñ ñ. ²²Ûbenita Jesús copedini, óre jári, arejame:

—Mñ, ji ũmo, torojñjaco. “Û meadaiye majibi yñre”, arī dápíarebu mñ. Que baru mi que arī dápíaiye boje, meadaiyvñ mñre, arejame óre Jesús.

Aru dinñmñmareca ico nomió, ijimo máco, meatedejaquemavñ.

²³Jesús eayñ ñai judíoiva jabocñi cñrami, pedu japuivñre aru obedivñ pōeva bujñé oivñre járejame. ²⁴Näre etaicōjēññ arejame:

—Etajarā mña. Ico juedoco yayió āmemico. Quénora cāđotame, arejame Jesús.

Näre nópe arejame Jesús, ñi majié boje ñi nacovaquinore óre yainore jarñvarī. Ûñi que aiyede, yñridejaima ũre. ²⁵Ûñi etavarīburu yóboi ina pōevare, ecorejame Jesús juedoco bácoi curitucubñi. Ó mácoi pññre jēnejameđa. Aru nacajarejacođa ñ, apñco cojedeca. ²⁶Aru ñi que đaiye

borore jápiarejaimađa caivu pöeva dijaboröcavu.

**Jesús ũi meadaino pucarã
ũmũva jári eabevure**

²⁷ Jesús ũi dajocarĩ nũiyede nore jocarĩ, pucarã ũmũva, jári eabevũ, darejaima ũi yóboi. Bujié, yópe arĩ, codoboborejaima:

—Mu, David báciai pãramecu, Jũmenijicui daroimũ mácu, ñũje jabocu bacuyú, ñũjare cõmaje ãroje jájacu mu, codoboborĩ are nũrejaima na.

²⁸ Jesús ũi ecoiyede cũrami, ina pucarã jári eabevũ darejaima ũi yebai. Aru jẽniari járejame náre:

—¿Dãpiaivurũ muja yure meadaiye majicũre? arejame.

—Jũju, ñũje jabocu, majivu ñũja mũre meadaiye majicũre, arejaima na.

²⁹ Dinũmu ne yacoruarã tuorĩ, arejame:

—Meatejarã muja. Yópe muje ju aiyepe đacaivu yũ mujare, arejame Jesús.

³⁰ Que đayũre, járejaima ina jári eabevũ báciavu. Parurõreca Jesús arevure coyũicõjemenidurejame náre:

—Ñamene coyũbejarã iye ji meadaiyede mujare, arĩdurejame.

³¹ Ũbenita cũinã, etaivu báciavu diñamine jocarĩ, coyũrejaimađa caivu dijaboröcavũre Jesús ũi meadaiye baquede náre.

**Jesús ũi meadaino yávaiye
majibecũre**

(Mt 10.25, 12.24; Mr 3.22; Lc 11.15)

³² Ina pucarã jári eabevũ báciavu ne eta iyede, cũinácũ ũmũ, yávaiye majibecũre, davarejaima arevũ Jesús yebai. Ñai ũmũ abujucu ũi imamu marejaquémavu. ³³ Jesús ũi jaetovarĩburu yóboi ñai abujucũre, yávaiye majidejame ñai abujucu ũi imamu mácu. Caivu ina obedivu pöeva Jesús ũi nópe đaiyede jáivu báciavu, cuecumari, urarõ dãpiarĩ aivu barejáima:

—Javede pu cari járavũita ye jánevũ ñũja iyepẽ paiye đaiyede yore, ñũje joborõ, Israel ãmicurijoborõ, arejaima.

³⁴ Ũbenita ina fariseova yópe are curejaima Jesurã:

—Abujuvai jabocui parueque jarũvaibi abujuvare, arejaima ũbenina.

Jesús ũi cõmaje ãroje jáino pöevare
(Mt 4.23; Mr 1.39, 6.34; Lc 4.44, 10.2)

³⁵ Jesús buede nũrejame cainoa imaroai aru imajinoai máre. Judiova ne cójijiñamiai bueni, coyũyũ barejáme iye yávaiye méne Jũmenijicui jaboteiyede pöevare. Aru meadayũ barejáme caiye duica ijie coapa aru caino ijinore máre.

³⁶ Ũi jáiyede pöeva chõivure ne ñãjiye boje aru ne baju cadateiye majibe boje, cõmaje ãroje járejame náre, yópe ovejava náre coreipöecu cũbevũre paivũre. ³⁷ Que baru ñũja ũi bueimarare arejame Jesús:

—Obedivu pöeva curivũbu, Jũmenijicui yávaiye méne majibevũ cãreja, muje buenajimara iye yávaiye méne, ũi meadaquiyepe aivu náre. Ũbenita obebevũ memecaivũbu Jũmenijicure. ³⁸ Que baru jẽniajara ĩque, ũi bueicõjequiyepe aivu arevure ũi yávaiye méne ina diede coreóvabevũre cãreja, arejame ñũjare Jesús.

**Jesús ũi beoino ũi yávaiye méne
coyũicõjeimarava**
(Mr 3.13-19; Lc 6.12-16)

10 ¹ No yóboi Jesús órejarejame doce paivu ñũjare ũi bueimarare. Aru parũre đarejame ñũjare, ñũje jaetovarãjiyepe ayũ abujuvare aru ñũje meadarãjiyepe ayũ caiye duica ijie coapa aru caino ijinore máre. ²⁻⁴ Ñũjare beorĩ epedejame ũi yávaiye méne beorĩ coyũicõjeimarare: Mamarũmu Simón, ũi ãmidoimũ mácu Pedro, aru Andrés, Simón Pedroi yócu; aru Zebedeoi mácu Santiago, aru Santiagoi yócu Juan; Felipe aru Bartolomé; Tomás aru yũ, Mateo, jabovare tãtura icãipöecu bácia; Santiago, Alfeoi mácu, aru Tadeo; Simón, ãmicũcu Celote, aru Judas Iscariote máre. Ñai marejáme jẽni jicũyũ Jesũre ũi mavare. Ñũja marejacará Jesús ũi yávaiye méne beorĩ coyũicõjeimara.

Jesús ùi jaroino ùi bueimarare
(Mt 11.24; Mr 6.7-13; Lc 9.1-6, 10.4-12; Hch 13.51; 1 Co 9.14; 1 Ti 5.18)

⁵Ñija doce paivure jarocuyu barejáme Jesús, ñije coyuräjijeyepere ayu Jümenijicui jaboteinoquede yávaiye méne. Yópe arí, majicarejame ñijare ùi jaroquiye jipocai:

—Judíova ãnevũ ne joborðai nũmejara. Aru Samaria ãmicurijoborðque ìmaroare ecobejarã muja. ⁶Quénora coyurãñujara muja majevure, ina judíova, Israel bácuĩ pãramenare. Jümenijicui yávaiyede jápiabeni, ùi urõpe ðabeni, ùre jaboteicõjemema na. Que baru ovejava mamateivure paivubu na. ⁷Muje nuiyede yópe arí: “Jümenijicu jabotecuyume pøevare maumejiena”, arí coyujarã náre. Meadajarã ijimarare.

Nacovajara yaivu bácvure yainore jaruvarí. Meadajarã pojevure. Aru jaetovajarã abujuvare ne ìmamarare jocarí. ⁸Bojecubeda jívu yu muje paruéva, muje meadaräjijeyepere ayu pøevare. Que baru meadajarã náre bojecubeda. ⁹Nũvamejara tãuturare muje jãrióicãvai. Úrure, platare, aru cobrede máre nũvamejara. ¹⁰Curubvare máre, muje curãñuri cave nũvajuroricurubvare, nũvamejara muja. Aru pũcacajea muje cuitótecajeare, curaidoare, aru tuturiteiyoare máre nũvamejara muja. Memecai pøevure bojedaiye javũ ùi memeinore. Que baru ina muje meadaimara mãrajivure jíye javũ mujare javéde.

¹¹Ìmaroi muje eaiyede, vorí eajarã cüinãcu pøevure, ne pueðaimvure, jápiayucvure muje coyuiyede. Úque cujarã muja ùi cürami pu dajocarí nũvũta nore jocarí. ¹²Muje ecoiyede cürami, diñamicavure jacoyujarã muja, jëniacavũ Jümenijicvure ùi mearo ðacaquiyepe aivu náre. ¹³Na meara maru, náre mearo ðacacuyume Jümenijicu yópe muje jëniaiyepe. Æbenita na ãmena maru, náre mearo ðacabecuyume ù. ¹⁴Apecũ ùi copũ

etabedu mujare, aru muje coyuiyede jápiayubedu máre, pupejarã jobore mujare jëiyede muje cuboba cãchinoi ùi jáiyede, muje etaiyede ùi cüramine jocarí, no ìmarore jocarí máre. ¹⁵Jãve coyuyubu mujare: Ina Sodomacavũ bácvũ aru ina Gomorracavũ bácvũ máre pare ãmeina ðaivũ barejaquémavũ. Æbenita diìmarocavũ mujare copũ etabevũ ñãjinajarama nõcvũ bácvũ pũeno baju, Jümenijicui ñãjiovaquijãravũ baquinõre pøevare, ne ãmeina teiye boje, arejame Jesús, ñijare jaroym.

Jesús ùi coyũino ùre ju aivũ ne ñãjiyede

(Mt 9.34, 12.24, 24.9, 13; Mr 3.22, 13.9-13; Lc 6.40, 10.3, 11.15, 12.11-12, 21.12-17; Jn 13.16, 15.20)

¹⁶Jesús coyure nũrejame ñijare, yópe arí:

—Jájara. Jaroivu yu mujare ijãravucavũ jëneboi, yópe ovejava nuiyepere ãimara jjecurivũ jëneboi. Ávaivubu maja judíova: Áða me majibi, aru jureco jjecubebico. Que baru ãðape me majijarã, aru jurecope jjecubekarã pøevaque, muje coyuiyede náre. ¹⁷Me jájara muja. Mujare jëni nũvarajarama jabova ne ãmeina teivure jëniari jáiñami. Jara popenajarama mujare maja judíova maje cõjijiñamiai. ¹⁸Aru mujare nũvarajarama cõjeipøeva ne jipocai aru jabova ne jipocai máre, yure muje ju aive boje, muje coyuräjijeyepere aivu ji borore náre aru ina judíova ãnevure máre. ¹⁹Ne jëni nũvaiyede mujare ãmeina teivure jëniari jáiñami, “¿Aipe coyurãjidi náre?” arí cãrijimejara muja. Dinũmũ maquinómareca majinajaramu muje coyuräjijeyepere javéde. ²⁰Coyujarã muja yópe majepacui Espíritu ùi dãpiare ðaquiyepe aivu dinũmũ maquinõre.

²¹Mujare, yure ju aivure, ina yure ju bevũ ùbenajarama. Que baru ùmũ jëni jicuyume jíbcvure o ìmacvure máre, jabova ne boarí jarũvaicõjenajijeyepere ayu ùre. Aru nopedecca jípacu jëni

jícnyume mamacure. Aru nopedeca némará ju abeni nébucavare maucavari boarájarama náre. ²²Caivu mujare, yure muxe ju aiye boje, jorojini járajarama cainoa joboróacavu. Ubenita nai ju ayu yure úi yainumuita, ú macuyáme ji meadaimu. ²³Cúináro ímarocavu ne nájine ðaiyede mujare, dupini nujara muja apeno ímaroi. Jáve soyuyubu mujare: Yu, Jümenijicui daroimu mácu úmure, copaidacuyumu muxe soyuri bubarájiye jipocamia ji yávaiye méne cainoa maje ímaroa, Israeque ímaroi.

²⁴Ina bueimara ñame majibema náre bueipóescu püeno. Aru ina memecaivu ñame parúbema ne jabocu püeno. ²⁵Nai bueimure vaiye jauvu caiye iye úre bueipóescui vaiye báquede. Aru nai memecayure vaiye jauvu caiye iye úi jabocui vaiye báquede. Póeva ámeina yávaivu baru cürami upacure, püeno baju ámeina yávarájarama úi cüramicavure. Quédecabu ina yure ju abevu “Abujuvai jabocubu mu” aiyuri yure, ámidoivu Beelzebúre. Que baru mujare majicayubu: Püeno baju ámeina yávari nájine ðarájarama mujare, arejame ñujare Jesús.

Jesús úi soyüino póeva ne jidurájimure
(Mr 4.22; Lc 8.17, 12.2-7)

²⁶Ñujare soyure nurejame Jesús: —Póevareca jidubejará muja. Caiye yaveiye báque jároquiyebu. Aru dupióvaiye báquede máre majinajarama caivu póeva. ²⁷Caiye ji soyüiyede mujare ñeminoi, póeva ne járiabede, soyujará póevare miadároi, ne járiaiyede. Aru caiye muxe járiaiyede, póeva ne jüjuvaiyede, soyujará obedivu póevare ne cójijinoai. ²⁸Jidubejará ina boarí jaruvavure muxe bajure, ubenita muxe úmene boarí jaruvavu oabevure. Quéhora jidujará Jümenijicure, ñaine muxe bajure aru muxe úmene máre, bíjarorí majicure toabo cúiméboi.

²⁹Yócavu bojedáivu pucáina mújina quíjinare cúinátrava táuturatrava bojecubetravaque. Ubenita cúinájicu

nácacu turíburu joboróita úi yaidú, majepacu Jümenijicu tuicójeimi úre. Jümenijicu úi tuicójemenu cúinájicu nácacure joboróita, tubecuyume. ³⁰Aru caiye iye poðamea cuede muxe jipobui majibi majepacu Jümenijicu. ³¹Que baru jidubejará. Muja bojecurivutamu caivu mújina obedivu püeno. Que baru Jümenijicui cójemenu, ámeno vaibéquiyebu mujare, arejame ñujare Jesús.

Jesús ju aivure aru ju abevure soyüino

(Lc 12.8-9; 2 Ti 2.12)

³²Yópe arí, soyure nurejame Jesús: —Caivu ina ju aivure yure póeva ne jáiyede, yu máre náre ju acuyumu jipacu, cavaró mearocacu, úi jáinoi. ³³Ubenita caivu ina ju abevure yure póeva ne jáiyede, yu máre náre ju abecubu jipacu, cavaró mearocacu, úi jáinoi, arejame Jesús.

Jesús úi coatede ðaino póevare

(Mt 16.24-25; Mr 8.34-35; Lc 9.23-24, 12.51-53, 14.26-27, 17.33; Jn 12.24-25)

³⁴Cojedeca Jesús, yópe arí, buedejame ñujare:

—Dápiabejará muja yu dayu bácuere, cárijimene ðacuyu íjaravacavure. Dabedejacacu yu íjaravui, cárijimene ðacuyu mujare. Quéhora darejacacu yu, póevare coatede ðacuyu, apenvu yure ne ju aiye boje ubenita apenvu yure ne ju abe boje. ³⁵Ji daiye báque boje, mamacu maucnvacuyume jíracure, aru mamaco maucnvacóome jíracore, aru mamacui márepaco maucnvacóome ói vácore máre. ³⁶Que baru póescu úi cüramicavuvacaribu úi mauva márajivu.

³⁷Ácu póescu jíracure o jíracore ucu baru ji püeno, ú buojabebi jícu bacuyú. Ácu póescu mamacure o mamacore ucu baru ji püeno, ú buojabebi jícu bacuyú. ³⁸Ácu póescu daiyucu yúque, ðajocajacurí póeva ne mearo jáiyede úre, cuyebecurí yure yóvaiyede, aru jidubejacurí úi nájiquiyede. Nópe ðabecu baru, ú buojabebi jícu bacuyú. ³⁹Ñai

põescu ùi baju urõpe ðarĩ, meaðaiyucu baru ùi bajure, coatecuyume ùi bajure Jũmenijicure jarũvarĩ, yõpe yaiyũ bÁCupe ùi ùmei. Ūbenita ñai põescu, “Ye baju ãmevũ, ji yaidũ Cristore boje” ayũ, ùi baju urõpe ðabecũva quẽnora ji urõpe ðarĩ, ùrecabe ji meadaquimũ, cũcuyũ Jũmenijicũque cainũmũ, ñũjare arĩ buedejame Jesús.

Põeva bojedaimara ne baju ðaiyepe
(Mr 9.37, 41; Lc 9.48, 10.16; Jn 13.20)

⁴⁰ Jesús buedejame ñũjare cojedeca: —Ñai põescu copũ etayu baru mũjare mũje coyũrãnuiyede ji yávaiye méne, yure máre copũ etaibi ù. Aru ñai põescu copũ etayu baru yure, copũ etaibi ñai yure daroyure máre. ⁴¹ Ñame copũ etaivũ cũinácũ Jũmenijicũ yávaiyede coyũcaipõecure, Jũmenijicũ bojedacuyume náre yõpe ùi bojedaiyepedeca ñai ùi yávaiyede coyũcaipõecure. Aru ñame copũ etaivũ cũinácũ ùmũ meacure, Jũmenijicũ bojedacuyume náre yõpe ùi bojedaiyepedeca ñai ùmũ meacure. ⁴² Jãve coyũyũbu mũjare: Ñai põescu jĩyũ cũinárũ jorogũre ocoque, caðatecuyũ cũinácũ ji bueimaracacure, parubecũreca ùi yóvaiye boje yure, jãve bĩjabecũyume ù Jũmenijicũ bojedaiyede ùre, arĩ buedejame Jesús.

Juan Bautista ùi jaroimara Jesús
yebai

(Mt 17.10-13; Mr 9.11-13;
Lc 7.18-35, 16.16)

11 ¹ Jesús ñũja doce paivũ ùi bueimarare majicarĩ bũojayũ bÁCũ, nore jocarĩ nũrejame ðijoborõcaĩmaroai, põevare buecuyũ aru coyũcuyũ ùi yávaiye méne.

² Dinũmũre Juan Bautista ñai jabocũ Herodes ùi buoimũ marejãmeda. Cũrejãmeda ãmeina teivũre jẽni jacoĩnami jĩvũi. Noi cũcũ, jãpiarejãmeda Cristo ùi ðaiye borore. Que baru jarorejãmeda apevũ ùi bueimarare Jesús yebai. ³ Jẽniari jãicõjenejãmeda náre yõpe:

—¿Jãveneca máru Juan Bautista “Ji yóboi dacũyume apecũ coyũipõescu” arĩ, ùi buevacamũ? ¿Ûi que arĩ buevacamũ ãmenu, corenajidi ñũja apecure? aicõjenejãmeda náre Juan Bautista.

⁴ Ne que arĩburu yóboi, Jesús jũ ayũ arejame náre:

—Nuri coyũjarã Juan Bautistare mũje jáiyede aru mũje jápiayede caride:

⁵ Ina jári eabevũ bÁCavũ jári eaðama aru ina cuiye majibevũ bÁCavũ cuyama caride. Ina pojeivũ bÁCavũ meama aru ina jápiabevũ bÁCavũ jápiadama caride. Ina yaivũ bÁCavũ nacovaimara yainore jarũvarĩ apũma cojedeca caride. Aru cõmaje ãrojarivũre coyũyũbu iye yávaiye méne, Jũmenijicũ meaðaiyede põevare. ⁶ Aru torojubi ñai jũ arĩ ðajocabecũ yure, arejame náre Jesús.

⁷ Ina daroimara ne nuriburu yóboi, Jesús Juan Bautistai borore yávarĩ búyũ arejame ina obedivũ põevare noi cũrivũre:

—Jãve jãranũmeteavũ mũja cõriãre ùmevũ japuiyede põecũbenoi. ⁸ Aru jãve jãranũmeteavũ mũja põescu cuitótecaje meacajede doyũre máre põecũbenoi. Majivũ mũja ina doivũre cuitótecaje meacajeare cũrivũre cainũmũ jabovai cũramiai. ⁹ Quẽnora jãve jãranũvũ mũja cũinácũ Jũmenijicũ yávaiyede coyũcaipõecure. Jãve coyũyũbu mũjare: Jáquemavũ mũja Jũmenijicũ yávaiyede coyũcaipõecure pũeno meacũ bajure. ¹⁰ Juan Bautistabe ñai Jũmenijicũ toivaicõjeimũ mácu ùre coyũcaipõescu bÁCure:

Jarõivũ yure coyũcaipõecure mi jipocai, ùi meaðaquiyepe ayũ põevare, ne copũ etarãjiyepe ayũ mũre, nopedeca põeva ne meaðaiyepe cuimare ñai ùmũ, ne pueðaimũ, ùi ðaquiye jipocai, arĩ coyũicõjenejaquemavũ Jũmenijicũ.

¹¹ Jãve coyũyũbu mũjare: Cũbebi apecũ Jũmenijicũ yávaiyede coyũcaipõescu meacũ baju Juan Bautista pũeno, ina ijãravũre põeteivũ jẽneboi. Ūbenita caivũ Jũmenijicũ jaboteimara ùi mearo ðacaimaramu Juan

Bautista pueno. Aru nácacu ũbeni cücü máre Jūmenijicui mearo đacaimume Juan Bautista pueno, arejame Jesús.

¹²Aru yópe arĩ, buede nurejame:

—Ānijāravu bācarō Juan Bautista Jūmenijicui yāvaiyede ũi coyurĩ buijāravumata pu caride máre, obedivu pōeva parurō đadama, ecoiyurivu Jūmenijicui jaboteinore. Aru pōeva Jūmenijicure ju abevu parurō đadamatedama, cūinē đaiyurivu ũi jaboteinore. ¹³Juan Bautista ũi curinūmure curejaquemavu Jūmenijicui đaicōjeiye Moisés bācure toivaicōjeni bueiye báque aru ina Jūmenijicui yāvaiyede coyucaipōeva mácavu toivarĩ bueiye báque Jūmenijicui jabotecuyure ũi pōevare. ¹⁴Aru ji coyuiyede muje ju aiyuru, coyuyubu mujare: Juan Bautistarecabe ñai Jūmenijicui yāvaiyede coyucaipōecu Elíape páyu dacuyu Jūmenijicui epequimū ũi daquiye jipocamia. ¹⁵Me jápiajarā muja iye ji bueiyede, arejame Jesús.

¹⁶Aru yópe arĩ, buede nurejame:

—¿Yéque jēvari coyuji ina pōeva ijāravucavure? ¿Aipe ārōjari na? Juedova tãibui dobarivupebu, yajurājivū nácavūque. Aru yópe aivupebu: ¹⁷“Japuvū ñuja yurriainore. Ŭbenita upabetevu muja. Yurriavu ñuja chĩore đaiyede. Ŭbenita obetevu muja”. Aru nópe ijāravucavu máre cãrijijāna na. ¹⁸Que baru Juan Bautista ũi daiyede, ũi āmeni aru ũcumeni teiyede, “Abujucure cuvabi”, ũra ũbenina aivubu muja. ¹⁹Aru Jūmenijicui daroimū mácū ũmure, ji daiyede, āri aru ũcuri teiyede yópe caivu apevure, “Ñai ũmū ũrarō āri ũi vainĩ tuiyeta, aru ũrarō ũcuri ũi pacoteiyeta, yóvaibi āmenare aru jabovare tãutura ĩcaipōevare máre”, yurā ũbenina aivubu muja. Que baru muja máre, ijāravucavupedeca cãrijivubu. Ŭbenita Jūmenijicui majiēde pōeva jáđama ũre ju aivūque, arejame Jesús.

**Apeĩmaroacavu ne ju abeno
Jūmenijicure**

(Mt 10.15; Lc 10.12-15)

²⁰Apeĩmaroai ũre pōeva ne đarĩ majibede đarejame Jesús. Ŭbenita

nócavu chĩomeni ne āmeina teiyede, oatvabedejaima ne đaiyede. Que baru Jesús, yópe arĩ, jijatani búrejame ina ĩmaroacavure:

²¹—iMuja, judíoiva, Corazícavu, āmeno ñájinajaramu muja! iAru muja, judíoiva, Betsaidacavu máre, āmeno ñájinajaramu muja! Pōecu ũi đaru pōeva ne đarĩ majibede yópe ji đaiyepe muje jáiyede, judíoiva āmevu Tirocavu aru Sidócavu máre ne jáiyede, nócavu jave chĩori ne āmeina teiyede, oatvajeju ne đaiyede. Āmenicajeare dorĩ, ũapenare tuorĩ ne jipobui, jáđovajeju ne chĩori dápiaiyede. ²²Ŭbenita yu coyuyubu mujare: Muja ñájinajaramu Tirocavu aru Sidócavu pueno baju, Jūmenijicui ñájiovaquijāravu baquinóre pōevare, ne āmeina teiye boje. ²³Aru muja, judíoiva, Capernaucavu, jáve nūmenajaramu muja cavarō mearo Jūmenijicui curōi. Quénora muja nurajaramu toabo cūiméboi. Ina Sodomacavu bācavu āmena bajuvacari, jáivu bācavu baru pōeva ne đarĩ majibede, yópe ji đaiye bāquepe Capernaui, chĩori ne āmeina teiyede, oatvajeju ne đaiyede. Aru na mácavure bíjare đabejeju Jūmenijicui. ²⁴Ŭbenita yu coyuyubu mujare: Ina Sodomacavu bācavu pare āmeina teivureca, ne pueno ñájinajaramu muja, Jūmenijicui ñájiovaquijāravu baquinóre pōevare, ne āmeina teiye boje, arejame Jesús.

Jesús ũi jabuóvare đaiyue pōevare

(Lc 10.21-22; Jn 1.18, 3.35, 10.15)

²⁵Dinūmūmareca Jesús, yópe arĩ, coyurejame Jūmenijicure:

—Mu, jipacu, cavarō mearocavu ne jabocu aru ijāravucavu ne jabocu máre, mearore jívū mure, mi jáđovame boje caiye iye ji coyuiyede ina majidivure aru mi jáđovaiye boje caiye iyede ina majibevure. ²⁶Mu, jipacu, mearore jívū mure mi nópe đaiye boje, arejame Jesús.

²⁷Jūmenijicure coyurĩ buōjarĩ, Jesús arejame ñujare, ũque curivure:

—Jipacu Jūmenijicu yure majide đaiibi caiyede, aru parure đaiibi máre.

Ñame majibema yure, quénora majibi jipacáva. Ñame majibema jipacure quénora majivu yu, aru na máre ina ji majide ñaimara. ²⁸Caivu mña uetuvu mñe ñariduiye boje yópe Jñmenijicui ñaicójeiyepe, ñajarã ji yebai. Jabuóvare ñaquijivu mñjare diede jocarí, mñje cãrijimenajiyepa ayu. ²⁹Ju ajarã yure aru ji coyuyede máre. Buejarã yáque ji bueiyepe. Majicaicójejara mñjare yure, ñarãjivu ji ñaiyepe. Yu cõmaje ñroje jãñumu põevare. “¿Meacu bárica yu?” arí ñápiabevu. Que baru yu jabuóvare ñaquijivu mñjare mñje ñmene. ³⁰Ju arí yure, ji coyuyede máre, maiyójabevu mñjare. Mñje ñaiye majibede ñaicójemevu mñjare, arejame Jesús.

**Jesúí bueimara ne puyoino oteiyepe
jabuóvairavui**

(Mt 9.13; Mr 2.23-28; Lc 6.1-5)

12 ¹Apejaravu, judíovai jabuóvairavuvu sábadoi, ñña Jesúsã vaidéjarã oteiye curóí. Ñña ñi bueimare ñvúé ijidejavú. Que baru die oteiyepe jëni puyorí ñrejarã ñña. ²Aru apévú fariseovacavu ññje nópe ñaiyepe jãri, arejaima Jesúsre:

—Jãjacu. Mi bueimara maja judíovai mñe ñaicójemeno ñarí, ñmeno ñavubu jabuóvairavure, arejaima.

³Ubenita Jesús, ñi ñápiaye boje ñña ñmeno ñabevure, arejame náre:

—¿Jãve ñrumetenaru mña yo David bácuí ñaino mácarõre ñvúé ijidé ñre aru ñque curivure máre? ⁴U mácu ecõrejaquemavu Jñmenijicui cñrami. Aru ñrejaquemavu páure, Jñmenijicure jíye báquede, ina sacerdoteva ne ñiyede, sacerdote ñmecu bácvacari. Aru jídejaquemavu ñque curivure máre, sacerdoteva ñmenvu bácvareca. Ubenita Jñmenijicu ñájine ñabedejaquemavu na mácvare. ⁵¿Aru jãve ñrumetenaru mña Jñmenijicui ñaicójeiyepe sacerdotevare ñi toivaicójeiye báquede Moisés bácvare? Ina sacerdoteva memevuvacari Jñmenijicui cñrami jabuóvairavure, ñmeno ñabema na. ⁶Yu coyuyubu mñjare: Ji cuede

mñje jëneboi mearotamu mñjare, mñje Jñmenijicui cñramine cñvae pñeno. ⁷Mña ji bueimarara “Ñmeno ñavubu” abejebu, majidivu bácvu baru aipe aiyurõre iye Jñmenijicui yávaiyede toivaicójeiye báquede: “Uvu yu mñje cõmaje ñroje jãrajiyepa ayu apévure, mñje yure jícaiye pñeno”, arí toivaicójejemaquemavu Jñmenijicu. ⁸Yu, Jñmenijicui ñaroimvú mácu ñmñre, jabocubu yu. Que baru ñaicójei buoiaivu yu põevare ne ñaiyede caijãravure aru jabuóvairavure máre, arejame Jesús.

**Jesús ñi meadaino ñmñvú ñmuve
jiacubevure**

(Mr 3.1-6; Lc 6.6-11, 14.5)

⁹Nore jocarí ñrejarã ñña, Jesúsã. Aru cñináñami judíovai cõjijíñami ecõrejarã. Noi cñrejame cñinácu ñmñvú, ñmuve cñinápvuravu jiacubevu. ¹⁰Apévú fariseovacavu jëniari jãrejaima Jesúsre:

—¿Mi ñápiaru, meadãicójeini Jñmenijicu jabuóvairavuvu sábadoi? arejaima na.

Nópe arejaima, boro coyurí ñaiyuriduvu ñre.

¹¹Jesús arejame náre:

—¿Ácu mñjacacu ñi oveja turu cobe jívui, cñiná jëni ñmeje bárica ñre judíovai jabuóvairavuvu, mñjare memecójemejãravure? ¡Põecu bojecucutame oveja pñeno! ¹²Que baru Jñmenijicu mearore ñaicójeimi põevare jabuóvairavuvu sábadoi. Aru yu meadavu baru ñai ñmñre caride, mearo ñajebu yu, arejame Jesús.

¹³Nópe ayvva, ñai ñmñvú ñmuve jiacubevure arejame:

—Jabióvacu mi ñmuvede, arejame.

U jabióvaiyede, meatedejavú ñi ñmuve, yópe apervuravucãmuvepe.

¹⁴Que teni ina fariseova etavuvu bácvu cõjijidejaima. “Boarí jarvãrãjavuvu”, arí ñápiavuvu barejaima Jesúsre.

Isaiás bácuí coyucavuvu Jesús

¹⁵Jesús coreóvavu ina fariseova ne boarí jarvãvuvu ñre, náre ñajocarí

nurejame nore jocarí. Obedivu pöeva cujurejaima ñi yóboi. Aru caivu nácavu ijimarare meadarejame Jesús. ¹⁶ Yávaicōjemenidurejame náre arevure, ne coreóvabenajiyere ayu ñi ðaiyede. ¹⁷ Caiye iye nópe vaidéjavū cūináturu Jūmenijicui coyucōjeiye báqueredeca ñai Isafas āmicucu ñi yávaiyede coyucaipōescu bācure. Yópe arí, toivaicōjenejaquemavu ñi máscure Jūmenijicu:

¹⁸ Jápiajarā. Ñaime yure memecayu, ji beoimū mácu. Érecabe ji umū. Éque torojuvu yu ji ūmei. Ére darocuyumu ji Espíriture, ñi cōjequiyere ayu yure memecayu ñi dápiayede, ñi coyuyede, aru ñi ðaiyede máre. Que baru coyucuyume yure memecayu judíova ānevure aipe ðarí buojavure, boropatebenajivuva ji jáinore. ¹⁹ Érecabe ādamatebecu, coðobobobescu mái, aru órejabescu ímaroacarō tāibui. ²⁰ Napiñu cadatecuyume ina parubevure. Aru cōmaje āroje jáñu meadacuyume ina ijimara yaijurorivure. Nópe ðacuyume pu ñi vainí turíburu yóboita āmenore jaravari, ñi jaboteiyeta. ²¹ Érecabe pöevare meadarí buojayu. Que baru ére napini corenajarama ina judíova ānevū, ñi meadaquiyere aivu náre, arí toivaicōjenejaquemavu Isafas bācure Jūmenijicu.

“Abujuvai jabocui paruéde cuvabi ũ” arí, ne boro coyurí adaríduino Jesúre
(Mt 9.34, 10.25; Mr 3.20-30, 9.40; Lc 11.14-23, 12.10)

²² Dinumure apevu davarejaima cūinácū ũmure, abujucu ñi ímatmure, Jesús yebai. Ñai ũmu jári eabescu aru yávaiye majibescu barejáme. Aru ére meadarejame Jesús. ²³ ũi que ðaiyede, caivu ina pöeva, nócavu, cuedumari arejaima:

—¿David bācui pāramecu, Jūmenijicui epeimū mácu maje jabocu bacuyú bārīca ñai? jēniari járejaima ne bajumia.

²⁴ ũbenita ina fariseova, jápiaivu pöeva nópe ne coyuyede, yópe arejaima:

—Ñai ũmu cuvabi Beelzebúre. Que baru abujuvai jabocui paruéque jaetovaibi abujuvare, arejaima na.

²⁵ Jesús coreóvayu ne dápiayede, arejame náre:

—Cūináro jaborōcavu ādamateivu baru ne bajumia, ina jaborōcavu cūinájarama na. Aru nopedeca cūináro ímarocavu o cūinádami cūramicavu máre ādamateivu baru ne bajumia, díímarocavu o díñamicavu máre cūinájarama na. ²⁶ Aru nopedeca bájebu ñai abujuvai jabocu, jaetovayu baru abujuvai jabocure. Ádamateyu bájebu ñi bajuma. Aru jaetovayu baru abujuvare, joe parucu cubejebu ũ. ²⁷ ¿Ji jaetovaru abujuvare ne jabocui paruéque, ñamei paruéque jaetovaidi mujacavu abujuvare? Que baru mujacavu, abujuvare jaetovaiyu, jáðovadama mujare muje borocuede yure ũbenita. ²⁸ ũbenita Jūmenijicui Espiritu Santo ñi paruéque jaetovayubu yu abujuvare. Que baru jáðovaiyu yu Jūmenijicu jaboteyure mujare.

²⁹ ũbenita buojaino ānevū ecoivu ñai ũmu parucui cūramine, ñavarajivu ñi cuvade. Mamarumure ére buorí, que ðaivu bācavuta buojaiyu ñavaiyu ñi cuvade, arejame Jesús.

Nópe ayu, Jesús yópe ayucu barejaquemavu: ũvacari parubi abujuvai jabocu pueno, ñi jaetovaiye boje abujuvare pöevare jocarí.

³⁰ Aru Jesús arejame:

—Ñai yóvabescu maucuvabi yure. Aru ñai arevure yóvare ðabebi yure, náre maucuvare ðaibi yure.

³¹ Que baru coyuyubu mujare:

Jūmenijicu ārumetecuyume caiye iye muje āmeina teiyede, aru caiye iye ére āmeina yávaiyede máre. ũbenita ácu pōescu ñi yávaru āmeina ñai Espiritu Santore, aipinmū Jūmenijicu ārumetebecube ñi āmeina teiyede. Quédata boropatecuyume, bíjacuyū Jūmenijicure jocarí cainmua. ³² Que

baru caivu ina ãmeina yávaivure yure, Jümenijicui daroimu mácure ñmure, Jümenijicu ãrumetecuyume ne ãmeina teiyede. Æbenita ina ãmeina yávaivure ñaine, Espíritu Santore, Jümenijicu ãrumetebecube ne ãmeina teiyede, ijáravure aru daquijáravu baquinóre máre, arejame Jesús.

**Jesús ñi bueino maje majinore
jocucu jéidure**

(Mt 3.7, 7.20, 15.18, 23.33;
Lc 3.7, 6.43-45)

³³Cojedeca Jesús, yópe arí, buedejame:

—Jocucu meacu cuvavu jéidua mearure. Æbenita jocucu ãmecu, ãmedure cuvavu. Que baru coreóvaivubu iye jocucure dicuá jéiyequé. Nopedeca muja coreóvarí buojaivubu yure ji ñaiyeque. ³⁴iMuja, jujovaiyu, ãdavape paivubu muja! Mujarecabu dápiayu ãmene. Que baru ãme matuiyede yávaivubu muja. Aru méne yávarí buojabevu muja. ³⁵Ñai pōecu meacu yávayube méne, ñi ñmei mearo cue boje. Aru ñai pōecu ãmecu yávayube ãmene, ñi ñmei ãmeno cue boje. Que baru pōecu yávaibi ñi jijecamuque ñre cuede ñi ñmei. ³⁶Coyuyubu mujare: Ñijáravu daquijáravu baquinó Jümenijicui ñájiovaquijáravu baquinóre pōevare, ne ãmeina teiye boje, caivu ñbenina yávaivu bácvure ñájine ñacuyume Jümenijicu, ne nópe yávaiye báque boje. ³⁷Muje yávaiyeque jáðovaiyubu aipe muje dápiayede. Que baru Jümenijicu bojedacuyume mujare yópe muje yávaiyepere. Muje ména yávaru, mujare boropatebevure jácuyume Jümenijicu. Æbenita muje ãmeina yávaru, mujare boropateivure jácuyume ñ, arí buedejame Jesús.

**Pōeva ne ñarí majibenore Jesúsre
ñaicōjeniduo**
(Mt 16.1, 4; Mr 8.11-12; Lc 11.16, 29-32)

³⁸Dinūmure apevu ina Jümenijicui yávaiye báquede bueipōevacavu

aru apevu fariseovacavu máre yópe arí durejaima Jesúsre:

—Mu, bueipōecu, Jümenijicui majiéque ñarí jáðovajacu pōeva ne ñarí majibenore, arí durejaima.

³⁹Æbenita Jesúsapūravu yópe arejame náre:

—Ñmena bajutamu muja. Jümenijicure dajocaiyurivubu muja yópe nomio ãmeco ñi dajocaiyepere jímarepacure jocarí. Que baru jēniariduiyubu ji jádovaquiyepere aivu Jümenijicui majiéque ñainore, pōeva ne ñarí majibenore. Æbenita jámenamu apenore Jümenijicui ñainore mujare, quénora yo Jonás mácure vaino mácarōre.

⁴⁰Yópe Jonás mácui cue báquepe moacu uracui yapibu jívui yóbecurijáravua aru yóbecuríñamia máre, nopedeca yu, Jümenijicui daroimu mácu ñmure, cuscuyumu joborō jívui yóbecurijáravua aru yóbecuríñamia máre.

⁴¹Aru Jümenijicui ñájiovaquijáravu baquinóre pōevare, ne ãmeina teiye boje, ina ñmuva mácvu, Nínivecavu bácvu, nacajarajarama muja ijáravucavūque, aru ñmecororājarama mujare, yure muje ju abe boje. Aru ina Nínivecavu bácvu chíori ne ãmeina teiye báquede oatvarejaquemavu, jápiayu bácvu Jonás mácui coyuiyede Jümenijicui yávaiyede. Æbenita Jonás mácui majié pueno baju bueyubu yu. ⁴²Aru Jümenijicui ñájiovaquijáravu baquinóre pōevare, ne ãmeina teiye boje, ico jaboco, aviá daino cācopūravucaco báco, nacajacoðome muja ijáravucavūque aru ñmecorocoðome mujare, yure muje ju abe boje. Ñ máco darejaquemavu joarō joborōre jocarí, jápiacoðo ñai Salomón mácui coyuiye báquede ñi majiéque. Æbenita Salomón mácui majié pueno baju bueyubu yu, arejame Jesús.

Jesús ñi coyūino abujucui copainore
(Lc 11.24-26)

⁴³Bediōva cojedeca Jesús, yópe arí, buedejame:

—Abujucu etayu bácu ñmure jocarí, voibi ñi jabuóvaino penenoi, pōecubenoí.

⁴⁴ Ëbenita jabuóvaino eabecu baru, copaiyubi ñai ñmu, ñi etaimu máscrecata. Aru copaini dayu, eaibi ñai ñmu meacure, yópe cūrami oeni meadainamipe páyure. ⁴⁵ Que teni nuñu, nuvaimi apevu siete paivu abujuva ñi pueno ámenare. Aru ne ecoiyede ñai ñmure, ámedadama úre pueno baju. Nopedeca vaiquiyebu ijāravucavu ámenare. Ñájinajarama yóbocajārvuare ne mamarumñu ñájiye báque pueno, arejame Jesús.

Jesús ñi jina ne voino úre

(Mr 3.31-35; Lc 8.19-21)

⁴⁶ Jesús ñi coyuiyede ina pōevare, jípacu aru ñi yóva máre úque boroteiyurivu edarejaimada ñi curōi. Ëbenita jedevamia mautedejaimada na. ⁴⁷ Aru cūinácū nore cucū arejame Jesúsre: —Mipacu aru míyova máre, mure járadaivu, jedevai núma, arejame.

⁴⁸ Ëbenita Jesúcapūravu arejame úre coyuyú báscure:

—¿Namema jípacu aru jíyova? jēniari járejame ñi.

⁴⁹ Aru ñi purure jabióvarí jáđovacuñu ñujare, ñi bueimarare, arejame:

—Yuibu jípacope paivu aru jíyovape paivu máre. ⁵⁰ Que baru caivu ina ñaivu jípacu, cavarō mearocacu, ñi nrōpe, nárecabu jíyocupe páyū, jíyocope páđo, aru jípacope páđo máre, arejame Jesús.

“Oteipōecure” jári dápiarí ne ñarājiyepe aino

(Mr 4.1-9; Lc 5.1-3, 8.4-8)

13 ¹ Dijāravumareca cūramine etarí, macajitabu urabu écarui nuri, dobarejame Jesús. ² Obedivu pōeva cójjijidejaima ñi yebai. Que baru jíadocū écaru joabenoí curicūre jári, jaturí, dobarejame dicūra, buescuyú pōevare. Aru caivu ina pōeva cūrejaima macajitabu urabu écarui. ³ Jesús buedejame ñujare jári dápiarí ñuje ñarājiyepe ayu caijē apejēne. Yópe arí, buedejame:

—Yui oteipōescu otescunquemavu. ⁴ Ëi oteiyede, ape oteiyete tuquemavu ma

écarui. Aru mójina darí, āradaquemavu caiye iye oteiyede. ⁵ Ape oteiyete tuquemavu joborō edubenoí, cūraboa puenoí. Nore joborō yaurijē cubeniburu, maumejiena píarí etaquemavu. ⁶ Ëbenita aviá ñi boiyede, équemavu. Aru nuomua ñmujurimua cubeni, yaiquémavu. ⁷ Ape oteiyete tuquemavu miucua jēneboí. Aru yóboi miucua bucuní, chíquemavu iye oteiyede. ⁸ Aru ape oteiyete tuquemavu mearo joborōi. Aru die jēquemavu, apeñu jēiñu cien paivua, apeñu jēiñu sesenta paivua, aru apeñu jēiñu treinta paivua, caiye oteiyabea coapa. ⁹ Me jápiajarā muja iye ji bueiyede, arejame Jesús.

Aipe aiyurōre Jesús ñi jári dápiarí ne ñarājiyepe aino

(Mt 25.29; Mr 4.10-12, 25; Lc 8.9-10, 18, 10.23-24, 19.26)

¹⁰ Dinumure ñuja, ñi bueimara, ñi yebai nuri, jēniari járejacarā Jesúsre: —¿Aipe teni bueyurū mu jári dápiarí ñuje ñarājiyepe ayu mi coyuiyeque? arejacarā.

¹¹ Aru Jesús coyurejame ñujare, yópe arí:

—Mujare coyurí majide dayubu iye Jūmenijicu ñi coyucōjeme máquede. Ë jaboteibi mujare, ñi pōevare. Ëbenita ina apevu, iyede majibevure, quéda jári dápiarí ne ñarājiyepe ayu, bueyubu yu náre. ¹² Nopedeca ina jápiaivure Jūmenijicui yávaiyede, Jūmenijicu pueno baju majide ñacuyume náre. Ëbenita ina jápiabevure Jūmenijicui yávaiyede, iye ne quíjino majiēde, Jūmenijicu náre ícuyume. ¹³ Jáivnvacari ji ñaiyede, coreóvayubema yure. Aru jápiaivnvacari ji coyuiyede, ju aiyubema yure. Yéde majibema na ji yávaiyede. Que baru jári dápiarí ne ñarājiyeque coyuyubu yu náre. ¹⁴ Ne ñaiye nópe vaidéjaquemavu cūináturu Jūmenijicui coyucōjeiye báquepedeca ñai Isaías ámicucu ñi yávaiyede coyucaipōescu báscure. Yópe arí, toivaicōjenejaquemavu ñi máscure:

Jāve jápiarídurājaramu muja.

Ëbenita yē jápiarí eabenajaramu.

Jāve jārīdurājaramu mūja.
 Ūbenita ye jārī eabenajaramu.
 15 Mūja coreóvaivūbevu, mūje yávaiyede jāvene jārīarī eaiyūbe boje. Mūja jāpiabevū, mūje yávaiyede jāvene jāpiayūbe boje. Mūja bieivū mūje yacorūare, mūje jāvene jāiyūbe boje. Yūre jārī coreóvaivū baru mūje yacorūaque, ju ajebu mūja. Yūre jāpiaivū baru mūje cāmucobeaque, ju ajebu mūja. Yūre jārīarī adaivū baru mūje ūmeque, ju ajebu mūja. Que daivure, meadajebu yu mūjare, toivaicōjenejaquemavū Jūmenijicū Isaiás bācure.

16 Ūbenita torojūmā jaramu mūja, ji bueimara. Ji daiyede jārī coreóvaivūbu mūje jāiyede. Aru ji coyūiyede jārīarī, ju aivūbu diede. Que baru Jūmenijicū mearo đacaimaramu mūja. 17 Jāve coyūyūbu mūjare: Obedivū Jūmenijicū yávaiyede coyūcaipōeva aru meara pōeva máre jāiyūrīduquemavū caiye iye mūje jāiyede. Ūbenita jāmetequemavū. Aru jāpiayūrīduquemavū caiye iye mūje jāpiayēde. Ūbenita jāpiabetequemavū, arī coyūrejame űjare Jesús.

**Jesús űi coyūino aipe aiyūrōre
 “oteipōecure” jārī dāpiarī ne
 đarājiyepe aino**
(Mr 4.13-20; Lc 8.11-15)

18 Yōpe arī, Jesús coyūrejame űjā űi bueimarare:

—Yo jārī dāpiarī mūje đarājiyepe ayū ji aino mácarō yōpe coyūiyūrōmu mūjare: Iye oteiye Jūmenijicū yávaiyepe paiyebu űi jaboteinoque yávaiye. Aru űai oteipōecu Jūmenijicū yávaiyede bueipōecupe páyūbe. 19 Aru inamu ma ēcarūi oteiye turīduiye báquepe paivū. Náre coyūiyede Jūmenijicū yávaiyede jāpiadama, űbenita coreóvarī eabevūva. Que baru ne jārīarīburu yóboi, űai abujuvai jabocu darī, ārūmetede đabi Jūmenijicū yávaiyede, ne jāpiayē bāquede. 20 Aru inamu joborō edubenoī, cūraboā pūenoī, oteiye turīduiye báquepe paivū. Jūmenijicū yávaiyede

jārīarī, torojūma me. 21 Ūbenita diede ju arīduyama na. Que baru quījino yóboi, pōeva ne cārījovaru aru űājine đaru náre, ne ju aiye boje, maumena đajocađama ne ju aiyede Jūmenijicū yávaiyede. Que teni ju abema na.

22 Aru inamu miucūa jēneboi oteiye turīduiye báquepe paivū. Na máre jāpiaivū Jūmenijicū yávaiyede, űbenita cārījiñama ijāravūquede. Aru torojūma tautūraque. Que baru dāpiadama caiye diede. Ūbenita dāpiabema Jūmenijicū yávaiyede. Que baru Jūmenijicū cadatebebi náre űi yávaiyeque yōpe űi urōpe. 23 Ūbenita inamu mearo joborōi oteiye tuiye báquepe paivū. Jūmenijicū yávaiyede jāpiadama. Aru diede jārīarī coreóvadama. Nárecabu ju are đaivū apevū pōevare, apevū cien paivūre, aru apevū sesenta paivūre, aru apevū treinta paivūre, arī buedejame Jesús űjā űi bueimarare.

**“Āmecōria oteiye jēneboi” jārī
 dāpiarī ne đarājiyepe aino**

24 Apeno jārī dāpiarī űjē đarājiyepe ainoque buedejame Jesús:

—Jūmenijicū jaboteino yōpe painomu. Cūinácū űmu űi oteiye méne, trigo āmicūede, otequemavū jioī. 25 Ūbenita űami, pōeva ne cāiyede, űi maucu dupini darī, otequemavū āmecōriare űi oteiye jēneboi. Aru que đarī buojarī, űuquemavū űai űi maucu. 26 Que baru oteiye me pīarī bucūiyede, āmecōria máre pīarī bucūquemavū. 27 Dinūmure űai jio upacu űre memecaivū űi yebai nurī, aquemavū: “Mū, űjē jabocu, ¿otebetecurū oteiye méne jioī? Jājacu. Mī oteiyeque āmecōria máre cuvū”, arī coyūquemavū. 28 űai jio upacu náre coyūyū: “Ji maucu que đayūme”, aquemavū. Ūre memecaivū jēniari jāquemavū: “¿Iye āmecōriare ĩnajidi űjā?” aquemavū. 29 Ūbenita űai jio upacu aquemavū: “Bítamu. Mūje űyede āmene, méne máre ĩnajichūvū mūja. 30 Bucūicōjejara caiyede, oteiye méne aru āmecōriare máre, pu jējāravū eaiyeta. Jējāravū eaiyede, yōpe

coyucnyumtu yu ji oteiyede ícaipõevare: ‘Mamarumũ ijara mũja iye ãmecõriare. Ìni, tóroa ðarĩ, ditoroa coapa buorĩ, juajarã mũja. Ëbenita iye oteiyede méne trigo ãmicuẽde ñiniburu, epejarã ji epeiñami jívui’, coyucnyumtu náre”, aquemavũ ñai jio upacu, arĩ buedejame Jesús.

“Oteiyabe mostazare” jári dápiarĩ ne ðarãjiyepe aino

(Mr 4.30-32; Lc 13.18-19)

³¹ Apeno jári dápiarĩ ñuje ðarãjiyepe ainoque buedejame Jesús:

—Coyuqijivũ mũjare aipe ãrojarore yo Jũmenijicui jaboteinore. Yópe mostaza ãmicuriyabe oteiyabepebu. Cũinácũ ãmu diyabede ñni, oteibi ãi jioi. ³² Diyabedecabu oteiyabe quĩjiyabe caiye oteiyede pueno. Ëbenita ãi oteniburu yóboi, bucũrĩ mũivũ uracu ape oteiyede pueno. Aru dicũ cavabua uracavabua mũivũ, dicũ taino cãchinoi mĩjina ne juaiboa ðaðama, arejame Jesús.

Nopedeca mamarumũre Jũmenijicui jaboteino quĩjinotamu, põeva obebevu ne cue boje noi. Ëbenita Jũmenijicui yávaiye méne coyurĩburu yóboi, urarõtamu no Jũmenijicui jaboteino, obedivũ põeva ne cue boje noi.

“Páure bucure ðaiyede” jári dápiarĩ ne ðarãjiyepe aino

(Lc 13.20-21)

³³ Bediõva diede buedejame Jesús apeno jári dápiarĩ ñuje ðarãjiyepe ainoque, yópe arĩ:

—Jũmenijicui jaboteino yópebu nomió õi páure bucure ðaiyede. Diede ðarĩ jívaiyepebu yóbecuricubua páu ðaicurubua. Aru caino jívai bore bucuvainopebu, arejame Jesús.

Aipe teni Jesús ãi bueno jári dápiarĩ ne ðarãjiyepe aiyede

(Mr 4.33-34)

³⁴ Caiye iye jári dápiarĩ ne ðarãjiyepe aiyede coyurejame Jesús ina obedivũ põevare. Coyure curejame cainumua jári dápiarĩ ne ðarãjiyepe aiyequẽ ãi

bueinore. ³⁵ Nópe vaidéjavũ cũináturu Jũmenijicui coyucõjeiye báquepedeca cũinácũ ãi yávaiyede coyucãipõescu bácuere. Yópe arĩ, toivaicõjeneaquemavũ ãi mácuere Jũmenijicui:

Jári dápiarĩ ne ðarãjiyepe ainoque coyucnyumtu yu põevare. Iye yávaiye jáðovame máquede Jũmenijicui járavũre cuẽðaquiye jipocamata coyucnyumtu yu náre, arĩ toivaicõjeneaquemavũ.

Jesús ãi coyũino aipe aiyurõre “ãmecõria oteiyede jẽneboi” jári dápiarĩ ne ðarãjiyepe aino

³⁶ Dinumũ ina obedivũ põevare ðajocarĩ, cũrami ecorejame Jesús. Aru noi ñũja, ãi bueimara, ãi yebai nurĩ, yópe arejaraã úre:

—Mu, bueipõescu, coyujacu ñũjare aipe aiyurõre yo jári dápiarĩ ñuje ðarãjiyepe ayu mi aino mácarõre, ãmecõria oteiyede jẽneboi, arejaraã.

³⁷ Yópe arĩ, coyurejame ñũjare Jesús:

—Ñai jio upacu oteiyede méne oteicõjeũpe páyubu yu, Jũmenijicui ðaroimũ mácu ãmũpe. ³⁸ Ëi jio ijãravũre painomu. Iye trigo ãmicue oteiyebu Jũmenijicui jaboteimarape paivũ. Aru iye ãmecõriamũ abujuvai jabocui jaboteimarape paivũ. ³⁹ Ñai jio upacui maucube, ãmecõriare oteyũ, abujuvai jabocupe páyũ. No járavũ oteiyede jẽijãravũ ijãravũ cũiquĩjáravũre painomu. Aru ina oteiyede ícaipõevamũ ángelevape paivũ. ⁴⁰ Yópe ne ñni juaiyepe toaque iye ãmecõriare, nopedecca vaiquĩyebu ijãravũ cũiyede.

⁴¹ Yu, Jũmenijicui ðaroimũ mácu ãmũpe, darocnyumtu ji ángelevare ji jaboteimara yebai. Ina ángeleva ñnajarama caivũ ina ji jaboteimara jẽneboi ãmeina ðaivũre aru apevũre ãmeina ðare ðaivũre máre. ⁴² Náre ñni jarorãjarama toabo cũimẽboi. Chõioivũ orĩ curãjarama nore. Aru jaraã cõpi curãjarama na. ⁴³ Dinumũ maquinõre ina põeva meara, ina ðaivũ yópe Jũmenijicui urõpe, curãjarama majeracu Jũmenijicui jaboteinoi, miadãre ðaivũre

yópe aviá ùi boiyepe. Me jápiajarā mña iye ji bueiye, arejame Jesús.

**“Bojecue yaveiyede” jári
dápiarī ne ðarājiyepe aino**

⁴⁴ Apeno jári dápiarī ñuje ðarājiyepe ainoque buedejame Jesús:

—Jūmenijicui jaboteinomu yópe bojecuede yaveiye báquepe jioi. Cūinácu ūmu memēñu, ùi ūiyede joborō jívui eayu baru bojecuede yaveiye báquede noi, epeni yaveyube diede cojedeca. Aru jiore copainuri, caiye ùi cūvaede jíni bojedari, no jiore bojedayube, cuvacyu iye bojecuede, arejame Jesús.

**“Perla āmicurijībo cūrajībo
pare bojecurijībo” jári
dápiarī ne ðarājiyepe aino**

⁴⁵ Apeno jári dápiarī ñuje ðarājiyepe ainoque buedejame Jesús:

—Jūmenijicui jaboteinomu yópe bojedaiþōecui voiyepe cūrajībo perla āmicurijībo bojecurijīboare. ⁴⁶ Ñai ūmu eayu baru cūinájībo perla āmicurijībo cūrajībo, bojecurijībo caiboa apeboa pñeno, caiye ùi cūvaede jíni bojedacunuñume, ñni bojedacuyu nijībo, arejame Jesús.

**“Pápicu uracure” jári dápiarī
ne ðarājiyepe aino**

⁴⁷ Apeno jári dápiarī ñuje ðarājiyepe ainoque buedejame Jesús:

—Jūmenijicui jaboteinomu yópe pápicu uracu ne jaboáicu jia uradaí, obedivu moa ne coiyepe dicui. ⁴⁸ Dicu buiyede, ina moa boaiþōeva dicure nvari, jabuborī écaruita, noi dobarī, jári beorī adaivubu caivu ina moa mearare ne pñeá jívui. Aru caivu ina āmenare jaruvaivubu na. ⁴⁹ Nopedeca vaiquíyebu ijāravu cūiyede. Ina ángeleva darī, jári beorī ñajarama ina þōeva āmenare ina meara jēneboi. ⁵⁰ Ina āmenare jararājarama toabo cūiméboi. Chōivū orī curājarama nore. Aru jararī cōpi cūrajarama na, arejame Jesús.

Bueiye mamae aru javeque máre

⁵¹ Yópe arī, jēniari járejame ñujare Jesús:

—¿Caiye iye ji coyuiyede mñjare jápiarī eaivurū mña? arejame ñujare.

Aru arejacarā úre:

—Jápiarī eaivubu ñuja, arejacarā.

⁵² Que arī, Jesús arejame ñujare:

—Caivu ina Jūmenijicui yávaiye báquede bueiþōeva bueivū baru Jūmenijicui jaboteiyede ùi þōevare yópe ji coyuiyepe, bueni buojarājarama Jūmenijicui yávaiye báque jave de aru Jūmenijicui yávaiye mamaene máre, cadatenajivū ina jápiaivure, ne majinajiyeye aivu aipe ðaiye jaurōre. Nopedeca cūrami upacu davaibi ùi cuvae javequede aru mamaene máre ùi epeiye báquede ùi cūrami jívui, cadatecuyū ðinamicavure ne ðaiyede, arejame Jesús.

Jesús Nazarei ùi nuino

(Mr 6.1-6; Lc 4.16-30; Jn 4.44)

⁵³ Caiye iye jári dápiarī ne ðarājiyepe aiyede coyurīburu yóboi, nñrejame Jesús nore jocarī. ⁵⁴ Copainñrejame ùi joborōi. Aru judíovai cōjjiñami buedejame þōevare. Úre jápiaivu cuēcumari arejaima:

—¿Ároqueba caiye iye ùi majié aru iye ùi ðaiye þōeva ne ðarī majibede? ⁵⁵ ¿Ñai āmeni jocure memeiþōecui mácu? ¿Ico María āmicuco āmeni jípacu? ¿Úi yóva āmeni Santiago, José, Simón, aru Judas máre? ⁵⁶ ¿Aru ùi yórōmiva máre cubedi majaque yui? Que baru, ¿ároqueba caiye iye ùi ðaiye ñai ūmu, majape páyu? jēniari járejaima na.

⁵⁷ Que arī, āmeina járejaima úre. Ubenita Jesúsapūravu náre arejame, ne ju abe boje úre:

—Cubebi Jūmenijicui yávaiyede coyucaipōecu ne pueðaimū ùi joborōcavu aru ùi cūramicavu máre, arejame.

⁵⁸ Aru obebejie þōeva ne ðarī majibede ðarejame nore, ne ju abe boje úre.

Juan Bautista bácu ùi yaino

(Mr 6.14-29; Lc 3.19-20, 9.7-9)

14 ¹ Dinmu ñai Herodes, ñuja Galilea āmicurijīborōcavu ñuje

jabocu, jápiarejameđa Jesúí borore.

²Jápiayũ, úre memecaivure arejameđa:

—Ñaime Juan Bautista. Nacajacube yainore jarũvarí. Que baru yópe parucube ũ, ũbenina arejameđa.

³Nópe dápiarejameđa Herodes, Juan Bautista bácu arucure cãreja, ũi yaiquiye jipocai, Herodes ũi buoicõjeiye báque boje úre. Aru buoicõjenejameđa, jacocuyũ ãmeina teivure jëni jacoĩnami, yópe Herodei márepaco Herodíai urópe. Nópe urejacođa, õi jorojĩye boje ũi ãmecoroie báquede Herodede, ũi cuvae boje óre, ímacu Felipei márepacore. ⁴Javede Juan Bautista bácu ávarejameđa Herodede: “Jũmenijicui ðaicõjeiye Moisés bácu ũi coyuiye báque cuvaicõjemevũ mure apecui márepacore”, ávarejameđa úre.

⁵Herodecapuravu Juan Bautista bácu boarí jarũvaiyucuvacari, jidurejameđa ina obedivũ põevare, “Jũmenijicui yávaiyede coyũcaipõecube Juan Bautista”, arí dápiaivure. ⁶Ūbenita cüinájaravu ũi arũrijãravũ eaiyede, Herodei põeteijãravũ bácarõre, torojuve teino ðarejameđa ũ. Dijãravure Herodíai máco nuri, uparejacođa caivũ ina Herodei cutuimara ne jáiyyede. Que teni Herodede pare coyũarejacođa õ. ⁷Que baru parúque arejameđa óre:

—Jíquiivũ mure yéde mi urõre. Yure ñãjine ðajacurí Jũmenijicu, ji ðabedu yópe ji ainope, arejameđa.

⁸Jípaco jëniaicõjenejacođa óre. Aru ico nomiõ bojũyo arejacođa Herodede:

—Jíjacu yure carijie Juan Bautistai jipobure jororũque, arejacođa õ.

⁹Õi jëniainore jápiarí, chíorejameđa ñai jabocu. Ūbenita ũi aiye báque boje parúque ũi cutuimara ne jápiaiyede, jícaicõjenejameđa óre. ¹⁰Boaipõecure jarorejameđa ãmeina teivure jëni jacoĩnami jívui, ũi burarí jarũvaquiyepẽ ayũ Juan Bautistai jipobure. ¹¹Burarí buojarí, jororũque nuvari, jídejameđa ico nomiõ bojũyore. Aru jídejacođa jípacore, õi majicojiyepẽ ado Juan Bautista bácu jáve yaivyá bácu.

¹²Aru Juan Bautista bácuí bueimara

nuvarejaimađa ũi baju bácarõre, jarũvarãjivũ cũracobe jívui. Que teniburu yóboi, coyũrãnurejaimađa Jesúre die borore.

Jesús ũi ãre ðaino cüinápurupe paimil baju ũmũvare

(Mr 6.30-44; Lc 9.10-17; Jn 6.1-14)

¹³Jesús diede jápiayũ bácu, nore jocarí nurejame jíadocüi, ina põeva obedivure ðajocarí, pũ põecubenoita. Ūbenita nuñũre majidejaimađa na. Aru mái ũi yóboi nurejaima na, obedivũ ímaroacavũ. ¹⁴Ūi jataiyede, êcarui mari, ina obedivũ põevare cõmaje ãroje járejame Jesús. Nãcavũ ijimarare meadarejame ũ. ¹⁵Nainúta ñũja ũi bueimara ũi yebai nuri, coyũrejagarã úre:

—Nainútamu majare yui põecubenoí.

Põeva ne ãrajiyede bojedãrãnicõjejacu mũ. Noi ímajinoai jarorí, náre “Ãranũjara” ajacu mũ, aridurejagarã Jesúre.

¹⁶Ñũjare arejame:

—Ne ãrajiyede bojedãrãniye jaubevũ náre. Jíjarã mũja ne ãrajiyede, arejame ñũjare.

¹⁷Úre arejagarã:

—Pãuboa cüinápurupe paiboa aru moa pũcarã cuvavũ ñũja, arejagarã Jesúre.

¹⁸—Diede davajarã ji yebai, arejame Jesús.

¹⁹Dinũmũre cõriá pũenora põevare dobaicõjenejame Jesús. Aru die pãuboa cüinápurupe paiboa aru moa pũcarãre jëni, cavarõi jáñũ, torojuede jídejame Jũmenijicure. Ūi cotũvaríburu yóboi pãuboa, ñũja ũi bueimara jídejagarã diede ina põevare, yópe Jesús ũi jícõjeiye báquipedeca ñũjare. ²⁰Aru caivũ ãri, yapidejaima na. ãri bubaríburu yóboi, iye cotũvaiye báquede, ne ãri oabede, ñni, meadãrí, pũebua doce paibua, judíovai pũebua, buivãrejagarã ñũja. ²¹Aru ina ãivu bácvũ ũmũva cüinápurupe paimil baju barejáima. Apevũ, nomiva aru jueðova máre, ãrejaima na.

Jesús ũi cuino oco pũenora

(Mr 6.45-52; Jn 6.16-21)

²²Dinũmũ Jesús jatuicõjenejame ñũja ũi bueimare jíadocüi, ñũje nuãrajyepẽ

ayu ñi jipocai macajitabu urabu apeduvei. Que teni copaicōjenezamedā ina pōevare ne cūramiai. ²³Ne nūriburu yóboi, Jūmenijicure coyucunūrejamedā cūinácuva cūracūi. Noi ñi coyuiyede Jūmenijicuque, ñami marejávūya. ²⁴Dicū, ñuje jiadocū, macajitabu urabu coricai curejavū. Pācaiboa uraboa jarururejavū dicūre. Aru ūmevu cobarejavū ñujare.

²⁵Aru jāravucapūravui aviá ñi daquie jipocai, Jesús curi macajitabu urabu puenora dārejame ñuje yebai.

²⁶Ūbenita ñuja jáivu ũ cuyre macajitabu urabu puenora, jidūrivu baju cođoboborejara:

—iPōe decocu bācutame! arī cođoboborejara ñuja, jidūrivu.

²⁷Ūbenita maumena ñujare coyurī, arejame Jesús:

—Paréque dápijarā. Yútamu Jesús. Jidūbejarā muja, arejame ũ.

²⁸Dinūmuma Pedro arejame ũre:

—Mū, ji jabocu, jāve mū maru, yure daicōjeyacu mi yebai, oco puenora, arejame ũ.

²⁹Aru Jesús arejame ũre:

—Dajacu, arejame.

Que jápiayu, Pedro etarejame dicūre jocarī. Aru vaivārejame oco puenora, nūriducuyū Jesús yebai. ³⁰Ūbenita ūmevu pare japuiyede jāri, jidūrejamedā ũ. Jidūcu, corī búrejame. Que baru cođoboborejame:

—iMū, ji jabocu, cađatejacu yure! arejame.

³¹Maumejiena Jesús jabióvarejame Pedroe ũi pūru. Aru arejame ũre:

—¿Aipe teni jidūcurū mu? ¿Aipe teni “Jesús meadacuyame yure”, abecurū mu? arejame Pedroe.

³²Ne jatuiyede dicū jiadocūi, ūmevu bíjarejavū. ³³Aru ñuja dicūi curivu mearore jídejarā Jesúsre.

—Jāve mútamu Jūmenijicui mácu, arejara ũre.

Jesús ũi meadaino Genesarecavu

ijimarare

(Mr 6.53-56)

³⁴Jatarīburu yóboi, earejara Genesaret āmicurijoborōi. ³⁵Aru dicūre

jocarī etaivu bācavure, obedivu pōeva coreóvarejaima Jesúsre. Que baru ñi borore jarorejaimada caino ne ĩmaroai, ne davarājiyepe aivu ijimarare. ³⁶Ūre jēniarejaima, jēni járajivu ũi cuitótecaje turūvarā. Aru aiavu jēni jáivu meateivu barejāima na, ijimara mácavu.

Iye pōevare āmeina tede ñaiye

(Mt 12.34; Mr 7.1-23; Lc 6.39)

15 ¹Dinūmū fariseovacavu apēvu Jūmenijicui yávaiye báquede buiepōevaque, Jerusalēn āmicurīmarore jocarī daivu bācavu, járadarejaima Jesúsre. Aru ũre yópe arī, jēniari járejaima:

²—¿Aipe teni mi buemara ne pūruáre cojabedi ne ārajiye jipocai, Jūmenijicui me jáquiepe aivu náre? Yópe ne āiyede, majeñecuva mácavu ne ñaicōjeiye báquede vainí tūyama na, arejaima.

³Jesús náre yópe arī, coyurejame:

—¿Muja máre, aipe teni vainí tuivurū Jūmenijicui ñaicōjeiye, ñarājivu yópe mujeñecuva mácavu ne ñaicōjeiye báquere? ⁴Jūmenijicu yópe aicōjenezajuemavu: “Mipacure aru mipacore máre urī, ju ajarā. Ūbenita ñaine āmeno coyuyure jípacure o jípacore máre, muje jabova boarī jaruvajarāri ũre”, arejaquemavu Jūmenijicu, ũi ũe boje pōeva ne cađatequiepe ayū nébucūvare.

⁵Ūbenita muja bueivūbu yópe: “Cūinácū pōecu jípacore o jípacore ayū baru, ‘Mure cađateyu buojabevu. Ji tāuturare, muje jacorpūroede, javeita jícacu yū Jūmenijicure’, ayū bájebu ũ. ⁶Ñai pōecure cađateiye jābevū ũi būcūvare”, aivūbu muja. Que baru muje ñaiye boje yópe mujeñecuva mácavu ne ñaicōjeiye báquere, Jūmenijicui yávaiyede bojecubede ñaivūbu muja. ⁷Muja, jujovaiyu, jāve Jūmenijicu, yópe arī, coyucaicōjenezajuemavu ũi yávaiyede Isaías bācure mujara:

⁸Ina pōeva yure ju adama ne jijecamuque. Ūbenita ñabema yópe ji urōpe. ⁹Bojecubenoque

mearore jíniduyama yure.
Bueniduyama pōeva ne
bueinore Jūmenijicui yávaiyepe,
arejaquemavū.

Que arejame Jesús ina fariseovare
aru ina Jūmenijicui yávaiye báquede
bueipōevare.

¹⁰ Jesús órejarejame ina pōevare ũi
yebai. Aru arejame náre:

—Caivu yure jápiaivū dápijarā.

¹¹ Caiye iye ecoiye pōeva ne jijecamui
jedevaque āmeina tede đabevū náre.
Ūbenita caiye iye etaiye pōeva ne
jijecamure jocarī ne ũmeque āmeina
tede đaivū náre, arejame Jesús.

¹² Dinumure ñuja, ũi bueimara, ũi
yebai nurī, arejarcā Jesúre:

—Ina fariseova jorojñnama mure, ne
jápiayede mi coyuiyede, arejarcā ũre.

¹³ Yópe arī, coyurejame ñujare:

—Yópe jio upacui ĩni jaruvaiyepe
caiye āmene bucuiyede ũi jioi, ũi oteiye
báque āmene, nopedeca jipacu, cavarō
mearocacu, ĩni jaruvacuyme ũre jocarī
caivu ina ũre coyucaipōevape teivure
ubenina. ¹⁴ Náre cārījovaicōjemejara
muja. Námu jári eabevure paivū
jipocateiyurivū apévure, ũbenita jāve
ñamene cađateni majibevū. Cūinácu
jári eabecu buojabebi nuñu mái apecu
jári eabecuque. Que baru caipucarā jári
eabevū baru, tujebu na cobei, arejame
Jesús.

¹⁵ Pedrocápūravū arejame ũre:

—Coyujacu ñujare aipe aiyurōre yo
jári dápiarī ñuje darājiyepe ainore,
arejame ũ.

¹⁶ Aru arejame:

—¿Muja máre jápiarī coreóvabenaarū?

¹⁷ ¿Coreóvabenaarū caiye iye ecoiyede
pōeva ne jijecamui jedevaque, ne
yapibui earī etaiyede ne bajure jocarī?

¹⁸ Ūbenita caiye iye etaiye pōeva ne
jijecamure jocarī ne ũmeque, diedecabu,
ne dápiaye, āmeina tede đaiye
náre. ¹⁹ Ne ũmei āmeina dápiadama
apévure. Boarī jaruvadama pōevare.
Nomicurivuvacarī apocoque suma.
O nomiva máre ũmucurivuvacarī
apecuque suma. Nomicubevū, aru

ũmucubevū máre, đadama caiyede
āmeina đaiyede apévūque. Ñavadama
apévū ne cūvaede. Borocuma apévui
borore. Aru coyuyama āmenore apévui
borore caivu ne jápiayede. ²⁰ Caiye iye
āmene etaiye pōeva ne ũme jívūquede,
āmeume cure đaivū náre. Ūbenita ne
āiyede ne puruáre cojabevūva, đabevū
yópe mujeñecuva mácavū ne đaicōjeiye
báquepe, āmeina tede đabevū náre,
arejame Jesús.

**Cūináco nomió, judíoiva āmevucaco,
ó i ju aino Jesúre**
(Mr 7.24-30)

²¹ Dīmarore jocarī, Jesús nurejame
apejaborōi, Tiro aru Sidón āmicurīmaroa
yebai. ²² Aru cūináco nócano, judíoiva
āmevucaco, Canaán āmicuriyajubocaco,
ũi yebai darī, yópe arī, codoboborejaco:

—Mu, ji jabocu, David bácuī pāramecu,
judíoiva jabocu bacuyá, cōmaje āroje
jájacu yure. Jímacobe abujucu ũi ĩmamo.
Pare ñájiñome ō, arejaco ō.

²³ Ūbenita Jesúcapūravū bi ayū,
yéde coyubedejame óre. Aru ñuja ũi
bueimaracápūravū Jesús yebai nurī, ũre
jaroicōjenidurejarcā óre.

—Maje yóboi codoboborī daibico
ō. Que baru óre copainure đajacu mu,
arīdurejarcā.

²⁴ Jesús arejame:

—Jipacu Jūmenijicu daroibi yure, ji
cađatequiyepe ayū ñuja Israecavure
quévura. Námu yópe ovejava
mamateivure paivū, náre coreipōecu
cuvabevure, arejame Jesús.

²⁵ Ūbenita ō darī, ñuatutarī ũi jipocai,
puedacođo ũre, arejaco:

—Mu, ji jabocu, cađatejacu yure,
arejaco.

²⁶ Jesúcapūravū arejame óre:

—Meamevū ĩnu juedova ne āiyede,
jínajivū yavimivare, arejame ũ.

Que arī, aiyucu barejaquemavū
judíoivare Jūmenijicui mārāpe aru
judíoiva āmevure yavimivare.

²⁷ Aru ócapūravū arejaco:

—Mu, ji jabocu, jāve coyuvū mu.
Ūbenita yavimiva máre đadama náre

upacü jivü ne äri jarüvayie tuiye báquede tuoivare jocarí, arejaco Jesúre.

²⁸ Jesús arejame:

—Mü, ji ümo, urarõ ju adobu yure.

Que baru ðacaivü müre yópe mi urõpe, arejame óre Jesús.

Aru cüiná meatedejaquemavü õi máco.

Jesús üi meadaino obedivü ijimarare

²⁹ Jesús nürejame nore jocarí.

Vaidéjame macajitabü urabü Galilea ämicurijitabü écarü. Aru cüracü uracüü müri nuriburu yóboi, dicü pñenoí dobarejame ü. ³⁰Noi dobacure, obedivü pöeva darejaima üi yebai. Davarejaima cuiye majibevüre, jári eabevüre, purü ijimarare, yávayie majibevüre, aru apévure máre. Náre jüarejaima Jesúü cuboba yebai. Aru náre meadarejame ü. ³¹Que teni caivü ina obedivü pöeva cuicumarejaima ne jáiyede ina yávayie majibevü bácvü yávaivüre, ina ijimara mácvü meadaimarare, ina cuiye majibevü bácvü vaiváivüre, aru ina jári eabevü bácvü jáivüre. Aru caivü ina pöeva mearore jídejaima Jümenijicure, maja Israecavü maje mearore jímure.

Jesús üi äre ðaino yóvaicuvaimil baju

ümüvare

(Mt 8.1-10)

³² Dinümü Jesús órejarejame ñüja üi bueimarare üi yebai. Aru arejame:

—Cõmaje äroje jáivü yü ina pöevare. Ina obedivü cüma yúque yóbecurijárvava. Aru äiyede cuvabema. Apevü ne cüramía joarõtamu. Que baru copaicójeiyubevü yu náre. Máí müri, mamaðajebu, ne ävüé ñájiye boje, arejame Jesús.

³³ Ñüjacapüravü jëniari járejacarä úre:

—¿Äri earäjidica ñüja äiyede yui pöescubenoí, jínajivü caivü ina obedivü pöevare? arejacarä ñüja.

³⁴ Jesúcapüravü jëniari járejame ñüjare:

—¿Aipino páuboare cüvarärü müja? arejame ü.

Aru arejacarä:

—Siete paiboabu. Aru obebejina moajinare máre cuvavü, arejacarä.

³⁵Que aiyede, ina pöevare dobaicõjenezame joborõ. ³⁶Diboá páuboa siete paiboare ñüi, aru ina moajinare máre ñüi, torojuede jídejame Jümenijicure. Üi cotüvaríburu yóboi páuboare, ñüja üi bueimara jídejacarä diede ina pöevare, yópe Jesús üi jícójeiyie báquepedeca ñüjare. ³⁷Que ðaiyede, äri yapidejaima caivü. Aru äri bubaríburu yóboi, iye cotüvayie báque páu aru moa máre, pöeva ne äri oabede ñüi, meadarí, pueá siete paipuea, judíova änevü ne pueäre, buivárejacarä ñüja. ³⁸Ina äivu bácvü ümüva yóvaicuvaimil baju barejáima na. Aru apevü, nomíva aru juedova máre, ärejaima na. ³⁹Jesús üi copaicójeniburu yóboi ina pöevare ne cüramiai, jádocüü jaturí, nürejacarä úque apejoborõ, Magadán ämicurijoborõita.

Fariseovacavü aru saduceovacavü ne jëniaino pöeva ne ðarí majibede

(Mt 12.38-39; Mr 8.11-13;

Lc 11.16, 29, 12.54-56)

16 ¹Apevü fariseovacavü aru saduceovacavü máre jüjovaiyürädrejaima Jesús yebai. Jëniarejaima üi jádovaquiyepe äivu náre pöeva ne ðarí majibede, cavarõ mearo Jümenijicüi curõquede. ²Jesús, yópe arí, coyürejame náre:

—Aviá üi doiyede, “Ocopenibobu jüaripenibo. Que baru javena meajárvavü baquiyébu”, aiyavü müja. ³Aru aviá üi cõaiyede, “Ocopenibobu jüaripenibo. Que baru cari járvavü ocaquiyebu”, aiyavü müja. Cavarõquede coreóvaivüvacari, übenita pare coreóvabevübu müja jjaravüi vaiyede. ⁴Müja ämena bajutamü, dajocaiyürivü Jümenijicure yópe nomió ämeço õi dajocaiyepere jímarepacure jocarí. Müjarecabu jëniaridivüü jádovaiye pöeva ne ðarí majibede. Übenita jámenamu müja apenore Jümenijicüi ðainore müjare, quénora yo Jonás mácure vaino mácarõre, arejame Jesús.

Que arí, náre dajocarí nürejame ü.

Fariseova ne ämeno dápiyaiye

(Mt 14.17-21, 15.34-38; Mr

8.14-21; Lc 12.1)

⁵Jataivü bácvü macajitabü urabü apeduveita, ñüja Jesúü bueimara

coreóvarejadarā ārumeteivū bācavū páure. ⁶Jesús arejame ñujare:

—Me ñajará. Me jājara ina fariseova aru ina saduceova máre ne páure bucúovare ñaiyede, arejame ũ.

⁷Que teni yávarejadarā ñuje bajumia:

—Ū yópe aibi, maje páure cāvabe boje, arejadarā.

⁸Ūbenita Jesús coreóvarejaquemavū ñuje yávainore. Que baru arejame:

—¿Aipe teni yūre ju abenaru mña?

¿Aipe teni coyúivurū mña, “Páure cāvabevū maja” aivū? ⁹¿Coreóvabenaru mña? ¿Aru ārumenaru mña? ¿Ji cotūvacaiye báquede cūinárurūpe paiboa páuboare ina cūinárurūpe paimil baju ũmūvare, doce paibua puebua baju cotūvaiye báqueque ímetecarāru mña? ¹⁰¿Aru ji cotūvacaiye báquede siete paiboare ina yóvaicūvaimil baju ũmūvare, siete paipuea baju cotūvaiye báqueque ímetecarāru mña? ¹¹Que baru mñjare jauéde, mñje ārajiyede, jíyū majivū yū. Ūbenita, “Me jājara ina fariseova aru ina saduceova máre ne páure bucúovare ñaiyede” ji ainore, coyūbetevū yū páure. Qué Nora coyūyūbu yū ne dápiayede. Que baru me jājara, mñje dápiabenajiyere aivū yópe ne dápiayere, arejame ñujare Jesús.

¹²Dinūmū coreóvarejadarā coyūyūre ina fariseova aru ina saduceova máre ne bueiye. Yópe páure bucūre ñaiye jivaiyere, caiye iye páu ñaiyede, nopedeca ne bueiye jāve āmeque jujovadama obedivū pōevare, arejame Jesús.

Pedro ũi “Cristobu mñ” aino

(Mt 14.1-2, 18.18; Mr 6.14-15, 8.27-30;

Lc 9.7-8, 18-21; Jn 6.68-69, 20.23)

¹³Jesús, ũi eaiyede Cesarea de Filipo āmicarōi, ñuja ũi bueimare jēniari jārejame:

—¿Aipe aidi pōeva yūre, Jūmenijicūi daroimū mácure ũmūpe? arejame ũ.

¹⁴Ūre arejadarā:

—Apevū adama, “Juan Bautistabe”. Aru apevū adama, “Elíabe”. Aru apevū

adama, “Jeremíame”. Aru apevū adama, “Cūinácū Jūmenijicūi yávaiyede coyūcaipōescube ũ”, arejadarā ũre.

¹⁵Aru arejame ñujare:

—¿Ūbenita aipe aivurū mña yūre? arejame Jesús.

¹⁶Aru Simón Pedro arejame ũre:

—Mñ Jūmenijicūi daroimū mácūbu, ñujare jabotecuyū. Cristobu mñ. Jūmenijicūi apūcūi mácūbu mñ, arejame Pedro Jesúre.

¹⁷Aru Jesúcarūravū, yópe arī, coyūrejame Pedrorre:

—Mñ, Simón, Jonái mácu, torojūcuyūmū mñ. Jūmenijicūi mearo ñacaimūmū mñ. Pōescu cūbebi coreóvare ñayū mñre diede. Qué Nora jipacu, cavarō mearocacūrecabe coreóvare ñayū mñre diede. ¹⁸Coyūyūbu mñre: Mí āmiámū Pedro. No āmiá cūravacarō aiyūrōmū. Mí coyūiyebu yūre yópe cūrava ũrava parūrivape paie cūrami cāchinoi. Caivū ju aivūre yūre, aru caivū ju arājivūre yūre máre, coyūiyē javū yūre mi coyūiyere paie. Aru caivū ina yaibénajarama ne ũmei. Que baru coatebenajarama Jūmenijicūre jarūvarī. ¹⁹Yópe ñai cūvacū cūramine voainore, llavede, ũi ecoicōjeiyere pōevare ñiñamine, nopedeca coyūicōjeivū mñre ji yávaiye méne pōevare, ne ecorājiyere ayū Jūmenijicūi jaboteinore, diede ne ju aru. Mí jacorūbemarare ijārvūi jacorūbecuyūme Jūmenijicūi cavarō mearo ũi cūrōi. Aru mí jacorūimarare ijārvūi jacorūcuyūme Jūmenijicūi cavarō mearo ũi cūrōi, arejame Jesús.

²⁰Aru parúéque ñujare “Jesúbe ñai Cristo, Jūmenijicūi daroimū mácu”, arī coyūicōjemenejame apevūre.

Jesús ũi coyūino ũi yaiquínore

(Mt 10.38-39, 25.31; Mr 8.31-9.1; Lc 9.22-

27, 14.27, 17.33; Jn 12.24-25; Ro 2.6)

²¹Dinūmūmata Jesús jáðovari

būrejame ñuja ũi bueimare ñájicūnūcuyūre Jerusalén āmicrūiimaroi. Yópe arī, buedejame ñujare:

—Javū yūre ũrarō ji ñájiquino. Ina judfóva bucūva, aru sacerdotevare

jaboteipõeva, aru Jümenijicui yávaiye báquede bueipõeva máre yüre ñájjine ðarãjarama. Yüre boarí jaruvarãjarama. Aru yóbecurijãravua yóboi nacajacuyumu yu yainore jaruvarí, arí coyurejame ñujare.

²²Pedro úre ñvarejame apevu ñujare jocarí. Aru yópe arí, jararídurejame Jesúre: —iMu, ji jabocu, mi que aiyepo vaicõjemejacurí mure Jümenijicu! arejame Pedro.

²³Ûbenita Jesús copedini, arejame Pedroro:

—Mu, Satanás, jujovarídubejacu yüre. Ñujacu mu yüre jocarí. Murecabu maucuvacu yüre mi nópe aiyepo. Dápiavü mu pøevape. Aru dápiabevü mu Jümenijicu jiede, arejame Jesús.

²⁴No yóboi Jesús, yópe arí, coyurejame ñuja úi bueimarare:

—Ácu pøescu daiyucu yúque, dajocajacurí pøeva ne mearo jáiyede úre, cuyebecurí yüre yóvaiyede, aru jidubejacurí úi ñájjiquyede. Nópe ðabecu baru, ñ buojabebi jícu bacuyú. ²⁵Ñai pøecu úi baju urõpe ðarí, meadaiyucu baru úi bajure, coatecuyume úi bajure Jümenijicure jaruvarí, yópe yaiyú bácupe úi úmei. Ûbenita ñai pøescu, “Ye baju ámevü, ji yaidú Cristore boje” ayü, úi baju urõpe ðabecuva quénora ji urõpe ðarí, úrecabe ji meadaquimü, cuscuyü Jümenijicúque cainümua. ²⁶Ñai pøescu cuvacu baru caiye ijãravuquede, ùbenita bíjauyü baru úi úmene, ñájjicuyume cainümua toabo cüiméboi. ²⁷Que teni yu, Jümenijicui daroimü mácu ùmure, meacu baju dacuyumu jipacuí mearoque aru ji ángelevaque, bojedacuyü caivü pøevare yópe ne ðaiyepo. ²⁸Jãve coyuyübu mujare: Apevu curivü yui, ne yainájjipe jipocai jãrajarama yüre, Jümenijicui daroimü mácu ùmure, jaboteyure, arejame ñujare Jesús.

Jesús úi baju oatuvaino

(Mt 3.17, 11.14, 12.18; Mr 1.11, 9.2-13; Lc 3.22, 9.28-36; 2 P 1.17-18)

17 ¹Seis paijãravua yóboi, Jesús ñvarejame Pedroro, aru

Santiagore, ímacü Jüare máre. Jipocatedejameða náre cüracü ùmujuricü puenoi, apevure jocarí.

²Aru na járejaimada úi oatuvaiye me bajure. Úi jiva pøorejavüya, yópe avia úi pøoiyepo. Úi cuitótecaje máre pøorejavüya, pare boricaje yópe miadárope. ³Aru járorejaimada Elías Moisémaque. Núrejaimada boroteivü Jesúque. ⁴Aru Pedro arejameða Jesúre:

—Mu, ji jabocu, mearotamu ñuje curu yui. Mi uru, ðacaquijivü yu yóbecurínamia cüramia quijíñamia maquiyéde. Cüinádami míñami maquinóre, aru apeðami maquinóre Moiséde, aru apeðami maquinóre Elíare ðacaquijivü yu, arejameða Pedro.

⁵Úi coyuiyedeca, oopenibo miadáripinibo émeni, taorejavüya náre. Aru jápiarejaimada apeno yávainore, oopenibo etaiyede: “Ñaime jímacü, ji umü. Me torojvü yu úre. Que baru jápiajará úi coyuiyede”, arejaquemavü Jümenijicu.

⁶Ina yóbecurá Jesú bueimara ne jápaiyede diede, jidurí, mori turejaimada joborói. ⁷Ûbenita Jesús ne yebai nuri, náre tuorí, arejameða:

—Nacajajara muja. Jidubejará, arejameða Jesús.

⁸Ne jáiyede, járejaimada Jesúre cüinácüra. ⁹Aru émeni daiyede dicü cüracüre jocarí, Jesús apevure coyucõjemenejameða náre ne jáino mácarõre. Yópe arejameða:

—Me jápiajará muja. Coyubejará apevure no muje jáino mácarõre cüracü ùmujuricü puenoi pu ji nacajariburu yóboita yainore jaruvarí. Yúbu Jümenijicui daroimü mácu ùmure, arejameða náre Jesús.

¹⁰Aru ina úi bueimara, coreóvaivü úre Jümenijicui daroimü mácu ùre, úre jëniari járejaimada:

—¿Aipe teni aivüba ina Jümenijicui yávaiye báquede bueipõeva, “Mamarümü Elías dacuyume, ñai Jümenijicui daroimü úi daquiyepo jipocai”? arejaimada na.

¹¹Aru Jesús arejameða náre:

—Jāve Elíarecabe meadacudacuyū caiyede, Jūmenijicūi daroimū ūi daquiyē jipocai. ¹²Jave dāme Elías, ayūbu yū mūjare. Ūbenita pōeva ūre coreóvabeteima na. Quénora ne urōpe daima ūre. Quédecabu yūre, Jūmenijicūi daroimū mácure ūmūpe. Yūre máre pōeva nájine darājarama, arejameđa Jesús.

¹³Dinumūre ina ūi bueimara coreóvarejaimađa ūi coyūiyede náre Juan Bautista bācure.

**Jesús ūi meadaino juedocure,
abujuca ūi imamure**
(Mt 21.21; Mr 9.14-29, 11.23;
Lc 9.37-43; 1 Co 13.2)

¹⁴Jesúja ne eaiyede obedivū pōeva yebai, cūinācu ūmū nūrejame Jesús yebai. Nūatutarī ūi jipocai, pueđacuyū ūre, arejame:

¹⁵—Mū, ji jabocu, cōmaje āroje jājacu jīmacure. Bidini, aru aburi etarī ūi jījecamure, pare nájimi ū. Apenūma taibi toaboi. Aru apenūma jiai turī coibi ū. ¹⁶Ūre đavavu yū mi bueimara yebai, ūbenita meadaiye majibetema na, arejame Jesúre.

¹⁷Jesús arejame:

—Mūja, ijāravucavu, Jūmenijicure ju abevū aru āmeina teivū máre, ¿aipijāravua cuquidi yū mūjaque? ¿Aru aipijāravua nájiquidi yū mūjaque, mūje ju arājīyēpe ayū ji coyūiyede? Davajacu mīmacure ji yebai, arejame Jesús.

¹⁸Que teni Jesús nāi abujucure jararī, jaetovarejame juedocure jocarī. Aru maumejiena meatedejame ū.

¹⁹Que đarīburu yóboi, nūja ūi bueimara jēniari jāre nūrejacarā Jesúre cūinācura, yópe arī:

—¿Aipe teni nūja jaetovarī majibetedi nāi abujucure? arejacarā nūja.

²⁰Aru Jesús arejame nūjare:

—Quíjino mūje ju aiye boje yūre, que baru jaetovarī majibetevū mūja. Jāve coyūyūbu mūjare: Oteiyabe mostaza āmicuriyabe quíjiyabetamu. Ūbenita pīarīburu yóboi, jocusū uracutamu. Nopedeca mūje ju aru yūre quíjino, nópe

quíjiyabe oteiyabepe, Jūmenijicu urarō mearore đajebu mūjare. Mūja me ju aivū Jūmenijicure mūje cōjenu icū cūracū uracūre yópe: “Nūjacū yore jocarī pu ānoita”, dicū ju ajebu mūje cōjeiyede. Jāve ju aivū baru yūre, caiye đaiyede majinajaramu mūja. ²¹Jūmenijicure jēniaye javū āmevūva āiyede, abujucu nāipe páyure mūje jaetovarājīyēpe aivū, arejame nūjare Jesús.

**Jesús ūi coyūino cojedeca ūi
yaiquínore**

(Mr 9.30-32; Lc 9.43-45)

²²⁻²³Nūje cōjijiyedeca Galilea āmicurījoborōi, Jesús, yópe arī, buedejame nūjare:

—Yūre, Jūmenijicūi daroimū mácure ūmūpe, jēni jīnajivūbu ji mauvare, ne boarī jarūvarājīyēpe ayū yūre. Aru yóbecurījāravua yóboi, Jūmenijicu nacovacuyūme yūre yainore jarūvarī, arejame Jesús.

Ūi nópe aiyede, pare cārijivū barejacarā nūja.

**Jūmenijicūi cūramine coreivū ne
pōevare jīcaicōjeino tāuturare**

²⁴Nūje copaidaiyede Capernaum āmicurīmaroi, Pedro yebai darejaimađa ina Jūmenijicūi cūramine tāutura ícaipōeva. Ūre jēniari jārejaimađa, yópe arī:

—¿Jībedi nāi mi bueipōecu tāuturatūravare, Jūmenijicūi cūramine meadaiye boje? arejaimađa.

²⁵Aru Pedro ju arejameđa náre:

—Jūju, jībi ū, arejameđa.

Aru cūrami copaiyede, mamarūmūre Jesús jēniari jārejameđa ūre, yópe arī:

—Mū, Simón, ¿aipe dápiayūgū mū? ¿Nāmene jocarī tāuturare ĩni ijāravucavu jabova? ¿Īni ne jaboteimarare jocarī o apēvure jocarī? arejameđa Jesús.

²⁶Pedro arejameđa:

—Tāuturare ĩnāma apēvure jocarī, arejameđa.

Jesús arejameđa:

—Que baru ne jaboteimarare jíye jaubevū tāuturare ne jabovare.

Quédeca táuturare jíye jauvevu yure, Jūmenijicui mácre, ne meadarājiyepe jipacui cūramine. ²⁷Ūbenita ne jorojīmenajiyepa majare, jajovacunujacu mū macajitabu urabu ēcarui. Nāi mamaramū mi ímu moacu ūi jijecamure voarī, eacuyumu mū cūináturava táuturatavare, jicacuyū yure aru mure máre. Diturava cūináturu baquiyébu maja pucarā majare jíye jaué Jūmenijicui cūramine meadaiyede, arejameđa Jesús.

Aru yópe Jesús ūi daicōjeiyepe đarejameđa Pedro.

¿Namema parucu maje jēnebore?

(Mr 9.33-37, 10.15; Lc 9.46-48, 18.17, 22.24)

18 ¹Dinūmure nūja, ūi bueimara, nurejacařá Jesús yebai. Aru jēniari járejacařá ūre:

—¿Namema parucu apevu pūeno Jūmenijicui jaboteinore? arejacařá.

²Jesús órejarejame cūinácu juedocure. Nūvarejame ūre nūje coricai. ³Aru arejame:

—Jāve soyuyubu mujare: Juedova “¿Meara márica nūja?” arī dāpiabevupe dāpijarā mūja. Oatuvabevu baru mūje dāpiaiyede, Jūmenijicui jaboteimara teivu buojabenajaramu mūja. ⁴Ácu pōecu “¿Meacu bārica yu?” abecu baru, yópe nāi juedocure, ūrecabe parucu apevu pūeno Jūmenijicui jaboteinore. ⁵Cūinácu pōecu coru etayu baru cūinácu juedocure ji āmiái, ji cōjeiyepe, que đayū coru etaibi yure, arejame Jesús.

Jidojarō maje āmeina teino

(Mt 5.29-30; Mr 9.42-48; Lc 17.1-2)

⁶Nūjare yópe arī, buede nurejame Jesús:

—Ácu pōecu ūi āmeina tede đaru apesu yure ju ayure parubecureca, ūi đajocaquiyepa ayū ūi ju aiyede yure, meajebu ūre jaruvavu ūi nāmemui buorī cūinábo cūrabo uraboque jia ūrađai. ⁷Chiori āmeno nājinajarama ina ijāravucavu jūjoivaivū apevure,

ne āmeno đarājiyepe aivū. Jāve jūjovarājarama mujare. Ūbenita nāi jūjovare đayū apevure chīori āmeno nājicuyūme ū. ⁸Aru mū āmeno đayū baru mi pūgūque o mi cubobaque, burarī jaruvajacu dipūgūre o dibare. Meaquiyebu mure, mi earu Jūmenijicui curōi cūinápūgūque o cūinába cubobaque. Ūbenita meamequiyebu mure, mi nuru toabo cūiméboi caipūcarūgūque o caipūcaba cubobaque. ⁹Aru mū āmeno đayū baru mi yacorūque, ĩni jaruvajacu didure. Meaquiyebu mure, mi earu Jūmenijicui curōi cūináru yacorūque. Ūbenita meamequiyebu mure, mi nuru toabo cūiméboi caipūcarūa yacorūaque, majicarī arejame Jesús.

“Oveja mamateyure” jári dāpiarī ne đarājiyepe aino

(Lc 15.3-7, 19.10)

¹⁰Jesús, yópe arī, buedejame bediōva cojedeca juedovarā:

—Cavarō mearo Jūmenijicui curōi ina ángeleva juedovare coreivu cuma cainūmua Jūmenijicui jivateinoi. Que baru cūinájicu ina juedovacacure ye āmeina jámejara mūja. Yéde āmeina đabejarā cūinájicure. ¹¹Yu, Jūmenijicui daroimū mácu ūmūpe, meadacudaivū ina bĵare đavure Jūmenijicure jocarī. ¹²¿Aipe dāpiaivurū mūja iye ji soyūquiyede mujare? Cūinácu ūmū, ovejavare coreipōecu, cuvacu baru cien paivu ovejavare, aru cūinácu nácacu ūi mamatedu, nāi đajocajebu ina noventa y nueve paivu ovejavare caracūai, vocūñ nāi bĵayu bácure. ¹³Aru jāve soyuyubu mujare: Eayu baru nāi mamateyū bácure, torojūjebu ūque ina noventa y nueve paivu mamatebevu pūeno. ¹⁴Quédeca cūinájicu ina quĵinacacu ūi bĵaiyede ūbebi jipacu cavarō mearocacu, arejame Jesús.

Aipe ārumeteiye jauřō majecu ūi āmeina đaiyede

(Mt 16.19; Lc 17.3-4; Jn 20.23)

¹⁵Yópe arī, buedejame nūjare Jesús:

—Apecu ñi ãmeina ðaru mure, apevu ne jápiabenoí coyujacu úre ñi ãmeina ðaiyede. Mí coyuiyede jápiaru, ãrumetejacu ñi ãmeina ðaiyede. Aru cãrijimene ðajarã muja. ¹⁶Ûbenita mi coyuiyede jápiaiyubedu, nuvajacu ñi yebai cûinãcu mujecure, ñi majiquiyepa ayu, o pucarã mujevure, ne majinajiyepa ayu, aipe mi coyuiyede úre aru aipe ñi coyuiyede mure máre, ne majicarãjiyepa ayu úre. ¹⁷Ne coyuiyede máre jápiaiyubedu, coyujacu ñi ãmeina ðaiyede caivu ina yure ju aivure ne cójijinoi. Aru ne coyuiyede máre jápiaiyubedu, ðajacu úre yópe mi ðaiyepa ina judíoiva ãmevure aru ina jabovare tãutura ñicaipevare. ¹⁸Jãve coyuyubu mujare: Caivu muje jacopubemarare ijãravui jacopubecuyume Jãmenijicu cavarõ mearo ñi curõi. Aru caivu muje jacopuimarare ijãravui jacopucuyume Jãmenijicu cavarõ mearo ñi curõi.

¹⁹Bedióva cojedeca coyuyubu mujare: Pucarã mujacavu cûinãturu baru muje ñmei, muje jëniayede jipacu cavarõ mearocacure, úcapûravu ðacuyume yópe muje jëniayepa. ²⁰Pucarã o yóbecurã ne cójijidu, jëniarajivu ji ãmiái, ji paruéque, yávacari cuvã ne jëneboi, arí buedejame Jesús.

²¹Dinumure Pedro jëniari járejame Jesúre:

—Mu, ji jabocu, ¿aiyepa baju majecu ñi ãmeina ðaiyede yure ãrumeteji? ¿Siete baju ñi ãmeina ðaiyede ãrumeteji? arejame Pedro.

²²Aru Jesús arejame úre:

—Siete baju abevu yu. Quénora corevabecava ãrumetejacu ñi ãmeina ðaiyede cainumua, arejame Jesús.

“Memecaipeocu ãrumeteiyubecure apecu ñi ãmeina ðaiyede” jári dápiaií ne ðarãjiyepa aino

²³Yópe arí, buedejame Jesús, jári dápiaií ne ðarãjiyepa ayu, pöeva ne ãrumetenajiyepa ayu apevure ne ãmeina ðaiyede:

—Jãmenijicui jaboteino yópebu cûinãcu jabocu meaðaiyucu úre

memecaipevu ne bojecube ðaiyede. ²⁴Û corevari buiyede, apevu davaquemavu ñi yebai cûinãcu úre memecaipeocure, bojecube ðayure obedimillones tãuturare. ²⁵Û bojecube ðaiyede ye bojedayu buojabetequemavu. Que baru ñai jabocu, yebacavure teni, bojedaipequemavu úre, aru jímarepacore, aru némarare máre. Caiye ne cuvare máre bojedaipequemavu, ñcuy ñi bojecube ðaiyede. ²⁶Ñai memecaipeocu pueðarí ñai jabocure, ñuatutaquemavu ñi jipocai. “Mu, ji jabocu, napijacu yure. Aru caiyede bojedacuyumu mure”, aquemavu. ²⁷Que baru ñai jabocu, cómaje ãroje jári, ãrumetequemavu caiye iye ure bojecube ðaiyede. Aru jodeiðequemavu úre.

²⁸Ûbenita ñai memecaipeocu etayu bácu, apecu memecaipeocu ñi yóvaimure copuquemavu. Ñai ñi copuimu majiéda bojecube ðaquemavu úre, obebecentenaes tãuturare. Ñai ñi copuimure ñi ñamemui jëni, yaiváiyuriduquemavu úre. “iMi bojecube ðaiyede jójacu yure!” aquemavu. ²⁹Que ðayure, apecu ñuatutaquemavu ñi jipocai. “Napijacu yure. Caiyede bojedacuyumu mure”, aquemavu. ³⁰Ûbenita apecu jápiaiyubetequemavu úre. Quénora jaruvaicpequemavu úre ãmeina teivure jëni jacoñami jívui, pu ñi bojedaiyeta caiye iye bojecube ðaiyede. ³¹Apevu ñai jabocure memecaipevu ñi ðaiyede jári, chíori, coyurãnuquemavu diede ne jabocure. ³²Ne coyuiyede ñi jápiaríburu yóboi, ñai jabocu órejaipequemavu ñai ñi ãrumeteimu mácure. Aru aquemavu: “iÁmecu bajutamu mu! Yúcapûravu ãrumetevu caiye iye mi bojecube ðaiye báque urarõ bajure, mi jëniayepa báque boje yure. ³³Que baru mure máre, cómaje ãroje jáiye javvu micure, yópe ji cómaje ãroje jáiyepe mure”, aquemavu. ³⁴Pare jarayu, ñai jabocu ãmeina teivure jëni jacoñami coreiðevare nuvaicpequemavu úre, ñi ñájiyepa ayu, pu ñi bojedaiyeta caiye iye bojecube ðaiyede, arejame Jesús.

³⁵ Aru arejame Jesús:

—Quédeca ñacuyame mujare jipacu, cavarõ mearocacu, muxe ñrumetebedu mujecure ñi ãmeina ñaiyede, arejame ñujare, majicayũ Jesús.

Jesús ñi bueino nomi jaruvainore

(Mt 5.31-32; Mr 10.1-12; Lc 16.18; 1 Co 7.10-11)

19 ¹ Jesús caiye iyede coyũri bhojarĩ, nurejame Galilea ãmicurijoborõre jocarĩ. Aru ecorejame Judea ãmicurijoborõi, Jordã ãmicuriya jia apedũvei. ² Obedivũ põeva darejaima ñi yõboi. Aru noi ijimarare meadarejame. ³ Fariseovacavũ mãre nurejaima ñi yebai. Ûre jujuvayuvũ, jẽniari jãrejaima: —¿Cũinãcu ãmu jaruvayũ baru jĩmarepacore, apejĩe õi ñaiye boje, ñaidi yõpe maje ñaicõjeiyepe? arejaima na.

⁴ Jesús arejame nãre:

—Jãve buedavũ mũa. Mamarũmure Jũmenijicu cuedarejaquemavũ caiyede, “Ûmu macuyũre aru nomio macodõre mãre ñarejaquemavũ Jũmenijicu”. ⁵ Aru arejaquemavũ: “Que baru caride ñcu põescu, jĩmarepaco bacodõ cuvacyũ, ñi bucavare ñajocacyũme. Aru jĩmarepacore cuvãri, õmaque cũinãvũpetamu na Jũmenijicu jãinore”. ⁶ Que baru pũcarã ãmema. Quãnora cũinãvũpetamu na. Que baru põescu Jũmenijicu cõjjovaimara mãcavũre coavabejacurĩ ñi, arĩ buedejame Jesús.

⁷ Jesũre jẽniari jãrejaima na:

—¿Aipe teni Moisés bãcu jĩcõjenejaquemari jĩmarepacure cũinãyoca, “Mũre jaruvayubu yũ” aiyocare, jĩmarepacore? arejaima.

⁸ Aru Jesús arejame nãre:

—Moisés bãcu jaruvaicõjenejaquemavũ mujare mujemarepacore, muxe Jũmenijicu ñaicõjeiyede jãpiayube boje. Ûbenita mamarũmũmata nõpe ãmenejaquemavũ. ⁹ Aru yãcarũravũ coyũyũbu mujare: Ñcu põescu jĩmarepacore ãmeina ñabecoreca jaruvãrĩburu yõboi pũrũbuoyũ baru apescoque, ãmeina ñaibi õre ñi mamarũmũcacore jaruvãri, arejame Jesús.

Nõpe ayũ, “Nomi jaruvainore ñbevũ yũ”, aiyũcu barejaquemavũ Jesús. ¹⁰ Que ayũre, ñũa ñi bueimara arejacarã ñre:

—Nõpe mi coyũiyepe baru, meamequiyebe pũrũbuoie majare, arejacarã.

¹¹ Ûbenita ñujare yõpe arĩ, coyũrejame Jesús:

—Cavũ põeva cũinãcva curivũ majibema. Quãnora na quãnora Jũmenijicu torojure ñaimara curivũ cũinãcva coapa majima na. ¹² Apevũ põeva nomicurĩ, ñmũcurĩ mãre, buojabema, ne nõpe põeteiye bãque boje. Que baru pũrũbuobema na. Aru apevũ põeva ne baju burãicõjeiye boje, nomicurĩ buojabema na. Que baru pũrũbuobema na. Aru apevũ põeva ne baju burabevũvacari, burãivũ bãcavũre paivũ tedama na, ne memecarãjĩye boje Jũmenijicure cainũmũ ñi jaboteinore. Que baru na mãre pũrũbuobema, ne baju nõpe ñaiyue boje. Ñcu põescu Jũmenijicure torojure ñaimũ cũcu cũinãcva, que ñajacurĩ ñi, arĩ buedejame Jesús.

Jesús ñi mearore jĩno juedovare Jũmenijicuque

(Mr 10.13-16; Lc 18.15-17)

¹³ Põeva davare cuivũ barejãima nẽmarare Jesús yebai, ñi tuoquiyepe aivũ nãre ñi pũrũãque, ñi jẽniaiyede Jũmenijicuque nãre boje. Que teni ñũa ñi bueimara davaicõjemenidurejacarã nẽmarare. ¹⁴ Ûbenita Jesús arejame:

—Ina juedova ñajarãri ji yebai. Jũmenijicu jabotecũyũme põevare nãpe paivũre. Que baru, “Davabejarã juedovare”, abejarã nãre, arejame Jesús.

¹⁵ Aru nãre coapa tuorĩ ñi pũrũãque, jẽniarejame Jũmenijicuque nãre boje. Que teniburu yõboi, nurejacarã ñũa, Jesũjã.

Cũinãcu bojũyo cũve cũvacũ

Jesũmaque ne boroteino

(Mt 20.16, 25.31; Mr 10.17-31; Lc 13.30, 18.18-30, 22.30)

¹⁶ Cũinãcu bojũyo, Jesús yebai nũri, jẽniari jãrejame:

—Mũ, bueipõescu meacu, ñaibe ñaiye me jaurĩ yũre, cũvacũyũ jãravũ cũimẽjãravũ baquinõre cavarõ mearo Jũmenijicu curõi? arejame ñi.

¹⁷ Jesús arejame ñre:

—¿Aipe teni jēniari jāñuḡu mu yure daiye ména? Cūinácunabe meacu baju. Jūmenijicunacaribe. Cuvaiyucu baru jāravu cūiméjāravu baquinóre, đajacu yópe Jūmenijicui đaicōjeiyepe, arejame Jesús.

¹⁸—¿Ádeba đaicōjeiye? jēniari járejame.

Aru Jesús arejame:

—Pōevare boarí jaruvabejacu.

Cuvabejacu apcore mimarepacore jaruvarí. Navamejacu apesu ũi cūvaede. Borodabejacu apesure. ¹⁹Ju ajacu mipacure aru mipacore máre. Aru mícure, mi bajure jecuépedeca, ũre máre jecujacu mu, arejame Jesús.

²⁰Que ayure, ñai bojuyo arejame:

—Đaivu caiye iye mi cuyiyede.

¿Ároma yure jaurō cāreja? arejame.

²¹Jesús ũre arejame:

—Jaubecuna cuiyucu baru Jūmenijicui jāinore, nujacu aru jini bojedajacu mi cūvede. Aru mi iquiyede jījacu ina cōmaje ārojarivure. Que teni cuvacyumu mu mi boje méne cavarō mearo Jūmenijicui cūrōi. Aru dajacu yáque, arejame Jesús.

²²Ūbenita iyede jāpiari, urarōreca chīorejame, dajocaiyubecu ũi ure cūvede. ²³Que baru Jesús arejame ñuja ũi bueimarare:

—Jāve cuyuyubu mujare: Ina pōeva cūve cūvarivure pare maiyójavu ne ju aipe Jūmenijicure, ũi meadaquiyeye aivu náre aru ne ecorājiyepe aivu ũi jaboteinore, cavarō mearo ũi cūrōre.

²⁴Bedióva cojedeca cuyuyubu mujare: Cūinácun aimacu uracu, camello āmicucu, ũi ecoru aviyo cobei, maiyójajebu ũre. Aru rueno maiyójavu cūve cuvacure ũi ecoquino Jūmenijicui jaboteinore, arejame Jesús.

²⁵Que ayure jāpiaivu ñuja, cūcumarejacarā pare. Aru arejacarā:

—¿Name bujarí ecorājidica Jūmenijicui jaboteinore, cūvarājivu jāravu cūiméjāravu baquinóre? jēniari járejacarā Jesúre.

²⁶Ūcapūravu ñujare jári, arejame:

—Pōeva ne đarí majibeno maiyójabevu Jūmenijicure. Ū cūinácuna bujarí meadayube pōevare, arejame Jesús.

²⁷Aru Pedro arejame:

—Dajocacarā ñuja caiye ñuje cūvaede, ñuje daiye boje máque. ¿Yéde earājidica ñuja? arejame Pedro.

²⁸Aru ñujare arejame Jesús:

—Jāve cuyuyubu mujare: Mamajāravu đaquijāravu baquinó yu, Jūmenijicui đaroimu mácu ũmure, dobacyumu jabocui dobarō mearo, jabotecuyu pōevare. Aru muja máre, daivu bācavu yáque, dobarājaramu doce painoa jabovai dobarō mearo coapa, cuyurājivu ina doce paiyajuboacava Israecavure méne o āmene ne đaiyede.

²⁹Ácu pōescu dajocayu baru ũi cūramine, o jíburāre, ĩmarare, jípacure, jípacore, mamarare, o ũi joborōre máre ji āmiá boje, ũi daiye boje yáque, memecacyu yure, eacuyume rueno baju mearo bajure. Aru cuvacyume jāravu cūiméjāravu baquinóre. ³⁰Ūbenita dīnūmu maquinóre apenvu, jaboteivu bācavu ijāravure, jabotebenajarama na Jūmenijicui jabotequiyede. Aru apenvu, mujapedeca, jabotebevu bācavu ijāravure, jabotenajarama na Jūmenijicui jabotequiyede, arí buedejame Jesús.

“Memeipōevare” jári đapiarí ne đarājiyepe aino

(Mt 19.30; Mr 10.31; Lc 13.30)

20 ¹Jesús, yópe arí, buedejame:

—Jūmenijicui jaboteinomu yópe jio upacui memeipōevare vorí, earí bojedaiyepe náre ne memeiyepe. Javejīnara, seis baji, ñai jio upacu tībui vocunquemavu memeipōevare, ne jēnajiyepe ayu úyaiboare ũi jioi. ²Náre earí, “Cūináturava tāturataturava, cūinājāravu memeiye bojedaituravare jíquijivu mujare coapa”, aquemavu ũ. Aru ũi nópe aiyede, ju aquemavu na coapa. Ne ju aríburu yóboi, ñai jio upacu náre jaroquemavu jioi.

³Yóbecuriora vainíburu yóboi, nueve baji, bedióva tībui nquemavu ñai jio upacu. Noi jáquemavu apenvu memeipōevare, ne memeiño cuvabevure.

⁴Aru náre máre, “Memenanujara muja

ji jioi. Aru bojedacuyumtu mñjare me, yópe jaeépe”, aquemavu ñ. Que baru memenanuquemavu na. ⁵No yóboi, jāravu corica baji, aru no yóboi tres baji máre, nopedeca ñaquemavu ñ. ⁶Bedióra cojedeca, cinco baji, cūináora ne memeióra jaeéde cáreja, nuquemavu ñai jio upacu tãibu. Noi jáquemavu arevu memeiðevare, ne memeiño cūvabevure. Náre jēniari jáquemavu, “¿Aipe teni curivurū mña yui caijāravu memevūva?” aquemavu. ⁷Ūre aquemavu na, “Pōescu cubebi memeiðeñu ññjare”, aquemavu. Náre máre “Memenanñjara ji jioi”, aquemavu.

⁸Aviá ñi doiyede, ñai jio upacu yópe arí, coyūquemavu ñi cūramine corecaipōescure: “Ina memeiðevare órejarí bojedajacu náre. Ina memeni buivu bācavui yóbocavure bojedajacu mamarumū. Aru no yóboi ina mamarumū memeni buivu bācavure bojedajacu mñ”, aquemavu. ⁹Ina cūináora memeiñu bācavu ne ðaiyede, cūinátura va tātutaturava, cūinájáravu memeiye bojedaituravare jacopuquemavu na coapa. ¹⁰Diede jári, ina javejñara memeni buivu bācavu dápiaríduquemavu ne baju jacopurājivure pñeno baju ne bojedaiyede. Ūbenita na máre quédeca, cūinátura va tātutaturava, cūinájáravu memeiye bojedaituravare jacopuquemavu na coapa.

¹¹Ne jacopuiyede, jaraqemavu ñai jio upacure. ¹²Ūre aquemavu, “Nácarūravu cūináora quénora memema. Aru ññjacapūravu memevñu caijāravu. Aviá ñi boiyede ñājivñu ññja. Ūbenita ñājimevñu bācavureca, náre bojedaiñu mñ cūinátura reca mi bojedaiyepere ññjare, ñājivñu bācavure”, aquemavu ina javejñara memeni buivu bācavu. ¹³Ūbenita ñai jio upacu aquemavu cūinácu nácacure, “Pacomá, mure ñmeno ñabevñu yu. Múcarūravu ju avñu yure, ‘Cūinájáravu memeiye bojedaituravare jíquijivñu mure’, ji aiyede. ¹⁴Que baru íjacu iye mi bojede aru nujacu mñ. Cūinátura iye ji jíyepere mure,

jíyuvñu yu ñai cūináora memescayure. ¹⁵Ūre jícojemeniduyurñi ji cūvaequede yópe ji urópe? Ñameina jámejacu yure, ji cadatequiyepere ayñu pōevare, ji mearo ñaiye boje”, aquemavu ñai jio upacu, arejame Jesús.

¹⁶Pōeva ne jári dápiabede yópe maje jabocu Jūmenijicui jári dápiayepere arí coyūrejame Jesús:

—Arevñu jabotebevñu bācavu ijāravure jabotenajarama na Jūmenijicui jabotequiyede. Aru arevñu jaboteivñu bācavu ijāravure jabotebenajarama na Jūmenijicui jabotequiyede, arí buedejame Jesús.

Jesús ñi coyūino bedióra cojedeca ñi yaiquínore

(Mr 10.32-34; Lc 18.31-34)

¹⁷Mái nuri, cuivñu barejacará Jerusalén ñmicuríimaro. Ññje nuiyede, ññja ñi buemarare nuvarejame arevñu jocarí. Aru yópe arí, coyūrejame Jesús:

¹⁸—Jerusaléi nuivubu. Nore curí, yure, Jūmenijicui daroimñu mácure ūmure, ji maucu jēni jíquijibi sacerdotevare jaboteipōevare aru Jūmenijicui yávaiye báquede bueiðevare máre. Ina pōeva arājivñu: “iBoarí jarñvaicōjeara ūre! iYaijācurí!” ¹⁹Que arí, jínajivñu yure ina judío va ñevñu. Que teni ina pōeva yurinajivñu yure. Jara popenajivñu yure. Aru yure pēvari jocusujaravena, boarí jarñvarājivñu. Ūbenita yóbescurijāravñu yóboi, jípacu, Jūmenijicui, nacovacuyñu yure yainore jarñvarí, arejame Jesús.

Santiago aru Juan népaco ñi jēniaino Jesúre

(Mt 23.11, Mr 9.35, 10.35-45; Lc 22.25-27; Jn 13.12-15)

²⁰No yóboi Zebedeoi márai paco nurejacoða Jesús yebai mamaraque, Santiago aru Jūaque máre. Ūi jípacai ññatutarejacoða, ñi jēniayue boje apejñene ūre. ²¹Aru Jesús jēniari járejameða óre:

—¿Yéde ñacaji mure? arejameða. Ūre arejacoða:

—Dobaicōjejacu ina jímara pucarāre mi yebai, cūinácure meapūravui aru apēcure cācopūravui, mi jabotequinumū maquinóre, arejacoda ò.

²²Ūbenita Jesúcapūravu arejameða:

—Mi jēniaiyede coreóvabevu mu. Pōecu dobaiyucu baru yáque ji jabotequinumū maquinóre, mamarumū nájijye javvu úre yáque. ¿Ūcuri buojarájidica mija ji ūcinore? arejameða náre Jesús.

Aru ju arejaimaða úre:

—Buojaivubu nija, arejaimaða.

²³Aru Jesús arejameða náre:

—Ji ūcinore ūcurajivubu mija. Ji que aiyede, yópe ayubu: Ji nájijyepedeca nájijnajivubu mija. Ūbenita yávacari beobevu náre, dobarājivure ji meapūravui aru ji cācopūravui máre. Quénora dobarājarama nore ina jipacui beoimara mácavu, javeta ūi meaðaimara mácavu, arejameða Jesús.

²⁴No yóboi, jápiarejacařa ne borore apevu nija caipucararuape paivu Jesú bueimara. Que baru jararejacařa inare.

²⁵Dinumū Jesús órejarjame nujare ūi yebai. Aru arejame nujare:

—Mija majivu ina jaboteivure judío va ámevure ne ðaiyede. Parúeque cōjeivubu ina ne jaborócavure, ne ðacarājijyepe aivu náre ne urópe.

²⁶Ūbenita nápe ðabejarā mija. Nāi mujacacu parucu baiyucu baru, memecajacurī mujare. ²⁷Aru nopedeca nāi mujacacu jabocu baiyucu baru, yebacatejacurī caivure. ²⁸Nopedeca Jūmenijicui daroimu mácu ūmure, yu, dabedejacacu, pōeva ne memecarājijyepere ayu yure. Quénora darejacacu yu, memecacuyu apévure aru boarī jaruvaicōjecuyu ji bajure, meaðacuyu obedivu pōevare, ji yaiquíyede náre boje, arejame nujare Jesús.

Jesús ūi meadaino pucarā jári eabevure

(Mr 10.46-52; Lc 18.35-43)

²⁹Jerico ámicurīmarore etarejacařa nija, Jesújā. Obedivu pōeva darejaima nujare yóboi. ³⁰Aru pucarā ūmva, jári

eabevu, ma écarui dobarejaima. Pōeva “Jesús Nazarecacube ū”, aivure jápiaivu, coðoboborejaima na, jári eabevu:

—Mu, David bácuī pāramecu, Jūmenijicui daroimu mácu, nujare jabocu bacuyú, cōmaje ároje jájacu nujare, arejaima na.

³¹Ina obedivu pōeva náre arīdurejaima:

—Bi ajařa mija, arīdurejaima.

Ūbenita pūeno baju coðoboborejaima cojedeca:

—Mu, nujare jabocu, David bácuī pāramecu, cōmaje ároje jájacu nujare, arejaima na.

³²Que teni úre coðoboboivure jápiaivu Jesús, dajocarejame. Aru apévure cutuicōjenejame ina pucarā jári eabevure ūi yebai. Eaivure, Jesús jēniari járejame náre:

—¿Aipe ðacaji yu mujare? arejame ū.

³³Ūre arejaima na:

—Mu, nujare jabocu, jári eabevubu nija. Ūrařó jáiyurivubu nija, arejaima.

³⁴Jesús cōmaje ároje jáñu, ne yacoruaře tuorejame ū. Aru cūinā járejaima na, jári eabevu bácavu. Que teni Jesúre yóvarī nurejaima na máre.

Jesús Jerusaléi ūi ecoino

(Mr 11.1-11; Lc 19.28-40; Jn 12.12-19)

21 ¹Jerusalén ámicurīmaro joabejinoi curi, Betfajé ámicurīmajino baji, no cūracū Olivocū ámicuricū émeino baji, earejacařa nija, Jesújā. Nore earī, pucarā nija ūi bueimaracavure yópe arī, jarorejame Jesús:

²—No cōchinoi curīmajinoi nujara mija. Cūinā earājaramu mija pōevare ūmaiāimacure, burra ámicuco, mamacuque, nácacui buoimarare. Náre buoimeare jodeni, davajařa yure. ³Aru, “¿Aipe teni ina áimarare náre buoimeare jodeni, náre nuvaivurū mija?” ne aruta, yópe ajařa: “Nujare ícōjeni darobi maje jabocu. Ūre ūmacayu áimacu jaubi ū. Carijieneca mujare jacopaiyovacuyume cojedeca”, ajařa, arejame Jesús.

⁴Caie iye nópe vaidéjavū cūináturu Jūmenijicui coyuicōjeiye báquepedeca

cūinácū ũi yávaiyede coyũcaipõescu bácure. Yópe arí, toivaicõjeneaquemavũ ũi mácure Jūmenijicu:

⁵ Coyũjacū ina Jerusalén
āmicũriĩmarocavũre. Jájara.
Mũje jabocū bacũyú mũjare
dacũyũme. “¿Meacū bārīca
yu?” abecube. Burrõre tubarĩ
dacũyũme. Burro bojũyovacarĩ
bacũyũme ũi tubamũ macũyú,
arĩ toivaicõjeneaquemavũ
Jūmenijicu.

⁶ Jesúĩ daroimara nũrejaĩma. Aru ðarejaĩmada yópe ũi aĩye báquepedeca náre. ⁷ Davacarejaĩma Jesúre ico burrare mamacũque. Aru ñũje doicajea pũenocacajearẽ burrare aru mamacũre máre tuorejagarã. Mamacũre tubarejame Jesús. ⁸ Dinũmũma ina obedivũ põeva, ñũjaque cũrivũ, ne pũenocacajearẽ jũarejaĩma mára. Aru apevũ jocũcũ cavabũa yoca cũricavabũare burarĩ, jũarejaĩma mára, Jesúre meaðaiyũrivũ, ne pũedarĩ jacoyurãjiyepẽ aivũ. ⁹ Ũre jipocateivũ aru ũi yóbojavũ máre coðoboborejaĩma na:

—David bácũĩ pãramecũ, maje jabocū bacũyũre torojũe bajadéni. Jūmenijicu mearo ðacaimũme ũi, Jūmenijicũĩ daroimũ mácũ. Carĩ jabocū bacũyũre ména borotenajarevũ, coðoboborĩ arejagarã ñũja caivũ.

¹⁰ Jesús ũi eaiyede Jerusalén āmicũriĩmaroĩ, caivũ nójavũ etarĩ, jári, jēniari járejaĩma na, “¿Ñamema ñai?”

¹¹ Aru ina põeva ñũjare yóvaivũ arejaĩma náre;

—Ũtame ñai Jūmenijicũĩ yávaiyede coyũcaipõescu, Jesús Nazarecacũ, Galileacarõcacũ, arejaĩma ina põeva.

Jesús ũi meaðaino Jūmenijicũĩ cũramine

(Mr 11.15-19; Lc 19.45-48; Jn 2.13-22)

¹² Jesús edarĩ Jūmenijicũĩ cũrami yebai, diñami tãibũ uratãibũĩ ecõrejame ũi. Aru nore diñami cũrivũ bojedaiipõevare jarũvarejame Jesús. Tãutũra oatũvaipõeva ne jáðovaire moarĩ najuárejame ũi. Aru jurevare

bojedaiipõeva ne dobarõare máre moarĩ najuárejame. ¹³ Náre yópe arejame Jesús:

—Yópe arĩ toivaicõjeneaquemavũ Jūmenijicu ũi yávaiyede: “Jĩ cũrami caivũ põeva ne yũre, Jūmenijicũre, coyũĩnamĩmu”, arĩ toivaicõjeneaquemavũ. Ũbenita diñamine tatorĩ ívũ ne dupiñamipe ðaquemavũ mũja, mũje pũeno urarõ tãutũra íye boje põevare jocarĩ, ne bojedaiyede mũje cũvaede, arejame náre Jesús.

¹⁴ Jári eabevũ darĩ, aru cuiye majibevũ máre daivũ barejáĩma ũi yebai no Jūmenijicũĩ cũrami. Náre coapa meadarejame Jesús. ¹⁵ Apevũ fariseova aru Jūmenijicũĩ yávaiye báquede bueipõeva caiye iye põeva ne ðarĩ majibede Jesús ũi ðaiyede járejaĩma. Aru ina juedova noi cũrivũ, “David bácũĩ pãramecũ, maje jabocū bacũyũre torojũe bajadéni”, ne arĩ coðoboboyede jápiarejaĩma ina fariseovajã. Que baru jorojĩnejaima ũre. ¹⁶ Aru arĩdurejaĩma: —¿Jápiabecũrũ mũ ne aiyede? arĩdurejaĩma.

Ũbenita Jesús arejame náre:

—Jápiavũ yũ. ¿Ārũmetenaru mũja? Jūmenijicu ũi yávaiye báquede toivaicõjeneaquemavũ cūinácū ũi yávaiyede coyũcaipõescu bácure yópe arĩ yurã:

Mũ, ñũje jabocū, juedovare aru juedojĩnare máre mearore jícõjeivũ mũre, arĩ toivaicõjeneaquemavũ Jūmenijicu, arejame Jesús.

¹⁷ Que arĩburu yóboĩ, náre ðajocarĩ etarejagarã ñũja, Jesújã, diĩmarore jocarĩ. Cãranũrejagarã Betania āmicũriĩmajinoĩ.

Jesús ũi āmecoroino higueraçũ jēidũa cũbecure

(Mt 17.20; Mr 11.12-14, 20-26; 1 Co 13.2)

¹⁸ Cõmiáijãravũ javejĩnara copainũrejagarã Jerusalén āmicũriĩmaroita. Aru āvué ijidejavũya Jesúre. ¹⁹ Que baru ũi jáiyede cūinácū jocũcũ higuera āmicũricũre ma êcarũĩ,

jēidūare vocunūridurejame dicu yebai. Ūbenita yoca matuiyeda earejame. Aru arejame dicure:

—Cainūmua jēmejadeni mi jēidua cojedeca, arejame ũ.

Aru cūiná dicu yaidéjavū. ²⁰Ñuja ũi bueimara diede jári, cuecumarejaca. Aru arejaca:

—¿Aipe teni cūiná yaidí dicu higuera? arejaca.

²¹Aru Jesús, yópe arí, coyūrejame ñujare:

—Jāve coyūyubu mujare: Muja me ju aivu baru Jūmenijicure, aru “Jūmenijicu iye ðaiyede majibebi” arí dápiabevu baru, muja máre ðarí buojarājaramu yópe ji ðaiye báquepe dicu higuera. Aru pueno baju ðarí buojarājaramu muja. Icu cūracure “Ñujacū yore jocarí pu jia uradaita, cocunjacū” muje aru, nópe ðaquiyebu dicū. ²²Caiye iye muje Jūmenijicure jēniaiyede, “Jāve Jūmenijicu jícuyume yure” arí dápiaru, Jūmenijicu jícuyume mujare muje uede, arí buedejame ñujare Jesús.

Jesús ũi parué

(Mr 11.27-33; Lc 20.1-8)

²³Diede coyuyū bácu, Jesús Jūmenijicui cūrami ecorejame cojedeca. Noi pōevare bueyure, sacerdotevare jaboteipōeva aru judfova bucuva máre ũi yebai ñurejaima. Aru jēniari járejaima ũre:

—¿Ye paruéque ðayurū mu iye mi ðaiyede? ¿Ñame jidi mure iye paruéde mi nópe ðaiyede? arejaima na.

²⁴Jesús arejame náre:

—Yu máre jēniari jáquijivū mujare cūináro jēniari jáinore. Yure coyuru, yu máre coyquijivū mujare ji paruéque ji ðaiyede. ²⁵¿Juan Bautista bácu jáðovaquemari pōevare Jūmenijicu ũi paruéque o pōeva ne paruéque? Coyujarā yure, arejame náre Jesús.

Ūi que aiye, ne bajumia boroteivū arejaima yópe:

—Maje aru “Jūmenijicuque”, ũ aquijibi “¿Aipe teni ju abetecarū ũre?” ²⁶Ūbenita maje aru “pōevaque”,

jidué javu majare. Ina obedivu pōeva coreóvadama Juan Bautista bácu Jūmenijicui yāvaiyede coyūcaipōecu bácu. Que baru nácapūravu āmedajebu majare, arejaima. ²⁷Que baru arejaima Jesús:

—Majibevū ñuja, arejaima.

Dinūmure Jesús arejame náre:

—Yu máre coyūbevū mujare ñamei paruéque ji ðaiyede, arejame Jesús.

“Paruá mamarare” jári dápiarí ne ðarājiyepe aino (Lc 3.12, 7.29-30)

²⁸Bedióva yópe arí, buedejame Jesús:

—¿Aipe dápiavurū muja iye ji coyquiyede mujare? Cūinácu ũmu paruá mamarare cuvacu yópe aquemavu cūinácu: “Mu, bucu, memescunjacu úyaimu jioi carí jaravu”, aquemavu jípacu. ²⁹Ūbenita ũcapūravu “Ñuiyūbevū”, aquemavu jípacu. Ūbenita nópe aríburu yóboi, chíori dápiaquemavu ũi ju abe báquede jípacu. Aru jioi ñuquemavu ũ, mamacu. ³⁰Népacu ñai mamacu ũi coyuríburu yóboi, apesu mamacu quédeca aríduquemavu. Aru ñai mamacucapūravu “Báyu, memescunñūmu yu”, ju aríduyvacari, ũbenita ye ñumetequemavu ũ, arejame Jesús.

³¹Náre jēniari járejame Jesús:

—¿Ácuva ina paruá mamaracacu jípacu ĩrópe ðayu bácu? arejame Jesús. Arejaima Jesús:

—Ūi mamarūmu jēniaimū mácu ũi ĩrópe ðaquemavu, arejaima.

Aru Jesús arejame náre:

—Jāve coyuyūbu mujare: Ina jabovare táutura ícaipōeva aru ina nomiva āmena ne bajure bojedavū ecorājarama Jūmenijicui jaboteinore muje jipocai.

³²Quédeca Juan Bautista bácu buecudame mujare aipe ðarí Jūmenijicu jáñre pōevare boropatebevū. Ūbenita mujacapūravū ũ mácu ju abetequemavu. Quénoa ina jabovare táutura ícaipōeva aru ina nomiva āmena ne bajure bojedavū ũ mácu ju aquemavu, arejame náre Jesús.

**“Āmena memecaiṗōevare” jári dápiarī
ne ḍarājiyepe aino**
(Mr 12.1-12; Lc 20.9-19)

³³ Jesús, yópe arī, buede nurejame náre:
—Apeno jári dápiarī muje ḍarājiyepe
aino ji soyūquiyede jápiajarā muja.
Cūinācu cūrami upacu doaicōjequemavu
jiore úyaimuque. Doarī buojarī,
ḍaicōjequemavu biaidore jio turuvai.
Aru ūicōjequemavu cobede úyai
pipoicobede. Aru ḍaicōjequemavu
ūmujuriñami cūramine, jiore coreipōescu
ūi jáquiñamine máre. Caiye iyede
meadarī buojarī, vorī earī jiore
memeiṗōevare, epequemavu náre,
ne memecarājiyepe ayū úre. Ina
memecaiṗōeva ĩnājivu batequémavu
apeboa úyaiboare, ne memeie boje. Aru
nuquemavu ñai jio upacu apeno joborōi.
³⁴ Úyai jēijāravu yóboi, ñai jio upacu
jarorīduquemavu apenu ūi yebacavure
memecaiṗōeva yebai, ne ĩnājiyepe
ayū apeboa úyaiboare, ñai jio upacu
jiede. ³⁵ Ūbenita ina memecaiṗōeva
ina yebacavu eaivure jēni, cūinācure
jara popequemavu, aru apescure
boarī jaruvaquemavu, aru apescure
cūraboaque ḍavarī boarī jaruvaquemavu
máre. ³⁶ Ñai jio upacu jarorīduquemavu
apenu yebacavure. Ūbenita náre
quédeca ḍaquemavu ina memecaiṗōeva.

³⁷ No yóboi, ñai jio upacu
jarorīduquemavu mamacure
memecaiṗōeva yebai. “Jímacure
jáivu pueḍarājichuma na”, arī dápiarī,
que ḍarīduquemavu. ³⁸ Ūbenita ina
memecaiṗōeva jáivu ñai jio upacui
mácure, aquemavu ne bajumia, “Ñai
ñuje jabocu bacuyúme. Jírascu ūi
yainíburu yóboi, cuvascuyúme caiye ūi
cūvaede. Járica, boarī jaruvarājavu
úre, maja cuvaburī caiye ūi cūvaede”,
aquemavu na. ³⁹ Que arī, úre jēni
jaetovaquemavu jiore jocarī. Aru boarī
jaruvaquemavu úre, arejame Jesús.

⁴⁰ Na ūi soyūiyede jápiaivure jēniari
járejame Jesús:
—Īñai jio upacu copaini ḍayū, aipe
ḍaquidi ina memecaiṗōevare? arejame ū.

⁴¹ Úre jápiaivu arejaima:

—Ina āmenare pare ñájiye ḍarī boarī
jaruvaicōjecuyúme ū. Aru epecuyúme
apenu memecaiṗōevare noi, ūi jioi, úre
jínajivure ūi jēiduare jēijāravu eaiyeta,
arejaima na.

⁴² Jesús arejame náre:

—ĪĀrumetenaru muja iye Jūmenijicui
yávaiye ūi toivaicōjeiye báquede? Yópe
toivarejaquemavu yurā, Cristo ji borore:

Iva cūravare cūramine ḍaiṗōeva
ubeni jaruvaquemavu. Caride
iva cūrava caiva apeva pueno
parurivabu. Nópe ḍaino mácarōre
ḍaquemavu Jūmenijicu. Que baru
pare mearotamu majare, maje
dápiaru, arī toivarejaquemavu.

⁴³ Que baru soyuyubu mujare: Muja judíoiva
muje ḍabe boje mearore yópe Jūmenijicui
urópe ūi jaboteimarare ḍaiye jauépe, apenu
ṗōeva, judíoiva āmevu, mearore ḍaivu
yópe Jūmenijicui urópe, ūi jaboteimara
marajárama na muje pueno. ⁴⁴ Ācu ṗōescu
tuyū baru divarā, turī yavascuyúme ūi
bajure. Aru diva tuiva baru ṗōescu puenora
chitoquiyebu úre, arejame náre Jesús.

Yópe aiyurótamu no: ṗōeva “Āmecube ū”,
arīdurājarama Jesúii borore. Ūbenita meacu
bajube ū, Jesús, caivu apenu pueno.

⁴⁵ Ina sacerdotevare jaboteiṗōeva
aru ina fariseova jápiaivu bácvu
Jesús ūi jári dápiarī ne ḍarājiyepe
aiyede, coreóvarejaimaḍa soyuyure
nára, “Muja judíoiva muje ḍabe boje
mearore yópe Jūmenijicui urópe, judíoiva
āmevu ūi jaboteimara marajárama muje
pueno” ūi aije báque boje. Que baru
jēni nvaiyurīdurejaima. ⁴⁶ Ūbenita ne
jēiyurīduiyede úre, obedivu ṗōeva “Jesúbe
Jūmenijicui yávaiyede soyūaiṗōescu” arī
dápiaivure jidurejaimaḍa.

**“Purubuoivu ne torojuve teinore” jári
dápiarī ne ḍarājiyepe aino**

(Mt 8.12, 25.30; Lc 13.28, 14.15-24)

22 ¹ Bedíoiva cojedeca Jesús, yópe
arī, buedejame náre apeno jári
dápiarī ne ḍarājiyepe ainoque:

² —Jūmenijicui jaboteinomu
yópe cūinācu jabocui mácú

puru buoyare torojave tede ðainope. ³Nai torojave teino upacu jarorí, “Nujara” aicõjeniduemavu ñi yebacavure ñi cutuimarare. Æbenita ina cutuimaracapuravu nu iyubetequemavu. ⁴Bediõva cojedeca jarorí, aicõjeniduemavu apevu ñi yebacavure yõpe: “Coyujarã ina ji cutuimarare yõpe: ‘Ji torojave teinore meadaivu yu. Boaicõjeivu oteivescva urarãre aru ina mamara jiacurivure mãre. Caiyede meadaivu yu. Que baru aranjara cari, ajarã ji cutuimarare”, aquemavu ñai jabocu. ⁵Æbenita ina cutuimara ñai jabocure ãmeina jãri, yurini, numetequemavu ñi torojave teinore. Cũinãcu memescnuquemavu ñi jioi. Apecu memescnuquemavu ñi bojedaitucubni. ⁶Aru apevu ina yebacavure jẽni, cuyojarõ ðarí, boarí jaruvaquemavu náre. ⁷Diede jãpiarí, ñai jabocu jaraqumavu. Churaravare jaroquemavu, ne boarí jaruvãrãjiyepere ayu ina boarí jaruvaivu bãcavure ñi yebacavure aru ne juarãjiyepere ayu ne imarore.

⁸Dinumure ñai jabocu aquemavu apevu ñi yebacavure, “Jímacu ñi puru buoiye torojave teino meadarí buojainomu. Æbenita ina ji cutuimara mãcavu ãmena bajure daiye jabutedebu. ⁹Que baru ma uramaí nujara muja. Nore caivu muje eaimarare cutujarã, ne darãjiyepere aivu ji torojave teinoi”, aquemavu ñai jabocu. ¹⁰Æi que aríburu yõboi, ina yebacavu mãi nuri cójijovaquemavu caivu ne eaimarare, mearare aru ãmenare mãre, ne torojave teitucubu buiquiyepere aivu. ¹¹Æbenita ñai jabocu jãcunuri ina ñi cutuimarare no torojave teitucubni, jãquemavu cũinãcu põcure puru buoino doiyede dobecva. ¹²Que baru ùre jẽniari jãquemavu, “Pacomã, ÷aípe teni ecoyu buojacurẽ yore puru buoino doiyede dobecva?” aquemavu. Æbenita ñai cutuimãcapuravu bi aquemavu. ¹³Dinumure ñai jabocu ùre caðateipõevare yõpe aquemavu, “Æi purãre, ñi cubbare mãre buorí,

jaruvajarã ùre joai, ñeminoi, ñi ju abe boje yure, ñi coatequiyepe aivu yure jaruvãri. Chõioivu orí curãjarama põevare. Aru jararí cõpi curãjarama na, aquemavu ñai jabocu”, arejame Jesús.

¹⁴Jesús, yõpe arí, buede nurejame:

—Obedivu põevatamu ina Jũmenijicu ñi cuturíduimara. Æbenita obebejĩnatamu ina ñi beoimara, ñi jaboteimara mãrajivu, arejame Jesús.

Jesús ñi coyũino jabovare bojedainore

(Mr 12.13-17; Lc 20.20-26)

¹⁵No yõboi apevu fariseova ne bajumia borotedejaimada aipe ðarí ne jujovarí jacotujuroede Jesúre ñi coyuiyequede. ¹⁶Apevu ne bueimarare apevu Herodecavũque jarorejaimada na. Æi yebai edarí, ùre yõpe arejaima, mamadayurivu:

—Mu, bueipõescu, mure coreõvaivũbu ñija. Nurié yãvaivu mu. Jãveneca bueivu mu põevare, ne ðarãjiyepere ayu mearore yõpe Jũmenijicu ðaicõjeiyepere. Caivure cũinãcamuara yãvaivu mu. Coyubevu mu põevare yõpe ne ðaiyepere. Quénora jidũbecva coyũivu mu náre yõpe ne dãpiayepere. ¹⁷Que baru coyujacu yéde mi dãpiayede iye ñuje jẽniayede mure caride. ¿Maje jabocu César ñi ícõjejuroede, ñi jaboteiyepere boje, maje bojedaru, mearica die? ¿O bojedabejeba maja? arejaima na, ùre jujovaiyuríduivu.

¹⁸Æbenita ne ùre ãmeina ðãjuroede majini, yõpe arejame Jesús:

—Mujã, jujovaiyu, ÷aípe teni yure jujovaiyurídurãru muja? ¹⁹Jãðovajara yure tãtutaturavare, arejame Jesús.

Que ayure, nãcacu cũinãturava tãtutaturavare davarejame ùre. ²⁰Ære ñi davarí jiyede, arejame Jesús:

—¿Ñamema ñai, dituravare jẽnu? ¿Aru ñamei ãmiã curituravaba diturava? arejame náre Jesús.

²¹—Ñai jabocu Césai decocu aru ñi ãmiã mãre curituravatamu, arejaima Jesúre.

Que aivure arejame Jesús:

—César jiede úre jacopaiyovajarã muja. Jíjarã úre táutura yópe ùi bojedacõjeiyepe mujare. Aru Jūmenijicu jiede úre jacopaiyovajarã muja. Đajarã yópe ùi urõpe, arejame náre, jēniari járadaivre, Jesús.

²² Òi que aiyede jápiarĩ, pare dápíarĩ cuecumarejaimada ina úre jūjovaiyurĩdivu bácavu. Que baru úre dajocarĩ etarĩ nurejaima na.

Saduceova ne jēniari jáino Jesúre yainore jaruvarĩ nacajainore
(Mr 12.18-27; Lc 20.27-40; Hch 23.8)

²³ Dijāravumareca apenvu saduceova darejaima Jesús yebai. Saduceo āmicuriyajubobu judfovacavu ne yajubo cūináyajubo. Caivu saduceova “Yainore jaruvarĩ nacajaiye cubevu”, adama na. Jesúre jēniari járejaima ina saduceova yópe arĩ:

²⁴ —Mu, bueipõecu, Jūmenijicui cõjeiyede Moisés bācu coyurejaquemavu: “Cūinácu nēmamicu yaidú, juedocunabescuva, yaiyú bācui yócuere purubuoíye javvu nomiópecoque, juedocunascuvu. Aru ina juedova bárājivu yaiyú bācui āmiāre cūvarājarama na”, coyucõjenejaquemavu Moisés bācuere Jūmenijicu. ²⁵ Javede cātequemavu siete paivu ūmva ñjacavu. Cūinácu ūmvi mára matequémavu na. Aru nēmamicu purubuoquemavu. No yóboi yaiquémavu ū mācu, juedocunabescuva. ²⁶ Que baru apescu, nēmamicu bācūrã cutuyv, purubuoquemavu jībvcu bācui márepacoque. Aru jībvcu bācūpedeca, yaiquémavu ū mācu máre, juedocunabescuva. Aru apescu, ū mācūrã cutuyv máre, popedeca, aru caivu ina siete paivu bācavu óque purubuoĩ, yaiquémavu na māvavu caivu juedocunabevvva. ²⁷ Caivu ne yóboi, ico nomió máco máre yaiquémavu. ²⁸ ¿Aru yainore jaruvarĩ nacajaijāravu baquinóre, ñamei márepaco bacođóba ico? Ijāravvi caivu ina siete paivu cuvatequemavu óre, arejaima na Jesúre.

²⁹ Ūbenita Jesús arejame ina saduceovare:

—Mamateivubu muja, muje majibe boje Jūmenijicui yāvaiyede. Aru Jūmenijicui paruéde máre majibevubu muja. ³⁰ Yainore jaruvarĩ nacajaijāravu baquinóre purubuoobenajarama. Aru jíbenajarama nēmaromivare, ne purubuoarājiyepe aivu. Quénora ángeleva, ina purubuoobevu, cavarõ mearo Jūmenijicui curõcavupe paivu, barājarama ina yainore jaruvarĩ nacajarajivu. ³¹ ¿Iye yainore jaruvarĩ nacajaiyede, jápiarĩ eabenaru muja iye Jūmenijicui coyuiye báquede Moisés bācuere? ³² “Yátamu Jūmenijicu. Abraham, Isaac, aru Jacob ne mearore jímumu yu”, arejaquemavu Jūmenijicu. Que arĩ, yaivu bācavu ne mearore jímū āmemei Jūmenijicu. Quénora apurivu ne mearore jímūtame ū, arĩ coyurejame náre Jesús.

³³ Ina obedivu põeva Jesús ūi nópe coyuiyede jápiaivu, pare dápíarĩ cuecumarejaimada, ūi nópe aye boje.

Đaicõjeiye parué caiye pñeno
(Mr 12.28-34; Lc 10.25-28)

³⁴ Apevu fariseova ne jápiaiyede Jesús vaini tuyv bācuere ina saduceovare, bi are đayv bācuere náre, cõjijidejaima ūi yebai. ³⁵ Aru cūinácu nācavu, Jūmenijicui đaicõjeiyede majicu, Jesúre jūjovarĩ jacotuiyurĩduyv jēniari járejame yópe:

³⁶ —Mu, bueipõecu, ¿ároma majare Jūmenijicui đaicõjeino pñeno parurõ cõjeino? arejame ū.

³⁷ Jesús arejame úre:

—“Ūjacu mi jabocu Jūmenijicure caino mi ūmeduque, caino mi ūmeque, aru caino mi majiéque”. ³⁸ Nótamu Jūmenijicui đaicõjeino pñeno parurõ, pñeno mearo máre. ³⁹ Aru no yóbo cāchijino parurõ đaicõjeinotamu mamaro cõjeinope paino. “Mi bajure mi jecūepedeca jecujacu mícure máre”. ⁴⁰ Caiye Jūmenijicui đaicõjeiye ūi coyuiye báquede Moisés bācuere, aru caiye ina Jūmenijicui yāvaiyede coyucāipõeva māvavu ne bueiye báquede máre coyuiyetamu cūináturura

iye pique ðaicōjeiyeque. Pōevare ñe jaunv majepacu Jūmenijicure aru jesué jaunv arevñ pōevare máre, arí buedejame Jesús.

Cristo ñai jabocu David bácu pāramecu

(Mr 12.35-37; Lc 20.41-44)

⁴¹Ina fariseovacavñ cójijivureca cāreja Jesús yebai, náre yópe arí, jēniari járejame Jesús:

⁴²—¿Aipe dápiavñrū muja ñai Cristore? ¿Namei mácuña ñai? arejame. Ūre arejaima:

—David bácu pāramecu ñe, arejaima.

⁴³Náre arejame Jesús:
—Que baru, ¿aibe teni David bácvacari Espírítu Santoi paruéque coyicōjeimñ marejaquémari “mñ, ji jabocu” Cristorā? David bácu, yópe arí, coyurejaquemavñ Cristorā:

⁴⁴Jūmenijicu aquemavñ ji jabocure, “Dobajacu ji meapūravñi, mi cuvae boje paruéde yupeca. Aru yñ epecñyumu mi mauvare mi cuboba cāchinoi. Que teni mñre vaini jarvñare ðacñyumu yñ náre, mi jabotequiyepe ayñ náre”, arí toivarejaquemavñ David bácu Cristorā.

⁴⁵David bácvacari Cristoi borore arejaquemavñ, “Ūrecabe ji jabocu”. Que baru, ¿aibe teni David bácu pāramecuña ũ? arejame Jesús.

⁴⁶Ñame buojari cūiná coyubeteima ũre. Dijaravñmata ñame yéde jēniari jámenejaima Jesúsre bedióva cojedeca.

Jesús ũi boro coyurí adaino fariseovare aru Jūmenijicui yávaiye báquede bueipōevare

(Mt 3.7, 5.34, 6.1, 12.34, 20.26-27; Mr 9.35, 10.43-44, 12.38-40; Lc 3.7, 11.37-54, 14.7-14, 18.14, 20.45-47, 22.26; Hch 23.3)

23 ¹No yóboi Jesús, yópe arí, coyurejame ina obedivñ pōevare aru ññja ũi bueimarare máre:

²—Jūmenijicui yávaiye báquede bueipōeva aru fariseova buedama

mñjare Jūmenijicui ðaicōjeiye ñi coyuiye báquede Moisés bácu. Jūmenijicui yávaiye jāvene buedama na. Que baru ðajarā mñja yópe ne bueiyepedeca. ³Ūbenita návacari ðabenama yópe ne bueiyepere. Que baru ðabejarā mñja yópe ne ðaiyepe. ⁴Ne baju dápiaiyepe ðaicōjedama pōevare. Ūbenita yópe Jūmenijicui yávaiye báquepe dápiabenama na. Maiyójajebu iye ðaicōjeiye ne baju dápiaiye báque. Návacari caiye iyede ye ðabenama na. Aru ne ðaicōjeimarare ye ðadatebenama, ne ðarājijeye aivñ die maiyójae ðaiyede. ⁵Caiye ne ðaiyede ðadama arevñre jáicōjenajivñ, “¿Meara márica na?” ne arí dápiarājijeye aivñ. Que baru Jūmenijicui yávaiyequede ne toivaino mácarō yocarā, ne adaino mácarō quíjitōcua jívñi buodama na. Ditōcuare ne buoiyede ne tñtñva coapa aru ne ñmuve cācopūravñcañmuve coapa, ñramea buoimeaque buodama na, jáicōjenajivñ arevñre. Aru ne cuitótecajea coapa nareicōjedama turvñvaca jea ñracajeare, jáicōjenajivñ arevñre. Que teni arevñre dápiare ðaiyñrñduyama mearore jívaivñre Jūmenijicure aru jñ ávaivñre máre. Ūbenita nópe dápiajebu pōeva náre ũbenina. ⁶Torojñve teinore cuiyñma na ñai torojñve teino upacu yebai, arevñ ne pueðarājijeye aivñ náre. Judíovai cójijijñamiare ũma na ne dobae mearoa baji, arevñ ne járajijeye aivñ náre parñvñre. ⁷Aru ũma na pōeva pueðarí ne jacyuñnore tñibñi aru “mñ, bueipōecu” ne ainore máre náre.

⁸Ūbenita mñjacapūravñ “mñ, bueipōecu” aicōjemejara arevñre mñja coapa, mñje dápiaiye boje meara arevñ pñeno. Yñ cūinácuratamu mñje bueipōecu. Aru cūinátrñgbu mñja, caivñ cūinávñre paivñ. ⁹Aru ijāravñcasu cubebi “mñ, ññjepacu, ññje jabocu” mñje aimñ. Nópe abejarā pōecure. Majepacu cūinácuratame cavarō mearocasñ. ¹⁰Aru “mñ, jabocu” aicōjemejara arevñre mñja coapa. Yñ, Cristo, cūinácuratamu mñje jabocu. ¹¹Que baru ñai mñjacacu

parucú baiyucú baru, memecajacurí mujare. ¹²Ñai cuiyucú me apevu pueno, parubescuyume pueno baju. Aru ñai parubede ñaiyucú ñi baju apevu cāchino, me cuscuyume pueno baju, Jūmenijicui mearo ñacaquiye boje úre, arí buedejame ñujare Jesús.

¹³Aru yópe arí, coyure ñurejame ñ: —Mujá, Jūmenijicui yávaiye báquede bueirpóeva, aru mujá, fariseova, jujovaivú, chíorajaramu mujá. Jūmenijicu ñájine ñacuyume mujare. Mujá ñadavú yópe pōescu ñi beiiyepe cūramine, apevu ne ecobenajiyeye ayú, aru ñ máre ecobescuyú. Mujá coreóvadavú Jūmenijicui yávaiyede. Ubenita diede ju are ñabevú apevure, ne ecobenajiyeye aivú Jūmenijicui jaboteinore, aru mujá máre ju abevú. Que baru ecobenajaramu nore.

¹⁴Mujá, Jūmenijicui yávaiye báquede bueirpóeva, aru mujá, fariseova, jujovaivú, chíorajaramu mujá. Jūmenijicu ñájine ñacuyume mujare. Jujovarí ñavadavú ina nomiópeva ne arejienne. Aru jēniadavú joe Jūmenijicucque, pōeva ne dápiarājiyeye aivú ubenina mujá me Jūmenijicure ju aivúpe. Caiye iyede mujé ñaiye boje, pueno uraró ñájinajaramu mujá, mujé āmeina teiye boje.

¹⁵Mujá, Jūmenijicui yávaiye báquede bueirpóeva, aru mujá, fariseova, jujovaivú, chíorajaramu mujá. Jūmenijicu ñájine ñacuyume mujare. Joai curānuñavú mujá jia uradai aru joboróí máre. Cūinácú pōecure vorānuñavú, oatvvarājivú ñi dápiayede, ñi dápiacuiyeye aivú mujé dápiayeye. Aru ñi ñaiyede máre oatvavadavú mujá, ñi ñacuiyeye aivú pueno āmenore, ñi ñájiquiyeye aivú toabo cūiméboi mujé pueno.

¹⁶Mujá, Jūmenijicui yávaiye báquede bueirpóeva, aru mujá, fariseova, jujovaivú, chíorajaramu mujá. Jūmenijicu ñájine ñacuyume mujare. “Jūmenijicui yávaiye báquede buení buojaiuvú ñujá”, adavú mujá pōevare ubenina. Yópe jári eabevú ne

jipocateiyeye pōevare, mujá Jūmenijicui yávaiye báquede buení buojabenamu. Yópe ubenina buedavú mujá: “Pōescu ayú baru ‘Ji aiyeye ñacuyumu yú, Jūmenijicui cūrami cue boje’, ñaiye jaubevú úre. Ubenita ayú baru ‘Ji aiyeye ñacuyumu yú, úru cue boje Jūmenijicui cūrami jívui’, ñaiye jauvú úre”, adavú mujá. ¹⁷Mujatamu jári eabevúpe paivú mujé ũmei. Mujatamu ārumevú. Coreóvabevú mujá Jūmenijicui cūramine pueno paruróre caiye iye úru pueno. Iye úrubu pueno me, die cue boje Jūmenijicui cūrami jívui. ¹⁸Aru yópe ubenina buedavú mujá: “Pōescu ayú baru ‘Ji aiyeye ñacuyumu yú, Jūmenijicure jícayede jícavá cue boje ñi cūrami jívui’, ñaiye jaubevú úre. Ubenita ayú baru ‘Ji aiyeye ñacuyumu yú, Jūmenijicure jícayé boje jícavá puenora ñi cūrami jívui’, ñaiye jauvú úre”, adavú mujá. ¹⁹Mujatamu jári eabevúpe paivú mujé ũmei. Coreóvabevú mujá Jūmenijicure jícavare pueno paruróre caiye iye jícayé pueno. Iye jícayebu pueno me, die cue boje Jūmenijicure jícavá puenora. ²⁰Que baru pōescu ayú baru “Ji aiyeye ñacuyumu yú, Jūmenijicure jícavá cue boje ñi cūrami jívui”, jāve aiyuró “Jūmenijicure jícavá aru caiye Jūmenijicure jícayé diva puenora”, aiyubi ũ. ²¹Aru pōescu ayú baru “Ji aiyeye ñacuyumu yú, Jūmenijicui cūrami cue boje”, jāve aiyuró “Jūmenijicui cūrami aru ñai cuscú noi”, aiyubi ũ. ²²Aru pōescu ayú baru “Ji aiyeye ñacuyumu yú, cavaró mearo cue boje”, jāve aiyuró “Jūmenijicui dobaró mearo aru ñai dobacu nore”, aiyubi ũ, arejame Jesús.

Uí que aiyede, Jesús yópe aiyucú barejaquémanu: Cainumua ñaiye jauvú pōevare yópe ne aiyé báquepedeca.

²³Aru yópe arí, coyure ñurejame Jesús:

—Mujá, Jūmenijicui yávaiye báquede bueirpóeva, aru mujá, fariseova, jujovaivú, chíorajaramu mujá. Jūmenijicu ñájine ñacuyume mujare. Caiye mujé oteiyoca, quíjiyoca

bojecubeyoca, caipucapucare
paiyocare cvarivũ, cuiinayocare
jyavũ Jũmenijicure. Ubenita mearo
đavũre aprevũre, cõmaje ãroje jáivũre
aprevũre, aru ju aivũre Jũmenijicure
mãre ãrumevũ muja. Cairucapucare
paiye muje cũaaede jocarĩ, cuiinãrore
Jũmenijicure jyve jauvũ mujare. Ubenita
pũeno baju jauvũ mujare muje mearo
đaiye aprevũre, muje cõmaje ãroje jáiye
aprevũre, aru muje ju aiye Jũmenijicure
mãre. ²⁴Muja đadavũ yõpe jári eabevũ
ne jipocateiyere põevare. Iye parubede
dãpiadavũ muja. Que teni đadavũ yõpe
põecũ ãi íyere jujicure ãi ùcuidore
jocarĩ, ubenita ãi jãruóiyere camello
ãmicũcũ ãimacũ uracure.

²⁵Muja, Jũmenijicui yávaiye
bãquede bueipõeva, aru muja,
fariseova, jujovaivũ, chĩorajaramu
muja. Jũmenijicu ñãjine đacũyũme
mujare. Muja joadavũ muje ùcuidoare
aru jororũare mãre pũenomã, põeva
ne jáinore. Ubenita mujavacari
tatoiyurivũbu aprevũ ne cũaae. Que
teni ãmeno baju đadavũ muja. Que baru
mearo đaiye aprevũre mearotamu joare
đaicõjeiye pũeno. ²⁶Muja, fariseova,
đadavũ yõpe jári eabevũre paivũ
ne ùmei. Muje joaru mamarmũre
ùcuido jívũi aru jororũ jívũi mãre,
ùcuido pũeno aru jororũ pũeno mãre
docũcũbequiyebu. Quédeca dãpiaivũ
baru me, đarãjaramu me mãre.

²⁷Muja, Jũmenijicui yávaiye bãquede
bueipõeva, aru muja, fariseova, jujovaivũ,
chĩorajaramu muja. Jũmenijicu ñãjine
đacũyũme mujare. Mujatamu yõpe
yavũ bãcavũ ne epeĩnamia borĩnamiape
paivũ. Diñamiare põeva ne járu jedevai,
meadamiare ãrojariñamiamu. Ubenita
diñamia jívũi, buidĩnamiamu yavũ
bãcavũ ne cũaõoque, aru docũcũeque
mãre. ²⁸Quédeca põeva ne járu
mujare, mearape aru mearore đavũre
ãrojarivũbu muja ne jáiyede. Ubenita
muje ùmei dãpiadavũ jujovavũre paivũ
aru ãmenore đavũre paivũ mãre.

²⁹Muja, Jũmenijicui yávaiye bãquede
bueipõeva, aru muja, fariseova, jujovaivũ,

chĩorajaramu muja. Jũmenijicu ñãjine
đacũyũme mujare. Muja đadavũ
meadamia cũramiare ina Jũmenijicui
yávaiyede coyũcaipõeva mãcavũ ne
jobocobea bãque pũeno. Aru muja
meadadavũ ãruriñamia cũramiare ina
meara mãcavũre. ³⁰Yõpe borocurĩ adavũ
muja: “Majeñecuva mãcavũ ne curĩnũmũ
curivũ baru maja, ne boarĩ jaruvaiye
bãquede ina Jũmenijicui yávaiyede
coyũcaipõeva mãcavũ cadatebejebu
maja”, adavũ muja. ³¹Ubenita mujavacari
jãdovadavũ ina Jũmenijicui yávaiyede
coyũcaipõeva mãcavũre boarĩ jaruvavũ
bãcavũre paivũre. ³²Maumejiena iye
ãmeina đaiyede mujeñecuva mãcavũ ne
bũiye bãquede bubajarã muja, muje boarĩ
jaruvãrãjiyede yure, Jũmenijicui daroimũ
mãcure.

³³iMuja, jujovaivũ, ãdavape paivũbu
muja! Muje toabo cũimẽboi ñãjinaiyede
jocarĩ, dupini nũivũ buõjabenamũ muja.
³⁴Que baru yũ daroquijivũ muje yebai
Jũmenijicui yávaiyede coyũcaipõevare
aru ùmũva majidivũre, aru Jũmenijicui
yávaiye bãquede bueipõevare mãre.
Aprevũ nãcavũre boarĩ jaruvãrãjaramu
muja. Aprevũre jocũcũjaravena pẽvari,
boarĩ jaruvãrãjaramu. Aprevũre jara
popenajaramu maja judõova maje
cõjjiñamiai. Aru aprevũre cujurãjaramu
muja ãmaroa coapa. ³⁵Que baru
Jũmenijicu ñãjine đacũyũme mujare,
cavũ meara mãcavũ ne yaiye bãque boje
ijãravũre, aprevũ ãi boarĩ jaruvaiye bãque
boje ñai Abel bãcure, aru aprevũ ne boarĩ
jaruvaiye bãque boje cavũ Abel bãcui
yõbocavũ bãcavũre mãre, pũ Zacarĩas
bãcũ bajita, Berequĩas bãcui mãcũ bãcure,
ñai mujacavũ bãcavũ ne boarĩ jaruvaimũ
mãcure Jũmenijicui cũrami tãibũ
coricai. ³⁶Jãve coyũyũbu mujare: Muja
ijãravũcavũ ñãjinajaramu, muje ãmeina
đaiye boje, arĩ buedejame Jesũs.

Jesũs ãi oino, Jerusalẽcavũre jecũcũ

(Lc 13.34-35)

³⁷Yõpe arejame Jesũs:

— iMuja, Jerusalẽcavũ, mujeñecuva
mãcavũ boarĩ jaruvãrejaquemavũ ina

Jūmenijicui yávaiyede coyucaipōeva mácavure! Cūraboaque dvarí boarí jaruvarejaquemavu ina Jūmenijicui daroimara mácavure ne yebai. Obedinũma cójijovaiyuríduvu yu mujare ji yebai, yópe cáyuco òi cójijovaiyepe mamarare òi caveba cāchinoi. Ūbenita ũbeteavũ mija. ³⁸Jájara. Dinũmu maquinó mije curõre Jūmenijicui dajocarí jaruvacũyume. ³⁹Aru coyuũbu mujare: Yure jámenajaramu mija cojedeca pu jádovacudayure meacu bajure jáivuta. Dinũmu maquinóre arājaramu yópe: “Torojue bajeñi ñai dayure Jūmenijicui ãmiái, ũi paruéque”, arejame Jesús.

Jesús ũi coyuũno “Jūmenijicui cūrami tũquiyeu” arí
(Mr 13.1-2; Lc 21.5-6)

24 ¹Jesús etayu bácu Jūmenijicui cūramine jocarí, ñija ũi bueimara ũi yebai nurí, jádovarejacarã diñamia cūramiare, Jūmenijicui cūramicadãmiane. ²Aru ñijare arejame: —Caiñamia diñamia uradãmia cūramiare jáivũbu mija. Jáve coyuũbu mujare: Cūináva cūrava mautebequiyeu apeva puenora. Caiye iva cūrava tũquiyeu, arejame Jesús.

Jádovaiye jāravu cūiquíye jipocai
(Mt 10.22; Mr 13.3-23; Lc 17.22-24, 31, 37, 21.7-24; Ap 7.14)

³Jesús dobarejame cūracū Olivocū ãmicuricū puenoi. Ūi dobaede noi, ñija, ũi bueimara, jēniari járejacarã ũre yavenina, pōevare jocarí:

—Coyũjacu ñijare: ¿Aipiye tũquidi caiye iye cūramia uradãmia? ¿Aipe ñari coreóvarājidica ñija mi copaidaquiye? ¿Aipe ñari majinajidica ñija ijāravu cūiquíye? jēniari járejacarã ũre.

⁴Ñijare yópe arí, coyurejame Jesús: —Me jájara apecu jūovaiyucure mujare. ⁵Obedivu ũmũva ñari arājarama “Cristobu yu”, jūovarājivu obedivu pōevare. ⁶Aru “Pōeva boadãma apevu pōevaque” ne borore jápiarí, aru “Pōeva boarājarama apevu pōevaque” ne

borore máre jápiarí, jidubejarã mija. Que baru caiye iye vaiye javvu, jāravu cūiquíye jipocai. Ūbenita cūimébu cāreja. ⁷Cūináyajubo pōeyajubocavu ãdamatenajarama apeyajubo pōeyajubocavunque. Aru cūináro jaboteinocavu ãdamatenajarama apeno jaboteinocavunque. Joboró cūiquíyeu obedicurõare. Ñajinajarama ãvũena. ⁸Iye ñájiye baquiébu yópe jueocũ pōteyure ñájiyepe. Yópe báquiyeu caiye iye ãmeina ñajinajiye.

⁹Mujare jēni jīnajarã, mije ñajinajiyepe aivu. Aru mujare boarí jaruvarejarama na. Mujare cainoa jaborõacavu jorojīni járajarama, yure mije ju aye boje. ¹⁰Dinũmu maquinóre obedivu yure ju aivu bácvu dajocarājarama ne yure ju aye báquede. Obedivu jēni jīnajarã névure ne mavure. Aru obedivu jorojīni járajarama névure máre.

¹¹Obedivu borocurivu “Jūmenijicui yávaiyede coyucaipōecubu yu” arí, ũbenita coycaríduivu, pōevare jūjovarãdarājarama. ¹²Dinũmu maquinóre obedivu pōeva urarõ baju ãmenore ñarājarama. Que baru obedivu pōeva ũbenajarama apevu pōevare. ¹³Ūbenita ñai ju ayu yure ũi yainũmũta, ũ macũyũme ji meadãimu. ¹⁴Mamarũmure yávaiye méne Jūmenijicui jaboteinora coyuíye javvu cainoa joborõacavure, ne jápiarãjiyepe aivu diede. Que baru cainoa joborõacavu iye yávaiye méne coreóvaivu barājarama. No yóboi jāravu cūiquíyeu.

¹⁵Ūbenita iye vaiquíye jipocai, ñai ũmu pare ãmecu núcyũme nore, Jūmenijicui cuicõjemenore ũre, yópe Daniel ãmicucu Jūmenijicui yávaiyede coyucaipōecu bácu ũi coyuíye báquipedeca. Caivu jári boroteivu iye toivaiyede me dápijarãri caiye iyede. Ñai ũmure járajaramu mija. ¹⁶Judeacavu dupini ñajarari cūracūai, ne jidué boje ñai ũmure. ¹⁷Aru ñai cūrami puenora cuscũyũ, ũi dupini nuiyede, ěmeni, ñari, ñavariducũyũ

ñi apejijene, ecobejacurĩ ñi cūrami.

¹⁸ Aru ñai jiore memecuyu, ñi dupini nuiyede, copainumejacurĩ, ñiducuyu ñi cuitótecaje puenocacajede. ¹⁹ iCōmaje ārojarajarama ina nomiva micava bārājivũ dijāravua baquiyéde! iAru ina nomiva nēmajina nuri dajocabevure cvarājivũ máre pare ñājinajarama dijāravua baquiyéde! ²⁰ Jēniajara Jūmenijicuque iye vaibéquiyepe aivũ ocorūmure aru jabuóvañājavũ sábadore máre.

²¹ 'Dijāravua baquiyéde pōeva űrarō ñājinajarama. Nópe paiye cubevu cāreja, mamarumumata Jūmenijicu ñi cuedarĩ bwinumure pu caride máre. Aru cainumua cubequiyebu. ²² Jūmenijicu ñi javaiyobedu dijāravua ñājiovaquijāravua baquiyéde, caivũ yaijēbu. Meadaimara cubejebu. Ūbenita Jūmenijicu javaiyocuyume dijāravua ñājiovaquijāravua baquiyéde, ñi beoimara mácavure boje.

²³ 'Dijāravua baquiyéde apecu ñi aru mũjare yópe, "Jājara. iÑainecabe Cristo!" o apecu ñi aru mũjare, "iÑñurecabe Cristo!" náre ju abejarā.

²⁴ Que teni obedivũ borocurivũ darĩ, coyurājarama "Cristobu yũ". Aru apevu máre Jūmenijicui yāvaiyede coyucarĩdurājarama. Ūbenita Jūmenijicui yāvaiyede coyucaipōeva baju āmenajarama na. Ūrarō pōeva ne jámene aru ne ñarĩ majibede máre ñarājarama, jujovaiyurĩduivũ Jūmenijicui beoimara mácavure.

²⁵ Ūbenita me jājara mũja. Coyũyũbu mũjare ne borore, mũje majinajiyepere ayu, ne darājiye jipocai. ²⁶ Que baru apevu ne aru "Jājara. Ñai Cristo cubi pōecubenoĩ", nūmejara mũja nore. Aru apevu ne aru "Jājara. Ñai Cristo cubi tucubũ jívũ", ju abejarā ne nópe coyuiyede.

²⁷ 'Jūmenijicui daroimũ mácu űmure, yaroinope nūquiyebu ji copaidaquijāravũ baquinóre. Yópe no yaroino pēoiyepere cavarōi, aviá dainocapūravure jocarĩ pu aviá doinocapūravũita, caivũ pōeva ne jājajiyepere ayu nore, nopedeca

copaidacuyumu yũ. Aru caivũ pōeva jājajarama ji copaidaquiyede ijāravui. ²⁸ Āri yayiyũ bācuĩ curōi, noi cójjinajarama cavava. Nopedeca caiye iye ji coyuiyede jáivũ, majinajaramu mũja ji copaidaquino joabenore, ji ñājiovaquinore pōevare, ne āmeina teiye boje, arĩ buedejame Jesús.

Jūmenijicui daroimũ mácu űmure ñi copaidaquino

(Mr 13.24-37; Lc 12.39-40, 17.26-30, 34-36, 21.25-33; Ap 1.7, 6.12-13)

²⁹ Bediōva cojedeca Jesús, yópe arĩ, coyurejame ñũjare:

— Cūinājāravũ dijāravuacajāravũ baquinói, iye űrarō ñājiniburu yóboi, aviá ñemitecuyume. Aru aviá ñamicacu máre pēomescuyume. Na abiácova turājarama cavarōre jocarĩ. Aru caivũ ina parurivũ curivũ cavarōi cújinajarama. ³⁰ Dinumũ maquinóre Jūmenijicui daroimũ mácu űmure ji copaidaquiyede jádovaiye jároquiyebu cavarōi. Aru caivũ pōeyajuboacavũ ijāravucavũ chĩorĩ orājarama. Dinumũ maquinóre jājajarama yure, Jūmenijicui daroimũ mácu űmure, dayure ocopeniboai, űrarō paruéque, jádovañure meacu bajure. ³¹ Que teni trompeta āmicuriyo japuiyore japuiye pare bujiéque, ji ángelevare darocuyumu yũ. Nācapūravũ cójjiovarājarama Jūmenijicui beoimara mácavure, caivũ aviá dainocavure aru caivũ aviá doinocavure máre, cainoa joborōacavure.

³² 'Majijarā yo mũje jáinore. Icu jocosu higueraçu āmicuricure yoca yuiyede, majivũ mũja mũjũmũ joabenore.

³³ Nopedeca jáivũ caiye iye teiyede, majinajaramu mũja jāravũ cūino joabenore. ³⁴ Jáve coyũyũbu mũjare: Apevu ijāravui curivũ yaibédeca cāreja, vaiquiyebu caiye iye yópe ji coyuiyepere. ³⁵ Caino cavarō, aru caino joborō máre cūiquiyebu. Yópe ji yāvaiyepedeca jáve vaiquiyebu.

³⁶ 'Ūbenita dijāravũ baquinóre aru diora baquinóre ñame majibema.

Ángeleva, ina curivũ Jũmenijicũque cavarõ mearoi, aru yu, Jũmenijicũ mácu máre, majibevũ ñũja. Quénora jipacu majibi dijãravũ baquinóre.

³⁷ Dijãravũ baquiyéde,

Jũmenijicũ daroimũ mácu ãmũpe ji copaidaquijãravũ jipocai, cuquiyebu nópe añijãravũ Noé mácu curijãravũ báquepe. ³⁸ Añijãravũ báquede, muiváibo daquiye jipocai, caivũ põeva ãivũ barejaquémavũ, aru ùcuivũ barejaquémavũ. Ñmũva purũbuoivũ barejaquémavũ. Aru jivũ barejaquémavũ némaromivare, ne purũbuorãjiyepe aivũ. Nópe tedejaquemavũ, Noé mácu jiaðocũ uracũre ecoijãravũ bácarõita. ³⁹ Ñbenita ne bjãrãjiyede coreóvabedejaquemavũ, pũ muiváibo daiyeta. Aru caivũ ina põeva corĩ bjãrejaquemavũ na mácavũ. Nopedeca baquiyébu Jũmenijicũ daroimũ mácu ãmũpe ji copaidaquiyede. ⁴⁰ Dinũmũ maquinóre pũcarã ãmũva memenajarama ne jioi. Cũinácu nũvaimũ macũyáme, yure ãi jũ aiyẽ boje. Aru apescu mautescũyume, yure ãi jũ abe boje. ⁴¹ Pũcarã nomiva jĩorajarama ne cũrami jivũ. Cũinácu nũvaimo macoðóme, yure õi jũ aiyẽ boje. Aru apesco mautescoðome, yure õi jũ abe boje.

⁴² Que baru me jãjara mũja. Mũja majibevũ ji copaidaquijãravũre, ji jabotequiyede mũjare. ⁴³ Ñai cũrami upacu majibebi aipiyede ñavaipõescu dacũyure. Majicu baru ñavaipõescu ãi daiyede, coreni, ecoicõjemeni, ñavaicõjemejebu ãi cũramiquede. ⁴⁴ Aru mũjare máre meadaiye janvũ. Que baru yu máre, Jũmenijicũ daroimũ mácu ãmũpe, dacũyũmu mũje corebeorai yure, arĩ buedejame Jesús.

“Memecaiõescũ jũ ayũre aru memecaiõescũ jũ abecũre” jãri dápiarĩ ne ðarãjiyepe aino
(Lc 12.41-48)

⁴⁵ Bediõva jãri dápiarĩ ñũje ðarãjiyepe arĩ, buedejame Jesús:

—Coyũquijivũ mũjare ãi borore ñai memecaiõescũre jũ ayũre ãi

jabocũre aru majicũre máre. Ñai cũrami upacu coreicõjescũyube ñai memecaiõescũ majicũre, ãi jíquiyepẽ ayũ yebacavũre ne ãrajivẽva caijãravũa.

⁴⁶ Ñai cũrami upacu copaini dayũ earu úre memecaiõescũre ðayũre yópe ãi cõjeinope, torojucũyube ñai memecaiõescũ, cũrami upacu ãi jíquiyẽ boje úre bojedaino mearore. ⁴⁷ Jãve coyũyũbu mũjare: Ñai cũrami upacu coreicõjescũyube ñai memecaiõescũre caiye ãi cãvaede. ⁴⁸⁻⁴⁹ Ñbenita ñai memecaiõescũ, jũ abescu baru ãi jabocũre, “Ji jabocũ maume dabecũbe” arĩ, aru ãmeina ðayũ baru ãi yebacavũre aru yebacarõmivare máre, urarõ ãri aru ùcuri pacotecũyube ãi.

⁵⁰ Que teiyede ãi jabocũ dacũyube ñai memecaiõescũ ãi corebejãravũ baquinói aru ãi majibeora baquinói máre. ⁵¹ Aru ñai jabocũ jarũvaicõjescũyube úre jũjovavũre ne jarũvainoi, ãi ñãjiquiyepẽ ayũ noi. Nore chõioivũ orĩ, curãjarama põeva. Aru jararĩ cõpi cũrajarama na, arĩ buedejame Jesús.

“Cairũsarũũare paivũ bojurõmivare” jãri dápiarĩ ne ðarãjiyepe aino
(Lc 12.35, 13.25)

25 ¹ Yópe arĩ, jãri dápiarĩ ñũje ðarãjiyepe ainoque buedejame Jesús:

—Dijãravũ baquinói, ji copaidaquijãravũ, Jũmenijicũ jaboteino yópe baquiyébu cairũsarũũare paivũ bojurõmiva ne ðaiye báquepe. Ina bojurõmiva, ne pẽoibũare náre coapa ñni, copũ etaquemavũ ñai purũbuoyure ãi daiyede. ² Cũinápurũpe paivũ nácvũ majibevũ batequémavũ. Aru apenvũ cũinápurũpe paivũ nácvũ majidivũ batequémavũ. ³ Ina majibevũ, ne nũvaiyede ne pẽoibũare, neore nũvametequemavũ. ⁴ Ñbenita ina majidivũ, ne nũvaiyede ne pẽoibũare, nũvaquemavũ ne neobũare máre neoque.

⁵ Ñai purũbuoyũ ãi dabe boje cãreja, caivũ ina bojurõmiva cãquemavũ.

⁶ Ñbenita ñami corica bajĩ codoboboyede jãpiaquemavũ na.

“Jájara. Ñai p̄r̄ub̄uoy daibi. Ére copu etajarā m̄ja”. ⁷Diede jápiarī, caiv̄u ina bojur̄ōmiva coedaquemav̄u. Aru ne p̄oib̄uare meadaquemav̄u na. ⁸Que teni ina majibev̄u, yópe arī, j̄eniaridudemav̄u ina majidiv̄uare, “Ñuje p̄oib̄uare cođaib̄uatamu. Que baru j̄járā ñujare majiówarijino m̄je neoquede”, aridudemav̄u na. ⁹Ūbenita ina majidiv̄u, yópe arī, coȳquemav̄u náre, “Bi, j̄ibev̄u m̄jare. Neo eabequiyebu ñujare aru m̄jare máre. Quénora neore bojedaino bojedar̄ñujara m̄ja, ñajiv̄u m̄jeva”, aquemav̄u na. ¹⁰Ne neore bojedar̄ñuiyede, ñai p̄r̄ub̄uoy daquemav̄u. Ina bojur̄ōmiva meadaiv̄u b̄acav̄u ecoquemav̄u éque, ārajiv̄u toroj̄uve teinoi. Aru no c̄rami jedevacobede biequemav̄u. ¹¹No yóboi ina bojur̄ōmiva meadabev̄u b̄acav̄u edaquemav̄u toroj̄uve teiñami máre. Aru yópe arī, “M̄, ñuje jabocu, voacajacu ñujare”, j̄eniaridudemav̄u. ¹²Ūbenita ñai p̄r̄ub̄uoy yópe aquemav̄u náre: “J̄ave coȳyubu m̄jare: J̄iv̄u ānev̄u m̄ja. M̄jare coreóvabev̄u yu”, aquemav̄u ũ ina bojur̄ōmiva majibev̄uare, arejame Jesús.

¹³Aru buede n̄rejame Jesús:

—Que baru meadaimara m̄jara m̄ja, m̄je majibe boje ye j̄arav̄uare aru ye órare máre ji copaidaquiyede, m̄jare meadaive jauquinore, arejame Jesús.

“T̄aturare” jári d̄apiarī ne đar̄ajiyep̄e aino

(Mt 8.12, 13.12, 22.13; Mr 4.25;

Lc 8.18, 13.28, 19.11-27)

¹⁴Yópe arī, jári d̄apiarī ñuje đar̄ajiyep̄e ainoque buedejame Jesús:

—Dij̄arav̄u, ji copaidaquij̄arav̄u baquinói, J̄ūmenijicui jaboteino yópe baquiyébu c̄inác̄u ũm̄u arepo jaborōi n̄sc̄ȳu ũi đaiye b̄aquepe. Ūi n̄quiȳe j̄ipocai, órejaquemav̄u ére memecaip̄ōvare, epec̄ȳu ũi c̄vaede náque, ne jári coreñajiyep̄e ayu diede. ¹⁵C̄inác̄u n̄ac̄ure epequemav̄u c̄inár̄p̄upe paimil turava t̄aturaturavare. Apecu

n̄ac̄ure epequemav̄u p̄scamil turava t̄aturaturavare. Aru ap̄c̄ure epequemav̄u c̄inámil turava t̄aturaturavare. Ne majiépe epequemav̄u náre coapa. Caiye iyede epeniburu yóboi, n̄quemav̄u ñai ũm̄u. ¹⁶Ñai memecaip̄ōescu jacop̄ȳu b̄acu c̄inár̄p̄upe paimil turava t̄aturaturavare bojedac̄n̄quemav̄u dieque. Aru eaquemav̄u ape c̄inár̄p̄upe paimil turava t̄aturaturavare. ¹⁷Quédeca ñai memecaip̄ōescu jacop̄ȳu b̄acu p̄scamil turava t̄aturaturavare bojedac̄n̄quemav̄u dieque. Aru eaquemav̄u ape p̄scamil turava t̄aturaturavare. ¹⁸Ūbenita ñai memecaip̄ōescu jacop̄ȳu b̄acu c̄inámil turava t̄aturaturavare ũc̄n̄quemav̄u jaborōi, yavesc̄ȳu diturava, ũi jabocu t̄aturaturavare.

¹⁹Obedij̄arav̄u yóboi, ñai jabocu copaidaquemav̄u. Corevac̄daquemav̄u ne bojedaiyede ũi epeiye b̄aquepe náre. ²⁰Ñai jacop̄ȳu b̄acu c̄inár̄p̄upe paimil turava t̄aturaturavare n̄quemav̄u ũi jabocu yebai. Navaquemav̄u caip̄sc̄ar̄p̄upe paimil turava t̄aturaturavare. Aru aquemav̄u, “M̄, ji jabocu, m̄ epeáv̄u c̄inár̄p̄upe paimil turava t̄aturaturavare yure. Diede bojedarī, ív̄u yu ape c̄inár̄p̄upe paimil turava t̄aturaturavare”, aquemav̄u ũ. ²¹Que baru ñai jabocu aquemav̄u ére, “Mearo đarebu m̄. Đaiv̄u m̄ yópe đaiye jauépe. Mi mearo đaiye boje quíjinoque, epequijiv̄u m̄re p̄ueno baju. Caride toroj̄usc̄ȳum̄u m̄, yópe ji toroj̄upe”, aquemav̄u ñai jabocu. ²²Aru ñai jacop̄ȳu b̄acu p̄scamil turava t̄aturaturavare n̄quemav̄u ũi jabocu yebai. Ūi jaboc̄ure aquemav̄u, “M̄, ji jabocu, m̄ epeáv̄u p̄scamil turava t̄aturaturavare yure. Diede bojedarī, ív̄u yu ape p̄scamil turava t̄aturaturavare”, aquemav̄u ũ. ²³Que baru ñai jabocu aquemav̄u ére máre, “Mearo đarebu m̄. Memecaip̄ōescu meacubu m̄. Đaiv̄u m̄ yópe đaiye

janépe. Mi mearo ðaiye boje quíjinoque, erequijivü müre püeno baju. Caride torojüncuyümu mü, yöpe ji torojüneré”, aquemavü ñai jabocu.

²⁴ Ûbenita ñai jacopuyü bácu cüinámil turava täuturaturavare nüquemavü üi jabocu yebai. Üi jabocure aquemavü, “Mü, ji jabocu, jidojacübu mü. Mü ñümu apescu üi epeiye báquede. Aru mü jēñümu apescu üi oteiye báquede. ²⁵ Que baru jidüvü yü müre. Aru yavecaca mi täuturare joborō jívüi. Yüi cüvavü mi täuturare”, aquemavü ü. ²⁶⁻²⁷ Ûbenita ñai jabocu aquemavü üre, “Mü, memecaipöescu ämecübu. Jüracücübu mü. Yü ñüre apescu üi epeiye báquede aru jēñüre apescu üi oteiye báquede majicüvacari, epecünüri jaüridurebu müre ji täuturare täutura epeiñami. Mi que ðaru, copaini ðayü jacopüjebu yü ji täuturare püeno baju, diñamicavü ne bojedaiye báque cojióri”, aquemavü ñai jabocu. ²⁸ Que baru ñai jabocu apevüre ícöjeni aquemavü, “Íjara üre jocarí yo cüinámil turava täuturaturavare. Aru jíjarä ñai caipücapüruape paimil turava cüvacure. ²⁹ Caivü cüvarivü jacopüräjarama püeno baju, cüvaräjivü urarō baju. Ûbenita caivü dápiavüre cüvarivüpe apevü püeno, caiyede náre ícüyümu yü. ³⁰ Aru ñai memecaipöescu yure cadatebecure jaetovajarä joai ñeminoi, üi ju abe boje yüre, üi coatequiyepé aivü yüre jarüvarí. Noi pöeva chíoivü orí, cüräjarama. Aru jararí, cöpi cürajarama na”, arí buedejame Jesús.

Jesús üi bojedaino caivüre yöpe ne ðaiye báqupe

(Mt 16.27, 19.28; 1 Co 8.12; He 13.3)

³¹ Yöpe arí, coyürejame Jesús:

—Yü, Jümenijicüi ðaroimü mácu ümüre, meacu baju dacuyümu íjarävüi. Aru caivü ina ángeleva ðaräjarama yúque. Edaríburu yöboi, dobacuyümu jabocüi dobarō mearora. ³² Ji jípacai cójijinajarama caivü íjarävüi joborōacavü. Yöpe oteiäimarare coreipöescu üi boiyepe ovejavare ini

cabravare jocarí, popedeca beocuyümu yü ina pöevare. ³³ Yöpe üi epeiyepe ina ovejavare üi meapüravüi aru ina cabravare üi cäcopüravüi, popedeca beorí epecuyümu yü ina pöevare.

³⁴ Beoríburu yöboi, acuyümu yü, caivü ne jabocu, ina pöeva meara ji meapüravüi curivüre, “Dajarä müja. Müjamu jípacüi mearo ðacaimara. Ji jaboteimara májara müja. Jípacü Jümenijicü üi cüedaiye báquedata caiyede, meadacarejaquemavü yo jaboteinore müjare boje. ³⁵ Yüre ävüé ijiteavü. Aru äiyede jivävü müja yüre. Yüre cüiñóavü. Aru ücuiyede jivävü müja yüre. Joai cucüdacacu müje yebai. Aru yüre copü etavü müja. ³⁶ Cuitótecaje cüvabotecacu yü. Aru ji doiyeva jivävü müja yüre. Íjimü matecácu yü. Aru ji yebai curäðavü müja. Jabova ne buoimü matecácu yü ämeina teivüre jēni jacoíñami jívüi. Aru yüre járadavü müja noi”, acuyümu müjare. ³⁷ Que ayüre, ina pöeva meara, ji meapüravücavü, yöpe aräjarama yüre: “Mü, nüje jabocu, çaipiyede müre äuyaiyüre jári, äiyede jiarí nüja? çAipiyede müre cüiñóimüre jári, ücuiyede jiarí nüja? ³⁸ çAipiyede müre joai cucüdayüre jári, copü etarí nüja? çAipiyede müre cuitótecaje cüvabecüre jári, mi doiyeva jiarí nüja? ³⁹ çAipiyede müre íjimüre aru müre ne buoimüre jári, járadarí nüja?” aräjarama yüre. ⁴⁰ Aru yü, caivü ne jabocu, acuyümu náre: “Jäve coyüvübu müjare: Müje cadateiyede cüinájicu ina jívücacure parübecureca, yüre müje cadateiyepébu”, acuyümu yü.

⁴¹ Dínümu maquinóre ina pöeva ämenare, ji cäcopüravüi curivüre yöpe acuyümu yü: “Nüjara müja yüre jocarí. Müjamu jípacüi ämedaimara. Nüjara müja toabo cüiméboi. No meadaino mácaröre abujuvai jabocüi curöre üi ángelevaque. ⁴² Yüre ävüé ijiteavü. Ûbenita äiyede jíbeteavü müja yüre. Yüre cüiñóavü. Ûbenita ücuiyede jíbeteavü müja yüre. ⁴³ Joai cucüdacacu müje yebai. Ûbenita yüre copü etabeteavü müja. Cuitótecaje cüvabotecacu yü. Ûbenita ji doiyeva

jíbeteavū mūja yure. Ijimu matecácu yu. Aru jabova ne buoimū matecácu yu āmeina teivure jēni jacoĩnami jívui. Ëbenita yure járadabeteavū mūja”, acuyūmu yu. ⁴⁴Que ayure, ina pōeva āmena, ji cācopūrāvucavū, yópe arājarama yure: “Mū, ñuje jabocu, çaipiyede mure āuyaiyure, o cūinómure, o joai cucūdayure, o cuitótecaje cuvabecure, o ijimure, o jabova ne buoimure jári, ùbenita mure cađatebetearı ñūja?” arājarama na. ⁴⁵Aru yu acuyūmu náre: “Jāve coyūyubu mujare: Mūje cađatebede cūinájicu ina jívucacure parubecureca, yure mūje cađatebepedecabu”, acuyūmu yu. ⁴⁶Aru nácapūravu nurajarama toabo cūiméboi, ñájinajivu cainumua. Ëbenita ina meara ecorājarama ji jaboteinore, me curājivu cainumua, arí coyurejame Jesús.

Jesús ũi coyūino ne jēnainore ũre yóboimia

(Mr 14.1-2; Lc 22.1-2; Jn 11.45-53)

26 ¹Caiye iyede Jesús coyurí buojarí, yópe arejame ñūja ũi bueimarare: ²—Majivu mūja. Pascua āmicurijāravu aru páure bucure ðaiye cube āiye torojūve teinumu pucajāravua jipocai barejávū cāreja. Aru dinumu maquinóre yure, Jūmenijicui daroimū mácure ũmupe, jēni jínajarama ji mauvare, ji yaiquíyepa aivu jocucjaravena, arejame Jesús.

³Dinumure sacerdotevare jaboteipōecu Caifás āmicurejame. Apevu sacerdotevare jaboteipōeva aru judíoiva bucūva cōjjijidejaimada ñai Caifás ũi cūrami.

⁴Cōjjivū, ne bajumia majicarejaimada Jesúre hujovari jēni, boarí jaruvarājivu yavenina. ⁵Ne bajumia arejaimada:

—Torojūve teinumu ũre jēmenajarevu maja. ũre jēnu torojūve teinumu, pōevacapūravu jorojīni, majare boarí jaruvaivyūjebu, arejaimada ina judíoivai jabova.

Cūináco nomió ōi mumijue yuaino Jesúre

(Mr 14.3-9; Lc 7.37-38; Jn 12.1-8)

⁶⁻⁷Dinumure Jesús ũi cuede Betania āmicurīmajinoi, Simón pojeyu bácu

cūrami tuoiva yebai āivu barejacará ñūja. Que teni cūináco nomió darejaco Jesús yebai. Ico nomió davarejaco cūinábu ũmujūribu boribure, mumijuricoro curibure. Iye mumijue, nardo āmicue, pare mearo corajūrejavū. Aru pare bojecue barejávūya. Que ðarı ico nomió yuarejaco caiye iye mumijuede Jesúi jipoburá. ⁸Ëbenita ñūja Jesúi bueimara ōi nópe ðaiyede jári, jorojīni arejacará:

—¿Aipe teni iye mumijuede jaruvadóba ō? ⁹Diede bojedarı, uraró boje ĩni, jíye jaujebu ōre cuve cuvabevure, arejacará ñūja.

¹⁰Ëbenita Jesús, diede coreóvayu, arejame ñūjare:

—¿Aipe teni ico nomióre cārijovaiuvurū mūja? Ōi ðaiye yure mearotamu.

¹¹Cainumua ina cuve cuvabevu curājarama mūjaque. Ëbenita yu cubecubu mūjaque cainumua. ¹²Ōi yuayiede dicorore yurá, meadacaibico ji bajure, ne jaruvarājíyepa ado. ¹³Que baru jāve coyūyubu mujare: Cainoa joborōai ijāravui pōeva ne coyūiyede iye yávaiye méne ji meadaiyede pōevare, iye ōi yure ðacaiyede máre coyurājarama, ne ārurajíyepa aivu ōre, arejame Jesús.

Judas ũi jēni jino Jesúre

(Mr 14.10-11; Lc 22.3-6)

¹⁴No yóboi cūinácu ñūjacacu, doce paivu Jesúi bueimaracacu, ũi āmiá Judas Iscariote, nurejameđa ina sacerdotevare jaboteipōeva yebai. ¹⁵Ñai Judas náre jēniari jārejameđa:

—¿Ji Jesúre jēni jídu mujare, aipino jínajivurū mūja yure? arejameđa ũ.

Aru treinta paiturava plataque ðaiturava tauturatūravare jídejaimada ũre. ¹⁶Que baru dinumumata Judas jári, coreni búrejameđa yavenina, jēni jícyu Jesúre.

Jesús ũi āino ũi bueimaraque

(Mr 14.12-25; Lc 22.7-23; Jn 13.21-30; 1 Co 11.23-26)

¹⁷Páure bucure ðaiye cube āiye torojūve teinumu mamabuijāravu

barejávã. Aru dijãravure Jesús yebai nuri, jëniari járejarã ñuja, ñi bueimara:

—¿Ari nuri, mure maje Pascua jãravuque ãiyede meadacarãjidica ñuja? arejarã úre.

¹⁸ Aru arejame Jesús:

—Jerusaléi nuri, ñai ñmu, ji aimu mácu, ñi cãrami ñujara muja. Úre yópe ajarã muja, “Maje bueipõecu aibi, ‘Joabëjñotamu ji yaiquino. Que baru mi cãrami ãquijivu yu Pascua jãravuquede ji bueimaraque’, aibi maje bueipõecu”, ajarã muja, ñujare arejame Jesús.

¹⁹ Úre ju arí, ñmaroi nuri, ðarejarã ñuja yópe Jesús ñi aiyede báquepedeca. Noi Pascua jãravuque ãiyede meadarejarã ñuja. ²⁰ Que teni meadarí bujarí, nainú baji, aviá ñi doríburu yóboi, darí dobarejame Jesús tuoiva yebai, ñuja ñi bueimara doce paivuce.

²¹ Ñuje ãiyedeca, Jesús arejame ñujare:

—Jãve soyuyubu mujare: Mujacacu cüinácu yure ji mauvare jëni jícuyme ñi, arejame Jesús.

²² Que baru chioivã barejarã. Aru ñuja coapa yópe arí búrejarã Jesúre:

—iMu, ji jabocu, que ðabecubu yu! ¿Múcarí? arejarã ñuja coapa.

²³ Que arí, Jesús arejame ñujare:

—Cüinácu mujacacu jóyu páure jorotãmica yúque, ñ macuyúme ji mauvare yure jëni jíyu. ²⁴ Yu, Jümenijicui daroimu mácu ñmure ijãravui, ji yaijãravui nucuyumu yu, yópe Jümenijicui toivaicõjeiye báquepedeca ñi yãvaiyede. Ubenita ñmeno vaicuyume ñi, ñai yure jëni jíyu bacuyá. Ñai nópe ðacuyu, ñi põetebedu meajebu, arejame Jesús.

²⁵ Judas, úre jëni jícuymu, arejame úre:

—Mu, bueipõecu, yu ñmenvu mi soyuimã nópe. ¿Múcarí? arejame Judas. Úre arejame Jesús:

—Mátamu ji soyuimã nópe, arejame Jesús.

²⁶ Ñuje ãiyedeca, páure ñni, Jümenijicure torojuede jídejame Jesús. No yóboi, páure cotãvarejame. Aru ñujare coapa jídejame.

—Páure ñjara muja. Diedecabu ji bajupe, jádovaiye ji yaiquino ñujare boje, arejame ñujare Jesús.

Aru ñrejarã ñuja.

²⁷ Úcuidore máre ñni, torojuede jñi Jümenijicure, ñujare jídejame Jesús, yópe arí:

—Jëni, úcuri, veorí, úcujara caivu muja coapa. ²⁸ Diedecabu ji jivepe, jádovaiye ji yaiquino ñujare boje, Jümenijicui ñrumetequiyepu ayu muje ñmeina tuyede. Jümenijicu “Yópe ðajarã muja, boropatebenajivu ji jáino”, ñi yóbocarõ soyuino mácarõre põevare ñurajaramu muja, muje úcu iyede diede. ²⁹ Soyuyubu mujare: Quénora vino úyaicorore úcuñmu yu ijãravure. Ubenita ñnijãravu, jipacui jabotequimã maquinõre, bedióva cojedeca úcuri jácuymu yu, arejame Jesús ñuja ñi bueimarare.

Aru úcurejarã ñuja.

Jesús ñi soyuino Pedroru ñi “Jesúre yu coreóvabevu” aquinore
(Mt 28.16; Mr 14.26-31; Lc 22.31-34; Jn 13.36-38)

³⁰ Ñuje ñriburu yóboi, Salmos ñmicue yurí iyede yurí arejarã ñuja. Yuríarí bujarí, no cãracú Olivocú ñmicuricú nurejarã ñuja, Jesújã. ³¹ Mái nuri, arejame Jesús:

—Yure dajocarí nurajaramu muja. Yure vaiquiyede Jümenijicu toivaicõjeneaquemavu, yópe arí: “Ovejare coreipõecure boarí jaruvacuymu yu. Aru coateni nurajarama na, ovejava”, arí toivaicõjeneaquemavu. ³² Ubenita ji yainíburu yóboi, Jümenijicu ñi nacovaiyede yure yainore jaruvarí, muje jipocai nucuyumu Galileai, arejame Jesús.

³³ Que ayure, Pedrocãpãravu arí durejame úre:

—Caivu apenvu ne dajocarí ñuiyedeca, yúcapãravu mure jocarí ñmrecubu yu, arí durejame.

³⁴ Aru Jesús arejame úre:

—Jãve soyuyubu mure: Carí ñnami cáyu ñi ñrejaquiyepu jipocai, yóbecue baju

“Jesúre yu coreóvabevu” asuyutu mu,
arejame Pedrore Jesús.

³⁵ Ûbenita Pedrocapûravu soru ayu
barîdurejame:

—Máque yure ne boarí jarûvaruta,
“Jesúre yu coreóvabevu” abecubu yu,
arîdurejame Pedro.

Aru ñuja coapa nôpe arîdurejacaã.

Jesús Getsemaní ñi jëniaino

Jãmenijicuque

(Mr 14.32-42; Lc 22.39-46)

³⁶ No yóboi Jesús nurejame ñuja ñi
bueimaraque Getsemaní ãmicurôi. Nore
earí, arejame ñujare:

—Yui dobarí corejarã muja ji
Jãmenijicuque boroteiyede ãnoi,
arejame Jesús.

³⁷ Ñujacavu Pedrore aru ina pûcarã
Zebedeoi mârare máre nuvarejame
Jesús. Chïoñu baju ãmeno vaidéjameã.

³⁸ Que teni arejameã náre:

—Yu ãmeno chïori dápiavu ji
yaiquínore. Yui mauteni, jári capujarã
muja, arejameã ñi.

³⁹ Jipojica báque nuñu Jesús, ñuatutarí,
mori turejameã joborôita. Aru
Jãmenijicuque boroteyu barejameã ñi:

—Mu, jipacu, yure cari vaiquíye
vaibéjadeni. Caiyede ðaiye majicutamu
mu. Ûbenita ji urôpe ðabejacu. Quénora
mi urôpe ðajacu mu, arejameã jípacure
Jesús.

⁴⁰ Ina ñi bueimara yóbecurã ne yebai
copainuri, náre cáivure earejameã
Jesús. Aru arejameã Pedrore:

—¿Cúinãorajie cámevûva coreiye
majibenaru muja yáque? arejameã
Pedrore.

⁴¹ Caivu náre arejameã:

—Coreni, Jãmenijicuque borotejarã
muja, abujuvai jabocu mujare ñujovarí,
ãmeina tede ðabequiyepere aivu. Muje
ûme ue parurô mariduiyu. Ûbenita
muje baju ðaiye bajure parûbevû muja,
arejameã náre Jesús.

⁴² Cojedeca Jãmenijicuque
borotecunurejameã, yópe arí:

—Mu, jipacu, yure cari vaiquíye jaru,
mi urôpe ðajacu mu, arejameã Jesús.

⁴³ Ûi bueimara yóbecurã ne yebai
copainuri, náre cáivure earejameã
Jesús cojedeca. ãmei vuo ijidejavûya
náre. ⁴⁴ Que baru Jãmenijicuque
ñi boroteiye báquepedeca bedióva
borotecunurejameã, yóbecue
borotecuñu. ⁴⁵ Boroteni buojarí, ne yebai
copainuri, arejameã náre:

—¿Cáivurû muja cáreja? Jede,
quénoramu. Iora jave eaiyu. Ijáravui
dayu bácu, Jãmenijicui daroimû mácu
ûmupe, ãmeina teivu ne jëni jínajimûmu
yu. ⁴⁶ Nacajajara muja. Soru nurajarevu.
Yure ji mavure jëni jícuyu daibi,
arejameã Jesús.

Jesúre jëni ne nuvaino

(Mr 14.43-50; Lc 19.47, 21.37,

22.47-53; Jn 18.2-11)

⁴⁷ Jesús ñi boroteiyedeca, edarejame
Judas, ñujacacu, doce paivucacu.
Obedivu pôeva úque darí, boaicarovea
aru boaidua dururí edarejaima,
sacerdotevare jaboteipôeva aru judíova
bucva máre ne daroimara. ⁴⁸ Judas,
ñai Jesúre jëni jícuyu, ñi edaquiye
jipocamia nore, javeta Jesúre boarí
jaruvaiyurivure coyurejameã yópe: “Ji
jacyurí jiya nuimû macuyáme muje
jënajimû. Ûre jējara”, arejameã náre
Judas. ⁴⁹ Jesús yebai nurí, cúiná Judas
úre earí, arejame:

—Aru, bueipôecu, arejame Jesúre
Judas.

Que arí, úre jiva nuri jacyurejame.

⁵⁰ Que teni Jesúcapûravu jëniari
járjame Judare:

—Mu, jícu, cáipe teni dacurû mu?
arejame Jesús.

Que teiyede, Judaque edaivu bácvu
Jesúre jënejaima na. ⁵¹ Nôpe teiyede
jáinata, ñujacacu cúinácu, Jesúsque
curivucacu, ñi boaicarovede tatorí,
duarí, ñni, sacerdotevare jaboteipôecu
ñi yebacacure juijórí, najuárejame ñi
cámucare.

⁵² Nôpe ðayure jári, Jesús arejame úre:

—Mi boaicarovede meadajacu
mu. Caivu boaicarovede ñni,
pôevare boarájivu, yainájarama na

boaicarovequedeca. ⁵³¿Coreóvabenaru muja yure jipacu cadateni buojayure? Ji jëniaru jipacure, cüiná darojebu yure doce paiyajuboa ángeleva obedivü ne yajuboare, ne cadatenajiyere ayü yure. ⁵⁴Ûbenita ji nópe daru, vaibéjebu yópe Jümenijicui toivaicójeiye báquepe üi yávaivede, arejame ñujare Jesús.

⁵⁵Dinümüre Jesús arejame ina obedivü pöevare:

—¿Tatorí ñavaipöecure jëivüpe yure boaicaroveaque aru boaiduaque jëni jacorádaivüñü muja? Járavua coapa mûje jëneboi Jümenijicui cürami bueyu batecácu yu. Arurí mujaque cüsure, yure jëni jacobeteavü muja. ⁵⁶Ûbenita caiye iye vaivu yópe Jümenijicui toivaicójeiye báquepedeca ina üi yávaivede coyucapöeva mácvare, arejame náre Jesús.

Que tedurata ñuja üi bueimara úre jocarí, dupini nurejarcá ñuja.

Jesúre ne nãvaino judíovai jabova cójijivü yebai

(Mr 14.53-65; Lc 22.54-55, 63-71; Jn 2.19, 18.12-14, 19-24)

⁵⁷Jesúre Caifás yebai, ñai sacerdotevare jaboteipöecu yebai, nãvarejaimada na, úre jëivü bávavu. Nore ina Jümenijicui yávaiye báquede buaipöeva aru judíova búcvava ne baju cójijini borotenanurejaimada ne jabova baju. ⁵⁸Aru Pedrocápüravu joajienata Jesús yóboi nure nuñü mácu, sacerdotevare jaboteipöecui táibui ecorejameda ü. Nore ecorí, Jümenijicui cüramine coreipöevaque dobarejameda ü, jácuyü aipe vaiquíyede Jesúsre.

⁵⁹Na sacerdotevare jaboteipöeva aru caivü ne cójijinocavü Jesúsre ámecororájivure vorídurejaimada, úre boarí jaruvaiyüvü. ⁶⁰Ûbenita obedivü Jesúsre borocurí, ámecororíduivüreca, eabedejaimada na. No yóboi, pucará darí, borocurí ámecororejaimada Jesúsre:

⁶¹—Ñai pöecu yópe arí coyuyure jápiacará ñuja: “Íñami Jümenijicui cüramine jaruvarí majivü yu. Yóbecurijárvua jaruvaríburu yóboi

apedámi dacuyümu”, áme Jesús, arejaimada na.

⁶²Que teni ñai sacerdotevare jaboteipöecu nacajari, arejameda Jesúsre: —¿Coyurí majibecurü mu? ¿Ne nópe ámecoroiyede, aipe ayurü mu? arejameda Jesúsre.

⁶³Ûbenita Jesúsapüravü bi arejameda. Dinümü arejameda Jesúsre sacerdotevare jaboteipöecu:

—Yu coyucójeivü müre Jümenijicui arücu cue boje. ¿Máru ñai Cristo, Jümenijicui mácu? Coyujacu ñujare, arejameda ü.

⁶⁴Aru Jesús ju ayu arejameda úre: —Quédeca mi aimütamu yu. Ûbenita yúcapüravü coyuyübu ñujare: Jümenijicui daroimü mácvare ümüpe, yure, járajaramu muja, Jümenijicui parücü mearpüravü dobacure. Aru ji ocopeniboai jödari émeiyede máre járajaramu muja, arejameda náre Jesús.

⁶⁵Que ayure, ñai sacerdotevare jaboteipöecu jorojini, üi baju doiyede tatorí, jadevarí, arejameda:

—Ñai ümu Jümenijicure corü ámeina yávaibi. Quénona üi ámeina teiyede coyujará muja. Apevü ne coyuiye jaubevü. Javeta muja jápiadavü. Jümenijicui uebebi ñai yópe yávayure.

⁶⁶¿Aipe adaräru muja? arejameda ü.

Aru arejaimada na:

—Boarí jaruvaimü macuyüme ü, arejaimada na caivü, úre boarí jaruvaicójeivü.

⁶⁷Que arí, üi jivarä jëcututürejaimada na. Úre jara popedejaimada. Aru pëvavarejaimada máre úre. ⁶⁸Aru arejaimada:

—Mü, Cristo, coyujacu ñujare. ¿Ñame matedí pëvañü müre? úre pëvavaiü arejaimada na.

Ûbenita Jesúsapüravü ye coyubedejameda.

“Jesúre yu coreóvavevü” arí, Pedro üi coyüno

(Mr 14.66-72; Lc 22.56-62; Jn 18.15-18, 25-27)

⁶⁹Pedro sacerdotevare jaboteipöecui táibui dobacu barejameda. Üi noi

dobaedeca, yebacarōmivacaco cūināco ũi yebai earejacoda. Aru arejacoda:

—Mu máre ñai Jesús Galileacacque cútevu mu, arejacoda ũre.

⁷⁰Ūbenita caivu ne jápiaiyede, Pedrocapūravu ju abedejameda ũre:

—iNācacu āmevu! Jesúre yu coreóvabevu. ¿Aipe arí, mu que adorú? arejameda.

⁷¹Que arí, táibui etarí, jedevai nuitenevei nurejameda Pedro. Aru apeco yebacarōmivacaco ũre jári, arejacoda náre, nore curivure coyuyo:

—Nai cútebi Jesús Nazarecacque, arejacoda.

⁷²Aru bedióva cojedeca Pedrocapūravu ju abedejameda:

—iNācacu āmevu! Jesúre yu coreóvabevu.

Jūmenijicu majibi jāve coyuyure, arejameda.

⁷³No yójiŕboi ina nore curivu Pedro yebai nuri, arejaimada ũre:

—Jāve mu máre nācacubu mu. Mi yāvaiyeque majivu Galileacacure mure, arejaimada na.

⁷⁴Dinūmuma jāve ayure, náre pare baju arí, coyurejameda Pedro:

—iJāveneca Jūmenijicui jáinoi yu mujare coyuyutamu! iJāve ji coyubedu, Jūmenijicu āmedajacurí yure! Jesúre yu coreóvabevu, arejameda.

Ūi que aipe bajure, ũrejurejameda cáyu.

⁷⁵Ūi ũrejaiyede, ārurejameda Pedro Jesús ũi coyuiye báquede: “Cáyu ũi ũrejaiyede, jipocai, yóbecue baju Jesúre yu coreóvabevu, acuyumu mu”, arí coyuiye báquede ārurejameda. Aru ārucu, cūiná etarí, pare chíori orejameda ũ.

Jesúre ne nūvaino Pilato yebai

(Mr 15.1; Lc 23.1-2; Jn 18.28-32)

27 ¹Aviá ũi tucūmuyede, caivu ina sacerdotevare jaboteipōeva aru judíova bucūva cójijidejaimada na, ne bajumia boroteni majicarājivu aipe ne boarí jarūvarājiyede Jesúre. ²Boroteni buojarí, Jesúre buorí, nūvari, jacobu ũi āmiá Pilato yebai jacorānurejaimada na.

Jesúre jēni jíyu bācu ũi yaino

(Hch 1.18-19)

³Judas, Jesúre jēni jíyu bācu ũi mauvare, coreóvayū ne boarí

jarūvarājiyede Jesúre, chíonū marejámada ũ. Chíori dápiarí, oatūvaiyurídurejameda ũi ñaiye báquede. Que baru iye tātuturavara treinta paiturava plataque ñaituravare nūvarejameda ina sacerdotevare jaboteipōeva aru ina judíova bucūva ne yebai. Diede náre nūvari jacopaiyovacūnūridurejameda Judas.

⁴Ne yebai earí, arejameda:

—Yūrecabu āmeina teyu bācu. Jēni jívu mujare pōecu meacure, āmeina ñabecure. Que baru muje tātuturare, muje jíye báquede yure jēni jíye bojede, jacopaiyovaquijivu mujare caride, arejameda Judas.

Ūbenita nācapūravu arejaimada ũre:

—Ye baquiyé āmevu; míyetamura die, arejaimada na.

⁵Que aivure, Judacapūravu iye tātuturare dūvarí jarūvarejameda Jūmenijicui cūrami jívu. Aru etarí, nuri, ũi ñamemure buorí, jocucu cavabui yuyurí boarí jarūvarejameda ũi baju.

⁶Die tātuturare ũni, ina sacerdotevare jaboteipōeva arejaimada ne bajumia:

—Maje ñaicōjeiyepa iye tātuturare epeicōjememaramu maja Jūmenijicure jícaiyeque. Diedecabu bojedarí jíye báque pōecure ũi boarí jarūvare ñaiyede apecu pōecure. Que baru diede jíye jaubevū majare Jūmenijicure, arejaimada na.

⁷Que arí, ne baju boroteni majicarejaimada. Boroteni buojarí, iye tātuturacue jíni, jiore bojedarejaimada. No jio jorodaipōecui jio bācarō marejāvūya. “Apenocavu yaivu bācavure yore, ne yuarí jarūvarājinomu” arí, no jiore bojedarejaimada.

⁸No jiore bojedarejaimada tātuturacue, pōecu ũi jíye báque, apecu pōecure boarí jarūvaicōjesuyū. Que baru aivubu maja “Jivecūrō” no jiore, pu caride máre. ⁹Nópe vaidéjavūya cūināturu Jūmenijicui coyūicōjeiye báquapedeca ñai Jeremías āmicucu ũi yāvaiyede coyūaipōecu bācure. Yópe arí, toivaicōjenejaquemavu ũi mácure Jūmenijicu:

Ĩnama iye tãuturaturava treinta paiturava plataque ðaituravare. Apevu Israecavu bojedaicõjenejaquemavu nópe paiye bojede úre boje. ¹⁰Iye tãuturave jíni bojedadama no jiore, jorodaipõecui jio bácarõre. Que teni yópe Jãmenijicui ðaicõjeino mácarõpedeca yure, ðadama na, arí toivaicõjenejaquemavu Jãmenijicu.

Pilato ùi jëniari jáino Jesúre
(Mr 15.2-5; Lc 23.3-5; Jn 18.33-38)

¹¹Jesús ùi eaiyede ñai jabocu Pilato yebai, núrejameða ùi jipocai. Ñai jabocu jëniari járejameða úre:

—¿Múru judío vai jabocu? arejameða.

Jesúcapúravu arejameða:

—Quédeca mi aimurecavu yu, arejameða.

¹²Ûbenita ina sacerdotevare jaboteipõeva aru ina judío va bucúva ne ãmecoroiyede úre, náre coyubedejameða Jesús. ¹³Dinũmure Pilatocapúravu arejameða úre:

—¿Jápiabecurũ caiye ne ãmecoroiyede mũre? arejameða.

¹⁴Ûbenita bi arejameða Jesús. Caiye ne ãmecoroiyede ye coyubedejameða ù. Aru ùi que yávabede cuecumañũ urarõ ðápiarejameða Pilato.

Põeva ne boarí jaruvaicõjeino Jesúre
(Mr 15.6-20; Lc 23.13-25; Jn 18.38-19.16)

¹⁵No torojũve teinũmure, ñai jabocu Pilatocapúravu ỹjuá coapa etavavarejameða cũinácu jacoimu mácure, põeva ne etavaicõjeimure.

¹⁶Dinũmure, cũinácu ùi buoimaracacu, caivu ne coreóvaimu marejámeða, Barrabás ãmicucu. ¹⁷Que baru põeva obedivu ne cójijiyede Pilato yebai, náre yópe arí, jëniari járejameða Pilato:

—¿Ñamene etavaji yu? ¿Barrabáre urivurũ mũja? ¿O Jesúre, Cristo ne aimure, urivurũ mũja? arejameða ù.

¹⁸Ina sacerdotevare jaboteipõeva Jesúre ne jorojĩyede majini, obedivu

põeva ne ùe boje úre, nópe náre jëniari járejameða Pilato. ¹⁹Pilato dobarejameða nore, coyucuyu ina põevare ñamene ùi etavaquimure. Coyubecu cáreja, ùi dobaedeca, jímarepaco úre yópe arí, boro jarorejacoda: “Ñai ùmu Jesúre ãmedabecacu mu. Úrecabe meacu baju. Cari ñami marede decoboavu yu úre. Aru pare urarõ cãrijivũ yu, iye decoboaiye báque boje. Que baru me ðajacu mu” arí, boro jarorí majicarejacoda jímarepaco Pilatore.

²⁰Ina sacerdotevare jaboteipõeva aru ina judío va bucúva máre ina obedivu põevare jëniacõjenejaimaða Pilatore, ùi etavaquiyepa aivu Barrabáre aru ùi boarí jaruvaquiyepa aivu Jesúre. ²¹Bedío va cojedeca ñai jabocu Pilato jëniari járejameða ina põevare:

—¿Ñamene ina pũcarã buoimaracacure jaetovaji? arejameða.

Aru arejaimaða:

—Barrabáre jaetovajacu mu, arejaimaða na.

²²Ne que coyurĩburu, arejameða náre Pilato:

—¿Dinũmu ñai Jesús, Cristo ne aimure, aipe ðaji yu? arejameða.

Caivu ina põeva arejaimaða:

—iÚre jocucũjaravena pẽvari boarí jaruvaicõjejacu mu! arejaimaða ñai jabocure.

²³—¿Yéde ãmeina tearĩ ñai? jëniari járejameða náre Pilato.

Ûbenita pũeno baju coðoboborí, arejaimaða na:

—iÚre jocucũjaravena pẽvari boarí jaruvaicõjejacu mu! arí, coðoboborejaimaða na.

²⁴Ne que aiyede, Pilato coreóvarejameða úre ju abevure. Quédata pũeno cãrijovari búrejaimaða na. Que baru ocoque joarejameða ùi pũuáre, yópe judío va ne ðaiyepa, ne jáðovarajiyepa ayu boropatebevure. ùi joaiyedeca arejameða:

—Yávacari boropatebecubu, mũje boarí jaruvavu ñai Jesúre, ùmu meacure ji jáinoi. Mũjemu die, arejameða Pilato.

²⁵Aru caivũ ina p̄eva arejaimada:

—Jau, ñajvacarĩ aru ñajemara máre boropatenajivũbu ñai ñmũ ñi yaiye boje, arejaimada na.

²⁶Ne que arĩburu yóboi, Barrabáre etavarĩ darorejameda Pilato. Aru Jesúre jara popeicójenejameda. No yóboi, ina churaravare Jesúre jocucjaravena p̄vaicójenejameda Pilato.

²⁷Que teni ina churarava Jesúre ñni, ñvvari, ecovarejaimada ñai jabocu Pilatoĩ c̄urami. Nore ecovarĩ, apewũ churarava caivure cójijovarejaimada Jesús jipocai. ²⁸Ëĩ cuitótecajeare Ëre duarejaimada. Jesúre p̄enocacaje, jabocui doicajepe paicaje ñemijuaricajede doarejaimada na. ²⁹Doarĩ buojarĩ, miumua c̄ateni, cainitarabu ðarĩ, ñi jipoburã ditarabure tuorejaimada na. Aru jocũyo, jabocui c̄ojeiyope paiyore, durure ðarejaimada Jesúre ñi meap̄ravũcap̄rui, yópe jabocui j̄eyepe. Ne que teimure yurivũ, jacyurejaimada na:

—Ména c̄ujacu m̄, jud̄ovai jabocu, arejaimada churarava Jesúre, ñbenita Ëre yurivũ.

³⁰Ëra j̄ecututuivũ barejaimada. Aru Ëre jipoburã iyo jocũyoque j̄ãdovaiũ barejaimada na. ³¹Que teni Ëre yurini buojarĩ, Ëre ne doicaje ñemijuaricaje bácarõre, no jabocui doicajepe paicajede ñni, duarĩ, ñi doicaje bácarõre bediõva Ëre doarejaimada cojedeca. Que teni, buojarĩ, Ëre ñvvari, jocucjaravena Ëre p̄vari j̄eoranurejaimada na, churarava.

**Jesúre ne p̄vari yuyaino
jocucjaravena**

(Mt 26.61; Mr 15.21-32; Lc 23.26-43; Jn 2.19, 19.17-27)

³²Ina churarava Jesúque ñvviũ, jocucjaravede ture ññũ maridurejame Jesús. Nuri, cop̄rejaima c̄uinácu ñmure, Cirene ñmicurĩmarocacure, ñi ñmiá Simón. Ëre Jesús ñi jocucjaravede tuino mácarõre tuicójenejaima na, churarava.

³³Ina churarava ñvwarejaima Jesúre c̄uracũ Gólgota ñmicuricũi. P̄e

jipobucũ aiyurõmu no. ³⁴Noi ñcuiye upiáteiyẽ báque curijororu c̄urejavũ vino ñyaicoro mirra ñmicue jocucũ cuidóque, churarava ne ñvvaiye báquede. Die ñcuiyede j̄nidurejaima Jesúre, Ëre ijibequiyepe aivũ. Ëbenita ñ ñcuri j̄ari, ñbecũ, ñcumenejame. ³⁵Que teni Ëre jocucjaravena p̄vari j̄eorejaima. Aru ne yajuiyede ðvwarejaima. Cainijidua etayede j̄ari, Jesús ñi doiyede náre coapa ñnejaima na, Ëre p̄vvaivũ bácvũ. ³⁶Que teniburu yóboi, dobarejaima, j̄ari cap̄rãjivũ Ëre. ³⁷Jocucjaravena ñi jipobũ p̄enoĩ toivaino j̄enejavũ, apewũ ne majinajiyepe aino Jesúre boarĩ jaruvaiũ ne dápiainore, “¿Aipe teni Ëre boarĩ jaruvarama na?” ne aino. Yópe aiyurejavũ no toivaino: “Ñaime Jesús, jud̄ovai jabocu”.

³⁸Ëque máre p̄vari boarĩ jaruvarejaima p̄carã tatorĩ ñvvaip̄evare, ape p̄carõa jocucjaravearã. C̄uinácu Jesús ñi meap̄ravui aru apewũ ñi c̄acop̄ravui curejaima. ³⁹⁻⁴⁰Ina vainánuravũ j̄ari, ne jipobuare c̄ujjovari, ñmeina yávrejaima Ëre, yópe ari:

—Mu, J̄ümenijicui c̄uramine jaruvaiyvucacu aru yóbecurijãravua yóboi ññamine meadaiyvucacu, mi bajure meadajacu m̄. Mu J̄ümenijicui mácu baru, caride jocucjaravede dajocarĩ, ñmeni, dajacu m̄, arejaima Jesúre ina vainánuravũ.

⁴¹Nopedeca ina sacerdotevare jaboteip̄õeva, ina J̄ümenijicui yávaiye báquede buaip̄õevaque, aru ina jud̄ova b̄vcvaque máre, ne baju yurivũ Jesúre, yópe arejaima:

⁴²—Apewure meadavacac̄vvacari, ñbenita ñi bajure meadarĩ majibebi ñ. Cristo, maja Israevũ maje jabocu baru, jocucjaravede dajocarĩ ñmeni dajacurĩ ñ. Que ðaru, maja ju arãjaramu Ëre, ⁴³Ë “Yábu J̄ümenijicui mácu”, ayu bateáme. Ërecabe ju ayu J̄ümenijicure aru “J̄ümenijicu yure cadatecuyume”, arĩ dápiayu. Que baru J̄ümenijicu, Ëre ucũ baru, cadatejacurĩ caride, arejaima na.

⁴⁴Aru ina p̄carã tatorĩ ñvvaip̄õeva p̄vvaimara mácvũ máre Ëque, nopedeca ñmeina yávrejaima Ëre.

Jesús ũi yaino

(Mr 15.33-41; Lc 8.2-3, 23.44-49; Jn 19.28-30; He 10.20)

⁴⁵ Jāravu corica baji ñemié turī darejavū caino joborōi. Pū yōbecuriora yóboita vaidéjavū. ⁴⁶ Aru yōbecuriora bajita, iye ñemié tuyede dajocaiyede pare bujité coðoboborī, yávarī darorejame Jesús:

—Elí, Elí, ¿lama sabactani? Nópe aino: “Mu, ji mearore jímū, mu, Jūmenijicu, ¿aipe teni yre dajocarī, nuñuru mu?” aiyurō marejavū.

⁴⁷ Que ayure, apevu nore núrivicavū úre jápiarī, ũbenita jápiarī eabeni, arejaima:

—Jápiarā. Elfare órejaiibi ũ, arejaima na.

⁴⁸ Dinumure maumena nácacu cúyarī, jaubore ñni, uyovarejame vino úyaicoro upiáricoroque. Aru dijaúbore aboðorā buorī, jēori, jarururejame Jesús ũi úcuquiyepa ayu. ⁴⁹ ũbenita apevu arejaima:

—Corejarā. Járarevū Elías jōðavacudayure úre, arejaima na.

⁵⁰ Cojedeca Jesús pare bujité coðoboborī, yaidéjame ũ. ⁵¹ Dinumu ũi yaitávabomica Jūmenijicui cūramicacaje uracaje coricópavaicaje bácarō quéda corica baji jaðeni nurejavūya, puenocatuvavai búri pū cāchinocatuvavaita. Joborō cújidejavū. Aru cūraboa uraboa pārejavū máre.

⁵² Yaivu bácvu ne jaruvaino voarejavūya. Obedivu Jūmenijicui pōeva yaivu bácvu nacovaimara marejáimaða na, arurājivu bedióna cojedeca.

⁵³ Aru ina nacovaimara mácvu ne jaruvainoare jocarī etarejaimaða, Jesús ũi nacajariburu yóboi. Etarī buojarī, Jerusalén āmicurīmaroi ecorejaimaða. Obedivu pōeva járejaimaða náre, yaivu bácvu nacovaimara mácvure. ⁵⁴ Nore Jesús bácvure cocorī núrivu barejáima apevu churarava ne jabocūque. No joborō cújinore jári, aru caiye iye vaiye jidojaede máre, pare dápiavu cuicumarejaima. Aru arejaima:

—Jāveneca Jūmenijicui mácvu baju batecúbe ñai, arejaima na.

⁵⁵⁻⁵⁶ Obedivu nomiva máre cocorī núrivu joajēmia curejaima. Ne jēneboi curejaima cūináco nomió, Magdala āmicurīmarocaco, ōi āmiá María, aru apeco nomió, ōi āmiá María máre, ico Santiago aru José népaco, aru apeco máre, Zebedeoi márai paco. Jesús ũi cuede Galilea āmicurōi caðateivu barejáima úre. Aru apevu nomiva, ina daivu bácvu úque Jerusalén āmicurīmaroi, curejaima nore.

Jesús bácvu jaruvaimu ne pōe jaruvainoi

(Mr 15.42-47; Lc 23.50-56; Jn 19.38-42)

⁵⁷ Dijāravu bácarō, nainú, aviá ũi dorīburu yóboi, cūinácvu ũmu nurejameða Pilato yebai. Ũ marejáimeða cūve cūvcu, Arimatea āmicurīmarocacu, ũi āmiá José. Ũ máre Jesús bácvu bueimaracacu barejáimeða ũ. ⁵⁸ Pilato yebai nuri, Jesús bácvu baju bácarōre jēniacunurejameða ũ. Ũi jēniayede Pilato churaravavure jícōjenejameða Jesús bácvu baju bácarōre úre. ⁵⁹ Aru Jesús bácvure jocucujaravede jōðavari, ñni, meacaje docucubecaje lino āmicuricajeque ũ mácvure cūmarejaimaða Joséjá. ⁶⁰ Ũ mácvure nuvari, cūracobe mamacobe, José jicobei, Jesús bácvure jaruvarejaimaða Joséjá. Nore jaruvarīburu yóboi, apeturava cūraturavare ñni, jaturuvari, dicobede bidejaimaða. Aru bieniburu yóboi, nurejaimaða na. ⁶¹ Ne Jesús bácvure jaruvayede curejaimaða nore María Magdalacaco aru apeco María máre, dobarivu dicobe jipocai.

Churarava ne jári coreniduino Jesús bácvu baju bácarōre ne jaruvainore

(Mt 16.21, 17.23, 20.19; Mr 8.31, 9.31, 10.33-34; Lc 9.22, 18.31-33)

⁶² Dijāravu yóbocajāravui, maja judiova maje jabuóvaujāravu sábadoi, ina sacerdotevare jaboteipōeva aru fariseovacavu cójjidejaimaða Pilato yebai. ⁶³ Aru úre arejaimaða:

—Mñ, ññje jabocu, ārurivubu ñña ñai jujovayu bācu ñi aiyede arucu cāreja, yópe arí: “Yóbescurijāravna ji yainiburu yóboi nacajacuyumu yu yainore jaruvari”, ayu bateáme. ⁶⁴Que baru churaravare me járí coreicōjejacu mu Jesús bācuí baju bācarōre ne jaruvainore yóbescurijāravna vaiyeta. Nópe ñajacu, ñi bueimara ne ñavamenajiyepu ayu ñi mácuí baju bācarōre ñamine. Ñi mácuí baju bācarōre ñavaivū baru, “Jesús nacajaimi yainore jaruvari”, arí coyurājarama pōevare. Nópe ñaivū baru, ñmei jujovajebu pōevare ne mamarumu jujovaiye báque pñeno. Ñi mácuí “Nacajacuyumu” ñi aiyé báqueque pōevare jujovariduame. Ñbenita “Nacajaimi” ne ájuroeque, pōevare jāve jujovajebu, arejaimađa na Pilatore.

⁶⁵Pilatocapūravu arejameđa náre:

—Churaravare cuvavu muja. Náre jarorí me coreicōjeyara Jesús bācuí baju bācarōre ne jaruvainore, arejameđa Pilato.

⁶⁶Que baru churaravare jarorí, cūraturava uraturava Jesús bācure jaruvaicobede bieituravare me jājare ñaicōjenejaimađa na. Aru dituravare jājare ñarīburu yóboi, no ne jaruvainore me járí coreicōjenidurejaimađa churaravare.

Jesús ñi nacajaino yainore jaruvari

(Mr 16.1-8; Lc 24.1-12; Jn 20.1-10)

28 ¹No judíovai jabuóvaujāravu sábadu yóbocajāravu, sumana buijāravu, domingo, miadāe tuquiye jipocai, María Magdalacaco apeco Maríamaque járānurejaimađa Jesús bācuí baju bācarōre ne jaruvainore. ²Aru urarō baju joborō cújidejavūya, ángele ñi ěmeni daiye boje cavarō mearo Jūmenijicuí curōre jocarí. Ñai ángele, Jūmenijicuí daroimu, ěmeni, ñarí jāturuvejameđa diva cūrava uravare, no cūracobede bieiturava bācarōre. Dituravare ñi jāturuvariburū yóboi, dobarejameđa diturava pñenora. ³Ñai ángele pñonpe páyu ārójacu barejameđa, yópe yaroinope. Ñi

cuitótecaje boricaje baju barejávūya. ⁴Ñre jáivū, ina churarava dicobede járí coreniduivū jidurivū bididejaimađa, ne jidué boje. Bidini, turejaimađa joborōi, yópe yaivū bācavūpe. ⁵Aru ñai ángele arejameđa ina nomivare:

—Jidubejarā muja. Coreóvaivū yu voivure Jesúre, ne jocucujaravena pēvaivu mácure. ⁶Yore cubebi ñ. Javeta nacajaimi, yópe ñi aiyé báquepedeca. Dajarā. Járjide apa. Ñi baju bācarōre ne jaruvaino mácarōre jájara muja. ⁷Maumena nujara muja. Yópe arí, coyujarā ñi bueimare: “Jesús nacajaimi yainore jaruvari. Nucuyume muje jipocai Galilea ámicurijoborōi. Noi járjaramu muja ñre”, coyujarā. Jede, quénoramu ji coyūino mujare, arejameđa náre.

⁸Que arīburu yóboi, maumejiena dicobede etarí, nurejaimađa ina nomiva, jidurivū ñbenita pare torojurivū. Cúyarí coyurānurejaimađa iye borore ñi bueimare. ⁹Ne nuiyede, Jesúvacari náre copurejameđa. Aru náre jacyurejameđa. Ñi yebai nuri, mori turejaimađa joborōi ñi jipocai. Aru ñi cubobare jēni, mearore jídejaimađa ñre, yópe judíova ne ñarí cōmajiyepu. ¹⁰Que teni Jesús arejameđa náre:

—Jidubejarā muja. Jívure yópe arí, coyurānujara muja, “Galileai nuri, noi yure járānujara muja, aibi Jesús”, náre ajarā muja, arejameđa dinomivare Jesús.

Churarava Jesús bācuí baju bācarōre járí coreniduivū bācavū ne coyūino borocurō

¹¹Ina nomiva ne nuiyedeca, apevu ina churarava, Jesús bācuí baju bācarōre járí coreniduivū bācavū, Jerusalén ámicurīmaroi nurejaimađa. Coyurānurejaimađa ina sacerdotevare jaboteipōevare caiye iye vaiye báquede náre. ¹²Ina churarava ne coyūiyede jápiaivū bācavū, ina sacerdotevare jaboteipōeva ina judíova bucūvaque cójjijidejaimađa, majicarājivū ne bajumia. Cójjini buojarí, urarō tāuturare jídejaimađa ina churaravare. ¹³Aru yópe arí, borocucōjenejaimađa náre:

—Yópe ajarā mŭja pōevare, “Jesús báci bueimara ñamine darí, ñŭje cáiyede, ñavarama ũ máci baju bácarōre”, ajarā mŭja. ¹⁴Aru ñai jabocu ũi jápiaru diede, “Ina churarava boropateivubu ne jári corebe boje” arí dápíaru, ñŭjavacari meadarājaramu caiyede úque, ũi ñájine ðabequiyepa aivŭ mŭjare, arejaimada ina judíovai jabova.

¹⁵Que baru iye táuturare ñni, borocurí coyurejaimada ina churarava, yópe ina sacerdotevare jaboteipōeva ne coyucōjeiye báquepe. Aru no coyúno borocurōre coyŭvaivubu judíova ne bajumia pŭ caride máre.

Jesús ũi coyucōjeino ũi yávaiye méne

(Mt 26.32; Mr 14.28, 16.14-18; Lc 24.36-49; Jn 20.19-23; Hch 1.8)

¹⁶Ñŭja once paivŭ Jesúi bueimara Galilea ámicurijoborói nŭrejararā. Yópe

Jesús ũi nuicōjeiye báquepe, cŭracúi nŭrejararā ñŭja. ¹⁷Noi úre jári, mearore jídejararā. Ŭbenita apevŭ ñŭjacavŭ, “Jesús ámemi” arí, ju abedejaima. ¹⁸Aru Jesús arejame ñŭjare:

—Caiye parúede cŭvavŭ yŭ. Jipacu Jŭmenijicu parŭre ðaibi yŭre, ji cōjequiyepa ayŭ caivŭ cavarō mearocavŭre aru caivŭ ijáravŭcavŭre máre. ¹⁹Que baru jaroivŭ yŭ mŭjare. Buenanŭjara caivŭ ijáravŭcavŭre ji yávaiye méne, ne ju arájiyepa aivŭ diede, aru ne ðarájiyepa aivŭ ji ŭrōre. Ocoque jáðovajara ina ju aivŭre jipacu Jŭmenijicŭre; aru yŭre, Jŭmenijicui mácŭre; aru ñai Espíritu Santore máre. ²⁰Buejarā náre, ne ðarájiyepa aivŭ caiyede yópe ji ðaicōjeiye báquepe mŭjare. Aru yúvacari cŭcŭyŭmu mŭjaque cainumŭa, pŭ ijáravŭ buojaiyeta, arejame ñŭjare Jesús. Quénoramŭ.

San Marcos

Mamabuinore coyuiyebu Marcos bácu ùi toivaiye báquede Jesucristorã. Marcos bácu barejaquémavu judíovacacu, Bernabé bácu chimacu (Hch 5:36, Col 4:10). Jípaco bácu, María ámicucu, òi cūrami cójjiivarejaquemavu Jesúre ju aipóeva (Hch 12:12). Juan ámicucu barejaquémavu Marcos bácu. Cucunñrejaquemavu Pablo bácuque aru Bernabé bácuque (Hch 12:25, 15:37-39). Majidivú ne dápiayeye, iye coyuiyede Jesucristorã toivarejaquemavu ù mácu cucu bácu Roma ámicuriimaroi. Marcos bácu, Jesúque cubecu bácuvacari, majidejaquemavu Jesú borore Simón Pedro bácu, ñai Jesús ùi yávaiye méne beorí coyucójeimu, ùi coyuiye báque boje ù mácu Jesúsã. Póecu cubebi majicu ye uju ùi toivaiju bácaróre diede. Ëbenita obedivú majidivú ne dápiayeye Marcos bácu toivarejaquemavu Mateo bácu, Lucas bácu, aru Juan mácu ne toivarájiye jipocare, ániñña báquede 57-63 d.C. baji.

Marcos bácu jádovarejaquemavu Jesúre yópe memecaipóecu. Judío bácuvacari, toivarejaquemavu judíova ánevure, ne majinajiyeye ayu Jesús parucure caivu pueno, ùi ðaiye boje póeva ne ðari majibede, ùi cójeiye boje abujuvare, aru ùi jaruvaiye boje póeva ne ámeina teiyede. Coyurí búrejaquemavu Jesús ùmureca, ùi buiyede ùi memecaiyede, Juan Bautista bácu ùi jádovaiye báquede úre Jūmenijicure ocoque.

Juan Bautista ùi coyuíno Jūmenijicui yávaiyede pōecubenoí

(Mt 3.1-12; Lc 3.1-9; Jn 1.19-28)

1 ¹Yópeda teni búrejaquemavu iye yávaiye me Jesucristo Jūmenijicui mácurã coyuiye.

²Javede toivarejaquemavu Jūmenijicui yávaiyede coyucaipóecu bácu ùi ámiá Isaías, yópe Jūmenijicui aiye báquede mamacure:

Jaroivú yure coyucaipóecure mi jipocai, mi cuimare meadaquiyeye ayu. ³Jūmenijicure coyucaipóecu codoboboyure jápiarãjarama pōecubenoí: “Meadajarã muje ùmene copu etaburí maje jabocure, nopedeca muje meadaiyeye daimare ñai ùmu, muje pueðaimú, ùi ðaquiyé jipocai”, arejaquemavu Jūmenijicu, arí toivarejaquemavu Isaías bácu.

⁴Nópe Jūmenijicui yávaiyede coyucayú, Isaías bácu, ùi aiye báquepedeca tedejaquemavu Juan

Bautista pōecubenoí. Póeva vaivure coyure curejameða nore. Ocoque jádovacuyú póevare Jūmenijicūque, coyuyú barejameða póevare, ne chōiri dápiarãjiyeye ayu ne ámeina teiyede, Jūmenijicui árumetequiyeye ayu diede.

⁵Obedivú póeva Judea

ámicurijoborócvu aru Jerusalén ámicuriimarcavu máre jápiarãñurejaimaða Juan Bautista yebai. Aru na coapa “Ámecubu yu” ne aríburu yóboi Jūmenijicure, ne chōiri dápiayeye boje ne ámeina teiyede, jádovarejameða náre Jūmenijicūque Jordán ámicuriya jiai.

⁶Juan Bautista dorejameða áimacu camello ámicucui pōdaque ðaicajede ùi cuitótecaje. Aru ùi járióicáva máre áimacajeque ðaicáva marejávūya. Ë áre curejameða mujuñvare aru mumicorore máre, yópe arevú nócvu cūve cūvabevure. ⁷Yópe arí, coyurejameða póevare:

—Dacuyume ji yóboi cūinácú, ji pueno parucu. Que baru caivu pueno meacu bajube ù. Buojabevú yu orí nacachini

duayū ũi curaidoa buoimeare. ⁸Yū ocoque jádovaivū mujare Jūmenijicure. Ũbenita ũ macuyūme jádovañū mujare Jūmenijicuque, daroyū Espiritu Santore, arejameđa Juan Bautista.

Juan Bautista ũi jádovaino Jesúre Jūmenijicuque

(Mt 3.13-17, 12.18; Mr 9.7; Lc 3.21-22)

⁹Dijārvuai Jesús nurejameđa Nazaret āmicurīimarore jocarī, etacuyū Galilea āmicurijoborōre jocarī, nuñū Juan Bautista yebai. Aru Juan Bautista jádovarejameđa ũre Jūmenijicuque Jordán āmicuriya jiai. ¹⁰Maumena ũi maiyede jiare jocarī, Jesús járejameđa cavarō mearo vorī nuinore. Aru ñai Espiritu Santo jurecope ēmeni darejameđa ũi pñenora. ¹¹Aru jápiarejameđa apeno yāvainore, cavarō mearo Jūmenijicui curōque aiyede yópe: “Mū, jímacū, ji ũmū, me torojūvū yū mure”, arejameđa Jesúre Jūmenijicu.

Abujuvai jabocu Jesúre ũi jujovarīduino

(Mt 4.1-11; Lc 4.1-13)

¹²No yóboi ñai Espiritu Santo nūvarejameđa Jesúre pōcubenoī. ¹³Cuarenta pajārvua Jesús curejameđa nore, āimara jijecurivū ne jēneboī. Que teni ñai abujuvai jabocu, Satanás āmicucu, jujovaiyūrīdurejameđa ũre. Aru ángeleva coreni cađatedejaimađa Jesúre.

Jesús Galileai ũi bueni buino

(Mt 3.2, 4.12-17; Lc 4.14-15)

¹⁴Dinūmure Herodes āmicucu jabocu būorejameđa Juan Bautistare. ũre būorīburu yóboi, Jesús nurejameđa Galilea āmicurijoborōi, coyucuyū iye yāvaiye méne, Jūmenijicui coyucōjeiyede ũre. ¹⁵Que teni arejameđa pōevare: —Jave eaiyu dijārvū. Maumena Jūmenijicu mujare jabotecuyūme. Que baru chíjara mūje āmeina teiyede. Oatūvajarā mūje daiyede. Aru ju ajarā iye yāvaiye méne, Jūmenijicui coyucāiyede mujare, arejameđa Jesús.

Jesús ũi “Dajarā” aino yóvaicūvaivū moa boaipōevare

(Mt 4.18-22; Lc 5.1-11)

¹⁶No yóboi Jesús cuyū macajitabu urabu Galilea āmicurijitabu ēcarūi, járejameđa Simóre aru Andrés ĩmacūmaquevure. Moa boarī bojeđaipōeva marejáimada na. Que baru dūvaivū barejáimada ne pápicure no macajitabūi. ¹⁷Ne que teiyede, Jesús arejameđa náre:

—Dajarā yáque. Aru epequijivū mujare, mūje davarājiyepē pōevare ji yebai, yópe mūje moare davaiyepē pápicuque, ji meadaquiyepē náre, arejameđa Jesús.

¹⁸Que ayure jápiarī, dajocarejaimada ne pápicuare, nūrajivū Jesúque.

¹⁹Aru cuyū cāreja, jipocai járejameđa Zebedeoi mārare, ne āmiá Santiago aru ĩmacu Juan. ĩmarejaimada ne jiađocūi, meadaivū ne pápicuare.

²⁰Járina cuturejameđa náre. Quénora cūiná dajocarejaimada népacure ũre memecaipōevaque jiađocūi, nūrajivū Jesúque.

Abujucu ũi ĩmamū Jesúre ũi copūino

(Mt 7.28-29; Lc 4.31-37)

²¹Jesús ũi bueimaraque earejaimada Capernaum āmicurīimaroi judóvai jabúovaijārvū sábadoi. Judóvai cójjiñami ecorī, Jesús buedejameđa ina pōeva noi curivure. ²²Ina Jūmenijicui yāvaiye báquede bueipōeva pñeno buedejameđa náre, yópe parucupe. Que baru ina jápiaivū ũi buiyede torojurī cuecumarejaimada. ²³Aru curejameđa judóvai cójjiñami cūinācu ũmū, abujucu ũi ĩmamū. ²⁴Cođoboborī arejameđa Jesúre:

—Mū, Jesús Nazarecacū, zyéde ũcurū mū ñūjaque? ¿Jarūvacūdayū dacurū mū ñūjare? Coreóvaivū yū mure. Jūmenijicui mácu meacu bajubu mū, arī cođoboborejameđa.

²⁵Ũbenita Jesús bi aicōjenejameđa ũre:

—Mū, bída etajacu ñai ũmure jocarī, arejameđa Jesús.

²⁶Que baru abujucu bidióvarejameđa pare ñai ùmure. Cođoboborí pare, etarejameđa úre jocarí. ²⁷Aru cuecumari jáivu ina pōeva, arejaimađa ne bajumia: —¿Yéba yo? ¿Ye bueiye mamaema iye? Úi yávaiye paruéque jaruvaibi abujuvare. Aru nácapúrvavu ju adama úre, arejaimađa na.

²⁸Aru maumejiena majidejaimađa Jesúi borore caino Galilea ámicurijoborōcavu caivu.

**Jesús úi meadaino Simón Pedro
vácure**

(Mt 8.14-15; Lc 4.38-39)

²⁹Etaivú bácavu judíovai cójijíñamiena jocarí, ecoránurejaimađa maumena ne cūrami ina Simón aru Andrés máre. Santiago aru Juan máre yóvarejaimađa náre. ³⁰Ico Simói váco moimo pararejacođa. Aru cūiná coyurejaimađa Jesúre òi borore. ³¹Que baru Jesús nurejameđa òi yebai. Jēni òi pūrure, óre nacovarejameđa. Aru maumejiena ðajocarejavúya moino óre. Dinñumia áiyede meadari jídejacoda náre.

Jesús úi meadaino obedivu ijimarare

(Mt 8.16-17; Lc 4.40-41)

³²Dinainumica ñamijie baji avía úi doríburu yóboi, jabúovaijārvavu vaiyede, ina ímarocavu nūvarejaimađa Jesús yebai caivu ijimarare, aru abujuva ne ímamarare máre. ³³Que teni caivu ina ímarocavu cójijidejaimađa jedevacobena. ³⁴Jesús meadarejameđa obedivu ijimarare. Caiye ijiéde jaruvarejameđa. Jarorejameđa náre jocarí ina abujuvare máre. Aru yávare ðabedejameđa, ne coreóvaiye boje úre.

Jesús Galileai úi bueino

(Mt 4.23, 9.35; Lc 4.42-44)

³⁵Jesús coedarí nacajari ñeminomia, avía úi cōaquiye jipocai, nurejameđa pōecubenoí. Jēniare cuyu barejameđa Jūmenijicuque. ³⁶Miadáe tuyede Simón úcavūque vorejaimađa Jesúre. ³⁷Vorí earí, arejaimađa úre: —Caivu pōeva vodama mure, arejaimađa Jesúre.

³⁸Náre arejameđa:

—Járica, apenoa ímaroa joabenoai nurevu, coyurājivu Jūmenijicuí yávaiyede noi. Que baru daivu yu, coyucudayū diede, arejameđa Jesús.

³⁹Coyurejameđa Jūmenijicuí yávaiyede caino Galilea ámicurijoboróí judíovai cójijíñamiai. Aru jaetovarejameđa abujuvare máre.

Jesús úi meadaino pojeiyure

(Mt 8.1-4; Lc 5.12-16)

⁴⁰Cūinácu pojeiyu nurejameđa Jesús yebai. Aru ñuatutarí, arejameđa úre: —Mu ũcu baru, meadajacu ji pojeiyede. Buojaivu mu meadayu yure, arejameđa.

⁴¹Que ayure jápiarí, Jesús cōmaje āroje jári, úi purūque jabíovarí tuoyu, arejameđa úre:

—Ūvu yu. Caride meatejacu mu, arejameđa Jesús.

⁴²Maumejiena Jesús úi que aiyeda vaidéjavúya úre. Meatedejameđa ũ. ⁴³Ūbenita Jesús majicarejameđa parurōreca, “Nujacu” ayu úre, arejameđa majicaríduyu:

⁴⁴—Coyubejacu apevure. Cūiná nuri, jáđovajacu sacerdotede. Aru jíjacu mi meateiye boje, yópe Jūmenijicuí ðaicójeiyede úi coyuiye báquepe Moisés bácure, pōeva ne coreóvarājiyepē ayu mi meateinore, arejameđa úre Jesús.

⁴⁵Ūbenita coyure nurejameđa Jesúi borore. Que baru ecorí majibedejameđa Jesús pōeva ne jáinore. Quénora curejameđa pōecubenoí. Aru nurejaimađa pōeva, cainoa ímaroacavu, úi yebai.

**Jesús úi cure ðaino nacajaiye
majibecure**

(Mt 9.1-8; Lc 5.17-26)

2 ¹Ecorejameđa Jesús cojedeca Capernaum ámicuríimaroí obedijārvava yóboi. Jápiarejaimađa cūcure cūrami. ²Que baru cójijidejaimađa obedivu pōeva. Buiní jajidejaimađa jedevacobeita. Aru Jesús coyurejameđa Jūmenijicuí yávaiyede náre. ³Dinñu yóvaicuvaiyu ũmva

nɔvarejaimada ũi yebai cūinácu ũmu nacajaiye majibecure. ⁴Ūbenita ecoivu buojabedejaimada Jesús yebai, pōeva obedivu ne cue boje. Que baru mɔri nɔri cūrami puenora, voarejaimada diede, ěmeóvarajivu ñai nacajaiye majibecure ũi parainoque Jesús yebai. ⁵Náre coreóvayu ju aivure, Jesús arejamedá ñai nacajaiye majibecure:

—Mɔ, ji ɔmu, mi ámeina teiyede jaruvári árumeteivu yu, arejamedá Jesús.

⁶⁻⁷Noi dobarejaimada obebevu Jūmenijicui yávaiye báquede buepōeva, dápiavu ne ðaiyūrōre: “¿Aipe teni que yávayuba ñai? Jūmenijicui ũbenore ðaibi ũ. ¿Ñamema buojari jaruvayu ámeina teiyede, árumeteni diede? Quénora cūinácurabe Jūmenijicu jaruvayu diede” arí, dápiarejaimada na.

⁸Jesús jári coreóvarí maumejiena ne baju ne dápiayede, jēniari járejamedá náre:

—¿Aipe teni que arí dápiavurū mɔja? ⁹Maiyójabevu yópe aru apecure, “Mi ámeina teiyede jaruvári árumeteivu yu”, ji paruéde jáðovame boje, ji que coyuiyede. Ūbenita maiyójarótamu nacajari cuicójenú nacajaiye majibecure. Ūre cure ðayu baru, jáðovaquijivu ji paruéde. “Mi ámeina teiyede jaruvavú” ji aiyede, coreóvabevu mɔja Jūmenijicui árumeteinore diede. Ūbenita ñai cuvacu Jūmenijicui majié paruéde, ũrame yópe ðari jáðovaiye majicu. Quécura Jūmenijicuvacari meadarí majibi iijimarare. ¹⁰⁻¹¹Que baru mɔje majinajiyepere ayu Jūmenijicui daroimá mácu ũmɔpe, yu, paruéde cuvacure ijáravure, jaruvacuyu ámeina teiyede, yópe ðaquijivu yu, arejamedá Jesús.

Dinɔmu arejamedá nacajaiye majibecure:

—Yópe aivu yu mɔre, nacajari, mi parainore ñni, nɔjacu mi cūrami, arejamedá ũre Jesús.

¹²Dinɔmuma nacajari maumejiena, ũi parainore ñni, etarejamedá ne jēneboi. Caivu cuecumari, mearore jídejaimada Jūmenijicure. Aru, “Aipinɔmu jámeteavū maja yópe painore”, arejaimada na.

Jesús ũi “Dajarā” aino Levíde

(Mt 9.9-13; Lc 5.27-32)

¹³No yóboi Jesús nurejamedá cojedeca macajitabu urabu ěcarai. Caivu pōeva nurejaimada ũi yebai. Aru bueyu barejamedá náre. ¹⁴Dinumure vainí nuñu járejamedá Levíde, Alfeoi mácure, dobacure ũi memeitucubui, pōeva ne Roma ámicurō jaboteino bojedainoi. Aru arejamedá ũre:

—Dajacu yúque, arejamedá Jesús.

¹⁵Nacajari nurejamedá Jesúque. Aru obedivu pōeva nurejaimada ũi yóboi. Que teni Jesús ũi ácunuiyede Leví cūrami, obedivu jabovare táutura ícaipōeva, ámeno ðaipōeva, aru ũi bueimara máre dobarejaimada, árajivu Jesúque. ¹⁶Apevu judíova, ðaicójeiyede ðaiye cōmajivu, fariseo ámicuriyabocavú, cūrejaimada nore. Ina fariseovacavú, Jūmenijicui yávaiye báquede buepōeva, Jesús áñure jári, ina jabovare táutura ícaipōevaque aru ámeno ðaipōevaque máre, arejaimada ũi bueimarare:

—¿Aipe teni áñuma jabovare táutura ícaipōevaque aru ámeno ðaipōevaque máre? jēniari járejaimada náre.

¹⁷Que aivure jápiarí, Jesús arejamedá:

—Meara pōevare juoipóecuí cadateiye jaubevu. Quénora iijimarare ũi cadateiye javuvu. Dabedejacacu yu ijáravui, cutucuyu mearare ne baju dápiainore. Quénora darejacacu yu, meadacuyu ámenare, ne chíorajiyepere ayu ne ámeina teiyede, Jūmenijicui árumetequiyepere ayu diede, arejamedá Jesús.

Pōeva ámevva áiyede ne jēniaino

Jūmenijicue

(Mt 9.14-17; Lc 5.33-39)

¹⁸Dinɔmu Juan Bautistai bueimara aru fariseovai bueimara máre ne jēniayede Jūmenijicueque ámenejaimada áiyede. Aru pōeva earí, jēniari járejaimada Jesúsre:

—¿Aipe teni Juan Bautistai bueimara aru fariseovai bueimara máre ámevva áiyede, ũbenita mi bueimara ámevva ámema áiyede? arejaimada.

¹⁹ Jesús arejameđa náre:

—Ina purubuoꝝy ũi cutuimara, ne torojuve tenajiyepre ayu ũi purubuoꝝiyede, ye ámevu ámemá áiyede ũi cuede cáreja náque. Nopedeca ji bueimara torojurivu ji cuede náque, ámevu ámemá áiyede.

²⁰ Ūbenita ji mauva ne nuvarajiyede yure, ji bueimara chíoiꝝy ámenajarama áiyede, arejameđa Jesús.

²¹ Cojedeca Jesús buedejameđa náre:

—Pöeva jëomema cuitótecaje mamacaje joabecajei javecaröre. Nópe đaru, no jëoicajeva mamacaje jađevajebu javecaröre. Que đaru, püeno baju járojebu codeicobe. Quédeca ñame buojabema ju aivu ji bueiye mamaene aru javeque bueiyeđe máre. ²² Pöeva yuabema vino úyaicorore mamacorore áimacaje curubu javecacurubuque. Que đaru, codeóvajebu dicurubure. Yuri bíjajebu dicoro. Aru bíjajebu dicurubu máre. Ūbenita ne yuaru mamacorore mamacurubuque bíjajebu dicoro. Quédeca ñame buojabema đaiꝝy yópe ji bueiye mamaepe, đare nuivꝝy baru yópe ne jave đaiye báquepe, náre arí buedejameđa Jesús.

Jesúí bueimara ne puꝝoino oteiyede

jabuóvájárvavú

(Mt 12.1-8; Lc 6.1-5)

²³ Apejárvavꝝ, judíovai jabuóvájárvavꝝ sábadoi, Jesús vaidéjameđa oteiyé curíoi ũi bueimaraque. Aru ũi bueimara jënejaimađa iye oteiyede. ²⁴ Apeꝝy fariseova jëniari járejaimađa úre:

—Jájacu. ¿Aipe teni mi bueimara đaiꝝvaba ámeno, maja judíova maje đaicójemenoꝝe, jabuóvájárvavꝝ? arejaimađa na.

²⁵ Ūbenita Jesús, ũi dápiaye boje ũi bueimara ámeno đabevure, arejameđa náre:

—¿Jáve árumetenaru muja yo David bácuí đaino mácaröre, úre jauéde aru ávué ijíéde úre, úque curivure máre?

²⁶ Ū mácu ecorejaquemavꝝ Jümenijicui cürami, Abiatar bácuí ũi sacerdotevare jaboteiye báquede. Aru árejaquemavꝝ páure, Jümenijicure jíye báquede, ina

sacerdoteva ne áiyede, sacerdote ámeꝝy bácavacari. Aru jídejaquemavꝝ úque curivure máre, sacerdoteva ámeꝝy bácavureca. Ūbenita Jümenijicu ñájine đabedejaquemavꝝ na mácavure, arejameđa Jesús.

²⁷ Cojedeca Jesús arí buedejameđa:

—Jümenijicu epedejaquemavꝝ jabuóvájárvavure pöevare boje. Ūbenita epedejaquemavꝝ pöevare dijárvavure boje.

²⁸ Yu, Jümenijicui daroimꝝ mácu úmure, jabocubu yu. Que baru đaicójeni buoꝝaiꝝy yu pöevare ne đaiyede caijárvavure aru jabuóvájárvavure máre, arejameđa Jesús.

Jesús ũi meadaino úmu ámuve

jiacubecure

(Mt 12.9-14; Lc 6.6-11)

3 ¹ Bedíova Jesús ecorejameđa cojedeca judíovai cójijíñami. Noi curejameđa cüinácu úmu, ámuve cüinápüravꝝ jiacubecu. ² Aru fariseovacavꝝ Jesúre coreni járejaimađa. Jesús ũi meadaru ñai úmure, ámuve jiacubecure, judíovai jabuóvájárvavure sábadoi, jáiyurivꝝ, boro coyurí adaiyuríduivꝝ barejáimada úre. ³ Dinumuma Jesús arejameđa ñai úmu ámuve jiacubecure:

—Nacajari nújacu pöeva jëneboi, arejameđa Jesús.

⁴ Aru arejameđa apeꝝy noi curivure:

—Jëniari jáquijivꝝ cüináro mujare. ¿Yéde đaicójeini Jümenijicu jabuóvájárvavure, mearore o ámenore; meadaru pöevare o boarí jaruvavu náre? arejameđa Jesús.

Ūbenita bi arejaimađa na. ⁵ Que baru Jesús jararí chíorejameđa, ne coreóvabe boje. Aru arejameđa ñai úmu ámuve jiacubecure:

—Jabióvajacu mi ámuvede, arejameđa Jesús.

Ū jabióvaiyede meatedejavúya ũi ámuve. ⁶ Que teni ina fariseova etaiꝝy bácavꝝ cójijidejaimađa Herodede cađateipöevaque. “Boarí jaruvárvavꝝ”, arí dápiavꝝ barejáimada Jesúre.

Jesús ũi meadaino obedivꝝ pöevare

macajitabu urabu écarui

(Mr 4.1; Lc 5.1-3)

⁷⁻⁸ Jesús apeꝝy dajocarí nurejameđa macajitabu urabu écarui ũi bueimaraque.

Obedivũ pöeva cujurejaimada ùi yóboi, Galilea aru Judea ãmicurijoboröacavũ, Jerusalén ãmicuriiमारocavũ, Idumea ãmicurijoboröcavũ, aru Jordán ãmicuriya jia apedüvecavũ: Tiro aru Sidón ãmicuriiमारocavũ máre. Obediyajuboa pöeyajuboa nũrejaimada ùi yebai, jápiaivũ ðayure urarö pöeva ne ðarí majibede. ⁹Aru Jesús arejameda ùi bueimarare:

—Meðarí corejarã jiadocũre, pöeva obedivũ ne ðaríburu, jatujivarí, ne chítomenajipe yure, arejameda Jesús.

¹⁰Obedivũ ùi meadaiye báque boje, apevũ ijimara ùre chítorejaimada, tuoiyuríduivũ ùre.

¹¹Aru ina abujuva ne ñamara máre Jesúre jári, mori turí codoborejaimada ùre:

—Mũrecabu Jũmenijicũ mácu, arí codoborejaimada.

¹²Ûbenita Jesús yávaicöjemenejameda paruröque, apevũ ne coreövabenajipe ayũ ùi ðaiyede.

**Jesús ùi beoino ùi yávaie méne
coyucöjeimarava**

(Mt 10.1-4; Lc 6.12-16)

¹³No yóboi Jesús muri nũrejameda cũracũi. Aru órejurejameda ùi umarare.

¹⁴⁻¹⁵Beorejameda doce paivure. Aru epedejameda náre ùi yávaie méne beorí coyucöjeimarare, ne yóvarãjipe ayũ ùre aru jarocũyũ náre ne coyurãjipe ayũ Jũmenijicũ yávaieyede. Paruéde jídejameda náre, ne jaetovarãjipe ayũ abujuvare. ¹⁶Jesús epedejameda ina doce paivure: Simón ãmicucũ bácuere ãmidorejameda Pedro. ¹⁷Zebedeo mácu Santiago, aru Santiagoi yócu Juan máre, ãmidorejameda náre Boanerges, öpo tuinoi mára ayũ. ¹⁸⁻¹⁹Apevũre máre beorejameda Jesús: Andrés, Felipe, Bartolomé, Mateo, Tomás, Alfeoi mácu Santiago, Tadeo, Simón ãmicucũ Celote, aru Judas Iscariote máre. Ñai marejameda jëni jícuũ Jesúre ùi mauvare. Que teniburu yóboi, Jesús ecorejameda cũrami.

**“Abujuvai jabocũ paruéde cuvabi ù”
arí, ne boro coyurí aðaríduino Jesúre**

(Mt 9.34; 10.25, 12.22-32;
Lc 11.14-23, 12.10)

²⁰Bedióva cójjijdejaimada obedivũ pöeva. Aru ãicöjemenejaimada

Jesúre, ùi bueimarare máre. ²¹Pöeva “Árũmemi” ne are cuiye boje ùre, ù jivũ jápiarí, nũrejaimada, ùre jënanũivũ.

²²Ûbenita ina Jũmenijicũ yávaie báquede bueipöeva, ëmeni ðaivũ bácuere Jerusalén ãmicuriiमारore jocarí, arejaimada:

—Cũvabi Beelzebũre. Que baru abujuvai jabocũ paruéque jaetovaibi abujuvare, arejaimada.

²³Jesús náre órejayũ bácu ùi yebai, yópe corejurejameda:

—¿Aipe teni buojaidica abujuvai jabocũ jaetovayũ ùi baju? ²⁴Cũináro jaboröcavũ ãðamateivũ baru ne bajumia, ina jaboröcavũ cũinájarama na. ²⁵Aru nopedeca cũináðami cũramicavũ ãðamateivũ baru ne bajumia, ðiñamicavũ cũinájarama na. ²⁶Aru nopedeca bájebu ñai abujuvai jabocũ, jaetovayũ baru abujuvai jabocũre. ãðamateyũ bájebu ùi bajuma. Aru jaetovayũ baru abujuvare, joe parucũ cũbejebu ù.

²⁷Ûbenita buojaino ãmevũ ecoivũ ñai ùmũ parucũ cũramine, ñavarajivũ ùi cũvaede. Mamarũmũre ùre buorí, que ðaivũ bácuere buojainũ ñavaivũ ùi cũvaede, arejameda Jesús.

Nópe ayũ, Jesús yópe aiyũcu barejaquémavũ: Ëvacari parubi abujuvai jabocũ pũeno, ùi jaetovaiye boje abujuvare pöevare jocarí.

²⁸Aru Jesús arejameda:

—Jãve coyũyũbu mujare: Jũmenijicũ ãrũmetecũyũme caiye iye muje ãmeina teiyede, aru caiye iye Jũmenijicũre ãmeina yávaieyede máre. ²⁹Ûbenita ácu pöecu ùi yávaru ãmeina ñai Espíritu Santore, aipinũmu Jũmenijicũ ãrũmetecũbe ùi ãmeina teiyede. Quéðata boropatecũyũme, bíjacũyũ Jũmenijicũre jocarí cainũmũ, náre arí buedejameda Jesús.

³⁰Nópe arejameda Jesús, ina Jũmenijicũ yávaie báquede bueipöeva “Ñai ùmũ cuvabi abujucũre”, ne borocũrí yávaie boje ùi borore.

Jesús ù jina ne voino ùre
(Mt 12.46-50; Lc 8.19-21)

³¹Ðinũmũre Jesúi yóva aru jípacu máre earí, jedgevãmia mauteni

órejaicójenajaimada úre. ³²Aru ina pöeva obedivu dobarivu ñi curöi arejaimada úre:

—Mipaco aru míyova máre jedevai cüma. Aru vodama mure, arejaimada úre.

³³Aru Jesús arejamedá:

—¿Namema jipaco aru jíyova? jēniari járejamedá Jesús.

³⁴Ina pöeva obedivu dobarivure ñi curöi jári, arejamedá:

—Yuibu jipaco aru jíyova máre. ³⁵Que baru caivu ina daivu Jūmenijicui uröpe, nárecabu jíyocupe páyu, aru jíyocope pádo, aru jipacope pádo máre, arejamedá náre Jesús.

**“Oteipöecure” jári dápiari ne
darājiyepe aino**

(Mt 13.1-9; Lc 5.1-3, 8.4-8)

4 ¹Apejāravu Jesús buedejamedá cojedeca macajitabu urabu écarui. Aru obedivu pöeva cójjidejaimada ñi yebai. Que baru jiadocū écaru joabenoí curicūre jári, jaturí dobarejamedá dicūra, buesuyū pöevare. Aru caivu ina pöeva curejaimada macajitabu urabu écarui. ²Náre buedejamedá jári dápiari ne darājiyepe ayu caijīe apejīene. Aru arejamedá ñi bueiyequé:

³—Jápiajarā. Yui oteipöecu otesññquemavū. ⁴Ûi oteiyede ape oteye tūquemavū ma écarui. Aru mījina darī, āradaquemavū caiye iye oteiyede. ⁵Ape oteye tūquemavū joborō edubenoí cūraboá pñenoí. Nore joborō yaurijīe cūbeniburu, maumejiena píari etaquemavū. ⁶Ûbenita avíá ñi boiyede équemavū. Aru nuomua ñmujurimua cūbeni, yaiquémavū. ⁷Ape oteye tūquemavū miucña jēneboi. Aru yóboi miucña bucūrī, muiní, chíoyede, jēiye jēmetequemavū. ⁸Aru ape oteye tūquemavū mearo joborōi. Aru jēiye jēquemavū, apeñū jēiñū treinta paivua, aru apeñū jēiñū sesenta paivua, aru apeñū jēiñū cien paivua, caiye oteiyabea coapa, náre arí buedejamedá Jesús.

⁹Dinñtu Jesús arejamedá náre:

—Me jápiajarā mēja iye ji bueiyede, arejamedá Jesús.

**Aipe aiyuröre Jesús ñi jári dápiari ne
darājiyepe aino**

(Mt 13.10-17; Lc 8.9-10)

¹⁰Jesús ñi cuede cūinácuvu, apevū ñi yebai joabenoí curivu aru ñi bueimara máre jēniari járejaimada úre:

—¿Aipe teni bueyurū mū jári dápiari ñuje darājiyepe ayu mi coyuiyeque? arejaimada.

¹¹⁻¹²Jesús arejamedá náre:

—Mujare coyurí majide dayubu yu Jūmenijicu ñi coyucójeme máquede. Û jaboteibi mujare, ñi pöevare. Ûbenita ina ñi jaboteimara āmevū, yópe jedevai curivupe, diede majibema. Quéda jári dápiari ne darājiyepe ayu bueyubu yu náre, jáivureca, ne jári majibenajiyepé ayu aipe aiyuröre ne jáiyede, aru jápiaivureca, ne jápiari majibenajiyepé ayu aipe aiyuröre ne jápiayede. Na majidivū baru, chíori oatuvajebu ne ñaiyede. Jūmenijicure ju aru, ārumetejebu ñ ne āmeina teiyede, arejamedá Jesús.

**Jesús ñi coyuiño aipe aiyuröre
“oteipöecure” jári dápiari ne
darājiyepe aino**

(Mt 13.18-23; Lc 8.11-15)

¹³Yópe arí, Jesús coyurejamedá ñi bueimarare:

—¿Majibenaru yo jári dápiari mēje darājiyepe ayu ji ainore? ¿Aipe darí majinajivurū caiye ji jári dápiari mēje darājiyepe ayu arí bueiyede? ¹⁴Iye oteye Jūmenijicui yávaiyepé paiyebu. Aru ñai oteipöecu Jūmenijicui yávaiyede coyuröpöecupe páyube. ¹⁵Aru inamu ma écarui oteye turíduiye báquepe paivū. Náre coyuiyede Jūmenijicui yávaiyede jápiadama, ñbenita coreóvari eabevvua. Que baru ne jápiarīburu yóboi, ñai abujuvai jabocu darí, ārumetede ñabi Jūmenijicui yávaiyede, ne jápiayepé báquede. ¹⁶Aru inamu joborō edubenoí, cūraboá pñenoí, oteye turíduiye báquepe paivū. Jūmenijicui yávaiyede jápiari, torojūma me. ¹⁷Ûbenita Jūmenijicui yávaiyede ju aríduyama. Que baru quíjino

yóboi, pōeva ne cārijovaru aru ñájine ðaru náre, ne ju aiyे boje, maumena ðajocadama ne ju aiyede Jūmenijicui yávaiyede. Que teni ju abema na. ¹⁸⁻¹⁹Aru inamu miucua jēneboi oteiyе turiduiyе báquepe paivу. Na máre jápiaivу Jūmenijicui yávaiyede, ũbenita cārijināma ijāravуquede. Torojuma tāturaque. Aru cūvaiyuma caijīe apejīene. Que baru dāpiadama caiyе diede. Ũbenita dāpiabema Jūmenijicui yávaiyede. Que baru Jūmenijicui cadatebebi náre ũi yávaiyеque yópe ũi ũrópe. ²⁰Ũbenita inamu mearo joborōi oteiyе tuiyе báquepe paivу. Jūmenijicui yávaiyede jápiadama. Aru diede ju adama. Nárecabu ju are ðaivу apevу pōevare, apevу treinta paivure, apevу sesenta paivure, aru apevу cien paivure, arī buedejameda Jesús.

“Pēoibure” jári dāpiarī ne ðarājiyеpe aino

(Mt 5.15, 7.2, 10.26, 13.12, 25.29; Lc 6.38, 8.16-18, 11.33, 12.2, 19.26)

²¹Cojedeca Jesús, yópe arī, buedejameda náre:

—¿Pōecu ðavaidi pēoibure, ñōcuyу dibure puebу cāchinoi o paraino cāchinoi? Bi, quénora tuoibi dibure jocuve puenora. ²²Que baru caiyе yaveiyе báque jároquiyebu. Aru dupióvaiyе báquede máre járajarama caivу pōeva. ²³Me jápiajarā muja iye ji bueiyede, arejameda Jesús.

²⁴Aru cojedeca, yópe arī, buedejameda náre:

—Me dāpiajarā muje jápiaiyede ji bueiyede. Yópe pōeva adama: “Mi corevacaru apecure cūinárу jororūque, ðidumica Jūmenijicui corevacacuyume mure. Aru jícuyume pueno baju”.

²⁵Nopedeca ñai jápiaiyure Jūmenijicui yávaiyede Jūmenijicui pueno baju ũi majiéquede jícuyume ũre. Ũbenita ñai jápiabecure Jūmenijicui yávaiyede, iye ũi quíjino majiéde Jūmenijicui ũre icuyume, arejameda Jesús.

“Oteiyе bucūinore” jári dāpiarī ne ðarājiyеpe aino

²⁶⁻²⁷Cojedeca Jesús arī coyurejameda:

—Jūmenijicui jaboteino yópe painotamu. Cūinácу ũmу ũi oteiyе epeiyе joborōi, oteni buojarī cāimi ũ ñamiá coapa aru coedaibi jāravua coapa. Que teni ārumemi diede, oteiyе báquede. Ũi oteiyе bucūivу, ũbenita ũi majibedeca. ²⁸No joborō bucure ðaivу no bajumia. Mamarumу etaivу cainiñу. No yóboi etaivу yoca. No yóboi baji etaivу ðiñу jēiyoa. ²⁹Aru jēijāravу eaiyede, jēiyoa coboiyede, pōeva jēñaima ðivuáre, arejameda Jesús.

“Oteiyabe mostazare” jári dāpiarī ne ðarājiyеpe aino

(Mt 13.31-32; Lc 13.18-19)

³⁰Jesús arejameda:

—¿Yépe ārojari yo Jūmenijicui jaboteino? ¿Yéque jári coyurājidi maja nore? ³¹Yópe mostaza āmicuriyabe oteiyabepebu. Cūinácу ũmу ðiyabede ñni, oteibi joborōi. ðiyabedecabu oteiyabe quíjiyabe caiyе oteiyе pueno. ³²Ũbenita ũi oteniburu yóboi, bucūrī muivу ũracу ape oteiyе pueno. Aru ðicu cavabua ũracavabua nuivу. ðicu taino cāchinoi, mífjina ne juaiboa ðadama, arejameda Jesús.

Nopedeca mamarumure Jūmenijicui jaboteino quíjinotamu, pōeva obebevу ne cue boje noi. Ũbenita Jūmenijicui yávaiyе méne coyurīburу yóboi, ũrarōtamу no Jūmenijicui jaboteino, obedivу pōeva ne cue boje noi.

Aipe teni Jesús ũi bueino jári dāpiarī ne ðarājiyеpe aiyede

(Mt 13.34-35)

³³Yópe arī, buedejameda Jesús Jūmenijicui yávaiyede jári dāpiarī ne ðarājiyеpe ayу. Ne jápiarī coreóvarājiyеpe ayу buedejameda náre cainumua.

³⁴Coyure curejameda cainumua jári dāpiarī ne ðarājiyеpe aiyеque ũi bueinore. Ũbenita coyurejameda ũi bueimarare aipe aiyuede iye jári dāpiarī ne ðarājiyеpe aiyede.

Jesús ũmevure ũi bjaroino

(Mt 8.23-27; Lc 8.22-25)

³⁵ðijāravumica nainújie baji Jesús arejameda ũi bueimarare:

—Járica, macajitabu urabu apeduvei nurevu, arejameđa náre.

³⁶Quénora dajocarí nurejaimađa, nuvaivu Jesúre pöevare jocarí jiađocúi. Apevu pöeva nurejaimađa jiađocúi, náre coapa yóvaivu náre. ³⁷Aru jataivure japurejavýya úmevu paruró baju. Pácaiboa coipe boje jiađocúi, buidjéjavýya dicüre oco. ³⁸Ubenita Jesús cáñu marejámeđa japuvaino yebai. Tüorejameđa jabuóvaiboi. Aru coedavarí, arejaimađa úre:

—¿Mü jidübecurü maje corájinore? arejaimađa.

³⁹Jesús coedarí jararejameđa úmevure. Aru arejameđa macajitabure:

—Quénora, pácamejabu, arejameđa Jesús.

Que aiyede, úmevu bíjacunari, pácamenejavýya díbu macajitabu. ⁴⁰Que teni Jesús arejameđa úi bueimare:

—¿Aipe teni jidurivurü müja? ¿Aipe teni “Jesús meadacuyume nüjare”, abevurü müja? arejameđa.

⁴¹Jesús úi que aiyede, cucumari arejaimađa ne bajumia:

—¿Yécuba ñai yópe ñayü, úmevu aru macajitabu máre ju aimü? arejaimađa na.

Jesús úi meadaino úmü abujuva ne ímamure

(Mt 8.28-34; Lc 8.26-39)

5 ¹No macajitabu urabure jatari nuri, apeduvei jatarejameđa Jesús úi bueimaraque. Diduvei curejaimađa na, Gerasa ámicuröcavü. ²Aru Jesús úi maiyede jiađocüre jocarí, maumejiena copü nurejameđa cüinácu úmü, abujuva ne ímamü. Yaivu bácvü ne baju bácaröre japuvainore jocarí etarejameđa. ³Cucu barejámeđa noi. Aru ñame buojabedejaimađa buoivu úre táumeaque. ⁴Cainumua úre úi árađoare aru úi ámuveare máre táumeaque buoridurejaimađa. Ubenita die úi ámuveare ne buoyede cobururü burarí, die úi árađoare ne buoyede máre pëvari buravarejameđa ú. Tuijibua ñarí dajocavarejameđa

ñai abujuva ne ímamü. Aru pöeva úre jéivu parubedejaimađa na. ⁵Járvua aru ñamiá coapa cuyü barejámeđa cođoboborí cüracúai aru pöeva ne yaivu bácvure japuvainoi. Úi bajure jiađodovari, churiá teni, jive copidejameđa. ⁶Ubenita Jesúre joai jári, cýyarí nuri, ñuatutarejameđa úi yebai. ⁷Aru bujé cođoboborí, arejameđa:

—Mü, Jesús, Jümenijicui mácu, caivu pueno paracui mácu, ¿yéde ucürü yúque? Jëniaivu müre Jümenijicuque, ñájine dabejacu yure, arí cođoboborejameđa Jesúre.

⁸Nópe arejameđa, Jesús úi aiyede báque boje jipocamia: “Müja, abujuva, etajará ñai úmure jocarí”, ayü barejámeđa Jesús. ⁹Aru Jesús jëniari járejameđa:

—¿Yécu ámicucurü mü? arejameđa.

Jü arí arejameđa:

—Obedivübu nüja. Que baru Obecu ámicuvü yu, arejameđa.

¹⁰Pare jëniarejameđa Jesús úi jarobequiyepe ayü náre ne curöre jocarí. ¹¹Curejaimađa noi cüracú yebai obedivu oteivárviva, áre cuivu. ¹²Aru jëniarejaimađa ina abujuva Jesúre:

—Jarojacu nüjare ina oteivárviva, nüje corájiyeppe nára, arejaimađa na.

¹³Dinumuma nuicöjenejameđa náre Jesús.

—Nujara, arejameđa.

Aru ina abujuva etarí, corejaimađa ina oteivárviva. Na marejámeđa pucamil paivu baju. Cýyarí nuri, türejaimađa cüracú émeino, macajitabu urabui. Turí, corí bjarejaimađa na. ¹⁴Diede jári, ina oteivárviva mácvure coreipöeva cýyarí nurejaimađa, coyüivu uráimaroai aru ímaro curövaquede máre. Que baru obedivu pöeva, “¿Aipe tenama?” arí, járanurejaimađa. ¹⁵Jesús yebai nuivu, járejaimađa ñai úmü abujuva ne ñájine ñaimü mácu dobacure, cuitótecajede doyure, meacure cari. Aru jidurejaimađa úre. ¹⁶Coyurejaimađa ina jáivu bácvü Jesúí ñaiye báquede aru aipe vaino mácaröre ñai úmü abujuva ne ímamü mácvü, ina oteivárviva máre. ¹⁷Quénora “Nüjacü”, arejaimađa Jesúre

parurõque. Etaicõjenejaimada úre ne curõre jocarí.

¹⁸Aru Jesús ùi jatuiyede jiadocúi, jaturídurejameða ñai ùmu abujuva ne ímamũ mácu. Jëniaridurejameða parurõreca cuiyucu úque. ¹⁹Ûbenita Jesús yóvaicõjemecu arejameða úre:

—Nujacu mi cûrami, mívu yebai. Aru coyujacu caiye iye urarõ Jûmenijicu ùi ðaiyede máque, aru aipe ùi cõmaje ároje jáinore mure, arejameða Jesús.

²⁰Nuri, coyurí búrejameða Decápolis ámicuríjoborõcaímaroai caiye iye Jesús ùi ðaiye báquede úre. Aru caivu cuicumarejaimada jápiaivu ùi que ainore.

**Jesús ùi nacovaino Jairoi máco
bácore aru ùi meaðaino nomió
ñájiñore jiveque**

(Mt 9.18-26; Lc 8.40-56)

²¹No macajitabu urabu Jesús jatayu bácu cojedeca apedavei jiadocúi, cójijidejaimada obedivu põeva ùi yebai. Aru ùi carejameða macajitabu urabu écarui. ²²Ûi yebai earejameða cûinácu judíovai cójijiñamine coreipõecu, Jairo ámicucu. Aru maumejie járina ñuatutarejameða Jesúí cuboba yebai.

²³Urarõreca jëniari, arejameða Jesúre:
—Jímaco yaiyóta tebico õ. Yáque darí, tuojacu óre mi puruque, õi yaibécojiyepo ayu. Aru cucodome õ, arejameða Jesúre.

²⁴Ûi que aiyede, Jesús nurejameða úque. Cujurejaimada náre obedivu põeva. Aru cojivare nurejaimada Jesúre. ²⁵Ne jëneboi cûináco nomió carejacoda. Doce paíujua baju íjimo marejácode jive yuiyegue. ²⁶Pare ñájiño mácore, obedivu juoipõeva juorídurejaimada óre. Aru bojedari jaruvarejacoda caiye õi cuvae báquede, bojedacodo ina juoipõevare. Ûbenita ye meatebedejavüya. Quédata pueno baju íjino nurejavüya óre. ²⁷Jesús ùi põevare úmedavaiyede borore jápiaido báco, nurejacoda ùi yóboi obedivu põeva jëneboi. Aru jëni járejacoda ùi doicajena. ²⁸Yópe arí dápiarejacoda õ: “Yu jëni jádo maru ùi doicajede, quénora úmedacodomu yu”, arejacoda õ.

²⁹Maumejiena õi jëni jáiyede, bíjarejavüya õi jive yuino mácarõ. Aru dápiarejacoda caino õi baju meateni nuinore. ³⁰Ûbenita Jesús majicu ùi baju ùi paruecarõre etaiyede úre jocarí, copedini, ina obedivu põevare arejameða:

—¿Ñame matedí yure jëni jádo ji cuitótecajede? jëniari járejameða Jesús.

³¹Ûi bueimara arejaimada Jesúre:
—¿Obedivu põeva cojivare daivure jáñuvacari, “¿Ñame matedí yure jëni jádo?” ayurü mu? arejaimada na Jesúre.

³²Ûbenita járidurejameða caino ùi curõvare, jáiyucu ñame jëni jádo mácore úre. ³³Que teni ico nomió bidini jiduco, majico Jesús ùi úmedavaino mácarõre óre, nuri ñuatutarejacoda ùi jipocai. Aru coyurejacoda jáve õi ðaino mácarõre.

³⁴Jesúcapuravu arejameða óre:

—Mu, ji umo, “Û meaðaiye majibi yure”, arí dápiarebu mu. Que baru mi que arí dápiayiye boje, meaðaivu mure. Ména nuri cuyaco mu. Caride meateivu, arejameða óre.

³⁵Ûi boroteiyede óque, earejaimada ina judíovai cójijiñamine coreipõecui cûramicavu. Jairore arejaimada na:

—Javeta mímaco yaibíco õ. Quénora cárijovamejacu bueipõecure, arejaimada.

³⁶Ûbenita Jesús jápiaiyu bácu ne yávainore, jápiabecupe teni, arejameða Jairore:

—Jidubejacu mu. Quénora ju ajacu ji coyuinore, arejameða Jesús.

³⁷Aru apevure nuicõjemeni, nuvarejameða Pedrore, Santiagore, aru Jüare, Santiagoi yócore máre.

³⁸⁻³⁹Nurejaimada Jairoi cûrami. Cójijivure jári, aru codoborí oivure jári, aru cõmaje ároje teivure máre jári, ecorí arejameða Jesús:

—¿Aipe teni cójijini bujiéque oivurü muja? Ó yaiyó ámemico. Quénora cãdotame, arejameða.

Náre nópe arejameða Jesús, ùi majié boje ùi nacovaquinore óre yainore jaruvarí. ⁴⁰Ûi que aiyede, yuridejaimada úre. Ûbenita Jesúcapuravu náre etavarí, jarorejameða jedevai. Jípacure íni, aru

jípacore ñni, aru éque curivure máre ñni, ecorejameđa juedoco bácoi curitucubui.

⁴¹ Ó mácoi purure jēni, “Talita cumi”, arejameđa óre Jesús. “Juedoco, nacajajaco”, ayu barejameđa, óre que ayu.

⁴² Cūiná ico juedoco, doce paiujua cūvaco, nacajari, vaivarejacoda. Aru ina jáivu bácvu pare cuicumari dápiarejaimađa. ⁴³ Ūbenita Jesús apévure coyucōjemenejameđa náre iye ũi daiye báquede. Aru “Áiyede jíjará óre”, arejameđa Jesús.

Jesús Nazarei ũi nuino

(Mt 13.53-58; Lc 4.16-30; Jn 4.44)

6 ¹ Jesús nurejameđa nore jocarí, copainuñ ũi joborói ũi bueimaraque. ² Aru judíovai jabuóvaíjaravū sábadoi bueni búrejameđa judíovai cójijíñami. Ina obedivū pōeva úre jápiaivū cuicumari arejaimađa:

—¿Ároqueba caiye iye daiye? ¿Yéba iye úre majide daiye, aru iye daiye pōeva ne đarí majibede? ³ ¿Ñai ámeni jocure memepōecui mácu? ¿Ñai ámeni Maríai mácu? ¿Santiago, José, Judas, aru Simón máre némmamicu ámeni? ¿Ūi yórómiva máre cubedi majaque yui? arejaimađa na.

Que arí, ámeina járejaimađa úre.

⁴ Ūbenita Jesúcapūravū arejameđa náre, ne ju abe boje:

—Cubebi Jūmenijicui yávaiyede coyucaipōescu ne pueďaimū ũ jivu aru ũi cūramicavū máre ũi joborói, arejameđa.

⁵ Que baru đabedejameđa pōeva ne đarí majibede nore. Quénora obebevu íjimarare ũi puruque tuorí meadarejameđa. ⁶ Chíori dápiarejameđa pare ne ju abe boje úre.

Jesús ũi jaroino ũi bueimarare

(Mt 10.5-15; Lc 9.1-6, 10.4-11; Hch 13.51; Stg 5.14)

Jesús buede nurejameđa cainoa ímaroa coapa. ⁷ Cūinájjaravū ina doce paivū ũi bueimarare órearejameđa ũi yebai. Jídejameđa ne paruéva, ne

jaetovarājiyepē ayu abujuvare. Aru jarorejameđa pūcarā matuiyeda, ne coyurājiyepē ayu Jūmenijicui jaboteinoque yávaiye méne.

⁸ Nūvaicōjemenejameđa apejiēne ne nuinore, páuboare, aru curubūare, aru tāuturare máre ne járíoicāvai. Quénora nūvaicōjemenejameđa ne tuturiteiyova ne nuinoi. ⁹ Aru doicōjemenejameđa ne curaidoare. Ūbenita nūvaicōjemenejameđa náre pūcacajea cuitótecajeare. ¹⁰ Que baru arejameđa náre;

—Ári muja ecoivure ímaroi, cūjará cūinácu cūrami upacuque pu dajocarí nuivuta nore jocarí. ¹¹ Aru apenoi ne copu etabedu mujare, aru ne jápiaiyubedu iye yávaiye méne, etarí mujara. Aru pūpejará jobore mujare jēiyede muje cuboba cāchinoi ne jáiyede, ne jápiaiyube boje. Que teni díímarocavū coreóvarájarama ju abevure Jūmenijicure aru mujare máre, arejameđa Jesús.

¹² Que aríburu yóboi, etarí nurejaimađa ũi bueimara, yópe arí coyurájivū pōevare: “Chíori dápiarí dajocajará muje ámeina teiyede, Jūmenijicui árumetequiyepē aivū diede”.

¹³ Jaetovarejaimađa obedivū abujuvare. Aru obedivū íjimarare olivo ámicuricu jéidua córoque yuarí meadarejaimađa na.

Juan Bautista bácu ũi yaino

(Mt 14.1-12, 16.14; Mr 8.28; Lc 3.19-20, 9.7-9, 19)

¹⁴ Dinūmu ñai jabocu Herodes jápiarejameđa Jesúí borore, cainoacavū ne yávaiye boje úre. Aru arejameđa:

—Juan Bautista, yaiyú bácu, nacajacube yainore jaruvarí. Que baru yópe parucube ũ, ũbenina arejameđa Herodes.

¹⁵ Apevu arejaimađa: “Úrecabe Elías”. Aru apevu arejaimađa: “Jūmenijicui yávaiyede coyucaipōescube. Jūmenijicui yávaiyede coyucaipōeva mácvupe páyube ũ”, ávarejaimađa pōeva Jesúí borore. ¹⁶ Ūbenita Herodes, jápiayū Jesúí borore, arejameđa:

—Ñaime Juan Bautista, ji buravacamu ñi jipobure, nacajañu mácu yainore jaruvarí, ùbenina arejameða.

¹⁷Nópe dápiarejaquemavu Herodes, Juan Bautistare, apucure cãreja, ñi yaiquíye jipocai, Herodei buoicõjeiye báque boje úre. Buoicõjenejameða, jacocuyu ãmeina teivure jëni jacoĩnami, yópe Herodei márepaco Herodíai urõpe. Nópe urejacoda, õi jorojĩye boje, ñi ãmecoroie báquede Herodei, ñi cavae boje óre, ímacu Felipei márepacore.

¹⁸Javeðu Juan Bautista bácu ávarejameða Herode: “Jümenijicui ðaicõjeiye ñi coyüiye báque Moisés bácu cavaicõjemevu müre apecui márepacore”, ávarejameða úre.

¹⁹Que baru Herodías jararí pare ubedejacoda Juan Bautistare, apucure cãreja. Úre boarí jaruvaríidurejacoda. Ùbenita majibedejacoda õ. ²⁰Aru Herodes jidure curejameða Juan Bautistare, apucure cãreja, ñi majié boje meacure aru mearo ðayure.

Herodes cãrijĩñu mácuvacari Juan Bautistai coyüiye báque boje, torojurí jápiarejameða úre. Aru meadarejameða úre, apucure cãreja. ²¹Ùbenita cüinájãravu, ñi ãrurijãravu eaiyede, Herodei põeteijãravu bácarõre torojuve teino ðarejameða ñ. Cuturejameða caivu ina jabovare, churara jabovare, aru Galilea ãmicurijoborõcavu parurivure máre. Dijãravui Herodías coreóvarejaquemavu aipe boarí jaruvarí buojacodore Juan Bautistare. ²²Herodíai máco nuri, uparí, cojuyarejacoda Herode aru ñi cutuimarare máre. Que baru Herodes arejameða óre:

—Jíquiivü müre mi urõre, arejameða.

²³Aru paruéque arejameða óre:

—Jíquiivü müre yéde mi urõre. Yure ñãjine ðajacurí Jümenijicü, ji ðabedu yópe ji ainope. Coricaita ji jaboteni cavarõre jíquiivü müre, arejameða cojedeca.

²⁴Nãre jocarí, etarí nuri, jëniari járejacoda jípacore:

—¿Yéde jëniãji úre? arejacoda.

Aru jípacõ jëniãicõjenejacoda óre:

—Juan Bautistai jipobure jëniãjaco, arejacoda.

²⁵Maumena copainuri ñai jabocu yebai, arejacoda:

—Jíjacu yure carijie Juan Bautistai jipobure jororõque, arejacoda õ Herode.

²⁶Õi jëniãinore jápiarí, chõorejameða pare. Ùbenita ñi aiye báque boje paruéque, aru ñi cutuimarare cuyeni, ju abeni majibedejameða ñ. ²⁷Que baru maumena boaipõecure jarorejameða, ñi davaquiyepe ayu Juan Bautista bácu jipobure. ²⁸Ãmeina teivure jëni jacoĩnami nuri, burarí buojarí nuvarejameða Juan Bautista bácu jipobure jororõque. Jídejameða ico nomiõ bojuyore. Aru jídejacoda jípacore, õi majicojiyepe ado Juan Bautista bácu jáve yaiyá bácu.

²⁹Aru cüiná jápiaivüva iyede, Juan Bautista bácu bueimara nuvarejaimaða ñi baju bácarõre, jaruvarãjivü cãracobe jívui.

Jesús ñi ãre ðaino cüinãpurupe paimil baju ñmuvare

(Mt 9.36, 14.13-21; Lc 9.10-17; Jn 6.1-14)

³⁰Dinumu Jesús ñi daroimara mácavu copainurejaimaða ñi yebai. Aru úre coyurejaimaða caino ne ðaino mácarõre aru ne bueino mácarõre máre. ³¹Aru obedivü põeva Jesújãre nuri, jári, copainurejaimaða. Que baru ina põevacapuravu ãicõjemenejaimaða Jesújãre. Que teni Jesús arejameða ñi bueimarare:

—Járica, majapeda jabuóvarãnurajarevu ne cãrijovamenoi, arejameða.

³²Que teni jiadocüi jaturí, nuri põecubeno, nuridurejaimaða na, Jesújã, põevare jocarí nuivü. ³³Ùbenita náre nuivure járejaimaða põeva obedivü. Nuivure jári, náre coreóvarí arejaimaða: “Jesújãmu”. Que arí, cúyarí nuri, Jesújã ne earãjinoi ne jipocai emeni, coredejaimaða na macajitabu urabu écarui curiimaroacavu obedivü. ³⁴Aru ñ jatayü bácu, écarui mañu, ina

obedivũ pœvare jáñũ, náre cõmaje
ãroje járejamedã Jesús. “Ovejãva ne
coreipõescu cũbevũpebebu ina” arĩ,
bueni búrejamedã náre Jesús. ³⁵Urãrõ
coyũrĩ buedejamedã náre Jesús. Náre
bueni, nainúta marejávũya. Que baru
coyũrãearejaimada na, ùi bueimara.

—Javeta nainútãmu. Aru yo
põescũbenotãmu. ³⁶Mũ, bueipõescu,
pœvare ne ãrajiye bojedãicõjejacũ mũ.
Ëcarũcãvũ ne cũramia coapa aru noi
ĩmajinoai máre náre jarorĩ, “Áranũjara”
ajacũ mũ, arĩdurejaimada Jesúre ùi
bueimara.

³⁷—Mũja náre ãiyede jíjarã,
arejamedã Jesús.

Ëi bueimara arejaimada ùre:

—Doscientos pajãravũãa memeiye
bãque bojeque obedivũre ne ãrajiye
pãũboare ne bojedãrãnuru, eabequiyebu
iye náre coapa, arejaimada.

³⁸Arejamedã náre:

—¿Aipiboa pãũboare cũvarãrũ mũja?
Jãranũrijide apa, arejamedã.

Aru na majidivũ bácvũ arejaimada,
ùre coyũivũ:

—Pãũboã cũinãpũrũpe paiboa aru moã
pũcarã cũvãvũ ñũja, arejaimada na.

³⁹Dinũmũre cõriã pũenora pœvare
dobaicõjenezamedã Jesús. Yajuboa
teni, náre dobaicõjenezamedã ù. ⁴⁰Ëi
dobaicõjeiyede, dobarejaimada ina
pœvacãpũravũ. Dobarĩ, yajuboa teni,
cainimea teni, dobarejaimada na.
Cincuenta paivũ cũriyajuboa aru cien
paivũ cũriyajuboa dobarejaimada na.
⁴¹Aru die pãũboã cũinãpũrũpe paiboa
aru moã pũcarãre jẽni, cavarõĩ jáñũ,
torojuede jídejamedã Jũmenijicũre.
Torojuede jíni bũojarĩ, pãũboare
cotũvarĩ jebeni, pœvare jícõjenezamedã
Jesús ùi bueimare. Aru moare máre
quédãca pœvare cotũvãrejamedã Jesús.
⁴²Aru caivũ ãri yapidejaimada na. ⁴³Ãri
bubarĩburu iye cotũvaiye báque pãũ
aru moã máre pœva ne ãri oabede
ĩni, meadarĩ, pũebũã doce paibũare,
judĩovai pũebũare, buivãrejaimada ùi
bueimara. ⁴⁴Aru ina ãivũ bácvũ ùmũva
cũinãpũrũpe paimil baju barejãimada na.

Jesús ùi cuino oco pũenora

(Mt 14.22-27; Jn 6.16-21)

⁴⁵Maumejiena Jesús
jãtuicõjenezamedã ùi bueimare
jãdocũi, ne nũrajiepe ayũ ùi jípcãi
apedũvei, Betsaida ãmicũriĩmaroi. Que
teni copãicõjenezamedã ina pœvare.
⁴⁶Ne nũriburu yõboi, Jũmenijicũre
coyũcũnũrejamedã cũracũi. ⁴⁷Ñami
marejávũya. Ne jãdocũ macãjitãbũ
ũrabũ coricãi cũrejãvũya. Aru Jesús
cũracũi cũrejamedã. ⁴⁸Nore cãcũ,
jãrejamedã ùmẽvũ cobainore náre.
Que baru jãtabedejaimada apedũvei.
Pare doarĩ ñãjinejaimada. Aru
jãravũcãpũravũãi aviã ùi daquie jípcãi,
Jesús curĩ macãjitãbũ ùrabũ pũenora
nũrejamedã ne yebãi. Vaivãrejamedã
náre jocarĩ vaiyũpe. ⁴⁹Ëbenita ù
cuyũre macãjitãbũ ùrabũ pũenora
jãri, jídurivũ codõboborejaimada na:

—¿Põẽ decocũ bácvũ bãrica?
codõboborĩ arejaimada na.

⁵⁰Caivũ ina ùre jãri, pare
cucumãrejaimada. Ëbenita maumena
náre coyũvũ arejamedã:

—Paruèque dãpiãjarã. Yútãmu Jesús.
Jídũbejarã mũja, arejamedã náre Jesús.

⁵¹Que arĩ, jãturejamedã ne yebãi
jãdocũi. Aru ùmẽvũ bíjãrejãvũya. Que
teni cucumãri pare dãpiãrejaimada.

⁵²Coreóvãbedejaimada iye Jesús ùi
ðãiyẽ báquede pãũboaque, ùi ãre
ðãiyẽ báquede ina cũinãpũrũpe paimil
baju ùmũvare. Que baru ye coreóvarĩ
majibedejaquemãvũ na.

Jesús ùi meadãino Genesãrecãvũ ijimãrãre

(Mt 14.34-36)

⁵³Jãtarĩburu yõboi, eãrejaimada
Genesãret ãmicũrijõborõi. Aru
bũorejaimada ne jãdocũre Ëcarũi.
⁵⁴Dicũre jocarĩ etãivũre, obedivũ
pœvã coreóvãrejaimada Jesúre.
⁵⁵Que baru cúyãrejaimada cãino
ne ìmaroãi, nũvarãjivũ ijimãrãre ne
parãinoãi, cãino cũrõãi, ne jãpiãiyede
Jesús cũcũre. ⁵⁶Cãino Jesús ùi ñũino,

ímaroai, aru ímajinoai, aru curõvaquei máre, íjimarare nuvari epedejaimada táibui. Ére jëniarejaimada, ùi jëni jáicõjequiyeye aivu ùi cuitótecaje turvarã. Aru caivu jëni jáivu meateivu barejaimada na, íjimara mácavu.

Iye pøevare ámeina tede ðaiye
(Mt 15.1-20)

7 ¹Dinumu fariseovacavu apevu Jümenijicui yávaiye báque bueipøevaque Jerusalén ámicuríímarore jocarí etaiivu bávavu earí, cójjidejaimada Jesús yebai. ²Aru járejaimada ùi bueimaraçavure áivure ne puruáre cojabevuva. Ina fariseova dápiarejaimada caivure ne cojaiye jauéde ne árajiye jipocai, Jümenijicui mearo jáquiyeye aivu náre. ³Que baru ina fariseova ámeina járejaimada náre. Caivu fariseova aru caivu apevu judíova máre cainumua cojavarejaimada, ne árajiye jipocai. Nópe ðarejaimada ñujeñecuva mácavu ne ðaicõjeiye báquepe. ⁴Aru áiye bojedainore jocarí copaiivu bávavu cainumua cuyavarejaimada ne bajure, ne árajiye jipocai. Aru ape urarõ ñujeñecuva mácavu ne ðaicõjeiye báquede ðarejaimada na. Quédeca joavarejaimada ne jororure, ne cõaiñure, ne táucõaiñure, aru ne paraiboare máre. ⁵Que baru ina fariseova aru Jümenijicui yávaiye báquede bueipøeva jëniari járejaimada ére:

—¿Aipe teni mi bueimara ne puruáre cojabedi ne árajiye jipocai? Yópe ári majeñecuva mácavu ne ðaicõjeiye báquepe ðabema na, arejaimada na.

⁶Jesúcapüravu arejamedá náre:

—Jáve Isaiás báciu Jümenijicui yávaiyede coyucarejaquemavu mujare, jujovavure. Yópe arí, Jümenijicui toivaicõjenejaquemavu ùi mácure:

Ina pøeva yure ju adama ne jijecamuque. Ubenita ðabema yópe ji urõpe. ⁷Bojecubenoque mearore jñiduyama yure. Bueniduyama pøeva ne bueinore

Jümenijicui yávaiyeye, arí toivarejaquemavu.

⁸Muja dajocarí jaruvavubu Jümenijicui ðaicõjeiyede. Ubenita ju arí ðaivubu muja pøeva ne ðaicõjeiyede, arejamedá Jesús.

⁹Aru náre arejamedá cojedeca:

—Jáve dajocarí jaruvavubu muja Jümenijicui ðaicõjeiyede, ðarãjivu yópe mujeñecuva mácavu ne ðaicõjeiye báquepe. ¹⁰Que baru Jümenijicui coyurejaquemavu Moisés bávure, ùi toivaquiyeye ayu yópe: “Mipacure aru mipacore máre urí, ju ajarã. Ubenita ñaine ámeno coyure jípacure o jípacore máre, muje jabova boarí jaruvajarãri ére”, arejaquemavu. ¹¹Ubenita muja bueivubu yópe, “Cüinácu pøecu jípacure o jípacore ayu baru, ‘Mure cadateyu buojabevu. Mu jacopujebu ji táuturare. Ubenita jave jícacu yu Jümenijicure ji táuturare’, ayu bájebu ù”, aivubu muja. ¹²Muja ére cadateicõjemevu bájebu jípacure o jípacore máre. ¹³Que teni Jümenijicui yávaiyede bojecubepe ðarí, cómajivubu mujeñecuva mácavu ne ðaicõjeiye báquepe ðaivu, ne bueiye báque Jümenijicui yávaiye pueno. Aru ðaivubu muja cainumua iyeye paiyede, arejamedá náre Jesús.

¹⁴Cojedeca Jesús órejurejamedá ina pøevare. Aru arejamedá náre:

—Caivu yure jápiarí dápijarã. ¹⁵Caiye iye ecoiye pøevare jedevaque ámeina tede ðabevu náre. Ubenita caiye iye etaiye pøeva ne ùmene ámeina tede ðaivu náre. ¹⁶Me jápijarã muja iye ji bueiye, arejamedá Jesús.

¹⁷Que arí, dajocarí nurí ina pøevare jocarí, ecorejamedá cürami. Uí bueimara yore ùi coyüno mácarõre jëniari járejaimada ére. ¹⁸Aru náre arejamedá:

—¿Muja máre jápiarí eabenaru? ¿Coreóvabenaru? Caiye iye ecoiye pøevare jedevaque ámeina tede ðabevu náre. ¹⁹Ecobevu ne ùmei. Ubenita ne yapibü jívui earí etaiivu bajure jocarí, arejamedá.

Caiye iye maje áiye métamu aiyucu barejaquemavu Jesús. ²⁰Cojedeca arejamedá:

—Ūbenita caiye iye etaiye pōevare jocarī, ne dāpiaye, āmeina tede ðaivũ náre. ²¹Ne ūmei āmeina dāpiadama apevũre. Ðaðama āmeina ðaiyede apevũque, nēmarebũcũva ānevũque. Ñavaðama apevũ ne cũvaede. Boarī jarũvaðama pōevare. ²²Nomicũrivũvacarī apecoque cũma aru nomiva märe ũmucũrivũvacarī apecũque cũma nēmarebũcũvare jarũvarī. Cũvaiyũta apevũ ne cũvaede. Āmeina ðaiyurī dāpiadama. Jũjovaðama apevũre. Ne baju āmeno ðaðama. Jorojĩñama. Coyũyama āmenore apevũ borore caivũ ne jápiayede. “¿Meara mārīca?” aðama. Aru ārũmevũpe āmeina ðaðama, coreóvaivũvacarī ñájinajivũre ne que ðaiye boje. ²³Caiye iye āmene etaiye pōeva ne ūme jivũquede, āmeũme cũre ðaivũ náre, arī buedejameða Jesús.

**Cũináco nomió, judfova ānevũcaco,
õi jũ aino Jesúsre
(Mt 15.21-28)**

²⁴Diĩmarore jocarī Jesús nũrejameða apejororõi, Tiro aru Sidón āmicurĩmaroa yebai. Noi cũinádami cũrami ecorejameða. Aru apevũ ne majinore ũbedejameða cũcũre noi. Ūbenita dupini oabedejameða. ²⁵Maumejie cũináco nomió ũi borore jápiarī, nũri ũi yebai, ñaũtutarejacoða ũi cũboba yebai. Cũvarejacoða mamacore abujucũ ũi ĩmamore. ²⁶Aru ō nomió judfovacaco āmenejacoða. Sirofencia āmicurĩjororõi pōetedejacoða ō. Jesúsre jēniarejacoða, ũi etavaquiyepe ado abujucũre ōi mácõre jocarī.

²⁷Jesús arejameða óre:

—Meamevũ ĩnu jueðova ne āiyede, jĩnajivũ yavimivare. Que baru jueðova ājarari mamarũmũre, arejameða Jesús.

Que arī, aiyũcũ barejaquémavũ judfovare Jũmenijicũi mārãpe aru judfova ānevũre yavimivape.

²⁸Aru arejacoða ĩre:

—Mũ, ji jabocũ, jáve coyũivũ mũ. Ūbenita yavimiva märe tuoiva cāchĩnoi cũrivũ, jueðova ne ārĩ jarũvaiyede āðama na, arejacoða Jesúsre.

²⁹Aru arejameða óre:

—Me copainũjaco, mi que aiyẽ boje. Abujucũ jáve etayũme mĩmacore jocarī, arejameða óre Jesús.

³⁰Cũrami copainũri, earī, járejacoða ōi mácõre ōi parainoi meacore. Aru abujucũ cubedejameða óque.

**Jesús ũi meadaino
jápiabeni yávabecure**

³¹No yóboi copainũrejameða Tiro āmicurĩmaro curijororõre jocarī. Aru vaidéjameða Sidón āmicurĩmarore aru Decápolis āmicurĩjororõre märe, pũ earĩta macajitabũ urabũ Galilea āmicurĩjitabũre. ³²Noi ũi cuede, nũvarejaimaða ũi yebai cũinácũ ũmũre, ñai jápiabecure aru yávarī majibecure. Aru jēniarejaimaða Jesúsre, ũi pũrũque tuoquiyepe aivũ ĩre.

³³Que baru Jesús nũvarejameða ĩre joajĩmaque apevũre jocarī. Doarejameða ũi āmũyoare ñai ũmũ ũi cá mucobea jivũ. Aru ũi āmũyoare jēcuturi tuorejameða ñai ũmũ ũi jemedore. ³⁴Cavarõre jári, ũme dapurī, arejameða: “Efata”. “Efata” aino, vojarõ aiyũrõtamũ no.

³⁵Que arī, Jesús ñai jápiabecũ bácũre jápiare ðarī, ñai yávabecũ bácũre yávare ðarejameða. ³⁶Que teniburu Jesús apevũre coyũicõjemenejameða náre pare, ne majibenajiyẽpe ayũ. Ūbenita cainũmũ ũi coyũrĩduiyede ca yóboi, cainũmũ coyũrejaimaða ũi borore pũeno baju. ³⁷Aru pare cuezumari arejaimaða ĩre:

—Ū ðaibi cainũmũa ménẽ. Jápiare ðayũbe jápiabevũ bácavũre. Aru yávare ðayũbe yávabevũ bácavũre märe, arejaimaða na.

**Jesús ũi āre ðaino yóvaicũvaimil baju
ũmũvare
(Mt 15.32-39)**

8 ¹Apejãrvũi bediõva cõjĩidejaimaða obedivũ pōeva Jesús yebai. Aru āiyede cuvabedejaimaða na. Que baru Jesús órejarejameða ũi bueimarare ũi yebai. Aru arejameða náre:

²—Cómaje ãroje jáivu yu ina pōevare. Ina obedivũ cuma yúque yóbecurijãravua. Aru ãiyede cuvabema.

³Apevu ne cūramia joarótamu. Que baru ji copaicōjenu náre ne cūramiai, mái nuri mamaðajebu, ne ãvué ñájijye boje, arejameda Jesús.

⁴Ëi bueimara jēniari járejaimada ãre: —¿Ëbenita aipe ðarí jínajidi ãiyede caivu ina pōevare, ne ãrajijyepe yui pōecubeni? arejaimada na.

⁵Jesús jēniari járejaimada náre:

—¿Aipiboa páuboare cuvãrãru mũa? arejaimada.

Aru arejaimada:

—Siete paiboabu, arejaimada.

⁶Que aiyede, ina pōevare dobaicōjenejaimada joborõi. Aru diboá páuboa siete paiboare ñni, torojuede jīni Jūmenijicure, diboáre cotvarí jídejaimada ãi bueimarare, ne jínajijyepe ayũ pōevare. Aru nópe ðarí jídejaimada na. ⁷Obebejina moajinare máre cuvarejaimada. Jūmenijicure torojuede jīniburũ yóboi, jícōjenejaimada náre máre. ⁸Que ðaiyede, ãri yapidejaimada caivu. ãri bubarĩburũ yóboi, iye cotvãiyeye báque páu aru moa máre, pōeva ne ãri oabede ñni, meðarí, pueá siete paipueare, judfova ãmevu ne pueáre, buivãrejaimada na. ⁹Aru ina ãivu bácvã pōeva yóvaicuvaimil baju barejáimada na. ¹⁰Jesús copaicōjenejaimada náre, ãre jocarí. No yóboi, maumejiena jaturejaimada jiaðocũ ãi bueimaraque. Aru nũrejaimada apejorõi, Dalmanúta ãmicuríjoborõita.

Fariseovacavũ ne jēniaino pōeva ne ðarí majibede

(Mt 12.38-39, 16.1-4; Lc 11.16, 29, 12.54-56)

¹¹Apevu fariseovacavũ nũrejaimada Jesús yebai. Aru ãmeina boro coyurí búrejaimada ãre. Jáiyurejaimada ãi jáðovaiyede cavarõ mearo Jūmenijicui curõquede, jujovarĩdurãjivũ ãre. Yópe arí, pōeva ne ðarí majibede ðaicōjenidurejaimada ãre:

—Mu, Jesús, jáðovajacũ ñũjare apede mi ðaiyede Jūmenijicui parueque, ñũje majinajijyepe aivu jáve mure Jūmenijicui daroimũ mácure, arĩdurejaimada Jesúre.

Nópe arí, ãre jujovaiyurejaimada na. ¹²Aru chĩori, ãme dapurí pare, arejaimada:

—¿Aipe teni ijãravucavũ jáðovaiyede jáiyuri? Jáve coyuyũbu mujare:

Ijãravucavũ jámenajarama jáðovaiyeye cavarõ mearo Jūmenijicui curõquede, arejaimada Jesús.

¹³Que arí, náre dajocarí, jiaðocũ jaturí cojedeca, jatari nũrejaimada apeduvei.

Fariseova ne ãmeno dápiayeye

(Mt 16.5-12; Mr 4.12; Lc 12.1)

¹⁴Jesú bueimara ãrumeteivũ bácvã páure, quénora cuvarejaimada cūinábo páubore náque jiaðocũ. ¹⁵Aru Jesús cōjeñũ arejaimada náre:

—Me ðajarã. Me jájara ina fariseova aru ñai Herodes máre ne páure bucõvãre ðaiyede, arejaimada Jesús.

¹⁶Ëi que aiyede, arejaimada ne bajumia:

—Ë yópe aibi, maje páure cuvabe boje, arejaimada na.

¹⁷Ëbenita Jesús coreóvarejaimada ne yávainore. Que baru arejaimada náre:

—¿Aipe teni coyuvãrũ mũa “Páure cuvabevũ ñũja” aivu? ¿Coreóvabenarũ cãreja? ¿Majibenarũ cãreja? ¿Dápiabeni coreóvabenarũ mũa? ¹⁸¿Yacorũ cuvãrivãvacari, jámenarũ? ¿Aru cá mucobea cuvãrivãvacari, jápiabenarũ? ¹⁹¿Aru ãrumenarũ? ¿Yũ cotvãcavũ cūinárvũpe paiboa páuboare ina cūinárvũpe paimil baju ãmũvare, aipirpuebũ cotvãiyeye báqueque ícanarũ mũa? arejaimada náre Jesús.

Na ju arejaimada ãre:

—Doce paibua puebua baju ícarã ñũja, arejaimada na.

²⁰Jesús arejaimada náre cojedeca:

—¿Aru yũ cotvãcavũ siete paiboare ina yóvaicuvaimil baju ãmũvare, aipirpuea cotvãiyeye báqueque ícanarũ mũa? arejaimada.

Aru na ju arejaimada úre:
—Siete paipuea baju ícará ñuja,
arejaimada na.

²¹ Dinumure arejameda náre:
—¿Aipe teni majibenaru cãreja?
Coyuyubu mujare: Me jájara ina
fariseova aru Herodes máre ne
dápiayede, muje dápiabenajiyepe ne
dápiainope, arejameda náre Jesús.

**Jesús ñi meadaino jári
eabecure Betsaidai**

²² No yóboi earejaimada Betsaida
ámicuriimaroí. Apevu pöeva
nũvarejaimada Jesús yebai cüinácü ñmu,
jári eabecure. Aru Jesúsre jëniarejaimada,
ñi purũque tuoquiyepe aivu ñai ñmure.

²³ Que teni jári eabecu ñi purũre jëni,
nũvarejameda úre diimarore jocarí.
Aru jëcuturi ñi yacoruará, úre tuorí ñi
purũáque, jëniari járejameda úre:
—¿Apejïene jáñũru cari? arejameda
Jesús.

²⁴ Quíjino jári, arejameda:
—Jáivu yu ñmũvare. Ubenita
jocũcuape árojama cuivu, arejameda
Jesúsre.

²⁵ Cojedeca Jesús tuorejameda
ñi yacoruará. Que teni ñai ñmu
cocorejameda me. Jári earejameda
cojedeca. Aru me járejameda caiyede.

²⁶ Jesús copaicõjenejameda úre ñi
cũrami, yópe arí:
—Diimaroi ecobejacu mu, arejameda
úre Jesús.

Pedro ñi “Cristobu mu” aino

(Mt 16.13-20; Mr 6.14-15; Lc
9.7-8, 18-21; Jn 6.68-69)

²⁷ Jesús nũrejameda ñi bueimaraque
ĩmaroai Cesarea de Filipo ámicuriimaro
joabejĩnoi. Aru mái nũre nũiyede jëniari
járejameda ñi bueimaraque yópe:

—¿Aipe aidi pöeva yure? ¿“Yécubebu”,
aidi yure? arejameda Jesús.

²⁸ Arejaimada úre:
—Apevu adama, “Juan Bautistabe”. Aru
apevu adama, “Elíabe”. Aru apevu adama,
“Jümenijicui yáviayede coyũcipõecube
ũ”, adama mure, arejaimada na.

²⁹ Aru jëniari járejameda náre:
—¿Ubenita aipe aivurũ muja yure?
arejameda Jesús.

Aru Pedro arejameda úre:
—Mu Jümenijicui daroimu mácubu.
Ñujare jabotecuyumu mu, arejameda
Pedro Jesúsre.

³⁰ Aru náre coyũicõjemenejameda
apevure ñi borore.

Jesús ñi coyũino ñi yaiquĩnore
(Mt 10.38-39, 16.21-28; Lc 9.22-
27, 14.27, 17.33; Jn 12.24-25)

³¹ Jesús, yópe arí, bueni búrejameda
náre:

—Jaũvu yure, Jümenijicui daroimu
mácure ñmure, urarõ ji ñájiquino. Ina
judíova bucũva, aru sacerdotevare
jaboteipöeva, aru Jümenijicui yáviaye
báquede bueipöeva máre yure boarí
jarũvarájarama. Aru yóbecũrijãravũa
yóboi nacajacuyumu yu yainore jarũvarí,
arejameda Jesús.

³² Caiye iyede coyurejameda náre. Aru
ñi coyũiye báque maiyõjabejevãvũya
náre, ne járiari earãjiyepa aipe.
Dinumure Pedro nũvarejameda úre
apevu ina bueimaraque jocarí. Aru
parũrõque jararí búridurejameda Jesúsre.

³³ Ubenita Jesús, copedini járejameda
apevu ñi bueimaraque. Aru Pedro
curejameda ñi yóboi. Que teni jararí
arejameda úre:

—Mu, Satanás, jujoarĩdubejacu
yure. Nujacu yure jocarí. Dápiavũ mu
pöevape. Aru dápiavũ mu Jümenijicui
jiede, arejameda Pedrore.

³⁴ Jesús orejarejameda ñi yebai
obedivu pöevare ñi bueimaraque. Aru
arejameda náre:

—Ácu pöecu daiyũcu yáque,
dajocajacurí pöeva ne mearo jáiyede
úre, cuyebajacurí yure yóviayede, aru
jidubejacurí ñi ñájiquiyede. Nõpe ñabecu
baru, ñ buojabebi jícu bacuyá. ³⁵ Ñai
pöecu ñi baju urõpe ñarí, meadaiyũcu
baru ñi bajure, coatecuyũme ñi bajure
Jümenijicure jarũvarí, yópe yaiyá
bácure ñi ñmei. Ubenita ñai pöecu, “Ye
baju ánevũ, ji yaidú Cristore boje” ayũ,

ñi baju urõpe ðabecuna quénora ji urõpe ðarí, úrecabe ji meadaquimú, cuscuyu Jümenijicúque cainumna. ³⁶⁻³⁷Ñai pöescu cuncavu baru caiye ijáravuquede, ubenita bíjauv baru ñi ñmene, ñájiycuyume cainumna toabo cúiméboi. ³⁸Aru ñai pöescú cuyedu yure aru ji yáviayede máre ijárvucavu ámeina teivú ne jáiyede, yu, Jümenijicú daroimú mácu ñmure, máre cuyeni dápiascuyumu úre ji jáðovaiyede jipacu meacu baju ñi mearore ji daiyede ina ángeleva mearaque máre, arejameða Jesús.

9 ¹Aru arejameða náre cojedeca: —Jáve coyuyubu mujare: Apevu curivu yui, ne yainájiye jipocai járajarama Jümenijicú jaboteino curõre paruéque, ji jaboteiyede pöevare, arejameða Jesús.

Jesús ñi baju oatuvaino
(Mt 3.17, 11.14, 17.1-13; Mr 1.11;
Lc 3.22, 9.28-36; 2 P 1.17-18)

²Seis pajárvava yóboi, Jesús nuvarejameða Pedrose, Santiagore, aru Jüare máre. Jipocatedejameða náre cüracú ñmujuricú puenoi, apevure jocarí. Aru na járejaimaða ñi oatuvaiye me bajure. ³Yópe barejávüya. Ñi cuitótecaje pöorejavüya, pare boricaje ñi cuitótecaje. Ijárvure joaipöescu yópe boricaje ðarí majibebi. ⁴Aru járorejaimaða Elías Moisémaque, boroteivú Jesúque. ⁵Dinumú Pedro arejameða Jesúre:

—Mú, bueipöescu, mearotamu ññje curu yui. Que baru ðarájivubu ñña yóbecuríñamia cüramia quíjiñamia maquiyéde, cúináðami míñami maquinóre, apeðami maquinóre Moiséde, aru apeðami maquinóre Elíare, arejameða Pedro.

⁶Pare cuicumarejaimaða na. Que baru Pedro majibedejameða aipe ñi ainore.

⁷Dinumuma oopenibo émeni taorejavüya náre. Aru jápiarejaimaða apeno yávinore oopeniboi etaiyede: “Ñaime jímacu, ji umu. Que baru jápiajará úre”, arejameða Jümenijicú.

⁸Aru yávaríburu yóboi, járejaimaða Jesúre cúinácura.

⁹Ne émeni daiyede dicú cüracúre jocarí, Jesús apevure coyucójemenejameða náre ne jáino mácarõre. Yópe arejameða:

—Me jápiajará muja. Coyubejará apevure no muje jáino mácarõre cüracú ñmujuricú puenoi, ji nacajaríburu yóboita yainore jaruvarí. Yébu Jümenijicú daroimú mácu ñmure, arejameða náre Jesús.

¹⁰Que baru ju aivu úre, coyubedejaimaða apevure no ne jáino mácarõre. Aru jëniari járejaimaða ne bajumia, “¿Aipe aiyucuba yo ñi aino nacajainore yainore jaruvarí?” arejaimaða na. ¹¹Que teni jëniari járejaimaða úre:

—¿Aipe teni aivuba ina Jümenijicú yáviaye báquede bueipöeva, “Mamarumú Elías dacuyume, ñai Jümenijicú daroimú ñi daquiyé jipocai”? arejaimaða na.

¹²Aru arejameða náre: —Jáve Elías dacuyume Jümenijicú daroimú ñi daquiyé jipocai, meadacudayu caiyede. Toivarejaquemavu yópe yure, Jümenijicú daroimú mácure ñmure: “Pare ñájiñe ðarájarama pöeva úre. Aru ubenama úre”, arí toivarejaquemavu. ¹³Ubenita jáve dáme Elías, ayubu yu mujare. Aru pöeva ne urõpe ðaima úre, yópe Jümenijicú toivaicójeiye báquepedeca úre, arí buedejameða náre Jesús.

Jesús ñi meadaino jueðocure,
abujucu ñi imamure
(Mt 17.14-21; Lc 9.37-43)

¹⁴Apevu Jesú bueimara yebai earí, járejaimaða ina bueimarare obedivu pöeva jëneboi. Aru Jümenijicú yáviaye báquede bueipöeva jararí yávorejaimaða náque. ¹⁵Jesús ñi eaiyede, ina pöeva úre jári, torojurí cúyarejaimaða ñi yebai, úre jacoyuránuvú. ¹⁶Jesús jëniari járejameða náre:

—¿Yéde yávaivurú muja náque? arejameða náre.

¹⁷ Cūinácu pōescu pōeyajubo jēneboi arejameđa úre:

—Mu, bueipōescu, jímacure abujucu ímami. Aru yávaicōjememi úre. Que baru úre davaríduvú yú mi yebai. ¹⁸ Nāi abujucu cainumua bidióvarí ture ďávabi úre joborói. Aru aburí etavavú úre. Cōpi cívabi ũ. Aru ũi baju jājatevabi ũ. Que baru yú jēniariduvú mi bueimarare, ne jaetovarājiyepe ayú nāi abujucure. Ūbenita na nāine jarúvarí majibema, arejameđa Jesúre.

¹⁹ Aru Jesús arejameđa náre:

—Múja, ijāravucavú, Jūmenijicure ju abevú, ¿aipijāravua cūquidi yú mújaque? ¿Aru aipijāravua nājiquidi yú mújaque, múje ju arājiyepe ayú ji coyuyede? Davajarā nāi juedocure ji yebai, arejameđa Jesús.

²⁰ Nūvarejaimađa juedocure Jesús yebai. Aru nāi abujucu Jesúre jári, juedocure bidióvarí, ture ďarejameđa joborói. Joborói turí, nāi juedocu jātururejameđa. Aru aburí etarejavūya úre.

²¹ Jesús jēniari jārejameđa jípacure yópe:

—¿Aipinūmua baju abujucu ímari úre? arejameđa Jesús.

Aru jípacu ju arejameđa:

—Javeita, quíjicurata. ²² Aru apenūmua úre bidióvarí, ture ďarí toaboi aru jiai, boarí jarúvaríduvabi úre. Ūbenita buojayú baru cōmaje āroje jári, ďadatejacu nūjare, arejameđa Jesúre.

²³ Jesús arejameđa úre:

—¿Būojayú baru, ayurū mū? Yú caiyede ďacarí majivú mure, yure mi ju aru, arejameđa úre Jesús.

²⁴ Maumejie nāi juedocui pacu codoboborejameđa:

—Mure ju aivú yú. Ćadatejacu yure ji ju aye parúé baquiyépe, arejameđa Jesúre.

²⁵ Dinūmure Jesús jári obedivú pōeva cūyavure ũi yebai, parúéque etaicōjenejameđa abujucure. Arejameđa:

—Mu, abujucu, nāi juedocure yávaicōjemescu aru jápiaicōjemescu, yú cōjeivú mure. Etajacu úre jocarí. Aru

ímamejacu úre cojedeca, arejameđa Jesús.

²⁶ Que ayú Jesús, nāi abujucu codoboborí aru pare bidióvarí, ture ďarí juedocure, etarejameđa úre jocarí. Que teni nāi juedocu yayú bācupe pararejameđa. Que baru ina pōeva obedivú “Jave yaibí ũ”, arídjurejaimađa na. ²⁷ Ūbenita Jesús, ũi purure jēni, nacovarejameđa úre. Aru nāi juedocu nacajarejameđa. ²⁸ Que ďaríburu yóboi, Jesús ecorejameđa cūrami. Nore ũi bueimara jēniari jārejaimađa úre cūinácura, yópe arí:

—¿Aipe teni nūja jaetovarí majibetedi nāi abujucure? arejaimađa na.

²⁹ Náre arejameđa:

—Jūmenijicure jēniaye javuvú āmevva āiyede, abujucu nāipe páyure múje jaetovarājiyepe aivú, arejameđa náre Jesús.

Jesús ũi coyūino cojedeca ũi yaiquínore

(Mt 17.22-23; Lc 9.43-45)

³⁰ Nore jocarí nuivú, Jesújā vaidėjaimađa Galilea āmicuríjoboróre. Aru pōeva ne majiéde ũbedejameđa Jesús. ³¹ Ū bueyú barejameđa ũi bueimarare. Que baru ajevú pōeva ne eaiyede ũi yebai ũbedejameđa Jesús. Yópe arí, buedejameđa ũi bueimarare:

—Yure, Jūmenijicui daroimú mácure ũmure, jēni jínajivubu ji mavure, ne boarí jarúvarājiyepe ayú yure. Aru yóbecuríjāravua yóboi, nacajacuyumu yú yainore jarúvarí, arejameđa náre Jesús.

³² Ūbenita jápiarí eabedejaimađa ũi coyūino mácaróre. Aru jidurivú jēniari jáiyubedejaimađa úre.

¿Námema parucu maje jēnebore?

(Mt 10.40, 18.1-5, 20.26-27,
23.11; Mr 10.43-44; Lc 9.46-48,
10.16, 22.24, 26; Jn 13.20)

³³ Jesújā earejaimađa Capernaum āmicurímaroi. Aru ecorejaimađa cūrami. Cūrami jívui curivú, Jesús jēniari jārejameđa ũi bueimarare yópe:

—¿Ye batedí mǎje borotede daiye máí? arejamedá náre Jesús.

³⁴ Ûbenita coyubedejaimada úre, ne borotede daiye báque boje ñamene parucure ne jēneboi arevǎ p̄eno.

³⁵ Dinmure Jesús dobacunrejamedá, buescuy. Órejurejamedá ina doce paivǎ úi buemarare. Aru arejamedá náre:

—Ñai p̄escu úi cōjeiyuru arevure, dáriaiye javǎ úre yópe parubescure. Aru caivǎ ne yebacacure bacuyúme ú. Arevure bojecube memecaiye javǎ úre, arejamedá Jesús.

³⁶ Que arǐburu, Jesús jēnejamedá cūinácu j̄ueḏocure. Aru núvari úre ne coricai, dururǐ úre úi ámuveaque, arejamedá náre:

³⁷ —Cūinácu p̄escu copǎ etayǎ baru cūinácu j̄ueḏocure ji ámiái, ji cōjeiyepe, que ḏayǎ nopedeca copǎ etaibi yure. Aru cūinácu p̄escu copǎ etayǎ baru yure, copǎ etaibi ñai yure daroyure máre, arejamedá Jesús.

Majare jarabecu, majacacube
(Mt 10.42, 12.30; Lc 9.49-50, 11.23)

³⁸ Juan arejamedá Jesúre:

—Mu, bueip̄escu, jácarǎ ñja cūinácu úmǎ abujuvare jaetovayure mi ámiái, mi paruéque. Ûbenita ñjaque úi cube boje, “Ḑabejacu” acarǎ ñja úre, arejamedá Juan.

³⁹ Ûbenita Jesús arejamedá náre:

—Ñai ḏayǎ p̄eva ne ḏarǐ majibede ji ámiái, ji paruéque, no yóboi ámeina yávabecube yure. Que baru nópe abejarǎ mǎja úre. ⁴⁰ Ñai p̄escu maucvabecu majare queñora majacacube ú. ⁴¹ Que baru jáve coyuyǎbu mǎjare: Ácu p̄escu jíyǎ baru cūináru jorogure ocoque, caḏatecuyǎ cūinácu ji buemaracacure, úi yóvaiye boje yure, jáve bíjabcuyume Jūmenijicui me boḏedaiyede úre, arejamedá Jesús.

Jidojarō maje ámeina teino

(Mt 5.13, 29-30, 18.6-9;
Lc 14.34-35, 17.1-2)

⁴² Bedióva buedejamedá Jesús, yópe arǐ:

—Ácu p̄escu úi vainí ture ḏaru apescu yure ju ayure parubecureca, úi ḏajocaquiyepe ayǎ úi ju aiye de yure, meajebu úre jarǎvaru jia uradai úi ñamemui buorǐ cūinábo cūrabo uraboque. ⁴³⁻⁴⁴ Aru mu ámeina teyǎ baru mi p̄uḏaque, burarǐ jarǎvajacu dipurure. Meaquiye bu mure, mi earu cavarō mearo Jūmenijicui curōi cūináruḏaque. Ûbenita meamequiye bu mure, mi nǎru toabo cūiméboi caipucap̄uḏaque. ⁴⁵⁻⁴⁶ Aru mu ámeina teyǎ baru mi cubobaque, burarǐ jarǎvajacu dibare. Meaquiye bu mure, mi earu cavarō mearo Jūmenijicui curōi cūinába cubobaque. Ûbenita meamequiye bu mure, mi nǎru toabo cūiméboi caipucaba cubobaque. ⁴⁷ Aru mu ámeina teyǎ baru mi yacorḏaque, ñni jarǎvajacu didure. Meaquiye bu mure, mi ecoru Jūmenijicui jaboteinore cūináru yacorḏaque. Ûbenita meamequiye bu mure, mi nǎru toabo cūiméboi p̄ucarḏa yacorḏaque. ⁴⁸ Nore toabo cūiméboi curōi cuma júva yaibévu. Que baru p̄eva nore nuivǎ baru cainmua ñájinajarama na, toabore aru júvare máre.

⁴⁹ Meadaivǎ maje áiyede yuquiraque. Nopedeca ñájiye meadaivǎ p̄evare. ⁵⁰ Yuquira maje áiyede meadaivǎ. Ûbenita yuquira vaijue bíjaru, áiyede meadaie buojabevǎ. Aru mǎja máre yuquirape bájarǎ. Nópe yuquira meadaiyepedeca maje áiyede, caḏatejarǎ mǎjevure. Aru cǎrijimene ḏarǐ, me cǎjarǎ mǎjevunque, arejamedá Jesús.

Jesús úi bueino nomi jarǎvainore
(Mt 5.31-32, 19.1-12; Lc 16.18; 1 Co 7.10-11)

10 ¹ Bueniburu yóboi, Jesús etarejamedá ne ñmarore jocarǐ. Aru nurejamedá Judea ámicurijoborōi aru Jordán ámicuriya jia aped̄vei máre. Bedióva cojedeca obedivǎ p̄eva cōjjidejaimada úi yebai. Aru úi ḏarǐ cōmajiyep̄e, bueyǎ barejamedá náre. ² Fariseovacavǎ máre nurejaimada úi yebai, jujovaiyurivǎ úre, jēniari járejaimada:

—¿Cúinácu ũmu jaruvayu baru jímarepacore, ñaídi yópe maje ñaicōjeiyepere? arejaimada na.

³Náre arejamedá Jesús:

—¿Aipe ñaicōjeneaquemari Jūmenijicu, ũi toivaicōjeiye báquede Moisés bácuere? arejamedá.

⁴Aru arejaimada:

—Moisés bácu jícōjeneaquemavu pōecure cúináyoca “Mure jaruvayubu yu” aiyocare jímarepacore, arejaimada na.

⁵Aru Jesús arejamedá:

—Moisés bácu jaruvaicōjeneaquemavu mujare mujemarepacore, muje Jūmenijicui ñaicōjeiyede járiaiyube boje.

⁶Ūbenita mamarumure, Jūmenijicu cuedarejaquemavu caiyede. “Ūmu macuyáre aru nomió macodóre máre ñarejaquemavu Jūmenijicu”. ⁷Aru, “Que baru caride ácu pōecu jímarepaco bacoðó cuvacuuy, ũi bucuvare ñajocacuyume. ⁸Aru jímarepacore cuvari, ómaque cúinávupetamu na Jūmenijicui jáinore”. ⁹Que baru pucarã ámeta. Quénora cúinávupetamu na. Que baru pōecu Jūmenijicui cójjiovaimara mácavure coavabejacurí ũ, arí buedejamedá Jesús.

¹⁰No yóboi, cūrami jívuai ina ũi bueimara jēniari járejaimada ũre cojedeca aipe iye ũi coyuiye báquede.

¹¹Náre arejamedá:

—Ácu pōecu jímarepacore jaruvaríburu yóboi purubuoyn baru apocoque, nomicucuvacari apocoque cucu baru, ámeina ñaibi óre ũi mamarumucacore jaruvari. ¹²Aru áco pōeco jímarepacure jaruvaríburu yóboi purubuoðo baru apocuque, ũmucucovacari apocuque cucu baru, ámeina ñaibico ũre ñi mamarumucacure jaruvari, arí buedejamedá náre Jesús.

**Jesús ũi mearore jino juedovare
Jūmenijicucue**

(Mt 18.3, 19.13-15; Lc 18.15-17)

¹³Pōeva núvare cuivu barejáimada némarare Jesús yebai, ũi tuoquiyepe aivu náre ũi puruáque. Que teni ũi

bueimara núvaicōjemenidurejaimada némarare. ¹⁴Ūbenita Jesús járejamedá náre ne que ñaiyede. Pare cojubedejavūya ũre. Que baru arejamedá náre:

—Ina juedova dajarari ji yebai.

Jūmenijicu jabotecuyume pōevare nápe paivure. Que baru, “Davabejarã juedovare”, abejarã náre. ¹⁵Jáve coyuyubu mujare: Ácu pōecu copu etabecu baru Jūmenijicure jaboteyure ũre, yópe juedocu ũi copu etaiyepe, ecobecuyume ũi jaboteinore, arejamedá Jesús.

¹⁶Que arí, Jesús ñni dururejamedá ina juedovare ũi ámuveaque. Náre coapa dururí, tuorí ũi puruáque, mearore jídejamedá náre Jūmenijicucue.

**Cúinácu ũmu cuve cuvacu Jesúmaque
ne boroteino**

(Mt 19.16-30, 20.16; Lc 13.30, 18.18-30)

¹⁷Jesús ũi núiyede cojedeca, cúinácu ũmu cúyarí ñuatutarejamedá ũi yebai. Aru jēniari járejamedá ũre:

—Mu, bueipōecu meacu, ¿aipe ñaji yu, cuvacuuy járavu cúiméjjaravu baquinóre? arejamedá ũ.

¹⁸Jesús arejamedá ũre:

—¿Aipe teni “Meacubu mu”, ayurū yure? Jūmenijicu cúinácurabe meacu baju. ¹⁹Majivura mu Jūmenijicui ñaicōjeiyede ũi coyuiye báquede Moisés bácuere: “Pōevare boarí jaruvabejacu. Cuvabejacu apcore mimarepacore jaruvari. Ñavamejacu apacu ũi cuvade. Borodabejacu apacure. Borocurí imejacu apacu ũi cuvade. Ju ajacu mipacure aru mipacore máre”, arejamedá Jesús.

²⁰Que teni arejamedá Jesúre:

—Mu, bueipōecu, ñacacu caiye iye mi coyuiyede juedocu cãreja yu, aru caride máre, arejamedá.

²¹Jesús ũre jári, urejamedá. Aru arejamedá ũre:

—Cúináro javvu mure cãreja. Nujacu aru jini bojedajacu mi cuvade. Aru mi íquiyepe jíjacu ina cómaje árojarivure. Que teni cuvacuuyumu mu boje méne cavarõ mearo Jūmenijicui curõi. Aru ñajacu yúque, arejamedá Jesús.

²²Iyede jápiarí, ñai ñmũ cojũbeteni aru urredõ baju chíori nurejameða Jesúre jocarí, dajocaiyũbecu ñi ure cũvede.

²³Que teni Jesús ñi buemarare jári, arejameða náre:

—Ina pœva cũve cũvarivure pare maiyójavũ ne ja aiye Jũmenijicũre, ñi meadaquiyepe aivũ náre aru ne ecorãjiyepe aivũ ñi jaboteinore, cavarõ mearo ñi cũrõre, arejameða náre Jesús.

²⁴Iye ñi coyũiyede jápiaivũ bácavũ ñi buemara, cœcumarejaimaða. Aru Jesús arejameða náre cojedeca:

—iMũja, ji umara, pare maiyójavũ cũve cũvarivure ecoiyurivure Jũmenijicũ jaboteinore! ²⁵Cũinácũ ãimacũ uracũ, camello ãmicũcũ, ñi ecoru aviyo cobei, maiyójajebu ũre. Aru pũeno maiyójavũ cũve cũvacũre ñi ecoquino Jũmenijicũ jaboteinore, arejameða Jesús.

²⁶Urarõreca cœcumavũ, arejaimaða ũre:

—¿Ñame buojarí ecorãjidica Jũmenijicũ jaboteinore, cũvarãjivũ jãravũ cũiméjãravũ baquinõre? arejaimaða na.

²⁷Jesúcapũravũ náre jári, arejameða:

—Pœva ne ðarí majibeno maiyójabevũ Jũmenijicũre. ũ cũinácũra buojarí meadayube pœvare, arejameða Jesús.

²⁸Aru Pedro arejameða ũre:

—Dajocacará ñũja caiye ñũje cũvaede, ñũje daiye boje máque, arejameða Pedro.

²⁹⁻³⁰Jesús arejameða:

—Jãve coyũyubu mũjare: Ácũ pœcũ ðajocayũ baru ñi cũramine, o jĩburãre, ñmarare, jĩpacore, jĩpacũre, mamarare, o ñi joborõre máre, ñi daiye boje yáque, aru Jũmenijicũ yávaiye méne coyũiyebõ boje máre, eacũyũme pũeno baju caride ijãravũ cũramiare, aru jĩburãre, ñmarare, jĩbũcũrõmivare, mamarare, aru ñi joborõre máre ajevũ ñãjine ðaivũreca ũre, ðaquijãravũ baquinói cũvacũyũme jãravũ cũiméjãravũ baquinõre. ³¹Dinũmũre ajevũ jaboteivũ bácavũ ijãravũre, jabotebenajarama na Jũmenijicũ jabotequiye. Aru ajevũ jabotebevũ bácavũ ijãravũre,

jabotenajarama na Jũmenijicũ jabotequiye, náre arí buedejameða Jesús.

Jesús ñi coyũino bedióva cojedeca ñi yaiquĩnore

(Mt 20.17-19; Lc 18.31-34)

³²Mái nũre nuivũ barejãimaða Jerusalén ãmicũriĩmaro. Jesús nurejameða ne jipocai. ũi buemara cœcumarejaimaða. Aru ajevũ máre, náre cujuivũ, jidurejaimaða. Cojedeca Jesús nũvarejameða ina doce paivũre ajevũre jocarí. Aru coyurí búrejameða náre pœva ne ðarãjiye ére. ³³Coyurí arejameða yópe:

—Jerusaléi nuivũbu. Nore curí, yũre, Jũmenijicũ daroimũ mácũre ũmũre, ji maucũ jẽni jíquijibi sacerdotevare jaboteipœvare aru Jũmenijicũ yávaiye báquede bueipœvare máre. Ina pœva arãjivũbu: “iBoarí jarũvarãrã ũre! iYaijãcũrĩ!” Que arí, jĩnajivũbu yũre ina judíova ãnevũre. ³⁴Que teni ina pœva yũrinajivũbu yũre. Jœcututurajivũbu yũre. Jara popenajivũbu yũre. Aru boarí jarũvarãjivũbu yũre. ũbenita yóbecurijãravũ yóboi, jĩpacũ, Jũmenijicũ, nacovacũyũme yũre yainore jarũvarí, arejameða Jesús.

Santiago aru Juan ne jẽniaino Jesúre

(Mt 20.20-28, 23.11; Mr 9.35; Lc 12.50, 22.25-27; Jn 13.12-15)

³⁵Santiago aru Juan máre, Zebedeo mára eare nurejaimaða Jesús yebai. Aru arejaimaða ũre:

—Mũ, bueipœcũ, ðajacũ ñũje urõre, ñũje jẽniarãjiye ñmũre, arejaimaða na.

³⁶Jesús jẽniari járejameða náre:

—¿Yéde ðacaji mũjare? arejameða ñi.

³⁷Aru arejaimaða ũre:

—Dobaicõjejacũ ñũjare mi yebai, cũinácũ meapũravũ aru ajevũ cãcopũravũ, mi jabotequinũmũ maquinõre, arejaimaða na.

³⁸ũbenita Jesúcapũravũ arejameða náre:

—Mũje jẽniayede coreóvabevũbu mũja. Dobaiyurivũ baru yáque ji

jabotequinumu maquinóre, mamarumu ñájiye javvu mujare yáque. ¿Ũcuri buojarājídica mija ji ũcuinore? ¿Aru jáđovari buojarājídica mija yópe ji jáđovainope Jūmenijicuque? arejameđa náre Jesús.

³⁹Na ja arejaimađa úre:

—Buojaivubu ñija, arejaimađa.

Aru Jesús arejameđa náre:

—Ji ũcuinore ũcurajivubu mija.

Que teni ji ñájiyepedeca ñájinajivubu mija. Aru ji Jūmenijicuque

jáđovaiyepedeca jáđovarajivubu mija.

Que teni ji đaiyepedeca đarājivubu

mija Jūmenijicui uróre. ⁴⁰Ūbenita

yávacari beobevu náre, dobarājivure

ji meapūravui aru ji cācopūravui máre.

Quénora dobarājarama nore ina jipacui beoimara mácavu, javeta ũi meadaimara mácavu, arejameđa Jesús.

⁴¹No yóboi, jápiarejaimađa ne borore arevu caipucapuvape paivu Jesúi bueimara. Que baru jararejaimađa inare, Santiagore aru Jūare máre. ⁴²Dinumu Jesús órejarameđa ũi bueimare ũi yebai. Aru arejameđa náre:

—Mija majivu ina jaboteivure judíova ámevure ne đaiyede. Paruéque cōjeivubu ina ne jaborócavure, ne đacarājiyepe aivu náre ne urópe.

⁴³Ūbenita nápe đabejarā mija. Ñai mujacacu parucu baiyucu baru, memecajacurī mujare. ⁴⁴Aru nopedeca ñai mujacacu jabocu baiyucu baru, yebacatejacurī caivure. ⁴⁵Nopedeca Jūmenijicui daroimu mácu ũmure, yu, dabedejacacu, pōeva ne memecarājiyepe ayu yure. Quénora darejacacu yu, memecacuyu arevure aru boarí jaruvaicōjecuyu ji bajure, meadacuyu obedivu pōevare, ji yaiquíyede náre boje, arejameđa Jesús.

Jesús ũi meadaino Bartimeore, jári eabecure

(Mt 20.29-34; Lc 18.35-43)

⁴⁶Jerico ámicurīmaroi earejaimađa na Jesújā. Nore curíduivu bācavu nurejaimađa na cojedeca. Jesús ũi bueimaraque, obedivu pōeva máre

yóvarí nurejaimađa. Ne nūimai, no ma écarui, Bartimeo, Timeoi mácu, dobarejameđa. Jári eabecu barejameđa.

Que baru tāturare jēniavarejameđa.

⁴⁷Aru pōeva “Jesús Nazarecacube ũ”, aivure jápiayu, codoborejameđa Bartimeo:

—Mu, Jesús, David bācui pāramecu, Jūmenijicui daroimu mácu, ñije jabocu bacuyú, yure cōmaje āroje jájacu mu, arejameđa ũ.

⁴⁸—Bi ajacu mu, arídurejaimađa Jesújāque nuivu.

Ūbenita pueno baju

codoborejameđa ũ cojedeca:

—Mu, David bācui pāramecu, Jūmenijicui daroimu mácu, ñije jabocu bacuyú, yure cōmaje āroje jájacu mu, arejameđa ũ.

⁴⁹Que teni úre codoboyure jápiayu Jesús, dajocarejameđa. Aru úque nuivure cutuicōjenejameđa.

—“Dajacurī”, aibi mure Jesús.

Torojujacu mu, arejaimađa Bartimeore.

⁵⁰Aru cūiná nacajari, ũi puenocajede quédata durí jaruvarí, Jesús yebai earejameđa ũ.

⁵¹—¿Aipe đacaji yu mure? jēniari járejameđa úre Jesús.

—Mu, bueipōecu, jári eabevu yu. Ūraró jáiyuvu yu, arejameđa Jesúre.

⁵²—Dinumu meavu. Ména nujacu. “Yure meadacuyume Jesús”, arí dāpiarebu mu. Que baru mi jári eabede meadacaiyu yu caride, arejameđa úre Jesús.

Aru cūiná járejameđa ũ, jári eabecu bācu. Que teni Jesúre yóvarí nurejameđa ũ máre, Bartimeo.

Jesús Jerusaléi ũi ecoino

(Mt 21.1-11; Lc 19.28-40; Jn 12.12-19)

11 ¹Jerusalén ámicurīmaro joabejinoi nuri, Betfajé aru Betania ámicurīmajinoa baji, no cāracū Olivocū ámicuricū émeino baji, earejaimađa na, Jesús ũi bueimaraque. Nore earí ũi bueimaracavu pucarāre jarorejameđa Jesús.

²Náre yópe arí:

—No cōchinosi cūriimajinosi
 m̄jara m̄ja. Ma ēmeinosi p̄evare
 ūmaiāimacure, burrore, earājaramu
 m̄ja, nócacu ūi buoimure. P̄eva
 ne tubabemutame cāreja. Ūbenita ūi
 buoimene jōdeni, ūre davacajarā yure.
³Aru, “¿Aipe teni burrore ūi buoimene
 jōdeni, ūre nuvaivurū m̄ja?” ne aruta,
 yópe ajarā: “Ñujare ícōjensi darobi maje
 jabocu. Ūre ūmacayu āimacu jaubi ū.
 Carijieneca m̄jare jacopaiyovacuyume
 cojedeca”. Nópe ajarā, arejameđa Jesús.

⁴Na ja arī ícarānurejameđa. Nuri,
 burrore earejameđa na. Cūrami
 jedevai, ma ēcarui, buoimu núrejameđa
 ū, tubamu. Aru ūi buoimene
 jōdenidurejameđa na. Dinumuma ina
 burro yebai núriva arejameđa:

⁵—¿Aipe teni jōdevurū m̄ja ūi
 buoimene? arejameđa tubamure
 ícaivure Jesús.

⁶Jesús ūi aipe báquepedeca náre, nore
 núrivure coyurejameđa tubamure ív̄.

⁷Coyurī buojarī, nuvaicōjenejameđa
 náre nócavu. Nuvari Jesúsre burrore
 nuvacarejameđa ina p̄carā. Ne
 doicajea, ne p̄enocacajeare tubamura
 tuorī, Jesúsí tubaquinore ðarejameđa ūi
 bueimara. Aru burrore tubarejameđa
 Jesús. ⁸Dinumuma ne p̄enocacajeare
 jūarejameđa ina obediv̄ p̄eva
 mára. Aru apevu jocucu cavabua yoca
 curicavabua burarī, jūarejameđa
 mára, Jesúsre meadaiyuriv̄ ne p̄uedarī
 jacyurājiiyep̄e aivu.

⁹Ūre jipocateiv̄ aru ūi yóbocavu
 máre coðoboborejameđa na:

—Jūmenijicure torojue bajadéni.
 Jūmenijicu mearo ðacaimume ū,
 Jūmenijicui daroimu mácu. ¹⁰Majeñecu
 mácu, David bácu jaboteino
 mácarōpedeca, cari jabotecuyume.
 Ūi jabotequino meaqiiyebu. Cari
 jabocu bacuyáre ména borotenajarevu.
 Jūmenijicure torojue bajadéni,
 coðoborī arejameđa na.

¹¹Aru Jesús Jerusalén āmicurīimaro
 earī, Jūmenijicui cūrami nurejameđa.
 Nore earī, ecorejameđa Jesús. Nore
 cocorī járidurejameđa Jesús. Ūbenita

nainúta marejávūya. Que baru ūi
 bueimara doce paivaque Betania
 āmicurīimajinosi nurejameđa Jesús.

**Jesús ūi āmecoroino higueraçu jēidua
 cubecure**
(Mt 21.18-19)

¹²Cōmiājāravu javejīnara, Jesúsja
 ne etaiyede Betania āmicurīimajinore
 jocarī, āvué ijidejavūya Jesúsre.

¹³Járejameđa joai cūinācu jocucu
 higueraçure yoca curicure. Que baru
 jēiduaare vocunuridurejameđa dicu yebai.
 Ūbenita nore earī, yoca matuiyeda
 járejameđa. Jēidua cubedejavūya, jēidua
 higo āmicuridua jēijāravu eabe boje.

¹⁴Aru arejameđa dicure:

—Cainumua āmejarari p̄eva mi
 jēiduaare cojedeca, arejameđa Jesús.

Aru nópe ūi aiyede jápiarejameđa ina
 ūi bueimara.

**Jesús ūi meadaino Jūmenijicui
 cūramine**

(Mt 21.12-17; Lc 19.45-48, Jn 2.13-22)

¹⁵Bediōva Jerusalén āmicurīimaro
 earejameđa na Jesúsja, Betania āmicurōi
 nuiv̄u bácvu. Earī, Jūmenijicui cūrami
 nuri, diñami tāibui ecorejameđa Jesús.
 Nore diñami curiv̄u bojeaip̄evare
 jaruvarī jarorejameđa Jesús. Tāutura
 oatuvaipeva ne jáðovaiare moari
 najuárejameđa ū. Aru jurevare
 bojeaip̄eva ne dobarōare máre
 moari najuárejameđa. ¹⁶Diñami tāibui
 nuvari jatajuroriv̄ure ye apejēe paiyede
 nuvaicōjemenejameđa Jesús. ¹⁷Náre
 bueyu, yópe arejameđa ū:

—Yópe arī, toivaicōjenejaquemavu
 Jūmenijicu ūi yávaiyede: “Ji
 cūrami caiv̄u p̄eva ne yure,
 Jūmenijicure, coyuiñamimu”, arī
 toivaicōjenejaquemavu. Ūbenita
 diñamine tatorī ív̄u ne dupiñamipe
 ðaquemavu m̄ja, m̄je p̄eno urarō
 tāutura íye boje p̄evare jocarī, ne
 bojeaiyede m̄je cūvaede, arejameđa
 náre Jesús.

¹⁸Sacerdotevare jaboteip̄eva aru ina
 Jūmenijicui yávaiye báquede bueip̄eva

diede, Jesús ùi ðaiye báquede, jápiarí, úre boarí jaruvaiyurídurejaimada na. Ùbenita ina pðevacapúravu Jesús ùi bueiye ðaiyarí, urarò dápíarejaimada na. Que baru jidurí, úre ne boarí jaruvarájíyede borotodejaimada ina sacerdotevare jaboteipðeva ina Jümenijicui yávaiye báquede bueiðevaque. ¹⁹ Aru nainíburu yóboi diimarore jocarí, nurejaimada Jesújã.

Higueracu yaicu

(Mt 6.14-15, 17.20, 21.20-22; 1 Co 13.2)

²⁰ Cõmiájãravu javejínara vainánuivu dicu higueracu yebai járejaimada. Aru caicu dicu aru caiye nuò máre yaidéjavãya. ²¹ Dinũmũma Pedro, Jesús ùi yávaino mácarõre dicure aruri, arejameda úre: —iMũ, bueiðecu, jájacu! Dicu, mi ênoare âmecorovaricu, yaidébu, arejameda Jesúre.

²² Aru Jesús arejameda náre: —Ju ajarã muja Jümenijicure, ùi cadatequiyere aivu mujare. ²³ Jáve coyũyũbu mujare: Ácu pðecu icũ cüracũre ùi aru yópe: “Nujacũ yore jocarí pũ jia uradaita, cocunujacũ”, nópe ðaquiyebu dicũ. Ácu pðecu ùi me ju aru Jümenijicure aru “Jümenijicu iye ðaiyede majibebi”, arí dápíabedu, caiye ùi cüracũre cõjeiyere tequiyebu. ²⁴ Que baru coyũyũbu mujare: Caiye iye muje Jümenijicure jëniayede, dápíajarã yópe: “Jãve Jümenijicu jícuyũme yure”, arí dápíajarã muja. Yópe dápíaru, Jümenijicu jícuyũme mujare muje uede. ²⁵ Aru cainũmũ muje jëniayede majepacuque, jaraivũ baru o chíoiũ baru apesu ùi âmeina teiyede, ârumetejarã diede. Cãrijimene ðajarã úque, majepacu cavarõ mearocacu ùi ârumetequiyere aivu muje âmeina teiyede máre. ²⁶ Ùbenita apesu ùi âmeina teiyede mujaque ârũru, majepacu cavarõ mearocacu ârumetebecube muje âmeina teiyede máre, náre arí buedejaimada Jesús.

Jesús ùi parué

(Mt 21.23-27; Lc 20.1-8)

²⁷ Bediõva cojedeca earejaimada Jerusalén âmiciĩmaroi. Nore

Jümenijicui cürami táibui cuyũ barejameda Jesús. Sacerdotevare jaboteipðeva, aru Jümenijicui yávaiye báquede bueiðeva, aru judiõva bucũva máre nurejaimada ùi yebai. ²⁸ Jëniari járejaimada úre:

—¿Ye paruéque ðayurũ mu iye mi ðaiyede? ¿Ñame jídi mure iye paruéde mi nópe ðaiyede? arejaimada Jesúre.

²⁹ Jesús arejameda náre:

—Yu máre jëniari jáquijivũ mujare cüináro jëniari jáinore. Coyũjarã yure. Yure muje coyũyede, yu máre coyũquijivũ mujare ji paruéque ji ðaiyede. ³⁰ ¿Juan Bautista bácu jáðovarejaquemari pðevare Jümenijicu ùi paruéque o pðeva ne paruéque? Coyũjarã yure, arejameda náre Jesús.

³¹ Ùi que aiyede, borotodejaimada ne bajumia yópe:

—Maje aru “Jümenijicuque”, ù aquijibi “¿Aipe teni ju abetecarãrũ úre?”

³² Ùbenita “pðevaque” aye jaubevũ majare, ne bajumia arejaimada.

Caiũ ina obedivũ pðeva coreðvarejaimada Juan Bautista bácu Jümenijicui yávaiyede coyũcaipðecu bajure. Que baru ina jabova jidurejaimada náre. ³³ Arejaimada Jesúre:

—Majibevũ ñuja, arejaimada.

Dinũmũre Jesús arejameda náre:

—Yu máre coyũbevũ mujare ñamei paruéque ji ðaiyede, arejameda Jesús.

“Âmena memecaipðevare” jári dápíari ne ðarãjiyere aino

(Mt 21.33-46; Lc 20.9-19)

12 ¹ Dinũmũre Jesús coyurí búrejameda náre jári dápíari ne ðarãjiyere ainoque, yópe arí:

—Cüinácu ùmũ doaicõjequemavũ jiore úyaimuque. Doarí bũojarí, ðaicõjequemavũ biãidore jio turãvai. Aru úicõjequemavũ cobede úyai pipocobede. Aru ðaicõjequemavũ ùmujuriñami cüramine, jiore coreipðecu ùi jáquiñamine máre. Caiye iyede meadãri bũojarí, vorí earí jiore memeiðevare, epequemavũ náre

ne memecarājīyēpe ayu ére. Ina memecairpōeva īnajivū batequémavū apeboa úyaiboare, ne memēiye boje. Aru nuquemavū ñai ūmū apeno joborōi. ²Úyai jējījāravū yóboi, ñai ūmū jarorīduquemavū cūinácū ūi yebacacūre memecairpōeva yebai, ūi īquiyēpe ayu apeboa úyaiboare, ñai jabocu jiede. ³Ūbenita ñai yebacacū ūi eaiyede nore, ina memecairpōeva ére jēni, pare boarí, copaide ñaquemavū ére quédāta. ⁴Cojedeca ñai ūmū, jio upacu, jarorīduquemavū apesu ūi yebacacūre memecairpōeva yebai. Ūbenita churiá ñaquemavū ére ūi jipobui. Aru cūyojarō ñaquemavū ére máre. ⁵Cojedeca ñai ūmū, jio upacu, jarorīduquemavū apesu ūi yebacacūre nore, memecairpōeva yebai. Ūbenita boarí jarūvaquemavū ére. Apevūre jio upacu ūi jaroimarare máre boaquémavū. Aru apevūre boarí jarūvaquemavū na.

⁶No yóboi, mautequemavū ñai jio upacūre cūinácū ūi mácu cūinácūva, pare ūi ūmū. Quénora jarorīduquemavū mamacūre. “Ére jáivū, pueðarājichuma” ayu, que dápiacquemavū ū. ⁷Ūbenita ina memecairpōeva jáivū ñai jio upacūi mácu, aquemavū ne bajumia, “Ñai ñūje jabocu bacūyūme. Jīpacū ūi yainíburu yóboi, cūvacūyūme caiye ūi cūvaede. Járica, boarí jarūvarājarevū ére, maja cūvaburí caiye ūi cūvaede”. ⁸Que arí, ére jēni, boarí jarūvaquemavū. Aru ūi baju bácarōre jaetovaquemavū jiore jocarí, arejameða Jesús.

⁹Na ūi coyūiyede jápiaivūre jēniari járejameða Jesús:
—¿Aipe ñaquidi ñai jio upacu náre? Ū boarí jarūvacūnūcūyūme ina memecairpōevare. Aru apesu yūme apēvū memecairpōevare noi, ūi jioi. ¹⁰¿Jári borotēbenarū mūja iye Jūmenijicūi yáviaye ūi toivaicōjeiye báquede? Yópe toivarejaquemavū yurā, Cristo ji borore:

Iva cūravare cūramine ñaipōeva ūbeni jarūvaquemavū. Caride iva cūrava caiva apeva pueno parūrivabu. ¹¹Nópe ñaino mácarōre ñaquemavū Jūmenijicū.

Que baru pare mearotamu majare, maje dápiaru, arí toivarejaquemavū, arejameða Jesús.

Yópe aiyurōtamu no: Pōeva “Ámecūbe ū”, arīdurājarama Jesúi borore. Ūbenita meacu bajube ū, Jesús, caivū apēvū pueno.

¹²Que aiyede, Jesúre jēni, nuvaiyurīdurejaimaða, ūi coyūiye boje nára no jári dápiarí ne ñarājīyēpe ainore. Ūbenita jidurejaimaða ina obedivū pōevare. Que baru ére ñajocarí etarí nurejaimaða.

Jesús ūi coyūino jabovare bojedainore

(Mt 22.15-22; Lc 20.20-26)

¹³Fariseova aru Herodecavū jarorejaimaða nácvare Jesús yebai, ére jūjovarí, jacotujurovūre. ¹⁴Ūi yebai earí, ére yópe arejaimaða na, madaaiyurivū:

—Mū, bueipōecu, mure coreóvaivūbu ñūja. Nurié yávaivū mū. Caivūre cūinácūmūara yávaivū mū. Coyūbevū mū pōevare yópe ne ñaiyēpe. Quénora jidūbecūva coyūivū mū náre yópe ne dápiayēpe. Jáveneca bueivū mū pōevare, ne ñarājīyēpe ayu mearore yópe Jūmenijicūi ñaicōjeiyepe. ¿Maje jabocu César ūi ícōjejūroede, ūi jaboteiye boje, maje bojedaru, mearica die? ¿O bojedabejeba maja? ¿Bojedaje bárica maja? ¿O bojedaicōjeino āmeni? arejaimaða Jesúre ina fariseova aru ina Herodecavū.

¹⁵Ūbenita ne jūjovajuroede majicū, náre yópe arejameða Jesús:

—¿Aipe teni yūre jūjovaiyurīdurí vainí tuiyurārū mūja? Yūre tauturaturava, ji jáquituravare, davajacurí mūjacacu, arejameða náre Jesús.

¹⁶Ére tauturaturavare nuvarejameða nácacū. Ére nuvari jíyede, arejameða Jesús:

—¿Ñamema ñai, dituravare jēñū? ¿Aru ñamei āmiá curituravaba diturava? arejameða náre Jesús.

Ére arejaimaða:

—Ñai jabocũ Césai decocũ aru ñi ãmiá máre curituravatamu, arejaimada.

¹⁷Que aivure arejamedã Jesús:

—César jiede ére jacopaiyovajarã muja. Jíjarã ére táutura yópe ñi bojedaicõjeiyepe mujare. Aru Jümenijicu jiede ére jacopaiyovajarã muja. ðajarã yópe ñi urõpe, arejamedã náre, jëniari járadaivure, Jesús.

Aru jujovaiyurõduivu bácvũ Jesúre ñi que aiyede, urarõ dápiarejaimada ina fariseova aru ina Herodecavu máre.

Saduceova ne jëniari jáino Jesúre yainore jaruvãri nacajainore

(Mt 22.23-33; Lc 20.27-40; Hch 23.8)

¹⁸Apevũ saduceova nãrejaimada Jesús yebai. Saduceo ãmicurijajubobu judíovacavu ne yajubo cüináyajubo. Caivũ saduceova “Yainore jaruvãri nacajaiye cubevũ”, adama na. Jesúre jëniari járejaimada ina saduceova yópe:

¹⁹—Мъ, bueipõescu, Jümenijicui ðaicõjeiyede Moisés bácvũ toivarejaquemavu yópe: Cüinácvũ némamicu yaidú, jímarepacore jocarí jueðocuvabecova, yaiyú bácvũ yõcure purubuoioye javvũ óque, jueðocuvacuvũ. Aru ina jueðova bárãjivũ yaiyú bácvũ ãmiáre cüvarãjarama na. Que arí, toivarejaquemavu Moisés bácvũ.

²⁰Javede cãtequemavu siete paivũ ñmũva. Cüinácvũ ñmũ mára matequémavu na. Némamicu purubuoquemavu. No yóboi, yaiquémavu ñ mácvũ, jueðocuvabescvã. ²¹⁻²²Que baru apescvũ, ñ mácvã cutuyvũ, purubuoquemavu jíbcvũ bácvũ márepacoque. Aru jíbcvũ bácvũpedeca, yaiquémavu ñ mácvũ máre, jueðocuvabescvã. Aru apescvũ, ñ mácvã cutuyvũ máre, popedeca, aru caivũ ina siete paivũ bácvũ óque purubuoõí, yaiquémavu, jueðocuvabevvã. Caivũ ne yóboi, ico nomió máco máre yaiquémavu. ²³¿Yainore jaruvãri nacajaijãravũ baquinóre, ñamei márepaco bacodóba ico? Jãravũ caivũ ina siete paivũ cüvatequemavu óre, arejaimada na Jesúre.

²⁴Aru Jesús arejamedã ina saduceovare:

—Mamateivubu muja muje majibe boje Jümenijicui yávaiyede. Aru Jümenijicui paruéde máre majibevvubu muja. ²⁵Yainore jaruvãri nacajaijãravũ baquinóre purubuoenajarama. Aru jíbenajarama némaromivare, ne purubuoõãjiyepe aivvũ. Quénora ángelevã, ina purubuobevũ, cavarõ mearo Jümenijicui curõcavure paivũ barãjãrama ina yainore jaruvãri nacajarajivũ. ²⁶¿Iye yainore jaruvãri nacajaiyede, jápiarí eabenaru muja iye Jümenijicui coyuiye báquede Moisés bácvũ ñi toivaiye báquede, jocvãjicvũ uruijicure coyurí? “Yátamu Jümenijicvũ. Abraham, Isaac, aru Jacob ne mearore jímvũ yvũ”, arejaquemavu Jümenijicvũ Moisés bácvure. ²⁷Que arí, yaiyvũ bácvũ ne mearore jímvũ ñmemei Jümenijicvũ. Quénora apurivvũ ne mearore jímvũtame ñ. Que baru ina majeñecvã apurivvubu. Que baru pare mamateivubu muja, arejamedã náre Jesús.

ðaicõjeiye parué caiye püeno

(Mt 22.34-40; Lc 10.25-28)

²⁸Cüinácvũ Jümenijicui yávaiye báquede bueipõescu Jesús yebai earí, jápiarejamedã Jesús apenvuque ne copvũ boroteiyede. Jesús náre ñi copvũ aiyede cojurejavvãya ére. Dinumvũma Jesúre yópe jëniari járejamedã Jümenijicui yávaiye báquede bueipõescu:

—¿Ároma majare Jümenijicui ðaicõjeino mácarõ püeno parurõ cõjeino? arejamedã.

²⁹Aru Jesús ju arejamedã ére:

—Püeno parurõ ðaicõjeinotamu yo: “Jápiarã muja, Israecavvũ. Maje jabocvũ Jümenijicvũ cüinácvũratame. ³⁰¿Javvũ mi jabocvũ Jümenijicvure caino mi ñmedvũque, caino mi ñmeque, caino mi majiéque, aru caino mi baju paruéque máre”. ³¹Aru no yóbo cãchijino parurõ ðaicõjeino yópe ainomu: “Mi bajure mi jescvũpedeca jescvũjavvũ mícvure máre”. Iye ðaicõjeiye bu püeno parué. Apeno ðaicõjeino püeno parurõ cubevvũ, arejamedã Jesús.

³² Arejamedá Jesúre:

—Mu, bueipõecu, jãvetamu. Mu jãve arĩ coyũvũ mu. Jũmenijicu cũinãcurabe ã. Apesu cubebi. ³³ Maje ãimacu caicure toaque juarĩ, Jũmenijicure jíye o maje ape paiyede Jũmenijicure jíye meavũ. Ëbenita Jũmenijicure caiye maje ãmedũque, caiye maje majiéque, aru caiye maje paruéque máre jecué aru majecure maje bajure jecurõpe máre jecué, pũeno mearotamu, arejamedá Jesúre ã.

³⁴ Jesús ãi jãpaiyede mearo ãi ju aiyede, yõpe arejamedá:

—Quĩjino baju jaũrdurebu mi eaquino Jũmenijicui jaboteinore, arejamedá Jesús.

Que arĩburu jidurĩ, Jesúre ye jẽniari jãmenejaimada na caivũ.

**Cristo ñai jabocu David bácu
pãramecu**

(Mt 22.41-46; Lc 20.41-44)

³⁵ Jesús buede curejamedá Jũmenijicui cũrami. Aru arejamedá:

—¿Aipe teni “Cristobe David bácu pãramecu”, aivũba Jũmenijicui yãvaiye báquede bueipõeva? ³⁶ David bácuvacari Espiritu Santoi paruéque coyũicõjeimũ arejaquemavũ ã mácu:

Jũmenijicu aquemavũ ji jabocure, “Dobajacu ji meapũravũ, mi cãvae boje paruéde yũpedeca. Aru yũ epecuyũtu mi mauvare mi cuboba cãchinoi. Que teni mũre vainĩ jarũvare ñacuyũtu yũ náre, mi jabotequiyere ayũ náre”, arejaquemavũ David bácu Cristorã.

³⁷ “David bácuvacari Cristoi borore “Ërecabe ji jabocu”, arejaquemavũ. Que baru, ¿aipe teni David bácu pãramecuba ã? arejamedá Jesús.

Aru caivũ ina obedivũ põeva torojurĩ jãpiarejaimada Jesúre.

**Jesús ãi boro coyũrĩ adaino
Jũmenijicui yãvaiye báquede
bueipõevare**

(Mt 23.1-36; Lc 11.37-54, 20.45-47)

³⁸ Jesús bueyũ bácu arejamedá:

—Me ñarã ina Jũmenijicui yãvaiye báquede bueipõevare. Nãmu cuiyũrivũ cuitótecajea ãmũjuricajeaque. Aru ãma na põeva pueðarĩ ne jacoyũinore náre tãibũ. ³⁹ Judíovai cójjiñãmiamare ne dobae méne ãma na, põeva ne jãrajyeyepẽ aivũ náre. Aru torojuve teinore, cuiyũma na ñai torojave teino upacu yebai. ⁴⁰ Ëbenita jujovarĩ ñavaðama ina nomiõpevare ne apejĩene. Aru jẽniadama joe urarõ Jũmenijicuque, põeva ne ñapiarãjyeyepẽ aivũ Jũmenijicui yãvaiye báquede bueipõeva me Jũmenijicure ju aivũpe. Caiye iyede ne ñaiye boje, pũeno urarõ ñãjinajarama na, ne ñameina teiye boje, arejamedá Jesús.

**Nomiõpeco cãve cãvabeco õi tãtura
jino Jũmenijicure**

(Lc 21.1-4)

⁴¹ Nore, Jũmenijicui cũrami, Jesús dobarejamedá joabejĩnoi cũinãtõcu põeva ne Jũmenijicure tãtura jíye epeitõcu yebai. Ditõcu cãrejavũya ãi jipocai. Noi dobarĩ, põeva obedivũ ne ãre tãturare ditõcui jĩni tuoivũre jãñũ marejãmedá Jesús. Aru obedivũ cãve cãvarivũ tuorejaimada ãre tãturare. ⁴² Que teiyede cũinãco nomiõpeco, cãve cãvabeco, ditõcu yebai earĩ, tuorejacoda pũcaturava tãturatoravare, me bojecubeturavare. ⁴³ Õi que ñaiyede jãñũ Jesús, õrejarejamedá ãi bueimarare ãi yebai. Aru arejamedá náre:

—Jãve coyũyũbu mũjare: Ico nomiõpeco cãve cãvabeco, Jũmenijicure jĩbico apẽvũ ne jíye pũeno baju, õi jíye boje õi cãvarõ cainore. Ëbenita nãcapũravũ quãnora quĩjino ne cãvarõcarõre jíyama. ⁴⁴ Caivũ ina põeva ne urarõ cãvaecarõre jíyama Jũmenijicure náre jaubede. Ëbenita ico nomiõ õi quĩjino cãvarijĩno mácarõre cainore jĩbico Jũmenijicure. Caiye õi ijãravũ cãvajuroede jĩbico õ Jũmenijicure, arejamedá náre Jesús.

**Jesús ãi coyũino “Jũmenijicui cũrami
tuquiyebu” arĩ**

(Mt 24.1-2; Lc 21.5-6)

13 ¹ No yõboi Jesús etayũ bácu Jũmenijicui cũramine jocarĩ, cũinãcu ãi bueimaracacu arejamedá ãre:

—Mñ, bueipõescu, jájacu. iPare meavabu iva cõrava! iAru pare meadãmiamu iñamia cõramia! arejamedã Jesúre.

²Ëi que aiyede, Jesús arejamedã ùre:

—¿Jáñuru mu iñamia uradãmia cõramiare? Cũináva cõrava mautebequiyebu apeva pñenora. Caiye iva cõravare najuarajarama. Que teni cõiquiyebu, arejamedã Jesús.

Jáðovaiye járavu cõiquíye jipocai

(Mt 10.17-20, 22, 24.3-28; Lc 12.11-12, 17.22-24, 31, 21.7-24; Ap 7.14)

³Jesús dobarejamedã cõracũ Olivocũ ãmicuricũ pñenoi, Jũmenijicũ cõrami ãi jipocai jáñu mácu. Ëi dobaede noi Pedro, Santiago, Juan, aru Andrés máre jñeniari járejaimada ùre yavenina, põevare jocarí:

⁴—Coyujacu ñujare: ¿Aipiyede tuquidi caiye iye cõramia uradãmia? ¿Aipe ðarí coreóvarãjídica ñuja caiye iye buojaquiyede? arejaimada na.

⁵Aru Jesús arí búrejamedã náre:

—Me jájara apesu jujovaiyucure mujare. ⁶Darãjarama obedivu ãmũva. Aru arãjarama “Cristobu yũ”. Jujovarãjarama obedivu põevare.

⁷Muje jápaiyede boaino borore aru boaquíno borore máre, jidubejarã. Caiye iye vaiquiyebu járavu cõiquíye jipocai. Ëbenita cõimébu cãreja. ⁸Cũináyajubo põeyajubocavu ãdamatenajarama apeyajubo põeyajubocavunque. Aru cõináro jaboteinocavu ãdamatenajarama apeno jaboteinocavunque. Joborõ cõjiquiyebu obedicũrõare. Ñãjinajarama ãvuéna. Iye ñájiye baquiyébu yópe jueðocu põeteyure ñájiyepere. Yópe búquiyebu caiye iye ãmeina ñãjinajiye.

⁹Ëbenita mujacarpũravu me jári me ðajarã. Mujare jñeni jínajarama ne jabovare. Mujare jara popenajarama judíovai cójijíñamiai. Aru muja núrajaramu cójeipõeva ne jipocai aru jabova ne jipocai máre, yure muje ju aye boje, coyurãjivu ji borore. ¹⁰Mamarũmũre yávaie méne Jũmenijicũ jaboteinora coyuiye jauvu,

cainoa joborõacavu ne jápiarãjiyepere aivu diede. ¹¹Ne jñeni nũvaiyede mujare jabova ne ãmeina teivure jñeniari jáñiami, “¿Aipe arí coyurãjidi náre?” arí, cãrijimejara muja. Ëbenita coyujarã muja yópe ñai Espiritu Santo ãi dãpiare ðaquiyepe dinũmu maquinóre. ¹²Que teni ãmu jñeni jícũyũme jíbucure o ãmacure máre, jabova ne boarí jaruvãrãjiyepere ayũ ùre. Nopedeca jípacu jñeni jícũyũme mamacure. Aru nopedeca némcure ju abeni jñeni jínajarama, boarí jaruvãicõjenajivu náre. ¹³Caivu mujare muje yure ju aye boje jorojini járajarama. Ëbenita ñai ju ayũ yure pu ãi yainũmũita, ã macũyũme ji meadaimu, arejamedã Jesús.

¹⁴Aru Jesús buedejamedã náre, ãi bueimarare, cojedeca:

—Ñai ãmu pare ãmescu nũcũyũme nore, Jũmenijicũ cuicõjemenore ùre. Caivu iye toivaiyede jári boroteivu me dãpiajarãri caiye iyede. Ñai ãmũre járajaramu muja. Judeacavu dupini ñujarari cõracũai. ¹⁵Ñai cõrami pñenora cõcũyũ, ãi dupini ñuiyede, ãmeni darí, nũvariducũyũ ãi apejñene, ecobejacurí ãi cõrami. ¹⁶Aru ñai jiore memescũyũ, ãi dupini ñuiyede, copainũmejacurí ñiducũyũ ãi cuitótecaje pñenocacajede. ¹⁷iCõmaje ãrojarajarama ina nomiva micava bárãjivu dijãravua baquiyéde! iAru ina nomiva némajina nuri dajocabevure cõvarãjivu máre pare ñãjinajarama dijãravua baquiyéde! ¹⁸Jñenijicũque iye vaibéquiyepe aivu ocorũmũre. ¹⁹Dijãravua baquiyéde põeva urarõ ñãjinajarama. Nópe paiye cõbevu cãreja, mamarũmũmata Jũmenijicũ ãi cuedarí buinũmũre, pu caride máre. Aru cainũmũa cõbequiyebu.

²⁰Jũmenijicũ ãi javaiyobedu dijãravua ñãjiovaquijãravua baquiyéde, caivu yaijébu. Meadaimara cõbejebu. Ëbenita Jũmenijicũ javaiyocũyũme dijãravua ñãjiovaquijãravua baquiyéde, ãi beoimara mácavure boje.

²¹'Dijãravua baquiyéde apesu ãi aru mujare yópe, “Jãjara. iÑainecabe

Cristo!” o apesu ñi aru mujare, “iÑñurecabe Cristo!” náre ju abejará.
²²Que teni obedivu borocurivu darí coyurájarama “Cristobu yu”. Aru apenu máre Jūmenijicui yávaiyede coyucaridurájarama. Ubenita Jūmenijicui yávaiyede coyucaipōeva baju āmenajarama na. Urarō jáđovaiye aru pōeva ne đarí majibede máre đarájarama, jujovariduiyu Jūmenijicui beoimara mácavure. ²³Ubenita me jájara muja. Coyuyubu mujare ne borore, muje majinajiyere ayu, ne darájiye jipocai, arejamedá Jesús.

Jūmenijicui daroimu mácu ũmure ñi copaidaquino

(Mt 24.29-36, 42, 44; Lc 12.36-38, 21.25-36; Ap 1.7, 6.12-13)

²⁴Bediōva cojedeca Jesús coyurejamedá náre:

—Cūinájāravu dijāravuacajāravu baquinói, iye urarō nājiniyuru yóboi, avía ñemitecyume. Aru avía ñamicacu máre pēomescyume. ²⁵Na abiacova turájarama cavarōre jocarí. Aru caivu ina paruéque curivu cavarōi cūjinajarama. ²⁶Dinumu maquinóre jārarama yure, Jūmenijicui daroimu mácu ũmure, dayure oopeniboai, urarō paruéque, jáđovañure meacu bajure. ²⁷Que teni ina ángelevare darocuyumu yu. Nápapuravū cōjijovarájarama Jūmenijicui beoimara mácavure, caivu avía dainocavure aru caivu avía doinocavure máre, cainoa joborōacavure.

²⁸Majijará yo muje jáinore. Icu jocsu higuercare yoca yuiyede, majivu muja ujurūmu joabenore. ²⁹Nopedeca jáivu caiye iye teiyede, majinajaramu muja jāravu cūino joabenore. ³⁰Jāve coyuyubu mujare: Apenū ijāravū curivu yaibēdeca cāreja, vaiquiyebu caiye iye yópe ji coyuiyere. ³¹Caino cavarō, aru caino joborō máre cūiquiyebu. Yópe ji yávaiyepedeca jāve vaiquiyebu.

³²Ubenita dijāravu baquinóre aru diora baquinóre ñame majibema. Ángeleva, ina curivu Jūmenijicue

cavarō mearoi, aru yu, Jūmenijicui mácu máre majibevu ñuja. Quénora jipacu majibi dijāravu baquinóre, ji aijāravure. ³³Que baru me jájara muja. Ārūjara. Muja majibevu ji copaidaquijāravure. ³⁴Jēvari coyūquijivu ji copaidaquinore yópe cūinācu ũmu ñi cusūquiyerepe arejoborōi. Ũi etaquiyere jipocai ñi cūramine, memeicōjeimi ñi yebacavure náre coapa. Aru jedevacobede coreipōecure máre coreicōjeimi cāmesava. ³⁵Quēdeca memeni corejarā muja, cāmevva. Muja majibevu cūrami upacu ñi copaidaquinore. Daquijichubi nainure, o ñami coricai, o cāyu ñi órejaiyede, o javejānare. ³⁶Ũi copaidaru maumejena aru mujare cāivure earu, meamejebu mujare. ³⁷Nopedeca ji coyūinore mujare, coyuyubu quēdeca caivure: Cāmevva memeni corejarāri, arí buedejamedá náre Jesús.

Jesús ñi coyūino ne jēnajinore ũre yóbomia

(Mt 26.1-5; Lc 22.1-2; Jn 11.45-53)

14 ¹Pascua āmicurijāravu aru páure bucure đaiye cube āiye torojuve teinumu pucajāravva jipocai barejávūya cāreja. Yavenina Jesúre jujovarí jēni, boarí jaruvaiyurejaimada sacerdotevare jaboteipōeva aru Jūmenijicui yávaiye báquede bueipōeva máre. ²Ne bajumia arejaimada:

—Torojuve teinumu ũre jēmenajarevu maja. Ũre jēnu torojuve teinumu, pōevacapūravu majare jorojīni, majare boarí jaruvaiyūjebu, arejaimada ina judiōvai jabova.

Cūināco nomió ōi mumijne yuaino Jesúre

(Mt 26.6-13; Lc 7.37-38; Jn 12.1-8)

³Jesús ñi cuede Betania āmicuríimajinoi, Simón pojeyu bācui cūrami tuoiva yebai āivu barejāimada na, Jesújā. Que teni cūināco nomió earejacoda Jesús yebai. Ico nomió nuvarejacoda cūinābu ũmujuribu boribu mumijñaricoque. Iye mumijne nardo āmicue pare mearo corajurejavūya. Aru

pare bojecue barejávūya. Ico nomió earí, dibure cobarí yuarejacođa caiye iye mumijuede Jesúí jipoburá. ⁴Ūbenita nore curivū apevū, jorojīni, ne bajumia arejaimada:

⁵—¿Aipe teni iye mumijuede jaruvadoba ō? Diede bojedari, urarō boje ĩni, cūinácu memepōescu cūináuju ũi memeno bojede ĩni, jíye jaujebu ōre cūve cuvabevure, arejaimada na.

Que baru jararejaimada ōre. ⁶Ūbenita Jesús arejameda:

—Yávabejará āmeno ōre. ¿Aipe teni cārijovaivurū ōre? Ōi đaiye yure mearotamu. ⁷Cainumua ina cūve cuvabevū curājarama mujaque. Que baru muja cadateiyurivū cainumua náre buojaivū. Ūbenita yu cubecubu mujaque cainumua. ⁸Ō đacaibico yure ōi oainope. Ō meadacaibico ji bajure, ne yure jaruvarājiye jipocai. ⁹Que baru jāve coyuyūbu mujare: Cainoa joborōai ijārvui pōeva ne coyūiyede iye yávaiye méne ji meadaiyede pōevare, iye ōi yure đacaiyede máre coyurājarama, ne ārurajipepe aivū ōre, arejameda Jesús.

Judas ũi jēni jīno Jesúre
(Mt 26.14-16; Lc 22.3-6)

¹⁰No yóboi Judas Iscariote, cūinácu doce paivū Jesúí bueimaraacu, nurejameda ina sacerdotevare jaboteipōeva yebai, náre jēni jíyurejameda Jesúre. ¹¹Ūi đaiyuede jápiarí, torojurejaimada na. Que baru arejaimada ūre:

—Ūja jínajivūbu mure tāuturare, mi yavenina jēni jíye boje ūre, arejaimada na Judare.

Que baru Judas jári coreni búrejameda yavenina, jēni jícyū Jesúre.

Jesús ũi āino ũi bueimaraque
(Mt 26.17-29; Lc 22.7-23; Jn 13.21-30; 1 Co 11.23-26)

¹²Páure bucure đaiye cube āiye torojuve teinmū mamabūijārvū barejávūya. Pascua jārvucacure, ovejāicure, boarí, toaque juarí, ávarejaimada dijārvure. Aru dijārvure arejaimada Jesúre ũi buimara:

—¿Ári nuri mure maje Pascua jārvūque āiyede meadacarājidica űja? arejaimada na.

¹³Aru nácavū pucarā jarorí, arejameda Jesús:

—Īmaroi nuri, ēmeni, nócacūre oco tuyure corurājaramu muja. ¹⁴Ūque nuri, cūramine ũi ecoiyede cūináuru muja máre ecojarā. Diñami upacure yópe ajarā muja: “¿Átucubūba ji bueimaraque ji Pascua jārvūre ji āquitucubū?” aibi bueipōescu”, ajarā muja. ¹⁵Diñami upacurārvūre puenocatucubu jave majare jauéde meadaitucubū bācarōre majare jáđovacyūme ũ. Noi ditucubūi majare maje ārājiyede meadajarā muja, arejameda náre Jesús.

¹⁶Ūre ju arí, nuri, ĩmaroi earejaimada. Earí, nore Jesús ũi aiyede bāquepedeca ũi aitucubūre earejaimada na. Noi Pascua jārvūque āiyede meadarejaimada na pucarā.

¹⁷Que teni meadarí buojari, nainú baji, avia ũi doríburu yóboi, ũi bueimara ina doce paivūque no ditucubūre earejameda Jesús. ¹⁸Nore earí, dobarí āivure, Jesús arejameda ũi bueimara: —Jāve coyuyūbu mujare: Cūinácu mujacacu yure ji mauvare jēni jícyūme ũ. Nai yure nópe đacūyū, yúque caride āñūme ũ, arejameda náre Jesús.

¹⁹Que baru chíorejaimada. Aru na coapa yópe arejaimada Jesúre:

—iQue đabecubu yu! ¿Mácarí? arejaimada na coapa.

²⁰Que arí, Jesús arejameda náre:

—Cūinácu mujacacu, jóyu páure jororūmica yúque, ũ macuyūme ji mauvare yure jēni jíyū. ²¹Ūh, Jūmenijicui daroimū mácu ũmure ijārvui, ji yaijārvui nucuyūmu yū, yópe Jūmenijicui toivaicōjeiye bāquepedeca ũi yávaiyede. Ūbenita āmeno vaicūyūme ũ, űnai yure jēni jíyū bacuyú. Nai nópe đacūyū, ũi pōtebedu meajebu, arejameda ũi bueimara Jesús.

²²Ne āiyedeca, páure ĩni, Jūmenijicure torojuede jídejameda Jesús. Torojuede jíni buojari, páure cotūvarejameda.

Cotuvārī buojarī, náre coapa jídejamedá. Aru arejamedá:

—Páure ájara muja. Diedecabu ji bajupe, jáđovaiye ji yaiquínore mujare boje, arejamedá náre Jesús.

²³Úcuidore máre íni, torojuede jíni Jūmenijicure, náre jídejamedá Jesús. Didore jēni, úcuri, veorī, úcurejaimada na coapa. ²⁴Aru Jesús arejamedá náre:

—Dicorore úcujara muja. Diedecabu ji jivepe, jáđovaiye ji yaiquínore mujare boje, Jūmenijicui árumetequiyepē ayu muje ámeina teiyede. Jūmenijicu “Yópe đajarā muja, boropatebenajivu ji jáinói”, ũi yóbocarō coyūino mácarōre pōevare áruarajaramu muja, muje úcuiyede diede. ²⁵Jāve coyuyubu mujare: Quénora vino úyaicorore úcuñumu yu ijāravure. Ūbenita ānijāravu baquinói, Jūmenijicui jabotequinumu maquinóre, bedióva cojedeca úcuri jácuyumu yu, arejamedá ũi bueimarare Jesús.

Jesús ũi coyūino Pedrorē ũi “Jesúre yu coreóvabevu” aquinore

(Mt 26.30-35, 28.16; Lc 22.31-34; Jn 13.36-38)

²⁶Ne āriburu yóboi, Salmos āmicue yūriaiyede yūriarejaimada. Yūriarī buojarī, no cūracū Olivocū āmicuricūi nūrejaimada na, Jesújā. ²⁷Mái nūri, arejamedá Jesús:

—Yūre đajocarī nūrajaramu muja. Yūre vaiquíyede Jūmenijicu toivaicōjenejaquemavu, yópe arī: “Ovejavare coreipōecure boarī jaruvacuyumu yu. Aru coateni nūrajarama na, ovejava”, arī toivarejaquemavu. ²⁸Ūbenita ji yainíburu yóboi, Jūmenijicu ũi nacovaiyede yūre yainore jaruvārī, muje jipocai nūcuyumu Galileai, arejamedá Jesús.

²⁹Que ayūre, Pedrocapūravu arīdurejamedá úre:

—Caivu apevu ne đajocarī jocarī nūiyedeca, yúcapūravu mure jocarī nūmecubu yu, arīdurejamedá.

³⁰Aru Jesús arejamedá úre:

—Jāve coyuyubu mure: Carī űami ruque cáyu ũi órejaquiyē jipocai,

yóbecue baju “Jesúre yu coreóvabevu” acuyumu mu, arejamedá Pedrorē Jesús.

³¹Ūbenita Pedrocapūravu copu ayu barīdurejamedá:

—Múque yūre ne boarī jaruvaruta, “Jesúre yu coreóvabevu”, abecubu yu, arīdurejamedá Pedro.

Aru na coapa nópe arīdurejaimada, Jesúi bueimara.

Jesús Getsemaní ũi jēniaino

Jūmenijicunque

(Mt 26.36-46; Lc 22.39-46)

³²Getsemaní āmicurōi nūrejaimada Jesújā. Nore earī, arejamedá ũi bueimarare Jesús:

—Yui dobarī corejarā muja ji Jūmenijicunque boroteiyede ānoi, arejamedá Jesús.

³³Nūvarejamedá úque Pedrorē, Santiagore, aru Jūare máre. Aru urarō űájíñu ũi dápiaino, āmeno vaidéjamedá Jesús.

³⁴Que teni arīdurejamedá náre:

—Yū āmeno chíori dápiavū ji yaiquínore. Yui mauteni, jári capujarā muja, arīdurejamedá ũ.

³⁵Jipojica báque nūñu Jesús, űuatutarī, mori tūrejamedá joborōita. Aru Jūmenijicunque boroteyu barejamedá ũ:

—Mu, jipacu, yūre cari vaiquíye vaibéjadeni. Caiyede đaiye majicutamu mu. ³⁶Ūbenita ji urōpe đabejacu. Quénora mi urōpe đajacu mu, arejamedá jipacure Jesús.

³⁷Ūi bueimara yebai copainūri, náre cáivure earejamedá Jesús. Aru arejamedá Pedrorē:

—Simón, ¿cāñutarū mu? ¿Cūināorajī cāmecava coreiye majibecurū mu? arejamedá Jesús.

³⁸Caivu ũi bueimarare arīdurejamedá cojedeca:

—Coreni, Jūmenijicunque borotejarā muja, abujuvai jabocu mujare jūjovārī, ámeina tede đabequiyepē aivu. Muje ũme űe parurō mariduivu. Ūbenita muje baju đaiye bajure parubevu muja, arīdurejamedá náre Jesús.

³⁹Cojedeca Jūmenijicūque borotecunrejameđa Jesús. Ęi Jūmenijicūque boroteiye báquepedeca bediόva borotecunrejameđa ũ. ⁴⁰Ęi bueimara yebai copainuri, náre cāivure earejameđa Jesús cojedeca. Āmei vuo ijidejavāya náre. Aru ũre ju aiye majibedejaimađa na. ⁴¹Bediόva Jūmenijicūque borotecunuri, yóbecue borotecuñu. Boroteni buojarī, ne yebai copainuri, arejameđa náre:

—¿Cāivurū mja cāreja? Jede, quénoramu. Iora jave eaiyu. Ijārvūi dayu bācu, Jūmenijicui daroimu mácu ũmure, āmeina teivure ne jēni jīnajimūmu yu. ⁴²Nacajajara mja. Copu nurajarevu. Yure ji mauvare jēni jīcuyu daibi, arejameđa Jesús.

Jesúre jēni ne nuvaino

(Mt 26.47-56; Lc 19.47, 21.37, 22.47-53; Jn 18.2-11)

⁴³Jesús ũi boroteiyedecata earejameđa Judas, nācacu, doce paivucacu. Obedivu pōeva ũque earī, boaicarovea aru boaidua dururī earejaimađa, sacerdotevare jaboteipōeva, aru Jūmenijicui yāvaiye báquede bueipōeva, aru judiόva bucūva máre ne daroimara. ⁴⁴Judas, ũai Jesúre jēni jīcuyu, ũi eaquiyē jipocamia, javeta Jesúre boarī jaruvaiyurivure coyurejameđa yópe: “Ji jacoyurī jiya nuimu maucuyūme mje jēnajimu. Řre jējara. Řre jēni, ména ũre jārī capurī nuvajara mja”, arejameđa náre Judas. ⁴⁵Jesús yebai nuri, cūiná Judas ũre earī, arejameđa:

—Aru, bueipōecu, arejameđa Jesúre Judas.

Que arī, ũre jiva nuri jacoyurejameđa. ⁴⁶Que teni ina pōeva ũre jēnejaimađa na. ⁴⁷Nópe teiyede jārī, cūinácu Jesúi buemaracacu ũi boaicarovede tatorī, duarī, ĩni, sacerdotevare jaboteipōecui yebacacure juijórī najuárejameđa ũi cāmucare.

⁴⁸Řre jēnaeivure arejameđa Jesús: —¿Tatorī ũavaipōecure jēivure yure boaicaroveaque aru boaiduaque jēni jacorādaivurū mja? ⁴⁹Jārvua coapa

mje jēneboi Jūmenijicui cūrami bueyu batecācu yu. Apurī mjaque cūcure, yure jēni jacobeteavū mja. Řbenita yópe Jūmenijicui toivaicōjeiye báquepedeca, caiye iye vaivu, náre arejameđa Jesús.

⁵⁰Que tedurata ũi bueimara ũre jocarī, dupini nurejaimađa na.

⁵¹Cūinácu bojuyo, nore cūcu, Jesús yóboi nuñu, dorejameđa quénora cūinácaje doicaje meacajede, lino āmicuricajede. Jesúre jēivu bācavu jēnidurejaimađa ũai bojuyore máre, ũi doicajede jēni. ⁵²Řbenita dajocayu dicajede ne puruái, cúyarī, dupini nurejameđa cuitótecaje cubecava.

Jesúre ne nuvaino judiόvai jabova cójijivu yebai

(Mt 26.57-68; Lc 22.54-55, 63-71; Jn 2.19, 18.12-14, 19-24)

⁵³Jesúre nuvarejaimađa sacerdotevare jaboteipōecu yebai na, ũre jēivu bācavu. Nore ina sacerdotevare jaboteipōeva, aru ina judiόva bucūva, aru ina Jūmenijicui yāvaiye báquede bueipōeva máre ne baju cójijini borotenanurejaimađa ne jabova baju ne cójijinami. ⁵⁴Aru Pedro joajīenata Jesús yóboi nure nuñu mácu, sacerdotevare jaboteipōecui táibui ecorejameđa ũ. Nore ecorī, Jūmenijicui cūramine coreipōevaque toaboi cuocarī dobarejameđa ũ.

⁵⁵Na sacerdotevare jaboteipōeva aru caivu ne cójijinocavu Jesúre āmecororājivure voridurejaimađa, ũre boarī jaruvaiyurivū. Řbenita eabedejaimađa na. ⁵⁶Obedivu Jesúre borocurī āmecororidurejaimađa. Řbenita cūináturu boro coyubedejaimađa na. ⁵⁷Apevu ne jēneboi curivu nacajari, nūrī, borocurī āmecororejaimađa Jesúre, yópe arī:

⁵⁸—Ęi yópe arī coyuiyede jápiacarā ũja: “Īñami Jūmenijicui cūrami, pōevai đaiñamine, jaruvacuyumu yu. Yóbecurijārvua ji jaruvārīburu yóboi, apedāmi đacuyumu yu. Řbenita ji puruáque đabecubu yu”, áme Jesús, arejaimađa na.

⁵⁹ Ûbenita yópe ne ãmecorõduiyedeca cüináturu abedejaimada na. ⁶⁰ Dinũmũre ñai sacerdotevare jaboteipõecu nacajari ne coricai núri, arejameða Jesúre:

—¿Coyarĩ majibecurũ mu? ¿Ne nõpe ãmecoroiyede, aipe ayurũ mu? arejameða Jesúre.

⁶¹ Ûbenita Jesúcapũravũ bi arejameða. Dinũmu bediõva cojedeca arejameða Jesúre sacerdotevare jaboteipõecu: —¿Mu Cristo ãmecurũ mu? ¿Jũmenijicu meacũ mácurũ mu? arejameða ã.

⁶² Aru Jesús arejameða úre: —Quédeca mi aimutamu yũ. Jũmenijicũ daroimũ mácũre ãmũpe, yũre, járajaramu muja, Jũmenijicu parũcũ meapũravũ dobacũre. Aru ji ocopeniboai jõðari ãmeiyede máre járajaramu muja, arejameða náre Jesús.

⁶³ Que ayũre, ñai sacerdotevare jaboteipõecu jorojĩni, ãi doiyede tatorĩ, jadevarĩ, arejameða:

—Apevũ ne coyũye jaũbevũ. ⁶⁴ Javeta muja járiadavũ. Jũmenijicu ãbebi ñai nõpe yávayũre. ¿Aipe adarãru muja? arejameða ã.

—Boarĩ jarũvaimũ macũyũme ã, arejaimada na caivũ, úre boarĩ jarũvaicõjeivũ.

⁶⁵ Que arĩ, úra jẽcututurajaimada na. Aru ãi jivare moari, úre pẽvavarejaimada na. Aru arejaimada: —Coyũjacũ mu. ¿Ñame matedĩ mure pẽvañũ? úre pẽvavaivũ arejaimada na. Ina Jũmenijicũ cũramine coreipõeva máre úre totarejaimada na.

“Jesúre yũ coreóvabevũ” arĩ, Pedro ãi coyũino

(Mt 26.69-75; Lc 22.56-62; Jn 18.15-18, 25-29)

⁶⁶ Pedro ãi cuedeca tãibui, sacerdotevare jaboteipõecũ yebacarõmivacaco cüináco nore earejacoda õ. ⁶⁷ Û cũocayũre jári, úre me corejacoda õ. Aru arejameða: —Mu máre ñai Jesús Nazarecacũque cútevũ mu, arejacoda úre.

⁶⁸ Ûbenita Pedrocapũravũ arejameða óre:

—iNácacu ãnevũ! Jesúre yũ coreóvabevũ. ¿Aipe arĩ, mu que adorũ? arejameða.

Que arĩ, tãibui etarĩ, jedevai nuitenevei nũrejameða Pedro. Dinũmu cáyu órejurejameða. ⁶⁹ Aru bediõva cojedeca úre jári, arejacoda ico yebacaco náre, nore cũrivũre coyũyo:

—Ñai nácacube ã, arejacoda. ⁷⁰ Aru Pedrocapũravũ arejameða cojedeca:

—iNácacu ãnevũ! Jesúre yũ coreóvabevũ, arejameða.

No yójiõboi ina nore cũrivũ Pedrorẽ jári, cocorĩ, arejaimada úre cojedeca: —Mu máre nácacube mu.

Galileacacutamu mu, arejaimada na.

⁷¹ Dinũmũma jáve ayũre, náre pare baju arĩ coyũrejameða Pedro:

—iJãveneca Jũmenijicũ jáinoi yũ mujare coyũyutamu! iJãve ji coyũbedu, Jũmenijicu ãmedajacurĩ yũre! Muje aimure ye majibecutamu yũ. Jesúre yũ coreóvabevũ, arejameða.

⁷² Ûi que aipe bajure, bediõva cojedeca órejurejameða cáyu. Ûi órejaiyede, Pedro ãrũrejameða Jesús ãi coyũiyẽ bãquede: “Cáyu ãi puque órejaquiyẽ jipocai, yóbecũe baju, ‘Jesúre yũ coreóvabevũ’, acũyũmu mu”, arĩ coyũiyẽ bãquede ãrũrejameða. Aru ãrcũ, cüiná orejameða ã.

Jesúre ne nuvaino Pilato yebai

(Mt 27.1-2, 11-14; Lc 23.1-5; Jn 18.28-38)

15 ¹ Avia ãi tucũmũiyede ina sacerdotevare jaboteipõeva, judiõva bũcũvaque, Jũmenijicũ yávaiyẽ bãquede bueipõevaque, aru caivũ ne cõjjiinocavũ diede boroteni cõjjiidejaimada na. Boroteni buojarĩ, Jesúre buorĩ, nuvari jabocũ ãi ãmiã Pilato yebai jacorãnũrejaimada na. ² Ne nuvaiyede úre, Pilato arejameða Jesúre: —¿Mũru judiõvai jabocũ? arejameða. Jesúcapũravũ arejameða: —Quédeca, mi aimũrecabu yũ, arejameða.

³Dinɩntɩma Jesúre caijje ámene ámecororejaima na. ⁴Aru Pilatocapūravu arejameɗa Jesúre:

—¿Cora náre ju abecurū mu? ¿Járiabecurū caijje ne ámecoroiyede mure? arejameɗa.

⁵Ūbenita ye yávabedejameɗa Jesús. Ūi yávabe boje, urarō dápiarejameɗa Pilato.

Põeva ne boarí jarɩvaicõjeino Jesúre

(Mt 27.15-31; Lc 23.13-25; Jn 18.38-19.16)

⁶No torojave teinɩmure Pilatocapūravu jacoimɩ mácure põeva ne etavaicõjeimure etavavarejameɗa. ⁷Roma ámicurō jaboteinore boainɩmure, põevare boarí jarɩvaivɩ bávavɩ jacoimara marejámameɗa. Nácacɩ cūinácɩ Barrabás ámicurejameɗa.

⁸Obedivɩ põeva Pilato yebai mɩri nuri, jēniari járanurejaimaɗa Pilatore:

—Mi ðarí cōmajiyepere ðacajacɩ caride, arejaimaɗa na.

⁹Ne jēniari jáiyede arejameɗa náre Pilato:

—¿Dinɩmɩ mɩje jabocure jaetovaji yu? arĩdurejameɗa.

¹⁰Ina sacerdotevare jaboteipõeva Jesúre ne jorojĩyede majini, obedivɩ põeva ne ɛe boje úre, nópe náre jēniari járejameɗa Pilato. ¹¹Ūbenita ina põevare majicari, aicõjēnejaimaɗa sacerdotevare jaboteipõeva yópe:

—“Barrabáre jaetovajacɩ mu”, arĩ coyɩjarã mɩja Pilatore, arejaimaɗa sacerdotevare jaboteipõeva.

Que baru ina põeva náre ju arĩ, que arejaimaɗa Pilatore. ¹²Ne que coyurĩburu yóboi, arejameɗa náre Pilato:

—¿Dinɩmɩ ñai judiovai jabocɩ, mɩje aimure, aipe ðaji yu? arejameɗa.

¹³—iŪre jocɩcɩjaravena pēvari, boarí jarɩvaicõjejacɩ mu! codoboborí arejaimaɗa.

¹⁴—¿Yéde ámeina tearí ñai? jēniari járejameɗa náre Pilato.

Ūbenita pueno baju codoboborí arejaimaɗa na:

—iŪre jocɩcɩjaravena pēvari, boarí jarɩvaicõjejacɩ mu! arĩ codoboborejaimaɗa na.

¹⁵Que teiyede Barrabáre jaetovarejameɗa Pilato, náre ne urõpe ðaiyɩcɩ. Aru Jesúre jara popeicõjēnejameɗa. No yóboi churaravare Jesúre jocɩcɩjaravena pēvaicõjēnejameɗa ũ, Pilato.

¹⁶Que teni ina churarava Jesúre ĩni, nuvari jabocui cūrami, úre ecovarejaimaɗa ðĩnami tãibui. Nore covari, cójijicõjēnejaimaɗa caivɩ apevɩ churaravare. ¹⁷Jesúre puenocacaje, jabocui doicajepere paicaje ñemijuaricajede doarejaimaɗa na. Doarí buojarí, miumua cãteni, cainitarabure ðarí, ũi jipoburã ditarabure tuorejaimaɗa na. ¹⁸Que ðarí úre jacyurejaimaɗa na:

—Mēna cɩjacɩ mu, judíovai jabocɩ, arejaimaɗa churarava Jesúre, ũbenita úre yurivɩ.

¹⁹Ūre jipoburã jocuyoque jáðori, úra jēcututuri, úre jabocure jacyuivɩpere ñɩɩturí tedejaimaɗa na coapa.

²⁰Ūre yurini buojarí, úre ne doicaje ñemijuaricaje bácarõre, no jabocui doicajepere paicajede ĩni, duarí, ũi doicaje bácarõre bediõva úre doarejaimaɗa cojedeca. Que teni buojarí, úre nuvari, jocɩcɩjaravena úre pēvari jēoranurejaimaɗa na, churarava.

Jesúre ne pēvari yuyaino jocɩcɩjaravena

(Mt 27.32-44; Mr 14.58; Lc 23.26-43; Jn 2.19, 19.17-27; Ro 16.13)

²¹Jesús jocɩcɩjaravede ture nuñu maridurejameɗa. Aru cuyɩ bávɩ ĩmaroi earejameɗa Simón, Cirene ámicurímarocacɩ. Alejandro aru Rufo népacɩ barejámameɗa ũ, Simón. Nore vaiyúre, úre Jesús ũi jocɩcɩjaravede tuino mácarõre tuicõjēnejaimaɗa na, churarava.

²²Ina churarava nuvarejaimaɗa Jesúre cūraccū Gólgota ámicuricūi, Põe jipobucū aiyurõmu. ²³Noi ũcuiye upiáteiye báque cūrijororɩ cūrejavūya, vino úyaicoro mirra ámicue jocɩcɩ cuidóque. Die ũcuiyede jĩnidurejaimaɗa Jesúre, úre ijibequiyepere aivɩ. Ūbenita ũ ũcuri jári,

ubecu, ùcumenejameða. ²⁴Que teni ùre jocucjaravena pèvari jèorejaimaða. Aru ne yajuiyede cainijidure dũvarejaimaða. Diduá etaiyede jári, majidejaimaða ácu nácacu ìcuyure Jesús ùi doiyे báque coapa. Que teni yajurì, coavarì Jesús ùi doiyे báquede, ìnejaimaða ùre pèvaivũ bácavu.

²⁵Javejina nueve baji, pèvari jèorejaimaða ùre. ²⁶Jocucjaravena, ùi jipobũ puenoi, toivaino jènejavũya, apevu ne majinajiyepе aino Jesũre boarì jarũvaivũ ne dápiainore, “¿Aipe teni ùre boarì jarũvarãma na?” ne aino. Yópe aiyurejavũya no toivaino: “Judíovai jabocũbe”. ²⁷Ùque máre pèvari jèorejaimaða pũcarã tatorì ñavaipõevare, ape pũcarõa jocucjaravearã. Cũinácũ Jesús ùi meapũravũ aru apecũ ùi cãcopũravũ curejaimaða. ²⁸Que teni ðarejaimaða ina yópe Jũmenijicũ ùi toivaicõjeiyе báquedepedeca ùi yávaiyede: “Põeva ùre ðarãjarama yópe ne ðaiyepе ãmeina teivũre”, toivaicõjeneaquemavu.

²⁹⁻³⁰Ina vainãnravũ jári, ne jipobũare cũjiovari, ãmeina yávarejaimaða ùre, yópe arì:
—Mũ, Jũmenijicũ cũramine jarũvaivyvacacũ aru yóbecurijãravũa yóboi ðĩnamine meãaiyvãvacacũ, caride jocucjaravede dajocarì, èmeni, mi bajure meãajacũ mũ, arejaimaða Jesũre ina vainãnravũ.

³¹Nopedeca ina sacerdotevare jaboteipõeva aru Jũmenijicũ yávaiye báquede buaipõevaque máre, ne baju yũrivũ Jesũre, yópe arejaimaða:
—Apevũre meãavãcãvacari, ùbenita ùi bajure meãarì majibebi ù. ³²Cristo, Israecavũ ne jabocũ, jocucjaravede dajocarì, èmeni, dajacurì ù. Que ðaru, maja jũ arãjaramu ùre, arejaimaða na.

Aru ina pũcarã pèvaimara mácavũ máre ùque, nopedeca ãmeina yávarejaimaða ùre.

Jesús ùi yaino

(Mt 27.45-56; Lc 8.2-3, 23.44-49; Jn 19.28-30; He 10.20)

³³Jãravũ corica baji ñemié turì ðarejavũya caino joborõi. Pũ

yóbecuriora yóboita vaidèjavũya. ³⁴Aru yóbecuriora bajita, iye ñemié tuiyede dajocaiyede, pare bujié codoboborì, yávarì darorejameða Jesũs:

—Eloi, Eloi, ¿lama sabactani?

Nópe aino: “Mũ, ji mearore jímvũ, mũ, Jũmenijicũ, ¿aipe teni yure dajocarì nuñũrũ mũ?” aiyurõ marejavũya.

³⁵Que ayure, apevu nore nũrivãcavũ ùre jápiarì, ùbenita jápiarì eabeni, arejaimaða:

—Jápijarã. Elíare õrejaibi ù, arejaimaða na.

³⁶Dinũmũre cũinácũ nácacu cúyarì, jaubore ìni, uyovarejameða vino úyaicoro upiáricoroque aru dĩaũbore abodorã buorì, jèori, jarũrũrejameða Jesús ùi ùcuquiyepe ayũ. Aru arejameða:

—Corejarã. Jãrajarevũ Elías jõðavãcũdayure ùre, arejameða ù.

³⁷⁻³⁸Cojedeca Jesús pare bujié codoboborì, “Quénoramu” arì, yaidèjameða ù. Ùi yayieda, Jũmenijicũ cũramicacaje uracaje coricõpavaicaje bácarõ quèda corica baji jaðeni nurejavũya, puenocatũravũ bírì pũ cãchinocatũrvãita. ³⁹Nore Jesús bácvũre cocorì nũcvũ barejameða churaravai jabocũ. Jesús yayiũre jári, arejameða ñai:
—Jãveneca Jũmenijicũ mácvũ baju batecũbe ñai, arejameða churaravai jabocũ.

⁴⁰Nomiva máre cocorì nũrivũ joajĩemia curejaimaða. Ne jèneboi curejaimaða cũinãco nomió, Magdala ãmicũriĩmarocaco, õi ãmiã María, aru apeco õi ãmiã Salomé, aru apeco õi ãmiã María máre, ico Santiago aru José népaco. Ñai Santiago bojũyo barejameða. Apecũ Santiago bũcũcũ ùi cãchinocacũ barejameða ù, Maríai mácvũ. ⁴¹Na Jesús ùi cuede Galilea ãmicũrõi cadateivũ barejaimaða ùre. Aru apevu nomiva, ina eavũ bãcavũ ùque Jerusalén ãmicũriĩmaro, curejaimaða nore.

Jesús bácvũ jarũvaimũ ne põe jarũvainoi

(Mt 27.57-61; Lc 23.50-56; Jn 19.38-42)

⁴²Dijãravũ, nainú, torojãve teijãravũ baquinõre meãaijãravũ barejavũya.

Sábado baquinó jipocacajāravu barejávūya. ⁴³Pilato yebai nūrejamedā José, Arimatea āmicurīmarocacu. Sacerdotevai cōjijinore coyūipōevacacu barejāmedā ũ. Ne pueđaimu marejāmedā José. Ũ máre Jūmenijicui jabotequinumu maquinóre napini coreyu barejāmedā. Jidūrō cubeno, paruriūme curī, Pilato yebai nūri, Jesús bācui baju bācarōre jēniacunūrejamedā ũ. José ũi jēniaiyede, Pilato cuturejamedā churaravai jabocure. Aru jēniari járejamedā ũre:

⁴⁴—¿Jave yaidíca ũ? ¿Aipiye bajure yaidí? arejamedā.

⁴⁵Aru churaravai jabocu ju arejamedā: —Jave yaibí ũ mácu, arejamedā.

Aru aiyeta, Jesús bācui baju bācarōre ícōjenejamedā Pilato, Joséde ícōjeñu. ⁴⁶Meacaje boricaje, lino āmicuricajede bojedārī, Jesús bācure jocucujaravede jōđavari, ĩni, dicajeque, ũ mácure cūmari buorejaimada Joséjā. Ũ mácure nūvari cūracobei, Jesús bācure jarūvarejaimada na. Nore ne jarūvarīburu yóboi, apeturava cūraturavare ĩni, jāturuvari, dicobede biedejaimada. ⁴⁷Aru Jesús bācure jarūvainore járejaimada na, María Magdalacaco aru María, Joséi paco máre.

Jesús ũi nacajaino yainore jarūvarī
(Mt 26.32, 28.1-10; Mr 14.28;
Lc 24.1-12; Jn 20.1-10)

16 ¹No judío vai jabuóvaijāravu sábadu, nainú vaiyede, María Magdalacaco, aru Salomé, aru Santiagoi paco mumijuribure ĩni bojedarejaimada na. Jesús bācure ne jarūvainoi nūri, die mumijueque ũ mácui baju bācarōre yuarānuivu barejāmedā na. ²No sumana buijāravu domingo javejīnara, avíá ũi tucumuiyede, Jesús bācure ne jarūvainoi nūrejaimada ina nomiva.

³Ne bajumia borotede nūrejaimada, yópe arī:

—¿Name majare cūracobe bieituravare jāturuvari, cađatenajidica na? arejaimada dinomiva.

⁴Ne eaiyede nore, dicobe biebecobede járejaimada na. Diturava bieiturava bācarō uraturava baju barejávūya. Ũbenita joajīeneca dituravare jári earejaimada na. ⁵Dicobede ecoivu nore meapūravui dobacure, bojuyore járejaimada ina nomiva. Boricajede, ũmujuricajede doyu barejāmedā ũ. Aru dinomiva cuicumarejaimada na.

⁶Náre arejamedā:

—Jidubejarā muja. Jesús Nazarecacure, ne jocucujaravena pēvaimu mácure, voriduivubu muja. Yore cubebi ũ. Javeta nacajami. Járijide apa. Ũi bajure ne jarūvaino mácarōre jájara muja. ⁷Pedrore aru Jesúi bueimara mácavu apevure yópe coyūrānūjara muja: “Muje jipocai Galileai nucuyume Jesús. Nore mujare ũi ávarepe ũre járajaramu muja”, ajarā, arejamedā náre.

⁸Aru dicobede etarī, cúyari nūrejaimada ina nomiva. Jidūrī bididejaimada na. Nūri, ne copuimarare ye abedejaimada dinomiva, cuicumaivu.

Jesús ũi cueteino María Magdalacore
(Jn 20.11-18)

⁹Jesús nacajañu mácu yainore jarūvarī, sumana buijāravu domingo javejīnara, cuetedejamedā mamarumūre María Magdalacore, ico ũi jarūvaimo máco siete paivu abujavare. ¹⁰Ō nūri, majide đarejacođa ina ũque curivu bācavure, chīori oivure. ¹¹Aru na jápiaivu nacajañure yainore jarūvarī, aru ōi jáino mácarōre máre jápiarī, “Jave majavú”, abedejaimada na.

Jesús ũi cueteino pūcarā ũi bueimarare
(Lc 24.13-35)

¹²No yóboi cuetedejamedā apēcūpeda ina pūcarā ũi bueimaracavure ne nūiyede mái ĩmarore jocarī. ¹³Na nūri coyūridurejaimada nācavure. Ũbenita ju abedejaimada náre máre.

Jesús ũi coyūicōjeino ũi yávaiye méne
(Mt 28.16-20; Lc 24.36-49;
Jn 20.19-23; Hch 1.8)

¹⁴Yóbo baji Jesús cuetedejamedā caivu once paivu ũi bueimarare ne dobaede

tuoiva yebai. Ju abevu barejáimada ina jáivu bácvu Jesúre, nacajañu mácvu yainore jaruvarí, ne covuyede úra. Que baru jararejameda ne ju abenore aru ne jápiarí coreóvabede máre. ¹⁵Arejameda náre:

—Buenanujara caivu ijárvucavure iye yávaiye méne. ¹⁶Nácvu ne ju arí jádovaru Jūmenijicure ocoque meadacuyumu yu. Ubenita nácvu ju abevu baru bíjarājarama na. ¹⁷Ina yure ju aivu pōeva ne đarí majibede đarājarama. Ji āmiái, ji paruéque, jaetovarājarama abujuvare. Yávarājarama apecamua yávaicamuare ne majibecamuare. ¹⁸Dururājarama āđavare. Ne ũcuyede ijede ye āmedabequiyebu náre. Ijimarare

tuvorājarama, aru meatenajarama na, arejameda Jesús.

Jesús ũi muino cavarō mearo

Jūmenijicui curōi

(Lc 24.50-53; Hch 1.9-11)

¹⁹Jesús yávayu bácvu náre, muri nurejaquemavu ijárvure jocarí. Nurejaquemavu cavarō mearo Jūmenijicui curōi. Dobarejaquemavu Jūmenijicui meapūravui. ²⁰Aru ũi bueimara mácvu covurānurejaimada iye yávaiye méne pōevare, ne cainoai. Que baru cainumua Jesús cadatedejameda ũi pōevare, ne covurājijeyepu ayu Jūmenijicui yávaiyede pōeva ne đarí majibede đaiyeque. Quénoramu.

San Lucas

Mamabuinore coyuiyebu Lucas bácu ùi toivaiye báquede Jesucristorā. Lucas bácu juoipõescu barejaquemavu. Apevu bueipõeva ne dápiaru, ù mácu judío amenejaquemavu (Col 4:11-14). Cucunrejaquemavu Pablo bácuque (Hch 16:10). Áro ùi cuede ùi toivaiyede iye coyuiyede Jesucristorā caivu majibevu. Apevu ne dápiaru Roma āmicurriimaroí, apevu ne dápiaru Cesarea āmicurriimaroí, aru apevu ne dápiaru Acaya āmicurrijoborōi curejaquemavu. Majidivú ne dápiayepe Lucas bácu toivarejaquemavu Marcos bácu ùi toivariburu yóboi ùi coyuiyede Jesucristorā, āniujua báquede 60-65 d.C. baji. Que baru Lucas bácu Jesúque cubecu bácuvacari, majidejaquemavu Jesú borore, ùi jári boroteiye báque boje Marcos bácu ùi toivaiye báquede.

Lucas bácu jádovarejaquemavu Jesúre, Jūmenijicu bajureca, yópe põescu. Coyurejaquemavu Jesús ùi jipocacavu bácuvere pu Adán mácuta, aru Juan Bautista bácu ùi põeteiyede, aru Jesús ùi põeteiyede, aru Jesús juedocure. Coyurejaquemavu jēniayede Jūmenijicuque (3:2; 5:16; 6:12; 9:18, 29; 11:5-13; 18:1-8; 22:32; 23:40), nomivare (Juan Bautista bácu paco bácore aru Jesú paco bácore: 2:36; 7:11, 37; 8:2; 10:38-42; 13:11; 15:8; 18:1; 21:1; 23:27), aru apevu cōmaje ārojarivure, inape juedovare, cūve cūvabevure, aru jabovare tāutura ícaipõevare. Lucas bácu toivarejaquemavu Jesús ùi ðaiyede, mamabuinoque bárí pu buojainoque jebeni, cūináro, cūináro coapa. Toivarejaquemavu ñai ũmu Teófilo bácuve aru apevu judío va amevure, ne majinajiyepe ayu “jāveneca iye coyuiye” ne jápiaiyede Jesúrá (1:4). Que baru toivarejaquemavu, ne majinajiyepe ayu Jesús caivu põevare meadaipõescu, judío vore aru judío va amevure máre.

Mamabuino

(Hch 1.1)

1 ¹Mu, Teófilo, obedivú põeva toivari báquemavu caiye iye Jesú ðaiye báquede maje jēneboi coyuinore. ²Yópe ina mamarumure jáivu bácu caiye Jesú ðaiye báquede aru Jūmenijicu yāvaiyede ùi toivaicōjeiye báquede coyuiyú bácu majare toivaquemavu. Návacari ũque curejaquemavu ùi mamabujaravú pu ùi jebejaravuita. ³Aru yu máre jāve jári coreóvacacu joe báque caiye iye ðaiye báquede. Que baru dápiavu yu yópe, “Ji toivaru coyuinore iye teiye báquepe Teófilore, meajebu ũre”, arí dápiavu yu. ⁴Que baru toivaivú mure, mi majiquiyepe ayu jāveneca iye coyuiye mi jápiaiyede báquede.

Juan Bautista ùi põetequinore cūinácu ángele ùi coyuíno

⁵Ānijaravua báquei Herodes bácu Judea āmicurrijoborõcavu ne jabocu

baede, curejameða cūinácu sacerdote, ùi āmiá Zacarías. Abías āmicurijabocacu barejameða ũ. Jímarepaco máre Aarón āmicucu bácu sacerdote bácu párameco barejácoða, òi āmiá Isabel. ⁶Ina pucarā meara marejáimada Jūmenijicu jáinore. Aru ðarejaimada iye Jūmenijicu ðaicōjeiyede ùi coyuiye báquede Moisés bácuve. ⁷Ūbenita Isabel juedoeabedejacoda. Aru ina pucarā bucujina marejáimada. Que baru juedocuvabedejaimada na.

⁸Cūinájaravu Zacaríai yajubo, sacerdotevacavú yajubo, ne memejaravu Jūmenijicu cūrami jívú barejávüya. ⁹Aru Zacaríare ne beoiye boje, ùi juacnūino marejávüya. Que baru sacerdoteva ne ðarí cōmajiyepedeca ðaiye jaurejavüya ũre. Mumijuede juacnecorejameða ũ Jūmenijicu cūrami. ¹⁰Que teni obedivú põeva jēnarejaimada Jūmenijicure ùi

cūrami jedevacobei diora, mumijuede juaiorai. ¹¹Zacarías mumijuede juayu bācu, úre cuetedejameđa cūinácu ángele, Jūmenijicui daroimu, núcu meapūravui ne juaino yebai. ¹²Aru úre jári, cūcumarejameđa Zacarías. Jiducu barejámeđa ũ. ¹³Ūbenita ñai ángele arejameđa úre:

—Mũ, Zacarías, jidubejacu mũ.

Jūmenijicu jápiaibi mi jēnaiye báquede. Aru caride Jūmenijicu cađatecuyume mure. Mimarepaco juedocuvacodome. Aru Juan amidojacu mũ ũ macuyúre. ¹⁴Torojucuyumu mũ mímacu bacuyúre boje. Aru obedivũ pōeva torojurājarama ũi pōteiyede. ¹⁵Mímacu bacuyú parucu bacuyúme Jūmenijicui jánore. Jūmenijicui Espiritu Santo úque cūcuyume jípacoi yapibu jívumiareca. Que baru vino úyaicoro boqueicorore úcumecuyume ũ. Aru apecoro boqueicorore máre úcumecuyume ũ. ¹⁶Ñai mímacu bacuyú obedivũ pōeva Israel bácuí pāramena márājivure, ũi coyūquiyede náre Jūmenijicui yávaiye méne, chíore đarí ju arājarama ne jabocu Jūmenijicure.

¹⁷Jūmenijicu nópe đare đacuyume mímacu bacuyúre. Aru jipocateđe đacuyume mímacu bacuyúre maje jabocure ũi Espirituque, ũi paruéque. Nopedeca Jūmenijicu parure đarejaquemavu ũi yávaiyede coyucaipōecu bácuře máre, ũi ámiá Elías, ũi Espirituque, ina bucva ne ju arí jipocatenajiyepere ayũ némarare ne cārijimene đarājiyepere ayũ náque, aru ina ju abevũ ne dāpiarājiyepere ayũ ju aivũ ne majiépedeca. Caiye iye đacuyume mímacu bacuyú pōevare meadarí, ne jacopurājiyepere ayũ maje jabocure, Jūmenijicui daroquimure, arejameđa ñai ángele Zacaríare.

¹⁸Ñai ángele ũi aríburu yóboi, Zacarías jēniari járejameđa úre:

—¿Aipe đarí coreóvaji yũ jimarepaco juedocuvacodore? Bucucubu yũ. Aru jimarepaco máre bucucobe ō, arejameđa Zacarías.

¹⁹Aru ñai ángele arejameđa úre:

—Yúbu Gabriel. Yũ núcubu cainumua Jūmenijicu yebai, memecayu úre.

Jūmenijicui daroimũmu yũ. Mũre coyucudayubu yũ iye yávaiye méne. ²⁰Ūbenita caride yávarí majibecubu mũ. Aru yávabecuyumu mũ mímacu bacuyú ũi pōteiyeta, mi ju abe boje ji coyuiyede. Caiye vaiquíyebu yópe ji coyuiyepere mure cari, arejameđa ñai ángele.

²¹Aru ina nópe coyuiyvũ, caivũ ina obedivũ pōeva Zacaríai etaiyede coredejaimađa na. Ūrarō coreni úre, pare dāpiarejameđa, “¿Aipe teni Zacarías etabedi Jūmenijicui cūramine jocarí?” aivũ. ²²Buojarí, etarejameđa Zacarías Jūmenijicui cūramine jocarí. Etayũ bācu, yávarí majibedejameđa náre. Que baru ina pōeva coreóvarejaimađa Zacarías jáñũ mácuře yópe decoboinope apucure diñami Jūmenijicui cūrami jívui. Zacaríacapuravu yaredejameđa ũi puruque náre. Ūbenita yávarí majibecu mautedejameđa ũ.

²³No yóboi, apejāravũ ũi yajubo, sacerdotevacavui yajubo, ne Jūmenijicui cūrami memejāravua yóboi, Zacarías copainurejameđa ũi cūrami. ²⁴Aru dijāravua yóboi jímarepaco juedoearejacođa ō. Que teni cūinápurupe paiaviavare mautedejacođa ō cūrami jívui. Aru arejacođa:

²⁵—Yopedeca đacaquemavu Jūmenijicu yũre. Cōmaje āroje jári yũre, íame ji cūyeno mácarōre. Aru đacaibi yũre pōeva ne cōenimenajiyepere ayũ, arejacođa ō, Isabel.

Jesús ũi pōtequinore cūinácu ángele ũi coyuíno
(Mt 1.18, 21)

²⁶Isabel ōi seis paiaviava micaco baedata, dinũmũta bediōva cojedeca ñai ángele Gabriede darorejameđa Jūmenijicu, Galilea āmicurōi, Nazaret āmicuríimaro. ²⁷Diĩmaroi cūináco nomió cūrejacođa, María āmicuco. Ō marejácođa David bácuí pāramecu Joséi márepaco bacođó. Ō ye cubedejacođa ũmũque cāreja. Ōi yebai darorejameđa Jūmenijicu ñai ángelede. ²⁸Ōi yebai earí, yópe arejameđa Maríare ñai ángele:

—¿Me sacorã mu? Mu Jümenijicui beoimomu. Múque cubi Jümenijicu, arejamedá Mariáre.

²⁹Übenita ñai ángele üi nópe aiyede cuecumari, “¿Aipe ayu bárica ü yure?” arí dápiarejacoda. ³⁰Aru ñai ángele arejamedá óre:

—Ji coyuiyede jidubejaco mu, María. Jümenijicu müre jecubi.

³¹Micateni, jueðocuvacodomu mu. Mi jueðocuvacojimu Jesús ámicucuyume ü macuyú. ³²Jabocu parucu bacuyúme mímacu bacuyú. Aru pöeva arájarama üi borore, “Jümenijicu parucui mácube ü”. Üi ñecu mácu, David bácupe, jabotede ðacuyume Jümenijicu mímacu bacuyúre. ³³Israel bácuí páramena ne jabocu bacuyúme. Mímacu bacuyú üi jaboteiye ye cüiméquiyebe, arejamedá Mariáre.

³⁴Mariácapüravu arejacoda úre:

—¿Aipe ayurü mu, nópe ayu? Yu ye ümúque cubecotamu yu, arejacoda ó.

³⁵Ñai ángelecapüravu arejamedá óre:

—Müre dacuyume Jümenijicui Espiritu Santo. Aru Jümenijicu caivu püeno parucu üi parué cuquiyebe múque.

Que baru mi jueðocuvacojimu meacu baju bacuyúme ü. Jümenijicui mácu bacuyúme ü. ³⁶Aru miparimo Isabel, bucucovacari, micacobe ó máre. Caride “jueðoeabeco”, ne aimo máco javeta seis paiaviava micacotamedá. ³⁷Jümenijicu caiyede ðaiye majibi. Que baru ye cubevü üi ðabeno, arejamedá Mariáre ñai ángele.

³⁸Aru arejacoda Mariácapüravu:

—Jümenijicui yebacotamu yu. Mi aiyepe bajaróri yure, arejacoda ó.

Coyurí buojarí, nurejamedá ñai ángele óre jocarí.

María õi jáconuino Isabede

³⁹Dijārvuui María nurejacoda maumejie cüináimaroi, cūrācūai, Judea ámicurijoborõi. ⁴⁰Imaroi earí, Zacaríai cūrāmi ecorejacoda ó. Aru ecorí jacoyurejacoda Isabede.

⁴¹Õi jápiaiyede Maríai jacoyuiyede, õi mácu cújidejamedá õi yapibui. Aru

Espiritu Santo dápiaicõjenezamedá Isabede. ⁴²Que baru Isabel, yópe arí, coðoborejacoda Mariáre:

—iJümenijicu müre me jári, mearo ðacaquemavu müre caivu nomiva püeno! iJümenijicu me jári, mearo ðacacuyume mímacu bacuyúre máre püeno baju! ⁴³Cuecumari dápiaivu yu ji jabocui paco ji yebai õi cucodaiyede. ⁴⁴Ji jápiaiyede mi jacoyuiyede, jímacu torojucu cújibi ji yapibui. ⁴⁵Mu ju arebu ángele üi coyuiye báquede müre. Mu dápiarebu Jümenijicu ðacuyure müre üi aipe báquedepeda. Que baru Jümenijicu me teyube müre. Torojuvü mu, arejacoda ó.

⁴⁶Aru María arejacoda:

Ji ümei coreóvaivu ji jabocui

paruéde. ⁴⁷Aru ji decocui torojuvü Jümenijicare, yure meadaipöesure, boje. ⁴⁸Jümenijicu cõmaje ároje jáquemavu yure, üi yebacacore.

Que baru caivu ijārvucavu

“Jümenijicui torojure ðaimome

õ”, arájarama yure. ⁴⁹Ñai parucu baju ðayube yure mearo urarõre. Aru meacu bajube. Caivu apevu püeno meacube ü. ⁵⁰Cõmaje ároje jáñume caivu ina pueðaiyure úre, javede aru caride máre.

⁵¹Üi ðaiyeque jáðovañume üi paruéde. Ina pöeva ne baju me dápiaiyure, apevu püeno meara dápiaiyure, coavayube. ⁵²Ina

jabova parurivure ne paruéde ñume náre jocarí. Aru ina cõmaje árojarivure mearo ðacayube ü.

⁵³Ina áuyaiyure yapide ðayube me áiyeque. Aru ina cuve cuvavivure jaroyube cuve cuvabevüva.

⁵⁴Cadateyube üi pöevare, maja Israecavure, üi cõmaje ároje jári árúe boje. ⁵⁵Cüináturu yáverejaquemavu majeñecuva mácvure, Abraham mácvure aru üi páramenare máre, cainumua, arejacoda María.

⁵⁶Carejacoda Isabeque yóbecurá aviáva. Aru no yóboi copainñejacoda õi cūrāmi.

Juan Bautista ùi pōeteino

⁵⁷ Dinũmũai Isabel juedocũvarejacoda ùmu juedojĩcũre. ⁵⁸ Aru òi cadaĩjēcavũ, ò jivũ mãre, ne jãpiaiyede òi borore Jũmenijicu cõmaje ãroje jãñũre òre, torojũreajaimada òque.

⁵⁹ Ocho pajjãravũ pōeteniburu yõboi, sacerdoteva òi mãcũi cajede buraicõjeni judĩova ne ðarĩ cõmajiyepe, ðarãearejaimada na. Aru ãmidorãjivũ barĩdũreajaimada ùre Zacarĩas, jĩpacũre.

⁶⁰ Ñbenita jĩpaco arejacoda:
—Bi, Zacarĩas ãmemi. Ñ ãmicũcũyũme Juan, arejacoda ò.

⁶¹ Que teni ina põeva arejaimada òre:
—Cũbebi apesũ mĩvũ jẽnebore Juan ãmicũcũ, arejaimada na.

⁶² Aru ina põeva yaredejaimada ne pũũque jĩpacũre, jẽniari jãivũ ùre, “¿Yẽcũ ãmidocũyũrũ ùre?” ⁶³ Que teni Zacarĩas jabiõvarĩ jẽniarejameða toivaivede. Aru toivarejameða yõpe: “Juan ãmicũbi ù”. Que baru caivũ pare dãpiarejaimada caiye iyede. ⁶⁴ Aru cũinã yãvari bũrĩ, torojũrĩ, mearore jĩdejameða Jũmenijicũre Zacarĩas. ⁶⁵ Que baru caivũ ina põeva, ùi cadaĩjēcavũ, cũcumarejaimada na. Caiye iye borore borotedejaimada caivũ caino dijõborõi, Judea ãmicũrijõborõcacũa cãrcũai.

⁶⁶ Aru caivũ ina jãpiaivũ, me dãpiarĩ arejaimada:

—¿Yẽcũ baquidĩca ñai juedocũ? arejaimada na.

Aru Jũmenijicu cadatedejaquemavũ ùre.

Zacarĩas ùi yãvaino Jũmenijicũre

⁶⁷ Dinũmũre Espĩritu Santo dãpiaicõjẽnejameða Zacarĩare. Que baru Jũmenijicũi yãvaiyede coyũrejameða:

⁶⁸ Torojũvũ yũ Jũmenijicũque. Que baru mearore jĩvũ yũ maje jabocũre, Israecavũ maje mearore jĩmũre. Cõmaje ãroje jãrĩ ùi põevare, meadaibi majare abujuvai jabocũi parũede jarũvarĩ.

⁶⁹ Jũmenijicu daroyũbe majare cũinãcũ meadaipõecũre, ùi

põesũ David bãcũi pãramecũre.

⁷⁰ Javede Jũmenijicũi yãvaiyede coyũcaipõeva mãcavũ, yõpe arĩ, coyũreajaimada: “Jũmenijicu darocũyũme meadaipõecũre, ùi põevare meadaquiyepe ayũ”. ⁷¹ Majare meadaipõesũ meadacũyũme majare maucũvarivũ ne parũede jarũvarĩ.

⁷² Que ðacũyũme ùi cõmaje ãroje jãiyẽ bãque boje maje jipocacavũ bãcavũre aru ùi ãrumetebe boje “Yõpe ðarãjarevũ”, ùi aino mãcarõpedeca na mãcavũre.

⁷³ Jãve ðacacũyũme majare yõpe ùi aiyẽ bãquepedeca majeñesũ mãcũ Abraham mãcũre.

⁷⁴⁻⁷⁵ Meadacũyũme majare maucũvarivũre jarũvarĩ, maje memecarãjiyepe ayũ Jũmenijicũi jaboteinore jidũbevũva maja, mearore dãpiarĩ aru mearore ðarĩ Jũmenijicũi jãiyede cainũmũa, caride pũ maje yainũmũita, arejameða Jũmenijicũre.

⁷⁶ Aru mamacũre mãre arejameða Zacarĩas:

Mũ, jĩmacũ, coreõvarãjarama mũre Jũmenijicũi yãvaiyede coyũcaipõecũre caivũ pũeno parũcũre. Que baru mũ pũcũyũmũi maje jabocũ jipocai. Coyũcũyũmũi Jũmenijicũi yãvaiyẽ

mẽne põeva chĩori ne ãmeina teiyede, ne oatũvarãjiyepe ayũ ne ðaiyede ùi daquiyẽ jipocai.

⁷⁷ Coreõvare ðacũyũmũi mũ ùi põevare, ne majinajiyepe ayũ meadaquiyede nãre. Ñrecabe ãrumetecũyũ ne ãmeina

teiyede. ⁷⁸ Nõpe ðacũyũmũi mũ Jũmenijicũi cõmaje ãroje jãiyẽ boje põevare ãnijãravũ, majare meadaipõesũ bacũyũ ùi daquijãravũ baquinõi.

Yõpe mamajãravũ miadãepe baquiyẽbu majare. ⁷⁹ ãnijãravũ baquinõre yãvaiyede jãvene majide ðacũyũme põevare majare meadaipõesũ bacũyũ,

yópe pëoiye járe ðaiyepe ina ñeminoi dobarivure, ina yainore jidurivure. Yópe máre pëori maje cuiyepe, nopedeca cure ðacuyume majare cãrijimenoque. Jümenijicu majide ðacuyume caivu ina coreóvabevure üi yáviyede javene. Aru caivu majare cure ðacuyume cãrijimevva, arejamedá Zacarías.

⁸⁰Bucurejamedá Zacaríai mácu.

Paruríume curejamedá. Aru macaróí, pöcubenoi, curejamedá, üi coyurí buijárvu baquinó eaiyeta Israel bácuí páramenare.

Jesús üi pöeteino

(Mt 1.18-25)

2 ¹Dinmure üi jabodaimarare corevaicöjenejamedá César Augusto. ²No mamarumu ne ãmiáre toivaicöjeinmure Siria ãmicurijoboröcavure cöjeipöecu barejamedá Cirenio. ³Que baru caivu corevaimara márajivu ne bucva bácvu ne cue báquei copaidejaimada. ⁴Aru José máre Galileacaró ímaro, Nazaret ãmicuríimaroí cucu bácu, Judea ãmicuróí nurejamedá ü. Noi nuri, Belén ãmicuríimaro, üi ñecu mácuí curó mácaróí earejamedá José, David bácuí páramecu. Que baru nurejamedá José noi. ⁵Nuri, jímarepaco bacoðóre nurejamedá José. Ne ãmiáre toivarí ícöjenanurejaimada na. Aru dinmure micacota barejácada ö. ⁶Noi earí, curí, jueðocuvarejacoda María, ümu jueðojicu, mama jueðocure. ⁷Cuipöeva ne cáñami buidíñami marejávüya. Que baru ne cájuroroð eabeni, oteiáimara ne curíñami curí, jueðocuvarejacoda María. Jueðocuvarí, mamacure pavaicajeaque cümari, oteiáimara ne äitöcui tuorejacoda úre María, üi cáquiyepa ado.

Ángeleva Jesúí pöeteinore ne coyüino ovejavare coreipöevare

⁸Nore ovejavare coreipöeva curejaimada dáre ñami, ne oteiáimarare coreivu. ⁹Cüiná, Jümenijicui daroimu,

ángele, nore emenejamedá ü nára. Cojíé nurejavüya. Jümenijicui cojino pare cojidejavüya. Nára pëorejavüya. Ámei jidurejaimada ina oteiáimarare coreipöeva. ¹⁰Übenita ñai ángele arejamedá náre:

—Jidubejará müja. Müjare yáviaye méne davayutamu yu. Müjare aru caivure müje torojuráiyede davayubu yu. ¹¹Cari ñami David bácuí curíimaro mácaróí pöeteibi müje ámeina téjuroede meadacuyü, Jümenijicui epeimü, Cristo, müje jabocu bacuyú. Jávetamu. ¹²Müjare ji coyüimure noi earájaramu müja, cümaimure. Oteiáimara ne äitöcui paraibi, arejamedá ñai ángele.

¹³Coyurí buojarí, obedivu Jümenijicui daroimara, ángeleva, járorejaimada ñai ángeleque. Jümenijicure torojurí mearore jídejaimada ina ángeleva.

¹⁴Mearore jínajarevu Jümenijicure, cavarö mearocacure, caivu pueno parucure. Aru ijárvucavure, ijoboröcavure, Jümenijicure ju aivure, meaquiyebu, arejaimada na.

¹⁵Que arí buojarí, cavarö mearo Jümenijicui curóí copaidejaimada ina ángeleva. Ne nuriburu yóboita, ina oteiáimarare coreipöeva arejaimada ne bajumia:

—Járica, Beléí nuri, Jümenijicui cari coyüiyede járanurajarevu, arejaimada na.

¹⁶Que arí, cüiná nurejaimada. Nuri pu Joséda aru Maríare earejaimada na. Aru Maríai mácure máre, parayure, oteiáimara ne äitöcui earejaimada na. ¹⁷Que teni jueðojicure jári, Jümenijicui coyüiyepa báquede náre coyurejaimada ina oteiáimarare coreipöeva. ¹⁸Ne coyüiyede jápiaivu bácvu cucumari dápiarejaimada na. ¹⁹Aru Maríacapuravü ðie caiyede jápiarí, me dápiarejacoda öi ümei. ²⁰Que teni ne curöre copainurejaimada ina oteiáimarare coreipöeva. Nópe ne jápiaiyepa báquepe, ñai ángele üi coyüiyepa báquepedeca, járejaimada na. Que baru torojurí arejaimada ina oteiáimarare coreipöeva:

— iMи, Jūmenijicu, meacu bajutamu mu! are nurejaimada na.

Ne nūvaino Jesúre Jūmenijicui cūrami
(Lc 1.31)

²¹Ocho pajjāravua ūi pōeteniburū yóboi, sacerdotevare Maríai mácuí cajede buraicōjenejaimada, judíova ne đarí cōmajiyeye. Aru āmidorejaimada ūre Jesús, yópe ñai ángele ūi coyuiye báquepe Jesúí pōetequiyē jipocai.
²²No yóboi náre đaiye jauéde nópe Jūmenijicui đaicōjiyede ūi coyuiye báquepe Moisés bácure, ne meara marajiyépe ayu Jūmenijicui jáinore, Jesúí bucūva, ūre nūvari, muri nurejaimada Jerusalén āmicuríimaroi, jínajivu ūre Jūmenijicure. ²³Nópe đarí, đarejaimada yópe Jūmenijicui đaicōjiyede ūi toivaicōjiyē báquepe: “Caivu ina ūmu jueđova népacore mamarumu pōeteivu, Jūmenijicui beoimara márājivubu. Que baru náre jįjarā Jūmenijicure”.
²⁴Jūmenijicui cūrami nurejaimada. Aru mįjinare jįdejaimada Jūmenijicure, ne boarí juarājiyēpe aivu yópe Jūmenijicui đaicōjiyēpe mamarumu pōteyu boje: “Pucarā jurevare o pucarā cōriájurevare jįjarā Jūmenijicure”.

²⁵Dinūmure cūinácu ūmu curejameda Jerusalén āmicuríimaroi, ūi āmiá Simeón. Ñai Simeón meacu barejameda. Jūmenijicure urí, ūi đaicōjiyēpe đare nurejameda cainūma. Napini coreni vore nurejameda Israecavure cadatecyūre. Aru ñai Espírítu Santo ūque curejameda. ²⁶Ñai Espírítu Santo ūre coreóvare đarejameda yaibécuyēre jipocamia jámecūva ñai Jūmenijicui epeimū, Cristore. ²⁷⁻²⁸Que baru ñai Espírítu Santo ecore đarejameda ūre Jūmenijicui cūrami. Aru ina bucūva ne nūvaiyede diñami némacu Jesúre, ne đarājiyēpe ayu yópe Jūmenijicui đaicōjiyēpe, ūre đururejameda Simeón ūi āmuveai. Aru torojurí mearore jįyu Jūmenijicure arejameda:

²⁹Мн, јi јabocн, caride yн, mi pōecн, yaiquįivн cārijimecūva, yópe

mi coyuiye báquepe. ³⁰Jáivu yu ji baju ñai mi daroimū mácure, caivure meadaipōecure. ³¹Mu daroivu ūre caivu pōeva ne meatenajiyēpe ayu abujuvai jabocui paruéde jaruvarí. ³²Ū macūyáme pēoinope caivure ina pōeva judíova ānevure, ne majinajiyēpe ayu Jūmenijicure. Aru davacyūme mearore mi pōevare, Israecavure, arejameda Simeón.

³³Caiye iye ūi yávaiyede Jesúí borore jápiarí, Jesúí bucūva cūcumari dāpiarejaimada. ³⁴Aru Simeón torojurí mearore jįyu Jūmenijicure náre boje, yópe arejameda Maríare, Jesúí pacore: —Ñai jueđocu Jūmenijicui epeimume. Obedivu Israecavu bįjarājarama, ne ube boje ūre. Aru obedivu Israecavu meadaimara marájarama, ne ūe boje ūre. Ū coreóvare đacūyūme obedivu pōevare Jūmenijicui dāpiainore. Ūbenita obedivu pōeva ūre ju abeni ubenajarama. ³⁵Caiye iye pōeva ne đarājiyē mímacure ñájine đaquiyebu mure yópe cūináve táuve mi ūmene burarí cotūvaiyēpe. Que teni caivu majinajarama obedivu pōeva ne dāpiainore ne ūmei, arejameda Simeón Maríare.

³⁶Aru diñamine máre curejacođa cūináco Jūmenijicui yávaiyede coyūcaipōeco, ői āmiá Ana, Fanuel bācuí máco, Aser bācuí yajubocaco. Pare bucūco barejacođa ő. Bojūyo cāreja, purūbuođo bāco siete pajjuva curejacođa jįmarepacu bācūque. ³⁷Aru nomíopeco barejacođa ő ochenta y cuatro pajjuaita cāreja. Jūmenijicui cūramine etabeni, nore curí cainūma jįyo mearore Jūmenijicure, āmecova āiyede jēniarejacođa ūre jāravure aru ñamine máre. ³⁸Dinūmūmiareca Jesús yebai nuri, jįdejacođa mearore Jūmenijicure. Aru Jesúí borore coyūrejacođa caivu ina napini coreni vore cuivure Jūmenijicui meadaquiyede Jerusalén āmicuríimarocavure.

Jesúí bucūva Nazarei ne copaino
(Mt 2.23)

³⁹Jesúí bucūva đaiivu bācavu caiye iye Jūmenijicui đaicōjiyēpe,

copainurejaimada Galileacarō imaro Nazaret āmicuriimaroi. ⁴⁰Aru nēmacu me bucurejameda. Parucu barejameda. Urarō majidejameda ũ. Aru Jūmenijicu me járejameda ũre máre.

Jesús ũi majicaino majidipōevare

⁴¹Ūjuá coapa Pascua āmicurijāravure aru páure bucure ðaiye cube āiye torojuve teinūmure, Jesúi bucúva mūri nurejaimada Jerusalén āmicuriimaroi.

⁴²Que baru Jesúi cavaede doce paiujua nūvarejaimada ũre noi, ðarājivu yópe ne ðaiyepere ũjuá coapa. ⁴³Torojuve teniburu yóboi, obedivu ina pōeva copainuivu barejaimada Jerusalén āmicuriimarore jocarī. Ūbenita ñai jueodocú Jesús mautedejameda noi. Aru ũi bucúva coreóvabedejaimada. Dápiarī arīdurejaimada ne baju yópe: ⁴⁴“Obedivu pōeva mái nuñama.

Que baru Jesús nuñume apevuque”, arīdurejaimada na. Que dápiarī, nurejaimada cūinájāravu baju. Aru yóboi vorīdurejaimada Jesúre névu jēneboi. ⁴⁵Ūbenita ũre eabedejaimada. Que baru Jerusalén āmicuriimaroi copaini vorānurejaimada ũre.

⁴⁶Pare vore curejaimada na. Yóbecurijāravua yóboita, ũre earejaimada Jūmenijicui cūrami, dobacure bueipōeva majidivu jēneboi. Náre jápiayu aru jēniari jáñu marejameda ũ, Jesús. ⁴⁷Caivu ina jápiaivu ũre pare dápiarejaimada, ũi majié boje aru ũi yávaiye boje máre. ⁴⁸Ūi bucúva jáivu ũre noi, pare dápiarejaimada. Que teni jípacu arejacoða ũre:

—Bucu, ¿aipe teni que ðayurū ñujare? Jájacu, mipacu aru yu máre chíori voivubu ñuja mure, arejacoða ō.

⁴⁹Jesús arejameda náre:

—¿Aipe teni vodārāru yure?

¿Majibenaru muja jauřore yure memecayure jipacure? arejameda Jesús.

⁵⁰Ūbenita coreóvabedejaimada na iye ũi aiyede náre.

⁵¹Náre yóvarī ēmenejameda Nazaret āmicuriimaroi. Aru náre ju arī, yópe ne

urōpe ðayu barejameda. Jípacu caiye iyede me dápiarī, ārurejacoða ũi yávaiye báquede aru ũi ðaiye báquede máre.

⁵²Jesús me bucurejameda ũi baju aru Jūmenijicui majiéque máre. Jūmenijicu aru pōeva máre ũque torojurejaimada.

Juan Bautista ũi coyūino Jūmenijicui yávaiyede pōecubenoī

(Mt 3.1-12, 7.19, 12.34, 14.3-4, 23.33; Mr 1.1-8, 6.17-18; Lc 7.29; Jn 1.19-28, 8.33)

3 ¹No yóboi Roma āmicurō jaboteino jabocu curejameda, ũi āmiá Tiberius César. Ūi jaboteiyede quince paiujua baju, Poncio Pilato jaboteyu barejameda Judea āmicurijoborōcavure. Aru Herodes jaboteyu barejameda Galilea āmicurijoborōcavure. Herodei yócu, Felipe, jaboteyu barejameda Iturea aru Traconite āmicurijoborōcavure. Aru Lisania jaboteyu barejameda Abilinia āmicurijoborōcavure. ²Anás aru Caifás máre sacerdotevare jaboteipōeva marejaimada na. Dinūmure Jūmenijicu yávarejameda Juan Bautistare, Zacarías bācui mácure, pōecubenoī. Pōeva vaivure coyure curejameda nore. ³Ū nurejameda caino Jordán āmicuriya jia yebai. Coyuyū barejameda pōevare, ne Jūmenijicure jáðovarajiyepere ayu ocoque, ne chíori dápiarājiyepere ayu ne āmeina teiyede. Aru ne oatvarājiyepere ayu ne ðaiyede, “Jūmenijicu ārumetecuyume” ayu barejameda diede. ⁴Yópe toivarejaquemavu javede ñai Jūmenijicui yávaiyede coyucaipōecu bācu, ũi āmiá Isafas:

Jūmenijicure coyucaipōecu codoboboyure jápiarājarama pōecubenoī: “Meaðajarā muje ũmene copu etaburī maje jabocure, nopedeca muje meaðaiyepere daimare, ñai ũmū, muje pueðaimū, ũi daquiye jípacai. Que ðarī ðajocajarā muje āmeina teiyede, Jūmenijicui ðaroimū macuyū ũi daquiye jípacai, Jūmenijicui copu etaquiye ayu mujare. ⁵Caino ēmeino buiquíyebu. Aru caiye

cūracūa jōdaquiyeu. Ma nurimema nuritequiyeu. Aru ma yaribema máre yaritequiyeu. Jabovare aru jabova ámevure máre dajocarí ne ámeina teiyede oatvayie javvu náre ñai Jūmenijicui daroimū macuyú ũi daquiye jipocai. ⁶Caivu ijārvavucavu jārjarama Jūmenijicui daroquimure, pōvare meadaipōecure”, arí toivarejaquemavu Isaías bácu.

⁷Obedivu pōeva earejaimada Juan Bautista yebai, ũi jádovaquiyepe aivu náre Jūmenijicūque jiai. Ũi yebai eavure, náre arejaimada:

—iMuja, jūjovavubu, muje ðaiye boje mearape! iAru ádavape paivubu muja, muje ámedaiye boje apévure! Jūmenijicui jorojiquijāravu edaiyede, jáve dupini buojabenamu muja. ⁸Ðajarā muja yópe pōeva chíoiu ne ámeina teiyede, oatvavivu ne ðaiyepe. Muje baju abejarā: “Majeñecu Abraham mácu barejaquemavu. Jūmenijicu yōvarejaquemavu ũi mácure. Que baru meara bajutamu maja Jūmenijicui jáinore”, abejarā muja. Jáve coyuyubu mujare: Jūmenijicu buojai bi oatvayū cūraboare Abraham mácu pāramena máravure ðacuyū, ne ðarājīyepe ayū yópe ũi urōpe. ⁹Yópe jiore memepōecu ũi jáiyede jocucua jēidua mearua cubecure ũi jioi, ũi jaruvajuroepe dícuare toaboi, nopedeca Jūmenijicu jáñu mujare mearo ðabevure, jaruvacuyume mujare toabo cūiméboi, arejaimada Juan Bautista.

¹⁰Que teni ina obedivu pōeva jēniari járejaimada Juan Bautistare:

—¿Aipe ðarājidi ñuja? arejaimada.

¹¹Juan Bautista arejaimada náre:

—Pucacajea cuitótecajia cuvacu baru, jíjacu ñai cuvabecure. Aru áino cuvacu baru máre, jíjacu ñai áino cuvabecure, arejaimada.

¹²Ina jabovare táutura ícaipōeva Juan Bautista yebai nurejaimada, ũi jádovaquiyepe aivu náre Jūmenijicūque jiai. Aru arejaimada ũre:

—Mu, bueipōecu, ¿aipe ðarājidi ñuja? arejaimada.

¹³Ũ arejaimada náre:

—Ímejara pueno baju yo muje jabocui cōjeinore mujare. arejaimada.

¹⁴Apevu churarava máre jēniari járejaimada ũre:

—¿Aipe ðarājidi ñuja? arejaimada.

Ũ arejaimada náre:

—Tatobejarā apévū ne cuvadee.

Boarí jaruvavubejarā náre. Aru borocubejarā ũbenina ne ðabedeca, ne jínaiyepe aivu mujare táuturare, muje borocubenaiyepe aivu. Torojjarā muje memeni cuvae boje, arejaimada ũ.

¹⁵Obedivu pōeva coreivu barejaimada Jūmenijicui epequimure. Que baru Juan Bautista ũi que aipe boje, caivu ina pōeva dápiari ne ũmei jēniari járejaimada ne bajumia: “¿Cristo, Jūmenijicui epeimu, márica ñai?”

¹⁶Ũbenita Juan Bautista arejaimada náre:

—Yu jáve mujare jádovavū Jūmenijicure ocoque, muje chíori dápiaye boje muje ámeina teiyede. Ũbenita dacuyume ji yóboi cūinácu, ji pueno parucu. Ũ macuyúme jádovañu mujare Jūmenijicūque Espiritu Santoque, ũi cuvuyepere ayū mujaque aru ũi cadatequiyepe ayū mujare máre. Aru ũ macuyúme jádovañu mujare Jūmenijicūque toaque máre, muje meara tenaiyepe ayū yópe pōeva ne meadaiyepere táure toaque, aru ũi ñájine ðaquiyepe ayū mujare, meara tebedu. Que baru caivu pueno meacu bajube ũ. Yúcapūravu pare ũi cāchinocacubu. Que baru ũre cadateni buojabevu yu. Pu oarí buojabevu yu duayū ũi curaidoa buoimeare. ¹⁷Yópe oteiyepere memepōecu ũi veoiyepe jaraboque, oteiyepere epecuyū ũi epeiñami jívu, aru oteiyepere cajeare juacuyū, nopedeca Jūmenijicu ũre ju aivure epecuyume ũi jaboteinoi aru ũre ju abevure jaruvacuyume toabo cūiméboi, arí buedejaimada Juan Bautista.

¹⁸Nópe coyurejaimada Jūmenijicui yávaiye méne meadaipōecure, darocuyure ina pōevare, náre

mearo ðaicõjeñ, ne ñájiemenajiyep
 ayu toabo cüiméboi. ¹⁹Aru Galilea
 ãmicurijoborõcavü ne jabocü Herodede
 jararejameða Juan Bautista, ñi
 cüvae boje ñmacü márepacore, õi
 ãmiá Herodías, aru caiye ape ñi
 ãmeina teiye boje máre. ²⁰Ûbenita
 Herodes Juan Bautistare jápaiyübecu,
 jarüvaicõjenezameða úre ãmeina teivüre
 jëni jacoiñami.

**Juan Bautista ñi jáðovaino Jesúre
 Jümenijicüque**

(Mt 3.13-17; Mr 1.9-11; Lc 9.35)

²¹Juan Bautista jáðovañü marejámeða
 Jümenijicüque jiai caivü ina obedivü
 põevare. Aru Jesús máre nürejameða
 ñi yebai, ñi jáðovaquiyepere ayu úre
 Jümenijicüque jiai. Ûi jáðovariburu
 yóboi, Jesús jëniñü marejámeða
 Jümenijicü. Dinüüre cavarõ mearo
 Jümenijicü curõ vorí nürejavüya.
²²Que teni jurecope Espíritu Santo
 émeni darejameða ñi puenora. Aru
 jápiarejaimaða apeno yávainore cavarõ
 mearo Jümenijicü curõque aiyede yöpe:
 “Mü, jímacü, jí ümü, me torojüvü yü
 müre”, arejameða Jesúre Jümenijicü.

**Jesucristo ñi jipocacavü bávavüre
 coyüino**
 (Mt 1.1-17)

²³Jesús treinta paiñüa cüvavü
 mamarümu buenü búrejameða põevare.
 Ina marejáimada Jesúi búcvü: Põeva
 dápiarejaimada úre Joséi mácvüre. Aru
 José Elí bácvü mácvü barejaquémavü.
²⁴Aru Elí bácvü Matat bácvü mácvü
 barejaquémavü. Matat bácvü Leví
 bácvü mácvü barejaquémavü. Leví bácvü
 mácvü barejaquémavü. Melqui bácvü mácvü
 barejaquémavü. Melqui bácvü Jana mácvü mácvü
 barejaquémavü. Jana mácvü José bácvü mácvü
 barejaquémavü. ²⁵Aru José bácvü
 Matatías bácvü mácvü barejaquémavü.
 Matatías bácvü Amós bácvü mácvü
 barejaquémavü. Amós bácvü Nahúm
 mácvü mácvü barejaquémavü. Nahúm
 mácvü Esli bácvü mácvü barejaquémavü.
 Esli bácvü Nagai bácvü mácvü

barejaquémavü. ²⁶Aru Nagai bácvü Maat
 bácvü mácvü barejaquémavü. Maat bácvü
 Matatías bácvü mácvü barejaquémavü.
 Matatías bácvü Semei mácvü mácvü
 barejaquémavü. Semei mácvü Josec
 bácvü mácvü barejaquémavü. Josec
 bácvü Judá bácvü mácvü barejaquémavü.
²⁷Aru Judá bácvü Joanán mácvü mácvü
 barejaquémavü. Joanán mácvü Resa
 bácvü mácvü barejaquémavü. Resa bácvü
 Zorobabel bácvü mácvü barejaquémavü.
 Zorobabel bácvü Salatiel bácvü mácvü
 barejaquémavü. Salatiel bácvü Neri bácvü mácvü
 barejaquémavü. ²⁸Aru Neri bácvü
 Melqui bácvü mácvü barejaquémavü.
 Melqui bácvü Adi bácvü mácvü
 barejaquémavü. Adi bácvü Cosam mácvü
 mácvü barejaquémavü. Cosam mácvü
 Elmadam mácvü mácvü barejaquémavü.
 Elmadam mácvü Er bácvü mácvü
 barejaquémavü. ²⁹Aru Er bácvü Josué
 bácvü mácvü barejaquémavü. Josué bácvü
 Eliezer bácvü mácvü barejaquémavü.
 Eliezer bácvü Jorim mácvü mácvü
 barejaquémavü. Jorim mácvü Matat
 bácvü mácvü barejaquémavü. ³⁰Aru Matat
 bácvü Leví bácvü mácvü barejaquémavü.
 Leví bácvü Simeón mácvü mácvü
 barejaquémavü. Simeón mácvü Judá
 bácvü mácvü barejaquémavü. Judá bácvü
 José bácvü mácvü barejaquémavü. José
 bácvü Jonam mácvü mácvü barejaquémavü.
 Jonam mácvü Eliaquim mácvü mácvü
 barejaquémavü. ³¹Aru Eliaquim mácvü
 Melea bácvü mácvü barejaquémavü.
 Melea bácvü Mena mácvü mácvü
 barejaquémavü. Mena mácvü Matata
 bácvü mácvü barejaquémavü. Matata
 bácvü Natán mácvü mácvü barejaquémavü.
³²Aru Natán mácvü David bácvü mácvü
 barejaquémavü. David bácvü Isai bácvü mácvü
 mácvü barejaquémavü. Isai bácvü Obed
 bácvü mácvü barejaquémavü. Obed bácvü
 Booz bácvü mácvü barejaquémavü. Booz
 bácvü Sala bácvü mácvü barejaquémavü.
 Sala bácvü Naasón mácvü mácvü
 barejaquémavü. ³³Aru Naasón mácvü
 Aminadab bácvü mácvü barejaquémavü.
 Aminadab bácvü Admin mácvü mácvü
 barejaquémavü. Admin mácvü Arni

mácuí mácu barejaquémavɯ. Arni mácu Esrom mácuí mácu barejaquémavɯ. Esrom mácu Fares báciu mácu barejaquémavɯ. Fares báciu Judá báciu mácu barejaquémavɯ. ³⁴Aru Judá báciu Jacob báciu mácu barejaquémavɯ. Jacob báciu Isaac báciu mácu barejaquémavɯ. Isaac báciu Abraham mácuí mácu barejaquémavɯ. Abraham mácu Taré báciu mácu barejaquémavɯ. Taré báciu Nacor báciu mácu barejaquémavɯ. ³⁵Aru Nacor báciu Serug báciu mácu barejaquémavɯ. Serug báciu Ragau báciu mácu barejaquémavɯ. Ragau báciu Peleg báciu mácu barejaquémavɯ. Peleg báciu Heber báciu mácu barejaquémavɯ. Heber báciu Sala báciu mácu barejaquémavɯ. ³⁶Aru Sala báciu Cainán mácuí mácu barejaquémavɯ. Cainán mácu Arfaxad báciu mácu barejaquémavɯ. Arfaxad báciu Sem mácuí mácu barejaquémavɯ. Sem mácu Noé mácuí mácu barejaquémavɯ. Noé mácu Lamec báciu mácu barejaquémavɯ. ³⁷Aru Lamec báciu Matusalén mácuí mácu barejaquémavɯ. Matusalén mácu Enoc, ñai yaibécɯ, ñi mácu barejaquémavɯ. Enoc Jared báciu mácu barejaquémavɯ. Jared báciu Mahalaleel báciu mácu barejaquémavɯ. Mahalaleel báciu Cainán mácuí mácu barejaquémavɯ. ³⁸Aru Cainán mácu Enós báciu mácu barejaquémavɯ. Enós báciu Set báciu mácu barejaquémavɯ. Set báciu Adán mácuí mácu barejaquémavɯ. Aru Adán mácu Jümenijicui mácu barejaquémavɯ.

Abujuvai jabocɯ Jesúre ñi jujovariduino

(Mt 4.1-11; Mr 1.12-13)

4 ¹Jesús, Espírítu Santoi ðaicójeimɯ, copaidejameða Jordán ámicuriya jiare jocarí. Ñai Espírítu Santo ñvarejameða úre pōcɯbenoi. ²Jesús cùrejameða nore cuarenta pajjārvavɯ. Yéde ámenejameða noi ñi curijārvavare. Aru abujuvai jabocɯ, Satanás ámicucɯ, jujovaiyuridurejameða úre. Que baru no yóboi ávñé ijidejavüya úre.

³Que baru ñai abujuvai jabocɯ arejameða Jesúre:

—Jāveneca Jümenijicui mácu baru, áiye ðajacɯ ibo cūraboro, arejameða.

⁴Jesús arejameða ñai abujuvai jabocure:

—Mi aiyepe ðabevɯ yɯ. Jümenijicui yávaiye ñi toivaicójeiye báque coyúivɯ yópe: “Pōeva cùbenama ne áiye matuiyeda. Quénora curājarama caiye Jümenijicui yávaiyeque máre”, arejameða Jesús.

⁵Que arıburu yóboi, ñai abujuvai jabocɯ ñvarejameða Jesúre cūraccú ñmujuricú pñenoi. Jádovarejameða maumena caiye ijārvavcarōa ĩmaroare.

⁶Aru arejameða úre:

—Yɯ jíquijivɯ mure ji jaboteinore aru caiye die cùve méne máre, mi jabotequiyepo ayɯ die ðe ji parúéque. Jíyebu caiye iye ijārvavque. Que baru buojaivɯ jíyɯ ji ñmure. ⁷Jíquijivɯ mure caiye ijārvavquede, mi ñnatutarı mearore jídu yure, arejameða ñai abujuvai jabocɯ Jesúre.

⁸Aru Jesúcapūravɯ arejameða úre:

—Mi aiyepe ðabevɯ yɯ. Jümenijicui yávaiye ñi toivaicójeiye báque coyúivɯ yópe: “Mearore jíjacɯ mi jabocɯ Jümenijicure aru cünácɯra memecajacɯ ñi urópe”, arejameða Jesús.

⁹Que teniburu yóboi, ñai abujuvai jabocɯcapūravɯ ñvarejameða Jesúre Jerusalén ámicurıımaroi. Úre muri nure ðarejameða Jümenijicui cūrami pñenora. Aru arejameða úre:

—Jāve Jümenijicui mácu baru, turı ñujacɯ yore jocarı pñ joboróita. ¹⁰Jümenijicui yávaiye ñi toivaicójeiye báque coyúivɯ mi borore yópe: “Jümenijicɯ jarocɯyume ñi ángelevare, ne coreñajiyepo ayɯ mure.

¹¹Jāmórajarama mure ne pñuáque, mi ijíe tebequiyepo aivɯ mi cùbobare ibo cūraboque”, arı toivarejaquemavɯ. Que baru mi turı nuru, yɯ jāñɯ buojacɯyumu Jümenijicɯ ðayure yópe ñi aiyepedeca, arejameða Jesúre ñai abujuvai jabocɯ.

¹²Jesúcapūravɯ arejameða úre:

—Mi aiyepe ðabevu yu. Nopedeca Jūmenijicui yávaiye ũi toivaicōjeiye báque coyivuvu yópe: “Jujovabejacu mi jabocu Jūmenijicure. Jáðovaicōjemejacu ũi paruéde”, arí toivarejaquemavu. Que baru yéde ðabevu yu, jáðovaicōjeiurocu ũi paruéde. Majivu yu paruere, arejameða Jesús.

¹³Nópe ðariduyū ñai abujuvai jabocu jujovari majibedejameða Jesúre. Que baru nurejameða Jesúre jocarí apenunuita.

Jesús Galileai ũi bueni buino

(Mt 4.12-17; Mr 1.14-15)

¹⁴Jesús ũi copaiyede Galilea āmicurijoboroi Espiritu Santoi ðaicōjeiye paruéde cuvacu barejameða. Aru pōeva yávarejaimaða ũi borore caino ijoborocaroi. ¹⁵Jesús buedejameða ne judíovai cójijiñamiai ímaroa coapa. Aru caivu torojurejaimaða ũre.

Jesús Nazarei ũi nuino

(Mt 13.53-58; Mr 6.1-6; Jn 4.44)

¹⁶Jesús nurejameða Nazaret āmicuriiimaroí, ũi bucuiimaro mácaroi. Ecorejameða judíovai cójijiñami ne jabuóvaujāravu sábadoi, yópe ũi ðaiyepe cainunua. Aru nacajari jári borotedejameða Jūmenijicui yávaiyede. ¹⁷Jídejaimeða ũre Jūmenijicui yávaiyede coyucaipōecu Isaías bácuí toivaiye báquede. Aru voarí jáñu earejameða yópe arí toivaino mácarore:

¹⁸Ji jabocu Jūmenijicu ũi Espiritu cubi yáque. Que baru ũi epeimumu yu, coyucuyū ũi yávaiye méne ina cómajē ārojarivure. Daroibi yure, ji meadaquiyepē ayū ina chíovure ne ũmei. Aru coyucōjeimi yure, ji joðequiyepē ayū ina buoimarape paivure ne āmeina teiye boje. Járe ðacuyumu ina jári eabevure. Joðede ðacuyumu ina āmeina ðaimarare máre. ¹⁹Coyucuyumu ne coreóvaino eainore ne jabocu meadaquinore náre, jári borotedejameða Jesús.

²⁰Jári boroteni buojari, Jesús iye toivaiye báquede bieni, jídejameða judíovai cójijiñami caðateipōecure. Aru dobacunurejameða, buecuyū ina pōevare. Que teiyede járejaimaða ũre pare caivu ina curivu judíovai cójijiñami jivui. ²¹Jesús yávari báyu, arejameða yópe:

—Caride yu ðayubu muje jēneboi yópe iye Isaías bácuí toivaiye báquepe javede, arejameða Jesús.

²²Caivu coyurejaimaða mearo Jesúsí borore. Aru pare dápiarejaimaða mearo ũi coyuiyede jápiari. Aru jēniari járejaimaða ne baju:

—¿Joséi mácu āmeni ñai? arejaimaða.

²³Náre arejameða Jesús:

—Jāveneca arājaramu muja yópe: “Mu, juoipōecu, juojacu mi bajuma, jáðovacuyū pōevare juorí majicure”. Aru arājaramu muja yure: “Ñuje jápaiyede mi ðaiye báquede Capernauí, nopedeca ðajacu yore, mi joboró bajure”, arejameða.

²⁴Aru yávare nurejameða:

—Jāve coyuyubu mujare: Ácu Jūmenijicui yávaiyede coyucaipōecu cubebi ne me copu etaimu ũi joborore.

²⁵Que baru jāve coyuyubu mujare: Cūrejaquemavu obedivu nomiópeva Israecavu bácvu Elíai curijāravua báquede. (Ñai Elíare Jūmenijicu nūvarejaquemavu Paraíso āmicurói apucura.) Aru ocabedejaquemavu yóbescurijua corica bají. Que baru āvúene nājinejaquemavu caino joborore. ²⁶Ūbenita Elías caðatecunumenejaquemavu ina nomiópeva bácvu yebai. Qué Nora nūrejaquemavu cūináco nomiópeco báco yebai, Sarepta āmicuriiimaroí, Sidón āmicuriiimaro joabenoí cūco bácore.

²⁷Nopedeca cūrejaquemavu obedivu pojeivu Israecavu bácvu Eliseo bácuí curijāravua báquede. Ūbenita Eliseo bácu meaðabedejaquemavu ina caivure. Cūinácurata meaðarejaquemavu, Naamán āmicucure, Siria āmicurijoborócasu bácvure. Aru ina pucarā, ico nomiópeco báco aru Naamán

mácu máre, judíoiva ãmenejaquemavu na, arejameða Jesús.

²⁸Ne jápiaiyede iye ùi coyuiyede, caivu ina judíoiva cójjiñami curivu jorojinejaimada pare Jesúre. ²⁹Nacajari jabuborí nuvarejaimada Jesúre ìmarore jocarí. Ùre nuvarejaimada cùracù puenoi, jaruvaràjivu dicù tũrobù cãchinoi. ³⁰Ûbenita Jesús vaicãnuvejameða ne jêneboi, náre jocarí.

Abujucu ùi ìmamu Jesúre ùi copũino
(Mt 7.28-29; Mr 1.21-28)

³¹Jesús ĕmeni nurejameða Galileacarõ ìmaroi, Capernaum ãmicuríimaro. Aru noi buedejameða põevare judíoiva jabuvaijãravu sãbadoi. ³²Ina jápiaivu ùi bueiye, torojurí cucumarejaimada ùi bueiye, ùi yãvaiye boje paruéque. ³³Aru curejameða judíoiva cójjiñami cũinãcu ùmu, abujucu ùi ìmamu. Coðoboborí arejameða Jesúre:

³⁴—Mũ, Jesús Nazarecacu, cãrijovamejacu ñujare. ¿Yéde ucũrũ mu ñujare? ¿Jaruvacũdayu dacũrũ mu ñujare? Coreõvaivu yu mure. Jũmenijicui mácu meacu bajubu mu, arí coðoboborejameða.

³⁵Ûbenita Jesús bi aicõjenejameða ùre:

—Mũ, bída, etajacu ñai ùmure jocarí, arejameða Jesús.

Que baru ñai abujucu ture ðarejameða ùi ìmamure joborõi ne jêneboi. Etarejameða ùre jocarí, ãmeno ðabecũva ñai ùmure. ³⁶Aru cucumari jáivu ina põeva, arejaimada ne baju:

—Paruéque yãvaibi ñai ùmu. Ùi yãvaiye paruéque jaruvaibi abujuvare. Aru etadama ména, arejaimada.

³⁷Que baru yãvarejaimada Jesúi borore caino Galilea ãmicurijoborõi.

Jesús ùi meadaino Simón Pedro
vãcore

(Mt 8.14-15; Mr 1.29-31)

³⁸Dinũmu Jesús etarejameða judíoiva cójjiñamine jocarí. Aru ecorejameða Simón Pedroi cũrami. Ico Simón Pedroi váco moimo marejacoda

pare. Coyurejaimada Jesúre õi borore.

³⁹Que baru Jesús õi yebai nacachini, dajocaicõjenejameða moinore óre jocarí. Maumejiena dajocarejavũya moino óre. Dinũmũmia nacajari, ãiyede meadarí jíðejacoda náre.

Jesús ùi meadaino obedivu ijimarare
(Mt 8.16-17; Mr 1.32-34)

⁴⁰Dinainumica ñamijie baji aviã ùi dorĩburu yõboi, jabuvaijãravu vaiyede, nuvarejaimada Jesús yebai obedivu ijimarare. Aru tuorejameða Jesús ùi puruque náre coapa. Que ðarí meadarejameða náre. ⁴¹Aru etarejaimada ijimarare jocarí abujuva, coðoboborí arejaimada Jesúre:

—Murecabu Jũmenijicui mácu, arejaimada Jesúre.

Ûbenita Jesús bi aicõjenejameða náre, ne majié boje Jũmenijicui daroimũ mácu Cristore.

Jesús Galileai ùi bueino
(Mr 1.35-39)

⁴²Miadãe tuiyede Jesús nurejameða põecũbenoi. Ûbenita põeva vorí earejaimada ùre. Ùi yebai earí, jẽniarejaimada ùre, ùi nũmequiyepa aivu náre jocarí. ⁴³Ûbenita Jesús arejameða náre:

—Nũiye javvu yure, coyucũyu apenoa ìmaroare máre Jũmenijicui jaboteiyede põevare. Que baru daivu yu, coyucũdayu diede, arejameða Jesús.

⁴⁴Que arí, coyure nurejameða judíoiva cójjiñamiai caino Galilea ãmicurijoborõi.

Jesús ùi bueimarare nrarõ moare
boaré ðaino

(Mt 4.18-22, 13.1-2; Mr 1.16-20, 3.9-10, 4.1; Jn 21.3, 6)

5 ¹Põeva obedivu nuivu Jesús yebai, ùi cuede macajitabu urabũ Genesaret ãmicurijitabu ĕcarui, pare copiporejaimada ùre, jápiaiyurivu Jũmenijicui yãvaiyede. ²Jesús járejameða pũcacũa jiaðocũare macajitabu urabũ ĕcaru yebai. Dicũái

moa boaipõeva núrejaimada dicúá yebai, joaivu ne pápicuare. ³Jesús jatuyu bácu cūinácū jiadocūi, Simón Pedro jicūi, jaroicõjenezaimada joajíemaque écarure jocarí. Aru dobacu dicūi, bueni búrejaimada ina obedivu põevare. ⁴Yávarí buojayu bácu arejaimada Simón Pedrorre: —Nuvajacu mi jiadocüre macajitabu ñmujurõ baji. Aru noi jaboájará muxe pápicuare, moa boarájivu, arejaimada Jesús.

⁵Simón Pedro ju ayu, arejaimada Jesúre:

—Mu, bueipõecu, caiñami memeniduvu ñña. Ñbenita ye boabétevu. Ñbenita mi cõjeiye boje, jaboáquijivu ji pápicure, arejaimada.

⁶Que teni ñaivu bácvu yópe Jesúi coyuiyepere, jënejaimada obedivu moare. Codedejaimada ne pápicure. ⁷Dinumu “Yareni dajará”, arejaimada ne yóvaimarare, apecū jiadocūcavure, ne cadatenaearájiyepere aivu. Aru earí, buivárejaimada caipucacūa jiadocūare coicúa baju. ⁸Yópe teiyede jári, Simón Pedro ñuatutarí Jesús yebai, arejaimada úre:

—Mu, ji jabocu, ñujacu yure jocarí, ji ámeina teiye boje, arejaimada Jesúre.

⁹Que baru Simón Pedro aru úcvu máre cucumarejaimada, urarõ ne moa boaiye boje. ¹⁰Santiago aru Juan máre, Zebedeoi mára, Simón Pedroi yóvaimara marejáimada. Cucumarejaimada na máre. Ñbenita Jesús arejaimada Simón Pedrorre:

—Jidubejacu. Caride epequijivu mure, mi davaquiyepere põevare ji yebai yópe mi moare davaiyepere pápicuque, ji meadaquiyepere náre, arejaimada Jesús.

¹¹Que teni jiadocūa eaiyede écarui, dajocaivu bácvu caiyede nurejaimada Jesúque.

Jesús ñi meadaino pojeyure

(Mt 8.1-4; Mr 1.40-45)

¹²Jesús ñi cuede cūináro ímaroi, ñi yebai nurejaimada cūinácu pojeyu. Aru Jesúre jári, ñuatutarejaimada joborõi, puedacuyu úre. Aru jëniarejaimada:

—Mu, ji jabocu, ucu baru, meadajacu ji pojeiyede. Buojaivu mu meadayu yure, arejaimada.

¹³Dinumure Jesús, ñi puruque jabióvarí troyu, arejaimada úre:

—Uvu yu. Caride meatejacu mu, arejaimada Jesús.

Yópe ñi aiyede vaidéjavūya úre.

¹⁴Jesús, coyucõjemecu aprevure, arejaimada:

—Cūiná nuri, jádovajacu sacerdotede.

Aru jíjacu mi meateiye boje, yópe Jñmenijicui ñaicõjeiyede ñi coyuiye báquepe Moisés bácvure, põeva ne coreóvarájiyepere ayu mi meateinore, arejaimada úre Jesús.

¹⁵Ñbenita pñeno baju coyuiyu barejáimada Jesúi borore. Obedivu põeva cõjijidejaimada jápiaivu, aru úre meadacõjeiyurivu náre ijiéde. ¹⁶Que baru ina obedivu cue boje, Jesús nurejaimada põecubenoí, jëniacuyu Jñmenijicucue.

Jesús ñi cure ñaino nacajaiye majibecure

(Mt 9.1-8; Mr 2:1-12)

¹⁷Cūinájárvu Jesús ñi bueiyede põevare, dobarejaimada noi fariseovacavu, ina Jñmenijicui ñaicõjeiyepere ñaivu, aru Jñmenijicui yávaie báquede bueipõevacavu máre, eaiyu bácvu cainoa ímaroa Galilea ámicurõre, Judea ámicurõre, aru Jerusalén ámicuriimarore jocarí máre. Jñmenijicui paruéde curejaimada Jesús, meadacuyu ijimarare. ¹⁸Dinumu aprevu ñmva nuvarejaimada ñi yebai cūinácu ñmu, nacajaiye majibecure, ñi parainoque. Ecoiyurejaimada cñrami jívui Jesús yebai. ¹⁹Ñbenita eabedejaimada ne ecorájino, obedivu põeva cue boje. Que baru muri nuri cñrami pñenora, voarí diede, émeóvarejaimada ijimure ñi parainoque põeva jëneboi Jesús yebai. ²⁰Náre coreóvayu ju aivure, Jesús arejaimada ñai nacajaiye majibecure:

—Mu, ji umu, mi ámeina teiyede jaruvarí, árgumeteiyu yu diede, arejaimada Jesús.

²¹ Dinumtu ina Jūmenijicui yāvaiye báquede bueipōeva aru fariseova máre dápíarí búrejaimada yópe: “¿Yécuba ñai ũtu āmeina yāvayū Jūmenijicure? Ñame buojabema jaruvaivu āmeina teiyede. Quénora cūinácúrabé Jūmenijicu buojarí jaruvayū diede”, arí dápíarejaimada.

²² Aru Jesús, jári coreóvarí ne baju ne dápíaiyede, arejamedá náre:

²³ —¿Aipe teni que arí dápíaiyevũ muja? Maiyójabevu yópe aru apesure: “Mi āmeina teiyede jaruvarí, ārumeteivu yu”, ji paruéde jáđovame boje ji que coyuiyede. Ũbenita maiyójarótamu nacajari cuicōjenu nacajaiye majibecure. Ũre cure đayū baru, jáđovaquijivu ji paruéde. “Mi āmeina teiyede jaruvaivu”, ji aiyede, coreóvabevu muja Jūmenijicui ārumeteinore diede. Ũbenita ñai cūvacu Jūmenijicui majié paruéde, úrame yópe đarí jáđovaiye majicu. Quécura Jūmenijicūvacari meadarí majibi ijimarare. ²⁴ Que baru muje majinajiyepe ayu Jūmenijicui daroimú mácu ũmure, yu, paruéde cūvacure ijāravure jaruvacuyū āmeina teiyede, yópe đaquijivu yu, arejamedá Jesús.

Dinumtu arejamedá nacajaiye majibecure:

—Yópe aivu yu mure: Nacajari, mi parainore ini, nujacu mi cūrami, arejamedá Jesús.

²⁵ Dinumtuma nacajari, ũi parainore ini, etarejamedá obedivu jēneboi. Aru mearore jídejamedá Jūmenijicure.

²⁶ Caivu ina pōeva máre, pare dápíaiyū, mearore jídejaimada Jūmenijicure.

Jesús ũi “Dajacu” aino Levíde
(Mt 9.9-13; Mr 2:13-17; Lc 15.1-2)

²⁷ No yóboi, Jesús etarí nuñu járejamedá cūinácú judíovacacu, Roma āmicuró jaboteino jabovare táutura ícaipōecu, ũi āmiá Leví, dobacure ne bojedainoi. Aru arejamedá úre:

—Dajacu yúque, arejamedá Jesús.

²⁸ Aru nacajari, dajocayū caiyede, nurejamedá Jesúsque.

²⁹ Que teniburu yóboi, Leví torojuve tedejamedá āino uraróque ũi cūrami,

puedacuyū Jesúsre. Aru obedivu jabovare táutura ícaipōeva aru apevu pōeva máre dobarejaimada Levíque aru Jesúsque máre. ³⁰ Ũbenita Jūmenijicui yāvaiye báquede bueipōevacavū aru fariseovacavū máre āmeina yávarí búrejaimada Jesúsí bueimarare. Arejaimada:

—¿Aipe teni āri, ũcuri teivuvũ muja ina jabovare táutura ícaipōevaque aru āmeno đaipōevaque máre? arejaimada náre.

³¹ Jesús ju ayu, arejamedá náre:

—Meara pōevare juoipōecui cađateiye jaubevu. Quénora ijimarare ũi cađateiye jauvu. ³² Dabedecacacu yu ijāravui, cutucuyū mearare ne baju dápíainore. Quénora darejacacu yu, meadacuyū āmenare, ne chíorajiyepe ayu ne āmeina teiyede, Jūmenijicui ārumetequiyepe ayu diede, arejamedá Jesús.

Pōeva āmevva āiyede ne jēniaino
Jūmenijicuce

(Mt 9.14-17; Mr 2.18-22)

³³ Dinumtore jēniari járejaimada Jesúsre ina fariseova:

—¿Aipe teni Juan Bautistai bueimara aru nuje bueimara máre āmevva āiyede, ũbenita mi bueimara āmevva āmema āiyede? arejaimada.

³⁴ Jesús arejamedá náre:

—Ina purubuoyu ũi cutuimara ne torojuve tenajiyepe ayu ũi puruboiyede, ye āmevva āmema āiyede ũi cuede cāreja náque. Nopedeca ji bueimara torojarivu ji cuede náque, āmevva āmema āiyede.

³⁵ Ũbenita ji mauva ne nuvarajiyede yure, ji bueimara chíoiyu āmenajarama āiyede, arejamedá Jesús.

³⁶ Jēvari coyurejamedá náre:

—Ñame buojabema buraiyu cūinájeve cuitótecaje mamacajede, jēorajivu cuitótecaje javecaróre. Nópe đaru, āmedajebu cuitótecaje mamarore. Aru mamajeve jēmejebu cuitótecaje javecaróre. Quédeca ñame buojabema ju aivu ji bueiye mamaene aru javeque bueiye máre. ³⁷ Nopedeca buojabema yuavū vino úyacorore mamacorore āmacaje

curubũ javēcacurubũque. Que ðaru, cõeõvaje bu dicurubũ. Aru yurĩ bĩjajebu dicoro. Bĩjajebu dicurubũ mãre. ³⁸Ûbenita ne yuaru vino ýuaicorore mamacorore mamacurubũque, bĩjajebũ dicoro. Quédeca ñame buojabema ðaivu yõpe ji bueiye mamaepe, ðare nuivu baru yõpe ne jave ðaiye báquepe. ³⁹Aru ñai ũcuñũ mácu icoro mamaboqueicorore ũcuiyubecu mamaene ajebu yõpe: “Javequetamu me baju”. Nopedeca apevu põeva jãpiayubevũ Jũmenijicũ yávaiye mamaene, ne dãpiayibe boje javeque yávaiye pũeno me bajure, arĩ buedejameða náre Jesús.

**Jesũ bueimara ne puõino oteiye de
jabuõvaujãravũ**

(Mt 12.1-8; Mr 2.23-28)

6 ¹Apejãravũ, judõovai jabuõvaujãravũ sãbadoi, Jesús ũi vaiyede oteiye curõi, ũi bueimara diede jẽni, pũruáque cõjuñõri, ãrejaimaða. ²Aru apevu fariseovacavũ jẽniari jãrejaimaða náre: —¿Aipe teni ãmeno ðaivurũ muja, maja judõova maje ðaicõjemenope, jabuõvaujãravure? arejaimaða náre.

³Ûbenita Jesús, ũi dãpiayibe boje ũi bueimara ãmeno ðabevure, arejameða náre: —¿Jãve ãrumetenaru muja yo David bácu ðaino mácarõre ãvué ijíede ýre aru ýque curivure mãre? ⁴Û mácu ecorejaquemavũ Jũmenijicũ cũrami. Aru ãrejaquemavũ pãure, Jũmenijicure jíye báquede ina sacerdoteva ne ãiyede, sacerdote ãmecũ bácvacari. Aru jídejaquemavũ ýque curivure mãre, sacerdoteva ãmevũ bácvareca. Ûbenita Jũmenijicũ ñãjine ðabedejaquemavũ na mácvure, arejameða Jesús.

⁵Cojedeca Jesús arĩ buedejameða:

—Yũ, Jũmenijicũ daroimũ mácu ũmũpe, jabocubũ yũ. Que baru ðaicõjeni buõjãivu yũ põevare ne ðaiyede caijãravũare aru jabuõvaujãravũare mãre, arejameða Jesús.

**Jesũ ũi meaðaino ũmũ ãmuve
jiacubecure**

(Mt 12.9-14; Mr 3.1-6)

⁶Apejãravũ cojedeca, judõovai jabuõvaujãravũ sãbadoi, Jesús

ecorejameða ne cõjijĩñami. Aru buenĩ búrejameða põevare. Noi curejameða cũinãcu ũmũ, ãmuve meapũravũcaãmuve jiacubecu. ⁷Jũmenijicũ yávaiye báquede buei põeva aru fariseova mãre nore curivũ coreni jãrejaimaða Jesũre. Jãiyurivũ barejãimada meaðayure ýre ne jabuõvaujãravũ, boro coyurĩ adaiyurĩduivũ Jesũre. ⁸Ûbenita ũ, majicũ ne dãpiayibe, arejameða ñai ũmũ ãmuve jiacubecure:

—Nacajari nũjacu põeva jẽneboi, arejameða Jesús.

Jesũ ũi que aiyede, ñai ũmũ nacajari nũrejameða. ⁹Dinũmũma Jesús arejameða náre:

—Jẽniari jãquijivũ cũinãro mujare. ¿Yéde ðaicõjeini Jũmenijicũ jabuõvaujãravure, mearore o ãmenore; meaðaru põevare o boarĩ jarũvaru náre? arejameða Jesús.

Ûbenita bi arejaimaða na.

¹⁰Que baru Jesús, jãñũ ina curivure ũi yebai, arejameða ñai ũmũ ãmuve jiacubecure:

—Jabiõvajacu mi ãmuvede, arejameða Jesús.

Ûi jabiõvaiyede, meatedejavũya ũi ãmuve. ¹¹Ûbenita apevu, jorojĩni pare, jẽniari jãrejaimaða ne bajumia:

—¿Aipe ðarãjídica maja ñaine? arejaimaða na.

**Jesũ ũi beoino ũi yávaiye méne
coyucõjeimarava**

(Mt 10.1-4; Mr 3.13-19)

¹²Cũinãjavũ Jesús nurejameða cũracũai, jẽniacũñũ. Aru noi jẽniarejameða Jũmenijicũque caiñami.

¹³Miaðãe tuiyede õrejarejameða ũi bueimarare. Aru doce paivure beorĩ epedejameða ũi yávaiye méne beorĩ coyucõjeimarare. ¹⁴⁻¹⁶Na marejãimada Simón, ũi ãmidoimũ mácu Pedro; Andrés, Simón Pedroi yõcu; Santiago, Juan, Felipe, Bartolomé, Mateo, Tomás; Santiago, Alfeoi mácu; Simón, ãmicucu Celote; Judas, Santiãgoi mácu; aru Judas Iscariote. Ñai marejãmeða jẽni jícyũ Jesũre ũi mavure.

Jesús ùi bueino obedivu p̄oveare
(Mt 4.23-25)

¹⁷ Jesús ēmeñu mácu c̄urac̄iare jocarī, mautedejameđa dái ùi bueimaraque. Aru obedivu p̄ovea curejaimađa. Judea āmicurijobor̄ocav̄u, Jerusalén āmicurīmarocav̄u, aru macajitabu urab̄u ēcarui īmarocav̄u máre: Tiro aru Sidón āmicurīmaroacav̄u máre curejaimađa. Ina earejaimađa, jápaiyuriv̄u Jesúre aru ùi meadaquiyep̄e aiv̄u náre ijíede. ¹⁸Ina abujva ne n̄ájine đaimarare máre Jesús meadarejameđa. ¹⁹Caiv̄u p̄ovea tuoiyurejaimađa Jesúre, ùi meadaie boje ùi paruéque. Aru meadarejameđa ina caiv̄ure.

Jesús ùi bueino torojur̄ore aru ch̄oinore máre
(Mt 5.1-12; Hch 7.52; 1 P 4.14)

²⁰Din̄um̄re Jesús, jáññ ùi bueimarare, arejameđa:

—M̄ja c̄omaje ārojariv̄u, m̄jarecabu J̄ūmenijicui jaboteimara. Que baru torojur̄ajaramu m̄ja. ²¹M̄ja āv̄ué yaiv̄u caride, yapinajaramu. Que baru torojur̄ajaramu m̄ja. M̄ja caride oiv̄u yur̄inajaramu. Que baru torojur̄ajaramu m̄ja.

²²Torojur̄ajaramu m̄ja p̄ovea J̄ūmenijicure ju abev̄u ne āmeina jáiye boje m̄jare aru ne jar̄uvaiye boje m̄jare máre, m̄je yóv̄aiye boje yure, J̄ūmenijicui daroim̄u mácure ūm̄ure. Torojur̄ajaramu m̄ja, p̄ovea J̄ūmenijicure ju abev̄u ne jar̄aiye boje m̄jare aru ne ūbe boje m̄jare máre, m̄je yóv̄aiye boje yure, J̄ūmenijicui daroim̄u mácure ūm̄ure. ²³Torojur̄ajaramu m̄ja dij̄arav̄ure. Aru c̄var̄ajaramu m̄je boje urar̄ō cavar̄ō mearo J̄ūmenijicui cur̄ōi. Nopedeca ānina jav̄ecav̄u b̄acav̄u, m̄jeñecuva mácav̄u máre, āmeina đarejaquemav̄u ānina J̄ūmenijicui yáv̄aiyede coȳucaip̄ovea mácav̄ure.

²⁴Ūbenita m̄ja c̄ve c̄var̄iv̄u ij̄arav̄ure torojur̄i c̄v̄u m̄ja. Que baru āmeno n̄ájino c̄var̄ajaramu m̄ja.

²⁵M̄ja yapiv̄u caride āno urar̄ōque, āmei āv̄ué yain̄ajaramu m̄ja. Que baru āmeno n̄ájino c̄var̄ajaramu m̄ja. M̄ja yur̄iv̄u caride ch̄iori or̄ajaramu m̄ja. Que baru āmeno n̄ájino c̄var̄ajaramu m̄ja. ²⁶Āmeno n̄ájino c̄var̄ajaramu m̄ja, p̄ovea ne me yáv̄aiyede m̄jare. Nopedeca ānina jav̄ecav̄u b̄acav̄u, m̄jeñecuva mácav̄u máre, me yáv̄arejaquemav̄u ānina boroc̄uriv̄u J̄ūmenijicui yáv̄aiyede coȳucaip̄oveare tenidiv̄u b̄acav̄ure, arī buedejameđa náre Jesús.

Jesús ùi bueino maje ur̄ore maje mauvare
(Mt 5.38-48, 7.12)

²⁷Jesús, yópe arī, buedejameđa náre cojedeca:

—Ūbenita coȳuȳubu m̄jare, jápaiv̄ure ji coȳuȳede. Ūjar̄ā m̄je mauvare. Me đajar̄ā náre ina āmeina jáiv̄ure m̄jare. ²⁸Torojur̄i mearore j̄jar̄ā náre ina āmeina yáv̄av̄ure m̄jare. J̄ēniajara J̄ūmenijicueque ina boroc̄urī yáv̄av̄ure m̄jare. ²⁹Cūin̄ácu p̄oc̄u ùi p̄varu mi cūin̄áp̄urav̄ucav̄iob̄ure, copedini p̄evaic̄ōjejac̄u aperiur̄av̄ure máre. Aru cūin̄ácu p̄oc̄u ùi ĩnu mi cuit̄ótecaje p̄uenocacajede, j̄jac̄u mi camisare máre. ³⁰J̄jac̄u caiv̄ure ne j̄ēniainore m̄ure. Aru ne tatoru míyede, j̄ēniamejac̄u cojedeca. ³¹Đajar̄ā aperiur̄e yópe m̄je ūepe đav̄ure m̄jaque.

³²M̄je ur̄u náre, ina ur̄iv̄ure m̄jare, J̄ūmenijicu bojedabecube p̄oveare ne que đayede. Nopedeca ina āmeina teiv̄u máre uma ur̄iv̄ure náre. ³³M̄je mearore đaru náre, ina mearore đav̄ure m̄jare, J̄ūmenijicu bojedabecube p̄oveare ne que đayede. Nopedeca ina āmeina teiv̄u máre đadama nópe. ³⁴M̄je j̄idu náre, ina jacopaiyovar̄ajiv̄ure m̄jare, J̄ūmenijicu bojedabecube p̄oveare ne que đayede. Nopedeca ina āmeina teiv̄u máre j̄iyama aperiur̄e āmeina teiv̄ure, ne jacopaiyovar̄ajiyep̄e aiv̄u cojedeca. ³⁵Ūbenita ūjar̄ā m̄je mauvare. Me đajar̄ā náre. Aru j̄jar̄ā jacopaiyov̄aiyede corebev̄uva no boje.

Nópe ðaru, ʋrarō meaquiyebu mʋje boje jēino. Aru Jūmenijicui mára marajáramu mʋja. Que baru ʋ meacube náque ina jíbevure mearore ʋre aru ina jíyubevure arevure máre. ³⁶Cómaje ároje jájara mʋja arevure, ñai majepacu Jūmenijicu ʋi cómade ároje jáiyepedeca, náre arí buedejamedá Jesús.

**Jesús ʋi pōevare arevure
ámecoroicōjemeno**

(Mt 7.1-5, 10.24-25, 15.14; Jn 13.16, 15.20)

³⁷Jesús, yópe arí, buedejamedá náre cojedeca:

—“Ámenatamu” arí, ámeorobejará mʋja arevure. Mʋje nópe aru, majepacu Jūmenijicu ámeororí, “Ámenatamu mʋja”, acuyume mʋjare. Jarʋvabejará mʋja arevure. Mʋje jarʋvabedu, Jūmenijicu jarʋvabecube mʋjare. Árumetejará mʋja arevure ne ámene. Mʋje árumetedu, Jūmenijicu máre árumetecuyume mʋje ámeina teiyede. ³⁸Jíjará mʋja arevure. Aru Jūmenijicu jícyume mʋjare. Jícyume mʋje pʋeá buidírʋea, doairʋea, aru jayuirʋeare. Nopedeca mʋje arevure jíyepedeca Jūmenijicu jícyume mʋjare, arejamedá náre Jesús.

³⁹Aru yópe arí, jēvari coyurejamedá Jesús:

—Cūinácu jári eabecu buojabebi nuñ mái apecu jári eabecuque. Que baru caipucará jári eabevu baru tʋjebu na cobei. ⁴⁰Bueimara ñame baju majibema ne bueirōescu pʋeno. ʋbenita bueni buojaiʋu baru, ne bueirōescupe tenajarama.

⁴¹Me jáivubu mʋja mʋjecui docʋjīe cʋrōre ʋi yacorui. ʋbenita jámevu mʋja mʋje ʋrarō docʋcʋrōre mʋje yacorui. ⁴²Aru jámevʋvacari mʋja ʋrarō docʋcʋrōre mʋje yacorui, mʋjecure “¿Mi docʋjīene ñaji mi cʋvaede mi yacorui?” arí buojabevu mʋja. ¡Jʋjovaiʋutamu mʋja! Mamarʋmʋ ijara mʋja mʋje ʋrarō docʋcʋrōre mʋje yacorure. No yóboi, mearo jáivuta, ijara mʋjecui docʋjīene ʋi cʋvaede ʋi yacorui, arí buedejamedá náre Jesús.

Yópe aiyurōtamu iye Jesúsí aiyebáque: Pōescu ʋi ʋrarō ámenore ðaru, “Dajocajacu mi ámeina teiyede” arí, coyuiye jaubevu ʋre apecure, quíjino ámenore ðayure. Quénora mamarʋmʋ ñai ʋrarō ámenore ðayure dajocaiye jaʋvu ʋi baju ámeina teiyede cāreja.

**Jesús ʋi bueino maje majinore
jocʋcua jēidʋare**

(Mt 7.17-20, 12.33-35)

⁴³Cojedeca Jesús arí buedejamedá náre, ne majinaiyipe ayu aipe árojarivure pōevare:

—Cubevu jocʋcu meacu jēiye ámene jícu. Aru cubevu jocʋcu ámeacu jēiye méne jícu. ⁴⁴Que baru coreóvaivubu jocʋcuare dicuá jēiyeque. Miñua jēmevu higo ámicʋridʋare. Nopedeca jēmevu ʋyai miñuara. ⁴⁵Ñai pōescu meacu yávyube méne, ʋi ʋmei mearo cʋe boje. Aru ñai pōescu ámeacu yávyube ámene, ʋi ʋmei ámeno cʋe boje. Que baru pōescu yávaibi ʋi jījecamuque ʋre cʋede ʋi ʋmei, arí buedejamedá Jesús.

**Jesús ʋi coyūino pʋcadámia cūramia
ðaiʋu bácvure**

(Mt 7.24-27)

⁴⁶Cojedeca Jesús arí buedejamedá náre: —¿Aipe teni aivurū yure “ñʋje jabocu”, ʋbenita ðabevʋvacari ji coyuiyede?

⁴⁷Coyuquijivʋ mʋjare ñamepe árojacure ñai yure darí járiayure aru ðayure yópe ji coyuiyere. ⁴⁸Ðaibi yópe ñai pōescu ʋi ðaiye báquepe ʋi cūrami jájaroi. Aru jia yaboiyede, oco eavʋya diñamine. ʋbenita cújibeteavʋya diñami, jájaro núe boje. ⁴⁹ʋbenita ñai járiayʋvacari yure, ðabecu baru yópe ji coyuiyere, ñai pōescu ʋrepe ñai ðayú bácupe ʋi cūramine jájamenoi. Aru jia yaboiyede, oco eavʋya diñamine. Aru tuavʋya diñami. ʋrarō mateávʋya diñami bʋjaino, arí buedejamedá Jesús.

**Jesús ʋi meadaino churavai jabocu
yebacacure**

(Mt 8.5-13)

7 ¹Jesús yávarí dajocayú bácu pōevare, nurejamedá

Capernaum ãmicurĩmaroi. ²Noi curejameða cien paivu churarava ne jabocu, cuvacu ñi yebacacure pare ñi umu. Ijimu baju barejameða ñai yebacacu. ³Ñai churaravai jabocu jápiayu bácu yávaivure Jesúí borore, jarorejameða apevu judíova bucuvare, ne órejarãiyepe ayu Jesúre, ñi meadaquiyepe ayu ñai yebacacure. ⁴⁻⁵Jesús yebai eaivu, pare nuicõjenejaimaða úre. Arejaimaða:

—Ñai jabocu meacube ñi. Que baru mi cadateiye jañu ùre, ùi ñe boje maje curijaborõre. Úvacari ðaicõjeame cõinádami maje cójijiñamiva, arejaimaða na Jesúre.

⁶Dinmumia Jesús nurejameða náque. Úbenita joabenoí ne tuvaiyede ñi cõrami yebai, ñai jabocu jarorejameða ñi yóvaimarare, yópe arãnuivu Jesúre:

—Mu, ji jabocu, cãrijimejacu. Meacubu mu. Úbenita yúcapûravu ãmecutamú. Que baru darí ecobejacu ji cõrami.

⁷Buõjarí vocunumetevu yu mure ji baju. Quénora coyujacu mi cójeinore. Aru ji yebacacu meatecuyume. ⁸Yurecabu cucu ne cójeiyeque ina ji jabova. Aru cuvavu churaravare, ji cójeimarare. Nácacu cõinácure “Nujacu” ji arĩburu, nuimi ñi. Aru “Dajacu” ji arĩburu, daibi ñi. Aru ji ðaicõjenu apejĩene ji yebacacure, ðaibi ñi. Nópe aicõjemi ñujare daroyu, cien paivu churarava ne jabocu, arejameða Jesúre ñai jabocui jaroimaracacu.

Úi que aiyede, “Ijiéde cójeipõecubu mu” aiyucu barejaquémavu Jesúre.

⁹Que ayure jápiarí, pare ðápiarejameða Jesús. Aru jári ina põeva nuivure ñi yóboi, arejameða:

—Jãve coyuyubu mujare: Eabevu cãreja majacacure, Israecacure, me ju ayure yure yópe ñai churaravai jabocupe, arejameða Jesús.

¹⁰Aru ne copaiyede jabovai cõrami, earejaimaða ñai yebacacure meacuta.

Jesús ñi meadaino nomiópecoi mácure

¹¹No yóboi, Jesús nurejameða Nain ãmicurĩmaroi. Úque nurejaimaða

ñi bueimara aru apevu põeva máre, obedivu. ¹²Úi ea iyede ímaro joabenoí, járejameða nuvaivure yaiyú bácare, jaruvarãnuivu. Jípaco, nomiópeco caride, cõinácú õi mácu bácu barejameða. Aru obedivu põeva diímarocavu yóvarejaimaða náre. ¹³Jesús cómajé ãroje jári, arejameða óre:

—Obejaco, arejameða ñi.

¹⁴Joabejĩnoi nuri, icadava paraicadava, yaiyú bácu paraicadavare, tuorejameða Jesús ñi puruque. Ina nuvaivu bácvu dicadavare mauteðejaimaða. Dinmuma Jesús arejameða yaiyú bácare:

—Mu, bojuyo, coyuyubu mure:

Nacajajacu, arejameða Jesús.

¹⁵Quénora ñai yaiyú bácu dobarí, yávarí búrejameða. Aru Jesús jíðejameða úre jípacore. ¹⁶Yópe ðayure jáivu, cuenumarejaimaða caivu. Aru torojurí, jívu mearore Jũmenijicure arejaimaða:

—Jũmenijicui yávaiyede coyucaipõecu parucu edaibi maje jẽneboi. Jũmenijicu daibi, cadatecudayv ñi põevare, arejaimaða na.

¹⁷Que teni Jesúí boro earejavãya caino Judea ãmicurijoborõi aru caiye curõaquede máre. Jápiarejaimaða caivu Jesúí ðaiye báquede.

Juan Bautista ñi jaroimara Jesús yebai

(Mt 11.2-19, 21.32; Lc 3.12)

¹⁸Juan Bautistai bueimara, ñi yebai nuri, coyurejaimaða úre caiye Jesúí ðaiye báquede. Aru órejarejameða Juan Bautista pucarã ñi bueimarare. ¹⁹Jesús yebai jarorí, jẽniari jáicõjenejameða náre yópe:

—¿Jãveneca múru Juan Bautista “Ji yóboi dacuyume apecu coyupõecu” arí, ñi buevacamú? ¿Úi que arí buevacamú ãmenu, corenajidi ñuja apecure? aicõjenejameða náre Juan Bautista.

²⁰Ina daroimara, Jesús yebai earí, arejaimaða úre:

—Juan Bautista darobi ñujare jẽniari jáicõjeñu: “¿Jãveneca múru Jũmenijicui daroimú, ‘Ji yóboi dacuyume apecu

coyũipõescu' arĩ, ñi buevacamũ? ¿Ëĩ que arĩ buevacamũ ãmenu, corenajidi ñũja apesure?" arejameda Jesũre.

²¹Aru dinũmũmareca Jesũs meadare cuyũ barejameda obedivũ põevare: ijimarare, ñãjivure, aru abujuva ne ïmamarare mãre. Aru obedivũ jãri eabevure cõmaje ãroje jãri meadarejameda.

²²Que teni Jesũs ju ayũ, arejameda Juan Bautistai daroimarare:

—Nũri coyũjarã Juan Bautistare mũje jãpiaiyede aru mũje jãiyede mãre: Ina jãri eabevũ bãcavũ jãri eadama caride, aru ina cuiye majibevũ bãcavũ cuyama caride. Ina pojeivũ bãcavũ meama aru ina jãpiabevũ bãcavũ jãpiadama caride. Ina yaivũ bãcavũ, nacovaimara yainore jarũvarĩ, apũma cojedeca caride. Aru cõmaje ãrojarivure coyũyũbu iye yãvaiye mène, Jũmenijicui meadaiyede põevare. ²³Torojũbi ñai ju arĩ dajocabescu yũre, arejameda mãre Jesũs.

²⁴Ina daroimara ne nũriburu yõboi, Jesũs Juan Bautistai borore yãvarĩ bãyũ, arejameda ina põevare:

—Jãve jãranũmeteavũ mũja cõriãre ãmevũ japuiyede põescubenoĩ. ²⁵Aru jãve jãranũmeteavũ mũja põescu cuitõtecaje meacajede doyũre mãre põescubenoĩ. Majivũ mũja ina doivure cuitõtecajea meacajeare curivure torojũve teni cainũmũa jabovai cũramiai. ²⁶Quénora jãve jãranũavũ mũja cũinãcu Jũmenijicui yãvaiyede coyũcaipõescure. Jãve coyũyũbu mũjare: Jãquemavũ mũja Jũmenijicui yãvaiyede coyũcaipõescu pũeno meacu bajure. ²⁷Juan Bautistabe ñai Jũmenijicui toivaicõjeimũ mãcu ãre coyũcaipõescu bãcure:

Jaroivũ yũre coyũcaipõescure mi jipocai, ñi meadaquiyepe ayũ põevare, ne corũ etarãjiyepe ayũ mũre, nopedeca põeva ne meadaiyepe cuiimare ñai ãmũ, ne pueðaimũ, ñi daquiye jipocai, arĩ coyũicõjenejaquemavũ Jũmenijicu.

²⁸Jãve coyũyũbu mũjare: Cũbebi apescu Jũmenijicui yãvaiyede

coyũcaipõescu meacu baju Juan Bautista pũeno ina ijãravũ põeteivũ jẽneboi. Ëbenita ñai ãbeni cãcu Jũmenijicui jaboteinore Jũmenijicui mearo ðacaimũme Juan Bautista pũeno, arejameda Jesũs.

²⁹Ëĩ que aiyede Juan Bautistai borore jãpiarĩ, obedivũ põeva aru ina jabovare tãutũra ïcaipõeva mãre coreõvarejameda Jũmenijicure jãve ayũre. Que baru Juan Bautistare jãdovaicõjenejaimada mãre Jũmenijicũque. ³⁰Ëbenita ina fariseova aru Jũmenijicui yãvaiye báquede bueipõeva mãre ãbedejaimada Jũmenijicui ðaiyũrõre mãre boje. Que baru Juan Bautistare jãdovaicõjemenejaimada mãre Jũmenijicũque.

³¹Que teni Jesũs arejameda mãre:

—¿Yéque jẽvari coyũji ina põeva ijãravũcavũre? ¿Aipe ãrojari na? ³²Jueðova tãibũi dobarivũpebu, yajurãjivũ nãcavũque. Aru yõpe aivũpebu: “Japuvũ ñũja yũriainore. Ëbenita upabetevũ mũja. Yũriavũ ñũja chõre ðaiyede. Ëbenita obetevũ mũja”. Aru nõpe ijãravũcavũ mãre cãrijiĩnama na. ³³Que baru Juan Bautista ñi daiyede, ã ãmeni aru ãcumeni teiyede, “Abujucure cãvabi”, ãra ãbenina aivũbu mũja. ³⁴Aru Jũmenijicui daroimũ mãcu ãmũpe, ji daiyede, ãri aru ãcuri teiyede yõpe caivũ apevũpe, “Ñai ãmũ urarõ ãri ñi vainĩ tuiyeta, aru urarõ ãcuri ñi pacoteiyeta, yõvaiibi ãmenare aru jabovare tãutũra ïcaipõevare mãre”, yũrã ãbenina aivũbu mũja. ³⁵Ëbenita Jũmenijicui majiède põeva jãðama ãre ju aivũque, arejameda Jesũs.

Jesũs ñi cũe fariseovacacu Simõĩ cũrami

(Mt 26.7; Mr 14.3)

³⁶Cũinãcu fariseovacacu cuturejameda Jesũre, “ãrevũ” ayũ, ñi cũrami. Aru Jesũs ju arĩ, ecorĩ, dobarejameda tuoiva yebai. ³⁷Aru cũinãcu nomiõ, ðiĩmarocaco, ãmeina teipõeco, majico Jesũs dobacure ñai

fariseoi cūrami, nāvarejacoda cūinábu ūmjuríbu boríbu mumijue curíbure.
³⁸Orí earejacoda Jesúí cuboba yebai. Aru ōi orique ēnuvarejacoda ūi cubobare. Que teni popovarejacoda ōi poḍaque. Aru nuri ūi cubobare, ōi pueḍaie boje ūre, yuarejacoda iye mumijuede ūi cuboba p̄uenoi. ³⁹Que teni ñai fariseo, Jesúre cutuyū bācu, “Ārevū” arí ūre, yópe teinore járí, dápiarejameḍa ūi baju: “Ñai ūmū Jūmenijicui yávaiyede coyucaipōecu baru, majijebu yéco pōeco ico jēni jádore ūre. Pōeco āmeina teipōecobe ō”, arí dápiarejameḍa.
⁴⁰Quénora Jesús arejameḍa ñai fariseore:

—Mū, Simón, apejino coyuyūvū mure, arejameḍa Jesús.

Ñai fariseo ju arejameḍa ūre:

—Mū, bueipōecu, coyujacu yure, arejameḍa Simón.

⁴¹Ūi nópe aiyede, Jesús yópe arí coyurejameḍa ūre:

—Pucarā ūmūva bojecube ḍaquemavu tātūrare cūinácu tātūra jípōecure. Cūinácu bojecube ḍaquemavu p̄ucaujūa memeiye bojede. Aru apesu bojecube ḍaquemavu p̄ucarā aviáva memeiye bojede. ⁴²Na yéque buojarí ne bojedabe boje, ñai tātūra jípōecu ārumetequemavu ina p̄ucarā ne bojecube ḍaiyede. Coyujacu yure. ¿Ácu pōecu ina p̄ucarācasu p̄ueno baju ūri ūre? arejameḍa Jesús.

⁴³Aru Simón ju arejameḍa:

—Dápiavū ūcure pare ūre ñai ūi ārumeteimū mácu p̄ueno bojecube ḍayure, arejameḍa.

Jesús arejameḍa ūre:

—Jāve coyūivū mū, arejameḍa.

⁴⁴Jesús copedini, jáñū ico nomióre, arejameḍa Simóre:

—Jájacu ico nomióre. Ecovū yū mi cūrami, aru jibetevū mū oco, joaquiye ji cubobare. Ūbenita ico nomió ēnuvaimico ji cubobare ōi orique aru popovabico ōi poḍaque.
⁴⁵Jacoyubetevū mū yure. Ūbenita ico ḍajocabico pueḍado yure, ji cubobare nuño. ⁴⁶Yuabetevū mū mumijueque

ji jipobure. Ūbenita ō yuarí mumijue ḍaibico ji cubobare. ⁴⁷Que baru aivū yū, ōi āmeina teiye urede Jūmenijicui ārumeteiye báque boje, ūrarō ōi ūrōre jáḍovaimico ō. Ūbenita ñai ūi āmeina teiye obebeda Jūmenijicui ārumetedu, quíjino ūi ūrōre jáḍovaimi ū, arejameḍa Jesús.

⁴⁸Aru arejameḍa ico nomióre:

—Mi āmeina teiyede ārumeteivū yū, arejameḍa Jesús.

⁴⁹Ina Simói cutuimara, dobarivū ūque, yávarí búrejaimada ne bajumia:

—¿Yécu bárica ñai ūmū āmeina teiyede ārumetede ḍayū? arejaimada na.

⁵⁰Aru Jesús arejameḍa ico nomióre:

—Mi ju aiyé boje, meateivū mū. Que baru me nujaco cārijimecova, arejameḍa ōre Jesús.

Nomiva Jesúre ne caḍateino

(Mt 27.55-56; Mr 15.40-41; Lc 23.49)

8 ¹No yóboi, Jesús coyucunurejameḍa ĩmaroai aru ĩmajino coapa, pōeva ne majinajiyepe ayū Jūmenijicui jaboteinoque borore. Aru ina doce paivū ūi bueimara yóvarejaimada ūre. ²Apevū nomiva máre yóvarejaimada náre, Jesúí meadainomiva mácavu. Apevure ina nomivare Jesús javei jaetovarejameḍa abujuvare. Aru apevure javei meadarejameḍa ū. Cūináco Magdala āmicuríimarocaco barejácoḍa, ōi āmiá María. Jipocamia Jesús jaetovarejameḍa siete paivū abujuvare ōre jocarí.
³Apeco barejácoḍa, ōi āmiá Juana. Ñai jabocu Herodes ūi cāramine coreipōecui márepaco barejácoḍa ō, ūi āmiá Chuza. Aru apeso barejácoḍa, ōi āmiá Susana. Apevū obedivū nomiva, Jesúí meadainomiva mácavu máre yóvarejaimada ūre. Ina nomiva Jesújāre jauéde jḍejaimada.

“Oteipōecure” járí dápiarí ne ḍarājijipe aino

(Mt 13.1-9; Mr 4.1-9)

⁴Obedivū pōeva cójjivū Jesús yebai ĩmaroa coapacavu. Que teni Jesús

buedejameđa náre jári dápiarĩ ne đarãjiyepe ainoque, yópe arĩ:

⁵—Cúinácũ oteipõecu

otecũnuquemavũ ùi oteiyeđe. Ùi oteiyeđe ape oteiye tuquemavũ ma êcarui. Aru ne curaiyeđe ina cuiũ noi, mĩjina vũivũ darĩ, áradacquemavũ caiye iye oteiyeđe. ⁶Ape oteiye tuquemavũ joborõ edubenoĩ cũraboa pũenoĩ. Aru yóboi pĩarĩ etaquemavũ. Ùbenita yaiquémavũ, no oco cube boje. ⁷Ape oteiye tuquemavũ miucua jêneboi. Aru miucua bucũrĩ chĩoiyeđe, jẽiye jẽmetequemavũ. ⁸Ape oteiye tuquemavũ mearo joborõĩ. Aru bucũquemavũ. Aru jẽquemavũ jẽiñũ cien paivũa caiye oteiyebea coapa, arejameđa Jesús.

Que yávayũ bácu, Jesús pare bujino yávarĩ, arejameđa náre:

—Me jápijarã muja iye ji bueiyeđe, arejameđa Jesús.

Aipe aiyurõre Jesús ùi jári dápiarĩ ne đarãjiyepe aino

(Mt 13.10-17; Mr 4.10-12)

⁹Jesũi bueimara jẽniari járejaimađa ùre:

—¿Aipe teni bueyurũ mu jári dápiarĩ ñũje đarãjiyepe ayũ mi coyũiyeque? arejaimađa.

¹⁰Aru Jesús arejameđa náre:

—Mũjare coyũrĩ majide đayũbu iye Jũmenijicu ùi coyũicõjeme máquede. Ù jaboiteibi mũjare, ùi põevare. Ùbenita ina apevũ iyede majibevũre quẽđa jári dápiarĩ ne đarãjiyepe ayũ bueyũbu yũ náre, jáivũreca ne jári majibenajiyepẽ ayũ aipe aiyurõre ne jáiyeđe, aru jápiaivũreca ne jápiarĩ majibenajiyepẽ ayũ aipe aiyurõre ne jápiaiyede, arejameđa Jesús.

Jesũ ùi coyũino aipe aiyurõre “oteipõecũre” jári dápiarĩ ne đarãjiyepe aino

(Mt 13.18-23; Mr 4.13-20)

¹¹Yópe arĩ, Jesús coyũrejameđa ùi bueimarare:

—Yo jári dápiarĩ mũje đarãjiyepe ayũ ji aino yópe coyũiyurõmu mũjare:

Iye oteiye Jũmenijicui yávaiyepe paiyeđu. ¹²Aru inamu ma êcarui oteiye turĩduiye báquepe paivũ. Náre coyũiyede Jũmenijicui yávaiyeđe jápiađama, ùbenita coreóvarĩ eabevũva. Que baru ne jápiarĩburu yóboi, ñai abujuvai jabocu darĩ, árumetede đaiibi Jũmenijicui yávaiye ne jápiaiye báquede, ne ju abeni majibenajiyepẽ ayũ, meatebenajivũ. ¹³Aru inamu joborõ edubenoĩ, cũraboa pũenoĩ, oteiye turĩduiye báquepe paivũ. Jũmenijicui yávaiyeđe jápiarĩ, torojuma me. Ùbenita Jũmenijicui yávaiyeđe ju arĩduyama na. Que baru quĩjino yóboi, põeva ne cãrijovaru náre, ne ju aiyẽ boje, maumena dajocadama ne ju aiyede Jũmenijicui yávaiyeđe. Que teni ju abema na. ¹⁴Aru inamu miucua jêneboi oteiye turĩduiye báquepe paivũ. Na máre jápiaivũ Jũmenijicui yávaiyeđe, ùbenita cãrijĩñama ijãravũquede. Torojuma tãuturãque. Aru caiye iye ne torojũve teiye ijãravũque cojũvũ náre. Que baru Jũmenijicu cadatebebi náre ùi yávaiyeque yópe ùi urõpe. ¹⁵Ùbenita inamu mearo joborõĩ oteiye tuiye báquepe paivũ. Jũmenijicui yávaiyeđe jápiaivũ, ju adama jáve dieđe. Aru me áruma dajocabevũva. Que baru nárecabu đaiivũ Jũmenijicui urõpe cãrijimevũva, arejameđa Jesús.

“Põibũre” jári dápiarĩ ne đarãjiyepe aino

(Mt 5.15, 10.26, 25.29; Mr 4.21-25; Lc 11.33, 12.2, 19.26)

¹⁶Cojedeca Jesús, yópe arĩ, buedejameđa náre:

—Põecu cubebi pẽoibũre pẽoriburu yóboi moañũ dibũre cõaiñũque o ñõñũ paraino cãchinoĩ. Quénora tũoibi jocũve pũenora, pẽoquiyepẽ ayũ caivũ ecoivũre nore. ¹⁷Que baru caiye yaveiye báque jároquiyebu. Aru dupiõvãiyẽ báquede máre járajarama caivũ põeva.

¹⁸Que baru me dápijarã mũje jápiaiyede ji bueiyeđe. Aru đajarã yópe ji coyũiyepẽ. Nopedeca ñai jápiaiyure Jũmenijicui yávaiyeđe, Jũmenijicu

pæno baju ùi majiéque jícyume úre. Òbenita ñai jápiabecure Jūmenijicui yávaiyede, iye ùi quíjino majiéde dápiayū cūvaede, Jūmenijicu úre ícyume diede, arejameða Jesús.

Jesús ù jina ne voino úre
(Mt 12.46-50; Mr 3.31-35)

¹⁹Dinumure Jesú paco aru ùi yóva earejaimada ùi curó. Òbenita úre eabedejaimada, obedivū pøeva ne cūe boje.

²⁰Que baru apevu arejaimada Jesúre:
—Mípaco aru míyova máre jedevai núrivu, mure járadadama, arejaimada.

²¹Òbenita Jesús arejameða náre:
—Caivu ina Jūmenijicui yávaiyede jápiaivu aru Jūmenijicui urøpe ðaivu, nárecabu jipacope pádo aru jíyovape paivu máre, arejameða Jesús.

Jesús úmevure ùi bíjaroino
(Mt 8.23-27; Mr 4.35-41)

²²Cúinájāravū Jesús, jatuyū jiadocú i ùi bueimaraque, arejameða náre:

—Járica, macajitabū urabū apedavei nurevu, arejameða náre.

Que baru nurejaimada na. ²³Ne jatayede, Jesús cārejameða. Japurejavūya úmevu parurō baju. Aru pācaiboa ecorejāvūya jiadocúre. Que baru dicū buidjāvūya. Pare jidojarejavūya no. ²⁴Que teni Jesús yebai nuri, yøpe arí, coedavarejaimada úre:

—iMu, bueipøecu, coivūbu maja! íBíjarājivūbu maja! arejaimada na.

Jesús coedarí, jararejameða úmevure. Iboá uraboa pācaiboa bíjarejavūya. Aru cārijimene ðarejavūya. ²⁵Que teni Jesús arejameða ùi bueimarare:

—¿Aipe teni “Jesús meadacuyume ñjare”, abevurū muja? arejameða.

Que aiyede, cūcumari urarō dápiarejaimada. Aru arejaimada ne bajumia:

—¿Yécuba ñai, yøpe cøjeñū úmevure aru macajitabure máre ju aimū? arejaimada na.

Jesús ùi meadaino ùmū abujuva ne imamure
(Mt 8.28-34; Mr 5.1-20)

²⁶Jesújā jatarejaimada no macajitabū urabure apedavei. Aru cūrejaimada na

Gerasa āmicurōcavū, Galilea āmicurō cōchinoi. ²⁷Jesús ùi maiyede jiadocúre jocarí, copū nurejameða cūinācu ímarocacu, abujuva ne ímamu. Joe baju cuitótecajede dobedejameða. Aru cūrami cubedejameða ù. Quénora pøeva ne yaivu bācavure jaruvainoi cūcū barejameða. ²⁸Jesúre jári, ùi yebai nuri, ñuatutarí bujié codoborí, arejameða:
—Mu, Jesús, Jūmenijicui mácu, caivu pæno parucui mácu, cyéde ucūrū yúque? Jēniaivu mure, ñájine ðabejacu yure, arí codoborejameða.

²⁹Nøpe arejameða Jesús ùi etaicøjeiye báque boje jípcamia ina abujuvare ñai ùmure jocarí.

Apenumua abujuva úre ímarejaimada. Que baru nócavū úre coreni buorídurejaimada tåumeaque, buoimeaque máre. Òbenita cobururū buravarejameða dimeáre. Aru ina abujuva jarorejaimada úre pøecubenoí. ³⁰Dinumure Jesús jēniari járejameða úre:

—¿Yécū āmicucurū mu? arejameða. Ju arí arejameða:

—Obecu āmicuvū yu, arejameða.

Nøpe arejameða, obedivū abujuva ne ímae boje. ³¹Ina abujuva pare jēniarejaimada, ùi jarobequiyepe aivu náre ùmujāricobei, abujuva ne ñájinoí. ³²Cūrejaimada noi cūracū yebai obedivū oteivāriva, āre cuivu. Aru jēniarejaimada ina abujuva Jesúre:

—Jarojacū ñjare oteivārivara, ñuje corājiyepe nára, arejaimada.

Dinumūma, nuicøjenejameða náre Jesús:

—Nujara, arejameða.

³³Aru ina abujuva etarí, corejaimada oteivārivara. Cúyarí nuri turejaimada cūracū émeinoí, macajitabū urabū. Turí corí bíjarejaimada na. ³⁴Aru ina oteivāriva mácavure coreipøeva cúyarí nurejaimada, coyūivu uráimaroai aru ímaro curōvaquede máre. ³⁵Que baru obedivū pøeva “¿Aipe tenama?” arí, járanurejaimada. Nuivu Jesús yebai, járejaimada ñai ùmū abujuva ne ñájine ðaimū mácu dobacure, cuitótecajede

doyure, meacure cari. Aru jidurejaimada úre. ³⁶Coypurejaimada ina jáivu bácvu Jesú meadaiye báquede ñai ñmu, abujuva ne ímamú mácvre. ³⁷Quénora “Nujacu”, arejaimada Jesúre paruróque caivu Gerasa ámicurócavu, ne jidué boje.

³⁸Jiadcúii jatúrí, Jesús copainurejameđa. Ûbenita ñi copaiquiye jipocamia ñai ñmu, abujuva ne ímamú mácv, jëniarejameđa paruróreca cuiyucu úque. Ûbenita Jesús yóvaicójemecu arejameđa úre:

³⁹—Copainujacu mi cürami. Aru coyujacu caiye iye uraró Jämenijicu ñi ðaiyede máque, arejameđa Jesús.

Nuri, coyuyu barejameđa caivu ímarocavure caiye iye Jesús ñi ðaiye báquede úre.

**Jesús ñi nacovaino Jairoi máco
bácore aru ñi meadaino nomió
ñájiñore jiveque**

(Mt 9.18-26; Mr 5.21-43)

⁴⁰Jesús copaiyu bácvre, obedivu pöeva coreivu barejaimada úre. Que baru cójijidejaimada ñi yebai, úre jacoyuivu. ⁴¹Aru earejameđa cüinácu judíovai cójijiñamine coreipöecu, Jairo ámicucu. Járina ñuatutarejameđa Jesú cuboba yebai. Uraróreca jëniañu arejameđa Jesúre:

—Mu, bueipöecu, dajacu ji cürami, arejameđa.

⁴²Cüinácvva ñi máco, doce paiujua cvvacore, cvvarejameđa Jairo. Aru yaidé ñño marejácoda ö. Que baru Jesús nurejameđa úque. Cujurejaimada náre obedivu pöeva. Aru cojivare nurejaimada Jesúre.

⁴³Ne jëneboi cüináco nomió cvrejacođa. Doce paiujua baju ijimo marejácoda jive yuiyeque. Aru pöecu cubedejameđa juoiye majicu óre. ⁴⁴Nurejacođa ñi yóboi obedivu pöeva jëneboi. Aru jëni járejacođa ñi doicaje turuvará. Cüiná öi jëni jáiyede, bíjarejavüya öi jive yuino mácarö.

⁴⁵Dinumu Jesús arejameđa:

—¿Name matedí yure jëni jádo? arejameđa.

Caivu “Yu ámevu” ne aiyede, Pedro arejameđa:

—íMu, bueipöecu, obedivu pöeva cojivare daivubu mure! arejameđa.

⁴⁶Ûbenita Jesús arejameđa:

—Cüináco nomió jëni jácobe yure. Que baru majivu yu. Ji baju ji majiéque meadaiyu yu óre caride, arejameđa Jesús.

⁴⁷Ûi que aiyede, ico nomió öi baju dupini majibe boje, bidini jiduco, nuri ñuatutarejacođa ñi cuboba yebai. Coypurejacođa caivu ina pöeva ne jáiyede öi jëni jáinore úre aru cüiná öi meateinore. ⁴⁸Aru Jesús arejameđa óre:

—Mu, ji umo, “Û meadaiye majibi yure”, arí dápiarebu mu. Que baru mi que arí dápiaye boje, meadaiyu mure. Ména nuri cujaco mu, arejameđa Jesús.

⁴⁹Ûi boroteiyede óque, cüinácu ñai judíovai cójijiñamine coreipöecu cüramicacu earí, arejameđa Jairore: —Javeta mímaco yaibíco ö. Quénora cãrijovamejacu bueipöecure, arejameđa.

⁵⁰Ûbenita Jesús, jápiayu bácv ñi yávinore, arejameđa Jairore:

—Jidubejacu mu. Quénora ju ajacu ji coyuinore, aru meatecodome ö, arejameđa Jesús.

⁵¹Jesús ñi eaiyede Jairoi cürami, apévure ecoicójemeni úque, nvvarejameđa Pedrorre, Jüare, Santiagore, aru ico juedoco bácoi pacure aru pacore máre. ⁵²Caivu pöeva nócvu óre oivu aru cómaje ároje jáivu barejaimada. Ûbenita Jesús arejameđa: —Obejará. Ö yaiyó ámemico. Quénora cãdotame, arejameđa.

Náre nópe arejameđa Jesús, ñi majié boje ñi nacovaquinore óre yainore jaruvarí. ⁵³Ûi que aiyede, yuridejaimada úre, ne majié boje yaiyó bácore.

⁵⁴Dinumu Jesús ecorejameđa juedoco bácoi curitucubui aru öi purare jëni, bujié yávvarejameđa óre:

—Mu, juedoco, nacajajaco, arejameđa Jesús.

⁵⁵Aru ümedarejacođa ö. Que baru cüiná nacajarejacođa. Aru, “Áiyede jíjará óre”, arejameđa Jesús. ⁵⁶Öi bucva

cuecumari pare dápiarejaimada. Ñbenita Jesús apევure coyúicõjemenejaimada náre iye ùi ðaiye báquede.

Jesús ùi jaroino ùi bueimarrare

(Mt 10.5-15; Mr 6.7-13; Lc 10.4-11; Hch 13.51)

9 ¹Órejarĩ ina doce paivũ ùi bueimarrare ùi yebai, Jesús jídejaimada ne parúeva, ne jaetovarãjiyepe ayũ abujuvare aru ne meadarãjiyepe ayũ ijimarrare. ²Aru jarorejaimada náre, ne coyurãjiyepe ayũ Jũmenijicui jaboteinoque yávaiye méne aru ne meadarãjiyepe ayũ põevare. ³Jesús arejaimada náre:

—Nũvamejara mũja apejĩene mũje nũinore. Tuturiteiyoava nũvamejara, curubũare máre, ãiyede máre, aru tãuturare máre. Nũjara mũje cuitótecaje doino cueda. ⁴Árĩ mũja ecoivũ ìmaroi, cũjarã cũinãcũ cũrami upacũque pũ ðajocarĩ nũivũta nore jocarĩ. ⁵Apenoi ne copũ etabedu mũjare, aru ne jápiaiyũbedu iye yávaiye méne, etarĩ nũjara. Aru pũpejarã jobore mũjare jẽiyede mũje cuboba cãchinoi ne jáiyede, ne jápiaiyũbe boje. Que teni ðiĩmarocavũ coreóvarãjarama jũ abevure Jũmenijicure aru mũjare máre, arejaimada Jesús.

⁶Que arĩburu yóboi, etarĩ nũrejaimada ìmaroai aru ìmajinoa coapa. Coyurejaimada Jũmenijicui yávaiye méne aru meadarejaimada põevare caino.

Juan Bautista bácu ùi yaino

(Mt 14.1-12, 16.14; Mr 6.14-29, 8.28; Lc 9.19)

⁷Dinũmũ ñai jabocũ Herodes jápiarejaimada Jesúĩ borore, caiye ùi ðaiyede. Aru cãrijinejaimada, põeva ne yávaiye boje. Apevũ arejaimada, “Juan Bautista bácu nacajacũbe yainore jarũvarĩ”. ⁸Apevũ arejaimada, “Elías járocũbe cojedeca”. Aru apevũ arejaimada, “Cũinãcũ Jũmenijicui yávaiyede coyũcaipõescu bácu nacajacũbe yainore jarũvarĩ”.

⁹Herodecapũravũ arejaimada: “Juan Bautista bácu jípobure buraicõjecacũ yũ. Que baru, ðñamema ñai ùi borore jí jápiaimũ?” arejaimada. Aru pare jáiyũrejaimada Jesúre ñai jabocũ Herodes.

Jesús ùi ãre ðaino cũinãpũrũpe paimil baju ùmũvare

(Mt 14.13-21; Mr 6.30-44; Jn 6.1-14)

¹⁰Dinũmũ Jesúĩ daroimaraã mácvũ copainurejaimada ùi yebai. Ùre coyũrejaimada caino ne ðaino mácarõre. Aru Jesús náre nuvaridurejaimada põevare jocarĩ cũinãĩmaro joabenoĩ, Betsaida ãmicũrõĩ. ¹¹Ñbenita náre nũivure majidejaimada põeva obedivũ. Aru Jesújãre cujurejaimada na. Jesúcapũravũ torojucũ jacoyũrejaimada náre. Coyũrejaimada Jũmenijicui jaboteinoque yávaiyede. Aru meadarejaimada nácvũ ijimarrare máre.

¹²Aru nainú tuvaino marejávũya. Que baru coyurãearejaimada ina doce paivũ ùi bueimara. Arejaimada ùre:

—Põecubenotamu yo. Que baru nũicõjejacũ ina põevare, ne vorãjiyepe ayũ ne jabuóvarãjiyede aru ne bojedãrãjiyepe ayũ ne ãrajyede ìmaro joabenoĩ aru no curõvaquei, arejaimada Jesúre.

¹³Ñbenita Jesús arejaimada náre:

—Mũja náre ãiyede jíjarã, arejaimada. Na arejaimada ùre:

—Páuboa cũinãpũrũpe paiboa aru moa pũcarã quénora cuvavũ ñũja. ðÑũja bojedãcarãnrãjidi ãiyede, jínajivũ caivũ ina põevare? arejaimada na.

¹⁴Aru nácvũ ùmũva cũinãpũrũpe paimil baju barejãimada na. Jesús arejaimada ùi bueimarrare:

—Dobaicõjejara mũja ina põevare yajuboa tenĩ, cainimea tenĩ, cincuenta paivũ curiyajuboa, arejaimada Jesús.

¹⁵Ûĩ aiyẽ báquapedeca ðarejaimada na. Que teni dobaicõjenejaimada náre. ¹⁶Aru ðie páuboa cũinãpũrũpe paiboa aru moa pũcarãre jẽni, cavarõĩ jáñũ, torojuede jídejaimada Jũmenijicure. Torojuede jíni bũojarĩ, páuboa aru

moare máre cotavari jebeni, pöevare jícöjenezameda Jesús ùi bueimarare.

¹⁷Aru caivu ãri yapidejaimada na. Ñri bubarĩburu yóboi, iye cotuvaiye báque páu aru moa máre pöeva ne ãri oabede ìni, meadarĩ, puebua doce paibuare, judíova ne puebuare, buivárejaimada ùi bueimara cojedeca.

Pedro ùi “Cristobu mu” aino

(Mt 14.1-2, 16.13-19; Mr 6.14-15, 8.27-29; Lc 9.7-8; Jn 6.68-69)

¹⁸Jesús coyuva barejámeda Jümenijicure cüinácuva. Aru ùi bueimara curejaimada úque. Dinumure jëniari járejameda náre yópe:

—¿Aipe aidi pöeva yure? ¿“Yécubebu”, aidi na? arejameda Jesús.

¹⁹Arejaimada úre:

—Apevu adama, “Juan Bautistabe”. Aru apevu adama, “Elíabe”. Aru apevu adama, “Cüinácu Jümenijicui yávaiyede coyucaipöescu bácu nacajañu mácube”, adama mure, arejaimada na.

²⁰Aru Jesús jëniari járejameda náre:

—¿Ubenita aipe aivurü muja yure? arejameda Jesús.

Pedro ju arejameda úre:

—Mu Jümenijicui daroimu mácbu. Ñujare jabotecuyumu mu, arejameda Pedro Jesúre.

Jesús ùi coyuino ùi yaiquínore

(Mt 10.38-39, 16.20-28; Mr 8.30-9.1; Lc 14.27, 17.33; Jn 12.24-25)

²¹Ubenita ùi borore apevure coyuicöjemenezameda náre, yópe arĩ:

²²—Jaavu yure, Jümenijicui daroimu mácure ùmure, urarõ ùi ñáiquino. Ina judíova bucúva, aru sacerdotevare jaboteipöeva, aru Jümenijicui yávaiye báquede bueipöeva máre yure boarĩ jaravarájarama. Aru yóbecurijárvua yóboi nacajacuyumu yu yainore jaravari, arejameda Jesús.

²³Aru caivure arejameda Jesús:

—Ácu pöescu daiyucu yúque, dajocajacurĩ pöeva ne mearo jáiyede úre, cuyebejacurĩ yure yóvaiyede, aru jidubejacurĩ ùi ñáiquiyede. Nópe ðabecu

baru, ù buojabebi jícu bacuyú. ²⁴Ñai pöescu ùi baju uröpe ðarĩ, meadaiyucu baru ùi bajure, coatecuyume ùi bajure Jümenijicure jaravari, yópe yaiyú bácupe ùi ùmei. Ubenita ñai pöescu, “Ye baju ámevu, ji yaidú Cristore boje” ayu, ùi baju uröpe ðabecuva quénora ji uröpe ðarĩ, úrecabe ji meadaquimu, cucusu Jümenijicucque cainuma. ²⁵Ñai pöescu cuvacu baru caiye ijárvuquede, ubenita bíjayu baru ùi ùmene, ñáicuyume cainuma toabo cüiméboi. ²⁶Aru ñai pöescu cuyedu yure aru ji yávaiyede máre, yu, Jümenijicui daroimu mácu ùmure, máre cuyeni dápiacuyumu úre ji jáðovaiyede ji mearore, aru jipacu meacu baju ùi mearore, aru ina ángeleva meara ne mearore máre, ji daquijárvu baquinói. ²⁷Jáve coyuuvu mujare: Apevu curivu yui, ne yainájiye jipocai járajarama Jümenijicui jaboteino curöre, ji jaboteiyede pöevare, arejameda Jesús.

Jesús ùi baju oatuvaino

(Mt 3.17, 12.18, 17.1-8; Mr 1.11, 9.2-8; Lc 3.22; 2 P 1.17-18)

²⁸Ocho paijárvua yóboi, Jesús núvarejameda Pedrore, Jüare, aru Santiagore máre, jëniarajivu Jümenijicucque cüracüi. ²⁹Ûi jëniayedecca, ùi jiva oatavarejavüya. Aru ùi cuitótecaje boricaje pöerejavüya. ³⁰Pucarã ùmuva járorejaimada, boroteivu úque. Na marejáimada Moisés aru Elías. ³¹Caino ne curö miadári jajavu tedejavüya. Borotedejaimada Jesús ùi copaiquínore ijárvure jocarĩ aru úre vaiquínore máre Jerusalén ámicurĩmaroi. ³²Pedro aru úcavu máre vñocurivvacari, cámenezaimada. Quénora apurivu járejaimada Jesús meacu bajure aru náre máre, ina pucarã ùmuva curivure úque. ³³Moisés aru Elías ne dajocaiyede Jesúre, Pedro arejameda:

—Mu, bueipöescu, mearotamu ñuje curu yui. Que baru ðarájivubu ñuja yóbecurĩnamia cüramia quíjĩnamia maquiyéde, cüinádamia maquinóre míñami, aru apedãmi maquinóre

Moiséde, aru apedāmi maquinóre Elíare, arejamedá Pedro.

³⁴Ūbenita majibedejamedá ūi que ainore. Ūi coyuiyede, ocopenibo ēmeni taorejavūya náre. Que baru jidurejaimada pare. ³⁵Aru ocopenibo taoiyede náre, jápiarejaimada apeno yávainore ocopenibo etaiyede: “Naime jímacu, ji beoimu. Que baru jápiajarā úre”, arejamedá Jūmenijicu.

³⁶Aru yávarīburu yóboi, járejaimada Jesúre cūinácūva. Ūbenita ne jáino mácaróre bi arī coyubedejaimada apēvu pōevare.

Jesús ūi meadaino juedocure abujucu ūi imamure

(Mt 17.14-21; Mr 9.14-29)

³⁷Cōmiájāravu, ēmeivu bācavu dicū cūracūre jocarī, obedivu pōeva copu nurejaimada Jesúre. ³⁸Aru cūinācu pōecu pōeyajubo jēneboi, yópe arī, cođoboborejamedá:

—Mu, bueipōecu, jēniaivu mure. Jájacu jímacure, cūinācura ji cuvamure. ³⁹Abujucu cainumua bidióvarī ture dāvabi úre joborōi. Ūre nājine darī, cođobobore dāvabi. Aburi etavavu úre. Aru ūai abujucu dajocaiyubevabi úre. ⁴⁰Yu jēniaridivu mi bueimarare, ne jaetovarājiyēpe ayu ūai abujucure. Ūbenita ūaine jaetovarī majibema na, arejamedá Jesúre.

⁴¹Jesús arejamedá:

—Mūja, jāravucavu, Jūmenijicure ju abēvu aru āmeina teivu máre, ¿aipijāravua cuquidi yu mūjaque? ¿Aru aipijāravua nājiquidi yu mūjaque, mūje ju arājiyēpe ayu ji coyuiyede? Davajacu mímacure ji yebai, arejamedá Jesús.

⁴²Aru ūai juedocu ūi eaiyede Jesús yebai, ūai abujucu bidióvarī ture dārejamedá úre. Ūbenita Jesús jararī abujucure, jaetovarejamedá úre ūai juedocure jocarī. Que darī meadarejamedá úre. Aru jacopaiyovarejamedá jīpacure. ⁴³Aru caivu cuicumarejaimada Jūmenijicu ūi urarō paruéde.

Jesús ūi coyūino cojedeca ūi yaiquínore

(Mt 17.22-23; Mr 9.30-32)

Pōeva ne urarō dāpiaiyede caiye ūi dāiye báquede, Jesús arejamedá ūi bueimarare:

⁴⁴—Me jápiajarā caiye iye ji coyūquiyede mujare. Arumetebejarā. Yure, Jūmenijicūi daroimu mácure ūmure, jēni jínajivubu ji mauvare, Jesús arejamedá náre.

⁴⁵Jūmenijicu jápiarī eaicōjemenejamedá náre iye Jesús ūi coyuiyede. Que baru jápiarī coreóvabedejaimada. Aru jidurivu jēniari jáiyubedejaimada úre iye ūi coyūino mácaróre náre.

¿Ūamema parucu maje jēnebore?

(Mt 10.40, 18.1-5; Mr 9.33-37;

Lc 10.16, 22.24; Jn 13.20)

⁴⁶Jesúi bueimara jararī bārejaimada ne bajumia ūamene parucure ne jēneboi apēvu pūeno. ⁴⁷⁻⁴⁸Ūbenita Jesús coreóvayu bācu ne dāpiaiyede ne ūmei, jēnejamedá cūinācu juedocure. Aru úre núvari ūi yebai, arejamedá náre:

—Cūinācu pōecu copu etayu baru ūai juedocure ji āmiái, ji cōjeiyēpe, que đayū popedeca copu etaibi yure. Aru ūai copu etayu baru yure, copu etaibi ūai yure daroyure máre. Que baru ūai mujacacu parubecu caivu pūeno, ūai cadateiyucu apēvure, úrecabe jáve parucu Jūmenijicūi jáinore. Pōeva parurivubu, cadateivu baru apēvure Jūmenijicūi jáinore. Ūbenita ina jaboteiyurivu apēvure, aru đaicōjeiyurivu náre máre, parubevubu Jūmenijicūi jáinore, arī buedejamedá Jesús.

Majare jarabecu, majacacube

(Mr 9.38-40)

⁴⁹Juan arejamedá Jesúre:

—Mu, bueipōecu, jácarā ūja cūinācu ūmu abujuvare jaetovayure mi āmiái, mi paruéque. Ūbenita ūjaque ūi cube boje, “Đabejacu” acarā ūja úre, arejamedá Juan.

⁵⁰Ūbenita Jesús arejamedá:

—Ácu pōecu maucuvabecu baru majare, majacacube ū. Que baru úre nópe aiye jaubeteavū mujare, arejamedá náre Jesús.

Jesús Santiagore aru Jūare máre ūi jaraino

⁵¹Joabējino marejávūya ūi mūri nuquijāravu baquinó cavarō mearo

Jūmenijicui cūrōita. Que baru Jesús, paruéque dápiarī, búrejameđa ũi nuiyede Jerusalén āmicurīīmaroi.

⁵²Ūi jipocai jarorejameđa ũre boro nūvacaipōevare. Aru ina nuri ecorejaimađa Samaria āmicurijoborōcaīmaroi. Noi Jesús ũi eaquinore meadarānūridurejaimađa na. ⁵³Ūbenita ina Samariacavū copu etaiyūbedejaimađa Jesúre, ũi nuiye boje Jerusalén āmicurīīmaroita, ne ũbe boje diīmarocavūre. ⁵⁴Ūi bueimara pucarā, Santiago aru Juan, diede jāiva bācavū, jēniari jārejaimađa Jesúre:

—Mū, ũñje jabocu, ċjōđaicōjenajidi ũñja toabore cavarō mearo Jūmenijicui cūrōquede, ne éñajiyepē aivū? arejaimađa na.

⁵⁵Ūbenita Jesús copedini jararejameđa náre. ⁵⁶Aru nūrejaimađa apeno īmaroi.

Apevu Jesúque ne nuiyurīduino

(Mt 8.19-22)

⁵⁷Jesúja mái nuiyede, cūinācu ũmū arejameđa Jesúre:

—Máque nūquijivū yū caino mi nūnoita, arejameđa.

⁵⁸Aru Jesús arejameđa ũre:

—Macayavimiva cuvama ne cobeá.

Aru mījina cuvama ne juaiboa. Ūbenita yū, Jūmenijicui daroimū mácu ũmūpe, ji cūrō cuvabevū, arejameđa Jesús.

⁵⁹Aru apēcure arejameđa:

—Dajacu yúque, arejameđa.

Ūbenita arejameđa Jesúre:

—Mū, ji jabocu, mamarūmure jarūvaquijivū cāreja jipacure cūracobei, ũi yayiede, arejameđa.

⁶⁰Ūbenita Jesúcupūravū arejameđa:

—Ina yaivū bācavūpe paivū, ne jāpiabe boje Jūmenijicui jaboteinoque yāvaiyede, jarūvajarāri ina yaivū bācavūre. Ūbenita mūcupūravū coyūcunūjacu Jūmenijicui jaboteinoque yāvaiyede, arejameđa Jesús.

⁶¹Aru apēcū máre arejameđa Jesúre:

—Mū, ji jabocu, máque nūquijivū yū. Ūbenita mamarūmure, “Nūñumu” aicōjejacu yūre ji cūramicavūre, arejameđa.

⁶²Jesúcupūravū arejameđa ũre:

—Pōescu đaiyūcu baru ji ũrōre aru ũi baju ũrōre máre, buojabebi memecayū yūre. Pōeva ũpe paivūre Jūmenijicu jabotebecube, arī buedejameđa náre Jesús.

Jesús ũi bueicōjeni jaroino setenta y dos paivūre

(Mt 9.37-38, 10.7-16, 11.24; Mr 6.8-11;

Lc 9.3-5; Hch 13.51; 1 Co 9.14; 1 Ti 5.18)

10 ¹No yóboi Jesús beorejameđa apēvure setenta y dos paivūre. Náre jarorejameđa ũi jipocai pucarā matuiyeda cainoa īmaroai ũi nūquinoai.

²Aru jaroyū, arejameđa náre:

—Obedivū pōeva cūrivū, Jūmenijicui yāvaiye méne majibema na cāreja, mūje buenajimara iye yāvaiye méne, Jūmenijicui meadarājiyepē aivū náre, ne jū aiyede diede. Ūbenita obebevūbu memecaivū Jūmenijicure. Que baru jēniajara ũre, ũi daroquiyepē aivū apēvu buenajivure ina pōevare. ³Nuri jājara mūja. Jaroiñvū mūjare ijāravūcavū jēneboi yópe ovejavai nuiyepē āimara jījecurivū jēneboi. ⁴Nūvamejara mūja tāuturare, curubūare, aru cūraidoare máre. Borotede nūmejara mūje mái copūimaraque. ⁵Āri mūja ecoivū cūinādami cūramine, mamarūmū ajarā yópe: “Īñamicavū, mearo cūjarā mūja”.

⁶Aru diñamicavū mearoque ne cūru, nópe ajarā náre. Ūbenita mearoque ne cūbedu, “Mearo cūjarā mūja”, abejarā náre. ⁷Cūjarā cūinādāmima. Que teni āri aru ũcuri tejarā ne jīyede mūjare, mūje náre cadateiye boje. Mūja memecaivūpebu. Aru memecaipōēcure bojedaiye jaivū ũi memeinore. Ūbenita nūmejara cūramia coapa.

⁸Ecoivū baru mūja īmaroi, aru ina īmarocavū ne copū etaru mūjare me, ājara apējīene ne jīyede mūjare. ⁹Meadajarā ijimarare. Aru coyūjarā náre yópe: “Jūmenijicu jabotecūyūme pōevare maumejiena”. ¹⁰Ūbenita ecoivū baru mūja īmaroi, ne copū etabenoī mūjare diīmarocavū pōeva, cuimai nuri, ajarā yópe: ¹¹“Mūje jobore ũjare

jēiyede ñuje cñboba cāchinoi pñpeivũbu ñuja, mñje copũ etabe boje aru mñje jápiabe boje ñujare. Ûbenita majijarã iyede: Jñmenijicũ jabotecũyũme pñevare maumejiena”, ajarã. ¹²Coũyũbu mñjare: Ina Sodomacavũ bñcavũ pare ãmeina tedejaimada. Ûbenita diĩmarocavũ, mñjare copũ etabevũ bñcavũ, ñájinajarama ina Sodomacavũ bñcavũ pñeno baju Jñmenijicũ ñájiovaquijãravũ baquinóre pñevare, ne ãmeina teiye boje, arĩ buedejaimada náre Jesús.

**Apeĩmaroacavũ ne ju abeno
Jñmenijicure**

(Mt 10.40, 11.20-24; Mr 9.37; Lc 9.48; Jn 13.20)

¹³ Jesús arejaimada cojedeca:

—iMũja, judíova, Corazícavũ, ãmeno ñájinajaramu mñja! iMũja, judíova, Betsaidacavũ máre, ãmeno ñájinajaramu mñja! Pñecũ ãi ðaru pñeva ne ðarĩ majibede yópe ji ðaiyepe mñje jáiyede Tirocavũ aru Sidócavũ máre ne jáiyede, jave chĩori ne ãmeina teiyede, oatvajibevũ ne ðaiyede. ¹⁴Ûbenita mñja ñájinajaramu Tirocavũ aru Sidócavũ pñeno baju, Jñmenijicũ ñájiovaquijãravũ baquinóre pñevare, ne ãmeina teiye boje. ¹⁵Aru mñja, judíova, Capernaucavũ, jáve ñumenajaramu mñja cavarõ mearo Jñmenijicũ curõi. Quénora mñja ñurajaramu toabo cñiméboi, arejaimada Jesús.

¹⁶ Jesús arejaimada ãi bueimare cojedeca:

—Ñai pñecũ jápiaũy baru mñjare, jápiaibi yũre máre. Ñai pñecũ ãbecũ baru mñjare, ãbebi yũre máre. Aru ñai pñecũ ãbecũ baru yũre, ãbebi ñai yũre daroyũ bñcũ, Jñmenijicure máre, arejaimada Jesús.

Setenta y dos paivũ ne copaini daino

¹⁷ Ina setenta y dos paivũ, Jesúi jaroimara mácavũ, copaidejaimada torojurivũ Jesús yebai. Aru yópe arejaimada ãre:

—iMũ, ññje jabocũ, abujuva máre ju ama ññje cõjeiyede náre mi ãmiái, mi parúeque! arejaimada na.

¹⁸ Aru Jesús arejaimada náre:

—Jávũ yũ ñai abujuvai jabocure, ãi ãmiái Satanás, tũyũre cavarõre jocarĩ yópe yaroino tũiyepẽ. ¹⁹Mñjare parũre ðaivũ yũ, mñje járu ãðavare aru murivare máre, mñje curarãjiyepẽ ayũ náre. Aru mñja parũrivũtamũ ñai mñje maucũ, abujucũ pñeno. Que baru ãmeno ðabenama mñjare ãðava aru muriva máre. ²⁰Ûbenita mñja, torojurivũ ina abujuva ne ju aiye boje mñjare, pñeno baju torojurãrã mñje ãmiái toivaino cue boje cavarõ mearo Jñmenijicũ curõi. Que baru mñja curarãjaramu jaravũ cñiméjaravũ baquinóre, arejaimada náre Jesús.

Jesús torojucũ

(Mt 11.25-27, 13.16-17; Jn 3.35, 10.15)

²¹ Dinũmũmiareca Jesús, torojurĩ ãi ãmei Espĩritu Santoi parúeque, yópe arĩ, coyũrejaimada Jñmenijicure:

—Mũ, jipacũ, cavarõ mearocacũ aru ijãravũ jabocũ máre, mearore jívũ mũre, mi jáðovame boje caiye iye ji coyũiyede ina majidivũre, aru mi jáðovaiye boje caiye iyede ina majibevũre. Mũ, jipacũ, jívũ mũre mearore mi nópe ðaiye boje, arejaimada Jesús.

²² Jñmenijicure coyũrĩ buõjarĩ, Jesús arejaimada ina ãque curivũre:

—Jipacũ Jñmenijicũ jĩbi yũre caiye ji majiéde aru caiye ji parúede máre. Ñame majibema yũre. Quénora majibi jipacũ. Ñame majibema jipacure. Quénora majivũ yũ, aru na máre ina ji coyũimara, arejaimada Jesús.

²³ Dinũmũ aprevũre dajocarĩ, Jesús arejaimada ãi bueimare:

—iTorojuma ina pñeva jáivũ caiye iye mñje jáiyede! ²⁴Coũyũbu mñjare: Obedivũ Jñmenijicũ yávaiyede coyũcaipñeva aru jabova máre jáiyũrĩduquemavũ caiye iye mñje jáiyede. Ûbenita jámetequemavũ. Aru jápiaiyũrĩduquemavũ mñje jápiaiyede. Ûbenita jápiabetequemavũ, arejaimada Jesús.

**“Samaricacure” jári dápiarĩ ne
ðarãjiyepẽ aino**

(Mt 22.35-40; Mr 12.28-34)

²⁵ Cñinácũ pñecũ, Jñmenijicũ ðaicõjeiyede majicũ, Jesúi majiéde

majiyucu, nasajari, jēniari járejamedá úre:

—Mú, bueipōesu, ¿aipe ñaquidi yu, cūvacuyú járavu cūiméjāravu baquinóre? arejamedá ũ Jesúre.

²⁶Jesús arejamedá úre:

—¿Aipe Jūmenijicu toivaicōjēnejacquemari ũi ñaicōjeiyede Moisés bácuere javede? ¿Aipe majicurū iye mi bueiyede? arejamedá Jesús.

²⁷Ju ayu arejamedá úre:

—Ujacu mi jabocu Jūmenijicure caino mi úmeduque, caino mi úmeque, caino mi baju parúeque, aru caino mi majiéque máre. Aru ujacu mícuere yópe mi uepe mi baju, arejamedá Jesúre.

²⁸Que teni Jesús arejamedá úre:

—Meavu mi ju aino. Ñajacu yópe mi coyūinope, cūvacuyú járavu cūiméjāravu baquinóre, arejamedá Jesús.

²⁹Ubenita ñai ũmu, apévure ne me járajíyēpe ayu úre, jēniari járejamedá Jesúre:

—¿Namema ñai jícu? arejamedá ũ.

³⁰Jesús ju ayu, arejamedá úre:

—Cūinácu ũmu ēmeni nuquemavu Jerusalén āmicuríimmarore jocarí, nuñu Jericó āmicuríimmaroi. Que teni ñavacurivu jēquemavu úre, tatorājívū ũi cūvaede. Íquemavu ũi cuitótecajede aru caiye ũi apejīene máre. Aru jara popequemavu úre. Pare churíá ñaquemavu. Que teni ñajocquemavu úre, “¿Yaiyú bāríca?” arí ñápiavū. ³¹Nópe teniburu yóboi, cūinácu sacerdote ēmeni nuquemavu dimamica. Aru jáquemavu ñai parayūre joborói, ma ēcarui. Ubenita úre jári, vaiquémavu. ³²Nopedeca cūinácu Jūmenijicui cūramine memepōesu, levita āmicuríyabocacu, eaquemavu joabenoí ñai parayū yebai. Ubenita úre jári, vaiquémavu.

³³No yóboi, cūinácu apenocacu, Samaria āmicuríjoborócacu, nuñu dimamica, eaquemavu ñai parayū yebai. Aru cōmaje āroje jáquemavu úre. ³⁴Ūi yebai nuri, ũi churíare yuaquemavu olivo āmicurícu jēidna córore aru vino úyaicorore máre. Aru cuitótecajecávaque

būorí juoquemavu úre. Que teni nacovari ñoquemavu ũi tubamura. Aru nuvaquemavu úre cuipōeva ne cāiñami, meadacuyú úre. ³⁵Cōmiáijāravu jíquemavu táuturatūravare ñai cāiñami upacure, bojedacuyú ũi meadaquiyede ñai tatoimū mácuere. Aru aquemavu úre: “Meadajacu ñai ũmure me. Que teni ji copainumuta bojedaquijívū mure caiye mi jíye báquede úre”, aquemavu ñai Samariacacu, arejamedá Jesús.

³⁶Coyurí bujarí, ñai majicure Jūmenijicui ñaicōjeiyede ũi coyūiye báquede Moisés bácuere jēniari járejamedá Jesús:

—¿Ácu pōesu ina yóbecurá ũmūvacacu batequémari cadateyū ñai ũmure, ñavacurivu ne tatoimū mácuere? arejamedá Jesús.

³⁷Ū ju ayu arejamedá Jesúre:

—Ñai cōmaje āroje jári, cadateyū bácube úre, arejamedá.

Jesús arejamedá úre:

—Caride nuri ñajacu ũi ñaiye báquepe. Cōmaje āroje jári, cadatejacu mu apévure, arejamedá Jesús.

Jesús ũi jácūnūino Marta aru María yebai
(Jn 11.1)

³⁸Jesús nūrejamedá mái ũi bueimaraque. Aru imajinoi ecoiyede, cūinácu nomió, ōi āmiá Marta, copū etarejacoda Jesúre ōi cūrami. ³⁹Martai yóco máre cūrejacoda, ōi āmiá María. Ico dobaco Jesúi cuboba yebai, nópe ina judíovai ñari cōmajíyēpe ne buenajíyēpe aivu, jápiado barejácoda ũi bueiyede. ⁴⁰Ubenita Marta pare cārijinejacoda, ōi āiyede memeiye boje. Que baru Jesús yebai nuri, arejacoda úre:

—Mú, ji jabocu, ¿ye baju āmeni jíyocoi ñajocaino yūre, cūinácova memeiñu yu? Cadateicōjejacu ōre yūre, arejacoda ō Jesúre.

⁴¹Ubenita Jesús arejamedá ōre:

—Mú, Marta, cārijívū mu caijīe apejīe boje. ⁴²Ubenita cūinárora javū mure. Yópe María ōi ñaiyēpe paino mearotamu. Ōi jápiayē ji bueiyede mearotamu. Que

baru pōecu cubebi ícayū ōi ðaiyurōre, arejameða Jesús.

Jesús ũi bueino Jūmenijicuque jēniainore

(Mt 6.9-15, 7.7-11; Jn 14.13-14, 15.7, 16.23-24; 1 Jn 3.21-22, 5.14-15)

11 ¹ Cūinájāravu Jesús jēniañu marejámeða jípacu Jūmenijicuque. Aru ũi jēniariburu yóboi, cūinācu ũi bueimaracacu arejameða ũre: —Juan Bautista bácu Jūmenijicuque jēniainore buequemavu ũi bueimarare. Que baru mu máre buejacu ñujare Jūmenijicuque jēniainore, arejaimada na.

² Aru Jesús arejameða náre:

Muja jēniaivu Jūmenijicuque yópe ajarā: “Mu, ñujepacu, meacu bajubu mu. Que baru caivu pōeva mure pueðarí mearore jíjarāri. Báre ðajacu mu mi jabotequiyede pōevare. ³ Jíjacu ñujare jāravua coapa ñuje āiyeva.

⁴ Aru ārumetejacu ñuje āmeina teiyede yópe ñuja máre ñuje ārumeteiyepre caiye apevu ne āmeina ðaiyede ñujaque. Ñai abujuvai jabocui jujovajuroede ñujare vainí tuicōjemejacu ñujare, ñuje ðabenajiyepre āmenore”, arejameða náre Jesús.

⁵⁻⁷ Aru Jesús coyurejameða náre yópe:

—Pōecu ũi nuru cūinācu ũi yóvaimu yebai, acuyū ũre yópe: “Yúcacu, jíjacu yure yóbecuriboa páboare. Apecu ji yóvaimu edaibi ji cūrami cuyū. Aru āiye cubevu yure. Que baru jíquiye ũre eabevu yu” ayure, ñai ũi yóvaimu, ũi cūrami cucu, ju abejebu ũre yópe: “Cārijovamejacu yure. Jave bievu yu ji cūramine. Aru jímara jave cáivutamu. Que baru mure nacajari jíyu buojabevu yu”. ũi yóvaimu abejebu ũre yópe.

⁸ Coyuyubu mujare: ũi yóvaiye boje jíbecube ũre. Quénora ũi cārijovaiye boje, nacajari jícyume caiye iye jauéde ũre. ⁹ Que baru coyuyubu mujare: Jēniare ñujara Jūmenijicure, aru jícyume muje jēniainore ũre. Vore ñujara ũre, aru earājaramu. Aru muje

órejare nuiyede jedevacobei, Jūmenijicu voacacuyume mujare. ¹⁰ Que baru caivu jēniaivu Jūmenijicure cuvama ne jēniainore. Aru caivu voivu eadama ne voimure. Aru caivu órejaivure jedevacobei voaibi, arejameða Jesús, náre bueyu.

¹¹ Cojedeca Jesús, yópe arí, buedejameða náre:

—Muja juedocuvavivū, ímujemacu ũi jēniaru mujare páubore, jíje bárica muja ũre cūrabore? Í Aru mujemacu ũi jēniaru mujare moacure, jíje bárica muja ũre āðare? ¹² Í Aru mujemacu ũi jēniaru mujare jíðure, jíje bárica muja ũre murine? Nópe ðabenamu muja. ¹³ Que baru muja āmena méne cuvede jíni majiépedeca mujemarare, majepacu Jūmenijicu cavarō mearocacu pueno méne cavaede jíni majibi muja jēniaivure ũque. ũvacari darocuyume ñai Espiritu Santore caivu jēniaivure ũre, arejameða Jesús.

“Abujuvai jabocui paruéde cuvabi ũ” arí, ne boro coyurí adaríduino Jesúre
(Mt 9.34, 10.25, 12.22-30, 38, 16.1; Mr 3.20-27; 8.11, 9.40)

¹⁴ Dinumure Jesús jaetovayū barejámeða abujucu yávabecure cūinācu ũmure jocarí. Aru ñai abujucu ũi etaríburu yóboi, ñai ũmu yávabecu bácu yávarejameða. Que baru ina pōeva jáivu bācavu, pare dápiaivu, cuecumarejaimada. ¹⁵ ũbenita apevu ina pōevacavu arejaimada:

—Beelzebú, abujuvai jabocu, ímamume ũ. Que baru ũi paruéque jaruvaibi abujuvare, boro coyurí adaríduurejaimada Jesúre.

¹⁶ Aru apevu jujovaiyurivū barejámada ũre, ne majinajiyepre aivu jáve ũi ðaru ũi ðaiyede Jūmenijicui paruéque. Que baru jēniarejaimada ũi jáðovaiyepre aivu pōeva ne ðarí majibenore. ¹⁷ ũbenita Jesús coreóvayū ne dápiayede, “Beelzebú ũi ímamū” aivure, arejameða náre:

—Cūináro jaborōcavu ādamateivū baru ne bajumia, ina jaborōcavu cūinájarama

na. Nopedeca cūinádami cūramicavũ ádamateivũ baru ne bajumia, diñamicavũ cūinájarama na. ¹⁸Nopedeca bájebu ñai abujuvai jabocu, jaetovayũ baru abujuvai jabocure. Ádamateyũ bájebu ñi bajuma. Aru jaetovayũ baru abujuvare, joe parucu cubejebu ñi. “Abujuvai jabocui paruéque jaetovaibi abujuvare”, mñje aye boje yũre, yópe coyũyũbu mñjare: ¹⁹¿Ji jaetovaru abujuvare abujuvai jabocui paruéque, ñamei paruéque jaetovaidi mñjacavũ abujuvare? Que baru mñjacavũ abujuvare jaetovaivũ jáđovadama mñjare mñje borocuede yũre ũbenina. ²⁰Ūbenita Jũmenijicui paruéque jaetovayũbu yũ abujuvare. Que baru jáđovaiyũ yũ Jũmenijicu jaboteyũre mñjare, arejamedã Jesús.

²¹Dinũmure Jesús coyũrejamedã náre yo jári dápiarĩ ne đarãjiyere ainore, ne majinajiyere ayũ parucure abujuvai jabocu pũeno.

—Ūmũ parucu jári coreyũ ñi cūramine ñi boaiyeque, me meadaquemavũ ñi cũvaede.

²²Ūbenita apesu ñi pũeno parucu earĩ, boarĩ tatoquemavũ ũre. Ūi boaiyede, aru ñi cũvaede nũvari, coavaquemavũ diede apevũ ñi yóvaimaraque. ²³Que baru ñai yóvabecu maucũvaibi yũre. Aru ñai apevũre yóvare đabebi yũre, náre maucũvare đaiibi yũre, arĩ buedejamedã Jesús.

Jesús ñi coyũino abujucui copaino

(Mt 12.43-45)

²⁴Bediõva cojedeca Jesús buedejamedã náre:

—Abujucu etayũ bácu ũmure jocarĩ, voibi ñi jabũvõvõno penenoi. Ūbenita jabũvõvõno eabecu baru, copaiyũbi ñai ũmũ, ñi etaimũ márcurecata. ²⁵Aru copaini nũñũ, eaibi ñai ũmũ meacure, yópe cūrami oeni meadaiñamipe páyũre. ²⁶Que baru apevũ siete paivũ abujuva ñi pũeno ámenare vorĩ earĩ, nũvaimi ũque. Aru ina đaicõjeivũ ñai ũmure, ámedadama ũre pũeno baju, arĩ buedejamedã Jesús.

Jesús ñi coyũino torojuede

²⁷Jesús ñi yávaiyedeca, cūináco nomió ina obedivũ põeva jũneboi codoborĩ arejacoda ũre:

—Mũre jũedocũvaco báco, aru mũre bucũvõvõdo báco mearo torojũjacorĩ õ, arejacoda õ.

²⁸Ūbenita Jesús arejamedã óre:

—Ūi pũeno torojũrãjarama ina põeva Jũmenijicui yávaiyede jũ arĩ, đaiivũ yópe die coyũinope, arejamedã Jesús.

Põeva ne đarĩ majibenore Jesúre đaicõjeniduino

(Mt 12.38-42, 16.4; Mr 8.12)

²⁹Obedivũ põeva ne cójjiyede Jesús yebai, yávarĩ búrejamedã náre:

—Ijáravũcavũ ámena jáiyũrĩduyama põeva ne đarĩ majibenore. Ūbenita jámenama apenore Jũmenijicui đainore náre, quénora yo Jonás márcure vaino mácarõre. ³⁰Yópe Jũmenijicu ñi jaroie báquepe Jonás márcure, ñi coyũcaquiyepe ayũ ñi yávaiyede nõcavũ, Nínive ámicũrĩmarocavũ bácvũre, nopedeca Jũmenijicu darorejame yũre, ñi daroimũ márcure ũmure, ji coyũcaquiyepe ayũ ñi yávaiyede ijáravũcavũre. Aru yópe Jonás márcui cue báquepe moacu uracui yapibũ jĩvũ yóbecurijáravũ aru yóbecurĩnamia máre, nopedeca yũ, Jũmenijicui daroimũ márcu ũmure, cũcũyũtu joborõ jĩvũ yóbecurijáravũ aru yóbecurĩnamia máre. ³¹Jũmenijicui ñájiovaquijáravũ baquinóre põevare, ne ámeina teiye boje, ico jaboco aviá daino cãcopũravũcaco báco nacajacodome ina põeva ijáravũcavũque aru ámecorocodome náre, ne yũre jũ abe boje. Ó máco darejaquemavũ joarõ joborõre jocarĩ, jápiacodo ñai Salomón márcui coyũie báquede majiéque. Ūbenita Salomón márcui majié pũeno baju bueyũbu yũ. ³²Aru Jũmenijicui ñájiovaquijáravũ baquinóre põevare, ne ámeina teiye boje, ina ũmũva mácvũ, Nínivecavũ bácvũ, nacajarajarama ijáravũcavũque aru ámecororãjarama náre, ne yũre jũ abe boje. Ina Nínivecavũ bácvũ chĩori ne ámeina teiye báquede oatũvarejaquemavũ, jápiaivũ bácvũ Jonás márcui coyũie báquede Jũmenijicui yávaiyede. Ūbenita

Jonás mácuí majié pueno baju bueyubu yu, arejameđa Jesús.

Jesús ũi bueino pōeva ne đainore ne dápiai nope

(Mt 5.15; 6.22-23; Mr 4.21; Lc 8.16)

³³ Cojedeca Jesús buedejameđa ina ũque curivure:

—Pōecu pēoibure pēoriburu yóboi, nómemi dibure cobe jívui aru puebu cāchinoi máre. Quénora ñoimi dibure jocuve puenora, ina ecoivu nore ne járajiyepe ayu. ³⁴ Pōeva ne yacorua, pēoinope, járe đaiyu náre, ne memenajiyepa aino aru ne majinajiyepa aino ári ne nuiyede. Pōeva ne yacorua ijetedu náre o ne jáiye bíjaru náre, ye ne memeyede aru ne nuiyede máre majibenama. Aru pōeva ne ũme, yacoruafe paino, pēore đaiyu ne dápiaiyeđe. ³⁵ Que baru pōecu cainumua dápiai yu baru ijárvuquede, ijetede đaiibi ũi ũmene, ũi dápiafe boje cavarō mearo Jūmenijicui curōquede. Aru ñai pōecu ũi ũmene bíjacuyume. ³⁶ Que baru pōeva ne jámenu ne yacoruaque ámenotamu. Ũbenita pueno ámenotamu ne ũme ñemino maru, arí buedejameđa Jesús.

Jesús ũi boro coyurí adaino fariseovare aru Jūmenijicui yávaiye báquede bueipōevare

(Mt 23.1-36; Mr 12.38-40; Lc 20.45-47)

³⁷ Jesús ũi yávaríburu yóboi, cūinácu fariseovacacu “Ácudajacu” ayu, órejarejameđa ũre ũi cūrami. Que baru Jesús ecorí, dobarejameđa tuoiva yebai. ³⁸ Aru ñai fariseo ámeina járejameđa ũre, ũi cojabe boje ũi ñquiye jípoai. ³⁹ Aru Jesús arejameđa ũre:

—Mujá fariseova joaivubu muje ũcuidoare, aru jororuafe máre puenomia, pōeva ne jáiyede. Ũbenita mujá tatoiyurivubu avenu ne cvaede. Que teni ámeno baju đaiyubu mujá. Mearo đaiye avenu mearotamu joare đaicōjeiye pueno. ⁴⁰ iÁrumevu mujá! Ñai Jūmenijicu cuedayu maje baju puenocarōre cuedarejaquemavu jívcarōre, maje ũmene máre. ⁴¹ Ũbenita

mujé cvaede jívcuquede jíjárā cōmaje árojarivure. Nópe đaiyu mearo dápiai curājaramu mujá. Que baru mearo baju đaiyubu mujá.

⁴² iMujá, fariseova, ámeno ñájino cvarājaramu mujá! Caiye mujé oteiyoca, quíjiyoca, bojecubeyoca, caipucapruape paiyocare cvarivú, cūináyocare jíyavū Jūmenijicure. Ũbenita mearo đavure avenu aru jecuđe Jūmenijicure máre árumevu mujá. Caipucapruape paiye mujé cvede jocarí, cūinárore Jūmenijicure jíye javu mujare. Ũbenita pueno baju javu mujare mujé mearo đaiye avenu aru mujé jecuđe Jūmenijicure máre. Que đaru me cojuquiyebu Jūmenijicure.

⁴³ iMujá, fariseova, ámeno ñájino cvarājaramu mujá! Mujé ũe boje dobae mearoa baji judfovai cójjiñamiare aru mujé ũe boje pōeva ne jacoyiyede mujare táibui, ñájinajaramu mujá. Ñájinajaramu mujé ũe boje avenu ne dápiaiyeđe mujare mearape avenu pueno.

⁴⁴ iÁmeno ñájino cvarājaramu mujá! Yaivu bācavu ne jobocobeape paivu. Pōeva cuivubu dicobeá puenora, jámevva. Que baru ne cuiyede jaruvaino puenora majibema na. Nopedeca pōeva cuivubu mujé yóboi, ũbenita mujé ũmene jámevva. Que baru mujé ámeina dápiaiyeđe majibema na, arejameđa Jesús, náre bueyu.

⁴⁵ Aru cūinácu pōecu, Jūmenijicui đaicōjeiyeđe majicu, arejameđa Jesúre: —Mū, bueipōecu, mi que aiyé ámecoroivu ñujare máre, arejameđa Jesúre.

⁴⁶ Aru Jesús arejameđa náre: —Mujá, Jūmenijicui đaicōjeiyeđe majidivu máre ámeno ñájino cvarājaramu mujá, mujé đaicōjeiyeđe boje avenu ne đaiyu buojabede. Ũbenita mujavacari ye cadatebevu náre. Que baru mujá máre ñájinajaramu.

⁴⁷ iÁmeno ñájino cvarājaramu mujá! Mujá đaiyubu meadamia cūramiare ina Jūmenijicui yávaiyeđe coyucaipōeva mácavu ne jobocobeá

báque pñenoí, pueðarājivü na mácavüre. Ûbenita mujeñecuva mácavu boarí jarüvarejaquemavu na mácavüre.

⁴⁸Muje ðaiyede diñamiare, jáðovaiübu ju aivüre ne ãmeina teiye báquede, ne boarí jarüvaiye báquede Jümenijicü yávaiyede coyucaipöeva mácavüre.

⁴⁹Que baru Jümenijicü üi majiéque arejaquemavu yöpe: “Jarocuyumu yüre yávaiyede coyucaipöevare aru ji yávaiye méne beorí coyuicöjeimarare máre. Apevu ina yüre yávaiyede coyucaipöevacavüre aru ina ji yávaiye méne beorí coyuicöjeimaracavüre máre ãmeina ðarí, boarí jarüvarājarama náre”, arejaquemavu Jümenijicü.

⁵⁰Ne nópe ðaiye boje, Jümenijicü yaicöjecuyume ijäravucavüre ijärvüre ðarí buiyedata.

⁵¹Apecü üi boarí jarüvaiye báque boje ñai Abel bácuere, aru apevu ne boarí jarüvaiye báque boje caivü Abel bácuí yóbocavu bácvüre máre pu Zacarías bácu bajita, ñai ne boarí jarüvaimu mácu Jümenijicüi cürami táibu coricai, jáve coyuübu mujare: Ijäravucavu ñájinajarama ne boarí jarüvaiye báque boje.

⁵²¡Muja, Jümenijicüi ðaicöjeiyede majidivü, ãmeno ñájino cüvarājaramu muja! Jümenijicüi majiéde bueivüvacari, coyuübevu muja apévure, ne majibenajiyere aivü. Jáve Jümenijicüi majiéde majibevu, majidivüpe teivüvacari, apévure máre majicöjemevübu, arí buedejameða náre Jesús.

⁵³⁻⁵⁴Jesús üi yávaríburu yöboi nürejameða nore jocarí. Aru no yöboi ina Jümenijicüi yávaiye báquede bueipöeva aru ina fariseova máre pare cãrijovari jëniari járejaimaða üre, boro coyuüí ðaiyürídivü üi yávaiye boje.

Jesús üi coyuüno borocurí majiéde

(Mt 16.6; Mr 4.22, 8.15; Lc 8.17)

12 ¹Dinumu obedivü pöeva cójjivü ne baju cüraryede, Jesús, yöpe arí, coyuüí búrejameða üi bueimarare:

—Me ðajarä. Me jájara, muje ðápiabenajiyere yöpe ina fariseova ne

ðápiayere. Nácapüravu ðápiavaivübu aipe ðarí jujovarājivü apévure. ²Caiye jáðovame máque jároquiyebu. Aru dupiövaiye báquede máre majinajarama caivü pöeva. ³Que baru caiye muje aipe báquede ñeminói, jápiarājarama caivü pöeva Jümenijicü coyüre ðayüre dieðe miadároi. Caiye muje jüjuvaiye báquede máre tucubüa jívüi apévure jocarí, jápiarājarama caivü pöeva Jümenijicü coyüre ðayüre dieðe ne cójjinói, arejameða Jesús.

Jesús üi coyuüno pöeva ne

jidurājimüre

(Mt 10.26-31)

⁴Jesús coyürejameða náre cojedeca: —Muja, ji yövaimarare, coyuübu mujare yöpe: Jidübejarä ina boarí jarüvavüre muje bajure aru apeno ðarí buojabevüre. ⁵Ûbenita coyuquijivü mujare muje jidurājimüre: Jidüjarä Jümenijicüre, ñaine muje baju yainíburu yöboi jarüvarí buojayüre toabo cüiméboi. Jáve coyuübu mujare: ¡Jidüjarä üre! arejameða Jesús.

⁶Aru cojedeca Jesús arejameða náre: —Yöcavu bojeðaiüvü cüinápuüpe paivü mójina quíjinare pücatürava táutüraturava bojecubeturavaque. Aru Jümenijicüi arümetebebi caivü ina mójinare. ⁷Jümenijicüi majibi caiye poðamea cuede muje jipobüi máre. Que baru jidübejarä. Muja bojecurivütamu caivü mójina obedivü pñeno, muje üme yaibé boje, arí buedejameða náre Jesús.

Jesús üi coyuüno üre ju aivüre aru ju abevüre

(Mt 10.19-20, 32-33, 12.32; Mr

3.29, 13.11; Lc 21.14-15)

⁸Bediöva cojedeca Jesús, yöpe arí, coyürejameða ina üque cürivüre:

—Coyuübu mujare: Caivü ina ju aivüre yüre pöeva ne jáiyede, yu máre, Jümenijicüi daroimu mácu ümupe, náre ju acuyumu Jümenijicüi ángeleva ne jáiyede. ⁹Ûbenita caivü ina ju abevüre yüre pöeva ne jáiyede, yu máre náre ju abevübu Jümenijicüi ángeleva ne jáiyede.

¹⁰ 'Caivü ina âmeina yávaivure yure, Jümenijicui daroimü mácure ümure, Jümenijicu ârumeteibi ne âmeina teiyede. Ëbenita ina âmeina yávaivure ñai Espiritu Santore, Jümenijicu ârumetebebi ne âmeina teiyede.

¹¹ 'Aru ne jëni nûvaiyede mujare judfovai cójijiñamia yebai, aru âmeina teivure jëniari jáipõeva jipocai, aru jabova jipocai máre, "¿Aipe coyuräjidi náre?" arí cãrijimejara muja. ¹² Dinümü maquinómareca ñai Espiritu Santo majicacuyume mujare iye muje coyuräjiyede náre, arejameða Jesús.

**Jesús üi coyüino apejê
uraró cuvuru jidojaröre**

¹³ Cüinácu ina pöevacacu arejameða Jesúre:

—Mu, bueipõecu, ñujepacu yayiú bácu, üi cûvaede dajocame. Aru jimamicu ñame caiye diede. Que baru coavaicõjejacu jimamicure die üi cûvaede yáque, arejameða Jesúre.

¹⁴ Ëbenita Jesús arejameða üre:

—¿Ñame yure epeði âmeina teivure jëniari jáipõecupe o coavaipõecupe mujare? arejameða Jesús.

¹⁵ Aru arejameða ina obedivü pöevare:

—iMe jájara! Áujimejara muja. Põecu üi apué âmevü üi uraró cuvareque, arejameða Jesús.

¹⁶ Que baru ne jápiarí earäjiiyepa ayu, yópe arí, jári dápiarí ne ðaräjiiyepa ainore coyurejameða Jesús:

—Cüinácu ümü cuve cuvacu uraró oteiyede iquemavü üi jiore. ¹⁷ Que teni dápiaquemavü üi baju: "¿Aipe ðaji yu? Caiye iye ji uraró oteiyepa epeiñami cuvabevü yu". ¹⁸ Que dápiarí, üi baju yópe arí dápiaquemavü cojedeca: "Tavarí jaruvaicõjequijivü ji cûramia epeiñamiare. Aru tvarí jaruvaríburu yóboi, ðaicõjequijivü apedámia püeno uradámia. Aru uradámia jívui epeiçõjequijivü caiye ji oteiyede aru caiye ji apejêne máre. ¹⁹⁻²⁰ Aru ji baju dápiarí aquijivü yópe: 'Uraró cuvarede cuvavü yu. Yure apure ðaiyede cuvavü yu obedivüaqueva. Que baru jabuóvarí,

ári, ücuri, torojave tequijivü yu dieque', aquemavü". Ëbenita Jümenijicu aquemavü üre: "iMu, ârumecu, cari ñamimareca yaiquijivü mu! Que teni caiye iye mi cuvare bíjaquiyebu mure", aquemavü üre Jümenijicu. ²¹ Nopedeca vaivü üre, ñai põecu jëñure ü jieva uraró cuvarede. Ëbenita Jümenijicui jáinoi ye cuvabebi ü, arí coyurejameða Jesús.

**Jesús üi bueino Jümenijicui coreiyede
üi pöevare
(Mt 6.25-34)**

²² No yóboi Jesús arejameða üi bueimarare:

—Coyuyubu mujare: Cãrijimejara muja apurivü muje arajiyede, aru muje bajure, muje doräjiyede. ²³ Muje apuró äiye püeno bojecurótamu. Aru muje baju máre doiye püeno bojecurótamu, muje üme yaibé boje. ²⁴ Járijide apa ina mjinare. Na otebevüreca, aru oteiyede máre imevüreca, aru ne oteiyepa epeiñamine máre cuvabevüreca, Ëbenita Jümenijicu jíbi náre ne äiyeva. Aru caivü mjinana obedivü püeno muja bojecurivütamu, Jümenijicui püeno ue boje mujare. ²⁵ Aru mujacacu cãrijiiñu maru cüináora cure ðaiye majibebi üi cuede ijáravüi. Que baru cãrijiiye meamevü mujare. ²⁶ ¿Buojarí ðabevüvacari maiyójabenore, aipe teni cãrijivurü muja muje ðaiye majibede?

²⁷ Járijide apa muja iye cóvure. Die bucuiyavü, mememevacari, aru ne cuitótecajeara máre naremevacari. Ëbenita coyuyubu mujare: Iye cóvua métamu, caiye icaje ñai jabocu bácu Salomón mácu cuitótecajeara bojecuricajeara püeno. ²⁸ iMuja pare quíjino ju aivubu Jümenijicure! Jümenijicu nópe mearo ðaibi iye córiáre, caride dáí cuede aru javenare pöeva ne juaräjiyede. Nopedeca Jümenijicu jícuyme mujare muje cuitótecajeara meacajeara caiye iye cóvua püeno. ²⁹ Que baru cãrijini vobekarä muje arajiyede aru muje ücurajiyede máre. ³⁰ Ina Jümenijicure ju abevü cãrijini vodama caiye iyede, ne arajiyede,

aru ne ũcurajiyede máre. Ũbenita majepacu Jūmenijicu majibi caiye iye mujare jauéde. ³¹Ũbenita vojarā mūja Jūmenijicui jaboteinoquede, mūje ðaiyue boje mearore yópe ũi ðaicōjeiyere. Aru Jūmenijicu jícuyume mūje ārajiyede, mūje ũcurajiyede, aru cuitótecajeare máre, arī buedejamedā náre Jesús.

Jesús ũi bueino maje cūvarājiyede mearo bajure cavarō mearoita
(Mt 6.19-21)

³²Cojedeca yópe arī, buedejamedā Jesús:

—Mūja, jívū, obebejinavacari jidubejarā. Majepacu Jūmenijicu, ũi me boje, epecuyume mujare jabovava ũi jaboteinumure. ³³Jīni bojedajarā mūje cūvaede aru tāuturare ĩniburu, jījarā cūve cūvabevure. Que teni cūvarājaramu cainmua mūje cūvae me cūiméne cavarō mearo Jūmenijicui cūrōi, ñavaipōeva ne ĩmenoi aru bocomiva ne āmenoi. ³⁴Que baru mūje cūvae cūrōre dāpiarājaramu mūje ũmeque máre, arejamedā Jesús.

Jesúre meateni coreino
(Mt 24.43-44, 25.1-13; Mr 13.34-36)

³⁵Jesús, yópe arī, buedejamedā ina ũique curivure:

—Meatejarā mūja yópe pōeva ne memenajiye jipocamia ne meateiyere. Buojarā mūje jārióicāvare aru pōojara mūje pōoibure. ³⁶Ðajarā yópe ina memecaiipōeva ne ðaiyere coreivū ne jabocure, voarājivū maumena ũi copaiyede purubuoŕi torojuve teinore jocarī. ³⁷Ñai jabocu darī earu ina ũre memecaiipōeva coreivure, torojurājarama na. Jāve coyuyubu mūjare: Ñai jabocu buocuyume ũi jārióicāvare. Aru náre dobaicōjenī tūoiva yebai, jícuyume ne ārajiyeva. ³⁸Que teni ñai jabocu ũi daiyede ñami coricai o miadāe tuiyede, ina memecaiipōeva coreivū baru ũre, me torojurājarama na, ũi mearo ðacaquiye boje náre. ³⁹Me dāpijarā iyede: Ñai cūrami upacu

majibebi aipiye ñavaipōescu dacuyure. Majicu baru ñavaipōescui daquiye, coreni, ecoicōjemeni, ñavaicōjemejebu ũi cūramiquede. ⁴⁰Ũi máre, Jūmenijicui ðaroimū mácu ũmure, dacuyumu yure mūje corebenumure. Que baru meateiyere jauvū mujare máre, arejamedā Jesús.

“Memecaiipōescu ju ayure aru memecaiipōescu ju abecure” jári dāpiarī ne ðarājiyere aino
(Mt 24.45-51)

⁴¹Pedro jēniari jārejamedā Jesúre:

—Mu, ñūje jabocu, ¿coyucacurū mu yo jári dāpiarī pōeva ne ðarājiyere aino mácarōre ñūjare? ¿O coyucacurū yore caivure? arejamedā Jesús.

⁴²Aru Jesús arejamedā ũre:

—Coyuquijivū mujare ũi borore ñai memecaiipōescure ju ayure ũi jabocure aru majicure máre. Ñai cūrami upacu coreicōjecuyube ñai memecaiipōescu majicure, ũi jíquiyere ayu yebacavure ne ārajiyeva caijārvua. ⁴³Ñai cūrami upacu copaini dayū, earu ũre memecaiipōescure ðayure yópe ũi cōjeinore, torojucuyube ñai memecaiipōescu, cūrami upacu ũi jíquiyere boje ũre bojedaino mearore. ⁴⁴Jāve coyuyubu mūjare: Ñai cūrami upacu coreicōjecuyube ñai memecaiipōescure caiye ũi cūvaede. ⁴⁵Ũbenita apescu memecaiipōescu, ñai ju abescu ũi jabocure, “Ji jabocu maume dabecube” arī, āmeina ðayū baru ũi yebacavure aru yebacarōmivare máre, urarō āri aru ũcuri pacotecuyube ũ. ⁴⁶Que teiyede, ũi jabocu dacuyube ñai memecaiipōescu ũi corebejārvu baquinói aru ũi majibeora baquinói máre. Aru jarūvaicōjecuyube ũre noi, Jūmenijicure ju abevure ne jarūvainoi, ũi ñājiquiyere ayu.

⁴⁷Que baru ñai memecaiipōescu majicureca ũi jabocui urōre, ũbenita ũi mememenu, aru ju abedu ũre, ñai jabocu pare jara popeicōjecuyube ũre. ⁴⁸Ũbenita ñai memecaiipōescui majibedu ũi jabocui urōre, aru āmenore ðaru, majiédā jara popeicōjecuyube ũre. Ñai majicure ũi jabocui urōre ðaiye jauvū ũi

majiépe. Aru ñai pōeva ne jímu mácure uraró, jacopaiyovaiye javvu náre coapa cojedeca, arejameđa Jesús, náre bueyu.

Jesús ũi coatede ðaino pōevare

(Mt 10.34-36; Mr 10.38)

⁴⁹Cojedeca Jesús coyurejameđa náre:

—Darejacacu yu ijárvui, Espírítu Santo ũi daquiyepa ayu ijárvucavure. Aru pare uvu yu ũi daquiyede ũi ure paruéque. ⁵⁰Ūbenita mamarumu uraró ñájiye jauquiyebu yure. Nájivu yu caride, aru ñájiqijiviu ji ñájiye buojaiyeta. ⁵¹¿Dápiavurū muja yu dayu bácuře cārijimene ðacuyu ijárvucavure? Jáve coyuyubu mujare: Ji daiye báque boje ijárvui, pōeva coatenajarama ne baju. ⁵²Que baru cūinápurupe paivu cūinádami cūramicavu maucvarājivubu ne baju yure boje. Pucarā ádamatenajivubu apevu yóbecuráque. ⁵³Apevu nácavu ju arājivubu yure. Ūbenita apevu nácavu ju abenajivubu yure. Que baru népacu ádamatequijibi mamacuque. Aru mamacu ádamatequijibi jípacuque. Népacu ádamatecojibico mamacoque. Aru mamaco ádamatecojibico jípacuque. Mamacui márepaco ádamatecojibico ōi vácuque. Aru ōi vácore ádamatecojibico ōque, arejameđa Jesús.

Jesús ũi coyūino meajárvure aru ámejárvure

(Mt 16.1-4; Mr 8.11-13)

⁵⁴Jesús arejameđa ina obedivu pōevare:

—Muja jáivu ocopenibo nacajainore aviá doinoi, cūiná aiyavū muja “Ocaquiyebu”. Aru nopedeca ocaiyavū no. ⁵⁵Aru muja jáivu ũmevu japuínore aviá ðaino cācopūravure jocarí, aiyavū muja “Pare bo ðaivu. Meajárvu ðaivu”. Aru nopedeca boiyavū no. ⁵⁶iMuja, jujovavutamu! Joboróquede aru cavaróquede máre coreóvavacari, ũbenita pare coreóvavubu muja ijárvui vaiyede, arejameđa Jesús.

Mauvare mearo maje ðaino

(Mt 5.25-26)

⁵⁷Jesús arejameđa náre cojedeca:

—¿Aipe teni meadabenaru muje ðaiyede caride muje majinomía? Meadajarā muje ðaiyede caride yópe muje majinope. ⁵⁸Mujacacu nuñu maru ũre ámecoroyuque jabova ne ámeina teivure jēniari jáiñami, “Meadarājevnu” ajacurí ũre, ũi nuvamequiyepa ayu ũre jabova ne ámeina teivure jēniari jáipōecure, aru ũi jēni jíbequiyepa ayu ũre churaravare, aru ne jaruvabenajiyepa ayu ũre ámeina teivure jēni jacoñami jívuí. ⁵⁹Coyuyubu mujare: Ne buoru ũre ámeina teivure jēni jacoñami jívuí, etabecube pu bojedayuta caiye iye ũi bojecube ðaiyede, arejameđa náre Jesús.

Muje ámeina ðaiyede chōino méne oatuvaino

13 ¹Dinumu apevu pōeva, Jesús yebai járanuri, ũre coyurejaimađa ñai jabocu Pilato ámicucu ũi boarí jaruvaiyede apevu Galilea ámicurijoborócuve aru ũi jivaino mácarōre ne jivede áimara jiveque, diede juaicōjēni pueðariducuyu Jūmenijicure. ²Aru Jesús arejameđa náre:

—¿Dápiavurū muja ina Galileacavure, Pilatoí boarí jaruvaimara mácavu, ámena mácavu bajure apevu Galileacavu pueno? ³Coyuyubu mujare: ¡Que ámevu! Muja chōiri dápiarí muje ámeina teiyede jaruvarí oatuvabevu baru, napedeca ñájinajaramu muja. ⁴¿Aru dápiavurū muja ina dieciocho paivu tuiмара mácavure cūrami ũmujuriñami Siloé ámicurócadami ámena mácavu bajure caivu apevu Jerusalécavu pueno? ⁵Coyuyubu mujare: ¡Que ámevu! Muja chōiri dápiarí muje ámeina teiyede jaruvarí oatuvabevu baru, napedeca ñájinajaramu muja, arejameđa Jesús.

“Higueracure” jári dápiarí ne ðarājiiyepa aino

⁶Apeno jári dápiarí ne ðarājiiyepa ainoque, yópe arí, buedejameđa Jesús: —Cūinácu ũmu cuvatequemavu higuera ámicuricure ũi jioi. Aru

cūinájāravu nuri vorīduquemavu dīcu jēidūare. Ūbenita eabetequemavu didūare. ⁷Que teni aquemavu jiore memecaipōecure yōpe: “Jájacu. Yōbecurījūa coapa vocūdarīduivū yu jēidūare icu jocūcure. Ūbenita cainūmua eabevū yū. Jēidūa cubevū dīcu. Que baru icu hīgueracure coenī jarūvajacu mū. ¿Aipe teni bījaji yū jī jōborōre icu āmecu boje?” aquemavu űai jabocu memecaipōecure. ⁸Ūbenita űai memecaipōecu aquemavu űre: “Mū, jī jabocu, dajocajacu icu hīgueracure iūju bajure cāreja. Ūiyūvu yu icu yebai. Aru etejūede māre epeiyūvu yu dīcure. ⁹Que teni arejū jēidūa bucūru, meaquiyebu. Ūbenita arejū jēidūa bucūbedu, coenī jarūvaicōjejacu icu hīgueracure”, aquemavu űai memecaipōecu, arejameđa Jesús.

**Jesús űi meadaino tūijidū ijimore
judfōva ne jabuóvaijāravūi**

¹⁰Dinumu Jesús bueyu barejameđa cūinādami judfōvai cōjijīñami jīvūi ne jabuóvaijāravūi sábadoi. ¹¹Aru nore cūrejacođa cūināco nomio abujucu űi ijide đaimo. űai abujucure cūrejacođa ō dieciocho paijūa baju. Ō tūijidū barejacođa. Nurié núco oabedejacoda ō. ¹²Jesús ōre jáññ, cuturejameđa ōre űi yebai. Aru arejameđa:

—Mū, nomio, meadaimomu mū mi ijinore, arejameđa Jesús.

¹³Que arī, tuorejameđa ōre űi purūaque. Aru cūinā nurié núrejacođa ō. Que baru torojūede jīdejacoda Jūmenijicure. ¹⁴Ūbenita űai judfōvai cōjijīñamine coreipōecu Jesúre jarayū, űi meadaiye boje jabuóvaijāravūi, arejameđa ina pōevare:

—Seis paijāravūa cūvū, mūje memejāravūa. Memejāravūai meatenadajarā mūja. Ūbenita jabuóvaijāravūi meatenadabejarā, arejameđa ű.

¹⁵Aru Jesús arejameđa űre:
—iMūja jajovaiūtamu! Caivū mūja mūje oteivecure o mūje burrore māre űi āitōcure jōdeni jocarī, ocore

jīnanūvaiyavū mūja jabuóvaijāravūi.

¹⁶Quédeca ico nomio, Abraham mácuī pāramenacacore, abujuvai jabocu űi đaicōjeimo mácore dieciocho paijūa baju, meadaiye javū ōre jabuóvaijāravūi, arejameđa Jesús.

¹⁷Ū que ayure, caivū űi mauva cūyoje tedejaimada na. Aru caivū ina obedivū pōeva pare torojūrejaimada caiye iye űi đarī majibede đaiye boje.

**“Oteiyabe mostazare” jári dāpiarī ne
đarājiyepe aino**

(Mt 13.31-32; Mr 4.30-32)

¹⁸Bediōva Jesús arejameđa:

—Coyūquiivū mūjare aipe ārojarore yo Jūmenijicūi jaboteinore. Jári dāpiarī mūje đarājiyepe ainore coyūquiivū mūjare, mūje majinajiyepē ayū. ¹⁹Yōpe mostaza āmicurīyabe oteiyabepebu. Cūinācu űmū diyabede ĩni oteibi űi jioi. Aru bucūrī mūivū jocūcure. Dīcu cavabūa űracavabūa nuivū. Aru dīcu taino cāchīnoi mājina ne juaiboa đadama, arejameđa Jesús.

Nopedeca mamarūmure Jūmenijicūi jaboteino quījīnotamu, pōeva obebevu ne cue boje noi. Ūbenita Jūmenijicūi yāvaiye méne coyūrīburu yōboi űrarōtamu no Jūmenijicūi jaboteino, obedivū pōeva ne cue boje noi.

**“Páure bucure đaiyede” jári dāpiarī ne
đarājiyepe aino**

(Mt 13.33)

²⁰Bediōva cojedeca Jesús arejameđa:

—Jári dāpiarī mūje đarājiyepe ainore coyūquiivū yo Jūmenijicūi jaboteinore. Yōpebu nomio ōi páure bucure đaiyepē. ²¹Diede adarī jīvaiyepēbu yōbecurīcurubūa páu đaicurubūare. Aru caino jīvāibore bucūvāinopebu, arejameđa Jesús.

**Jesús űi bueino jedevacobe
quījīcōbede**

(Mt 7.13-14, 21-23, 8.11-12, 19.30,
20.16, 22.13, 25.30; Mr 10.31)

²²Jesús űi nuīyede Jerusalén āmicurīmaroi, űi vaiyede ĩmaroare

aru ïmajinoare máre, buedejameða nócvare. ²³Aru cüinácu pöescu jëniari járejameða úre:

—Mu, ñuje jabocu, ¿obebevu bárãjídica na, Jümenijicui meaðaimara márajivu? Jesúre arejameða.

Aru Jesús arejameða caivu ina pöevare:

²⁴—Ecojarã muja jedevacobe quíjicobei. Norecabu Jümenijicui jaboteino. Соууубу мујаре: Obedivu ecoiyuridurãjarama nore. Æbenita buojabenajarama. ²⁵Cüinácu cürami upacu bieniburu yóboi úi jedevacobede ñamine, voaiyubebi dicobede cojedeca. Nopedeca Jümenijicu úi jaboteino ecoiyede bieniburu yóboi, voabescuyme muja núrivure jedevai. Órejarãjaramu úre pare: “Mu, ñuje jabocu, voajacu ñujare”. Æbenita Jümenijicu acuyume mujare: “Jívu ãmevu muja. Muje dainore majibevu yu”, acuyume ú. ²⁶Dinũmure yópe arí bárãjaramu muja: “Ñuja ãri aru úcuri tecarã múque aru ñuje ïmaroa ma écarui bueávũ mu ñujare”, arãjaramu.

²⁷Æbenita ú acuyume: “Соууубу мујаре: Jívu ãmevu muja. Muje dainore majibevu yu. ¡Que baru caivu muja ãmeina teivu ñujara yure jocarí!” acuyume ú.

²⁸Chíoivu orí curãjaramu muja nore. Aru jararí cöpi cürajaramu muja jáivu náre; Abrahãre, Isaare, Jacore, aru caivu ina Jümenijicui yávaiyede соуцаирöevare máre, curivure Jümenijicui jaboteinoi. Æbenita mujacapüravu mautenajaramu jedevai. ²⁹Aru darãjarama pöeva, cainoa joboröacavu. Dobarãjarama úi tuoiva yebai, ãrajivu úi torojuve teinũmure Jümenijicui jaboteinoi. ³⁰Dinũmu maquinóre apevu jabotebevu bácvu ijãravure jabotenajarama Jümenijicui jaboteino edaiyede. Aru apevu jaboteivu bácvu ijãravure jabotebenajarama Jümenijicui jaboteino edaiyede, arejameða Jesús.

Jesús úi oino, Jerusalécavure jescu

(Mt 23.37-39)

³¹Dinũmu apevu ina fariseovacavu ñurejaimaða Jesús yebai. Aru arejaimaða úre:

—Herodes boarí yaiváiyubi ñure. Que baru dupini ñujacu mu yore jocarí, arejaimaða na.

³²Æbenita Jesús arejameða náre:

—Yópe arãñujara ãñu borocucure: “Jesús ñujare aicöjeimi ñure yópe, ‘Abujvare jaruvavu yu aru pöevare meaðavu yu caride aru javenare máre. Aru yóbecurijãravua yóboi ji ðaiyede buojaquijivu. ³³Æbenita mái ñuiye javvu yure caride, javenare, aru javena cömiãijãravure máre. Cüinácu Jümenijicui yávaiyede соуцаирöescu yainí buojabecube Jerusaléne jocarí. Que baru ñuquijivu yu Jerusaléi, ina Jümenijicui yávaiyede соуцаирöeva mácvure ne boarí jaruvainoi, pöeva ne boarí jaruvãrijivepe ayu yure’, ajarã Herodede”, náre aicöjenejameða Jesús.

³⁴Aru arejameða Jesús:

—iMuja, Jerusalécavu, mujeñecuva mácvu boarí jaruvarejaquemavu ina Jümenijicui yávaiyede соуцаирöeva mácvure! Cüraboaque duvarí boarí jaruvarejaquemavu ina Jümenijicui daroimara mácvure. Aipye baju cójjiovaiyuriduvu yu mujare ji yebai, yópe cáyuco ði cójjovaiyepere mamarare ði caveba cãchinoi. Æbenita ùbeteavũ muja. ³⁵Jãjara. Dinũmu maquinóre muje curöre Jümenijicu dajocarí jaruvacuyme. Aru соууубу мујаре: Yure jámenajaramu muja cojedeca pu jáðovacudayure meacu bajure jáivuta. Dinũmu maquinóre arãjaramu yópe: “Torojue bajadéni ñai dayure Jümenijicui ãmiái, úi paruéque”, arejameða Jesús.

Jesús úi meaðaino cocoroyure

(Mt 12.11)

14 ¹Cüinájaravu, judío vai jabuóvãijãravu sãbadoi, Jesús ãcunñrejameða cüinácu jabocu, fariseovacacui cürami. Ina jabova nore curivu cocorejaimaða úre, úi ãmeina tedu, boro соуурí adarãjivu úre. ²Aru cüinácu úmu pare ijimũ jarorejameða nore, úi ãmuvea aru úi ãraðoa máre pare cocororejavãya úre. ³Úre jáñu Jesús, jëniari járejameða ina Jümenijicui

yávaiye báquede bueipōevare aru ina fariseovare máre, noi curivure, yópe arí:

—¿Meadaíe jauri pōevare judíovai jabuóvaujāravu sábadoi? arejameđa Jesús.

⁴Ūbenita bi arejaimađa na.

Dinũmũma Jesús ñai ijimure jēni meadarejameđa. Ūi meadarĩburu yóboi, nuicōjenejameđa ũre. ⁵Aru Jesús arejameđa náre:

—¿Ácu mũjacacu mamacu o ũi oteivacu máre turu cobe ũmũjaricobe jĩvui, cūiná imeje báraca ũre judíovai jabuóvaujāravure? arejameđa Jesús.

⁶Ūbenita bi arejaimađa na.

“Cutuimara torojũve teinoi” jári dápíarĩ ne đarājijeyepa aino

(Mt 23.12; Lc 18.14)

⁷Dinũmũre Jesús járejameđa ina cutuimara voivure apevu pũeno ne dobarō mearova. Que baru coyurejameđa náre yo jári dápíarĩ ne đarājijeyepa aino:

⁸⁻⁹—Apecu ũi cuturu mũre ũi torojũve teinoi, apevu pũeno dobabejacu dobarō mearoi. Que đaru, ñai torojũve teino upacu cutuyũ baru apecu ũmũre, mi pũeno ne majimũre, acũyũte mũre: “Jĩjacu mi dobarōre ñai ũmũre”. Que teni cũyoje teni dobacũnjebũ mũ tũrũvaita. ¹⁰Ūbenita apecu ũi cuturu mũre ũi torojũve teinoi, dobajacu tũrũvai. Que đaru, dacũyũte mi yebai ñai cutuyũ bācu aru acũyũte mũre: “Jĩcu, nũjacu pũenomaque. Vojacu mi dobarō mearova”. Que teni torojũrĩ járajarama mũre caivu dobarivu mũque tũoiva yebai. ¹¹Que baru ñai cũiyũcu me apevu pũeno, parũbecũyũte pũeno baju. Aru ñai parũbede đaiyũcu ũi baju apevu cāchino, me cũcũyũte pũeno baju, Jũmenijĩcui mearo đacaquiye boje ũre, arejameđa Jesús.

¹²Aru ñai ũre cutuyũ bācure máre arejameđa Jesús:

—Mi torojũve teinũmũ, cutubejacu mũ mi yóvaimarare, aru mívure, aru mi cađajĩecavu cũve cũvarivure máre. Que đaivu baru, nācapũravũ ne cuturājijeyede

mũre máre ne torojũve tenajiyede, cũvacũyũmu mũ mi bojeva. ¹³Ūbenita mi torojũve teinũmũ cutujacu ina cōmaje ārojarivure: cũve cũvabevũre, ijimarare, cuiye majibevũre, aru jári eabevũre máre. ¹⁴Aru torojũcũyũmu mũ. Nācapũravũ buojabenama bojeđaivu mũre. Ūbenita eacũyũmu mũ mi bojeva ina boropatebevũ ne nacajarajijāravũ baquinóre yainore jarũvarĩ, arejameđa Jesús.

“Ūrarō āinore” jári dápíarĩ ne đarājijeyepa aino

(Mt 22.1-10)

¹⁵Cūinácu ũque curivucacu, Jesús ũi que aiyede járiayũ bācu, arejameđa Jesũre:

—ĩTorojũcũyũte ñai ācũyũ Jũmenijĩcui jaboteinore! arejameđa ũ.

¹⁶Jesús, ũre buecũyũ, arejameđa:

—Apeũmũ cūinácu ũmũ torojũve teinore meadaquemavũ. Aru cutuquemavu obedivu pōevare. ¹⁷Que teni ne āiora joabejĩnoi ñai torojũve teino upacu ũi yebacacure jaroyũ, aicōjequemavũ ũi cutuimarare yópe: “Jave meadacavu caiyede mũjare, que baru ‘Áradajarā’ aibi ji jabocu”, ajacu, aquemavũ ũ. ¹⁸Ūbenita ina ũi cutuimara coapa coyũrĩ bāquemavũ nũiyũbevũ ũi torojũve teinore. Cūinácu ũi cutuimaracacu aquemavũ: “Mamajiore bojeđavu yũ. Que baru jácũnũiye javũ yũre no jiore. Que baru coyũjacu mi jabocure, ũi corebequiyepe yũre”, aquemavũ ũ. ¹⁹Aru apecu aquemavũ: “Cairũcarũrũare paivu oteivescavare bojeđavu yũ. Que baru jácũnũiye javũ yũre náre. Que baru coyũjacu mi jabocure, ũi corebequiyepe yũre”, aquemavũ ũ. ²⁰Aru apecu aquemavũ: “Pũrũbuovũ yũ. Que baru daiye majibevũ yũ mi jabocui torojũve teinoi”, aquemavũ ũ. ²¹Que teni ñai ũi yebacacu copaini coyũquemavũ caiye iyede ũi jabocure.

’Ūi coyũiyede járiayũ bācu ñai jabocu, jararĩ dápíayũ, aquemavũ ũi yebacacure: “Maumejiena nũjacu ĩmarocama ũramai

aru quíjimai máre. Aru davajacu ina cõmaje ãrojarivure: cãve cãvabevure, ijimarare, jári eabevure, aru cuiye majibevure máre”, aquemavu ñai jabocu. ²²Ñai yebacacu ñi copaiyede, aquemavu ñi jabocure: “Mũ, ji jabocu, yópe mi cõjeiyepe ðavu yũ. Æbenita mi ãitucubu buibévu cãreja”, aquemavu ñai yebacacu. ²³Aru ñai jabocu aquemavu ñi yebacacure: “Ímarore jocarĩ nujacu mũ. Ma nuimai nujacu aru daicõjejacu põevare ji torojũve teinoi, ji cõrami buiquiyepe. ²⁴Сочууабу муре: Саиву ina ji cutuimara mãcavu ãmenajarama ji torojũve teinoque ãiyede”, aquemavu ñai jabocu, arejamedã Jesũs.

Jesúque nũru ñãjiovaino

(Mt 10.37-38; 16.24; Mr 8.34; Lc 9.23; Jn 12.24)

²⁵Mái nu iyede obedivu põeva yõvarejaimada Jesũre. Aru ñi copedini, jári, arejamedã náre:

²⁶—Ácu põecu ñi daru ji yebai, ji bueimaracacu bacũyũ, yure jesué jaũvu ãre caivu pũeno baju. Que baru ñjacurĩ yure jípacu, jípacu, jímarepaco, mamara, jíburã, ímara, aru ñi baju máre pũeno baju. ²⁷Ácu põecu daiyũcu yúque, ðajocajacurĩ põeva ne mearo jáiyede ãre, cãyebejacurĩ yure yõvaiyede, aru jíðubejacurĩ ñi ñãjiquiyede. Nõpe ðabecu baru, ñi buojabebi jícu bacũyũ. ²⁸Ácu mũjacacu cõrami uraðãmi ðaiyũcu baru, ðãpiarĩ dobajebu, corevacũyũ aipino bojecurõre ðĩnamine aru ñi buojaquinore máre. ²⁹⁻³⁰Iñamine ðarĩ búriburu yõboi, ñai cõramine ðayũ ñi buojabedu, caivu ina jáivu ãre yurinajarama yópe aivu: “Ñai ãmũ cõramine ðarĩ búcube. Æbenita buojabebi caride”. ³¹Aru ácu jabocu ðãpiarĩ dobajebu, ñi jina caipũcarũnãre paimil baju churaravaque boaiyũcu baru apescu jabocu veinte mil paivu baju churarava cãvacũque ãdamatecũdayũ ãre. ³²Aru boarĩ buojaiyũbecu baru ñi boro nuvaipõevare coyurĩ jarocũyũme ñi maucu joai cuedeca cãreja, “Boaiyũbevũ yũ” arĩ jaroyũ. ³³Que baru me ðãpaiaye

jaũvu mũjare jipocamia, ji bueimara mãrajivu baru. Mũja ðajocabevũ baru mũje cãvaede, ji bueimara teivu buojabenamu mũja, arejamedã Jesũs.

“Yuquirare” jári ðãpiarĩ ne ðarãjiyepe aino

(Mt 5.13; Mr 9.50)

³⁴Bediõva cojedeca arĩ buedejamedã Jesũs náre:

—Meaðaivu maje ãiyede yuquiraque. Nopedeca ñãjiye meadaivu põevare. Yuquira maje ãiyede meadaivu. Æbenita yuquira vaijue bĩjaru, ãiyede meadaive buojabevũ. ³⁵Joborõre aru oteiye ãrojũrõre máre meadaive buojabevũ. Quédata põeva jarũvaðama iye yuquira meamene. Nopedeca Jũmenijicui põeva ñi urõpe ðarĩ ðajocauvu baru, meadarĩ buojabenama ijãravũcãvure. Me jápijarã mũja iye ji bueiyepe, arejamedã Jesũs.

“Oveja mamateyure” jári ðãpiarĩ ne ðarãjiyepe aino

(Mt 18.10-14; Lc 5.29-30; Jn 10.1-16; He 13.20)

15 ¹Apenũmũ earejaimada Jesũs yebai obedivu Roma ãmicurõ jaboteino jabovare tãtura ícaipõeva aru ãmeno ðaipõeva máre, jápiarãcaivu ãre. ²Fariseova aru Jũmenijicui yãvaiye báquede bueipõeva máre borotedejaimada, ne bajumia aivu: —Ñai ãmũ copũ etaibi ãmeno ðaipõevare aru ãimi náque, arejaimada na.

³Ne que aive boje, Jesũs coyũrejamedã náre yo jári ðãpiarĩ ne ðarãjiyepe ainore:

⁴—Mũjacacu ovejavare coreipõecu cãvacu baru cien paivu ovejavare, aru cõinãcu nãcacu ñi mamatedu, ñai ðajocajebu ina noventa y nueve paivu ovejavare põescubenoĩ, vocũñũ ñai bĩjayũ bácuere ãre earĩta. ⁵Aru ãre earĩ, ñni, arũboi tuorĩ, torojurĩ nuvajebu ñai ovejare ñi cõramita. ⁶Cõrami earĩ, õrejajebu ñi yõvaimarare aru ñi ðãjãicãvure máre. Aru ajebu náre

yópe: “Torojujarā yáque, ji oveja bíjaye bácare ji eaiye boje”, ajebu. ⁷Nopedeca coyuyubu mujare: Ina cavarō mearo Jūmenijicui curōcavu torojurājarama cūinácū āmeno ñaipōecu chīori, oatūvaru ũi ñaiyede, apevu noventa y nueve paivu pñeno, ina “Chīori oatūvaiye jaubevu yure”, arī dāpiaivu, arī buedejameđa Jesús.

**“Tāturaturavare” jári dāpiarī
ne ñarājiyeye aino**

⁸Cojedeca Jesús coyurejameđa apeno jári dāpiarī ne ñarājiyeye ainore, náre buecu:

—Cūinácū nomió cūvaco baru pñarupñape paiturava tāturaturavare aru cūinaturava bíjaru ōre, ico nomió pñoiñure pñori, ōi cūramine oeni, vojebu pñi dituravare earīta. ⁹Dituravare earī, ĩni, epeni, torojurī ōrejajebu ōi yóvaimarare aru ōi cađajīecavure máre. Aru ajebu náre yópe: “Torojujarā yáque, ji tāturaturava bíjaino mácarōre ji eaiye boje”, ajebu. ¹⁰Nopedeca coyuyubu mujare: Ina Jūmenijicui ángeleva torojurājarama cūinácū āmeno ñaipōecu chīori, oatūvaru ũi ñaiyede, arī buedejameđa Jesús.

**“Mamacu mamateyure” jári
dāpiarī ne ñarājiyeye aino**

¹¹Cojedeca Jesús coyurejameđa apeno jári dāpiarī ne ñarājiyeye ainore, náre buecu:

—Cūinácū ũmñu cūvatequemavu pñarā māmara. ¹²Aru ñai ĩmacupñuravu pñeđabecu jípacure aquemavu: “Mñ, jípacu, jíjacu yure, ‘Míye baquiyébu’, mi aiye báquede yure”, aquemavu. (Mamacu nópe ayñ jípacure, “Mi yaiquínore nñu yñ”, ayñbe ũ.) Dñmñmña népacu jíquemavu diede náre coapa. ¹³Obebejaravua yóboi, ñai ĩmacu caiye ũi apeñene meadarī, ĩni, nñquemavu joai, apeno joborōi. Aru noi jarñvaquemavu caiye ũi cūvaede ũi nrōpe ñarī. ¹⁴Aru ũi jarñvarīburu yóboi caiye ũi cūvae báquede, áñvé ñaquemavu caino no ũi curījoborōre.

Que baru ũi nrarō ñajíquemavu áñvéna. ¹⁵Nñri, memeiño voquemavu apesu ũmñu, dijaborōcacure. Que teni ñai jaroquemavu ũre, coreicōjeñu oteivārivare. ¹⁶Aru áiyutequemavu oteivāriya ne áinore. Ūbenita ñame jíbetequemavu ũre. ¹⁷Aruri earī, dāpiarī aquemavu ũi baju: “Caivu ina jípacure memecaivu cūvarāma nrarō ne áiye méne aru pñuiye máre. Ūbenita yñ yaiyátamu áñvéna. ¹⁸Caride copaiquijivu jípacu yebai. Coyuquijivu ũre yópe: ‘Mñ, jípacu, āmeno ñavu yñ Jūmenijicure aru mñre máre. ¹⁹Que baru “jímacu”, abejacu yñre caride. Jájacu yñre yópe mi jáiyeye cūinácū memecayure mñre’ ”, arī dāpiaquemavu ũi.

²⁰Que teni nacajari nñquemavu jípacu yebai. Aru jípacu ñayure jári joamica, cōmaje ároje jáquemavu ũre. Que baru cūyarī, copñ nñri, ũre narióquemavu. Aru ũi vioburā nuquemavu mamacure. ²¹Aru mamacu aquemavu ũre: “Mñ, jípacu, āmeno ñavu yñ Jūmenijicure aru mñre máre. Que baru ‘jímacu’, abejacu mñ yñre caride”, aquemavu jípacure. ²²Ūbenita jípacu aquemavu ũre memecaivure: “Davacajarā maumejiena ũre meacaje cuitótecajede. Doajarā ũre. Adajarā ámujo adaitarabure máre. Aru curaidoare máre doajarā ũre. ²³Davajarā ñai oteivecu mamacu me jíacucure. Vojarā, ámuri, torojñve tenajivu caivu ĩmarocavu. ²⁴Ñai jímacu yaiyú bácupe páyñ ũmedayupebe cojedeca. Javede bíjame yñre jocarī. Ūbenita eaiyu ũre cojedeca”, aquemavu jípacu. Aru torojñve teni báquemavu na.

²⁵Que teiyedeca, jíbcu memeiñu matequémavu jioi. Copaini cūrami, joabejīnoi jápiaquemavu ne upaiyede. ²⁶Aru cūinácū memecapōecure ōrejarī, jēniari jáquemavu ũre, “¿Aipe teni upaiñba na?” ²⁷Jñ aquemavu ũre: “Míyocu copaini ñacuñbe. Que baru mīpacu boaicōjemi ñai oteivecu me jíacucure, mamacu meacure copñ etaiye boje”, aquemavu ũre. ²⁸Ūbenita ñai jíbcu jarayñ, torojñve teinoi

ecoiyubetequemavũ. Que baru jípacũ, etarí ùi yebai, jēniacquemavũ úre: “Mũ, bucũ, ecorí, ājacũ”. ²⁹ Ûbenita aquemavũ jípacũre: “Obediũjũa memecaivũ mũre yebacacũre. Aru cainũmũa ju aivũ mũre aru mi cõjeiyede ðaivũ. Ûbenita yure mũ jíbevũ cũinájieneca cũinácũ oteiãmajicũre, ñũje ārajijere ji yõvaimaraque torojũve teinoi. ³⁰ Ûbenita ñai mímacũ ùi eaiyede, mi jíye báquede úre jarũvayũ bácũreca nomiva āmenaque, boacáicõjēnebu mũ úre oteivesũ me jíacũcũre”, aquemavũ ù. ³¹ Aru jípacũ aquemavũ úre: “Mũ, bucũ, mũ cũvũ yáque cainũmũa. Aru caiye ji cũvae míyetau. ³² Ñai míyocũ yaiyũ bácũre páyũ arũcũrebe cojedeca. Ñai bíjayũ bácũ eaimũme caride. Que baru torojũve teiye javũ majare”, aquemavũ nēpacũ, arí coyũrejamedã Jesús.

“Ñai memeiõevare coreyũ vainí
tũyũre” jári dápiarí ne ðarãijere
aino

(Mt 6.24, 25.21; Lc 19.17)

16 ¹ Jesús coyũrejamedã ùi
bueimarare, yõpe arí:

—Cãtequemavũ cũinácũ ùmũ cũve cũvacũ. Cũvatequemavũ cũinácũ ùi cũvaede coreyũre. Aru arevũ coyũquemavũ ñai cũve cũvacũre yõpe: “Ñai mi coreipõescu jarũvavaibi caiye mi cũvaede”, aquemavũ na. ² Que baru ñai cũve cũvacũ òrejaicõjēni ñai coreipõescũre ùi yebai, aquemavũ úre: “¿Aipe járiayũba yũ mi borore? Jáðovajacũ yũre mi toivarí cũvarõre, ji majiquiyere aipino mi jacõpiyede aru aipino mi jíyede ji cãvede. Caride memecabescũyũmũ mũ yũre cojedeca”, aquemavũ ñai jabocũ. ³ Que baru ñai coreipõescu ùi baju dápiarí aquemavũ: “¿Aipe tequidi yũ? Ji jabocũ ími yũre ji memeinore jarũvarí. Joborõre ùri buojabevũ yũ, ji parũbe boje. Aru tãutũrare jēniari cũyevũ yũ. ⁴ Jave majivũ yũ ji ðaquinore, cũvacũyũ põeva ne copũ etarãijere ayũ yũre ne cũramiai ji memeinore cũvabede”, arí ðãriaquemavũ ñai coreipõescu.

⁵ Que baru ñai coreipõescu òrejaquemavũ náre coapa ina bojecũbe ðaivũre ùi jabocũre, coreõvabevũreca úre memeinore cũvabescũre. Aru ñai mamarũmũre ùi òrejaimũre jēniari jáquemavũ: “¿Aipino bojecũbe ðayũrũ mũ ji jabocũre?” aquemavũ. ⁶ Ju aquemavũ ù: “Cien paibua jocũbua olivocũ āmicũricũ jēidũare pipocorore bojecũbe ðaivũ yũ úre”, aquemavũ. Aru ñai coreipõescu aquemavũ úre: “Ûjũ, jējacũ mi bojecũbe ðaino cũriyocare. Maumejiena dobarí oatũvarí toivajacũ iyede: ‘Cincuenta paibua bajura’”, aquemavũ. ⁷ Dinũmũma ñai coreipõescu jēniari jáquemavũ apescũ bojecũbe ðayũre: “¿Aipino bojecũbe ðayũrũ mũ ji jabocũre?” aquemavũ. Ju aquemavũ ù: “Cien paipũea triço āmicũe oteiyede bojecũbe ðaivũ yũ úre”, aquemavũ. Aru ñai coreipõescu aquemavũ úre: “Ûjũ, jējacũ mi bojecũbe ðaino cũriyocare. Aru oatũvarí, toivajacũ iyede: ‘Ochenta paipũea bajura’”, aquemavũ. ⁸ Aru ñai jabocũ, jáñũ ùi borocũrĩ majinore, aquemavũ ñai coreipõescu borore: “Ñai ùmũ borocũcũvacari me majibi ù”, aquemavũ. Ina ijãravũcavũ Jũmenijicũre ùbevũ, ne cũvae méne aru ne me cũede máre íni majima, aru me bajura ne tãutũrare earí majima ina Jũmenijicũre ju aivũ pũeno, arejamedã Jesús.

⁹ Jesús arí buedejamedã náre cojedeca:

—Mũje cũvaede jíyede cõmaje ārojarivũre, na pũedarãjarama mũjare. Mũje nópe ðaru, Jũmenijicũ jíscũyũme mũjare mũje cũrõ cũiménore, arejamedã Jesús.

¹⁰ Bediõva cojedeca Jesús coyũrejamedã ina põevare:

—Ñai mearo ðarí epeyũ baru quĩjĩnore, dinũmũre mearo ðarí epecũyũme urarõre máre. Aru ñai quĩjĩno ùi cũvarõque borocũcũ baru, urarõ ùi cũvarõque máre borocũcũyũme ù. ¹¹ Que baru ijãravũ cũrivũ mearo ðabevũbu mũja mũje cũvaede. Que ðaivũ, mũjare Jũmenijicũ jíyede mearo ðabenamu mũja. ¹² Que baru apescũ jíyede mearo ðabedu, ñame buõjarí jibenama

mujeneca. ¹³ Cūinácu Jūmenijicure ārucu baru, pare ārumemi tāuturare. Aru tāuturare pare ārucu baru, ārumemi Jūmenijicure. Que baru Jūmenijicure aru tāuturare máre ārumejara mija. Nāi tāuturare ucū baru, Jūmenijicure ũbecuyume ũ, arejameđa Jesús.

¹⁴ Ina fariseova tāuturare pare urejaimađa na. Que baru iye Jesús ũi coyuiye báquede jápiaivū bācavū ũre yuridejaimađa. ¹⁵ Ūbenita Jesús arejameđa náre:

—Pōeva ne jáiyede mearape paivūbu mija. Ūbenita Jūmenijicu majibi mije dápiainore. Pōeva ne mearo jáiyede Jūmenijicu ũbebi, arejameđa Jesús.

Majare cōjeiye aru Jūmenijicūi jaboteino

(Mt 5.18, 11.12-13)

¹⁶ Jesús, yópe arī, buedejameđa náre cojedeca:

—Juan Bautista bácu ũi curinūmu mácarō baji curejaquemavu Jūmenijicūi daicōjeiye Moisés bácuŕe toivaicōjeni bueiye báque aru ina Jūmenijicūi yávaiyede coyūcaipōeva mácavū toivarī bueiye báque máre. Dinūmu mácarōre Juan Bautista bácu coyúame Jūmenijicūi jaboteinoquede aru ũi yóbore máre coyūivūbu iye yávaiye méne. Aru caivū pōeva pare teđama ecoiyurivū Jūmenijicūi jaboteinore.

¹⁷ Caino cavarō aru caino joborō máre cūiye maiyójabevū. Ūbenita caiye iye Jūmenijicūi daicōjeiye cūiye maiyójavū. Quénora caiye jáve vaiquíyebu yópe Jūmenijicūi daicōjeiyepe, arejameđa Jesús.

Jesús ũi bueino nomi jarūvainore

(Mt 5.32, 19.1-12; Mr 10.1-12; 1 Co 7.10-11)

¹⁸ Bedióva cojedeca Jesús arī buedejameđa ina pōevare:

—Ácu pōecu jímarepacore jarūvarīburu yóboi pūrubuoyū baru apocoque, nomicucūvacari apocoque cūcu baru, āmeina đaiibi ōre ũi mamarūmūscacore jarūvarī. Aru

ácu pōecu pūrubuoyū baru cūináco nomió jímarepacu mamarūmūscacu ũi jarūvainore āmeina đaiibi óque, arejameđa Jesús.

Jesús ũi coyūino cūve cūvacure aru Lázarore

¹⁹ Jesús coyūrejameđa ina pōevare cojedeca:

—Cūinácu ũmu cūve cūvacu cútequemavu. Pare meacaje cuitótecajede dorī torojūve teni, javatequemavu jarūvna coapa. ²⁰ Aru apocu ũmu cūve cūvabecu cútequemavu, ũi āmiá Lázaro. Ū pátequemavu nāi cūve cūvacu ũi cūrami jedevacobe yebai. Churiá ijié cútequemavu nāi Lázaro. ²¹ Áiyurīduquemavu āiye tuiye báquede nāi ũmu cūve cūvacu ũi tūoivare jocarī. Aru yavimiva darī nenequemavu ũi churiáre.

²² Cūinájāravū nāi cūve cūvabecu, Lázaro bácu, yaiquémavu. Aru ángeleva nūvaquemavu ũre Abraham yebai. Nāi cūve cūvacu bácu máre yaiquémavu. Aru ũi bajure jarūvaquemavu cūracobei. ²³ Nūquemavu ũ toabo cūiméboi.

'Noi pare nājīñū, jáquemavu joai Abrahāre aru Lázarore máre. ²⁴ Que baru órejaquemavu, ayū yópe: "Mū, jícu, Abraham, cōmaje āroje jájacu yure. Darojacu Lázarore ji yebai ũi ocoque jóri neneóvaquiyere āmuyoque ji jemedore, cojūjovacu yure. Pare nājivū yū yo toaboi", aquemavu. ²⁵ Ūbenita Abraham aquemavu ũre: "Mū, jícu, ārucacu mū caiye iye méne mi cūvavaquede arucū cāreja. Aru Lázaro arucū cāreja nājiquemavu ũrarō āmenore. Ūbenita caride torojūbi ũ yore, aru nājivū mū. ²⁶ Maje coricai cūvū ũrarō tūrobū. Que baru nūjacavū jataiyurivū buojabema nūivū nore. Nopedeca nócavū máre jataiyurivū buojabema dāivū yore", aquemavu Abraham.

²⁷⁻²⁸ Dinūmūma aquemavu nāi cūve cūvacu: "Mū, jícu, jēniaivū mure. Jarojacu Lázarore jipacu bácu cūrami, ũi coyūquiyere ayū jýyova cūinápūrcpe paivure, ne nājimenajiyere

ayu yore”, aquemavũ. ²⁹Ûbenita Abraham aquemavũ yópe: “Jūmenijicui ðaicōjeiyede ũi toivaicōjeiye báquede Moisés bácure aru ina Jūmenijicui yávaiyede coyũcaipōeva mácavũ ne toivaiye báquede máre cuvama na. Que baru míyova jápiajarāri diede”, aquemavũ Abraham. ³⁰Ûbenita aquemavũ ñai cve cuvacu: “Mũ, jícũ, Abraham, ina jápiabevũvacari iye Jūmenijicui yávaiyede, cūinácu yainore jarũvarĩ copainũ náre, chĩori oatũvarājarama ne ðaiyede”, aquemavũ Abrahãre. ³¹Aru Abraham aquemavũ ũre: “Ina pōeva jápiabevũ baru Jūmenijicui ðaicōjeiyede ũi toivaicōjeiye báquede Moisés bácure aru ina Jūmenijicui yávaiyede coyũcaipōeva mácavũ ne toivaiye báquede máre, jápiabenama cūinácu nacajañureca yainore jarũvarĩ”, aquemavũ Abraham, arĩ coyũrejameða Jesús.

Jidojarō maje ãmeina teino

(Mt 18.6-7, 15, 21-22; Mr 9.42)

17 ¹Jesús buedejameða ũi bueimarare, yópe arĩ:

—Jãve jujovarājarama mujare. Ûbenita ñai jujovare ðayu arevũre chĩori ãmeno ñájicuyũme ũ. ²Ñai pōecu ũi vainĩ ture ðaru apecu yũre ju ayũre parũbecureca, ũi dajocaquiyeye ayũ ũi ju aiyede yũre, meajebu ũre jarũvaru jia uraðai ũi ñamemui buorĩ cūinábo cũrabo uraboque. ³Me jájara mũa. Me dápiajarã mũje ðarājiyede. Apecu ũi ãmeno ðaru mũre, majicajacu ũre ména. Aru ũi chĩori oatũvaru ũi ðaiyede, ãrumetejacu iye ũi ãmeno ðaiye báquede mũre. ⁴Aru ũi ãmeno ðaru mũre siete paiye baju cūinájaravũre aru siete paiye bajureca, “Chĩoiũ yũ ji ãmeno ðaiye báquede mũre” ũi aru, ũi ãmeno ðaiyede ãrumetejacu mũ, arejameða Jesús.

Jūmenijicũre ãrũre ðaino majare

⁵Ina Jesús ũi yávaiye méne beorĩ coyũicōjeimara arejaimaða Jesúsre yópe: —iCadatejacu ñujare, ñuje ju arājiiyeye mũre pũeno baju! ũre arejaimaða na.

⁶Aru Jesús arejameða:

—Oteiyẽ mostaza ãmicũe oteiyẽ quĩjietamu. Ûbenita pĩarĩburu yóboi jocũcu uracũtamũ. Nopedeca mũje ju aru yũre quĩjino, nópe quĩjĩe oteiyeye, Jūmenijicũ urarō mearore ðajebu mujare. Mũa me ju arĩ Jūmenijicũre, mũje aru icũ jocũcu uracũre yópe: “Nũjacũ caiye mi nũoque. Aru nũri nũjacũ jia uraðai”, dicũ ju ajebu mũje cōjeinore, arejameða Jesús.

Memecaiþōecu ũi ðaino

⁷Jesús arĩ buedejameða cojedeca:

—Mujare memeni coreyũre jiore o coreyũre ãimarare ũi copaidaiyede cũrami, “Maumena ðarĩ, ãcũdajacu”, abevũ mũa ũre. ⁸Quédata, “Meaðajacu ji ãquiyede. Oatũvajacu mi doiyede. Aru corejacũ ji ãiyede cãreja. Ji ãrĩburu yóboita mũ máre ãri ũcujacu”, aivũbu mũa ũre. ⁹Aru ñai jabocũ jáve abecũbe ũi yebacacũre, “Meavũ mi memecaino yũre”, ũi ðaicōjeiye báquepe ðaiye boje. ¹⁰Nopedeca mũa máre, caiye iye ðaicōjeiye báquepe mujare ðarĩ buojaiũ, ajarã mũa baju yópe: “Bojecũbevũbu maja. Quénora ðaiũbu maja yópe Jūmenijicũ ðaicōjeiyepe majare”, náre arĩ buedejameða Jesús.

Jesús ũi meaðaino caiþũcapũũape paivũ pojeivũre

¹¹Jesús nũñũ Jerusalén ãmicũriĩmaroi, vaidéjameða Samaria aru Galilea ãmicũrijoborõa tũrũvare. ¹²Cūináro ãmajinoi ecōiyede, copũ nũrejaimaða ũre caiþũcapũũape paivũ ũmũa pojeivũ. Nũrejaimaða joai Jesúsre jocarĩ. ¹³Aru coðoboborejaimaða na:

—Mũ, Jesús, bueiþōecu, cõmaje ãroje jájacũ ñujare, arejaimaða na.

¹⁴Nãre jári, arejameða Jesús:

—Nũri jáðovajara sacerdotevare, arejameða.

Nópe arejameða, judíoiva ne ðaiye boje Jūmenijicũ ðaicōjeiyepe. Aru ne nuiyedeca mái, meatedejaimaða ne pojeiyede. ¹⁵Que teni cūinácu nácacũ jári coreovari meateyũ ũi baju, copaini

nuri codoboborí torojurejameda Jūmenijicure. ¹⁶Mori turejameda joborōi Jesús jipocai, jíyū mearore úre. Aru Samaria āmicurijoborōcacu barejaquémavu ñai ũmū. ¹⁷Que teni Jesús arejameda:

—Caip̄sar̄m̄uare paivū meatevū m̄uja. ¿Árima apevū, ina nueve paivū? ¹⁸Apevū c̄ubema ina j̄nadaj̄rorivū mearore Jūmenijicure. Quénora ñai dacube, apeno joborōcac̄uvacari, arejameda Jesús.

¹⁹Aru Jesús arejameda úre:

—Nacajari n̄jacu m̄u. “Ũ yure meadaíye majibi”, arí dápiarebu m̄u yure. Que baru, mi que dápiayibe, meadaivū m̄ure, arejameda úre Jesús.

Jūmenijicui jaboteino aipe edaquinore

(Mt 10.39, 16.25, 24.17-18, 23-28, 36-41; Mr 8.35, 13.15-16; Lc 9.24; Jn 12.25)

²⁰Cūináj̄ravū apevū fariseovacavū j̄ñiari j̄rejaimada Jesúsre, yópe arí:

—¿Aipiyede edaquidica yo Jūmenijicui jaboteino maquinó? arejaimada na.

Jesús arejameda náre:

—Jūmenijicui jaboteinore j̄ári majibevū m̄uja. ²¹Que baru abenajarama yópe: “iJájacu, yui c̄avū!” Aru abenajarama yópe: “iJájacu, noi c̄avū!” Quédata jave Jūmenijicu jaboteyube m̄uje j̄ñeboi, arejameda Jesús.

²²Dinūmure Jesús arejameda ũi buemarare:

—J̄ravūa c̄uquiyebu m̄uje j̄áiyurij̄ravūa yure, Jūmenijicui daroimū m̄ácure ũm̄upe, cūináj̄ravūra. Ũbenita j̄menajarama m̄uja. ²³Aru ar̄ajarama m̄ujare yópe: “iJájara noi!” Aru ar̄ajarama yópe: “iJájara yui!” Ũbenita n̄mejara m̄uja. N̄mejara ne yóboi. ²⁴Jūmenijicui daroimū m̄ácu ũm̄upe yaroinope n̄quiyebu ji copaidaquij̄ravū baquinó. Yópe no yaroino p̄oiyere cavarōre cūináp̄uravū p̄u apep̄uravūita, caivū p̄ōeva ne j̄raj̄iyere nore, nopedeca copaidac̄uyumu yu. Aru caivū p̄ōeva j̄rajarama ji copaidaiyede ij̄ravūi.

²⁵Ũbenita mamar̄m̄u urarō ñájiye j̄avūa yure. Aru ij̄ravūcavū ju abenajarama yure.

²⁶Dij̄ravūa baquiyéi, Jūmenijicui daroimū m̄ácu ũm̄upe, ji copaidaquij̄ravū jipocai, c̄uquiyebu nópe añij̄ravūa Noé m̄ácu curij̄ravūa báquepe. ²⁷Dinūmū m̄acarōre caivū p̄ōeva āivū barejaquémavu, aru ũcuiivū barejaquémavu. Ũm̄uva p̄urub̄uoiivū barejaquémavu. Aru jídejaquemavu n̄maromivare, ne p̄urub̄uor̄ájiyere aivū, Noé m̄ácu j̄iadocū urac̄ure ecoij̄ravūita. Muiváibo darejaquemavu. Aru caivū ina p̄ōeva corí b̄j̄arejaquemavu na m̄ácvū. ²⁸Nopedeca c̄urejaquemavu Lot b̄ácu curij̄ravūa báquede máre. Caivū p̄ōeva āivū barejaquémavu, aru ũcuiivū barejaquémavu. Bojedaivū barejaquémavu. Oteivū barejaquémavu. Aru c̄uramiare ðaivū barejaquémavu máre. ²⁹Ũbenita añij̄ravū b̄acarō, Lot b̄ácu etaiyede Sodomare jocarí, Jūmenijicu maumena darorejaquemavu toabore aru c̄uraboav̄ uruibovare máre. Ocainope turejaquemavu cavarōre jocarí. Aru caivū ina diimarocavū b̄ácvū yaidējaquemavu na m̄ácvū. ³⁰Nopedeca baquiyébu Jūmenijicui daroimū m̄ácu ũm̄upe, ji copaidaquij̄ravū baquinóre. Maumena, p̄ōeva yure ne corebede, copaidac̄uyumu yu ij̄ravūi cojedeca.

³¹Dij̄ravū baquinó ñai c̄urami p̄enora c̄ucu bac̄uyé ĩmeni dabejacurí, n̄vac̄uyū ũi apej̄iene. Ecobejacurí ũi c̄urami. Aru ñai j̄iore mem̄eñu mac̄uyé copain̄mejacurí ũi c̄urami. ³²Ar̄ujara m̄uja iye Lot b̄ácu máreparo b̄ácore vaiye báquede. Ō mácoi ju abe boje Jūmenijicui c̄ojeiye báquede, yuquirarū cainidū tedejaquemavu ō máco. ³³Ñai p̄ōecu ũi baju ur̄ōpe ðarí, meadaiyucu baru ũi bajure, coatec̄uyume ũi bajure Jūmenijicure jar̄varí, yópe yaiyú b̄ácupe ũi ũmei. Ũbenita ñai p̄ōecu, “Ye baju ām̄evū ji yaidú Cristore boje” ayū, ũi baju ur̄ōpe ðabec̄uva quénora ji ur̄ōpe ðarí, úrecabe ji meadaquimū, c̄uc̄uyū Jūmenijicuc̄u cainum̄a.

³⁴Cōuyūbu m̄ujare, ji copaidaquij̄ravū baquinó p̄ucarā

ñmva cārajarama ne cūrami jívui ñamine. Cūinácu ñvaimu macuyúme, yure ñi ju aiye boje. Aru apescu mautescuyume, yure ñi ju abe boje. ³⁵Aru pucarā nomiva jiorajarama ne cūrami jívui. Cūináco ñvaimo macodóme, yure ñi ju aiye boje. Aru apesco mautescodóme, yure ñi ju abe boje. ³⁶Aru pucarā ñmva memenajarama ne jioi. Cūinácu ñvaimu macuyúme, yure ñi ju aiye boje. Aru apescu mautescuyume, yure ñi ju abe boje, arejamedá Jesús, náre bueyu.

³⁷Aru jēniari járejaimada úre:

—Mu, ñuje jabocu, ¿ári yópe vaiquídi caiye iye? arejaimada Jesúsre.

Aru arejamedá náre majidivú ne aino mácaróque yópe:

—Ári yaiyú bácuí cūrōi, noi cójjinajarama cavava. Caiye iye ji coyuyede jáivu, majinajaramu muja ji copaidaquino joabenore, ji ñájiovaquinore pōevare, ne ámeina teiye boje, arejamedá Jesús.

“Ámeina teivure jēniari jáipōecure aru nomiópecore” jári dápiarí ne darājīyepē aino

18 ¹Jesús buedejamedá pōevare jári dápiarí ne darājīyepē ainoque ne jēniarajīyepē ayu Jūmenijicūque cainumua dajocabevva. ²Aru arejamedá: —Cūináimaroí cūtequemavú cūinácu jabocu, ámeina teivure jēniari jáipōecu. Ñai jabocu puedabetequemavú Jūmenijicure. Aru puedabetequemavú pōevare máre. ³Dīimariareca cūtequemavú cūináco nomiópeco máre. Ō nuri, yávere ñurejaquemavú úre: “Cadatejacu yure, ji maucu ñi ñájine ñabequiyepē yure”, aquemavú ñ. ⁴⁻⁵Obedijārvuare ñai jabocu járiabetequemavú óre. Ūbenita no yóboi arí dápiaquemavú ñi baju: “Yu puedabecuvacari Jūmenijicure aru puedabecuvacari pōevare máre, ico nomió, ji yebai dado járvava coapa, ñi pare cārijovaiye boje yure, cadatequijivú óre, ñi ñeture ñabecoquiyepē yure”, aquemavú ñ, arejamedá Jesús.

⁶Aru Jesús arejamedá:

—Jápijará ñai ñmu ámeцу ñi aiye báquede. ⁷Aru jáve cadatecuyume Jūmenijicu ina ñi beoimare jēniavure úre, ñi cadatequiyepē aivu náre járvavure aru ñamine máre. Corede ñabecube ñ joe baju, cadatecuyú náre. ⁸Coyuyubu mujare: Maumejiena cadatequijibi náre. Ūbenita yu, Jūmenijicui daroimú mácu ñmure, ji copaidaiyede ijārvui, jáve obebejina pōeva ju aivure Jūmenijicure paruríumeque eacuyumu, arejamedá Jesús.

“Pucarā ñmva ne jēniario Jūmenijicūque” jári dápiarí ne darājīyepē aino
(Mt 23.12; Lc 14.11)

⁹Bedióva Jesús buedejamedá náre jári dápiarí ne darājīyepē ainoque. Coyurejamedá ina pōevare “¿Meara márica?” arí dápiaivure ne baju apēvu pūeno. Arejamedá:

¹⁰—Pucarā ñmva Jūmenijicūque jēniaranūquemavú Jūmenijicui cūrami. Cūinácu fariseovacacu batequémavu. Aru apescu jabovare tautura ícaipōecu batequémavu. ¹¹Ñai fariseo núri jēniari dápiaquemavú ñi baju yópe: “Mu, ji mearore jímú, torojuede jívú mure, ji ámedabe boje. Yu apēvure ñabevú. Apēvure jujovari ímevu yu ne cūvaede. Ámeno ñabevú yu apēvure. Nomicucu, apēcoque cubevú yu. Aru ñai jabovare tautura ícaipōecure ñabevú yu. ¹²Pucajārvava sumana coapa ámeцуva áiyede jēniavaiyu yu mure. Aru caiye ji cūvaede caipucarūcape paivede cūvarí, cūináro jívavú yu mure”, aquemavú ñai fariseo. ¹³Ūbenita ñai jabovare tautura ícaipōecu joai núri, jáiyubecu cavaróre, totaquemavú ñi ñarebare, ñi chíoye boje. Aru aquemavú: “Mu, ji mearore jímú, cōmaje ároje jájacu yure, ámeina teyure”, aquemavú ñai jabovare tautura ícaipōecu. ¹⁴Coyuyubu mujare: Jūmenijicu árvumetequemavú ñai ñmu ñi ámeina teiye báquede. Ūbenita árvumetequemavú ñai fariseo ñi ámeina teiye báquede. Que baru ñai

cuivucu me arevü püeno, parübecuyme püeno baju. Aru ñai parübede ñaiyucu ñi baju arevü cāchino, me cucusuyme püeno baju, arejameña Jesús.

**Jesús ñi mearore jino juedovare
Jümenijicuque**

(Mt 19.13-15; Mr 10.13-16)

¹⁵Pöeva nüvare cuivü barejáimada némarare Jesús yebai, ñi tuoquiyepa aivü náre ñi püruáque. Que teni Jesúsí bueimara náre jáivü, nüvaicöjemenejaimada némarare.

¹⁶Ûbenita Jesús örejarejameña náre ñi yebai. Aru arejameña:

—Ina juedova dajarári ji yebai. Jümenijicu jabotecuyme pöevare náre paivare. Que baru, “Davabejará juedovare”, abejará náre. ¹⁷Jäve coyuyubu mujare: Ácu pöecu copu etabecu baru Jümenijicure jaboteyure úre, yöpe juedocu ñi copu etaiyepa, ecobecuyme ñi jaboteinore, arejameña Jesús.

**Cüinácu ñmü cüve cüvacu Jesúmaque
ne boroteino**

(Mt 19.16-30; Mr 10.17-31)

¹⁸Cüinácu jabocu jëniari járejameña Jesúre:

—Mü, bueipöecu meacu, ¿aipe ñaji yu, cüvacuyu járavu cüiméjárvu baquinóre? arejameña Jesúre.

¹⁹Jesús arejameña úre:

—¿Aipe teni “Meacubu mü”, ayurü yure? Jümenijicu cüinácurabe meacu baju. ²⁰Majivura mü Jümenijicui ñaicöjeiyede ñi coyuyibe báquede Moisés bácu: “Cüvabejacu apcore mimarepacore jaruvári. Pöevare boarí jaruvabejacu. Ñavamejacu apacu ñi cüvaede. Borodabejacu apacure. Ju ajacu mipacure aru mipacore máre”, arejameña Jesús.

²¹Que teni arejameña Jesúre:

—Ñacacu caiye iye mi coyuyiede juedocu cäreja yu, aru caride máre, arejameña.

²²Ûi ju ayiede jápiayü bácu Jesús, arejameña úre:

—Cüináro javü müre cäreja. Jíni bojedajacu mi cüvede. Aru mi íquiyede jíjacu ina cömaje ärojarivure. Que teni cüvacuyumu mü boje méne cavarö mearo Jümenijicui curöi. Aru dajacu yáque, arejameña Jesús.

²³Ûbenita iyede jápiarí uraröreca chíorejameña, dajocaiyubecu ñi ure cüvede. ²⁴Que teni Jesús úre jári, arejameña:

—Ina pöeva cüve cüvarivure pare maiyójavu ne ju aye Jümenijicure, ñi meadaquiyepa aivü náre aru ne ecoräjiyepa aivü ñi jaboteinore cavarö mearo ñi curöre. ²⁵Cüinácu äimacu uracu, camello ämicucu, ñi ecoru aviyo cobei, maiyójajebu úre. Aru püeno maiyójavu cüve cüvacure ñi ecoquino Jümenijicui jaboteinore, arejameña Jesús.

²⁶Ina úre jápiaivü bácvu arejaimada:

—¿Ñame buojarí ecoräjidica Jümenijicui jaboteinore, cüvaräjivü járavu cüiméjárvu baquinóre? arejaimada na.

²⁷Jesúcapüravu arejameña náre:

—Pöeva ne ñarí majibeno maiyójabevü Jümenijicure. Û cüinácura buojarí meadayube pöevare, arejameña Jesús.

²⁸Aru Pedro arejameña:

—Dajocacará ñüja caiye ñüje cüvaede, ñüje daiye boje máque, arejameña Pedro.

²⁹⁻³⁰Aru Jesús arejameña náre:

—Jäve coyuyubu mujare: Ácu pöecu dajocayü baru ñi cüramine, o jímarepacore, jíbura, ímarare, ñi bucüvare, o ñi máre máre, Jümenijicui jaboteino boje, ñai pöecu eacuyume püeno baju caride ijárvu. Aru ñaquiárvu baquinói cüvacuyume járavu cüiméjárvu baquinóre, arejameña Jesús.

**Jesús ñi coyüino bedióva cojedeca ñi
yaiquínore**

(Mt 20.17-19; Mr 10.32-34)

³¹Jesús nüvarejameña ina doce paivare. Aru yöpe arí, coyurejameña náre:

—Jerusaléi nüvubu. Nore ñaräjivubu na yure, Jümenijicui daroimu

mácure ñmupe, caiye iye Jñmenijicui yáviyede coyucaipõeva mácvu ne toivaiye báquepe. ³²Jínajivubu yure ina judíova ãmevure. ³³Que teni ina põeva yurinajivubu yure. Cuyoje ñarājivubu yure. Jēcututurajivubu yure. Jara popenajivubu yure. Aru boarí jaruvarājivubu yure. Ëbenita yóbecurijāravua yóboi jipacu, Jñmenijicui, nacovacuyume yure yainore jaruvarí, arejameða Jesús.

³⁴Ëbenita caiye iyede jápiarí eabedejameða na, ñi bueimara. Coreóvabedejameða aipe aiyurõ iye Jesús ñi coyuiye báquede náre. Que baru majibedejameða ñi coyuiyede.

Jesús ñi meadaino jári eabecure,

Jericócacure

(Mt 20.29-34; Mr 10.46-52)

³⁵Jericó ãmicuríimaroí joabenoí earejameða Jesús. No ma ēcarui cūinácū ñmū, jári eabecu, táuturare jēniañu dobarejameða. ³⁶Ë jápiayu bācu obedivu põeva vaivure mái, jēniari járejameða:

—¿Aipe teidi? arejameða.

³⁷Aru apevu arejameða ére:

—Jesús Nazarecacu mái nuimi, arejameða.

³⁸Ñai jári eabecu codoboborejameða:

—Mū, Jesús, David bācui pāramecu, Jñmenijicui daroimū mácu, ññje jabocu bacuyú, yure cōmaje āroje jájacu, arejameða ñ.

³⁹Aru ina ñi jipocai nuivū, ére jaraivū, arídurejameða:

—¡Bi ajacu mū! arídurejameða.

Ëbenita pueno baju codoboborejameða ñ cojedeca:

—Mū, David bācui pāramecu, Jñmenijicui daroimū mácu, ññje jabocu bacuyú, yure cōmaje āroje jájacu mū, arejameða ñ.

⁴⁰Que teni ére codoboboyure jápiayu Jesús, dajocarejameða. Aru arejameða:

—Davajarā ére ji yebai, arejameða.

Ñai jári eabecu ñi eaiyede, Jesús jēniari járejameða ére:

⁴¹—¿Aipe ñacaji yū mure? arejameða Jesús.

Ñai jári eabecu arejameða:

—Mū, ji jabocu, jári eabevu yū. Ërarõ jáiyuvu yū, arejameða Jesúre.

⁴²Jesús ju arejameða ére:

—Dinumu meavu. Jájacu mū cari. “Yure meadacuyume Jesús”, arí dápiarebu mū. Que baru mi jári eabede meadacaivu yū caride, arejameða ére Jesús.

⁴³Aru cūiná járejameða ñ, jári eabecu bācu. Que teni Jesúre yóvarí nurejameða ñ máre, mearore jíyū Jñmenijicure. Que baru caivu ina põeva máre, ére jári, mearore jídejameða Jñmenijicure.

Jesús ñi copuino Zaqueore

(Mt 18.11)

19 ¹Jericó ãmicuríimaroí Jesús ecorí vaiyú barejameða. ²Noi cūinácū ñmū curejameða, ñi ãmiá Zaqueo. Ë jabovare táutura ícaipõeva ne jabocu barejameða. Aru cūve cuvacu barejameða ñ. ³Obedivu põeva Jesúre jáiyurí copñrejameða. Zaqueo máre jáiyurídurejameða ére. Ëbenita ñai Zaqueo ñmujubecu, aru obedivu põeva ne nuíye boje ñi jipocai, jámenejameða ñ Jesúre. ⁴Que baru cūyarí apevu jipocai, jocucu sicómoro ãmicuricui mūri, Jesúre jácunurejameða ñ. ⁵Que teni Jesús mái vaiyú jocucu yebai, jáñu Zaqueo jocucui tubacure, arejameða ére:

—Mū, Zaqueo, jōðajacu maumena.

Mi cūrami mautescuyubu yū caride, arejameða ére Jesús.

⁶Que teni Zaqueo maumena jōðari, torojurí jacoyurejameða Jesúre. ⁷Aru caivu ina põeva jáivū iyede, ãmeina yávarejameða.

—Ñai Jesús mautescunūimi ãmeina teipõecui cūrami, arejameða na.

⁸Ëi cūrami ecoríburu yóboi, Zaqueo nūri, yávayū arejameða Jesúre:

—Mū, ji jabocu, coricai ji cūvaede jíquijivū yū cōmaje ārojarivure. Aru jacopaiyovaquijivū yū ina ji ñujovaimara mácvure yóvaicuvaiye pueno baju ji íno mácarõre náre jocarí, arejameða Zaqueo.

⁹Que ayure, Jesús arejamedá úre:
—Mũ máre Abraham mácai
pāramescũbu. Que baru caride inãami
cũramicavũ meadaimaramu mũja.
Jũmenijicũ meadarejaquemavũ Abraham
mácure, ùi ju aiye báque boje úre.
Nopedeca Jũmenijicũ meadaibi mũre
aru mi cũramicavũre, mũje ju aiye
boje úre. ¹⁰Yũ, Jũmenijicũi daroimũ
mácũ ùmũre, vocũdaivũ ina bĩjaivũre,
meadacũyũ náre, arejamedá Jesús.

**“Tãutũrare” jãri dãpiarĩ ne ðarãjiyepe
aino**

(Mt 13.12, 25.14-30; Mr 4.25; Lc 8.18)

¹¹Diede põeva ne jãpiarĩburu
yóboi, Jesús bueni bárejamedá náre
jãri dãpiarĩ ne ðarãjiyepe ainoque, ùi
Jerusalén ãmicurĩĩmaro joabejinoi cœ
boje, aru ne dãpaiye boje caivũ põeva
jãrajivũre Jũmenijicũi jaboteiyede
põevare maumejiena. ¹²Que baru Jesús
arejamedá:

—Cũinácu ùmũ, jabova jicũ,
nũcũyũ batequémavũ areno
joarõcajaborõi, ne epenajiyeye ayũ
úre jabocũva. ¹³Ñai jabocũ bacũyũ
órejaquemavũ caipũcarũrũape paivũ
úre memecaipõevare. Aru náre coapa
tãutũrare jíyũ, caivũre cũinátũrũ,
“Bojedajarã mũja iye tãutũraque ji
copaidaiyeta”, aquemavũ náre ñai
jabocũ. Que teni ñai jabocũ útequemavũ
ne inajiyeye ayũ tãutũrare pũeno baju.
¹⁴Coypũrĩ bũojarĩ, ñai jabocũ nũquemavũ
areno joarõcajaborõi. Ùbenita ùi
jaborõcavũ baju pare ùbetequemavũ
úre. Que baru jaroquemavũ boro
nũvacaipõevare ùi yóboi, ne
jẽniarajiyeye aivũ ãnijaborõ jabocũre,
ùi epebequiyeye aivũ ñai ùmũre ne
jabocũva. “Ùbevũ ñũje jabocũva ñai
ùmũre”, arĩduquemavũ na. ¹⁵Ùbenita
ñai ùmũ copaiyũ jabocũ batequémavũ ù.
’Aru órejaicõjequemavũ ina úre
memecaipõevare, ùi tãutũrare jímara
mácavũre, majiyũcũ ne bojedarĩ íno
mácarõ borore. ¹⁶Que teni cũinácu ina
memecaipõevacacũ ñai jabocũ yebai
nũri, aquemavũ: “Mũ, ji jabocũ, mi

jíye báqueque bojedacacũ yũ. Que
teni caride caipũcarũrũape paitũrava
cũvavũ”, aquemavũ ñai jabocũre. ¹⁷Aru
ñai jabocũ aquemavũ úre: “Mearo
ðarebu mũ. Memecaipõescũ meacũbu
mũ. Mi mearo ðaiye boje quĩjinoque,
jíquijivũ yũ mũre caipũcarũrũape
paĩĩmaroare, mi jabotequiyeye
diĩmaroacavũre”, aquemavũ ñai jabocũ
úre. ¹⁸Aru apescũ ina memecaipõevacacũ
ñai jabocũ yebai nũri, aquemavũ: “Mũ, ji
jabocũ, mi jíye báqueque bojedacacũ yũ.
Que teni caride cũinápũrũape paitũrava
cũvavũ”, aquemavũ ñai jabocũre. ¹⁹Aru
ñai jabocũ aquemavũ úre: “Mũre máre
jíquijivũ yũ cũinápũrũape paĩĩmaroare,
mi jabotequiyeye diĩmaroacavũre”,
aquemavũ ñai jabocũ úre.

²⁰Ùbenita apescũ ina
memecaipõevacacũ ñai jabocũ yebai
nũri, aquemavũ: “Mũ, ji jabocũ, yui
cũvavũ mi tãutũrare, mi jíye báquede
yũre. Epecacũ yũ diede cuitõtecajeque,
meadayũ diede. ²¹Jidojacubũ mũ. Mũ
ĩnũmu apescũ ùi epeiye báquede. Aru mũ
jẽñũmu apescũ ùi oteiye báquede. Que
baru jidũtevũ yũ mũre”, aquemavũ ñai
jabocũre. ²²⁻²³Aru ñai jabocũ aquemavũ
úre: “Mũ, memecaipõescũ ãmescũbu. Mi
que aiye boje ãmecoroimũ macũyũmu
mũ. Yũ jidojacũre majicũvacari, aru
yũ inũre apescũ ùi epeiye aru jẽñũre
apescũ ùi oteiye majicũvacari,
epebetequemavũ mũ ji tãutũrare tãutũra
epeĩnamĩ. Mi que ðaru, copaini dayũ
jacorpũjebu yũ ji tãutũrare pũeno baju,
diñamicavũ ne bojedaiye báque cojĩorĩ”,
aquemavũ ñai jabocũ.

²⁴’Que baru ñai jabocũ aquemavũ
ina nũrivũre nore: “Íjara úre jocarĩ
yo cũinátũrava tãutũratũravare. Aru
jĩjarã ñai caipũcarũrũape paitũrava
cũvacũre”, aquemavũ. ²⁵Aru
aquemavũ na: “Mũ, ñũje jabocũ, ù jave
cũvabi caipũcarũrũape paitũrava
tãutũratũravare”, aquemavũ. ²⁶Ùbenita
ñai jabocũ aquemavũ: “Coypũyũbu
mũjare: Caivũ cũvarivũ jacorpũrãjarama
pũeno baju. Ùbenita caivũ dãpaiivũre
cũvarivũre apescũ pũeno, caiyede náre

ĩcũyũtu yũ. ²⁷ Aru ina ji mauvare, ji jaboteinore ðbevũre, davajarã náre yui. Aru boarí jarũvajarã náre ji jáinoi”, aquemavũ ñai jabocu, arejamedã Jesús.

Jesús Jerusaléi ùi ecoino

(Mt 21.1-11; Mr 11.1-11; Jn 12.12-19)

²⁸ Jesús ùi coyũrĩburu yóboi, nuñũ cojedeca muri nurejamedã Jerusalén ãmicurĩĩmaroi nuĩmai. ²⁹ Aru Jerusalén ãmicurĩĩmaro joabejĩnoi nuri, Betfajé aru Betania ãmicurĩĩmajinoã baji, no cũracũ Olivocũ ãmicurĩcũ ãmeino baji, earejamedã Jesús. Noi earĩ ùi bueimara pũcarãre, yópe arĩ, jarorejamedã Jesús:

³⁰—No cõchino curĩĩmajinoi nujara muja. Ma ãmeinoi põevare ùmaiãimacure, burrore, earãjaramu muja, nõcacui buoimãre. Põeva ne tubabemũtame cãreja. Ùbenita ùi buoimene jodeni, ùre davacajarã yũre. ³¹ Aru, “¿Aipe teni burrore ùi buoimene jodeni, ùre nuvaivurũ muja?” ne aruta, yópe ajarã muja: “Ñũjare ícõjoni darobi maje jabocu. Ùre ùmacayũ ãimacu jaubi ù”, arejamedã náre Jesús.

³² Ina ùi daroimara nurejaimada. Aru vaidéjavũya náre nõpe Jesús ùi aipe báquepedeca. ³³ Ne jodiyede burrore, ùre uparivũ arejaimada náre:

—¿Aipe teni jodeivurũ muja ùi buoimene? arejaimada na. ³⁴ Aru arejaimada ina Jesũi bueimara:

—Maje jabocure ùmacayũ ãimacu jaubi ù, arejaimada.

³⁵ Ne ju aiyede náre, nuvarejaimada burrore Jesũre. Ne doicajea pũnocacajeare burrorã tuorĩ, Jesũi tubaquinore ðarejaimada ùi bueimara. ³⁶ Ùi nuiedeca ina obedivũ põeva ma ãcarũi núrivũ jũarejaimada ne pũnocacajeare mára Jesús jipocai, pueðarãjivũ ùre. ³⁷ Aru Jerusalén ãmicurĩĩmaro joabejĩnoi, Jesús ùi ãmeiyede cũracũ Olivocũ ãmicurĩcũre jocarĩ, caivũ ina obedivũ põeva, Jesũi bueimara, torojurivũ Jũmenijicure mearore jĩni búrejaimada, ne jáiye báque boje ùi ðaiye báquede caiye iye põeva ne ðarĩ majibede. ³⁸ Aru parũðreca arejaimada:

—Jũmenijicure torojue bajadéni. Jũmenijicui mearo ðacaimũme ñai jabocu Jũmenijicui daroimũ mácu. Cãrijimena cũjarãri cavarõ mearocavu. Jũmenijicure mearo majaróri. Jũmenijicure torojue bajadéni, arejaimada na.

³⁹ Apevu fariseovacavũ curivũ nore arĩdurejaimada Jesũre:

—Mũ, bueipõecu, bi aicõjejacu mi bueimarare, arĩdurejaimada na.

⁴⁰ Ùbenita Jesús arejamedã:

—Coyũyũbu mujare: Na bi aru, iboã cũraboavareca coðobobojebu, arejamedã náre Jesús.

⁴¹ Jerusalén ãmicurĩĩmaro joabejĩnoi eayũ Jesús, diĩmarore jáñũ, orejamedã, ùi Jerusalén ãmicurĩĩmarocavũre cõmaje ãroje jáiye boje. ⁴² Aru arejamedã:

—Mujã, Jerusalécavũ, muje coreóvaru cãrijimene ðaiyede, meajebu mujare. Ùbenita coreóvarĩ majibevũ muja diede. Jũmenijicũ majide ðabebi mujare diede cãreja. ⁴³ Apejãravua baquiyéi jãrajaramu muje mauva edaivũre muje ìmaro turũvai. Epenajarama jobore cũracũape. Etaino cubequiyebu mujare. Bienajaramu mujare ìmaro jĩvũi, muje dupibenajiyepe aivũ. ⁴⁴ Jarũvarãjarama muje cũramiare. Aru ye mautebequiyebu cũináva cũrava apeva cũrava pũenora. Boarĩ jarũvarãjarama mujare aru mujemarare máre. Caiye diede ñãjinajaramu muja, muje coreóvabe boje cari jãravũre, Jũmenijicũ ùi daroiyede yũre, ji meaðaquiyepe ayũ mujare, muje numenajiyepe arĩduyũ toabo cũiméboi, arejamedã Jesús.

Jesús ùi meaðaino Jũmenijicui

cũramine

(Mt 21.12-17; Mr 11.15-19;

Lc 21.37; Jn 2.13-22)

⁴⁵ No yóboi Jesús earejamedã Jerusalén ãmicurĩĩmaroi. Jũmenijicui cũrami tãibui ecorejamedã. Aru jaetovarejamedã ina bojedãipõeva curivure nore jocarĩ. Arejamedã náre:

⁴⁶—Yópe arĩ, toivaicõjeneaquemavũ Jũmenijicũ ùi yãvaiyede: “Jĩ

cārami caivũ pōeva ne yũre, Jūmenijicũre, coyũñamimu”, arĩ toivaicōjenejaquemavũ. Ūbenita diñamine tatorĩ ívũ ne dupiñamipe ðaquemavũ mũja, mũje pũeno urarō tãutũra íye boje pōevare jocarĩ, ne bojedaiyede mũje cũvaede, arejameða náre Jesús.

⁴⁷ Caijãravũa Jesús bueyũ barejãmeða Jūmenijicũ cārami jĩvũ. Ina sacerdotevare jaboteipōeva, aru Jūmenijicũ yávaiye báquede buaipōeva, aru ina judíova jabova máre boarĩ jaruvayũrivũ barĩdurejaimaða Jesúre. ⁴⁸ Ūbenita caivũ ina obedivũ pōevacapũravũ torojurĩ jápaiyũrejaimaða Jesús ũi bueiyeede. Que baru ũre boarĩ jarũvarĩ buojabedejaimaða na, ũi mauva.

Jesús ũi parué

(Mt 21.23-27; Mr 11.27-33)

20 ¹⁻² Cũinãjãravũ Jesús bueyũ barejãmeða ina pōevare, Jūmenijicũ cārami curivũre. Coyũyũ barejãmeða Jūmenijicũ yávaiye méne, ũi meadaquiyede pōevare. Sacerdotevare jaboteipōeva, aru Jūmenijicũ yávaiye báquede buaipōeva, aru judíova bucũva máre ũi yebai nũri, arejaimaða ũre: —Coyũjacũ ñũjare. ¿Ye paruéque ðayũrũ mũ iye mi ðaiyede? ¿Ñame jídi mũre iye paruéde mi nópe ðaiyede? arejaimaða Jesúre.

³ Jesús arejameða náre:

—Yũ máre jēniari jáquijivũ mũjare cũinãro jēniari jáinore. Coyũjarã yũre. Aru yũre coyuiyede, yũ máre coyũquijivũ mũjare ji paruéde ji ðaiyede.

⁴ ¿Juan Bautista bácu jáðovaquemari pōevare Jūmenijicũ ũi paruéque o pōeva ne paruéque? arejameða náre Jesús.

⁵ Ūi que aiyede, ne bajumia boroteivũ arejaimaða yópe: “Maje aru ‘Jūmenijicũque’, ũ aquijibi ‘¿Aipe teni ju abetecarãũ ũre?’” ⁶ Ūbenita maje aru ‘pōevaque’, caivũ ina pōeva cãraboare ðũvarĩ boarĩ jarũvarãjarama majare, ne majié boje Juan Bautista bácuare Jūmenijicũ yávaiyede coyũcaipōecũ

bácuare jáve”, arejaimaða ne bajumia.

⁷ Que baru arejaimaða Jesúre:

—Majibevũ ñũja, arejaimaða na.

⁸ Dinũmũre Jesús arejameða náre:

—Yũ máre coyũbevũ mũjare ñamei paruéque ji ðaiyede, arejameða Jesús.

“Āmena memecaipōevare” jári dápĩari ne ðarãjiyepẽ aino

(Mt 21.33-44; Mr 12.1-11)

⁹ No yóboi Jesús coyũrĩ búrejameða ina ũque curivũre jári dápĩari ne ðarãjiyepẽ ainoque, yópe arĩ:

—Cũinãcu ũmũ doaicōjequemavũ jiore ũyaimuque. Aru epequemavũ apevũ ũre memecaipōevare noi. Ina memecaipōeva ñajivũ batequémavũ apeboa ũyaiboare, ne memeiye boje. Aru ñũquemavũ apeno joborõi. Joe cũcũyũ batequémavũ ũ. ¹⁰ Ūyai jēijãravũ yóboi, ñai jio upacu jarorĩduquemavũ cũinãcu ũi yebacacũre memecaipōeva yebai, ũi íquiyepẽ ayũ apeboa ũyaiboare, ñai upacu jiede. Ūbenita ñai yebacacũ ũi eaiyede nore, ina memecaipōeva ũre jēni, pare boarĩ copaide ðaquemavũ ũre quédata. ¹¹ Cojedeca ñai jio upacu jarorĩduquemavũ apesũ ũi yebacacũre memecaipōeva yebai. Ūbenita ũre máre boaquémavũ. Aru cũyojarõ ðarĩ, copaide ðaquemavũ ũre máre quédata. ¹² Cojedeca ñai jio upacu jarorĩduquemavũ apesũ ũi yebacacũre nore memecaipōeva yebai. Ūbenita churiã ðarĩ, jaetovaquemavũ ũre nore jocarĩ.

¹³ Dinũmũ ñai jio upacũ aquemavũ yópe: “¿Aipe ðaji yũ? Jave majivũ yũ ji ðaquiyẽde. Jaroquijivũ jímacũ, ji mũmũre. ‘Ūre jáivũ pũedarãjichũma na’ ayũ”. Que aquemavũ ũ. ¹⁴ Ūbenita ina memecaipōeva jáivũ ñai jio upacũ mácuare, aquemavũ ne bajumia: “Ñai ñũje jabocũ bacũyũme. Jĩpacũ ũi yainĩburu yóboi, cũvacũyũme caiye ũi cũvaede. Járica, boarĩ jarũvarãjarevũ ũre, maja cũvaburĩ caiye ũi cũvaede”, aquemavũ na. ¹⁵ Que arĩ, ũre jēni jaetovaquemavũ jiore jocarĩ. Aru boarĩ jarũvaquemavũ ũre, arejameða Jesús.

Coyurĩburu yóboi, Jesús yópe arĩ, jēniari járejameđa ina jápiaivure úre:

—¿Aipe đaquidi ñai jio upacu náre?

¹⁶Ū boarĩ jaruvacunucuyume ina memecaipōevare. Aru epecuyume apevu memecaipōevare ũi jioi, arejameđa Jesús.

Diede jápiaivu arejaimađa:

—¡Que ãnevu no! arejaimađa.

¹⁷Ūbenita Jesús, jáñu náre, arejameđa: —¿Aipe aiyuri iye Jūmenijicui toivaicōjeiye báquede ũi yávaiye?

Iva cūravare cūramine đaipōeva ũbeni jaruvaquemavu. Caride iva cūrava caiva apeva pūeno parurivabu, arĩ toivaicōjenejaquemavu.

¹⁸Ācu pōecu tuyu baru divarā, turĩ yavacuyume ũi bajure. Aru diva tuiva baru pōecu pūenora, chitoquiyeđu úre, arejameđa náre Jesús.

Yópe aiyurōtamu no: Pōeva “Āmecube ũ”, arĩdurājarama Jesúi borore. Ūbenita meacu bajube ũ, Jesús, caivu apevu pūeno.

¹⁹Ina Jūmenijicui yávaiye báquede bueipōeva aru ina sacerdotevare jaboteipōeva máre jēni nūvaiyurĩdurejaimađa Jesúre dínunumia, ũi coyuiye boje no jári đápiarĩ ne đarājiyepe ainore, cūravare coyūino mácarōre, nára. Ūbenita jidurejaimađa ina obedivu pōevare.

Jesús ũi coyūino jabovare bojedainore

(Mt 22.15-22; Mr 12.13-17)

²⁰Ina judíovai jabova cocorejaimađa Jesúre, meajārvai coreivu ne jēni jínajinore úre ñai jabocu Pilatore. Que baru ārojamaña jarorejaimađa jujovavure, đavure mearape, ne earĩdurājiyepe aivu ũi ãmeina tedu aru ũi borocuru apevure. ²¹Que baru jēniari járejaimađa Jesúre:

—Mũ, bueipōecu, mũre coreóvaivũbu ñña. Nurié yávaivu mũ. Caivure cūinácamuara yávaivu mũ. Coyubevu mũ pōevare yópe ne đaiyepe. Quéñora jidubevuva coyuivu mũ náre yópe

ne đápiayepere. Jāveneca bueivu mũ pōevare, ne đarājiyepe ayu mearore yópe Jūmenijicui đaicōjeiyepe. ²²¿Maje jabocu César ũi ícōjejuoede, ũi jaboteiye boje, maje bojedaru, mearica die? arejaimađa Jesúre.

²³Ūbenita ne jujovajuroede majicu, nácacure arejameđa Jesús:

²⁴—Jáđovajacu yure tātuturavare.

¿Ñamema ñai, dituravare jēñu? ¿Aru ñamei ãmiá curituravaba diturava? arejameđa náre Jesús.

—Césai decocu aru ũi ãmiá máre curituravatamu, arejaimađa Jesúre.

²⁵—César jiede úre jacopaiyovajarā mũja. Jíjarā úre tātura yópe ũi bojedaicōjeiyepe mũjare. Aru Jūmenijicu jiede úre jacopaiyovajarā mũja. Đajarā yópe ũi urōpe, arejameđa náre, jēniari járadaivure, Jesús.

²⁶Ina jujovaiyurĩdivu bácavu Jesúre ũi que aiyede urarō đápiarejaimađa ũi coyuiyede. Aru bi arejaimađa na.

Saduceova ne jēniari jáino Jesúre yainore jaruvarĩ nacajainore

(Mt 22.23-33; Mr 12.18-27; Hch 23.8)

²⁷Apevu saduceova nurejaimađa Jesús yebai. Saduceo ãmicuriyajubobu judíovacavu ne yajubo cūináyajubo. Caivu saduceova “Yainore jaruvarĩ nacajaiye cubevu”, adama na. ²⁸Jesúre jēniari járejaimađa ina saduceova yópe:

—Mũ, bueipōecu, Jūmenijicui đaicōjeiyede Moisés bácu toivarejaquemavu yópe: Cūinácu ũmũ yaidú, jímarepacore jocarĩ jueđocuvabecova, yaiyú bácuĩ yócure pũũbuoiye jaevu óque, jueđocuvacuyũ. Aru ina jueđova bárājivu yaiyú bácuĩ ãmiáre cūvarājarama na. ²⁹Javede cútequemavu siete paivu ũmũva. Cūinácu ũmũ mára matequemavu na. Némamicu pũũbuoquemavu. No yóboi yaiquemavu ũ mácu, jueđocuvabecuva.

³⁰Que baru apecu, ũ mácurā cutuyũ, pũũbuoquemavu jíbcu bácuĩ márepacoque. Aru jíbcu bácupedeca yaiquemavu, jueđocuvabecuva.

³¹Aru apecu, ũ mácurā cutuyũ, máre

nopedeca, aru caivn ina siete paivn bácvn óque purubvorí, yaiquémavn, juedocuvabevvna. ³²Caivn ne yóboi, ico nomió máco máre yaiquémavn. ³³¿Yainore jaruvarí nacajaijārvn baquinóre, ñamei márepaco bacoódba ico? Ijārvnre caivn ina siete paivn cvvatequemavn óre, arejaimada na Jesúre.

³⁴Aru Jesús arejaimada ina saduceovare:

—Ijārvnvcavn purubvodama aru némaromivare jýyama, ne purubvorājiyepere aivn. ³⁵Ūbenita ānijārvnvcavn yaibénama na. Que baru Jūmenijicui yainore jaruvarí nacajaicōjeimara mārājivn, purubvobenajarama. ³⁶Ānijārvnvcavn ángelevape ārojarajarama na. Que baru Jūmenijicui mārātamū na, ne yainore jaruvarí nacajaiye boje. ³⁷¿Iye yainore jaruvarí nacajaiyede, jápiarí eabenarū mūja Jūmenijicui coyūiye báquede, Moisés bácv ūi toivaiye báquede, jocujicū uruijicūre coyūí? “Yūtamu Jūmenijicū. Abraham, Isaac, aru Jacob ne mearore jímūmu yū”, arejaquemavn Jūmenijicū Moisés bácvre. ³⁸Yaivn bácvn ne mearore jímū āmemi Jūmenijicū. Qué Nora arūrivn ne mearore jímūtame ū. Que baru ina majeñecuva arūrivnbu. Caivn Jūmenijicui beoimara arūrivnbu na, arejaimada náre Jesús.

³⁹Aru apevn, Jūmenijicui yávaiye báquede buaipōevacavn, ju arejaimada ūre:

—Mū, buaipōecū, me yávaivn mū, arejaimada na.

⁴⁰Que baru jidūrivn jēniari jáiyūbedejaimada ūre bedióna cojedeca, ūi me ju aiyē boje ina ūre jujovaiyurīduivn bácvnre.

**Cristo ñai jabocū David bácvī
pāramecū**

(Mt 22.41-46; Mr 12.35-37)

⁴¹Ūbenita Jesús jēniari járejaimada náre:

—¿Aipe teni “Cristobe David bácvī pāramecū” aivūba? ⁴²David bácvvacari

Espírítu Santoi parvéque coyūicōjeimū toivarejaquemavn Salmos āmicūriyoca cāriāiyocarā yópe arí:

Jūmenijicū aquemavn ji jabocūre,
“Dobajacū ji mearpūravūi, mi
cvvae boje parvéde yūpedeca.

⁴³Aru yū epecūyūmu mi mauvare mi cuboba cāchīnoi. Que teni mūre vainí jarūvare đacūyūmu yū náre, mi jabotequiyepere ayū náre”, arí toivarejaquemavn David bácv Cristorā.

⁴⁴David bácvvacari Cristoi borore “Ūrecabe ji jabocū”, arejaquemavn. Que baru, ¿aipe teni David bácvī pāramecūba ū? arejaimada náre Jesús.

**Jesús ūi boro coyūí adāino
Jūmenijicui yávaiye báquede
bueipōevare**

(Mt 23.1-36; Mr 12.38-40; Lc 11.37-54)

⁴⁵Caivn ina pōeva ne jápiaiyede, Jesús arejaimada ūi bueimarare:

⁴⁶—Me đajarā ina Jūmenijicui yávaiye báquede buaipōevare. Nāmu cuiyūrivn cuiótocajea ūmūjricajeaque. Aru ūma na pōeva pueđarí ne jacoyūinore náre tāibūi. Judíovai cōjjiñamiare ne dobae méne ūma na. Aru torojūve teinore cuiyūma na ñai torojūve teino upacū yebai. Caiye iyede ūma na, pōeva ne mearo járajiyepere aivn náre. ⁴⁷Ūbenita jūjovarí ñavađama ina nomiópēvare ne apejēne. Aru jēniadama joe urarō Jūmenijicūque, pōeva ne đápiarājiyepere aivn Jūmenijicui yávaiye báquede buaipōeva me Jūmenijicūre ju aivūre. Caiye diede ne đaiye boje, pueno urarō ñájinajarama na, ne āmeina teiye boje, arejaimada Jesús.

**Nomiópeco cūve cūvabeco ōi tāūtura
jīno Jūmenijicūre**

(Mr 12.41-44)

21 ¹Jesús jáñū marejāmeda ina pōeva cūve cūvarivūre ne ūre tāūturare Jūmenijicui cūrami tāūtura jíye epeitōcūi jīni tuoivūre. ²Jārejaimada cūināco nomiópecore cūve cūvabecore, pūcatūrava tāūturatūravare,

me bojecubetavare tuodore. ³Aru arejameða:

—Jāve соууубу мујаре: Ico nomiópeco cūve cūvabeco Jūmenijicure jíbico arevū ne jíye pūeno baju, òi jíye boje òi cūvarō cainore. Ūbenita nácarūravū quénora quíjino ne cūvarōcarōre jíyama. ⁴Caivū ina pōeva ne űrarō cūvaecarōre jíyama Jūmenijicure náre jaubede. Ūbenita ico nomió òi quíjino cūvarijino mácarōre jíbico cainore Jūmenijicure. Caiye òi ijāravūi cūvajūroede jíbico ò Jūmenijicure, arejameða Jesús.

Jesús űi соууino “Jūmenijicūi cūrami tuquiyebu” arí
(Mt 24.1-2; Mr 13.1-2)

⁵Arevū, Jūmenijicūi cūramine jári, arejaimaða:

—iPare meavabu iva cūrava! iAru pare meadamiamu iñamia cūramia! iAru pare mearomu pōeva ne jino mácarōre, cojuyarājivū diñamiare! arejaimaða na.

⁶Ne que aiyede, Jesús arejameða:
—Apejāravū cūquiyebu cūinē ðaijāravū baquinó caiye iye muje jáiyede. Cūináva cūrava mautebequiyebu apeva pūenora. Caiye iva cūravare tūvarājarama. Que teni cūiquiyebu die, arejameða Jesús.

Jáðovaiye jāravū cūiquíye jipocai
(Mt 24.3-28; Mr 13.3-23; Lc 12.11-12)

⁷Jesúi bueimara jēniari járejaimaða űre:

—Mū, bueipōecu, ðaiyiyede tuquidi caiye iye cūramia űradāmia? ¿Aipe ðarí coreóvarājidica ñūja caiye iye buojaquiyede? arejaimaða na.

⁸Aru Jesús arejameða náre:
—Me jájara apecū jujovaiyūcure muјare. Darājarama obedivū űmūva. Aru arājarama “Cristobu yū” aru “Cristoi ðaquijāravū baquinó joabejñotamu”. Náre ju abejarā. Aru náque nūmejara. ⁹Muje jápaiyede boaino borore aru boaquino borore máre, jidūbejarā. Caiye iye vaiquiyebu jāravū cūiquíye jipocai. Ūbenita cūimēbu cāreja, arejameða náre Jesús.

¹⁰Dinmū arejameða náre:

—Cūináyajubo pōeyajubocavū āðamatenajarama apeyajubo pōeyajubocavūque. Aru cūináro jaboteinocavū āðamatenajarama apeno jaboteinocavūque. ¹¹Ūrarō joborō cújiquiyebu obedicūðare. Nájinajarama āvūéna aru duica ijíede máre, yainájivū. Aru járajarama űrarō jáðovaino jidojarōre cavarōi.

¹²Ūbenita iye vaiquíye jipocai pōeva jēnajarama muјare. Ámeno ðarājarama muјare. Jēni jīnajarama muјare ina judíovai cōjjiñamine coreipōevare aru ina āmeina teivūre jēni jacoiñamine coreipōevare máre. Nūvarajarama muјare, muje nūrajíyepē aivū cōjeipōeva ne jáinoi aru jabova ne jáinoi máre, yūre muje ju aye boje. ¹³Dinmūma muja соууrājaramu ji borore. ¹⁴Que baru muje baju majijarā, dápiabenajivū aipe muje arājínore. ¹⁵Que teni yāvacari majide ðacūyūmu muјare, muje соууrājíyepē ayū ménē. Que baru caivū ina muje mauva muјare соуу yávarí aru muјare majibeuvūre jáðovari buojabenajarama. ¹⁶Mujebūcūva máre, mujemamina, mujevū, aru muje yóvaimara máre jēni jīnajarama muјare, jabovare ne boarí jarūvarājíyepē aivū muјacavūre. ¹⁷Aru caivū muјare, muje ju aye boje yure, jorojini járajarama. ¹⁸Ūbenita cūinájiyo muje poðaðo bíjabequiyebu. Que baru ye āmeno ðabenajarama muјare. ¹⁹Muja ju aivū baru yure, muje yainmūita, earājaramu muja jāravū cūiméjāravū baquinóre.

²⁰Ūbenita muje jáiyede ina muje mauva churarava jacotūrādaivūre Jerusaléne, majinajaramu joabenore diimaro bíjaquinore. ²¹Dinmūma ina Judeacavū dupini nuјararí cūracūai. Aru ina imarocavū cūyarí etajararí imarore jocarí. Aru ina jioi cūrivū ecobejararí imarore. ²²Dijāravūa Jūmenijicūi ñájiovaquijāravūa baquiyébu, eaquiyepē ayū caiye iye toivaiye báquede ānijāravūa baquiyéde. ²³iCōmaje ārojarajarama ina nomiva micava bárājivū! iAru ina nomiva némajina nuri

dajocabevure cūvarājivū máre, pare ñájinajarama na! Dijáravua baquiyéde urredō āmeno edaquiyebu ijaborōre. Aru ijáravucavū ñájinajarama urredō baju. ²⁴Ne mauva boarí jarūvarājarama nácavure. Aru buorí apevure, nūvarajarama náre cainoa joborōai. Aru b́jarorājarama Jerusaléne ina judfova ānevū ne jaboteinūmu buojaiyeta, arí buedejameđa náre Jesús.

Jūmenijicūi daroimū mácu ūmure ūi copaidaquino

(Mt 24.29-35, 42-44; Mr 13.24-37; Lc 19.47; Ap 1.7, 6.12-13)

²⁵Jesús buede nurejameđa, yópe arí: —Jūmenijicū jádovacūyūme ūi paruéde aviáque, aru aviá ñamicacuque, aru abíacovaque máre. Ijáravucavū, cainoa joborōacavū, jidūrivū cārijinajarama jia urada pācaiyē pare bujijé boje.

²⁶Aru pōeva cuecumarajarama, ne jidúe boje, dápiaivū caino no āmeno vaiquínore ijáravucavure. Que baru caivū ina paruéque cūrivūvacarí cavarōi cūjinajarama. ²⁷Dinūmu j́arajarama yure, Jūmenijicūi daroimū mácure ūmure. Dacūyūmu ocopeniboi, urredō paruéque, jádovacūyū meacu bajure. ²⁸Que baru caiye iye buiyede yópe ji coyūiyēpe, jidūbejarā. Dinūmu maquinóre maumena Jūmenijicū meadaquijibi mūjare, arejameđa náre Jesús.

²⁹Aru Jesús coyūrejameđa náre j́ari dápiarí ne đarājiyēpe ayū:

—J́ajara icū jocūcu higueraçure aru arecua jocūcure máre. ³⁰Yoca yuiyede majivū mūja ūjūrūmu joabenore.

³¹Nopedeca j́aivū caiye iye teiyede, majinajaramu mūja Jūmenijicūi jabotequinūmu joabenore.

³²J́ave coyūyūbu mūjare: Apevū ijáravūi cūrivū yaibédeca cāreja, vaiquiyebu caiye iye yópe ji coyūiyēpe.

³³Caino cavarō aru caino joborō máre cūiquiyebu. Yópe ji yáviyēpedeca j́ave vaiquiyebu.

³⁴Cārijovamejara mūje torojūve teiyēque, aru āiyēque, aru ūcūiyēque mūje pacoteiyede, aru caiye ijáravū

đaiyēque máre. Me j́ajara mūja, ānijáravū, ji copaidaquijáravū baquinó, edabequiyēpe mūjare mūje corebede, yópe doriñū jēiyēpe moacure.

³⁵Ānijáravū baquinó edaquiyebu caivū ijáravucavure maumejiena. ³⁶Ūbenita ārūjara cainūmua. Mūje vaiyede caiye iye ñájiyede, jēniajara Jūmenijicūre, ūi j́iquiyēpe aivū mūjare ūi paruéde, nūrājivū jidūbevūva aru cūyēbevūva máre Jūmenijicūi daroimū mácu ūmure, ji j́ainoi, arejameđa náre Jesús.

³⁷Caijáravua Jesús bueyū barejameđa Jūmenijicūi cūrami. Ūbenita nainfburu yóboi, ĩmarore jocarí nūri, Jesújā cāranūvarejaimađa cūracū Olivocū āmicuricūi. ³⁸Aru javejina coapa ĩmaroi copaini, Jūmenijicūi cūrami ecovarejameđa cojedeca Jesús. Aru obedivū pōeva ūre j́apiarānurejaimađa ūi yebai nore.

Jesús ūi coyūino ne jēnainore ūre yóboimia

(Mt 26.1-5, 14-16; Mr 14.1-2, 10-11; Jn 11.45-53)

22 ¹Pascua āmicurijáravū, páure bucure đaiye cube āiye torojūve teinūmu joabeno marejávūya.

²Ina sacerdotevare jaboteipōeva aru Jūmenijicūi yáviyē báquede buaipōeva jūjovarí jēni, boarí jarūvaiyūrejaimađa Jesúre. Ūbenita jidūrejaimađa ina obedivū pōevare.

³Dinūmure ñai abujuvai jabocū, Satanás, đaicōjēnejaquemavū Judas Iscariotede, ñai cūinácū ina doce paivū Jesúi bueimaracacure. ⁴Que teni ñai Judas coyūcūnurejameđa ina sacerdotevare jaboteipōevare aru ina Jūmenijicūi cūramine coreipōevare máre. Náre jēni j́iyūrejameđa Jesúre.

⁵Ūi đaiyūede j́apiarí, torojūrejaimađa na. Que baru arejaimađa ūre: “Ñūja j́inajivūbu mure táuturare, ñūjare mi jēni j́iye boje ūre yavenina”, arejaimađa Judare. ⁶Judas ju arejameđa náre. Que baru j́ari coreni búrejameđa, jēni j́icūyū Jesúre yavenina, ina obedivū pōeva ne j́āmeno.

Jesús ñi ãino ñi bueimaraque
(Mt 26.17-29; Mr 14.12-25; Jn
13.21-30; 1 Co 11.23-26)

⁷Páure bucure ðaiye cube ãiye torojuve tejjárvav barejávüya. Pascua jãrvavcãcure, ovejãjicure, boarí, toaque juarí, ávarejaimada dijãrvavure. ⁸Que baru Jesús, Pedrose aru Jũare máre jarorí, arejamedã náre:

—Meadarãñujara maje Pascua jãrvavque ãiyede maje árajiyede, arejamedã náre Jesús.

⁹Aru jëniari járejaimada Jesúre:
—¿Ári nuri meadacarájidica ñuja diede? arejaimada na.

¹⁰Ë arejamedã náre:
—Muja ecoivã bãcavã ìmarore, ëmeni, nõcãcure oco tuyure copurãjaramu muja. Éque nuri, cüramine ñi ecoiyede cüináturu muja máre ecojarã. ¹¹Diñami upacure yópe ajarã muja: “¿Átucububa ji bueimaraque ji Pascua jãrvavure ji áquitucubu?” aibi bueipõecu”, ajarã muja. ¹²Diñami upacurãpüravã puenocatucubu uratucubu jave majare javéde meadaitucubu bácarõre mujare jáðovacuyume ñ. Noi ditucubui majare maje árajiyede meadajarã muja, arejamedã náre Jesús.

¹³Ëre ju arí, nuri, ìmaroi earejaimada na. Earí, nore Jesús ñi ãiye báquepedeca ñi aitucubure earejaimada. Noi Pascua jãrvavque ãiyede meadarejaimada na pncarã.

¹⁴Que teni ne Pascua ãiora barejávüya. Jesús earí, dobarejamedã tuoiva yebai ñi yávaiye méne beorí coyucõjeimaraque. ¹⁵Aru arejamedã náre:

—Pare ãiyuvã yu iye Pascua ãiyede mujaque ji ñãjiquiye jipocai. ¹⁶Que baru coyuvãbu mujare: Ámecubu yu Pascua jãrvavque ãiyede cojedeca, pu Jũmenijicui jaboteino eaiyeta, arejamedã Jesús.

¹⁷Ûcuidore ñni, Jũmenijicure torojuede jíniburu yóboi, arejamedã:

—Ëju, coapavajarã dicorore muje baju. ¹⁸Que baru coyuvãbu mujare: Quénora vino úyaicorore úcuñumu yu ijãrvavure.

Ûcumeçubu dicorore cojedeca, pu Jũmenijicui jaboteinumu, arejamedã ñi bueimaraque Jesús.

¹⁹Ne ãiyedeca, páure ñni, Jũmenijicure torojuede jídejamedã Jesús. Torojuede jíni buojarí, páure cotuvarejamedã. Cotavari buojarí, náre coapa jíni, arejamedã:

—Dápijarã iye páure yópe muje dápiayepi ji bajure. Jíquijivã yu ji bajure, ne boarí jaruvãrãjiiyepi yure, mujare ji meadaquiye boje. Que baru muje ãiyede iye páure, árujara yure, arejamedã náre Jesús.

²⁰Aru nopedeca Ûcuidore ñni, ne ñni bubaríburu yóboi, Jesús arejamedã:

—Dápijarã iye Ûcuiyede yópe muje dápiayepi ji jivede. Jíquijivã yu ji jivede, ne boarí jaruvãrãjiiyepi yure, mujare ji meadaquiye boje. Que baru yure mequiyebu ji jive obedivure boje. Jũmenijicu “Yópe ðajarã muja, boropatebenajivã ji jáinoi”, ñi yóbocarõ coyuno mácarõre pöevare árujararamu muja, muje Ûcuiyede diede. ²¹Ëbenita jájara. Ñai ñmu jëni jícuyã yure ji mavare cubi yui tuoiva yebai yáque.

²²Yu, Jũmenijicui daroimã mácu ñmure ijãrvavui, ji yãjãrvavui nucuyumu yu, yópe Jũmenijicui toivaicõjeiye báquepedeca ñi yávaiyede. Ëbenita ãmeno vaicuyume ñ, ñai yure jëni jíyu bacuyá, arejamedã Jesús.

²³Que baru jëniari jári búrejaimada ne bajumia:

—¿Ñame maquidí jëni jíyu Jesúre ñi mavare? arejaimada na.

¿Ñamema parucu maje jënebore?

(Mt 18.1, 19.28, 20.25-28, 23.11; Mr
9.34-35, 10.42-45; Lc 9.46; Jn 13.12-15)

²⁴Jesúi bueimara yópe yávarejaimada ne bajumia:

—¿Ñamema majacacu parucu aprevã pueno? arejaimada.

²⁵Jesús arejamedã náre:

—Ina judíova ãnevã ne jabova parucéque cõjeivãbu ne jaborõcãvure, ne ðacarãjiiyepi aivã náre ne urõpe. Aru ina jaborõcãvã, “Ñujare cadateipöevatamu”,

aivubu ne jabovare. ²⁶Ūbenita nápe ďabejarā mŭja. Ńnai mŭjacacu parucu baiyucu baru, mŭjeycupe memecajacurī mŭjare. ²⁷Apevu dobarivubu tuoiva yebai. Aru apevu, ne yebacavu, jŭyama ina dobarivure ne āiyede. ĆŃamema parucu apevu pŭeno? ĆŃai dobacu tuoiva yebai o Ńnai yebacacu pŭeno parucuba? Jāve Ńnai dobacu tuoiva yebai pŭeno parucube. Ūbenita yu cŭvu mŭje jēneboi yebacacupe.

²⁸Mŭja dajocabevu yure ji Ńājijede, quénora Ńājivu mŭja cūnáturu yúque. ²⁹⁻³⁰Yópe jŭpacu ũi jŭyere yure ji jabotequinore, nopedeca yu máre jŭvu mŭjare mŭje jabotenajinore, mŭje dobarājiyere ayu ji tuoiva yebai ji jabotequiyede, ārajivu aru ũcurajivu yúque, aru mŭje dobarājiyere ayu jabovai dobarōa mearoara, coyŭrajivu mearare o āmenare ina doce paiyajuboa Israecavure, arejamedā Jesús ũi bueimarare.

Jesús ũi coyũino Pedrore ũi “Jesúre yu coreóvabevu” aquinore

(Mt 26.31-35; Mr 14.27-31; Jn 13.36-38)

³¹Jesús arejamedā Simón Pedrore: —Mu, Simón, Ńnai abujuvai jabocu Satanáre Jŭmenijicu jŭjovalcōjeimi mŭjare, yópe pōeva ne jajuóiyere matore. ³²Ūbenita yu jēniaivu Jŭmenijicucque, mi dajocabequiyere ayu mi ju aiyede ũre. Ńnai abujuvai jabocu mure jŭjovarĩburu yóboi, mi me cuquiyede Jŭmenijicucque cojedeca, caďatejacu apevu ũre ju aivure, mi yóvaimarare, arejamedā Jesús.

³³Aru Simón Pedro arĩdurejamedā Jesúre:

—Mu, ji jabocu, āmeina teivure jēni jacoĩnami múque nuñu buojaivu yu. Aru múque yaiyú máre buojaivu yu, arĩdurejamedā Jesúre.

³⁴Ūbenita Jesús arejamedā ũre:

—Mu, Pedro, coyũyubu mure: “Jesúre yu coreóvabevu”, acũyũtu mu cari Ńnami, cáyu ũi órejaquiyē jipocai. Aru yóbcue nópe acũyũtu mu, arejamedā Pedrore Jesús.

Jesúre ne jēnajino joabeno

(Mt 10.9-10; Mr 6.8-9; Lc 9.3, 10.4)

³⁵Jesús arejamedā náre, ũi bueimarare:

—Javede ji jaroiyede mŭjare nŭvameteavũ mŭja táuturare, aru curubuare, aru curaidoare máre. ĆYe jaũtearĩ mŭjare? arejamedā náre Jesús.

Aru ju arejaimada ũre:

—Jaubeteavũ Ńmŭjare, arejaimada na.

³⁶Ū arejamedā náre cojedeca:

—Ūbenita caride Ńai táuturare cŭvacu baru, nŭvajacurĩ diede. Aru Ńnai curubure máre cŭvacu baru, nŭvajacurĩ dicurubure. Aru Ńnai boaicarovede cŭvabecu baru, ũi pŭenocacaje doicajede jŭjacurĩ, bojedacuyu boaicarovede.

³⁷Coyũyubu mŭjare: Javede Jŭmenijicui yáviyede coyũaipōecu bācu, yópe arĩ, toivarejaquemavu yŭrā: “Pōeva ũre ďarājarama yópe ne ďaiyere āmeina teivure”, arĩ toivarejaquemavu. Aru ji mauva ďarājarama yure nópe iye toivaiye báque coyũiyere, arejamedā Jesús.

³⁸Arejaimada náre:

—Mu, Ńmŭje jabocu, jájacu. Yuibu pŭcavea boaicarovea, maje boarājivea, arejaimada.

Aru Jesús ju arejamedā náre:

—Quénora meaquiyebe, arejamedā Jesús.

Jesús Getsemaní ũi jēniaivo Jŭmenijicucque

(Mt 26.36-46; Mr 14.32-42)

³⁹No yóboi Jesús etarejamedā ne Pascua áitucubure jocarĩ. Aru ũi ďarĩ cōmajiyere nurejamedā cŭracũ Olivocũ āmicŭricũ. Ūi bueimara máre yóvarejaimada ũre. ⁴⁰Ne eaiyede ũi nŭiyŭrō mácarōi, Jesús arĩdurejamedā náre:

—Jŭmenijicucque borotejarā mŭja, abujuvai jabocui mŭjare jŭjovarĩ, āmeina tede ďabequiyere aivũ, arĩdurejamedā náre Jesús.

⁴¹Que ayu bācu, náre jocarĩ nurejamedā, yópe pōecu cŭraborē

đuvarī jaroinope paino baji. Aru ñuatutarī joborōi borotedejameđa Jūmenijicuque.

⁴²—Mũ, jipacu, yure cari vaiquíye vaibéjađeni. Caiyede đaiye majicıtamu mũ. Ūbenita ji urōpe đabejacu. Quénora mi urōpe đajacu mũ, arejameđa jípacure Jesús.

⁴³Dinũmure cūinácu ángele, cavarō mearo Jūmenijicui curōcacu, járorejameđa űi yebai, cadatecudayu earejameđa. ⁴⁴Jesús űi urarō ñájiye eare, pueno parurō borotedejameđa Jūmenijicuque. Que teni ijove darī, jivepe turejavāya joborōi.

⁴⁵Aru boroteni b̄ojarī, nacajari copainurejameđa, űi bueimara yebai. Earejameđa náre cāivure, uetivure, ne chíoiye boje. ⁴⁶Dinũmũ Jesús arejameđa náre:

—¿Aipe teni cāivurũ muja? Nacajajara. Jūmenijicuque borotejarā muja, abujuvai jabocui mujare jujovarī, āmeina tede đabequiyepe aivũ, arejameđa náre Jesús.

Jesúre jēni ne nuvaino

(Mt 26.47-56; Mr 14.43-50; Lc 19.47, 21.37; Jn 18.2-11)

⁴⁷Jesús űi boroteiyedecata earejaimada obedivu pōeva. Judas, ina doce paivucacu, jipocatedejameđa náre. Jesús yebai nuri, űre jiva nuri jacyurejameđa. ⁴⁸Ūbenita Jesús arejameđa űre:

—Mũ, Judas, ¿jiva nuri jacyuyurũ mũ yure, Jūmenijicui daroimu mácure űmure, jēni jícyu yure ji mauvare? arejameđa Jesús űre.

⁴⁹Ina Jesúi yóvaimara, jáivũ iyede vaiyede, jēniari járidurejaimada Jesúre:

—Mũ, ñuje jabocu, ¿boarājidi ñuja náre iveá boaicaroveaque? aridurejaimada na.

⁵⁰Dinũmũma cūinácu Jesúi yóvaimaracacu űi boaicarovede tatorī, duarī, ĩni, sacerdotevare jaboteipōecui yebacacure juijorī najuárejameđa ű, űi meapūravucacumucare. ⁵¹Ūbenita Jesús arejameđa:

—Dajocjarā diede quénora, arejameđa.

Que ayava, űi cāmucare tuorī, űre meadarejameđa Jesús. ⁵²Dinũmure Jesús arejameđa ina sacerdotevare jaboteipōevare, aru ina Jūmenijicui cūramine coreipōevare, aru ina judíova bucuvare máre:

—¿Tatorī ñavaipōecure jēivure yure boaicaroveaque aru boaiduaque jēni jacorādaivurũ muja? ⁵³Jārvava coapa mujaque Jūmenijicui cūrami cítecacu yũ. Arurī mujaque cūcure, yure jēni jacobeteavũ muja. Ūbenita caride Jūmenijicu mujare đaicōjeñme muje urōpe yúque. Aru caride abujuvai jabocu āmeno đare đabi yure, yópe muje urōpe, arejameđa Jesús.

“Jesúre yũ coreóvabevũ” arī, Pedro űi coyũino

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴Que arurata Jesúre jēni, sacerdotevare jaboteipōecui cūrami nuvarejaimada űre. Aru Pedro joajienata űi yóboi nure nuñũ mácu, sacerdotevare jaboteipōecui tãibui ecorejameđa ű. ⁵⁵Apevu Jesúre nuvaivũ bācavucavu toabore dacuvarĩburu yóboi, dobarejaimada toabo ēcarui nore tãibu coricai. Aru Pedro máre dobarejameđa ne jēneboi. ⁵⁶Ūi noi dobaedeca, yebacarōmivacaco cūinácu járejacođa Pedroro, toabo p̄oiyede űi jivare. űre me cocorī, arejacođa:

—Ñai űmũ máre cítebi Jesúque, arejacođa ű.

⁵⁷Ūbenita Pedro ju abedejameđa űi yáva iyede:

—Jesúre yũ coreóvabevũ, arejameđa.

⁵⁸Que arĩburu yóji boi, apesu, Pedroro jáñũ, arejameđa:

—Mũ máre nácacubu, arejameđa.

Ūbenita Pedrocavũ arejameđa cojedeca:

—iNácacu āmevũ! Jesúre yũ coreóvabevũ, arejameđa.

⁵⁹Cūinóra yóboi, apesu máre arejameđa parurōreca:

—Jave ñai űmũ cítebi Jesúque. űre máre Galileacacutame ű, arejameđa.

⁶⁰ Ñbenita Pedrocapuravu jāve ayupe, pare baju arejameđa cojedeca:

—iJāveneca Jūmenijicui jāinoi yu mure coyuyutamu! iJāve ji coyūbedu, Jūmenijicu āmedajacurī yure! Mi aimure ye majibecutamu yu. Ñai Jesúre yu coreóvabevu, arejameđa.

Dinumuma, ũi que aye bajure, órejurejameđa cáyu. ⁶¹ Que teiyedata, Jesús copedini járejameđa Pedrorre. Aru ũi ānurejameđa Jesús ũi coyuiye báquede: “Cari ñami, cáyu ũi órejaquie jipocai, yóbecue baju ‘Jesúre yu coreóvabevu’, acuyumu mu”, arí coyuiye báquede ānurejameđa Pedro. ⁶² Aru ārucu, cūiná etarī, pare chīori orejameđa ũi.

Jesúre ne yávarī yurino

(Mt 26.67-68; Mr 14.65)

⁶³ Ina Jesúre coreipōeva yuridejaimađa ũre. Aru totatarejaimađa ũre. ⁶⁴ ũi yacorure moari, ũre pēvavari, arejaimađa:

—Coyujacu mu. ¿Ñame matedí mure pēvañu? arejaimađa na.

⁶⁵ Aru urarō yávarī, āmeina yávorejaimađa ũre.

Jesúre ne nūvaino judíovai jabova cójijivū yebai

(Mt 26.59-66; Mr 14.55-64; Jn 18.19-24)

⁶⁶ Avia ũi tucumuiyede, ina judíova bucuvu, aru ina sacerdotevare jaboteipōeva, aru ina Jūmenijicui yáviye báquede buaipōeva máre cójijidejaimađa na. Nūvarejaimađa Jesúre ne cójijinoi. Aru arejaimađa ũre:

⁶⁷ —Mu Cristo baru, coyujacu ñujare, arejaimađa na.

Aru Jesús arejameđa náre:

—Ji coyuru, muja ju abenajaramu yure.

⁶⁸ Aru ji jēniari járu, ju abenajaramu muja yure. ⁶⁹ Ñbenita yure, Jūmenijicui daroimu mácure ũmure, járajaramu muja caride pu cainumua Jūmenijicu parucui meapūravui dobacure, arejameđa.

⁷⁰ Dinumu caivu ina jēniari járejaimađa:

—¿Jūmenijicui mácurū mu? arejaimađa.

Jesús ju ayu náre arejameđa:

—Quédeca, muje aimurecabu yu, arejameđa ũi.

⁷¹ Nacapūravu arejaimađa:

—Apevu ne coyuiye jaubevu. Javeta jápiadavū maja ũi coyuiyede ũi baju āmeina teyure, jorojīni arejaimađa na.

Jesúre ne nūvaino Pilato yebai

(Mt 27.1-2, 11-14; Mr 15.1-5; Jn 18.28-38)

23 ¹ No yóboi caivu ina judíovai cójijinocavu nacajari, Jesúre nūvari, jabocu ũi āmiá Pilato yebai jacorānurejaimađa na. ² Aru āmecororī búrejaimađa Jesúre.

—Ñuja eavu ñai ũmure jaruvarīduyure maje jaborōre, aru bojeđaicōjemecure ñujare tāuturare maje jabocu Césare, aru ayure ũi baju “Cristobu yu” aru jabocu máre, arejaimađa na Pilatore.

³ Ne que aiyede, Pilato jēniari járejameđa Jesúre:

—¿Máru judíovai jabocu? arejameđa. Jesús ju arejameđa:

—Quédeca, mi aimurecabu yu, arejameđa.

⁴ Pilato arejameđa ina sacerdotevare jaboteipōevare aru caivu ina obedivu pōevare:

—Āmeina tebecutame ũi ji járu, arejameđa.

⁵ Ñbenita parurōreca arejaimađa bediōva cojedeca:

—Ñai cārijovaimi caivu Judeacavure ũi buieyeque. Bueni búquemavu Galileai. Aru edaibi yuita, jorojivu arejaimađa na.

Jesúre ne nūvaino Herodes yebai

⁶ Ne nópe āmecoroiyede jápiarī Pilato, jēniari járejameđa:

—¿Galileacacuba ũ? arejameđa.

⁷ Ina Jesúre āmecoroivu ne ju aiyede, Pilato majicu Jesúre Galileacacure, jarorejameđa ũre Galileacavu ne jabocu Herodes yebai. Dinumu ñai Herodes Jerusalén āmicurīmaroi curejameđa.

⁸ Jesúre jári, torojurejameđa Herodes, ũi jápaiye báque boje Jesúi dáieye báque borore. Que baru ũre pare jáiyucu barejámeđa. Jesús pōeva ne đarī majibede

dayure pare jáiyurejameđa Herodes.
 9 Jesúre caijiene jēniari járidurejameđa Herodes. Ubenita Jesúcapūravu bi arejameđa úre. 10 Herodes ũi jēniari jáiyede Jesúre, pare āmecoroivu barejáimada ina sacerdotevare jaboteipōeva aru Jūmenijicui yáviaye báquede buaipōeva máre. 11 Dinumuma Jesúre yurini, āmeno baju úre đarejaimada na, Herodes ũi churavaque. Doicaje meacajede Jesúre doarí, úre yurini, Pilato yebai jacopaiyovari jarorejameđa Herodes. 12 Jipocare ina jabova pucarā maucvarejaimada ne baju. Ubenita ne que teijāravui, dijāravu baji, boroteni, meadžarejaimada ne baju, Herodes Pilatomaque.

Pōeva ne boarí jaruvaicōjeino Jesúre
 (Mt 27.15-26; Mr 15.6-15; Jn 18.39-19.16)

13 No yóboi Pilato cójjiovarejameđa ina sacerdotevare jaboteipōevare aru apevu judíova cójjinocavure máre. 14 Ne cójjiyede ũi yebai, arejameđa náre:

—Nai ũmure davaivubu muja ji yebai. Úre boro coyurí adarí, “Ũ jaruvaríduibi maje jaboróre”, aivubu yure. Ubenita muje jáinoi yávacari jēniari jáivu úre ũi đaiye báquede. Aru ũi coyuyede jápiaríburu, coyuyubu mujare: Āmeina tebecutame ũ ji járu. 15 Herodes máre Jesús ũi āmeina teiyede eabetecube. Que baru jacopaiyovacube úre ñuje yebai cojedeca. Jápijarā. Coreóvaivubu muja. Ũi āmeno đaru, úre boarí jaruvaicōjejebu yu. 16 Que baru jara popeicōjeniburu yóboi, jaetovaquijivu úre, arejameđa náre Pilato.

17 Nópe dayu Pilato, ũi đarí cōmajiyē boje ujuá coapa no torojūve teinumure, cūinácu jacoimū mácure, pōeva ne etavaicōjeimure, jaetovavarejameđa ũ. 18 Ubenita caivu ina pōeva cođoboborejaimada cūnáturu, boarí jaruvaicōjeivu Jesúre.

—Iñaine boarí jaruvaicōjejacu mu! Barrabáre jaetovajacu mu, arí cođoboborejaimada na.

19 Nai Barrabás āmicucure jacorejaimada āmeina teivure jēni

jacoiñami ũi boarí jaruvaivyē boje Romacavure, ne jaboteiye boje Jerusalén āmicuríimarore, aru pōevare ũi boarí jaruvaivyē báque boje máre. 20 Ubenita Pilatocapūravu jaetovaiyurejameđa Jesúre. Que baru bediόva cojedeca coyurídurejameđa ina pōevare. 21 Ubenita cojedeca cođoboborejaimada ina pōevacapūravu, boarí jaruvaicōjeivu Jesúre.

—ÍŨre jocucujaravena pēvari boarí jaruvaicōjejacu mu! arí cođoboborejaimada Pilatore.

22 Bediόva cojedeca Pilatocapūravu arídurejameđa náre:

—¿Yéde āmeina tearí ñai? Coreóvaivubu muja. Ũi āmeno đaru, úre boarí jaruvaicōjejebu yu. Que baru jara popeicōjeniburu yóboi, jaetovaquijivu úre, arídurejameđa Pilato náre.

23 Ubenita ina pōevacapūravu parurōreca cođoborí bujiéque boarí jaruvaicōjenejaimada Jesúre. Que baru Pilato ju arejameđa náre. 24 Boarí jaruvaicōjenejameđa úre ina pōeva ne urōpe. 25 Pilato jaetovarejameđa ñai boarí jaruvayū bácure, āmeina teivure jēni jacoiñamicacure, ne jēniaimure. Ubenita jídejameđa Jesúre náre, ne đarājipepe ayu úre yópe ne urōpe.

Jesúre ne pēvari yuyaino
jocucujaravena

(Mt 27.32-44; Mr 15.21-32;
 Jn 19.17-27; Ap 6.16)

26 Jesúre ñvarejaimada. Jocucujaravede ture nuñu marídurejameđa ũ. Aru cuyu bácu ĩmaroi earejameđa Simón, Cirene āmicuríimarocacu. Nore vaiyúre, úre Jesús ũi jocucujaravede tuino mácaróre tuicōjenejaimada na, churava, Jesús yóboi.

27 Obedivu pōeva nurejaimada ũi yóboi. Aru nácavu nomiva orejaimada pare, ne chíoiye boje. 28 Ubenita Jesús copedini, náre jári, arejameđa:

—Muja, Jerusalécavu, obejarā yure. Quénora ojarā muje bajure, mujemarare máre. 29 Apejārvua baquiyéde pōeva

arājarama yópe: “Torojurājarama ina jue docuvavevu, aru ina jue doe abevu máre”.³⁰ Arājarama cūracūa uracūare: “Tujacūari ñujare”. Aru arājarama cūracūare: “Yavejacūari ñujare”.

³¹ Muja jáivu ne daiyede yure, meacure, jocucupe páyure. Que baru jáve pñeno ámeno ðarājarama mujare, ámenare, yópe pecacupe paivure, arejamedá náre Jesús.

³² Aru pucarā ámeina teivure máre ñvarejaimada ina churarava, Jesúque ne boarí jarvarājimarare.

³³ Põe jipobucū ámicuricū cūracūi eaivu, Jesúre jocucujaravena pēvari jēorejaimada na. Aru ina pucarāre máre ne jocucujaravea coapa pēvari jēorejaimada na, cūinácure meapūravui, apécure cācopūravui, aru Jesúre ne coricai. ³⁴ Ūbenita Jesús arejamedá:

—Mu, jipacu, ne ámeina teiyede árumetejacu mu. Coreóvabema ne ðainore, arejamedá Jesús jípacure.

Churarava ne yajuiyede ðuvarí, cainijidua eta iyede jári, Jesús ūi daiyede náre coapa ínejaimada na, úre pēvaivu bācavu. ³⁵ Pōeva nore cocoivu barejáimada. Aru nācavu judíovai jabova, Jesúre yurivu, yópe arejaimada na:

—Apevure meadavacacu. Caride jáve Jūmenijicui beoimu maru, Cristo baju baru, ūi bajure meadajacurí ū, arejaimada na.

³⁶ Ina churarava máre úre yurivu barejáimada na. Ūi yebai nurí, ūcuiye upiáteiye báquede úre jñidurejaimada na, úre íjibequiyepe aivu. Aru arejaimada úre:

³⁷ —Mu judíovai jabocu baru, mi baju mi yaiquínore meadajacu, arejaimada Jesúre ina churarava.

³⁸ Jocucujaravena, ūi pñenoí, toivaino jēnejavūya. “Judíovai jabocube”, aiyurejavūya no toivaino. Griegova ne yávaicamuaque, Romacavu ne yávaicamuaque, aru judíova ne yávaicamuaque máre toivarejaimada nore.

³⁹ Aru cūinácū ina ámeina teivucacu, jocucujaravena ne pēvaimu mácu, Jesúre ámeina yávarejamedá ū máre.

—Mu, ¿Cristo ámecurū mu? Cristo baju baru, mi baju mi yaiquínore meadarí, ñujare máre ñuje yainájiyede meadacajacu mu, arejamedá Jesúre.

⁴⁰ Ūbenita apēcucapūravu Jesúre ámeina ayure jári, jararejamedá:

—¿Jūmenijicure jidubecurū mu? Maja yaivutamu, maje ámeina teiye báque boje. ⁴¹ Que baru ámeno vaivu majare. Ūbenita ñai ámeina tebecutame ū. Majacapūravu maje ámeina teiye báquede bojedaiivutamu maja, arejamedá.

⁴² Que ayuva, arejamedá Jesúre:

—Mu, Jesús, jabocu bacuyá, árujacu yure, arejamedá.

⁴³ Aru Jesús ju arejamedá úre:

—Jáve coyuyubu mure: Cari jaravumica Paraíso ámicurōi yúque cucuyumu mu, arejamedá Jesús ñai chíõñure ūi ámeina teiye báquede.

Jesús ūi yaino

(Mt 27.45-56; Mr 15.33-41; Lc 8.2-3;

Jn 19.28-30; Hch 7.59; He 10.20)

⁴⁴ Jāravu corica baji ñemié turí darejavūya caino joborōi. Pu yóbecuriora yóboita vaidéjavūya. ⁴⁵ Que baru yóbecuriora baju ye aviá pēomenejamedá. Aru Jūmenijicui cūramicacaje uracaje coricópavaicaje bācarō quēda corica baji jadeni ñurejavūya. ⁴⁶ Dinumure pare bujíe coðoborí, yávarí darorejamedá Jesús:

—Mu, jipacu, ji ūmene mure jíyubu yu, arejamedá Jūmenijicure.

Que ayuva, yaidéjamedá ū.

⁴⁷ Nore Jesús bácuere cocorí núcu barejámedá churaravai jabocu. Jesús yaiyúre jári, mearore jídejamedá Jūmenijicure.

—¡Jāveneca ñai ūmu ámeina tebecu batecúbe! arejamedá churaravai jabocu.

⁴⁸ Aru caivu ina obedivu pōeva cójjiyivu bācavu nore, Jesús yaiyú bácuere jáivu, copainurejaimada ne cūramia coapa, totaivu ne ñarebare, ne chíoiye boje. ⁴⁹ Caivu Jesús bácu coreóvaimara, aru ina nomiva, Galilea ámicurōre jocarí ðaivu bācavu úque, na máre cocorí núrejaimada joajñemia.

Jesús b́acu jaruvaimu ne p̄e jaruvainoi

(Mt 27.57-61; Mr 15.42-47; Jn 19.38-42)

⁵⁰Cüinácu ũmu c̄urejameđa, ũi ámiá José, Arimatea ámicurĩmarocacu. Sacerdotevai cójijinore coyũp̄oēvacacu barejámeđa ũ. Nái José meacu aru ámeina tebecu barejámeđa ũ. ⁵¹Que baru ju abedejameđa ina judíovai cójijinocavũ ne ñaiye báquede Jesúre. Ũ máre Jūmenijicui jabotequinũma maquinóre napini coreyũ barejámeđa ũ. ⁵²Pilato yebai nuri, Jesús b́acui baju b́acarõre jēniacun̄rejameđa ũ. ⁵³Pilato ũi jēniayede ju arĩburu yóboi, Jesús b́acure jocuc̄jaravede jōđavari, ĩni, meacaje boricaje lino ámicuricajeque cūmari n̄varejaimađa ũ mácure cūracobei. P̄eva ne yaivũ b́acavũ ne ĩmamecobe barejávũya dicobe. Aru dicobei Joséjā jaruvarejaimađa Jesús b́acure. ⁵⁴Dijāravũ, nainú, torojũve teijāravũ baquinóre meadajāravũ barejávũya. Sábado baquinó jipocajāravũ barejávũya.

⁵⁵Ina nomiva Jesúque eaiyvũ b́acavũ Galilea ámicurõre jocarĩ, Joséjā yóboi nuri, járejaimađa dicobede aru ne jaruvaiyede Jesús b́acui baju b́acarõre nore. ⁵⁶Jāri buojarĩ, copainurejaimađa na, meadarājivũ mumijũede aru jĩjovaiyede máre, ne nuvarajiyede sábado jāravũ yóboi, meadarājivũ Jesús b́acui baju b́acarõre dieque. Aru judíovai jabuóvajāravũ sábadoi, jabuóvarejaimađa na yópe Jūmenijicui ñaicójeiye báquepe.

Jesús ũi nacajaino yainore jaruvari

(Mt 16.21, 17.22-23, 20.18-19, 28.1-10; Mr 8.31, 9.31, 10.33-34, 16.1-8; Lc 9.22, 18.31-33; Jn 20.1-10)

24 ¹No sumana buijāravũ domingo javejñara, aviá ũi tucumuiyede, ina nomiva nurejaimađa Jesús b́acure ne jaruvainoi, n̄vaivũ mumijũede, ne meadaiye báquede, yuarājivũ diede Jesús b́acui baju b́acarõre. ²Dicobe cūracobede carejavũya beiturava

cūrat̄urava uraturava. Dinomiva ne eaiyede ũ mácure ne jaruvainore, earejaimađa dicobe biebecobede.

³Ũbenita ne ecoiyede dicobei, Jesús b́acui baju b́acarõre eabedejaimađa.

⁴Cārijini dápiaivũ, “¿Āri curi Jesús b́acui baju b́acarõ?” arejaimađa ne bajumia. Ne nópe dápiayede, járorrejaimađa p̄ucarā ũm̄va, n̄urivũ ne yebai. Aru ne doicajea boricajea pare p̄orejavũya.

⁵Que baru ina nomiva, cucumaivũ, doco járejaimađa na, ne jidũe boje. Aru ina ũm̄va arejaimađa náre:

—¿Aipe teni voivurũ muja apucure yaivũ b́acavure ne jaruvainoi? ⁶Jesús jave nacajami yainore jaruvari. Que baru cubebi yore. ¿Ārumetenarũ muja ũi coyuiye báquede mujare nore Galilei?

⁷Coyuquemavũ mujare yópe: “Jauvũ yure, Jūmenijicui daroimũ mácure ũm̄pe, ji urarõ ñájiquino. Jēni jínajarama yure ina ámeina teivure, ne p̄evari boarĩ jaruv̄arājiyep̄e yure. Aru yóbecurijāravũ yóboi yainore jaruvari nacajacuyũmu yũ”, aquemavũ mujare Jesús, arejaimađa na nomivare.

⁸Ne que aiyede, ina nomiva ārurejaimađa Jesús ũi coyuiye báquede náre. ⁹Copainuriburũ yóboi Jesús b́acure ne jaruvaino mácarõre jocarĩ, caiye ne jáiye báquede coyurejaimađa ina once paivure aru apevũ Jesú yóvaimarare máre. ¹⁰Iye boreore coyuvũ b́acavũ barejaimađa María Magdalacaco, aru Juana, aru apoco María, Santiagoi paco máre, aru apevũ nomiva náque curivũ. Ina coyuridurejaimađa ne jáino mácarõre Jesús ũi yáviye méne beorĩ coyicójeimarare. ¹¹Ũbenita nácap̄uravũ ju abedejaimađa ina nomiva ne coyuiyede. “¿Ũbeni márica?” arĩ dápiarejaimađa.

¹²Ũbenita Pedro nacajari, cúyarĩ, earejameđa Jesús b́acure ne jaruvaino mácarõ yebai. Dicobei nacachini, járejameđa Jesú cūmaicajea báquede, lino ámicuricajea paraicajeare cūinároma. Que teni Pedro, pare dápiayũ, cūrami copainurejameđa.

Jesús ũi c̄ueteino Emaús ma n̄umai

(Mr 16.12-13)

¹³Dijāravũmica Jesú bueimaracavũ p̄ucarā Emaús ámicurĩmaroĩ

nũivũ barejáimada na, Jerusalén
 ãmicuriĩmaroi curivũ bÁCavu. Jerusalén
 joabejĩnoi, once paikilometros baju
 barejávũya diĩmaro. ¹⁴Nũre nũivũvacari
 boroteivũ barejáimada na, yo Jesús
 bácuĩ baju bácarõ bĩjaino mácarõre.
¹⁵Diede boroteivũ ne yávare nũiyedeca
 mái, Jesús ñi baju nára earejameđa
 ñ. Náque vaivári nũrejameđa Jesús.
¹⁶Vaivári nũñũreca náque, ñre
 coreóvabedejaimada na.

¹⁷Aru náre arejameđa Jesús:

—¿Aipe arĩ boroteivũrũ mũja, mái
 nũivũ? ¿Aipe teni chĩoivũrũ mũja?
 arejameđa.

Ñi que aiyede, dajocarĩ,
 nũranũrejaimada na, chĩoivũ. ¹⁸Aru
 nácacu cũinácũ, Cleofas ãmicucũ,
 arejameđa Jesũre:

—¿Mu máre Jerusaléi cũcũvacari,
 caiye vaiye báquede majibecurũ mu?
 arejameđa ñ.

¹⁹—¿Yéde? jēniari járejameđa náre
 Jesús.

Aru arejaimada:

—¿Jesús Nazarecacu bácre vaiye
 báquede jápiabetecurũ? Jũmenijicui
 yávaiyede coyũcaipõecu bácu baju
 bateáme ñ. Jũmenijicui jáinoi aru
 põeva ne jáiyede máre caiye ñi ñaiye
 báque aru caiye ñi coyũiyede báque máre
 me mateávũ. Coyurĩ parucũ bateáme
 ñ mácu. ²⁰Aru ñre boarĩ jarũvaicõjeni,
 ñre jocucũjaravena pēvaicõjeima na
 sacerdotevare jaboteipõeva ina maje
 jabovaque. ²¹Ûbenita, “Û majubĩ
 Israecavũre meadãipõecu bacũyũ”,
 aivũ bateávũ ñũja. Cari jãravũque
 yõbecurĩjãravũa nũivũ ñi yainĩburu
 yõboi. ²²Ñũjacavũ nomiva ñũjare
 cuavama caride. Cari jãravũ javejĩnara
 ñ mácre ne jarũvainoi numada na,
 ñũje nomiva. ²³Ûbenita ñ mácuĩ baju
 bácarõ cubetevũya. Eabetemada na.
 Aru yõpe arĩ, ñũjare coyũrãedama na
 nomiva: “Ángelevare jávũ ñũja. ‘Arũbi
 ñ Jesús’, ama na”, ama ñũjare dinomiva.
²⁴Dinumũma ñũjacavũ apevũ, “¿Jãve
 márica no?” arĩ, jãranũma na nomicata.
 Nomiva ne aiyede báquepedeca jámada na

máre. Ûbenita ñre, Jesũre, jámetemada
 na, arĩ coyũrejaimada ina pũcarã mái
 nũipõeva.

²⁵Náre arejameđa Jesús:

—Dãpiabevũtamũ mũja. Coreóvabeni
 curivũtamũ mũja. Jũmenijicui yávaiyede
 coyũcaipõeva mácavũ ne toivaiye
 báque caiyede jápiarĩ coreóvabevũbu
 mũja. ²⁶Nõpe ãmeno vaijẽbu Cristo. Aru
 no yõboi, ãmeno vaiyũ bácu, caiyede
 jaũbeda jebeyũ bácu, meacũ baju ñũjebu
 cavarõ mearo Jũmenijicui curõi, arĩ
 coyũrejameđa náre Jesús.

²⁷Aru coyurĩ búri Jũmenijicui
 ñaicõjeiyede ñi toivaicõjeiye báquede
 Moisés bácre, aru ina Jũmenijicui
 yávaiyede coyũcaipõeva mácavũ ne
 toivaiye báquede coyurĩ jebedejameđa
 náre Jesús caiye ñi borore.

²⁸ĩmaro ne earãjino joabejĩnoi eaiyede,
 nũñũpe tedejameđa Jesũcapũravũ.

²⁹Ûbenita ne yebai mauteicõjenejaimada
 na:

—Yui ñũjaque cũjacũ mu. Jájacũ, jave
 nainũtamũ. Jave ñemié tũinotamũ,
 arejaimada Jesũre.

Que teni ne yebai nũrejameđa Jesús.

³⁰Náque curĩ, dobarejameđa Jesús,
 ãcũyũ náque. Pãure ñni, Jũmenijicũre
 torojuede jĩni, pãure cotũvarĩ, náre
 jídejameđa Jesús. ³¹Ñi pãure cotũvarĩ
 jĩye bajure, ñre coreóvarejaimada
 na. Ne coreóvaiye bajure cũinã náre
 bĩjarejameđa Jesús. ³²Que teiyede,
 arejaimada na, ne bajumia boroteivũ:

—Jãvemũ. Ñi boroteiyede majare mái
 Jũmenijicui yávaiyede coyũyũ, maja
 meañũme cãtevũ, arejaimada na, Jesús ñi
 bĩjarĩburu yõboi.

³³Que teninata, cũinã Jerusalén
 ãmicuriĩmaroi copainũrejaimada na.
 Nore eaiyũ, ina Jesũi bueimara mácavũ
 once paivũ baju, aru apevũ náque
 curivũ, cũinãroĩ cõjijivũre earejaimada
 na. ³⁴Aru ina Jesũi bueimara mácavũ
 once paivũcapũravũ arejaimada ina
 pũcarã copavũ bácvũre yõpe:

—Jãve bajubũ. Maje jabocũ yaiyũ bácu
 bediõva cojedeca arũbiya ñ. Simõn
 Pedro ñre jámiya, arejaimada na.

³⁵ Dinumuma ina copaivu bácvu náre vaiye báque caiyede coyurejaimada ina once paivure. Ëi coyuiye báquede náre mái coyurejaimada na.

—Páure ñi cotuvaiye bajure ùre coreóvanu ñija, arí coyurejaimada na.

Jesús ñi cueteino ñi bueimarare

(Mt 28.16-20; Mr 16.14-18;
Jn 20.19-23; Hch 1.4)

³⁶ Ne nópe coyuiyedeca, Jesúvacari cuetedejameđa ne jéneboi. Aru yópe arí, jacoyurejameđa náre:

—¿Ména curáru muja? arejameđa Jesús.

³⁷ Ëbenita na cuicumari jidurivú, yópe arí dápiarejaimada: “¿Põe decocu bácu bária?” arejaimada na. ³⁸ Ëbenita Jesús arejameđa náre:

—¿Aipe teni jidurivurú muja? ¿Aipe teni púcaũmea curivurú muja? ¿Aipe teni “¿Ñamema ñai?” aivurú muja?

³⁹ Jájara ji puruáre, ji cubobare máre. Jáve yurecabu. Jēni jájara yure. Aru jájara yure máre. Que baru jiaru aru cúađo máre cuvú. Põe decocu yópe cubebi, arejameđa Jesús.

⁴⁰ Que ayuva, jáđovarejameđa náre ñi puruáre aru ñi cubobare máre.

⁴¹ Ëbenita ju abedejaimada cãreja, ne uraró torojue boje, aru ne pare dápiayue boje máre. Jesús jēniari járejameđa náre:

—¿Áiyede cuvabenaru muja yore? arejameđa náre.

⁴² Ju arí, jídejaimada ùre cūinátuibu moacu joaimure, aru mumicorore máre.

⁴³ Aru dituibure ñni, aru mumicorore máre ñni, ãrejameđa ne jáinore.

⁴⁴ Dinumu arejameđa náre:

—Jave yu coyucacu mujare caiye iyede ji cuede mujaque. Coyucacu mujare ñaiye javvu caiye iye Jūmenijicui ñaicójeiyede ñi toivaicójeiye báquepe Moisés bácvure, aru Jūmenijicui yávaiyede coyucaipóeva mácvu ne toivaiye báquepe, aru iye Salmos ñmicue toivaiye báquepe máre, arejameđa náre Jesús.

⁴⁵ Que ayuva, Jūmenijicui yávaiyede coyurí majicarejameđa náre, ne me majinajiyere ayu iye Jūmenijicui yávaiyede. ⁴⁶ Aru coyurí buojarí, arejameđa náre:

—Yópe toivainotamu: “Cristore ñi uraró ñájiye javvu ùre. Aru yóbecurijárvava ñi yainíburu yóboi nacajacuyume yainore jaruvarí”. ⁴⁷ Aru, “Coyuiye javvu póevare ne ãmeina teiyede chíori, ne oatvarájiyere aivu, Jūmenijicui ñrumetequiyepe aivu náre ne ãmeina teiyede. Cristoi ñmiái, ñi paruéque, coyuiye javvu náre caivu ijárvavcavure, mamarumure Jerusalécavure aru yóboi caivu arevure máre”, arejameđa Jesús, Jūmenijicui yávaiyede majicayu ñi bueimarare.

⁴⁸ Bedióva cojedeca Jesús coyurejameđa náre:

—Mujavacari jáivú bácvuvbu caiye iyede. Que baru coyuiye javvu mujare arevure, ne majinajiyere aivu. ⁴⁹ Yu daroquijivu mujare ñaine, jipacui daroquimure, Espiritu Santore. Que baru mautejará muja cãreja yui ímaroi, pu muje jacopuiyeta Jūmenijicui paruéde, cavaró mearoquede, arí ñaicójenejameđa Jesús ñi bueimarare.

**Jesús ñi muino cavaró mearo
Jūmenijicui curói**

(Mr 16.19-20; Hch 1.9-11)

⁵⁰ Ëi que aríburu yóboi, Jesús jipocatedejameđa ñi bueimarare pu Betania ñmicuríimajinoita. Nore ñi puruáre jaruvurí, “Jūmenijicui jáinoi me tejará muja”, arejameđa náre. ⁵¹ Nópe ayuvacari, muri nurejaquemavu náre jocarí pu cavaró mearo Jūmenijicui curóita. ⁵² No yóboi, ñuatutarí mearore jídejaimada ùre. Aru torojurivú copainurejaimada Jerusalén ñmicuríimaroí. ⁵³ Nore Jūmenijicui cūrami jívui mauteni cainumua, mearore jídejaimada Jūmenijicure. Quénoramu.

San Juan

Mamabuinore coyuiyebu Juan mácu ñi toivaiye báquede Jesucristorã. Juan mácu barejaquémavu judíovacacu, Galilea ãmicurijoborôcacu, aru Jesús ñi yávaiye méne beorí coyucôjeimaracacu. Ñi mamicu Santiago bácuque moa boaipôescu bácu barejaquémavu, Jesús ñi órejaquiye jipocare ñi mácure. Lucas bácu coyurejaquemavu Juan mácu borore Hch 3:1-4:22. Majidivu ne dápiayepere, iye coyuiyede Jesucristorã toivarejaquemavu ñi mácu cücü bácu Éfeso ãmicurímaroi. Pôescu cubebi majicu ye ujü ñi toivaiju bácarôre diede, ñbenita obedivu majidivu ne dápiayepere ãniujua báquede 85-98 d.C. baji, Marcos bácu, Lucas bácu, aru Mateo bácu ne toivaríburu yóbore. Juan mácu toivarejaquemavu yóbecuríyoca ñi paperayocare ñi toivaiyepere jipocare iye coyuiyede Jesucristorã. Aru toivarejaquemavu Jesucristo ñi jáðovaiye báquede ñi mácure ñi toivaríburu yóbore iye coyuiyede Jesucristorã.

Juan mácu jáðovarejaquemavu Jesúre, pôescu bajureca, yópe Jümenijicupe. Ñi coyuiye boje judíova ne cômajiyede ðaiyede, judíova ãnevare toivarejaquemavu, ne majinajiyepere ayu "Jesucristobe Jümenijicui daroimu mácu. Jümenijicui mácube Jesús" (20:31). Que baru Juan mácu búbedejaquemavu ñi coyuiyede Jesúrã ñi pôeteino mácarôre coyuiyeque. Quéhora búrejaquemavu ñi coyuiyede Jesús ñi cuedaiye báquede caiyede coyuiyeque. Juan mácu apevu püeno coyurejaquemavu Jesús ñi bueiye ñevari coyuiyeque: Jümenijicui ovejajícupe (cap. 1); cure ðaicope (caps. 4, 7); apure ðarí ãiyepere (cap. 6); pëoinope (cap. 8); ovejavare coreipôescu meacupe (cap. 10); aru oteiuyaimupe (cap. 15). Apevu püeno coyurejaquemavu Jesús ñi coyuiyede aru ñi ðaiyede ãniñami ñi yaiquijáravu jipocacañamine (caps. 13-17), aru ñi ðaiyede ñi nacajaríburu yóboi yainore jarívarí (caps. 20-21).

Jümenijicui yávaiye pôeteino

(Mt 3.1, 11.27; Mr 1.4; Lc 3.1-2, 10.22;
Col 1.15-17; He 1.2; 1 Jn 1.1-2; Ap 19.13)

1 ¹Mamarumure cãreja jãravure cuedaquiye jipocai, curejaquemavu majare Jümenijicui dápiainore coyucuedacuyü. Jümenijicucue curejaquemavu. Aru Jümenijicu baju barejaquémavu ñi. ²Mamarumumiata jãravure cuedaquiye jipocamiata, Cristorecabe cücü bácu Jümenijicucue. ³Ûrecabe Jümenijicui caiyede cuedare ðaimü mácu. Ûre pôevare, ãimare, aru caijïe coapa cuedare ðarejaquemavu Jümenijicu. Ñi cuedabedu, ye cubejebu. ⁴Ûrecabe cure ðayu bácu pôevare apurivure, ñi ðaicôjeimarare. Yópe pëoiye járe ðaiyepere pôevare, nopedeca Cristo pôevare coreóvare ðarejaquemavu jáve baju. ⁵Yópe ñami jámene ðaiyepere pôevare, nopedeca

ijãravucavu ne ãmeno ðaiyeque jávene coreóvabede ðaimaramu. Ñbenita Cristo, pëoinope, darejaquemavu ijãravui, ñeminitucubure, ãmecurijãravui, coreóvare ðacuyü pôevare jáve bajure. Aru pëoiyede codavainope teino coyuiye jávene vaini turíduyama ijãravucavu ãmeno ðaivu. Ñbenita ñi coyuiye jávene vaini tuiye majibenama.

⁶⁻⁷Pôevare Jümenijicui dápiainore coyucuedacuyüre Cristore jáðovaiyücu, Juan Bautistare coyucôjenezameða Jümenijicu. Juan Bautista coyucudarejaquemavu ijãravui iye coyuiyede, Jümenijicui coreóvare ðaiye báquede ñre Cristorã, caivu pôevare ne jápiarí ju arãiyepere ayu iye yávaiye méne. ⁸Ñai Juan Bautista Jümenijicui dápiainore coyucuedacuyü baju, Cristo baju, ãmenezameða ñi. Quéda Cristorã, Jümenijicui dápiainore coyucuedacuyü bajura, coyucudayü barejameða

ẽ. ⁹Cristorecabe dayu b́acu ij́aravũ coreóvarĩ buojare đacuyũ caivũ p̄evare Jũmenijicũ d́apiainore j́ave bajure.

¹⁰Cristo curĩdurejameđa ij́aravũ. Jũmenijicũ cuedare đaimũ ḿacuvacari ij́aravure, urre coreóvabedejaquemavũ ij́aravucavũ. ¹¹Ë jino dij́aravũ ẽi cuedaino ḿacarõĩ, darĩdurejaquemavũ ẽ. Ëbenita urre jacopũbedejaimađa obedivũ ẽ jina maridivũvacari.

¹²Ëbenita apevũ ńacavũ j́ave coreóvarĩ jacopurĩ urre ju aivure Jũmenijicũ ḿara teicõjenejaquemavũ Cristo.

¹³“Yure j́apiarĩ ju aivũ Jũmenijicũ ḿara tejarãri na”, ẽi que aino, maja p̄eva maje juedocuvãrõpe ãmevũ no. Aru maja p̄eva, “Jũmenijicũ ḿara teiyurĩ, ẽi ḿara tenajaramu”, maje aiyere ãmevũ no. Aru nomiõĩ ḿarepacũ juedocuvaiyure ḿare ãmevũ no. Quénora “Yure j́ave baju j́apiarĩ ju aivũ Jũmenijicũ ḿara tejarãri na. Jũmenijicũ ḿara baju tejarãri na”, arejaquemavũ ẽ.

¹⁴Majare Jũmenijicũ d́apiainore coyucuedacuyũ p̄otedejaquemavũ dij́aravũ. Majaque curejame ẽ, p̄ocupe páyũ. Ërarõ baju urĩ majare, đacaibi méne. Aru ẽvacari j́ãđovarejame majare aipe ãrojacure Jũmenijicure j́ave matuiyede. Meacu bajube ẽ. Jũmenijicũ ẽi parũede j́imũ ḿacũ parũede j́arejacarã ñjã. Cũinácũbe Jũmenijicũ ḿacu baju. Cũinácũrabe ẽ. ¹⁵Juan Bautista coyurejame ẽi borore urre j́arĩburu yóboi. Yõpe arĩ, codoborejame p̄evare:

—Ñaime mujare ji coyuvaimũ ji ávaiyere: “Ji yóboi dacuyũte ẽ. Ëbenita ji p̄otequiye jipocamiata curejaquemavũ ẽ, ji mujare ji coyuvaimũ. Ji jipocacacube ẽ. Yure vainĩ tuibi ẽ. Caiyede cuedaquiye jipocai curejaquemavũ ẽ”, acacu yũ mujare, arejame Juan Bautista.

¹⁶Ërarõ ẽi ue boje, mearo đacaibi caivũ majare. Obedinũmũa ména cure đabi majare. Obedinũmũa bediõva mearo đacavaibi, cadatecuyũ majare. ¹⁷Jũmenijicũ coyurĩburu

yóboi Moisés b́acure ẽi đaicõjeiyede p̄evare, ména cure đaicõjeino majare buenidurejaquemavũ Moisés b́acu.

Ëbenita Jesucristo barejáme majare Jũmenijicũ uede j́ãđovañũ. Majare aipe ãrojacure Jũmenijicure j́ave j́ãđovarejame Jesús. ¹⁸Jáimũ ãmemi Jũmenijicũ. Ëbenita Jũmenijicũ ḿacu cũinácũra, ẽvacari Jũmenijicũ baju, majepacũque cũcu, majare coreóvare đacudarejame ẽ Jũmenijicure. Edarĩ, j́ipacu jiede coyucudarejame ẽ.

Juan Bautista ẽi memecaino Jesucristore

(Mt 3.11-12; Mr 1.7-8; Lc 3.15-17)

¹⁹Ina judiõva Jerusalén ãmicurĩmarocavũ j́eniari j́aicõjeni jarorejaimađa Juan Bautistare. Sacerdotevacavũ aru Jũmenijicũ cũramine memep̄devacavũ, levita ãmicuriyajubocavũ, jarorejaimađa ina jabova, “¿Namenũ mu?” ne arĩ j́eniari j́arajiyere aivũ urre. Que arĩ, yécu p̄ocupe páyure majiyurejaquemavũ na. ²⁰Juan Bautistacapuravũ nuriéna coyurĩ jebedejame náre.

—Cristo ãmevũ yũ. Jũmenijicũ epeimũ, jabocu bacuyú, ãmevũ yũ, arejame náre.

²¹—¿Dinũmũ ñamenũ mu? Cristo ãmevũ mu. ¿Elĩarũ mu? arejaima ina sacerdoteva.

—Ë ãmevũ yũ, arejame.

—¿Ñai Jũmenijicũ yávaiyede coyũcaip̄ocũ bacuyú, majeñescuva ḿacavũ “edacuyũ”, ne ávaimũ mu? arejaima urre cojedeca.

—Ë ãmevũ yũ, arejame náre.

²²—¿Dinũmũ ácure páyurũ mu? Ñjare cũiná coyũjacũ mu, ñjare j́eniari j́aicõjeivure ñje coyurãjiyere. ¿Aipe ayurũ mu? ¿Yécurũ mu? arejaima urre ña sacerdoteva.

²³Ëcapũravũ coyurejame náre yõpe arĩ, ñai Jũmenijicũ yávaiyede coyũcaip̄ocũ b́acu, Isaías ãmicũcu b́acu ẽi toivaiye báqueque:

—Yurecabu Isaías b́acu ẽi toivaimũ ḿacu: “Jũmenijicure coyũcaip̄ocũ

codoboboyure jápiarājarama pōecubeno: ‘Meadajarā m̄je ūmene, copu etaburī maje jabocure, nopedeca m̄je meadaiyepe daimare, ñai ūm̄, m̄je pueðaim̄, ūi daquiye jipocai. Que ðarī ðajocajarā m̄je āmeina teiyede, Jūmenijicui daroim̄ macuyú ūi daquiye jipocai, Jūmenijicu ūi copu etaquiyepe aiv̄ m̄jare’”, arejame náre Juan Bautista.

²⁴Ina fariseovai jaroimara Juan Bautistare are n̄ri jēniari járejaima:

²⁵—M̄ Cristo āmev̄. Elías āmev̄ m̄. Aru ñai Jūmenijicui yāvaiyede coycaipōecu bacuyú āmev̄ m̄. ¿Din̄m̄ aipe teni pōevare Jūmenijicuque jáðovañ̄ m̄ ocoque? arejaima ina fariseovai jaroimara.

²⁶Juan Bautista arejame náre: —Yurecabu pōevare jáðovañ̄ Jūmenijicure ocoque. Ūbenita cūinācu cubi m̄je jēneboi, m̄je coreóvabem̄.

²⁷Ji yóboi dacuyume ū. Ūbenita ji p̄eno paracu bacuyume. Caiv̄ p̄eno meacu bajube ū. Yúcapūrav̄ pare ūi cāchinocacubu. Que baru ūre cadateni buojabev̄ yu. P̄u oarī buojabev̄ yu duaȳ ūi curaidoa buoimeare, arejame náre.

²⁸Caiye iye vaidéjav̄ Betania āmicur̄oi, Jordán āmicuriya jia avia daid̄ve écarui, Juan Bautista ūi jáðovare cuiyede pōevare Jūmenijicuque ocoi nore.

**Jesús Jūmenijicui daroim̄
m̄acu ovejajīcure, jaruvacuȳ
pōeva ne āmeina teiyede**

²⁹Cōmiájārav̄i yópe barejáv̄. Juan Bautista járejame Jesúre dayure ūi yebai. Ūre jári, arejame ñ̄jare:

—Jájara m̄ja. Ūrecabe Jūmenijicui daroim̄ m̄acu ijārav̄i, jaruvacuȳ pōeva ne āmeina teiyede. Yópe sacerdoteva ne boaiyepe ovejajinare, jínajiv̄ Jūmenijicure ūi ārumetequiyepe aiv̄ pōeva ne āmeina teiyede, nopedeca ñai Jūmenijicui daroim̄ mácure boarī jaruvārājarama pōevare boje, Jūmenijicui ārumetequiyepe aiv̄ pōeva

ne āmeina teiyede. Que baru pōeva ne āmeina teiyede meaðaipōecube ū. ³⁰Ñaime m̄jare ji coyvaimume ji ávaiyepe: “Ū ji yóboi dacuyume. Ūbenita ji pōetequiye jipocamiata curejaquemav̄. Que baru yure vainí tuibi ū. Caiyede cuedaquiye jipocamiata curejaquemav̄”, m̄jare acacu yu. ³¹Mamar̄m̄ure yu máre coreóvabotecacu ūre Jūmenijicui mácure. Ūbenita pōevare Jūmenijicuque jáðovacudacacu yu ocoque, Israecav̄ ne coreóvarājiyepe ayu ūre, Jūmenijicui mácure, arejame ñ̄jare, ūcavure, Israecavure, Juan Bautista.

³²⁻³³Yópe arī, ūi majiède coyurejame ū: —Yu máre ūre coreóvabecu cāreja, “Jūmenijicui daroim̄ m̄acu bajubí ū”, abetecacu yu. Ūbenita Jūmenijicu, yure jáðovaicōjeñ̄ m̄acu pōeva Jūmenijicu jina teiyurivure ūre ocoque, yópe arī coyúame yure: “Jácuȳm̄ m̄ ji Espiritu Santo tubacūemeñ̄re cūinācu ūm̄ra aru cūare ūque. Ñai ūm̄, ūrecabe pōeva jina teiyurivure yure jáðovacuȳ Espiritu Santoque”, áme yure Jūmenijicu. Quédeca ūi aiye báquepe, Jesúrā ñai Espiritu Santo tubacūemeñ̄re jurecope cavarō mearo Jūmenijicui cūrōre jocarī jácacu yu. Aru ñai Espiritu Santo cúteame ūque. ³⁴Yúcapūrav̄ majiv̄, ji jáiye báque boje. Que baru coyuȳbu m̄jare. Ñai ūm̄, m̄jare ji coyvacam̄, Jūmenijicui mácube ū, arejame Juan Bautista.

Jesús ūi mamar̄m̄ bueimara

³⁵Cōmiájārav̄i Juan Bautista curejame nore cojedeca ñ̄ja p̄carā ūi bueimaraque. ³⁶Que teni Jesús noi vaiȳre jári, arejame ñ̄jare:

—Ūre jájara m̄ja. Ūrecabe Jūmenijicui daroim̄ m̄acu. Yópe sacerdoteva ne boaiyepe ovejajinare, jínajiv̄ Jūmenijicure, nopedeca ñai Jūmenijicui daroim̄ mácure boarī jaruvārājarama pōevare boje, arejame ñ̄jare Juan Bautista.

³⁷Ūi que aiye ðapiaiv̄, Jesúque n̄rejacarā ñ̄ja. ³⁸Jesús núcun̄ri, copedini, ñ̄jare jēniari járejame:

—¿Aru muja yéde voivurū? arejame Jesús.

—Mu, bueipōecu, ¿ári cūcūmū mu? arejadarā nūja Jesúre.

³⁹—Yúque járadajarā muja, arejame nūjare Jesús.

Nūje nūiyede úque, yóvaicūvaioira nainú marejávū. Úque nūri, ūi curōi jári, curejadarā úque dijāravu joarō.

⁴⁰Cūinācu nūja pucarā Juan Bautistare jápiaivū bācavūcacu aru Jesúque nuivū bācavūcacu Andrés āmicūcu barejāme, Simón Pedroi yócu.

⁴¹Cūinā, Andrés vocunūrejame ūi mamicu Simóre. Eayū bācu, arejamedā úre:

—Mesíare, Jūmenijicūi epeimūre, pōevare meadaiipōecure, eavū nūja, arejamedā Andrés.

Mesías aino, Cristo aiyurōtamu. ⁴²No yóboi Andrés jībūcure nūvarejamedā Jesús yebai. Jesús, Simóre jári, yópe arī coyūrejame:

—Simómu mū. Mīpacu āmicūbi Juan. Ūbenita Cefas āmidoimū macūyūmu mū, arejame Jesús.

Cefas aino, Pedro aiotamu. Aru nóvacari cūrabo aiyurōtamu.

**Jesús ūi “Dajarā” aino Felipe,
Natanaene máre**

(Mt 16.15; Mr 8.29; Lc 9.20)

⁴³Cōmiájāravūi Galilea āmicūrijaborōi nūcūyū barejāme Jesús. Nuñū, Felipe de copūrejame ū:

—Yúque dajacu mū, arejame Felipe de Jesús.

⁴⁴Betsaida āmicūriīmarocacu barejāme Felipe. Andrés aru Pedro ne īmarocacu barejāme. ⁴⁵Dinūmure Natanaene vocunūrejamedā Felipe. Ūre eayū, coyūrejamedā:

—Naine, Moisés bācu aru ina Jūmenijicūi yāvaiyede coyūcaipōeva māvavū ne toivarī coyūvaimūre eavū nūja. Moisés bācu ūi toivaiye bāquede Jūmenijicūi daicōjeiyede toivarejaquemavu úra. Ūtame Jesús Nazarecacu, Joséi māvū, arejamedā Natanaene Felipe.

⁴⁶Natanaecapūravū arejamedā:

—No īmaro Nazarede pōeva meara, apevure cadateivū, cubema na, arejamedā Natanael.

—Dinūmū jácudajacu mū mi baju, arejamedā úre Felipe.

Jāradarejaima ina pucarā. ⁴⁷Náre edaivure jári Jesús, yópe arejame Natanaena:

—Majecu, israevacacu baju, edaibi ū. Borocubecu bajube ū, arejame Jesús, Natanaene jáñū.

⁴⁸—¿Aipe teni yūre majitecūmū mū? arejame Jesúre Natanael.

—Mūre Felipe ūi cutubede cāreja jávū yū. Hīgueracu cāchinoi dobatevū mū, arejame Natanaene Jesús.

⁴⁹—Mu, bueipōecu, Jūmenijicūi māvūbu mū. Nūja Israevavū nūje jabocūbu mū, arejame Jesúre Natanael.

⁵⁰Quénora Jesúcapūravū arejame úre: —¿“Jocūcu cāchinoi mūre jávū” ji aiyede, “Jūmenijicūi māvūbu mū”, ayurū yūre? Pueno ji apejīe parué ji daquiyyede jácūyūmu mū. ⁵¹Jāve coyūyūbu mūjare: Cavarō mearo Jūmenijicūi curō vorī nūinore járajaramu muja. Nore Jūmenijicūi āngeleva, jōdaivure aru mūivure járajaramu muja. Aru ne coricai cūcūyūmu yū, Jūmenijicūi daroimū māvū ūmūre, arejame nūjare Jesús.

**Jesús ūi buino pōeva ne darī
majibede**

(Mt 4.13)

2 ¹Pucājāravūa yóboi, Galilea āmicūrōi, Caná āmicūriīmaroi, purūbuoivū ne torojūve teino marejávū. Aru Jesúi paco curejaco noi. ²Jesús aru nūja ūi bueimara ina purūbuoivū ne cutuimaracavū barejacárā. ³Nūje āiye bajure ūcuiye cūinējāvūya. Jesúre coyūcodarejaco jīpaco:

—Būcūru, javeta ūcuiye, vino úyaicoro, cūivú die, arejaco Jesúre.

⁴—Báco, ¿aipe teni yūre que adorū? Ji memeinūmū eabevū cāreja, arejame jīpacore Jesús.

Āniñami cūramicavū ne yebacavū yebai nūri, yópe arejacođā ō:

5—Jímacni cōjeiyepe đajarā m̄ja, arejacoda Jesúi paco.

6Nore curejavū seis paibua jorobua, cūrajorobua. Ūrabua jorobua baju, cūinábū cincuenta o setenta pailitros baju eaibu barejávū. Dibua ocoque buiváibuare cūvarejarā n̄ja judíoiva, n̄je cojarājīyepe aivū, n̄je nópe teni cōmajinope Jūmenijicui me jáquiyeye aivū n̄jare. Que teni inamicavū máre cūvarejaima dibuáre.

7—Ocore in̄i, davarī, dibuáre buivájarā m̄ja, arejame nócacui yebacavure Jesús.

Na ju arī, dibuáre yuyeni, buivárejaima.

8—Que đarī quíjinora doarī, torojuve teino upacure n̄vajara m̄ja. Ūi ūcuri dápiacquiyeye arī, jinan̄jara, arejame ina yebacavure.

Ju arī, n̄ai torojuve teino upacure diede n̄vari, jídejaima.

9Die oco báquede Jesús oat̄varī, vino úyaicoro tede đarejame. N̄ai torojuve teino upacu die ūcuiyede ūcuri járejame. Ūcapūravū majibedejame ároi ne íye báquede diede. Ūbenita ina yebacavūcapūravū, ina ocoque dibuáre yuyeiuv̄u b́acavū, me majidejaima. Ūcuri jári, p̄r̄ub̄uoyure cuturejame n̄ai torojuve teino upacu. 10Dayū b́acure yópe arejame n̄ai torojuve teino upacu:

—Mamarum̄re ūcuiye me bajure jíyavū maja maje cutuimarare. Aru yóbota, na ūcuri vainí tuivure jári, majiéda meacorore náre jíyavū maja. Que đabetevura m̄. Mamarum̄re meacorore yavedebu m̄. Aru yóbota, méne ūcuiyede jívu m̄, arejame p̄r̄ub̄uoyure n̄ai torojuve teino upacu.

11Que teni p̄eva ne đarī majibenore đarejame Jesús, jáđovacuyū ūi majiéde. Galilea ámicurōi, Caná ámicurīmaroi, ūi ocore oat̄vainoque, Jesús búrejame p̄eva ne đarī majibede ūi daiyede. “Jūmenijicui epeim̄me ū”, p̄evare are đayū, nópe náre jáđovarejame Jesús. Aru “Cristo bajube ū” arī, me ju arejarā n̄ja ūi bueimara.

12No yóboi Capernaum ámicurīmaroi n̄rejame Jesús. Ūre yóvarān̄rejearā

jípaco, ūi yóva, aru n̄ja ūi bueimara. Nore obebejāravua curejarā.

Jesús ūi meadaino Jūmenijicui cūramine

(Mt 21.12-13, 26.61, 27.40; Mr 11.15-18, 14.58, 15.29; Lc 19.45-46)

13Pascua ámicurījāravū torojuve teijāravū baquinó eare n̄ino marejávū. N̄ja judíoiva n̄je torojuve tein̄mu marejávū no, Jūmenijicui etavaiye báque boje n̄jeñecuva mácavure Egipto ámicurījorob̄re jocarī. Dinum̄re Jerusalén ámicurīmaroi n̄rejaima obedivū judíoiva. Que baru Jesús máre m̄ri n̄rejame. 14M̄ri n̄ri, earī, Jūmenijicui cūramine jácun̄rejame Jesús. Diñami tāiburā earī, ecorī oteivecuv̄a, ovejava, aru jurevare bojedavure járejame. Nácapūravū p̄evare urarō ne tātutarare in̄ejaima. Apenoa joborōacavū ne tātutarare oat̄vaip̄eva dobarivure máre járejame nore. 15Que baru cainimea in̄i, ūi jara boaquímene cāriárejame. Cāriári buojarī, dimeque jara popeni, diñami curivure jaetovarejame Jesús ina tāibui curī bojedavure ne áimaraque. Tātutarare oat̄vaivure máre jararī, ne jáđovavure jaruporī, moari najuárejame, jar̄vacuyū ne tātutaraturavare joborōi.

16Jurevare bojedavure yópe arejame:

—N̄jara m̄ja, m̄je bojedajuromarare in̄i. Jipacure mearore jíñamimu yo. Bojedaiñami đabejarā jipacui cūramine, arejame náre Jesús.

17Jesús ūi que aiyede, Jūmenijicui yávaiyede ūi toivaicōjeiye báquede árvarejarā n̄ja, ūi bueimara. “Mu, Jūmenijicui, apevū ámeina đarājiv̄ubu yure. Que baru mi cūramine jecurī vaivū yu”, apecu b́acu ūi aiyede báquede toivaicōjenejaquemavū Jūmenijicui.

18Ina judíoiva n̄je jabova yávarāđarejaima Jesúsre:

—Jūmenijicui m̄re que đaicōjenu, n̄jare jáđovajacu p̄eva ne đarī majibede mi đainore, arejaima ina jabova.

19Jesús arejame náre:

—Inamine bíjarorí jaruvajarā mūja. Inamine mūje jaruvaríburu yóbecurijārvua yóboi, mūje jaruvaiñami mácarōre meadacuyumu yu, arejame Jesús.

²⁰Ina judíova arejaima ũre:

—Cuarenta y seis paiñua baju diñamine núvari ñájiquemavu memepōeva. ¿Aru mu yóbecurijārvua memeni, diñamine meadayu buojaje bārica mu? arejaima ñuje jabova Jesúre.

²¹Ūbenita diñami bajure ayu āmenejame Jesús. Ūi bajure cūramipe ayu barejáme ũ. Ūbenita majibedejaquemavu na, jabovacapūravu. ²²Majibenidurejacaarā ñuja máre, Jesús ũi que aiyede. Ūbenita ũi nacajariburú yóboi yainore jaruvarí, ũi que aye báquede dápiarí, ārrejacaarā ñuja, ũi bueimara. Árurívu ũi coyuiye báquede aru Jūmenijicui yávaiye báquede máre ju arejacaarā ñuja ũi bueimara.

Jesús ũi majiède pōeva ne dápiayede

²³Pascua torojuve teinumū, Jesús ũi cuedeca Jerusalén āmicurímaroi, ũre ju arídurejaima pōeva obedívu. Ne jáiye boje ũi jáđovaiyede pōeva ne đarí majibede, “Jūmenijicui epeimū Cristobe ũ”, arejaima na.

²⁴Ūbenita Jesúcapūravu náre coreóvari, “Jāve abema na”, arí dápiarejamedā. Me baju pōevare coreóvarejaquemavu ũ. ²⁵Ūre jaubevu apesu ũi coyuiye aipe ārojaene pōevare. Me majidejaquemavu pōeva ne dápiayede. Quénora ũi baju coreóvarejaquemavu náre.

Jesús Nicodemomaque ne boroteino

(Jn 8.28, 12.32-34, 18.32; 1 P 1.3, 23)

3 ¹Cūinācu ũmu Nicodemo āmicucu barejáme, ñuja judíova ñuje jabovacacu. Fariseo āmicuriyabocacu barejáme Nicodemo. ²Cūināñami Jesúre borotecuearejamedā.

—Mū, bueipōecu, coreóvaivūbu ñuja mure Jūmenijicui daroimū mácure, buescuyre ũ jiede. Que baru ácu pōecu Jūmenijicui paruéde cuvabecu baru,

đaiye majibebi yópe pōeva ne đarí majibede mi đaiyepe. Que baru máque cubi Jūmenijicū, arejamedā Nicodemo Jesúre.

³—Jāve coyuyūbu mure: Ácu pōecu bedíova cojedeca ũi pōetebedu mamaūmeque, ũre jabotebecuyume Jūmenijicū, arejamedā Jesús.

⁴—¿Aipe teni? ¿Bedíova cojedeca juedocupe pōeteiye majidi bucucu? Jāve bucucu jíracoi yapiburā ímari, pōeteuy buojabebi, arejamedā Nicodemo.

⁵Ūre arejamedā Jesús:

—Jāve coyuyūbu mure: Ácu pōecu ũi pōetebedu ocoque aru Espírítu Santoque máre, ũre jabotebecuyume Jūmenijicū. ⁶Pōevai mára pōevatamu. Ūbenita ñai Espírítu Santoi pōeđaimara mamaūmeque epeimaratamu na. Que baru Jūmenijicui máramu. ⁷“Ácu pōecu bedíova cojedeca ũi pōetebedu mamaūmeque, ũre jabotebecuyume Jūmenijicū”, ji aiyede mure urarō baju dápiabejacu mu. ⁸Ūmebo darí japuinopebu no. Ári japurí nuuyarō nuquiyebe. Ūmebo japuinoe maja quéda jápiadavū. Jáino āmevu no. Quédecabu Espírítu Santoi pōeđaimara mamaūmeque. Jári majino āmevu no, arejamedā Jesús.

⁹—¿Aipe aiyarō márica no, mi que aino? arejamedā Jesúre Nicodemo.

¹⁰Ūre arejamedā Jesús:

—Murecabu judíova ne bueipōeva me majidivucacu. ¿Jápiarí eabecurū mu iye ji mure coyuiyede? ¹¹Jāve coyuyūbu mure: Ñuje majiède mujare coyuríduyavū ñuja. Ñuje jáiye bajure coyuríduyavū. Ūbenita ju abevu mūja ñuje coyuríduiyede. ¹²Ijārvanquede coyuríduvu yu. Ūbenita ji coyuiyede ju abevu mūja. Ijārvanquede coyuiyede ju abevu baru, cavarō mearo Jūmenijicui curōquede ji coyuríduyede ju abenajaramu mūja. ¹³Cavarō mearo Jūmenijicui curōi muri nuri, cojedeca ijārvai ēmeni dayu bācu cubebi. Que baru ácu ijārvucacu cavarō mearoquede coyuiyede coyubebi. Yurecabu Jūmenijicui daroimū mácu

ñmure. Cavarō mearo Jūmenijicui curōi cucu bācu ijāravui darejacacu yu. Que baru cavarō mearo Jūmenijicui curōquede coyuiyede coyuiye majivu yu. ¹⁴Yópe Moisés bācu ñaiye báquepe, ñi cuede cāreja pōcubenoí, ādape paino bronce āmicurō táuque ñaino mārārōque, nopedeca vaiquiyebu yure. Ñi ñaimu mácure jocuyo ñmujuriyorā jēori, jāmuōrejaquemavu Moisés bācu. Nopedeca yure, Jūmenijicui daroimu mácure ñmure, jocucurā jēori, jāmuōrajarama pōeva. ¹⁵Yure yópe ñaimure jāri, caivu pōeva yure ju aivu baru, cavarājarama jāravu cūiméjāravu baquinóre cavarō mearoi, arejameña Jesús.

Jesús ñi coyūino Jūmenijicu ñi uede caivu pōevare

¹⁶Coyure ñurejameña Jesús: —Quécura, cūinácubaru yu Jūmenijicui mácure. Pare baju ijāravucavure ucu, yure darorejame Jūmenijicu yore. Jaurabeda toabo cūiméboi ne ñamenajiyepere ayu, yure ju aivure jāravu cūiméjāravu baquinóre cure ñaibi Jūmenijicu cavarō mearoi. ¹⁷Jūmenijicu darobedejame yure, ji ñájine ñaquiyepe ayu ijāravucavure ne ñameina teiye boje. Quénora darorejame yure, ji meadaquiyepe ayu náre. ¹⁸Yure ju aivu bācavure ñájine ñabecuyume Jūmenijicu. Ubenita yure ju abevure ñájine ñacuyume Jūmenijicu, ne ju abe boje yure, Jūmenijicui mácure cūinácura. ¹⁹Yópe ñari Jūmenijicu arevure “Boropatebevu mija ji jāinoi”, aru arevure “Boropateivubu mija ji jāinoi”, coyuyube. Ji daiye boje ijāravui, pōevare majide ñaimu Jūmenijicui yāvaiyede jāvene, yópe pōino jāre ñaiyepere náre. Aru ijāravucavu ne ñameina teiye ñeminopebu. Pōeva yure ñabema. Quénora ne ñameina teiyede ñama na. Nárecabu Jūmenijicu “Ñájinajaramu mija”, ñi arí coyūimara, ne ube boje yure. ²⁰Caivu ina ñameina teivu yure jādovaicōjeiyubema ne ñameina teiyede. Que baru yure

pōñmure, ne ñameina teiyede jādovañure, jāiyubema. ²¹Ubenita caivu ina ju aivu Jūmenijicure, ñai ayure jāvene, yaveiyubema ne ñaiyede. Quénora jādovadama ne ñaiye caiyede yópe Jūmenijicui urōpe. Que baru yure pōñmure vodama, arejameña Jesús.

Juan Bautista ñi coyūino Jesús ñi paruede

(Mt 14.3; Mr 6.17; Lc 3.19-20; Jn 1.20)

²²No yóboi Judea āmicurijoborōi ñurejame Jesús, ñija ñi bueimaraque. Nore curejacará ñija obedijāravua. Nócavure Jūmenijicucue jādovaiyu barejacará ocoque. ²³Aru Enón āmicurimaro bají, Salim āmicurō joabejino, curejameña Juan Bautista máre. Pōeva ñre eavure Jūmenijicucue jādovañu marejameña, oco urarō cūe boje nore. ²⁴Dinumure cāreja Juan Bautistare jēni, ñuari, buobedejameña ñije jabova.

²⁵Juan Bautista ñi bueimaraçavu coru yāvairi burejameña cūinácure judíoque, ñije ñari cōmajiyede Jūmenijicui me jāquiyepe aivu ñijare.

²⁶Que teni yāvairi buojari, Juan Bautistare coyurāearejameña ina ñi bueimaraçavu:

—Mu, bueipōecu, ñai mácure cūvacacu Jordáda añiduvei, mi coyūvacamu Jūmenijicui majiéque, ñvacari pōevare Jūmenijicucue jādovaimi ocoque. Obedivu ñuñama ñque caride, arejameña.

²⁷Yópe arí, náre coyurejameña Juan Bautista:

—Pōecu cubebi ñi ñaiyepere ñari buojayu, Jūmenijicui ñre parure ñabedu. ²⁸Mujavacari jāpiadavū ji coyuriduiye báquede. “Cristo ñamevu yu”, acacu yu ñijare. Quéda ñre coyurí jipocateicōjeimamu yu. ²⁹Yópebu yu Cristoque. Pūrubuocuyu nomiscuyume. Aru ñi yóvaimu, ñai meadayu bācu ne pūrubuoiyede, torojubi ñi jāpiayede ñai pūrubuocuyu ñi yóvainore. Ñai yóvaimu ñi teinope teyubu yu. Que baru pōeva Jesúsque ñivure jāñu, urarō torojuvu

ya ji ñemei. ³⁰Pueno paracü pucñuyume Jesús. Ubenita parubecu pucñuyumu ya. Pöeva ne puedaimu macñuyüme ñ. Ubenita puedabejaräri yure, arejamedä Juan Bautista.

Cavarö mearo Jümenijicüi curöi cücü bácuere coyüino
(Mt 11.27; Lc 10.22)

³¹Coyüere nurejamedä Juan Bautista: —Cavarö mearo Jümenijicüi curöi cücü bácu, ijäravüi emeni darí, caivu ijäravucavu maje pueno majibi. Ijäravucacu yócacube. Que baru majibi yóque majiéde. Ubenita cavarö mearore emeni dayu bácu yócavu maje pueno majibi. ³²Ñai cavarö mearo Jümenijicüi curöi cücü bácu ñi jáiye báquede coyüríduibi. Ubenita ñi coyüiyede ju abema obedivü yócavu. ³³Que baru ácu pöecu ju ayu baru ñi coyüiyede, Jümenijicüi jáve aiyede, “Jävemu”, ayutame ñ. ³⁴Jecubecüva Jümenijicüi ñi Espíritu Santore cure ñabi Cristoque. Que baru Cristo, Jümenijicüi daroimu mácu ijäravüi, Jümenijicüi jiede coyüibi. ³⁵Mamacüere pare ubi majepacu Jümenijicüi. Caiyede aru caivüere purucüvaicöjeimi ñ mamacüere. ³⁶Caivu ju aivu mamacüere, Cristore, järavu cüiméjäravu baquinóre cavarö mearoi cävama na. Ubenita caivu jápiabevü íre, Cristore, järavu cüiméjäravu baquinóre cavarö mearoi cävabema na. Quéñora ne jápiaiyube báque boje, náre urarö ñájine ñacñuyume Jümenijicüi, arejamedä Juan Bautista.

Jesús Samariacacöque ne boroteino
(Jn 7.37-39)

4 ¹⁻²Obedivü ñi bueimara cüvarejamedä Juan Bautista. Ubenita pueno obedivü ñi bueimara cüvarejame Jesús. Aru Jesúi Jümenijicüere jáðovaimara mácavu ocoque obedivü barejáima Juan Bautista ñi Jümenijicüere ocoque jáðovaimara mácavu pueno. Ubenita Jesúcapüravu pöevare Jümenijicüere jáðovamenejame ocoque. Quéñora ñüja,

ñi yávaiye méne beorí coyüicöjeimarare jáðovaicöjenejame náre ocoque. Ina fariseo ämicurijajubocavu, pöeva “Jesús obedivü ñi bueimara cävabi Juan Bautista pueno”, ne arí boroteiyede jápiarejaimada. ³Jesús jápiayu bácu ina fariseova ne coreóvayede iye borore úra, Judea ämicuröre dajocarí nuri, Galilea ämicurijaboröi nurejame. Aru éque nurejacadä ñüja.

⁴Ñüje nüiyede Galileai, Samaria ämicurijaboröi vaiye jaurejavü ñüjare. ⁵Vaidé nuri, Samariacarö ímaro, Sicar ämicurímaroi emenejacadä ñüja. Sicar bajita cürejaquemavu no joborö, ñüjeñecu mácu Jacob bácu ñi jino mácarö ñi mácu, José bácuere. ⁶Nore cüvu ne oco doaicobe, Jacob bácu oco doaicobe. Järavu corica baji barejávü. Joa baju mari, darí, ueturejame Jesús. Que baru no oco doaicobe écarüi dobarejame, jabuóvacüyu.

⁷⁻⁸Üi jabuóvayede, ímaroi emeni nurejacadä ñüja, ñüje ärajiyede bojedaränivü. Ñüje nuriburu yóboi, oco doainore emeni earejacoða cüináco Samariacaco. Oco doacodaðo barejácoða.

—Oco, ji ücuquiye jójaco yure, arejamedä oco doacodaðore Jesús.

⁹Ubenita Samariacavüere judíova ne puque ube boje, cücumari dápiarí yöpe arejacoða Jesúre:

—Judíobu mü. Aru ya Samariacacöbu. ¿Aipe teni yure ücuiye jëñañuru mü? arejacoða.

¹⁰Öre arejamedä Jesús:

—Jümenijicüi müre jíjuoede majibevü mü. Yu müre ocore jëñañure, majibevü mü. Yure majico baru, “Ocore jójacu”, yure ajebu mü. Aru nópe jëñaðore apüre ñaiocore müre jíjebu ya, arejamedä öre Jesús.

¹¹Jesúre arejacoða:

—¿Aipe ayurü mü yure?

Ümujuricobebu yö. Aru mi oco doaquino cävabevü mü. ¿Äri apüre ñaicorore, mi ocore, ícñuyü mü? ¹²Dicobede jídejaquemavu majeñecu mácu, Jacob bácu. Javede ñ mácu aru ñi mára mácavu yore ocore ñi ücurejaquemavu.

Aru jídejaquemavũ ne oteiãimara mácvũre. ¿Jacob bácvũ pũeno parũcũrũ mũ? arejacoda úre.

¹³ Óre arejamedã Jesús:

—Ácvũ pũescu ũcuũre oco dicobequede, bediõva cojedeca cũiĩnõquiyebu úre.

¹⁴ Ûbenita ácvũ pũescu iye ocore, ji jíquicorore, ũcuũn mácvũre cũiĩnãra, ye cũiĩnõmequiyebu úre cojedeca. Ji jíquicoro oco pĩarõinope teni, jãravũ cũiĩmējãravũ baquinõre cũvacũyũme ji jíquicorore ũcuũn mácvũ, arejamedã Jesús.

¹⁵ Ico nomiõ arejacoda:

—Jede, mi aicorore, iye ocore, jíjacu yũre caride. Ji ũcucojiye jíjacu yũre, bediõva cojedeca cũiĩnõmequiyepẽ ayũ yũre aru ji oco doacodabecojiyepẽ ayũ yore jãravũa coapa, arejacoda õ.

¹⁶ Õi que arĩburuta, õre yãvãrejamedã Jesús:

—Mimãrepacũre cutuconũjaco mũ. Úre davajaco yũre, arejamedã õre.

¹⁷ —Jimãrepacu cubebĩ, arejacoda õ.

—Jãve adobu mũ. Mimãrepacu baju cubebĩ. ¹⁸ Cũiĩnãpũrũpẽ paivũ ũmũva cũrĩduavũ mũ. Aru caricacu mi yõvaimũ, mimãrepacu baju ãmemi ũ. Jãve baju adobu mũ, arejamedã õre Jesús.

¹⁹ —Yũre Jũmenijicũi yãvaiyede coyũcaipõescu batedébu mũ. ²⁰ Yore, yõcacũ cũracũre Jũmenijicũre mearore jídejaquemavũ ñũjeñescuva mácvũ. Ûbenita “Jerusalévacari Jũmenijicũre mearore jíye javũ”, adavũ mũja judiõva, arejacoda õ.

²¹ Jesús arejamedã:

—Ji coyũiyede me jápiajaco. Jãvetamu ji coyũiyẽ. Apejãravũa daquijãravũa baquiyé põeva Jũmenijicũre mearore jínanũmenajarama Jerusaléi aru dicũ cũracũi máre. ²² Mũja Samariacavũ mũje mearore jímvũre majibevũ mũja. Ûbenita ñũja judiõva majivũ. Jũmenijicũ ũi daroimũ mácvũ põevare meadaipõescu ñũjecũbe. Que baru majininea Jũmenijicũre mearore jívũbu ñũja judiõva. ²³ Ji aijãravũa daquijãravũa baquiyé jave eare nũivũ. Dĩnũmũ maquinõre põevare mearore

jíde ðacũyũme ñai Espĩritu Santo Jũmenijicũre yõpẽ jãve coyũiyepẽ.

Põeva nápe paivũ quévũra úre mearore jíyũrivũre ũbi Jũmenijicũ.

²⁴ Jũmenijicũrecabe cũre ðayũ caivũre. Põeva mearore jíni majidivũbu úre, yõpẽ jãve coyũiyepẽ ñai Espĩritu Santo ũi nõpẽ majide ðaiyede, ũi náre cũre ðaiyeque mamaũmeque, arejamedã Jesús.

²⁵ Úre arejacoda:

—Majivũ yũ Mesĩare, Jũmenijicũi epeimũre, põeva ne aimũre Cristo, ðacũyũre. Aru ũi daquiyede, caiyede majare coyũri jebescũyũme, arejacoda.

²⁶ —Yãbu Cristo, mũre boroteyũ, arejamedã õre Jesús.

²⁷ Ico nomiõre ũi que coyũiyẽ bajure copaidãrejacarã ñũja, imaroi cuiivũ bácvũ. Pare ðãpiaivũ ñũje jáiye boje úre boroteyũre nomiõque, “¿Aipe teni õque boroteyũrũ mũ?” ájũrorivũ barejacarã ñũja. Ûbenita úre jẽniari jámenejacarã. ²⁸ Õcapũravũ õi oco doaibũre noi nõri, copainũrejacoda õi cũriimaroi. Noi nũri, earĩ, nõcavũre coyũrejacoda:

²⁹ —Jãradajarã mũja. ¿Yũre ji teiye báque caiyede coyũyũ, Cristo bárica ũ? arejacoda náre.

³⁰ Õi que arĩburu yõboi, õque járadãrejaquemavũ diĩmarocavũ.

³¹ Imarocavũ ne edabede cãreja, ñũje bojedãiye báque ãiyede Jesũre ãicõjenidurejacarã ñũja.

—Mũ, bueipõescu, ãiyede ãjacu mũ, arĩdurejacarã Jesũre.

³² —Mũje majibede ãiye cũvavũ yũ, arejame ñũjare Jesús.

³³ Aru ñũje bajumica boroteivũ, jẽniari járejacarã:

—¿Úre ãiye davarãma apevũ? arejacarã.

³⁴ Aru Jesús arejamedã:

—Maja ãiyede ãri bũojãrĩburu ũmedaivũ maja. Quédeca yũ ðayũ yõpẽ yũre daroyũ bácvũ ũi nrõpẽ aru bũojayũ iye ðaiyede ũi ðaicõjeiye báquede yũre, ũmedaivũ yũ. ³⁵ “Yõvaicũvaivũ aviãva bũcũquiyebu maje ãiye”, majidivũ

ne coyũino mácarõpe aiyavũ mũa. Ëbenita yu coyuyubu mũjare. Āiye jẽinumũ jave eaiyu. Ānina majare edaivũre jãjara mũa. Āiyede jẽiyepebu na. Vea coboiyede jãri, ĩye jaũvu no. Quédécabu ānina, majare edaivũ. Vea coboiyepedeca javeta yũre ju aivũ barãjãrama na. ³⁶Põevare yũre ju are ðayũ bãcu āiyede jẽũnũ mácupedeca torojubi. Ēi memeiye boje, yũre ĩi ju are ðaimarare torojubi. Põevare jãravũ cũiméjãravũ baquĩnõre cuvare ðaibi. Que baru torojubi ĩ. Jũmenijicũi yãvaiyede coyurĩ búyu bãcure, oteipõescupe páyu, caðateibi põevare yũre ju are ðaipõescu. Aru põeva ne ju aiyede torojũma ina pũcarã. ³⁷Majidivũ ne coyũino mácarõpe, “Cũinãcu oteibi aru apecuta āiyede ĩmi”, jãvetamu no caride. ³⁸Āiyede jẽivũpe paivure mũjare jaroyutamu yũ, põeva yũre ne ju arãjiyepẽ ayũ. Ëbenita mũa ameteavũ mamarũmũ Jũmenijicũi yãvaiyede coyurĩ buivũ náre. Mũa jipocai Jũmenijicũi yãvaiyede coyurĩ búquemavũ apevũ. Apevũ ne coyũimara mácavũre yũre ju are ðajarã mũa caride. Jũmenijicũi yãvaiyede jãpiarĩduivũ bãcavũ yũre ju ajarãri na, arejame Jesús ñũjare majicayũ.

Ēi que aiyedata edarejaima ĩmarocavũ, Jesúque borotedo bácoi cutuimara mácavũ. ³⁹Õi aiyẽ boje Jesúrã, “Ji teiye báque caiyede coyũibi”, obedivũ Samariacavũ ju arejaquemavũ ĩre. ⁴⁰Que baru ne edaiyede ĩi yebai, “Ñũjaque cuyacu cãreja”, arejaima Jesúre ina Samariacavũ. Dinũmũ pũcajãravũ náque cũrejame Jesús, náre bueyũ ne ĩmaroi. ⁴¹Jesúque borotedo báco õi coyũiyẽ boje náre, ĩre ju arejaquemavũ apevũ. Ëbenita ĩque boroteivũ obedivũ baju barejãima ĩre ju aivũ.

⁴²Que baru Jesúque borotedo bácore õi cuturĩ davaimara mácavũ arejaima:

—Caride ĩre ju aivũ ānevũ ñũja mi coyũiyẽ báque boje. Quénora ĩre ju aivũbu ñũje baju jãpiaiyẽ báque boje ĩi coyũiyede. Me majivũ ñũja Jesúre caivũ põevare meaðaipõescure, arejaima na.

Jesús ĩi meaðaino jabocui mácure
(Mt 13.57; Mr 6.4; Lc 4.24; Jn 2.1-11, 23)

⁴³Pũcajãravũ náque cũriburu yóboi, Galilea āmicurõi nũrejarã ñũja cojedeca, Jesúque nuivũ. ⁴⁴Javede ĩvacari arejame ñũjare: “Cũbebi Jũmenijicũi yãvaiyede coyũcaipõescu ĩi joborõcavũ ne pueðaimũ”, arejame ñũjare Jesús. ⁴⁵Jipocamia, Pascua torojũve teinũmũre, apevũ Galileacavũ nũrejaquemavũ Jerusalẽn āmicurĩmaroi. Nore Jesúre põeva ne ðarĩ majibede ðayũre jãivũ bãcavũ barejãima. Que baru Jesús ĩi eaiyede ne joborõi cojedeca, ĩre torojũrivũ copũ etarejaima nócavũ.

⁴⁶Oco báquede Jesús ĩi ũcuiye ðaino mácarõi Canã āmicurĩmaro, Galileacarõi, copainũrejarã ñũja Jesújã cojedeca. Nore, Canãi, cũrejame cũinãcu jabovacacu. Aru Capernaum āmicurĩmaroi cũrejameða ĩi mácu, pare ijeteyu. ⁴⁷Que baru ñai jabocu jãpiayũ bãcu Jesúi copaiyede Galileaita, Judeare jocarĩ, jãcũdarejame ĩi yebai. Jesús yebai edarĩ, yópe arĩ jẽniarejame Jesúre:

—Jĩmacu pare baju ijeteyuðe ĩ. Maumejeneca yaiquĩjibi. ĩre jãcũnuri, ĩre meaðacajacu yũre, arejame Jesúre ñai jabocu.

⁴⁸—Yũre põeva ne ðarĩ majibede ðayũre jãnevũ baru, yũre ye ju abenajaramu mũa, arejame ĩre Jesús.

⁴⁹Ëbenita Jesúre nuicõjenidurejame ñai jabocu.

—Maumena dajacu. Yũque jãcũdajacu mũ, jĩmacui yaiquĩyẽ jipocai. Yaiðécũbe cãreja jĩmacu, arĩdurejame Jesúre.

⁵⁰Aru Jesús arejame ĩre:

—Meaquiyebu. Mi cũrõi copainũjacu mũ caride. Mĩmacu yaiðécũbe, arejame. Jesús ĩi coyũiyede ju arĩ, cũinã copainũrejameða ñai jabocu. ⁵¹Ēi cũrõi eare nuĩnũre copũrejaimaða ĩre memecaivũ.

—Mĩmacu ũmedabi ũ, arejaimaða ĩre.

⁵²—¿Aipiye bajure ũmedari ũ? jẽniari jãrejameða ĩre memecaivũre.

—Ënoa marede, járavũ corica yóji boi moino buruvũ úre, arejaimada.

⁵³Ne que aiyede, ñai jabocu coreóvarejamedá. Jesús “Mímacu meacube caride”, ñi aiora bácarõre ñai jabocui mácu úmedarejamedá. Dinũmre ñai jabocu aru caivu ñi cūramicavũ máre Jesúre ju arejaimada.

⁵⁴Judea ámicurõi cucu bácu, Galilea ámicurõi edarĩ, cucu, põeva ne ðarĩ majibenore ðarejame Jesús. Jabocui mácure úmedavainoque, puque põeva ne ðarĩ majibe bajure ðarĩ jáðovarejame Jesús.

**Jesús ñi meadaino nacajaiye
majibecure
(Jn 10.30-38)**

5 ¹No yóboi Jerusalén ámicurĩmaroi ñija judíova ñuje torojave teino cūináro curejavũ cojedeca. Que baru ñija Jesújá máre no ímaroi jácunñejacarã. ²Diĩmaro biaido jedevacobe bajita, ovejava ne ecoicobe jedevacobena curejavũ cūinábu cuyai bu. Judíova ñuje yávaiyeque dibu ámicurejavũ Betesda. Dibũ écarui põeva ne earĩ curájinore cūinápurupe painoa jabuóvainoa curejavũ. ³⁻⁴Die jabuóvaiyena obedivu ijimara paraivu barejáima. Jári eabevũ, cuiye majibevũ, nacajaiye majibevũ máre, ijimara coapa noi curejaima. Apenũmua pácarejavũ dibu. Dibũ oco pácaiyede coredejaima ina ijimara. Apenũmua nore cūinácu ángele cavarõ mearo Jūmenijicui curõre jocarĩ émeni ðarĩ, dibũ ocore pácovarejaquemavu. Ëi ocore pácovaiye bajure dibure cuyarãemejororivũ barejáima ina ijimara. Mamarũmucacu pácovaiye bajure dibure cuyacuẽmeñũ, cūiná úmedarejame, áde ijiéde cuvacu bácvacari. ⁵Ijimaracacu cūinácu treinta y ocho paiñua baju corenidurejamedá, nore parayũ. ⁶Nomicata Jesús earĩ, ñai parayũre jári, coreóvarejamedá joe baju nore cucure. Que baru úre borotecunñejame.

—¿Úmedaiyucurũ mu? arejame Jesús.

⁷Ñai ijimũ arejame Jesúre:

—Járiajacu. Cainũmua pácovaiyede, ji cuyacuẽmejũroede, ji jipocai apescarũravũ nore émeni, turĩ cóvaibi. Yũre ocore énevacayũ cubebi, arejame Jesúre.

⁸—Nacajajacu mũ, aru mi parainore cututurĩ, ñni, vaivárĩ ñajacu mũ, arejame úre Jesús.

⁹Quénora cūiná úmedarejame ñai ijimũ mácu. Ëi parainore cututurĩ, ñni, vaivárĩ nũrejame ñi. Jesús ñi nópe ðaijãravũ ñija judíova ñuje jabuóvãijãravũ barejãvũ. ¹⁰Que baru úre, ijimũ mácure, coyũrãarejaimada judíovai jabovacavũ:

—¿Aipe ðayurũ mũ, mi parainore nópe nũvañũ? Cari járavũ maje jabuóvãijãravubu. Parainore nũvaicõjemenotamu, arejaimada úre ina jabova.

¹¹—Ëbenita yure meadaipõecu yópe abi: “Mi parainore cututurĩ, ñni, vaivárĩ ñajacu mũ”, abi yũre. Que barureca yũ nũvañũmu, arejamedá ñai ijimũ mácu.

¹²—¿Ñame matedĩ mũre que ayũ? arĩ jēniari járejaimada na.

¹³Ëbenita coyuiye majibedejamedá náre. Ëre meadarĩ buojarĩnata, põeva ne jēneboi bíjacunñejamedá Jesús, obedivu põeva ne cue boje nore. Que baru Jesúre coreóvabedejamedá ñai ijimũ mácu. ¹⁴No yóboi, Jūmenijicui cūramita ijimũ mácure corurĩ, yópe arĩ, coyũrejame Jesús:

—Meabaju cucutamu mũ. Caride mi ámeina teiye báquede dajocajacu. Cojedeca mũ ámeina ðayũ baru, pũeno ámeno ñájacuyũmu mũ, arejame úre Jesús.

¹⁵Jesús ñi que arĩburu yóboi, úre coreóvarejamedá ñai ijimũ mácu. Cūiná, jabovare coyucunñejamedá:

—Yũre meadayũ bácu Jesúbe, arĩ coyũrejamedá náre.

¹⁶Que teni Jesúre pare cãrijovari búrejaima ñuje jabova, úre ñájine ðájũrorivũ ñi meadaiye báque boje ijimũ mácure ñuje jabuóvãijãravũre.

¹⁷Ne ñájine ðájũroede úre, Jesús náre yópe arĩ, coyũrejame:

—Jipacu jabuónabebi. Quénora cainnuma cadatevaibi pōevare. Que baru yu máre cadateyubu náre, arejame Jesús.

¹⁸ Jesús ñi que aye boje, pueno úre boarí jaruvaiyurejaima ñuja judíova ñuje jabova. Ñi ðabe boje ne ðaicōjeiyere jabuónvajāravure, úre boarí jaruvaiyurejaima. Ñbenita pare boarí jaruvaiyurejaima úre, “Jipacube Jūmenijicu”, ñi aye boje. Ne dápiaru, ñi que aino, “Jūmenijicupe majicubu yu”, ayu barejáme Jesús.

**Jesúre Jūmenijicu ñi
pūgucñvaicōjeino**

(Mt 3.17; Mr 1.11; Lc 3.22;
Jn 1.19-27, 3.27-30)

¹⁹ Jesús, yópe arí, coyūrejame náre:

—Jāve coyūyubu mujare: Yu, Jūmenijicui mácu, ji baju jipacui coyūbenore jauwabeda ðayu buojabevu. Quénora jipacu Jūmenijicure jáñu, ñi ðaiyepedeca ðayubu yu. Caiye iye jipacui ðaiyede yu, mamacu, máre ðaivu diede. ²⁰ Pare ubi yure jipacu. Ñi ðaiye caiyede majicaibi yure. Pueno paruède ji ðaquiyede jádovacuyume yure jipacu. Mujavacari urarō cūcumarajaramu yure, jádovaicōjesuyure jipacu. ²¹ Yópe yaivu bācavure jipacui nacovaiyere yainore jaruvarí, nopedeca yu, mamacu, cure ðayubu ina ji umarare. ²² Jipacu ñmemi coyucuyu pōevare áde ne bojede ne ðaiye boje ijāravui. Quénora yure, mamacure, coyucōjeimi diede náre. ²³ Ñi que cōjeimi, caivu pōeva ne pueðarājiyere ayu yure ne pueðaiyepedeca jipacure. Ácu pōecu pueðabecu yure, mamacure, pueðabebi jipacure máre, yure daroyu bācure ijāravui, arejame Jesús.

²⁴ Náre coyūre nūrejame Jesús:

—Jāve coyūyubu mujare: Ácu pōecu ji coyūiyede jápiayu baru aru yure daroyu bācure ju ayu baru, jāravu cūiméjāravu baquinóre cuvabi ñi. Coatejurocu bācūvacari Jūmenijicure jaruvarí, ñájiñu macuyú ñmemi. Javeta jāravu cūiméjāravu baquinóre cuvabi ñi.

²⁵ Jāve coyūyubu mujare: Cūinājāravu ðaquijāravu baquinó jave eare nuinotamu ina coateivu Jūmenijicure jaruvarí ne jápiarājiyede ji coyūiyede. Ina coateivu Jūmenijicure jaruvarí yaivu bācavure paivutamu ne ũmei. Ñbenita ne jápiaiyede yure, Jūmenijicui mácure, ju aivu baru ji coyūiyede, curājarama na. ²⁶ Yópe jipacui apure ðaiyere pōevare, nopedeca yure, mamacure, apure ðaicōjeimi pōevare. ²⁷ Yurecabu Jūmenijicui daroimu mácu ũmure. Que baru Jūmenijicu pūgucñvaicōjeimi yure, ji coyūquiyere ayu caivu pōevare áde ne bojede ne ðaiye boje ijāravui. ²⁸ Cūcumamejara mija. Apejāravu baquinó eare nuinoi, caivu ina yaivu bācavu jápiarājarama ji coyūiyede. ²⁹ Aru nacajarajarama yainore jaruvarí. Ina meara mácavu nacajari, jāravu cūiméjāravu baquinóre cuvārājarama na cavarō mearo Jūmenijicui curōi. Ñbenita ina ñmeina teivu bācavu nacajari, ñájinajarama cainnuma toabo cūiméboi, arejame Jesús.

³⁰ Náre coyūre nūrejame Jesús:

—Ji baju jipacui coyūbenore jauwabeda ðayu buojabevu. Quénora jipacu Jūmenijicure jápiayu, ñi coyūiyepeda coyūyubu yu pōevare áde ne bojede ne ðaiye boje ijāravui. Que baru ji coyūiyede nurié coyūyubu yu. Ji nópe coyūye nuriétamu, ji ðaiyube boje yópe ji baju urōpe. Quénora jipacu, ñai daroyu bācu yure ijāravui, ñi urōpe ðayubu yu. ³¹ Ji baju “Meacubu yu”, abevu. Ji que aru, “Ñbeni que ayube ñi”, ajebu mija. ³² Ñbenita yure apēcucapūravu “Meacu bajutame Jesús”, aibi. Jāvetamu ñi que aino.

³³ Mujavacari mije daroimaraque jēniari jáicōjeniduemavu Juan Bautista yebai, yure majiyuridūivu. Aru Juan Bautista náre jāve coyūquemavu. ³⁴ Meavu no ñi coyūino. Ñbenita yure coyūcaipōecu jaubevū, ji jádovaquiyere ayu ñamene yure. Juan Bautista ñi coyūino mácarōre coyūyubatevú yu, mije majinajiyere ayu ñamene yure, ji meaðaquiye ayu mujare. ³⁵ Yópe

pëoibũ járe ðaiyepe pëovare, nopedeca yáviyede jávene majide ðáme Juan Bautista. Nurinimare pëoibũ pëoinope jáðovaridume. Ëi que teiyede torojuteavũ mũa mamarmũre cãreja. ³⁶Ëbenita ji baju daiyeque jáðovaivũ ñamene yũre. Yátamu jáðovañũ Juan Bautista ñi jáðovaino mácarõ pũeno.

‘Jipacui ðaicõjeiyepeda yũre, diedecabu ji ðaiye. Iye ðaiye jáðovaiyetamu yũre jáve jipacui daroimũ mácure. ³⁷Aru jipacũvacari, ñai daroyũ báciu yũre, coyũibi ji borore jáve. Ëbenita jipacure jámevũ mũa. Aru jápiabevũ mũa. ³⁸Yũre, Jũmenijicui daroimũ mácure, ju abevũ mũa. “Jũmenijicure coyũcaipõecubu mũ”, yũre aiyũbevũ mũa. Que baru ñi yáviyede cũvabevũ mũa mũje ùmei. ³⁹Jũmenijicui yáviyede ñi toivaicõjeiye báquede pare bueniduyavũ mũa. “¿Jũmenijicui yáviyede ñi toivaicõjeiye báquede bueivũ, aipe ðarĩ járavũ cũiméjãravũ baquinóre earãjidi maja?” arĩduyavũ mũa. Aru diemiareca mũje bueiyeque ji borore jáve toivaiyebu. ⁴⁰Ëbenita yũre jëniayũbevũ ji cũvare ðaquiyepa aivũ mũjare járavũ cũiméjãravũ baquinóre, arejame náre Jesús.

⁴¹Náre coyũre nũrejame Jesús: —Põeva ne mearore jýyede yũre vobevũ yũ. ⁴²Mũjare me majivũ yũ. Coreóvaivũ mũjare Jũmenijicure ùbevũre mũje ùmei. ⁴³Yore coyũicõjeni darorejame yũre jipacu. Ëbenita yũre ùbeni, copũ etabevũ mũa. Ëbenita apesu ñi coyũcũdaru ñi baju, jaũrabeda ùre copũ etadarãmu mũa. ùre jápiadarãmu. Ëbenita yũre ye jápiayũbevũ mũa. ⁴⁴Mũje baju copũ mearore jýyede vore cuivũbu mũa. Ëbenita ye vobevũ mũa ñai Jũmenijicu cũinácura ñi jíquiyepe aivũ mearore mũjare. Mũje nópe ðaiye boje, ji coyũiyede jáve ju arĩ bũojabevũ mũa. ⁴⁵Ëbenita dápiabejarã mũa ùbenina. Yúvacari ñmevũ boro coyũrĩ adacũyũ mũjare jipacui jáinore. Moisés

báciu, ñai mũa coreimũ cadatecũyũre, ùrecabe boro coyũrĩ adayũ mũjare, mũa jápiabeni ju abe boje iye borore, ñi toivaino mácarõre. ⁴⁶Moisés báciu ji borore toivarejaquemavũ. Que baru mũa jáve ju aivũ baru ñi mácure, yũre máre ju ajebu mũa. ⁴⁷Ëbenita mũa ju abe boje ñi toivarĩ coyũiyede báquede, ji coyũiyede máre ju abevũ mũa, arejame náre Jesús.

**Jesús ñi ñre ðaino cũinápũrũpe
paimil baju ùmũvare**
(Mt 14.13-21; Mr 6.30-44; Lc 9.10-17)

6 ¹No yóboi jiadocũi jaturĩ, macajitabu urabu Galilea ñmicũrijitabure jatarĩ nũrejacarã ñũa Jesúsã pu apedaveita. Dibvacari Tiberias máre ñmicũvũ. ²Ñũa jataivũque darejaima põeva obedivũ. Ne ijimarare meadayũre jáiye báque boje, põeva ne ðarĩ majibede jáðovaiyede jáivũ bácavũ Jesúsque darejaima. ³Macajitabu urabure jataivũ bácavũ, cũracũ pũeno mũri dobacũnũrejame Jesús, ñũa ñi bueimaraque. ⁴Pascua ñmicũrijãravũ baquinó, ñũa judío va ñũje torojũve teinũmu maquinó eare nũino marejãvũ. ⁵Dicũ pũeno dobacu, põeva obedivũre ùra mũre daivũre járejame Jesús.

—Que põeva obedivũ dare daivũ jároma. ¿Ne ñrajiyede ñri bojeðarãjídica maja? jëniari járejame Felipe de Jesús.

⁶Que arejame Felipe. Aipe ñrojãe ñi ju ainore jápiaiyucũ barejãme, ùre que ayũ. Felipe ñi jëniari jáquiye jipocamiata, jáve majidejaquemavũ Jesús aipe ñi ðaquiyede. ⁷Felipe arejame:

—Tãutũraque doscientos paijãravũ memeyẽ báque bojeque ne ñrajiye quĩjie baju pãure bojeðarĩ bũojabevũ maja, arejame Felipe Jesúsre.

⁸Apecu ñũjacacu, Jesúsĩ bueimaracacu, Simón Pedroĩ yócu Andrés, arejame Jesúsre:

⁹—Põevaque dayũ báciu juedocu pãũboa cũinápũrũpe paiboa cebada ñmicũe oteiyequẽ ne ðaiboa báquede aru

moajina pucajina ne joaimara macavure cuvabi ñ. Ubenita pøeva obedivure eabequiyebu ñru, arejame Jesúre Andrés.

¹⁰—Pøevare dobaicøjeja mña, arejame Jesús ñña ñi bueimarare.

Cøriá meacøria curejavñ nore. Que baru cøriá pñenora dobarejaima na. Nácavu ñmuvacari cüinápurupe paimil baju barejáima. Aru nomiva, jñedova máre, obedivu curejaima. ¹¹Pøeva ne dobaríburu yóboi, Jesús páuboare jñeni, torojuede jídejame Jñmenijicure. Torojuede jñni buojarí, páuboare cotvavari jebeni, ina dobarivure jíçøenejame Jesús ññjare, ñi bueimarare. Aru moajinare máre quédeca ðarejacañ ñña. Ne ñrøpe ñrejaima ina pøeva. ¹²Ne ñriburu yóboi, Jesús arejame ññjare, ñi bueimarare:

—Pøeva ne ñri oabede íjara mña, maje bíjare ðabenajiyepu aivñ ñiyede, arejame Jesús.

¹³Que baru ñni, meadarí iye cebadaque ne ðaíbo báque páuboajeveare pøeva ne ñri oabe báquede pñebña doce paibure buivárejacañ. ¹⁴Ina pøeva jáivñ bácvñ no pøeva ne ðarí majibenore, Jesús ñi ðaiyede, yópe arí bárejaima ne bajumia:

—Jáve ñaime Jñmenijicui yávaiyede coyñcaipøecu bacnyá, edacnyu me íjaravure ne ávaimñ, aivñ barejáima na.

¹⁵Ére que aivure majídejaquemavñ Jesús. Aru ne jñeni jaboacoiyede máre majídejaquemavñ ñ. Que baru náre jocarí cüinácva mñri nñrejameda cñracü pñeni, dupiyñ náre.

Jesús ñi cuino oco pñenora
(Mt 14.22-27; Mr 6.45-52)

¹⁶Ñemié tuyede macajitabñ urabui ñmenejacañ ñña, Jesúí bueimara. ¹⁷Nore jíadocüi jatúrí nñri, macajitabñre jataríðurejacañ, Capernaum ñmicurímaroi nñjñrorivñ. Que teicavure nainéjavñ. Aru Jesús ðabedejame cáreja ññje yebai. ¹⁸Ümevñ ññjare edarí, japurejavñ. Pare pácarejavñ macajitabñ urabñ ññjare, jatajñrorivñ. ¹⁹Ñña pare doarí, ññjini, cüinápurupe

paikilometros baju nñri, macajitabñ urabñ pñenora vaivári ðarejame Jesús, ññje yebai dayu. Ére jári, urarø jíðurejacañ ñña. ²⁰Que teivure jári, ññjare yávarejame Jesús:

—Yñ Jesútamu. Jíðubejará mña, arejame ññjare.

²¹Ûi que aríburu, torojurí “Jatujacu”, arejacañ. Ûi jatuiyedata écarui ññje earájinore cüiná datuøræarejacañ ñña.

Pøeva ne voino Jesúre

²²Cømiáíjaravñ Jesúre voríðurejaimada na macajitabñ urabñ écarui mauteivñ bácvñ, ñi ñoimara macavñ. Majídejaimada jíadocü cüinácva nore curicü mácarøre no jípacajárvure. Aru majídejaimada ñña ñi bueimaraque numecu bácvure máre. Que baru apecü ñi jatajñroricü cubedejavñya. ²³Ne voyede apevñ jataivñ bácvñ Tiberias ñmicurímarocavñ paránñrejaimada. Jesús Jñmenijicure torojuede jñniburú yóboi pøevare páubo ne ñrajíboá jñno mácarø joabejñoi tuijarejaimada. ²⁴Jesúre aru ññjare ñi bueimarare máre eabeni, edaicña máquede jaturejaimada ina écaboi curivñ bácvñ. Macajitabñ urabñre jatarí nñri, Capernaum ñmicurímaroi earejaima na, Jesúre voinvñ.

Jesús ñi coyñino pøevare
apure ðari ñiyepu

²⁵Ñibñre jataivñ bácvñ Jesúre earí, jñniari járejaima ére:

—Mñ, bueipøecu, çaiyiye bajure íðveí jatacurñ mu? arejaima.

²⁶Jesúcapñravñ, yópe arí, coyñrejame náre:

—Jáve coyñyubu mñjare: Yñre voráðabevñ mña, mñje járiarí eaiye boje jí jáðovaiyede pøeva ne ðarí majibede jí ðaiyeque. Quénora yñre voráðadavñ mña, mñje ñri yapiye báque boje. ²⁷Yóque ñiye pojeiyebu. Die matuiyeda memeni vobejará mña. Quénora iye ñiye cure ðaiyede jaravñ cüiméjaravñ baquinóre pare vojará mña.

Diedecabu yu, Jūmenijicui daroimu mácu ūmure, ji jíquiyē mujare, jipacu Jūmenijicu ūi jáđovaiye boje ūi mearo jáiyeđe yure, arejame Jesús.

²⁸Ūre jēniari járejaima:

—¿Aipe đaiye jauri ñujare, ñuje đarājiyēpe aivu yópe Jūmenijicui űrōpe? arejaima.

²⁹Jesús arejame:

—Yo cūináro đaiye jaűvu mujare, đarājivu yópe Jūmenijicui űrōpe. Ju ajarā yure, ūi daroimu mácure, arejame.

³⁰Ūre arejaima:

—¿Yéde pōeva ne đarī majibede đacuyurū mu, ñuje járiburu yóboi ñuje majinajiyēpe ayu jávene mi coyuiyede? ¿Ádepe paiyeba mi đaiye? ³¹Majeñecuva mácavu ne cuede pōecubenoí maná āmicue āiyede ārejaquemavu na mácavu. Que đarejaquemavu yópe Jūmenijicui toivaicōjeiye báquepe ūi yávaiyede:

“Cavarō mearo Jūmenijicui cūrōre jocarī āiyede jōđavari darorī jíđejaquemavu náre”, arī toivaicōjenejaquemavu Jūmenijicu, arejaima Jesús.

³²Aru Jesús ju ayu arejame náre:

—Jáve coyuyubu mujare: Moisés bácu āmenejaquemavu ñai jōđavari daroyu bácu āiyede cavarō mearo Jūmenijicui cūrōquede. Quénora jipacurecabe ñai jōđavari daroyu bácu āiye bajure cavarō mearoquede. ³³Cavarō mearoque āiye Jūmenijicu ūi daroiye me bajutamu. Iyetamu pōevare cure đaiye jāravu cūiméjāravu baquinóre, arī coyurejame Jesús.

³⁴—Ñuje jabocu, iye āiyede jíjacu ñujare cainmua, arejaima űre.

³⁵Jesús arejame náre:

—Yurecabu iye āiye. Āiyepe pōevare jáve cure đayubu yu jāravu cūiméjāravu baquinóre. Yópe pōescu āri buojarī, űre āvne íjibere, nopedeca ácu pōescu yure yóvacudayu baru, űre ye jaubequiyebu cainmua ūi űmei. Aru yópe pōescu űcuri buojarī, űre cūiñómepe, nopedeca ácu pōescu yure ju ayu baru, űre jaubequiyebu cainmua ūi űmei.

³⁶Ūbenita yópe ji mujare ávarepe, yure jáivvacarī ju abevu muja.

³⁷Yure jipacu ūi ju are đaimara coapa yure yóvarī curājarama. Aru jáve náre coapa ju arī jacopucuyumu yu. ³⁸Cavarō mearo Jūmenijicui cūrōi cūcu bácu yore ěmecudarejacacu yu, đacuyu jipacu, yure daroyu bácu, ūi űrōpe. Ji űrōpeda đacuyu āmenejacacu yu. ³⁹Yópe űbi ñai yure daroyu bácu: Caivu ina yure ūi ju are đaimarare coreiye jaűvu yure, ne bíjabenajiyēpe ayu, aru ji nacovaquiyēpe ayu náre coapa yainore jarűvarī ānijāravu buojaquijāravu baquinóre. Que đainore űbi ñai daroyu bácu yure.

⁴⁰Jipacu űbi caivu pōeva yure jári, coreóvarī, ju aivure ne cűvarājiyēpe ayu jāravu cūiméjāravu baquinóre. Aru yávacarī náre nacovacuyumu yainore jarűvarī ānijāravu buojaquijāravu baquinó, arejame Jesús.

⁴¹“Cavarō mearoque āiye bajutamu yu”, ūi aiyede jápiarī, Jesúsre jorojīnejaimada nócavu judíova, ne bajumia jūjuvaivure űra.

⁴²—Ñai Jesús José bácuí mácutame.

Aru jipacore máre coreóvadavū maja. ¿Aipe teni, “Cavarō mearo Jūmenijicui cūrōre jocarī ěmeni darejacacu yu”, arī buojaidi ű? arejaimada na, ne bajumia boroteivu.

⁴³Quénomia Jesús arejame náre:

—Muje bajumia jorojīni āmeina yávabejarā yure. ⁴⁴Ñame dabenama ne baju yure yóvarāđavū jipacu, yure daroyu bácuí náre daicōjemenu. Jipacurecabe yure darocairpōescu, ji nacovaquiyēpe ayu ina pōevare yainore jarűvarī buojaquijāravu baquinóre. ⁴⁵Javede Jūmenijicu toivaicōjenejaquemavu ina ūi yávaiyede coyűcairpōeva mácavure yópe arī: “Pōeva caivure buescuyume Jūmenijicu”, arī toivaicōjenejaquemavu. Que baru caivu ina jipacuí bueiyeđe jápiarī adarī, ju aivu, yure yóvarāđavūbu na, arejame Jesús.

⁴⁶Náre coyure ñurejame ű:

—Ji nópe aiyēque, “Jūmenijicure jáđaima pōeva”, aiyucu āmevu yu. Yurecabu Jūmenijicu yebai cūcu bácu, ūi daroimu mácu, cūinácura űre jáñu

máscu. ⁴⁷Jáve coyũyũbu mũjare: Caivũ pœva ju aivũ yũre jãravũ cũiméjãravũ baquinóre cõvarãjarama. ⁴⁸Yútamu ãiyepe páyu. Jáve pœvare cure ñayũbu yũ jãravũ cũiméjãravũ baquinóre.

⁴⁹Mũjeñecuva máscavũ ne cuede pœscũbenoi ávarejaquemavũ manãre. Aru diede ãivũ bácvãvacarĩ bucũteni yaidéjaquemavũ. ⁵⁰Ûbenita ji coyũvare ãiyebu, cavarõ mearo Jũmenijicũi cõrõi êmeni daiye ãiye. Áscũ pœscũ ji coyũvare ãiye de áru, ãi ùme yaibéquiyebu. Coatebecũyũme Jũmenijicũre jarũvarĩ.

⁵¹Yútamu iye cavarõ mearore êmeni daiye báque ãiye. Áscũ pœscũ iye ãiye de ãñũ maru, cõcũyũme cainũmũa. Iye ãiye ji jíquiye ji bajubu. Ji bajure jícvũyũtu caivũ pœvare boje, ne cõrãjiyepe ayũ mamaũmeque, arejame Jesús.

⁵²Jesús ãi que aiyede, ina judío va ne bajumia boroteni búrejaima, úre jaraivũ, ãi nópe aye boje.

—¿Aipe ñarĩ majare ãi bajure ãicõjeni buoqauidica ñai? arejaima.

⁵³Yõpe arĩ, jẽvari coyũrejame náre Jesús:

—Jáve coyũyũbu mũjare: Yũbu Jũmenijicũi daroimũ máscũ ãmũpe. Ji jiarũre ãmevũ baru mũja, aru ji jivede máre ùcũmevũ baru, cubenajaramu mũja mamaũmeque. ⁵⁴Áscũ pœscũ ji jiarũre ãñũ máscũ aru ji jivede máre ùcũñũ máscũ jãravũ cũiméjãravũ baquinóre cõvascũyũme. Aru yũvacarĩ úre nacovascũyũtu yainore jarũvarĩ ãnijãravũ buojaquijãravũ baquinóre.

⁵⁵Áiye bajutamu ji jia. Aru ji jive máre ùcũiye bajutamu. ⁵⁶Áscũ pœscũ ji jiarũre ãñũ máscũ aru ji jivede ùcũñũ máscũ cubi yũque, aru úque cõvũ yũ máre. Cũinãvũpe cõvũ ñũja.

⁵⁷Jipascũ, ñai pœvare arũre ñayũ mamaũmeque, darorejame yũre aru arũre ñarejame. Nopedeca áscũ pœscũ yũre ãñũ máscũre, úre arũre ñascũyũtu yũ. ⁵⁸Iye ji coyũvare ãiyebu cavarõ mearo Jũmenijicũi cõrõi êmeni daiye báque ãiye. Mũjeñecuva máscavũ ne ãiye báquepe paiye ãmevũ die. Na máscavũ ãivũ bácvãvacarĩ bucũteni

yaidéjaquemavũ. Ûbenita áscũ pœscũ ãñũ ji cari coyũvare ãiye de cõcũyũme cainũmũa, arejame Jesús.

⁵⁹Capernaum ãmicũrĩmaroĩ cõcũ, judío vaĩ cõjijiñami pœvare bueyũ, nópe coyũrejame Jesús.

Jesús ãi bueino jãravũ cũiméjãravũ baquinóre

(Mt 16.16; Mr 8.29; Lc 9.20)

⁶⁰Jesús ãi nópe bueiyede maiyõjeda dápiarĩ, yõpe arejaima ãi bueimara obedivũ.

—Maiyõjarõ baju bueibi. Nore jápiarĩ coreóvabevũ ñũja, arejaima na Jesúre buejũrorivũ ne bajumia.

⁶¹Jesús, coreóvayũ jorojĩvũre ne bajumia jũjuvaivũre úra, jẽniari járejame náre:

—¿Cari mũjare ji bueiye boje ãmeina jáivũrũ yũre? ⁶²¿Yũre, Jũmenijicũi daroimũ máscũre ãmũpe, ji cõrõ mácarõi ji mũiyede jáivũ baru, aipe dápiaje bárica mũja? ⁶³Jũmenijicũi Espíriturecabe pœvare cure ñayũ jãravũ cũiméjãravũ baquinóre. Pœva ne baju arevũ pœvare cure ñayũ majibema. Iye cari ji coyũiyeque, yũrecabu mũjare cõvare ñayũ Jũmenijicũi Espíriture, ñai pœvare cure ñayũre mamaũmeque ne ju aiyede yũre. ⁶⁴Ûbenita arevũ mũjacavũ yũre ju abema cãreja, arejame náre Jesús.

Ûi bueni buijãravũ bácarõre jipocamiata, Jesús coreóvarejame ñame úre ju abenajivũre aru áscũ pœscũre úre jẽne ñascũyũre ãi mauvare máre.

⁶⁵Jesús arejame náre cojedeca:

—Caivũ ãmevũ mũja ju aivũ yũre. Que baru coyũyũbu mũjare: Áscũ pœscũ cubebi ãi baju yõvacũdayũ yũre, ju acũyũ jipascũi úre daicõjemenu. Jipascũrecabe pœvare ji yebai darorĩ ju are ñayũ, arejame.

⁶⁶Dinũmũmia Jesúque buejũrorivũ bácvũ úre ñajocarejaima. Quénora úque cubedejaima. ⁶⁷Que teiyede jári, ñũjare, ãi bueimarare, ñũja doce paivũ bajure, yõpe jẽniari járejame:

—¿Mujá máre yure dajocaiyurivurú? arejame ñujare Jesús.

⁶⁸Yópe arí darorejame Jesúre ñujacacu Simón Pedro:

—Mu, ñuje jabocu, mátamu ñujare jáve baju bueiyede coyuyu. Mi coyuiyeque ñujare cure ñáivu mu járavu cüiméjáravu baquinóre. ⁶⁹Javeta mure ju adavú ñuja. Mure coreóvaivubu Jümenijicui mácu meacu bajure, arejame Pedro Jesúre.

⁷⁰Jesús arejame ñujare:

—Mujare doce paivure beocacu yu. Ñbenita cüinácu mujacacu abujuvai jabocui cõjeimunte ü, arejame ñujare üi bueimarare.

⁷¹Jesús que ayu, Judas, Simón Iscariotei mácu, üi ñáquinore coyuyu barejáme. Judas Jesúi bueimü mácuvacari, Jesúre jëne ñácuycu barejáme üi mauvare.

Jesúí yóva úre ne ju abeno

7 ¹No yóboi Galilea ámicurõcarõa ímaroa coapa cucusüü marejáme Jesús. Ñbenita Judea ámicurõi ñuiyubedejame, nósavu judíoiva ñuje jabova jorojini ne boaiyue boje úre.

²Ñuja judíoiva ñuje torojüve teinümu, úcua ñáinümu, eare nuino marejávü.

³Que baru Jesúre ñuicõjeivü, üi yóva arejaimada:

—Yui mautebejacu mü. Quénora ñujacu Judeaita, ina nósavure mi bueimara máre ne járajiyepe aivu mi ñáiyede. ⁴Põescu ucu baru apevu ne coreóva iyede úre, üi ñáiyede ñábebi yavenina. Que baru na caivure mi paruéque mi ñáiyede jáðovacunujacu mü, ámiyó, arí coyurejaimada üi yóva.

⁵Dinümare üi yóva Jesúre, “Jümenijicui mácu bu mü”, abedejaimada. Que barureca Jesúre nópe arejaimada.

⁶Náre, yópe arí, coyurejaimada Jesús:

—Yure ji nuino eabevü cãreja. Ñbenita mujare, müje ñuiyurinümu ñuru, meavü. ⁷Mujare cõenímema ina Jümenijicure ju abevü. Ñbenita yure jáiyubema Jümenijicure ju abe pöeva. Náre ne ámeina teiyena coyüivu yu. Que baru

yure jáiyubema. ⁸Mujavacari torojüve teiyede járanujara. Yu ñumevu cãreja, ji ñuquino eabe boje, arejaimada Jesús.

⁹Nópe arí coyuyü báciu üi yóvare, Jesúcapüvavu mautedejame apejáravna ne Galilea ámicurõmia.

Jesús üi coyüino judíoiva úcua ñáino ne torojüve teinoi (Jn 5.9)

¹⁰Üi yóva ne torojüve teiyede járanuriburu yóbore, Jesús máre nore jácunarejame. Aru árojamejiena earejame ü. ¹¹Torojüve teinümare Jesúre pare vorídurejaimada ñuja judíoiva ñuje jabova.

—¿Ári curi ñái? arejaimada na.

¹²Ñbenita ina pöevacapüvavu ne bajumia boroteivü barejáimada üi borore:

—Meacube ü. Pöevare cadateibi, arejaimada.

Ñbenita apevu pöeva:

—Ámecube ü. Jujovailbi majare, arejaimada na.

¹³Ñuje jabovare jidurina, bídeca ñuri, borotedejaimada na.

¹⁴Torojüve teino corica tuvaiye bajure, Jümenijicui cãrami ñurejame Jesús. Nore ecorí, pöevare bueni bárejame ü.

¹⁵Úre jápiaivü, ñuje jabova cücumari arejaima:

—¿Buebecu bácuvacari, aipe teni caiye iye jaubeda majidi ñái? arejaima.

¹⁶Jesús náre yópe arí, coyurejame:

—Ji bueiyede ji bajuma majibevü yu. Quénora yure daroyu báciube yure majide ñayu. Ü jiede bueyübu yu. ¹⁷Ácu pöescu Jümenijicui urõpe ñáiyucu baru, coreóvacuyüme ároque ji bueiyede. Ji buedu Jümenijicui majiéque o ji baju majiéque, coreóvacuyüme. ¹⁸Ácu pöescu üi baju majiéque yávayü voríduibi pöeva ne pueðarãjiyepe ayu úre. Ñbenita ácu pöescu voyu pöeva ne pueðarãjiyepe ayu úre daroyu báciure, úrecabe coyuyü jáve, ye borocubevü.

¹⁹Moisés báciu barejaquémavu mujare Jümenijicui ñaicõjeiyede coyuyü. Ñbenita ácu mujacacu üi toivarí epeiye

báquepe ju arí ðayũ cubebi. ¿Aipe teni yure boarí jarũvaiyũrĩvũrũ mũa? arejame Jesús ñũje jabovare.

²⁰—Abujucu cubi máque. ¿Ñamema boaiyũrĩvũ mũre? arejaima ina pœva obedivũ.

²¹Jesús arejame náre:

—Cũinájãravũ mũje jabũvõvajãravũ cũinãro ji ðaino mácarõre mũje ðarĩ majibenore cuicumavũ mũa. ²²Mũa buraicõjeivaivũbu mũjemara ãmũ juedovare ne cajede jabũvõvajãravũ, ocho pajãravũa baru ne pœteniburu yõbore, yõpe Moisés bãcu ãi ðaicõjeiye báquepe. Æbenita Moisés bãcu ãmenejaquemavũ buraicõjeni býũ. Quénora majeñecuva mácavũ, Moisés bãcuĩ ñecuva mácavũ barejaquémavũ ãmũvai cajede buraicõjeni buivũ. ²³Mũa máre buraicõjeivũ mũjemara ãmũ juedovai cajede mũje jabũvõvajãravũ, ðarãjivũ yõpe Moisés bãcu ãi ðaicõjeiyepe. ¿Dinũmũ aipe teni jorõjĩvũrũ yure ji meadaiye báque boje cũinãcu ijimũ mácuĩ bajure maje jabũvõvajãravũ? ²⁴Coyurĩ ðajocajará mũa apecu meacure o ãmecure ãi ãrojae bojeda. Quénora dápijarã apecu meacure o ãmecure ãi jáve ðaiye boje, arejame Jesús.

Jesús ãi coyũino ãi ðaino mácarõre

²⁵Jesús nópe ayũre jápiaivũ, Jerusalén ãmicurĩĩmarocavũ arejaima:

—¿Ñai ãmeni maje jabova pare ne võvaimũ boarí jarũvaiyũrĩdivũ?

²⁶Jãrijide apa. Maje coricai majare bueyũbe ã. Æbenita aipe abema maje jabova. “Cristo, Jũmenijicui epeimũ bajube ã”, ðarãma na.

²⁷Cristoi daiyede ñame majibenajarama árocacure. Æbenita ñai Jesús ãi curõ mácarõre majivũ maja, arejaima ãmarocavũ.

²⁸Ne que aiyede coreõvayũ Jesús, bueyũvacari Jũmenijicui cãrami, yõpe arĩ darorejame bujié:

—Yure aru ji ðaino mácarõre majivũ mũa. Æbenita ji bajuma ji majiéque ðabedejacacu yũ. Quénora darejacacu

yũ apecu ãi ðarõimũ mácu. Êtame borocubecu. Êrecabe mũje coreõvabemu máre. ²⁹Êtame daroyũ bãcu yure, éque cucu bãcure. Que baru yũrecabu ére me coreõvayũ, arejame Jesús.

³⁰Dinũmũre Jesũre jẽni jacojãrorivũ barĩdurejaima ñũje jabova. Æbenita ére ne jãnãjãravũ ãmenejaquemavũ cãreja. Que baru Jesũre ñame jẽmenejaima.

³¹Obedivũ ina pœvacavũ Jesũre ju aivũ, yõpe arĩ, coyũivũ barejáima:

—Cristo, Jũmenijicui ðarõimũ macuyú, ãi ðaquiyede jáve pœva ne ðarĩ majibede jáðovãũ buojabejebu Jesús pũeno. ¿Mácarĩ? arejaima ina pœva obedivũ.

Jesũre fariseova ne jẽni jacoicõjenidivũ

³²Ne que aiyede Jesũi borore jápiarĩ fariseovacavũ, ina fariseova aru sacerdotevare jaboteipõeva máre Jũmenijicui cãramine coreipœvacavũre jẽni jacoicõjenidurejaima Jesũre.

³³Dinũmũre Jesús yãvayũ, pœvare arejame:

—Majióvarõ bajura cucũyũmũ mũaque. Quijino bajura jaivũ yũre ji copaini ñũquino yũre daroyũ bãcu yebai.

³⁴Dinũmũ maquinõre pare vorãjaramu mũa yũre. Æbenita ji ñũquinore ñũiye majibevũ mũa. Que baru eabenajaramu yũre, arejame náre Jesús.

³⁵Que ayũre, ina judíoiva ñũje jabova ne bajumia yãvaivũ arejaima:

—¿Ári ñũquidica ñai, ñũje eabenajiyere ayũ ére? ¿Apeno joborõ, majevũ ne curãñũĩmaro mácarõĩ, cucũñũquidica ã, buescũyũ nócavũ judíoiva ãmevũre? ³⁶“Yũre pare vorĩdurãjaramu mũa. Æbenita ji ñũquinore ñũiye majibevũ mũa”, aibi. ¿Aipe aiyũrõ márica no ãi que aino? arejaima ne baju.

Jiãpe cure ðaicõre Jesús ãi jícaquinore ãi coyũino

(Jn 4.10-14)

³⁷No torojũve teino buõjãjãravũ pũeno meajãravũ barejãvũ. Dijãravũre

Jesús nacajari núcu, yópe arí darorejame bujé:

—Ácu pōecu pare cūvaiyucu baru jāravu cūiméjāravu baquinóre yópe pōecu cūinóimū ũi pare ũciuyepe ocore, ju ajacurí yure. Aru yópe ji jǵjuroepe ocore cūinóimure, nopedeca ũre cure đacuuyumu yu jāravu cūiméjāravu baquinóre. ³⁸Yópe arí, toivaicōjenejaquemavu Jūmenijicu ũi yávaiyede: “Ácu pōecu yure ju ayu bácure cure đacuuyumu yu mamaūmeque yópe cure đaicu piapóri daiyepé”, arejame Jesús.

³⁹Nópe ayu, Espírítu Santo ũi borore ayu barejáme Jesús. Caivu Jesúre ju aivu jacopuivū barājárama ñai Espírítu Santore. Dinumure Jūmenijicu Espírítu Santore darobedejaquemavu cāreja, Jesús ũi muri ñame boje cāreja, mearore cūvacuyū cavarō mearo Jūmenijicui curōi.

Jesúre judíoiva ne cūináturura yávabeno

⁴⁰Apevu ina obedivu pōeva ne jápiarǵburu yóboi Jesús ũi que aiyede, ne bajumia boroteivū arejaima:

—Jāve ñaime Jūmenijicui yávaiyede coyucaipōecu bacuyá, “edacuyū” ne ávaimū, arejaima apevu.

⁴¹Apevu nácavu arejaima:

—Ñai Jūmenijicui daroimū mácube Cristo baju, arejaima.

Ūbenita apevu nácavu arejaima:

—Cristo baju Galileacacu āmecuyume. ⁴²David bácui pāramecu bacuyáme Cristo baju. Belén āmicurǵmarocacu, David bácui curǵmaro mácarđcacu bacuyáme Cristo. Que arí, toivaicōjenejaquemavu Jūmenijicu ũi yávaiyede, arejaima apevu pōeva.

⁴³Que baru Jesúre cūináturura yávabedejaima pōeva. Cūináturū āmenejavū ne ũme. ⁴⁴Jesúre jēni jaciuyurejaima apevu nácavu. Ūbenita ñame ũre jēmenejaima.

Jesúre judíoiva jabova ne ju abeno (Jn 3.1-2)

⁴⁵Que teiyede Jūmenijicui cūramine coreipōevacavu Jesúre jēni jacoicōjeniduimara mácavu copainurejaimada fariseova aru sacerdotevare jaboteipōeva yebai.

—¿Aipe teni Jesúre jēmetenaru mǵja? arejaimada náre ina fariseova aru sacerdotevare jaboteipōeva.

⁴⁶—Ūi bueiyepé coyuyure ñūja ye jápiabevū. Que baru ũre jēni davabetevu ñūja, arejaimada ina coreipōeva.

⁴⁷Quēnomia ina fariseova arejaimada:

—Mǵja máre ũi jūjovaiyede ju arebu mǵja. ⁴⁸Ñūja fariseova aru ina jabova máre ye ju abevū Jesúre. Ye ñūjacacu cūinácū ũre ju abebi. ⁴⁹Ūbenita pōevacapūravū Jūmenijicui đaicōjeiyede ũi toivaicōjeiye báquede Moisés bácure majibema na. Ne majibe boje, Jūmenijicui ñájine đaimara marájárama na toabo cūiméboi, arejaimada ina fariseova.

⁵⁰Fariseovacacu Nicodemo, Jesúre boroteyū bácū jipocamia, curejamedā náque. Aru apevu nore curivure arejamedā ũ:

⁵¹—Jesús ũi boro bajure coyūbebi cāreja. Nópe páyure pōecure ñájine đaicōjemevū Jūmenijicui đaicōjeiye ũi toivaicōjeiye báque majare. Ūi baju coyuiyede jápaiye jaūvū majare, maje majinajiyepé aivu yéde ũi đaiyede, arǵdurejamedā Nicodemo.

⁵²Ūre arejaimada na:

—¿Mū máre Galileacacurū? Jūmenijicui yávaiye ũi toivaicōjeiye báquede me buejacu mū, majicuyū. Ácu Galileacacu Jūmenijicui yávaiyede coyucaipōecu cubevailbi ũ, arejaimada Nicodemore ina fariseova.

⁵³Que arí, ne cūramia coapa copainurejaimada na.

Cūinácū nomió cacu bácure apecuque jímarepacure jaruvari

8 ¹Pōevare coyurǵi bubarǵi cūracū Olivocū āmicurǵcūi muri nurejame

Jesús. ²Cómiáijárvavú javejina, Jūmenijicui cūramine copainurejame Jesús. Ũi yebai darejaima obedivú pōeva. Que baru dobarí, úre edaivure bueni búrejame Jesús. ³Ũi bueiye de, Jūmenijicui yávaiye báquede bueipōevacavú aru fariseovacavú máre cūináco nomió ne eaimo máco cūcore apescuque, jímarepacure jaruvarí, davarejaima Jesús yebai. Óre núicōjenejaima ina obedivú pōeva ne coricai.

⁴Aru arejaima Jesúre:

—Mú, bueipōecu, ico nomió jímarepacure jaruvarí apescuque cūcore eavu ñuja.

⁵Moisés bácu ópe pádore cūraboaque dūreni boarí jaruvaicōjenejaquemavú, yópe Jūmenijicui ðaicōjeiyepe. ¿Aru mácapūravú aipe ayurú mu óre? arejaima Jesúre.

⁶Que aivú úre jajovaridurejaima, boro coyurí adaiyuridurájivú úre, ũi vainí tújuroede ne ðaicōjeiye de. Ũbenita Jesús nacachini, joborói amuyoque toivarejame. ⁷Ũi que ðaiye de, Jesúre jēniari jāranurejaima na. Ne que teiyede nacajari, núri, arejame náre:

—Jede, mujacacú ámeina tebecú bácu bajacúrí mamarumú dūreni báyu óre cūraboaque, arejame Jesús.

⁸Que arí, bedióva cojedeca nacachini, joborói toivarejame. ⁹Nópe ũi aiyede jápiaivúva, cūinácu, cūinácu etarí nurejaima na, Jūmenijicui yávaiye báquede bueipōeva aru fariseova máre. Ne pūeno búscú mamarumú aru ũi cāchinocavú ũi yóbo etarí nurejaima. Pū mautedejagará ñuja, Jesújā, ico nomióque. ¹⁰Cojedeca nacajari, núri, arejame óre Jesús:

—¿Mure boro coyurí adaríduivú ári curi na? ¿Mí ámenore ðaiye boje, pōecu cubedi mure ñájine ðayú? arejame óre.

¹¹—Cūbebi, ji jabocu, arejaco ó.

—Yu máre mure ñájine ðabevú.

Nujaco mu caride. Aru ámeina ðabejaco cojedeca, arejame óre Jesús.

Jesús pēoinope pōevare coreóvare ðayú majepacui dápiaiye jávene

(Mt 5.14; Jn 5.31, 9.5)

¹²Bedióva cojedeca pōevare yávarejame Jesús:

—Yurecabu pēoinope páyu ijárvavúcvare ne ũmei, coreóvare ðacuyú Jūmenijicui dápiaiye jávene ji bueiyeque. Ácu pōecu yure yóvacudayú, úrecabe cūvacuyú iye pēoiye apure ðaiye de. Que baru mamaūmene cūvacuyume ũ. Úrecabe cūcuyú yópe miadároi cuyure, cainumua ñeminói cubecuyú. Ũbenita pōeva coreóvabevú Jūmenijicui dápiaiye jávene curivúbu yópe ñeminói cuiyure, ne majibe boje ũi dápiaiye jávene, arejame náre Jesús.

¹³Fariseovacavú arejaima úre:

—Murecabu mi borore coyuyú mi baju. Que baru ũbenina que ayúbu. Bojecubevú mi que coyuiye, arejaima úre.

¹⁴Yópe arí, coyurejame Jesús:

—Ji borore ji coyuiyevacari bojecuetamu. Yávacari coreóvaivú ji curó mácaróre aru ji nuquinore máre. Que baru ji coyuiye jávetamu. Ũbenita ji curó mácaróre aru ji nuquinore máre ye coreóvabevúbu muja. ¹⁵Mujacapūravú apévare ñájine dávaivúbu pōevare mje coyuiyeque. Ũbenita yúcapūravú ñamene ñájine ðabecubu. ¹⁶Ũbenita pōevare ji ñájine ðaru, ji nópe ðaiye jáve májebu. Quénora cūinácu ji baju nópe ðabejebu yú. Quénora jipacu, ñai daroyú bácu yure yui, nópe ðajebu yúque. ¹⁷Muje ðaicōjeiye de yópe arí, toivaicōjenejaquemavú Jūmenijicui: “Pūcará cūináturú ne coyuru ne jáiye báquede, bojecuvú ne que coyuiye”, arí toivaicōjenejaquemavú. ¹⁸Yávacari ji borore coyuyúbu. Aru jipacu, ñai daroyú bácu yure, ũ máre coyucaibi ji borore, arejame Jesús.

¹⁹—¿Mipacu ári curi ũ? jēniari járejaima Jesúre fariseova.

—Yure coreóvabevúbu muja. Aru jipacure máre coreóvabevúbu muja. Yure coreóvaivú baru, jipacure máre coreóvajebu muja, arejame Jesús náre.

²⁰Caiye iyede coyurejame Jesús ũi bueiye de pōevare Jūmenijicui cūrami, Jūmenijicure táutura jíye epeitōcua yebai. Ũbenita pōecu cubedejame jēni jacocuyú úre, ũi mauva úre ne jēnajjārvavú baquinó eabe boje cāreja.

**Jesús “Ji nuquinoini nuri
bujabenjaramu mija” ñi aino**

²¹ Bediova cojedeca pöevare yávorejame Jesús:

—Yurecabu nucuy. Yure voridurajaramu mija. Ubenita yainajaramu mija boropateiva, mije ãmeina ñaiyede dajocabe boje aru “Jesúbe Jümenijicui mácu aru majare meadaipöecu”, mije abe boje. Ji nuquinore nuri bujabenjaramu mija, arejame Jesús.

²² Que ayure, ina judíova ñije jabova ne bajumia yávaiva arejaima:

—¿Ñujare “Ji nuquinore nuri bujabenjaramu mija” ñi ainoque, jáve ñi baju boarí jaruvacuyuba? arejaima ne bajumia.

²³ Náre arejame Jesús:

—Mujacapuravu ijoboröcavubu mija. Ubenita yurecabu ñmucacu, cavarö mearo Jümenijicui cüröcacu. Mujacapuravu ijáravucavubu mija. Ubenita yácapuravu ijáravucacu ãmevu ya. ²⁴ Que baru “Yainajaramu mija boropateiva, mije ãmeina ñaiyede dajocabe boje, ‘Jesúbe Jümenijicui mácu aru majare meadaipöecu’, mije abe boje”, avu mujare. Mije ju abe boje ji ávarede ji baju, “Jümenijicui mácu yu, caivure meadaipöecu”, ji arí coyüvarede, yainajaramu mija boropateiva, mije ãmeina ñaiyede dajocabe boje, “Jesúbe Jümenijicui mácu aru majare meadaipöecu”, mije abe boje, arejame náre Jesús.

²⁵ —¿Yécürü mu? jëniari járejaima ñre.

—Mamarumu ji buiyede aru carita ji coyüvacamumu ya. ²⁶ Mujare ji coyüjuroe urarö cuvavu. Aru urarö mujare ji ñájine dájuroe máre cuvavu. Ubenita ñai daroyu bácu yure borocübecube aru jáve yávayube ñ. Que baru ñi coyüicöjeino mácaröpeda mija ijáravucavure coyüivu ya, arejame Jesús.

²⁷ Ubenita “yure daroyu bácu”, ñi aiyede, “jipacu”, ayure majibedejaquemavu na.

²⁸ Que baru yópe arí, coyürejame Jesús náre:

—Mije jocücürä jëori jámuórajivude yure, Jümenijicui daroimu mácure ñmure, majinajaramu jávene ji ávarede ji baju, “Jümenijicui mácu yu, caivure meadaipöecu”, ji arí coyüvarede.

Dinumü maquinóre majinajaramu mija. Ji baju jipacu coyübenore ñayü bujabevu. Quéhora jipacu, Jümenijicui, ñi coyüyepedata, yópe ñi coyüicöjeiye báquepe yure, coyüyubu ya. ²⁹ Ñai daroyu bácu yure cübi yúque. Yure cüinácura jocarí numecube jipacu, ji ñaiye boje ñi uröpe cainumüa, arejame Jesús.

³⁰ Jesús nópe ayure jápiarí, ju arejaima ñre obedivu pöeva.

**Jümenijicui mára aru cöjeimarape
paivu ne ãmeina ñaiyue boje**
(Mt 3.9; Lc 3.8; Gá 5.1, 13)

³¹ Ina judíova Jesús yebai cöjjivure, ñre ju aivu bácvure yópe arí, coyürejame Jesús:

—Mija ju aivu baru ji bueiye, ji bueiya jáve bajure majinajaramu mija. ³² Ji bueiye jáve bajure majinajaramu mija. Aru que baru apescu cöjeimarape ãmenajaramu mija, arejame Jesús.

³³ Ñre arejaima ina judíovacavu:

—Ñuja Abraham mácu páramenatamu. Que baru cainumüa apescu cöjeimara ãmevu ñija. ¿Aipe teni “Apecui cöjeimarape ãmenajaramu mija”, ayurü mü ñujare? arejaima Jesúsre.

³⁴ Náre ju ayü arejame Jesús:

—Jáve coyüyubu mujare: Yópe cöjeimara ne baju uröpe ñabevu, quéhora apescu uröpe ñaiyu, nopedeca caivu ina ãmeina ñaiyu cöjeimarapebu, ne ãmeina ñaiyue boje. ³⁵ Cürami upacu márape ãmema ñi cöjeimara. Mamara memeivu ne ue boje népacure. Ubenita cöjeimara memeivu ne jabocui cöjeiye boje náre. Quéhora ubenina curivutamu ina cöjeimara. Jabocui márape cainumüa ména cübema ñi cöjeimara. Ubenita jívü bajutamu mamara baju. Que baru me cüima népacüque cainumüa. Aru yávacari Jümenijicui mácu bajubu. ³⁶ Que

baru yu, Jūmenijicui mácu, mujare cōjeimarape āmevure ji đaru, jāve bajureca cōjeimarape āmevū barājáramu mija. Đarājaramu mije đaiyede mije űe boje majepacu Jūmenijicure. Đabenajaramu mije đaiyede apescu űi cōjeiye boje mujare. ³⁷Coreóvaivū yu mujare Abraham mácu pāramenare. Ūbenita ji bueiye de ju aiyūbevūbu mija. Que baru yure boarí jarūvaiyūrivūbu mija. ³⁸Yúcapūravū soyūyūbu jipacu jádovaiye báquede yure. Ūbenita mujacarpūravū đaivūbu yópe mujepacui soyūiye báquere mujare, arejame náre Jesús.

³⁹—Ñjēñecu mácu barejaquémavū Abraham mácu, arejaima na.

Ūbenita Jesús arejame náre:

—Abraham mácu pāramena baju baru, űi đaiye báqueredeca đajebu mija. ⁴⁰Ūbenita iye yávaiye jāvene Jūmenijicui bueiye báquede yure soyūyū bácreca mujare, mujacarpūravū boarí jarūvaiyūrivūbu yure. Que đabedejaquemavū Abraham mácu. ⁴¹Muje que đaiyēque, yópe mujepacui đaiyepedeca đaiyūrivūbu mija, arejame náre Jesús.

Nácapūravū arejaima űre:

—Ñja űbenina eaimara āmevū.

Jūmenijicūvacaribe cūinácu ñjepacu baju, arejaima.

⁴²Náre, yópe arí, soyūrejame Jesús:

—Jūmenijicui cūrōi cūcu bácu yore ēmeni darejacacu yu. Aru cūvū caride yui. Que baru Jūmenijicu mujepacu baju baru, yure űjebu mija. Ji bajuma ji majiéque dabedejacacu yu. Quēnora Jūmenijicui daroimū mácvū yu.

⁴³¿Aipe teni ji soyūiyede járiarí eabenarū mija? Yūre ji soyūiyede járiaiyūbevūbu mija. Que baru járiarí eabevūbu mija. ⁴⁴Mujepacube abujuvai jabocu. Ūpe paivūbu mija. Ūi űrōpe đaiyūrivūbu mija. Mamarūmure aru caride máre, pōevare boarí jarūvaipōescube ű. Jūmenijicui yávaiyede jāvene járiaiyūbebi ű. Aru cainūmūa yávaiyede jāvene soyūbebi ű. Ūi borocuede soyūyūbe ű, “¿Jāve

márica?” pōeva ne arājīyepere ayū. Aru mamarūmūcacu borocūcūbe ű. ⁴⁵Ūbenita yúcapūravū soyūyūbu yávaiyede jāvene. Mujacarpūravū ji soyūiyede ju abevūbu. ⁴⁶Ñame mujacacu ji āmeina đaiyede jáđovañū buojabebi, ji boropatebe boje. Jāvetamu ji soyūiye. ¿Dinūmū aipe teni diede ju abenarū mija? ⁴⁷Jūmenijicu jicu járiaiibi űi yávaiyede. Ūbenita mujacarpūravū Jūmenijicu jina āmevū. Que baru űi yávaiyede járiaiyūbevūbu mija, arejame náre Jesús.

**Jesús űi cuede Abraham mácu
pōetequiye jipocai**

(Jn 8.24, 10.30-33, 13.19)

⁴⁸Dinūmū ina judíova arejaima Jesúsre:
—Jāve soyūivūbu ñja: Samariacacūbu mū. Aru abujucu cūbi máque, arejaima na.

⁴⁹Náre arejame Jesús:

—Abujucu cūbebi yáque. Jipacure puedaivū yu. Ūbenita yure puedabevū mija. ⁵⁰Yūre mearore jívure vobevū yu. Ūbenita jipacu űbi pōevare ne jínajīyepere ayū mearore yure. Aru űrecabe soyūyū pōevare ne đaiye báque méne aru āmene máre. ⁵¹Jāve soyūyūbu mujare: Ácu pōescu ju ayū ji soyūiyede yaibécūyūme, arejame Jesús.

Que ayū, pōescu yaibéde űi űmei aiyūcu barejaquémavū Jesús.

⁵²Arejaima na:

—Caride jāve coreóvaivūbu ñja. Abujucu cūbi máque. Javede Abraham mácu aru ina Jūmenijicui yávaiyede soyūcaipōeva mácvū máre yaidéjaquemavū. Ūbenita “Ácu pōescu ju ayū ji soyūiyede yaibécūyūme”, mū ayūbu. ⁵³Majeñecu Abraham mácu yaidéjaquemavū. ¿Ūi pūeno paűcūgū mū? Jūmenijicui yávaiyede soyūcaipōeva mácvū máre yaidéjaquemavū. ¿Yéscure páyūű mū, mi đáriaru? arejaima na.

⁵⁴Que aivūre, yópe arejame Jesús:

—Ji baju “Meacutamu yu” ji aru, bojecūbejebu no. Ūbenita jipacurecabe “Meacutamu mū” ayū yūre. Ūrecabe

“ñijeracu Jāmenijicu”, muje aimu.

⁵⁵Mujacapuravu úre ye coreóvabevu. Ûbenita yurecabu coreóvayu. “Úre coreóvabevu yu” ayu baru, mujapedeca borocujebu yu. Ûbenita úre coreóvaivu yu. Òi coyuyede me ja aivu yu. ⁵⁶Aru dápiayu bácu ji edaquiyede ijāravui, torojurejaquemavu majeñecu Abraham mácu. Que teyu, ji edaiyede jáñu mácu, yure torojurejame ù mácu, arejame náre Jesús.

⁵⁷Ina judíova arejaima úre:

—Cincuenta paiñua cuvabevu mu. Aru Abraham mácu javeita yaidéjaquemavu. ¿Aipe teni “Járejacacu ù mácuere”, ayurù mu? arejaima Jesúsre na.

⁵⁸—Jāve coyuyubu mujare: Abraham mácu ùi pōetequiye jipocai curejacacu yu, arejame Jesús.

⁵⁹Òi que aiyede, Jesúsre jorojivu, ina judíova boarí jaruvaiyurivu úre ñnejaima cūraboare, durenajivu úre. Ûbenita Jāmenijicui cūramine jocarí etarí, dupini nārejame Jesús.

**Jesús ùi járe ðaino jári eabecu
pōteyuvu bácuere
(Mt 5.14; Jn 8.12)**

9 ¹No yóboi, Jesús ùi cuiyede, járejame cūinácu ùmu, jári eabecuere. Nópe pōetedejamedá ñai jári eabecu. ²Ñuja Jesúsí bueimara jēniari járejacarā úre:

—Bueipōecu, ¿aipe teni jári eabecu pōetedejaquemari ñai? ¿Òi baju āmeina ðaiye boje nópe pōetedejaquemari? ¿O ùi bucva ne āmeina ðaiye boje nópe pōetedejaquemari? arejacarā ñuja Jesúsre.

³Ñujare, yópe arí, coyurejame:

—Òi baju āmeina ðaiye boje āmevu aru ùi bucva ne āmeina ðaiye boje máre āmevu nópe pōteyuvu bácu ù jári eabecu. Jāmenijicui parvéde jáðovaquiyepere ayu, nópe pōetedejaquemavu ù. ⁴Jāravure pōeva memeivu buojadama. Ûbenita ñemié tuiyede memeivu buojobema. Quédeca majare máre ðaiye jauvu yure ðaroyu

bácu ðaicōjeiyede jāravure cāreja. Ûbenita ji yainíburu yóboi quénora ðarí buojobecubu yu. ⁵Ji cuede cāreja ijāravui, pēoinope páyu Jāmenijicui dápiaye jāvene majide ðaivu ijāravucavure, arejame Jesús.

⁶Que ayu bácu, yebarā jēcuturi, najuarí joboque jivarejame. Òi jivaiye báquede ñni, jári eabecu yacorūare jobo jijovarejame.

⁷Jijovañu mácu úre arejame Jesús:

—Siloé āmicuricobui mi yacorūare joacunijacu mu, arejame jári eabecuere Jesús.

Siloé aino, “Jaroicobe” aiyurótamu. Dibui nuri, ocoque ùi yacorūare joarejame. Joarí buojarí, ùi cūrami copainurejame, jáñuta. ⁸Úre, tātutare jēniañure jipocamia, jáivu bácvu arejaima ne bajumia:

—Járijide apa. ¿Jári eabecu bácu tātutare jēniari dobavayu bácu āmeni ñai? arejaima ùi curōcavu.

⁹—Júju, ù baju apa, arejaima nácavu.

—Ò āmemi. Úreca páyube. Ûbenita jári eabecu bácu āmemi ù, arejaima apevu.

Ne que aiyede, ùi bajumareca arejame:

—Jári eabecu bácvu yu, arejame, náre coyuyuvu.

¹⁰Dinumu úre jēniari járejaima ùi curōcavu:

—¿Aipe ðarí jári eayurù mu? arejaima.

¹¹—Jesús āmicucu yebarā jēcuturi, joboque jivacube. Die ùi joboque jivaiye báquere ji yacorūare jijovami ù. “Siloé āmicuricobui joacunijacu mu”, abi yure. Que ðacunvu yu. Diede joayu bácu, jávu yu, arí coyurejame ùi curōcavure jári eabecu bácu.

¹²—¿Mi aimu ári curi ù caride? arejaima úre ùi curōcavu.

—Aidica, majibevu yu, arejame náre jári eabecu bácu.

**Jári eabecu bácuere fariseovacavu
ne jēniari jápiaino**

¹³Dinumure jári eabecu bácuere nuvarejaimada ùi curōcavu fariseova yebai. ¹⁴Dijāravu, Jesúsí joboque jijovari

meadaijāravu bācarō jārī eabecu bācure ñuja judíova ñuje jabuóvaujāravu sábadu barejávū. ¹⁵Ina fariseova jārī eabecu bācure jēniari jārejaimada:

—¿Aipe teni jārī eayurū mu? arejaimada.

—Jobo ñi jīvaiye báqueque ji yacoruafe jījovame. Joacunuvu, ñi cōjeiyepe. Que teyu bācu jāivu caride, arejameđa náre.

¹⁶—Jūmenijicui daroimu mácu āmecube ũ, mure meadayu bācu, ñi memeiye boje maje jabuóvaujāravure, arejaimada apevu ina fariseovacavu.

Ūbenita apevu arejaimada:

—¿Āmeina ñayu baru, aipe teni pōeva ne ñari majibede jádovaiye majidi ũ? arejaimada nācavu.

Que arī ne bajumia cūináturura yávabedejaimada. Aru cūináturu āmenejavūya ne ũme. ¹⁷Bedióva cojedeca ina fariseova jēniari jārejaimada ũre:

—¿Ñai mure meadayu bācu mi aimu, mi dápiaru, ye pōecu páyu bārica ũ? arejaimada.

—Ji dápiaru, Jūmenijicui yávaiyede coyucaipōecube ũ, arejameđa.

¹⁸Ūbenita ñuje jabova judíova “Jārī eabecu bācube jáñu”, abedejaimada cāreja. Que baru ñi bucuvare cutuicōjenejaimada, ne ñarājīyepe aivu ne yebai. Ne eaiyede fariseova jēniari jārejaimada:

¹⁹—¿Mujemacuba ñai? ¿Aru mujemacu baru, jārī eabecu pōetedejarī ũ? ¿Nópe pōteyu bācuvacari, aipe teni jáñuma caride? arejaimada jārī eabecu bācui bucuvare ina fariseova.

²⁰—Ñujemacu bajube ñai. Jārī eabecu pōetedejame. ²¹Aru caride jārī eaibi. Aipe teni jáñu mácure majibevubu ñuja. Ūre meadayu bācure coreóvabevubu. Jēniari jájara ñujemacure. Bucucube ũ. Ūi baju coyucayume mujare, arejaimada ũi bucuva.

²²Nópe arejaimada, ne jidué boje ñuja judíova ñuje jabovare. Jipocamia yópe arī, coyurejaimada ina fariseova: “Ácu pōecu Jesúsbe Jūmenijicui daroimu

mácu ũ’ ayure, ñuje cōjijīñamine jaetovarājaramu ñuja, ñi cōjijibequiyepe aivu ñujaque bedióva cojedeca”, aivu barejaimada ña jipocamia. ²³Que baru, “Bucucube ũ. Ūre jēniari jájara muja”, arejaimada ina fariseovare ũi bucuva.

²⁴Bedióva cojedeca jārī eabecu bācure cutuicōjenejaimada ina fariseova. Eayu bācure arejaimada:

—Mure meadayu bācure majivu ñuja, āmeina teipōecu bajure. Que baru Jūmenijicui jáinore jáve coyujacu mu caride, arejaimada jārī eabecu bācure.

²⁵—Āmeina ñayure o mearore majibevu yu. Ūbenita jārī eabecu batevú yu. Caride que āmevu. Jáivu yu. No quénoratamu ji majino, arejameđa ina fariseovare jārī eabecu bācu.

²⁶—¿Aipe ñari ũ mure? ¿Aipe ñayu, mure járe ñari ũ? arī jēniari jārejaimada ũre cojedeca.

²⁷—Mujare coyuvu yu. ¿Jápiabenaru muja? ¿Ūi bueimara teiyurivurū muja? Que barureca burubeda yure jēniari jāivubu muja, arejameđa fariseovare.

²⁸Ūre, yópe arī, āmeina yávarejaimada:

—Mútamu ũi bueim. Moisés bācui bueimaramu ñuja. ²⁹Moisés bācure yávarejaquemavu Jūmenijicu. Aru Moisés bācure majivu ñuja. Ūbenita mure meadayu bācure ye majibevubu ñuja. ¿Árocacuba ũ? arejaimada ina fariseova.

³⁰—“¿Árocacuba ũ?” aivubu muja. Ūbenita ji jārī eabe báquede meadaibi yure. Mujacarpūravu ũi curō mácarōre majibevubu muja. ³¹Me majivu maja: Āmeina teivure jápiabebi Jūmenijicu. Quénora ũre mearore jívure, ñi urōpe ñaivure, jápiaibi ũ. ³²Jārī eabecure meadayede maja jápiabevubu. Yureca páyu nópe āmepeda pōteyu bācure meadaipōecu cubebi ũ. ³³Yure meadayu bācu Jūmenijicui daroimu mácu āmenu, ji jārī eabe báquede meadabejebu ũ, ayubu yu mujare, arejameđa náre jārī eabecu bācu.

³⁴—Mipacoi yapiburā pōtecayuvacari javeta āmeina ñayu

barejaquémanu m̄. ¿Quécvacari ñ̄jare bueyurū m̄? arejaimada jári eabecu bácuere ina fariseova.

Que arī, ére ne cójjiñamine jaetovarejaimada ina fariseova, ñ̄i cójjiibequiyere aivu náque bediόva cojedeca.

**Jesús ñ̄i coyuino majeracu
Jūmenijicure coreóvabevu
jári eabevure paivure**

³⁵Jári eabecu bácuere ne jaetovaiye báquede coreóvarejaquemavu Jesús. Coreóvayu bácu, jári eabecu bácuere vocun̄rejame. Aru eayu bácu ére, yópe arī, jēniari járejame Jesús:

—¿M̄ Jūmenijicui daroim̄ mácuere ũmure ju ayurū? arejame Jesús.

³⁶—M̄, ji jabocu, mi aĩmure coreóvare ñ̄jacu yure. Ére majicu, ju acuyumu yu, arejame Jesúre jári eabecu bácu.

³⁷—Jave jáivu m̄ ére. Ému yu, máque boroteyu caride, arejame ére Jesús.

³⁸Ũi que aiyeda, ñ̄natutarī Jesúre mearore jídejame jári eabecu bácu:

—M̄, ji jabocu, mure ju aivu yu, arejame Jesúre.

³⁹Din̄mure yópe arī, coyurejame Jesús:

—Jāravui darejacacu yu, beocuyu ju aivure aru ju abevure máre. Pōeva “Majibevubu ñ̄ja Jūmenijicui dápiaye jávene” aivu, jári eabevure paivubu. Nápe paivure meadacudayubu yu, ne majinajiyere ayu Jūmenijicui dápiaye jávene jávure. Ũbenita pōeva “Majidivubu ñ̄ja Jūmenijicui dápiaye jávene” aivu, jáivure barĩduyama, ne dápiaru. Nópe ne dápiaye boje, náre meadabecubu yu. Que baru jári eabevure teni, Jūmenijicui dápiaye jávene ye majibenama na, arejame Jesús.

⁴⁰Jesús que ayure jápiarejaima fariseovacavu.

—Que baru, ¿“Jári eabevure paivubu m̄ja”, ayurū m̄ ñ̄jare? arejaima Jesúre.

⁴¹Jesús ju ayu yópe arejame náre:

—M̄ja jári eabevure majibevu baru aru m̄ja coreóvavu baru Jūmenijicui cadateiyede jaūrōre m̄jare, boropatebejebu m̄ja. Ũbenita “Majidivubu ñ̄ja Jūmenijicui dápiaye jávene” aivu, jáivure paivutamu m̄ja. Ũbenina dápiadv̄ m̄ja majini buojaivure Jūmenijicui dápiaye jávene ũ cadatebecuva m̄jare. Que baru boropateiv̄ mauteiv̄bu m̄ja cāreja, arejame náre.

**Jesús ñ̄i coyuino ovejavare
coreipōecure**

(Lc 15.4-5; He 13.20)

10 ¹Din̄mure náre yópe arī, coyurejame Jesús:

—Jāve coyuyubu m̄jare: Ñ̄ai pōecu ovejavare biaido jedevacobei ecobecu, quénora baidore murina ecoyu baru, érecabe ñ̄avaipōecu o tatorī ípōecu. ²Ũbenita ñ̄ai ecoyu ovejavare biaido jedevacobe bajita, érecabe ovejavare coreipōecu aru náre upacu máre. ³Érecabe biaido jedevacobede coreipōecui voacaimu jedevacobede. Aru ovejavare órejarī daroibi ne ñ̄miá coapa náre coreipōecu. Ũi órejaiyede jápiarī, coreóvarī, ñ̄adama ũi yebai. Aru náre ñ̄vaimi ũ, ñ̄ocuyu. ⁴Ovejavare etavayu bácu baidore jocarī, náre jipocateibi. Aru ũi yóboi cuyuyama na, ne coreóvaiye boje ũi yávainore. ⁵Ũbenita ne coreóvabem̄que ñ̄mema na, ũi órejaiyede. Ére dupiv̄ cúyan̄rinata bíjadama na ovejava, ne coreóvabe boje ũi yávaicamure, arejame Jesús.

⁶No jári dápiarī ne ñ̄arājiyere ainore coyuridurejame náre Jesús. Ũbenita ye jápiarī majibedejaima na.

**Jesús ména coreyu pōevare yópe
ovejavare coreipōecu meacu ũi
coreiyere ovejavare**

(Mt 11.27; Lc 10.22, 15.4-5; Ef 2.11-22; He 13.20)

⁷Bediόva cojedeca pōevare yávorejame Jesús:

—Jāve coyuyubu m̄jare: Ojevavai biaido jedevacobepe pávutamu yu,

põeva ne earãiyere ayu Jũmenijicure.
⁸Ji edaquiye jipocare apevu, ovejavare coreipõevape teni, edaquemavu.

Caivu na ñavacurivupe paivu aru tatorĩ ípõevape paivu batequémavu. Ëbenita náre jápiarĩ adabetequemavu põeva. ⁹Jedevacobedeca páyutamu yu. Yópe ovejava jedevacobe biaidoi ne ecorĩ buojaiyere náre coreipõescu, ñi meadaquiyepe aivu náre, nopedeca põeva yúque earĩ buojavuvu Jũmenijicure, ñi meadaquiyepe aivu náre. Ne ãmeina vaijuroede meadacuyumu yu. Yópe ovejava ecorĩ, etarĩ jedevacobei buoimara ãmevupe, nopedeca põeva yúque curivu jidubevu buoimarape ãmema. Yópe ovejava ne ãiyede eaiyere náre coreipõescuque, nopedeca ina yúque curivu náre apure ñaiyede earĩ, ména curãjarama na ne ùmei, arejame Jesús.

¹⁰Náre, yópe arĩ, coyure ñurejame Jesús:

—Ñavaipõescu quénora ñavacudaibi aru põevare boarĩ jaruvacudaibi, náre bíjarocuyu. Ëbenita yúcapuravu apure ñacudaivu põevare mamaũmeque, ne curãjiyere ayu urarõ meaũmeque cainumua. ¹¹Ovejavare coreipõescu meacu me baju jári capuibi ñi ovejavare pu ñi yayieta náre boje. Quédeca tescuyumu yu máre. Põevare meadacuyu, yaicúyumu náre boje. ¹²Ëbenita nópe ñabebi ovejava upacure memecaipõescu. Ë ovejavare coreipõescu ãmemi. Ë jina ãmema na. Que baru ãimacu jijecucu, lobo ãmicucu, ñi edaiyede jáñu, cüiná cýarĩ dupibi ovejava upacure memecaipõescu, ovejavare jocarĩ nuñu. Que baru corebemarape ovejavare cujurĩ jaroibi ñai lobo. Cüiná cure jëñiburu, apevu coateni nuñama. ¹³Ñai memecaipõescu jecubebi ovejavare. Quénora ñi jabocui bojedaiyeda ubi ñ. Que baru ovejavare jocarĩ, dupini nuimi ñ, arejame Jesús.

¹⁴⁻¹⁵Náre, yópe arĩ, coyure ñurejame Jesús:

—Yu mearo coreyubu põevare yópe ovejavare coreipõescu meacui coreiyere

ovejavare. Jipacu coreóvaibi yure. Aru coreóvaivu yu úre máre. Quédeca coreóvaivu yu ji cuvamara coapa. Aru yure coreóvama na máre. Yñrecabu meadacuyu põevare. Que baru yaicúyumu náre boje. ¹⁶Yópe apedoa biaidoacavu ovejavai cñere, nopedeca apevu põeva, yócvu ãmema, ñbenita jina márjavu cuma nore máre. Náre cuturĩ, jipocateni davacuyumu yu. Ji cutuiyede jápiarĩ ju arãjarama na. Náre epecuyumu jívucue cüináupe. Na caivu curãjarama yúque. Aru náre corecuyumu yu. Que teni cüináyubope teni, yu ne coreipõescu cüinácuque curãjarama caivu ina jívu, arejame Jesús.

¹⁷Náre coyure ñurejame Jesús:

—Ji mauvare boarĩ jaruvaicõjeiyuvu yu ji bajure, nacajari yainore jaruvarĩ cscuyu bediõva cojedeca. Que baru ñbi yure jipacu. ¹⁸Põescu cubebi yure boarĩ jaruvacuyu ji ñbedu. Ji mauvare boarĩ jaruvaicõjecuyumu. Yu buojavuvu boarĩ jaruvaicõjeñu ji bajure aru nacajari cscuyu bediõva cojedeca máre. Que ñaicõjeimi yure jipacu, arejame Jesús.

¹⁹Que ayure jápiarĩ, ina judiõva cüináture ãmevu cojedeca ne ùme, cüináturena yávabema Jesúsã.

²⁰—Abujucu cubi úque. Que baru ãñmemi. ¿Aipe teni ñi coyuiyede jápvaivuvu mña? arejaima nãcavu obedivu.

²¹Ëbenita apevu nãcavu arejaima:

—Abujucure cuvacu nópe yávayuvu buojabebi. Aru jári eabecure meadaiye buojabebi abujucu. ¿Mácarĩ? arejaima ina judiõva.

Jesúre judiõva ne ñbeni jaruvaino
(Jn 1.28)

²²Dinũmure uracoro ocorũmu marejávũ. Aru Jerusalén ãmicurĩmaroi torojuve teinũmu marejávũ. Jũmenijicui cũramine meadaiye báquede ãrurivu, torojurejarcã ñña judiõva. ²³Nore Jũmenijicui cũrami Salomón mácu cuino mácarõ ãmicurõi vaiváre ñurejame Jesús. ²⁴Nópe vaiváre nuñure

tarabudari ére, jēniari járejaima judíovacavu:

—Mure urarō chíodavu ñuja. ¿Yécurū mū? Cristo, Jūmenijicui daroimu mácu baru mū, cūiná coyūjacu ñujare. Coreni uetuyavū ñuja, arejaima Jesúre.

²⁵Náre, yópe arí, coyurejame Jesús:

—Jave coyuriduvu mujare. Ūbenita ji coyuiyede ju abetevu muja. Muje jáiyede pōeva ne ñari majibede jipacui cōjeiye bajure ñavu yu. Ūbenita diede jáivuvacari, yu Cristore ju abevu muja cāreja. Yu, Cristo, jádovaiyu jáve ji ñaiyeque. ²⁶Ūbenita mujacapuravu ji ovejavape paivucavu āmevu. Ji pōeva āmevutamu muja. Que baru ji coyuiyede ju abevu muja. ²⁷Yópe ovejava ne jápiarí, ju arí ñaiyepe náre coreipōecu bajui urōpe, nopedeca ji pōeva yure jápiarí, ju arí ñavubu yópe ji urōpe. Jívure me coreóvaivu yu. Yure jápiarí, ju arí cūma yúque. ²⁸Náre járavu cūiméjāravu baquinóre cūvare ñavvu yu. Toabo cūiméboi nūmenajarama na cainumua. Ji coreimarare yure tatojurocū cubebi ũ. ²⁹Yure jipacui jímara bojecurivvu caiye pūeno. Jipacure tatojurocū náre cubebi ũ. ³⁰Yu jipacūmaque cūinávūpebu ñuja, arejame Jesús ina judíovare.

³¹Ūi que aiyede, Jesúre jorojívū ina judíova, boaiyurivū ére, ñejaima cūraboare cojedeca, ñvarájívū ére.

³²Ūbenita Jesúcapūravu arejame:

—Jipacui ure ñaicōjeiyede pōeva ne ñari majibede jádovavu yu, cañatecuyū pōevare. ¿Caiye die muje jáiye báquede, áde boje cūraboare ñvarájívurū yure? arejame náre Jesús.

³³Jesúre arejaima na:

—Mi ñaiyede jáivū bācavu cūraboaque ñureni, mure boabēnamu ñuja. Ūbenita “Jūmenijicūque cūinávūpebu ñuja”, avūra mū. Jūmenijicūre āmeina yávaivu mū, que ayū. Quénora pōecuratumu mū. Que baru Jūmenijicūre mi āmeina yávaiye boje, mure boarājaramu ñuja, arejaima Jesúre ina judíova.

³⁴Náre, yópe arí, coyurejame Jesús:

—Mujeñecuva mácavu ne toivarí epeiyoca cāriáiyocai yópe arí,

toivaicōjenejaquemavu Jūmenijicū ũi yávaiyede: “Jūmenijinape paivubu muja”, arejaquemavu Jūmenijicū.

³⁵Me coreóvaivubu maja Jūmenijicui yávaiye ũi toivaicōjeiye báque jáve bajure cainumua. Ūi yávaino mácarōre oatvaino cubevu no. Aru Jūmenijicūvacari, “Jūmenijinape paivubu muja”, arejaquemavu ina javecavu ũi yávaiyede coyūimara mácavure.

³⁶Yurecavu Jūmenijicui beoimu mácu, memecacuyū ére. Yure darorí epeibi ijāravui. Que baru, ¿“Jūmenijicui mácubu yu” ji aiyede, aipe teni yure “Jūmenijicūre āmeina yávaivu mū”, aivurū muja? ³⁷Jipacui ñaicōjeiyede ji ñabedu, yure ju abejarā muja. ³⁸Ūbenita pōeva ne ñari majibede jipacui ñaicōjeiyede ji ñaru, nópe ñayure muje jári coreóvaie boje, ju ajarā muja. Yure ju abevureca, ji ñaiyede ju aiye javvu mujare, muje cūiná majinajiyepē ayū jáve jipacu cūcure yúque aru yu cūcure ũque máre cūinávūpe, arejame náre Jesús.

³⁹Bedióva cojedeca Jesúre jēni jacoiyuridurejaima na. Ūbenita náre dupidejame ũ.

⁴⁰Náre dupiyū bācu Jordán āmicuriya jia ānidavei, Juan Bautista bācu ũi pōevare Jūmenijicūque ocoi jádovaino mácarō yebai ñurejame Jesús cojedeca. Noi cūcūññū, ũque ñurejagarā ñuja ũi bueimara. ⁴¹Nore ñuje cuede pōeva obedivū Jesúre járadarejaima. Ne bajumia yópe arí, borotedejaima:

—Pōeva ne ñari majibede ñabeteame Juan Bautista bācu. Ūbenita caino ũi coyūino mácarō Jesúi borore jáve baju batequémavu, arejaima ina Jesúre járadavū bācavu.

⁴²Aru nore cūcure, Jesúre ju arejaima obedivū pōeva.

Lázaro bācu yaino

(Lc 10.38-39; Jn 12.3)

11 ¹Dinumure cūinácū ũmū ũi āmiá Lázaro ijeteuyū barejámeda. Jíburōmivaque Betania

āmicurīmajinoi cūrejame ũ. Marta aru María āmicurejaima na, jībūrōmiva.

²Ico María Lázaroī mamico barejácoda Jesúre mumijue yuado bacadó ũi cūbobare aru ōi yuarīburu yóboi ōi podaque tūredo macodó máre. ³Jesúre boro jarorejaimada na, Lázaroī maminomiva:

—Ñuje jabocu, mi yóvaimu, pare mi jecuvamu, ijeteibi ũ, arī boro jarorejaimada Jesúre dinomiva.

⁴Ne que aino mácarōre jápiayu bācu, yópe arejame Jesús:

—Ijeteyvacarī yaibécube Lázaro. Quénora Jūmenijicui paruéde jádovaquiyere ayu pōevare ijeteibi ũ. Ũi ijeteiye boje pōeva járajarama yu, Jūmenijicui mácu, ji paruéde, arejame Jesús.

⁵Martare, Maríare, aru néyocu Lázarore pare jecurejaquemavu Jesús.

⁶Ijimure jápiayu bācuvacarī, nomicata pucajāravnu mautedejame cāreja.

⁷Pucajāravnu yóboi, Jesús arejame ñujare ũi bueimarare:

—Járica, Judeai nurajarevu maja cojedeca, arejame ñujare.

⁸—Mu, bueipōecu, javejēneca cūraboaque dūreni, mure boajūrorivu batemá nōcavu. ¿Nore nucuyurū mu cojedeca? arejarā Jesúre.

⁹“Ji dájuroede buojajebu yu” ayu, yópe arī coyurejame Jesús:

—Jāravna coapa doce paiora cuvū. Ñai cuyū jāravure, aviá ũi boiyede, tobobi ũ, aviá ũi boino cue boje jāravure.

¹⁰Ūbenita ñai cuyū ñamine, torī yavaibi ũ, aviá ũi miadāre daino cube boje, arejame Jesús.

Que ayure Jesús, yópe aiynō marejaquemavu; Jāravna curejaquemavu ũre cāreja, ũi buojaquiyere ayu ũre dāiye janōre.

¹¹Que coyurīburu yójīboi, yópe arī coyurejame Jesús cojedeca:

—Maje yóvaimu Lázaro cāñime. Ũre coedavacunñimtu yu, arejame ñujare.

¹²—Mu, ñuje jabocu, jāve cāru, dīnūmu meaquiyebu. Meatecuyūme, arejarā ñuja.

¹³Jesús ũi nópe aiyede majibedejarā ñuja. Ūbenita “Cāñimebu”, arī dāpiarejarā ñuja. ¹⁴Ñuje que dāpiayede, yópe arejame Jesús yavebecuva:

—Jave yaicúbe Lázaro bācu. ¹⁵Ji cube báque boje ũque, torojūvu yu. Caride yure me baju coreóvarī ju arājaramu muja, ji dāquiyede jáivu. Járica, Lázaro bācu yebai nurajarevu maja, arejame Jesús.

¹⁶Ñujacacu Tomás, pējacu ñuje aimu, arejame ñujare:

—Járica, Jesúque yainánurajarevu maja máre, arejame.

Jesús ũi pōevare apure daino cojedeca, ũi nacovariburu náre yainore jaruvarī

(Ro 6.4-5; Col 2.12, 3.1)

¹⁷Jāranurejarā ñuja, Jesújā.

Earānūivu bajure Lázaro bācui yaino mácarōre coyurādarejaima nōcavu. Javeta Jesús ũi eaquiyē jipocamia, yóvaicūvajāravna jipocamiata, ũ mácure jaruvarejaimada cūracobei, pōe jaruvaicobei. ¹⁸Lázaro bācui curīmaro, Betania āmicurīmajino, joabējinoi yóbecurikilometros baji curejavū Jerusalén āmicurīmaro. ¹⁹Que baru Martare aru Maríare máre, yaityú bācui maminomivare, jāranurejaimada Jerusalécavu judíoiva obedivu. Na chōivūque orānurejaimada. ²⁰Jesús edayure majini, ũre copū darejaco Marta. Ūbenita Maríacapūravu dabedejaco. Quédata cūramimia curejaquemavu. ²¹Jesúre coyūyo, yópe arejaco Marta:

—Mu, ji jabocu, yui mi curu, jiyocu bācu yaibéjebu. ²²Ūbenita coreóvaivu yu Jūmenijicu dayure caiyede yópe mi jēniayere ũre, arejaco Jesúre.

²³—Miyocu bācu nacajacuyūme yainore jaruvarī, arejame Martare.

²⁴—Jāvemū no. Nore majivu yu. Jāravū cūiyeta, nacajacuyūme jiyocu bācu yainore jaruvarī, arejaco ō cojedeca.

²⁵Dinūmure Jesús arejame:

—Yábu yaivú bácvure nacovañu yainore jaruvarí. Jáve yaivú bácvure cainumua cure dayubu yu. Pöescu yaivyú bácvacari, yure ju ayu bácu baru, bediöva cojedeca aruscuyume. ²⁶Yure ju ayu, ji nacovaquimú, aruscuyume cainumua. Ye nuncescuyume toabo cüiméboi. ¿Iye ji coyuyede ju adorú mu? arejame Martare Jesús.

²⁷Aru arejaco:

—Mu, ji jabocu, ju aivu yu. Mu Cristobu, Jümenijicui mácu baju. Jümenijicui üi epeimú mácu yore üi daroimú mácubu mu, arejaco Jesúre Marta.

Lázaro bácvure Jesús üi oino

²⁸Ére que ado báco copainuri, imacore, Maríare, cutuconurejaco Marta. Yavenijiena cuturejacoða Maríare, apevu ne jápiabenajiyepé ado:

—Bueipöescu dare daibi. “Dajacorí”, aibi mure, arejacoða Maríare Marta.

²⁹Ju arí, cüiná nacajari, Jesús yebai copu nurejacoða María. ³⁰Imaro bajure eabedecará ñuja cäreja. Martare ñuje copuino mácarömiata curejacará cäreja. ³¹Jüjujiena nuñore jáivú, Maríare yóvarådarejaima ina judíova. Óque orádaivú barídurejaimada. “Yaiyú bácvure ne jaruvaino mácaröi oconuñome ö”, arí dápiarídurejaimada na.

³²María ñuje yebai edarina, Jesús yebamiata ñuatutari, arejaco ére:

—Mu, ji jabocu, yui mi curu, jýocu bácu yaibéjebu ü, arejaco Jesúre María.

³³María odore jáñu, aru óque edaivú oivure jáñu, öre comaje äroje jári, urarö chiorejame Jesús.

³⁴—¿Ári yaivyú bácvure jaruvarärü muja? arejame Jesús.

—Mu, ñuje jabocu, jácudajacu, arejaima Jesúre.

³⁵Dinumú orejame Jesús máre.

³⁶—Urarö yaivyú bácvure úteame Jesús, arejaima ne bajumia ére jáivú bácvu.

³⁷Apevu nácvu arejaima:

—Jári eabecure meadame Jesús. ¿Aipe teni Lázaro bácvure meadabetedi ü, üi yaibéquiyepe ayu? arejaima na, ne bajumia yávaivú.

Lázaro bácu üi nacajaino yainore jaruvarí

³⁸Yaiyú bácvure jaruvaino mácaröre eare nuíye bajure bediöva cojedeca orejame Jesús, pare chíönu. Que teni ü mácvure ne jaruvaino mácaröre earejacará ñuja, Jesúque daivu. Cüracobe, cainituravaque ne bieicobe barejávü Lázaro bácvure ne jajuidorí adaicobe bácarö.

³⁹—Cainituravare veojará muja, arejame náre Jesús.

—Mu, ji jabocu, yövaicuvaijävava vaivu yaivyú bácvure ñuje jaruvaríburu yöbo. Javeta ürojucube ü mácu, arejaco Jesúre Marta, yaivyú bácvu mamico.

⁴⁰—Javede coyuvu mure. Mu yure ju ado baru, yure Jümenijicui parüéde cuvavure jácodomu mu, avu yu mure, arejame Martare Jesús.

⁴¹Dinumú dicobede bieituravare veorí ñnejaima apevu. Ne que ñaríburu yöboi, nore núcu, cavaröi jáñu, arejame Jesús:

—Mu, jipacu, yure jápiaivú mu cainumua. Que baru mure torojuede jívú yu. ⁴²Yu me coreóvaivú jápiaivure yure cainumua. Ubenita yore yúque curivú ne majinajiyepé ayu, mure que aivu yu. Ne “Jümenijicui daroimú mácvube Jesús”, ne arájiyepe ayu, nópe mure yávaivú yu, arejame Jesús.

⁴³Jípacuque yávayu bácu coðoborí, órejurejame Jesús:

—Lázaro, etarí dajacu mu, arejame.

⁴⁴Jesús üi que aiyedata, etarí darejame ü yaivyú bácu. Cuitótecajeaque üi cuboba, üi purú, aru üi jipobu máre, caicu ne cümaimú mácu, Lázaro etarí darejame.

—Cuitótecajea ére cümaicajeare jödeni jaruvajarä muja, cürami üi copaiquiyepe aivu, arejame náre Jesús.

Jesús üi coyüino ne jënajinore ére yöbomia

(Mt 26.1-5; Mr 14.1-2; Lc 22.1-2)

⁴⁵Obedivú ina Maríaque yaivyú bácvure orádaivú bácvavavu, Jesúre nópe ñayure jáivú bácvu, ére ju arejaimada. ⁴⁶Ubenita fariseovacavure

coyurãearejaimada apevu. Caiye Jesús ùi ðaiye báquede náre coyurejaimada.

⁴⁷⁻⁴⁸Que teni sacerdotevare jaboteipõevaque cójijidejaimada ñuja judíova ñuje jabova, ina fariseova. Aru arejaimada, ne bajumia boroteivũ:

—Põeva ne ðarĩ majibede ure ðaibi Jesús. Que ðayu, parucu nuñume ù. Jesúre nópe ñuje ðare nuicõjenu, caivu põeva ùque ñjebu. Ùque põeva ne ñuru, meamejebu majare. Ùre ju arĩ, jabojaicoiyuma. Aru ne jabojaoru ùre, majare boarãdaicõjejebu churaravare ina Romacavu, maje jabova baju. Jesúre jabojaocõjorivure jáivu baru, Romacavui jacobure vaini tuivure majare jájebu nócavu. Dinumũita maje Jümenijicui cüramine vaivéni jaruvarĩ, maje joborõre máre tatorĩ ijebu ina Romacavu. Que baru, ¿aibe ðarãjídica maja? arejaimada ñuje jabova.

⁴⁹Ûbenita cüinácu nácacu ùi ãmiá Caifás, sacerdotevai jacobu baju diujure, arejameða:

—Muja, jívũ, jápiajarã. Majibevu muja nópe yávaivu. ⁵⁰¿Coreóvabenaru muja? Cüinácuva yaidú, majare meavu. Que teni caivu yaini bíjabejebu maja, arejameða jabovare Caifás.

⁵¹Û cüinácu nópe abedejaquemavu Caifás. Sacerdotevai jacobu baju boje, ùre nópe are ðarejaquemavu Jümenijicu, Jesús ùi yaiquýede judíovare boje coyuyu.

⁵²Ûbenita náre quévu bojeda yaicýu ãmenejame Jesús. Quénoa cainoa joborõacavure boje máre, yaicýu barejáme Jesús, obedivu Jümenijicui mára márãjivure cüináyajuboje ðacuyu.

⁵³Sacerdotevare jaboteipõeva aru fariseova máre, “Dinumu Jesúre boarĩ jaruvarãjarevu maja”, arĩ búreajaimada na dijãravũ, Caifás ùi nópe coyujãravumia.

⁵⁴Nore majicu Jesús, urãimaroai cubedejame. Judeacavure dupini nuñũ, ne joborõre jocarĩ, põecubenoĩ ñurejame Jesús. Ñujare ùi bueimare máre nuvari, Efraín ãmicurĩmajinoi curãñurejacařã ñuja.

⁵⁵Ñuja judíova ñuje torojave teijãravũ, Pascua ãmicurijãravũ baquinó eare nuino marejãvũ. Que baru Jerusalén ãmicurĩmaroi obedivu põeva, cainoa ãmaroacavu, muri ñurejaima na, ðarãjivu ne torojave tenajiye jipocai yópe Jümenijicui ðaicõjeipe ùi coyuiye báquede Moisés bácu, meara márãjivu Jümenijicui jáinore. ⁵⁶Que teivu, Jesúre vore cuivu barejãimada ina põeva. Cójijivu Jümenijicui cürami, ne bajumia boroteivu jeniari járeajaimada: —¿Muje dápiaru, Jesús máre edaquídica ù? arejaimada.

⁵⁷Jipocamia ina sacerdotevare jaboteipõeva aru ina fariseova máre caivure, yópe arĩ, coyucõjenejaimada: —Jesúĩ curõre majidivu baru, cüiná ñujare coyurãdajarã muja, ñuje jëni jacorãjiyepe aivu ùre, arejaimada ñuje jabova.

María õi mumijue yuaino

(Mt 26.6-13; Mr 14.3-9; Lc 7.37-38)

12 ¹Seis pajãravua Pascua ãmicurijãravũ jipocai, Betania ãmicurĩmajinoi ñurejacařã ñuja Jesúque cojedeca. Lázaro, yaiyũ bácu Jesús nacovaimũ mácu curĩmaroi ñurejacařã. ²Ñuja edaivure urarõ ãiye tuorejaima apevu nócavu, pueðarãjivu Jesúre. Áiyede tuodo barejãco Marta. Aru Lázaro máre curejame tuoiva yebai apevu dobarivũque. ³Ãñure, María davarejaco trescientos paigramos baju mumijuricorore Jesús yebai. Iye mumijue nardo ãmicue pare mearo corajue barejãvũ. Aru pare bojesue barejãvũya máre. Die mumijuricorore yuarejaco Jesúsĩ cubobarã. Yuado báco, õi poðaque türenejaco Jesúsĩ cubobare. Aru cañami cüramine mumijurejavũ die. ⁴Dinumure jararejame Judas Iscariote, ñuja Jesúsĩ bueimarecasu, ùre jëne ðacuyu. Óre jararĩ, yópe arejame ù:

⁵—¿Iye õi jaruvaicorore, aipe teni apevure bojedãbetedi õ? Tãtura urarõ, trescientos pajãravuare memeiye boje jíye jauridurebu óre. Diede boje ñni, cuve cuvabevure caðatejebu maja, arejame Judas.

⁶ Ëbenina que ayu barejáme Judas. Cũve cũvabevũre cõmajẽ äroje jáñũ ãmenejame, que ayu. Quénora ñavacũcu barejáme. Ë marejáme ñũjare täutũra ñavacaiõõecũ. Iyede ñũje täutũra corecaũ, ãi nrõmia ñni, ñũje täutũrare ñavavarejaquemavũ ã.

⁷ Ëbenita Jesús arejame:

— ãmeno yávabecũ óre. Õ que ðaibico, meadacodo ji bajure ne jarũvarãjyede cũracobeita. ⁸ Cainũmũa ina cũve cũvabevũ curãjarama mũjaque. Ëbenita yũ cubecubu mũjaque cainũmũa, arejame Jesús.

Sacerdotevare jaboteipõeva ne Lázarore boarí jarũvaiyũrõ

⁹ Dinũmũre Jesús Betania ãmicũriĩmajinoi ãi cuede boro jápiarejaimada obedivũ judíovacavũ. Que baru Jesũre járadarejaima, aru Lázarore mãre, Jesũi nacovaimũ mãcũre yainore jarũvarĩ. ¹⁰ Lázarore mãre boarí jarũvaiyũrejaimada ina sacerdotevare jaboteipõeva.

¹¹ Nãre jocarĩ nurejaima obedivũ judíovacavũ, Jesũre jũ arãjivũ ãi nacovaiye báque boje Lázarore yainore jarũvarĩ. Que baru Lázarore mãre boarí jarũvaiyũrejaimada na.

Jesús Jerusaléi ãi ecoino
(Mt 21.1-11; Mr 11.1-11; Lc 19.28-40)

¹² Apejãravũ, Lázaroque Jesús ãi ãijãravũ bácarõ yõbocajãravũ, Jesús Jerusaléi ãi edaquiyede jápiarejaquemavũ na, Pascua torojũve teijãravũre járadaivũ. ¹³ Diede jápiarĩ, yapoporũare burarĩ ñni, ñũja Jesújãre copũ darejaima obedivũ põeva. “Jũmenijicũre torojũve bajaðéni. Jũmenijicũi mearo ðacaimũme ãi ðaroimũ mãcũ, maja judíova maje jabocu bacũyũ”, arĩ coðoboborejaima ina judíova Jesúque nũivũ.

¹⁴ Põevare ãmaiãimacũ, burro ãmicũcũre earĩ, ãre tubarĩ nurejame Jesús. Nõpe teyũ, yõpe Jũmenijicũi yãvaiyede ãi toivaicõjeiye báquepe, teyũ barejáme Jesús:

¹⁵ Mũja Jerusalén ãmicũriĩmarocavũ, jidũbejarã mũja. Jájara mũje jabocu bacũyũ dacũyũre, burrojicũrã tubarĩ dacũyũre, arĩ toivaicõjenejaquemavũ Jũmenijicũ.

¹⁶ Que teinore majibedejacaãã ñũja Jesũi bueimara. Ëbenita ãi yainĩ, nacajari, aru mũri nrũriburu yõboi cavarõ mearo Jũmenijicũi curõi, ãrũrejacaãã ñũja. Dinũmũ maquinõ “Jũmenijicũi toivaicõjeino mãcarõpedeca Jesũre tequemavũ maja, maje mearore jiyede ãre burrojicũrã tubarĩ dayũre”, arãjivũ barejacaãã ñũja. ¹⁷ Ina põeva, Jesúque curivũ bácavũ ãi õrejaiye báquede Lázarore ãi etaquiyepẽ ayũ cũracobede jocarĩ arũcu cojedeca, coyũre cuivũ barejãimada iye ne jáiye báquede. ¹⁸ Ne nõpe coyũiye boje no Jesũi jáðovaino mãcarõre põeva ne ðarĩ majibede, Jesũre copũradarejaima caivũ ina obedivũ põeva. ¹⁹ Que baru ina fariseova ne bajumia arejaimada:

— Coyũrĩ oabevũ maja. Majare jápiabema ina põeva. Quédada Jesúque yõvarãnuñãma caivũ, arejaimada na, ne bajumia yãvaiyũ.

Apevũ Greciacavũ Jesũre ne voino
(Mt 10.38-39, 16.24-25; Mr 8.34-35; Lc 9.23-24, 17.33)

²⁰ Apevũ judíova ãnevũ, Jũmenijicũre mearore jávaiyũ, ina obedivũ põeva jẽneboi Jũmenijicũre mearore jĩnanurejaimada Jerusalén ãmicũriĩmaroita Pascua torojũve teinũmũre. ²¹ Na Felipe borotenanurejaimada. Galilea ãmicũriĩjoborõcarõ ñmaro Betsaida ãmicũriĩmarocacũ barejáme Felipe.

— Jesúque boroteiyũrĩduivũbu ñũja, arejaimada Felipe.

²² Andrés yebai nrũri, coyũrejameã Felipe ne borore. No yõboi, ina pũcarã nrũri, coyũrãearejaimada Jesũre ina judíova ãnevũ ne borore.

²³ Yõpe arĩ, coyũrejame ñũjare Jesús: — Dãjãravũ ji ãvaijãravũ caivũ. Caride jipacu Jũmenijicũ jáðovacũyũme yũre,

ñi daroimu mácsure ñmure, meacu bajure. ²⁴Jáve soyuyubu mujare: Jaunu yure ji yaiquinore. Jèvari soyurĩ soyuquijivũ. Yópe cūináyabe oteiyabede maje otebedu, quénora cūinárora mauteinomu no. Ëbenita iyabe oteiyabede maje otedu, joborõ jívui cuede cãreja, yainope teni, píarĩ cūpururi ñuyavu. Nopedeca ji yaidú, obedivũ pøeva mamañme curivũ bujarãjarama, ji yaiye boje. ²⁵Ñai pøecu ñi baju jescu baru, bíjacuyume ñ. Ëbenita ñai pøecu jecubecu baru ñi baju ijãravure, jãravũ cūiméjãravũ baquinóre cuvacyume ñ. ²⁶Ácu pøecu yure memecaiyucu baru, yure ñi ju aiye jaunu ñre. Que baru yáque ji curõi cucuyume ñ. Aru ácu pøecu yure memecaru, ñre pueðacyume jipacu, arejame Jesús.

Jesús ñi soyũno ñi yaiquinore

²⁷Nãre soyure ñurejame Jesús:

—Caride urarõ chõivũ yũ ji ñmei. ¿Aipe ajeba yũ jipacure? ¿Yure ñãjino vaijãrõri no, ajeba yũ jipacure? Abevũ yũ nópe. Ñãjinore vaicýyũ darejacacu yũ ijãravui, arejame Jesús ñujare, ñi bueimarare.

²⁸Ñujare nópe soyurĩ bujarĩ, arejame jipacure Jesús:

—Mu, jipacu, pøevare jãðovajacu mi baju meacu bajure, arejame jipacure.

Dinũmũta cavarõ mearo Jũmenijicui curõre jocarĩ yãvarĩ darorejavũ: “Meavu mi que aino. Que ðacacu javeta. Aru que ðacuyũtu yũ cojedeca”, arejavũ no yãvarĩ daroino.

²⁹Ina obedivũ pøeva ñujaque curivũ no bujinore jãpiarejaima.

—Õpo tuinomebu, arejaima nãcavu.

—Que ãmevũ. Cūinãcu ángele yãvarĩ daroyubebu ñre, arejaima arevũ.

³⁰Ëbenita Jesús arejame:

—No yãvarĩ daroino yure boje ãmevũ. Quénora mujare bojetamu no yãvarĩ daroino. ³¹Caride ijãravũcavure ne ãmene jãðovari, coreóvare ðacyume Jũmenijicu caivũ yure ju abevũ ñãjinajivure cūinãjavã. Caride

ijãravũcavu ne jabocure, ñai abujuvai jabocure, jarũvacuyume Jũmenijicu.

³²Ëbenita yũ ne jocusurã pèvari jèori jãmuórajimũ, yurecabu obedivũ pøevare ju are ðacuyũ yure, arejame Jesús.

³³Nópe arĩ soyuyũ, aipe ãrojae teni ñi yaiquinore soyuyũ barejãme Jesús. ³⁴Ëi que aiyede, yópe arejaima ñre jãpiaivũ:

—Jũmenijicu ñi yãvaiyede toivaicõjeneaquemavu, ñuje majinajiyere ayũ ñi daroquimure yaibécu bacuyure cainũmũ. ¿Aipe teni “Jũmenijicui daroimu mácu ñmure ne jocusurã pèvari jèori jãmuóimũ macuyũtu yũ”, ayurũ mu? ¿Yécu páyurũ mu? ¿Namema Jũmenijicui daroimu mácu ñmure? arejaima Jesús.

³⁵Nãre yãvarejame cojedeca Jesús:

—Ñai cucũñuyucure jãravure, aviã ñi boiyede, cuiye jaunu ñre. Que baru ñemié tuiyede, majibebi ári ñi ñnure. Quédeca quĩjino baju cucuyũtu yũ mujaque pøoiðocupe, jãðovañũ Jũmenijicui jãvene. Mujare majide ðaivũ Jũmenijicui dápiaye jãvene ji bueiyeque. Que baru muja diede majibevũ baru caride, ji cuede muje jêneboi cãreja, ji nuriburu yóbore apa ñeminoi cuivure paivũ barãjãramu muja. ³⁶Que baru ji cuere cãreja muje jêneboi, ji bueiyede ju ajarã muja. Yúcavu tenajãramu muja, ji bueiyede ju aivũ baru, arejame nãre Jesús.

Nópe ayũ bácu, nãre dupini ñurejame.

³⁷Pøeva ne jãiyede ñre ne ðarĩ majibede ðayureca Jesús, ñre ju abedejaima na.

Jesúre obedivũ judíova ne ju abeno (Mr 4.12; Lc 8.10)

³⁸Caiye iye vaidéjavũ yópe ñai Jũmenijicui yãvaiyede soyucaipøecu Isaías bácu “Yópe tequiyebu” arĩ, ñi toivaino mácarõpedeca.

Mu, ji jabocu, obebejina baju ju adama ñuje yãvaiyede. Jũmenijicu ñi paruéde jãðovaimi obebejina bajure, arĩ toivaicõjeneaquemavu Jũmenijicu Isaías bácu.

³⁹Que baru nãcapũravũ ju aivũ bujabedejaima. Bedíova

cojedeca Jūmenijicu, yópe arí,
toivaicōjenejaquemavu Isafas bácuere:

⁴⁰ Jári eabevure ðaibi náre Jūmenijicu,
ne jámenajiyepere ayu. Aru dápiarí
majibede ðaibi náre, ne jápiarí
eabenajiyepere ayu. Aru Jūmenijicu
yópe arí, coyuiibi: “Nópe ðaivu
yu, ne chíori oatvabenajiyepere
ayu ne ðaiyede. Que baru
náre meadabecuyumu”, arí
toivaicōjenejaquemavu Isafas
bácuere Jūmenijicu.

⁴¹ Nópe arejaquemavu Isafas bácu ñi
jáiyepere báque boje Jesucristoi mearore
Jūmenijicu jáðovaiye báquede nore aru
ñi coyuiye báque boje ñra.

⁴² Ñbenita obedivu pōeva ne
jabovacavu Jesúre majini, ju arejaima
ñre. Ñbenita fariseovare jidurí, “Jesúque
nuivabu ñña”, abedejaima ne jápiayede.
Jipocamia “ ‘Jesúbe Jūmenijicu
daroimu mácu Cristo’, aivure maje
cójjiñamine jaetovarājaramu ñña, ne
cójjibenajiyepere aivu ññaque bediova
cojedeca”, arejaima ña ina fariseova. Que
baru fariseovare jidurivu, bi arejaima
na Jesúre ju aivu. ⁴³ Jūmenijicu
mearo jáiyede náre ñbeni, pñeno baju
vorejaima pōeva ne mearo jáiyede náre.

Pōeva ne ñájinajino Jesús ñi yávaie boje

⁴⁴ Yópe arí, bujino yávarí darorejame
Jesús:

—Ácu pōecu yure ju ayu baru, yure
daroyu bácuere máre ju aibi ñ. ⁴⁵ Aru
quédecabu. Ácu pōecu yure jáñu
maru, yure daroyu bácuere máre jáimi
ñ. ⁴⁶ Ijáravui darejacacu yu. Pōeva ne
majinajiyepere ayu Jūmenijicure, yu
pñonpe teyu buesudarejacacu náre.
Yure que teyure ju aivu, ñeminoi ne
mautebenajiyepere ayu yópe Jūmenijicure
majibevure, darejacacu yu. ⁴⁷ Ñbenita
ácu pōecu ji coyuiyede járiayvacari
ju abedu, yu ñre ñáine ðabecubu ñi
ámeina teiye boje caride. Pōevare
ne ámeina teiye boje ñáine ðacuyu
ðabedejacacu. Quépora pōeva
bíjajurivure meadacudayu darejacacu

yu. ⁴⁸ Ácu pōecu yure ñbecu baru
aru ji coyuiyede máre ju abecu baru,
ñrecabe jáve ñáicuyu. Ñi ju abe boje ji
coyuiyede, ñáicuyume buojaquijáravu
baquinói. ⁴⁹ Ji baju ji majiéque coyubevu
yu. Quépora jipacu, yure daroyu bácu,
yure coyucōjeimi ji coyuiye caiyede.
Que baru pōeva ñájinajarama, ne ju
abe boje ji coyuiyede. ⁵⁰ Coreóvaivu yu
iyede: Pōeva yure ju aivu baru yópe
jipacu ðaicōjeiyepere náre, cuvarejarama
járavu cūiméjáravu baquinóre. Que baru
yópe jipacu coyucōjeiyepeda coyuyabu
mujare, arejame Jesús.

Jesús ñi bueimarare ne cubobare ñi joaino

(Mt 10.24, 40, 20.28; Mr 9.37, 10.45;
Lc 6.40, 9.48, 10.16, 22.27; Jn 15.20)

13 ¹ Pascua torojuve teijáravu
jipocacajáravu barejávñ.
Coreóvarejaquemavu Jesús dijáravu
eainore ñi nuquinore ijáravure jocarí,
copaicuyu jipacu yebai. Ina ijáravucavure
ñi jinare caipñña jecubi ñ. Que teni
ñujare jecurejaquemavu ñi yayeta.

² Nainú baju ñña ñi bueimaraque
aññ marejáme Jesús. Javeta ññjacacu
Judas, Simón Iscariotei mácuere yópe
arí, “Jesúre ñi mauvare jēni jíquijivu yu”,
dápiare ðarejaquemavu ñai abujuvai
jabocu, ñi jēni jíquiyepere ayu Jesúre ñi
mauvare. ³ Jesús coreóvarejaquemavu
majepacu Jūmenijicure caiyede aru
caivure purucvaicōjeññ mácuere ñre
pauéque. Aru coreóvarejaquemavu
ñi baju Jūmenijicu daroimu mácu
aru copaicuyu ñi yebai. ⁴ Que baru
coreóvayu, ññje ñiyedeca nacajari, ñi
pñenocacajede durí, epeni, tñreicajede
ñni, járióri jēori buorejame. ⁵ Que teyu
bácu oco doaibure yuarí buivárejame,
ññje cubobare joacuyu. Ññje cubobare
joarí búrejame. Ññjacacu cūinácure
joaríburu yóboi, tñreicaje ñi buoicajeque
tñrenejame. ⁶ Joarí tñreni ñujare coapa,
Simón Pedrore eacunñrejame Jesús. Aru
Pedro arejame ñre:

—Mu, ji jabocu, ¿yure ji cubobare
joacuyurñ mu? arejame.

⁷Jesús arejame:

—Ji cari ðaiyede coreóvabevu mu. Ûbenita no yóboi coreóvacuyumu, arejame.

⁸Pedro arejame Jesúre:

—Yure ji cubobare ye joaicōjemevu mure, arejame.

Aru Jesús arejame úre:

—Dinumu yure joaicōjemecu baru, yúcasu ámesuyumu mu, arejame.

⁹Pedro arejame:

—Mu, ji jabocu, ji cuboba matuinora joarí dajocabejacu mu. Ji jipobure aru ji puruáre máre joajacu mu, arejame.

¹⁰Aru Jesús arejame ñujare:

—Caibaju joaimu mácure bedióva cojedeca caibaju joaiye jaubevu. Quénora cubobare joaiye javvu, docucuru. Javeta caibaju joaimara mácavure paivutamu mija, Jūmenijicui árūmeteiye báque boje muje ámeina teiyede muje chīori dápíarí, diede jaruvarí, ju aye báquede yure. Ûbenita mujacacu cūinácu caibaju joaimu mácure ámemi ũ, ũi chíomeni jaruvaiyube boje ũi ámeina teiyede, arejame ñujare Jesús.

¹¹Ûre jēne ðacuyure

coreóvarejaquemavu Jesús. Que baru “Mujacacu caibaju joaimu mácu ámemi ũ”, arejame ũ.

¹²Que teni ñuje cubobare joarí buojarí, ũi puenocacajede bedióva cojedeca ĩni, dorejame Jesús. Dorí buojarí, áivarā dobacudarí, yópe ñujare arí coyurejame:

—¿Ji cari ðaiye báquede, coreóvadarāru mija? ¹³Yure “bueipōescu” aru “ñuje jabocu” máre aivubu mija. Muje nópe aye meavu yure. Quédecabu yu. Mujare bueipōescubu. Aru muje jabocubu yu. ¹⁴Yu muje jabocuvacari aru muje bueipōescuvacari yebacacupe muje cubobare joaivu yu. Que baru quédeca ðajarā mija. Apevu yure ju aipōeva ne cubobare joaiye javvu mujare coara. ¹⁵Que ðaivu yu mujare jáðovacuyu aipe ðaiye jaurōre mujare. Que barureca ji ðaiyepedeca ðajarā mija mujevure. ¹⁶Jāve coyuyubu mujare: Yebacacu cubebi ũi jabocure vainí

tuyu. Aru daroimu cubebi úre daroyure vainí tuyu máre. ¹⁷Iye cari coyuyede coreóvaivubu mija caride. Que baru popedeca ðaivu baru, torojurājaramu mija.

¹⁸Ûbenita ji beoimara mácavure coreóvaivu yu. Que baru “Torojurājaramu”, ji aiyede mija caivure abevu yu. Yópe Jūmenijicui yávaiyede ũi toivaicōjeiye báquepedeca vaiquiye javvu yure: “Nai añu mácu yúque, yure boaiyubi”, arí toivaicōjenejaquemavu Jūmenijicu. ¹⁹Iye vaiquiye jipocamia nópe coyuívu mujare, muje ju arájiyepere ayu jávene “Jūmenijicui mácubu yu” ji aino mácarōre. Ji coyuíno mácarōpe vainíburu yóboi, coreóvarājaramu mija. ²⁰Jāve coyuyubu mujare: Ácu pōescu ji jaroimarare me jacoruyu baru, yure máre me jacoruíbi ũ. Ácu pōescu yure me jacoruyu baru, yure daroyu bácuere máre me jacoruíbi ũ.

Que arí, coyurejame Jesús ñuja ũi bueimarare.

Jesús ũi coyuíno Judas ũi jēni jíquinore ũi mauvare

(Mt 26.20-25; Mr 14.17-21; Lc 22.21-23)

²¹Nópe arí coyuyu bácu urarō chíorejame Jesús ũi ũmei. Chíori, ñujare yópe yávarí darorejame cojedeca ye yavebecuva:

—Jāve coyuyubu mujare: Cūinácu mujacacu yure ji mauvare jēni jícuyme ũ, arejame Jesús.

²²Ûi que aiyede ñuje bajumia járejacarā ñuja, cucumaivu. Ácu ñujacacu ũi aimure majibedecarā ñuja. ²³Cūinácu ñujacacu pare Jesús ũi jecumu Jesús yebai ũi tucavai dobarejacacu yu. ²⁴Yure ũi puru jabióvarí, jēniari jáicōjenejame Simón Pedro:

—“¿Ácuba mure jēni jícuyme?” arí, Jesúre jēniari jájacu mu, arejame yure Pedro. Ûi puruque nópe arejame.

²⁵Nópe ðayure jáñu, Jesúre pueno cadajie nuri, jēniari járejacacu yu yavenijiena:

—Mu, ji jabocu, ácuba ũ, mure jēni jícuyme? arejacacu yu.

²⁶Ji nópe arura, ju arejame Jesús:
—Ji páujevede jórí, ji jímu, ñ
macayúme yure jēni jíyu ji mauvare,
arejame Jesús.

Que arí, páure cōpavari íni, jórí,
Judare, Simón Iscariotei mácure,
jídejame. ²⁷Dinunumiareca Judas
diede íñuva, cūiná Satanás ñaicōjeni
bárejaquemavu úre. Aru úre arejame
Jesús:

—Maumena mi ñaiyuede ñacunñjacu
mu, arejame Judare Jesús.

²⁸Ûbenita ñuja náque dobarivu
tuoiva yebai aipe teni Jesús ñi que
ainore Judare coreóvabedejaca
cāreja. ²⁹Judas ñi cūvae boje ñuje
tāuturare, ñujacavu, “Ñuje ārajiyede
torojuve teinumu bojedaicōjeñume
Jesús Judare”, arí dápiarejaquemavu.
Aru apēvu ñujacavu, “Cūve cūvabevure
tāuturare jícnucicōjeñume Jesús úre”,
arí dápiarejaquemavu. ³⁰Iye páure íñu
mácu, cūiná etarí ñurejame Judas. Ñami
marejávū ñi etarí ñuiyede.

Jesús ñi ñaicōjeino yóbocarō

(Jn 7.34, 15.12-17; 1 Jn 2.7, 3.23; 2 Jn 5)

³¹Judas ñi etaríburu yóboi, ñujare
yópe arí, yávorejame Jesús:

—Caride pōeva járajivubu
Jūmenijicui daroimu mácu ñmure
meacu bajure. Caride yu, Jūmenijicui
daroimu mácu ñmure, pōevare járe
ñajijivuvu Jūmenijicu meacu bajure.

³²Jūmenijicui daroimu mácu ñmure
ji jádovaru Jūmenijicu meacu bajure,
Jūmenijicuvacari pōevare jádovacuyume
ñi daroimu mácu meacu bajure.

Aru maumejeneca que ñacuyume
Jūmenijicu. ³³Muja, jímajinare raivū,
majióvarō bajura scuyumu ñujaque.
Yure vorājaramu muja. Ûbenita yópe
ji coyūino mácarōpe maje jabovare,
ñujare máre coyuyubu yu: Ji ñuquinore
ñiye majibevu muja. ³⁴Caride
ñaicōjeino yóbocarōre ñaicōjequijivuvu
yu: Muje bajumia ñjarā muja yópe ji
ñepedeca ñujare. Muje bajumia jecñjarā
muja. ³⁵Que ñaivure muje bajumia
ñivure jáivuvu, majinajarama caivuvu ji

bueimara bajure ñujare, arejame ñujare
Jesús.

Jesús ñi coyūino Pedrorre ñi “Jesúre
yu coreóvabevu” aquinore
(Mt 26.31-35; Mr 14.27-31; Lc 22.31-34)

³⁶Jesús que ayure, yópe arejame
Simón Pedro:

—Mu, ji jabocu, íári ñuñuvu mu?
arejame.

Jesús arejame:

—Ji ñuquinore caride ñari buojabevu
mu. Ûbenita ji ñaríburu yóboi, mu máre
ñacuyumu, arejame.

³⁷Pedro arejame:

—Mu, ji jabocu, íaipe teni caride
múque ñari buojabedi yu? Jáuru, mure
cadateni, yaiquijivuvu yu, arejame.

³⁸Aru Jesús arejame Pedrorre:

—Í“Mure boje yaiquijivuvu yu”, ayurū
mu? Jáve coyuyubu mure: “Jesúre yu
coreóvabevu” acuyumu mu cari ñami,
cáyu ñi órejaquiyu jipocai. Aru yóbescue
nópe acuyumu mu, arejame Pedrorre
Jesús.

Jesús pōevare ñi eare ñainore

Jūmenijicu yebai

(Mt 7.7-11, 11.27; Lc 11.9-13; Jn
1.18, 6.46, 15.7, 16, 16.23-24; Hch
4.12; 1 Jn 3.21-22, 5.14-15)

14 ¹Que ayu bácu, ñujare yópe
coyurejame Jesús:

—Chíomejara muja. Jūmenijicure
ju ajarā muja. Úre ju arí, yure máre
ju ajarā muja. ²Jipacui curōi tucubua
ure cūvu. Que āmenu, yópe arí ñujare
coyubejebu yu. Nore muje curājiyede
meadacacuyumu yu. ³Nore ñuri,
meadaríburu yóboi, copaidacuyumu
yu cojedeca, ñujare íni ñavacudacuyu,
muje curājiyere ayu yáque. ⁴Ji
ñuquinore majivuvu muja, yópe pōeva
ne majiére ma ñuimare, arejame Jesús,
ñujare coyuyuvu.

⁵Tomás arejame Jesús:

—Mu, ji jabocu, mi ñuquinore ye
majibevu ñuja. ÍAipe ayurū mu, “Ji
ñuquinore majivuvu muja” ayu? arejame.

⁶Jesús arejame:

—Yurecabu pōevare eare ðayñ Jūmenijicū yebai yópe ma nuinope cavarō mearoi. Yurecabu pōevare majide ðayñ Jūmenijicūi dápiaiye jāvene aru cure ðayñ mamaūmeque máre. Ñame eabenama jipacu yebare, ji nuvameni náre. ⁷Muja yure jāve coreóvaivñ baru, jipacure máre coreóvajebu muja. Caride jāve úre coreóvaivñbu muja cainumua. Aru úre jáðavñ muja máre, arí coyurejame ñujare Jesús.

⁸Úi que aiyede, Felipe arejame Jesúre: —Mñ, ji jabocu, majeracure jáðovajacu mñ. Quénora meaquiyebu ñujare, arejame ñ.

⁹Úre ju ayñ arejame Jesús: —Mñ, Felipe, ¿que joede mujaque ji cuedeca, yure coreóvabecurū cāreja? Ácu pōecu jáññ yure, jáimi jipacure máre. Que baru, ¿aípe tení “Majeracure jáðovajacu”, ayurñ mñ yure? ¹⁰Yu cuvñ jipacuque. Aru jipacu cubi yúque cūinávure. ¿Iye ji coyuiyede, ju ayurñ mu? Iye mujare ji coyuiye ji bajuma ji dápiaiño āmevñ. Quénora jipacurecabe, ñai cūcu yúque cainumua, yure coyure ðayñ yópe ñi urōpe. Aru ji ðaiyede máre ji bajuma ðayñ āmevñ. Quénora jipacurecabe yure ðaicōjeññ. ¹¹Ji coyūino mácarōre, “Cuvñ yñ jipacuque aru jipacu cubi yúque cūinávure”, ju ajarā muja. Ūbenita ju abevñ baru ji coyūino mácarōre, quénora ju ajarā yure ji ðaiye báque boje. ¹²Jāve coyuyubu mujare: Ácu pōecu yure ju ayñ, ji ðaiye báquepe raiyede ðacuyume ñ. Aru ape raiye me rueno raguéde ðacuyume, ji nuquiye boje jipacu yebai. ¹³Caiye muje jēniayeyede yure ji āmiái ðacacuyumu. Yópe muje jēniayepedeca ðacuyumu yñ, jáðovacuyñ jipacu meacu bajure. ¹⁴Áde muje jēniarajiyede yure ji āmiái, ji raguéque, mujare ðacacuyumu yñ, arejame Jesús.

Jesús “Jipacu Espiritu Santore ðarocuyume mujare” arí, ñi coyūino

¹⁵Ñujare coyure nurejame Jesús: —Muja urivñ baru yure, caiye ji ðaicōjeiyere ðarājaramu muja.

¹⁶Yurecabu jipacure jēniacuyñ mujare boje, ñi daroquiyere ayñ apescu cadateipōescure. Ū cainumua cūcuyume mujaque, jipacu daroquimu.

¹⁷Ūrecabe Jūmenijicūi Espiritu pōevare coreóvare ðacuyñ Jūmenijicūi dápiaiye jāvene. Ijāravucavñ Jūmenijicure ju abevñ úre jacopuivñ buojabenama, ne jári eabe boje ñi ðaiyede aru ne coreóvaiye majibe boje aipe ārojacure úre. Ūbenita mujacarpūravñ coreóvarājaramu aipe ārojacure úre, ñi mautequiye boje mujaque. Mujaque curí, ðajocabecuyume mujare cainumua. ¹⁸Tēumarape ðabecubu yñ mujare. Mujare jocarí nūmecubu yñ. Bedióna cojedeca copaidacuyumu, cūcuyñ mujaque.

¹⁹Quíjino baju yure jámenajarama ijāravucavñ yure ju abevñ. Ūbenita mujacarpūravñ yure járaramu. Bedióna cojedeca apucuyumu yñ. Que baru muja máre cainumua apurivñ barājaramu muja mamaūmeque. ²⁰Ānijāravñ, maje corūrajijāravñ baquinóre, jipacuque ji cuede majinajaramu muja, aru yúque muje cuede, aru mujaque ji cuede máre. Maja cūinávure curājaramu maja. ²¹Ácu pōecu ji ðaicōjeiye caiyede ju arí ðayñ, úrecabe yure ucu. Aru ñai yure ucu, úrecabe jipacuñ uquimñ. Yñ máre úre, yure ucure, ucuyumu. Aru ji bajure jáðovacuyumu úre, arejame ñujare Jesús.

²²Ūi que aríburu yóboi, cūinácu ñujacacu, ñi āmiái Judas, jēniari járejame Jesúre. (Judas Iscariote āmenejame. Apescu Judas barejáme ñ.) Yópe arí, jēniari járejame Jesúre:

—Mñ, ji jabocu, ¿aípe ðarí ñuja, mñre urivñ, mi bajure jáðovacuyurñ, Ūbenita apevñre, ijāravucavñ mñre ju abevñre, mi bajure jáðovamecuyurñ mu? arejame Judas.

²³Jesús, yópe arí, coyurejame:

—Ácu pōecu yure ucu, ji coyuiyede ju acuyume. Ūrecabe jipacuñ uquimñ. Yñ aru jipacumaque ñi yebai nñri, úque curājaramu ñuja. ²⁴Ácu pōecu yure ubecu, ji coyuiyede ju abebi. Ji coyuiye ji bajuma ji dápiaiño āmevñ.

Quénora jipacu, yure daroyu bácu, jiede coyuyutamu yu. ²⁵Que arí, coyuiyu yu mujare, ji cuede cãreja mũajaque. ²⁶Ûbenita mũajaque ji cubenũmure ñai Espiritu Santore, cadateipõecure, ñarocuyume mujare jipacu ji parueque. Ûrecabe caiyede mujare buescuy. Aru ji coyuiye báque caiyede mujare ãrre ñacuyume ñ.

²⁷Mujare, meaũme cãrijimeũme curivure, erescuyumu yu. Ji cãrijimeũmene mujare jíquijivũ. Ijãravũcavũ mujare ji jíyere paiyede jíye majibema. Que baru cãrijimevũva chĩomejara aru jídubejarã mũa, ayũbu yu. ²⁸Mujare ji coyũino mácarõre, “Yu nucuyumu. Ûbenita mũaje yebai copaidacuyumu yu” ainore, járiadañũ mũa. Yure urivũ baru, ji nucuyiyede jipacu yebai torojũebu mũa. Jipacu ji pũeno parucube. Que baru ñi yebai nucuyumu yu. Aru torojue jaũvũ mujare. ²⁹Nõpe coyũiva mujare caride, iye vaiquíye jipocamia, mũaje coreõvarãjiyere ayũ jávene ji coyũino mácarõre. ³⁰Caride ijãravũcavũ ne jabocũ, ñai abujuvai jabocũ, daibi. Que baru urarõ baju mujare coyubequijivũ yu. Û yure ñi ñaicõjeiye parue cubecureca nucuyumu yu. ³¹Vaiquíyebu yure yõpe ji aiyẽ báquepedeca, ijãravũcavũ ne coreõvarãjiyere ayũ ji uede jipacure. Que baru caiye jipacũ ñaicõjeiyede ñaivũ yu. Jãrica, etarevũ, arejame ñũjare Jesús.

Jesús “Oteiyaimu yobedope páyũbu” arí ñi coyũino

(Jn 13.34, 15.17; 1 Jn 3.23; 2 Jn 5)

15 ¹Ñũa ñi bueimarare, yõpe arí, coyure nurejame Jesús:

—Yurecabu oteiyaimu yobedope páyũ. Aru jipacurecabe dimure coreipõecu, oteipõecureca páyũ.

²Aru dimu cavajĩbũare paivũtamu mũa. Ñmecavabũ, jẽmecavabũare burarĩ jarũvaibi jipacu. Meacavabũ, jẽcavabũare majié burarĩ, meadaibi jipacu, oteipõecu ñi ñaiyere ñayũ. Que

teni jẽcavabũare urarõ jẽne ñaibi jipacu. ³Mũaje ju aiyẽ boje ji coyuiyede, javeta mujare meadacacu yu. Que baru jipacu ñi meadaimaramu mũa. ⁴Yũque cũjarã mũa. Aru yu mũajaque cuscuyumu. Cũinãvũpe curãjaramu maja. Cavabũ cubedu dimure, cainidũa jẽmenvũ. Quédecabu mujare. Yũque cubevũ baru, Jũmenijicũi urõpe ñabenamu. Yũque mautebevũ baru, mearore, yõpe ji memeiyepe, ñabejebu mũa. Põeva mearore ñabevũbu, yõpe cavabũa jẽidũa cubepe.

⁵Oteiyaimu yobedope páyũbu yu. Aru dimu cavabũare paivũbu mũa. Ácu põecu cũcu baru yũque aru ji curu máre ñque cũinãvũpe, ñrecabe urarõ mearore ñacuyũ yõpe Jũmenijicũi urõpe. Ûbenita yũque cubecu baru, Jũmenijicũi urõpe ñaiye majibebi ñ. ⁶Yũque mautebecu, oteipõecu ñi burarĩ jarũvaicavabũpe paicavabube ñ. Dicavabũ yaicavabũ jarũvaquicavabũre apesu jevaiyame meadayũ. Dicavabũre jevarĩ, pecatoro ñarĩ, nuvaiyame ñ nore jocarĩ, juarĩ jarũvacũũ.

⁷Mũa yure ñajocabevũ baru, aru ji coyuiyede ju are nuivũ baru, áde mũaje jẽniaiyede mũaje urõpe cũvarãjaramu mũa. ⁸Mũaje urarõ mearo ñaiyede jáve ji bueimara ñarĩ jádovaiyũbu mũa. Põeva mujare nõpe ñaivũre jáivũ, jipacure mearore jĩnajarama na. ⁹Yure jipacũ uepedeca vũvũ yu mujare. Que baru ji umarape mautejarã mũa. ¹⁰Ji ñaicõjeiye caiyede ju arĩ ñaivũ baru, ji umara mautenajaramu mũa. Nopedeca jipacũ ñaicõjeiye caiyede ju arĩ ñayũ, ñi umu mauteivũ yu.

¹¹Que arí, coyuiyu yu mujare, mũaje torojũrãjiyere ayũ ji torojũuepedeca, aru mũaje buõjarãjiyere ayũ torojũrivũ mũaje ñme jaubevũva. ¹²Ji ñaicõjeino mujare yõpe ainotamu: Mũaje bajumia ñjarã mũa yõpe mujare ji uepedeca. ¹³Põecu ñi yaidũ ñi yõvaimarare boje, ape ñi ñaiye cubevũ, ñi jádovaquiyere náre ucure. ¹⁴Ji ñaicõjeiyede ju arĩ ñaivũ baru, ji umaramu mũa. ¹⁵Caride “yure memecaivũ” abecubu mujare. Quénora

“ji yóvaimara” acnyũtu mujare. Põescure memecaivũ ne jabocũi dápianore majibema na. Ûbenita põescũi yóvaimara ãi dápianore majima. Aru yũre jipacũi jápiadovaiye báquede mujare soyũiye jebeivũ yũ. ¹⁶Yũre vobeteavũ muja. Yũ batecácu mujare vorĩ beoyũ. Jipacũi urõpe muje ðarãjiyepe ayũ, mujare beorĩ epecacu. Ji epeimaramu muja, urarõ mearore ðarãjivũ yópe Jũmenijicũi urõpe. Aru muje ðarãjiye bĩjabequiyebu. Quénora mautequiyebu. Que baru áde muje jëniyaiyede jipacũre ji ámiái, ðacacuyũme ã yópe muje jëniyaiyepedeca. ¹⁷Que baru yópe arĩ, soyũyũbu yũ mujare cojedeca: Muje bajumia urarã muja, arĩ soyũrejame Jesús, ñujare bueyu.

Jesús ã jinaque ijãravũcavũ ne ubemara

(Mt 10.24; Lc 6.40; Jn 13.16, 17.14-18)

¹⁸Yópe arĩ, soyũre ñurejame Jesús: —Ijãravũcavũ Jũmenijicure ju abevũ mujare ubenajarama. Ûbenita coreóvarã iyede: Mujare ne ubenajiye jipocai, yũre ubeteima na. ¹⁹Muja ijãravũcavũ baju baru, mujare ñjebu ijãravũcavũ Jũmenijicure ju abevũ, yópe ne ñepedeca ne bajumia. Ûbenita yũvacari mujare beorĩ epecacu jivũ barãjiyẽpe ayũ ijãravũcavũre jocarĩ. Que baru náque curivũvacari, nácanũ ámevũ muja. Que baru mujare ubema na. ²⁰Ji soyũvarede me arũjara muja. Yebacacu cubebi ãi jabocure vainĩ tuyũ. Apevu ñájine ðaima yũre. Que baru mujare máre ñájine ðarãjarama. Ûbenita apevu ji soyũiyede ju aima. Que baru mujare máre ju arãjarama. ²¹Yũcavũbu muja. Aru ina ijãravũcavũ yũre daroyũ bácuere majibema na. Que baru mujare máre ñájine ðarãjarama na.

²²Náre ji soyũcudabedu, boropatebejebu ne ámeina teiye boje. Ûbenita ji soyũcudaiye báque boje ijãravũcavũre, ye bojedabemarava cuma na ne ámeina teiyede. ²³Ácu põescu ubescu yũre, jipacũre máre ubebi ã. ²⁴Põeva ne ðarĩ majibe bajure

jãdovacacu yũ yócvũre. Apecu cubebi ji ðaiyere paiyede ðarĩ majicu. Ji que ðabedu ne jáiyede, boropatebejebu ne ámeina teiye boje. Ûbenita ji nópe ðaiyede jáðama na. Aru jáivũvacari, yũre ubeni, jipacũre máre ubema na. ²⁵Caiye iye vaivũ yópe Jũmenijicũi toivaicõjeiye báquepedeca ãi yáva iyede: “Jaurabeda yũre ubema”, arĩ toivaicõjeneaquemavũ Jũmenijicũ.

²⁶Ûbenita ñai Espiritu Santo, mujare çadateipõescu, dacuyũme muje yebai. Ûrecabe põevare coreóvare ðacuyũ Jũmenijicũi dápiaiye jávene. Ûre jipacũi curõre jocarĩ darocuyũtu yũ muje yebai. Ûi edarĩburu yóboi, Ûrecabe soyũcuyũ ji borore ãi jáiye báque boje. ²⁷Aru muja mamarũmũre ji bueni buinũmũre yũque çateavũ muja. Pũ caride máre curivũbu yũque. Que baru muja máre soyũrãjivũbu ji borore muje jáiye báque boje, arejame Jesús.

16 ¹Yópe arĩ, soyũre ñurejame Jesús:

—Nópe soyũvũ yũ mujare, muje dajocabenajiyepe ayũ muje ju aiye yũre. ²Judíovai jabova jaetovaicõjenajarama mujare ne cójijĩñamiare jocarĩ. Apejãravũa ðaquijãravũa baquiyé põeva ne boarĩ jarũvarãjiyede mujare, “Nópe ðarĩ Jũmenijicure memecaivũbu maja”, arĩ dápjarãjarama ina mujare boarãjivũ. ³Que ðarãjarama, yũre aru jipacũre máre ne coreóvabe boje. ⁴Nópe soyũvũ yũ mujare, muje arũrajiyepere ayũ iye ji soyũiye báquede ãnijãravũa, ne nópe ðarãjijãravũa baquiyéde mujare, arĩ soyũrejame Jesús.

Jesús ãi soyũino Espiritu Santoi ðaquinore

Yópe arĩ, soyũre ñurejame Jesús: —Ji bueni buinũmũre caiye iye ji cari soyũiyede mujare soyũbetecacu yũ, ji cue boje mujaque. ⁵Ûbenita caride yũre daroyũ bácu yebai ñscuyũtu yũ. Ñscuyũreca mujacacu cubebi, “¿Ári ñscuyũgũ mu?” arĩ jëniari jáñũ yũre. ⁶Quénora urarõ çhíoivũbu muja muje

úmei ji nópe arí coyúye boje. ⁷Ëbenita yácarpūravu mujare yávaiyede jávene coyuyubu ya. Ji nuquino meaquiyebu mujare. Ji numenu, mujare cađateyu bascuú dabejebu. Ëbenita ya nuñu mácu darocuyumu úre mujare.

⁸Dacuyu edayu bácu ijāravucavu boropateivure ne āmeina teiye boje coreóvare đacuyume. Yure boropatebecure Jūmenijicui jáinore coreóvare đacuyume. Jūmenijicu nājine đacuyure pōevare ne āmeina teiye boje máre coreóvare đacuyume ũ, ji daroquimu. ⁹Nāre coreóvare đacuyume āmeina teivu boropateivure ne ju abe boje yure. ¹⁰Nāre coreóvare đacuyume yure boropatebecure Jūmenijicui jáinore, ji nuquiye boje jipacu yebai. Que baru yure jámenajaramu mja. ¹¹Aru náre coreóvare đacuyume Jūmenijicu nājine đacuyure pōevare ne āmeina teiye boje, Jūmenijicui “Nājicuyumu mu”, ũi jave coyúye báque boje ijāravucavu ne jabocure, nāi abujuvai jabocure.

¹²Urarō mujare ji coyujuroe cuvavu. Ëbenita cūinā caiyede jápiayie majibevubu mja. ¹³Ëbenita nāi Espiritu Santo đacuyume, pōevare coreóvare đacuyu Jūmenijicui yávaiyede jávene. Úrecabe coreóvare đacuyu mujare caiye Jūmenijicui yávaiyede jávene. Aru iye vaiquiyede coyucuyume mujare. ũi baju majiéque coyubecube. ¹⁴Ji majié matuiyede jápiayu bácu, diede mujare coreóvare đacuyume. Que baru yure mearore jícuyume. ¹⁵Caiye jipacui majiéde majivu ya. Que baru “Nāi Espiritu Santo ji majié matuiyede mujare coreóvare đacuyume”, avu ya mujare, arejame Jesús.

**Jesú bueimara ne chōriburu yóboi
ne torojuede**
(Mt 7.7-11; Stg 1.5-6)

¹⁶Yópe arí, coyure nurejame Jesús:
—Quíjino baju yure jámenajaramu mja. Ëbenita apeno quíjino baju yóji boi bediōva cojedeca yure járajaramu mja, arejame Jesús nja ũi bueimarare.

¹⁷ũi que aiyede, nujacavu yópe arí, jēniari járejaima ne baju:

—¿Aipe ayu bárica, “Quíjino baju yure jámenajaramu mja. Ëbenita apeno quíjino baju yóji boi bediōva cojedeca yure járajaramu mja” ayu? ¿Aru, “Jipacu yebai nucuyumu ya” ayu, aipe ayuba ũ? ¹⁸¿Carijieneca ũi ayeque aipe ayuba Jesús? “Maiyójavu majare. Majino āmevu ũi que coyúino”, arejaima nujacavu ne bajumia boroteivu.

¹⁹Nje jēniari jáiyede úre coreóvayu, nujare yópe arí, coyurejame Jesús:
—¿Ji aiyede, “Quíjino baju yure jámenajaramu mja. Ëbenita apeno quíjino yóji boi bediōva cojedeca yure járajaramu mja” jēniari jáivurū mja, mje bajumia boroteivu? ²⁰Jāve coyuyubu mujare: Mujacarpūravu urarō chōri orājaramu. Ëbenita ijāravucavu Jūmenijicure ju abevucarpūravu torojurājarama na. Ëbenita mja chíoi vuvacari, no yóboi chíoi vuvacavu torojurājaramu mja. ²¹Maje nomiva juedocuvarivu āmeno nājina na. Ijiébu náre. Ëbenita juedocuvariburu yóboi, ijino mácarōre ārumenama juedocuvarivu bácvu. Nēmajicure jári torojurivu, no mácarō āmeno ne nājiiye báquede ārumenama na. ²²Nópebu mujare. Caride urarō nājinajaramu. Ëbenita mujare jácudacuyumu cojedeca. Dinumu maquinóre urarō torojurājaramu mja mje ũmei. Aru mujare nāme chíore đavu buojabenama cainuma.

²³Dinumu maquinóre quénora yure ye apejēne jēniari jámenajaramu mja. Jāve coyuyubu mujare: Áde mje jēniariyede jipacure ji āmiái, đacacuyume yópe mje jēniariyepedeca úre. ²⁴Javede pu carita ye apejēne jēniamevu mja cāreja ji āmiái. Jūmenijicure jēniajara cari. Mje jēniaru, mje jēniariyepedeca đacacuyume Jūmenijicu, mje buojariyēpe ayu torojurivu mje ũmei jaubevava, arejame Jesús nujare.

**Jesús ũi vainí tuino ijāravuque
āmene**

(Ro 8.37; 2 Co 2.14; Ap 3.21, 5.5)

²⁵Yópe arí, coyure nurejame Jesús:
—Nópe coyúivu ya mujare apejēne jēvari maiyójepeda. Ëbenita

apejāravna daquijāravna baquiyéde
apejēne jēvarī coyubecuyumu mūjare
cojedeca. Quénora mūjare coyucuyumu
nuriéne jipacūi borore yavebecūva.

²⁶Dinūmū maquinóre mūjavacari ūre
jēniarajaramu ji āmiái, ji paruéque.

Que baru, “Jipacūre jēniacacuyumu
mūjare”, abevū yū. ²⁷Jipacūvacari ūbi
mūjare. Mūjare ūbi, mūje ūe boje yūre.
Mūjare ūbi, mūje jū aiye boje yūre, ūi
daroimū mácūre. Que baru mūje baju
jēniayede ūre jápiacuyume jipacu.

²⁸Jipacūque cūcū bācū, ūi cūrōge jocarī
etarejacacu, ēmeni dacuyū yore ijāravūi.
Aru caride yore cūcū, ijāravūre jocarī
dajocacuyumu, cojedeca nūcuyū jipacu
yebai, arejame Jesús.

²⁹Dinūmūre nūja ūi bueimara
arejcarā Jesúre:

—Caride me coyūivū mū nūjare,
apejēne jēvamecūva. ³⁰Caride mū
caiyede coreóvayūre majivū nūja. Mūre
jēniari jáiye ye jaubevū. Que baru mūre,
Jūmenijicūi daroimū mácū bajure, jū
aivūbu nūja, arejcarā nūja Jesúre.

³¹Nūjare arejame Jesús:

—¿Jāve “Jū aivūbu mūre”, aivūrū
mūja? ³²Járijide apa. Ānijāravū
daquijāravū baquinó jave eare
nūnotamu no. Carijēneca yūre
jocarī nūrajaramu mūja mūje cūrōai
coapa. Cūinácūva mautescuyumu yū.
Ūbenita jipacu yúque cūbi cainūmūa.
Que baru cūinácū bajuva āmevū yū.

³³Caiye iyede mūjare coyūivū yū,
mūje cārijimenajiyere ayū, mūje cūe
boje yúque cūinávūre. Mūjare nājine
đarājarama ijāravūcavū Jūmenijicūre
jū abevū. Ūbenita jidūbejarā mūja.
Ijāravūque āmene jave vainí tuivū yū.
Que baru jū ajarā yūre, arejame nūjare
Jesús.

**Jesús ūi jēniaino ūi bueimarare
Jūmenijicūque**
(Jn 13.18)

17 ¹Que arīburu yóboi cavarōi jáñū,
yópe arejame Jūmenijicūre Jesús.

—Mū, jipacu, ji memēinūmū jave
eaiyū yūre. Pōevare yūre mímacu

meacu bajure jáđovajacu mū, ji
jáđovaquiyere ayū mūre meacu
bajure. ²Yūre jaboteicōjeivū mū caivū
pōevare, ji cūvare daquiyere ayū jāravū
cūiméjāravū baquinóre caivū ina mi
jū are đaimarare yūre. ³Múvacari
Jūmenijicū cūinácūra jāvetamu mū. Aru
yū, Jesucristo, mi daroimū mácūbu
yū. Ina majare coreóvaivū, nárecabu
cūvarājivū jāravū cūiméjāravū
baquinóre, ne coreóvaie boje majare.

⁴Iye mi đaicōjeiye báquede yūre đarī
buojaivū yū. Que baru mūre meacu
bajure jáđovaivū yū yore ijāravūi.

⁵Mamarūmūre maje caiyede cūedarājiye
jipocai, meacu baju barejacacū mi
yebare. Caride bedióva yūre meacu
bajure epejacū mi yebai cojedeca, yópe ji
mamarūmūre cūe báquepedeca, arejame
Jesús.

⁶Yópe arī, coyūre nūrejame Jesús
jipacūre:

—Ijāravūcavū mūre jū abevūre
jarūvarī, beorī, ĩni, coatede đávū mū
ina yūre jū arājivūre. Mamarūmurata
mívū bārājivū barejáima na. Aru
náre yūre jū are đaiyū mū. Nárecabu
mūre ji coyūimara, majinajivū aipe
ārojacūre mūre. Aru mi yávaiyede
jápiarī jū adama na. ⁷Caride caiye iye
mi majié cūvare đaiyede yūre jāve
míyede coreóvaivūbu na. ⁸Iye mi
coyūicōjevarede yūre, náre coyūivū
yū. Aru na jū adama diede. Yūre, mi
daroimū mácūre, jāve coreóvaivūbu.
Aru mū yūre daroyū bācūre jū adama.

⁹Ijāravūcavū mūre jū abevūre
jēniacabevū yū múque. Quénora ina
mi yūre jū are đaimarare jēniacavū
yū múque, ne mívū bae boje. ¹⁰Caivū
yúcvū mívūbu na. Aru caivū múcvū
jívūbu na. Aru yū meacu bajure
jáđovadama na.

¹¹Yū mautebecūbu ijāravūre caride.
Quénora maumejieneca dacuyumu
mi yebai, cūcūyū múque. Ūbenita
nācapūravū mautehajivūbu ijāravūre.
Mū, jipacu bajutamū mū. Que baru
ina yore mautehajivūre corejacū mū
mi paruéque, iye parué mi cūvare

ðaiye báqueque yure. Corejacu náre, cūinávpeda ne tenajiyeye ayu yópe majapedeca. ¹²Yore cucu baju coreivu yu náre mi paruéque, iye parué mi cūvare ðaiyeque yure. Náre meadaivu yu. Aru bñjabema na. Cūinácu quécūra, ñai bñjacūyū ũi ámeina teiye boje, yure bñjaibi ũ, vaiquíyeye ayu yópe mi yávaiyede mi toivaicōjeiye báquepedeca.

¹³Caride mi yebai dacūyumu yu. Nópe soyūivu yu ji cuede cāreja ijāravure ne jápaiinoi, ne buojarājiyeye ayu torojūrivu ne ũmei jaubevūva, yópe ji torojūpedeca ji ũmei. ¹⁴Iye mi soyūicōjevarede yure, náre soyūivu yu. Na yúpe dápiaiūbu cari. Yópe ijāravūcavū mure ju abevū ne dápiaiyepe dápibema na. Que baru náre ũbema ijāravūcavū. ¹⁵“Ina mi yure ju are ðaimarare ñni nūvajacu ijāravure jocarī”, arī jēniamevū yu mure. Quénora “Náre jāri corejacu me, abujuvai jabocū ũi ámeina ðare ðabequiyeye ayu náre”, arī jēniaivu yu mure. ¹⁶Yu dápiabevū yópe ijāravūcavū mure ju abevū ne dápiaiyepe. Quédeca ina mi yure ju are ðaimara máre ijāravūcavū mure ju abevū ne dápiaiyepe dápibema na. ¹⁷Ijāravūque ámene jarūvarī náre coavarī, epejacu múcavure, ne memecarājiyeye ayu mure. Que ðajacu mi yávaiyeque. Jāvetamu mi yávaiye. ¹⁸Mu darorejavū yure, ji buequiyeye ayu ijāravūcavure. Nopedeca yu máre jaroivu náre, ne buenajiyeye ayu ijāravūcavure. ¹⁹Ji baju epeivu yu, memecacūyū mure yópe mi ũrópe. Que ðaivu náre boje, na máre ne epenajiyeye ayu ne baju, memecarājiivu mure yópe mi ũrópe. Que ðarājiūbu, ne majié boje jāvene mi yávaiyede.

²⁰Ina mi yure ju are ðaimara, ji bueimarare, mure jēniacaivu yu. Aru arevure máre, yure ju aivu bārājiūvre, ji bueimara ne bueiye boje náre, jēniacaivu yu mure. ²¹Mure jēniaivu yu, ne curājiyeye ayu cūinávure. Mu cūvū yúque aru yu cūvū máque cūinávure. Quédeca na mārājivū máre cūjarāri majaque cūinávure. Que

teivure jāivu, yure, mi daroimū mácure, ju arājarama ijāravūcavū. ²²Yópe mi meadaiye báquepe yure, quédeca yu máre meadaivu náre, ne curājiyeye ayu cūinávure yópe maje cūepedeca cūinávure. ²³Náque cūvū yu aru yúque cūvū mū, ne curājiyeye aivu majaque cūinávpeda. Que baru yu mi daroimū mácure aru na mi ũmarare cūináturu yure mi ũepedeca ũcure coreóvarājarama ijāravūcavū.

²⁴Mu, jipacu, mi yure ju are ðaimara mārājivure, ne curājiyeye yúque ji cūquinore ũvū yu, ne jārājiyeye ayu yure meacu bajure, múpe páyure. Mamarūmure maje caiyede cuedarājiye jipocai, yure ũrejāvū mū. Que baru yu meacu bajure, múpe páyure, jádovaiūvū mū. ²⁵Mu, jipacu, meacu baju, boropatebevū mū. Mure coreóvabema ijāravūcavū mure ju abevū. ũbenita yúcapūravū coreóvaiūvū mure. Aru ina mi ju are ðaimara yure, mi daroimū mácure, coreóvadama na. ²⁶Mu aipe ārojacūre coreóvare ðaivu yu náre. Aru mure ne coreóvaino pueno náre coreóvare ðacūyumu yu, ne ũrājiyeye ayu arevure yópe mi ũepedeca yure. Que teni yávacari náque cūcūyumu cūinávure. Que arī, jipacūre soyūrejame Jesús.

Jesúre jēni ne nūvaino

(Mt 26.39, 47-56; Mr 14.36, 43-50; Lc 22.42, 47-53)

18 ¹Nópe soyūitburu yóboi jipacuque, Jesús aru ñña ũi bueimara etarī, nuri jiajiya Cedrón āmicūriyare jatarejocarā. Nore eaiivu oteiye curōi, ecorejocarā ñña. ²No oteiye curōi ññje nūinore javede Jesúque nāvarejocarā ñña doce paivu ũi bueimara. Que baru noi ññje nūiyede majidejaquemavu Judas, ñai Jesúre jēni jícūyū ũi mauvare. ³Majicu, no oteiye curōre darejame Judas. Jipocateyū barejáme Jūmenijicūi cūramine coreipōevacavure, sacerdotevare jaboteipōeva aru fariseova ne jaroimarare úque, aru churaravare máre.

Ina ñi jipocateimara ne boarájijyede ðuráiv barejáima. Pëoibuaque aru cámoveaque máre darejaima na. ⁴Ûre vaiquíyede majicu, náre eavüre, copu ñari yópe arí, jëniari járejame Jesús: —¿Ñamene voivurü müja? arejame náre.

⁵—Jesús Nazarecasure vorádaivubu ñüja, arejaima na.

—Yúbu, arejame náre Jesús.

Ne nópe boroteiyede, ne coricai núrejame Judas, Jesúre jëni jíyü ñi mauvare.

⁶Jesús ñi que aiyede, daruíni yebamia puaréva türejaima na, Jesúre jënadaivü. ⁷Bedióva cojedeca náre jëniari járejame Jesús:

—¿Ñamene voivurü müja? arejame náre.

—Jesús Nazarecasure voivubu ñüja, arejaima na.

⁸—Javeta müjare “Yúbu”, avü. Yüre voivü baru, dinümü ji yóvaimarare ñicójejara, arejame úre voivüre Jesús.

⁹Que arejame Jesús yópe ñi aino mácarópedeca vaiquíyepere ayü, “Mü, jipacu, ina mi yüre ju are ðaimaracacu ye cüinácu bíjacabebi yüre”, ñi aino mácarópe.

¹⁰Dinümüre Simón Pedro ñi boaicarovede tatorí, ñni, duarí, sacerdotevare jaboteipöescu ñi yebacasure, Malco ámicasure, juijóri najuárejame ñi meapüravücacamucare.

¹¹Nópe ðayüre jári, Jesús arejame úre: —Mi boaicarovede meadajacu mü. Ámenore yüre jipacu ñi vaidé ðaquiyyede jáve vaicáyumu yü, arejame Pedrore Jesús.

Jesúre ne ñuvaino Anás yebai

(Mt 26.57-58; Mr 14.53-54; Lc 22.54; Jn 11.49-50)

¹²Dinümü ina churarava aru ina Jümenijicüi cüramine coreipöeva máre, Jesúre jëni, ñi püüaré buorí buojarí, ñüvarejaima. ¹³Ûre ñüvarejaima mamarümü Anás ámicücu yebai. Caifás barejáime ñi vácu. Aru ñai Caifás sacerdotevare jaboteipöescu barejáime ðiájure.

¹⁴Ñai Caifárecabe, “Cüinácuva yaidú, majare meajebu. Que teni caivü yainí bíjabejebu maja”, ayü bácu barejámeda apevü judíovai jabovare.

“Jesúre yü coreóvabevü” arí, Pedro ñi coyüino

(Mt 26.69-70; Mr 14.66-68; Lc 22.55-57)

¹⁵Jesúre ne jëni ñüvayiede, ne yójiþoi ñüre ñürejacarā ñüja, yü aru Simón Pedro. Sacerdotevare jaboteipöescu coreóvaimü marejacácu yü. Que baru ñi cürami täibüre Jesúre ne ecovayiede, yüre máre ecoicöjenejaima. ¹⁶Ûbenita täibücarō biaido jedevai mautedejame Pedro. Que baru ecoinore coreipöecoque borotecüñürejacacu, ði ecoicöjecojiyepere ayü úre máre.

¹⁷Pedro ecoyü bácu, jedevacobede coreipöeco jëniari járejaco úre:

—¿Jesús ñi bueimaracacu ámecürü mü? arejaco.

—iNácacu ámevü! arejame óre Pedro.

¹⁸Diñami ámei jüjurejavü. Que baru nócacü yebacavü ina coreipöevaque nore toabore dacuvarí, cüocarejaima. Aru Pedro máre náque cüocarejame.

Jesúre sacerdotevare jaboteipöescu ñi jëniari jápiaino

(Mt 26.59-66; Mr 14.55-64; Lc 22.66-71)

¹⁹Sacerdotevare jaboteipöescu Jesús ñi bueiyyede aru ñüja ñi bueimarare máre jëniari járejameda Jesúre. ²⁰Ûi jëniari jáiyede, Jesúcapüravü, yópe arí, coyürejameda úre:

—Yü caivü ne jápiayiede buecacu yavebecuva. Maja judíova maje cójijíñamiai aru Jümenijicüi cürami máre bueyü batecácu yü. Pöeva ne cójijinoai buecacu yü cainümü. Ye yavenina buebetecacu yü.

²¹Que baru, ¿aípe teni yüre jëniari jáñuru mü? Yüre jápiavü bácvüre jëniari jájacu. Náta ji coyüyye báque caiyyede majidivü coyurájarama mure, arejameda Jesús.

²²Jesús ñi que aiyede, cüinácu ina coreipöevacacu ñi jijecamure püñuque pëvari, yópe arejameda Jesúre:

—Maje jabocure nópe arí, abejacu mü, arejameda.

²³Aru Jesús arejameða:

— Ñmene ji que aru, yure coyujacu mu caride, caivu ne jápiaiyede. ¿Ubenita méne ji que aru, aipe teni yure pēvacurū? Pēvaiye jaubevu mure, arejameða úre Jesús.

²⁴Dinumure Anás Jesúre buoimure jarorejameða Caifás, sacerdotevare jaboteipōecu yebai.

“Jesúre yu coreóvabevu” arí, Pedro bediõva ñi coyũino

(Mt 26.71-75; Mr 14.69-72; Lc 22.58-62; Jn 3.14, 12.32)

²⁵Nore toabo ēcarui cuocayu barejáme Pedro cãreja. Apevu nore curivu úre jēniari járejameða:

—¿Mu máre Jesúí bueimmaracacu ãmecurū mu? arejaima úre.

—¡Nácacu ãmevu yu! arejame náre.

²⁶Dinumure sacerdotevare jaboteipōecui yebacavucacu, Pedro ñi boaicaroveque ñi buraimu mácu jicu, Pedroe arejame:

—Cari ñami marede oteieye curõi Jesúque mure jávu yu, arejame.

²⁷—¡Nácacu ãmevu yu! Jesúre yu coreóvabevu, arejame Pedro cojedeca.

Ëi que aipe bajure, cáyu órejarejame.

Jesúre ne nuvaino Pilato yebai

(Mt 27.1-2, 11-14; Mr 15.1-5; Lc 22.1-5)

²⁸Aviá ñi tucumuiyede, Caifái cūramine jocarí pu jabocui cūramita Jesúre nuvarejaima. Ñai jabocu, Roma ãmicurõ jaboteino jabocui epeimu marejáme, jabotecuyu ina judíovare. Judío ãmenejame ñai jabocu, Pilato ãmicucu. Ëi cūrami ecoivu baru, Pascua torojuve teinoque ãiyede ãicõjememara májebu judíova. Que baru iye ãiyede ãiyurivu, diñamine corí numenejaima ina judíova, Jesúre nuvaivu, Jūmenijicui jámequiyepa aivu náre ãmenape. ²⁹Que baru náre jēniari jácuetarejame Pilato.

—¿Ye ãmenore boro coyurí adaivurū mija ñai ãmure? arejame.

³⁰Ina judíova arejaima:

—Ëi ãmeno ðabedu, úre davabejebu ñija mi yebai, arejaima.

³¹Pilato arejame náre:

—Dinumu úre nuvari, majjarã muje baju. Muje ðaicõjeiyepedeca coyujarã úre aipe ñájicuyure, ñi bojeðaquiyepa aivu ñi ãmeno ðaie báquede, arejame.

Nácapūravu arejaima:

—Mija Romacavu ñija judíovare boarí jaruvaicõjemevu pōevare. Que baru úre boarí jaruvaivu buojabevu ñija, arejaima.

³²Nópe vaidéjavū, “Yópe vaiquíyebu” Jesús ñi aipe báquedepedeca javede aipe ãrojae jocucujaravena ñi mauva ne pēvaimu ñi yaiquínore.

³³Ëi cūramine corí nuri, Jesúre cutuicõjenezameða Pilato. Ëi eaiyede ñi yebai úre jēniari járejameða:

—¿Muru judíovai jabocu? arejameða Jesúre.

³⁴Jesúcapūravu arejameða:

—¿Mu mi baju majini, yópe jēniari jáñuru mu, que ayu? ¿O apevu ne coyuyede jápiarí, yópe jēniari jáñuru mu? arejameða.

³⁵Pilatocapūravu arejameða:

—¿Judíovacacu bárica yu, mi que aiyede?

Mi joborõcavu aru sacerdotevare jaboteipōeva mure boro coyurí adarãdama na. ¿Aipe ðacurū mu, ne que ãmecoroyede? arejameða.

³⁶Jesús ju arejameða:

—Ijãravucarõ ãmevu ji jaboteino. Yore ji jabotedu, ãdamatejebu ji yóvaimara, ji mauva ne jēni jíbenajiyepa aivu yure ina judíovai jabovare. Ijãravucarõ ãmevu ji jaboteino, arejameða.

³⁷Dinumu jēniari járejameða Pilato:

—¿Jãve “Jabocubu yu”, ayurū mu?

arejameða.

Ju arejameða Jesús:

—Quédeca mi aimurecabu yu.

Jabocubu yu. Que barureca ijãravui edarí, pōetedejaquemavu yu, jabotecuyu aru coyucuyu yávaiyede jáve bajure.

Yávaiyede jáve bajure majiyurivu, yure jápiarí adarãjarama na, arejameða Jesús.

³⁸Aru Pilato jēniari járejameða:

—¿Yéba yávaiye jáve baju? arejameða ñi.

Pōeva ne boarí jaruvaicõjeino Jesúre

(Mt 27.15-31; Mr 15.6-20; Lc 23.13-25)

Que ayu bácu Jesúre, jedevai etarí, pōevare borotecunurejame Pilato cojedeca:

—Ámeina tebecutame ñai ñmu
 ji járú. ³⁹Ûbenita Pascua járavui ji
 ðarí cõmajiyepedeca ðajuijivú yu.
 Mújacacu ji bñoimmaracacu cüináçure
 jaetovaquijivú. ¿Ñai muxe jabocure
 jaetovaji yu? arídurejame judíovare
 Pilato.

⁴⁰Pilato ñi que aiyede cüiná jorojini,
 coðoboborejaima:

—Bi, ñre jaetovabecacu mu. Barrabáre
 jaetovari, darojacu mu, arejaima
 Pilatore ina judíova.

Navacacu barejáme ñai Barrabás.

19 ¹Dinũmure ina judíova ne
 que aiyede, churaravare jara
 popeicõjenezamedá Pilato Jesúre. ²Aru
 ñre pñenocacaje, jabocu doicajepe
 paicaje ñemijuaricajede doarejaimada
 na. Jesúre que teivú, miumua cãteni,
 cainitarabure ðarí, ñi jipoburã
 dítarabure tñorejaimada ina churarava.

³Que ðarí Jesúre jacoyurejaimada:

—Ména suçacu mu, judíovai jabocu,
 arejaimada churarava, ñre yurivú.

Que teivú, ñre pñavarejaimada ñi
 jivai ne pñuáque.

⁴Jesúre ne yuriniburu yóboi, jedevai
 etarejame Pilato cojedeca.

—Jájara. Jaetovai yu ñre, muxe
 coreóvarãjijeyepa ayu: Ámeina tebecu
 bajube ñ ji járú, arejame.

⁵Pilato ñi que aríburuta, etarí
 darejame Jesús. Jabocui doicajepe
 paicaje ñemijuaricajeque ne doaimu
 mácu, ne jipoburã miumua cãteni
 jacoimu mácu etarí darejame.

—Jede, ñre jájara caride, arejame Pilato.

⁶Cüiná Jesúre ne jáiyede,
 coðoboborejaima ina sacerdotevare
 jaboteipõeva aru Jñmenijicui cñramine
 coreipõeva máre:

—Ñre jocucujaravena pñvari boarí
 jaruvaicõjeyacu mu, arí coðoboborejaima.

Pilato arejame:

—Muxe baju ñre nñvari,
 jocucujaravena pñvari boarí jaruvajarã.
 Yure ji járú ñmeina tebecutame, arejame.

⁷Arejaima Pilatore:

—“Yu Jñmenijicui mácubu yu”,
 ávaibi Jesús. Que baru yópe cüináro

ñujare ðaicõjeinope ñaípe páyure boarí
 jaruvaiye jauvu ñujare, arejaima.

⁸Ne que aiyede járiayú, pñeno baju
 cuicumarejaquemavu Pilato. ⁹Diñami
 ecorí cojedeca, Jesúre jñniari járejamedá:

—¿Árocacurú mu? arídurejamedá
 Jesúre Pilato.

Ûbenita Jesúcapũravu bi arejamedá.

¹⁰Dinũmũma Pilato arejamedá ñre:

—¿Yure soyuyubecurú mu? ¿Ji jaboede
 majibecurú mu? Mñre jocucujaravena
 pñvaicõjeiyacu baru, jocucujaravena
 mñre pñvaicõjeyũmũ yu. O mñre
 jaetovaiyacu baru, mñre jaetovacyũmũ
 yu. ¿Majicurú mu diede? arejamedá.

¹¹Jesús arejamedá ñre:

—Jñmenijicu mñre jaboteicõjeimi ñ.
 Ñi que ðabedu, yure yópe ðabejebu mu.
 Que baru ñai yure jñne ðayú bácu mñre
 mi pñeno boropateibi, ñi ñmeina teiye
 boje, arejamedá.

¹²Jesús ñi nópe soyuyeyede, pñeno
 baju ñre jaetovaiyurídurejamedá Pilato.
 Ûbenita yópe arí, coðoboborejaima ina
 judíova:

—Jesúre jaetovayu baru, ñai jabocu
 ijãravũcacu pñeno baju parũcu, César
 maje aimu, ñi yóvaímũ ñmejebu mu. Ácu
 pñecu “Jabocubu yu” ayu, ñai jabocu
 ijãravũcacu pñeno baju parũcure, César
 maje aimure, maucũvaibi ñ, arejaima
 ina judíova Pilatore.

¹³Que aivure járiarí, ñi dobariborã
 dobacũnñrejame Pilato. Noi dobacu,
 Jesúre davaicõjenezame, boarí
 jaruvaicõjeyacu ñre. Pilato ñi dobaribo
 curiva, cñraboacu ne tñoiva, ne
 meaðaiva ñuja judíova ñuje yávaicamuai
 Gabata ñmicñrejavũ. ¹⁴Pascua
 ñmicñrijãravũ baquinó jipocacajãravũ
 barejávũ, jãravũ corica baji. Ina obedivú
 judíovare, Jesúre ñbevure, yávarí
 darorejame Pilato:

—Jede, jájara caride muxe jabocure,
 arejame.

¹⁵Ina judíovacapũravu urarõ
 coðoboborejaima:

—¡Yaijácuri! ¡Yaijácuri!

¡Jocucujaravena pñvari boarí
 jaruvaicõjeyacu ñre! arejaima na.

Pilato arejame:

—¿Muje jabocure boarí jaruvaji yu, muje dápiaru? arejame.

Ina sacerdotevare jaboteipõeva arejaima:

—Cüinácure ñuje jabocu, ñai jabocu ijárvacacu pueno baju parucu, César maje aimu, arejaima.

¹⁶Que baru ne urõpe ñarí, jocusujaravena Jesúre pëvari, boarí jaruvaicõjenezame Pilato.

**Jesúre ne pëvari yuyaino
jocusujaravena**

(Mt 27.32-44; Mr 15.21-32; Lc 23.26-43)

Que baru Jesúre ñni, ne pëvarajinoi nãvarejaima churarava.

¹⁷Jesúvacari turí nurejame dijaravede Põe jipobucü ñuje aicü cüracüita, Gólgota ñmicuricü ñuje yávaicamuaque. ¹⁸Dicüre eaiyu, jocusujaravena pëvari jëorejaima na. Ùque apejaravearã apevu pucarãre máre pëvari jëorejaima, cüinácure Jesú meapüravüi, aru apecure Jesúi cácopüravüi, aru Jesúre ne corical. ¹⁹Yõpe arí, “Jesús Nazarecacube judíovai jabocu”, toivaicõjenezameda Pilato jocusuvena, ne jëorajiyep ayu dive de Jesúi jocusujaravena.

²⁰Jerusalén ñmicuríimaro joabejínoí Jesúre jocusujaravena jëorejaima. Que baru obedivu põeva nore járadaivu no toivaino mácarõre jári borotedejaima. Yóbecuricamua yávaicamuaque toivaicõjenezajuemavu Pilato. Ñuje yávaicamuaque, Romacavu ne yávaicamuaque, aru griegovana ne yávaicamuaque máre toivaicõjenezajuemavu Pilato. Que baru caivu dive de jári majidejacañã ñuja. ²¹Pilato ñi nópe toivaicõjeiyede ñbeni, sacerdotevare jaboteipõeva coyurãnurejaimada ñre:

—Nópe mi toivaicõjeino mácarõpe toivaicõjemejacu mu. Quéñora “Judíovai jabocubu yu”, abi ñ”, arí toivarí jëojacu mu cojedeca, aridurejaimada Pilatore sacerdotevacavu.

²²Ûbenita Pilato arejameda náre:

—Ji toivaicõjeino mácarõ nópeda bajaróri no. Oatuvabecubu yu, arejameda.

²³Jesúre jocusujaravena pëvari jëori bubaríburu yóboi, ñi doipe báquede coapa ñnejaima ñre pëvaivu bácvu. Yóvaicuvaiyu barejáima na. Que baru náre coapa ñnejaima. Ùbenita dicaje puenocacaje nareimea cubecajede coapavaiyubedejaima na.

²⁴Cüinácure nácvu arejame:

—Dicaje nareimea cubecajede jadevarí, coapa ñnu, meamejebu. Yõpe ñarãjarevu. Duvarí yajuivupe tenajarevu maja. Ácu majacacu majare yajurí vainí tuyu, dicajede ñcuyume ñ, arejame.

Na “jede” arí, nópe yajurejaima na. Ne nópe coapavaiye vaidéjavü yõpe Jümenijicüi toivaicõjeiye báquedepedeca ñi yávaiyede: “Ji doipe báquede ñni, coapavarãjarama na. Aru ñvarí yajurí vainí tuyu apacajede, ji puenocacajede ñcuyume nácvu”, arí toivaicõjenezajuemavu Jümenijicu. Quédeca tedejaima ñna Jesúre jocusujaravena pëvaivu bácvu.

²⁵Jesús ñi jocusujarave joabejínoí nurejaima jípacu, jípacu mamico Cleofai márepaco María ñmicuco, aru María Magdalacaco máre. ²⁶Jípacu nore núcore aru nijinoí yure máre, pare ñi jecumure, járejame ñ. Aru yõpe arí, yáverejame jípacore:

—Jájaco. Mímacureca páyube ñ, arejame jípacore Jesús.

²⁷Yure máre yõpe arejame Jesús: —Jájacu. Mípacoreca páðobe õ, arejame yure.

Que teni ji cüramine ñre nãvari epeni, cãvarejacacu yu ñre jipacope.

Jesús ñi yaino

(Mt 27.45-56; Mr 15.33-41; Lc 23.44-49)

²⁸No yóboi, caiye iye Jümenijicüi ñaicõjevarede ñarí bubayu bácu coreóvarejajuemavu Jesús. Que baru yõpe Jümenijicüi yávaiyede ñi toivaicõjeiye báquedepedeca vaiquíyep ayu, yõpe arejame Jesús:

—Cüinóivu yure, arejame Jesús.

²⁹Nore jorobũ, vino áyaicoro upiáricoroque jorobũ curejavũ. Diede jaũborã uyovarĩ hisopo ãmicuricu jocujicu cavajĩbui jëori jarururejame cüinácũ ina churaravacacũ. Jesúre ãi jijecamura jĩjovarejame ã. ³⁰Die upiáteiye báquede neneniburu yóboi, yópe arejame Jesús:

—Quénoramu, arejame Jesús.

Que arĩ, ãi jipobũ mori turĩ, yuyurĩ, yaidéjame.

**Jesús bácare churara ãi totarĩ
cõajaroino**

(1 Co 5.7; Ap 1.7)

³¹Dijãravũ torojũve teijãravũ baquinóre meadãijãravũ barejãvũ. Sábado, Pascua ãmicurijãravũ, judíovai pũeno meajãravũ, pueãijãravũ baquinó jipocacajãravũ barejãvũ. Que baru dijãravũ baquinóre ne pëvaimara mácacũ jocucujaravearã ne mautebenajiyepẽ aivũ, Pilatore coyurãnurejaimada ñũja judíova ñũje jabovacavũ. Ûre jëniarejaimada, ãi boarĩ pũyoicõjequiyepẽ aivũ ina jocucujaravearã jëivũ ne ãraãoare, ne yainãjiyepẽ aivũ maumena, jõðavari ñajivũ ne bajuá báquede torojũve teijãravũ baquinó jipocai. ³²Que baru Pilato ãi cõjeniburu yóboi, ina jocucujaravearã yuyuivure ne ãraãoare boarĩ, pũyorãnurejaima churaravacavũ. Mamarumucacure earĩ, ãi ãraãoare boarĩ pũyorĩ, apẽcure máre quédeca boarĩ pũyorejaima ina churara, Jesúque jocucujaravearã pëvaimara mácacure boavũ. ³³Ûbenita Jesús yebai eavũ, jave yaiyú bácare járejaima. Que baru yaiyú bácare jári, ãi ãraãoare boarĩ pũyobedejaima.

³⁴Ûbenita quédeca cüinácũ churaravacacũ Jesúi tẽpenaba cãchinoi ãi tãutedorũque totarĩ cõajarorejame ã. Jive ocoque jĩvaiye etarejavũ dicobede, ãi totarĩ cõajaroiyede. ³⁵Yãvacari járejacacũ. Que barureca ji jáiye báquede toivarĩ epeyubu yũ, mũje ju arãjiyepẽ ayũ Jesúre. Ji majié jãve bajure coyuyubu yũ.

³⁶Que vaidéjavũ. Yópe Jũmenijicui yãvaiyede ãi toivaicõjeiye báquedepedeca vaino marejãvũ: “Ûi cããoare ye cüinãdo pũyobenajarama na”, arĩ toivaicõjeneaquemavũ Jũmenijicũ.

³⁷Aru apeno Jũmenijicui toivaicõjeino mácarõ aiyepedeca vaidéjavũ: “Ne totaimũ mácare járajarama põeva”, arĩ toivaicõjeneaquemavũ Jũmenijicũ.

**Jesús bácu jaruvaimũ ne põ
jaruvainoi**

(Mt 27.57-61; Mr 15.42-47;

Lc 23.50-56; Jn 3.1-2)

³⁸Jesús ãi yainĩburu yóboi, ã mácuĩ baju bácarõre meadãiyucũ, Pilatore jëniacũnurejaimada José Arimateacacũ. Jesús bácu ãi bueimũ mácu baridurejame. Ûbenita sacerdotevare pare jidurejaimada. Que baru “Jesúcacubu yũ”, arĩ coyubedejaimada José. Pilato Joséde ju arejaimada. Que baru Jesús bácuĩ baju bácarõre ñni, ñvarejaimada Joséjá. ³⁹Joséde cadatecũnurejaimada Nicodemo, ñai mamarumure ñami Jesús bácare borotecũnũũ mácu. Jesús bácuĩ baju bácarõre meadacuyũ, Nicodemo me mumijuripenaque jĩvaiyede ñvarejaimada. Jocucũ cuidó mirra ãmicuricu yoca aru vecujichĩabo jëicũcoro máre, treinta paikilos ñni ñvarejaimada.

⁴⁰Jesús bácuĩ baju bácarõre ñni, ñvvari, meadarejaimada na. Meacaje lino ãmicuricajeque aru iye mumijueque ã mácuĩ baju bácarõre cãmarejaimada. Ñũja judíova ñũje ðarĩ cõmajiyepẽ yaiyú bácare ñũje jaruvãrãjiye jipocai meadarejaimada Joséjá. ⁴¹Jesús bácare ne pëvari jëoino mácarõ joabẽjĩno oteiye curõi ã mácare ñvarejaimada. Nore põ jaruvãicobe mamacobe curejavũ. Cũracobei Jesús bácare ñvarejaimada. Põeva ne yavũ bácacũ ne ñmamecobe barejãvũ dicobe. Nore Jesús bácare jaruvãrãnurejaimada Joséjá. ⁴²Jabuõvaijãravũ baquinó jipojĩca barejãvũ no. Aru dicobe joabẽjĩno marejãvũ. Que baru maumepeda Jesús

bácuī baju bácarōre meadarī, nore jaruvarānurejaimada.

Jesús ũi nacajaino yainore jaruvarī
(Mt 28.1-10; Mr 16.1-8; Lc 24.1-12)

20 ¹No sumana buijāravu domingo javejīnara, aviá ũi tucumuquiyē jipocai, Jesús bácuī ne jaruvainoi jáconurejacoda María Magdalacaco. Nore earī, no cūraturava uraturava dicobede bieurava bácarō javeta veoiturava bácarō marejāvūya ecoicobede jocarī.

²Nópe jári, cūiná cúyarī darī, Simón Pedrore aru yure máre coyucocoeajaco María. Nūjare edarī, yópe arī, coyurejaco:

—Maje jabocu bácuī baju bácarōre dicobede jocarī ĩni, nuvari, apenoi epenama apevu. Ne nuvari epeinore majibevu nūja, arejaco nūjare María.

³Ōi que aiyede, ĩmarore jocarī nurejacaarā nūja, Pedromaque, Jesús bácuī ne jaruvainore járanuivū. ⁴Cúyarī nurejacaarā nūja. Ūbenita Pedrore jocarī nuri, ũi jipocai earejacacu yu.

⁵Ūi jipocai earī, dicobe jívui nacachini járidurejacacu yu. Nore Jesús bácuī ne cūmaicajea báquede, nore paraicajeare, járejacacu. Ūbenita dicobede ecorī nūmenejacacu yu. ⁶Ji yóbo earī, dicobei cūiná ecorī nurejame Pedro. Dicajeare nore paraicajeare járejamedā ũ máre.

⁷Aru yaiyú bácuī ne jipobure moaicaje bácarōre jícuā tubaricaje pēpeicajede máre járejamedā Pedro. ⁸Dinumu dicobede mamarumre eayū bácuī nore ecorī nurejacacu yu máre. Nore ecorī, yu máre caiyede járejacacu.

—Jāve bajubu. Jave nacajacube Jesús yainore jaruvarī, arī dápíarejacacu.

⁹Jūmenijicui toivaicōjeiye báque jipocaquede, Cristo nacajacuyure yainore jaruvarī majibenidurejacaarā nūja cāreja.

¹⁰Dinūmā, járiduivū bácvū, nūje cūramī copainurejacaarā nūja pucarā.

Jesús ũi cueteino María
Magdalacacore
(Mr 16.9-11)

¹¹María Magdalacaco copainuri Jesús bácuī ne jaruvainoi, dicobe

jedeva bajita núco barejácoda, odo. Orī, nacachini, dicobe jívui járejacoda.

¹²Nore pucarā ángelevare, Jūmenijicui daroimarare, járejacoda María.

Boricajeare doivu dobarejaimada na Jesús bácuī paraino mácarōi, cūinácu ũi jipobu bácarōi aru apecu ũi cuboba bácarōi. ¹³Aru arejaimada óre:

—Mu, nomió, ¿aipe teni odorū mu? arejaimada na.

Ō arejacoda:

—Ji jabocu bácuī baju bácarōre nuvarama apevu. Ári ne nuvainore majibevu yu, arejacoda.

¹⁴Que adova, copedini, nore núcuīre Jesúre járidurejacoda. Ūbenita ũre coreóvabedejacoda. ¹⁵Óre arejamedā:

—Mu, nomió, ¿aipe teni odorū mu? ¿Namene vodorū mu? arejamedā.

Ūbenita, “Yore oteiye curōre coreipōescu bajubī ũ, que ayū”, arī dápíaridurejacoda ō.

—Mu, ũmu, ũ mácuīre nuvañū mácuī baru, mi epeinore coyujacu yure. Yu bácojivu ũre ĩconuño, arejacoda ō.

¹⁶Jesús arejamedā óre:

—María, arejamedā.

Cūiná copedini ō, hebreo āmicuricamua yávaicamuaque:

—Rabuni, arejacoda Jesúre.

Rabuni aiyrō, bueipōescu aiyrōtamū.

¹⁷Yópe arī, coyure nurejamedā Jesús.

—Jipacu yebai nūmevu yu cāreja. Que baru yure jēni jámejaco mu. Quénora jívure yópe coyucasonujaco yure: “Jipacu yebai, ji mearore jímu yebai, nuñutamu yu. Aru jipacu nujejacube ũ. Mūje mearore jímu ũ jipacu”, yópe arī, náre coyucajaco yure, arejamedā Maríare Jesús.

¹⁸Que arīburu yóboi, nūja ũi bueimarare coyucodarejaco María:

—Maje jabocure jávu yu, arejaco nūjare.

Que arī, ũi aiyē báquede coyurejaco ō nūjare.

Jesús ũi cueteino ũi bueimarare
(Mt 16.19, 18.18, 28.16-20;
Mr 16.14-18; Lc 24.36-49)

¹⁹Dijāravu, sumana buijāravūmica ñamine, nūje cūramine bienina

curejacadã ñũa, Jesúí bueimara, diñami jáivui, ñuje jidúé boje ñũa judíova ñuje jabovare. Que jidurivure ñuje coricai cuetedejame Jesús.

—¿Ména curārũ muja? arejame ñujare Jesús, jacoууу.

²⁰Que ayuva, ñi puruáre aru ñi tépenaba cāchinoi ñi churiá báquede jádovarejame Jesús. Ñuje jabocure jáivui, urarō torojurejacadã ñũa. ²¹Bedióva cojedeca ñujare arejame Jesús:

—¡Cujarã muja cārijimena! Yópe yure jipacu ñi daroiye báquedecaca caivure buiecōjeni, nopedeca yu máre mujare jaroутamu yu, arejame ñujare Jesús.

²²Que arí, ñujare ũme japurejame. Aru arejame:

—Espíritu Santore jacopujarã muja.

²³Ñamene “Jūmenijicu ārumemi muje āmeina teiyede” muje aru, jáve diede ārumemi Jūmenijicu. Ūbenita ñamene “Jūmenijicu ārumetebebi muje āmeina teiyede” muje aru, jáve diede ārumetebebi Jūmenijicu, arejame ñujare Jesús.

Tomás ũi jáino Jesúre nacajañũ mácure yainore jaruvarí

²⁴Jesús ũi edaiyede ñujacacu Tomás, pējacu ñuje aimũ, ñujaque cubedejame ũ. ²⁵Que baru Jesús ũi nuriburu yóbo, Tomáre coyurídurejacadã Jesúre jáivui bácvu:

—Maje jabocure jáivui ñũa, arejacadã ñũa.

Aru Tomás arejame:

—Jáve ámevũ. Ū baju ámeteyũte. Ūi puruáre ne pėvaiye báquede yu ji baju jáñũ maru, “jáve” acуутu yu. Ne pėvaiyoa coiye báquede ji ámuyoque yu ji baju doarí jáñũ maru máre, “jáve” acуутu yu. Aru ũi tépenabacachuri bácarōre yu ji baju doarí jacoуу baru, “Jávetame ñai” acуутu, arejame ñujare Tomás.

²⁶Ocho pajjáravũa yóboi, nomica ñuje cūramine bienina curejacadã ñũa cojedeca. Dinũmũre ñujaque curejame Tomás máre. Diñami bieñamineca ecorí, ñuje coricai cuetedejame Jesús cojedeca. Aru arejame ñujare:

—¿Ména curārũ muja? arejame.

²⁷Dinũmũre arejame Tomáre:

—Mũ, Tomás, mi ámuyoque ji puruáre mu mi baju doarí jácvadajacu. Aru ji tépenabacachuri bácarōre máre mu mi baju doarí jájacu. Ju abecu tebejacu mũ. “Jáveму” arí, ju ayu tejacu, arejame Tomás Jesús.

²⁸Tomás, ũi churiá báquede jári majicu, arejame:

—Ji jacobu bajubu mũ. Yũre Jūmenijicu bajubu mũ, arejame.

²⁹Aru Jesús arejame:

—Yũre jáivui mu mi baju. Que baru mu yũre ju aivui. Torojurivubu na jámevũva yũre ju aivui, arejame Jesús.

Juan ũi toivaino pœva ne ju arājīyēpe ayu Jesúre

³⁰Pœva ne ðarí majibede ure ðarejame Jesús ñuje jáiyede. Yore ijárvui ũi ðaiye báque caiyede corevarí toivabevu yu.

³¹Ūbenita diede toivacaivui yu, Jesúre muje ju arājīyēpe ayu. “Jesucristobe Jūmenijicui daroimũ mácu. Jūmenijicui mácube Jesús” muje arājīyēpe ayu, iyede toivacaivui. Mũje majini ju arājīyēpe ayu ũre, iyede toivacaivui yu. Jesúre ju arí, mamaũme cūvarājaramu muja. Que baru mujare, yópe arí, toivacaivui yu.

Jesús ũi cueteino siete paivui ũi bueimarare

(Lc 5.5-6)

21 ¹No yóboi bedióva cojedeca ñujare cueteni, jádovarejame Jesús macajitabu Tiberias ámicurijitabu ěcarui. Yópe barejávũ Jesús ũi cueteino mácarō. ²Simón Pedro; Tomás, pējacu ñuje aimũ; Natanael, Galileacarō ĩmarocacu, Canácacu; Zebedeoi mára pucarã, jimamicu aru yu; aru aprevu pucarã Jesúí bueimara quévũra curejacadã ñũa nore.

³Simón Pedro arejame ñujare:

—Yu moa boacáñũmu, arejame.

Aru ñũa arejacadã:

—Jede, ñũa máre daivubu, arejacadã.

Que arí, jiaðocũi jaturãñurejacadã ñũa. Jave nainũta marejávũ. Nami

joarō pápi boarídurejacaṛā ñuja. Ûbenita boabédejacarā. Ye cūinájicu cūvabedejacarā. ⁴Javejīna miadāe tuiyede, dibu ēcarui cucudarejaquemavu Jesús. Ûbenita ñuja moa boaríduiuv ũre nore núcure jári coreóvabedejacarā.

⁵Ñujare órejurejame, yópe arí:

—¿Moa boabénaru muja? arí jēniari járejame ñujare.

—Bítamu. Moa boabévu, arejacarā.

⁶Jesús arejame ñujare:

—Jiadocūi meapūravui dūvarī, jaboájarā muja. Que đaivu boarājaramu muja, arejame.

Ûi que aiyede, meapūravui dūvarī, jaboarī, dabūborī, ĩnidurejacaṛā. Moa pūcajīnare boaréjacarā. Dabūborī oabedejacarā. ⁷Yu, Jesúí pare jecumu, arejacacu Pedrorre:

—Maje jabocūvacaribe ñai, que ayu, arejacacu Pedrorre.

Simón Pedro ji que aiyede ũi pūenocacajede duyu bācu ũi moa boarī memeiye boje, dorī, jārióri, dibui biararī corī Jesús yebai tarī nūrejame. ⁸Ûi yóboi jiadocūi darejacarā ñuja. Dicu pápicure moa buiní vaidéjaima na. Que baru dicure ĩni, adaivu oabedejacarā. Quéda jabūborī, ēcarui mavaranūrejacaṛā. Joabejīno cien paimetros baju barejávū.

⁹Écarui eaivu, jiadocūre datuórí, mari nūrejacaṛā pu Jesús yebai. Toaboi moa joayú barejáme ũ. Aru páure máre cūvarejame Jesús.

¹⁰Dinūmure Jesús ñujare arejame:

—Muje boaimara mácavu obebevure davajarā, arejame.

¹¹Que arí, jiadocūi jatucūnūrejame Simón Pedro cojedeca. Pápicure jabūborī, ēpacūi jūarejame. Ûrarā marejáima ñuje boaimara mácavu. Ciento cincuenta y tres baju barejáima. Obedivūvacari dicu pápicure codebedejaima na.

¹²Jesús arejame ñujare:

—Āradajarā, arejame.

Aru “¿Ñamēnu mu?” abedejacarā ñuja Jesúre. Ûre majidejacarā. ¹³Ñujare tuorejame Jesús ñuje aiyede. Páure jīni aru moa ũi joaimara mácavure máre ñujare jídejame Jesús.

¹⁴Nóque yóbecue ñuja ũi bueimare cūetedejame Jesús ũi nacajariburu yóboi yainore jarūvarī.

Jesús Simón Pedromaque ne boroteino

¹⁵Ñuje āri buojarīburu yóboi, Simón Pedrorre jēniari járejame Jesús:

—Mu, Simón, Jūai mácu, ¿ucurū mu yure ina apevu ne ue pūeno? arejame.

Aru Pedro ju arejame:

—Mu, ji jabocu, mure uvu yu. Ji uede mure majivu mu, arejame.

Ûi que aiyede, Jesús arejame:

—Dinumu yure ju aivure, paūbevure cāreja ne ũmei, meadacajacu yure.

Mi coreiye inare jauvu yópe ovejava mamajinare coreiye jauépe. Ji couyiye báquede bueni, náre yure ju arīduivure ju are đajacu, arejame Pedrorre.

¹⁶Bedióva cojedeca ũre quédeca jēniari járejame Jesús:

—Mu, Simón, Jūai mácu, ¿yure ucūru mu? arejame.

Ju arejame Jesúre cojedeca:

—Mu, ji jabocu, mure uvu yu. Ji uede mure majivu mu, arejame.

Ûi que aiyede, Jesús arejame:

—Yópe ovejavare coreipōecu ũi meadaiyepe ovejavare, nopedeca yure ju aivure meadacajacu yure. Ûi āoiyepe ovejavare, ji couyiye báquede buejacu mu yure ju aivure, arejame Pedrorre.

¹⁷Que arí, bedióva cojedeca jēniari járejame ũre Jesús:

—Mu, Simón, Jūai mácu, ¿yure ucūru mu? arejame.

Yóbecue Jesús ũi que aiyede, ũrarō chíorejame Pedro. Que baru arejame:

—Mu, ji jabocu, caiye jaubeda majivura mu. Mure uvu yu. Majivura mu, arejame.

Jesús arejame Simón Pedrorre:

—Yure ju aivure meadacajacu yure.

Ovejavare paivubu na. Ji couyiye báquede náre majicajacu mu. ¹⁸Jāve couyūbu mure: Mu mi bojūātma doiyē mi uede dorī, āri nuiyacu mu, nuquemavu mu. Ûbenita bucūcūta mure buorī nūvacūyume apesu. Mi āmuveare

dabuborī, buorī, đacuyume mure.
Dinamū maquinó mi nuiyubenoī mure
nūvacuyume, arejame.

¹⁹Nópe ayu, Pedro ũi vaiquínore
coyuyū barejaquémavu Jesús. “Mi
vaiquínore mi đaiye boje ji urópe jári,
Jāmenijicure mearore jínajarama pōeva”,
ayu barejaquémavu Jesús, Pedrore que
ayu. Dinamū arejame Pedrore:

—Ji bueimū májacu mu, arejame Jesús.

Jesúí bueimū pare ũi jecumū

(Jn 13.25)

²⁰Pedro copedini yure ũi yóboi
dayure járejame. Yu barejacácu, Jesúí
bueimū ũi pare jecumū, ũi yebai ũi
tucavai dobacu bācu ñuje āino mácarōre.
“Mu, ji jabocu, łñame maquidí mure jēne
đacuyū mi mauvare?” jēniari jáñu mácu
barejacácu Jesúre. ²¹Ne yóboi dayure
yure jári, yópe arejame Jesúre Pedro:

—Mu, ji jabocu, łñaine aipe
vaiquídica? jēniari járidurejame Jesúre.

²²Jesús arejame Pedrore:

—Ji uru, bedióva cojedeca ji
copaidaiyeta yaibécuva cūjebu

ũ. Ñaine vaiquíye míye āmevu.
Cārijovamejacu ũre vaiquíyede.
Múcapūravu quéda ji bueimū májacu
mu, arejame.

²³Que teni Jesús ũi aipe báque
boro nūrejaquemavu ũi bueimara
jēneboi: “Jesúí bueimū pare ũi
jecumū yaibécuyume ũ”. No aino
boro nūrejaquemavu yurā. Que
arīdurejaima Jesúcavu. Ūbenita nópe
ayu āmenejame Jesús. “Ye yaibécuyume
ũ”, ayu āmenejame Jesús. Quénora “Ji
uru, bedióva cojedeca ji copaidaiyeta
yaibécuva ũi cūru, míye āmevu”,
arejame Jesús.

²⁴Jesús ũi que aimamū yu. Que
barureca nuriéna coyuyūbu yu. Iye
caiye ji toivarī epeiye báque jāvetamu.
Ji toivarī epeiye báque ñija majivu
jāvene.

²⁵Jesús ũi đaiye báque caiye cūvu.
Ūbenita caiye yore toivabevu yu. Caiye
ũi teiye báquede paperare toivarī
jēoru, paperatucuboa ure baju nūjebu.
Caiye iye toivajuroede epeino cūbejebu
ijāravui. Quénoramu.

Jesús ñi yávaiye méne beorí coyucõjeimara ne ðaiye Espíritu Santoi paruéque

Los hechos de los apóstoles

Mamabuinore coyuiyebu Lucas bácu ñi toivaiye báquede Jesús ñi yávaiye méne beorí coyucõjeimara ne ðaiye báquede Espíritu Santoi paruéque. Lucas bácu, judío ãmenejaquemavu. Жюирпѳесу barejaquemavu (Col 4:11-14). Cucunrejaquemavu Pablo bácuque (Hch 16:10). Diede toivarejaquemavu, buojacuyu ñi toivaino mácarõre ñi buiye báquede ñi coyuiyeque Jesucristorã. Que baru Lc 24:50-53 aru Hch 1:1-11 máre coyurejaquemavu Jesús ñi muri nuino mácarõre cavarõ mearoi. Majidivũ ne dápiayepe maumena ñi jebeniburu yóboi ñi toivaino mácarõre Jesucristorã, toivarejaquemavu Jesús ñi yávaiye méne beorí coyucõjeimara ne ðaiye báquede Espíritu Santoi paruéque, ãniujua báquede 62-65 d.C. Ári ñi cuede ñi toivaiyede diede caivu majibevũ.

Toivarejaquemavu ñai ñũu Teófilo bácuare aru apevu judíoava ãnevure, ne majinaiyepere ayu aipe ina Jesús ñi yávaiye méne beorí coyucõjeimara mácavu ne coyuiyede, aipe judíoava ne ju abede iye coyuiyede, aipe judíoava ãnevũ ne ju ayede diede, aru aipe jabova ne ðaiyede ina Jesús ñi yávaiye méne beorí coyucõjeimara mácavure. Yópe Jesús ñi coyucõjeiyepere ñi yávaiye méne “Jerusalécavure, Judeacavure, Samariacavure, aru pu caino joborõcavure máre” (1:8) nopedeca coavaiye buojavũ iye toivaiye báquede: (1) ne coyuiyede Jerusalén ãmicuriimarcavure (1:1-6:7); (2) ne coyuiyede Judea aru Samaria ãmicurijoborõcavure (6:8-9:31); (3) aru ne coyuiyede apenoa joborõcavure máre (9:32-28:31), ina Antioquia ãmicuriimarcavure (9:32-12:24), ina Asia ãmicurijoborõcavure (12:25-16:5), ina Egeo ãmicuriya jia urada écarucavure (16:6-19:20), aru ina Roma ãmicuriimarcavure máre (19:21-28:31).

Espíritu Santo ñi daquino

(Mt 3.11; Mr 1.8; Lc 3.16, 24.49; Jn 1.33)

1 ¹⁻²Мѳ, Теófilo, ji mamarumũ toivaiye báquede toivacacu yũ, mi majiquiyepere ayũ caiye iye Jesús ñi ðaiye báquede aru caiye iye ñi bueiye báquede máre. Majicacacu yũ mure caiyede Jesús ñi memeni buijãravure, aru pu ñi cavarõ mearo Jũmenijicui curõi mujãravũita máre, jípacu Jũmenijicu ñi jacopaiyovaiyede ñre cavarõ mearo ñi curõi. Aru ñi muri nuquiyepere jipocai, Jesús ðaicõjonejamedã ñi yávaiye méne beorí coyucõjeimara ñi beoimara

mácavure, Espíritu Santoi paruéque.

³Aru caiye cuarenta pajãravũã Jesús ñi yainĩburu yóboi, ina ñi yávaiye méne beorí coyucõjeimara jávarejaimada ñre cainũmũã. Que baru jáve majidejaimada na Jesús apucure cojedeca, nacajañũ mácuare yainore jaravari. Ñre járejaimada. Aru coyurejamedã náre Jũmenijicui jabotequiyede ñi põevare.

⁴Jesús cucu bácu náque cãreja, yópe arĩ, cõjonejamedã náre:

—Numejara muja Jerusaléne jocarĩ cãreja. Quéda corejarã ñaine, jípacui daroquimure mujare. ⁵Juan Bautista bácu jáðovame mujare Jũmenijicure

ocoque. Ñbenita yu jádovacuyubu mujare Jūmenijicure pueno mearo baju obebejārvua yóboi. Darocuyubu mujare ñai Espiritu Santore, arejameda náre Jesús.

**Jesús ñi mũino ñmũi, cavarō mearo
Jūmenijicui curōi**

(Mt 28.19; Mr 16.15, 19; Lc 24.47-48, 50-51)

⁶No yóboi, Jesús ñi yávaiye méne beorī coyūicōjeimara cójijidejaimada ñeque cūracū Olivocū āmicuricū puenoī. Aru jēniari járejaimada ñre:

—Mũ, ññje jabocu, ¿caride jaboteicōjequidica mũ cojedeca majacavu, Israecavure? arejaimada na.

⁷Jesús arejameda náre:

—Jipacu, ñi caivure jaboteiye boje, majibi aipijārvua vaiquíye jaurōre. Ñbenita ñ majicōjememi mujare iyede.

⁸Jūmenijicu darocuyube ñai Espiritu Santore, ñi ñaicōjequiyepe ayu mujare. Que baru muja coyurājaramu ji yávaiye méne. Coyurājaramu muje jáiyede ji ñaiye báquede aru muje jápaiyede ji coyūiye báquede máre. Coyurājaramu caivu ijārvucavure: Jerusalécavure, Judeacavure, Samariacavure, aru pu caino joborōcavure máre, arejameda Jesús.

⁹Que arī yávaiyeda, Jesúre jacopaiyovarejaquemavu Jūmenijicu náre jocarī, cavarō mearo ñi curōita. Ñi mũiyedeca oopenibo darī, ñre taorejavūya. Quéñora jámenejaimada ñre. ¹⁰Ne járiduiyedeca cavarōre Jesús muri bñjayure, cūiná, pucarā ñmũva doivu boricajea cuitótecajeare núrejaimada ne yebai. ¹¹Ina pucarā ángeleva jēniari járejaimada náre:

—Mũja, Galileacavu, ¿aipe teni yui nūri jáivurū muja cavarōre? Ñai Jesús mũñu mácu mujare jocarī cavarō mearo Jūmenijicui curōi copaidacuyube cojedeca ijārvui cavarō mearore jocarī yópe ñi mũiyepedeca, arejaimada.

**Matíare ne beoino Judas bácu ñi
yaiye boje**

(Mt 3.16, 10.2-4, 27.3-8; Mr 1.9, 3.16, 19, 16.19; Lc 3.21, 6.14-16, 24.51)

¹²No yóboi, Jesús ñi yávaiye méne beorī coyūicōjeimara copainurejaimada

cūracū Olivocū āmicuricūre jocarī Jerusalén āmicurīmaroi. Cūinákilometro vaivárejaimada na. Yópe judíoiva ne jabuóva ijārvui nuicōjeiyepe vaivárejaimada na. ¹³Ne eaiyede diīmaroi, ecorī, nuri cūinádami cūrami, ñmucacucubuita, ne curitucubui, ecorejaimada na: Pedro, aru Juan, Santiago, Andrés, Felipe, Tomás, Bartolomé, Mateo; apesu Santiago, Alfoi mácu; Simón āmicucu Celote, aru Judas, apesu Santiago jicu máre.

¹⁴Obedijārvua Jūmenijicūque jēniari, cójijivu barejaimada na nore. Jesú yóva, María, Jesú paco, aru apenvu nomiva máre, caivu ina cūináturu ne ñme Jūmenijicūque jēniarejaimada na.

¹⁵Obebejārvua yóboi, Jesúre ju aipōeva cójijidejaimada. Ciento veinte paivu baju barejaimada na. Aru Pedro nacajari arejameda náre:

¹⁶—Mũja, jívu, jave vaivá yópe Jūmenijicui toivaicōjeiye báquepe David bácu Espiritu Santoi paruéque. Judas bácu jēni jiaime Jesúre ñi mauvare. ¹⁷Ñ mácu, majacacu bácu, yóvayu bateáme majare. Que baru ñ mácu máre Jesús ñi beoimu mácu bateáme, ñi memequiyepe ayu majaan, arejameda náre Pedro.

¹⁸Jesúre ñi jēni jíquiye jipocai, Judas bácu jacopurejameda táuturare, ñi Jesúre jēni jíye boje, ñi āmeina teiye boje. Iye táuturaque apenvu bojedarejaimada cūináro joborōre. No joborōre ñi baju boarī jaruvaiyucu, ñmũi turī darī ñi baju bñjarejaimada Judas bácu. Aru ñi curabo etarejavūya joborōita. ¹⁹Caivu Jerusalén āmicurīmarocavu jápiarejaimada ñ mácu borore. Que baru ne yávaicamuaque amidorejaimada no joborōre Acéldama āmicurō, Jivecurō aiyrō. ²⁰Pedro are nurejameda ina Jesúre ju aipōevare yópe:

—Jave toivarejaquemavu iye toivaiye báque Salmos āmicurōi yópe Judas bácu borore:

Ñi curō mácáro pōecubeno majaróri. Ñame cubejarāri nore, arī toivarejaquemavu.

'Aru yópe toivarejaquemavũ apeno Salmoi:

Apecu ðajacurĩ ñi mememo mácarõre, arĩ toivarejaquemavũ.

²¹⁻²² 'Que baru apecu yóvajacurĩ ñũjare, ñ máre coyũcuyũ põevare ñũjare: "Majivũ yũ Jesús apũcũre. Êre jácasu yũ, nacajañũre yainore jarũvarĩ", arĩ coyũcuyũme ñ. Ê majacurĩ cũinácũ nácasũ ina ñũjaque curivũ bácavũ jaravũa coapa Jesús ñi cuiyede ñũjaque, Juan Bautista bácũ ñi jáðovari buiyede põevare Jũmenijicũre ocoque, aru pũ Jesús ñi mũijãravũita cavarõ mearo Jũmenijicũ curõi, arĩ coyũrejameða náre Pedro.

²³ Êi coyũrĩburu yóboi, ina põeva jáðovarejaimaða pũcarã ñmũvare, nácavũre, cũinácũ ñi ãmiá José, ne ãmidoimũ Barsabás aru apenũmũa ne ãmidoimũ Justo, aru apecu máre, ñi ãmiá Matías. ²⁴⁻²⁵ Yópe arĩ, jẽniarejaimaða ina Jesũre jũ aipõeva Jũmenijicũque:

—Mũ, ñũje jabocũ, me majivũ mũ caivũ põeva ne dápaiyede. Que baru jẽniaivũbu mũre. Majide ðajacu ñũjare ñamene ina pũcarã ñmũvare mi beoimũre, ñi memecaquiyepẽ cũinátũru ñũjaque mi yávaiye méne beorĩ coyũicõjeimaraque. Judas bácũ ðajocame mi yávaiye méne coyũinore, ñi nũiyede toabo cũiméboi, ñi ãmeina teiye báque boje. Que baru apecũ mi yávaiye méne beorĩ coyũicõjeimũ jaubi, arĩ jẽniarejaimaða na.

²⁶ Ne jẽniariburu yóboi, ðvarejaimaða cũrayabeare, ina pũcarã ñmũva ne ãmiáque. Aru tũrejavũya ðiyabe Matías ñi ãmiáque. Que baru ñ máre, apecũ once paivũque, Jesús ñi yávaiye méne beorĩ coyũicõjeimũ teðejameða Matías.

**Espíritu Santo ñi edaino
Jesũre jũ aipõevare**

2 ¹ Pentecostés ãmicũrijãravũ eaiyede, caivũ ina Jesũre jũ aipõeva cójijidejaimaða cũinãdami cũrami jĩvũ. ² Cũinã jápiarejaimaða

ũrarõ bujinore yópe ñmevũ parũõ jãpũinope. No bujino ðarejavũya cavarõre jocarĩ. Aru caivũ ina dobarivũ ðĩnamĩ jĩvũ jápiarejaimaða no bujinore. ³ No yóboi, járejaimaða ñre toa quĩjino uruino yópe jemedope. Tubarejavũya caivũre, náre coapa. ⁴ Caivũ ina põeva cũvarejaimaða ñai Espĩritu Santore. Náre yávaicõjenejameða. Aru yávarejaimaða apecamua yávaicamua ne majibecamua, yópe ñai Espĩritu Santo yávare ðaiyepẽ náre coapa.

⁵ Nore Jerusalén ãmicũrĩmaroi judfova caino joborõcavũ cũrejaimaða ðijãravũare. Ina judfova cainũmũa jíðejaimaða mearore Jũmenijicũre. ⁶ Ne jápaiyede iye vaiyede, obedivũ ina judfova cójijidejaimaða. Aru jápiarejaimaða caivũ na coapa Jesũre jũ aipõeva yávaivũre ne yávaicamuaque. Que baru pare cũcumarejaimaða na. ⁷ Cũcumari, pare dápaiivũ arejaimaða na:

—Jãrijide apa. ¿Galileacavũ ãmeni caivũ ina yávaivũ? ⁸ ¿Aipe teni caivũ ñũja jápaiivũba náre yávaivũre ñũje yávaicamua coapa? ⁹⁻¹⁰ Yui curivũbu apecũ Partiacavũ, aru apecũ Mediacavũ, apecũ Elãcavũ, apecũ Mesopotamiacavũ, apecũ Judeacavũ, apecũ Capadociacavũ, apecũ Pontocavũ, apecũ Asiãcavũ, apecũ Frigiacavũ, apecũ Panfiliacavũ, apecũ Egiptocavũ, apecũ Áfricãcavũ, aru apecũ Cirenacavũ máre. Aru apecũ Romacavũ máre curivũbu yui. Apecũ majacavũ judfovã, ne põeteiye báque boje nópe, ne cãvã boje nẽbũcãva judfova. Aru apecũ majacavũ judfova ãmevũ, ñbenita jũ aivũbu judfovai bueiye. ¹¹ Curivũbu apecũ Cretacavũ aru apecũ Arabiacavũ máre. Ñbenita maja jápaiivũbu náre yávaivũre maje yávaicamua coapa. Coyũivũbu majare Jũmenijicũi ũrarõ mearo ðainore ñi parũéque, arejaimaða ne bajumia.

¹² Cũcumãivũ aru jápiarĩ eabevũ cãreja, jẽniari járe cuivũ barejáimãna ne bajumia:

—¿Aipe ðarĩ jápiarĩ earãjídica maja caiye iyede? arejaimaða na.

¹³ Ûbenita arevũ yurivũ arejaimada ina Jesũre ju aipõevare:
—Ina ãmũva pacovatamu! arejaimada.

Pedro ãi yávaino põevare

(Mt 22.44, 27.35, 28.5-6; Mr 12.36, 15.24, 16.6; Lc 20.42-43, 23.33, 24.5; Jn 19.18; 1 Co 15.25; He 1.13)

¹⁴ Dinũmũma Pedro nacajari, nũri arevũ once paivũ Jesũs ãi yávaiye méne beorĩ soyũicõjeimaraque parũrõreca soyũrejamedã caivũ ina obedivũ põevare, ne járiarĩ earãjiyepe ayũ iye ne jáiye báquede aru ne járiaiye báquede máre.

—Mũja, judíoiva, jívũ, caivũ mũja Jerusalécavũ, caride coreóvajarã diede, ñũje majiéde. Járiajarã yũre. Aru me járiarĩ adajarã ji soyũquiyede mũjare.

¹⁵ “Pacovabebu”, arĩ dápiaiuvũbu arevũ mũjacavũ ñũjare. Ûbenita javejĩnamu, nueve bajĩ caride. Que baru pacova ãmẽvũ ñũja. ¹⁶ “Pacovabebu”, arĩ dápiabejarã mũja ñũjare. Que baru põescu cubebĩ pacoteyũ javejinare. Quénora ñũje ðaiyede yõpe soyũsarejaquemavũ Jũmenijicũi yávaiyede soyũsairpõescu básu, ãi ãmiã Joel.

¹⁷ Jũmenijicũ arejaquemavũ: “Yõpe ðascũyũtu yũ ãnijãravũna bũojaquijãravũna baquiyéna. Daroscũyũtu ji Espĩriture caivũ põevare. Mũjemara, aru mũjemaromiva máre, Jũmenijicũi yávaiyede soyũsarãjarama. Mũjacavũ ãmũva bojvũ arũrivũre yõpe decoboainope majide ðascũyũtu yũ. Aru mũjacavũ ãmũva bũscũvare majide ðascũyũtu yũ decoboainoque. ¹⁸ Jáve ãnijãravũna baquiyéna daroscũyũtu ji Espĩriture yũre memecairpõevare, ãmũvare aru nomivare máre, ne soyũsarãjiyepe ayũ ji yávaiyede. ¹⁹ ðascũyũtu yũ põeva ne jámene cavarõĩ aru ne ðarĩ majibede joborõĩ. Aru põeva járajarama jivede, toare, aru bicore máre,

caino jidojarõ, ji jáðovaquiyẽ jipocare náre. ²⁰ Jũmenijicũi ñãjiovaquijãravũ baquinó jipocare põevare, ne ãmeina teiye boje, ñai aviã pẽomescũyũme. Quédãta ñemitecũyũme ãi. Aru aviã ñamicacu máre jũatecũyũme yõpe jivepe. Yõpe vaiquiyebu maje jabocu Cristo ãi daquijãravũ baquinó jipocare. Põeva járajarama urarõ ne ðarĩ majibede. Aru ne jáiyede diede pare cuedmarajarama na. ²¹ Dijãravũna baquiyéna meadãscũyũtu caivũ ina órejaiyvũre yũre ji cadatequiyẽpe aivũre náre. Ĩscũyũtu náre abujuvai jabocuĩ parueéde jocarĩ”, arejaquemavũ Jũmenijicũ, soyũsarejaquemavũ Joel básu.

²² Mũja, Israecavũ, me járiajarã ji soyũquiyede mũjare. Jũmenijicũ jáve jáðovaquemavũ mũjare ãi daroimu mácure, ãi me jáimũre, Jesũs Nazarecacure. Que baru Jesũs ðáme ãi ðaiye báquede Jũmenijicũi parueéque, põeva ne jámene, aru ne ðarĩ majibede, aru ape parueéque ðaiyede máre mũje jẽneboi. Que baru mũjavacari majidivũbu caiye iye jávene. ²³ Ñai Jesũre Jũmenijicũ javede jẽni jicõjenejaquemavũ, yõpe ãi urõpe aru ãi majiéque máre. Que baru jẽni jíquemavũ ãre mũjare. Aru mũja boarĩ jarũvaicõjeavũ ãre, ãmeina teivũre ne pẽvarajiyepe aivũ ãre joscũjaravena. ²⁴ Ûbenita Jũmenijicũ nacovaquemavũ ãre yainore jarũvarĩ. Jesũs yayiũ básũvacari, mautebeteame yayiũ básure. Que baru Jũmenijicũ jebequemavũ ãi ñãjiye báquede ãi yainore. ²⁵ Javede ñai jabocu David básu, yõpe arĩ, Jũmenijicũi yávaiyede soyũsarejaquemavũ Jesũrã:

Cainũmũa jácacũ yũ ji jabocure ji jipocai. Û cubi ji yebai. Que baru arevũ cãrijovari bũojabenama yũre. ²⁶⁻²⁷ Mũ, Jũmenijicũ, dajocabecubu mu ji ãmene ina yayivũ básavũ ne curõĩ. Pojeicõjemescubu mu ji

bajure, ji meacu baju boje, aru ji memecaiye boje mure. Que baru torojvnu yu ji ũmei. Aru torojvri yávaivnu yu. Caivnu pōevape páyu, yu máre yaicúyumu. Ũbenita apucu jabuóvaivnu yu, ji coreiye boje mi mearo đacaquiyede yure. ²⁸Mu jáđovaiivnu yure ye đaiye jauřore cucuyure máque. Aru mi cne boje yáque cainumna, urarō torojvnu yu mure, arı soyucarejaquemavu David bācu Jesús ũi coyuiye báquede Jūmenijicure.

²⁹Muja, jívnu, jáve soyuiyvnu mujare majeñecu mácu David bācu borore. Ũ mácu yaidéjaquemavu. Aru jaruvarejaquemavu ũi baju bācarōre cūracobei. Maja cari curivabu joabenoı dicobede. ³⁰Ńai David bācu apucu cāreja, Jūmenijicui yávaiyede soyucaipōecu barejaquémavu. Majidejaquemavu Jūmenijicu jáve đacuyure yópe ũi aiye báquepedeca úre. Jūmenijicu soyurejaquemavu David bācure, “Yópe jáve đacuyumu” arı: “Mu, David, yópe mearo đacacuyumu yu mure. Cūinācu mipāramenacacure jaboteicōjecuyumu yu, yópe ji jaboteicōjeyepedeca mure”, arejaquemavu Jūmenijicu David bācure. ³¹David bācu Jūmenijicui yávaiyede soyucaipōecu barejaquémavu. Que baru majidejaquemavu Jūmenijicui đaquiyede. Die majiéque soyurejaquemavu ũai Cristoi borore, yópe arı: “Jūmenijicu đajocabecube úre yaivnu bācavu ne curōi. Ũi bajure máre pojeicōjemecube úre”, arı soyucarejaquemavu Jūmenijicui yávaiyede David bācu. ³²Ńaineca Jesúre Jūmenijicu nacovaquemavu yainore jaruvarı. Aru caivnu ũija úre jácarā apucure cojedeca ũi yainıburu yóbore. ³³Jūmenijicu nacovarı Jesúre epequemavu úre ũi meapūravui. Ńai meapūravui cucu paruéde cāvabi. Aru jípacu Jūmenijicu daroquemavu úre ũai Espiritu Santore, yópe ũi aiye báquepedeca. “Darocuyumu mure ũai Espiritu Santore”, jipocamia aquemavu Jūmenijicu Jesúre. Aru Jūmenijicu

Jesúre daroicōjeimi ũai Espiritu Santore ũujare máre. Que baru Jesús đaiı caiye iye muje jáiyede, muje jápaiyede máre cari jāravure. ³⁴Ũbenita David bācu muri numenejaquemavu cāreja cavarō mearo Jūmenijicui curōi yópe Jesús ũi muıye báquepe. Que baru David bācu arejaquemavu yópe:

Jūmenijicu aquemavu ji jabocure:

“Dobajacu ji meapūravui mi cūvave boje paruéde yupedeca. ³⁵Aru yu epecuyumu mi mauvare mi cuboba cāchinoi. Que teni mure vainı jaruvare đacuyumu yu náre, mi jabotequiyepere ayu náre”, arejaquemavu David bācu Cristorā.

³⁶Caivnu muja Israecavu jáve majijarā iyede: Ńai Jesúvacaribe muje jocusujaravena pēvaicōjeimu mácu, ji soyuımu mujare. Ũbenita Jūmenijicu epeıbi ũai Jesúre maje jabocūva. Ũrecabe Jūmenijicui daroımu mácu, arejameda Pedro ina pōevare.

³⁷Aru ina pōeva, ne jápaiyede caiye ũi coyuiyede náre, cārijinejaimada. Que baru arejaimada Pedrojāre:

—Muja, ũujevnu, łaipe đarājidi ũija? arejaimada na.

³⁸Pedro arejameda náre:

—Caivnu muja jaruvajarā muje āmeına teiyede. Aru oatuvajarā muje đaiyede. Jáđovajara Jūmenijicure ocoque muje Jesúre ju aiye boje, Jūmenijicu ũi ārūmetequiyepere aivnu muje āmeına teiyede, aru ũi daroquiyepere aivnu mujare ũai Espiritu Santore. ³⁹Mujare, mujemarare, mujepāramenare máre, aru caivnu ina joai curivure máre darocuyume cāreja Jūmenijicu ũai Espiritu Santore yópe ũi aiye báquepedeca. Caivnu ũi cutuiyumarare meadacuyume ũ, arejameda Pedro.

⁴⁰Aru Pedro soyure nurejameda náre parurōreca, urarō ũi coyuiyede, ne ju arājıyepere ayu Jesúre.

—Ina āmeına teıvnu pare ũājınajarama. Jūmenijicu meadajacurı mujare, muje ũājımenajıyepere ayu ne ũājınajıyepere, arı soyurejameda Pedro.

⁴¹Que ayure jápiarí, obedivu ina pōevacavu ju arejaimada iye ùi coyuiyede. Aru Pedrojá jádovarejaimada náre Jūmenijicure ocoque. Que teni, dijāravure cójijidejaimada arevu yóbecurimil paivu baju Jesúre ju aipōevaque. ⁴²Yópe dare cuivu barejáimada járavua coapa. Jesús ùi yávaiye méne beorí coyucōjeimara bueivu barejáimada náre. Cađateivu barejáimada ne bajumia. Ne cūvaede jívu barejáimada ne bajumia. Caivu áivu barejáimada cūináromia. Aru caivu jēniaivu barejáimada Jūmenijicūque máre cūináturu.

Jesúre ju aipōeva mamarumucavu ne đaino
(Hch 4.32-35)

⁴³Jesús ùi yávaiye méne beorí coyucōjeimara đare cuivu barejáimada ure pōeva ne jámene, ne đarí majibede máre. Aru iye ne jádovaiyede jári, caivu cūcumarejaimada pare. ⁴⁴Caivu ina Jesúre ju aipōeva, cūináturu ne ũme, cađateivu barejáimada ne bajumia. Nácavu cūve cūvarivu jívu barejáimada arevu nácavure jauéde, cūbenajiyepa aivu cōmaje árojarivu ne jēneboi. ⁴⁵Cūinácu nácacure jauŕu, arevu nácavu bojedarí ne cūvaede, jívarejaimada ñai cūvabecure jauéde. ⁴⁶Caijāravua cójijivarejaimada Jūmenijicui cūrami. Aru cójijivarejaimada ne cūramia coapa, árajivu. Torojurí ávarejaimada na ne ũme méque. ⁴⁷Jívarejaimada mearore Jūmenijicure. Que baru caivu arevu pōeva me járejaimada náre. Pueđarejaimada náre, ina Jesúre ju aipōevare. Aru caijāravua Jūmenijicu cójijovarejaquemavu arevu ùi meadaimarare.

Pedro aru Juan ne meadaino cuiye majibecure

3 ¹Cūinájāravu, tres baji nainú, Pedro Jūamaque mūri nuivu barejáimada Jūmenijicui cūrami. Diora cūináora judíoiva ne Jūmenijicūque jēniaiora barejávūya. ²Cūinácube

Jūmenijicui cūrami jedevacobe yebai, Meacobe ámicurijedevacobe yebai, cūrejameđa cūinácu ũmu, cuiye majibecu. Ñai ũmu pōetedejameđa cuiye majibecu. Caijāravua arevu úre nuvari epevarejaimada yo jedevacobe yebai, ùi jēniaquiyepa aivu táuturare ina Jūmenijicui cūrami ecoivure. ³Ū jáñu mácu Pedroro aru Jūare máre ecoivure, jēniaridurejameđa táuturare náre. ⁴Ūbenita ina pūcará pare járejaimada. Aru Pedro arejameđa úre:

—Jájacu ñujare, arejameđa.

⁵Ūi que aiyede, ñai ũmu járejameđa náre, “Jínajivubu yure”, arí dápjaríduyu.

⁶Dinumu Pedro arejameđa úre:

—Táuturare cūvabevu yu. Ūbenita jíquijivu mure ji majié cūvaede. Jesús Nazarecacu ùi ámiái, ùi paruéque, nacajarí cuicōjeivu mure, arejameđa Pedro.

⁷Que ayuva, ùi puŕu meapūravure jēni, Pedro nacovarejameđa úre. Cūiná ùi cuboba, ùi cubochiarua máre, tutudejavūya. ⁸Maumejiena biararí, núri ùi cubobare, vaivarí búrejameđa ũ, cuiye majibecu bácu. Ecorejameđa Jūmenijicui cūrami náque. Vaiváyu barejameđa. Biaráyu barejameđa. Aru yópe arí, mearore jívu barejameđa Jūmenijicure: “Jūmenijicu meacu bajube”, ayu barejameđa ñai cuiye majibecu bácu. ⁹Obedivu pōeva járejaimada úre vaiváyure. Aru jápiarejaimada úre, “Jūmenijicu meacu bajube”, ayure. ¹⁰Ne coreóvayede úre ñai táuturare jēniari dobacu bácu Jūmenijicui cūrami jedevacobe yebai, pare cūcumarejaimada na, ñai ũmu ùi meateiye boje.

Pedro ùi yávaino pōevare Salomón mácuí cuinoi

(Mt 22.32, 27.15-23; Mr 15.6-14; Lc 23.13-23; Jn 19.12-25; Hch 7.37; Gá 3.8; Fil 2.7-9)

¹¹Ñai ũmu jēiyede Pedroro aru Jūare máre, ina obedivu pōeva cūcumaivu cūyarejaimada ne yebai Jūmenijicui cūramiacuino, Salomón mácuí cuino

āmicurōi. ¹²Pedro jāññu mácu ina pōevare, arejameđa náre:

—Mujá, Israecavũ, ¿aipe teni cucumaivurũ mujá? ¿Aipe teni jáivurũ ñujare? ¿Dápiavurũ cure ðaivure ñai ũmure ñuje paruéque, o ñuje me boje Jūmenijicui jáinore?

¹³Abraham mácu, Isaac bácu, aru Jacob bácu máre, majeñecuva mácavu ne ju aimũ, Jūmenijicu, jáðovaimi ũre memecaipōecu Jesús ũi paruéde. Ñai Jesúrecabe mujé jēni jícaimũ mácu mujé jabovare, ne boarí jaruvarãjiyepe aivũ ũre. Aru ñai jabocu Pilato ũi jaetovaiyuede, ũbeteavũ mujavacari.

¹⁴Ñai Jesús cainũmũ memecayũ bateáme Jūmenijicure. Aru cainũmũ ðayũ bateáme mearore Jūmenijicui jáinore. Ũbenita mujá ũbeteavũ ũre. Quénora mujá jēniavũ Pilatore, ũi jaetovacaquiyepere aivũ mujare ñai boaipōecure, Jesúre jaruvarí. ¹⁵Que teni mujavacari boarí jaruvaicōjeavũ ñai jíyũre pōevare jāravũ cūiméjāravũ baquinóre. Ũbenita Jūmenijicucapūravũ nacovaquemavũ ũre yainore jaruvarí. Ñujavacari jácarã ũre apucure cojedeca, ũi yainĩburu yóbore. ¹⁶Jesúvacari, ũi paruéque, meadacube ñai cuiye majibecu bácu. Caride mujá jári majidivũbu caiye iye vaiyede ũre, ũi dápiaye boje, yópe arí: “Jesús meadayũ majibi”, arí dápiacube ũ. Aru ũi ju aipe boje Jesúre, meateibi ñai ũmũ mujé jáiyede.

¹⁷Mujá, jívu, majivu yũ. Mujé ðaiye báquede aru mujé jabova ne ðaiye báquede Jesúre boarí jaruvaivũ coreóvabeteavũ mujá diede. ¹⁸Javede caivũ ina Jūmenijicui yávaiyede coyũcaipōeva mácavũ coyũrejaimađa ũra, pōeva ne coreóvarãjiyepe aivũ ũi ðaroimũ mácu Cristoĩ urarō ñájiquiyede. Aru nópe ne coyuiye báquepedeca vaiávũ Jesúre. ¹⁹Que baru chĩojara mujá mujé āmeina teiyede. Aru oatũvajarã mujé ðaiyede. Vojarã Jūmenijicure, ũi jaruvaquiyepere aivũ mujé āmeina teiyede, aru diede máre ũi ārũmetequiyepere aivũ. ²⁰Mujé yópe ðaru,

Jūmenijicu parũre ðacayũme mujare mujé ũmei. Aru ðarocayũme mujare Jesúre, ñai ũi beoimũ mácu, mujare meadacayũre. ²¹Jesús ũi mauteino jaũvũ cavarō mearo Jūmenijicui curōi pũ dijāravũ baquinói, Jūmenijicui caiyede mamaene cuedaquijāravũita bedióva cojedeca. Javede Jūmenijicui yávaiyede coyũcaipōeva mácavũ, Jūmenijicure cūinácura memecaivũ, coyũcarejaimađa Jūmenijicure, pōeva ne majinajiyepere aivũ diede. ²²Nopedeca, Moisés bácu arejaquemavũ: “Jūmenijicu, mujé jabocu, ðarocayũme mujare cūinácũ ũi yávaiyede coyũcaipōecure, yópe ũi ðaroiyepere yũre. Ũ macayũme cūinácũ mujacacu. Judío bacayũme ũ. Me járiajarã ũre. Ðajarã yópe ũi coyuiyepere. ²³Ácu pōecu ũi járiabedu ũre, Jūmenijicu coavacayũme ũre ũi pōevare jaruvarí”, arejaquemavũ Moisés bácu.

²⁴Samuel bácu aru ũi yóbocavũ bácvũ, aru arevũ Jūmenijicui yávaiyede coyũcaipōeva mácavũ máre coyũrejaquemavũ iye vaquiyede añijāravũba baquiyéde. ²⁵Jūmenijicu coyũcōjenejaquemavũ ũi yávaiyede coyũcaipōeva mácavũre, yópe arí: “Yũ, Jūmenijicu, mearo ðacacayũmu mujare”. Aru “mujare” ayũ Jūmenijicu, majeñecuva mácavũre aru majare máre ayũ barejaquemavũ. Jūmenijicu “Yũ mearo ðacacayũmu mujare” ũi aiyede apesu oatũvarí buojabebi diede. Aru Jūmenijicu baju oatũvabebi ũi que aiyede. Que baru mujavacari jáve jacopurãjaramu Jūmenijicui mearo ðacaquiyede. Mearo ðacacayũme mujare máre. Nopedeca arejaquemavũ ũ Abraham mácu: “Mipāramena márãjivũre mearo ðacacayũmu yũ. Mure mearo ðacayũ báquepedeca ijāravũcavũ arevũ caivũre máre mearo ðacacayũmu yũ”, arejaquemavũ Jūmenijicu. ²⁶Aru beorejaquemavũ Jesúre, ũre memecaipōecure. Ũre nacovariburu yóboi, ðaroquemavũ maje yebai mamarũmure. Que ðarí Jūmenijicu mearo ðacaquemavũ majare, ũi jaruvaicōjeiye boje majare maje

ãmeina teiyede, arejameđa Pedro ina pöevare.

Pedro aru Jũamaque ne boroteino jabova yebai

(Mt 21.42; Mr 12.20-22; Lc 20.17; Jn 14.6; 1 P 2.7)

4 ¹Pedro aru Juan máre yópe yávaiyedeca ina pöevare, apevu sacerdotevacavu, aru Jũmenijicui cũramine coreipöevai jabocu, aru saduceovacavu máre nurejaimada ne yebai. Saduceo âmicurijajubo judfovavavu barejaimada na. Dápiarejaimada nacajaino cubenore yainore jaruvarĩ. ²Jararejaimada Pedrojäre ne bueiye boje. Pedrojã arĩ buedejaimada:

—Jesús nacajaquemavu yainore jaruvarĩ. Aru maja máre nacajarajaramu yainore jaruvarĩ, arejaimada Pedrojã.

³Jaraivũ Pedrojäre, ina saduceovajã náre jëni, ãmeina teivũre jëni jacoiñami nuvaicöjenejaimada churaravare. Jave nainũ marejávũya. Que baru cõmiájãravũita jabova ne ãmeina teivũre jëniari jáiñami nuvarajivũ barejaimada náre. ⁴Ûbenita obedivũ pöeva, ne bueiye de jápiaivucavu bãcavu, ju arejaimada Jesũre. Ina pöeva mamarumũ ju aivũ Jesũre dijãravũre cũinápuupe paimil paivũ baju ãmũva marejaimada na. Obedivũ nomiva máre ju arejaimada ũre.

⁵Cõmiájãravũ ina judiovai jabova, aru bucũva, aru Jũmenijicui yávaiyede bueipöeva máre cójijidejaimada Jerusalén âmicurĩmaroi. ⁶Apevu ina jabovacavu barejaimada sacerdotevare jaboteipöecu ũi ãmiá Anás, aru Caifás, Juan, Alejandro, aru apevu Anás jinacavu. ⁷Cójijivũ bãcavu, davaicöjenejaimada Pedrojäre ne yebai aru núicöjenejaimada náre ne coricai. Que teni cũinácu nácacu jëniari járejameđa Pedrojäre:

—¿Ñamei paruéque meadarãru muja ñai cuiye majibecu bãcũre? arejameđa náre.

⁸Dinumũ ñai Espĩritu Santo Pedrove ñaicöjenejameđa ũre ũi ju aiyede náre.

⁹—Muja jabova, muja bucũva máre, caride muja jëniari jáivũ ñũjare ñũje meadacaino mácarõre ñai cuiye majibecu bãcũre. Muja majiyuvũ aipe ñarĩ meadaimũ mácũre. ¹⁰Que baru coyũyubu mujare, muje majinajiyepe ayũ, aru caivũ Israecavu máre, ne majinajiyepe ayũ. Jesús Nazarecacu ũi parué boje, ñai ãmũ númi yui muje jáinoi, meacu baju. Ñainecabe Jesús muje pëvari boarĩ jarũvaimũ mácu. Ûbenita Jũmenijicu toivaicöjenejaquemavu ũre yainore jaruvarĩ. ¹¹Aru Jũmenijicu toivaicöjenejaquemavu ũi yávaiyede yópe Jesúi borore: “Iva cũravare cũramine ñaipöeva ũbeni jarũvaquemavu. Caride iva cũrava caiva apeva pueno parũrivabu”, arejaquemavu Jũmenijicu. Nopedeca Jesús, muje ũbemũ mácu, Jũmenijicui epeimũ. Apevu pueno jabocu parũcũbe ñai Jesús. ¹²Que baru ũrecabe cũinácu pöevare meadaipöecu. Ijãravũre apecu cubebi. Quécũra Jesús, Jũmenijicui epeimũ, pöevare meadayũ buojaibi, ne ñãjimenajiyepe ayũ ne ãmeina teiye boje, arejameđa Pedro cójijinocavũre.

¹³Ûre jápiaivũ bãcavu, ina cójijinocavu cuecumarejaimada, ne jáiyede Pedrore aru Jũare máre yávaivũre jidubevũva, ne coreõvaiye boje náre ũbeni curivũre aru buebevũ bãcavũre máre. Ûbenita majidejaimada Jesúi yóvaimara mácavũre. ¹⁴Jãrejaimada ñai ãmũ meadaimũ mácũre ne jëneboi Pedro aru Jũaque máre. Que baru coyũrĩ majibeni, bi arejaimada na. ¹⁵Dinumũ etaicöjenejaimada Pedrojäre ne cójijitucubũre jocarĩ. Ne etarĩburu yóboi, ina jabova yávaivũ barejaimada ne bajumia, yópe arĩ, jëniari járejaimada:

¹⁶—¿Aipe ñarãjídica maja náre?

Ñarãma na urarõ pöeva ne ñarĩ majibede. Caivũ Jerusalécavu majima ne ñaiye báquede. Que baru maja ju abeni majibevũ. ¹⁷Ûbenita ne buebenajiyepe aivũ apevũre ne bueiye de, aru ne ñabenajiyepe aivũ pöeva ne ñarĩ majibede cojedeca, yávaicöjemenajarevu

cojedeca Jesúí borore, arejaimada ina cójijinocavú, ne bajumia yávaivú.

¹⁸Ne yávarĩburu yóboi,

órejaicōjenejaimada Pedrorre aru Jũare máre ne cójijitucubú cojedeca. Aru parurōreca yávaicōjemenidurejaimada náre Jesúí borore.

—Bediōva cojedeca buebejarā m̃ja Jesúí borore, arĩdurejaimada na Pedrojāre.

¹⁹Ūbenita Pedrojācapūravú arejaimada ina judíovai jabovare:

—Dápiarĩ majijarā m̃ja. ¿Jũmenijicui jáĩnoi, ju arājidi ñ̃ja m̃je ðaicōjeiyede o Jũmenijicui ðaicōjeiyede? ²⁰Jave dápiarĩ majivú ñ̃ja aipe ðaiye jaurōre ñ̃jare. Ju aipe javuvú ñ̃jare Jũmenijicui ðaicōjeiyede. Que baru apenore ðaiye majibevú ñ̃ja. Quéñora ðaivubu yópe iye ñ̃je jáiye báquepe, aru yópe ñ̃je jápiaiye báquepe máre, arejaimada.

²¹Ina cójijinocavúcapūravú cojedeca yávaicōjemenidurejaimada náre parurōreca.

—Jesúí borore m̃je buedu, ñ̃jine ðarājivubu m̃jare, arejaimada Pedrojāre.

Ina pōevacapūravú torojurĩ mearore jidejaimada Jũmenijicure, Pedrojā ne ðaiye báque boje. Que baru ina cójijinocavú, yávaicōjemeniduvú, jaetovarejaimada náre. ²²Aru ñ̃ai ũmú, ne meadaimú mácu pōeva ne ðarĩ majibeno ðaiyeque, cuarenta paijua p̃eno baju bucucu barejámea ũ.

Jesúre ju aipōeva ne jēniaino paruéde Jũmenijicueque

(Mt 27.1-2; Mr 15.1; Lc 23.1, 7-11; Jn 18.28-29; Fil 2.7)

²³Maumejiena etarĩburu yóboi cójijinore jocarĩ, Pedro aru Jũamaque copainurejaimada ne yóvaimara yebai. Aru coyurejaimada náre caiye ina sacerdotevare jaboteipōeva aru ina judíova bucúva máre ne coyuiye báquede náre. ²⁴Ina Jesúre ju aipōeva jápiaivú b́cavú Pedrojāi borore, cūináturú yópe arĩ, coyurejaimada Jũmenijicure:

—Mú, ñ̃je jabocu, caivú jabova p̃eno meacu, cuedarejaquemavú mú cavarōre, aru joborōre, aru jia uradare máre, aru caivú nócvure, aru noi cuede máre.

²⁵Mú yávaicōjenejaquemavú ñ̃jeñecu David b́cure, m̃re memecaipōecu b́cure, mi Espiritu Santo majiéque. Que teni David b́cu arejaquemavú:

Judíova āmevú jorojĩnajarama.

Pōeva dápiarājarama ũbenina ne ðarājiyede. ²⁶Ijaravucavú jabova meadarājarama na ne baju. Aru ina ĩmaroare cójeipōeva cójijĩnajarama, maucvarājivú Jũmenijicure aru ũi epeimú Cristore máre, arejaquemavú David b́cu.

²⁷Yópe David b́cu ũi Jũmenijicui yávaiyede coyucaiye báquepe ðaiyede jávú ñ̃ja. Yo ĩmaroi ina jabova Herodes aru Poncio Pilato cójijiquemavú judíova āmevúque aru apenú Israecavúque máre, maucvarājivú Jesúre, m̃re memecaipōecu meacu bajure, ñ̃ai mi epeimú Cristore. ²⁸Cójijiquemavú, ðarājivú yópe “Ðarājarama”, mi aino mácarōpe, mi majiéque, nópe arĩ, yávrejaquemavú mú.

²⁹Aru mú, ñ̃je jabocu, cōmaje āroje jájacu ñ̃jare, ne ñ̃jine ðaiye boje ñ̃jare. Jidubevúva yávre ðajacu ñ̃jare Jesús ũi yávaie méne. ³⁰Ijimarare meadajacu náre coapa. Parure ðajacu ñ̃jare ñ̃je ũmei, ñ̃je ðarājiyeye ayu pōeva ne jámene, ne ðarĩ majibede máre, m̃re memecaipōecu Jesús ũi āmiái, ũi paruéque, arĩ jēnarejaimada Jũmenijicure na, Jesúre ju aipōeva.

³¹Jēniari buojaiyede, ne curō cújidejavūya pare Jũmenijicui paruéque. Aru ñ̃ai Espiritu Santo ðaicōjeñ̃, yávaicōjenejaquemavú náre. Que teni jidubevúva coyurejaimada Jũmenijicui yávaie méne.

Caivú ne cvuae ne coavaino
(Hch 2.44-45)

³²Caivú Jesúre ju aipōeva ne ũme aru ne dápiaie máre cūináturú barejámea na. Nácacu cubedejámea

“Yo jínomu” ayu. Quéнора caiye ne cūvaede “Majemu”, arejaimada na, Jesúre ju aipōeva. ³³Jesús ũi yávaiye méne beorī coyūicōjeimara parūrōreca coyūrejaimada arevure: “Jácarā ñuja Jesúre nacajañure yainore jarūvarī”, arejaimada. Aru Jūmenijicu mearo đacarejameđa náre pare. ³⁴⁻³⁵Nácacu cubedejameđa jaumu ũre apejīe. Apevu ina joborōre cūvarivū, cūramiare cūvarivū máre, bojedaiyvū barejáimada nēnore. Aru ne bojedainore ñvari, jívū barejáimada Jesús ũi yávaiye méne beorī coyūicōjeimarare, ne coavarājīyepe aivū ina apejīe jaumarare náre jaūrōpe. ³⁶Cūinácu nácacu yópe đarejameđa, ũi āmiá José. Nái José levita āmicuriyajubocacu barejáimada. Aru pōetedejameđa Chipre āmicurijivūi. Jesús ũi yávaiye méne beorī coyūicōjeimara āmidorejaimada ũre Bernabé, “cadateipōecu” aivū. ³⁷Ū cūvacu bācu joborōare, aru cūináro ũi joborōre bojedarejameđa ũ, Bernabé. Bojedarīburu yóboi, bojedainore ñvari, jídejameđa diede Jesús ũi yávaiye méne beorī coyūicōjeimarare, ne coavarājīyepe ayu. Que đarejameđa Bernabé.

Ananías jímarepacomaque ne borocurō

5 ¹Apevu curejaimada, ũi āmiá Ananías, aru jímarepaco máre, ōi āmiá Safira. Nái bojedarī jídejameđa ũi joborōre. ²Ne bojedainore ĩni, apede ne bojedainoquede yaveni epedejameđa nénova. Que teni apede ne bojedainoquede jídejameđa Jesús ũi yávaiye méne beorī coyūicōjeimarare. —Ūju, yo caino ñuje joborō mácarō bojetamu, ũbenina arejameđa Ananías Pedrojāre.

Jipocamia jímarepaco majidejacođa caiye iye ũi đaquiyede. ³Ūi jíniburu yóboi, Pedro arejameđa ũre:

—Mū, Ananías, ¿aipe teni abujuvai jabocu dápiaicōjeni mure yópe mi đainore, mi jujovarīduquiyepere ayu ñai Espiritu Santore mi yaveni epeiyede

apede yo bojedainoquede? ⁴Mi joborōre bojedarī jíquiyepi jipocai, míno cútevu dijaborō. Aru bojedarīburu yóboi, iye tātura máre míye batevú. Que baru, ¿aipe teni dápiaicūrū mū mi ũmei iye āmeina teiyede? Borocubevū mū pōevare quévura. Quéнора borocubvū mū Jūmenijicure, arejameđa Pedro ũre.

⁵Cūiná Ananías jápiaiyū bācu iye Pedro ũi coyūiyede, yaini turejameđa joborōi. Aru caivū ina jápiaivū ũi borore jídjurejaimada pare. ⁶Dinumū apevu bojūvū earī, yaiyú bācu baju bācarōre cūmari, ñvari, jarūvarejaimada ũ mácure cūracobei.

⁷Yóbecuriora yóboi, Ananías bācu márepaco nurejacođa Pedrojā yebai. Ūbenita majibedejacođa cāreja jímarepacu bācure jave yaiyūre. ⁸Pedro jēniari járejameđa ũre:

—Coyūjaco yure. ¿Iyeba caiye tātura muje bojedaino joborō mácarō boje? arejameđa Pedro.

Ō ju arejacođa ũre:

—Jájju, quéнора bojecvū, ũbenina arejacođa ũ.

⁹Ōi que aiyede, Pedro arejameđa ũre:

—¿Aipe teni borocurīdurāru muja Jūmenijicui Espiritu Santore? Jájjaco daivure ina mimarepacu bācure jarūvavū bācavū, curivure jedevacobei caride. Mure máre ñvari, jarūvarājivūbu, arejameđa Pedro.

¹⁰Aru cūiná ũ máre yaini turejacođa joborōi Pedro ũi cuboba yebai. Ina bojūvū ecorī, yaiyó bācore jári, ũ mácore máre ñvari, jarūvarejaimada jímarepacu bācu yebai. ¹¹Que teni caivū ina Jesúre ju aipōeva aru apevu máre, ne jápiaiyede Ananías bācu aru Safira bāco ne borore, pare jídjurejaimada na.

Ūre pōeva ne đarī majibeno aru ne jámeno máre

¹²Jesús ũi yávaiye méne beorī coyūicōjeimara đare ñvivū barejáimada ũre pōeva ne jámene, ne đarī majibede máre. Aru caivū ina Jesúre ju aipōeva cójjijide ñvivū barejáimada Jūmenijicui cūrami jívui, Salomón mácu cuino

amicurōi. ¹³Caivū ina Jesúre ju abevu cójijibedejaimada ina ju aipōevaque, ne jidué boje. Ûbenita caivū ina ju abevu me jáivū aru me yávaivū barejáimada ina Jesúre ju aivūre, náre ne pueđaiye boje. ¹⁴Apevu obedivū pōeva, ũmūva aru nomiva máre, ju arí Jesús ũi yávaive méne, cójijide nuivū barejáimada Jesúre ju aipōevaque. ¹⁵Jesús ũi yávaive méne beorí coyucōjeimara, ne đaiye boje pōeva ne đarí majibede, obedivū pōeva nūvare nuivū barejáimada ijimarare ne parainoai, jūarajivū náre tãibuai, Pedro nore vaiyú, ũi decocūque ũi taoquiyepe aivū apevu ijimaracavūre, ne meatenajiyepere aivū. ¹⁶Aru apeno ĩmajinoacavū obedivū eare nuivū barejáimada Jerusalén amicuriĩmaroi. Na máre ijimarare, aru abujuva ne ĩmamarare máre, nūvare nuivū barejáimada. Aru caivū ne nūvaimara mácvū meadaimara marejáimada na.

Jabova ne ñáine đaino Pedrojárē

(Mt 27.25; Jn 11.25, 14.6; Ro 6.4)

¹⁷Dinūmū ñai sacerdotevare jaboteipōecu aru ũre cađateipōeva, caivū ina saduceo amicuriyajubocavū, pare jorojinejaimada Jesús ũi yávaive méne beorí coyucōjeimarare. Que baru ina saduceovacavū maucūvarí búrejaimada náre. ¹⁸Náre jēicōjeni, buorejaimada āmeina teivūre jēni jacoĩnami. ¹⁹Ûbenita diñamimiareca cūinácu Jūmenijicui daroimū, ángele earí ne yebai, voacarí náre diñami jedevacobede, jipocatedejameda náre nore jocarí. Que teni arejameda náre:

²⁰—Jūmenijicui cūrami nūjara mūja. Aru coyūjarā pōevare nore caiye iye yávaive méne járavū cūiméjaravū baquinóre, arejameda ñai ángele náre.

²¹Ûre ju arí, miadáe tuiyede Jūmenijicui cūrami ecorí, bueni búrejaimada.

Dinūmūmia ñai sacerdotevare jaboteipōecu ũre cađateipōevaque órejaicōjenejaimada caivū judíoiva bucūvare, ne cójijinajiyepere aivū caivūre. Que teniburū,

apevu ne coreipōevacavūre davaicōjenidurejaimada Jesús ũi yávaive méne beorí coyucōjeimarare āmeina teivūre jēni jacoĩnamine jocarí ne cójijinoita. ²²Ûbenita ina coreipōeva ne eaiyede āmeina teivūre jēni jacoĩnami, nore eabedejaimada ina Jesús ũi yávaive méne beorí coyucōjeimarare. Que teni cójijinoi copainūri, yópe arí, coyūrejaimada ina cójijinocavūre:

²³—Ñūje eaiyede āmeina teivūre jēni jacoĩnami, jedevacobe me bieicobede eavū ñūja. Aru churarava nūrvūre jedevacobe yebai coreivūre máre eavū ñūja. Ûbenita jedevacobede ne voaiyede, eabetevu ina buoimara mácvūre, arejaimada ina coreipōeva.

²⁴Ne coyuiyede jápiaivū bācvū Jūmenijicui cūramine coreipōevai jabocu aru sacerdotevare jaboteipōeva máre pare cārijini, “¿Aipe tedica na cari?” arí dápiarejaimada. ²⁵Dinūmūmia cūinácu ũmū ecorí ne cójijitucubui arejameda:

—Jápijarā yūre. Ina mūje ēnoare buoimara mácvū caride Jūmenijicui cūrami jívui nūri bueivūbu pōevare noi, arejameda.

²⁶Aru coreóvarí ári curivūre, ñai jabocu nurejameda Jūmenijicui cūrami ina coreipōevaque, ne nuvarajiyepere ayū Jesús ũi yávaive méne beorí coyucōjeimarare cójijinoi. Ûbenita náre āmeno đabevūva nūvarejaimada, pōevare ne jidué boje. “Ñūje āmeno đaru náre, pōeva cūraboaque đūvarí boarájarama ñūjare”, arí dápiarejaimada na. ²⁷Ne eaiyede ne cójijitucubui, núicōjenejaimada ne buoimarare ina cójijinocavū ne coricai. Sacerdotevare jaboteipōecu, yópe arí, jararejameda náre:

²⁸—Ñūjavacari parūrōreca bueicōjemeniduvū mūjare añū ũmū ũi borore. iÛbenita mūja ju abevū ñūjare! Bueivūbu mūja mūje bueiyede obedivūre, caino Jerusalécavūre. Náre coyuiyūvū mūja, “Sacerdoteva boarí jarūvaicōjema Jesúre”, aivūbu mūja, pōeva ne āmeina járajiyepere aivū ñūjare, arejameda sacerdotevare jaboteipōecu.

²⁹Pedrocapūravu apevu Jesús ũi yávaiye méne beorí coyucójeimaraque arejaimada úre:

—Ju aiye javvu ñujare Jūmenijicu ũi ñaicójeiyede pōeva ne ñaicójeiye pñeno. ³⁰Mujavacari Jesúre pēvari boarí jaruvaicójeavu jocucujaravena. Ūbenita Jūmenijicucapūravu, majeñecuva mácavu ne jabocu, nacovaquemavu úre yainore jaruvarí. ³¹Aru nacovariburu yóboi, Jūmenijicu epequemavu úre ũi meapūravui. Ñai meapūravu cucu paruje cuvabi. Que baru Jesúrecabe maje jabocu aru majare meadaipōecu máre, Israecavu chíori ne āmeina teiyede, oatuvarí buojarājiyepa ayu ne ñaiyede, aru Jūmenijicu ũi ārumetequiyepe ayu ne āmeina teiyede. ³²Ñuje jáiye báque boje Jūmenijicu ũi ñaiye báquede Jesúre, coyuvubu mujare iyede. Ñai Espiritu Santo máre coyuyube Jūmenijicui ñaiye báquede. Aru Jūmenijicu daroyube ñai Espiritu Santore caivu ina ju aivure úre, arejaimada Pedrojá.

³³Ne coyuiyede jápiaivu ina cójjiinocavu, pare jararejaimada Jesús ũi yávaiye méne beorí coyucójeimarare. Ne náre pare jaraiye boje, “Boarí jaruvaicójenajarevu náre”, arejaimada ina cójjiinocavu ne bajumia. ³⁴Ūbenita cūinācu cójjiinocacu, fariseovacacu, ũi āmiá Gamaliel, nacajari, coreipōevare nvaicójenejameđa Pedrojáre cójjiitucubare jocarí. Caivu pōeva me puedarejaimada úre, Gamalielde. ³⁵Pedrojā ne etaríburu yóboi, Gamaliel yópe arí, coyurejameđa apevu cójjiinocavure:

—Muja, jívū, Israecavu, me dápijarā muje ñaiyuede ina ũmuvare. ³⁶Arujara muja āñu Teudas bácu ũi ñaino mácarōre obediñua jipocai. “Parucubu yu. Me jabotequijivu mujare”, arejameđa ũi mácu pōevare. Aru cuatrocientos paivu ũmūva baju nurejaimada úque. Ūbenita ne boarí jaruvaiyede ũi mácu, úque nuivu bácvu coateni nurejaimada na. Que teni ũi mácu ñaiye báque bíjarejaváya. ³⁷No yóboi, nopedecabu

apevu ũi ñaino mácarō, āñu Galileacacu bácu, ũi āmiá Judas. Jabocu toivaicójeinūmu pōevare ne āmiare, corevaiyucu náre, obedivu pōeva nurejaimada úque máre. Aru úre máre ne boarí jaruvaiyede, úque nuivu bácvu coateni nurejaimada na. ³⁸Nopedecabu caride ina ũmūvaque. Coyuyubu mujare: Dabejarā āmeno náre. Cārijovamejara náre. Pōeva ne ñaicójevu iye ne ñaiyue aru ne bueiye máre, bíjaquiyebu die. ³⁹Ūbenita Jūmenijicu ũi ñaicójevu iye ne ñaiyue aru ne bueiye máre, bíjabequiyebu die. Muja maucuvarivu baru náre, maucuvajebu Jūmenijicure máre, arejameđa Gamaliel.

Aru ina cójjiinocavu ju arejaimada ũi coyuiyede. ⁴⁰Que arí, ina coreipōevare davaicójenejaimada Jesús ũi yávaiye méne beorí coyucójeimarare cójjiitucubui cojedeca. Ne eaiyede, ina coreipōevare jara popeicójenejaimada náre, Pedrojáre. Aru jara popeniburu yóboi, ina jabova yávaicójemenuidurejaimada Pedrojáre cojedeca Jesúi borore. Que teniburu yóboi, jaetovarejaimada náre. ⁴¹Aru Jesús ũi yávaiye méne beorí coyucójeimaracapūravu torojurivu baju etarejaimada cójjiinore jocarí. Torojurejaimada ne cūyoje teni ñájiye boje, ne ju aiye boje Jesúre. ⁴²Aru caijāravua Jūmenijicui cūrami aru ne cūramiai máre buede nuivu barejáimada, aru coyure nuivu barejáimada na iye yávaiye méne Jesúrā, Jūmenijicui epeimū mácurā.

Siete paivu cađateipōevare ne beino

6 ¹No yóboi, apevu obedivu Jesúre ju aipōeva jararí jūjuvaivu barejáimada ne bajumia. Nācvu griego āmicuricamuare yávaivu aru apevu nácvu hebreo āmicuricamuare yávaivu jaraivu barejáimada ne baju. Ina judíova griegore yávaivu arejaimada:

—Ñujacavu nomiōpeva jacorubema muje coavaiyede jaravua coapa. Que baru, “Muja coapavabevu”, chíoiyu arejaimada.

²Que baru ina doce paivü Jesús üi yávaiye méne beorí coyucōjeimara órejarí caivü ina Jesúre ju aipōevare ne yebai arejaimada:

—Ñuje dajocarü Jūmenijicui yávaiye méne coyuiyede, jínajivü nomiōpevare aru apevü cōmaje ārojarivüre máre náre jauéde, meamejebu no. ³Que baru mujá, ñujevü, beojará siete paivü mujacavüre. Yópe bajarári na: Pōeva ne pueđaimara, Espiritu Santo üi đaicōjeimara, aru majiéde cuvarivü bajarári. Ñuja náre coapavaicōjenajivübu cōmaje ārojarivüre. ⁴Que teni ñujacapüravü cūináturu ñuje üme jēniarajivübu Jūmenijicūque aru coyurājivübu üi yávaiye méne, arejaimada na, Pedrojá.

⁵Ne coyuiye cojurejavüya caivü ina Jesúre ju aipōevare. Que baru beorejaimada Estebäre. Ū parurōreca ju ayü barejámeda Jesúre. Aru ñai Espiritu Santo đaicōjenajimada úre. Beorejaimada apevüre máre: Felipe, Prócorore, Nicanore, Timóre, Parmenare, aru Nicoláre máre. Ñai Nicolás Antioquía āmicurīmarocacu barejámeda. Ū judío āmenejimada. Ūbenita jipocamia ju arejaimada ina judío va ne buei yede. ⁶Náre beorí buojarí, nūvarejaimada náre Jesús üi yávaiye méne coyucōjeimara yebai, ne jēnicarājiiyepa aivü náre Jūmenijicūque, tuorí puruáque ne jipoburá náre coapa yópe judío va ne đarí cōmajiiyepa, jáđovarajivü ne memei no bui yede.

⁷Aru apevü pōeva obedivü Jūmenijicui yávaiye méne coyuiyede jápiari, ju arejaimada diede. Caijāravua apevü ne ju aiyede pūeno baju obedivü ju aivü nūrejaimada Jerusalén āmicurīmaroi. Aru apevü ina sacerdoteva máre ju arejaimada Jesús üi yávaiye méne.

Estebäre apevü ne jéino

⁸Esteban Jūmenijicui mearo đacaimü marejámeda. Jūmenijicū me járejaquemavü úre. Que baru parure đarejaquemavü úre. Aru majide đarejaquemavü úre máre. Esteban

đare cuyü barejámeda urarō pōeva ne jámene, ne đarí majibede máre, pōeva jēneboi. ⁹Ūbenita apevü ūmüva maucūvarejaimada úre. Ina cūinádami judío va cōjjijñamicavü barejámeda na. Ina Estebái mauva marejáimada Cirene aru Alejandría āmicurīmarocavü, aru apevü Cilicia aru Asia āmicurijoborōacavü máre. Caivü ina judío va barejáimada na. Esteban yebai nūri, jaraivü yávarí búrejaimada na úque. ¹⁰Ūbenita Esteban yávarejaimada urarō majiéde, ñai Espiritu Santoi paruéde üi cūvae boje. Que baru ina üi mauva ju arí majibedejaimada na úre. ¹¹Que baru Estebái mauva bojedarejaimada apevü borocūrivüre. Aru ina borocurivü arejaimada yópe:

—Esteban āmeina yávabi Moisés bácure aru Jūmenijicūre máre. Jápiavübu ñuja, ūbenina arejaimada.

¹²Yópe đarí jorovarejaimada obedivü pōevare, judío va bucūvare aru Jūmenijicui yávaiyede coyuipevare máre. Ina Esteban yebai nūri, úre jēni, jarūporejaimada judío va cōjjijñami.

¹³Dinümü davarejaimada apevü borocūrivüre. Aru borocurí arejaimada na:

—Ñai ūmü cainümü āmeina ávaibi Jūmenijicui cūramine aru Jūmenijicui đaicōjeiyede üi coyuiye báquede Moisés bácure máre. ¹⁴Ñujavacari jápiavübu ū ayure yópe añü Jesús Nazarecacui borore: “Jesús jarūvacūyüme diñami Jūmenijicui cūramine aru oatūvacūyüme caiye maje đarí cōmajiyede yópe Jūmenijicui đaicōjeiyede üi coyuiye báquepe Moisés bácure”. Que abi ñai Esteban, ina borocurivü arejaimada cōjjinocavüre.

¹⁵Aru caivü nore curivü me cocorí Estebäre járejaimada üi jivare yópe ángelei jivape ārojarore.

Esteban üi yávaino úre ne boarājiiye jipocai

(Mt 22.32; Hch 3.22)

7 ¹Dinümü ñai sacerdotevare jaboteipōecu jēniari járejaimada Estebäre:

—¿Jāvēma yo ne coyuino mi borore? arejameða.

²Aru Esteban, yóre arí, coyñrejameða cójijinocavure:

—Mujá, jívũ aru jíbũcũva máre, jápiajarā ji coyñiyede. Javede Jūmenijicu meacu baju cūetedejaquemavũ majeñecu Abraham mácu yebai ũi cūedeca cāreja Mesopotamia āmicurijoborōi, ũi nũquiye jipocamia Harán āmicurīimaroi. ³Jūmenijicu arejaquemavũ ũre: “Mũ, Abraham, mi curōre jocarí nujacu mũ. Aru mi curōcavure máre jocarí nujacu. Jáđovacuymu yũ mare mi apeno curō, mi cuquinore”, arejaquemavũ Abraham mácure Jūmenijicu. ⁴Jũ arí Jūmenijicure, Abraham mácu etarejaquemavũ Caldea āmicurijoborōre jocarí, cũcũncũyũ Harán āmicurīimaroi. (Mesopotamia āmicurijoborōi cũvũ Caldea.) Abraham mácu pacu bácu ũi yainíburu yóboi, Jūmenijicu nuicōjenejaquemavũ ũre yore, muje cari curōre.

⁵Dinũmu Abraham mácu eaiyede yore, Jūmenijicu jíbedejaquemavũ joborōre ũ mácure. Ye joborō quíjimore máre cūinácũbobareca ũi epeino jacorũbedejaquemavũ Abraham mácu cāreja. Ũbenita, “Yo curō mi cuquinore jícũyũ yũ mũre”, Jūmenijicu arejaquemavũ ũ mácure. “Yo joborōre jícũyũ yũ mũre aru mipāramena mārājivure máre. Yo joborō mujeno maquiyébu”, arejaquemavũ Jūmenijicu ũ mácure. Aru Jūmenijicu ũi que aiyede, Abraham mácu juedocũvabecu barejaquemavũ cāreja. ⁶Yóre arí, coyñrejameða Jūmenijicu ũ mácure: “Mipāramena mārājivũ apejoborōi nũri, cuatrocientos paicũva baju nore curājarama na mārājivũ. Aru nore curí, mipāramena mārājivure pare memecōjenajarama nócavũ, ne eaijoborōcavũ. Yebacavũpe memecarājarama mipāramena mārājivũ. Náre jara popeni, memecaicōjenajarama nócavũ. ⁷Ũbenita náre, dijoborōcavũre, nájine dacũyũ yũ ne āmeina ðaiye báque boje mipāramena mārājivure. No yóboi, yore copaidarājarama

mipāramena mārājivũ dijoborōre jocarí. Aru yũre mearore jínajarama yui”, arejaquemavũ Abraham mácure Jūmenijicu.

⁸No yóboi, bedióva Jūmenijicu “Yóre ðarājare”, arí yávarejaquemavũ Abraham mácure. “Mũ jũ aru ji coyñiyede báquede, yóre ðarí jáđovajara mujá. Mũ aru mívũ ũmũva aru mi yebacavũ ũmũvaque máre muje cajede burajarā mujá, ārũrivũ ji coyñiyede báquede mujare”, arejaquemavũ Jūmenijicu. Abraham mácu jũ arejaquemavũ ũre. Que baru cajede burarejaquemavũ mamacu Isaac bácu ocho paicũvavũ ũi pōeteniburu yóboi. Aru nopedeca ðarejaquemavũ Isaac bácu mamacu Jacob bácu. Aru nopedeca ðarejaquemavũ Jacob bácu doce paivũ mamarare, majeñecuva mácavũre.

⁹Cairũcarũũare paivũ ina Jacob bácu mára, majeñecuvacavũ bácvũ, pare jorojinejaquemavũ néyocũ bácu, ũi amíá José. Que baru bojedarejaquemavũ ũ mácure apevũre, ũ mácure nũvari bojedarājivũre aivũ Egipto āmicurijoborōcavure yebacavũre. Ũbenita Jūmenijicu cadatedejaquemavũ ũ mácure. ¹⁰Ũ mácu cuede Egipto āmicurijoborōi apenũmu nájijnũ marejaquemavũ ũ, José bácu. Ũbenita cainũmũ Jūmenijicu cadatedejaquemavũ ũ mácure, ũi etaquiyepere meacu ayũ. Ũrarō majide ðarejaquemavũ ũ mácure. Que baru Egiptocavũ ne jabocũ bácu, Faraón ne aimũ, me járejaquemavũ José bácu, ũi mearo ðaiye boje aru ũi majié boje máre. Jaboteicōjenejaquemavũ José bácu caivũ ũi cūramicavũre aru caivũ Egiptocavũre máre. Aru coreicōjenejaquemavũ ũ mácure caiye ũi cũvaede.

¹¹Dinũmu āmeno baju vaidéjaquemavũ no āiye cũbenore caivũ Egipto āmicurijoborōcavũ aru Canaán āmicurijoborōcavũ máre. Que baru majeñecuva mácvũ, Canaán āmicurijoborōi curivũ, ye āiye cũvabedejaquemavũ na mácvũ. ¹²Jacob

bácu jápiayü “Áiye cüröre Egiptore”, darorejaquemavü caipücapüncapere paivü mamarare, majeñecüva mácavüre, mamarütmü ne nurí ñajiyere ayü áiyede. ¹³Ne copaiyede nore bediöva cojedeca, José bácu “Yü Josébu”, arejaquemavü jíburã mácavüre. Faraón mácu José bácu jívüre coreóvarejaquemavü. ¹⁴José bácu jarorejaquemavü jíburã mácavüre aru ímacü bácvüre máre népacü Jacob bácu yebai, daicöjeñü caivü ü jívüre üi yebai, Egipto ámicurijoboröi. Aru setenta y cinco paivü baju barejaquémavü na mácavü. ¹⁵Jacob bácvüjä nurejaquemavü Egipto ámicurijoboröi. Ü mácu aru caivü mamara máre, majeñecüva mácavü, yaidéjaquemavü dijoboröi. ¹⁶Yóbore népáramena mácavü núvarejaquemavü ne bajuá báquede, jarüvaräjivü cüracobei Siquem ámicuríimaroí. No ne yaivü bácvüre jarüvaräjínore Abraham mácu bojedarí ínejaquemavü jípcamia Hamor bácvüi márare. Na mácavüre jídejaquemavü táuturare Abraham mácu.

¹⁷Aru ánijáravü, Jümenijicüi Abraham mácvüre, “Yópe ñacacuyütmü müre”, üi áijáravü bácarö joabede, obedivü majeñecüva mácavü cürejaquemavü Egipto ámicurijoboröi.

¹⁸Dinütmü jaboteyü barejaquémavü Egiptocavüre apescu jabocu bácu. Ü mácu coreóvabedejaquemavü José bácvüre. ¹⁹Ü mácu borocürí ámeina ñarejaquemavü majeñecüva mácavüre. Ñájine ñarejaquemavü na mácavüre. Ü mácu ñajocicöjenejaquemavü némara quíjínare jedevai, ne yainájiyere ayü.

²⁰Dinütmüia pötededejaquemavü majeñecu mácu, üi ámiá Moisés. Juedocu meascü baju barejaquémavü. Ü mácvüi búcvüva bácvüi búcvóvarejaquemavü ü mácvüre yóbecurã aviáva ne cürami jívüi. ²¹Ne ñajocaiyede ü mácvüre jedevai, Faraón mácvüi máco báco Moisés bácvüre earí, núvari öi cürami, búcvóvarejaquemavü mamacü bajupe. ²²Ina Egiptocavü bácvüi majiéde buedejaquemavü Moisés bácvüre. Que teni búcvüi carí yácvarejaquemavü aru ñarejaquemavü igrarö parüéque.

²³Cuarenta paivüja cüvacü Moisés bácu, jácvü nurejaquemavü apevü ü jívüre, Israecavüre. ²⁴Járejaquemavü cüinácü Egiptocacü bácvüre jara boayüre cüinácü Israecacü bácvüre. Ü jícvü bácvüre cadateiyücvü, áñü Egiptocacü bácvüre boarí jarüvarejaquemavü Moisés bácvü yavenina. ²⁵Ü mácu yópe arí ñapiarídurejaquemavü: “Ina jívü majinajarama Jümenijicü yüre núvaicöjescüüre náre ne yebacateinore jocarí, arídurejaquemavü. Übenita majibedejaquemavü na mácavü.

²⁶Cömiáijáravü Moisés bácu járejaquemavü pücarã ümüva Israecavü bácvüre áðamateivüre ne bajumia. Que teni cárijovamene ñarídurejaquemavü ü mácu na mácavüre. Yópe arejaquemavü: “Müja cüinávütmü. Que baru, ñaipre teni ámeina ñaivüü müja müje baju?” arejaquemavü Moisés bácu.

²⁷Übenita cüinácü nácacü bácvü jarüvarejaquemavü Moisés bácvüre. Aru jëniari járejaquemavü ü mácvüre:

“¿Name jaboteicöjeni müre ñüjare? ¿Ñame jëniari jáipöescüpe epedi müre?”

²⁸¿Yüre máre boarí jarüvaivücvüü, yópe mi boavarepe áñü Egiptocacü bácvüre énoare?” arejaquemavü. ²⁹Ü mácvüi que aiyede jápiayü Moisés bácu, dupini nurejaquemavü Egipto ámicurijoboröre jocarí. Apeno joborö, Madián ámicurijoboröi, earí cürejaquemavü. Jímarepaco báco, dijoboröcaco, juedocüvarejaquemavü pücarã ümüvare.

³⁰Aru Moisés bácu nore cürejaquemavü cuarenta paivüja. Dinütmü cüinácü Jümenijicüi ñaroimü mácu, ángele, cüetedejaquemavü ü mácvüre pöescübenoi joabejínoi Sinaí ámicuricü cüracüre. Áñü ángele cüetedejaquemavü cüinácü jocüjicü uruijicü jëneboi. ³¹⁻³²Moisés bácu cüecumañü üi jáiyede, joabenoí nurejaquemavü, me jácvü. Que teni jápiarejaquemavü Jümenijicüi yávainore, yópe aiyede: “Yátamu Jümenijicü. Míñecüva Abraham, Isaac, aru Jacob ne ju aimümu yü”, arejaquemavü Jümenijicü. Diede

jápiarī, Moisés b́acu jiducu, bidini jáiyubedejaquemavu. ³³Cojedeca J́umenijicu arī yávarejaquemavu ũ mácure: “Mu núvu caride joborō mearo baji, ji cwe boje yui. Aru ýbu meacu baju caivu pueno. Que baru dujacu mu mi c̄raidoare, pueđac̄uȳ ūre. ³⁴Ȳu jáivu ji p̄eva urarō ñájivure no joborō Egiptoī. Ȳu jápiaivu ne oiyede. Que baru daivu ȳu, meadac̄udaȳu náre. Nujacu cari. Jacopaiyovaquijiv̄u m̄re Egiptoita”, arejaquemavu J́umenijicu Moisés b́acure.

³⁵Ñ̄u Moisés b́acure Israecavu b́acavu ũbeni jaruvaiyuridurejaquemavu. Yópe arī, “¿Ñ̄ame jaboteicōjeni m̄re ñ̄ujare? ¿Ñ̄ame j̄eniari jáip̄oc̄ure epedi m̄re?” j̄eniari járejaquemavu na mácavu. Ũbenita na mácavu ũ mácure jaruvaiyuriduivureca, J́umenijicu jarorejaquemavu Moisés b́acure ne yebai, ũi jaboteni meadaquiyep̄e ayu na mácavure. Aru ñ̄u ángele, ũi jáim̄u mácu joc̄uj̄icu uruij̄icui, cadateȳu barejaquemavu ũ mácure.

³⁶Moisés b́ac̄vacari núvarejaquemavu ñ̄ina Israecavu b́acavure Egipto ñ̄micurijoborōre jocarī. Darejaquemavu p̄eva ne jámene aru ne đarī majibede máre ure Egipto ñ̄micurijoborōi, ne etar̄aj̄iye jipocare, aru jia urada yebai, aru na mácav̄ni cuede máre p̄oc̄ubenoī cuarenta paiuj̄ua baju.

³⁷Ñ̄u Moisés b́ac̄vacari arejaquemavu Israecavu b́acavure: “J́umenijicu daroc̄uȳme m̄jare ap̄ecu ũi yáviyede coyuc̄aip̄oc̄ure popedeca ũi daroiyep̄e ȳre. M̄jacasu bac̄uȳme ũ. Ju ajarā ũre”, arejaquemavu ũ mácu. ³⁸Ñ̄u Moisés b́ac̄vacari c̄rejaquemavu Israecavu b́acav̄que, majeñec̄uva mácav̄que, ne c̄oj̄ij̄iyede p̄oc̄ubenoī. Aru c̄rejaquemavu ñ̄u ángele ũre yávu ȳu b́ac̄que Sinaí ñ̄micuric̄u c̄rac̄ui. Ñ̄u Moisés b́ac̄vacari jac̄orejaquemavu J́umenijicui yáviyede, majide đac̄uȳu majare, maje majinaj̄iyepe ayu aipe đaiye jaur̄ore, maje c̄var̄aj̄iyepe ayu j̄arav̄u c̄im̄ej̄arav̄u baquinóre.

³⁹Ũbenita majeñec̄uva mácavu ju abedejaquemavu Moisés b́acure.

Ũbedejaquemavu ũ mácure. Aru, “Egiptoī copaiyuriv̄ubu ñ̄uja”, aridurejaquemavu na mácavu. ⁴⁰Que teni yópe arī, j̄eniarejaquemavu Aarón mácu, Moisés b́ac̄ui yócu b́acure: “Đacajacu ñ̄ujare ap̄ev̄u p̄peimarare, maje nuvaraj̄iyepe maje jipocai. Majibev̄u maja aipe vainore ñ̄ai Moiséde, majare davavacure Egiptore jocarī”, arejaquemavu na mácavu. ⁴¹Que arī, đarejaquemavu ne p̄peim̄ure yópe oitevc̄uj̄icure. Que đarī buojari, ñ̄imarare boarī, juarejaquemavu, ne p̄peim̄ure j̄iv̄u. Aru torojurejaquemavu, mearore j̄iv̄u ne baju puruáque ne đaiye báquede. ⁴²Que teni ne J́umenijicure jaruvaiye boje, J́umenijicu máre jaruvarejaquemavu na mácavure, mearore j̄ic̄oj̄eñ̄u abiac̄ovare. Nópe đarī, đarejaquemavu na mácavu yópe c̄uinác̄u J́umenijicui yáviyede coyuc̄aip̄oc̄evac̄u b́acu ũi toivaiye báquepedeca:

M̄jua, Israecavu, cain̄m̄ua no cuarenta paiuj̄ua m̄je cuede p̄oc̄ubenoī, ȳre ñ̄imarare boarī, juarī, j̄ibeteav̄u m̄jua. Aru ape j̄iyede máre j̄ibeteav̄u m̄jua ȳre. ⁴³Ñ̄ai j́umenijicu, ũi ñ̄miá Moloc, ũi c̄ramine, ñ̄imac̄ajeaque đaiñ̄amine, núvav̄u m̄jua. Aru ñ̄ai j́umenijicu, ũi ñ̄miá Refán, ũi p̄peim̄ure yópe abiac̄or̄upe ráyure máre núvav̄u m̄jua. Dinum̄re iye m̄je p̄peimarare đaiye báque boje, aru m̄je mearore j̄iye boje náre, m̄je mauvare núvaic̄oj̄ec̄uȳm̄u ȳu m̄jare m̄je joborōre jocarī pu Babilonia ñ̄micur̄o ñ̄ip̄urav̄uita, arejaquemavu J́umenijicu, arī toivarī, ũi yáviyede coyuc̄arejaquemavu.

⁴⁴Majeñec̄uva mácavu ne cuede p̄oc̄ubenoī c̄varejaquemavu náque ñ̄iñ̄ami c̄rami ne ñ̄imac̄ajeaque đaiñ̄ami mácarōre, iveá c̄ravea báqueque J́umenijicui đaic̄oj̄eiȳe ũi coyuiye báquede Moisés b́acure toivainoque c̄riñ̄ami mácarōre. Ñ̄iñ̄ami mácarōre đarejaquemavu na mácavu

nópe Jūmenijicui jáđovaino mácarōpe jipocamia Moisés bácare ũi caede cūracūi. ⁴⁵Obediujua yóboi, Josué bácu jabotedejaquemavu majeñecuva mácavure, diñami mácarōre ðaipōeva mácavui pāramena mácavure. Jipocamia na mácavu jacopñrejaquemavu diñami mácarōre néñecuva mácavui jino mácarōre náre. Josué bácuque nuri, Jūmenijicui etavaiyede apevu judíova āmevure ijoborōre jocarí, majeñecuva mácavu ñejaquemavu yo joborōre. Na mácavu máre ñvarejaquemavu diñami mácarōre dinumumia. Aru népāramena mácavu máre jacopñvarejaquemavu diñamine, nébucuva bácvui jino mácarōre na mácavure pu David bácu jaboteiyeta.

⁴⁶Aru David bácu ðaiyurejaquemavu Jūmenijicui urōpe. Que baru Jūmenijicui me járejaquemavu ũi mácure. Aru David bácu ðacaiyurídurejaquemavu cūramine, pōeva ne jēniaiñamine Jūmenijicure. ⁴⁷Ūbenita David bácu mácu bácu, ũi āmiá Salomón, ðacarejaquemavu diñami mácarōre Jūmenijicure. ⁴⁸Ūbenita Jūmenijicui, parucu caivu apevu pñeno, cubebi pōeva ne ðaiñamia jívui. Que teni cūinácu Jūmenijicui yávaiyede coyucapōescu bácu yópe toivarejaquemavu Jūmenijicui yávaiyede:

⁴⁹Cavarō mearomu yópe ji dobarō mearo. Caiyede ðaicōjeivu yu nore dobacu. Aru ijāravubu yópe ji cuboba epeinope. Que baru ji cūramiva ðarí majibevu mija. Jūmenijicui curōre ji jabuóvaiñamine ðarí majibevu mija. ⁵⁰Yávacari caiyede cuedarejacacu yu, arejaquemavu Jūmenijicui.

⁵¹Yu coyuyubu mujare: iŪbenita járiaiyubevu mija! Dápiavubu mija yópe Jūmenijicure ju abevu ne dáriaiyepere. Járiaiyubevu mija Jūmenijicui yávaiyede. Mujeñecuva mácavure paivubu mija. Na mácavupedeca mujavacari máre cainumua járiabevu ñai Espiritu

Santore. ⁵²Mujeñecuva mácavu ñájine ðarejaquemavu caivu ānina Jūmenijicui yávaiyede coyucapōeva mácavure. Mujeñecuva mácavucapūravu boarí jaruvarejaquemavu Jūmenijicui daroimara mácavure, ũi yávaiyede coyucapōeva mácavure, ānina javede “Jūmenijicure memecapōescu meacu baju dacuyume”, arí coyuvu bácvure. Aru ũi daiyede mujacapūravu jēni jini ũre ũi mauvare, boarí jaruvaicōjeavu ũre. ⁵³Mujavacari jacopñrejaquemavu Jūmenijicui ðaicōjeiyede ũi toivaicōjeiye báquede. Ū yávarejaquemavu ángelevare. Aru ina ángeleva yávarejaquemavu Moisés bácare. Aru ũi mácu toivarejaquemavu diede, muje majinajiyepere ayu. Ūbenita mujacapūravu ye ju abevu iye Jūmenijicui ðaicōjeiyede ũi toivaicōjeiye báquede, arejameða Esteban cójjinocavure.

Estebāre cūraboaque ne boaino

(Lc 23.34, 46)

⁵⁴Esteban ũi coyuyedeca jápiaivu ina cójjinocavu, pare jararejaimaða ũre. Que baru cūrejaimaða ne cópiāre, pare ne jaraiye boje. ⁵⁵Ūbenita ñai Espiritu Santo ðaicōjeñu marejameða Estebāre. Que teni Esteban, cavarōre cocorí járejameða Jūmenijicui mearo miadārore, aru Jesúre máre nūcure Jūmenijicui meapūravui paruéque.

⁵⁶Aru Esteban arejameða:

—Jájara. No cavarō voainore jáivu yu. Aru ñai Jūmenijicui daroimu mácure ũmure máre, nūcure Jūmenijicui meapūravu yebai jáivu yu, arejameða.

⁵⁷Ūi que aiyede, coðoboborí bidejaimaða na ne cá mucobeare ne pñuáque. Cūináturu nacajari, cúyarí nuri ũi yebai, ũre jēni, ñvarejaimaða nore jocarí. ⁵⁸Jabuborí jaetovarejaimaða ũre ímarore jocarí. Aru cūraboaque ðvarí búrejaimaða na Estebāre. Ina ũre boro coyurí aðaivu bácvu barejaimaða cūraboaque ðvarí buivū. Ne ðvarājiye jipocamia, epedejaimaða ne pñenocajeare cūinácu ũmū yebai, ũi āmiá Saulo. ⁵⁹Ne ðureiyedeca

cūraboaque, Estebācapūravū jēniañū marejāmeda Jesúre.

—Му, ji jabocu, Jesús, caride ijacu ji ūmene, arejameda Esteban.

⁶⁰Que arī, ñuatutarī joborōi, codoboborejameda:

—Му, ji jabocu, ārumetejacu iye ne āmeina teiyede, arejameda.

Nópe ayū bācu, Esteban mácu yaidéjameda.

8 ¹Aru ñai Saulo torojurejameda ne boarī jaruvaiyede Esteban mácure.

Saulo ūi ñájine ñaino Jesúre ju aipōevare

(Hch 2.2, 4-5, 26.9-11)

Dijāravumareca Jesúre ju aipōeva Jerusalén āmicurīmaroi curivū ñájini búreajaimada pare, náre apevū ne āmeina ñaiye boje. Caivū ina Jesúre ju aipōevare dupini nure ñarejaimada caino Judea āmicurījoborōi, aru caino Samaria āmicurījoborōi máre. Ūbenita Jesús ūi yávaiye méne beorī coyucōjeimara dupini numenejaimada. ²Apevū ūmūva, Jūmenijicure ūrivū, nuvarejaimada Esteban mácuī baju bācarōre, jaruvārājivū ū mácure cūracobei. Ūrarō chíoiñū codoboborī bujiéque orejaimada ū mácure. ³Ūbenita Saulocapūravū bíjaroiyurejameda caivū Jesúre ju aipōevare. Que baru nuñū cūramia coapa, ina ju aipōevare jēni jabūborī buoicōjeñū marejāmeda āmeina teivure jēni jacoiñami jívui. Ūmūvare aru nomivare máre ñájine ñarejameda ñai Saulo.

Felipe Samariai ūi coyūino Jesús ūi yávaiye méne

⁴Ina Jesúre ju aipōeva dupini nuivū Jerusalén āmicurīmarore jocarī, Jesús ūi yávaiye méne coyurāñurejaimada caino joborōi. ⁵Cūinācu nācacū, Felipe āmicucū, nurejameda Samaria āmicurīmaroi. Aru coyuyū barejāmeda Jesús ūi yávaiye méne nōcavure. ⁶Obedivū pōeva ūi coyuiyede jápiaivū aru ūi ñaiyede pōeva ne ñarī majibede jáivū, me jápiarejaimada ūre. ⁷Felipe

etaicōjenejameda abujvare obedivū pōevare jocarī. Codoboborī etarejaimada na. Aru meañarejameda obedivū nacajaiye majibevure, cuiye majibevure máre. ⁸Que baru obedivū Samaria āmicurīmarocavū pare torojurivū barejāimada na.

⁹Ūbenita diīmaroi cūinācu ūmū curejameda, ūi āmiā Simón. Joe baju cucū bācu noi, yaviéde ñayū barejāmeda ū. Caivū nōcavū cucumarejaimada ūi yaviéde. “Parucubū yu”, arejameda ū. ¹⁰Que baru caivū diīmarocavū, jabova aru apevū máre, me jápiarejaimada ūi coyuiyede. “Ñai Simón parucube apevū pueno. Jūmenijicui parucube cuvabi ū. Ūrecabe Jūmenijicū baju”, arejaimada caivū.

¹¹Joe baju Simón pare cuvarejameda ina pōevare. Que baru me jápiarejaimada caiye ūi coyuiyede.

¹²Ūbenita ina pōeva ne ju aiye Felipe coyuiyede, jápiaivū bācavū iye yávaiye méne Jūmenijicui jaboteinore aru Jesúre, Jūmenijicui epeimū mácure máre, jáðovarejaimada Jūmenijicure ocoque, ūmūva aru nomiva máre.

¹³Simón máre ju arejameda Jesúre. Aru jáðovarejameda Jūmenijicure ocoque. Ūi jáðovariburu yóboi, Simón yóvarejameda Felipe. Ūvacari cucumarejameda ū jáñū mácu caiye iye Felipe ūi ñaiyede pōeva ne jámene aru ne ñarī majibede.

¹⁴Aru Jesús ūi yávaiye méne beorī coyucōjeimara Jerusalén āmicurīmaroi curivū, jápiarejaimada ina Samariacavure ne ju aiye Jūmenijicui yávaiye méne. Que baru jarorejaimada Pedroro aru Jūare máre Samaria āmicurīmaroi. ¹⁵Nore Pedrojā earī, jēniacarejaimada Jūmenijicure, ūi daroquiyepe aivū Espiritu Santore ina pōeva mamarumū ju aivure Jesúre dijāravūare. ¹⁶Jave jáðovarejaimada Jūmenijicure ocoque Jesúi āmiāi. Ūbenita ñai Espiritu Santore cuvabedejaimada na cāreja. ¹⁷Ne jēniariburu yóboi, Pedro aru Juan máre tuorejaimada ne puruáque náre

coapa ne jipoburā. Que teni caivu ina cuvarejaimada ñai Espiritu Santore.

¹⁸ Aru Simón járejamedá Pedrojá ne tuoiyede Jūmenijicu daroyure Espiritu Santo pōevare. Que baru jíyurejamedá tātuturare Pedrojáre, cuvaiyucu Jūmenijicui majiéde nápe.

¹⁹ —Jíjarā yure máre iye Jūmenijicui majiéde. Yu máre jíyuvu Espiritu Santore ina ji tuoimarare ji puruáque, Simón arejamedá Pedrojáre.

²⁰ Ubenita Pedrocapuravu jarayū arejamedá úre:

—Yu uvu Jūmenijicui ñájine daquiyepe mure mi tātuturare toabo cūiméboi, mi dápiayé boje bojedainore úre iye majiéde Espiritu Santo jíyede pōevare.

²¹ Mu Jūmenijicui jáinore amecu bajutamu mu mi úme. Que baru mu jáve ñujacacu ámevu. Ñuje memeinore dabevu mu. ²² Caride chíonū oatuvajacu mu mi daiyede. Dajocajacu mi ámeina dápiainore. Aru jēniyacū Jūmenijicūque, ũi árumetequiyepé mi nópe dápiainore.

²³ Jáivū yū mure pare jorojĩñure. Aru buoimure páyubu mu, mi ámeina teiye boje, arejamedá Pedro úre.

²⁴ Nópe ayure, Simón ju arejamedá:

—Jēniaivū mujare. Jēniacajarā yure Jūmenijicūque, vaibéquiyepé yópe mi coyuiyepé, arí jēniarejamedá Simón.

²⁵ No yóboi Pedro aru Juan, Jesúre coreóvaivū, coyurejaimada caivu ina pōevare Jūmenijicui yávaiye méne. Coyurí buojarí, etarejaimada díimare jocarí, copainurajivū Jerusalén ámicuríimaroí. Aru mái nuri coyurejaimada Jūmenijicui yávaiye méne obedivū imaroacavure Samaria ámicurijoboróí.

Felipe ũi bueino Etiopíacacure

²⁶ Dinumu Jūmenijicui daroimū, cūinácu ángele, nuicōjēnejamedá Felipede.

—Caride avíá daino cācopūravu ñujacu, Jerusalén ámicuríimaro yebai ñuimai ñujacu, Gaza ámicuríimaroí ñuimai, arejamedá.

Caride pōeva cubema dimare. ²⁷ Ju arí, Felipe nurejamedá. Dinumu

dimai cūinácu ũmu eunuco, Etiopía ámicurijoborócasu, copainuñu marejamedá Jerusalén ámicuríimare jocarí ũi joboróí. Ñai ũmu jabocu parucu barejamedá. ũi joboró jabocoi tātuturare coreipóecu barejamedá. Aru ico jabocore pōeva arejaimada Candace. Ñai ũmu copainuñu marejamedá ũ, torojuede jíyu bácu Jūmenijicure Jerusalén ámicuríimaroí. ²⁸ Jāturuicūi dobacu nuñu caballovaque, aru ũi nuíyede Jūmenijicui yávaiyede jári boroteyu barejamedá. Ñai Jūmenijicui yávaiyede coyucaipóecu bácu, ũi ámiá Isaías, ũi toivaiye báque barejávūya ũi jáiye. ²⁹ Aru Felipei jáiyede ñai ũmure, Espiritu Santo arejamedá úre:

—Jāturuicū yebai ñujacu mu.

Mautejacū mu ñai ũmuque, arejamedá.

³⁰ Ju arí, cúyarí, ũi yebai earí, Felipe jápiarejamedá ũi jári boroteiyede Isaías bácu toivaiye báquede. Que teni Felipe jēniari járejamedá úre:

—¿Dápiarí eayurū mu aipe aiyuróre yo mi jári boroteinore? arejamedá Felipe.

³¹ Aru ñai Etiopíacacu arejamedá Felipede:

—Bi, dápiarí eabevu yu yo ji jári boroteinore. Pōecu majicu jaubi yure, majicacuyū aipe aiyuróre yo ji jári boroteinore. Jatujacu. Dobajacu ji yebai. Majicajacu yure yore, arejamedá ñai ũmu Felipede.

³² Iye toivaiye báquede jári boroteyu barejamedá yópe:

Nuvarajarama úre boarí

jaruvarajivū, yópe ne nuvaiyepé

ovejare boarí jaruvainoi. Aru

bi acuyume ũ, yópe ovejajicu

obepe ũi pođare buraiyedeca.

Abecuyume ũ. ³³ Cuyoye tede

darajarama úre. Aru yávarí

cadateipóecu cubecuyume.

Que baru ámeno darajarama

úre. Cūiquíyebu ijāravure ũi

cūrō. Que baru ũi pāramena

majurórivū cubenajarama. Aru na

majurórivure coyubenajarama ne

borore, jári borotedejamedá ñai

Etiopíacacu.

³⁴ Aru jēniari járejameđa Felipede:
—Coyuǵacu yure. ¿Ñamene
Jūmenijicui yávaiyede
coyucarejaquemari iyede?
¿Coyurejaquemari ũi baju o apesure?
arejameđa.

³⁵ Ju arí ũre, iye toivaiye báqueque
bári, Felipe coyurejameđa ũre caiye iye
Jesús ũi yávaiye méne. ³⁶ Ne nuiyedeca
mái earejaimađa oco curijitabure. Aru
ñai jabocu arejameđa Felipede:

—Jáǵacu. Yuibu oco curijitabu. ¿Ji
jáđovaiyuede Jūmenijicure ocoque,
apesu jáđovaicōjemecu buojaidi yure?
arejameđa.

³⁷ Felipe arejameđa ũre:
—Mu ju ayu baru Jesúre, jáđovari
buojaivu mu Jūmenijicure ocoque,
arejameđa.

Ñai jabocu, yópe arí, ju arejameđa
ũre:

—Yu ju ayubu Jesúre. Majivu yu
ũre Jūmenijicui mácure, Jūmenijicui
daroimú mácure, arejameđa ñai jabocu.

³⁸ Que arí, nuicōjemenejameđa
caballovare, icú jäturuicú mautequiyepu
ayu. Aru ina pucarā, Felipe ũmaque,
etarí dicüre jocarí, ěmeni oco
curijitabui, Felipe jáđovarejameđa
ũre Jūmenijicucue noi. ³⁹ Aru ne
maiye oco curijitabure jocarí, cūiná
Jūmenijicui Espiritu nuvarejameđa
Felipede. Ñai jabocu jámenejameđa
ũre cojedeca. Ūbenita torojucu mái
nurejameđa bedióva. ⁴⁰ Felipecapūravu
járorejameđa Azoto āmicurīimaroí. Etarí
nore jocarí, mái nure nuñu Cesarea
āmicurīimaroí coyurejameđa iye Jesús
ũi yávaiye méne cainoa imaroai dimai
pu eayuta Cesarea āmicurīimaroí.

Saulo Jesucristore jári ũi ju aino
(Hch 22.6-16, 26.12-28)

9 ¹ Que teiyedeca, Saulo cainumua
ñájine dayu barejameđa Jesúre ju
aipōevare, náre yópe arí:

—Boaquíjivu mujare muje Jesúre ju
aiye boje, jarayu arejameđa Saulo.

² Aru ñai sacerdotevare jaboteipōecure
jēniacunurejameđa papyayocare Saulo,

ũi jáđovaquiyepu ayu diyocare judíovai
cójjiñamia coreipōevare Damasco
āmicurīimaroí, ne majinajiyepu ayu
ñamene ũ Saulo aru ye paruéde
cuvacure ũ, ne cōjeimú mácu. Damasco
āmicurīimaroí nucuyu barejameđa
Saulo, vocunñu Jesúre ju aipōevare.
Náre eayu baru, buojebu náre, ũmuvare
aru nomivare máre, nuvacuyu náre
Jerusalén āmicurīimaroí.

³ Diyocare ĩni, Saulo nurejameđa
mái. Damasco āmicurīimaroí joabenoí
eaiyede, maumejena cavarōre jocarí
pōorejavūya yópe yaroinope ũi yebai,
aru urarō miadárejavūya noi. ⁴ Que baru
cucumañu, mori turejameđa joborōí.
Aru jápiarejameđa Jesús ũi yávainore,
yópe ainore:

—Mu, Saulo, ¿aipe teni maucuvacurū
mu yure? arejameđa.

⁵ Saulo jēniari járejameđa:

—Mu, ji jabocu, ¿ñamenu mu? jēniari
járejameđa.

Aru Jesús arejameđa:

—Yurecabu Jesús, mi maucuvamu
mácu. Mi maucvvarō yure āmedaivu
mure, arejameđa.

⁶ Saulo, jiducu, bidini jēniari
járejameđa Jesúre:

—Mu, ji jabocu, ¿yéde ji ñainore ucunū
mu? arejameđa Saulo.

Aru Jesús arejameđa ũre:

—Nacajajacu. Ecojacu diimaroí. Noi
apesu majicacuyume mure aipe mi
ñaquinore, arejameđa Jesús ũre.

⁷ Iye pēoiyede, ina ũmava, nuivu
bácavu Sauloque, dajocarejaimađa.
Aru bi arejaimađa na. Iye yávainore
jápiarejaimađa na. Ūbenita ñai yávayure
ye jámenejaimađa na. ⁸ Ju arí Jesús ũi
cōjeiyede, Saulo nacajarejameđa. Ūbenita
ũi yacorua voaiyede, ye jámenejameđa ũ.
Jári eabecu barejameđa ũ, Saulo. Que baru
ũque nuivu ũi puruáre jēni, nuvarejaimađa
ũre pu Damasco āmicurīimaroita.

⁹ Yóbecurijārvavare Saulo jári
eabedejameđa. Āinore ye āmenejameđa.
Aru ũcuinore máre ũcumenejameđa ũ.

¹⁰ Noi, Damasco āmicurīimaroí,
curejameđa cūinácu Jesúre ju

aipõevacacu, ñi ãmiá Ananías. Ñ arucu járejamedá Jesúre decoboainope. Aru Jesús arejamedá úre:

—Mu, Ananías, ¿cucurú mu? arejamedá.

Aru Ananías arejamedá:

—Mu, ji jabocu, cuvü yu, arejamedá.

¹¹ Jesús arejamedá úre:

—Nujacu Nurinima ãmicurimai. Noi, Judai cãrami nuri, vojacu cüinácu ñmure, Tarso ãmicuríimarocacure, ñi ãmiá Saulo. Jipacu Jümenijicure jëniáimi ñ. ¹² Jári eabebi ñ caride. Arucu ñ decoboainope jáimi mure tuoýure mi puruáque, járe dacuyure úre cojedeca, arejamedá Jesús Ananiäre.

¹³ Nópe ayure jápiarí, Ananías arejamedá:

—Mu, ji jabocu, ñ mínare mearare Jerusalécavure ámeno ñabiya ñ. Obedivü pøeva yávaðama yure. ¹⁴ Que baru yo Damascure caivü ina mure ju aivure buocudayutame ñ, sacerdotevai jabova ne cójeimü mácu, arejamedá Ananías Jesúre.

¹⁵ Ñbenita Jesús arejamedá úre:

—Nujacu. Beoivü yu ñai ñmure, ñi coyüquiyepe ayu ji yávaie méne apejoborõacavure, nócavu ne jabovare máre, aru Israecavure máre. ¹⁶ Yu jáðovaquijivü úre ñájiyede yure boje, arejamedá Jesús.

¹⁷ Dinümü Ananías nurejamedá cãrami, Sauloi curiñami. Ecoyü bácu, tuorí ñi puruáre Saulorã, arejamedá:

—Mu, jícu, Saulo, Jesúvacari ñai mi jáimü mácu mái dayu, daroibi yure, mi jáquiyepe ayu cojedeca aru Espiritu Santo ñi ñaicõjequiyepe ayu mure, arejamedá Ananías Saulore.

¹⁸ Nópe ñi aiyeda, turejavüya ñi yacorüare jocarí moatüchiapa paiyede, aru me járejamedá cojedeca. Dinümüre nacajañure jáðovarejamedá Jümenijicure ocoque. ¹⁹ No yóboi ári, parucu nurejamedá cojedeca. Aru mautedejamedá obebejáravua Jesúre ju aipõevaque, Damasco ãmicuríimaroi curivüque.

**Saulo Damascoi ñi coyüino
Jesús ñi yávaie méne**

²⁰ Maumejiena Saulo coyüri búrejamedá judíovai cójijiñamiai,

“Jesúre jáveneca Jümenijicui mácube” ayu. ²¹ Caivü úre jápiaivü bácvü cuecumaivü arejaimada ne baju:

—Ñai Jesúre ju aivure ámeno ñayube ñ. Que baru náre jëni jícyu dacube yui, ina sacerdotevai jabova ne buorãjiyepe ayu náre, arejaimada na.

²² Ñbenita Saulocapuravü coyurejamedá Jesús ñi yávaie méne, paruéque jáðovañu jáveneca Jümenijicui mácube. Ñbenita jápiarí coreóvare ñabedejamedá ina judíova curivure Damasco ãmicuríimaroi.

**Saulo ñi dupino judíovare jocarí
(2 Co 11.32-33)**

²³ Obedijaravua yóboi, judíovacavü cójijidejaimada, boarí jarüvarãjivü Saulore. ²⁴ Ñbenita ñ majidejamedá. Jãravure aru ñamine máre coreivü baríidurejaimada ímaro jedevacobeai, boarí jarüvarãjivü úre, ñi etaru nore. ²⁵ Ñbenita Jesúre ju aipõeva epedejaimada Saulore pue urapue jívüi. Aru no biaido tarabü jáicobede ñmeóvarejaimada úre ímaro biaido apepüravüi pu joborõita ñami. Yópe ñari, Saulo dupini nurejamedá ñi mauvare jocarí.

Saulo Jerusaléi ñi curõ

²⁶ Saulo eayü bácu Jerusalén ãmicuríimaroi, cójijiyuríidurejamedá Jesúre ju aipõevaque. Ñbenita caivü jidurejaimada, ne dápaiye boje ju abecure Jesús ñi yávaie méne. ²⁷ Ñbenita Bernabécapuravü nvari yóvare ñarejamedá Jesús ñi yávaie méne beorí coyüicõjeimaraque. Coyurejamedá aipe teni Saulo ñi jáino mácarõre Jesúre, ñi nuiyede Damasco ãmicuríimaroi, aru aipe Jesús ñi yávaino mácarõre úre. Aru Bernabé coyurejamedá aipe Saulo ñi yávaino mácarõre máre, Damasco ãmicuríimaroi, coyüyu jidübecüva caivü pøevare Jesús ñi yávaie méne.

²⁸ Yópe aríburu yóboi, Saulo mautedejamedá Jerusalén ãmicuríimaroi, cuyü Jesús ñi yávaie

méne beorí coyucōjeimaraque.
²⁹ Coyure cuyu barejámeđa jidubecuva pōevare Jesús ũi yávaiye méne, boroteni coyūvarejameđa pare ina judíova griego āmicurricamuare yávaivure. Ũbenita boarí jaruvaiyure curídivu barejámada na. ³⁰ Jesúre ju aipōevare majidivū boarí jaruvaiyurivure, nūvarejaimada Saulore Cesarea āmicurriīmaroi. Aru nore jocarí, jarorejaimada ũre Tarso āmicurriīmaroita. ³¹ Yópe teni, Jesúre ju aipōeva caivu Judea, aru Galilea, aru Samaria āmicurđocavū nájimenejaimada. Pueno baju majidivū barejámada na Jūmenijicure aru ũi yávaiyede máre, ñai Espírítu Santo ũi bueiyede náre. Cūrejaimada pueđarí Jūmenijicure Espírítu Santo ũi cadateinoque. Aru pueno baju obedivū tedejaimada Jesús ũi yávaiye méne ju aipōeva.

Pedro ũi meadaino Eneas

³² Dinūmū Pedro coyure cuyu barejámeđa cainoa ímaroacavure. Que teni cūinájāravū jácunūrejameđa ina pōevare, Jūmenijicure mearore jívure, Lida āmicurriīmarocavure. ³³ Nore cūinácū ũmū cūrejameđa, ũi āmiá Eneas. Nacajaiye majibecu barejámeđa ũ. Ocho paivūja joe nacajamenejameđa ũi parainore jocarí. ³⁴ Aru Pedro ũi yebai nuri, arejameđa ũre:

—Mū, Eneas, caride Jesúvacari meadaibi mure. Nacajajacu. Aru meadajacu mi parainore, arejameđa Pedro Eneas.

Maumejena Eneas nacajarejameđa.
³⁵ Que teni caivu ina pōeva Lida āmicurriīmarocavū aru Sarón āmicurridarōcavū máre járejaimada Eneas meateyure. Que baru ju arejaimada Jesúre.

Pedro ũi nacovaino Dorcas yaiyó bácore Jesúi paruéque

³⁶ Dinūmū Jope āmicurriīmaroi cūinácū nomió cūrejacođa, ōi āmiá Tabita. Ico Tabita Jesúre ju aipōeco barejacođa ō. Ōi āmiá griego āmicurricamua yávaicamuaque

Dorcas barejávūya, yo aiyurō ñamaco. Cainumua mearo đari cōmajiyó báco apévure aru cadatedo báco cōmaje ārojarivure máre. ³⁷ Dijāravuai ijeteri, yaidéjacođa ō, Tabita báco. Ōi baju bácarōre joariburu yóboi, epedejaimada puenocaticubui. ³⁸ Jope āmicurriīmaro aru Lida āmicurriīmaro joabeno marejávūya. Que baru ina Jesúre ju aipōeva Jope āmicurriīmarocavū jápiaivū Pedro cūcure Lida āmicurriīmaroi, yo borore jarorejaimada ũre pucarā ũmūvaque:

—Maume dajacu ñūje curōi, arí daicōjenejaimada ũre.

³⁹ Ju arí, Pedro nūrejameđa náque. Ne eaiyede, nūvarejaimada ũre yaiyó bácoi curitucubū puenocaticubui. Ditucubui ecoyū, caivu ina nomiópeva oivū ō mácore chītoivū ũre, jáđovaivū barejámada doicajeare, Dorcas báco ōi nareiyē báquede apūco cāreja. ⁴⁰ Ũbenita Pedro etaicōjenejameđa caivu inare ditucubure jocarí. Que teniburu yóboi, ñuatutarí jēniarejameđa Jūmenijicūque. Ũi jēniariburu yóboi, copedini, ōi baju bácarōre jári, arejameđa:

—Mū, Tabita, nacajajaco, arejameđa.

Ōi yacorūare voarí, Pedrore jári, nacajari dobarejacođa ō, Tabita. ⁴¹ Ōi purure jēni, Pedro nacovarejameđa ōre. Dinūmūma ōrejarejameđa ina Jesúre ju aipōevare aru ina nomiópevare máre, ne járajyepere ayū ōre apūcore cojedeca. ⁴² Aru ōi borore jápiarejaimada caivu Jope āmicurriīmarocavū. Que baru obedivū pōeva ju arejaimada Jesúre nore. ⁴³ No yóboi, Pedro mautedejameđa diīmaroi obedijāravua. Cūrejameđa apesu Simóque, āimacajeare memeipōescuque, ũi cūrami.

Pedro ũi coyūino Corneliore Jesús ũi yávaiye méne
(Hch 11.4-18)

10 ¹ Cūinácū ũmū cūrejameđa Cesarea āmicurriīmaroi, ũi āmiá Cornelio. Ñai Cornelio cien paivū churaravai jabocu barejámeđa ũ. Roma āmicurđo jaboteino churaravai

yajubo italiano āmicuriyajubocacu barejámeđa ũ. ²Jāve mearore jīni Jūmenijicure, ũ jīvu máre mearore jīvarejaimada ũre. Cadatede cuyu barejámeđa ina judíovacavu cōmaje ārojarivure. Aru jēniavarejameđa Jūmenijicuque. ³Cūinájāravu tres baji nainú, ñai Cornelio apucu járejameđa cūinācu Jūmenijicui daroimu, ángelede, decoboainope. Ñai ángele ecori, Cornelio yebai nuri, arejameđa ũre:

—Mu, Cornelio, arejameđa.

⁴Cornelio, jiducu, ñai ángelede cocori, jēniari járejameđa ũre:

—Mu, ji jabocu, ¿yéde ucuru mu? arejameđa Cornelio.

Ñai ángele ju arí, arejameđa ũre:

—Jūmenijicu jápiaibi mi jēniayede ũre. Aru me jáimi mi cadateiyede cōmaje ārojarivure máre. Que baru Jūmenijicu ārumi mure. ⁵Caride jarojacu apevu ũmuvare Jope āmicuriimaro, ne vorí earājiyepe ayu cūinācu ũmure, ũi amíá Simón Pedro. ⁶Apecu Simón, āmacajeare memeipōecu, ũi cūrami cuvabi jia urađa ēcarui. Aru Simón Pedro cucube ũi cūrami. ũre ne eaiyede, davajarāri mi yebai, arejameđa ñai ángele Corneliore.

⁷Que arí, ñai ángele nurejameđa Corneliore jocarí. Dinmu Cornelio órejarejameđa pucarā ũi yebacavure aru cūinācu churaravacure. Ñai máre mearore jíyu barejámeđa Jūmenijicure. Cornelioi me dápiaimu marejámeđa, ũre ũi mearo cadateiye boje. ⁸Ina yóbecurā ne eaiyede ũi yebai, Cornelio coyurejameđa náre caiye iye ñai ángele ũi coyuiye báquede. Aru nuicōjenejameđa náre Jope āmicuriimaro.

⁹Cōmiájāravu ne mái nuiyedeca, Jope āmicuriimaro joabeno, Pedro muri nurejameđa cūrami puenora, jēniacuyu Jūmenijicuque. Jāravu corica barejávūya. ¹⁰Ūi jēniayedeđa, āvué ijidejavūya ũre. Ūbenita āiyede jatubedejaimada cāreja. Ne jatubíyedeca, Pedro apucu járejameđa yópe decoboainope. ¹¹Járejameđa

no cavarō voainore aru apejīe yópe uracaje cuitótecajepe jōdarejavūya cavarōre jocarí. Jōdarejavūya yópe pōeva ne buorí yóvaicuvaitōbua ñarí ēmeóvaiyepe dicajede. Jōdarejavūya pu cūrami puenoita Pedro yebai.

¹²Dicaje jīvui curejaimada obedivu āimara yóvaicuvaiyu cubobaque cuivu, aru obedivu āđavape papeivu, aru obedivu āimara vuivu máre. ¹³Pedro jápiarejameđa apeno yávainore. Aru yópe arejameđa Jūmenijicu ũre:

—Mu, Pedro, nacajajacu. Boajácu mi āquinova, arejameđa Jūmenijicu.

¹⁴Ūbenita Pedro arejameđa:

—Mu, ji jabocu, ique āmevu!

Cainmua āmevu yu caiye iye Moisés bácuí āicōjemene ñujare, judíovare. Que baru āiyubevu yu diede, arejameđa Pedrocápūravu.

¹⁵Ūbenita Jūmenijicupūravu arí yávorejameđa Pedrore cojedeca.

—“Āiyubevu yu”, abejacu mu iyede ji āicōjeiyede mure, arejameđa Jūmenijicu.

¹⁶Yóbecue vaidéjavūya Pedrore yópe paino. Aru no yóboi, dicaje uracaje muri copainurejavūya pu cavarōita cojedeca.

¹⁷Pedrocápūravu pare arí dápiayu barejámeđa. “¿Yéde majicaiyucuba Jūmenijicu yure yo ji jáino mácarōque?” arí dápiarejameđa ũ. Que dápiayedeđa, ina Cornelioi jaroimara mácavu Simó cūramine vorí, earí, núrejaimada jedevacobei. ¹⁸Aru jēniari járejaimada:

—¿Aru, Simón Pedro curi yui? arejaimada.

¹⁹Pedrocápūravu coreóvabecu cāreja aipe ayurō ũi jáino mácarōre dápiayu baridurejameđa. Que teiyedeđa, ñai Espiritu Santo arejameđa Pedrore:

—Jápiajacu. Yóbecurā ũmuvu vodama mure. ²⁰Que baru nacajajacu, jōđajacu, aru ñujacu náque. “Nuiyubevu yu náque. Jívu āmema na”, arí dápiabejacu mu. Yurecabu daroyu náre yui, arejameđa ñai Espiritu Santo Pedrore.

²¹Ju arí, nacajari, jōđari ne yebai, jacyourí náre, Pedro arejameđa:

—Yurecabu ñuje voimu. ¿Yéde urivurū ñaja yúque? arejameđa.

²²Pedrore arejaimada na:

—Ñuje jabocu, ñi ãmiá Cornelio, cien paivu churaravai jabocu, darobi ñujare mi yebai. Meacube ñ, aru mearore jýyube Jümenijicure. Caivu judíoiva me jádama úre. Pueadama úre pare. Cüinácu Jümenijicui daroimü mácu, ángele, yópe abiya úre: “Cutujacu mü Pedrore mi cürami, ñi coyuyeyepe ayu müre Jümenijicui yávaiye méne”, abiya ñai ángele ñuje jabocure, arejaimada ina Pedrore vorádaivu bácvu.

²³Ne borore jápiaiyede, Pedro yópe arí, mauteicójenajameđa náre úque: —Ecojará müja. Cari ñami cüjará müja yui, arejameđa Pedro náre.

Cömiáijárvu Pedro ñi cüvede meadarí, nurejameđa náque. Aru apevu ümüva, Jesúre ju aipóeva, Jope ámicuríimarcavu yóvarejaimada úre máre. ²⁴Earejaimada na Cesarea ámicuríimaro. Noi Cornelio coredejameđa Pedrore. Úque curivu ñi cürami apevu ñ jivu aru ñi yóvaimara máre, ñi cutuimara mácvu barejáimada na. ²⁵Pedro ñi eaiyede Cornelioi cürami, ñai jabocu úre jacoyurí, pueđaiyücu mori turejameđa Pedrore ñi cüboba yebai. ²⁶Übenita Pedrocapuravu nacajaicójenajameđa úre.

—Nacajajacu mü. Yópe đabejacu mü. Yu máre müpe páyu pöescu yu, arejameđa Pedro Corneliore.

²⁷Ne baju yávaivu ecorejaimada Cornelioi cürami. Pedro járejameđa caivu ina obedivu pöevare cójjivüre noi. ²⁸Aru arejameđa náre:

—Jave majivu müja, ñuja judíoiva curáñmevüre müja judíoiva ámevüque aru ñuja yóvabevüre máre müjare, ñujare Moisés bácu đaicójeiye boje. Übenita Jümenijicüvacari majicabi yure iye đaicójeiye jaubevu yure caride. Ámeina jáicójememi yure apevüre, judíoiva ámevüre. ²⁹Que baru yure mi órejaiye báquede jápiarí, cüiná ju arí, đavu yu mi yebai. Que baru coyujacu yure. ¿Aipe teni daicójecurü mü yüre? arejameđa Pedro.

³⁰Aru Cornelio arejameđa úre:

—Yóvaicuvaijárvu jipocai yo óra baji, tres baji nainú, yu jéniavu Jümenijicüque yui ji cürami. Ji jéniaiyedeca, maumena cüinácu ümü doicaje pëoicajeque númi ji jipocai. ³¹Aru ñ abi yure: “Mü, Cornelio, Jümenijicu jápiaibi mi jéniaiyede úre. Aru me jáimi mi cađateiyede cömaje árojarivüre máre. Que baru Jümenijicu árvu müre. ³²Caride jarojacu apevüre Jope ámicuríimaro, ne vorí earájiyepa ayu cüinácu ümü, ñi ãmiá Simón Pedro. Apevu Simón, áimacajare memepöescu, cüvabi ñi cürami jia urađa écarui. Aru Simón Pedro cücube diñami”. Que abi yure ñai ángele. ³³Que baru cüiná jarovu yu inare, ne davarájiyepa ayu müre ji yebai. Aru me daivu mü caride. Caivu ñuja cójjivübu yui caride, Jümenijicui jáinoi. Jápiaiyüvübu ñuja caiye iye mi coyuyeyede yópe Jümenijicui coyucaicójeiyede müre ñujare, arejameđa Cornelio Pedrore.

Pedro ñi yávaino Cornelioi cürami

³⁴Pedro yávarí báyu, yópe arí, coyurejameđa náre:

—Yu coreóvaivu caride jáve Jümenijicu jáñure caivu pöevare cüinátrü. ³⁵Jümenijicu copü etayube caivu ina pueđavüre úre, ju aivüre úre, aru mearo đavüre máre. Caivu ina caiyajuboacavu yópe đavüre Jümenijicu copü etayube náre. ³⁶Müjavacari majivu iye Jümenijicui coyuiye báquede Israel bácu páramena mácvüre ñi daroquimü Cristorá. Jümenijicürecabe daroyu bácu Jesucristore, caivu pöeva ne jabocüva, ñi coyuyeyepa ayu náre ñi yávaiye méne, cárijimene đacacüvüre náre Jümenijicüque. ³⁷Aru müjavacari majivu no uraró teino mácaröre Juan Bautista bácu ñi coyurí buojarí jáđovaiye báquede pöevare Jümenijicure. Jesucristo buame ñi đaiyede uraró pöeva ne đarí majibede Galilea ámicurijoboröi. Diede đare cuyu bateáme pu caino Judea ámicurijoboröi. ³⁸Aru müjavacari majivu ñai Jesús Nazarecaci borore.

Jūmenijicu beorejaquemavu ūre javede. Que teni daroquemavu ūre ūi Espiritu Santore. Que baru Jūmenijicui paruéde cuvatequemavu ū, Jesús.

‘Caino ūi cuino Jesús cadateame pōevare. Meadame caivu ina pōevare abujuvai jabocui nājine đaimara mácavure, ūi cuvae boje Jūmenijicui paruéde. ³⁹Ņujavacari jácarā caiye iye ūi đaiye báquede Jerusalén āmicurīmaroi aru caino judíovai joborōi máre.

Ūbenita ūre pēvairi jocusujaravena, boarí jaruvaima ūi mauva. ⁴⁰Ūbenita yóbecurijāravua ūi yainíburu yóboi, Jūmenijicu nacovaquemavu ūre yainore jaruvarí. Aru jáđovame ūre űujare.

⁴¹Apevu jámetequemavu ūre. Quévura űujavacari, Jūmenijicui beoimara mácavu jipocama, jácarā ūre, apucure cojedeca. Ūi nacajariburu yóboi yainore jaruvarí, űuja ūque ācarā aru ūcucarā.

⁴²Ūque curivu űuja, coyucōjeame űujare ūi yávaiye méne apévure. Aru yópe aicōjeame űujare máre: “Jāve ijāravu cūiquiyede yávacari jarocuyumu caivure, apurivure aru yaivu bācavure máre, ne curājinoi. Apévure jarocuyumu cavarō mearo Jūmenijicui curōi. Aru apévure jarocuyumu toabo cūiméboi. Javede Jūmenijicu beorejaquemavu yure, yópe jarocuyure caivu pōevare”. Que aicōjeame űujare Jesús. ⁴³Aru Jestivacari űai caivu Jūmenijicui yávaiyede coyucaipōeva mácavui coyucimame ū. Na mácavu coyurejaimada ūi borore yópe: “Caivu pōeva ne ju aru Jūmenijicui daroquimure, Jūmenijicu ārumetecuyume ne āmeina teiyede”, arí coyucarejaimada na mácavu, arí coyurejaimada Pedro Corneliojāre.

Judíova āmevu ne copu etaino Espiritu Santore

⁴⁴Pedro ūi coyuyedeca, űai Espiritu Santo náre earí đaicōjenezaimada caivu ina jápiaivure iye yávaiye méne.

⁴⁵Que baru ina judíova, Jesucristore ju aivu, Pedroi yóvaimara mácavu, cucumarejaimada ne jáiyede

Jūmenijicu daroyure űai Espiritu Santore ina judíova āmevure. ⁴⁶Ina judíova jápiaivu ina judíova āmevure yávaiyure apecamua yávaicamua ne majibecamuaque, majidejaimada űai Espiritu Santore đaicōjeñure náre. Ina pōeva mamarumu ju aivu Jesúre dijāravure mearore jídejaimada Jūmenijicure, ūi urarō majié boje, ūi urarō parué boje máre. ⁴⁷Dinumu Pedro arejaimada:

—Ina pōeva, űujape paivu, copu etadama űai Espiritu Santore. Que baru pōecu cubebi náre jáđovaicōjemecu Jūmenijicure ocoque, arejaimada Pedro.

⁴⁸Que arí, náre jáđovaicōjenezaimada Jūmenijicure ocoque, ne Jesucristore ju aiyé boje. Dinumu jēniarejaimada Pedrorre, ūi mautequiyere aivu náque apejāravua.

Pedro ūi coyucino Jerusalécavu Jesúre ju aipōevare
(Hch 1.5, 10.1-48)

11 ¹Dinumu Jesús ūi yávaiye méne beorí coyucōjeimara aru Jesúre ju aipōeva caino Judea āmicurijoborōcavu máre jápiarejaimada ne borore, apavu judíova āmevure ju aivure máre Jūmenijicui yávaiye méne. ²Que baru Pedro muri űuñu mácu Jerusalén āmicurīmaroi, apavu judíovacavu jararí yávarejaimada ūre. Ina judíova dāpiarejaimada caivu ūmuvare Jesúre ju aivure ne cajede buraicōjeiye jaurōre náre, yópe Jūmenijicui đaicōjeiyere ūi coyuyiye báquede Moisés bācure. Que baru ina judíova jaraivu Pedrorre, jēniari járejaimada ūre:

³—¿Aipe teni ecocurū mu judíova āmevui cūrami? ¿Aipe teni náque dobarí ācurū mu? arejaimada na Pedrorre.

⁴Ne que aiyé boje, Pedro coyurejaimada náre caiye iye vaiye báquede ūre mamabũino mácarōre pu dijāravuita. ⁵Yópe arí, coyurejaimada náre:

—Yúvacari jēniñu maticácu Jūmenijicure Simói cūrami, Jope

āmicurīīmaroi. Ji jēniaiyedeca, yu apucū jácacu yópe decoboainope apejēne yópe uracaje cuitótecajepe yóvaicūvaitōbuaque buoinope jōđaicajede cavarōre jocarī. Ēmeni darī pū ji yebai mauteavū dicaje. ⁶Que teni me cocorī dicaje jívui jácacu obedivū āimarare yóvaicūvaivū cubobaque cuivure, apevū oteiāimarare aru apevū macarōcavū jijecurivure máre; aru obedivū papeivure; aru obedivū āimara vūivure máre. ⁷Dinūmu jápiacacu Jūmenijicure yópe ayure yure: “Mū, Pedro, nacajajacu. Boajácu mi āquinova”, áme yure. ⁸Ūbenita acacu yu ūre: “Mū, ji jabocu, ique āmevū! Cainūmua āmevū yu caiye iye Moisés bācūi āicōjemene űjare, judíovare. Que baru āiyūbevū yu diede”, acacu yu. ⁹Ūbenita Jūmenijicūcapūravū, yópe arī, yávame yure cojedeca cavarō mearo űi curōre jocarī: “Āiyūbevū yu, abejacu mū, iyede ji āicōjeiyede mure”, áme yure Jūmenijicu. ¹⁰Aru yóbecue vaiávū yure yópe paino. No yóboi, quénora mūrī copainūavu dicaje pū cavarōi cojedeca.

¹¹Dinūmumareca yóbecurā űmūva edaima diñami ji curīñami. Cūinācu Cesarea āmicurīīmarocacu űi daroimara mácavū bateima na, yure vorāeavū.

¹²Aru űai Espírītu Santo yópe áme yure: “Jidūbejacu. Náque űjacu mū”, áme yure. Aru ina seis paivū űmūva, Jesúre ju aipōeva, yóvaima yure. Cesarea āmicurīīmaroi nūri, yure órejayū bācūi cūrami earī, noi ecocarā űja caivū.

¹³‘Que teni űai cūrami upacu, yópe arī, coyūáme űjare: “Cūinācu ángele cūetebi yure. Jávu yu ūre nūcure yui ji cūrami jívui. Ū abi yure: ‘Jarojacu apevure Jope āmicurīīmaroi, ne vorī earājiyepe ayū cūinācu űmure, űi āmiá Simón Pedro. ¹⁴Ū coyūcūyume mure yávaiye méne, mū aru caivū mi cūramicavū máre, mūje meatenajiyeye ayū, Jūmenijicūi ārumetequiyepe ayū mūje āmeina teiyede’. Que abi űai ángele yure”, áme űai cūrami upacu yure.

¹⁵Aru ji yávarī buiyede, űai Espírītu Santo edaibi náre máre nopedeca

űi edaiyede űjare mamarūmure.

¹⁶Dinūmure ārutecacu yu Jesús űi coyūiye báquede: “Juan Bautista bācu jáđovame mūjare Jūmenijicure ocoque. Ūbenita yu jáđovacūyūmu mūjare Jūmenijicure pūeno mearo baju. Darocūyūmu mūjare űai Espírītu Santore”. Que áme űjare Jesús.

¹⁷Jāvemū. űjā judíova űje ju aiyede Jesúre, Jūmenijicu daroáme űjare űai Espírītu Santore. Nopedeca đaibi ina judíova āmevū ne ju aiyede Jesúre. Jūmenijicu daroibi űai Espírītu Santore náre máre. Que baru, ¿aipe đaiye jauri yure? Jūmenijicure űi urōre đaicōjemecu buojabevū yu, arejamedā Pedro ina judíovare.

¹⁸Aru ina judíova jápiaivū bācavū Pedro űi coyūiyede, ne jararī yávaiyede ūre đajocarejaimada. Quénora mearore jídejaimada Jūmenijicure.

—Jūmenijicu meacu bajube ű. Ū űbi judíova āmevure máre, ne đaiyede oatvarī ne āmeina teiyede chíoiye boje, űi ārumetequiyepe ayū diede, aru űi cure đaquiyepe ayū náre jāravū cūiméjāravū baquinóre, arejaimada na.

Antioquíacavū ne ju aino Jesúre
(Hch 8.1-4, 21.10)

¹⁹Esteban mácure judíovai jabova ne boarī jarūvarīburu yóboi, Jesúre ju aipōeva dupini nurejaimada Jerusalén āmicurīīmarore jocarī apejeborōaita, judíovai jabova ne űājine đaiye boje náre. Apevū dupini nurejaimada joai, pū Fenicia āmicurijoborōita, aru Chipre āmicurijivūita, aru Antioquía āmicurīīmaroita. Ne nuiyedeca coyūrejaimada Jesús űi yávaiye méne apevū judíovare. Ūbenita coyūbedejaimada cāreja diede judíova āmevure. ²⁰Ūbenita apevū űmūva, Jesúre ju aipōeva, Chipre āmicurijivūcavū aru Cirene āmicurīīmarocavū máre, nurejaimada Antioquía āmicurīīmaroi. Noi coyūrejaimada judíova āmevure máre iye yávaiye méne. “Jesúrecabe caivū pōeva ne jabocu”, arī coyūrejaimada

na. ²¹Jūmenijicu jídejameđa náre ũi parúede. Que teni cađatedejameđa náre, ne buenajiyepre ayu me. Aru obedivu pōeva ju aivv iye yávaiye méne, chíoiyv ne ámeina teiyede, oatuvarejaimađa ne đaiyede, ju arájivv Jesúre.

²²Antioquía ámicuríimarocavv ne borore jápiaivv, ina Jerusalén ámicuríimarocavv Jesúre ju aipōeva jarorejaimađa Bernabéde ne yebai.

²³Ūi eaiyede Antioquía ámicuríimaroj, járejameđa Jūmenijicui urarō mearo đaiyede ina Jesúre ju aivvure. Que baru torojurejameđa ũ, Bernabé. Parurōreca yópe arí, coyurejameđa náre:

—Jesúre ju ajará cainumua.

Cūináumeque đajarā cainumua caiye iye ũi bueiye báquepe. Cainumua árūmetebejarā diede, arejameđa náre.

²⁴Ńai Bernabé parurōreca ju ayu barejameđa Jesucristore. Aru űai Espírиту Santo đaicōjenejameđa ũre. Que baru mearo đayv barejameđa ũ. Aru obedivu nócovv, ũi bueiyede jápiaivv, ju arejaimađa Jesúre.

²⁵No yóboi, Bernabé nurejameđa Tarso ámicuríimaroj, vocũñ Saulore. ²⁶Ūre vorí earí, nuvarejameđa ũre Antioquía ámicuríimaroj. Noi ina pucarā curivv cūináju baju. Cójjivv barejaimađa ina Jesúre ju aivvure. Obedivu pōeva Jesúre ju aivvure buevaivv barejaimađa na, Bernabé aru Saulo máre. Noi Antioquía ámicuríimaroj mamarumv pōeva ámidorejaimađa ina Jesúre ju aipōevare cristiano.

²⁷Dijárvavvai apevv Jūmenijicui yávaiyede coyucapōeva emenejaimađa Jerusalén ámicuríimarore jocarí. Aru earejaimađa Antioquía ámicuríimaroj.

²⁸Cūinácv nácacv, ũi ámiá Agabo, yávacunacajarejameđa ũ. Nai Espírиту Santo yávaicōjenejameđa ũre. Aru Jūmenijicui yávaiyede coyucarejameđa ũ, yópe arí: “Caiyv Judea ámicuríjborōcavv űájinajivvbu urarō ávneña”, arejameđa ũ. Aru obebejva yóboi, Claudio ũi jaboteinumvure, pōeva űájinejaimađa urarō ávneña, nópe ũi coyucaiye báquepedeca.

²⁹Iye Jūmenijicui yávaiyede coyucaiyede jápiaivv bácovv, ina Jesúre ju aipōeva “Cađatenajare náre, Judeacavv Jesúre ju aivvure”, arejaimađa ne baju. Que aivv, na coapa davaivv barejaimađa táuturare ne oainope, ne jínajiyepre. ³⁰Ne táuturare cójjivaríburu yóboi, Bernabé Saulomaque nuvarejaimađa diede, jínajivv Judea ámicuríjborōcavv Jesúre ju aivvure coreipōevare.

Jabova ne boarí jaruvaino Santiagoore aru ne buoino Pedrore

12 ¹Dijárvavvai űai jabocv Herodes űájine đarí búrejameđa apevv Jesúre ju aipōevare. ²Boarí jaruvaicōjenejameđa Santiagoore, Jūai mamícure, boaicaroveque. ³Ūi boarí jaruvaiye báque Santiago bácvure coyurejavvya ina judíovai jabovare. Que baru buoicōjenejameđa Pedrore. Dinumv pávure bucvure đaiye cube áiye torojvure teinumv marejávuya. ⁴Pedrore ne jéniburu yóboi, nuvarejaimađa ũre ámeina teivvure jeni jacoĩnami. Noi yóvaicvvaivvayuboa churarava jári coreivv barejaimađa ũre. Yóvaicvvaivv churarava barejaimađa yajuboa coapa. Aru ina churarava jári coredejaimađa ũre ne yajuboa coapa. Herodes davaicōjescvuy barejameđa Pedrore pōeva ne jáinoi Pascua ámicuríjávavv yóboi, acvuy ũre “Yaicvuyv mu”. ⁵Que teni ina churarava me coreivv barejaimađa Pedrore ámeina teivvure jeni jacoĩnami jívvi. Ūbenita ina Jesúre ju aipōeva parurōreca jéniaivv barejaimađa Jūmenijicvque ũre járvavvure aru űamine máre.

Jūmenijicv ũi jaetovaino Pedrore ámeina teivvure jeni jacoĩnamine jocarí

⁶Cūináñami, Herodes davaicōjescvuy Pedrore cōmiájávavv jipocacañamine, Pedro cāñv marejameđa ámeina teivvure jeni jacoĩnami jívvi. Pucarā churarava coricai cāñv, pvcamea táumeaque buoimv mácv; cūinámeque buoimv

mácu cūinácu churarare ũi meapūravui aru apemeque buoimū mácu apecu churarare ũi cācopūravui. Aru apevu churarava máre coreivū barejáimada diñami jedevacobe yebai. ⁷Maumejiēna ñai Jūmenijicui daroimū, cūinácu ángele, cuetedejameđa noi Pedro yebai. Aru miadárejavūya diñami jívui. Ñai ángele jēni jáñu marejameđa ũre cūinápūravui, ũre coedavacuꝝ, aru arejameđa ũre:
—iMaume coedajacu mū! arejameđa Pedrove.

Aru cūiná dimeá táumea voarī turejavūya Pedroi ámuveare jocarī. ⁸Ñai ángele arejameđa ũre:

—Buojacu mi jārióicāvare. Dojacu mi curaidoare máre, arejameđa.

Ju arī, ũi đaicōjeiyepedeca đarejameđa Pedro. Aru ñai ángele arejameđa ũre:

—Dojacu mi puenocacajede. Aru dajacu yúque, arejameđa ũ.

⁹Pedro ũi yóboi nūri, etarejameđa diñami jacoĩnamine jocarī. Ūbenita Pedrocapiūravu coreóvabedejameđa ũi đaiye jāvene. “¿Decoboaino márica yo?” arī dāpiarejameđa Pedro. ¹⁰Nūre nūivū vaidéjaimada cūináyajubo churarava coreivūre. Aru vaidéjaimada apējajubore máre, churarava coreivūre. Quénora earejaimada na ũracobe jedevacobe parūricobe táuque đaicobede, nūino ĩmaroi. Dicobe bajumareca vorejavūya, ne etarājiyepedecadiñami jacoĩnamine jocarī. Nūimai cuivū barejáimada na. Aru cūiná ñai ángele đajocarejameđa Pedrove cūinácura.

¹¹Dinumumia Pedro coreóvarejameđa iye ũre vaiye jāvene. Yópe arī dāpiarejameđa: “Caride majivu yu caiye iye jāvene. Jūmenijicu darocube ũi ángelede, ũi jaetovaquiyepe ayu yure Herodes ũi đaicōjeiyede jaruvarī, ũi đabequiyepe ayu yure yópe ina judíovai jabova ne ũrōpe”, arī dāpiarejameđa Pedro ũi baju.

¹²Ū coreóvayū caiye iyede, nūrejameđa Maríai cūrami. Ico María Jūai paco barejácođa. Aru ñai Jūiavacari ámicurejameđa Marcos

máre. Obedivu pōeva cójijivu diñami jēniaivū barejáimada Jūmenijicuque, ũi meadaquiyepe aivu Pedrove. ¹³Ne jēniaiyedeca, Pedro eayū diñami jedevacobei, órejarejameđa. Aru cūináco ne yebacaco, ōi ámiá Rode, voaconuridurejacoda ō. ¹⁴Ūbenita Pedrove jápiarī, coreóvarī, pare torojurejacoda ō. Que baru cūyarī copainurejacoda pōevai curitucubui cojedeca, jedevacobede voabecova cāreja. Ina jēniaivūre torojuco arejacoda ō:

—Jedevacobei cubi Pedro, arejacoda ō. Ūbenita ju abevū óre, arejaimada na:

¹⁵—Ārumecobu mū, arejaimada.

Ūbenita parurōreca:

—Jāvetamu. Jápíajarā yure.

Jedevacobei cubi Pedro, arejacoda ócapūravu.

Ina cójijivu arejaimada óre:

—Ūrecabe Pedro bácu decocu, mi jápiaimū, arejaimada na.

¹⁶Aru ne nópe yāvaiyedeca, Pedrocapiūravu đajocabecvna órejayū barejámeđa ũ cāreja. Quénora apevu nācavū jedevacobede voaivū, Pedrove jáivū, cuecumarejaimada na. ¹⁷Pedro cūrami ecorī, ũi pūruque jáđovari, bi aicōjeni, coyurejameđa náre caiye iye Jūmenijicui đaiye báquede jaetovacuꝝ ũre ámeina teivūre jēni jacoĩnamine jocarī.

—Iye ji coyuiyede Santiago, Jesúi yócuere, máre coyujarā mūja, aru caivu apevu Jesúre ju aipōevare máre, arejameđa náre Pedro.

Náre yávarī buojarī, Pedro etarejameđa diñamine jocarī, nūcuꝝ apenoita.

¹⁸Cōmiáijāravu miadáe tuiyede ina ámeina teivūre jēni jacoĩnami churarava pare jidurivū cārijinejaimada na. Jēniari jáivū barejáimada ne bajumia:

—¿Ári curi Pedro? ¿Aipe tedica ũ? arejaimada.

¹⁹Herodes churaravare voicōjenidurejameđa Pedrove. Ūbenita eabedejaimada ũre. Que baru Herodes jēniari járejameđa ina churaravare

ne majiéde Pedroi borore. Aru boarí jaruvaicōjenezameđa náre, Pedro ũi dupini nuiye boje náre jocarí.

No yóboi, Herodes ěmenezameđa Judea āmicurōre jocarí, cuscuyu Cesarea āmicuriīmaroi.

Herodes ũi yaino

²⁰Ũi cuede noi, pare jararejameđa ñai Herodes Tiro aru Sidón āmicuriīmaroacavure máre. Que baru apevu diīmaroacavu cójijidejaimada, cārjimine ðaiyurājivu Herodede. Diīmaroacavu ini bojeđavu barejámada ne ārajyede Herodei jaboteinoi. Que baru maucuvaiyubedejaimada ũre. Mamarumure coyurānurejaimada Blastore, jēniarajivu ũi cadatequinore náre. Ñai Blasto Herodei cūramine coreipōecu barejámada. Ne coyuiyede jápiayu, ne jēniayede ju ayu, cadateiyurejameđa náre. Ũi cadateiyequé, cójijini, nurajivu barejámada Herodes yebai, jēniarajivu ũi cārjimine ðaiyurepe aivu náre.

²¹Que baru cūinájāravu, Herodes ũi beojāravui, ũi meacaje jabocui doicajede dorīburu yóboi, ne cójijinoi nuri, jabocui dobarōra dobarí, yávorejameđa náre joe ñai Herodes.

²²Aru yávarīburu yóboi, caivu ina cójijivu, yópe arí, codoboboivu barejámada:

—iJūmenijicui yávaiyepé yávaibi ũ! Yávabebi ũmure. iJūmenijicui yávaiyepé yávaibi ũ! codoboborí arejaimada na.

²³Maumejiena Jūmenijicui daroimū, cūinācu āngele, pare ijino jídejameđa Herodede, “Yu máre ũmurecabu. Jūmenijicu āmevu yu” ũi arí coyube boje ina pōevare. Que teni júva ne āimū yaidéjameđa ũ, Herodes bácu.

²⁴Ũbenita apevu pōeva obedivu Jūmenijicui yávaiye méne coyuiyede jápiarí, ju arejaimada diede. Caijāravua apevu ne ju aiyede pūeno baju obedivu ju aivu nurejaimada.

²⁵Bernabé aru Saulo ne jíniburu yóboi iye tāuturare ju aivure coreipōevare, copainurejaimada Jerusalén

āmicuriīmarore jocarí. Aru Juan Marcore nuvarejaimada náque Antioquía āmicuriīmaroi.

Bernabé aru Saulo ne bueni buino Jūmenijicui yávaiyede

13 ¹Antioquía āmicuriīmaroacavu Jesúre ju aivu jēneboi curejaimada apevu Jūmenijicui yávaiyede coyuvu aru pōevare bueivu máre. Na marejámada Bernabé; aru Simón, āmidoimū mácu ñemicu; aru Lucio, Cirene āmicuriīmaroacacu; aru Manaén, Herodei bucūovaimū mácu juedocu cāreja; aru Saulo máre. (Ñai Herodes Galileacavu ne jabocu barejaquémavu.) ²Cūinájāravu ina bueipōeva mearore jivu barejámada Jūmenijicure. Aru āmenezaimada āiyede, ne me jēniarajyepé aivu ũre. Ne nópe ðaiyedeca, ñai Espiritu Santo arejameđa náre:

—Javede beocacu yu Bernabéde aru Saulore máre, ne memecarājyepé ayu yure. Que baru caride jarojarā náre yure memecarājivure, arejameđa ñai Espiritu Santo.

³Que teni cojedeca jēniarejaimada Jūmenijicure āmevua āiyede. Bernabéde aru Saulore máre ne jipoburā tuorīburu yóboi ne pūruáque, jáðovarajivu ne memeino buiyede, jarorejaimada náre.

Jesús ũi yávaiye méne beorí coyucōjeimara ne bueino Chiprecavure

⁴Ñai Espiritu Santo nuicōjenezameđa ina pucarāre Seleucia āmicuriīmaroi. Noi jadocūi uracūi jaturí nurejaimada pu Chipre āmicuriijavuita. ⁵Earejaimada Salamina āmicuriīmaroi. Judíovai cójijiñamiai nuri, ecorí coyurejaimada Jūmenijicui yávaiye méne. Aru Juan Marcos náre yóvayu barejámada, cadatecuyu náre. ⁶Caino no jivavure vainí, nuri earejaimada na Pafos āmicuriīmaroi. Noi copurejaimada cūinācu judíore, ũi āmiá Barjesús.

Ñai Barjesús “Jūmenijicui yávaiyede coyucaipōecubu yu”, are cuyu

barejámeđa. Ûbenita borocucu barejámeđa. Quénora yaviéde ðayu barejámeđa ù. ⁷Ûi yóvaimu marejámeđa no jiauvucavui jabocu, ùi ámiá Sergio Paulo. Ñai jabocu me majicu barejámeđa ù. Jápiaiurejameđa Jümenijicui yávaiye méne. Que baru cuturejameđa Bernabéde aru Saulore máre ùi yebai, ne coyurájijeyepe ayu diede úre. ⁸Ûbenita ñai yavié ðaipöecu, ùi ámiá griego ámicuricamua yávaicamuaque Elimas, maucüvarejameđa náre. Ûbenidurejameđa ñai jabocure ùi ju aiyede Jümenijicui yávaiye méne. ⁹Dinũmure Saulo me járejameđa ñai yavié ðaipöecure. Saulovacari barejámeđa Pablo ùi ámiá. Ñai Espíritu Santo ðaicöjenejameđa Pablöre. Que baru ñai yavié ðaipöecure me jári arejameđa úre:

¹⁰—iMu, abujuvai jabocupe ðare cuivu mu! Cainũmua maucüvacütamu mu ina mearo ðaivure. No mearore ubevu mu. Cainũmua ámecubu mu. Borocücutamu mu. Jujoivaivu apevure. Cainũmua meyuyarí ávaivu mu, “Jäve ámevu Jümenijicui yávaiye”. Yöpe ávaivu mu pöevare, ne ju abenajijeyepe ayu Jümenijicui yávaiyede. ¹¹Jájacu. Caride Jümenijicui ñájine ðaquiijibi mure mi ámeina teiye boje. Jári eabequijivu mu. Apejávavua aviá ùi miadáene jámequijivu mu, arejameđa Pablo.

Cüiná járe eabedejameđa Elimas. Que baru curidurí voyu barejámeđa apecure, úre nuvacuyu ùi puruque. ¹²Aru ñai jabocu iyede jáñu, ju arejameđa Jesús ùi yávaiye méne. Que baru pare cuicumarejameđa iye ne bueiyeđe Jesurá.

Pablo aru Bernabé ne bueino Antioquía Pisidiacaröcavure

(Mt 3.11, 17, 10.14, 17.15, 27.22-23, 57-61; Mr 1.4, 7, 6.11, 9.7, 15.13-14, 42-47; Lc 3.3, 16, 22, 9.5, 35, 10.11, 23.21-23, 50-56; Jn 1.20, 27, 19.15, 38-42; Hch 1.3, 2.27; He 1.5, 5.5)

¹³No yóboi, Pablojá jiaðocü uracüi jaturí Pafos ámicuríimareore jocarí

nurejaimađa Perge ámicuríimaroí jia urađa apedüvei, Panfilia ámicurijoboröi. Dinũmu Juan Marcos ðajocarejameđa náre, copainucuyu Jerusalén ámicuríimaroí. ¹⁴Ûbenita Pablojá nurejaimađa Perge ámicuríimareore jocarí. Earejaimađa Antioquía ámicuríimaroí, Pisidia ámicurijoboröi. Noi judíovai jabuóvaujávavũ sábadoi, judíovai cójijiñami nuri, ecorí, dobarejaimađa na, Pablojá. ¹⁵Apecu jári borotedejameđa Jümenijicui ðaicöjeiyede ùi coyuiye báquede Moisés bácuře aru cüinácu Jümenijicui yávaiyede coyücaipöevacacu bácu ùi toivaiye báquede máre. Ûi jári boroteniburu yóboi, ina cójijiñamine coreipöeva ðarejaimađa apecure Pablojá yebai, ùi jëniari jáquiyeye aivu náre:

—Muja, jívu, çyávaiyuráru muja ina pöeva yore curivure, caðatenajivu náre? Yávaiyurivu baru, coyujará caride, arejameđa ne ðaroimũ mácu Pablojáre.

¹⁶Que baru Pablo nacajari, ùi puruque jáðovari ne bi arájijeyepe ayu, coyurí búrejameđa náre.

—Muja, jívu, Israecavu, aru judíova ámevu mearore jívu Jümenijicure máre, jápiajará ji coyuiyede. ¹⁷Ñai Jümenijicui, Israecavu maje mearore jívu, beorejaquemavu majeñecuva mácavure, judíovare. Obedicüpuruvarejaquemavu na mácavure ne cue báquede apevure apejaboröi, Egipto ámicurijoboröi. Ûi urarö puruque nuvarejaquemavu na mácavure Egipto ámicurijoboröe jocarí. ¹⁸Napinejaquemavu na mácavure cuarenta paiñjua baju ne cuede cáreja pöecubenoí. ¹⁹Bíjaroyu bácu siete paiyajuboare, Canaán ámicurijoboröcavure, jídejaquemavu no joboröre ùi pöeva mácavure. ²⁰Que teni Jümenijicui jabotede ðarejaquemavu obedivu jabova ùi pöeva mácavure cuatrocientos cincuenta paiñjua reca pu ñai ùi yávaiyede coyücaipöecu Samuel bácu ùi jaboteiyeta.

²¹'Aru Israecavu bácvu ne jëniayede Samuel bácuře, “Epejacu jabocure

ñujare” ne aiyede, Jūmenijicu jabotede ðarejaquemavu Saúl bǎcure, Cis bǎcui mǎcure, Benjamín mǎcui yajubocacure, ũi jabotequiyepere ayu na mǎcavure. Aru Saúl bǎcu jabotedejaquemavu na mǎcavure cuarenta paiujua baju. ²²Dinm̄m̄mia Jūmenijicu jaboteicōjemenejaquemavu Saúl bǎcure. Quénora jabotede ðarejaquemavu David bǎcure. Yópe arejaquemavu Jūmenijicu: “Davique, Isaí mǎcūque, torojuvu yu. Ji ðaicōjeiyepedeca ðacuyume ũ”, arejaquemavu Jūmenijicu.

²³Aru cūinǎcu David bǎcui pǎramenacacure, Jesúre, daroquemavu Jūmenijicu, ũi meadaquiyepere ayu Israecavure. Que teni Jūmenijicu ðaquemavu yópe ũi jipocamia aye báquepedeca. ²⁴Ūbenita Jesús ũi ðaquiyepere jipocai, Juan Bautista bǎcu coyúameða caivu Israecavure. “Chīori dǎpiajarǎ muja muje āmeina teiyede. Oatuvajarǎ muje ðaiyede, Jūmenijicu ũi ārumetequiyepere aivu diede. Aru jáðovajara muja Jūmenijicure ocoque”, ámeda Juan Bautista bǎcu. ²⁵Ūi memeinore buojare nuñu, Juan Bautista bǎcu ámeda pōevare: “Muja dǎpiaivubu yure muje coreimure, ūbenita yu āmevu ñai muje coreimu. Dacuyume ji yóboi cūinǎcu, ji pueno parucu. Ūrecabe meacu baju caivu pueno. Que baru ũre caðateni buojabevu yu. Buojabevu yu oarí nacachini duayu ũi curaidoa buoimeare”, ámeda Juan Bautista bǎcu.

²⁶Muja, jívu, Abraham mǎcui pǎramena, aru judíova āmevu mearore jívu Jūmenijicure máre, majareca Jūmenijicu daroibi ũi yávaiye méne, maje meatenajiyepere ayu. ²⁷Ūbenita ina Jerusalén āmicurímarocavu aru ne jabova máre coreóvabetequemavu ñai Jesúre náre meðaipōescure. Ne boaicōjeiyede ũre ðaquemavu yópe ina Jūmenijicu yávaiyede coyucaipōeva mǎcavu ne toivaiye báquepe, diede jári boroteivuvacari ne jabuóvaíjaravuai sábadoda coapa. Ūbenita ne boarí jaruvaicōjeiyede Jesúre, vaiqué mavu caiye yópe ina Jūmenijicu yávaiyede

coyucaipōeva mǎcavu ne toivaiye báquepedeca. ²⁸Jesús ũi āmeina teiye cubedeca, quénora Pilatore boarí jaruvaicōjeimada ũre. ²⁹Aru ũre ðaríburu yóboi yópe ina Jūmenijicu yávaiyede coyucaipōeva mǎcavu ne toivaiye báquepedeca ũi borore, apevu ũ mǎcure jocucujaravede jōðavari, ñni, cūracobei jaruvaimada na. ³⁰Ūbenita Jūmenijicu nacovaquemavu ũre yainore jaruvari. ³¹Obedijāravuare ina ũi yóvaimara mǎcavu jáimada ũre. Na mateima yóvavu bǎcavu ũre jipocamia ũi nuiyede Galilea āmicurijoborōre jocarí pu Jerusalén āmicurímaroita. Aru caride ina jáivu bǎcavu coyuvubu Israecavure ne majiéde Jesúre.

³²⁻³³Aru ñujacapuravu coyurádivubu mujare iye Jūmenijicu yávaiye méne. Jūmenijicu “Mearo ðacacuyumu yu mujepǎramena mǎrajivure”, arejaquemavu judíovai ñecuva mǎcavure. Aru Jūmenijicu nacovañu mǎcu Jesúre yainore jaruvari, ðacaquemavu majare, judíova bǎcavu pǎramenare aru judíova āmevure máre, yópe ũi aye báquepedeca. Yópe toivarejaquemavu apeno toivaino mácarō Salmo āmicurōi Jūmenijicu coyuiye báquede Jesúrǎ: “Jímacurecabu m̄. Caride caivu ne jápaiyede yávacari jaboteicōjeivu mure”, arejaquemavu Jūmenijicu Jesúre. ³⁴Apeno toivaino mácarōi Jūmenijicu arí coyurejaquemavu ũi nacovaquiyede Jesúre yainore jaruvari, ũi bajure pojebequiyepere ayu. “Jāve mearo ðacacuyumu yu mujareca yópe ji aye báquepedeca David bǎcure”, arejaquemavu Jūmenijicu. ³⁵Aru apeno toivaino mácarō máre, Salmo āmicurōi, añu toivaipōecu bǎcu arejaquemavu Jūmenijicure: “Pojeicōjemecubu mu ji bajure, ji meacu baju boje, aru ji memecaiye boje mure”, arejaquemavu. ³⁶David bǎcucapuravu ðarejaquemavu Jūmenijicu ũrope ũi cue báquede íjaravui. Que ðarí buojari, yaidéjaquemavu. Aru jaruvarejaquemavu ũi baju bácarōre ũi

ñecuva mácavu yebai cūracobei, aru ñi baju bácarō pojedejaquemavu. ³⁷Ūbenita Jesúvacari, Jūmenijicui nacovaimu mácu yainore jaruvarī, pojebetequemavu ñi.

³⁸⁻³⁹’Muja, jívū, jāve majjarā muja ñuje coyuiyede mujare Jūmenijicui yávaiye méne, ñi arumetequiyepa aivu āmeina teiyede, Jesús ñi yayiye báque boje majare boje. Majjarā. “Mi āmeina teiye cubevū”, acuyume Jūmenijicu caivu ina ju aivure Jesúre. Ūbenita pōeva ne ñaiyuru Jūmenijicui ñaicōjeiyede ñi coyuiye báquede Moisés bácare, “Mi āmeina teiye cubevū”, abecuyume náre. ⁴⁰Que baru me ñajarā muja, vaibéquiyepa aivu mujare yópe Jūmenijicui toivaicōjeiye báquepe ñi yávaiyede coyucaipōeva mácavure:

⁴¹ Jájara muja, ju abeni yurivu ji yávaiyede. Yure jārī cōenínajaramu muja. Ji ñaquiye de jidujarā muja. Yainí bjarājaramu muja. Muje curijāravure pōeva ne ñarī majibede ñacuyumu yu. Ūbenita ju abejebu muja, apesu ñi coyuru mujare ji ñaiyede. Apesu ñi coyuiyedeca aipe aiyurōre ji ñaiyede, ju abejebu muja cāreja, arejaquemavu Jūmenijicu mujare, arejameña Pablo náre.

⁴² Arī buojarī, Pabljā ne etaiyede judfovai cōjjiñamine jocarī, judfova ānevucavu jēniarejaimađa náre ne copaidarājiyede apesumana judfovai jabuóvaujāravui, ne coyurājiyepa aivu pñeno baju iye yávaiye méne. ⁴³Obedivu pōeva, judfova aru judfova ānevū mearore jívū Jūmenijicure, ne etaiyede cōjjiñamine jocarī cujurejaimađa Pablōre aru Bernabéde máre ne ñuiyede. Que teni ina Jesús ñi yávaiye méne beorī coyucōjeimara coyuvu barejáimađa ina pōevare parurōreca, ne ñajocabenajiyepa aivu ne coreinore Jūmenijicui mearo bojecubeno ñi ñacaquiyede náre.

⁴⁴ Aru apesumana judfovai jabuóvaujāravu sábadoi, obedivu pōeva ñiimarocavu cōjjiñajaimađa, jápiarājivu Jūmenijicui yávaiye méne. ⁴⁵Ūbenita

apevu judfovacapūravu, ne jāiyede caivu ina obedivu pōevare cōjjiñavure, pare jorojñejaimađa na. Que baru copu arejaimađa Pablo ñi coyuiyede. Aru āmecomorejaimađa ūre. ⁴⁶Ūbenita Pablo aru Bernabécapūravu jidubevuva pñeno baju parurōque arejaimađa:

—Mamarumure javu ñujare ñuje coyuiye Jūmenijicui yávaiye méne muja, judfovere. Ūbenita muja járiaiyubevu diede. Que baru muje cuvaiyube boje jāravu cūiméjāravu baquinóre ñajocavuvu mujare. Caride coyurāñiuvu iye yávaiye méne ina judfova ānevure. ⁴⁷Que teni ñarājivuvu ñija yópe Jūmenijicui coyuiye báquepe, arejaimađa.

Yu jaroivu mure yópe pēoinope caivu ina pōeva judfova ānevure, ne ju arājiyepa ayu ji yávaiye méne, meadacuyu náre, arejaquemavu Jūmenijicu.

⁴⁸Ina judfova ānevū járiaiyuvu iyede, torojurivu “Jūmenijicui yávaiye me bajutamu”, arejaimađa. Nácavu, Jūmenijicui beoimara mácavu cuvurājivu jāravu cūiméjāravu baquinóre, ju arejaimađa na Jesúre. ⁴⁹Aru caino dijborōre apavu pōeva obedivu Jūmenijicui yávaiye méne jápiarī, ju arejaimađa diede. Que teni pñeno baju obedivu ju aivu ñurejaimađa. ⁵⁰Ūbenita nócavu judfova maucuvare ñarejaimađa ñiimarocavu, ñmava parurivure aru nomiva judfova ānevū pōeva ne pueðainomivare máre, ne ñājine ñarājiyepa aivu Pablōre aru Bernabéde máre. Que baru ñaetovarejaimađa náre dijborōre jocarī.

⁵¹ Dinumure Pabljā pupedejaimađa jobore náre jēiyede ne cuboba cāchinoi ne jāiyede, ina pōeva ne járiaiyube boje Jūmenijicui yávaiye méne. Que teni náre ñajocarī ñurejaimađa na Iconio āmicurīmaroi. ⁵²Ina Antioquía āmicurīmarocavu Jesúre ju aipōeva torojurejaimađa. Aru ñai Espiritu Santo ñaicōjñejameña náre coapa.

Pablo aru Bernabé ne bueno Iconiocavure

14 ¹Iconio āmicurīmaroi Pablo Bernabémaque ecorejaimađa judfovai cōjjiñami, buenajivu nócavure.

Aru buedejaimada majiéque. Que baru obedivu pöeva ju arejaimada Jesúre, apevu judíoiva aru apevu judíoiva ámevu máre. ²Ûbenita nócavu judíoiva Jesúre ju abevu maucüvare ðarejaimada nócavu judíoiva ámevure, ne ámeina dápiarájiyepe aivu Pabljäre. ³Que baru Pabljä mautedejaimada noi obedijäravua. Náre Jesús üi cadateiye boje, jidübevüva coyüivu barejáimada parúéque. Aru Jümenijicu parure ðarejaquemavu náre, ne ðarájiyepe ayü pöeva ne jámene aru ne ðarí majibede máre. Que baru Jümenijicu jáðovarejaquemavu jáve ne coyüiyede jíyede mearo bojecübenore Jesúre ju aipöevare. ⁴Ûbenita cüináturu ne üme dápiabedejaimada na, diímarocavu. Apevu ju arejaimada ina judíoiva ne coyüiyede aru apevu ju arejaimada Jesús üi yávaiye méne beorí coyüicöjeimara ne coyüiyede. ⁵Dinumure ina judíoiva aru apevu judíoiva ámevu máre coyürejaimada jabovaque, yópe arí: “Nájine ðarájarevu Pabljäre”, arejaimada ne bajumia. Que arí, cüraboaque ðavari boaiyürídurejaimada náre. ⁶Pabljä coreóvaivu ne maucüvari dápiayede náre, dupini nurejaimada apejborói. Cürejaimada Licaonia ámicurijoborócaímaroai, Listra aru Derbe ámicuríímaroai, aru no joabenoquei máre. ⁷Coyüivu barejáimada Jesús üi yávaiye méne nócvare.

**Listracavu ne boaino Pablore
cüraboaque**
(Hch 4.24)

⁸Listra ámicuríímaroi dobarejameða cüinácu ümu cuiye majibecu. Üi cuboba jiacubedejavüya. Pöetedejameða ñai ümu cuiye majibecu. Aru cainumua cubedejameða ü. ⁹Û jápiayü barejámeða Pabloi coyüiyede. Pablo me cocoyü úre, coreóvarejameða ñai ümu ju ayure Jesús parücure, úre meadacuyure. ¹⁰Que baru Pablo me jáñu úre, arejameða parürörecá:

—Nacajajacu mi cübobaque nurié, arejameða Pablo.

Maumejiena biararí, nuri, vaivarí búrejameða ü, cuiye majibecu bácu. ¹¹Ina obedivu pöeva jáivu Pabloi ðaiye báquede, codoboborí búrejaimada ne yávaicamuaque, Licaonia ámicurijoborócaivu ne yávaicamuaque. Yópe arí, codoboivu barejáimada na: —iJümenijina ümuvape árojarivu teni émeni ðarí edaðama maje yebai! arejaimada na.

¹²Que baru arejaimada Bernabéde, “Érecabe ñai jümenijicu üi ámiá Zeus”. Aru arejaimada Pablore, “Érecabe ñai jümenijicu üi ámiá Hermes”. Que arejaimada na Pablo üi yávaie boje Bernabé püeno. ¹³Cüinádami cürami pöeva ne torojuede jíñami ñai Zeure curejavüya diímaro turuvai. Aru Zeui sacerdote davarejameða otevecüvare aru cóvure máre diñami jedevacobe yebai. Ü diímarocavuque ina otevecüvare boarí juaiyürídurejaimada na, mearore jínajivu Bernabéde aru Pablore máre. ¹⁴Ûbenita Bernabé aru Pablocapüravu jápiaivu pöeva ne ðaiyuede, ne baju doicajearé tatorí jadevarejaimada, pöeva ne majinajiyeye aivu diede ubevure. Aru pöeva jéneboi cüyarí nuri, codoboborejaimada na:

¹⁵—iYópe ðabejará müja! iJümenijina ámevu ñüja! Ñüja máre müjape paivu pöevatamu. Coyürádaivübu Jümenijicui yávaie méne müjare, müje ðajocarájiyepe aivu müje mearore jíyede jümenijina ámevure aru müje majinajiyeye aivu ñai Jümenijicu arücu cüinácuva. Ñai Jümenijicu cuedarejaquemavu cavaröre, joboröre, jia uraðare máre, aru caivu nócvare, noi cuede máre. ¹⁶Jipocai judíoiva ámevu ðaivu bácvareca ne baju uró coapa, Jümenijicu ðaicöjeñü ámenejaquemavu náre. ¹⁷Ûbenita cainumua Jümenijicu jáðovaimi müjare aipe árojacu üi baju üi ðacaiyede mearore müjare. Que teni Jümenijicu ocare ðacaibi cavaröre jocarí müjare. Aru bucure ðacaibi müje oteiye, müje

cuvaräjipepe ayu äiyede. Yapide ðacaibi mujare äiyeque. Aru torojure ðacaibi mujare ũmene, Pablo Bernabémaque arejaimada.

¹⁸Yópe arejaimada, náre ne torojuede oteivecuvare juarí jýue boje. Ŭbenita maiyójarejavüya náre ne dajocaiyede.

¹⁹Dinũmure apevu judíova, Pisidia ämicurijoborõcaĩmaroa Antioquía aru Iconio ämicurĩmaroacavu earejaimada diĩmaroi. Obedivu diĩmarocavure maucuvare ðarejaimada na Pabljäre. Que teni Pablöre İni, cüraboaque ðuvarí ũre, “¿Yaiyú bárica?” arí jabuborí jaruvarejaimada ũi baju bácarõre diĩmarore jocarí. ²⁰Ŭbenita no yóboi Jesúre ju aipõeva cójijini nũivu ũi yebai, Pablo nacajari, copainurejameda diĩmaroi. Cõmiáijaravure Bernabémaque nurejaimada Derbe ämicurĩmaroi.

²¹Pabljä coyurejaimada Jesús ũi yávaiye méne diĩmaroi. Aru obedivu põeva ju arejaimada diede. No yóboi, copainurejaimada Lистра, Iconio, aru Antioquía ämicurĩmaroai, Pisidia ämicurijoborõcarõai. ²²Diĩmaroa coapa caðatedejaimada Jesúre ju aipõevare, ne ju aräjipepe aivu pueno baju parurõ aru ne dajocabenajipepe aivu ne Jesúre ju aiye de máre. Arejaimada diĩmaroacavure:

—Caivu maja ju aivu Jesúre ñájinajivubu pare ijäravui, maje ecoräjipepe jipocai Jũmenijicui jaboteinore, arí buedejaimada na.

²³Diĩmaroa coapa apevu ũmũva Jesúre ju aivucavure beorejaimada Pablo aru Bernabé máre, ne corenajipepe aivu apevu Jesúre ju aipõevare, náque cójijivaivure. Que teni jẽniarejaimada Jũmenijicure ämevũva äiyede, ũi corequiyepe aivu ina ũre ju aipõevare, aru ũi caðatequiyepe aivu náre. Que ðarejaimada Pabljä diĩmaroa coapa.

Pablo aru Bernabé ne copaino Antioquía Sircarõi

²⁴Dinũmu Pisidia ämicurijoborõre vainí, earejaimada Pabljä Panfilia ämicurijoborõi. ²⁵Noi Perge

ämicurĩmaroi coyurejaimada Jesús ũi yávaiye méne. Coyurí buojarí, ěmenejaimada Atalia ämicurĩmaroi. ²⁶Noi jiadocũ uracũ jaturí, earãnurejaimada Antioquía ämicurĩmaroi cojedeca, mamarũmu ne etaino mácarõi. Ne etaräjijäravu jipocamia, Jesúre ju aipõeva diĩmarocavu jẽniarejaimada Jũmenijicure, ũi corequiyepe aivu ina ũre memecaivure aru ũi caðatequiyepe aivu náre.

Que arejaimada, jẽniaivu Jũmenijicure ũi ðacaquiyepe aivu mearore Pabljäre. Aru ne copaiyede noi cojedeca jave buojarejaimada ne memeinore, Jũmenijicui coreni caðateye báque boje náre. ²⁷Que baru Pabljä eaivu Antioquía ämicurĩmaroi, cójijide ðarejaimada caivu Jesúre ju aipõevare, coyuräjivu náre caiye iye Jũmenijicui caðateye báquede náre aru ũi meadaicõjeiye báquede ina judíova ämevure, ju aräjivure Jesúre. ²⁸Aru Pabljä mautedejaimada Jesúre ju aipõeva que noi obedijäravua.

Jesúre ju aipõeva jabova Jerusaléi ne cójijino
(Hch 2.4, 10.1-44)

15 ¹Dinũmure apevu ũmũva ěmenejaimada Judea ämicurijoborõre jocarí Antioquía ämicurĩmaroi. Yópe arí, bueni búrejaimada ina Jesúre ju aipõevare: —Mũja urivu baru Jũmenijicui meadaquiyepe aivu mujare, buraicõjeiye javvu mujere cajede yópe Jũmenijicui ðaicõjeiyepe ũi coyũiye báquede Moisés bácare, arí buedejaimada.

²Pablo aru Bernabé máre ju abedejaimada iye ne bueiye de. Que baru coyuridurejaimada náre jãve ämene. Ŭbenita ina Judeacavu jaraivu jápiaiyubedejaimada Pabljäre. Que baru Jesúre ju aipõeva beorejaimada Pablöre aru Bernabéde, aru apevu Jesúre ju aivure máre, ne muri nurajipepe aivu Jerusalén ämicurĩmaroi, jẽniari jãrajivu diede Jesús ũi yávaiye

méne beorí coyucōjeimarare aru ju aivure coreipōevare máre. ³Que baru ina Jesúre ju aivu jarorejaimada náre. Vainí nuri Fenicia aru Samaria āmicurijoborōare, coyure cuivū barejáimada nōcavure īmaroa coapa apevu judíova āmevu ne ju aiyede Jesúre. Iye borore jápiaivū bācavū nōcavū Jesúre ju aipōeva urarō torojurejaimada na.

⁴Pablojā ne eaiyede Jerusalén āmicurīmaroi, ina Jesúre ju aipōeva aru náre coreipōeva, aru Jesús ūi yāvaiye méne beorí coyucōjeimara máre jacoyurejaimada náre. Dinūmū Pablojā coyurejaimada náre caiye Jūmenijicui đaiye báquede ne bueiye báquede ūi yāvaiye méne. ⁵Dinūmūre apevu Jesúre ju aivu, fariseo āmicurijabocavū, nacajari arejaimada Pablojāre:

—Ina judíova āmevu ūmūvare ne cajeāre buraicōjeiye jaūvu aru đaiye jaūvu náre caiye yópe Jūmenijicui đaicōjeiyepe ūi coyuiye báquede Moisés bācure, arejaimada ina fariseova.

⁶Ne que arīburu yóboi, ina Jesús ūi yāvaiye méne beorí coyucōjeimara aru ina Jesúre ju aivure coreipōeva máre cójijidejaimada, majinajivu diede. ⁷Ne urarō coyurīburu yóboi, Pedro nacajari arejameđa náre:

—Mūja, jívu, majivu mūja javede Jūmenijicu beoyū bācure yure mūje jēneboi, ji coyūquiyepe ayū ūi yāvaiye méne, judíova āmevure, ne jápiarī ju arājīyepe ayū. ⁸Aru Jūmenijicu, űai majicu caivū ne đápiayede, jáđovaquemavu náre ūi copū etaimara māvavure ūi daroiyede náre űai Espírītu Santore nopedeca majare ūi daroiye báquepe ūre. ⁹Que baru Jūmenijicu copū etaibi caivure cūináturu. Jáimi náre, judíova āmevure, nópe ūi jáiypedeca majare, judíovare. Que baru Jūmenijicu ārūmeteibi ne āmeina teiyede ne ju aiyede Jesúre. ¹⁰¿Aipe teni ūbevurū mūja Jūmenijicui đaiye báquede? Mūja đaicōjeiyurivubu Jūmenijicui jave đaicōjeme máquede. Mūja đaicōjeiyurivubu Jesúre ju

aipōeva judíova āmevure pūeno baju. Majeñecuva māvavu nópe đarī buojabedejaquemavu caiye iyede. Aru maja máre đarī buojabevu maja caiye iyede. ¹¹Nópe đabejarā. Maja coreóvaivū Jūmenijicu meadayure majare, Jesús ūi mearo đacaiye báque boje majare. Aru cūináturu Jūmenijicu meadayube judíova āmevure máre, arejameđa Pedro.

¹²Caivū ina cójijivu bi arejaimada na. Dinūmū Bernabé aru Pablo máre coyurejaimada aipe pōeva ne jámene aru ne đarī majibede máre Jūmenijicui đare đaiye báquede náre judíova āmevu jēneboi. Aru caivū ina cójijivu me jápiarejaimada ne coyuiyede.

¹³Coyurīburu yóboi, Santiago, Jesús yócu, yópe arī, yávarejameđa:

—Mūja, jívu, jápiarjā ji coyūquiyepe.

¹⁴Simón Pedro coyui bi mūjare aipe đarī Jūmenijicu mearo đacarī būino mācarōre judíova āmevure, aru aipe đarī beoino mācarōre apevu nācavure ū jina mārājivure. ¹⁵Aru cūináturu iye Pedro ūi coyuiyepe toivarejaquemavu ina Jūmenijicui yāvaiyede coyūcaipōeva māvavu. Yópe Jūmenijicu toivaicōjenejaquemavu cūinācu ūi yāvaiyede coyūcaipōecu bācure ūi yāvaiyede:

¹⁶Ūi Jūmenijicutamu. No yóboi, copaidacūyūtu yū. Pōevare yure mearore jíde đacūyūtu yū, yópe ne mearore jíye báquepe yure David bācui jaboteinūmū mācarōre. David bācui pāramena māvavu ne jaboteino cūinotamu, nopedeca cūināđami cūrami tuiñamipe. Ūbenita parure đacūyūtu yū cojedeca cūinācure nepāramenacacu bacūyūre, ūi jabotequiyepe ayū bedíova yópe pōeva mamāđami cūramine ne đaiyepe tuiñami mācarōquede. ¹⁷Yópe đacūyūtu yū judíova āmevure, ne vorājīyepe ayū yure, ne jabocure. ¹⁸Que teni caivu ji beoimara māvavu jína mārājivūtamū, arejaquemavu Jūmenijicu.

¹⁹Que baru yu dápiaivü yópe. Cãrijojamenajarevü maja ina judíova ãmevü ju aivüre Jümenijicüre.

²⁰Quénora toivarãjarevü paperayocare, ãaicõjenajivü náre ne ãmenajiyepe aivü caiye ãiyede pẽpeimarare jíye báquede, ne ãbenajiyepe aivü ãmeina ãaiyede némarebucüva ãmevüque, ne ãmenajiyepe aivü ãmajiarua jive cuede, aru ne ãmenajiyepe aivü jivede máre. ²¹Yópe ãaiye javüvü majare. Joe baju cainoa ímaroai caisumana coapa jabüvõvãjaravuai, judíovai cójjiñãmiamia nuri, põeva jári borotedama Jümenijicui ãaicõjeiyede ñi coyüiye báquede Moisés bácvre aru buedama diede. Que baru ina jápiaivü bácvü jave majima na diede, arejamedã Santiago.

**Paperayocare ne toivaino
judíova ãmevüre**

²²Caivü ina Jesús ñi yávaiye méne beorí coyüicõjeimara, ina Jesúsre ju aivüre coreipõeva, aru caivü ina Jesúsre ju aipõeva máre ju arejaimada Santiago ñi coyüiyede. Que baru beorejaimada ne jẽneboi apevü ñmüvare, jarorãjivü náre Pablo aru Bernabéque Antioquíã ãmicuríimaroí, ne nüvarajiyepe aivü diyoca paperayocare. Que baru beorejaimada pucarã nácvü jabovare. Cüinácü ñi ãmiã Judas, évacari Barsabás ãmicurejamedã. Aru apecü Silas ãmicurejamedã. ²³Ne jaroiyocaque yópe arejaimada:

“Ñuja, Jesús ñi yávaiye méne beorí coyüicõjeimara aru Jesúsre ju aivüre coreipõeva máre meaicõjeivübu mujare, ñujevüre, judíova ãmevü Jesúsre ju aipõeva Antioquíãcvüre, Siriacvüre, aru Ciliciacvüre. ²⁴Jápiaivübu ñuja apevü ñuje cójjiñocavüre nuivüre mujë yebai, ne buenajiyepe aivü mujare mujë cajeãre buraicõjeiye javrõre yópe Jümenijicui ãaicõjeiyepe ñi coyüiye báquede Moisés bácvre. Ñbenita ñuja jarobetecarã náre. Que baru chíovübu ñuja ne cãrijojaviyede mujare ne bueiyequé. ²⁵Que baru cójjiñvübu ñuja cüináturu ñuje ñme,

beorãjivü apevü ññjacavüre, ne járanurajiyepe aivü mujare. Daðama ina ñuje jaroimara Bernabé aru Pabloque máre, maje umaraque. ²⁶⁻²⁷Põeva ne boaiyüríduimara ne Jesúsre memecaiye boje, aru ñuje jaroimara, ne ãmiã Judas aru Silas máre, coyurãjarama mujare nópe ñuje toivaiyepedeca diyocare. ²⁸Jümenijicui Espíritu Santo ñujare toivaicõjeimi mujare. Aru me ju aivübu ñuja iye ñi cójeiyede, ãaicõjemenajivü urarõ maiyõjarõ ãaicõjeinore. Quénora yópe ãaicõjeivübu mujare: ²⁹Caiye ãiyede pẽpeimara mácvü ne jino mácarõre ãmejara. Aru jivede ãmejara. ãmajiarua jive cuede máre ãmejara. Aru ãbejarã ãmeina ãaiyede apevüque mujemarebucüva ãmevüque. Nópe ãaivü baru, mearo ãarãjaramu mija. Quénoramü”, arí toivarejaimada na.

³⁰Ina ne jaroimara mácvü ãmenejaimada Antioquíã ãmicuríimaroí. Na eavü noi, cójjiñvarejaimada caivü ina Jesúsre ju aipõevare. Aru jídejaimada náre diyoca paperayocare. ³¹Ne jári boroteiyede diyocare, iye toivaiye báque pare cadatedejavüya náre. Que baru torojurejaimada na. ³²Judas aru Silas máre Jümenijicui yávaiyede coyüipõeva marejáimada na. Que baru ina pucarã pare buedejaimada nócvüre, náre cadatenajivü, aru pueno baju parüre ãarãjivü náre ne ñmei. ³³Obedijãravüã mautedejaimada ina pucarã nore. Aru bueniburu yõboi, nócvü Jesúsre ju aivü jacopaiyovarí jarorejaimada ina coyüipõevare ne daino mácarõí. “Me ñujara mija cãrijimevüva”, arejaimada náre. ³⁴Ñbenita Silas mautedejamedã noi, Antioquíã ãmicuríimaroí. ³⁵Pablo Bernabémaque máre mautedejaimada obedijãravüã nore. Bueivü barejáimada aru Jesús ñi yávaiye méne coyüivü barejáimada na apevü obedivüque.

**Pablo ñi jácvüno cojedeca,
coyucüvü Jümenijicui yávaiyede
(Hch 13.13)**

³⁶Obedijãravüã yõboi, Pablo arejamedã Bernabéde:

—Járica, járanurevu cojedeca maje bueimare imaroa coapa, maje bueino mácarō Jesús ũi yávaiye méne, jámuri aipe ne cuede Jesúque, arejameđa Pablo.

³⁷Bernabé nvaivurejameđa Juan Marcore máre. ³⁸Ūbenita Pablocapūravu ju abedejameđa ũre. Jipocamia Juan Marcos dajocarejameđa náre Panfilia āmicurijoborōi. Que teni yóvabedejameđa náre pu ne memeinore buojaiyeta. ³⁹Que baru cūináturu ne ũme cubedejaimada na, Pablo Bernabémaque. Que baru coatedejaimada ne baju. Bernabé Juan Marcomaque nurejaimada jiađocū ũracūque Chipre āmicurijavui. ⁴⁰Ūbenita Pablo beorejameđa Silare, nucyvu ũque. Jesúre ju aipōeva “Jūmenijicu coreni cađatejacurī mūjare” ne arīburu yóboi, nurejaimada Pablo Silamaque. ⁴¹Aru vaidėjaimada Siria aru Cilicia āmicurijoborōare. Buede cuivu barejaimada Jesúre ju aipōevare, pueno baju parare đarājivu náre ne ũmei.

**Timoteo ũi yóvaino
Pablore, Silare máre**

16 ¹Pablojā earejaimada Derbe aru Litra āmicurīmaroai. Nore curejameđa cūinácū Jesúre ju aipōecu, ũi āmiá Timoteo. Jīpaco, judíovacaco, Jesúre ju aipōeco barejácoda ō. Ūbenita jīpacu judío āmenejameđa ũ. ²Litra aru Iconio āmicurīmaroacavu Jesúre ju aipōeva me járejaimada Timoteore. ³Pablo nvaivurejameđa ũre náque. Ūbenita nócavu judíova majidejaimada Timoteoi pacu judío āmezure. Que baru Pablo buraicōjenejameđa Timoteore ũi cajede, yópe judíovai đaicōjeipe. ⁴Pablojā ne vaiyede imaroa coapa buede nurejaimada Jesúre ju aipōevare. Coyurejaimada náre Jesús ũi yávaiye méne beorī coyicōjeimara aru Jerusalén āmicurīmarocavu Jesúre ju aivure coreipōeva ne đaicōjeiyede judíova āmevure, ne đarājipe aivu yópe ne cōjeipe. ⁵Ne nópe teiyede Jesúre ju aipōeva majidejaimada Jesús ũi yávaiyede pueno baju. Aru caijāravua

apevu ne ju aiyede pueno baju obedivu ju aivu nurejaimada na.

**Pablo ũi jáino decoboayure
Macedoniacacure**

⁶Ņai Espiritu Santo Pablojāre coyicōjemenejameđa Jesús ũi yávaiye méne Asia āmicurijoborōi. Que baru vaidėjaimada na Frigia aru Galacia āmicurijoborōare. ⁷Misia āmicurijoborō turavai ne eaiyede, nuiyuridurejaimada Bitinia āmicurijoborōi. Ūbenita űai Espiritu Santo nuicōjemenejameđa náre nore. ⁸Que teni Misia āmicurijoborōi vaini, ěmeni, earejaimada Troas āmicurīmaroi. ⁹Diñamimareca Pablo járejameđa decoboainope cūinácū ũmu Macedonia āmicurijoborōcacure, núcure, jēniañre ũre, “Dajacu Macedoniai, cađatejacu űujare”, ayure Pablore. ¹⁰(Lucas copurejaquemavu Pablojāre Troas āmicurīmaroi.) Que teni coreóvarejacařā Jūmenijicu jarocuyure űujare, coyurājivu Macedonia āmicurijoborōcavure Jesús ũi yávaiye méne. Que baru no decoboinore járiburu yóboi, cūiná meadarejacařā űuja, nurajivu ne joborōi.

**Pablo Silamaque ne
bueino Filipocavure**

¹¹Etarejacařā jiađocū ũracūque Troas āmicurīmarore jocarī. Jatarejacařā nurié pu Samotracia āmicurijavuita. Cōmiájāravui jatarejacařā pu Neápolis āmicurīmaroi. ¹²Nore jocarī, mái nurejacařā pu Filipos āmicurīmaroi. Javede Roma āmicurō jaborōcavu barejaimada mamarumu đavu diīmarore. Aru pōeva nore curivu Roma āmicurīmarocavure paivu barejaimada na. Cūinárocarō joborōcarō Macedonia āmicurijoborōcarō aviá daino turavacarō marejávūya no imaro ũrarō. Obebejāravua curejacařā noi.

¹³Aru judíovai jabuóvaujāravu sábadoi, nurejacařā imarore jocarī tuipāvai. Judíova cōjijini cōmajidejaimada, jēniarajivu Jūmenijicuque noi. Que baru vorānurejacařā cūináro ne jēniainore.

Apevu nomiva cójživu barejáima tuipávai. Náque dobari, coyurejaca náre Jesús ñi yávaiye méne. ¹⁴Cüináco nácaco ñuje coyuiyede jápiado, òi ámiá Lidia, Tiatira ámicuriimarocaco barejácoða. Meacajea ñemijuaricajea cuitótecajeare bojedaipóeco barejácoða ò. Mearore jívarejacoda Jümenijicure. Que baru Jümenijicu jápiarí adare ðarejaquemavu óre. ¹⁵Que teni ò aru òi cüramicavu máre jádovarejaima Jümenijicure ocoque. Dinumu yópe arí, cuturejaco ñujare òi cürami:

—Muja dápiavu baru yure jáve ju adore Jesúsre, cáradajará ji cürami, arejaco ò.

Aru pare jecurejaco ñujare. Que baru mautedejacará ñuja òi cürami.

¹⁶Apejávavu ñuje nu iyede bediöva no jëniainoi, copurejaco ñujare cüináco yebacaco, abujucu ñi ímamo. Aru ò cãcoé namuódo marejaco ñai abujucu cue boje óre. Que teni òi jabova ívu barejáimada urarò táuturave, òi cãcoé namuóiyee boje pöevare aipe vaiquíyede náre. ¹⁷Ico yebacaco, yópe arí, coðoboborí are cuyo barejaco ñujara:

—Ina ñmuvarecabu memecaivu Jümenijicure, caivu püeno parucu bajure. Coyurádivu mujare aipe ðarí Jümenijicu meadacuyure mujare, ado barejaco ò.

¹⁸Obedijávava nopedeca are cuyo barejaco. Ubenita pare cárijovado marejaco Pablöre. Que baru copedini, arejame ñai abujucure:

—Jesúí paruéque cójeivu mure, etajacu óre jocarí, arejame.

Aru cüiná etarejaquemavu óre jocarí. ¹⁹Que teni òi jabova coreóvaivu ne táutura ímenajinora òi cãcoé namuóiyeeque, jënejaima Pablöre aru Silare máre. Náre jabuborejaima Roma ámicurò jaborócavui jabova yebai táibui. ²⁰Náre davaivu arejaima ina jabovare:

—Ina ñmüva judiövabu. Cárijovadama maje ímarocavure. ²¹Bueivubu ne ðarí cömajiyede. Ubenita maja, Romacavu, yópe ðarí buojabevu. Maje ðaicójeiye ðaicójemevu majare yópe ne bueiyepe, arejaima na.

²²Que arí, caivu pöeva táibui cüvüvü maucüvarí búrejaima Pabljäre. Aru ina Romacavui jabova jaðevaicójenejaima Pabljäre ne doicajeare. Aru jara popeicójenejaima náre jaradoque.

²³Urarò jara popeniburu yóboi, ina Romacavui jabova nüvaicójenejaima náre ámeina teivure jëni jacoñiami. Parurõreca coreicójenejaima ñai diñamine coreipóecure náre, ne dupini nümenajiyee aivu. ²⁴Ne cójeiyede jápiavu, ñai coreipóecu epedejameda náre jëni jacoñiami jívu baji. Aru ne cubobare táinorejameda jocuveaque.

²⁵Ñami corica joabeno baji Pablo aru Silas máre jëniavü barejáimada Jümenijicure. Yürivü, mearore jívu barejáimada úre. Aru apevu buoimara náre jápiavü barejáimada. ²⁶Cüiná, joborò cújidejavüya pare. Aru diñami ámeina teivure jëni jacoñiami máre cújidejavüya pare. Que teni cüiná, caicobea diñami jedevacobea bajumareca vorejavüya. Aru caivu ina buoimara ne buoimea táumea cojodorí turejavüya náre. ²⁷Ñai coreipóecu coedarí, jedevacobea voaicobearé jári, “Buoimara etarãma”, arí dápiarejameda ñi baju. Que baru ñi boaicarovede duarí ñi, boacúyu barejameda ñi bajumia. (Buoimu ñi etaru, úre coreyure ñájine ðaicójenajaquemavu buoimu mácuí ñájinope.) ²⁸Ubenita Pablo coðoboborí bujiéque arejameda:

—Boabéjacu mi baju. Jájacu. Caivu ñuja cuvü yui, arejameda Pablo.

²⁹Ñai coreipóecu davaicójeñü pëoinore, nore ñi, cúyarí, Pabljá yebai ecorí, bidini, morí turejameda ne cuboba yebai. ³⁰Nacajari, nüvarejameda Pablöre aru Silare máre nore jocarí. Aru jëniari járejameda náre:

—Muja, ji jabova, ¿aípe ðaji yu ji meatequinore? arejameda ü.

³¹Pabljá arejaimada úre:

—Jesucristore ju ajacu mü, mü aru mívu máre meadaimara marajiyépe ayu, arejaimada.

³²Que arí, coyurejaimada Jesús ñi yávaiye méne úre, aru caivu ñi

cūramicavure máre. ³³Dioramia, ñamimareca, ñai coreipöecu joarejameða ne churiáre. Aru cūiná jáðovarejaimada úre aru caivu ñ jivüre máre Jūmenijicure ocoque. ³⁴Pablöre aru Silare máre ñvarejameða ñi cūrami. Jídeameða aiyede náre. Aru torojurejameða ñ jivüque, ñi ju aye boje Jesúre.

³⁵Cōmiájāravure javejīnara ina Romacavui jabova churaravare jaetovaicōjenejaimada Pabljāre. ³⁶Que teni ñai coreipöecu aridurejameða Pablöre:

—Ji jabova yure jaetovaicōjema mujare. Que baru etajarā. Me ñujara muja cārijimevüva, aridurejameða.

³⁷Ūbenita Pablocapūravu arejameða ina churaravare:

—Iye Roma āmicurō jaboteino ðaicōjeiye ñājine ðaicōjemevu Romacavure ne āmeina teiyede jáðovaiyeta. Ñujavacari Romacavutamu ñuja. Ūbenita ñuje āmeina teiyede jáðovari buojabema ina jabova. Aru jáðovamevüva diede, jara popeicōjema ñujare caivu pōeva ne jáiyede. Aru buoma ñujare. Que teniburuta, jaetovaiyüma na ñujare yavenina. ¡Que āmevu! Nāvacarari ðarī jaetovajarāri ñujare yore jocarī, arejameða Pablo.

³⁸Ina churarava ne coyuiyede diede Romacavui jabovare, jidurejaimada ina jabova, ne coreóvayie boje Pabljā Romacavure. ³⁹Que baru āmeina teivure jēni jacoñami nuri, arejaimada Pabljāre:

—Chíoivubu ñuja, ñuje āmeina ðaiye báque boje mujare. Jēniaivubu mujare. Ārumetejarā diede, arejaimada.

Que arī, ñvarejaimada Pabljāre diñamine jocarī. Aru parūrōreca jēniaivu barejáimada náre, ne etarājīyepa aivu diimarore jocarī.

⁴⁰Que teni Pablo aru Silas máre etarejaimada. Nūrejaimada Lidiai cūrami. Jāranuri Jesúre ju aipöevare, coyurejaimada, parure ðarājīvu náre ne ūmei. Aru coyūrīburu yóboi, etarejaimada na, Pablo aru Silas máre.

Tesalónicavü ne cārijini jorojīno Jesúre ju aipöevaque

17 ¹Pabljā vaidéjaimada Anfípolis āmicurīimarore aru Apolonia āmicurīimarore máre. Aru earejaimada Tesalónica āmicurīimaroi. Diimaroi curejavüya cūináðami judío vai cójjijñami. ²Noi Pablo nūrejameða yópe ñi ðarī cōmajiyepa yóbecurisumanareca jabuóvairāravu sábadoi. Jūmenijicui yávaiyepa buedejameða nócvare. ³Coyurejameða náre Cristo ñi ñājīye báque, aru ñi yayi báque, aru ñi nacajaiye báque máre yainore jaruvārī. Caiye iye vaiye báque Cristore jaurejavüya, yópe Jūmenijicui yávaiyede coyuiye báquepe. Aru Pablo arejameða náre:

—Ñai Jesúvacari, ji coyuiümu, úrecabe Cristo, Jūmenijicui epeimü, arejameða ñ.

⁴Apevu nácavu judío va aru obedivu judío va āmevu mearore jīvu Jūmenijicure, aru apevu máre, obedivu nomiva jabova parurinomiva, ju arejaimada Jesús ñi yávaiye méne. Aru yóvarejaimada Pabljāre. ⁵Ūbenita apevu judío va jorojīnejaimada Pabljāre. Que baru cójjiovarejaimada obedivu ūmüva āmenare, tāibui nūrivure, mememevure, aru coðoboborī, bujini, cūyarī cārijovarejaimada caivu diimarocavure, ne maucūvarājīyepa aivu Pabljāre. Ina judío va ne cójjiovaimaraque nūrejaimada cūinácu ūmu, ñi āmiá Jasón, ñi cūrami, Pabljā ne mauteiye boje úque. Voridurī Pabljāre, davaiyurejaimada náre jedevai. Cūramine tatorī voarī, ecorejaimada na. ⁶Aru náre eabeni, jabuborī Jasóre aru apevu Jesúre ju aipöevare máre, davarejaimada náre diimarocavui jabova yebai. Yópe arī, coðoboborejaimada:

—Pabljā cārijovaðama pöevare caino jaborōi. Caride ðaðama maje ĩmaroi. ⁷Aru Jasón cuicōjeimi náre ñi cūrami. Caivu ina pueðabenama ñai Roma jaboteino jabocu ijāravūcacu püeno baju parūcure. Ūi ðaicōjeiyepe ðabenama

na. Aru ađama, “Apecu jabocu jaboteibi ñujare, ũi amiá Jesúš”, arejaimađa ina obedivu pōeva ne jabovare.

⁸Apevu obedivu jápiaivu bácavu aru ina jabova máre, ne jápiaiyede diede, cārijini jorojinejaimađa na.

⁹Jícōjenejaimađa tātutare Jasójure. Aru tātutare ne jñiburu yóboi, jaetovarejaimađa náre.

**Pablo Silamaque ne
bueino Bereacavure**

¹⁰Maumejiena ñemié tuiyede nócavu Jesúre ju aipōeva jarorejaimađa Pablora aru Silare máre Berea āmicuriĩmaroi. Ne eaiyede nore, nurejaimađa judío vai cójjiñami. ¹¹Nócavu judío va Tesalónica āmicuriĩmarocavu judío va pñeno meara, jápiaiyurejaimađa Jesúš ũi yávaiye méne. Jārvava coapa bueivu barejáimada Jūmenijicu yávaiyede. “¿Jāve márica die?” arī majiyurejaimađa nócavu Pabljā ne bueiyede. ¹²Que baru obedivu nácavu ju arejaimađa Jesúš ũi yávaiye méne. Ne jēneboi curejaimađa judío va āmevu, nomiva parurinomiva aru ũmva parurivu máre. ¹³Ūbenita Tesalónica āmicuriĩmarocavu judío va jápiaivu bácavu Pablo ũi coyuiyede Jūmenijicu yávaiyede Berea āmicuriĩmarocavure, nurejaimađa noi, cārijini jorojinajivu obedivu pōeva nócavure. ¹⁴Maumejiena nócavu ju aipōeva jarorejaimađa Pabljāre jia ũrađa écarui. Ūbenita Silas Timoteomaque mautedejaimađa Berea āmicuriĩmaroi. ¹⁵Pabloi yóvaimara nurejaimađa ũque pu Atenas āmicuriĩmaroi. Aru ne copainurajiyē jipocai nore jocarī, Pablo náre coyucōjenejameđa Silare aru Timoteore máre, yópe arī: “Dajarāri ji yebai maumena”. No yóboi, copainurejaimađa Berea āmicuriĩmaroi.

**Pablo ũi bueino Atenacavure
(Hch 8.47)**

¹⁶Pablo ũi coreiyedeca Silare aru Timoteore máre ne earājiyede, pare chíorejameđa ũi jáiye boje obedivu

pēpeimarare diĩmaroi. ¹⁷Que baru yávale cuyu barejámeđa judío vai cójjiñami judío vaque aru judío va āmevu Jūmenijicure mearore jívūque, aru ina tāibui cójjiñūque. ¹⁸Apevu bueivu Epicúreo bácui yávaiye báquede, ne yajubo epicúreo āmicuriyajubo, aru apevu bueivu Zenón mácui yávaiye báquede, ne yajubo estoico āmicuriyajubo, yávarī búrejaimađa na Pabloque. Apevu nácavu arejaimađa ne bajumia:

—¿Aipe ayu barĩduidi ñai bueipōecu majibecu? arejaimađa.

Aru apevu arejaimađa:

—Bueyu bajubí apevu ne jūmenijinare, arejaimađa.

Yópe arejaimađa Pablo ũi bueiye boje Jesúš ũi yávaiye méne aru pōeva ne nacajiyede yainore jaruvarī.

¹⁹Que teni Pablora jēni nuvari ne cójjiñoi Areópago āmicurō, arejaimađa ũre:

—Majiyuvu ñuja iye boro mamaene mi coyuiyede. ²⁰Mu bueyubu ñuje majibede cāreja. Que baru coreóvayuvu aipe aino mi bueinore, arejaimađa Pablora.

²¹Que baru caivu ina Atenas āmicuriĩmarocavu aru apenoacavu máre nore curivu cainmua cójjiñu barejáimada, borotenajivu apavure ape boro mamaene ne jápiaino mácarōre aru jápiarājivu apevu ne boro mamaene ne jápiabede cāreja. ²²Que teni Pablo núcu Areópago āmicurō cójjiñoi, yópe arī, yávarejameđa ina cójjiñocavure:

—Muja, Atenacavu, jáivu yu mujare mearore jívure obedivu jūmenijinare.

²³Ji vaiyede muje jūmenijina curōi, jáivu yu cūináro jūmenijinare jícaiyede juainore, yópe toivaiye curōre nora: “Yo jícaiyede juainomu ñai jūmenijicu ñuje majibemure”, arī toivainomu. Ñai jūmenijicu muje mearore jímure coreóvabevureca, ũrecabe ji coyumu mujare caride. Jūmenijicutame ũ.

²⁴Ūvacari cuederejaquemavu ijārvure, caivu yócvure, aru yore cuede máre. Que baru ũvacari cavarō mearocavure jabocu aru ijārvucavure máre

jabocutame ũ. Que teni évacari cubebi cūramia pōeva ne ðaĩñamia jívui. ²⁵Aru pōeva caðateimu ãmemi Jūmenijicu, ére caiye jaube boje. Quénora évacari apure ðayube caivure, ũmene epeyube majare, aru caiye jauéde máre jýube majare.

²⁶Mamarumure Jūmenijicu cuedarejaquemavu cūinácu pōecure aru caivu pōeva ijāravucavu, caiyajuboacavu, ũi pāramenatamu. Aru cūma na caino joborōi. Jūmenijicui cuedaie baquiyé jipocai, majidejaquemavu ũ caiyajuboa pōeyajuboa ne curājino, aru ne pōeteijāravure, aru ne yaijāravure máre. ²⁷Jūmenijicu cuedarejaquemavu pōevare, maje vorí, earí, ju arājiiyepe ayu ére. Que baru Jūmenijicu cubi joabejinoi maje yebai, majare coapa. ²⁸“Évacari apure ðayube majare, vaiváre ðayube majare, aru cure ðayube majare máre”, arejameða apecu. Aru yópe apevu mujacavu toivaipōeva mácavu arejameða: “Jāve caivu maja Jūmenijicui cuedaimaramu yópe ũi pāramenape”, arí toivarejaquemavu. ²⁹Que baru maja jāve Jūmenijicui pāramenape paivu baru, dápaiye buojabevu maja Jūmenijicure ārojacure yópe pēpeimū úruque aru plataque aru cūraboaque ðaimure, pōeva ne ðaimū mácure ne pūguáque aru ne majiéque. Jūmenijicu nópe ãmemi.

³⁰Javede Jūmenijicu ñájine ðabedejaquemavu pōevare, bojeðayū ne ãmeina teiyede, ne ðaie báquede cāreja majibe boje. Ubenita caride caivu pōevare caino joborōcavure ðajocaicōjeñume maje ãmeina teiyede, maje chīori oatūvarājiyepe ayu maje ðaiyede. ³¹Jūmenijicu beorejaquemavu pōeva ne ðarājiiyede yópe, ũi ñájiovaquijāravu baquinóre náre. Ānijāravu baquinói Jūmenijicu ñájine ðacuyume caivu pōevare, ne ãmeina teiye boje, ũ ārumetebecu baru cāreja ne ãmeina teiyede. Aru cūinácu ũmū, Jūmenijicui epeimū mácu, ðacacuyume diede Jūmenijicure. Aru Jūmenijicu jāve jáðovaquemavu ñai ũmure, ũi

epeimū mácure, caivu pōevare, maje majinajiiyepe ayu ére Jūmenijicui nacovaiye báquede yainore jarūvarí, arejameða Pablo náre.

³²Ne jápaiiyede ére coyuyure pōescu nacajiiyede yainore jarūvarí, apevu nácvu yuridejaimaða ére. Ubenita apevu arejaimaða:

—Ñuja jápaiiyvū mi coyūquiyede diede bediōva cojedeca apejāravure, arejaimaða.

³³Que baru Pablo nurejameða cójjjinore jocarí. ³⁴Apevu pōeva yóvarejaimaða ére. Aru ju arejaimaða Jesúre. Cūinácu náccacu, ũi ãmiá Dionisio, Areópago āmicurō cójjjinocacu barejameða ũ. Apeco máre, Dámaris āmicurejacoda. Aru apevu máre curejaimaða náque.

Pablo ũi bueino Corintocavure

18 ¹No yóboi, Pablo etarejameða Atenas āmicurímarore jocarí. Aru nurejameða Corinto āmicurímaroi. ²Noi copurejameða cūinácu judfore, ũi ãmiá Aquila. Roma āmicuríjaborōcavure jabocu ijāravucacu pūeno baju parucu, ũi ãmiá Claudio, jipocamia nuicōjenejameða caivu judfōvare Roma āmicurímarore jocarí. Que baru Aquila etarejameða nore jocarí, Italia āmicuríjaborōre jocarí, jímarepacomaque, ōi ãmiá Priscila. Aquila Ponto āmicuríjaborōcacu barejameða ũ. Mamarumure earejaimaða na Corinto āmicurímaroi. Aru Pablo jácunurejameða náre ne yebai. ³Aquilajā āimara cajeáque cūramiare nareni, ðarí, bojeðarí memenejaimaða na. Aru Pablo máre nopedeca memenejameða ũ. Que baru náque curejameða. ⁴Caisumana coapa judfōvai jabuóvajāravu sábadoi, Pablo bueyu barejameða judfōvai cójjjiñami jívui. Jáðovaiyurejameða judfōvare aru judfōva ãnevure máre ũi bueiyede jāve, ne ju arājiiyepe ayu diede.

⁵Aru Silas Timoteomaque ne eaiyede Pablo yebai, Macedonia āmicuríjaborōre jocarí, Pablo dajocarejameða ũi

memeinore. Quénora coyure cuyu barejámeđa iye yávaiye me matuiyeda, yópe arí judíovare:

—Jesúvacari Cristobe. Úrecabe Jūmenijicui daroimu mácu, arejameđa ũ.

⁶Na ũi yávaiyede ju abevu, aru úre maucuvativu, aru ámeina ne yávaiye úre máre, ne nópe đaiye boje, Pablo pupedejameđa ũi doicajede, ne majinajiyere ayu dajocacuyu náre. Aru arejameđa:

—Coyuyubu yu Jūmenijicui yávaiye méne mujare. Ubenita mujavacari jápiabevü. Jūmenijicui daroimu mácure, meadaipöecure, ju abevu muja. Que baru Jūmenijicu árumetebecuyume muje ámeina teiyede. Que baru mujavacari muje bajuma bíaiavu muja járavu cūiméjāravu baquinóre. Quénora nájinajaramu toabo cūiméboi. Yúcapūravu cadateni buojabevü mujare. Que baru dajocayubu mujare caride. Coyucunquijivü iye yávaiye méne judíova ámevure, arejameđa Pablo ina judíovare.

⁷Que arí, dajocarejameđa náre. Diimaroi curejameđa cūinācu ũmu, judíova ámevucacu, ũi ámiá Tito Justo. Ju ayu barejámeđa Jūmenijicure. Ũi cūrami judíovai cójijiñami tucavai curejavūya. Aru Pablo cucunurejameđa ũi cūrami. ⁸Apecu máre curejameđa, cūinācu judío, ũi ámiá Crispo. Judíovai cójijiñamine coreipöecu barejámeđa ũ. Nāi ũmu ũ jivunque aru apevu obedivu Corinto ámicuríimarcavu Jesús ũi yávaiye méne jápiare cuivü, ju arí diede, jáđovarejaimada Jūmenijicure ocoque.

⁹Cūināñamine Jūmenijicu coyurejameđa Pablöre yópe decoboainope. Arejameđa úre:

—Jidubejacu ina ũmuvare. Bueni dajocabejacu ji yávaiye méne. Bi abejacu mu. ¹⁰Yúvacari cadateivü mure. Nāme ámeno đabenama mure, ji cuvae boje obedivu pöevare diimaroi, arejameđa Jūmenijicu Pablöre.

¹¹Que baru Pablo mautedejameđa noi cūināju coricai, buede cuyu nócvare Jesús ũi yávaiye méne.

¹²Ũi bueiyedeca noi, Acaya ámicuríjjoboröre jabotedejameđa Galión. Aru caivü nócvu judíova maucuvarejaimada Pablöre. Que teni apevu nācvu úre jēni nūvarejaimada jabocu yebai. ¹³Aru arejaimada nāi jabocure:

—Nāi ũmu bueibi pöevare, ne mearore jínajiyede Jūmenijicure yópe đaicöjemepe, arejaimada.

¹⁴Pablo yávacuyu barejámeđa. Ubenita Galión arejameđa ina judíovare:

—Muja, judíova, cārijovamejara yure. Nāi ũmu jaboteino đaicöjeiyepere ũi đabedu o ámeina tedu, yu jápiajebu muje coyuiyede. ¹⁵Ubenita muja jorojivubu nāi ũmure, ũi bueiye boje aru ũi đabe boje muje đaicöjeiyede. Que baru mujavacari meadajarā diede. Yúcapūravu nájine đabecuyumu úre, arejameđa ina judíovare.

¹⁶Que arí, jaetovarejameđa náre nore jocarí. ¹⁷Que teni ina judíova ámevu jēnejaimada Sóstenene, judíovai cójijiñamine coreipöecure. Jara popedejaimada úre nāi jabocu ũi jáinoi. Ubenita Galiócapūravu jámecupeda yéde đabedejameđa ũ.

Pablo ũi copaino Antioquíai aru ũi jácunūino bedíova cojedeca, coyucuyu Jūmenijicui yávaiyede

¹⁸Obedijāravu Pablo mautedejameđa Corinto ámicuríimaroí Jesúre ju aipöevaque. Ũi etaiyede nore jocarí, Priscila aru Aquila máre yóvarejaimada úre. Nūrejaimada Cencrea ámicuríimaroí. Nore Pablo buraicöjenejameđa ũi pođare, jáđovacuyu ũi jebeiyeđe “Yópe đacacuyumu yu” ũi aino mácaröre Jūmenijicure. No yóboi Pablo, Priscila, aru Aquila máre jáđocú uracúí jaturí, etarejaimada Cencrea ámicuríimaroí jocarí. Dicú nūquicú marejávūya pu Siria ámicuríjjoboróita. ¹⁹Ubenita Pablojā jatarejaimada pu Éfeso ámicuríimaroí. Ne eaiyede noi, Pablo dajocarí Priscilare aru Aquilare máre, cūinācvu nūri, ecorí judíovai cójijiñami, coyurejameđa

nócvav judíovare. ²⁰Aru nácavv jēniarejaimada úre, ũi mautequiyepe aivv náque obedijāravva. Ūbenita Pablo ju abedejameda náre. ²¹Quénona ũi etaiyede náre jocarī arejameda:

—Nūquijivv Jerusalén āmicurīimaroi torojuve teinūmure. Ūbenita yure Jūmenijicv ũi daroru, copaidacuyv mu yv mūje yebai cojedeca, arejameda náre Pablo.

Que arī, jiadocū űracūi jaturī, nurejameda Éfeso āmicurīimaroe jocarī.

²²Jatarī pū Cesarea āmicurīimaroi, nore jocarī mái mari nurejameda pū Jerusalén āmicurīimaroi, jacoūvcuyv Jesúre ju aipōevare noi. Aru nore jocarī, ēmeni nurejameda pū Antioquía āmicurīimaroi cojedeca. ²³Apejārvavare cūrejameda nore. Ū etayv bācv nore jocarī, vaidējameda caino Galacia aru Frigia āmicurīijoborōai. Īmaroa coapa vaidé nuri, Jesúre ju aipōevare coyure cuyv barejameda ũ, parure dacuyv náre ne ũmei.

Apolos ũi coyūino Éfesocavure

²⁴Cūinācv ũmū judíovacacv, Alejandría āmicurīimarocacv, ũi āmiá Apolos, earejameda Éfeso āmicurīimaroi. Me coyurejameda pōevare. Aru me majidejameda Jūmenijicvī yāvaiyede máre. ²⁵Ūtubecvva buedejameda me Jesús ũi yāvaiye méne. Ūbenita quénona Juan Bautista bācv ũi bueiyyede aru ũi jáđovaiyyede pōevare Jūmenijicvure ocoque majidejameda. ²⁶Jidubecv coyurī bārejameda parurōreca judíovai cójijīnami jīvūi. Priscila aru Aquila máre jápiaivv ũi coyuiyyede, nūvarejaimada úre pōevare jocarī, buenajivv úre caiye Jūmenijicvī yāvaiye méne. ²⁷⁻²⁸No yóboi, Apolos jatarī nuiyurejameda Acaya āmicurīijoborōi. Que baru ina Éfeso āmicurīimarocavv Jesúre ju aivv Apolore cadateiyurivv, nācavv toivarejameda paperayocare ina Acaya āmicurīijoborōcavv Jesúre ju aivvure, ne jacopurājiyyepe aivv Apolore ũi eaiyyede ne yebai. Aru ũi eaiyyede noi, caivv pōeva ne jáinoi

parurōreca coyurejameda judíovare. Jáve jáđovarejameda náre Jūmenijicvī yāvaiyyeque Jesúreca Cristore, Jūmenijicvī epeimv mácvre.

Pablo ũi bueino Éfesocavure

(Mt 3.11; Mr 1.4, 7-8; Lc 3.4, 16; Jn 1.26-27)

19 ¹Apolos ũi cvuede Corinto āmicurīimaroi, Pablocapūravv mái nuri, cūracūare jatarī vainí, earejameda cojedeca Éfeso āmicurīimaroi. Noi copurejameda apevū Jesúre ju aipōevare. ²Náre yópe arī jēniari járejameda:

—¿Jesúre mamarūmū mūje ju aiyede, Espírītu Santore jacopurārū mūja? arejameda Pablo.

—Nūja ye jápiabevū űnai Espírītu Santo cvcūre, arejaimada na.

³Ne que arīburu, Pablo jēniari járejameda náre:

—¿Ye batearī mūje jáđovaiye báque Jūmenijicvure ocoque? arejameda Pablo.

—Juan Bautista bācv ũi jáđovaiye báquepe jáđovaima Jūmenijicvure űnjare ocoque, arejaimada Pablöre.

⁴Aru Pablo arejameda náre:

—Juan Bautista bācv jáđovaquemavv ina pōeva chíoivvure ne āmeina teiye boje ne đaiyyede oatvvaivvure. Aru náre coyūquemavv, yópe arī: “Dacuyvme ji yóboi cūinācv, ji pueno parvcv, Jūmenijicvī daroquimv. Ju ajarā úre”, aquemavv Juan Bautista bācv. Aru Jesúreca batequémavv dacuyv űnai Juan Bautista bācv yóboi, arejameda Pablo náre.

⁵Diede jápiaivv bācavv, jáđovarejaimada Jūmenijicvure ocoque, ne Jesúre ju aiye boje, ũ jina márājivv.

⁶Dinumvma Pablo ũi tuoiyede ũi pūrváque náre coapa ne jipoburā, jacopurejaimada űnai Espírītu Santore. Que teni yāvarejaimada apacamua yāvacaicmua ne majibecamuaque. Aru Jūmenijicvī yāvaiyyede coyūcarejaimada na. ⁷Doce paivv ũmūva marejaimada na.

⁸Yóbecurā aviáva baju Pablo návarejameda ne judíovai cójijīnami.

Jidubecava coynyu barejámeđa parurõreca, ne majinajipepe ayu jãve ũi coyniyede Jũmenijicui jaboteino borore. ⁹Ūbenita apevu, ũi yãvaiyede jãpiayubevu aru ju aiyubevu, ãmeina yãvarejaimađa Jesúi bueciõjeiyede caivu ina judíova cójjivũ ne jáiyede. Que baru Pablo dajocarejameđa náre. Aru nuvarejameđa ina Jesúre ju aipõevare ũque. Caijãravua coynyu barejámeđa põevare apedãmi, Tirano ãmicucu ũi bueiñami. ¹⁰Nópe ðayũ barejámeđa pũcaũja baju. Que teni caivu põeva Asia ãmicurijoborõcavu, judíova aru judíova ãmevu máre, jápiarejaimađa Jũmenijicui yãvaiye méne.

¹¹Jũmenijicu Pablõre ðare ðarejameđa urarõ põeva ne ðarĩ majibede. ¹²Que baru ũi doicajeare nuvaivu barejámeđa ijimarare. Aru ne tuoiyede ðicajeare meatedejaimađa na. Abujuva máre etarejaimađa náre jocarĩ.

¹³Apevu judíova, yaviéde ðaivu, cuivu ãmaroa coapa jaetovaivu barejámeđa abujuvare põevare jocarĩ. Jaetovaiyuridurejaimađa abujuvare Jesúi paruéque máre. Que teni arejaimađa cõinãcu abujucure:

—Ðaicõjeivu mũre, Pablõi coynimũ Jesús ũi paruéque, etajacu mũ ñai ũmũre jocarĩ, arejaimađa.

¹⁴Ina yaviéde ðaivu siete paivu ũmũva, cõinãcu ũmũi mára marejámeđa na. Népacu cõinãcu judío vai sacerdotevare jaboteipõecu barejámeđa, ũi ãmiã Esceva. ¹⁵Ūbenita ñai abujucu arejameđa náre:

—Jesúre majivu yu. Aru Pablõre máre majivu yu. Ūbenita mũjare ye majibevu yu, arejameđa náre ñai abujucu.

¹⁶Que arĩ, ñai ũmũ, abujucu ũi ãmamũ, jiejecucu ne pũenoĩ biarãrĩ, jara popeni, ne cuitõtecajeare jaðevarĩ, jaetovarejameđa náre cũramine jocarĩ. Que teni cúvarejaimađa cũramine jocarĩ na coapa, churiã curivu aru cuitõtecajea cubevũva. ¹⁷Aru caivu Éfeso ãmicurĩmarocavu, judío va aru judío va ãmevu máre, jápiarejaimađa iye Escevai márai borore. Que baru pare

jidurejaimađa ina caivu. Aru pũeno baju mearore jídejaimađa Jesúre, ũi parué boje.

¹⁸Obedivu põeva, Jesúre ju aivu caride, caivu ne jáiyede coynrãearejaimađa ne ãmeina teiye báquede, Jesúre ne ju arãjiye jipocai.

¹⁹Obedivu nãcavu, yaviéde ðaivu bãcavu ne yaviéde bueitucuboare davarĩ, juarejaimađa caiye ditucuboare caivu põeva ne jáiyede. Aru ne corevaiyede aipino bojecurõ ditucubo na éitucuboa báquede, cincuenta mil paiturava tãturatorava me bojecuriturava bojecurõpe baju bojecurejavũya. (Cũinãturũbu quince paivu memepõeva ne memeiye boje caipũcarũreape paivjuare.)

²⁰Yópe parurõque caijãravua ðarĩ jáðovaiyede apevu obedivu põeva jápiaivu Jũmenijicui yãvaiye méne, ne ju aiyede pũeno baju obedivu ju aivu nurejaimađa na.

²¹Que teniburu yóboi, Pablo arĩ dápiarejameđa: “Vainĩ nuquijivũ Macedoniare aru Acayare máre. Que teni nuquijivũ Jerusaléne. Aru no yóboi, nuiye jauvu yũre Romai”, arĩ dápiarejameđa Pablo. ²²Que baru jarorejameđa pũcarã ũi yóvaimarare, Timoteore aru Erastore máre, ne nurajipepe ayu ũi jipocai Macedonia ãmicurijoborõi, ũi mauteiyedeca apejãravũre Asia ãmicurijoborõi.

Éfescavu ne cãrijini jorojĩno Jesúre ju aipõevaque

²³Dinũmũreca obedivu Éfeso ãmicurĩmarocavu jararejaimađa Pablõre, ũi bueiye boje põeva ne ðarãjiyede yópe Jesúi urõpe. ²⁴Cõinãcu ũmũ, nócacu, ũi ãmiã Demetrio, tãure memepõecu barejámeđa ũ. Ðarejameđa tãuque quĩjĩnamia cũramiare yópe ico jũmenijico õi ãmiã Artemisa õi cũrami urãðãmipe paĩnamĩ, ðarĩ bojedacuyũ ðĩnamiare põevare. Urarõ tãtutarare ãnejameđa ũ ðĩnamia boje. Aru apevu Demetriorẽ memecaipõeva máre urarõ tãtutarare ãnejaimađa

na, ne memeiye boje. ²⁵Que baru Demetrio cójijovarejameđa caivũ úre memecaivũre aru caivũ apevũ nócvũ máre ne memeiyepe paiyede đaiivũre. Cójijivũ caivũ, Demetrio arejameđa náre:

—Muja, ji yóvaimara, mujavacari majivũ maje me curõre maja coapa iyede maje memeiye boje. ²⁶Ñai Pablöre jári jápiaivũbu muja. Buede cuibi pöevare, yópe arí: “Pêpeimara pöeva ne đaimara jũmenijina âmema”, arí bueibi ù. Obedivũ pöeva yui, Éfesocavũ, aru caino Asiavũ máre, ju adama ùi bueiye. ²⁷Yópe ne ju aino jidojavũ majare. Maje memeiyo bĩjaquijichũvũ. Aru iñami jũmenijico Artemisai cũrami máre diñamine yávaino mácarõ, bĩjaquijichũvũ. Nópe vaidú, pueđarí đajocarãjarama õre, aru âmema járajarama õi paruéde caivũ Asiavũ aru caino joborõacavũ máre, arejameđa Demetrio.

²⁸Ëi yávaiyede jápiaivũ, ina obedivũ pöeva jaraiivũ codoboborí búrejaimađa: —Artemisa, ñuja Éfesocavũre jũmenijico meaco bajube õ, codoboborí arejaimađa na.

²⁹Que teni obedivũ pöeva, caivũ ïmarocavũ, cãrijini jorojinejaimađa. Cúyarí nurí, pũcarã Pablo ùi mái darí yóvaimara mácvũre, ne amiá Gayo aru Aristarco máre, Macedoniavũre, jëni jabuborí ecovarejaimađa ïmarocavũ cójijino urarõ curõi. ³⁰Pablocapũravũ coyucũnrĩdurejameđa no cójijinoi. Ëbenita nócvũ Jesúre ju aipöeva nuicõjemenejaimađa úre. ³¹Aru apevũ máre, Asia âmĩcurõ jabova, Pabloi yóvaimara, boro jarorejaimađa, jëniarajivũ úre ùi ñumequiyepere aivũ no cójijinoi. ³²Que teiyedeca, apevũ ina cójijinocavũ codobobovũ barejáimada. Cũináyajubo apei ne aiyeđe, apeyajubo máre apeita ávarejaimađa na. Que teni ina cójijivũ coreóvabevũ obedivũ jëniari járejaimađa ne baju, “¿Aipe teni dari maja yui?” arejaimađa na, majibevũ. ³³Ëbenita ina judíova coyurejaimađa Alejandore aipe vaiyede. Aru núvarejaimađa úre caivũ ne jáinoi,

ùi coyũquiyepere aivũ náre, “Caiye iyede jacotũcayumu judíovare”. Que teni Alejandro ùi pũrũque jádovarejameđa, ne bi arãjiyepere arĩduyũ. ³⁴Ëbenita na majidivũ ù máre judíore, pũcaora baju codobobovũ barejáimada na cojedeca:

—Artemisa, ñuja Éfesocavũre jũmenijico meaco bajube õ, codoboborí arejaimađa na.

³⁵Quénora Éfeso âmĩcurĩmarocavũre jabocu bi aicõjenejameđa ina pöevare. Aru arejameđa náre:

—Muja, Éfesocavũ, jápiajarã ji yávaquiyede. Maja, Éfesocavũ, jári coreivũbu ico jũmenijico Artemisa, meaco baju, õi cũramine aru õi cũraborre máre, cavarõre jocarí tuibo bácarõre, caivũ pöeva ne mearore jĩbore. Aru caivũ pöeva majima dieđe. ³⁶Pöecu cubebi buojarí ju abecu dieđe. Que baru mujacapũravũ bi ajarã muja. Đabejarã ãrũmevũre. ³⁷Muja davađavũ ina pũcarã ùmũvare yui. Ëbenita jũmenijina cũramia cuvede ñavamema na. Aru âmema yávabema maje jũmenijicore máre. ³⁸Que baru Demetriojã boro coyũrĩ adaiyũrivũ baru, boro coyũrĩ adarãñujarari na jabova ne âmema teivũre jëniari jáiñami. Noi âmema teivũre jëniari jáipöecu cubi ù. Ëi jáinoi boro coyũrĩ adajarãri na. ³⁹Muja apejĩene urivũ baru, coyũiye javũvũ noi, ïmarocavũ ne cójijinoi yópe maje đaicõjeiyepere. ⁴⁰Me đajarã. Jidojavũ majare ina Romacavũ jabova coyũrĩ adarí yávarãjivũre majare yópe maucũvarivũre, maje coyũrĩ majibe boje aipe teni buinore yo maje urarõ codoboboinore, arejameđa ñai jabocu ina pöevare.

⁴¹Que yávarĩburu yóboi, “Quénoramũ. Nujara muja muje cũramia coapa”, arejameđa náre.

**Pablo ùi nuino Macedoniai,
Grecia máre**

20 ¹No codoboboino mácarõ cũiyede, Pablo daicõjenejameđa ùi yebai ina Jesúre ju aipöevare, majicacayũ náre. Aru “Nuñũmu”

arí, dajocarejameđa náre, нсчүи Macedonia āmicurijoborōi. ²Ū vaiváyu no joborōre bueyu barejámeđa nócavure, cadatecuyu náre. Que teyu, earejameđa Grecia āmicurijoborōi. ³Mautedejameđa noi yóbecurá aviáva baju. Jatacuyu barejámeđa Siria āmicurijoborōi. Ūbenita coreóvarejameđa ūre ūi nuquiyedeca jiadocū uracūque apevu judíova boarí jaravarājivure ūre. Que baru jatubedejameđa dicūi. Quénora mái nuri, vaidéjameđa Macedonia āmicurijoborōi bedíova cojedeca. ⁴Aru apevu yóvarejaimada ūre, ne āmiá Sópater, Pirroi mácu, Berea āmicurīmarocacu; Aristarco aru Segundo máre, Tesalónica āmicurīmarocavu; Gayo, Derbe āmicurīmarocacu; Timoteo; aru Tíquico, Trófimo máre, Asia āmicurijoborōcavu. ⁵Ina Jesúre ju aipōeva űuje jipocai nuri, coredejaima űujare Troas āmicurīmaroi. ⁶Páure bucure daiye cube āiye torojuve teinumu yóboi, űuja jatuiavu jiadocū uracūi etarejadarā Filipos āmicurīmarore jocarí aru cūinápurupe pajívaravu yóboi tuijarejadarā Troas āmicurīmaroi. Aru curejadarā nore cūinásumana.

Pablo ūi jácunūino Troacavure

⁷Domingo jāravui Jesúre ju aipōeva cójjijidejadarā, āri ūcurajivu, ārurajivu Jesúi yaiye báquede. Aru etarājivu barejadarā cōmiájāravure. Que baru Pablo coyuyu barejame náre joe űami corica bajita. ⁸Cójjijidejadarā puenocatucubu jívui aru ure pēoibua pēorejavū. ⁹Cūinácu bojuyo, ūi āmiá Eutico, dobarejame jáicobei. Pablo ūi urarō coyuyedeca, vno ijidejavū űai Euticore. Cāri nurejame ū. Aru cāñu, turejame jáicobede jocarí pu joborōita. Yóbecuriva curaivare vainí turejame ū. Apevu ūre jēnejaima, jave yaiyú bácuta. ¹⁰Ūbenita Pablo jōđari yaiyú bācui baju bācarōre tucunuri, nariónu arejame apevure:
—Cuecumamejara. Apucube cojedeca, arejame Pablo.

¹¹⁻¹²Dinumu Pablo copaini nuri nurejame puenocatucubui cojedeca. űai bojuyore nūvarejaima apucure. Aru torojurejaima, ūre meadaíye boje. Pablojā páure cotovarí, ārejadarā. Āri bujarí Pablo borotedejame náque joe baju miadáe tuiyeta, űuje etaiyeta. Que teniburu yóboi, nurejadarā űuja.

Pablo ūi nūino Miletoi, Troare jocarí

¹³Pablo nuicōjenejame űujare jiadocū uracūque Aso āmicurīmaroi ūi jipocai. Ūcapūravu mái нсчүи barejame, corucuyu űujare noi. ¹⁴Que teni űuje coruyiede Aso āmicurīmaroi, Pablo jaturejame űujaque. Aru nurejadarā Mitilene āmicurīmaroi. ¹⁵Cōmiájāravui Mitilene ĩmarore jocarí, jatarí nuri earejadarā Quío āmicurijivavu cōchinoi. Bedíova cōmiájāravui jatarí nuri, tuijarejadarā Samos āmicurijivavu tuipāvai. Jatarí nuri Troguilio āmicurīmaroi, jabuóvarejadarā noi. Aru cōmiájāravui jatarí nuri, earejadarā Mileto āmicurīmaroi. ¹⁶Pablo eaiyurejame Jerusalén āmicurīmaroi Pentecostés torojuve teijāravu jipocai. Que baru jatarí nuri, vaidéjadarā Éfeso āmicurīmarore jocarí, Pablo ūi mauteiyube boje Asia āmicurijoborōi.

Pablo ūi yávaino Éfesocavu ju aivure coreipōevare (2 Ti 4.7)

¹⁷Ūi cuede Mileto āmicurīmaroi, Pablo boro jarorejame Jesúre ju aivure coreipōevare Éfeso āmicurīmarocavure, ne darājipepe ayu ūi yebai. ¹⁸Ne edaiyede ūi yebai, arejame náre:
—Mujavacari coreóvaivubu aipe cūcure yu muje jēneboi mamarumure ji daiyede Asiai pu caride máre. ¹⁹Cainumua cátecacu yu muje jēneboi Jesúre memecayu, dápiabecu ji baju apevu pueno meacupe, aru oyu ji űájiyede judíova ne āmedaiyue boje yure. ²⁰Jidūbecu coyuyu batecácu mujare caiyede, cadatecuyu mujare. Bueyu batecácu Jesús ūi yávaiye méne muje cójjiñamiai aru muje cūramia

coapa. ²¹ Parurōreca coyuyū batecácu judíovare aru judíova ãnevure máre: “Chíojara mŭje ãmeina teiyede. Oatuvajarã mŭje ðaiyede. Aru ju ajarã Jesús ũi yávaiye méne”, arí coyuyū batecácu yu. ²² Aru caride, ñai Espírítu Santo nuicōjeimi yure Jerusaléi. Majibevu yu aipe yure vaiquýyede noi. ²³ Quénora ñai Espírítu Santo majide ðaibi yure yópe: Cainoa ĩmaroai ji nuquinoai pōeva coreðama yure. Nájine ðarãjarama yure. Aru apenũma buorãjarama yure ãmeina teivure jēni jacoĩnami. ²⁴ Ūbenita ye baquinó ãnevū yure cūcure ijãravure. Quénora ðaiyuvu mearo iye memeyede, Jesús ũi ðaicōjeiyede yure pu ji buojaiyeta diede. Coyũiyuvu caivure iye yávaiye méne Jũmenijicui urarō mearo ðacaiyede pōevare, ũi meadaquiyepē ayu náre.

²⁵ Jápiajarã. Coyucũncacū iye yávaiye méne Jũmenijicui jaboteinore mŭje jēneboi. Ūbenita coreóvaivu yu mŭja jámenajivure yure cojedeca ijãravure. ²⁶ Que baru coyũvū yu mŭjare caride yópe: Mŭjavacari mŭje bajuma bíjaru jãravū cũiméjãravū baquinóre, yúcapũravū cadateni buojabevū mŭjare. Jave ðacavū yu mŭjare caino ji oainope. ²⁷ Jidubecu bueni buojacacū yu mŭjare me caiye iye Jũmenijicui yávaiyede. Ye ãrumetebevū yu caiye diede. ²⁸ Me ðajarã mŭja. Ñai Espírítu Santo mŭjare járĩ corede ðaibi caivū Jesúre ju aipōevare. Que baru me corejarã náre yópe ovejavare coreipōecu ũi coreiyepē. Caivū Jesúre ju aipōeva Jũmenijicu jinatamu na, Jũmenijicui mácu, Jesús, ũi yaicáiyē báque boje náre. ²⁹ Coreóvaivu yu ji etarĩburu yóboi mŭjare jocarĩ, apēvū ðarãjivure mŭje jēneboi yópe ãimara macarōcavū jijecurivū ne daiyepē ovejava jēneboi. Borocurãjarama mŭjare, mŭje dajocarãjiyepē aivū mŭje ju aiyede Jesúre. ³⁰ Aru apēvū mŭjavacavvacari borocurivū buebenajarama jãvene. Quénora jujovarãjarama Jesúre ju aipōevare, mŭje dajocarãjiyepē aivū mŭje ju aiyede Jesúre aru mŭje

yóvarãjiyepē aivū náre. ³¹ Que baru me jájara mŭja. Ārũjara iye yóbecurĩjua jãravure aru ñamine máre urarō ji orĩ majicavaquede caivū mŭjare.

³² Yu jēniañũmu Jũmenijicure, ũi járĩ corequiyepē ayu mŭjare. Aru yávaiye me urarō mearo ðacaiyē cadatequiyebu mŭjare. Que baru parure ðaquiyebu mŭjare mŭje ũmei ũi yávaiye parueque, mŭje ju arãjiyepē Jesúre cainũma. Aru Jũmenijicu epecũyũme mŭjare mŭje curãjino caivū apēvũque, ina ũi meadãmaraque, ne Jesúre ju aiyē boje. ³³ Yu íyubevū jíyeva apēcu ũi tãuturare aru ũi cuiótotecajearē máre.

³⁴ Mŭjavacari coreóvaivũbu aipe memēñure yure, bojedarĩ ĩcũyū yure jauéde aru ina ji yóvaimarare jauéde máre. ³⁵ Cainũma yu jáðovaivū mŭjare yópe urarō memēino jauróre mŭjare, mŭje cadatenajiyepē ayu ina cōmajē ãrojarivure. Aru dápiajarã cainũma yópe Jesús ũi aiyē báquepe: “Ñai jíyū apēcure torojucutame ñai jacopũyũ pñeno”, arejame Pablo.

³⁶ Que arĩburu yóboi, Pablo ñũatutari jēniarejame Jũmenijicure caivũque.

³⁷ Aru caivū orĩ narióri Pablōre, nuivū barejáima ũi jivare, yópe ne ðarĩ cōmajiyepē névū ne nurajiye jipocai.

³⁸ Ūrarō chíoivū barejáima, “Yure jámenajivũbu mŭja cojedeca ijãravũ” ũi aiyē báque boje jipocamia. Aru ũre yóvarejaima mái, jia uraða ēcarũi nurĩ jiaðocū uracū yebaita.

Pablo ũi nuino Jerusaléi

(Hch 6.5, 8.5, 11.28)

21 ¹ Ñũje etaiyede náre jocarĩ, jaturejagarã jiaðocū uracūi. Jatarejagarã nuríē pu Cos ãmicurijivũita. Cōmiáljãravũi jatarejagarã nuríē Rodas ãmicurijivũi aru Pátara ãmicurĩmaroĩ máre. ² Noi vorĩ earejagarã apēcū uracūre, Fenicia ãmicurijoborōĩ nuquicūre. Que teni jaturĩ nũrejagarã dijiãvure jocarĩ. ³ Chipre ãmicurijivure vaidéjagarã dijiãvū cãcopũravũi. Aru nũrejagarã pu Siria ãmicurijoborōĩ.

Tuijarejagarā Tiro āmicurīimaro ēcarui, dicūre memecaipōeva, ne mavarajiyepē dicū davaiyede. ⁴Que baru dicūre jocarī etarī, mari, īmaroi nūri, vorī copūrejagarā diīmarocavū Jesūre jū aipōevare. Náque mautedejagarā cūinásamana. Nāi Espiritu Santo náre majide đarejaquemavū aipe vaiquíyede Pablōre Jerusalén āmicurīimaroī. Que baru “Nūmejacu Jerusalēi”, arejaima ūre. ⁵Nūje etaijāravū eaiyede, māi nūrejagarā, jatarājivū cojedeca. Caivū ina Jesūre jū aipōeva, yóvarebucūvaque, nēmaraque máre, yóvarejaima nūjare māi ne īmarore jocarī pu tuipāvai jia urada ēcarui. Noi nūatutari ēpacūi jēniarejagarā Jūmenijicuque. Aru jēniari buojari, “Nūivūbu” arejagarā náre. ⁶Que arī, dicū uracūi jatūrejagarā. Aru ina Jesūre jū aipōeva copainūrejaima ne cūramiai na coapa.

⁷Etari Tiro āmicurīimaroē jocarī, earejagarā Tolemaida āmicurīimaroī. Jacoyūrejagarā diīmarocavū Jesūre jū aipōevare. Aru mautedejagarā náque cūinājāravū. ⁸Cōmiájāravūi etaiavū diīmarore jocarī, earejagarā Cesarea āmicurīimaroī. Aru nūrejagarā Felipe cūrami. Felipe Jesús ūi yāvaiye méne coyūipōescu barejáme. Cūinācu ina siete paivū Jesús ūi yāvaiye méne beorī coyūicōjeimarare cađateipōevacacu barejámeđa ū. ⁹Yóvaicūvaivū ūi máromiva, ūmucūbevū, Jūmenijicūi yāvaiyede coyūcaivū barejāima na.

¹⁰Nūje mauteiyedeca náque apejāravūa, nāi Jūmenijicūi yāvaiyede coyūcaipōescu, ūi āmiá Agabo, ēmenējaquemavū Judea āmicurijoborōre jocarī. ¹¹Darī nūje yebai, jēni Pabloi jārióicāvare, buorejame ūi baju ūi pūruáre aru ūi cūbobare máre dicāvaque. Aru arejame:

—Yópe aibi nāi Espiritu Santo:

“Jerusalécavū judíoiva buorājivūbu dicāva jārióicāva upacūre yópe. Aru jīnājivūbu ūre judíoiva ānevūre”, arejame Agabo.

¹²Nūja jāpiaivū diede, nūja aru nócavū máre jēniavū barejacārā Pablōre parurōreca, ūi muri nūmequiyepē aivū Jerusalén āmicurīimaroī. ¹³Ūbenita Pablocapūravū arejame nūjare:

—¿Aipe teni oivurū mūja? Chiore đabejarā yūre. Yūvacari jūracubevū Jerusalécavū yūre ne buoru, aru yūre ne boarī jarūvaru máre, ji coyūiye boje Jesús ūi yāvaiye méne, arejame Pablo.

¹⁴Nūja ūre jū are đarī buojabedejagarā. Que baru jēniari dajocarejagarā ūre. Quénora:

—Jūmenijicu đajacurī ūi urōpe, arejagarā nūja.

¹⁵No yóboi, meadarejagarā nūje cūvede. Aru muri nūrejagarā Jerusalén āmicurīimaroī. ¹⁶Apevū Cesarea āmicurīimaroicavū Jesūre jū aipōeva yóvarejaima nūjare. Nūvarejaima nūjare Mnasóī cūrami. Nāi Mnasón Chipre āmicurijivūcacū barejámeđa. Aru javeita jū arejameđa Jesūre. Ūque curājivū barejacārā nūja.

Pablo ūi jācūnūino Santiagore

¹⁷Nūje eaiyede Jerusalén āmicurīimaroī, Jesūre jū aipōeva torojurī me jacoyūrejaima nūjare.

¹⁸Cōmiájāravūi nūrejagarā Pablogue Santiago yebai, ūre jāranūivū. Caivū ina Jesūre jū aivūre coreipōeva cōjijidejaima ūque. ¹⁹Pablo náre jacoyurī buojari, coyūrejame caiye Jūmenijicūi đare đaiye báquede ūre judíoiva ānevū jēneboi. ²⁰Ūi coyūiyede jāpiaivū bācavū, caivū mearore jidejaima Jūmenijicūre. Aru arejaima Pablōre:

—Mū, nūjecū, jārijide apa. Obedivū judíoicavū jū aivūbu Jesūre. ²¹Aru caivū ina đadama cainūmua yópe Jūmenijicūi đaicōjeiyede ūi coyūiye báquepe Moisés bācūre. Apevū borocūrivū, yópe arī, coyūimađa náre: “Pablo bueibi judíoivare judíoiva ānevū ne joborōai curivūre, ne đabenajiyepē ayu yópe Jūmenijicūi đaicōjeiyede ūi coyūiye báquepe Moisés bācūre”, aimaða na. Aru apenore, yópe arī, coyūimađa: “Pablo judíoivare buraicōjememi nēmarare ne cajede yópe Jūmenijicūi đaicōjeiyede ūi coyūiye báquepe Moisés bācūre. Aru đaicōjememi náre yópe majeñecūva mácavū ne đarī cōmajiye báquepe”, aimaða. ²²Ina judíoiva

Jesúre ju aipõeva jápiarājarama mi borore edayure. Que baru, ¿aipe ðarājidi maja? ²³ Ðajacu yópe ñuje ðaicõjeiyere. Ññacavu yóvaicuvaiyu Jesúre ju aivu “Yópe ðacacuyumu yu” aima na Jūmenijicure. Ëbenita nópe ðarí buojabema na cãreja. ²⁴ Que baru nñajacu náre múque. Náque ðajacu mu máre yópe Jūmenijicui ðaicõjeiyede ñi coyuiye báquepe Moisés bácure, mñje meara marajiyépe aivu Jūmenijicui jáinoi. Aru bojedacajacu mu náre coapa, caiye ne poðare ne yñvarājiyere ayu yópe Jūmenijicui ðaicõjeiyede ñi coyuiye báquepe Moisés bácure, ne bubarājiyere ayu “Ðacacuyumu Jūmenijicure”, ne aive báquede. Mi yópe ðaru, caivu ina judíova majinajarama jáve ãmevu ne jápiaive báquede mi borore. Návacari járajarama mure ðayure yópe Jūmenijicui ðaicõjeiyede ñi coyuiye báquepe Moisés bácure. ²⁵ Ëbenita ññjavacari toivacarā no papeyocare ina judíova ãmevu Jesúre ju aipõevare. Ne majinajiyere aivu maje dāpiaiyede. Yópe arí, toivacarā náre: “Caiye ãiyede pēpeimara mácavu ne jino mácarõre ãmejara. Aru jivede ãmejara. Æimajiarua jive cuede máre ãmejara. Aru ðabejarā ãmeina ðaiyede apevuque mñjemarebucava ãmevuque”, arí toivacarā ññja náre, arejaima Pablöre Jesúre ju aivure coreipõeva.

**Churarava ne jēino Pablöre
Jūmenijicui cūrami jívui**
(Hch 15.29, 20.4)

²⁶ Dinumu Pablo yóvarejameða ina yóvaicuvaiyu ñmuvare. Cõmiájāravui ðarejameða ñ yópe Jūmenijicui ðaicõjeiyede ñi coyuiye báquepe Moisés bácure náque, ne meara marajiyépe ayu Jūmenijicui jáinoi. Ecorejameða Jūmenijicui cūrami, coyucuyu sacerdotevare ájāravu ne jebelijāravure, ne jínajiyere ayu ne jícaiyede Jūmenijicure na coapa.

²⁷ Yópe Jūmenijicui ðaicõjeiyede ñi coyuiye báquepe Moisés bácure ðarejaimaða siete pajāravua

baju. Dijāravua cūiquíye jipojicai, apevu judíova ðaivu bācavu Asia ãmicurijoborõre jocarí járejaimaða Pablöre Jūmenijicui cūrami jívui. Obedivu põevare jarare ðarejaimaða Pablöre. ²⁸ Ëre jēni, codoboborí arejaimaða:

—iMñja, Israecavu, cadatejarā ññjare! Ñai ñmu, ñrecabe buecunñu caino jaborõcavure, ne jápiabenajiyere ayu maja judiovare, ne ju abenajiyere ayu Jūmenijicui ðaicõjeiyede ñi coyuiye báquede Moisés bácure, aru ne pueðabenajiyere ayu Jūmenijicui cūramine máre. Aru davacube judíova ãmevure Jūmenijicui cūrami jívui. Que teni ãmeno ðaibi yo curõ Jūmenijicu jinore, arejaimaða na.

²⁹ Jipocamia járejaimaða Pablo cuyure Jerusalén ãmicurímaroi judíova ãmevucacumaque, ñi ãmiá Trófimo, Éfeso ãmicurímarocacu. Que baru ina judíova “Pablo nñvacube judío ãmecure Jūmenijicui cūrami jívui”, arejaimaða na ñbenina. ³⁰ Dinumu caivu ðiimarocavu jorojivu cýarí, cõjjini, Pablöre jēni, jabuborejaimaða Jūmenijicui cūramine jocarí. Cūiná biedejaimeða caicobea ðiñami jedevacobeare. ³¹ Ne boarí jarñvaríduiyedeca ñre, apevu põeva boro jarorejaimaða ñai churaravai jabocure. “Caivu Jerusalécavu cārijini jorojívubu”, arejaimaða ñre. ³² Maumejiena cõjjiovarí churaravare aru apevu ne jabovare máre, cýarí jõðari earejaimaða ina obedivu põeva yebai. Aru ne jáiyede ñai jabocure aru ina churaravare máre, Pablöre jara popeni ðajocarejaimaða na. ³³ Ne yebai dayu ñai jabocu, buoicõjenemeða Pablöre pñcama tãumeaque. Aru jēniari járejameða:

—¿Ñameña ñai? ¿Aipe tedi ñ?

³⁴ Apevu ina cõjjinocavu apeí arí codoboboyede, apevu máre apeita codoboborí ávarejaimaða na. Ne pare bujé boje, ñai jabocu coreóvabedejameða aipe aivure. Que baru churaravare nñvaicõjenemeða

Pablöre churaravai cūrami jívui.
³⁵Nuvarejaimada úre quédata mūicadavaita. Ūbenita ina obedivü pōeva ne jorojīye boje, íyurídurejaimada Pablöre cojedeca churaravare jocarī. Que baru úre dururejaimada, pōeva ne ímenajīyepē aivü úre. ³⁶Que teni ina obedivü pōeva nurejaimada ũi yóboi aru:

—iBoarí jaruvajarā úre! ¡Yaijácūrī ũi arī codoboborejaimada.

Pablo “Ámeno đabevü yu” arī, ũi yávaino

(Hch 5.34-39, 8.3, 26.9-11)

³⁷Ne nuvaiyede Pablöre buoimūpe churaravai cūrami, Pablo arejamedā griego ámicrīcamua yávaicamuaque ñai churaravai jabocu pñeno paracūre: —Yu mure coyūiyuvü, arejamedā Pablo. Aru ñai churaravai jabocu arejamedā Pablöre:

—¿Mu griegovai yávaiyede majicūrū?
³⁸¿Dinumu mu ámecurū añu Egiptocacu jabeteni pōevare nuvañu mácu yóvaicuvaimil paivu baju pōecubenoī, pōevare boaré đacuyü, me javejīene aru maucūvare đacuyü jabetēinore máre? arejamedā ñai churaravai jabocu pñeno paracu Pablöre.

³⁹Aru Pablo arejamedā úre: —Ñai ánevü yu. Yúvacari judíobu yu. Ciliciacaáimaro urarō Tarsocacubu yu. Jēniaivü mure. Coyūicōjejacu yure ina obedivü pōevare, arejamedā Pablo ñai jabocure.

⁴⁰Ñai churaravai jabocu pñeno paracu coyūicōjenejamedā úre. Que baru Pablo nūri noi mūicadavai, ũi pñuque jáđovarejamedā, ne bi arājīyepē ayu. Ne bi aiyede, Pablo coyūrī búrejamedā ne yávaicamuaque, judíovai yávaicamuaque, yópe arī:

22 ¹—Mūja, jívü aru jíbcūva máre, jápijarā ji coyūiyede ji đaiye báquede, arejamedā Pablo.

²Ne jápiayede ũi coyūiyede ne yávaicamuaque, pñeno baju bídeca jápiarejaimada na. Aru Pablo arī coyūrejamedā náre:

³—Yúvacari judíobu yu. Tarsoi pōetedejaquemavu yu. Que baru Ciliciacacubu yu. Ūbenita bucuóvarejaima yure yui Jerusaléi. Aru Gamaliel buedejame yure me caiye iye Jūmenijicui đaicōjeiyede ũi coyūiyē báquede Moisés bácure, majeñecuva mácavu ne đarī cōmajīye báquede. Cainūma memecaiyucacu Jūmenijicure ũi urōpe, nopedeca mūje đaiyepē caride. ⁴Que teni pare ñájine đacacu yu Jesúre ju aipōevare. Náre cunjurī, jēni, buocacu yu, ũmūvare aru nomivare máre. Aru apevure boarí jaruvaicōjecacu. ⁵Maje sacerdotevare jabetēipōecu aru caivu maje cójijinocavu máre jáđovari buojadama ji coyūiyede jáve. Na jíma yure paperayocare, ji buorī davaquiyepe aivü judíova Damascocavure Jesúre ju aipōevare pñ yui Jerusaléi, ñájine đarājivü náre. Que baru etacacu yu, nucuyü Damascoi, arejamedā Pablo.

Pablo ũi coyūino Jesús jicu teni buino mácarōre

(Hch 9.1-19, 26.12-18)

⁶Pablo coyūre nurejamedā, yópe arī: —Mái nuīyede Damasco joabenoī eaiyede járavu corica bajī, maumejiena cavarōre jocarī pēoávu yure urarō miadáro ji núroi. ⁷Que teni cūcumañu mori tucacu joborōi. Aru jápiacacu yávainore yópe ainore yure: “Mu, Saulo, ¿aipe teni maucūvacūrū mu yure?” jēniari jáme yure. ⁸“Mu, ji jabocu, ¿ñamenü mu?” acacu yu. “Yūrecabu Jesús Nazarecacu, mi maucūvamü”, áme yure. ⁹Aru ina ji yóvaimara no miadárore jáima. Ūbenita ñai yure yávayü bācu ũi yávainore jápiabeteima na. ¹⁰Aru jēniari jácacu úre: “Mu, ji jabocu, ¿yéde ji đainore ucūrū mu?” acacu yu Jesúre. “Nacajari ecojacu Damascoi. Noi apecu majicacuyūme mure aipe mi đaquinore yópe Jūmenijicui urōpe”, áme yure Jesús. ¹¹No miadáro mácarō yacorü cobovaiye boje, jáñu mácu jári eabetecacu. Que baru apevü ji yóvaimara ji pñuáre jēni nuvaima yure Damascoi.

¹²Noi cáteame cūinácu ũmu, ũi āmiá Ananías. Ũ mearore jiame Jūmenijicure jāve aru đayũ yópe Jūmenijicui đaicōjeiyede ũi coyuiye báquepe Moisés bácure. Aru caivũ pócavũ judíoiva ũre pueđarĩ me yávaquemavũ ũra. ¹³Ji yebai darĩ, nūri yure áme: “Mu, jícũ, Saulo, caride jáquijivũ mu cojedeca”, áme yure. Aru cūiná jári eacacu cojedeca. Jácasu ũre. ¹⁴Aru Ananías áme yure cojedeca: “Jūmenijicũ, ñai majeñecuva mácavũ ne ju aimũ ũi beoimũmu mu, majicuyũ ũi urõre, jácuyũ Jūmenijicure, ñai mearore đayure, aru jápiacuyũ ũi yávainore máre. ¹⁵Que baru mu coyucuyũmu ũi yávaiyede caivũ pōevare mi jáiye báquede aru mi jápaiye báquede máre. ¹⁶¿Yéde coreyurũ mu caride? Nacajari Jesúi parúeque jarũvajacu mi ámeina teiyede. Aru jáđovajacu Jūmenijicure ocoque”. Que áme Ananías yure, arejameđa Pablo.

Pablo ũi coyũino judíoiva āmevũre ũi bueinore
(Hch 7.58)

¹⁷Yópe arĩ, Pablo coyũre nurejameđa: —Ji copaiyede Jerusaléi, nũcacu Jūmenijicui cūrami, jēniacuyũ Jūmenijicure. Aru ji jēniaiyede, yũ arũcu jácasu ji jabocure yópe decoboainope. ¹⁸Ũ áme yure: “Ina Jerusalécavũ ju abenajivũbu mi coyuiyede ji yávaiyede. Que baru maumejiēna nũjacu yore jocarĩ”, áme ji jabocu yure. ¹⁹Ũbenita acacu yũ: “Mu, ji jabocu, návacari majima ji borore, buoicōjeñũ mácure aru jara popeicōjeñũ mácure máre ina mure ju aipōevare ne cójjiñamiamia coapa. ²⁰Aru apevũ ne boarĩ jarũvaiyede máre ñai Esteban mácure, mure coyũcayũ bácure apevure mi yávaiyede, yávacari nũcu, jáñũ, ju acacu yũ ne đaiye báquede. Aru ina ũ mácure boarĩ jarũvaiyvũ bécavũ pũenocacajea doicajeare jári corecacu yũ”, arĩ yávacacu yũ ji jabocure. ²¹Dinũmu ji jabocucapũravũ áme yure cojedeca: “Yávacari jaroquijivũ mure joarõi, mi coyũquiyepe ayũ ji yávaiye

méne judíoiva āmevũre. Que baru nũjacu mu”, áme yure ji jabocu, arejame Pablo ina obedivũ pōevare.

Pablo ũi yávaino churaravai jabocuque

²²Ũi nópe aiyeede, quénora ye jápaiyubedejaimađa ina pōeva, ũi judíoiva āmevũre coyuiye boje. Yópe arĩ, cođoborejaimađa: —iBoarĩ jarũvajarã ũre! iYaijácũrĩ ũi! Jáiyubevũ cucure yore, arejaimađa na. ²³Cođoborĩ, jipocatedejaimađa na. Pare jorojivũ, ne baju doicajeare tatorĩ jađevaiyvũ aru jobobicore đũvaiyvũ barejaimađa na. ²⁴Diede jáñũ ñai churaravai jabocu pũeno parũcu nũvaicōjenejameđa Pablõre churaravai cūrami jivũi. Noi jara popeicōjenejameđa ũre āimacajeque đaimeque. Ũre coyũre đaiyũrejameđa, majiyũcu aipe teni ina pōeva jorojivũre ũre. ²⁵Que baru ina churarava buorejaimađa Pablõre, međarĩ ũre ne jara popenajiyē jipocai. Ũbenita Pablo arejameđa apecu churaravai jabocure, apecu cāchino parũcure, nũcure ũi yebai: —Yúbu Roma jaboteinocacu. ¿Yure jara popeicōjeni mure ji ámeina đaiyede jáđovamecũva cāreja? arejameđa Pablo. ²⁶Diede jápiayũ ñai jabocu, nurejameđa ũi jabocu yebai, ñai Pablõre coyũicōjeimũ mácu. Aru arejameđa ñai churaravai jabocu pũeno parũcure: —Mu, ji jabocu, me đajacu mu. Ñai ũmu Roma jaboteinocacũbe, arejameđa ũ. ²⁷Que baru ñai churaravai jabocu pũeno parũcu nurejameđa Pablo yebai. Aru arejameđa ũre: —Coyũjacu yure. ¿Jāveneca Roma jaboteinocacurũ mu? arejameđa. Pablo arejameđa ũre: —Jũju, ũrecabu yũ, arejameđa. ²⁸Ñai jabocu pũeno parũcu arejameđa: —Ũrarõ tãuturare jícacu yũ Roma jaboteino jabovare, ne epenajiyēpe ayũ yure Roma jaboteinocacũva, arejameđa ũ.

Pablo arejameđa:

—Yurecabu Roma jaboteinocacu ji pōteinũmũmiareca aru jipacu máre ũi Roma jaboteinocacu bae boje, arejameđa.

²⁹Ina ũre jara popenajivu b́acavu que ayure jápiaivu, cūiná darúini nurejaimađa ũre jocarí. Aru ñai churaravai jabocu p̄eno parucu máre jidurejameđa, ũi buoiye báque boje Pablöre t́aumeaque, yópe Roma āmicarō jaboteino đaicōjemenope.

Pablo ũi yávaino judíovai jabovaque

(Mt 22.23, 23.27; Mr 12.28; Lc 20.27; Hch 26.5; Fil 3.5)

³⁰Ñai churaravai jabocu p̄eno parucu majiyurejameđa aipe teni ina judíova pare jorojivure Pablöre. Que baru cōmiáijaravui cójjicōjenejameđa caivu ina sacerdotevare jaboteipōevare aru ina judíovai jabova cójjinocavure máre. Churaravare jodeicōjenejameđa Pablöre. Aru n̄varejameđa ũre ne cójjino yebai.

23 ¹Pablo me jári, ina cójjinocavure arejameđa:

—M̄uja, jívũ, ýavacari cainũmua c̄vũ yũ, “Boropatebevũ yũ”, arí d́apiarí Jũmenijicui jáinoi, arejameđa Pablo.

²Ũi que aiyeda, ñai sacerdotevare jaboteipōecu, ũi amíá Ananías, ina ńurivure Pablo yebai, jara boaicōjenejameđa Pabloi j̄jecamure.

³Que teni Pablo arejameđa ũre:

—Mũ, j̄jovayũ, Jũmenijicu jara boac̄yũme mure. Yui mũ dobavũ, đac̄yũ yópe đaicōjeiye ainope. ¿Aipe teni ḿavacari đaicōjemec̄upe đayurũ mũ mi jara boaicōjeiyede yure? arejameđa Pablo.

⁴Apevu ũi yebai ńurivũ arejaimađa Pablöre:

—Mũ āmeina yávaivu Jũmenijicui sacerdotevare jaboteipōecure, arejaimađa.

⁵Que aivure, Pablo arejameđa:

—M̄uja, jívũ, coreóvabetevũ yũ ũre Jũmenijicui sacerdotevare jaboteipōecure. Yũ majicu baru, nópe abejbu yũ, Jũmenijicui yávaiyede

toivaiye báque boje yópe: “Āmeina yávabejarā m̄uja ñai m̄ujare jaboteyure”, arejameđa Pablo.

⁶Aru Pablo coreóvarejameđa apevu ina cójjinocavure saduceovacavure aru apevu fariseovacavure. Que baru arí codoborejameđa:

—M̄uja, jívũ, fariseovacac̄vũ yũ. Aru fariseovai ḿac̄vũ yũ. Buodama yure, ji bueiye boje maje coreiyede Jũmenijicui nacovaquiyede caivu yaivu b́acavure yainore jarũvarí, arejameđa Pablo.

⁷Ne jápiaiyede ũi coyuiyede, jararí búrejaimađa na. Ina saduceova ina fariseovaque cūináturu āmenejav̄yua ne ũme. ⁸Ina saduceova “Yainore jarũvarí nacajaino cubevũ, aru ángeleva, decova máre cubema”, ávadama. Ũbenita ina fariseova “Yainore jarũvarí nacajaino c̄vũ, aru ángeleva, decova máre c̄vũ”, ávadama. ⁹Ina cójjinocavũ pare jararí n̄vivũ, p̄eno baju codoboboivu barejáimađa na. Que teni apevu fariseovacavũ, Jũmenijicui yávaiyede coyuipōeva, nacajari, parũrõeca arejaimađa:

—Ñũje járu, āmeina tebecu bajube ñai ũmũ. Cūinácu decocu o cūinácu ángele máre coyũichubi ũre. Mauc̄vabenajarevũ maja Jũmenijicure, arejaimađa na.

¹⁰P̄eno baju jaraivu barejáimađa na. Ñai churaravai jabocu p̄eno parucu náre jáñũ, arí d́apiarí jid̄cũ, “Pablöre āmeina đarājichũma” ayũ, churaravare ina nuicōjenejameđa Pablöre cójjinocavure jocarí, ne n̄varejiiyere ayũ ũre churaravai c̄rami cojedeca.

¹¹Điñamimareca Jesús c̄ueteni n̄cu Pablo yebai arejameđa ũre:

—Jidubejacu mũ. Nópe mi coyuiyepedeca ji yávaiyede Jerusalécavure, coyũc̄yũmũ Romacavure máre, arejameđa Jesús Pablöre.

Pablöre judíova ne boarí jarũvaiyũrō

¹²Cōmiáijaravũ javej̄nara apevu judíovacavũ cójjivu yavenina, cūinátũrũ ne ũme, “Yópe đacarajaramu Jũmenijicure”, arejaimađa na.

—Ñuje boarí jaruvabedu Pablöre, Jãmenijicu jaruvajacurí ñujare toabo cüiméboi. Amenajivutamu aru ucumenajivutamu, ñuje Pablöre boarí jaruvarãjiye jipocai, parurõreca arejaimada na.

¹³Cuarenta paivu pñeno baju boaipõeva marejáimada na.

¹⁴Nurejaimada na sacerdotevare jaboteipõeva aru judíoiva bucüva yebai. Aru arejaimada náre:

—Ñuja parurõreca avu “Yópe ñacarãjaramu Jãmenijicure”. Ñuje boarí jaruvabedu Pablöre, Jãmenijicu jaruvajacurí ñujare toabo cüiméboi. Amenajivutamu aru ucumenajivutamu, ñuje Pablöre boarí jaruvarãjiye jipocai.

¹⁵Que baru mujavacari boro jarojarã ñai churaravai jabcu pñeno parucure, jëniarajivu ñi daroquiyepa aivu Pablöre muje cójijinoi cojedeca. Ajarã úre: “Pablöre jëniari jápiaiyurivubu ñuja bedióva cojedeca”, ajarã. Aru ñujacapüravu yavenina coreni boarí jaruvarãjivubu úre ñi edaquiye jipocai muje yebai, arejaimada na.

¹⁶Ûbenita Pabloi yucü iye borore ne ñarãjiyede jápiarejaimada. Que baru churaravai cürami nuri, ecorí, coyurejaimada ñi jápiaiyepa báquede Pablöre. ¹⁷Que teni Pablo órejurejaimada ñi yebai cüinácü churaravai jabcure. Aru arejaimada úre:

—Nuvajacu ñai bojuyore mi jabcu pñeno parucu yebai, ñi coyquiyepa ayu úre ñi jápiaiyepa báquede, arejaimada Pablo.

¹⁸Que baru ñai jabcu nuvarejaimada úre ñai jabcu pñeno parucu yebai. Aru arejaimada:

—Ñai buoimu ñi amía Pablo yure davaicõjeimi ñai bojuyore mi yebai, ñi coyquiyepa ayu mure ape borore, arejaimada ñi.

¹⁹Ñai churaravai jabcu pñeno parucu ñi amuve de jëni, úre nuvari apévure jocarí, yavenina jëniari járejaimada ñai bojuyore:

—¿Yéde coyuyucurü yure? arejaimada ñi.

²⁰Aru ju arejaimada ñai bojuyore:

—Ina judíoiva jabcu jëniarajivubu mure, mi jaroquiyepa aivu Pablöre ne yebai javenai, bedióva cojedeca úre jëniari jápiari ñbenina teiyurivu.

²¹Ûbenita apévu, cuarenta paivu, yavenina coreni, jaburãjivubu úre. Na “Áiyede amenjare aru ucuyede máre ucumenajare”, arãna na Jãmenijicure ne boarí jaruvarãjiye jipocai Pablöre. Caride coreivubu mi ju aiyede ne jëniaiyede. Que baru ju abejacu diede, arejaimada Pabloi yucü.

²²Aru ñai jabcu pñeno parucu ñai bojuyore coyucõjemenejaimada apévure iye ñi coyuyepa báquede úre.

—Coyubejacu apévure iye borore mi coreóvare ñaiyede yure, arejaimada ñai churaravai jabcu pñeno parucu.

Que arí, copaicõjenezaimada ñai bojuyore.

Ne jaroino Pablöre jabcu Félix yebai

²³Dinumuma ñai jabcu pñeno parucu daicõjenezaimada pucarã churara jabcu ñi yebai, aru arejaimada náre:

—Meatejarã muja doscientos paivu churarava cuivure, aru apévu setenta paivu caballovarã tubarivure, aru apévu doscientos paivu tãumure nuvaivure máre. Cari ñami nueve baji nuvajara muja Pablöre Cesareita. ²⁴Meadaajarã Pablöre máre ñi caballovare. Me nuvajara úre pu ñai jabcu Félix yebai Cesareai, arejaimada ñai churaravai jabcu pñeno parucu.

²⁵Aru ñi, yópe arí, toivarejaimada paperayocare:

²⁶“Yü, Claudio Lisias, toivacavü mure, ji jabcu Félide. Me cüjacu mü. ²⁷Apevu judíoiva tatorí jëma ñai ñmure, ñi amía Pablo. Boarí jaruvarãjivu batemã úre ji ñiyede ne yebai churaravaque, ji jápiaiyepa báque boje Pablo Roma jaboteinocacure. Úre ivu ñuja, ne boarí jaruvabenajiyepa aivu. ²⁸Aru coreóvayucacu yu aipe teni jaravure úre. Que baru nuvacarã úre ne cójijinoi.

²⁹Jarama úre judíoiva ne ñaicõjeiyepa boje. Ûbenita ñi ñaiyepa báque boje ñi yaiquino

jaubevu, úre buorājino máre. ³⁰Aru jí jápiaiyede apevu jári coreni, boarí jaruvaiyurivure úre yavenina, cūiná jaroivu úre mi yebai. Aru soyuicōjeivu úi mauvare mi jipocai, ne boro soyurí adarājiyepe aivu”, arí toivarejameđa nai churaravai jabocu pueno parucu.

³¹Dinumu ina churarava, ne jabocu đaicōjeiye báquepe, nuvarejaimađa Pablöre nāmi pu Antípatris āmicuriīmaroita. ³²Cōmiáijāravu ina cuivu copainurejaimađa churaravai cūrami. Ūbenita ina caballovarā tubarivu yóvarejaimađa Pablöre cojedeca. ³³Ne eaiyede Cesarea āmicuriīmaroi, nai jabocu Félix yebai nuri, jídejaimađa úre diyoca paperayocare aru Pablöre máre.

³⁴Diyocare jári boroteniburu yóboi, nai jabocu jēniari járejameđa árocacure Pablöre. Aru úi coreóvayede Cilicia āmicurijorōcacure, arejameđa úre:

³⁵—Jápiacuijivu mi soyuiyede mi mauva ne edaiyede, arejameđa Félix Pablöre.

Que arí, Félix churaravare nuvaicōjenejameđa Pablöre Herodes bācui cūrami, jabovai cūrami, ne jári corenajiyepe ayu úre noi.

Pablo “Āmeno đabevu yu” arí, úi yāvaino Félide
(Hch 21.17-28, 23.6)

24 ¹Cūinápurupe pajāravua yóboi, nai sacerdotevare jaboteipōecu, Ananías, earejameđa Cesarea āmicuriīmaroi apevu judíova bucuvaque aru Roma jaboteino đaicōjeiyede bueipōecuque, úi āmiá Tértulo. Tértulo soyucacuyu barejámeđa ina judíovare. Que baru jabova ne āmeina teivure jēniari jáiñami nurejaimađa, boro soyurí adaridurājivu Pablöre nai jabocu Félix úi jivateinoi. ²Churarava ne davaiyede Pablöre noi, Tértulo yópe arí, boro soyurí adaridurejameđa:

—Mū, nūje jabocu, meacubu mū, mi majié boje. Mi jaboteiyede obedijāravuai cārijimena cuvū nūja. Ūrarō mearore đacaivu mū caivu nūje joborōcavure.

³Que baru caivu nūje ĩmarocavu torojurí āruvu mure. ⁴Ūbenita coreóvaivu cōmaje āroje jáñure mū nūjare. Que baru joe baju nūmequiyepe ayu maje boroteino, jēniavu mure mi jápiaquiyepe ayu nūje boro quíjinore.

⁵Nai ūmu Pablo pare cārijovaimi ū. Caino joborōi maucuvare đabi judíovare ne baju, úi apede bueiye boje. Apeyajubo, nazareno āmicuriyajubo jabovacacube ū. ⁶Aru āmedarīduame ū Jūmenijicui cūramine. Ūbenita jēcarā nūja úre. Aru nājine đarājivu batecarā úre nūje đaicōjeiyepe. ⁷Ūbenita nai jabocu Lisias darí churaravaque, ĩame úre nūjare jocarí parurōque. ⁸Aru boro soyurí adaicōjeame nūjare mi yebai. Mū jēniari jápiayu baru úre, majini buojacuyumu caiye nūje soyuiyede úra jāvene, arejameđa Tértulo Félide.

⁹Aru ina judíova máre nopedeca boro soyurí adaridurejaimađa Pablöre, ju arí caiye iye Tértuloi yāvaiye báquede. ¹⁰Dinumu nai jabocu Félix jáđovarejameđa Pablöre, úi soyuquiyepe ayu ūi borore. Que baru arejameđa:

—Obediujua javede pu caride máre mū jápiaivu nūje boro soyurí adaiyede nūje joborōcavure. Que baru torojurí soyuyubu ji borore, mi majiquiyepe ayu diede. ¹¹Mū majini buojacuyumu jāve ji soyuiyede. Quénora doce pajāravua vaivu caride, ji eaiye báquede Jerusaléi. Nore nucacu yu, mearore jícuu Jūmenijicure. ¹²Yu jarabetecacu apecure. Aru cārijini jorojīmetecacu cójijivure. Jūmenijicui cūrami, aru judíovai cójijīñamiai, aru tībui máre. Yópe ne boro soyurí adaiyepede đabetecacu yu. ¹³Buojabema jáđovaivu jāve āmeno đayure yure yópe ne soyuiyepede. ¹⁴Ūbenita jāvemū “Pablo ju aibi Jesús Nazarecacu úi bueiyede”, ne soyuiyepede yurā. Ju ayubu yu Jūmenijicure, nūjeñecuva māvavu ne mearore jímuve. Mearore jíyubu yu Jūmenijicure yópe ina judíova “Apede bueibi”, ne aiyepedeca yurā. Ūbenita ape bueiye ānevū. Ju ayubu yu caiye iye Jūmenijicui đaicōjeiyede úi soyuiyepede

báquede Moisés bácare aru caiye iye Jūmenijicui yáviyede coyucaipōeva mácvu ne toiviye báquede máre.

¹⁵Yū coreivu Jūmenijicu nacovacayure caivu yaivu bácvure yainore jaruvarī, mearare aru āmenare máre, yópe judíova ne coyuiyepedeca. ¹⁶Que baru yávacari cainmua daiyuvu yu, “Boropatebevu yu”, arī dāpiarī Jūmenijicui jáinoi aru pōeva ne jáiyede máre.

¹⁷Obedijua cútecacu arenoa joborōai. No yóboi, copaincacu Jerusaléi cojedeca, táuturare jícvu judíova cōmaje ārojarivure aru ape jícaiye jícvu Jūmenijicure máre.

¹⁸Ji Jūmenijicure jíquiye jipocai, dacacu yópe Jūmenijicui daicōjeiyede ūi coyuiye báquepe Moisés bácare meacu bacuyú Jūmenijicui jáinoi. No yóboi, apevu judíova, Asiavuvu, jáima yure Jūmenijicui cūrami jívu, jíyure ji jícaiye Jūmenijicure. Ūbenita cójijivu cubetema ji yebai. Jaraino máre cubeteavū. ¹⁹Que baru boro coyurī adarādarārī ina Asiavuvuacari yui mi jipocai, na jáivu bácvu baru yure āmeina teyure. ²⁰Aru ne coyūbedu, coyūjarārī ina ūmva yui curivu, aipe ji āmeina teiyede ne eaiye báquede ji cūe báquede judíovai jabova ne cójijinoi.

²¹Quénora arājichuma na: “Pablo cacu ñuje cójijinoi, yópe arī cođoboboame, ‘Buodama yure, ji bueiye boje maje coreiyede Jūmenijicu nacovacayure caivu yaivu bácvure yainore jaruvarī’”, arājichuma na ji borore, arejameda Pablo Félide.

²²Aru Félix, Jesús ūi yáviye méne coreóvayū me, ūi jápiayede diede, dajocaicōjenejameda ne coyuiyede apejārvuūta, yópe arī:

—Ñai jacobu Lisias ūi daiyede, yu coyucayumu mi ñájinu, arejameda Pablöre.

²³Que arī buojarī, Félix coyurejameda ñai churavai jacobure, Pablöre davayū bácare. Ūre nuvaicōjenejameda Pablöre jabovai cūrami cojedeca, churava ne jári corenajiyepe ayū ūre noi. Ūbenita

daicōjenejameda Pablöre yópe ūi urōpe aru járadaicōjenejameda ūre ūi yóvaimarare, ne cadatenajiyepe aivu ūre jauéde. ²⁴Apejārvuua yóboi, Félix copaidarejameda cojedeca jímarepacomaque, judíovacaco, ōi āmiá Drusila. Ōrejaicōjenejameda Pablöre ne yebai, ne jápiayue boje ūi coyuiyede aipe darī pōeva ju aivure Jesúre. ²⁵Que teni Pablo náre coyurejameda pōevare ne mearo daiye jauéde apevure yópe Jūmenijicui daicōjeiyepere, aru pōevare ne curī majié jauéde ne baju coapa, aru Jūmenijicui ñájinu daquiye pōevare ne āmeina teiye boje máre. Aru iye coyuiyede jápiayū, Félix cuicumari arejameda Pablöre:

—Quénoramū caride. Nujacu mū.

Apejārvuua ōrejaquijivu mure cojedeca, arejameda Pablöre.

²⁶Obedijārvuui Félix daicōjenejameda Pablöre ūi yebai, borotecuyū ūque, ūi coreiye boje ūi jíquiyepe ayu táuturare. Táuturare ūi júdu, Félix jaetovajebu ūre. ²⁷Ūbenita pūcaujua yóboi Félix ūi jaboteino cūinējavūya. Ū torojure daiyurī judíovare, dajocarejameda Pablöre buoimūpe. Aru apecu jaboteni bárejameda, ūi āmiá Porcio Festo.

Pablo ūi yávaino jacobu Festoque

25 ¹Festo earejameda dijaborōi aru yóbecurijārvuua yóboi muri nurejameda Cesarea āmicurīmarore jocarī pū Jerusalén āmicurīmaroi. ²Noi ina sacerdotevare jaboteipōeva aru apevu judíovai jabova máre ūi yebai earī, āmeno boro coyurī adarīdurejaimada Pablöre.

³Jipocamia ina jabova arejaimada ne baju: “Boaipōevare coreni, jaburī boarī jaruvaicōjenajarevu Pablöre”, arejaimada yavenina. Que baru parurōque jēniariduvai barejaimada ñai jacobure, ūi ju aqiyepere aivu náre yópe ne urōpe.

—Copaide dajacu mū Pablöre Jerusaléi, arī jēniaridurejaimada na.

⁴Ūbenita Festo arejameda náre:

—Pablo buoimū cubi Cesareai.

Maumena nuñumu yu noi. ⁵Que baru

yóvararāri yure mije jabova Cesareai, ne boro coyurī adarājiyepe aivu Pablore noi, ũi āmeina tedu, arejameđa Festo.

⁶Pu ocho pajārvava ũi maute niburu yóboi nore, Festo emenejameđa Cesarea āmicurīmaroi. Aru cōmiájārvavu jabova ne āmeina teivure jēniari jāiñami nuri, dobarejameđa, jápiacuyu ne boro coyurī adarīduiyede. Aru davaicōjenejameđa Pablore. ⁷Ũi eaiyede, ina judíova Jerusalén āmicurīmarocavu daivu bācavu nūrejameđa ũi yóboi. Urarō āmeno boro coyurī adarīduivu barejameđa ũi borore. Ũbenita ye buojabedejameđa jádovaiyu jāve ne borore. ⁸Pablocapūravu arejameđa:

—Judíova ne đaicōjeiyede, aru Jūmenijicui cūramine, aru ñai jabocu ijārvavacacu pueno baju parucure máre, āmeina đabevu yu, arejameđa Pablo.

⁹Ũbenita Festo judíovare torojure đaiyu, yópe arīdurejameđa Pablore:

—¿Muri nuiyubecurū mu Jerusaléi? Noi yávacari jápiacuyumu cojedeca mi borore, “Āmeno đabetequemavu mu” acuyu o “Nájicuyumu mi āmeina teiye boje” acuyu, arejameđa Festo.

¹⁰Ũbenita Pablocapūravu arejameđa ũre:

—Núvu yu caride Roma jaboteino jabova ne āmeina teivure jēniari jāiñami. Yuita međaiye javvu yure, etacuyure o nájicuyure. Múvacari me coreóvaivu. Ye āmeno đabotecacu yu judíovare. ¹¹Ji āmeina đaiye boje, boarī jaruvaiye javrō maru yure, jidubejebu yu ji yaiquínore. Ũbenita ne boro coyuiye jāve āmenu, pōecu cubebi buojarī jiyu yure náre. Que baru jēniaivu mre jarocuyure yure ñai jabocu ijārvavacacu pueno baju parucu yebai, ũi baju međaquiyepu ayu yure, arejameđa Pablo.

¹²Dinumu Festocapūravu borotedejameđa ũre cađateipōevaque. Aru boroteni buojarī arejameđa Pablore:

—Ñai jabocu ijārvavacacu pueno baju parucu yebai nuiyuvu mu. Que baru nucuyumu ũi yebai, arejameđa Festo.

Pablo ũi yávaino jabocu Agripa que

¹³Apejārvava yóboi, ñai jabocu Agripa, jíbucomaque, ői āmiá Berenice,

earejameđa Cesarea āmicurīmaroi. Jacoyurānurejameđa Festore. ¹⁴Aru obedijārvava maute de jameđa na. Cūinájārvavu Festo coyurejameđa náre Pabloi borore.

—Yui cubi cūinácu ũmu, Félix ũi buorī epeimū mácu. ¹⁵Ji cue báquede Jerusaléi, sacerdotevare jaboteipōeva aru judíova bucava máre āmeno boro coyurī adarādarīduima ũre ji yebai. Jēniariduima yure ji nájine đaquiyepu aivu ũre. ¹⁶Ũbenita yu acacu náre: “Yópe đarī cōmajiyama Romacavi jabova. Mamarumure ina boro coyurī adaiyūque copu yávare đarī cōmajiyama ñai ne coyurī adaimūque, ũ máre ũi coputequiyepu aivu náre. Naja Romacavi jabova yópe đabevu baru mamarumure, jibevu pōecure ina boro coyurī adaiyure”, acacu yu náre. ¹⁷Que baru ne edaiyede yui, joe corebecava, cōmiájārvavure dobatecacu jabova ne āmeina teivure jēniari jāiñami jívui. Aru davaicōjecacu ñai ũmure. ¹⁸Dápiayu barīducacu ina judíova boro coyurī adarājiyure ũre urarō ũi āmeina teiye báquede. Ũbenita coyurī adaiyu ye yávabeteima urarō ũi āmeina teiye báquede yópe ji dápiarīduino mácarōpe.

¹⁹Quénora jorojīma ũre ne buei yede jēvari Jūmenijicure aru cūinácu Jesús āmicacu yayú bácu. Ũbenita Pablocapūravu parurōreca coyuyube ñai Jesús apucure cojedeca. ²⁰Ũcapūravu ye majibotecacu caiye iye ne borore. Que baru jēniari jácacu Pablore: “¿Muri nuiyubecurū mu Jerusaléi? Noi yu jápiacuyumu cojedeca mi borore”, acacu ũre. ²¹Ũbenita ũcapūravu jēniáme: “Jarojacu yure ñai jabocu ijārvavacacu pueno baju parucu yebai, ũi jápiaquiyepu ayu ji borore”, áme yure. Que baru churaravare coreicōjecacu ũre buoimure ji jaroiyeta ñai jabocu ijārvavacacu pueno baju parucu yebai, arejameđa Festo Agripare.

²²Aru Agripa arejameđa:

—Yávacari jápiaiyuvu ñai ũmure, arejameđa.

Que baru Festo ju arejameđa:

—Javena úre jápiacuymu m̄, arejamedá.

²³Cōmiájāravui Agripa Berenicemaque earī cōjjiñami uradāmi, ecorejaimada noi pōeva ne urarō pueđaiyede náre ne ecoiyede. Caivu ina churaravai jabova paruriv̄u, aru caino diimarocav̄u paruriv̄u máre ecorejaimada diñami náque. Aru Festo davaicōjenezamedá Pablöre. ²⁴Que teni Festo arejamedá:

—M̄, judíovai jaboc̄u, aru caivu muja ñujaque curiv̄u máre, jáivubu ñai ñmure. Caivu ina judíova Jerusalécav̄u aru yócv̄u máre ámeno boro coyurī ađarıduima ñi borore. Cođoboborī, “Úre boarī jaruvajacu”, p̄eno baju aima na. ²⁵Úbenita yúcapurav̄u ye ñi ámeina teiyede eabev̄u yu. Ji járu, ñi đaiye báque boje boarī jaruvaiye jaubev̄u úre. Ñai Pablocari jēniáme ñai jaboc̄u ijārav̄ucacu p̄eno baju paruc̄u jápiacuym̄e ñi borore. Que baru arī dāpiacacu: “Jaroc̄uym̄e úre ñai jaboc̄u ijārav̄ucacu p̄eno baju paruc̄u yebai”, acacu yu. ²⁶Úbenita yúcapurav̄u majibev̄u yéde ji toivaquiyede ñi borore ñai jaboc̄ure, ñi majiquiyep̄e ayu Pabloi ámeno đaiye báquede. M̄, ji jaboc̄u Agripa, que baru daicōjeiv̄u úre yui m̄je yebai. Maje úre jēniari jápiarīburu yóboi, yu majiquijichuv̄u ñi ámeno đaiye báquede, toivacuym̄ ñai jaboc̄u ijārav̄ucacu p̄eno baju paruc̄ure. ²⁷Buoimure jaroiye majibev̄u yu jaboc̄u yebai, coyubec̄uva aipe đarī ñi ámeno đaiye báquede, arejamedá Festo náre.

26 ¹Din̄m̄ Agripa arejamedá Pablöre:

—Caride coyujacu mi borore, arejamedá.

Que aiyede, Pablo jabióvarī ñi p̄ur̄e, yávarī búrejamedá, coyuc̄uym̄ ñi borore:

²—M̄, ñuje jaboc̄u Agripa, caride torojuv̄u yu ji úme mi jápiaquiyep̄e ayu ji coyuiyede caiye iye ne ámeno boro coyurī adaiyede yure ina judíova.

³Múvacari coreóvaiv̄u me judíova ne đarī cōmajiyede aru ne bueiyeđe máre. Que baru jēniav̄u mi jápiaquiyep̄e ayu ji coyuiyede napiyeque, arejamedá Pablo.

Pablo ñi coyuiño ñi đaiye báquede Jesús jicu tequiyep̄e jipocai
(Hch 23.6; Fil 3.5)

⁴Pablo, yópe arī, coyure n̄rejamedá:

—Ina judíova coreóvadama aipe c̄uc̄ure yu ne jēneboi juedoc̄u c̄areja aru caride máre, mamarum̄re ji cuede ji imaroi aru no yóboi ji cuede Jerusaléi máre. ⁵Joe baju yurecavu c̄uináyajubo fariseo ámicurijajubocacu. Ñuja fariseova mearore jiv̄ubu Jūmenijic̄ure yópe ñi daicōjeiyede ñi coyuiye báquepe Moisés bácvure caivu apevu judíova p̄eno baju. Ina judíova urivu baru, ju ajebu jáve iye ji coyuiyede. ⁶Caride núvu yu yui, ne boro coyurī adaim̄u, ji coreiye boje Jūmenijic̄u mearo đacaquiyede ñujare yópe ñi aipe báquedep̄eca ñujeñec̄uva mácvure. ⁷Aru caivu ñuje doce paiyajuboc̄avu Israec̄avu máre coređama yópe ji coreiyepe. Que baru mearore jiyama na Jūmenijic̄ure jārav̄ure aru ñamine máre. Aru m̄, ñuje jaboc̄u Agripa, ina judíovavacari boro coyurī adaiyubu yure, iye ji coreiye boje. ⁸¿Aipe teni “Jūmenijic̄u nacovañu buojabebi yaivu bácvure yainore jaruv̄arī”, arī dāpiaiv̄urū muja? arejamedá Pablo.

Pablo ñi coyuiño ñi ñájine đaiye báquede Jesúre ju aip̄ōevare

⁹Yópe arī, coyure n̄rejamedá Pablo:

—Javede yávacari yópe arī dāpiacacu: “Jesús Nazarec̄ure ju aip̄ōevare mauc̄uv̄e jav̄u yure”, acacu yu. ¹⁰Yópe đacacu yu Jerusaléi: Obediv̄u ina Jesúre ju aip̄ōevare jēni, buorī, jarocacu yu náre ámeina teiv̄ure jēni jacoñamiai, yópe ina sacerdotevare jaboteip̄oeva ne daicōjeiyede. Aru ne boarī jaruvaiyueđe náre, yu máre ju acacu diede. ¹¹Obedijārav̄ua yu nuc̄acu judíovai cōjjiñamiai, ñájine đac̄uym̄ ina Jesúre ju aip̄ōevare. Jesúre ju abede đarīduc̄u yu náre. Aru ji urarō baju jorojiye boje náre, yu c̄ujuc̄u náre apeimaraoita, arejamedá Pablo.

Pablo ñi coyuiño cojedeca Jesús jicu teni buino mácarōre
(Hch 9.1-19, 22.6-16)

¹²Yópe arī, coyure n̄rejamedá Pablo:

—Cūinājāravu Damasoi nūcasu yu ina sacerdotevare jaboteipōevai paruéque, đacuyu yópe ne đaicōjeiyepe. ¹³Aru mu, ñuje jabocu Agripa, ji nūiyede mái jāravu corica baji jácacu cavarōre jocarī urarō miadárore, aviá ũi pueno cojinore. Pēoávu ñuje yebai, yure aru yáque nuivure máre. ¹⁴Que baru cuccumaivu caivu mori tucarā joborōi. Aru jápiacacu apeno yávainore ñuja judíova ñuje yávaicamuaque, yópe ainore: “Mu, Saulo, ¿aipe teni maucuvacurū mu yure? Yópe đayū, mávacari ñájine đavū mu mi bajuma, yópe cūinácu oteiáimacu uracu ũi ñájine đaiyepe ũi bajure tātāñu abodo juijóiyore”, áme yure. ¹⁵“Mu, ji jabocu, ¿ñamenu mu?” acasu yu. “Yurecabu Jesús, ñai mi maucuvamu. ¹⁶Caride nacajari nújacu. Yu jáđovaivu mure, ji baju mi memecaquiyeye ayu yure. Beoivu mure, mi coyūquiyeye ayu aprevure yópe mi jáinope yure caride. Aru mi jáquiyede yure bedíova coyūcuyumu diede máre. ¹⁷Que baru jaroquijivū mure, mi coyūquiyeye ayu ji yávaie méne judíovare, aru judíova ámevure máre. Aru yu jodecuyumu mure, ne ámeno đabenajiyeye ayu. ¹⁸Mi coyūquiyede judíova ámevure, yu jápiarī eare đacuyumu náre, ne dajocarājiyeye ayu ne ámeina teiyede yópe ñeminoi cuiyepe, aru ne ju arājiyeye ayu yure yópe miadároi cuiyepe. Yu jaetovacuyumu náre ñai abujuvai jabocu Satanás ũi jaboteinore jocarī. Aru ecovacuyumu náre Jūmenijicui jaboteinoi. Que teni yu árumetecuyumu ne ámeina teiyede, ne yure ju aie boje. Aru Jūmenijicui pōevaue curājarama na”, áme Jesús yure, arejameđa Pablo.

Pablo ũi coyūino ũi đaiyede Jesús đaicōjeinore ũre decoboainoque
(Hch 9.20, 28-29; 1 Co 15.20)

¹⁹Yópe arī, coyure nurejameđa Pablo: —Mu, ñuje jabocu Agripa, ñai cavarō mearo Jūmenijicui curōcacu ji jáimū mácure jáve ju acasu yu. ²⁰Que baru coyūcasu matarumure Damascocavure,

aru no yóboi Jerusalécavure, no yóboi caino Judeacavure, aru no yóboi judíova ámevure máre. Coyūcasu náre: “Chíojara muja muje ámeina teiyede. Aru jaruvajarā diede. Oatuvajarā muje đaiyede. Aru đajarā yópe Jūmenijicui urōpe, apenv pōeva ne majinajiyeye ayu jáve muja ju aivure Jūmenijicure”, arī coyūcasu náre. ²¹Ji nópe bueiye boje, ina judíova yure jēni boarī jaruvarīduima Jūmenijicui cūrami jívu. ²²Ūbenita javede aru caride máre Jūmenijicu cađateibi yure. Que baru yu yui núcu, coyūivu yávaieyede jávene caivure, paruvure aru parubevure máre. Quénora coyūivu yu yópe Jūmenijicui đaicōjeiyede ũi coyūie báquepe Moisés bácu aru ina Jūmenijicui yávaieyede coyūcaipōeva mácavu ne toivaiye báquepe ne coyūcaiyede, “Yópe vaiquíyebu. Que ayube Jūmenijicu”, ne aie báquepedeca. ²³Yópe arī, toivarejaquemavu na: “Cristore, Jūmenijicui daroquimure, javū ũi ñájiqiyeye, aru ũi yaiquíyeye, aru ũi nacajaquiyeye yainore jaruvarī caivu apenv jipocai. Que đarī yópe pēoino járe đaiyepe pōevare, nopedeca Cristo jáđovacuyume judíovare aru judíova ámevure máre Jūmenijicui meadaquiyede náre”, arejameđa Pablo.

Pablo “Ju ajacu Jesús” ũi aríduino jabocu Agripare

²⁴Pablo ũi coyūiyede, Festo codoboborejameđa ũre:

—Mu, Pablo, árumevu mu. Mi pare bueiye boje, árumevu mu, arejameđa ũre.

²⁵Ūbenita Pablo arejameđa ũre:

—Mu, ñuje jabocu Festo, árumecu ámevu yu. Quénora coyūivu yávaieyede jávene ji ũmei. Ūbenina ayu ámevu yu.

²⁶Ñai jabocu Agripa majibi caiye iye ji coyūiyede. Que baru yu jidubecūva coyūivu ũre. Yavenina ámeno đaiye ámevu iye. Que baru javede jápiaquemavu diede ñai jabocu Agripa, arejameđa Pablo.

²⁷Que ayu, Pablo arejameđa Agripare:
—Mu, ñuje jabocu Agripa, ina Jūmenijicui yávaiyede coycaipōeva mácvu ne toivaiye báquede ju aivu mu. Majivu yu mu ju ayure, arejameđa úre.

²⁸Agripa arejameđa Pablöre:

—Mi coyūinoque quíjino baju yure ju are đarídivu mu Jesúre, arejameđa.

²⁹Aru Pablo ju arejameđa úre:

—Quíjino baju meajebu. Úrarō baju máre meajebu. Yu Jūmenijicue jēniacaivu caivu mujare, muje ju arājīyere ayu úre aru muje nurajīyere ayu yupe paivu, ubenita buoimeaque cubevva, arejameđa Pablo.

³⁰Dinumu ñai jabocu Agripa, ñai jabocu Festo, Berenice, aru náque dobarivu máre nacajari etarejaimađa nore jocarī. ³¹Ne etarīburu yóboi, arejaimađa ne bajumia:

—Ñai ūmu ūi đaiye boje yaiquino jaubevu úre, aru buoino máre. ³²Pablo ūi abedu “Jarojacu yure ñai jabocu ijāravucacu pueno baju parucu yebai, ūi jápiaquiyere ayu ji borore”, maja buojajebu etaicōjeivu úre. Úbenita ūi nōpe jēniaye boje, maja buojabevu etaicōjeivu úre, arejameđa Agripa Festore.

Pablöre ne jaroino Romai

27 ¹Ñai jabocu ijāravucacu pueno baju parucu surejameđa Italia āmicurijoborōi. Que baru Pablöre aru apevu buoimarare máre Festo coreicōjenejameđa cūinácu churaravai jabocure, ūi āmiá Julio, ūi nuvaquiyere ayu náre Italia āmicurijoborōi jiađocū uracū ūmevu japuino nuicūque. Ñai Julio cien paivu churaravare jabotedejameđa. Ne yajubo “Augusto jina churaravayajubo barejávūya. Aru yu máre nucuyu barejacácu. ²Que teni jatujacará cūinácu jiađocū uracūi, Adramitio āmicurīmarore jocarī daicū mácarōi. Dicū etaquicū marejávū, tuijaquicū imaroa coapa Asia āmicurijoborōi jia urada écarui. Aru Aristarco máre, Macedonia āmicurijoborōcarō imaro

Tesalónica āmicurōcacu, yóvarejame ñujare. ³Ūmevunque nuri, cōmiájāravui tuijarejacadā Sidón āmicurīmaro écarui. Julio me járejame Pablöre. Que baru maicōjenejame úre ūi yóvaimara nócvu yebai, ne jīnajiyepe ayu úre jauéde.

⁴Jaturī cojedeca, etarejacadā nore jocarī. No ūmevu japuiye boje ñujare copu, vaidéjacadā Chipre āmicurijavure ñuje cācopūravui. Dijíavū cue boje, ūmevu āmedabedejavū ñujare. ⁵Dijíavure vainíburu yóboi, jatarī jia uradaí, vainí Cilicia aru Panfilia āmicurijoborōare, earejacadā Licia āmicurijoborōcarōi, Mira āmicurīmaroi.

⁶Noi Julio vorī earejame apecū jiađocū uracūre, ūmevu japuino nuicūre, Alejandría āmicurīmarore jocarī daicū mácarōre. Etarī, nuicū tuijaquicū marejávū Italia āmicurijoborōi. Que teni jature đarejame ñujare dicūi. ⁷Bedióva ūmevu japuiye boje ñujare copu, duibajīeneca nurejacadā obedijāravua. Eabenidurejacadā Gnido āmicurīmaroi. Aru ūmevu nuicōjemenejavū ñujare ñuje nurié nuinoi. Que baru eaivu Salmócāpido āmicurīmaroi, vaidéjacadā Creta āmicurijavure ñuje meapūravui. Dijíavū cue boje, ūmevu āmedabedejavū ñujare. ⁸Duibajīeneca nuri, tuijarejacadā Mearoa tuipāva āmicurīmaroi, Lasea āmicurīmaro joabenomía.

⁹Obedijāravua vaidéjavū. Aru judíovai torojuve teijāravu máre, ne ānurijāravu Jūmenijicui ārumeteiyede ne āmeina teiyede, vaidéjavū. Ocorūmu joabe boje, pōeva ne nuino maru jiađocū uracūque, jidojarō marejávū. Que baru Pablo majicarejame náre, ñujaque nuivure:

¹⁰—Muja jápiajarā. Maje nuru jia uradaí cojedeca cari, meamequiyebu. Ocorūmu boje, bíjaquiyebu dicū, aru caiye maje nuvaiye máre dicūi. Aru maja máre corí bjarājaramu, arejameđa Pablo, majicayū.

¹¹Úbenita dicū upacu aru dicūre cōjeipōecu máre ju abedejaima Pablöre. Aru Julio jápiarejame náre Pablöre pueno. ¹²Mauteino meamenejavū ocorūmure diímaro, Mearoa tuipāvai.

Que baru apevu obedivu pōeva dicūcavu etaiyurejaima nore jocarī, nuridurājivu apeno tuiḡāvai, Fenice āmicurīūmaroi. Coreiyurejaima ocōrūmu vaiyede nore. Fenice Creta āmicurījiavui cūvu. No tuiḡāvai curī, jia uradare aviá ūi darī doinocapūravui, aru aviá ūi darī doino meapūravui máre jáino marejávū. Que baru jiaḡocū jorī noi, javaiyorejavū ocōrūmure.

Jia urada pācaibo urabo daino

¹³ Ūmevu japuino oatuvaiyede, duibajieneca japuiyede aviá daino cācopūravure jocarī, jiaḡocū uracūre memeipōeva jāmuórejaima ducuribore, dicūi numene ḡaibore. Nurejacarā dicūque Creta āmicurījiavu ēcarui joabejinoi. ¹⁴ Ūbenita no yóḡīboi, ūmevu pare parurō japurejavū dijiávu apedūvede jocarī, aviá ūi darī doino cācopūravure daino. ¹⁵ Aru no ūmevu pare japurejavū ḡuje jiaḡocūre. Que teni ūmevu ḡuje jipocai japuiye boje, nuri buojabedejacarā. Numenejacarā ḡuje nuīyūrōre. Que baru dicūre copediovarī, ūmevure japuroicōjenezacarā ūmevu nuinoi. ¹⁶ Vaidéjacarā Cauda āmicurījiavure ḡuje meapūravui. Dijíávu cue boje, ūmevu āmedabedejavū ḡujare. Aru apēcū quījicūre, uracūi dabuboicūre, jāmuóiyurejacarā, adarājivu uracū jívui. Ūbenita nópe ḡaivu pare ḡājinejacarā. ¹⁷ Quījicūre meadarīburu yóboi, ina memeipōeva buorejaima uracūre buoimea uramea parurimeaque. Ūracū cāchino dimeáre epeni, me buorejaima na, dicū copobequiyepe aivu. No yóboi, ne jidué boje dicū eajuroede Libia āmicurījiborōi, noi ēcaru joabenoī ēpacūrō, pare meameno, Sirte āmicūrō, jiaḡocūare jēino, jōdovarejaima uracaje ūmevu paicajede, ēpacū jēmequiyepe aivu ḡuje jiaḡocūre. Que teni ūmevuque nurejacarā ḡuja. ¹⁸ No ūmevu ye bījabedejavū. Quénora cainumua pueno baju japurejavū no. Aru pācaiboa máre uraboa baju jāriyadedejavū dicūre. Que baru cōmiájījaravui nūvaiyede jarūvarī būrejaima jia uradaī. ¹⁹ Cōmiájījaravui

jarūvarejacarā apeno dicūcarōre: cajeáre, buoimeare, aru aboḡoare máre. ²⁰ Obedijāravua jámenejacarā aviáre aru abiácovare máre. No ūmevu, pācaiboa máre ye bījabedejavū. Quénora cainumua pueno urarō baju nurejavū no. Que baru “¿Bījarājivu bārica jia uradaī?” arī dápiarejacarā ḡuje baju.

²¹ Obedijāravua ye āmenejaima na. Aru Pablo darī, nūri ne jēneboi arejame náre:

—Muja jápiabetevu yure ji coyurīduiye báquede ḡujare. “Cretare jocarī nuīye jaubevu majare”, arīduvu yu. Maje dabedu, yópe tede ḡabejebu majare. Ūbenita maje daiye boje vaivu majare yópe. ²² Yu coyuyubu ḡujare: Jidubejarā. Majacacu ye cūinácu bījabequijibi. Quénora dicū jiaḡocū uracū bījaquiyebu. ²³ Nópe majivu yu, cūinácu ángele ūi coyuiye báque boje yure cari ḡami marede. Jūmenijicu, ji jabocu aru ji mearore jímū máre, ūi daroimū matecúbe ḡai ángele. ²⁴ Ji yebai darī, abi yure: “Mu, Pablo, jidubejacu. Mi nuquiye boje ḡai jabocu ijāravucacu pueno baju parucu yebai, Jūmenijicu ūi me boje, caivu ina múque jiaḡocū uracūi nuīvu yaibénajarama na”, abi yure ḡai ángele. ²⁵ Que baru jidubejarā ḡuja. Jūmenijicure ju aivu yu. Que baru majivu yu caiye vaiquiyede yópe ḡai ángele ūi aīye báquepedeca. ²⁶ Ūbenita no ūmevu japuquiyebu maje jiaḡocūre apedūve javu ēcaruīta, arejame Pablo náre.

²⁷ Pūcasumana ūmevu urarō japurī būrīburu yóboi, ḡamineca jataivu barejacará ūmevu japuiyeque jia urada Adriático āmicuriyare. ḡami corica baji dicūre memeipōeva “¿Joborō joabenoī eaivu bārica?” arī dápiarejaquemavu ne baju. ²⁸ Que baru corevarejaima na aipino ūmujurō jia urada ne yebai. Aru treinta y seis paimetros ūmujurō marejávū noi. Quījino no yóḡīboi, corevarejaima cojedeca. Aru veintisiete paimetros ūmujurō marejávū noi. ²⁹ Que teni jidurejaima, “¿Jārajidica?” aivu ēcarui

c̄raboaque. Que baru ēmeóvarejaima yóvaicuvaíboa d̄curíboa dic̄ure numene ðaíboare jap̄vainocap̄rav̄ni jocarí.

Aru, “Maumejiena miad̄ae t̄jarōr̄i”, ar̄i j̄niarejaima na. ³⁰Dic̄ure memeip̄ōeva dup̄ini n̄iuȳrejaimada dic̄ure jocarí.

Dic̄u qūj̄ic̄u b̄uoimeare jođeni, dic̄ure ēmeóvari j̄ia ur̄adaí, borocur̄i “Apeboa d̄curiiboare epenan̄uiv̄bu p̄raboí”, arejaima na, borocur̄iv̄u. ³¹Ūbenita Pablo arejame churaravai jabocure aru churaravare máre:

—Ina dic̄ure memeip̄ōeva ne n̄ru j̄iadoc̄ure jocarí, mujavacari yain̄jaramu, arejame náre Pablo.

³²Que baru apevu churarava burarejaima dimeáre, dic̄ure b̄uor̄i yuyaimere. Aru dic̄u qūj̄ic̄u tur̄i j̄ia ur̄adaí, cor̄i b̄j̄arejav̄ū.

³³Miad̄ae t̄qūiye j̄ipocai c̄areja, Pablo āic̄ōjenejame náre.

—Caride p̄casumana vaiyede m̄ja c̄ar̄ijiv̄u, coreiv̄u, ye āmev̄u āiyede.

³⁴Que baru parur̄ōreca j̄ēniaiv̄u m̄jare. Ājara, par̄bur̄i tar̄j̄iv̄u. Ār̄jara. Caiv̄u maja yaib̄n̄ajaramu, arejame Pablo náre.

³⁵Que ar̄i, Pablo páure j̄ēni, J̄men̄ijicure torojuede j̄iniburu yóboi ne j̄áinoi, páure cot̄var̄i, ārejame ū.

³⁶Caiv̄u ina ūre āñ̄ure j̄áiv̄va, na máre ārejaima na. ³⁷Aru caiv̄u n̄j̄a dic̄ū cur̄iv̄u doscientos setenta y seis paiv̄u baju barejacár̄a n̄j̄a. ³⁸Que teni caiv̄u yap̄iniburu yóboi, n̄j̄e āiyede p̄p̄uiyede, trigo āmicue oteiyede, jar̄v̄arejaima dic̄ure jocarí j̄ia ur̄adaí, d̄c̄ubec̄ū ðar̄j̄iv̄u dic̄ure.

Jiadoc̄ū ur̄ac̄ū coino

³⁹Miad̄ae t̄uiyede yo jobor̄ore ye coreóvabedejaima ina dic̄ure memeip̄ōeva. Ūbenita j̄árejaima t̄uip̄avare ēpac̄ū, c̄raboab̄a cubenore. Que baru, “T̄ujar̄j̄arev̄u noi”, ar̄i d̄ápiarejaquemav̄u ne baju.

⁴⁰Mamar̄um̄re apevu burarejaima d̄curiiboab̄a b̄uoimea máquede d̄iboáre, d̄ajocar̄j̄iv̄u j̄ia ur̄adaí j̄ív̄u. Din̄um̄ma apevu duarejaima dic̄ū j̄ipocateivea

b̄uoimeare, diveáre ēmeóvari j̄ipocatenajiv̄u dic̄ure diveáque. No yóboi, j̄am̄órejaima ur̄acaje ūmev̄u paicajede, eaiyur̄id̄uiv̄u ēpac̄ū. ⁴¹Ūbenita dic̄ū p̄rabo j̄ia ur̄ada j̄ív̄u apec̄ū ēpac̄ū ur̄ac̄ū curejav̄ū. N̄j̄e j̄iadoc̄ū j̄árejav̄ū ēpac̄ūra. Aru p̄rabo ēpac̄ū dor̄i j̄ēnejav̄ū. P̄caíboab̄a parur̄iiboab̄a j̄āriyadedejav̄ū pare n̄j̄e j̄iadoc̄ure copovaiye jap̄v̄ainore.

⁴²Que baru ina churarava boar̄i jar̄v̄vaiyur̄id̄urejaima ina b̄uoimarare, ne tar̄i dup̄ini numenaj̄iyepe aiv̄u.

⁴³Ūbenita n̄ai churaravai jabocu mead̄aiȳrejame Pabl̄ore. Que baru churaravare boar̄i jar̄v̄vaic̄ōjemenejame ū ina b̄uoimarare. Quénora ina tar̄i maj̄id̄iv̄ure biar̄ar̄i coic̄ōjenejame j̄ia ur̄adaí mamar̄um̄re, ne tar̄i nar̄aj̄iyepe aȳu ēcar̄uita. ⁴⁴Aru ne yóboi n̄uic̄ōjenejame apev̄ure jor̄i joc̄uveai, dic̄ū mácar̄ō jar̄v̄vaiye. Que teni caiv̄u n̄j̄e baju mead̄aiv̄u, earejaccar̄a jobor̄oita.

Pablo ūi cur̄ō Malta

28 ¹N̄j̄e eaiyede mearava jobor̄oi, nócav̄u “Yo Malta āmicur̄ij̄iv̄bu”, coȳrejaima n̄j̄are.

²Ina dij̄iáv̄u cur̄iv̄u me j̄ári n̄j̄are, jacoȳrejaima na. Ocar̄i b̄uiyede cojedeca āmei j̄uj̄arejav̄ū n̄j̄are. Que baru toabore dacuvacarejaima n̄j̄are.

³Aru Pablo jevar̄i pecare c̄uin̄atoro pecatorore, juarejame ditorore toabor̄ā. Que teni c̄uin̄ácu āda etarejame pecatorore jocarí, toaij̄ie boje. C̄uri j̄ēnejame Pabloi p̄rui. ⁴Aru nócav̄u ne j̄áiyede n̄ai āda j̄ēñ̄ure Pabloi p̄rui, ar̄id̄urejaima ne bajumia: “¿Boar̄i jar̄v̄vaȳu b̄arica p̄ōevare n̄ai ūm̄u? Dup̄ini dacube j̄ia ur̄adare jocarí. Ūbenita J̄men̄ijic̄u ap̄uic̄ōjemem̄i ūre. Que baru caride yaic̄ȳume, ūi āmeina ðaiye boje”, ūbenina ar̄id̄urejaima nócav̄u.

⁵Ūbenita Pablo p̄peni ūi p̄r̄ure, jar̄v̄var̄i d̄v̄arejame n̄ai āðare toaboi. Aru ij̄ibedejav̄ū ūre. ⁶Que baru ina p̄ōeva ar̄id̄urejaima ne bajumia,

“Cocoroquiyebu úre”. Aru, “Yainí tuquijibi ú”, aridurejaima na. Ùbenita joe coreni jáiyede, ye nájimenejame ú. Que baru ne dápino oatuvári, “¿Jūmenijicu bárica ú?” arejaima na.

⁷Aru cūinácu ũmu, ũi amíá Publio, ũi curó joabeno curejavú ñuje maino mácarói jia uradare jocarí. Nócavui jabocu barejáme ú. Ñujare cuturejame ũi cūrami. Aru me copu etarejame ñujare noi. Yóbecurijārvua curejacadā úque. Aru mearo đacarejame ñujare.

⁸Publio pacu parayú ijimu, morejavú úre. Aru cođo yayiyú barejáme ũ. Pablo jácunurejame ũi yebai. Jēniari Jūmenijicuque úre, tuoyú ũi pūruque, meadarejame úre. ⁹Apevu nócavu ijimara jápiaivu bācavu Publio pacui borore, darejaima ñuje yebai, Pablo ũi meadaquiyepa aivu náre máre. Aru meadaimara marejáima na. ¹⁰Jívu barejáima ñujare cuvede. Aru ñuje etarājiye jipocai, ñuje jiađocú jívu adarejaima caijē ñujare jauéde.

Pablo ũi eaino Romai

¹¹Cūinácú jiađocú uracū, Alejandría āmicurīmarore jocarí daicū mácaró javaiyorejavú uracorore dijiávui tuipāvai. Dicū Cástor aru Pólux āmicuricū aru ina pucarā jūmenijina ne decova curejavú dicū pūraboi. Noi curivu bācavu yóbecurā aviáva baju jaturejacadā, nūrajivu dijiávure jocarí. ¹²Tuijarejacadā Siracusa āmicurīmaroi. Aru mautedejacadā noi yóbecurijārvua. ¹³Etarí nore jocarí, nurejacadā ēcabo cūináturu pu Regio āmicurīmaroi. Cūinájārvu yóboi, ũmevu aviá daino cācopūrvure jocarí japurí búrejavú. Que baru nurejacadā cojedeca. Pucajārvua yóboi, Puteoli āmicurīmaroi tuijarejacadā ñuja.

¹⁴Apevu nócavu Jesúre ju aipōvare copurejacadā noi. Cuturejaima ñujare:

—Cūinásumana mautejarā ñujaque, arejaima na.

Que baru cūinásumana yóboi, etarejacadā náre jocarí, nūrajivu Roma āmicurīmaroi. ¹⁵Diīmarocavu

Jesúre ju aipōeva jápiaivu bācavu ñuje borore, jacyurādarejaima ñujare Apio āmicuró cuve bojedaino āmicurīmaroi aru Yóbecurīnamia āmicurīmaroi máre. Pablo jáñu náre, torojurejame. Aru torojuede jídejame Jūmenijicure.

¹⁶Ñuje eaiyede Roma āmicurīmaroi, apecu jabocu Pablora cuicōjenejame ũi cūrami baji cūinácuva. Ùbenita cūinácu churaravacacure jári coreicōjenejame úre cainmua, ũi dupini nūmequiyepa ayu.

Pablo ũi coyūino Jesús ũi yávaiye méne Romacavure

(Mt 13.14-15; Mr 4.12; Lc 8.10; Jn 12.40; Hch 25.11)

¹⁷Yóbecurijārvua yóboi, Pablo órejurejamedā ũi yebai nócavu judfovai jabovare. Cójijivu bācavure, Pablo arejamedā náre:

—Muja, jívu, yávacari āmeno đabetecacu judfovere. Aru āmeina yávabecacacu majeñecuva mácavu ne đarí cōmajiyede máre. Ùbenita apevu majacavu buoima yure Jerusaléi. Aru jíma yure buoimupe Romacavui jabovare. ¹⁸Ne jēniari jáiyede yure, ina Romacavui jabova jaetovaiyuteima yure. Ji borore “Nai ũmu ũi đaiye boje boarí jaruvaiye jaubevu úre”, aima na. ¹⁹Ùbenita ina judfova jorojini ju abeteima diede. Que baru jēniacacu yópe: “Ñai jabocu ijārvucacacu pūeno baju parucu yebai nuquijivú”, acacu yu. Ùbenita ye āmenore boro coyurí adabequijivu yu jívu borore. ²⁰Que baru cutuivū mujare, jáiyuvu mujare, aru coyuyuvu mujare máre. Buoimūmu yu, maje coreiye boje Cristo meadacuyure maja Israecavure, arejamedā Pablo náre.

²¹Aru arejaimada úre:

—Ina Judeacavu toivabema paperayocare ñujare mi borore. Aru ina majacavu edaivu bācavu yui āmeina yávabema mure. ²²Ùbenita majivu ñuja imaroa coapa āmeina jáivure Jesúre ju aipōevare aru āmeina yávaivure iye bueiye mamaene. Que

baru jápiaiyrivubu mi dápiainore diede, arejaimada Pablore.

²³Que baru apejáravũ, ne beoijáravũ, obedivũ ina judíova, Romacavũ, nũrejaimada Pabloi cũrami. Javejĩnare búrĩ pu nainũta Pablo coyurejamedã náre Jũmenijicui ðaicõjeiyede ùi coyũye báquede Moisés bácvũ. Coyurejamedã náre ina Jũmenijicui yáviyede coyũcaipõeva mácvũ ne toivaiye báquede máre. Ju are ðaiyurejamedã náre Jesúre, Jũmenijicui daroimũ mácvũ, aru Israecavũ coreimũ mácvũ máre. ²⁴Apevũ ju arejaimada ùi coyũiyede. Ùbenita apevũ ju abedejaimada diede. ²⁵Que baru cũinátũrũ ãmeni ne ùme, etarĩ búrejaimada ina judíova. Ùbenita ne etarãjiye jipocai, Pablo arejamedã náre:

—Jãve Isaías bácvũ Espĩritu Santoi yávaicõjeiyeque Jũmenijicui yáviyede coyũcarejaquemavũ mũjeñecvũ mácvũre Jũmenijicui yáviyede:

²⁶Nũjacu ina põevare ne yebai.

Aru ajacũ náre: “Jãve jápiarĩdurãjaramu mũja. Ùbenita ye jápiarĩ eabenajaramu. Jãve járidurãjaramu mũja. Ùbenita ye jári eabenajaramu. ²⁷Mũja coreóvayũbevũ, mũje yáviyede jávene jápiarĩ eaiyũbe boje. Mũja

jápiabevũ, mũje yáviyede jávene jápiaiyrũbe boje. Mũja bieivũ mũje yacovũare, mũje jávene jáiyũbe boje. Yũre jári coreivũ baru yacovũaque, ju ajebu mũja. Yũre jápiaivũ baru cá mucobeaque, ju ajebu mũja. Yũre jápiarĩ ðaivũ baru ùmeque, ju ajebu mũja. Que ðaivũre, meaðajebu yũ mũjare”, arĩ toivaicõjeneaquemavũ Jũmenijicũ Isaías bácvũ, arejamedã Pablo náre.

²⁸Aru cojedeca Pablo arejamedã náre:

—Jãve majjarã mũja, judíova. Caride Jũmenijicũ daroibi ùi yáviye méne coyũcaipõevare, meaðacvũũ ina judíova ãmevũre ne ãmeina teiyede jarũvarĩ. Aru návacari jápiarãjarama, arejamedã Pablo judíovare.

²⁹Pablo ùi que aiyede, ina judíova etarejaimada, jorojĩni yávaivũ ne bajumia.

³⁰Pũcaũjũa baju Pablo cũrejamedã noi. Bojedarejamedã ùi baju ùi cũramine noi. Aru torojũcu jacoyurejamedã caivũ ùre járadavũre. ³¹Jidũbecvũa coyurejamedã Jũmenijicui jaboteinoquede. Aru buedejamedã maje jabocũ Jesucristorã máre, jidũbecvũa. Aru ñame jecũbedejaimada coyũvũre aru buevũre máre. Quénoramu.

Romanos

Mamabuinore coyũiyebu Pablo b́acu ũi toivaicõjeiye báquede paperayocare Roma ámicurĩĩmarocavũ Jesúre ju aipõevare. Pablo b́acu judíovacacu b́acuvacari, Jesús ũi yávaiye méne beorĩ coyũicõjeimũ marejaquémavũ, coyũcyũ ũi yávaiye méne judíova ánevũre, judíova ne ju abe boje ũi coyũiyede. Lucas b́acu coyũrejaquemavũ Pablo b́acui borore Hch 7:57-8:1, 9:1-31, 13:1-28:31, aru ũi cuede Roma ámicurĩĩmaroi Hch 28:14-31. Javede Pablo b́acure toivacaipõescu b́acure toivaicõjenejaquemavũ pũcayoca ũi paperayocare Tesalónica ámicurĩĩmarocavũre, aru pũcayoca ũi paperayocare Corinto ámicurĩĩmarocavũre, aru ũi paperayocare Galacia ámicurijoborõcavũre máre, ũi toivaicõjeiquiye jipocai Tercio b́acure iyoca paperayocare Roma ámicurĩĩmarocavũre (16:22). Pablo b́acu coyũrejaquemavũ ũre toivacaipõescu b́acure aipe ũi toivacaquiyẽ báquede diyocare. Toivaicõjenejaquemavũ diyocare ániũjua báquede 56-57 d.C., yóbescu ũi cuscũniyede, coyũcyũ Jesús ũi yávaiye méne. Majidivũ ne dápiayere, curejaquemavũ Grecia ámicurijoborõi, Corinto ámicurĩĩmaroi, o apeno imaro díjborõcaĩmaroi ũi toivaicõjeiyede diyocare.

Diyocaque Pablo b́acu coyũrejaquemavũ caivũ põeva ne boropateiyede Jũmenijicui jáĩnore, Jesucristoi boropatebede Jũmenijicui jáĩnore, põeva ne boropatebede Jũmenijicui jáĩnore ju aivũ baru Jesucristore, aru Jesucristoi boropatebede ðaimarare ðaiye jaurõre yópe Jũmenijicui urõpe Espĩritu Santoi caðateiyequẽ.

Pablo ũi meaicõjeino Romacavũre

(Mt 1.1, 12.23)

1 ¹Yũ, Pablo, toivaicõjeivũ apescure iyoca paperayocare mũja Roma ámicurĩĩmarocavũre. Jesucristore memecayũbu yũ. Jũmenijicui beorĩ epeibi yũre Jesús ũi yávaiye méne beorĩ coyũicõjeimũre, ji coyũquiyere ayũ ũi yávaiye méne, meaðaiyede caivũ põevare.

²Javede iye yávaiye méne Jũmenijicui, “Yópe jáve ðacacũyũmu yũ põevare”, arejaquemavũ. Aru toivaicõjenejaquemavũ ina ũi yávaiyede coyũcaipõeva mácavũre diede, ũi yávaiyede. ³Iye yávaiye méque Jũmenijicui coyũibi mamacui borore. Ũi mácu, ñai cuscũ cainũmua, põetedejaquemavũ ũmũvape ijãravũi. Jũmenijicui mácu, maje jabocu Jesucristo, ñai jabocu David b́acui pãramecũbe ũ. Que baru Jesucristo põecũbe, ũi ũmũvape árojæ boje.

⁴Ũbenita Jũmenijicui jáðovaimi

parũrõreca caivũ põevare maje jabocu Jesucristo mamacure. Jũmenijicui jáðovarejaquemavũ diede jáveneca ũi nacovaiye báquede Jesucristore yainore jarũvarĩ. Que baru Jesucristo Jũmenijicui mácu, ũi ũmepe me cue boje. ⁵Jũmenijicui Jesucristore epede ðaibi ñũjare Jesús ũi yávaiye méne beorĩ coyũicõjeimarare, ũi mearo ðacaiye boje bojecũbeda, ñũje coyũrãjiyere ayũ caino joborõcavũre, ne ju arãjiyere ayũ Jesús ũi yávaiye méne, ne ðarãjiyere ayũ ũi urõpe, apevu máre ne jĩnajiyere ayũ mearore ũre. ⁶Aru mũja máre nácvũbu. Jesucristo ũi beoimaratamu mũja. Ũ jĩnamu mũja.

⁷Caivũ mũjare, Jũmenijicui umarare, Romacavũre, Jũmenijicui beorejaquemavũ mũjare ũ jina márãjivũre. Majepacu Jũmenijicui, maje jabocu Jesucristomaque, mearo ðacajacurĩ mũjare bojecũbeda ũi me boje. Aru torojurĩ cure ðajacurĩ mũjare cãrijimevũva.

Pablo ñi jácunuiyurō Romacavure
(Hch 19.21)

⁸Mamarumure soyuiyuvu mujare yópe: Caivu ijāravucavu jápiaivubu muje borore, muje ju aye boje Jesucristore. Que baru yu jiyubu torojuede Jūmenijicure ñuje baju urōque muje ju aye boje úre. Jesucristobe cadateni, “Pueno baju meacubu mu”, Jūmenijicure yure are ñay, obedivu pōeva ne jápiaie boje muje ju aiyede Jesucristore. ⁹Yu memecayubu Jūmenijicure ji úmei ji bueiye pōevare ñi yávaie méne Jesucristorā. Cainumua ji soyuiyede Jūmenijicure jēniacavayubu mujare. Jūmenijicuvacari majibi jāve ji soyuiyede. ¹⁰Javemiareca jácunuiyuriduiyu yu mujare. Que baru jēniavayubu Jūmenijicure, ñi járe ñacunure ñacuiyepere ayu mujare. Aru ñi urīburu, jácunucuyumu mujare. ¹¹Pare jáiyuvu mujare, cadatecuyu mujare yópe ñai Espiritu Santoi cadateiyepere yure, muje pueno parñiúme cvarājiyepere ayu muje ju aiyede Jesúre. ¹²Yópe ayubu yu: Muja máre yure cadatenajaramu. Aru mujare máre yu cadatecuyumu. Aru cūináturu torojurivu cadatenajarevu maje bajumia.

¹³Muja, jív, majijarā iyede: Obedinumua jácunuiyuriducacu yu mujare, buescuyu mujacavure máre, ne ju arājiyepere ayu Jesúre nópe ji bueiypedeca apenoa imaroai apējajubocavure, ne ju arājiyepere ayu napedeca. Ubenita ñari buojabevu yu muje yebare cāreja. ¹⁴Soyuiye javu yure Jūmenijicui yávaie méne caivu pōevare, ina yávaivure ñuje yávaicamuare aru ina apēcamuare yávaivure máre, aru majidivure aru majibevure máre. ¹⁵Que baru yácapiravū ñetubevū bueiycū iye yávaie méne mujare, Romacavure, máre.

Pablo ñi soyuiño Jūmenijicui yávaie me paruéde

(Mr 8.38; 1 Co 1.18; Gá 3.11; He 10.35)

¹⁶Suyevuvu yu Jesús ñi yávaie méne soyuyū. Jáve majivu yu caivu

pōeva ne jápiaru diede, aru ne ju aru Jesúre, Jūmenijicui meadacuyure náre ñi paruéque. Mamarumure Jūmenijicui meadaiyurejaquemavu judíovare caivu jipocamia. Ubenita caride ñi meadaiyubi judíova ámevure máre. ¹⁷Jūmenijicui yávaie méque coreóvavubu aipe ñari Jūmenijicui “Boropatebevū muja ji jáinore”, ñi aiyede majare. Jūmenijicui yópe ñacaiibi ina Jesúre ju aivure. Cūinájāravu ne jápiaiyede ñi yávaiyede ju adama úre. Aru no yóboi caijāravua ju adama úre cainumua. Javede yópe arī, Jūmenijicui toivaicōjēnejaquemavu ñi yávaiyede: “Ina Jūmenijicui boropatebede ñaimara mácavu ne ju aye boje úre, apurājivubu cainumua. Que baru coatede ñabemara márajivubu na Jūmenijicure jaruvari”, toivaicōjēnejaquemavu Jūmenijicui.

Pablo ñi soyuiño pōeva ne ámeina ñaiyede
(Ef 4.17-18)

¹⁸Jūmenijicui cavarō mearocacu jorojini jáimi pōevare ne pueðabe boje úre aru ne ámeina teiye boje apēvūque. Que baru Jūmenijicui ñājine ñaibi náre ne árumetede ñaiye boje ne bajumia Jūmenijicui yávaiyede jāvene. ¹⁹Pōeva coreóvari buojadama apējinore aipe ārojacure Jūmenijicure. Uvacari jáðovaimi náre aipe coreóvari buojarājivure aipe ārojacure úre. Que teni cuedaibi náre, ne coreóvarājiyepere ayu úre. ²⁰Jūmenijicure ñame buojari jámema. Ubenita jáinomu ñi paruéde cūiméne. Que baru Jūmenijicui caiyede cuedajāravū bácarōmata pu caride máre, caivu pōeva coreóvari buojadama aipe ārojacure Jūmenijicure aru ñi paruéde máre, ñi cuedaiye boje. Jūmenijicui ñaiye báquede jári, caivu coreóvavubu úre. Que baru ñi pōevare ñājine ñaiyede ñame “Jūmenijicure coreóvabeteacacu yu” arī buojabenama na.

²¹Pōeva coreóvadama ñai Jūmenijicui parucu baju cūcure. Ubenita mearore jíbenama úre pueno baju meacure.

Aru torojuede máre jíbenama úre. “Meacubu mu”, aru “Meavu mi ðacaiyede ñujare”, ye abenama úre. Quénora ubenina dápiadama na. Aru jápiari coreóvabenama na. Aru áme matuiye dápiadama na árumevure. ²²“Me coreóvaivubu ñuja”, aríduyama na. Ubenita que aivuvacari árumevu tede nuñama na. ²³Dajocadama na ne mearore jíyede Jūmenijicure, ñai cainumua cūcure. Quénora mearore jíyama na pépeimarare, ne puruáque ðaimara mácvare, yópe yainájivure majapedeca, apevu ūmuvare, aru apevu mǐjinape, apevu áimarape, aru apevu papeivure paivure máre.

²⁴Ne Jūmenijicure dajocaiye boje, Jūmenijicu máre dajocaibi náre, ne ðarājiyepe ayu yópe ne ámeina ðaiyūepe. Que teni pōeva cūyojarō vaiye báque boje urarō ijete ðadama na ne bajure. ²⁵Ju aiyūbenama iye yáviyede jávene Jūmenijicūrā. Quénora ju adama borocuede. Mearore jíyama aru pueðadama Jūmenijicui cuedaiye báquede. Ubenita Jūmenijicure, caiyede ðayu bácvare, pueðabeni mearore jíbenama na. Aru ðarí jáðovamenama ne pueðaiyede úre. Ubenita mearore jíye jauvu Jūmenijicure caivu, aru cainumua. Quédecabu.

²⁶Que baru Jūmenijicu dajocaibi náre, ne cūvarājiyepe ayu ne ámeina ðaiyuede aru ne cūyojarōre máre ðarājiyepe ayu. Que teni nomiva ámeina ðadama ne bajure. Dajocarí ūmūvaque ne ðájuroede, ðadama ne bajumia apevu nomivaque. ²⁷Aru ūmūva máre nopedeca ámeina ðadama ne bajure. Parūrōreca ūma apevu ūmūvare. Dajocarí nomivaque ne ðájuroede, ðadama ne bajumia apevu ūmūvaque. Cūyojarō bajubu nópe ne ðaino. Que baru ijete ðadama na ne bajure, ne ámeina ðaiye boje.

²⁸Pōeva majibenama Jūmenijicure. Ne Jūmenijicui yáviyede jávene coyūiyede jápiayube báque boje, Jūmenijicu dajocaibi náre, ne ðarājiyepe ayu yópe ne ámeina pueno baju ðare nuíye urōpe, ámeno vainájiyepe ayu. ²⁹Quédata

cainumua ámeina baju ðadama na. Ámeina ðarí, apevure máre ðare ðaiyuma na. Jecuma na pueno urarō ne cūvaede. Ámeina dápiadama apevure, ðaiyurivu náre ámenore. Jorojĩnama na. Pōevare boarí jaruvadama na. Jararí pare, ádamateiyuma na. Jūjovadama na. Ámeina árojama ne baju. Yávadama jápiabenoí ámenore apevui borore. ³⁰Coyūyama ámenore caivu ne jápiainoí apevui borore. Ámeina jádama Jūmenijicure, aru Jūmenijicu máre náre ámeina jáimi. Ye baju ámeina apevure. Dápiadama ne baju “¿Meara márica apevu pueno?” Aru, “Mearatamu ñuja apevu pueno”, adama na. Mamae ámeina teiyede cuedadama na. Ju abenama nébucūvare. ³¹Jápiarí majibenama na. Ðabenama nópe “Ðarājivū”, ne aiyé báquepe. Apevure jáiyūbenama na, aru névu bajure, ne cūramicavure máre ubema na. Apevu ne ámeina ðaiyede náre, pueno bajura ðarí árumeteiyūbenama na. Aru apevure máre cōmaje ároje jáiyūbenama na. ³²Majima me bajureca Jūmenijicu ñájiçōjeñure ūi ðaicōjeiyequé caivu yópe ámeina ðaivure. Coavacūyūme náre úre jaruvarí, ne ámeina teiye boje. Ubenita pueno urarō ðare nuñama na. Aru torojurivu me jádama apevu ámeina teivure nápe ámeina ðaivure. Aru, “Me ðadama”, adama na ne borore.

Jūmenijicu ūi coyūino pōevare ne ðaiye méne o ámeine

(Mt 7.1, 16.27; Lc 6.37; 2 Ti 4.14)

2¹Mu ayu baru apevu ne borore, “Ñájiye jauvu náre ne ámeina teiye boje”, arí buojabevu “Ámeina ðabevu yu. Que baru ñájiye jaubevū yure”. Mi coreóva iyede apevu ne ámeina teiyede, mu máre pōescūrecabu. Que baru napedeca ámeina ðayubu mu. Que baru “Apevure ñájiye jauvu” mi aru, “Yure máre ñájiye jauvu”, ainopebu no. ²Majivu maja jáveque Jūmenijicu ñájiine ðayure caivu ina nópe ámeina ðaivure. ³Jūmenijicui aru apevure “Ñájinajaramu mija mije ámeina teiye boje”,

dápiabejacu mɔ, pōescupe, mi nápe cūináturu teiyede Jūmenijicu abescuyure mure máre, “Ñájcuyutu mɔ mi ámeina teiye boje”. Nópe jáve acuyume mure. Aru, “¿Ñájimescva vaiquídica?” arí dápiabejacu mɔ, mi ámeina teiye boje. Jūmenijicu jáve ñájine đacuyume mure máre. ⁴Puedabescupe tebejacu mɔ Jūmenijicure, ũi pare mearo cūiméno boje. Jūmenijicu cōmaje āroje jáimi mure. Duibajiena napini coreibi mure. Coreóvajacu mɔ jáve Jūmenijicu meacure múque, ũi ue boje mi jaruvaquiyede mi ámeina teiyede. Mi oatvayiye boje, mearo đacacuyume mure. ⁵Ūbenita mi ámeŭme boje, ámpedabu mɔ. Đaiyubevu mɔ yópe Jūmenijicui urópe. Ūre jápiaiyubevu aru mi đaiyede máre oatvayiubevu mɔ. Que teni pueno ámeno baju đayubu mɔ mi pueno urarō baju ñájiqiyede Jūmenijicui ñájiovaquijāravu baquinói pōevare, ne ámeina teiye boje. Dijāravu baquinói caivu pōevare Jūmenijicu jácuyume cūináturu. Aru jorojini jári, ñájine đacuyume náre, ne ámeina teiye boje. ⁶Dijāravu baquinói Jūmenijicu bojedacuyume caivu pōevare náre coapa yópe ne đaiye báquipedeca ijāravure.

⁷Pōeva cainumua mearo đaivu baru arevure, aru urivu baru Jūmenijicui đaquiyere aivu náre meara baju yópe ũi urópe, aru urivu baru Jūmenijicui coyūquiyere aivu náre “Mearo đaiyubu mɔja” ainore máre, aru urivu baru Jūmenijicui apure đaquiyere aivu náre cainumua, ne coatebenajiyere ayu ũre jaruvarí, nárecabu Jūmenijicui cure đaquimara jāravu cūiméjāravu baquinóre ũque. ⁸Ūbenita pōeva ne urópe cainumua đaivu baru Jūmenijicui urō pueno, aru dápiabevu baru Jūmenijicure, jápiaiyubevu baru ũi yávaiyede jávene, aru ju abevu baru ũre, quéda đaivu baru ámenore cainumua, ámeina đarājivu, nárecabu Jūmenijicui jorojini ñájine đaquimara pare. ⁹Caivu ina pōeva ámeina đaivu ñájinajarama aru chíorajarama, judíova mamagumure caivu jipocamia, aru

judíova ámevu máre. ¹⁰Ūbenita caivu ina pōeva mearare, Jūmenijicu đacuyume náre coapa meara baju yópe ũi urópe. Aru coyūcuyume náre, “Mearo đaiyubu mɔja”. Aru cārijimevva me cure đacuyume náre máre, judíovare mamagumure caivu jipocamia, aru judíova ámevure máre.

¹¹Que baru Jūmenijicu jáimi cūináturu caivu pōevare. ¹²Judíova ámevu, cuvabevu Jūmenijicui đaicōjeiyede ũi coyūiye báquede Moisés bácure, bíjarāramua na coapa ne ámeina teiye boje, die đaicōjeiyede majibevvua. Que teni nácapūravu coatede đaimara mārājivubu Jūmenijicure jaruvarí, ne ámeina teiye boje. Ūbenita judíovare, cuvārivure Jūmenijicui đaicōjeiyede ũi coyūiye báquede Moisés bácure, Jūmenijicu ñájine đacuyume náre coapa ne ámeina teiye boje, ne đabe boje yópe iye đaicōjeiye coyūiyere. Que teni nácapūravu máre coatede đaimara mārājivubu Jūmenijicure jaruvarí, ne ámeina teiye boje. ¹³Jūmenijicu abebi “Boropatebevū mɔja ji jáinore”, ina ũi đaicōjeiye báquede coyūiyede jápiaivu bācavureca đabevvua yópe ũi đaicōjeiye báquepe. Quénora Jūmenijicu ajebu “Boropatebevū mɔja ji jáinore”, caivu inare yópe ũi đaicōjeiye báquepe đájurorivure.

¹⁴Ina judíova ámevu cuvabema Jūmenijicui đaicōjeiye ũi coyūiye báquede Moisés bácure. Ūbenita apenumua đadama na yópe Jūmenijicui đaicōjeiye báquepe, Jūmenijicui cuedaiye báque boje náre ne mearo dápiayequé. Que đarí jáđovadama na ne coreóvayede ne ũmei mearore Jūmenijicui jáiyede aru ámenore máre, cuvabevuvacari iye Jūmenijicui đaicōjeiyede ũi coyūiye báquede Moisés bácure. ¹⁵Ne đaiyeque jáđovadama na ne coreóvayede ne ũmei aipe ārojaene Jūmenijicui đaicōjeiyede ũi coyūiye báquede Moisés bácure. Apenumua “Boropatebevū yu” aru apenumua “Boropateivū yu”, ne arí

dápiayequé jádovadama na ne jáve coreóvayede diede. Aru ne dápiayequé máre jádovadama na diede. Que baru apenũmua arĩ dápiadama ne baju “Mearore dayubu yu”, aru apenũmua “Ámenore dayubu yu”, arĩ dápiadama na.

¹⁶Que teni iye Jūmenijicui bojedaiye pōevare ne đaiye báque boje vaiquíyebu yópe ji yávaiye méne coyuiyepé Jūmenijicui ñájiovaquijárvu baquinói pōevare, ne ámeina teiye boje. Dijárvu baquinói Jūmenijicu Jesucristore ñájine đaicōjecũyume pōevare, ne yaveni ámeina dápiaye boje aru ne yaveni ámeina đaiye báque boje máre. Nopedeca coyũyubu yu Jūmenijicui yávaiye méne.

**Judíova ne đaiyurō yópe
Jūmenijicui đaicōjeiyede ũi
coyuiye báquepe Moisés bácure**

¹⁷Mujacapuravu adavũ “Judíovabu ñija”. Aru, “Jūmenijicu mearo đacacũyube ñijare, ñije cuae boje ũi đaicōjeiyede ũi coyuiye báquede Moisés bácure”, arĩ dápiadavũ muja. Aru coyũyavũ muja apevure, “Ñujarecabu Jūmenijicu jina. Ũi beoimaratamu ñija”. ¹⁸Aru adavũ muja, “Majidivubu Jūmenijicui urōre ñije đarājínore”. Aru adavũ muja yópe: “Majidivubu mearore aru ámenore máre pōeva ne đarājínore. Que baru beoiye javvu náre mearo bajure. Diede majidivubu, ñije bueiye boje Jūmenijicui đaicōjeiyede ũi coyuiye báquede Moisés bácure”, arĩ dápiadavũ muja. ¹⁹Muja bueni buojarĩduyavũ bueiye jávene ina majibevure, yópe ñai jáñũ nuvaiyepé járĩ eabevure. Yópe arĩ, coyũyavũ muja: “Apevure, majibevure, me majide đaiyubu ñija. Náre bueivubu ne coreóvabede, ne járĩ eabevure mautebenajiyepé aivũ”. Aru muja cadateni buojarĩduyavũ ina mearore coreóvabevure, ne coreóvarājiyepé aivũ diede, nópe ñai pēoinore cũvacũ cadateiyepé ñeminoi curivure. Yópe arĩ, coyũyavũ muja: “Apevure coreóvabevure me cadateivubu ñija. Náre cadateivubu ne ñeminoi

curivure mautebenajiyepé aivũ”. ²⁰Aru muja adavũ yópe: “Ñuja bueivubu ina majiède eabevure, ne mearore majinajiyepé aivũ. Aru bueivubu ina majibevure máre, ne coreóvarājiyepé aivũ”, adavũ muja. Muja arĩ dápiadavũ muje cuae boje Jūmenijicui đaicōjeiyede ũi coyuiye báquede Moisés bácure me majidivũ caiyede aru caiye muje majiède jávene.

²¹¿Muja bueivũ apevure, aipe teni đabevurũ muja yópe muje bueiyepe? Muja “Navamejara” aivũvacari apevure, muja máre ñavadavũ muja. ²²Muja “Đabejarã ámeina mujemarebũcũvare jaruvarĩ” aivũvacari apevure, muja máre đadavũ ámeina mujemarebũcũvare jaruvarĩ. Muja ubevũvacari pēpeimarare, muja máre pueđabenamu Jūmenijicure aru ũi jiede máre. ²³“Ñuja judíova mearamu apevũ pueno, ñije cuae boje Jūmenijicui đaicōjeiyede ũi coyuiye báquede Moisés bácure”, adavũ muja. Ũbenita nópe aivũvacari pueđabevũ ámeina yávadavũ muja Jūmenijicure, ju abevũ ũi đaicōjeiyede. ²⁴Javede yópe arĩ, Jūmenijicu toivaicōjeneaquemavũ ũi yávaiyede: “Ina pōeva judíova ámevũ ámeina yávadama Jūmenijicure, muje ámeina đarĩ jádovaiye boje”, arĩ toivaicōjeneaquemavũ.

²⁵Muje ju aru Jūmenijicui đaicōjeiyede ũi coyuiye báquede Moisés bácure, cadateivũ mujare muje ũmva cajede buraicōjeiye, muje majinajiyepé aivũ muja Jūmenijicu jinare. Ũbenita muje ju abedu iye Jūmenijicui đaicōjeiye báquede, ye cadatebevu mujare iye cajede buraicōjeiye. ²⁶Ina judíova ámevũ buraicōjemema ne cajede. Ũbenita ne đare yópe Jūmenijicui đaicōjeiyede ũi coyuiye báquepe Moisés bácure, majibevũva diede, Jūmenijicu jáve jáimi náre cūináturu ũi jáiyepé muja judíovare, muje cajede buraicōjeivũpedeca. ²⁷Mujacapuravu cũvarivubu iye Jūmenijicui đaicōjeiyede ũi coyuiye báquede Moisés bácure, aru buraicōjeivubu máre muje cajede. Ũbenita ye đabevũ muja yópe

Jūmenijicui ðaicōjeiyepe. Quénora ju abevu diede. Que baru apevu, judfova āmevu, ne cajede buraicōjemevureca, ne ðaiyede yópe Jūmenijicui ðaicōjeiye ũi coyuiye báquepe Moisés bācure, ne boro coyurī adaimara márajivubu muja, judfova, Jūmenijicui nājine ðarājīyepa aivu mujare, muje ju abe boje die ðaicōjeiyede.

²⁸Ina pōeva aivu baru “Yūbu judfovacacu, mearore jīvu Jūmenijicure”, caivu ina judfova baju āmema na. Aru ina ne cajede buraicōjeivū, Jūmenijicu jina tenajīye boje, caivu ina máre judfova baju āmeni, Jūmenijicu jina āmema na. ²⁹Ūbenita ina pōeva mearore jīvu Jūmenijicure judfova bajupe ju adama Jūmenijicure ne ũmei. Ina pōeva Jūmenijicui ðaicōjeiyepe buraicōjeivū ne cajede, caivu ina judfova baju āmema na. Ūbenita ina pōevare Jūmenijicui Espírītu oatuvacayūbe ne ũmene, ðacuyū náre Jūmenijicu jinava. Nárecabu judfova baju. Que baru nárecabu mearore buojari jīvu Jūmenijicure jāve, ũi ðadateiye boje. Ne baju ðaiyeque buojabema jīvu mearore Jūmenijicure.

3 ¹⁻²Aru apecu ũi aru yure: “Caivu majidivubu ina judfovere Jūmenijicui beoimara mácvare. ¿Mi dāpiaru, ina judfova meari apevu pūeno aru ne cajede buraicōjeiye ðadatebedi náre?” yópe arī, coyūjebu yū: “Jūju. Yópe ayūbuicu yū. Pōecu judfovacacu baru, pare meavū ũre. Aru cajede buraicōjeiye pare ðadateivū judfovere, ne nópe jádovaiye boje Jūmenijicu jinare. Mamarūmure Jūmenijicu jídejaquemavu judfovere ũi yāvaiyede, maje ju arī, aru bueni apevure, meðarī corenajiyepe ayū diede”. Que ajebu yū. ³⁻⁴Ūbenita apecu ũi aru yure: “Apevu judfova ju abema Jūmenijicui yāvaiyede. ¿Ne ju abe boje, ðabecuyūba Jūmenijicu nópe ũi aīye báquepedeca?” yópe arī, coyūjebu yū: “iBi, ye que āmevu! iAipinūmu vaibéjarōri nópe! Jūmenijicu jāve ðacuyūme yópe ũi aīye báquepedeca. Caivu pōeva ne borocuru,

Jūmenijicucapūravu cainūmua borocūbecube ũ”. Javede yópe arī, toivaicōjenejaquemavu Jūmenijicu ũi yāvaiyede:

Mi nājine ðaiyede yure ji ju abe boje mure, apevu jáivu aipe ðarī nājine ðayure yure, pueðarī mure arājarama na mi borore: “ðaiibi yópe ũi aīye báquepedeca majare. Borocūcu āmemi ũ”, arī toivaicōjenejaquemavu.

⁵¿Aru apecu ũi aru yure: “Maja judfova maje ðabede yópe Jūmenijicui ðaicōjeiye báquepe majare, jádovavubu Jūmenijicucapūravure pūeno meacu bajure ũi jāve ðaiyede yópe ũi aīye báquepedeca cainūmua, mearo ðayure pōeva ne mearo ðabede”, aipe aji yū? ¿Aji yópe apevu pōeva ne aīyepe, “Jūmenijicucapūravu jorojīni jári, nājine ðayū baru majare, judfovere, ũi nājiovaquijāravū baquinói pōevare, ne āmeina teiye boje, āmenore ðayū bájebu ũ”? ⁶iBi, ye que āmevu! iAipinūmu vaibéjarōri nópe! Jáve maru no, Jūmenijicu ye nājine ðarī buojabejebu ijāravucacure cūinácūra yópe ũi āmeina teiyepepedeca. ⁷Cūinácū pōecu ũi jīnoque mearore pēpeimarare ũi coreóvare ðaru pōevare urarō baju Jūmenijicu meacure caivu pūeno, jāve Jūmenijicu nājine ðacuyūme ũre, ũi que ðaiye boje. ⁸Que baru maje āmeina ðaiyede maje coreóvare ðaru Jūmenijicure pūeno meacu bajure, apevu pōeva yópe adama: “Āmeina ðarājarevū, Jūmenijicu ũi jádovaiyepe aivu majare meacu bajure caivu pūeno”, adama na. Apevu pōeva boro coyurī adarīduyama yure, ji nópe aīye boje. Que aivu, borocūma yure. Jūmenijicu nājine ðacuyūme ina borocūrivure yópe náre nājine ðaiye jāuēpe, ne que aīye báque boje.

Caivu pōeva maje boropateino maje āmeina teiye boje
(Gá 2.16)

⁹¿Mearama maja judfova apevu pūeno Jūmenijicui jāinore? iQue āmevu! Jáve jári coreóvaivubu judfovere aru

judíova ãmevure máre, caivũ cüináturu ãmeina teivure. Caivũ ijãravucavu maje ãmeina ðaiyue boje cõjeimarape curivubu. ¹⁰Yópe arí javede Jũmenijicu toivaicõjenejaquemavu ñi yávaiyede:

Põescu cubebi meacu Jũmenijicui jáinore. Ye cüinácu páyu cubebi. ¹¹Caivũ põeva coreóvabenama mearore. Aru caivũ põeva Jũmenijicu jina máre teiyubenama. ¹²Caivũ põeva dajocadama Jũmenijicure, ãrũmetedama ñre. Mamatedama caivũ cüináturu. Ye cõmaje ãroje jámeni apevure cadatebenama náre. Ñame ðabenama mearore. Ye cüinácu páyu cubebi.

¹³Ne jijecamu yópe põetõcu voitõcupebu. Que baru ne yávaiyeque jorojĩne ðadama Jũmenijicure. Borocurivũ yávaadama apevure, jũjovarájivũ. Ne yávaiye yópe ãðai jĩmape paiyebu. Que baru ne yávaiyeque ãmetede ðadama apevure.

¹⁴Ãmeina ðarí yávaadama apevure, ijivũ ne yávaiye. ¹⁵Que baru cãrijijnãma ðoarí jaruvaiyurivũ põevare. ¹⁶Ãri ne nuinoi ñájine ðadama põevare, aru mamatede ðadama, aru chiõre ðadama náre.

¹⁷Torojũre ðabeni aru cãrijine ðadama põevare. ¹⁸Ye cüinájino quíjinoreca puedabenama Jũmenijicure máre, arí toivaicõjenejaquemavu.

¹⁹Majidivubu maja caiye iye Jũmenijicui ðaicõjeiyede ñi coyuiye báquede Moisés bácuere toivacaino mácarõre caivũ maja judíovare, maje majinajiyepere ayũ majare máre ãmeina teivure. Caivũ bi arãjarama Jũmenijicui jáinoi ñi ñájiovaquijãravũ baquinói põevare, ne majié boje ñájiye jaurõre náre, ne ðabe báque boje yópe Jũmenijicui ðaicõjeiye báquepe. ²⁰Iye ðaicõjeiyeque ñame boropatebema Jũmenijicui jáinore. Quénora iye ðaicõjeiyeque põeva coreóvaivubu caivure ãmena matuiyede.

Jũmenijicu ñi jáino põevare boropatebevure ne ju aiyede Jesucristore
(Gá 2.16, 3.20)

²¹Ûbenita caride Jũmenijicu coreóvare ðaibi majare aipe ðarí coyurí buojayure põevare “Boropatebevũ muja ji jáinore”, Jesucristoi ðaiye báque boje. Aru yópe ðacaibi majare ñi ðaicõjeiye báquede ðabecuva. Ûbenita Jũmenijicui ðaicõjeiyede ñi coyuiye báquede Moisés bácuere aru ina Jũmenijicui yávaiyede coyũcaipõeva mácavu ne toivaiye báquede máre javede coyũrejaquemavu aipe ðacũyure Jũmenijicu diede. ²²Jũmenijicu coyũibi põevare “Boropatebevũ muja ji jáinore”, ne ju aiyede Jesucristore. Caivũ põeva cüináturũtamũ. Que baru Jũmenijicu nópe coyũibi caivure Jesucristore ju aivure.

²³Maja caivũ põeva ãmene ðaivubu maja. Que baru nópe ðaivure Jũmenijicu “Boropatebevũ muja”, abecube majare, maje ðabe boje yópe ñi urõpe. ²⁴Ûbenita Jũmenijicurecabe pũeno meacu baju. Que baru jýyũbe mearore bojecubeda. Que teni coyũibi “Boropatebevũ muja ji jáinore” caivũ majare, maje Jesucristore ju aiyede. Nópe bojecubeno ðarí, Jesús ñájine ðabede ðaibi majare, maje ãmeina teiye boje yópe põescu ñi yebacacure bojedarí iyepere, ñi dajocaquiyepere ayũ ñi mememo ãmeno baju bácarõre.

²⁵Jũmenijicu jorojĩni jáimi maje ãmeina teiyede. Que baru dajocacũyũ ñi jorojĩyede, darorejaquemavu Jesucristore, ñi ñájiquiyepere ayũ põeva ne ãmeina teiye boje. Que baru Jesucristo yaidéjaquemavu maje yayũroede. Que teni ñi jiveque bojedarejaquemavu põevare ne ãmeina teiyede. Jesús ñi yayiye báque boje, Jũmenijicũcapũravũ ãrũmeteibi maje ãmeina teiyede caivũ maja Jesucristore ju aivure. Jũmenijicu yópe vaidé ðarejaquemavu, jáðovacũyũ aipe ðarí coyurí buojayũ põevare “Boropatebevũ muja ji jáinore”.

Jipocamia Jūmenijicu majidejaquemavu darocuyu Jesucristore, ũi bojedaquiepe ayu pōeva ne āmeina teiyede. Que baru Jūmenijicu napinejaquemavu pōeva ne āmeina đaiyede. Yópe ñájine đabecuyupe vaidējaquemavu ne āmeina teiyede. ²⁶ Ūbenita caride Jūmenijicu quéda vaibébi pōeva ne āmeina teiyede.

Quénora āmeina teiyede bojedaiibi ũ, jáđovacuyu pōevare boropatebevure ũi jáinoi. Que teni Jūmenijicu coreóvare đaiibi ũi đaino p̄eno mearo bajure, “Boropatebevũ” ayu caivu Jesucristore ju aivure.

²⁷ ¿Caride “Boropatebevũ maja”, arĩ majidi maja, m̄je dáriaru? Nópe arĩ majibevũ maja. ¿Aipe teni diede nópe arĩ majibedi maja? ¿Jūmenijicui đaicōjeiyepe đarĩ cōmajidu, “Boropatebevũ” abecuyuba Jūmenijicu majare? ¡Que āmevũ! Maja đarĩ buojabevũ yópe caiye Jūmenijicui đaicōjeiyepe cainum̄a. Ūbenita p̄escu ũi ju aru Jesucristore, Jūmenijicuvacari boropatebede đacuyume ĩre ũi jáinoi. ²⁸ P̄escu cubebi Jūmenijicu “Boropatebecubu m̄” ũi aim̄, Jūmenijicui đaicōjeiyede đaiye boje. Quénora caivu pōeva ju aivure Jesucristore, “Boropatebevũ m̄ja ji jáinore” aibi Jūmenijicu. Que baru ácu p̄escu cubebi “Meacutam̄u yũ” ayu.

²⁹ ¿Dápiavũrũ m̄ja Jūmenijicu ucure judíova quévũra ũ jinava? Jáve āmevũ no. Jūmenijicu ubi judíovare aru judíova āmevũre máre ũ jinava. ³⁰ Cūinácũrabe Jūmenijicu. Que baru Jūmenijicu coyũibi judíovare “Boropatebevũ m̄ja ji jáinore”, maje ju aiyede Jesucristore. Aru quédeca coyũibi judíova āmevũre máre “Boropatebevũ m̄ja ji jáinore”, ne ju aiyede Jesucristore. Que teni Jūmenijicurecabe coyuyũ caivu majare “Boropatebevũ m̄ja”, maje ju aiyede ĩre.

³¹ Dinum̄, ¿coyũivuba maja p̄evare ne dajocarãjiiyepe aivu Jūmenijicui đaicōjeiyede ũi coyũie báquede Moisés b̄acure, Jūmenijicui coyũie boje maja boropatebevũre maje ju

aiyede Jesucristore? ¡B̄i, ye que āmevũ! ¡Aipinũm̄ vaibéjarõri nópe! Quénora caride maje ju aiyede boje Jesucristore p̄eno baju đaiyũrivũbu maja yópe Jūmenijicui đaicōjeiye báquepe.

Abraham m̄acui đarĩ jáđovaino m̄acarõ
(Gá 3.6)

4 ¹ Caride m̄jare coyũquijivũ yũ aipe Jūmenijicui đaiye báquede javede maja judíova majeñecu m̄acure, ũi āmiá Abraham. ² Jūmenijicu ũi coyũru Abraham m̄acure, “Boropatebecubu m̄ ji jáinore”, ũ m̄acui mearo đaiye báque boje, Abraham m̄acucapũravũ coyuyũ buojajebu, “Yũvacari mearo đaiyvũ ji bajuma”. Ūbenita ñame nópe arĩ buojabema Jūmenijicui jáinore. ³ Aru yópe arĩ, Jūmenijicu toivaicōjenejaquemavu ũi yávaiyede: “Abraham ju arejaquemavu Jūmenijicure. Que baru Jūmenijicu coyũrejaquemavu ĩre, ‘Boropatebecubu m̄ ji jáinore’, ũi ju aiyede báque boje Jūmenijicure”, arĩ toivaicōjenejaquemavu.

⁴ Ñai jabocu ũi bojedaiyede ĩre memecaip̄escure ũi memecaiye boje, p̄escu cubebi “Bojecubeda jínomu no” ayu. Quénora caivu majidivũbu bojedaiye javũrõre ñai memecaip̄escure. ⁵ Ūbenita ina pōeva eaiyũbevũre boropatebenore Jūmenijicui jáinore ne mearo đaiyeque, “ ‘Boropatebevũ m̄ja’, arĩ coyũcuyume Jūmenijicu ñujare, ñuje đaiye boje”, arĩ dáriabenama na. Quénora “Ñaja ju aivũbu Jūmenijicure, ñai coyũyure pōeva boropatebevũre ne ju aiyede ĩre”, arĩ dáriadama. Pōeva nópe dápiavũ, ye ne đabedeca mearore, Jūmenijicucapũravũ, p̄evare ucũ, coyũibi “Boropatebevũ m̄ja ji jáinore”, ne ju aiyede ĩre.

⁶ Nopedeca David b̄acu arĩ toivarejaquemavu ñai p̄escure Jūmenijicui torojure đainore đabecureca mearore Jūmenijicu “Boropatebecubu m̄ ji jáinore”, ũi ainore. Yópe arĩ, Jūmenijicu David b̄acure toivaicōjenejaquemavu ũi yávaiyede:

⁷ Ina jãve torojarivure, náreca Jūmenijicu ārūmeteibi caiye ne ju abe báquede ũi ðaicōjeiyepe, aru jāmemi ne āmeina teiyede máre. ⁸ Aru ñai jãve torojucure, úreca Jūmenijicu ũi āmeina teiyede coyurí ñájine ðabecube, arí toivarejaquemavu David bácu.

Que arí, “Jūmenijicu ñájine ðabecuyume náre ne āmeina teiye boje”, aiyurōmu.

⁹ ¿Aru judío va cūinávava torojarivure buojaidi yópe iye David bácu coyuiye báquepe? ¡Que āmeiva! Judío ai meva máre nopedeca jãve torojurí buojadama na. Dápijarã cojedeca Abraham mácure. Jave coyuiyu yu mujare iye Jūmenijicui toivaicōjeiye báquede ũi yávaiyede: “Abraham ju arejaquemavu Jūmenijicure. Que baru Jūmenijicu coyurejaquemavu úre, ‘Boropatebecubu mu ji jáinore’ ”. ¹⁰ ¿Aipiye de nópe yávarejaquemari Jūmenijicu Abraham mácure? ¿Jave buraicōjenejaquemari Abraham mácu ũi cajede dinumure? Bi, ũ mácu buraicōjemenejaquemavu ũi cajede cãreja. Jūmenijicu nópe yávarejaquemavu ũ mácure ũi cajede buraicōjequiye jipocamia. ¹¹ Que baru Jūmenijicu nópe yávaríburu yóboi, Abraham mácu buraicōjenejaquemavu ũi baju dicajede. Aru ũi yópe buraicōjeiye báque jáðovaiye barejaquémavu úre, ũi majiquiyepe ayu ũ mácu Jūmenijicui coyuiyu mácu boropatebecure ũi jáinoi, Abraham mácu ju aiyé boje Jūmenijicure.

Que teni caivú ne cajede buraicōjemevava ju aivure Jūmenijicure, ũi coyūquiyepe aivú náre boropatebevure ũi jáinoi, Jūmenijicu Abraham mácure tede ðarejaquemavu néñecupe páyu. ¹² Aru ũ mácu máre majeñecu mácu barejaquémavu maja cajede buraicōjeivú bácvu ju aivure Jūmenijicure. Ūbenita majeñecu mácu āmenejaquemavu, maje cajede buraicōjeiye báque boje. Quénora majeñecu mácu barejaquémavu maje ju aiyé boje Jūmenijicure, nopedeca majeñecu mácu Abraham mácu ũi

cuepedeca ju ayu Jūmenijicure ũi cajede buraicōjequiye jipocamia.

Boropatebeno Jūmenijicu “Yópe ðacacuyumu máre”, ũi aino mácarō Abraham mácure
(Gá 3.7, 18, 29)

¹³ Javede Jūmenijicu arejaquemavu Abraham mácure yópe: “Mure aru mipāramena márājivure mearo ðacacuyumu yu. Mipāramena márājivure jícuyumu yu ijāravure, ne cūvarājiyepe ayu caivú ijāravucavure”, arejaquemavu Jūmenijicu Abraham mácure. Ūbenita Jūmenijicu yópe abedejaquemavu Abraham mácu ðaiye báque boje, yópe ũi ðaicōjeiyede ũi coyuiye báquepe Moisés bácu. Quénora Jūmenijicu yópe arejaquemavu Abraham mácu ju aiyé báquede úre, coyucuy ũ mácure “Boropatebecubu mu ji jáinore”. Que teni Jūmenijicu mearo ðacacuyú barejaquémavu ũ mácure aru caivú apevure máre úre ju aivure. ¹⁴ Ūbenita Jūmenijicui jídu ijāravure ina ũi ðaicōjeiyede ũi coyuiye báquede Moisés bácu cūvarivure, ne cūvarājiyepe ayu diede, ye baju āmejebu pōeva ne ju aiyé Jūmenijicure aru ye baju āmejebu Jūmenijicu “Yópe mearo ðacacuyumu”, ũi aiyé báque máre. ¹⁵ Jūmenijicui ðaicōjeiye ũi coyuiye báqueque Moisés bácu coyubedejaquemavu “Yópe mearo ðacacuyumu”, ũi aiyé báquede. Jūmenijicui ðaicōjeiye ũi coyuiye báqueque Moisés bácu jorojíni jári, ñájine ðayube pōeva, ne vainí turí ðaiye boje diede. Ūbenita Jūmenijicui ðaicōjeiye ũi coyuiye báque Moisés bácu cubedu, iyede vainí turí ðaiye máre cubejebu.

¹⁶ Abraham mácu ju aiyé báquede Jūmenijicure, Jūmenijicu arejaquemavu ũ mácure, “Boropatebecubu mu ji jáinore”. Que teni jáðovarejaquemavu “Yópe mearo ðacacuyumu”, ũi aiyé báquede, mearo ðacaiye bojecubede jãve, caivú Abraham mácu pāramena márājivure. Jūmenijicu nópe

ðarejaquemavɯ ñi meacɯ baju boje. Aru Jūmenijicu jāve ðacɯyume yópe ñi aiyे báquepedeca. Abraham mácuí pāramena márajivubu Jūmenijicui ðaicōjeiyede ñi coyuiye báquede Moisés bácuře ðabevɯ. Quénora Abraham mácuí pāramena márajivubu ju aivɯ Jūmenijicure, yópe Abraham mácuí ju aiyे báquepedeca úre. Que baru pōeva Jūmenijicui ðaicōjeiyede cɯvarivure aru pōeva diede cɯvabevɯre máre, caivɯ maja Jūmenijicure ju aivure, majeñecu mácuře páyɯ barejaquémavɯ Abraham mácu. ¹⁷Yópe arí, Jūmenijicu toivaicōjeneaquemavɯ apesure ñi yávaiyede: “Yɯ obediyajuboacavɯ néñecu macɯyúre ðacɯyumu yɯ mure”, arejaquemavɯ Jūmenijicu Abraham mácuře. Que baru Jūmenijicui nópe aiyे boje, ñai Abraham mácuí ju aimɯ “Yópe ðacacɯyumu”, ñi aino mácarō bojecurōtamɯ. Jūmenijicu nacovaimi yaivɯ bácvure yainore jarɯvarí, ne arɯrājiiyepе ayɯ cojedeca. Aru Jūmenijicu cuedaibi ñi ðaicōjeiyequе no jipocai cube báquede.

¹⁸Nópe pōeva ne dápiaiyepе, Jūmenijicui aiyе báque Abraham mácuře ye buojabequiye barejaquémavɯ. Ubenita Abraham mácucapūravɯ ju arí Jūmenijicure napini coredejaquemavɯ. Que teni obediyajuboacavɯ néñecu mácuře páyɯ buojarejaquemavɯ ñi mácu. Jūmenijicu, yópe arí, toivaicōjeneaquemavɯ apesure ñi yávaiyede: “Obedivɯ tenajarama na mipāramena márajivɯ”, arejaquemavɯ Jūmenijicu Abraham mácuře.

¹⁹Dinɯmɯ Abraham mácu pare bucɯcɯ barejaquémavɯ. Quijino bajura jaurejavūya cien paiɯjua ñi cɯvaquino. Aru ñi juedocɯvajurorōre juedocɯvarí buojabecu ñi baju yaivyá bácuí bajupe cɯvarejaquemavɯ Abraham mácu. Aru jímarepaco báco, Sara báco, máre bucɯco barejaquémavɯ. Que baru juedoearí buojabedejaquemavɯ ó máco. Ubenita Jūmenijicure ñi ju aiyе parɯbetebedejaquemavɯ. Quéda cainɯmɯ ju arejaquemavɯ Jūmenijicure.

²⁰Abraham mácu ðajocabedejaquemavɯ cainɯmɯ ñi ju aiyede Jūmenijicure. Ye “Uí aiyе báquepe yure Jūmenijicu ðarí buojabecube”, arí dápiabedejaquemavɯ ñi mácu. Quénora ñi ju aiyе boje Jūmenijicure, parɯcɯ ðarejaquemavɯ ñi mácuře, ñi juedocɯvaquiyepe ayɯ. Aru parɯcɯ teni ñi úmei cainɯmɯ, “Parɯcɯ bajubu mɯ”, ávarejaquemavɯ ñi mácu Jūmenijicure. ²¹Que baru ñi baju arí dápiarejaquemavɯ parɯrōreca, “Jūmenijicu jāve buojaibi yure ðacayɯ yópe ñi aiyе báquepedeca”, ávarejaquemavɯ Abraham mácu. ²²Que baru, “Boropatebecubu mɯ ji jáinore”, arí coyurejaquemavɯ Jūmenijicu Abraham mácuře, ñi ju aiyede úre.

²³Ubenita Jūmenijicu toivaicōjemenejaquemavɯ “Boropatebecubu mɯ ji jáinore”, ñi aiyе báquede Abraham mácuře boje quécɯra. ²⁴Quénora Jūmenijicu toivaicōjeneaquemavɯ diede majare boje máre. Majare máre Jūmenijicu coyɯcɯyume “Boropatebevɯ mɯja ji jáinore”, maje ju aiyede úre, Jesucristore, maje jabocure, nacovaimɯ mácuře yainore jarɯvarí. ²⁵Jūmenijicu yaidé ðarejaquemavɯ Jesucristore majare boje, maje ámeina teiye boje. Aru Jūmenijicu coyurejaquemavɯ majare “Boropatebevɯ mɯja ji jáinore”, ñi nacovaiye báque boje Jesúre yainore jarɯvarí. Caiye diede ju aivɯbu maja.

Pōeva ne boropatebena Jūmenijicui jáinore

5 ¹Jūmenijicu coyuiibi majare “Boropatebevɯ mɯja ji jáinore”, maje ju aiyede úre. Aru cārijimevɯva cure ðaibi majare maje jabocɯ Jesucristo Jūmenijicuque. ²Maje ju aiyе boje Jesucristore, ñi cɯvare ðaibi majare Jūmenijicui mearo ðacaiye bojecubede. Aru maja cɯrivubu caride Jūmenijicui mearo ðacaiye bojecubeque. Que baru torojurivubu maja maje úmei, maje coreóvaiye boje cūnájáravɯ baquinói Jūmenijicu acɯyure majare “Mujarecabu yópe ji urópe”. Aru ñájjine

ɖabecube majare cojedeca. ³Aru maja máre torojrivubu maje ũmei maje ñájiyede, maje coreóvaiye boje pñeno urarõ napinajivure maje ñájiye boje.

⁴Aru torojrivubu maje ũmei maje napiye boje, maje coreóvaiye boje Jūmenijicu cadateyure majare maje ñájiyede cainumua. Que baru napini coreivubu Jūmenijicure jidubevvua.

⁵Maje napini coreiyede Jūmenijicui mearo ɖacaquiyede majare, cuyeбенamu maja. Caride coyquijivū majare aipe ɖarī majidivure cuyeбенajivure. Jūmenijicu daroibi ñai Espiritu Santore ũi cūquiyere ayū maje ũmei, ũi majide ɖaquiyere ayū majare Jūmenijicui ũmarare.

⁶Maja āmeno ɖaivū, maje baju mearo ɖaiye majibedeca, Cristocapūravū yaidéjaquemavū majare, maje ũbedeca Jūmenijicure. Jūmenijicui beoijāravū bācarõ yaidéjaquemavū ũ mácu. ⁷Ácu pōecu yayiūbebi apesu pōecure boje, mearo ɖayure. Ácu pōecu cūejubi, jidubecvua yayiūcu apesu pōecu meacure boje, apevure cadateyure.

⁸Ūbenita Jūmenijicu jáđovaimi majare aipe ũi urarõ ũede majare, daroyū bācu Cristore, ũi yayiquiyere ayū majare boje, maje āmeina teiyedeca cāreja. ⁹Maja majivū Cristoi mearo ɖacaiye báquede majare, yayí majare boje. Ūi jive meiyē báque boje, Jūmenijicu coyūibi majare “Boropatebevū mūja ji jáinore”. Ūi nōpe urarõ mearo ɖacaiye báque boje majare, maje āmeina teiyedeca cāreja, jáve majidivubu maja. Que baru pñeno urarõ Cristoi mearo ɖacaquiyede majare, maje ñájimenajiyere ayū ānijāravū Jūmenijicui ñájiovaquijāravū baquinóre pōevare, ne āmeina teiye boje.

¹⁰Majacapūravū maucūvarejaquemavū Jūmenijicure. Ūbenita Jūmenijicucapūravū cārjimene ɖarejaquemavū majare, daroyū bācu mamacure ũi yayiquiyere ayū majare boje. Que teni caride Jūmenijicui yóvaimaramu maja. Cristoi urarõ mearo ɖacaiye báque boje majare ũi yayiede, jáve pñeno urarõ mearo

ɖacacuyūme majare caride, apesu cojedeca. Maje cuede cūinávūpe maje jabocu Jesucristoque, meadacuyūme majare Jūmenijicui jorojīyede jarūvarī.

¹¹Aru pñeno baju Jūmenijicu coyūre ɖaibi majare maje ñájiyede, “Jāve torojrivubu maja Jūmenijicui jáinore”, maje jabocu Jesucristoi cārjimene ɖaiye báque boje majare Jūmenijicūque. Que baru cuyeбенajaramu maja maje napini coreiyede Jūmenijicure.

**Pablo ũi coyūino Adán mácu
aru Cristo ne borore**

¹²Javede ñai ũmū mácu mamarumucacu bācu, ũi āmiá Adán, āmeina tedejaquemavū. Aru coatedejaquemavū ũ mácu Jūmenijicure jarūvarī, āmeina teni. Que baru caivū pōeva máre Adán mácu yóbocavū coatedama Jūmenijicure jarūvarī aru yayíama máre Adán mácu āmeina teiye báque boje. ¹³Que teni Jūmenijicui coyūiye jipocai ũi ɖaicōjeiyede Moisés bācure, caivū ijāravūcavū āmeina teivū barejaquémavū. Dinūmure cāreja ũi ɖaicōjeiye cūbede, Jūmenijicu corevabedejaquemavū pōevare ne āmeina teiyede. ¹⁴Ūbenita caivū ijāravūcavū, Adán mácu yóbocavū coatedama Jūmenijicure jarūvarī, Adán mácu āmeina teiye báque boje. Adán mácu ɖarejaquemavū Jūmenijicui ɖaicōjemenore. Que baru coatedejaquemavū Jūmenijicure jarūvarī. Aru caivū ũi yóbocavū, Jūmenijicui ɖaicōjeiyede cūvabede ju abevū āmevūvacarī, coatedejaquemavū Jūmenijicure jarūvarī. Aru Adán mácu ɖaiye báque páyūreca barejaquémavū ñai Jesucristo. Pōeva jacopūyama ne ɖaiye báque bojede. Caivū pōevare Jūmenijicu jáimi āmeina teivūpe, Adán mácu ju abeno mácarõ boje. Nopedeca Jūmenijicu jáimi pōevare boropatebevūpe, Cristoi ju aino mácarõ boje.

¹⁵Ūbenita ina pūcarā ũmūva cūinátūgū āmema. Pōecu mamarumucacu, Adán mácu, ju

abecu bácareca Jūmenijicure, Jūmenijicucapūravu urarō mearo đacaibi pōevare. Jāve caivu pōeva coatedama Jūmenijicure jaruvarī, Adán mácu ju abeno mácarō boje. Ūbenita Jūmenijicu pūeno meacu bajutame. Que baru pūeno urarō mearo đacaibi obedivu pōevare ūi mearo đacaino mácarō bojecubenoque daroyu bácu Jesucristore, ūi meadaquiyepa ayu náre. Adán mácu đaino mácarō āmedaivu pōevare. Ūbenita Cristoi đaino mácarō meadaivu pōevare. Aru Cristoi đaino mácarō mearo bajubu Adán mácu đaino mácarō pūeno.

¹⁶Que baru Jūmenijicu mearo đacaibi pōevare bojecubeda, Adán mácu ju abecu bácareca ūre. Adán mácu cūinára ūi ju abe boje, Jūmenijicu arejaquemavu ūi mácare, “Mu aru mipāramena mārājivu máre nājinajaramu, mi ju abe boje yure”. Ūbenita obedivu pōeva ju abevureca cainumma baju, Jūmenijicu aibi majare, “Nājimenajaramu muja, muje ju abe boje yure”, ūi pūeno meacu baju mearo đacaiye boje.

¹⁷Jāve cūinácu ūmu, Adán mácu, ūi ju abeno mácarō boje, caivu apevu pōeva máre coatedama Jūmenijicure jaruvarī. Ūbenita jāve baju cūinácu ūmu, Jesucristo, ūi đaino mácarō boje, obedivu pōeva meatedama Jūmenijicucque. Que baru caivu maja jacopūivu bácvu Jūmenijicui mearo đacaino bojecubenore, maja ūi coyūimara mácvubu, “Boropatebevū muja ji jāinore”. Jāravu cūiméjāravu baquinóre cūvarājaramu maja Jūmenijicucque, cūinácu ūmu, Jesucristo, ūi đaino mácarō boje.

¹⁸Que baru nópe cūinácu ūmu mácu cūinára ūi ju abeno mácarō boje, Jūmenijicure jāre đarejaquemavu caivu pōevare boropateivūpe. Nopedeca cūinácu ūmu, Jesucristo, cūinára ūi mearo đaino mácarō boje, Jūmenijicu jājimi pōevare caiyajuboacavure boropatebevūpe, aru me apure đaibi náre coapa. ¹⁹Aru cūinácu ūmu mácu ūi vainí turí ju abe boje, caivu āmene

đaivu barejaquemavu. Nopedeca cūinácu ūmu, Jesucristo, ūi đaiye boje yópe Jūmenijicui urōpe, boropatebevūpe tede đaibi obedivu pōevare Jūmenijicui jājimore.

²⁰Ūbenita obediūjua Adán mácu yóbore aru obediūjua Cristoi daquiyepa jipocai, Jūmenijicu coyūrejaquemavu ūi đaicōjeiyede Moisés bácare, coreóvare đacūyu pōevare urarō āmeno ne đaiyede. Que teni pūeno urarō ju abede nūrejaquemavu na mácvu. Ūbenita pōevacapūravu ne urarō āmeno đaiyede, Jūmenijicucapūravu, cōmaje āroje jājū, pūeno urarō mearo baju đacarejaquemavu na mácvure. ²¹Que baru pōeva ne āmene đaiyūe parūétamu, ne coateiye boje Jūmenijicure jaruvarī. Nopedeca Jūmenijicui mearo đacaiye obedivu pōevare pūeno baju parūétamu aru cūvare đaivu jāravu cūiméjāravu baquinóre ūque, ūi jāiye boje obedivu pōevare boropatebevūpe. Aru Jūmenijicu yópe mearo đacaibi pōevare, maje jabocu Jesucristoi đacaiye báque boje.

Pōeva ne cue Cristoque cūinácvupe
(Gá 2.20; Col 2.12)

6 ¹¿Maje ju aiyepa boje diede, aipe đarājidi maja caride? ¿Pūeno āmenore đare nuīye jauří, Jūmenijicui jādovaquiyepa aivu ūi pūeno urarō mearore? ²¡Bi, ye que āmevu! ¡Aipinumu vaibéjarōri nópe! Majarecabu boarí jaruvaimara mácvupe paivu. Aru āmeno majare boarí jaruvayu bácvupe painotamu. Que baru āmeina teiye jaubevu majare. Aru “Đare nuīvu baru āmenore me cūrājaramu maja Jūmenijicucque”, arí buojabevu maja. ³Jāve majidivubu muja aipe teni jādovaimara mácvu Jūmenijicure ocoque. Maje jādovaiye báque Jūmenijicure ocoque apēvure coreóvare đarejaquemavu maja cūrivure Jesucristoque cūinácvupe. Iye maje nājijuroede maje āmeina teiye boje, Jūmenijicu nājine đarejaquemavu ūre majare boje. Ūre yaidé đayū,

Jūmenijicū dajocarejaquemavū ĩre cūinácūva. ⁴Maje jáđovaiyede Jūmenijicūre ocoque, yaiuvū bácavūpe barejaquémavū maja, yópe jarūvaimara mácvūpe Jesucristoque pōe jarūvainoi, mamabaju cūvarājivū ĩque. Yópe vaidéjaquemavū Jesucristore. Majepacu Jūmenijicū ĩi parué pūeno mearoque nacovarejaquemavū ĩ mácvūre yainore jarūvarī, arūcūyūre cojedeca, maje ména cūrājīyēpe ayū caride Jesucristoque cūinávūpe.

⁵Que baru maje yaiuvū bácavūpe paiye boje ĩque cūinávūpe ĩi yaiyede, jáve nacovaimaramu maja yainore jarūvarī ĩque cūinávūpe ĩi arué mamaene. ⁶Aru majidivūbu maja maje cūe báquede javede, Jesúre ju arājīye jipocare. Cristo ĩi yaiyede jocucūjaravena bíjarorejaquemavū maje āmeina đaiyue parué báquede. Jūmenijicū nópe đacarejaquemavū majare, maje đabenajīyēpe ayū maje āmeina đaiyūede yópe yebacavū ne jabocūi cōjeiyede đaiyēpe. ⁷Ūbenita jabocū cubebi cōjeñū yaiyú bácūre. Nopedeca maje yaiye báque boje Cristoque, coatede đarejaquemavū majare, maje āmeina đaiyūede jarūvarī. ⁸Maje majíe boje maja yaiuvū bácavūpe Cristoque ĩi yaiyede, coavaimara márājivūbu maje āmeina đaiyūede jarūvarī. Nopedeca majidivūbu maja cūrājivūre me Jesucristoque, maje ju aiye boje Jūmenijicūre caride aru cainūmūa. ⁹Maja majidivūbu Cristo nacajañū mácvūre yainore jarūvarī. Yaiíbēcube ĩ cojedeca. Caride yaino buojabevū ĩre yaiváino.

¹⁰Que baru Cristo yaidéjaquemavū cūinára, yaiíbēcūyū cainūmūa, parūbede đacūyū maje āmeina đaiyūede. Aru Jūmenijicūi parúeque cubi, đaiyūcū yópe Jūmenijicūi ũrópe. ¹¹Quédeca đápijarā mūja mūje baju yópe: “Āmeina teiye parūbebu, Jesucristoi đaiye báque boje. Que baru đaicōjemevū yūre caride. Yū yaiyú bácūpe páyūbu āmeina teiyeque. Ūbenita yū arūcūbu Jūmenijicūque, ĩi parué boje. Yū cūvū

đayū yópe Jūmenijicūi ũrópe, cūcū cūinávūpe Jesucristoque”, arī đápijarā mūja.

¹²Āmeina đaiyūede đaicōjemejara mūje bajure. Đaicōjeivū baru mūje āmeina đaiyūede mūje bajure, coatenajaramu mūja Jūmenijicūre jarūvarī. ¹³Que baru đaicōjemejara mūje āmeina đaiyūede mūje bajure aru mūje ũmene máre. Quénora đaicōjejara Jūmenijicūre mūje bajure aru mūje ũmene. Nacajaiuvū bácavūpe paivūbu yainore jarūvarī, arūrājivū cojedeca. Que baru Jūmenijicū matuiyeda cōjejacūrī mūje đápiayede aru mūje đaiyūede máre, mearore đare đaquīyēpe aivū. ¹⁴Mūje āmeina đaiyūede đaicōjeiye jaubevū mūjare. Jaubevū mūjare máre mūje đaiye yópe Jūmenijicūi đaicōjeiyede ĩi coyūiye báquepe Moisés bácūre. Ūbenita mūja me cūrivūbu carī, Jūmenijicūi cūre đaiye boje mūjare cūinávūpe Jesucristoque, ĩi ũrópe đarī. Nópe đaiibi Jūmenijicū ĩi mearo đacaiye boje bojecubeda.

**Pablo ĩi jēvari coyūino yebacateinora
maja mearore đaicōjeimarare**

¹⁵¿Aipe arājidi maja? ¿Āmenore đarājidi, majare đaiye jaube boje yópe Jūmenijicūi đaicōjeiyepe ĩi coyūiye báquede Moisés bácūre? ¿O quéda Jūmenijicū pūeno meacu baju ārūmeteidi maje āmeina teiyede? ¡Bi, ye que āmevū! ¡Aipinūmū vaibéjarōri nópe! ¹⁶Jāve majidivūbu mūja iyede. Yebacateivū baru apēcure, mūjare ju aiye javūvū ĩre. Quédeca mūja ju aiyūrivū baru mūje āmeina đaiyūede, maumena đaiye jauquīyēbu mūjare diede. Aru coatenajaramu mūja Jūmenijicūre jarūvarī. Ūbenita mūja ju aiyūrivū baru Jūmenijicūre, pūeno baju ju arājaramu ĩre. Que tenī me cūrājaramu mūja, đaiivū ĩi ũrópe. ¹⁷Jipocamia mūja ju arejaquemavū mūje āmeina đaiyūede yópe yebacavū ne ju aiyepe ne jabocūre. Ūbenita apējārvūre mūja ju arejaquemavū mūje ũmei iye yāvaiyede jávene, Jūmenijicūi

jápiarī eare daiyede mujare apevu ne bueiyeede. Que baru mearore jínajarevu Jūmenijicure. ¹⁸Úrecabe daicōjene đabecu mujare muje āmeina daiyueque. Quénora mujamu ūi yebacavupe paivū, đarājivū mearore.

¹⁹Ūi coyuyubu mujare yópe muje majiépe, muje jápiarājiyepe ayu ji bueiyeede. Jipocare muja yebacavupe barejaquémavu, đarājivū āmenore. Āmeina đaivu barejaquémavu muja. Aru ju abeni Jūmenijicui daicōjeiyede, đaivu āmenejaquemavu muja ūi urópe. Nopedeca caride yebacavupe tejarā muja, đarājivū mearore. Mujare Jūmenijicui coavaiye boje āmeina daiyede jaruvārī, cainūmua đare nujara pūeno mearore.

²⁰Jipocamia muje āmeina daiyueque yebacavupe paivū barejaquémavu muja. Aru mearore đaivu āmenejaquemavu dinūmure. ²¹Ye mearore eabedejaquemavu muja iye muje āmeina daiye báqueque. “Torojurājivutamu nūja”, arī dāpiarīđurejaquemavu. Ūbenita torojubedejaquemavu muja. Que baru caride cuyevū muja, muje āmeina daiye báque boje, coatede daiye pōevare Jūmenijicure jaruvārī. ²²Ūbenita Jūmenijicu daicōjemene đaiibi mujare muje āmeina daiyueque. Quénora epeibi mujare yópe ūi yebacavupe. Que teni cainūmua memecaiyurivubu muja Jūmenijicure. Aru Jūmenijicui coatede daiye boje mujare muje āmeina daiyuede jaruvārī, pūeno mearo đare nuivubu muja, cūvarājivū jāravu cūiméjāravū baquinóre ūque. ²³Pōeva ne āmeina daiye bojebu ne coateino Jūmenijicure jaruvārī. Ūbenita ina cūrivū Jesucristoque cūinávupe, cūvama ne bojeva, Jūmenijicui mearo đacaiye boje bojecubeda, ne cuede ūque caride aru cainūmua.

**Pablo ūi jēvari coyūino
pūrubuoinora Jūmenijicui
coyūiye báquede Moisés bácure**

7 ¹Muja, jívū, coreóvaivubu jāve iye ji coyūquiyede mujare caride. Coyūquijivū Jūmenijicui daicōjeiyede

ūi coyūiye báquede Moisés bácure. Pōeva daicōjeimaramu dieque ne cuede cāreja ijāravūi pū ne yayieta. ²Que baru Jūmenijicui daicōjeiyede ūi coyūiye báque Moisés bácure yópe cūináco nomió pūrubuodope paiyebu, cūcodo jímarepacuque ūi yaibéde cāreja ūqueda. Ūbenita ūi yaidú, iye daicōjeiyede aipe đabejebu ō dinūmū. ³Que baru ico apescuque cūco baru jímarepacure jaruvārī ūi cuede cāreja, āmeina đajebu ō aru “āmeço” ajebu óre. Ūbenita jímarepacu bácui yainíburu yóbore, cōjeimo āmejebu ō dinūmū. Que baru pūrubuodo baru apescuque, āmeina đabejebu ō.

⁴Muja, jívū, judíova, Jesúre ju aivu, quédeca vaivū mujare. Yópe ūmu ūi cūvaepe jímarepacore, Jūmenijicui daicōjeiye ūi coyūiye báque Moisés bácure cūvarejaquemavu mujare. Que baru iye daicōjeiyeque daicōjeimara marejaquémavu muja. Ūbenita Jesucristoi yayiede, caivu ina ūre ju arājivū máre yaidéjaquemavu ūque Jūmenijicui jāinore. Que teni muja máre yaivu bācavupe barejaquémavu ūque. Que baru iye daicōjeiyeque daicōjeimara āmevu muja caride. Yópe nomió, jímarepacu bācui yainíburu yóbore, ōi pūrubuoiyepe apescuque, nopedeca muja máre muje coateniburu yóbo yainore jaruvārī, yópe nacovaimarape paivū cūrivubu Jesucristoque cūinávupe. Maje cuede Jesucristoque cūinávupe, yopedecabu majare: Ū majemarepacupe páyu pūeno mearore đarī nure đaiibi majare, maje cūarājiyepe ayu pūeno mearo ūque. ⁵Ūbenita maje cūarājiye jipocai Jesucristoque, maje āmeina daiyue báque boje, coatedejaquemavu muja Jūmenijicure jaruvārī.

Yopedeca barejaquémavu majare: Pūeno āmenore đare nūrejaquemavu maja, pūeno baju coatenajivū Jūmenijicure jaruvārī. Jūmenijicu daicōjeme máque apejīene majare Moisés bácure ūi coyūicōjeiye báqueque, yópe pūeno urarō āmenore đare đarejaquemavu maje āmeina

ðaiyuede. Que teni maja maje bajure ðaicõjeneaquemavu aru maje dápiaiye de máre, pueno baju ámeina tenajivu. ⁶ Ñbenita caride ðaicõjememaramu maja Jñmenijicui ðaicõjeiye ñi coyuiye báqueque Moisés bácure. Jipocamia yebacavure barejaquemavu maja. Diede ju aiyे jaurejaquemavu majare. Ñbenita Jñmenijicure memecabevubu maja javecarõque, yõpe ñi ðaicõjeiye ñi coyuiye báquepe Moisés bácure. Quénora Jñmenijicure memecabevubu maja mamaroque caride, yõpe ñai Espiritu Santoi cure ðaiyepe majare arué mamaeque. Que baru ðaiyubu yõpe iye ðaicõjeiyepe majare jané cube boje, quénora maje ðaiyue boje.

Pablo “Ámeina tede ðaiye cue ji baju” arí, ñi coyuiño
(Ro 13.9; Gá 5.17)

⁷ ¿Aipe coyuiye jauri majare caride? ¿Meameni Jñmenijicui ðaicõjeiye ñi coyuiye báque Moisés bácure? Meame ámevu. Nópe dápiaiye jaubevu. Ñbenita ji ðaicõjeiyede coreóvaquiyе jipocare, coreóvabedejacacu yu ji ámeina ðaiyue cuede. Cúináro iye ðaicõjeiycarõ, “Áujimejacu apecu ñi cuvaede”, aino cubedu, áujimejebu yu apevu ne cuvaede. ⁸ ðaicõjeiye cubedu, maja ámeina ðaiyubejebu. Ñbenita Jñmenijicui ðaicõjeiye ñi coyuiye báque Moisés bácure coreóvare ðarejaquemavu yure áujiye jaubede põeva. Ñbenita no yóboi, ji coreóvaiye boje diede, urarõreca dápíarí búrejacacu áujiyede. Ji ámeina ðaiyue boje, jujovaimumu yu. Que baru áujivu yu. ⁹ Apenumua iye ðaicõjeiyede coreóvabecu, torojucu barejacácu ji baju. Coreóvabedejacacu boropateyu ji baju. Ñbenita cúinájáravu ji jápiaiye de yo ðaicõjeino, “Áujimejara” ainore, ure ámeina ðaiyede búrejacacu yu. Aru yaiyú bácure coateyu barejacácu Jñmenijicure jaruvarí.

¹⁰ Jñmenijicu coyuridurejaquemavu ñi ðaicõjeiyede Moisés bácure, põeva ju arí diede ne curájíyepе ayu me

úque ijáravure aru járavu cúiméjáravu baquinóre máre. Ñbenita bíjare ðarejaquemavu yure. Ji ðabe báque boje yõpe Jñmenijicui ðaicõjeiyepe, coatede ðaimu marejacácu yu Jñmenijicure jaruvarí. ¹¹ Ji coreóvaiye báque boje, cúináro ñi ðaicõjeiycarõ ñi coyuiye báque Moisés bácure, jujovaimure tedejacacu yu ji ámeina ðaiyue boje. Nurié dápíabedejacacu yu. Ñbenita ji nópe ðaiye báque boje, ju abedejacacu Jñmenijicure. Que teni ji ámeina ðaiyue boje, coatedejacacu yu Jñmenijicure jaruvarí yaiyú bácure no ðaicõjeino cúinároque. ¹² Que baru ámecubu yu. Ñbenita Jñmenijicui ðaicõjeiye ñi coyuiye báque Moisés bácure ámeno cubetamu die. Que baru yo Jñmenijicui ðaicõjeino cúináro máre ámeno cubenotamu. Pueno baju mearotamu, yõpe Jñmenijicuvacari pueno baju meacure. Aru põeva nore mearore ðaiyu torojurivubu.

¹³ ¿No ðaicõjeino mearo aru torojure ðaino máre coatede ðaidi yure Jñmenijicure jaruvarí yaiyú bácure? ¡Bi, ye que ámevu! ¡Aipinumu vaibéjarõri nópe! Quénora ji baju ámeina ðaiyue boje, coatedejacacu yu Jñmenijicure jaruvarí yaiyú bácure. Ji ju abede no ðaicõjeino mearore, jáðovaivu aipe pueno ámeno baju ji ámeina ðaiyuede. Que teni Jñmenijicu coyurejaquemavu no ðaicõjeinore, ji majiquiyepе ayu aipe pueno ámeno baju ji ámeina ðaiyuede. ¹⁴ Maja judíova majidivubu Jñmenijicui ðaicõjeiye ñi coyuiye báque Moisés bácure pueno mearo baju Jñmenijicui Espiritu Santoi epeiye báque boje diede aru ñi jie báque boje máre. Ñbenita yúcapúravu ðaicõjeimumu ji ámeina ðaiyueque. Aru ámecubu yu. Yúvacari ðayubu yõpe ji ámeina ðaiyure. Yõpe yebacacu, apecui bojedaimure páyubu yu. Aru ji ámeina ðaiyue ñai yebacacu jabocure painomu. Que baru yurecabu ðaicõjeimú ji ámeina ðaiyueque.

¹⁵ Jáve coreóvabevu aipe vaiyede yure aru ji ðaiyede máre. Yõpe ji ðaiyurepe ðabevu yu. Ñbenita iyebu ji jáiyube

ji ðaiye. ¹⁶Ji ðaiyubede ðayu baru, jádovaivu yu Jūmenijicui ðaicōjeiyede méne. ¹⁷Yávacari ðayubu iye āme ji ðaiyede. Ūbenita que ðabevu ji ũe boje. Quénora ji āmeina ðaiyue cūe boje cāreja ji ũmei, diebu āmeina tede ðaiye yure. ¹⁸Yu majivu yure me cubede. Ji ũmei mearo cubevu. Yávacari ðaiyuvu méne. Ūbenita ye buojabevu ðayu méne yópe ji ũrópe. ¹⁹Iye méne, ji ðaiyuede, ðabevu yu. Quénora iye āmene, ji ðaiyubede, ðaivu yu. ²⁰Yu ðayu baru ji ðaiyubede, yu ānevū ðayu die. Quénora ji āmeina ðaiyue cūe cāreja ji ũmei, diedecabu āmeina tede ðaiye yure.

²¹Que baru yu coreóvaivu aipe vaiyede yure cainumua. Méne ðaiyuvu yu. Ūbenita quénora ji ðaiyeque āmene eaivu yu. ²²Torojárĭ ũvu Jūmenijicui ðaicōjeiyede ji ũmei. Aru ðaiyurĭduivu yu die. ²³Ūbenita ji āmeina ðaiyueque ðaicōjeimumu yu. Yópe boaipóeva ne maucvarāðaiyepē ĩmaro jabocūre, nopedeca ji āmeina ðaiyue maucūvare ðaivu yure.

²⁴Que baru jāve yu, pōecu, cōmaje ārojacobu yu. Ūrarōreca jāvu yure meadaipōecūre, ðaicōjeimu āmequiyepē aivu ji āmeina ðaiyueque aru coateimu āmequiyepē aivu Jūmenijicure jaruvārĭ. ²⁵Yu mearore jĭyūbu Jūmenijicu pūeno meacu bajure. Ūrecabe maje jabocu Jesucristore caðatede ðayu yure. Yópe cuvū yu: Yávacari Jūmenijicure ju aiyuvu yu. Aru ũre memecaiyuvu yu. Ūbenita nópe ji ðaiyūpe ðaiye majibevu yu cainumua. Quénora apenumua ðaivu yu yópe ji āmeina ðaiyueque.

Espĭritu Santoi cure ðaino pōevare yópe ũi ũrópe

(Mr 14.36; 1 Co 3.16; Gá 3.17-19, 4.5-7)

8 ¹Caride maja Jesucristoque curivubu cūinávpe. Que baru coatebenajaramu maja Jūmenijicure jaruvārĭ, maje āmeina teiye boje. ²Ñai Espĭritu Santoi ðaicōjeiye boje yure caride, cure ðaibi yure Jesucristoque cūinávpe. Que baru jāve cure ðaibi yure. Que tenĭ ñai Espĭritu Santo

ji āmeina ðaiyuede ðaicōjemene ðaibi yure. Que baru ji baju āmeina ðaiyue coatede ðarĭ buojabevu yure Jūmenijicure jaruvārĭ yaiyú bācupe. ³Jūmenijicūvacari ðacarejaquemavu majare iye ũi ðaicōjeiye ũi coyuiye bāque Moisés bācure ðarĭ buojabede. Póeva ne āmeina ðaiyuede ũe boje, náva ðaicōjeiyepe ðarĭ buojabedejaquemavu ne majiéque. Que baru iye ðaicōjeiyeque Jūmenijicu meadayu buojabedejaquemavu pōevare ne āmeina teiyede jaruvārĭ.

Ūbenita Jūmenijicūcapūravu darorejaquemavu mamacūre, ũ jicūre, jaruvacacūyū pōeva ne āmeina ðaiyuede, maje curājiyepē ayū āmeina ðaiyubevūva. Nai mamacu ðarejaquemavu ijārvavĭ pōecūpe, cuvacu ũi baju yópe apevu pōeva, āmeina teivu ne bajupe. Ūbenita Jesucristocapūravu ye āmeina ðabedejaquemavu cainumua. Ūbenita Jūmenijicu ñájine ðarejaquemavu mamacui bajure, ũi bojeðaiquiyepē ayū maje āmeina ðaiyuede, meadacūyū majare maje āmeina teiyede jaruvārĭ. ⁴Jūmenijicu ðarejaquemavu nópe, ðare ðacūyū majare caiye ũi ðaicōjeiyepe me. Majarecabu ðabevu yópe maje baju ũrópe. Ūbenita majarecabu ðaivu yópe ñai Espĭritu Santoi ũrópe ũi parúeque.

⁵Ina pōeva ðaivu yópe ne baju ðaiyue ðaicōjeiyepe ne majiéque máre, nácapūravu dápiadama ne baju uede. Ūbenita ina pōeva ðaivu yópe ñai Espĭritu Santoi ðaicōjeiyepe ũi majiéque, nácapūravu dápiadama ñai Espĭritu Santoi uede. ⁶Mūja dápiarĭ ðaivu baru mūje ũmei uede, mūjacapūravu jāve yaivu bācavūpe paivubu, coateivu Jūmenijicure jaruvārĭ. Ūbenita mūja dápiarĭ ðaivu baru ñai Espĭritu Santoi uede, mūjacapūravu jāve apurivu, cārijimena me curivubu mūja Jūmenijicūque. ⁷Que baru ñai pōecu dápiarĭ ðayu baru ũi baju uede, maucvarĭ ju abebi Jūmenijicure. Aru jāve ye ðaicōjeñu buojabebi Jūmenijicure ũi bajure máre. ⁸Que

baru ina pōeva ðaivu ne baju ñede ne majiéque jáve Jūmenijicure torojure ðari buojabema na.

⁹ Ñbenita mujavacari, ñai Espiritu Santoi cwe boje mujaque, muja ðabevu yópe muje baju urópe muje majiéque. Quénora ðaivubu muja yópe ñai Espiritu Santoi urópe ñi majiéque. Ácu pōecu cuvabecu baru ñai Espiritu Santore úque, Cristo jicu amemi ñi. ¹⁰ Ñbenita mujacapuravu curivubu Jesucristoque cūinávure. Aru ñai Espiritu Santo apure ðaibi mujare. Muje baju coapa yópe yaivu bācavure coateivutamu muja muje amaina ðaiyue boje. Ñbenita mujavacari apurivu me curivubu cārijimena Jūmenijicūque “Boropatebevū muja ji jáinore”, ñi arī coyūiye báque boje Jesucristoi ðacaiyede mujare. ¹¹ Aru Jūmenijicu ñai Espiritu Santore nacovare ðarejaquemavu Jesucristore yainore jaruvārī. Ñai Espiritu Santoi cwe boje mujaque, apure ðacuyume muje bajuáre, muje cvarājiyepere ayu mamaūme. Aru iye mamaūmeque muja cvarājaramu parúede, ðarājivu no mearore yópe muje ðaiyūere.

¹² Muja, jívū, que baru ðaiye javvu majare ñai Espiritu Santoi majiéque, yópe ñi urópe. Ðaiye javbevū majare yópe maje baju urópe maje majiéque.

¹³ Muja ðaivu baru yópe maje baju urópe muje majiéque, jáve coatede ðaimaramu muja Jūmenijicure jaruvārī caride. Aru Jūmenijicu ñájine ðacuyume mujare cainūmua. Ñbenita muja ðajocaivu baru muje amaina teiyede caride, aru muja ðaicōjemevū baru muje amaina ðaiyuede muje bajure, ñai Espiritu Santoi cadateiyequē jáve me curivubu cārijimena Jūmenijicūque.

¹⁴ Caivu ina Jūmenijicui mára ðaivubu yópe Espiritu Santoi urópe, ñi jaboteimarape paivu. ¹⁵ Javede jidurivu barejaquémavu muja Jūmenijicure. Ñbenita ñai Espiritu Santo, Jūmenijicui daroimū mácu, yebacavure tede ðabebi mujare yópe muje ðaicōjemenajiyepere ayu bedióva cojedeca muje amaina ðaiyūequē. Que baru jidure ðabebi

ñi mujare. Muja jidubevū coateiyede Jūmenijicure jaruvārī, muje amaina teiye boje. Nópe vaibéquiye bu mujare. Quénora ñai Espiritu Santo majide ðaibi mujare, curājivure yópe Jūmenijicui urópe. Que ðayū ñai Espiritu Santo ñi majiéque “mū, jipacu”, arī coyure ðaibi majare Jūmenijicure. ¹⁶ Ñai Espiritu Santo cūbi maje ūmei, majide ðacuyū majare Jūmenijicui mára juedōjinape paivure. ¹⁷ Jūmenijicui máramu maja. Que baru jacopurājaramu úre caiye iye Jūmenijicui mearo ðacaiyede, ñi jíquiyede ñi pōevare. Aru jacopurājaramu maja Jesucristoque iye Jūmenijicui jíquiyede úre. Ñbenita Jesucristope ārojamevū maja cāreja. Que baru ñájivubu Jesucristope ijāravui. Aru ñájivu baru caride, jáve cūinájāravū baquinó meara baju barājāramu maja yópe Jūmenijicui urópe, Jesucristope. Aru Jūmenijicu “Mearamu muja”, arī coyucuyume majare.

**Jūmenijicui jádovaquino ñi pōeva
meara bajure
(2 Co 5.2-4)**

¹⁸ Jáve majivu yū urarō mearore Jūmenijicu ðacacuyure majare, maje torojurājiyepere ayu maje ūmei ñi oatvūquiyede majare yópe ñi urópe. Que baru ye baju amevū majare maje ñájiyede ijāravure, maje cuede yópe Jūmenijicui urópe ðaiye jaué boje cāreja. ¹⁹ Caivu Jūmenijicui cuedaimara napini coreivū, pare jáiyurivubu Jūmenijicui oatvūquiyede caivu ñi mārare yópe ñi urópe, mamaūmeque meara baju. ²⁰ Caiye iye Jūmenijicui cuedaiye báque “Yópe vaiquíyebu” ñi aye báquedeca, vaibévū yópe ñi urópe. Caiye bíjare nuivū. Ñbenita ñi cuedaiye báque cūináro ye bíjavevū. Quénora Adán mácu amaina teni ñi ju abe báque boje Jūmenijicure, Jūmenijicu bíjaicōjenejaquemavu diede. Ñbenita cainūmua amēniduiyebu yópe. Quénora caivu Jūmenijicui cuedaimara napini coreivubu, Jūmenijicui meadaquiyepere aivu caiye iye ñi cuedaiye báquede yópe ñi aye báquedeca.

²¹ Caiye Jūmenijicui cuedaiye báque bǐjare naiye jauvu javede aru caride máre, yópe yebacavure ne daiye jauépe ne jabocui daicōjeiyede. Ūbenita cūinájāravu baquinó Jūmenijicu dajocare đacuyume diede. Aru mamaro mearo đacuyume ũ caiyede. Quédeca urarō meara đacuyume caivu ũi mārare. ²² Maja majidivubu javede pū caride máre caiye iye cuedaiye báque nájijyede yópe juedocu pōteyure nájijyepē. ²³ Aru maja máre cuvarivubu nái Espíritu Santore, Jūmenijicui daroimū márcure majare, mamarumure maje ju arí buiyede Jesúre. Que baru majavacari napini coreivubu dijāravure, Jūmenijicui ámeina teiye cubede đaquijāravu baquinóre majare coapa, maje curājiyepē Jūmenijicui mārava, yópe ũi nrópe. ²⁴ Jūmenijicu meadarejaquemavu majare. Majare napini corede đarí ũi đaquiyede yópe ũi aiyē báquipedeca, meadarejaquemavu majare. Ūbenita jáivu iye maje napini coreiyede, jáve napini coreiye ámevu die. Pōecu cubebi napini coreyū iyede ũi jave jáiye báquede. ²⁵ Ūbenita napini coreivū baru iye maje jámene cāreja, napini coreiye jauvu majare.

²⁶ Quédeca nái Espíritu Santo cadatecudayube majare, parubevure, maje mearore daiye majibe boje. Maje urarō majibe boje, jēniayē jauřore Jūmenijicure majibevū maja. Aru aipe đarí jēniainore máre majibevū maja. Que baru nái Espíritu Santovacari, maje coyūiyēde majicu, jēniacaibi Jūmenijicure majare boje. Que teni ũme coturí, coyūibi Jūmenijicure iye maje coyūiyēde, maje yávaiye majibeque. ²⁷ Nái Espíritu Santo jēniacaibi Jūmenijicure parurōreca, cadatecuyū Jūmenijicui pōevare yópe Jūmenijicui urópe. Que baru Jūmenijicu, caivu pōeva ne dápiaiye de majicu, majibi Espíritu Santoi dápiaiř daiyuede.

Cristo ũi cadateino caiye maje daiyede

(2 Co 3.18; Gá 4.19; Fil 3.10)

²⁸ Maja majidivubu Jūmenijicure urivu baru, Jūmenijicu cadateyure

majare cainumua. Jūmenijicu mearo đacaibi majare caiye vaiyede majare, ũi cutuimara mácavure. Aru javede, mamarumure, Jūmenijicu majidejaquemavu aipe ārjarivure đacuyū majare, ũi cutuimara mārājivure. ²⁹ Jipocamia Jūmenijicu beorejaquemavu ũ jina mārājivure. Ūi beoimara mácavure Jūmenijicu epedējaquemavu, ũi mácupe paivu barājiyēpe ayū aru mamacu nēmamícupe páyū baquiyēpe ayū obedivū jēneboi. ³⁰ Aru ũi epēmara mácavure Jūmenijicu cutuibi, ju arājiyepē ayū ũi cutuiyede ũ jina mārājivūva. Aru ũi cutuimara mácavure “Boropatebevū mūja ji jáinore”, arí coyūibi náre Jūmenijicu. Aru ũi coyūimara mácavu boropatebevure Jūmenijicu cure đaibi náre mearava yópe ũi nrópe.

³¹ ¿Aipe arājidi maja? Jūmenijicui cadateiye boje majare, ye baju ámevu apēvū ne maucvarō majare. Pōecu cubebi ámedarí buojayū maje ũmene.

³² Jūmenijicu jecubedejaquemavu mamacure, meadacuyū majare. Qué Nora jēni jícarejaquemavu ũre, ũi urarō nájijquiyepē ayū majare boje. Que baru maje majié boje jícayure mamacu cūinácure, ũi umure, majare boje, jáve majidivubu đacacuyure majare máre mearore quéda jecubeda. ³³⁻³⁴ Jūmenijicuvacari “Boropatebevū mūja ji jáinore”, arí coyūrejaquemavu jave ũi beoimara mácavure. Que baru pōecu cubebi ámeina boro coyūř adarí buojayū majare. Aru pōecu cubebi coyūř buojayū majare nájijyē jauřore máre. Jesucristo, yayiýú bācu majare boje, nacovaimū mácu yainore jaruvarí, Jūmenijicui meapūravūi cubi caride. Nái meapūravūi cūcu paruéde cuvabi. Nái Jesucristo parurōque jēniaimi Jūmenijicure majare boje. Que baru náme ámeina boro coyūř adarí buojabema majare. ³⁵ Ye coatede đarí buojabevū majare Cristore, majare ucure, jaruvarí. Maja nájivū baru, aru chōivū baru, aru ámeina yávaimara maru, aru ávne ijimara maru áiye cubedu, aru cuitótēcaje cubedu, aru jidurivū baru

jidoae boje, aru boarí jaruvaimara maru máre, caiye iye boje ye coatede ðaimara ámenajaramu maja Cristore jaruvarí.

³⁶Aru iye boaiye borore javede Jümenijicu, yópe arí, toivaicõjenejaquemavu cüinácu ñi yávaiyede coyucaipõecu bácu:

Caijárovua boarí jaruvadama ñujacavure, ñuje mure ñe boje. Dápiadama ñujare curivure ne boarí jaruvárãjimarape, yópe ne dápiayepere ovejavare ne nuvaimarare boainoi, arejaquemavu Jümenijicui yávaiyede coyucaipõecu bácu Jümenijicure.

³⁷Ûbenita majacarpüravu maje mauva ne ámeina ðabemaramu. Quénora Jümenijicu püeno meare ðalbi majare ne ámeina ðariduiyede, ñi ñeque ñi jáðovaiye báquede Cristoí yayjáravu. Cadatevaibi majare, ðacuyü püeno meara márãjivu.

³⁸Yu jáve majivu iyede: Ye majare coatede ðarí buojabevu Jümenijicure, majare ucure, jaruvarí. Maje yaidú, Jümenijicu ñbi majare. Aru maje curu ijárovure obediüua, Jümenijicu ñbi majare máre. Aru ángeleva, aru jabova, aru cavarõi parurivu máre ye majare coatede ðarí buojabema Jümenijicure jaruvarí. Nopedeca caiye iye cari járovu vaiye boje, aru caiye iye apejárovua baquiyé vaiquíye boje máre ye majare coatede ðaimara ámenajaramu maja Jümenijicure, majare ucure, jaruvarí. ³⁹Aru maja nuivu baru ijárovu püenoí aru jia urada ñmujurõ jívui máre, coatede ðaimara ámenajaramu maja Jümenijicure, majare ucure, jaruvarí. Que baru jáve ye cubenore cuedaino márãrõ boje maja coatede ðaimara ámenajaramu Jümenijicure, majare cuedayü bácu, jaruvarí. Majidivubu maja aipe Jümenijicui urarõ urõre majare, Jesucristoí mearo ðacaiye báque boje majare. Que baru curivütamu maja Jesucristoque cüinácvupe.

**Jümenijicu ñi beoino judíovare,
Israecavure
(1 P 2.10)**

9 ¹Yu coyuyubu mujare yávaiyede jávene. Yu Cristoí jicubu. Que

baru borocubevu yu. Ñai Espíritu Santo ðaicõjeimi “Boropatebevü yu”, ji arí dápiayequé. Que baru majivu yu borocubede iye ji coyuyiye. ²Jáve pare chíoiyu yu ji ümei, jívure ne ju abe boje Jesúre. Járovua coapa chíori ñájivu yu ji üme ji uriduiye boje ina jñecuva mácvui páramena ne ju arãjiyepere ayu Jesúre. ³Yu náre cadateni buojayü baru, yávacari jëniájebu Jümenijicure ñájine ðacuyure yure toabo cüiméboi, ne bíjabenajiyepere ayu. “Coatede ðajacu yure Cristore jaruvarí”, ajebu yu Jümenijicure. ⁴Návacari Israel bácu, ñai mamarumu Jacob ámicucu bácu, Jümenijicui püeno baju mearo ðacaimu mácvui páramenamu. Návacaribu Jümenijicui beoimara mácvu, ñi epequiyepere ayu náre ñi bucúovaimara. Náque cucu, Jümenijicu jáðovarejaquemavu náre ñi mearo miadárorre, ne majinajiyepere ayu meacu bajure. Jümenijicu coyurejaquemavu náre: “Yurecabu muje jabocu. Aru mujarecabu ji jaboteimara”. Que arí, Jümenijicu toivaicõjenejaquemavu Moisés bácu ñi ðaicõjeiyede náre. Jümenijicu buedejaquemavu náre aipe ðarí ne jáve mearore jínajiyede ñre. Jümenijicu “Yu mearo ðacacuyumu mujare”, arí coyurejaquemavu náre. ⁵Ina judíovavacari “Ñujeñecuva mácvubu”, adama Abraham mácu, Isaac bácu, Jacob bácu, aru Jacob bácu doce paivu mamara mácvure máre, ne yajuboare buipõeva mácvure. Aru Cristovacari pøetedejaquemavu yópe ne yajubocacupe, judíovacacupe. Ûbenita me jápiajarã yure. Jesucristo pøecube. Ûbenita ñ máre Jümenijicu, mearore jímme, aru ne torojuede jímme cainüua járovu cüiméjárovu baquinóre. Quédecabu.

⁶Yu coyubevu mujare Jümenijicui ðabede yópe “Mearo ðacacuyumu yu mujare”, ñi aipe báquepedeca ina Israecavu majeñecuva mácvure. Quénora yorecabu jáve: Caivu ina Israel bácu páramena Jümenijicui beoimara mácvu ámemá. Que baru caivu ina

judíova baju ãmema. ⁷ Ārūjara mūja aipe Jūmenijicūi jáđovaino mácarōre caivū ina Abraham mácūi pāramenare ũi pāramena baju ãnevūre ũi jáinore. Que baru, “Quévūra ina Isaai pāramena marajárama mipāramena baju”, arejaquemavū Jūmenijicū Abraham mácūre. ⁸ Nōpe ayū Jūmenijicū, aiycū barejaquémavū yōpe: Ina Abraham mácūi pāramena, pōteivū yōpe caivū arevū juēđovape, ũi pāramena baju ãmema Jūmenijicūi jáinore. Quénora ina Abraham mácūi pāramena pōteivū Jūmenijicū “Yōpe mearo đacacūyūtu yū mūjare”, ũi aipe báque boje, nárecabu, ũi soyūiyede ju aivū, jāve Abraham mácūi pāramena baju. ⁹ Yōpe arī, Jūmenijicū soyurejaquemavū Abraham mácūre: “Yōpe đacacūyūtu yū mūjare. Cari daiūjūi copaidacūyūtu yū. Dinūtu maquinōre mimarepaco, Sara, jave juēđocūvacōđome mamacūre”, arejaquemavū Jūmenijicū Abraham mácūre.

¹⁰ Ārūjara aipe Jūmenijicūi jáđovaino mácarōre Isaac bācūque caivū ina Isaac bācūi pāramenare ũi pāramena baju ãnevūre Jūmenijicūi jáinore, ũi beobe báque boje náre. Majeñecu mácūi márepaco báco, Rebeca báco, juēđoearejaquemavū pūcarā mamara pējavare népacū Isaac bācūque. ¹¹⁻¹² Jūmenijicū nōpe vaidé đarejaquemavū, beocūyū cūinācū némacūre yōpe ũi űrōpe, ũi majié báquepedeca mamagūmūre. Yōpe arī, Jūmenijicū soyurejaquemavū Rebeca bācore: “Īmascapūravū jībūcu pūeno rapūrō pūcūyūte. Jībūcu memecacūyūte ĩmascapūravūre”, arejaquemavū Jūmenijicū Rebeca bācore. Jūmenijicū nōpe arejaquemavū ne pōtenajīye jipocamīa. Ũi nōpe aiyede ina pūcarā ye đabedejaquemavū cāreja mearore aru ãmenore máre. Que baru Jūmenijicū ye beobedejaquemavū nācacūre ũi đaiye báque boje. Quénora beorejaquemavū cūinācū nācacūre ũi jicū bacūyūva ũi cutuquīye boje ũre. ¹³ Aru obedijūa yóboi, yōpe arī Jūmenijicū

toivaicōjenejaquemavū ũi yávaiyede: “Jacore űrejacacū yū. Ũbenita Esaūre űbedejacacū yū”, arejaquemavū Jūmenijicū.

¹⁴ ¿Aipe soyūrājīdi maja caride diede? ¿Jūmenijicūvacari đabedi mearore caivūmūa yōpe “Đacacūyūtu”, ũi aipe báquepedeca? ¡Que ãnevū! ¡Aipinūtu Jūmenijicū đabecūbe nōpe! ¹⁵ Yōpe arejaquemavū Jūmenijicū Moisés bācūre: “Yū cōmaje āroje jáiyūcu baru pōcūre, ũre cōmaje āroje jácūyūtu yū. Aru yū mearo đacaiyūcu baru pōcūre, jī cōmaje āroje jáiye boje, ũre mearo đacacūyūtu yū”, arejaquemavū Jūmenijicū. ¹⁶ Que baru Jūmenijicū beobebi pōcūre, űai pōcūi űe boje. Aru Jūmenijicū beobebi pōcūre, űai pōcūi đaiye boje. Quénora Jūmenijicū beoībī pōcūre, ũi baju cōmaje āroje jáiye boje. ¹⁷ Yōpe arī, Jūmenijicū toivaicōjenejaquemavū ũi yávaiyede ũi daroiye báquede Moisés bācūre, ũi soyūquīyere ayū űai Egipto āmicurijoborōcavū ne jabocū bācūre, Faraón ne aimūre: “Mū jave ãmeina teyūbu aru pueđabevū mū űure. Aru yū pūeno baju ãmeina tede nūre đaiyū mūre, jáđovacūyū caivū pōevare aipe vaiquīyede mūre jī majiéque. Aru ne járiburu yóboi diede, ‘Jāve Jūmenijicū majicūbe caivū pūeno’, arājarama na”, arejaquemavū Jūmenijicū. ¹⁸ Que baru Jūmenijicū cōmaje āroje jáimi arevūre yōpe ũi baju űrōpe. Aru pūeno baju ãmeina tede nūre đaiyū arevūre máre, ne űbenajīyere ayū ũre pūeno baju yōpe ũi űrōpe.

¹⁹ Que baru cūinācū mūjacacū jēniari jácūyūte űure: “¿Jāve maru iye mi soyūiye, aipe đarī Jūmenijicū soyūyū buojaidi pōcūre, ‘Boropateyūbu mū mi ãmeina teiye boje’? űame cubebi buojarī vaidé đayū yōpe Jūmenijicūi űbenope. Aru űame cubebi buojarī vaibéde đayū máre yōpe Jūmenijicūi űrōpe”, acūyūte űure. ²⁰ Aru pōcūrecabu mū. ¿Aipe teni “Jorojīni, copū teni buojayūtamū yū”, arī dāpiayūgū mū Jūmenijicūre? Jorogū yávārī buojaidū baru pōcūre, jēniari

jámejeba pēpeñure: “¿Aipe teni ñacurū mū yure yópe?” ¡Que ñevu! Jūmenijicu ñarejaquemavu pōevare ũi dápiainope. Que baru cuedayū bácure jēniari jáiye jaubevu cuedaimara mácavure. ²¹Nai jororure pēpepōescu jāve ñarī buojaibi ũi urōpe joboque. Cūinábū jobobūque ñarī buojaibi pucarua jororure. Cūináru jororure me ñaibi ñuibajieneca, pōeva ñidure jári ne arājiyepe ayu, “Ñai pēpeñ me majibi”. Aru apedu jororure maumejieneca ñaibi ũre jauéde ũre ñauidu caijāravu.

²²Aru Jūmenijicu ñaibi pōevare yópe pēpepōescu jororure ũi ñaiyepe. Que teni Jūmenijicu ñapimi urarō ina jorojīni ñaivure ũre ne ñameina teiyeque, ina bíjarājivure. ũbenita apejāravu baquinó Jūmenijicu jáñovacayume ũi jorojīyede pōevare ne ñameina teiye boje. Aru pōevare majide ñacuyume ũi majiéde, ũi ñájine ñacuyede náre, ne ñameina teiye boje. ²³Aru Jūmenijicu máre, yópe pēpepōescu páyū, ñaibi yópe ũi urōpe, jáñovacayū ũi baju pñeno meacure aru meara ñacuyū majare máre, cōmaje ñrojarivure ũi jáinore. Javede Jūmenijicu majidejaquemavu, meañacuyū majare meara baju bārājivure. Que baru Jūmenijicu ñaru yópe ũi urōpe majare, ũi cuedaimara mácavure, ñame “Mearore ñabebi ũ”, arī buojabema. ²⁴Majarecabu Jūmenijicu cutuimara mácavu ũi mára mārājivava, apēvu judíovacavu, aru apēvu judíova ñevucavu máre.

²⁵Yópe arī, Jūmenijicu toivaicōjenejaquemavu ũi yávaiyede coyūcaipōescu bácure ũi ñmiá Oseas:

Ina pōeva, ji pōeva ñevu bácavure, acuyumu yu, “Ji pōevatamu mūja”. Aru diyajuboa pōeyajuboacavu ji ũbemara mácavure, “Ji ũmaratamu mūja”, acuyumu yu, arejaquemavu Jūmenijicu. ²⁶Aru no curōi “Mujavacari ji pōeva ñevutamu”, Jūmenijicu aino mácarōmiareca, “Ñai Jūmenijicu apucui mārāmu mūja”, ũi coyūimara marajárama, arī toivarejaquemavu Oseas bácū.

²⁷Aru Isaías bácū máre Jūmenijicu yávaiyede coyūcarejaquemavu, pōeva ne majinajiyepē ayu Israecavu ne borore: “Ina Israecavu obedivubu, yópe ēpayabea jia ēcarui paraiyepe. ũbenita obebevū bajura nácvu meañaimara marajárama na. ²⁸Aru Jūmenijicūcapūravu ñájine ñacuyume Israecavure corebecuva aru maumena”, arī toivarejaquemavu Isaías bácū. ²⁹Aru jipocamia Isaías bácūvacari Jūmenijicu yávaiyede coyūcarejaquemavu, yópe arī:

Ñai Jūmenijicu, caivu ne jabocu, ũi epebedu apēvu majacavure, ne juedocūvarājiyepe ayu, majare máre vaijēbu yópe ñniimaroa Sodomā aru Gomorracavure vaiye báquepe, caivu ina bíjaivu bácavure, arī Jūmenijicu yávaiyede coyūcarejaquemavu Isaías bácū Israecavu bácavui borore.

Judíova ne jápiaino Jūmenijicu yávaiye méne

(*Jn 12.38; Hch 2.21; Gá 3.12; Ef 6.15; 1 P 2.6, 8*)

³⁰Que baru, ¿aipe coyūiye jauři majare caride? Yópe coyūiye jauvu majare. Ina judíova ñevu mememēvu barejaquémavu, Jūmenijicu jáquiyepe aivu náre boropatebevure ne ñaiye báque boje. Quénora Jūmenijicūvacari “Boropatebevū mūja ji jáinore”, arī coyūrejaquemavu náre ne ju aiyede Jesucristore. ³¹ũbenita ina judíova, Jūmenijicu beoimara mácavu, ñaivu barejaquémavu Jūmenijicu ñaicōjeiyede ũi coyūiye báquede Moisés bácure, ñarājivu nópe iye ñaicōjeiyepe, Jūmenijicu jáquiyepe aivu náre boropatebevure. ũbenita eabedejaquemavu ñidē. ³²Vobedejaquemavu Jūmenijicu me jáiyede náre ne ju aiyēque Jesucristore. Quénora vorídjurejaquemavu Jūmenijicu me jáiyede náre ne mearo ñaiyeque. ũbenita yéde eabedejaquemavu na. Que baru vaidējaquemavu náre yópe pōescu torī tuiyepe

cūborā, ũi me jáme boje dibore, nopedeca Cristo bĳarorejaquemavu ina judĳovare ne jápiarĳ eabe boje ũre. ³³ Javede Jūmenijicu, yópe arĳ, toivaicōjenejaquemavu ũi yávaiyede dibo cūrabo borore:

Epeivū yū pōecure Jerusalén āmicurĳmaroi. Yópe cūrabo ma coricai dobaribo pōeva toivure ture đaiyepe, nopedeca ina pōeva ju abevū űai pōecure bĳarājarama na. Ũbenita caivū ina ũre ju aivū cūyebenajarama na, arejaquemavu Jūmenijicu.

10 ¹ Mūja, jĳvū, parūrōreca vuvū yū ji ũmei ina Israecavure, ji yajubocavure, ne ju arājiyepe ayū Jesucristore, Jūmenijicui meadaquiyepe ayū náre, ne coatebenajiyeye ayū ũre jarūvarĳ. Que baru ũrarōreca jĳniavaivū Jūmenijicūque náre boje. ² Yū jáve mūjare coyūivū. Nācapūravū ũrarō memecaiyurĳduivūbu Jūmenijicure ũi ũrōpe. Ũbenina “Yópe Jūmenijicui ũrōpe đavūbu űūja”, arĳ dāpiadama na. Ũbenita yéde đabenama na yópe ũi ũrōpe. ³ Jápiarĳ eabenama Jūmenijicu coyūyure “Boropatebevū mūja ji jáinore” pōevare, ne ju aiyede ũre. Que baru nācapūravū memecarĳduivūbu Jūmenijicure, “Boropatebevū mūja ji jáinore”, ũi arĳduquiyepe aivū. Ũbenita ũre memecaiyvureca, “Boropatebevū mūja ji jáinore”, ye arĳ coyūbebi náre, ne ju abe boje ũre. ⁴ Jūmenijicūcapūravū toivaicōjenejaquemavu ũi đaicōjeiyede ũi coyūiye báquede Moisés bācure, pōeva ne meatenajiyeye ayū Cristoi daquiye jipocai. Diede ju aicōjenejaquemavu caivū ina ju arājivure Cristore, boropatebevū barājiyépe ayū ũi jáinore.

⁵ Aru Jūmenijicu “Boropatebevū mūja ji jáinore” arĳ, ũi coyūjuroede pōevare, ne đájuroe boje yópe ũi đaicōjeiye ũi coyūiye báquepe Moisés bācure, die borore Moisés bācūvacari, yópe arĳ, toivarejaquemavu Jūmenijicui yávaiyede: “űai đarĳ buojayū caiye iye Jūmenijicui đaicōjeiyepe cūcyūme ũ. Ũi

đaicōjeiyepe đaiye boje coatede đabemū macūyūme ũ Jūmenijicure jarūvarĳ”, arejaquemavu Moisés bācu. ⁶⁻⁷ Ũbenita Jūmenijicu “Boropatebevū mūja ji jáinore”, ũi arĳ coyūiyede pōevare ne ju aiyede Jesucristore, die borore Moisés bācu, yópe arĳ, toivarejaquemavu Jūmenijicui yávaiyede: “Mi baju jĳniari jámejacu mi ũmei dāpiarĳ, ‘¿űame mārājidi mūivū cavarō mearo Jūmenijicui cūrōi?’ Aru mi baju jĳniari jámejacu mi ũmei dāpiarĳ, ‘¿űame mārājidi joborō jĳvū coivū yaivū bācavū ne cūrōi?’ ” arĳ toivarejaquemavu Moisés bācu. Yópe aiyūrōmu no: ¿űame mārājidi ěmeóvarajivū Cristore cavarō mearo Jūmenijicui cūrōre jocarĳ? ¿Aru űame mārājidi nacovarajivū Cristore yainore jarūvarĳ?

⁸ Aru yópe Moisés bācūvacari arĳ toivarejaquemavu Jūmenijicui yávaiyede: “Jūmenijicui yávaiye me joabenoimu mure. Que baru coyūrĳ ũi yávaiye méne jĳjecamuque aru ju arĳ ũmeque buojavū mū”, arĳ toivarejaquemavu. Aru iye yávaiye méne cūināturu baju coyūivūbu maja pōevare, ne ju arājiyepe aivū Jesucristore. ⁹ Mi ju aru Jūmenijicui nacovaiye báquede Jesucristore yainore jarūvarĳ, aru mi ju arĳ coyūru mi jĳjecamuque, “Jesucristo ji jabocube”, Jūmenijicu meadacūyūme mure, mi coatebequiyepe ayū ũre jarūvarĳ. ¹⁰ Que teni ũmequedeca pōeva ju aivūbu Jesucristore, Jūmenijicu “Boropatebevū mūja ji jáinore”, ũi arĳ coyūquiyepe aivū náre. Aru jĳjecamuquedeca pōeva coyūivūbu jávene Jesūrā, ũi meadaquiyepe aivū náre, ne coatebenajiyeye aivū ũre jarūvarĳ.

¹¹ Jūmenijicu, yópe arĳ, toivaicōjenejaquemavu ũi yávaiyede: “űai ju ayū Jūmenijicure cūyoje tebecūyūvacaribe”, arejaquemavu.

¹² Jūmenijicu que aibi caivū pōevare, judĳovare aru judĳova ānevure máre. Caivū pōeva cūināturātamu ũi jáinoi. Jūmenijicu cūinācūrabe. Aru caivū ne jabocube ũ. Aru ũrarō

mearo ðacasuyume Jūmenijicu caivũ úre jēniaivure. ¹³Yópe arí, toivaicōjenejaquemavũ ùi yávaiyede: “Ácu pōescu ùi jēniaru Jūmenijicure, ‘mũ, ji jabocu’ arí, Jūmenijicu meadacuyume úre”, arí toivaicōjenejaquemavũ. ¹⁴Apecu aquiijichubi yure: Ùbenita pōeva jēniaivũ buojabenama Cristore, úre jũ abevũ baru. Aru jũ aivũ buojabenama úre, jápiabevũ baru ùi yávaiye méne. Aru jápiaivũ buojabenama iye yávaiye méne, coyũipōeva ne buebedo náre. ¹⁵Aru ùi yávaiye méne coyũipōeva bueivũ buojabenama iye yávaiye méne, náre jarobedu, aquiijichubi apecu. Jūmenijicu, yópe arí, toivaicōjenejaquemavũ ùi yávaiyede: “Jesús ùi yávaiye méne coyũipōeva ne eaiyede pōeva yebai, torojure ðaivũbu náre ne úmei”, arí toivaicōjenejaquemavũ.

¹⁶Apecu ùi que aru, yópe arí, coyũjebu yũ: Ùbenita ina jápiaivũ bávavũ obedivũ jũ abema na iye yávaiye méne. Isaías bávavacari arejaquemavũ Jūmenijicure: “Mũ, ji jabocu, obebejina baju jũ adama ñje borore”, arejaquemavũ Isaías bávavũ Jūmenijicure. ¹⁷Aru cojedeca apecu aquiijichubi yure: “Pōeva jũ adama Cristore ne jápiaie báquede ùi yávaiye méne. Aru pōeva jápiadama iye yávaiye méne coyũipōeva ne bueieye báque boje náre”, aquiijichubi apecu.

¹⁸Ùi que aru, yópe arí, coyũjebu yũ: Jēniaru jáivũ mure: ¿Israecavũ jápiarejaquemari cāreja Jūmenijicui yávaiye méne? Jájũ, jáve jápiarejaquemavũ na diede. Jūmenijicu, yópe arí, toivaicōjenejaquemavũ ùi yávaiyede ùi cuedaiye báque borore:

Jáicōjeñũ pōevare cavarõre aru ne járu, majide ðajebu náre pueno baju meacu Jūmenijicure. Aru ne járu caiye Jūmenijicui cuedaiye báquede járavua coapa aru ñamiá coapa máre, majide ðajebu náre Jūmenijicui yávaiye jaubeda, arí toivaicōjenejaquemavũ.

¹⁹Aru bediõva cojedeca jēniaru jáivũ mure: ¿Ina Israecavvacari

coreóvarejaquemari aipe Jūmenijicu ðacuyure? Jájũ, jáve coreóvarejaquemavũ na diede. Mamarumure apevure ne jipocai Moisés bávavacari, yópe arí, jũ arejaquemavũ ùi toivaiye báqueque Jūmenijicui yávaiyede: “Tebutede ðacuyumu yũ mujare apevũ pōevare, jáve pōeyajubocavũ ãnevũque. Aru jorojĩne ðacuyumu yũ mujare pōeyajubocavũ ãrũnevũque”, arejaquemavũ Jūmenijicu Israecavure. ²⁰Aru Jūmenijicu toivaicōjenejaquemavũ ùi yávaiyede Isaías bávavũ napimecava, yópe ãri: “Ina pōeva ye vobevũ bávavũ yure, nárecabu eavũ yure. Aru yũ jáðovarejacacu ji baju ina pōeva ye jēniaru jánevũ bávavure yure”, arejaquemavũ Jūmenijicu. ²¹Ùbenita Israecavure ne borore Jūmenijicu arejaquemavũ: “Caijãravuare cãrijimene ðaiyũrĩdivũ yũ ina pōeva jũ abevure aru maucvavivure yure”, arejaquemavũ Jūmenijicu Isaías bávavũ toivaiye báquede.

Jūmenijicu ùi jecurĩ beoino judiõvare
(Fil 3.5)

11 ¹Que baru, ¿Israecavure Jūmenijicu jarũvaidi úre jarũvarĩ? jēniaru jáivũ yũ mujare. ¡Bi, ye que ãnevũ! ¡Aipinũmũ vaibéjarõri nópe! Jūmenijicu jáve jarũvabebi náre. Yurecabu Israecacu. Abraham mácu pãramecũbu yũ. Aru Benjamín ãmicũriyajubo pōeyajubocacũbu yũ. ²⁻³Israecavũ Jūmenijicui beoimaramu. Jávede Jūmenijicu beorejaquemavũ ñujare ùi pōeva máravivure. Jūmenijicu jarũvabebi ñujare.

Aru mũa coreóvaivũbu jáve yópe arí toivaiye báquede Jūmenijicui yávaiyede Elíai coyũiye báquede Jūmenijicuque. Elías chíõñ arí jēniarejaquemavũ Jūmenijicuque: “Mũ, ji jabocu, jáve boarĩ jarũvaquemavũ mi yávaiyede coyũcaipōeva mácvure. Aru mi ãimarare boarĩ juarĩ jácaivare máre mure jáve bĩjare ðaquemavũ die coapa. Aru yũ quécũrabu mi yávaiyede coyũcaipōescu apucu cãreja. Que baru

yure máre boarí jaruvaiyuvivubu na”, arejaquemavu Elías Jūmenijicure.

⁴Ūbenita Jūmenijicucapūravu, yópe arí, coyurejaquemavu Elíare: “Siete mil paivu baju ūmva Israecavu curivu cāreja mearore jíbema na pēpeimure ūi āmiá Baal”, arejaquemavu Jūmenijicu Elíare.

⁵Quédecabu caride máre. Obebevu baju curivubu Jūmenijicui beomara mácavu, ūi cōmaje āroje jáiye boje majare. Jūmenijicu beoibi majare ūi me boje, mearo đacayu bojecubeda. ⁶Beobebi majare maje mearo đaiye boje. Jūmenijicui beoru pōevare ne mearo đaiye boje, mearo đacaiye bojecube cubejebu. Quéhora ūre bojedajebu na ne mearo đaiyede.

⁷¿Aipe arājidi maja caride? Yópe arājivubu maja: Ina Israecavu vorí durejaquemavu Jūmenijicu “Boropatebevu muja ji jáinore”, ūi coyūquiyeye aivu náre. Ūbenita caivu ebedejaquemavu ne ūrōre. Obebejina nácavu, Jūmenijicui beomara mácavu, earejaquemavu diede. Ūbenita Jūmenijicu caivu apevu nácavure jápiaicōjemenejaquemavu ūi cutuiyede náre. ⁸Yópe arí, Jūmenijicu toivaicōjenejaquemavu ūi yávaiyede: “Jūmenijicu dápíabede đarejaquemavu náre aru coreóvabede đarejaquemavu náre máre. Javede aru caride máre jámenama na aru jápiabenama na Jūmenijicui đaiyede aru ūi ūrōre máre”, arí toivaicōjenejaquemavu. ⁹Yópe arí, Jūmenijicu toivaicōjenejaquemavu David bácure:

Caiye iye meadaiye űuoibope baquiyébu. Náre jēni ture đaquiyebu. Aru űájine đaquiyebu náre. ¹⁰Jūmenijicu jámene đajacurí náre, ne coreóvabeni űájinaiyeye ayu cainmua, arí toivarejaquemavu David bácu.

**Jūmenijicu ūi meadaino
judíova āmevure**

¹¹Que baru, čina judíova Jūmenijicure jáiyubeni aru jápiaiyubeni ne vainí tuiye

báque boje bíjarorejaquemari náre? jēniari jáivu mujare. iBi, ye que āmevu! iAipinmū vaibéjarōri nópe! Ina judíova ju abedejaquemavu Jūmenijicui yávaiye méne. Que baru vainí turejaquemavu na Jūmenijicure jaravarí. Iye ne vainí tuiye báque āmeina teiye barejaquémavu. Aru iye ne āmeina teiye boje, ina judíova āmevu jápiaivure Jūmenijicui yávaiye méne aru ju aivure máre, Jūmenijicu meadarejaquemavu náre, ina judíova ne jorojínaiyeye ayu. ¹²Ina judíova ne āmeina teiye báque boje, apevu obedivu ijāravucavu eadama ūrarō mearore. Aru ina judíova ne baju boropatebevure Jūmenijicui jáinore eabe báque boje, ina judíova āmevu eadama ūrarō mearore. Que baru pñeno ūrarō mearo baju baquiyébu ānijāravu baquinóre, caivu judíova Jūmenijicui meadaimara márāvivubu ne jápiaiyede Jūmenijicui yávaiye méne aru ne ju aiyede Jesucristore.

¹³Caride coyuyabu mujare, judíova āmevure. Cristovacari yure bueicōjeame ūi yávaiye méne mujare. Que baru Jesús ūi yávaiye méne beorí coyūcōjeimūmu yu judíova āmevure. Dápíavū yu parurō ji memeinore. ¹⁴Que teiyede, apevu jívū, judíova, jorojínajichuma ji bueiyede mujare. Que baru ju arājarama Jesucristore aru jápiarājarama Jūmenijicure máre, mujape, Jūmenijicui meadaquiyeye aivu náre. ¹⁵Jūmenijicui ūbede ina judíova jáiyubevure ūre aru jápiaiyubevure máre, apevu ijāravucavu cārijimenejaquemavu Jūmenijicūque. Que baru ūrarō mearo baju baquiyébu ānijāravu baquinóre, Jūmenijicui copu etaiyede ina judióvare, meadacuyū náre. Yópe yaivu bácavu ne nacajaiye yainore jaravarí ūrarō mearo bajutamu. ¹⁶Pāubore mama buraijevete pōeva ne jídu Jūmenijicure, caibo dibo máre Jūmenijicu jibobu. Aru jocucu ñomure máre pōeva ne jídu Jūmenijicure, caiye dicu cavabua máre Jūmenijicui cavabuabu. Quédeca Abraham mácu Jūmenijicu jicu barejaquémavu. Que baru ūi pāramenacavu máre Jūmenijicu jinamu.

¹⁷ Јосџу olivo āmicuricu cуvу jioi. Aru ņija judiova dicуpe paivubu. ņijeņecu mācu, Abraham mācu, dicу нuотуре pāyубe. Aru apescu cуvу macarōcasу olivo āmicuricu. Dicуpe paivubu mуja, judiova āmevу. Olivocu jiocacure cavabuare burarī jarуvaquemavу. Que baru macarōcasу cavabuare īni, doaquemavу olivocu jiocacure. Que baru ņija judiova cadateivubu mуjare, judiova āmevure, nopedeca jocucu нуoi oco мuri cadateiyepе cavabuare. ņija meadacaivubu mуjare ņije jыe boje mуjare caiye Jūmenijicui mearo đacaiyede ņujare Abraham mācu yóbore. ¹⁸ Őbenita mуjacapūravу āmeina jámejara ina judiovere, Jūmenijicui ũbemara mācavure, yópe cavabua buraicavabuare. Dápiabejarā mуja mуje baju ne pueño meara. Mуja máre cavabuare paivubu. Que baru cavabua āmevу jыe ocore нuотuare. Quénora нuотuamu jыe ocore cavabuare. Nopedeca mуja mearore đabevу ņija judiovere, quénora ņija mearore đaivubu mуjare.

¹⁹ Őbenita cūinācu mуjacacu acуyume yure, “Yópe jocуcuare coreipōescui buraiyepе cavabuare jioi curicure, doacуyу apescavabua macarōi curicui cavabuaque, nopedeca Jūmenijicu īnejaquemavу apеву judiovere ũi pōevare jocarī, epecуyу yure ne yebai”, acуyume yure cūinācu mуjacacu. ²⁰ Jāvemу no. Jūmenijicu īnejaquemavу náre, ne ju abe báque boje ũre. Aru cуvу nu dicui mi ju aye boje ũre. Őbenita dápiabejacу mu mi baju apеву pueño meacu. Quénora me đajacu aru me jájacу mu. ²¹ Yópe jocуcuare coreipōescu đajocabepе caiye cavabuare jocucu, nopedeca Jūmenijicu caivу judiovere đajocabedejaquemavу ũi pōevaque. Ői ýepedeca ina judiova ũre ju abevure, jāve мure máre icуyume ũre mi ju abedu.

²² Járijide apa. Jūmenijicu mearo đacarī buojaiби pōevare. Aru ņájine đayу máre buojaiби pōevare. ņájine

đaiби ina āmeina teivure, ju abeni vainí tuivure ũre. Őbenita mearo đacaibi maja ju aivure ũre, đaiyurivure ũi urōpe. Cainumua mуje ju aru ũre aru đaru yópe ũi urōpe, ũ mearo đacacуyume mуjare. Őbenita mуje ju abedu ũre, ũ icуyume mуjare máre ũre jocarī. ²³ Aru ina judiova Jūmenijicure ju abevу bācavу, ne ju aru ũre aru ne baju dápiaimore oatvarу, Jūmenijicu epecуyume náre máre ũi pōevaque cojedeca. ²⁴ Mуja judiova āmevу jocucu macarōi curicu cavabuare buraimara mācavure paivubu mуja. Que baru mуje cójjiyеe báque Jūmenijicui pōevaque yópe cavabua ne doaiye báquepebu jocucu jioi curicurā. Őbenita ina judiova jocucu jioi curicu cavabua buraicavabua bācavure paivubu. Que baru ne cójjiyеe baquiyé cojedeca Jūmenijicui pōevaque yópe cavabuare ne doarājiyepedecabu dicу jioi curicurā cojedeca. Que baru maiyójabevу no Jūmenijicure ũi epequino náre cojedeca ũi pōevaque.

Jūmenijicu ũi meadaino judiovere
(1 Co 2.16, 8.6; Ef 4.6; Col 1.16)

²⁵ Mуja, jívу, ũvу yу mуje majinajiyepе ayу iye Jūmenijicui jáđovameno mācarōre jipocamia ũbenita jáđovainore caride. Diede mуja majidivу baru, “Me majidivubu ņija”, arī dápiabenajaramu mуja mуje ũmei. Jāvemу yo: Ina Israecavу Jūmenijicui yávaiye méne jápiaiyubema caride. Őbenita apejáravу baquinói jápiarī ũi yávaiye méne ju arājarama na diede. Na ju abenama pu caivу ina judiova āmevу Jūmenijicui meadaimara mārājivу ne ju aiyeta Jesucristore. Aru no yóboi, ina judiova máre jápiarī Jūmenijicui yávaiye méne ju arājarama diede. ²⁶ Que teni Jūmenijicu meadacуyume caivу ina judiova ju arājivure ũre. Yópe arī, Jūmenijicu toivaicōjenejaquemavу ũi yávaiyede:

ņai meadaipōescu dacуyume
Jerusalén āmicurīmarore jocarī.
Jarуvacуyume caiye ina Jacob
bācuī páramena ne āmeina

teiyede. Aru āṛumetecuyume diede. ²⁷Que teni ḏacacuyumu yu yópe “ḏacacuyumu mujare”, ji aiye báquepedeca, ji jaruvaiyede ne āmeina teiyede, āṛumetecuyu diede, arejaquemavu Jūmenijicu.

²⁸Ina judíova Jūmenijicure maucvarivubu na, ju abevu ũi yávaiye méne. Aru ne que ḏaiye boje, Jūmenijicu meadaibi apevu mujare, judíova āmevure. Ūbenita ina judíovare Jūmenijicu ũbi, ũi beoiye báque boje neñecuva mácvure.

²⁹Jūmenijicui mearo ḏacarí buiyede pōevare bojecubeda ũi me boje, aru ũi cutuiyede pōevare ũ jina mārājivure, jāve oatuvabebi ũi dápiaiñore. Dajocabebi ũi mearo ḏacaiyede aru ũi cutuiyede máre. Quénora buojaiibi iye mearo ḏaiyede ũi buiye báquede. ³⁰Aru mija judíova āmevcapūravu javede ju abedejaquemavu Jūmenijicure. Ūbenita caride ina judíova ne ju abede ũre, Jūmenijicu cōmaje āroje jáimi mujare.

³¹Nopedeca ina judíovacapūravu caride, Jūmenijicui cōmaje āroje jáiyede mujare, ju abema ũre. Ūbenita ju arājarama ũre ũi cōmaje āroje jáiyede mujare, ũi mearo ḏacaquiyepa aivu náre máre ũi cōmaje āroje jáiye boje. ³²Que baru Jūmenijicu ḏaicōjeimarape ḏaibi caivu pōevare, ne ju abe boje ũre, cōmaje āroje jáicuyu náre.

³³Jāve Jūmenijicu pūeno meacu bajutame. Aru ũrarō cōmaje āroje jáimi caivu pōevare. Ūrarōmu ũi cūve cūvae, aru ũi majié, aru ũi coreóvaiye máre. ũame coyuiye buojabema ũi dápiaiye, ũi me coreóvaiye boje caivu pūeno. Aru ũame coreóvarí buojabema ũi ḏaiyede, ũi me majié boje caivu pūeno. ³⁴Jūmenijicu, yópe arí, toivaicōjonejaquemavu ũi yávaiyede:

Pōecu cubebi Jūmenijicui dápiaiye de majicu. Aru pōecu cubebi majicarí buojayu Jūmenijicure. ³⁵Aru pōecu cubebi jíacacu Jūmenijicure apejīene, Jūmenijicui bojecubenore cūvaquiyepa ayu ũre cojedeca, arí toivaicōjonejaquemavu.

³⁶Que baru Jūmenijicūvacari cūedarejaquemavu caiyede. Ūi paruéque

caivu cūrivubu aru caiye máre cūvu. Aru ũi cūe boje caivu cūrivubu aru caiye máre cūvu. Que baru caivu jínajarevu mearore Jūmenijicure cainūmua. Quédecabu.

**Cūrājarevu memecarājivu
Jūmenijicure
(1 Co 12.4-12)**

12 ¹Muja, jívu, Jūmenijicui pare cōmaje āroje jáiye boje majare, paredeca jēniaivu mujare, muje jēniarajiyepa ayu Jūmenijicūque, jāve muje ḏarājiyepa ayu yópe ũi ũrópe, caiyede me matuiyeda cainūmua. Yópe pōeva ne jícaiyepe āimara boaimara mácvure Jūmenijicure, jíjarā mija muje bajuáre. Ūbenita apūrivubu mija. Mujavacari epejarā muje bajuá coapa Jūmenijicure, memecarājivu ũre cūinácure. Yópe ḏarí coatejarā mija muje āmeina teiyede jaruvarí. Aru Jūmenijicu torojurí jáicuyume mujare. Nópe ḏaivu mija mearore jívu bu Jūmenijicure jāve muje ũmeque. ²ḏabejarā mija yópe ijāravucavu Jūmenijicure ju abevu ne ḏare ũuiyepa. Quénora Jūmenijicure oatūvaicōjejara mija, cūvarājivu mamaūmene aru muje dápiaiño mamarore máre mija coapa. Que teni mija buojarājaramu majidivu Jūmenijicui ũróre muje ḏarājiyede. Aru Jūmenijicui ũrō mearomu, torojure ḏaino, aru ye jaubenomu.

³Jūmenijicu pūeno meacu baju mearo ḏacaibi yure, jívu yo ji memeinore, ji memecaquiyepa ayu mujare. Que baru coyuyubu mujare, yópe arí: “Mearamu ũija”, arí dápiajekarā mija muje baju. Quénora “Jūmenijicui caḏatebedu yure, apejīene ḏaiye majibejebu yu”, arí dápiajarā mija coapa. ⁴Maje baju cūinárovacaribu cūvae ũre cūepe. Ūbenita caiye iye mememevu cūináromia. ⁵Quédecu maja, Jesúre ju aipōeva, obedivubu. Ūbenita cūinábajupe paivubu maja Jesúque. Cūinávupe Jūmenijicu cōjijovaiibi majare caivu apevuque. Que teni cūinábajupe paivubu maja.

⁶Jūmenijicu p̄eno meacu baju majide đaquemavu majare coapa bojecubeda ũi majiécārōre, maje cađatenajiyeye ayu aprevũre. Que baru caivu maja coapa đaiye jaũvu majare yópe ũi majide đaiye báquepe. Jūmenijicui jídu ũi majiécārōre maje soyucarājiyeye ayu ũi yávaiyede, soyucarājarevu diede, aipino ũi majare jíno mácarōpe majare coapa. ⁷Jūmenijicui jídu ũi majiécārōre maje memecarājiyeye ayu aprevũ Jesúre ju aivure, memecarājarevu náre. Jūmenijicui jídu ũi majiécārōre maje buenajiyeye ayu p̄evare, buenajarevu náre. ⁸Jūmenijicui jídu ũi majiécārōre maje cađatenajiyeye ayu aprevũre, cađatenajarevu náre. Majacavu jívu baru ne cūvecarōre aprevũre, jíjarāri náre jecubevũva. Majacavu jaboteivu baru ina ju aip̄evare, ũrarō memejarari na. Majacavu cōmaje āroje jáivu baru aprevũre aru mearo đacaivu baru náre, torojurivu náre mearo đacajarāri na.

Aipe đaiye jaũrō Jesúre ju aip̄evare

(Mt 5.44, 19.18-19, 22.21; Mr 12.17;
Lc 6.28, 20.25; 2 Co 8.21; Ef 6.11-17; He 10.30, 13.2; 1 P 4.9)

⁹Ūjarā aprevũre aru me đajarā náre jāve. P̄caũmea cubevũva cađatejarā náre. Ūbejarā āmenore. Cainũmua đajarā mearore. ¹⁰Ūjarā m̄uja m̄uje bajumia. Torojurivu jájara m̄uja coapa aprevũre m̄uje p̄enocavũre aru p̄ueđjarā náre máre.

¹¹Jūracubejarā. Quénora pare m̄uje đaiyueque memejara m̄uja. Memecajarā ũrarōreca maje jabocu Jesucristore m̄uje ũmeque.

¹²Napini coreivũbu m̄uja Jūmenijicui mearo đacaquiyede m̄ujare. Que baru torojurā m̄uja cainũmua. Napijara m̄uja m̄uje n̄ajiyede. Aru ũetubevũva soyujarā Jūmenijicuque cainũmua.

¹³Jíjarā m̄uje cūvecarōre aru t̄aturare máre ina Jūmenijicui p̄evacavũre jauéde. Me copu etajarā ina curādaivũre m̄uje yebai apenoacavũre.

¹⁴Jēniajara m̄uja Jūmenijicuque, ũi āmedabequiyeye aivu ina m̄uje mavare.

Aru m̄ujavacari āmeina yávabejarā náre. Quénora jēniajara Jūmenijicuque, ũi mearo đacaquiyeye aivu náre.

¹⁵Torojurarā m̄uja ina torojurivũque. Aru ch̄iori ojarā m̄uja ina aprevũ ch̄iori oivũque.

¹⁶Cārijimenoque c̄ujarā m̄uja aprevũque. Cūináturu m̄uje ũmei d̄apijarā m̄uja. Aru jájara caivu aprevũre cūináturu. D̄apiabejarā m̄uja coapa “¿Meara márica?” aprevũ p̄eno. Quénora yóvajarā m̄uja ina cōmaje ārojarivũre. D̄apiabejarā m̄uja ũrarō me majidivũre.

¹⁷Apevu ne āmeno đaiyede m̄ujare, copu āmeno đabejarā náre. Jipocamia d̄apijarā aipe đaiye jaũrōre, aprevũ ne járajiyeye aivu m̄uja jujovabevũre. ¹⁸M̄ujacapūravu caiye m̄uje đaiyeque cārijimena c̄ure đajarā m̄uje bajumia.

¹⁹M̄uja, ji yóvaimara, cainũmua n̄ajine đabejarā m̄uja aprevũre, ne n̄ajine đaiye báque boje m̄ujare. Quénora corejarā Jūmenijicu n̄ajine đacuyure náre. Que baru yópe arī, Jūmenijicu toivaicōjenejaquemavu ũi yávaiyede: “Yurecabu n̄ajine đacuyu ina āmeina đaivu b̄acavũre aprevũre. Yúvacari bojedare đacuyũmu náre yópe ne āmeno đaino mácarōpe”, arejaquemavu maje jabocu Jūmenijicu. ²⁰Que baru đajarā m̄uja yópe Jūmenijicui toivaicōjeiye báquepe ũi yávaiyede: “M̄uje mavai n̄ajinu āvũeña, jíjarā m̄uja náre ne āiyeva. Aru m̄uje mavai ũcuiyũru, jíjarā m̄uja náre ne ũcuiyeva. Que đarĩburu yóboi, nácapūravui ch̄iõmenu m̄ujare ne n̄ajine đaiye báquede, p̄eno ũrarō n̄ajine đarājaramu m̄uja Jūmenijicui n̄ajiovaquijaravu baquinóre ne maucũvae báque boje m̄ujare, m̄uje mearo đacaiyedeca náre”, arejaquemavu Jūmenijicu. ²¹Āmenore đare đaicōjemejara ina āmeno đare đavũre m̄ujare. Quénora mearo đacajarā m̄uja caivũre, b̄ijarorājivu m̄uje mavu ne āmenore đaiyede.

13 ¹Caivu ina jabovare Jūmenijicu jaboteicōjeimi ij̄aravũre. Que baru caivu p̄evare ju aye jaũvu ina jabovare coapa. Aru ina jabova

Jūmenijicui epeimaramu. ²Ácu pōescu maucuvacu baru jabocure, maucuvaibi Jūmenijicui epeimū mácure. Que teni ñai pōescu ñájicuyume ũi maucuvae boje. ³Ina mearore ðaivu jidubema jabovare. Quénora ina ámenore ðaivu jiduma jabovare. Que baru muja jiduiyubevu baru jabovare, mearo ðajarā. Aru ina jabova me járajarama mujare. ⁴Ina jabova Jūmenijicui epeimaramu na, me cadatenajivu mujare, aru mujare cadatede ðarājivu apevure máre. Ūbenita muja ámenore ðaivu baru, jidujarā náre. Nájine ðaivu buojadama na. Aru ñájine ðadama na ámeno ðaivure. Que teni ina jabova Jūmenijicui epeimara ñájine ðarājivubu ámeno ðaivure. ⁵Que baru ju aiye jauvu mujare ina jabovare, ne ñájine ðabenajiyeye aivu aru “Boropatebevu yu”, muje arī dāpiarājiyeye aivu máre. ⁶Que baru bojedaiyede máre jíye jauvu ina jabova ne tātura ícōjeiye boje caivu ne jaborōcavure. Jūmenijicuvacari ũi epeinore memeivubu ina jabova. ⁷Bojedajarā muja ina jabovare caino mujare bojedaiye jaurōre. Aru pueðajarā caivu ina jabovare, mujare cōjeivure máre.

⁸Bojecube ðabejarā apevure.

Quénora cūinārora ðaiye jauvu mujare: Ūjarā apevure. Ácu pōescu ũcu baru apevure, ðaibi caiyede yópe Jūmenijicui ðaicōjeiye coyuiyeye. ⁹Yópe ðaicōjeneaquemavu Jūmenijicu pōevare: “Cubekarā apevūque mujemarebucvare jaruvarī. Boarī jaruvabejarā pōevare. Ñavamejara. Āujimejara apevu ne cūvaede”, arī ðaicōjeneaquemavu. Caiye iye ðaicōjeiye aru caiye ape ðaicōjeiye máre cūināromia yópe aiynōmu: “Muja coapa ũjarā mujevure, yópe muje ũpedeca muje bajure”, aiyeubu iye. ¹⁰Ácu pōescu ũcu baru ũ jivure, ye ámenore ðabecuyume náre cainumua. Que baru pōescu ũcu baru ũ jivure, ñai ðaibi caiyede iye ðaicōjeiye coyuiyeye.

¹¹Aru caiye iye ji coyuiyeye ðaiye jauvu mujare, muje majié boje ijāravui vaiyede. Cāivupe paivubu muja.

Ūbenita coedaiye jauvu mujare. Jesúí copaidaquijāravu, ũi ñuvaquijāravu baquinó majare cavarō mearo ũi curōi, joabevu caride, maje Jesúre mamarumu ju aijāravu bácarō pueno. ¹²Maje cuede ijāravui yópe ñamipe painomu. Ūbenita joabevu miadāe tuiyeye paino maquinó, Jesúí copaidaquiyede yore. Que baru dajocaiye jauvu majare caiye iye ámeina teiyede, pōeva ne ðare nuiyede ñami, apevu ne járī buojabede náre. Quénora ðaiye jauvu majare caiye iye me teiyede yópe Jūmenijicui ũrōpe, pōeva ne ðare nuiyede jāravu, apevu ne jáiyede náre. Que baru yópe churara boaicarovede ĩni, ũi meateiyeye boacáyu ũi mauvare, nopedeca Jūmenijicui majiéque meateiye jauvu majare, ðabeburī ámenore. ¹³Que baru jauvu majare maje ðare nuiye yópe curivupe jāravu, apevu ne járī buojaiyede náre. “Ūcurajare” abeni, ũrarō boqueiyede ũcumeni, pacotebejarā muja. Aru ámeina ðabejarā muja apevūque mujemarebucvua ámevūque. Aru jarabeni jorojimejara muja apevūque máre. ¹⁴Ūbenita maje jabocu Jesucristore jēniajara, ũi cadatequiyeye aivu mujare, muje curājiyeye aivu yópe ũi ũrōpe. Aru muje ámeina ðaiyuepe dāpiaiyede dajocarī, ðabejarā muje ũrō ámenore.

“Ámenamu”, arī yāvabejarā
mujacavure

(2 Co 5.10; Col 2.16)

14 ¹Me coru etajarā muja ina Jesúre ju aivu coreóvabevure cāreja aipe ne ju aiye de Jesúre. Aru, “Majibevu muja”, arī yāvabejarā náre. ²Apevu Jesúre ju aipōeva me coreóvaivu aipe ne ju aiye de Jesúre, ádama áde áiyede. Ūbenita apevu Jesúre ju aipōeva coreóvabevu cāreja iye ne ju aiye de Jesúre, átema áimajiaruare, ne dāpiaiyeye boje Jūmenijicu ũbecure náre áimajiaruare áivure. ³Muja caijiene áivu ámeina jámejara ina áimajiaruare ámevure. Quédeca muja áimajiaruare ámevu ámeina yāvabejarā ina caijiene áivure. Jūmenijicuvacari me jáñu

coatebebi ina caijiene aivure ù jinare jocarí. ⁴Jaruvarí buojabevu mu apecu ùmure memecayure. Quénora ñai ùi memecaimu quécu cùinácunabe buojarí jaruvayu o mautede ðayu úre. Nópe mi jaruvarí buojabepedeca apecu múcacure, Jümenijicucavari, caivu ne jabocu, jaruvacuyume o mautede ðacuyume úre.

⁵Aru apevu Jesúre ju aipöeva áruvivubu cùinájárvure me apejávruva pueno. Ùbenita apevu Jesúre ju aipöeva áruvivubu cùináturu járvruva coapa. Majijararí caivure jávene ne dápiainore. ⁶Majacavu me áruvivu baru cùinájárvure apejávruva pueno ðadama nópe, pueðarájivu Jümenijicure. Aru majacavu áruvivu baru cùináturu járvruva coapa ðadama nópe, pueðarájivu Jümenijicure. Aru majacavu caijiene aivu nópe ðadama, pueðarájivu Jümenijicure, aru torojuede jíyama úre, ùi jíye boje náre ne áiyeva. Aru majacavu áimajiaruare ámevu máre nópe ðadama, pueðarájivu Jümenijicure, aru torojuede jíyama úre, ùi jíye boje náre ne áiyeva.

⁷Pöecu cubebi majacavu jëneboi jaboteyu ùi baju ùi apuéde cáreja. Jesúre ju aipöecu cubebi cùinácuna. Quédeca pöecu cubebi jaboteyu ùi baju ùi yayiede máre. Jesúre ju aipöecu yaiðébi cùinácuna. ⁸Maje apuéde cáreja maje jabocu jinamu maja, pueðarájivu úre. Aru maje yayiede máre maje jabocu jinamu maja, pueðarájivu úre. Que teni apuvivu baru maja cáreja, Cristo jinamu maja. Aru yaivu bácvu baru máre, Cristo jina márajivubu maja. ⁹Cristoi yayie báque boje aru ùi nacajaiye báque boje yainore jaruvarí, jaboteyube ù caivure, apuvivure aru yaivu bácvure máre.

¹⁰¿Aipe teni apevu mujacavu ámeina yávaivurú apevu Jesúre ju aipöevare, mívure paivure? ¿Aru aipe teni apevu mujacavu ámeina jáivurú apevu Jesúre ju aipöevare, mívure paivure? Nópe ðabejará muje baju. Caivu maja núrajaramu Cristoi coyquiyede maje ðaiye báquede méne o ámene

ùí jáinoi. ¹¹Yópe arí, Jümenijicu toivaicöjenejaquemavu ùi yávaiyede:

Yópe aibi maje jabocu: “Ji cainumua cue boje, coyuyubu mujare yópe vaiquiyede jáve. Caivu ijárvucavu ñuatutarí mearore jínajarama yure. Caivu ijárvucavu coyurájarama yure, ‘Jümenijicutamu mu. Ññje jabocubu mu’, arájarama caivu”, arejaquemavu Jümenijicu.

¹²Que baru caivu majavacari coyurájaramu Jümenijicure maje borore, caiye maje ðaiye báquede.

Ámeno ðare ðabejará mujevure

(Mt 15.1-20; Mr 7.1-23)

¹³Que baru ámeina yávbenaajarevu majevure. Quénora majijará muje ùme muja ámeina teivure. Que baru mearo ðajará, mujevü ne vainí tubenajiyepe aivu, ne jáiye boje muje ámeina teiyede. ¹⁴Yu jáve coreóvaivu ye áiye cubede yure ámedaiye, yure coavaiye Jümenijicure jaruvarí. Nópe buedejaquemavu maje jabocu Jesucristo. Ùbenita apecu “Ámetede ðaivu yure”, ùi arí dápiaru apejiene, diedecabu ámetede ðaiye úre. Que baru maja coapa dápiarí majidivubu ámeina teiyede.

¹⁵Áiyeque muje chíore ðaru apevu Jesúre ju aipöevare ne ùmei, meamejebu no. Muje nópe ðaiyeque, jáðovajebu muja ubevure náre. Jesucristo yaidéjaquemavu bojeðayu náre máre. Que baru bíjarobejará muja náre, ne coatenajiyepe aivu Jümenijicure jaruvarí, muje apejiene áiyue boje. ¹⁶Que baru muja ðaivu baru apejiene, méne muje jáiyede, “Boropatebevü yu”, muje arí dápiayede muje ðaiyede diede, aru pöevare cadateiyede máre, ùbenita apecu Jesúre ju aipöecu ámeina járu, o ámeina yávaru diede, dajocajará muje ðaiyede. Quénora ðabejará muja diede.

¹⁷Jümenijicu maje jabocube. Ùbenita majare jabotebebi maje ári aru úcuri teiye boje. Quénora cujará me nurie ðaivu, cárijimena, aru torojrivü, yópe ñai Espíritu Santoi cöjeiyepe majare.

Nópe ðaru, Jūmenijicu jaboteibi majare. ¹⁸Aru caivu ina memecaivu Cristore nópe ðaivu, nárecabu me Jūmenijicure torojure ðaivu, aru pōevare máre me járe ðaivu, aru me yávare ðaivu náre.

¹⁹Que baru cainumua cārijimene ðarājarevu maja apevure. Aru cainumua cadatenajarevu maja apevu majacavure, pñeno parurōreca ne ju are nurajiyeye aivu Jesúre aru pñeno me ne surajiyeye aivu úque. ²⁰Jūmenijicu pōevare ju are nure ðaibi pñeno parurōreca Jesúre. Que baru mujacapuravu āmedabejarā náre ne ju aiyede Jesúre, mje apejene āiyue boje. Aiyede cubevu āmedaiye pōevare, náre coavaiye Jūmenijicure jaruvārī. Ne āru mje āiyepedeca aru “Āmeina ðaiyebu ñjare”, arī dāpiaru, mujacapuravu āmeno ðajebu náre, mje āiyede boje. ²¹Que baru āmejara mja āimajiaruare, aru ūcumejara boqueiyede máre, aru ðabejarā caiye apejene, mujacacu Jesúre ju aipōecu vainī turī ūi ðabequiyeye aivu āmenore mje ðaiyede jári. ²²Mje dāpiainore mje āiyede, mje ūcuiyede, aru mje ðaiyede máre coyubejarā apevure. Quénora Jūmenijicuvacari coreóvacuyume diede. Nai pōecu caiyede ðayu baru, “Boropatebevu yu”, arī dāpiarī, ūrecabe Jūmenijicui torojure ðaimu. ²³Ūbenita ñai pōecu “Majibevu yu mearore ji āino, ji ūcuino, aru ji ðaino” arī dāpiayu baru, ūrecabe Jūmenijicui āmeina jáimū. Ūi nópe ðaiyede, “Majibevu yu Jūmenijicu ucure diede” arī dāpiayu baru, boropateyube ū Jūmenijicui jáinore. Caiye mje ðaiyede, “Meaquiyebu” arī dāpiabevu baru, āmeina teivubu maja.

Torojure ðarājarevu majacavure

15 ¹Maja Jesúre ju aipōeva me coreóvaivubu aipe mje aiyede Jesúre. Que baru majare cadateiyeye javvu apevure, Jesúre ju aipōeva coreóvabevure cāreja aipe ne ju aiyede Jesúre, ne vainī tubenajiyeye aivu āmeina teiyede. Mje urōpe ðaiye javbevū majare. ²Quénora ðacaiye javvu majare apevu Jesúre ju aivure, torojure

ðarājivu náre aru parure ðarājivu ne ūmene. Nópe ðaiye javvu majare, ne pñeno urarō majinajiyeye aivu aipe ne ju aiyede Jesúre. ³Cristovacari ūi baju torojure ðabedejaquemavu. Quénora vaidéjaquemavu ūre yópe Jūmenijicui toivaicōjeiyeye báquepe ūi yávaiyede: “Pōeva ne āmeina yávaiyeque mure, āmeina yávadama yure máre”, arejaquemavu Jūmenijicure. ⁴Aru caiye iye toivaie báque Jūmenijicui yávaiyede toivaicōjenejaquemavu, mje buenajiyeye ayu. Mje bueiyede diede, napivubu mje ñájiyede aru torojurivubu. Que baru napini coreivubu Jūmenijicui mearo ðacaquiyede majare. ⁵Aru Jūmenijicu napine ðaibi pōevare, aru torojure ðaibi náre máre. Que baru cure ðajacurī mujare cārijimevūva cūináturu mje ūme, mje ðarājiyeye ayu nópe Jesucristoi ðaiye báquepe. ⁶Que teni caivu mja, cūináturu mje ūme aru cūinácumūia, jjarā mearore Jūmenijicure, mje jabocu Jesucristoi mearore jímure, jipacure máre.

Judíova āmevu ne jápiaino Jūmenijicui yávaiye méne

⁷Copu etajarā mja mjevure yópe Jesucristoi copu etaiyeye majare, pōeva ne mearore jínajiyeye aivu Jūmenijicure. ⁸Yu coyuyubu mje yópe: Cristo ðarejaquemavu memecaipōecu, judíovare cadatecuyū. Que ðarī, jáðovarejaquemavu Jūmenijicure jáve ðayure yópe “Ðacacuyumu yu”, ūi aiyede báquepedeca. Cristo jáve ðarejaquemavu caiye iye Jūmenijicui coyuiye báquepedeca judíovai ñecuva mácavure. ⁹Aru Cristo máre mearore jíde ðarejaquemavu Jūmenijicure ina judíova āmevure, Jūmenijicui cōmaje āroje jáiye boje náre. Yópe arī, Jūmenijicu toivaicōjenejaquemavu ūi yávaiyede Cristorā:

Ji cuede judíova āmevu jēneboi, mearore jícuymu yu mure. Aru yuriacuyumu yu, torojuede máre jícuymu mure, arejaquemavu Jūmenijicure.

¹⁰Aru yópe arí, Jūmenijicu toivaicōjenejaquemavu ũi yávaiyede:

Muja, judíova āmevu, torojujarā mja Jūmenijicui beoimaraque, arí toivaicōjenejaquemavu.

¹¹Aru yópe máre arí, Jūmenijicu toivaicōjenejaquemavu ũi yávaiyede cojedeca:

Caivu mja judíova āmevu, mearore jíjarā Jūmenijicure. Muja, caivu pōeva, mearore jíjarā ũre, arí toivaicōjenejaquemavu.

¹²Aru Jūmenijicu Isaías bācure, yópe arí, coyūcaicōjenejaquemavu ũi yávaiyede:

Isaí bācui páramenacacu bacuyú dacuyume. Jūmenijicu epecuyume ũre, ũi jabotequiyepa ayu ina judíova āmevure. Aru ũ napini corede đacuyume ina judíova āmevure, arí toivarejaquemavu Isaías bācu.

¹³Jūmenijicu napini corede đayube mujare. Que baru me torojure đajacurí mujare me aru cārijimenoque cure đajacurí mujare, mje ju aye boje ũre. Nópe đajacurí ũ mujare ũai Espíritu Santoi paruéque.

¹⁴Muja, jívu, yúvacari jáve majivu mujare meara baju cađateivure aru me majidivure aipe đaiye jaurōre mujare, mje majicarājiyepa ayu mjevure.

¹⁵Ūbenita iyoca paperayocare apacure toivaicōjeivu yu mujare yavebecuva. Yo ji coyūno diyocaque ārure đaiyu aipe đaiye jaurōre mujare, Jūmenijicui epeiye beorí coyūcōjeimure, ũi mearo đacaiye bojecubeque. ¹⁶Que teni yurecabu Jesucristore memecaipōecu, buecu yu ina judíova āmevure. Yópe sacerdote ũi memeiyepe Jūmenijicui cūrami jívu mememtu yu, cađatecuyu pōevare ne mearore jíyede Jūmenijicure. Coyuyubu Jūmenijicui yávaiye méne náre, ũ jina marajiyépe ayu yópe jícaiyepa ũre, torojūquiyepa ayu ne ju aiyede Cristore. ũai Espíritu Santo epeyube náre, judíova āmevure, Jūmenijicu jinava.

¹⁷Yurecabu cūc Jesucristoque cūinávure. Que baru torojuvu yu

memecayū me Jūmenijicure. ¹⁸Yu yávaquijivu jidubecuva cūináro ji coyūquinore. Coyūquijivu aipe Cristo yure buede đayure aru aipe ju are đayure Jūmenijicure ina judíova āmevure máre. ¹⁹ũai Espíritu Santo parure đabi yure, ji đaquiyepa ayu pōeva ne jámene aru ne đarí majibede máre, ne coreóvarājiyepa ayu jáve ji coyūiyede. Que teni cucunūri cainoa joborōare Jerusalén āmicurímarore jocarí pu Iliria āmicuríjoborōita, coyūcacu caiye iye Jesucristoi yávaiye méne ímaroa coapa. ²⁰Cūináromu ji urō. Coyūiyuvu yu iye yávaiye méne áro ímaro ne jápiabenoí cāreja Cristorā, đabecuyū apevu ne memeni buino mácarōre. ²¹Que baru yópe arí, Jūmenijicu toivaicōjenejaquemavu ũi yávaiyede:

Ina coyūbemara mácavu ũi borore cāreja járajarama na. Aru ina jápiabevu bācavu ũi borore cāreja jápiarí coreóvarājarama na máre, arejaquemavu Jūmenijicu.

Pablo ũi jácūnuiyurō Romacavure
(Ro 1.13; 1 Co 9.11, 16.1-4)

²²Que baru obedinmua jácūnuiyuriducacu yu mje yebai. ²³⁻²⁴Ūbenita caride jave buojavu yu ji memeiyepe yo joborōre. Que baru obedijua joe jácūnuiyuriduyū, napini coreivu yu ji jácūnuquiyede mujare joabejena. Ji nuquiyede España āmicuríjoborōi, mauteiyuvu yu mje yebai obedijārvua, coreóvacuyū mujare coapa aru mje cađatenajiyepa ayu yure ji eaquiyede España āmicuríjoborōi, ji curíburu yóboi mjaque.

²⁵Ūbenita carijie nuquijivu Jerusalén āmicurímaroi, cađatecuyū Jesúre ju aipōevare noi. ²⁶Ina Jesúre ju aipōeva cójjivaivu Macedonia aru Acaya āmicuríjoborōacavu máre torojurivu jíyuma ne tātūrare, cađatenajivu ina Jerusalén āmicurímarocavu Jesúre ju aivucavu cūve cūvabevure. ²⁷Name jícōjemema náre. Quépora torojurivu “Jínajarevu, cađatenajivu ina cūve

cuvabevure”, aquemavu na. Ûbenita jãve nãre cađateiye javvu. Cristoi daquiyे jipocare maja judíova quévura cuvarejaquemavu Jũmenijicui mearo đacaiyede majare. Aru majarecabu coreóvare đavvu ina judíova ãmevure Jesucristoi yávaiye méne, ne cuvãrãjiyepе айv iye Jũmenijicui mearo đacaiyede nãre mãre. ²⁸Yũ jiyũ bãcu ina Jerusalécavu judíova Jesúre ju aivure caiye iye judíova ãmevu ne jíye báquede, ina judíova ne majinajiyepе ayũ arevũ judíova ãmevu jãve ju aivure Jesúre napedeca, etaquijivu nore jocarĩ nucuyũ España ãmicurijoborõi, aru jãcũdaquijivu mũje yebai, noi nuñvucarì. ²⁹Aru ji eaiyede mũje yebai, majivu yũ Jesucristore mearo đacacuyure majare.

³⁰Mũja, jívu, parũrõque jẽniaivu mũjare, maje ju aiyе boje maje jabocu Jesucristore aru ñai Espiritu Santoi uede đaiye boje majacavure. Jẽniaivu yũ mũjare, mũje jẽniacarãjiyepе ayũ yũre Jũmenijicũque parũrõca. ³¹Jẽniajara úque ina Judea ãmicurijoborõcavu Jesúre ju abevũ ne ãmeina đabenajiyepе айv yure. Aru jẽniajara Jerusalén ãmicurĩmarocavu Jesúre ju айv mãre ne torojurĩ jacopũrãjiyepе айv ji nuvacaquiyede nãre. ³²Que teni Jũmenijicui urĩburu, yũ torojucu eacuyumu mũje yebai. Aru ji cue mũjaque torojure đaquiyebu yure mãre. Caiye diede jẽniacajarã yure Jũmenijicũque. ³³Yũ jẽniaivu Jũmenijicure, ñai cãrijimenoque cure đayure põevare me, ñi cuquiyepе ayũ айv mũjaque. Quédecabu.

Pablo ñi meaicõjeino Romacavure

(Mr 15.21; Hch 16.1, 18.2, 19.29;

1 Co 1.14; 2 Ti 4.20)

16 ¹Majevucaco õi ãmiã Febe ju ađobe Jesúre majapedeca. Que baru uvũ yũ mũje me jacopũiyede óre. Ò cađateipõecobe ina Jesúre ju айv cõjjinocavure Cencrea ãmicurĩmarocavure. ²Me jacopũjarã óre, õi Jesúre ju aiyе boje. Nópe đaiye

javvu cayv Jesúre ju айpõeva arevũ ju айvure. Óvacari me cađateibico obedivu põevare aru yũre mãre. Que baru cađatejarã caiye óre javéde.

³Meajarari Prisca aru Aquila mãre, ji yóvaimara; memecaivũ Jesucristore boje. ⁴Ina yainđuima yũre boje, ji mauva ne boarĩ jarũvarĩduiyede yure. Que baru urarõ pare torojũede jívu yũ nãre. Aru айvũ ina judíova ãmevu Jesúre ju айpõeva mãre torojũede jívu nãre. ⁵Aru quédeca meajarari айvũ ina Jesúre ju айpõeva cõjjivaivũ ne cũrami jívu.

Meajacurĩ ñai ji uvũ Epeneto. Û ju ãme Jesúre айvũ arevũ Asia ãmicurijoborõcavu jipocai. ⁶Meajacorĩ ico María. Pare urarõ memecaibicođa õ mũjare. ⁷Meajarari ina Andrónico aru Júnias mãre. Ina yũpe paivũ judíovabu. ãmeina teivure jẽni jacoĩñami cũteima na yũque. Arevũ ina Jesúre ju айvũ ne daroimara coyũrãjivu Jesús ñi yávaiye méne me puedadama nãre. Aru Jesúre ju arejaquemavu na ji jipocai.

⁸Meajacurĩ ñai Ampliato, ji uvũ. Û ji yóvaimume Jesucristoque cũinãvure. ⁹Meajacurĩ ñai Urbano, maje yóvaimu memecayũ Cristore. Aru meajacurĩ ñai Estaquis, apecu ji uvũ. ¹⁰Meajacurĩ ñai Apeles. Û jãđovaimi jãve ñi ju aiyede Jesúre. Meajarari ina Aristóbuloi cũramicavu. ¹¹Meajacurĩ ñai Herodión. Û mãre judíovacacube. Aru meajarari ina Narcisoi cũramicavu Jesúre ju айvũ mãre. ¹²Meajarari ina pũcarã nomiva Trifena aru Trifosa mãre. Urarõreca memecadama na maje jabocu Jesúre. Aru meajacorĩ maje uvũ Pársida. Ò mãre pare memecaibico maje jabocu Jesúre.

¹³Meajacurĩ ñai Rufo. Caivũ majidivũbu úre me ju ayure maje jabocu Jesúre. Aru meajacorĩ Rufoi paco mãre. Ò me cađateibico yure yópe jipacope baju. ¹⁴Meajarari ina Asíncrito, Flegonte, Hermes, Patrobas, Hermas, aru айvũ ina Jesúre ju айpõeva náque curivũ mãre. ¹⁵Meajarari ina Filólogo aru Julia mãre, Nereo aru ñi yóco Olímpas, aru айvũ

ina Jūmenijicui pōeva náque curivũ máre.

¹⁶ Me jacoyujarã muja mjevũre, muje jivare nuri, muje Jūmenijicu jina mae boje. Caivũ Jesũre ju aipōeva cójjiñocavũ meaicōjedama mujare.

¹⁷ Muja, jivũ, yũ parũrōque jēniavũ mujare yópe: Me jájara ina maucvũre ðaivũre apevũre. Me jájara ina vaini ture ðarĩduivũre apevũre, dajocare ðaiyũrĩduivũre náre ne ju aiyede Jesũre. Me jájara ina buevũre apeno bueinore muje bueiye báquede jaruvarĩ. Yóvabejarã náre. ¹⁸ Ina pōeva dápiabenama aipe memecaiye jaurõre náre maje jabocũ Jesucristore. Quénora dápiadama na ne ārãiyede. Ũbenina yávadama yávaiye jávepe painore. Ũbenita jujoadama na ina majibevũre.

¹⁹ Caivũ pōeva jápiaivũbu muje borore, paruéque ju aivũre Jesús ũi yávaiye méne. Que baru torojurĩ ārũvũ yũ mujare. Yũ ũvũ mujare me majidivũre mearo ðaiyede, muje cadatenajiyepe ayũ apevũre. Ũbenita yũ ũvũ ye majibevũre mujare ámeno ðaiyede, muje ámeina ðabenajiyepe ayũ apevũre. ²⁰ Aru Jūmenijicu, ñai majare cãrijimenoque me cure ðayũ, maumejiena mujare bjarocuyũme ñai abujuvai jabocũre, ũi ámiá Satanás. Maje jabocũ Jesucristo me caðatejacurĩ mujare cainũmũa, ũi me boje.

²¹ Timoteo, yáque memeiũ memecayũ Jesũre, meaicōjeimi mujare. Aru apevũ judíova máre, Lucio, Jasón, aru Sosípater máre meaicōjedama mujare.

²² Yũ, Tercio, toivacayũ Pablöre ũi coyũiyede mujare iyoca paperayocare, mujape páyũ yũ máre ju ayũ Jesũre, meaicōjeivũ mujare.

²³ Yũ, Pablo, cuvũ Gayoi cūrami. Aru ũi cūrami Jesũre ju aipōevai cójjiñamimu. Ñai Gayo meaicōjeimi mujare. Aru Erasto, yo ímarocavũ ne tãutũrare coreipōecu máre, meaicōjeimi mujare. Aru Cuarto máre, apescu majescu, Jesũre ju ayũ, meaicōjeimi mujare.

²⁴ Maje jabocũ Jesucristo me caðatejacurĩ mujare cainũmũa, ũi me boje.

Pablo ũi jino mearore Jūmenijicũre

²⁵ Mearore jjarãri Jūmenijicũre caivũ cainũmũa. Jūmenijicu parure ðarĩ buojaibi mujare muje ju aiyede Jesús ũi yávaiye méne. Iye yávaiye méne coyũyũbu yũ. Jesucristoi borore Jūmenijicui jáðovameno mácarõre jipocamia ũbenita jáðovainore caride coyũyũbu yũ. ²⁶ Ũbenita cari ina Jūmenijicui yávaiyede coyũcaipōeva mácavũ ne toivaiye báque boje, iye Jūmenijicui yávaiyede jávene majidivũ bujoadama caivũ pōeva. Javede apevũ pōeva majidejaquemavũ iye yávaiyede. Aru Jūmenijicu, cainũmũa arũcũ, coreóvaicōjeimi diede caivũ pōeyajuboacavũ, ne ju arãjiyepere ayũ Jūmenijicũre, ne ðarãjiyepere ayũ ũi urõpe. ²⁷ Jūmenijicu cūinácũrabe ũ. Aru caiyede majibi ũ. Cainũmũa pōeva mearore jjarãri úre, Jesucristoi ðaiye boje. Quédecabu. Quénoramũ.

1 Corintios

Mamabuinore coyuiyebu Pablo bácu ùi toivaicōjeiye báquede mamayoca paperayocare Corinto āmicurīimarocavū Jesúre jū aipōevare. Pablo bácu judíovacacu bácvacari, Jesús ùi yávaiye méne beorī coyucōjeimū marejaquémavū, coyucuyū ùi yávaiye méne judíova ānevure, judíova ne jū abe boje ùi coyuiyede. Lucas bácu coyurejaquemavū Pablo bácu borore Hch 7:57-8:1, 9:1-31, 13:1-28:31, aru ùi cuede Corinto āmicurīimaroi 18:1-18. Javede Pablo bácu toivaicōjeiye bácu toivaicōjenejaquemavū pucayoca ùi paperayocare Tesalónica āmicurīimarocavure. Pablo bácu coyurejaquemavū ùre toivaicōjeiye bácu aipe ùi toivacaquiye báquede diyocare. Toivaicōjenejaquemavū diyocare āniujua báquede 54-55 d.C., yóbecue ùi cucunuiyede, coyucuyū Jesús ùi yávaiye méne. Curejaquemavū Éfeso āmicurīimaroi ùi toivaicōjeiye diyocare (16:8, Hch 19).

Diyocaque Pablo bácu coyurejaquemavū aipe ðaiye jauřore Jesúre jū aipōevare. Coyurejaquemavū Corintocavū ne jēniari jáiye báquede ùre ne paperayocaque purabuoiyede (cap. 7), āiyede pōeva ne jíye báquede pēpeimarare (cap. 8), Espiritu Santoi majide ðaiyede Jesúre jū aipōevare ùi majiécarōque (caps. 12-14), aru ne jínaiyede ina Jesúre jū aipōeva Jerusalén āmicurīimarocavū cuve cuvabevure (cap. 16). Aru jararejaquemavū Corintocavure ne yajuboa tede ðaiyede (caps. 1-3), ne nājine ðabe boje nácacu āmeina ðaipōescure (cap. 5), ne coyuiye boje ne jaraiyede ne bajumia āmeina teivure jēniari jáipōeva Jūmenijicure coreóvabevū ne jivateinoi (cap. 6), aru ne āmeina teiyede ne cōjjivaiyede (cap. 11). Jáđovarejaquemavū aipe ðaiye jauřore Jesúre jū aipōevare ùi coyuiyeque Jesúi daroimarare coyurājivure ùi yávaiye méne (cap. 4), ùi baju ðaiyede (cap. 9), aru Israecavū bácvū ne ðaiye báquede (cap. 10). Aru ārure ðarejaquemavū náre Jesús ùi yávaiye méne (cap. 15).

Pablo ùi meaicōjeino Corintocavure

(Hch 18.1)

1 ¹⁻²Yū, Pablo, toivaicōjeivū apecure iyoca paperayocare. Meaicōjeivū muja cōjjivaiyvū Corinto āmicurīimarocavū Jūmenijicui pōevare. Jūmenijicu beorī epeibi yure Jesucristoi yávaiye méne beorī coyucōjeimaracacure. Sóstenes máre, majecu ùi jū aipe boje Jesúre majapedeca, meaicōjeimi mujare. Caivū mujarecabu Jūmenijicui cutuimara mácvū ū jinava meara baju. Mujarecabu curivū Jesucristoque cūinávure, yópe caivū pōeva cainoa jaborōacavure mearore jívu maje jabocu Jesucristore. Ūrecabe ne jabocu aru maje jabocu máre. ³Majepacu Jūmenijicu, maje jabocu Jesucristomaque, mearo ðacajacurī mujare bojecubeda ùi me

boje. Aru torojurī cure ðajacurī mujare cārijimevūva.

Cristo ùi mearo ðacaiyede ùre jū aivure

⁴Cainumua Jūmenijicure torojuede jívaiyvū, ji mearore jímvure, mujare boje. Jūmenijicu Jesucristore mearo ðacare ðaibi mujare bojecubeda. Que baru ùre torojuede jíyubu. ⁵Muje cue boje Jesucristoque cūinávure, Jūmenijicu mearo ðacaibi mujare urarō baju. Caiye ū jiede coreóvare ðaibi mujare. Aru diede mujare me coyure ðaibi majiéque apévure máre. ⁶Pueno baju muje coreóvare nu iyede Jūmenijicui yávaiyede jávene Cristorā, pueno baju oatvabi mujare, muje mearo ðarājiyepē ayū. ⁷Que baru caride muje napini coreiyede maje jabocu Jesucristoi copaidaquiye, ye

jaubevu mujare cūinájino Jūmenijicui majiécārō iye ũi majide ðaiye ũi pōevare Espiritu Santoque, ne cadatenajiyepere ayu apevure. ⁸ Jūmenijicu parure ðacuyume mujare mije ũmei pu ijāravu cūiyeta, ñame ne buojabenajiyepere ayu boropadaivu mujare maje jabocu Jesucristoi copaidaquijāravu baquinóre. ⁹ Jūmenijicu ðaibi çainumua yópe ũi aiye báquepedeca. Ũrecabe mujare cuturí epeyu maje jabocu Jesucristoque cūinávure, “Yóvajarāri na jímacu Jesucristoque”, ũi aiye báquepedeca.

Corintocavu Jesúre ju aivu ne yajuboa tede ðaino
(Hch 18.8, 24, 19.29; Ro 16.23; 1 Co 16.15)

¹⁰ Muja, jívū, maje jabocu Jesucristo yópe coyúicōjeimi yure. Parurōreca jēniaivu mujare, mije dápiarājiyepere ayu cūináturu mije ũmei. Yajuboa tede ðabejarā mije jēneboi. Cārijimenoque çujarā mija. Cūináturu bajadéni mije ũme, mije dápiaino máre. ¹¹ Muja, jívū, nópe coyuyūbu mujare ico Cloé ōi cūramicavū, ne coyuiye boje yure mije jaraiyede mije baju. ¹² Muja dápiabevvya cūináturu mije ũmei. Quénora apevu mujacavū, “Ñujamu Pabloi bueimara”, adama. Aru apevu mujacavū, “Ñujamu Apoloi bueimara”, adama. Apevu mujacavū, “Ñujamu Pedroi bueimara”, adama. Aru apevu mujacavū, “Ñujamu Cristoi bueimara”, adama. ¹³ ¿Aipe teni nópe dápiavurū mija, yajuboa tede ðaivu? Caivu Jesúre ju aipóeva çurivubu ũque cūinávure. Jáve āmevu mije ũbenina arí dápiaiyede apevu ũre ju aivu çurivure ũque cūinávure, ũbenita apevu ũque cubevure. Aru yu āmevu ñai ne pēvari jēoimū mácu jocuçujaravena mujare boje. Aru ocoque mije jádovaiyede Jūmenijicūque, “Yu Pablōre ju aivu”, abeteavū mija. Quénora “Jesucristore ju aivu”, ávū mija.

¹⁴⁻¹⁵ Mujacavū obebejinare ocoque jádovacacu yu Jūmenijicūque. Crisporre aru Gayore máre quévura Jūmenijicūque

jádovacacu yu ocoque. Jūmenijicūque ji jádovaru obedivu pōevare ocoque, “Pabloi bueimaramu ñuja”, arājichūma na. Que baru torojūede jívū Jūmenijicūre, ji jádovame boje ocoque obedivu mujare ũque. ¹⁶ Estēfanare ũ jivūque ārvū yu caride. Náre máre Jūmenijicūque jádovacacu yu ocoque. Ārumetevū yu apevu ji jádovaimara mácavure, çurivū baru. ¹⁷ Cristo jarobeteame yure, ji jádovaquiyepere ayu pōevare Jūmenijicūque ocoque. Quénora jaroáme yure, ji coyūquiyepere ayu iye yávaiye méne ũi meadacaiyede pōevare ne āmeina teiyede jarūvarí. Ũbenita yu coyūbevū iye yávaiye méne pōeva ne majiéque aru me yávaiyeque máre. Ũbevu yu ne ju aiyede iye yávaiye méne, die me jápurae boje. Quénora mvū yu ne ju aiyede diede Cristoi yayiye báque boje jocuçujaravena. Que baru bojecube tede ðaiyūbevū yu ũi yayiye báquede ji coyuiyeque.

Jūmenijicu ũi jádovaino ũi paruéde aru ũi majiéde Cristoque
(Ro 1.16; 2 Co 10.17)

¹⁸ Ina pōeva bíjare nuivu Jūmenijicūre jocarí toabo cūiméboi ne jápiayede iye yávaiye méne Cristoi meadacaiyena pōevare ũi yayiye báque boje jocuçujaravena, “¿Ũbeni márca?” arí dápiadama na. Ārumevure jádama caivu coyūivure iye yávaiye méne Cristorā. Que baru ju abema ũre. Ũbenita majacapūravū meadare nuivūbu cavarō mearo Jūmenijicui çurōi ũi oatūvare ðaiye boje majare iye yávaiye méque Cristorā. Coreóvare ðaibi majare ũi paruéde iye yávaiye méque. ¹⁹ Yópe arí, toivaicōjēnejacquemavu Jūmenijicu ũi yávaiyede ina Cristore ju abevū ne borore:

Ina majidivū ne majiéde jarvūçuyūmu yu. Aru ina coreóvaivu ne coreóvaiyede bojecube tede ðacuyūmu yu, arejaquemavu Jūmenijicu.

²⁰ Que baru ye baquinó āmevu ina majinidivū ne majié ijāravūque, aru ina

bueniduiṽ ne majié ijāravuque, aru ina majicarĩduiṽ aṽevure máre ne majié ijāravuque. Caiye iye ne majiniduiyede ũbenina bojecũbe tede ðaibi Jūmenijicu.

²¹ Jāve caiyede majibi ũ. Aru, “Ijāravucavu ne majiémia ye coreóvaivu buojabema yũre”, arejaquemavu ũ. Quénora, “Ina pōeva ju aivu ji yávaiye méne Cristorã ji meadacaimara márajivũbu”, arejaquemavu Jūmenijicu. Iye yávaiye ménecabu Cristorã, ũi meadayede pōevare, ñuje coyuiye.

Ūbenita, “¿Ūbeni márica?” arĩ dápiadama ñuje coyuiyena ijāravucavu Jūmenijicure ju abevũ. Que baru iye ñuje coyuiye bojecũbevu, ne dápiaru.

²² Ina judíoṽa jáiyurivũbu pōeva ne ðarĩ majibede, ne ju arãjiye jipocai aṽecu ũi coyuiyede náre. Aru ina griegova jápiaiyurivũbu pōecu ũi coyuiyede ijāravuque majiéde, ju arãjivu ũi coyuiyede. ²³ Ūbenita ñujacarpũravu quéda cūináene coyuiṽbu. “Cristo jabovai pēvari jēoimũ mácu jocusũjaravena yaidéjaquemavu, bojedacuyũ maje ámeina teiyede, jarũvacuyũ diede”, arĩ coyuiṽbu ñuja. Ūbenita ina judíoṽa jorojĩñama ne jápiaiyede iye ñuje coyuiyede, ñai jaboltejarocure náre. Aru ina judíoṽa ámeṽ ne jápiaiyede diede, “¿Ūbeni márica?” arĩ, bojecũbepeda dápiadama iye ñuje coyuiyede.

²⁴ Ūbenita majacarpũravu coreóvaivũbu Cristo Jūmenijicui paruéde cũvacure aru Jūmenijicui majiéde máre cũvacure, ũi meadaquiyepe aivu pōevare. Majarecabu Jūmenijicui cuturĩ epeimara ũ jinava, judíoṽa aru judíoṽa ámeṽ máre, Cristoi meadacaimara. ²⁵ Pōeva aivu baru “Jūmenijicu majibebi”, nárecabu majibevũ. Jūmenijicu majicutame caivu pũeno, majibecure páyũvacarĩ pōeva ne jáiyede. Pōeva aivu baru “Jūmenijicu parũbebi”, nácapũravu ye majibema. Jūmenijicu parũcutame caivu pũeno parũbecure páyũvacarĩ pōeva ne jáiyede.

²⁶ Muja, jívu, ārũjara iyede. Jūmenijicui cutuquiye jipocamĩa mũjare, obebejĩna mũjacavu majitequemavu

ijāravuque majiéde, obebejĩna parũrivure cõjequemavu aṽevũ pōevare, aru obebejĩna cũvatequemavu mũjebucũva parũrivũ ne jabovava.

²⁷ Que baru Jūmenijicu beorĩ epeibi ũ jinava pōeva majibevure ijāravuque majiéde, cũyoje tede ðacuyũ ina pōeva “¿Majidivũ bárica ñuja?” arĩduivure. Aru Jūmenijicu beorĩ epeibi ũ jinava pōeva parũbevure ijāravuque paruéde, cũyoje tede ðacuyũ ina pōeva “¿Parũrivũ bárica ñuja?” arĩduivure. ²⁸ Jūmenijicu beorĩ epeibi ũ jinava jabova ámevure, ijāravucavu ne ũbemarare, aru parũbevure caivu ne cãchinocavure. Majarecabu Cristoi meadacaimara. Que teni Jūmenijicu cūiné ðacuyũme caivu ina “Parũrivũbu ñuja”, aivure ũbenina.

²⁹ Que baru ñame “¿Meara márica?” aivu buojabema Jūmenijicui jáinore. ³⁰ Jūmenijicurecabe cure ðayũ majare cūinávure Jesucristoque. Aru Cristoque majide ðaibi majare ũi bueyede jávene. Jesucristo boropatebevure ðaibi majare Jūmenijicui jáinore. Coatede ðaibi majare ámenore jarũvarĩ, maje ðarãjiyepe ayũ yópe Jūmenijicui urõpe. Aru bojedabi majare maje ámeina teiyede jarũvarĩ. ³¹ Que baru yópe arĩ, toivaicõjenejaquemavu Jūmenijicu ũi yávaiyede: “Ñai pōecu ‘¿Meacu bárica?’ arĩ coyuiyucũ baru, ũi bajuma nópe arĩ coyũbejacurĩ. Quénora ‘Meacu bajube maje jabocũ cavarõ mearocacũ’, arĩ coyũjacurĩ ũ”, arĩ toivaicõjenejaquemavu Jūmenijicu.

**Cristo jabova ne pēvari jēoimũ
mácuṽe coyuiño
(Hch 18.9)**

2 ¹ Muja, jívu, ji jácũñiye báquede mũje yebai, coyũcuyũ Jūmenijicui yávaiyede, coyũbetecacu yũ yópe ina ijāravucavu majidivũ ne coyuiyepe. Mũjare coyũcacu iye Jūmenijicui yávaiyede, jáðovameno mácarõre jipocamĩa ũbenita jáðovainore caride, mũje coreóvabejũroede aṽecu ũi coyũbedu diede mũjare. Ūbenita majidivũ ne yávaicamuaque

coyubetecacu yu. Aru maiyójae yávaicamuque máre coyubetecacu yu. ²Muje me coreóvarājiyepe ayu iye Jūmenijicui yávaiyede, “Cūináene quénora coyūquijivū ina Corintocavure”, arí dápiacacu yu, ji buequiye jipocamia mujare. Que baru, “Jesucristo, jabova ne pēvaimu mácu jocusujaravena, yaidéjaquemavu majare boje, jaruvacuyū maje āmeina teiyede”, arí coyucacu yu mujare. Yu ūre quécura coreóvare daiyutecacu mujare. ³Jiducu ji yávaiyeque eacacu yu muje yebai. “Jūmenijicui yávaiyede me coyurī buojabequijichavū yu”, ji arí dápiaye boje, jidurī bidicacu yu. ⁴Ji coyūiye báquede mujare Jūmenijicui yávaiyede yópe ina ijāravucavu majidivū ne coyūiyepe coyubetecacu yu. Majidivū ne yávaicamuare aru maiyójae yávaicamuare máre coyubetecacu yu, muje ju abenajiyere ayu ji coyūiyede iye jápurae boje me. Quénora ji coyūiye báqueque mujare jádovacacu Espiritu Santo paruéde. Aru ūi paruéque majide dáme mujare iye yávaiye méne. ⁵Que baru muja ju aivūbu Jūmenijicui yávaiye méne Cristorā, Jūmenijicui jádovaiye boje ūi paruéde. Ūbenita pōeva ne majié boje, muja ju aivu āmevu.

**Jūmenijicui majiéde ūi coreóvare
đaino Espiritu Santoque
(Ro 11.34)**

⁶Yu máre coyūivu majiéque. Ūbenita ijāravucavu ne majiépe āmevu. Aru ijāravucavu ne jabova ne majiépe āmevu. Iye ne majio ijāravūque cūinē nuivu. Quénora iye majié ji coyūiyeque coyūivu yu ina Jesúre ju aipōeva parure nuivure ne ju aiyequé ye jaubevūva ne coreóvayede Jesúre. ⁷Iye majié ji coyūiyebu Jūmenijicui majié. Javede ūi cuedaquiye jipocamia ijāravure, majidejaquemavu meadacuyū majare, maje curājiyepe ayu meara baju ūque cainūmua. Cristoi daquiye jipocamia ijāravui, Jūmenijicui jádovamenejaquemavu iye ūi majiéde, ūi daquiye. Ūbenita diede jádovaimi

caride. ⁸Ijāravucavu ne jabova caivu ye coreóvabedejaquemavu iye Jūmenijicui majiéde. Ina jabova coreóvaivu baru, pēvari jēomejebu maje jabocu cavarō mearocacure meacu bajure jocusujaravena. ⁹Aru iye ūi mearo đacaquiye ūi meadaiyede, yópe arí, toivaicōjenejaquemavu Jūmenijicui ūi yávaiyede:

Jūmenijicui meadaibi ūi mearo đacaquiye ina pōevare ūre urivure, yópe pōeva ne jámene, aru ne jápiabede, ne dápiabede máre, arí toivaicōjenejaquemavu Jūmenijicui.

¹⁰Iye ūi mearo đacaquiye ūi Espiritu Santoque coreóvare đaiibi majare. Ūai Espiritu Santorecabe majicu caiyede. Pu caiye iye Jūmenijicui urarō majiéde majibi ū.

¹¹Pōecu cubebi coreóvayū apesu pōecu dápiayede. Quécura ūai pōecu coreóvaibi ūi baju dápiayede. Quédecabu Jūmenijicui jie máre. Pōecu cubebi coreóvayū Jūmenijicui dápiayede. Ūai Espiritu Santo quécura coreóvaibi diede. ¹²Ūai Espiritu Jūmenijicui daroimu majare pōeva ne majiéde coreóvare đabebi majare. Quénora Jūmenijicui majiéde coreóvare đaiibi majare, maje coreóvarājiyepe ayu iye Jūmenijicui mearore đacaiyede majare bojecubeda. ¹³Que baru ji coyūiyede Jūmenijicui yávaiyede, coyubevū yu pōeva ne bueiye yure o ji baju dápiayede. Quénora coyūivu yu ūai Espiritu Santo bueiye yure. Que teni bueivu yu ina cvarivure Espiritu Santore iye yávaiyede ūai Espiritu Santo coreóvare daiyede yure.

¹⁴Ūbenita ina Espiritu Santore cuvabevū coreóvaivu buojabenama iye Jūmenijicui mearo đacaiyede bojecubeda ūi Espiritu Santoque. Ne jápiayede Jūmenijicui yávaiyede ūi majiéque coyūiyede, “¿Ūbeni márica?” arí dápiadama na. Ne dápiaru, die bojecubevū. Ácu pōecu Espiritu Santore cuvabecu baru, Jūmenijicui jiede ye coreóvabebi ū. ¹⁵Ūai Espiritu Santore

cuvacu, caiye bueiyede ñi jápiaiye, “Jümenijicui majiéque bueyube” o “Pöeva ne majiéque bueyube”, nurié arí coyurí majibi ñ. Ëbenita ñi baju bueiyede nurié arí coyurí majibebi pöescu Espíritu Santore cuvabecu. ¹⁶Yópe arí, toivaicöjeneaquemavu Jümenijicu ñi yávaiyede: “Pöescu cubebi Jümenijicui dápiaiye majicu. Aru pöescu cubebi majicarí buojayu Jümenijicure”, arí toivaicöjeneaquemavu. Ëbenita maja Jesucristore ju aipöeva dápiaiuvu yópe ñi dápiaiyepe.

**Jümenijicure memecaivu ne yóvaino
ne baju**

*(Hch 18.4-11, 24-28; 1 C 1.12,
6.19; 2 Co 6.16; He 5.12-13)*

3 ¹⁻²Muja, jívu, ji cæ báquede mujaque, coyuyu buojabetecacu mujare yópe ji coyuiyepe ina Jesúre ju aipöeva, parure nuivure ne ñmei Espíritu Santoque. Quéhora coyuiye jauteavü yure mujare, Jesúre ju aipöeva Espíritu Santore cuvavureca, yópe ji coyuiyepe Jesúre ju abevü Espíritu Santore cuvabevure. Juedojínape paivu bateávü muja. Juedojína opeco matuiyeda ücuñaima aru äiyede äiye majibema. Quédeca muja juedojínape paivu muje üme, quéhora Jümenijicui yávaiye maiyójabede Cristorá jápiarí eavü muja, aru ñi yávaiye maiyójaede jápiarí eabeteavü muja. Aru caride máre, bueiye maiyójaede jápiarí eajurorivüvacari, jápiarí eabevütamu muja cäreja. ³Nopedecabu muje dápiaiye boje aru muje ñaiye boje máre yópe ijáravüvacavu Jesúre ju abeni Espíritu Santore cuvabevü ne dápiaiyepe aru ne ñaiyepe máre. Muja jarađavü muje bajumia cäreja. Aru muja tebutedavü muje baju cäreja. Muje nópe ñaiye boje, jáđovadavu parure númevu muje ümei Espíritu Santoque. Quéhora ñare nuñavu muja yópe ijáravüvacavu Jesúre ju abevüre. ⁴Cüinácu mujacacu “Pablo ñi bueimümu yu” arí, aru apecu “Apolos ñi bueimümu yu” arí, jáđovavü ijáravüvacavure Jesúre ju abevüre paivübu muja.

⁵¿Ye paruéde cuvari ñai Apolos, aru ye paruéde cuvari yu, pöeva ne yóvaräiyeye aivu ñujare? Ñujacapuravubu Jümenijicure memecaivu quéda. Ñuje memecaiye boje úre, muja ju aivübu maje jabocu Jesucristore. Ñuja coapa ñaiuvübu ñuje memeiye yópe Jümenijicui memecöjeiye báquepe ñujare. ⁶Yópe cüinácu jiore memepöescu ñi oteiyepe, nopedeca mamamüme Jümenijicui yávaiye méne coyucacu yu mujare. Aru yópe apecu ñi meadaiyepe iye oteiyepe, nopedeca ji yóboi mujare buequemavu Apolos. Ëbenita yópe Jümenijicui bucure ñaiyepe iye oteiyepe, nopedeca úrecabe pöevare ju are ñayu ñi yávaiye méne. ⁷⁻⁸Que baru ye baquinó ämevu yu mamamümcacu, coyuyu Jümenijicui yávaiye méne, yópe oteipöescu. Aru ye baquinó ämemi ñai Apolos, yóbocacu, ñai bueyu diede máre, yópe meadaipepöescu. Ñujacapuravü cüináturutamu. Cüinácu ñujacacu apecu puenocacu ämemi. Ëbenita Jümenijicurecabe caivu maja maje puenocacu, ñi ju are ñaiye boje pöevare ñi yávaiye méne, yópe ñi bucure ñaiyepe oteiyepe. Ëbenita mamamümcacu, yu coyuyu, aru yóbocacu, ñai bueyu, cüináturu cuvüvacari ñuje memeiyeque, cüináturu ämevu ñuje íye bojeque. Quéhora Jümenijicu bojedacuyüme ñujare coapa, yópe ñujare jauépe ñuje memeiye báque boje. ⁹Memecaipevarecabu ñuja. Jümenijicurecabe ñuje memecaimü. Aru ñuje baju yóvaivübu ñuje memecaiyede úre. Mujacapuravü jiore paivübu. Aru yópe jiore memepöescu ñi memeiyepe, nopedeca Jümenijicurecabe memeuñu mujare, oatuvacuyu, meara ñacuyu. Apenore máre jévari coyuijivü yu. Muja cüramipe paivu báräivübu. Aru Jümenijicurecabe ñai ñayu diñamine. ¹⁰Yópe pöescu cuvaiyücu meadami cürami cüravaque ñaiñamine ñi ñari buicöjeiyepe diñamine cüinácu cüraque memepöescu me majicure, nopedeca Jümenijicu yure majide

ðarĩburu yóboi ùi majiéque, coyurĩ buicójeame ùi yávaiye méne mujare. Yópe arevũ memeipóeva ne memene nũiyere diñamine, nopedeca arevũ ji yóbocavũ buede nũñama mujare. Aru yópe ina memeipóeva ne me jáiyepe aipe ne memeiyede, nopedeca me jájararĩ ina mujare bueipóeva coapa aipe ne bueiyede, jáve maquiyépe aivũ. ¹¹Yópe memeipóescu ùi ðarĩ buojabepe cũravaque ðaiñamine cũrava cuvabescuva, nopedeca apescu bũna buojabebi Jũmenijicũ yávaiyede jávene, Jesucristorã coyubescuva. ¹²Yópe arevũ memeipóeva ne memeiyere bojecueque, yópe úruque, plataque, aru bojecurijĩboa cũrajiboaque máre, nopedeca arevũ me nurié coyũvũbu Jũmenijicũ yávaiyede. Æbenita yópe arevũ memeipóeva ne memeiyere bojecubeque, yópe jocuveaque, muiyocaque, aru cõriáque máre, nopedeca arevũ nurime coyũvũbu Jũmenijicũ borore. ¹³Jesucristoi ðaquijãravũ, ùi ñãjiovaquijãravũ baquinóĩ pòevare, ne ãmeina teiye boje, me jáðovacuyũme ùi toaque aipe ãrojaene caivũ pòeva ne ðaiye báquede ijãravũ. ¹⁴Pòescu nurié buedu Cristorã, ùi ðaiye éni cũiméquiye bu no toaque. Aru Jũmenijicũ me bojedacuyũme úre, yópe memeicójeipóescu ùi me bojedaiyepe úre memecayũre, bojecueque memeñũ mácũre. ¹⁵Æbenita pòescu nurime buedu Cristorã, ùi ðaiye éni cũiquiye bu no toaque. Aru Jũmenijicũ bojedabescuyme úre, yópe memeicójeipóescu ùi bojedabepe úre memecayũre, bojecubeque memeñũ mácũre. Ñai pòescu ùi ðaiye boje bĩjaquiyebu úre jocarĩ. Æbenita úvacari bĩjabescuyme. Meadaimũ macuyũme yópe pòescu ùi cúyarĩ dupini nũiyere cũrami toaque uruñamine jocarĩ.

¹⁶Caivũ maja Jesúre ju aipóeva Jũmenijicũ cũramipebu, maje cuvãe boje ùi Espĩritu Santore. Yópe pòeva ne cũepe cũrami jĩvũ, ñai Espĩritu Santo cubi maje úmei. ¿Diede coreóvabenaru mujã? ¹⁷Yópe

Jũmenijicũ cũrami meadami bajupe, mujarecãbu Jũmenijicũ pòeva meara baju, memecarãjivũ úre. Que baru ácu pòescu, ùi bueiyede jáve ãmeque, bĩjare ðaiyurĩburu yóboi mujare, ùi ðajocare ðaiyurĩduiyede mujare mujẽ ju aiyede Jesúre, Jũmenijicũvacari bĩjarocuyũme úre.

¹⁸Mujẽ bajumia apescũre jujovaicójemejara. Cũinãcu mujacacu “¿Majicũ bãrica yũ ijãravũcavũ Jesúre ju abevũ jiede?” arĩ ðãpiayu baru, ùbenina arĩ ðãpiarĩduibi ù. Ñai nope arĩ ðãpiayu majibescupe tejacurĩ ijãravũcavũ Jesúre ju abevũ ne jáiyede, úre Jũmenijicũ majide ðaquiyere ayũ majiẽ jáveque. ¹⁹Ijãravũcavũ Jesúre ju abevũ ne majiẽ bojecubevũ Jũmenijicũ jáinore. Ne coyũiyede ne majiẽque, “Æbenina coyũvũbu”, arĩ ðãpiaibi ù. Yópe arĩ, toivaicójenejaquemavũ ùi yávaiyede: “Ina ‘¿Majidivũ bãrica ñũja?’ ùbenina arĩ majinidivũre jarũvaibi Jũmenijicũ, ne baju majinidivũre boje”, arĩ toivaicójenejaquemavũ. ²⁰Aru yópe máre arĩ, toivaicójenejaquemavũ Jũmenijicũ: “Maje jabocũ majibi ina ‘¿Majidivũ bãrica ñũja?’ arĩ majinidivũre ne ðãpiaye ye bojecubede”, arĩ toivaicójenejaquemavũ. ²¹⁻²²Que baru arĩ ðãpiabejarã cũinãcu pòescu majicũre arevũ pũeno. Que baru, “Pablo ùi bueimũmu yũ”, o “Apolos ùi bueimũmu yũ”, o “Pedro ùi bueimũmu yũ”, abejarã mujã. Caivũ mujare bueipóevare aru caiye apede Jũmenijicũ mearo ðacaiyede epedejaquemavũ ù majare boje. Ijãravũre, maje cũede, maje yainãjijyede, caride, aru javenare máre epedejaquemavũ Jũmenijicũ, majare boje. ²³Majamu Cristo jina, ðarãjivũ yópe ùi urópe. Aru Cristobe Jũmenijicũ jicũ, ðacuyũ yópe ùi urópe.

Aipe ne memeino ina Jesúĩ ðaroimara coyũcarãjivũ ùi yávaiye méne

(Hch 18.3; 1 Co 11.1; Fil 3.17; 1 Jn 3.19-21)

4 ¹Jãjãra ñũjare, Jesucristoi ðaroimarare coyũcarãjivũ ùi

yávaiye méne, yópe úre memecaivure. Ñujare bueicõjeimi põevare Jümenijicu “Yópe ðacuyumu yu, meadacuyu põevare ne ámeina teiyede jaruvari”, ñi arí dápiaino jáðovameno mácarõre jipocamia ubenita jáðovainore caride.

² Aru ñai põecu Jümenijicui bueicõjeimu mácure bueiyé javu iye yávaiye méne Cristorã dajocabecuva aru diede oatuvabecuva máre. ³ Yúcapüravure ye baju ámevu muxe coyuiyede mearore o ámenore ji bueiyna. Ye baju ámevu yure apevu põeva máre ne coyuiyede mearore o ámenore ji bueiyna. Aru yávacari máre mearore o ámenore ye coyubevu ji baju bueiyna. ⁴ “Boropatebevu yu”, arí dápiavu cainumua Jümenijicui jáinoi. Ubenita ye baju ámevu ji boropatebedu ji dápiainore. Maje jabocurecabe ñai coyucuyu yure, “Boropateyubu mu ji jáinoi”, o “Boropatebecubu mu ji jáinoi”.

⁵ Que baru caivu põeva ye coyubejarãri apere mearore o ámenore ñi coyuiyena, añijãravu maje jabocu Jesucristoi copaidaquijãravu baquinó jipocamia. Çorejarã muja pu ñi copaidaiyeta. Úrecabe coreóvare ðacuyu caiye maje majibede cãreja, põeva ne ðaiyede yavenina. Aru úrecabe coreóvare ðacuyu caivu põeva coapa ne dápiayede aipe ne ðarãjiyede máre. Dinumu maquinóre caivu põeva coapa ne mearore ðaru, mearore jícuyume Jümenijicu náre coapa.

⁶ Muja, jivu, jëvari coyuiquijivu yu caiye iyede Apolore aru yure máre, caðatecuyu mujare, muxe ðaicõjenidubenajiyere ayu põevare ape de Jümenijicui yávaiyede ñi arí toivaicõjeiye báquede jocarí aru muxe abenajiyere ayu cüinácu mujare bueipõecurã, “¿Majicu bárica ñi apevu pueno?” muxe ámeina jáiyede apevure.

⁷ Jáve ñi majibecube apevu pueno. Caiye muxe majiéde muxe cuvaede majide ðaibi Jümenijicu. ¿Aru ñi majide ðaiye boje diede, aipe teni yávaivurü muja yópe majidivure muxe baju majiéque? Que baru, “¿Majidivü bárica ñija apevu pueno?” arí dápiayé javubevu mujare.

⁸ “Caiye iye Jümenijicui majiéde javu majidivubu ñija”, arí dápiaríduyavü

muja. Aru, “Caiye iye Jümenijicui jjúroede javu cüvarivubu ñija”, arí dápiaríduyavü muja. Que baru caride “Iye majié Jümenijicu jie caiyede cüvarivubu ñija”, ubenina arí dápiadavü muja. “Me cüvívubu ñija Jümenijicunque”, ubenina arí dápiadavü muja. “Ñija jabovatamu, apevu Jümenijicui põevare cõjeivü”, ubenina arí dápiadavü muja. Que baru ñujare ámeina jári bojecubevure jaruvadavü muja. Muxe jáve cõjenu, meajebu ñujare. Ñija máre yóvajebu mujare muxe jaboteiyede, cüvarãjivu Jümenijicui mearo ðacaiyede mujaque.

⁹ Ubenita ji dápiainoi, Jümenijicu epeibi ñujare, Jesú daroimarare coyucarãjivu ñi yávaiye méne, caivu apevu ne cãchinocavure. Cüvívubu ñija yópe jabovai buoimara ne boarí jaruvarãjimarape. Caivu ijãravucavu, ángeleva aru põeva máre, jáðama ñuje ñájiyede yópe ámeina teivure.

¹⁰ Ijãravucavu Jesúre ju abevu, “Majibema na, ubenina coyuvü”, adama ñuje borore, Jesú daroimarare coyucarãjivu ñi yávaiye méne. Ubenita mujacarpüravu “Jesucristo caiyede coreóvare ðaibi ñujare”, arí dápiadavü, ubenina dápiavüvacari. Ñujacarpüravu bueni majibevu paruéque. Ubenita mujacarpüravu “Paruéque bueivubu ñija”, arí dápiadavü, ubenina dápiavüvacari. Aru mujatamu põeva ne pueðaimara. Ubenita ñujatamu ne ámeina jáimara.

¹¹ Que baru javede aru caride máre, cainumua ñájivubu ñija. Ávue ijvivaivu ñujare. Cüiñóvaivu ñujare. Cuitótecajea javvaivu ñujare. Ñuje mauva pare ñájiovaivubu ñujare. Aru cüvavevu ñije cüramiva. ¹² Memevaivubu ñije puuáque pu uetivuta, bojedarãjivu ñuje arajiyeva. Põeva ne ámeina yávaiyede ñujare, “Majepacu mearo ðacajacurí mujare”, ávaivubu náre. Põeva ne ñájine ðaiyede ñujare, napivaivubu ñija. ¹³ Põeva ne borocurí ámenore coyuiyede ñujare, copu mearore coyuvvaivubu náre. Ne dápiaru, jaruvaiyere paivubu ñija. Ye bojecubevure paivure jávaivubu ñujare.

¹⁴ Caiye iye ñaje ñájiyede ji toivaicōjeiyede apesure mujare toivaicōjemevu cuyoje tede ñacuyu mujare. Quénora toivaicōjeivū ñre diede, majiacayū muja ji umarare, jímarape paivure. ¹⁵ Muja cūvarivuvacari obedivū baju bueirpōevare, cūinācu quécura, yure, cūvarivubu mujepacupe, ji búre ñaiye boje muje cuede Jesucristoque cūinávure, mamarumure ji coyuiye boje mujare ñi yávaiye méne. ¹⁶ Que baru parurōreca jēnāivū mujare: Ñajarā yópe ji ñaiyepe.

¹⁷ Que baru Timoteore jaroivū muje yebai. Éme jímacupe páyu, ji umu, ñi cue boje Jesucristoque cūinávure, ñajocabecūva ñi ju aiyede ñre. Árure ñacuyume mujare aipe ji ñaiyepe, ji ju aipe boje Jesucristore. Aru cainumua ñaiyu yū yópe ji ñaicōjeiyepedeca ji bueiye caivū Jesúsre ju aipōeva cójijivavure cainore.

¹⁸ Apevu mujacavū arī ñariariduyama ñumecuyureca yū muje yebai, ji jidúe boje. Que baru, “¿Majidivū bárica ñaja?” arī ñariadama na, ne ñariariduiye boje yū soyubecunucuyure náre, ne ámeina yávaiye báque boje yure. ¹⁹ Ñbenita maje jabocu ñi uru, jáve ñucuyumu muje yebai maumejiena. Ji eaiyede nore, jácuyumu ne ñaiyede, ina ñbenina arī ñariaridivū ne baju majidivū. Jácuyumu ne ñaru majiéque, o quénora majidivure tedu ne yávaiyeque. ²⁰ Maja Jūmenijicūi jabodaimara teni buojabenamu maje yávaiye boje o apesūi yávaiye boje máre. Quénora Jūmenijicūi jabodaimara teni buojadavū maje ñaiye boje yópe Jūmenijicūi urōpe ñi parúeque. ²¹ ¿Ji eaiyede muje yebai, aipe ñaji? Muje ñare ñuru yópe muje ñaiyepe caride, mujare jararī ñájiñe ñacudacuyumu. Ñbenita oatvaru muje ñaiyede, ñarājivū yópe Jūmenijicūi urōpe ñi parúeque, mujare jácudacuyumu ji ñeque, meacu ñumure.

Aipe ñaiye jarurōre Jesúsre ju aipōeva cūinācu nácasu ñi ámeina ñaiye boje nomióque
(Gá 5.9)

5 ¹ Jápiaicacu yū, “Ámeno baju ñaiyeva cūinācu Jesúsre ju aipōecu

Corintocacu”, pōeva ne coyavarede yure. “Cūbiya jípacūi márepaco bajuque”, ávaivubuya. Pūeno baju ámenotamuno. Que baru ina Jūmenijicure ju abevuvacari pare ñbema pōeva ne ñaiyede yópe ñi ñaiyepe. ² Cūinācu mujacacu nópe ámeina ñayuvacari, mujacapuravu “¿Meara márica ñaja, me curivū Jūmenijicūique?” ñbenina arī ñariavaivubuya. Ñbenita chōiye baju jauteavū mujare, ñi ámeina ñaiye boje. Muja chōivū baru, ñai nópe pūeno ámeina ñayure jaetovajebu muja muje cójijinore jocarī. ³ Yúcapuravu cubevū mujaque caride. Ñbenita ñariavū yū ji űmei yópe cūjurocupe mujaque. Aru jave coreóvavū yū ji űmei aipe ñaiye jarurōre mujare. ⁴ Muja Jesúsre ju aipōeva muje cójijiyede, muje majié boje ji ñariainore, yū yópe cūjurocupe cūquijivū mujaque. Aru muje cójijiyede, maje jabocu Jesucristoi parúe máre cūquiyebu mujaque. ⁵ Dinumure mujare jíccōjecuyumu ñai űmure abujuvai jabocu Satanáre. Que teni, ñre coatede ñari apesūi Jesúsre ju aipōevare jaruravū, ñre ñajocarī, Satanás ñi ñacuiyepes ayū űque yópe ñi urōpe, coreóvarī buojacuyume ű ñi ámeina teiyede. Que teni chōiri ñi ámeina teiyede, ñajocarī ñi ñaiyede yópe ñi baju ámeina ñaiyepes, meadaimu macuyume maje jabocu Jesucristoi copaidaquiyede.

⁶ “¿Meara márica ñaja?” arī ñariavū jaubevū mujare. Yópe pōeva ne arī cómajiyepes, “Quíjje páure bucure ñaiyepes caino jívaibo bucúvoino mávu”. ¿Diede coreóvabenaru muja? Nopedeca cūinācu ñi ámeina ñaru, apesūi máre űque cójijivū ámeina ñarājarama űpe. ⁷ Que baru, “Apevu mujacavū ñi ámeina ñaiyede jári, űpedeca ñaiyurājichuma” arī, jaetovajarā ñre muje cójijinore jocarī. Yópe judíovai Pascua torojave tenajiyepes jípacai, ne jaruvaiyepes caiye iye páure bucure ñaiye javequede, nopedeca jaruvajarā ñre mujare jocarī. Yópe judíovai ñaiyepes páure bucure ñaiye cubeque Pascua torojave teijaravare,

ovejajícure boaríburu yóboi, nopedeca cure nujara muja meara matuiye, yópe muje cuepe caride, ámeina dayu cubecuva muje jéneboi, Cristoi jave yaiye báque boje. Yópe ne ovejajícure boaiyepe ne ámeina teiye boje, Jümenijicui ñájine ðabequiyeye aivu náre, ne ámeina teiye boje, nopedeca Cristore boarí jaruvarejaquemavu maje ovejajícure páyure, maje ámeina teiye boje, Jümenijicui ñájine ðabequiyeye aivu majare, maje ámeina teiye boje. ⁸Que baru maja Jesúre ju aipöevare caiye maje ðaiye jauvu ye ámeina ðabeni, apevure máre ðare ðaiyubevuva aru ye ámeina dápiabeni apevure, náre ámenore ðaiyubevuva máre. Quénora ámeno cubevuva aru mearore dápiarí, ðarí cõmajini yópe maje dápiayeye ðaiye jauvu majare.

⁹Jipocare ji toivaicõjeiye báquede apesure paperayocare, mujare yóvaicõjemetecacu ina ámeina ðavure apevque némarebucuva ámevque. ¹⁰Ji nópe toivaicõjeiye ðre, coyubetecacu muje ðaiyede ina Jesúre ju abevque. Obedivu pöeva ijáravucavu Jesúre ju abev ámeina ðavubu apevque némarebucuva ámevque. Aru áujini, apevure jujovarí ívubu ne cavaede. Aru ñavacurívubu. Aru pépeimarare mearore jívubu máre. Muje náre yóvabenajiyeye aivu, etaiye jaujebu mujare ijáravure jocarí. Muje Jesúre ju abevque ðabedu, ye cubequiyebu muje cújurogöre. ¹¹Quénora ji toivaicõjeiye báqueque apesure yópe ayutecacu yu. Ácu pöecu majacacu ñi aye boje “Jesúre ju ayubu yu”, ðbenita ñi ámeina ðarí cõmajidu, yóvabejará ðre. Ácu pöecu ámeina dayu apesque jímarepaco ámeocoque, aru áujíñu jujovarí íñu apevu ne cavaede, aru pépeimarare mearore jíyu máre, Jesúre ju aríduru, yóvabejará ðre. Ácu pöecu borocurí ámenore coyuy apevure, aru pacoteyu, aru ñavacucu máre, Jesúre ju aríduru, yóvabejará ðre. Pöecu ðre páyunque ye ámejara áiyede. ¹²⁻¹³Ina Jesúre ju abevu ne ðaiyede jári, corevarí coyubevu ju

mearore o ámenore. Jümenijicurecabe coyucuyu náre ne ðaiyede mearore o ámenore. ðbenita mujacapuravure jári, corevarí coyuiye jauvu ina Jesúre ju aivu ne ðaiyede mearore o ámenore. Que baru jaetovajará ñai ámeina ðayure muje cójjinore jocarí.

Jümenijicui pöeva ne jaraiyede ne bajumia coyuiye jauveno ámeina teivure jëniari jáipöeva Jümenijicure coreóvabevu ne jivateinoi

6 ¹Cüinácu mujacacu Jesúre ju aipöecu jarayu baru apesu Jesúre ju aipöecure, coyuiye jauvu ðre diede Jümenijicui pöeva ne jivateinoi, ne meadarájiyeye ayu diede. Jáve coyuiye jaubev ðre ámeina teivure jëniari jáipöeva Jümenijicure coreóvabevure ne jivateinoi. ²Jáve maja Jümenijicui pöeva jëniari járiburu yóboi caivu ijáravucavure aipe ne ðaiyede, coyurájaramu mearore o ámenore Cristoi jabotequiyede. ¿Diede coreóvabenaru muja? Aru mujacapuravu coyurájivu baru mearore o ámenore caivu ijáravucavure muje jëniari járiburu yóboi aipe ne ðaiyede, jáve jëniari járiburu yóboi coyurí buojaivubu muja mujevure ne majiéda jaraiyede ne bajumia, meadarájivu diede. ³Jáve maja Jümenijicui pöeva ángelevareca máre jëniari járiburu yóboi aipe ne ðaiyede, coyurájaramu mearore o ámenore. ¿Diede máre coreóvabenaru muja? Que baru pueno baju jáve jëniari járiburu yóboi coyurí buojaivubu muja ijáravuque majiéda jaraiyede, meadarájivu diede. ⁴Que baru muje jaraiyede muje bajumia, coyuránuiye jaubev muje diede ámeina teivure jëniari jáipöeva Jümenijicure coreóvabevu ne jivateinoi. Nárecabu Jesúre ju aipöeva ne pueðaimara quíjino baju. ⁵Toivaicõjeivu apesure diede, cuyoje tede ðacuyu mujare. “¿Majidivu bárica ñuja?” muja aríduivureca, mujacacu cüinájicu majicu cubebi, meadacuyu mujevu ne jaraiyede ne bajumia. Mujacacu majicu cüinácu cucu baru, ðre coyuiye

jaujebu mujare mije jaraiyede mije bajumia, ñi meadaquiyepe aivu diede.

⁶ Ìbenita pueno baju ámenotamu aru cuyojarótamu mije ðaino! Mija, Jümenijicui pöevavacari, jaraðavü mije bajumia, aru coyuyavü diede ámeina teivure jëniari jáipöeva Jümenijicure coreóvabevü ne jivateinoi.

⁷ Mije coyuyue boje mije bajumia jaraiyede apevu ne jivateinoi, coreóvaivu yu ðabevure yópe Jesucristoi bueiye báquepe. Que baru vaini tuivubu mija mije ðaiyeque. Apevure ámenore ðaicöjeiye jauvu mujare coyubevüva. Aru apevure mije cüvaede ícöjeiye jauvu mujare jocarí máre coyubevüva.

⁸ Ìbenita mujacapuravu ámenore ðaðavü aru ñnavu apevu ne cüvaede náre jocarí. Aru mujevü, Jesúre ju aipöevavacari, nárecabu mije ámedaimara.

⁹ Jáve pöeva cömajivu ne ámedaiyede Jümenijicui jaboteimara ámenajarama. ¿Diede coreóvabenaru mija? Mije bajumia apesure jujoaicöjemejara. Ina pöeva ámeina ðaivu apevuque némarebücüva ámevuque, aru ina pëpeimarare mearore jívü, ina ámeina ðaivu apevuque némarebücüvare jarüvarí, ina ümüva nomivape ðaivu aru ina ümüva máre ðaivu apevu ümüvaque yópe ne ðájuroepe nomivaque, caivu ina Jümenijicui jaboteimara ye ámenajarama. ¹⁰ Aru ina ñavacurivu, ina áujivu, ina pacoteivu, ina borocurí ámenore coyüivu apevure, aru ina jujovarí apevure ívu ne cüvaede máre, caivu ina Jümenijicui jaboteimara ye ámenajarama. ¹¹ Aru apevu mujacavu inape paivu batequémavu mije Jesúre ju arájiye jipocare. Ìbenita yópe pöeva ne jarüvaiyepes docücüede ne joaiyede, nopedeca Jümenijicu jarüvarejaquemavu mije ámeina teiyede. Majare coavarí úre ju abevure jarüvarí, mearape ðarí, epedejaquemavu majare ñi pöevava. Aru boropatebevüpe ðarejaquemavu majare ñi jáinore. Caiye iyede ðacarejaquemavu Jümenijicu majare mije jabocu Jesucristo parücüque aru ñai Espiritu Santoque máre.

Meadaíye jauróre maje bajure Espiritu Santoi cüe boje majaque aru maje cüe boje Jesucristoque cüinávüpe

(Mt 19.5; 1 Co 3.16, 10.23; 2 Co 6.16)

¹² Yópe ávaivübuya apevu Jesúre ju aipöeva. “ðaicöjeiyede ðaiye jaubevü majare. Que baru caiyede ðaicöjeimümu yu”, ávaivübuya apevu. Jávetamu. Ìbenita apede maje ðaru, meamejebu majare o apevure máre. Yu caiyede ðaicöjeimüvacari, yúcapüravu yebacacupe teiyubevü ji ðaiyue boje apede. ¹³ Aru yópe máre ávaivübuya apevu: “Jümenijicu cüedarejaquemavu áiyede maje yapibu boje aru maje yapibure maje áiye boje”, ávaivübuya. Jávetamu. Aru Jümenijicu cüiné ðacüyume áiyede aru yapibure máre. Ìbenita cüedabedejaquemavu maje bajure maje ámeina tenajiyepes ayu apevuque majemarebücüva ámevuque. Qué Nora maje bajure cüedarejaquemavu, maje memecarájiyepes ayu maje jabocu Cristore. Aru cure ðarejaquemavu maje jabocu Cristore majaque cüinávüpe, maje baju jívü. ¹⁴ Yópe Jümenijicui nacovaiyepes báquepe maje jabocu Jesucristoi baju bácaróre yainore jarüvarí ñi parüéque, nopedeca majare máre maje bajure nacovacüyume ñi parüéque.

¹⁵ Jáve mije bajubu yópe Cristoi bajucaröpedeca. ¿Diede coreóvabenaru mija? Que baru yópe apeno Cristoi bajucaröpe ñni, coavaiyepes ñi bajure, ye ðayu buojabevü yu nomío ámeoque, cüináco öi bajure bojedado ámeina ðacodo ümüvaque. ¡Aipinümu ðabecübu yu nópe! ¹⁶ Jáve yópe teyübe ñai cücu nomío ámeoque. Ne bajuá jëori, cüinávüpe teivübu na. ¿Diede coreóvabenaru mija? Yópe arí, toivaicöjenejaquemavu Jümenijicu: “Ina pücará cüinávüpe tenajarama na”, arí toivaicöjenejaquemavu. ¹⁷ Aru quédeca ñai ju ayu maje jabocu Jesucristore cüinávüpe teibi úque ñi ümei.

¹⁸ Cainüma ámeina ðabejará apevuque mujemarebücüva ámevuque.

Ape ãmeina teiye die pñeno pñecu ñi bajure ãmedabevu. Ubenita diede ðayu baru, ñi bajure ãmedaibi. ¹⁹ Jãve ñai Espírиту Santo cucube maje baju jívui. Que baru maje bajubu yópe Espírиту Santoi cñramipe. Jñmenijicvacari darorejaquemavu ùre, ñi cñquiyepe ayu majaque. Que baru majavacari majare uparivu ãmevu aru ðaicõjemevu maje bajure. Quénora ñai Espírиту Santorecabe majare upacu aru ðaicõjeñu maje bajure. ¿Diede coreóvabengarú mña? ²⁰ Jñmenijicu ñni bojedarejaquemavu majare. Que baru caiye mñje ðaiyede mñje bajuque pueðajarã Jñmenijicure. ðaicõjeimara ãmevuvacari, mñje pueðaiye boje Jñmenijicure, me ðajarã mñje ðaiyede mñje bajuque.

Pablo ñi majicaino pñubuoivure aru pñubuoebvure máre

(Mt 5.32, 19.9; Mr 10.11-12; Lc 16.18)

7 ¹ Caride coyuqijivu iye jñnari jãiyede mñje toivaiye báquede yure paperayocaque. Pñecu ñi pñubuoobedu, meajebu. ² Ubenita obedivu pñeva ne ãmeina ðaiyue boje arevñque némarebucava ãmevñque, caivu ùmva coapa cuvajarãri némarepaco bajuva aru quédeca caivu nomiva coapa cuvajarãri némarepacu bajuva máre. ³ Ñai nomicucu ðajacurí cainmña yópe ùre jauépe, me cucuyu jñmarepacoque. Aru quédeca ico ùmucuco ðajacorí cainmña yópe óre jauépe, me cucodo jñmarepacuque. ⁴ Ñai nomicucu jñmarepaci baju jñnotamu, ñi corequiyepe aino nore. Que baru ico ùmucuco cñinácova òi bajure cõjememico. Aru quédeca ico ùmucuco jñmarepacu baju jñnotamu, òi corecojiyepe aino nore. Que baru ñai nomicucu cñinácova ñi bajure cõjememi. ⁵ Que baru mña, pñubuoivñ, nomicucu ñi ðaiyuru yópe pñubuoivñ ne ðarí cõmajiyere, “Ubevñ yñ”, abejacorí jñmarepaco. Aru ùmucuco máre òi ðaiyuru yópe pñubuoivñ ne ðarí cõmajiyere, “Ubevñ yñ”,

abejacurí jñmarepacu. Quédata ina pñcarã cñináturu ne ùme, “Maje ðarí cõmajiyede ðajocarãjarevñ apejãravñare, jñniarajivñ majepacu Jñmenijicucue”, arí coyvñvñ baru, ðajocarí buojaivñbu diede. Aru ðijãravña “apejãravña” ne aijãravña vainíburu yóboi, bedióva cojedeca ðajarãri yópe ne ðarí cõmajiyepedeca, ñai abujuvai jabocu Satanás ñi ãmeina ðare ðabequiyepe aivñ náre arevñque némarebucava ãmevñque, ne cõjeme boje ne baju ðaiyuróre ùmñ nomióque aru nomió ùmñque máre.

⁶ Iye pñubuoiyede ji coyvñyede mñjare, “Pñeva pñubuoivñvñvñ baru, pñubuoorí buojaðama na”, arí coyvñyubu yñ. Ubenita pñevare “Pñubuojarã”, abevñ yñ. ⁷ Caivu ne pñubuoobedu, yópe ji pñubuoobepedeca, meajebu ji dápiaru. Ubenita Jñmenijicu majide ðaibi majare coapa bojecubeda ñi majicãróre, maje caðatenajiyere ayu arevñre. Aru epeibi majare coapa maje ðarãjiyede ijãravñi. Que baru arevñ majacavure epeibi ne pñubuoarãjiyere ayu aru arevñre epeibi ne pñubuoebenajiyere ayu.

⁸ Caride coyuqijivu ina pñubuoebvure aru ina nomiópevare. Meavñ mñjare mñje cñru yápe, pñubuoebvñva. ⁹ Ubenita nácapñravñ cõjeni buojabevñ baru ne baju ðaiyuróre ùmñ nomióque aru nomió ùmñque máre, pñubuojarãri na. Métamu ne pñubuoivñ ne ñãjiye pñeno, ne nomicube boje o ne ùmucube boje.

¹⁰ Aru caride coyuqijivu ina pñubuoivñre. Yópe ðaicõjeivñ mñjare: Nomio ùmucuco jaruvabejacorí jñmarepacure. Aru yñvacari ãmevñ nópe ðaicõjeñu. Quénora maje jabocu Cristovacari nópe ðaicõjenejaquemavñ.

¹¹ Ubenita ñi jaruvãicõjemeneca, apoco jñmarepacure jaruvãdo baru, pñubuoebjacorí ò arecñque. Cñinácova cñjacorí ò, o meaðaríburu yóboi copainñjacorí jñmarepacu yebai. Aru ùmñ nomicucu máre quédeca jaruvabejacurí jñmarepacore.

¹² Aru caride coyuqijivu arevñ mñjacavure. Iyede maje jabocu

Cristovacari coyubedejaquemavũ; ubenita yũre coyũicõjeimi. Jesũre jũ aipõescu nomicũcu jĩmarepaco Jesũre jũ abecore cuvaco baru, aru õcapũravũ ẽque õi cure nuĩyũru, jãve õre jarũvabecarĩ ẽ. ¹³Aru Jesũre jũ aipõeco ẽmũcũco jĩmarepacũ Jesũre jũ abecure cuvaco baru, aru ẽcapũravũ õque ẽi cure nuĩyũru, jãve ẽre jarũvabecarĩ õ. ¹⁴Mũja Jesũre jũ aipõeva cũĩnãvũpetamu Jesucristoque mũje ẽmei. Aru mũjemarebucũvaque mãre cũĩnãvũpetamu mũje bajuĩ. Que baru Jũmenijicũ me jãũme nomicũcu Jesũre jũ abecure, ẽi cũe boje jĩmarepaco Jesũre jũ aipõecoque. Aru Jũmenijicũ me jãũme ẽmũcũco Jesũre jũ abecore, õi cũe boje jĩmarepacũ Jesũre jũ aipõescuque. Die jãve ãmenu, Jũmenijicũ mũjemarare me jãmejebu. Ɛbenita nãre mãre me jãũme ẽ. ¹⁵Jũmenijicũ cutuibi majare, maje curãjĩyere ayũ carĩjĩmenoque. Que baru ina Jesũre jũ abevũcapũravũ mauteiyũbevũ baru nẽmarebucũva Jesũre jũ aivũque, ne jaraiye boje ne baju, jarũvajarãri nãre. Ɛbenita nomicũcu Jesũre jũ aipõescu cuvacu jĩmarepaco Jesũre jũ abecore o ẽmũcũco Jesũre jũ aipõeco cuvaco jĩmarepacũ Jesũre jũ abecure, curãrãri nãque, ne nõpe uru. ¹⁶Que baru ne mautedu cũĩnãturũ, meaquiyebe, ñai jũ abecu o ico jũ abeco ne jũ aru Jesũre, ne cũe boje Jesũre jũ aipõecoque o Jesũre jũ aipõescuque jãravũ coapa. Mũ, ẽmũcũco, Jesũre jũ are ñacõjichũvũ mimarepacure, Jũmenijicũ meadaquiyepe ado ẽre. Ɛi jũ aqũiyede o ẽi jũ abequiyede majibevũ mũ. Aru mũ, nomicũcu, Jesũre jũ are ñacõjichũvũ mimarepacore, Jũmenijicũ meadaquiyepe ayũ õre. Ɛi jũ acõjĩyede o õi jũ abecoĩyede majibevũ mũ. ¹⁷Quẽnora cure mũjarari caivũ, ñarĩ yõpe Jũmenijicũ epeiye bãquepe nãre coapa, ne ñarãjĩyere ayũ, ẽi cutuquiye jipocamia nãre ẽ jina mãrajĩvũva. Nõpe bueyũbu yũ caivũ Jesũre jũ aipõeva cõjĩjivaivũre. ¹⁸Ñai põescu buraicõjeũ mãcu baru

ẽi cajede, yõpe judĩova ne ñaiyere, Jũmenijicũ cutuquiye jipocamia ẽre, oatũvabenidujacurĩ iye buraiye bãquede. Aru ñai põescu buraicõjemescu bãcu baru ẽi cajede, yõpe judĩova ne ñaiyere, Jũmenijicũ cutuquiye jipocamia ẽre, buraicõjemenidujacurĩ ẽi cajede. ¹⁹Ye baju ãnevũ buraicõjenu o buraicõjemenu maje cajede. Maje jũ aiye Jũmenijicũ ñaicõjeiyede, diedecabu majare jaũẽ. ²⁰Caivũ curẽ mũjarari yõpe ne curẽpedeca, Jũmenijicũ cutuquiye jipocamia. ²¹Que baru mũ apescu ẽi yebacacu bãcu baru Jũmenijicũ cutuquiye jipocamia mũre, carĩjĩmejacu die mi yebacateiye boje. Ɛbenita mi jabocu ẽi jõdeiyũru mũre, etajacu ẽre jocarĩ. ²²Ñai põescu apescu yebacacu bãcu Jũmenijicũ cutuquiye jipocamia ẽre, jõdeimũ mãcũpe pãyũbe Jũmenijicũ jãĩnore, ẽi cũe boje Jesucristoque cũĩnãvũre. Aru quẽdeca ñai põescu apescu yebacacu ãmescu bãcu Jũmenijicũ cutuquiye jipocamia ẽre, Jesucristoĩ yebacacũpe pãyũbe Jũmenijicũ jãĩnore. ²³Jũmenijicũ ñni bojedarejaquemavũ majare. Que baru apẽvũre yebacavũpe tede ñaicõjemejara mũjare, mũje ñaiye boje yõpe ne bueiye jãve ãmẽpe. Quẽnora ñajarã yõpe Jũmenijicũ urõpe. ²⁴Mũja, jĩvũ, caivũ curẽ mũjara Jũmenijicũ jãĩnore yõpe mũje curẽpedeca, ẽi cutuquiye jipocamia mũjare.

²⁵Caride coyũqũjivũ ina nomiva ẽmũcũbevũre carẽja. Maje jabocu Jesucristo coyubedejaquemavũ aipe ñaiye jaũrõre nãre. Ɛbenita yũre cõmajẽ ãroje jãri, beorĩ epedejaquemavũ ẽi yãvaiye mẽne coyũicõjeimũva. Que baru cainũmũa coyũyũbu yũ ẽi yãvaiyede ñajocabecũva aru oatũvabecũva diede mãre. ²⁶Ji ñapĩaru, meavũ ina ẽmũcũbevũre carẽja ne curẽde pũrũbũobevũva, põeva urarõ ne ñãjĩye boje ne curẽde ijãravũ, aru Jesũre jũ aipõeva pũeno baju ne ñãjĩye boje. ²⁷Mũ nomicũcu baru, mimarepacore jarũvabecacu. Aru mũ nomicũbecũ baru, pũrũbũobecacu. ²⁸Ɛbenita mũjare ji

pɾɨɾbɯoicɔjemeneca, mɨ pɾɨɾbɯoɨɯ baru, ãmedabejebu. Aru nomíó máre pɾɨɾbɯodo baru, ãmedabejebu. Æbenita ina pɾɨɾbɯoivɨ ñájinajarama pare ijãravɨ ina pɾɨɾbɯobevɨ ne ñájiye pɾeno. Aru yúcarpúravɨ mujare vaibéde ðaiyurídujebu iye ñájiyede.

²⁹Muja, jívɨ, ji nópe coyuiyede yópe aiyvɨ yɨ. Obebejua curívɨɨ maja ijãravɨ, memecarãjivɨ Jesúre. Que baru carimata ina nomicurívɨ memecajarãri Jesúre cainɨmɨ ne oainope, yópe nomicubevɨ ne ðaiyepe. ³⁰⁻³¹Caiye ijãravɨque b́jare nɨivɨ. Aru ijãravɨ cūiquíyebu. Que baru ina oivɨ, yópe obevɨpe ðajarãri na. Ina torojvɨ teivɨ, yópe torojvɨ tebevɨpe ðajarãri na. Ina cvede ñni bojedavɨ, yópe cve cɨvabevɨpe ðajarãri na. Aru ina cve cɨvarívɨ ne íye boje ijãravɨquede, yópe diede ñmevɨpe ðajarãri na. Que baru obejarãri, torojvɨ tebejarãri, ñni bojedabejarãri, aru cvede ñmejarari máre. Que ðavɨ baru cainɨmɨ, oabejebu memecaivɨ Jesúre. Quéhora memecajarãri úre cainɨmɨ. ³²Diede coyɨvɨɨ mujare, ji ɨe boje muje cãrijimenajiyepɨ ayɨ.

Ñai nomicubecɨrecabe dápiayɨ maje jabocɨ Jesucristo jiede aru memecayɨ úre caiye ñi úmeque aru caiye ñi parúéque, ñi torojvɨ ðaiyɨe boje maje jabocɨ Jesucristore. ³³Æbenita ñai nomicucɨrecabe dápiayɨ pare ijãravɨquede aru memɨñ ñi parúéque, ñi torojvɨ ðaiyɨe boje jímarepacore. ³⁴Que baru yópe coavaimɨpe páyabe ñ ñi úmei. Torojvɨ ðaiyuríduibi jímarepacore aru maje jabocɨ máre. Aru quédeca ico ñmucubecorecabe dápiado maje jabocɨ Jesucristo jiede aru memecado úre cūinácɨra caiye ði úmeque aru ði bajuque máre. Æbenita ico ñmucucorecabe dápiado pare ijãravɨquede, ði torojvɨ ðaiyɨe boje jímarepacore. ³⁵Nópe coyɨvɨɨ, ji cadateiyɨe boje mujare. Yebacavɨpe ðaiyubevɨ mujare, pɾɨɾbɯoicɔjɨni o pɾɨɾbɯoicɔjemeni mujare. Quéhora mujare memecare ðaiyvɨɨ maje jabocɨ

Jesucristore cainɨmɨ, caiye muje úmeque aru caiye muje parúéque máre, muje ðarãjiyepɨ ayɨ mearore yópe ñi ɨgɾe cainɨmɨ.

³⁶Ëmɨ, nomíó máre “Pɾɨɾbɯorãjaramu ñija”, aivɨ b́cavɨ baru, aru ñai ñmɨ “Ðabevɨ yɨ yópe yure javépe ñaje pɾɨɾbɯobe boje”, arí dápiayɨ baru, ico nomíó ði bɨcɨteiyɨe báque boje javede aru ñai ñmɨ ñi pare cɨvayɨe boje óre, ðajacurí yópe ñi ðaiyepɨ. Pɾɨɾbɯojarãri na. Pɾɨɾbɯovɨ baru, ãmeina tebenama na. ³⁷Æbenita ñai ñmɨ, me majicɨ baru ñi úmei aipe ðaiyɨe javróre, aru apɨcɨ cɔjeimɨ ãmɨcɨ baru, aru ñi me cɔjɨni bɯojayɨ baru ñi baju ðaiyɨróre nomíóque, ðajacurí yópe ñi ðaiyepɨ. Pɾɨɾbɯobejarãri na. Quéhora cɨjacorí ñi yurimacope. ³⁸Que baru ñai ñmɨ pɾɨɾbɯoɨɯ baru ñi yurimacomaque, mearore ðaibi. Æbenita ñai ñmɨ pɾɨɾbɯobecɨ baru ñi yurimacomaque pɾeno baju mearore ðaibi.

³⁹Nomíó ñmɨcɨcɨ cɨjacorí jímarepacuque ñi apúede cãreja. Æbenita ñi yainíburu yóboi, pɾɨɾbɯoivɨcɨ baru apɨcɨque, pɾɨɾbɯojacorí. Æbenita jímarepacɨ bacuyú Jesúre ju aipóecɨ bajacurí. ⁴⁰Ji dápiaru, nomíópeco pɾɨɾbɯobeco baru, torojmɨcɔdome nomíópeco pɾɨɾbɯodo pɾeno. Aru yɨ coreóvaivɨ Jūmenijicɨi Espírítu Santo dápiacɔjeñure yure.

Pablo ñi majicaino ãiyena póeva ne jíye báquede pēpeimarare
(Mt 25.45; Jn 1.3; Ro 11.36; Ef 4.6; Col 1.16)

8 ¹Caride coyquijivɨ iye jēniari jáiyede muje toivaiye báquede yure paperayocaque ãiyena póeva ne jíye báquede pēpeimarare, mearu o meamenu muje ãiyede diede. “Coreóvaivɨɨ ñija ãri bɯojavure ãiyede ne jíye báquede pēpeimarare, pēpeimɨ parube boje”, toivacube cūinácɨ mujacacɨ. Jãvetamu. Caivɨ maja diede coreóvaivɨ. Æbenita iye muje coyuiyede muje coreóvaiyede

pēpeimarare aru pōeva ne jýyede náre cārijivū yū. Mūja coreóvaivuvacari diede, “¿Meacu bārica yū apevū pueno?” arī dāpiabejarā mūja. Aru āmejara diede, dāpiabevūva apevū Jesúre ju aipōeva ne dāpiaiyede. Āivu baru náre dāpiabevūva, náre ũbevū mūja. Ūbenita meavū mūje ũru apevūre caiye mūje coreóvaive pueno. Pōescu ũcu apevūre, náre cadateibi, ne parūre nurājiyere ayū ne ũmei cainumūa. ²Que baru ñai pōescu “Caiye iye pēpeimara jiede coreóvaivū yū”, ũbenina āri dāpiayū, jāve me coreóvabebi cāreja diede yópe coreóvaive jaurōpe ũre. ³Ūbenita pōescu Jūmenijicūre ũru, Jūmenijicūvacari coreóvaibi ũre, aru me jāimi ũre. Ñai pōescu apevūre ũcu máre, jāve ũrecabe me coreóvaivū.

⁴Aru iye mūje jēniari jāiyede āiyena ne jýye báquede pēpeimarare yópe coyuyūbu yū. Caiivū maja majidivūbu iyede: Pōeva Jūmenijicūre coreóvabevū, “Pēpeimara jádovadama aipe ārojarivūre jūmenijinare. Aru ne paruéde cuvārivūbu”, ũbenina āri dāpiađama. Ūbenita jūmenijina ne jáđovaimara āmevū pēpeimara. Jūmenijicū cūinácūra cūbi, ñai Jūmenijicū. ⁵“Obedivū jūmenijina cūma, apevū joborōcavū aru apevū máre cavarōcavū”, ũbenina arī dāpiađama ina pōeva Jūmenijicūre coreóvabevū. Que baru obedivūre “mū, Jūmenijicū”, ũbenina arī coyuyama. Aru obedivūre máre “mū, ñūje jabocū”, ũbenina arī coyuyama. ⁶Ūbenita majidivūbu maja Jūmenijicū cūinácū quécūra cūcūre. Ūrecabe majeracu. Ūvacari cūeđarejaquemavū caiyede. Aru majare cūeđarejaquemavū, maje đarājiyere ayū yópe ũi ũrōpe. Aru majidivūbu maja maje jabocū cūinácū quécūra cūcūre. Ūrecabe Jesucristo. Ūrecabe Jūmenijicūi caiyede cūeđare đaimū mácu. Aru ũvacari cūre đaiibi majare.

⁷Ūbenita apevū Jesúre ju aipōeva majibema cāreja Jūmenijicū cūinácū quécūra cūcūre. Quénora apevū mūjacavū cōmajivūbu pōeva ne

coyuiyede apevū jūmenijina ne borore. Que baru ne āiyede āimajiarūare pōeva ne jýye báquede pēpeimūre, “Apecū jūmenijicūre mearore jívū yū, ji āiye boje yore”, ũbenina arī dāpiađama na. Aru, “Meamejavū ji đaiye. Ye majibevū yū”, ne arī dāpiaive boje, parūbenama na ne ũmei. Que baru, “Boropateyūbu yū Jūmenijicūi jāinore”, arī dāpiađama na. ⁸Jūmenijicū majare me jāñū āmemei maje āiye boje o maje āme boje. Maje apede āmenu, Jūmenijicū āmeina jāmemei majare. Aru maje apede āru, Jūmenijicū me jāmemei majare. ⁹Maja āri buojaivūreca iye ne jýye báquede pēpeimarare āmeina tebevūva, me jājara mūja. Ina majibevū cāreja arī dāpiaivū baru mūja mearore jíde nuivūre pēpeimarare, aru “¿Mearica iye đaiye?” arī dāpiaivū baru, āmeina tejebu, ne jāiye boje mūja āivūre diede. ¹⁰Nácacu jāñū maru mūjare, majidivūre ũi dāpiarū, āivūre pēpeimūre mearore jíñami jívūi, jāve āiyucuyūme ũ máre iye āiyede, ne jýye báquede pēpeimūre. ¹¹Mūjacapūravū majidivūbu āmeina tebevūre mūje āiye boje. Ūbenita ũcapūravū arī dāpiaiyūbe āmeina teyūre ũi āiye boje. Que baru mūje majié boje, āmedađavū mūja ñai mūjecūre. Cristo yaidéjaquemavū ũre boje, ũi bñjabequiyere ayū. Ūbenita mūja bñjare nūre đaivūbu ũre. ¹²Que teni mūjecūre, Jesúre ju aipōecūre, āmeina tede đađavū mūja. Ūtame Jesucristo jicū. Que baru mūje āmedaiyede ũre, Cristo bajure máre āmedađavū mūja. ¹³Que baru jícū, apecū Jesúre ju aipōescu, ũi āmeina tedu ji āiye boje āimajiarūare, ye āmescuyūmū yū āimajiarūare bedióva cojedeca, āmeina tede đabecuyū ũre.

Pablo ũi jáđovaino ũi đaiyeque aipe đaiye jaurōre

(Mt 10.10; Lc 10.7; Hch 9.3-6; Ro 15.27; 1 Co 15.8; Gá 1.11-16; 1 Ti 5.18)

9 ¹Jāve yūvacari apecū pōescu yebacacu āmevū. Jāve yūvacari Jesús ũi yāvaiye méne beorī coyuićojeimūmu. Jāve yūvacari

járejacacu maje jabocu Jesúre. Aru jáve yúvacari ñacacu méne Jesús ñi ñaicójeiyede yure, muje ju aye boje ñi yávaiye méne aru muje cue boje ñique cūinávure. Que baru meajebu muje jídu yure jauéde, ji memecaiye boje mujare. Ñbenita yu yéde jēniamevu mujare cainumua. ²Apevu “Pablo Jesús ñi yávaiye méne beorí coyuicójeimū āmemei” ñbenina aivureca, mujacapuravu majidivubu yure Jesús ñi yávaiye méne beorí coyuicójeimure, muje ju aye boje Jesúre, ji coyuie báque boje mujare ñi yávaiye méne, ñi meadacaiyede pōevare. Que baru muje cue boje Jesucristoque cūinávure, jáđovari buojaiyu yu jáve Jesús ñi yávaiye méne beorí coyuicójeimure. ³Nópe coyuivaivu yu caivu ina āmecoroivure yure.

⁴Muja jápiaivu ji bueiye de Jesús ñi yávaiye méne, muje jídu yure āiyede aru ũcuiyede máre yópe bojedaiyepe ji memeinore, cadatecuyu mujare, meajebu. Jáve nópe ñaiye jauvu mujare. ⁵Aru ji cvaru Jesúre ju aipōeco jimarepaco bajurócore, yópe apevu Jesús ñi yávaiye méne beorí coyuicójeimara, aru ñujacacu Pedro máre, aru maje jabocu Jesucristoi yóva ne cūvaere, meajebu. Aru jimarepaco bajurócore cūvaru, yáque ō majurócore nūvaiye jaujebu yure aru jíye jaujebu muja jápiaivure ji bueiye de ō majurócore máre āiyede aru ũcuiyede. ⁶Muja jíyavū apevu Jesús ñi yávaiye méne coyuipōevare náre jauéde. Ñbenita Bernabé yámaque memecarā ñuje pūruáque, bojedarājivu ñujare jauéde. Jáve ñuja máre, yópe apevu Jesús ñi yávaiye méne beorí coyuicójeimarape, memeiye ñuje pūruáque jaubevū ñujare. Qué Nora muja jápiaivure ñuje bueiye de jíye jauvu ñujare jauéde.

⁷Churara cūbebi ñi baju āquiyede bojedayū. Aru jiore oteipōescu cūbebi ñi baju oteiyede būcūri buojari jēiyede āmecu. Aru oteiāmarare coreipōescu máre cūbebi ina āimara opecore jívu ne opecore ímecu. ⁸Iye ji coyuiyede mujare,

“Ñi baju arí dápiayede coyuubebu ñi”, abejarā muja. Pōecureca ñi arí dápiayede coyuubevū yu. Qué Nora yópe Jūmenijicu ñaicójeiyede ñi coyuie báquere Moisés bācure coyuubu yu. ⁹Yópe arí, Jūmenijicu toivaicójenejaquemavu ñi ñaicójeiyede ñi pōevare: “Ñai oteiāimacu ũracu memecayure mujare, buobejarā ũre ñi jījecamure, ñi āmequiyere aivu ñi cūocaiyedeca mujare muje oteiyabere ñi curaiyede diede”, arí toivaicójenejaquemavu. Ñbenita Jūmenijicu ñi nópe toivaicójeiye báquede, oteiāmarare quévura cōmaje āroje jámenejaquemavu. ¹⁰Qué Nora toivaicójenejaquemavu ñi ñaicójeiyede Jūmenijicure memecapōevare boje. Majarecabu ñi nópe arí dápiamara.

Jēvari coyuubu yu. Ñai jiore memeuñ, meadacacuyu jobore ne otequie jipocamia, coreyube, cūvacuyu ñi memeiye bojede, jēijāravū baquinó eaiyede. Aru ñai oteiyede ñi coreyube, cūvacuyu ñi memeiye bojede máre, jēijāravū baquinó eaiyede. ¹¹Que baru yópe oteipōescu oteiyere, ñuje coyuiyede muje yebai Jesús ñi yávaiye méne, ñi meadacaiyede pōevare, cadatenajivu mujare muje ũmei, jáve mujare jíye jauvu ñujare jauéde, muje cadatenajiyere aivu ñujare yópe muje bojedaiyepe ñuje memeiye de. ¹²Apevu Jesús ñi yávaiye méne coyuicójeimara eaiyu bācavu muje yebai mujare jícojenu náre jauéde, ne coyuie báque boje, jáve pūeno baju mujare jícojeiye jauvu ñujare jauéde, ñuje coyuirí buiye báque boje mujare diede mamarumure.

Ñbenita ñuja ye mujare jícojemevū ñujare jauéde, ñuje coyuie boje Jesús ñi yávaiye méne muje yebai. Qué Nora ñujacapuravu nariñavu caiyede, muje me jápiarājiyere aivu Jesús ñi yávaiye méne aru, “Ina íyurivubu náre jauéde ñujare jocarí, ne bueiye boje ñujare”, ñbenina muje āmecorobenajiyere aivu ñujare. ¹³Ñujacavu judíova Jūmenijicure memecaiyu ñi cūrami jívu jasoruyama ne ārajiyeva, ne memecaiye boje

diñamine. Ina ãimarare boaipõeva jínajivü na mácvare Jümenijicure üi cürami diva úre jícaiyede juaivai jacoruyama ina boaimara mácvüi jiaruaquede ne arãjiyeva, ne memeyiye boje. ¿Diede coreóvabenaarü müja?
 14 Quédeca maje jabocu Jesucristo üi yávaiye méne coyucaipõevare jacorwicõjeñume náre jauéde, ne coyuiye boje üi yávaiye méne. Que baru ina jápiaivure ne bueyede jícõjeñume náre jauéde. 15 Übenita yúcapüravü ye müjare jícõjemevü yure jauéde. Aru ye toivaicõjemevü apecure müjare caride, müje jínajiyere ayü yure jauéde. Quénora yaijurocubu yu jacorubecüva apejiene. Müjare jícõjeñü maru, “¿Meacu bária yu?” ye arí buojabejebu yu.

16 Yu ye coyubevü Jesús üi yávaiye méne ji coyuiyue boje diede. Quénora Jesucristo coyucõjeimi yure. Que baru ji coyuiyede Jesús üi yávaiye méne üi meadacaiyede põevare, “¿Meacu bária yu?” ye arí buojabevü yu. iÁmeno vaiquíyebu yure ji coyubedu Jesús üi yávaiye méne! Que baru diede coyuiye jañvü yure. 17 Diede coyuyü baru ji coyuiyue boje, torojüjebu yu. Aru ji torojue bájebu yópe ji bojede íyere. Übenita diede coyubevü, ji coyuiyue boje. Quénora diede coyuiye jañvü yure Jümenijicüi coyucõjeiye báque boje yure diede. 18 Ji bajumica ji coyuiyede Jesús üi yávaiye méne bojecubeda, torojure ðaivü yure. Yure jauéde jícõjeni buojayuvacari yure jápiaivure, náre ye jícõjemevü yure apejiene.

19 Yúcapüravü apesu üi yebacacu ãmecuvacari, yebacacure teyübu ji baju, põeva obedivü baju ne jápiarãjiyere ayü ji coyuiyede Jesús üi yávaiye méne, ne ju arãjiyere ayü úre, üi meadacaiyere ayü náre ne ãmeina teiyede jarüvarí, ne curãjiyere ayü me úque cainumua. 20 Ji cuede judíovaque, judíope teyübu yu, ne me jápiaiyurãjiyere ayü Jesús üi yávaiye méne, üi meadacaiyede põevare. Que teni ina ðaivü yópe Jümenijicüi ðaicõjeiyede üi coyuiye báquepe Moisés bácure, ne ju arãjiyere

ayü Jesucristore, yu máre ðayübu yópe iye ðaicõjeiyere ji cuede náque, diede ðaiye jaubedeca yure. 21 Übenita ji cuede judío va ãmevunque, nácacure teyübu yu, ne me jápiaiyurãjiyere ayü Jesús üi yávaiye méne, üi meadacaiyede põevare. Que teni ina ðabevü yópe Jümenijicüi ðaicõjeiyede üi coyuiye báquepe Moisés bácure, ne ju arãjiyere ayü Jesucristore, yu máre ðabevü yópe iye ðaicõjeiyere ji cuede náque, ðayuvacari Jümenijicüi ðaicõjeiyede Cristoi cõjeimu mae boje. 22 Aru quédecabu ina parubevure ne ümei, ne majibe boje cãreja ne ðaiye méne o ãmene Jümenijicüi jáinore. Ji cuede náque, nácacure teni, ne majibedu apejiene méne o ãmene, diede ðabevü yu, ne me jápiarãjiyere ayü Jesús üi yávaiye méne üi parure ðaiyede põevare ne ümei. Que teni caino ji nuinoi, buesuyü Jesús üi yávaiye méne, cainumua ðayübu yu nócvü ne ðaiyere, ãmenore ðabecüva, Jesúsüi meadaquiyepe ayü arevü nácavure. 23 Caiye iyede ðayübu yu, põeva ne me jápiarí ju arãjiyere ayü Jesús üi yávaiye méne, na máre yáque Jümenijicüi mearo ðacaimara marajiyépe ayü.

24 Jēvari coyuyübu müjare. Obedivü yajuiipõeva cüyavüvareca, no yajuino upacu bojede jícuyume cüinácu ina cüyavüvareca quecúra. ¿Diede coreóvabenaarü müja? Yópe caivü ina yajuiipõeva coapa ne me cüyaiyere, ne íyue boje no bojede, nopedeca caivü müja máre mearore ðajará müje cuede ijãravüi, maje jabocu Jümenijicüi jíquiyepe aivü boje méne caivü müjare coapa. 25 Ina yajuiipõeva ne cüyarájiye jipocai, me coreðama ne ðaiyede, ne íyue boje no yajuino bojede, jipobü adaitarabü laurel ãmicuriyocaque ðaitarabure, maume pojequitarabure. Que baru ina ívü ðitarabure torojurãjarama ðitarabüque quíjino baju, pü ðitarabü pojeiyeta. Übenita majacapüravü me jári coreivübu maje ðaiyede, Jümenijicüi jíquiyepe aivü majare üi boje méne pojebequiyepe cainumua. Que baru torojurãjaramu maja Jümenijicüi boje méque cainumua.

²⁶Que baru yábu nápe páyu, ina nurié cýaiyvu pu cýaiyma turúvaita. Yúcapūravvu nurié ðayvbu yópe Jūmenijicui urōpe ðajocabecuvva cainumma. Yábu nápe páyu, ina totarī pēvari yajuivvu, nurié totarī pēvari vainájivvu ne mavvare. Yúcapūravvu nurié ðayvbu, vaicýyu ji mavvare, ji memeiye ijāravvu bojecube āmequiyepe ayv. ²⁷Jēvari soyuyvbu mūjare. Yópe jara popeiyepe ji bajure, vbenita ji ūmene, ðayvbu yv, me corecuyv ji ðaiyede, Jūmenijicui jiquiyepe ayv yvre máre ūi boje méne. Meamejebu yure, Jūmenijicui ūi jíbedu yvre ūi boje méne, ji āmedaru apesv Jesús ju aipōesv majibecure cāreja méne aru āmene máre. Meamejebu yure, Jūmenijicui ūi jíbedu yvre ūi boje méne, ūi jíniburu yóboi ðiede apevvure, ūi meadacaimarare, ji bueiye báque boje náre Jesús ūi yávaiye méne.

**Pablo ūi majicaino Corintocavure
Israecavvú bácvavvú ne ðaiye báqueque**
(Mt 28.26-28; Mr 14.22-24; Lc
22.19-20; 2 Co 6.15-16)

10 ¹Muja, jívu, vvvv yv mūje majinajiyede jáve aipe vaiye báquede ina Israecavvú bácvavvure, majeñecuvape paivvú bácvavvure, ne ju aiye boje Jūmenijicure. Ina caivvrecabv vaiváivvú bácvavvú pōesvbenoi no oopenibo cāchinoi. Aru ina caivvrecabv jataivvú bácvavvú no jia urada Jūariya āmicuriyare. ²Ina caivvrecabv jáðovaiivvú bácvavvú Moisés bácvavvú ne vaiváiyep boje ūi mácvavvú no oopenibo yóbore aru no jia curō mácarōre. ³Ina caivvrecabv áivvú bácvavvú iye áiyede Jūmenijicui daroiye báquede na mácvavvure cavarō mearo ūi curōre jocarī. ⁴Aru ina caivvrecabv ūcuiivvú bácvavvú no ocore Jūmenijicui daroino mácarōre na mácvavvure no cūrabo urabore jocarī. Vbenita ānibo cūrabo ina pōeva mácvavvure ne arvre ðaibo bácarō āmenejaquemavvú. Quénora Cristorecabe arvre ðayvú bácvv na mácvavvure aru caino ne nūinoi jári coreyvú bácvv na

mácvavvure. ⁵Vbenita nópe Jūmenijicui caðateyvú bácvureca na mácvavvú caivvure, obedivvú nácvavvú bácvavvú Jūmenijicure torojvure ðabedejaquemavvú, ne āmeina teiye boje. Que baru Jūmenijicui yaidé ðarejaquemavvú na mácvavvure no pōesvbenoi.

⁶Caiye iye vaiye báqueque na mácvavvure coreóvaivvubu maja aipe vaiquiyede majare, āmeina teiyvrvvú baru yópe ne āmeina teiyvve báquepe. ⁷Que baru pēpeimarare mearore jíbejarā mūja, yópe arevvv na mácvavvú ne ðaiye báquepe. Yópe arī, toivaicōjenejaquemavvú Jūmenijicui ūi yávaiyede ne mearore jíyena cūinácvv ne pēpeimaracacvure: “Ina pōeva dobarī áivvú barejaquémavvú aru ūcuiivvú barejaquémavvú. Aru no yóboi nacajari upaivvú barejaquémavvú”, arī toivaicōjenejaquemavvú. ⁸Āmeina ðaiye jaubevvú majare arevvvque majemarebvcvva āmevvvque, yópe arevvv na mácvavvú ne āmeina ðaiye báquepe arevvvque nēmarebvcvva āmevvvque. Ne nópe ðaiye báque boje, cūinájāravvú baji veintitrés mil paivvú baju yaidéjaquemavvú.

⁹Maje jabocv Cristo ūi urarō napiye boje maje āmeina teiyede, “Maja āmeina teivvvacari, nājimenajaramu maja, maje āmeina teiye boje”, vbenina arī dápiaiye jaubevvú majare, yópe arevvv na mácvavvú ne nópe arī dápiaiye báquepe. Ne nópe arī dápiaiye báque boje, áðava, Jūmenijicui daroimara mácvavvú, ne cūrivoru yóboi na mácvavvure, yaidéjaquemavvú na mácvavvú. ¹⁰Jūmenijicure āmeina yávabejarā mūja, yópe arevvv na mácvavvú ne āmeina yávaiye báquepe Jūmenijicure, ne āmecoroiye báquede ne jabovare, ūi epeimara mácvavvure. Ne nópe ðaiye báque boje, cūinácvv ángelede darorejaquemavvú, ūi boarī jarvvaquiyepe ayv na mácvavvure.

¹¹Caiye iye vaiye báqueque na mácvavvure coreóvaivvubu maja aipe vaiquiyede majare, maja ðaivvú baru yópe ne ðaiye báquepe. Aru Jūmenijicui

toivaicōjenejaquemavu diede, maje buenajiyere ayu. Maja curivubu ijāravu buojaijāravuare. Iye “Que vaiquíyebu”, aye báque vaivu caride.

¹²Que baru ácu pōecu “Āmeina tebevu yu. Aru āmeina tebecuyumu máre”, arí dápiayu me đajacurí, vainí tubecuyu.

¹³Apenumua mja “Yópe đaiyuvu yu”, arí dápiadavū. Ūbenita nópe đaivu baru, āmeina tejebu mja. Nópe vaiyavū caivu pōevare. Ūbenita Jūmenijicu, ñai đayu cainumua yópe ūi aye báquepedeca, ye đajocabebi mjure, mje vainí turājiyere ayu mje āmeina đaiyue boje. Quénora parure đacuyume mjure mje ūmei, mje āmeina đabenajiyere ayu. Parure đacuyume mjure mje ūmei, mje napinajiyere ayu caiye iye mje āmeina đaiyuede, đabevava diede. Que teni mja vainí tājurorivu bācavure vaidé đacuyume ū mje āmeina đaiyuede jocarí.

¹⁴Que baru mja, jívū, ji umara, pēpeimarare mearore jíbejarā mja.

¹⁵Coyuyubu mjure yópe majidivupe. Nuriéna ji coyuru, mjacapūravu coreóvaye majidivubu. ¹⁶Maje āri ūcuiyede, ārurajivu maje jacobu Jesucristo ūi yayi báquede majare boje, torojuede jívaivubu Jūmenijicure no ūcuidoque boje. Que baru ū mearo đacaibi majare maje ūcuiyede iye ūcuidoquede. Maje ūcuiyede diede, “Majarecabu Jesucristoi meadacaimara, ūi jive meiyē boje ūi yayi báquede”, arí jáđovaivubu. Aru iye páure cotāvavaivubu maja. Maje āiyede diede, “Majarecabu Jesucristoi meadacaimara, ūi jíye boje ūi bajure ūi yayi báquede”, arí jáđovaivubu. ¹⁷Maja yóvaivu Jesucristore obedivu curivūvacari, cūinābo páuboquede āđavu maja. Que baru cūináyajubo pōeyajubope teni, Jesucristoque cūinávupe cuvū maja.

¹⁸Dápijarā ina Israecavu ne āimara boaiyede, ne juarí jícarājiyere aivu Jūmenijicure, ne āmeina teiyē boje. Cójijivu bācavu ne āiyede ina boaimara māvavū jiaruquede, “Cūináyajubo pōeyajubobu maja. Jūmenijicui

yóvaimaratamu maja”, arí jáđovaivubu.

¹⁹Ji nópe coyuiyē boje, “Āimajiaruare ne jíye báquede pēpeimarare meajiaruabebu apejiarua pueno”, ūbenina arí ye dápiabejarā mja. Aru, “Pēpeimara parurivubebu”, ūbenina arí ye dápiabejarā mja. ²⁰Quénora yópe aiyuvu yu ji coyuiyēque: Pōeva Jūmenijicure coreóvabevu ne āimara boaiyede ne juarí jícarājivu pēpeimarare, “Jūmenijinare diede jícaivubu maja”, ūbenina arí dápiadama. Jūmenijina āmeina ne jícaimara. Jūmenijicu cūinácu quécara cubi. Quénora abujuvatamu ne jícaimara. Aru ūbevu yu mje yóvaiyede abujuvaque. ²¹Mja ye buojabevu cūináturu ūcuiyu maje jacobu Jesucristo ūi ūcuidoquede aru abujuva ne ūcuidoquede máre. Mja ye buojabevu cūináturu āivu maje jacobu Jesucristo ūi tōivaquede aru abujuva ne tōivaquede máre. ²²Mja āri ūcuiyu baru Jesucristo jiede maje cójijíñami jívu aru abujuva jiede pēpeimara ne cūrami jívu máre cūináturu, jorojine đarājaramu maja maje jacobu Jesucristore. ¿Parurivū bárica maja ūi pueno, napinajivu ūi ñájine đaquiyede majare ūi jorojīye boje? Bítamu. Jáve útame parucu maje pueno.

Jesúre ju aipōeva apēcui yebacavu āmevūvacari, ne jáđovaino ne uede apevure ne đaiyeque

(Mt 26.26-29; Mr 14.22-25; Lc 22.14-20; 1 Co 4.16, 6.12, 8.7-12; Fil 3.17)

²³Yópe ávaivubuya apēvu Jesúre ju aipōeva. “Đaicōjeiyede đaiye jaubevu majare. Que baru caiyede đaicōjeimumu yu”, ávaivubuya apēvu. Jāvetamu. Ūbenita apede maje đaru, meamejebu majare o apevure máre. Aru apede maja đaivu baru, cadatebejebu apēvu majevure, ne parure nurajiyere aivu ne ūmei. ²⁴Ñame mearore đaiyurídubejarāri ne baju boje. Quénora caivu mearore đaiyujarāri apēvure boje quéda.

²⁵⁻²⁶Apenumua Jūmenijicure coreóvabevu ne āimara boaimara

mácvu jiaruaquede jini bojedadama aimajiaruare bojedaitucubua uparivure, pèpeimarare jicariburu yóbore. Ne que ðaiyedeca, ñni bojedajarã muja aimajiaruare nore, jèniari jámevva árore ne íyede, “¿Boropateyu bárica?” arí dápiabenajivu. Maje jabocu Jümenijicu jietamu caiye ijãravu aru caiye ijãravuque máre. Que baru jèniari jámevva, aimajiaruare ñni bojedarí, ãjara muja.

²⁷Cüinácü Jesúre ju abecu, “Áranujara ji cüramí”, ñi arí cuturu mujare, aru muja nuivurivu baru, áranujara muja. Áde ñi tuoiyede mujare, ãjara muja. Jèniari jámejara árore ñi íyede aimajiaruare, “¿Boropateyu bárica?” arí dápiabenajivu. ²⁸Ûbenita apescu nore cucü, “Iyebu aimajiarua ne jíye báque pèpeimarare” ñi aru mujare, iye jiaruare ámejara muja. Ñi que aríburu yóboi, muje áru iye jiaruare, écapüravu arí dápiacijichubi muje borore yópe: “Pèpeimarare pueðaivubebu na. Que baru meavubebu Jesúre ju aipöve ne pueðaru pèpeimarare aru ne áru jiaruare, náre jíye báquede”, ñbenina arí dápiacijichubi ñ. Que baru ñi arí dápiabequiyeye ayu nópe, aru “¿Boropateyu bárica?” ñi arí dápiabequiyeye ayu máre, ámejara muja. ²⁹Muja “¿Boropateyu bárica?” arí dápiabevureca, apescu nópe arí dápiacijichubi. Que baru ére boje, nópe coyuyubu mujare.

Ûbenita apescu jèniari jáquijichubi: “¿Aipe teni ðaiye jauí yure yópe apescu ‘¿Boropateyu bárica?’ ñi arí dápiajuroepe yurã?” ³⁰¿Aru ji torojuede jídu Jümenijicure, ñi jíye boje ji áquiyede, aipe teni apescu ámechorori yure ji áiyede iyede?” arí jèniari jáquijichubi.

³¹Apescu ñi que aru, yópe arí coyujebu yu. Caiye muje áiyuede, caiye muje ücuiyuede, aru caiye muje ðaiyuede máre, apenvu mearore jínajivu baru Jümenijicure muje ðaiye boje, meajebu muje ðaiye. Ûbenita apenvu “¿Boropateyu bárica yu?” ne arí dápiaru, muje ðaiye boje, meamejebu muje ðaiye. “¿Yópe

ðayu baru, apenvu mearore jíde ðajeba yu Jümenijicure?” arí dápiajarã muja, muje ðarãiyeye jipocai. ³²Yéde ðabejarã apenvu ne vainí turí ámeina tenajiyeye aivu. Quénora ðajarã cainumua apenvu ne vainí tubeni ámeina tebenajiyeye aivu. Judíovare, aru judíova ámevure, aru Jesúre ju aipöevare máre ámeina tede ðabejarã náre, muje ðaiye boje. ³³Yúcapüravu torojure ðaiyuvu caivu pöevare caiye ji ðaiyeque. Méne vaidé ðaiyubevu yu ji baju. Quénora obedivu apenvu méne vaidé ðaiyvuvu yu, Jesús ñi meaðaquiyeye ayu náre.

11 ¹Yúvacari ðare nuñmu yópe Cristo ñi ðaiye báquepedeca. Que baru ðajarã muja yópe ji ðaiyepe.

Aipe ðaiye jauí Jesúre ju aipöevare ne cójijivaiyede jínajivu mearore Jümenijicure
(2 Ts 2.15)

²Torojvuvu yu muje árué boje yure aru caiye ji bueiye báquede mujare, aru muje ðarí cómajiyeye boje yópe Cristo bueiye báquepedeca ji coyuiye báquede mujare. Muje que ðaiyede me ðadavü muja. ³Ûbenita caride vuvu yu muje coreóvarãiyeye ayu iyede. Muje ju abedu ñai mujare jaboteyure, meamevü. Cristorecabe jaboteyu caivu ñmuvare. Nomicurivu coapa jaboteivubu némarepacore. Aru Jümenijicurecabe jaboteyu Cristore. ⁴Ûmu cümañu maru ñi jipobure ñi jèniayede Jümenijicure aru ñi coyucayede Jümenijicui yávaiyede apenvu pöevare máre, Cristore pueðabebi. (Pöecu ñi jipobure cümaimi ñi cuede ére jaboteipöescu jivateinoi. Ûbenita apescu ñmu aru nomió máre ñmure jaboteivu ámema, quénora Cristo baju jaboteyube ñmuvare.) ⁵Ûbenita nomió cümameco baru ñi jipobure ñi jèniayede Jümenijicure aru ñi coyucayede Jümenijicui yávaiyede apenvu pöevare máre, jímarepacure pueðabebico ñi jivateinoi cucu cümamecova. Ó cümameco baru ñi jipobure, yópe nomió jímarepacui jaboteimo ámecope teðobe ó. Que

baru quédeca bájebu, òi yɔvaru caiye òi podare. ⁶Nomió òi cūmaiɔbedu òi jipobure òi jēniayede Jūmenijicuque aru òi coyɔcaiyede ùi yávaiyede aɓevure máre, pɓeno meajebu óre yɔvaru òi podare. Ëbenita cɔyeco baru ò ùmɔjubepodaque cɔco baru aru caiye òi podare yɔvarí jarɔvado baru, cūmajacorí òi jipobure. ⁷Ëbenita ùmure cūmaiye jaɔbevu ùi jipobure ùi jēniayede Jūmenijicuque aru ùi coyɔcaiyede ùi yávaiyede aɓevure máre, Jūmenijicui cɔedaiye báque boje úre úpe árojacure. Que baru ùmɔvarecabu curivu, mearore jínajivu Jūmenijicure. Diede jádovaivubu ne cūmameque ne jipobure. Ëbenita nomivarecabu curivu, mearore jínajivu némarepacure. Diede jádovaivubu ne cūmaiyeque ne jipobure.

⁸Jūmenijicu cɔedabedejaquemavu ñai mamarumɔcacu bácu ùmure, ùi ámiá Adán, ico nomió òi cūañoque. Qué Nora cɔedarejaquemavu ico mamarumɔcaco báco nomióre, òi ámiá Eva, ñai ùmɔ ùi cūañoque. ⁹Aru Jūmenijicu cɔedabedejaquemavu ñai ùmure, ùi cadatequiyepe ayɔ ico nomióre. Qué Nora cɔedarejaquemavu ico nomióre, òi cadatecojiyepe ayɔ ñai ùmure. ¹⁰Que barureca nomióre cūmaiye jaɔvu òi jipobure, jádovacoño jímarepacui jaboteimore. Ói que ðaiyede, ina ángeleva máre óre me jádama.

¹¹Ëbenita maje jabocu Jūmenijicui cɔedaiye báquede ùmure aru nomióre máre ina pɔcaráre jauquiyede majidejaquemavu. Nomióre jaubi ùmɔ. Aru ùmure jaubico nomió. ¹²Que baru jávetamu ico mamarumɔcaco báco nomió, òi ámiá Eva, Jūmenijicui cɔedaimo máco ùmɔ ùi cūañoque. Aru jávetamu caivu ùmɔva máre curivu nomió òi juédocɔvae báque boje náre. Aru caivure, caiyede máre cɔedarejaquemavu Jūmenijicu.

¹³¿Muje dápiaru, meameni nomió jēniadore Jūmenijicuque òi jipobure cūmamecova? Mujacapúravu coreóvaiye majidivubu jáve meamenore òi jēniaru Jūmenijicuque òi jipobure cūmamecova.

¹⁴Aru pōeva ne ðarí cōmajiyeque máre majidivubu maja. Pōeva ámeina jádama ùmɔ ùmɔjue poda cɔcure. Ëmɔ ùmɔjue poda cɔcu baru, cɔyoje tejebu ù. ¹⁵Ëbenita pōeva me jádama nomió ùmɔjue poda cɔcore. Nomiva pōeva ne puedaimaramu ne cɔe boje ùmɔjue poda, cūmarajivu ne jipobure. ¹⁶Aɓecu mujacacu o aɓeco mujacaco ju aiyɔbedu iye ji majicaiyede, quédata coyɔyubu yɔ diede. Ñuja aru caivu aɓevu Jesúre ju aipōeva cójjivaiivu aɓenoa ímaroarí ye coreóvabevu aɓevure, mujare jocarí, ne nomivare jēniacōjeivure Jūmenijicuque o coyɔcaicōjeivure ùi yávaiyede máre ne jipobure cūmamevɔva.

Pōeva ne ámedaino ne ári úcuiyede, áruarajivu Jesucristoi yaiye báquede

¹⁷Caride aipe ðaiye jauróre muje cójjivaiyede majicaiyavu yɔ mujare. Muje cójjiyede ámedadavú muja. Que baru torojubevu yɔ. Muje cójjivaiyede mearore nure ðabevubebu muja muje bajure. Qué Nora ámenore nure ðaivubebu muja muje bajure. ¹⁸Mamarumure yópe aɓevu ne arí coyuiyede, “Ina Corintocavu Jesúre ju aipōeva yajuboa tede ðaivubu. Ne baju cūináturu ámevu ne úmei ne cójjivaiyede. Aɓevu ne uraró áiyede ne ðavaiyede cójjijíñami, aɓevure jíbevɔva, áivubu uraró, aɓevu ne ámeneca”, jápiaivu yɔ muje borore. Jáve majuvú iye ne coyuiyede. ¹⁹Muje yajuboa tede ðaiye boje, pōeva coreóvavubu Jūmenijicu ámeina jáñure mujacavu jíbevure aɓevure. ²⁰Maje jabocu Jesucristo jáve ámeina jáñure muje cójjivaiyede, muje ári úcurajiyepere ayɔ, áruarajivu ùi yaiye báquede, muje ðabe boje yópe ùi ðaicōjeiye báqueredeca diede. ²¹Muja cójjivaiivu bácvu, aɓevu mujacavu áiyede nɔvavivu bácvu coapa muje baju áiyede íni ávavibuya, jíbevɔva aɓevure. Aru maumena ári búvavibuya aɓevu mujevú ne earájiye jipocai. Que baru aɓevu mujacavure ávúé ijivavuya. Ëbenita aɓevu uraró yapivavibuya pu ne pacoteiyeta. Muja

cūináturu āmevaivubuya. ²²Muje que đaiyede pare ubevu yu. Āri ūcuiye jaovu pōevare ne cūramiai. Ūbenita muje cūramiare cūvarivuvacari muja coapa, pueno baju āri ūcuiyurivubuya Jesúre ju aipōeva ne cójjiñami. Pare ubevu yu muje āmeina jáiyede Jūmenijicui pōevare aru muje cūyoje tede đaiyede mujevū āiyede cūvabevure. Āmeina jámejara muja Jūmenijicui pōevare. Aru cūyoje tede đabejarā muja mujevū āiyede cūvabevure. ¿Aipe arī coyūji mujare? Ye majibevu yu aipe arī coyucūyure mujare. Jáve torojubevu yu muje que đaiyede. “Me đaivubu muja”, jáve ye abecūyumu yu mujare.

**Jesúre ju aipōeva ne āri ūcuino,
āruajivu ūi yaiye báquede**
(Mt 26.26-29; Mr 14.22-25; Lc 22.14-20)

²³Iye maje āri ūcuiyede, āruajivu Jesucristoi yaiye báquede, Jesucristovacari coreóvare đarejame yure. Aru yópe ūi coreóvare đaiye báquedepedeca coreóvare đacacu mujare. Āniñami mácarōmiareca, Judas bācui jēni jíye baquiyé jipocai maje jabocu Jesúre ūi mauvare, páure ĩnejamedā Jesús. ²⁴Jūmenijicure torojuede jíniburu yóboi, páure cotūvarejamedā. Aru arejamedā ūi bueimarare: “Dápijarā iye páure yópe muje dápiayepe ji bajure. Jíquijivu yu ji bajure, ne boarī jarūvarājiyepere yure, mujare ji meadaquiyepere boje. Que baru muje āiyede iye páure, ārujara yure”, arejamedā náre Jesús. ²⁵Aru nopedeca ūcuidore ĩni ne āri bubarīburu yóboi, Jesús arejamedā: “Dápijarā iye ūcuiyede yópe muje dápiayepe ji jivede. Jíquijivu yu ji jivede, ne boarī jarūvarājiyepere yure, mujare ji meadaquiyepere boje. Que baru yure mequiyebu ji jive obedivure boje. Jūmenijicu ‘Yópe đajarā muja, boropatebenajivu ji jáinoi’, ūi yóboicarō coyūino mácarōre pōevare āruajaramu. Cainūma muje ūcuiyede diede, ārujara yure”, arejamedā Jesús. ²⁶Cainūma yópe muje páure āiyepere aru muje ūcuidoquede ūcuiyepere máre, pu maje

jabocu Jesucristoi copaidaiyeta, pōevare jádovaiyebu Cristoi yaiye báquede náre boje, meadacūyū náre.

**Aipe đaiye jauro Jesúre ju aipōevare
ne āri ūcuiyede, āruajivu ūi yaiye
báquede**
(He 12.5-11)

²⁷Ácu pōecu puedabecu āñu maru iye páuquede, iye āruere đaiye maje jabocu Cristoi bajure, o ūcuñu maru iye ūcuidoquede, iye āruere đaiye maje jabocu Cristoi jivede, boropatecūyume ūi puedabe boje Cristoi bajure aru ūi jivede máre. ²⁸Nópe vaibéquiyepe aivu, caivu coapa me dápiarī corevajarāri caiye ne đaiyede, ne dápiayede máre, “¿Āmeina teyuba yu?” jēniari járajivu ne baju. Aru āmeina teivu baru, chíori coyūjarāri ne āmeina teiyede Jūmenijicure, ūi ārumeteni jaruvaquiyepere ayu diede, ne āri ūcurajipe jipocai. ²⁹Ácu pōecu ūi āru iye páuquede aru ūi ūcuro iye ūcuidoquede máre, dápiabecūva maje jabocu Cristo baju nājini yayú bācure, jáve Jūmenijicu nājine đacūyume ūre, ūi que đaiye boje. ³⁰Que baru obedivu mujacavubu parubevu aru ĩjimara máre. Aru apevu yayúama. ³¹Maja me dápiarī corevaru maje baju đaiyede aru maje baju dápiayede máre, maje jabocu Jūmenijicu nājine đabejebu majare. ³²Ūbenita maje jabocu Jūmenijicu nājine đayube majare, majicacūyū majare, maje bíjabenajiyepere ayu ūre jocarī ĩjaravucavu ūre coreóvabevūque. ³³Que baru, muja, jívu, muje cójjiivaiyede āri ūcurajivu yópe maje jabocu Jesucristoi āruere đaicōjeyepere mujare, corejarā caivu mujevure, ne earājiyepere aivu. Que teni āri ūcujara caivu muja cūináturu. ³⁴Ácu pōecu mujacacu āvué yayú baru, ājacurī ūi cūrami jívu, Jūmenijicui nājine đabequiyepere ayu mujare, muje āmedaiye boje muje cójjiivaiyede. Apepe muje jēniari jáiye báquede yure, majicacūyumu mujare aipe đaiye jaurore ji eaquiyede muje yebai.

**Espíritu Santoi majide ðaino Jesúre
ju aipõevare ùi majiécārõque
bojecubeda, ne caðatenajiyere aino
apevure
(Ro 12.6-8)**

12 ¹Muja, jívũ, caride coyũquijivũ iye jëniari jáiyede muje toivaiye báquede yure paperayocaque Espiritu Santoi majide ðaiyena Jesúre ju aipõevare ùi majiécārõque bojecubeda, maje caðatenajiyere ayũ apevure. Uvu yũ muje me coreóvarãjiyere diede.

²Muja iyede coreóvaivubu. Jũmenijicure coreóvabevũ bácavu cãreja, pẽpeimara yávabevure mearore jíde ðaimara matequémavũ muja, muje dápíarĩdũyie boje paruéde cuvavivure. Ne ðaicõjeimara matequémavũ muja.

³Que baru caride mujare coreóvare ðaiyvũ yũ iyede. Põecu cubebi Jũmenijicui Espiritu Santore cuvacu, “Jũmenijicu ñájine ðajacurĩ Jesúre toabo cũiméboi cainumua”, arĩ buojayũ. Aru põecu cubebi, “Jesús maje jabocube”, arĩ buojayũ jáve, Jũmenijicui Espiritu Santoi nópe coyure ðabedu úre.

⁴Uretamu Jũmenijicui majiéque ùi majide ðaiye ùi põevare bojecubeda. Ubenita ñai Espiritu Santo cũinácuracabe majide ðayũ caivũ majare maje majiécārõva. ⁵Uretamu maje memecaiye Jũmenijicure aru apevure máre maje majiécārõque. Ubenita cũináturu ãmevũ. Aru maje jabocu Jesucristo cũinácuracabe jaboteyu maje memecaiyede. ⁶Uretamu Jũmenijicui jáðovaiye ùi paruéde, ùi jýyede majare, maje memecarãjiyere ayũ úre aru apevure máre ùi majiécārõque. Ubenita cũináturu ãmevũ. Aru majepacu Jũmenijicu cũinácuracabe parure ðayũ caivũ majare, maje memecarãjiyere ayũ maje majiécārõque.

⁷Jũmenijicu majide ðayũbe caivũ majare Jesúre ju aipõeva coapa ùi majiécārõre, maje jáðovarajiyere ayũ cuvavivure ùi Espiritu Santore aru maje caðatenajiyere ayũ apevure. ⁸Apevũ ùi põevare Jũmenijicu ùi Espiritu Santore

coyure ðaicõjeimi ùi majiéque. Aru apevũ ùi põevare Jũmenijicu ùi Espiritu Santore majicare ðaicõjeimi apevure iye majiéde ùi majide ðaiye báquede náre, apevũ ne coreóvarãjiyere ayũ diede. ⁹Apevũ ùi põevare Jũmenijicu ùi Espiritu Santore jëniare ðaicõjeimi úque, “Jãve majivũ yũ Jũmenijicu ðacuyure yópe ji jëniaiyepedeca úre” arĩ. Aru apevure Jũmenijicu ùi Espiritu Santore meaðare ðaicõjeimi ijimarare. ¹⁰Apevũ ùi põevare Jũmenijicu ùi Espiritu Santore põeva ne ðarĩ majibede ðare ðaicõjeimi. Apevũ ùi põevare Jũmenijicu ùi Espiritu Santore coyucare ðaicõjeimi ùi yávaiyede apevure. Aru apevũ ùi põevare Jũmenijicu ùi Espiritu Santore majide ðaicõjeimi apecu yávayure yópe Espiritu Santoi yávaicõjeiyere o yópe abujucu ùi yávaicõjeiyere. Apevũ ùi põevare Jũmenijicu ùi Espiritu Santore yávare ðaicõjeimi apecamua yávaicamua ne majibecamua. Apevũ ùi põevare Jũmenijicu ùi Espiritu Santore coyure ðaicõjeimi aipe aiyuede iye apecu ùi yávaiyede apecamua yávaicamua ùi majibecamuaque.

¹¹Aru caiye iye Jũmenijicui majiéquede ñai Espiritu Santo cũinácura majide ðaibi majare coapa yópe ùi urõpe.

**Jëvari coyũino Jesúre ju aipõeva
cõjjivaivũ yópe põecu ùi bajure
(Ro 12.4-5; Ef 4.11, 14-16)**

¹²Jëvari coyũiyede coyũyũbu yũ mujare. Yópe põecu ùi baju cuvare ure cõere, ubenita ùi baju cũinábaju quénora cõere, nopedeca obedivtatamu maja Jesúre ju aipõeva, ubenita cũináyajubo põeyajubo teni, cũinávure cuvũ maja Jesúre ju aipõeva. ¹³Caivũ maja Jesúre ju aipõeva, judíova aru judíova ãmevũ, yebacavũ aru yebacavũ ãmevũ máre, Jũmenijicuque jáðovaimara mácavũbu ocoque. Nópe ðarĩ, ñai Espiritu Santo cũinácuracabe maja Jesúre ju aipõeva caivure cũináyajubo põeyajubo tede ðayũ. Aru caivũ coapa cuvavivũbu ñai Espiritu Santore majaque.

¹⁴Põescu ñi baju cūináro cūvaecarõ ãmevu. Quédeca Cristo jina obedivutamu maja. ¹⁵Mi cuboba yávarí bñojaiba baru põescupe aru “Yü ãmevu mi pũru. Que baru mi baju cūvaecarõ ãmevu yu”, aiba baru, nópe aibavacari, mi baju cūvaecarõ bájebu diba. ¹⁶Aru mi cámuca yávarí bñojaica baru põescupe aru “Yü ãmevu mi yacorũ. Que baru mi baju cūvaecarõ ãmevu yu”, aica baru, nópe aicavacari, mi baju cūvaecarõ bájebu dica. Quédeca maja cūináturu ãmevũreca, majacacu cubebi meacu apevu pũeno. ¹⁷Põescu ñi baju yacorua matũiye baru, ñai põescu jápiarí majibejebu. Aru põescu ñi baju cámuca matũiye baru, ñai põescu vĩni majibejebu. Quédeca cadateiyavũ maje baju iye majiéque, ñai Espĩritu Santoi majide ðaiyede majare coapa. ¹⁸Ûbenita Jũmenijicũrecabe epevu báciu caiye põescu ñi baju cūvaede yópe ñi urõpe. ¹⁹Cūináro põescu baju cūvaecarõ quénora cũru, põescu cubejebu.

²⁰Ûbenita põescu ñi baju cūvae ure cūvacũreca, ñi baju quénora cūinárotamu. ²¹Mi yacorũ yávarí bñojaidũ baru põescupe, “Mũre jaubevu yure”, aidũ majibejebu mi pũrũre. Aru mi jipobũ yávarí bñojaibũ baru põescupe, “Mũre jaubevu yure”, aibũ majibejebu mi cubobare. Quédeca, “Mũre jaubevu Cristore” arĩ, majecũre coyũbenajarevu maja. ²²Quénora jaũvu majare iye maje baju cūvae parũbe ape maje baju cūvae pũeno, maje arũrãjiyere aivũ. ²³Apede maje baju cūvaequede yópe maje baju jivũquede majié me jáivũbu maja. Ûbenita diedecabu maje me coreiye. Aru apede maje baju cūvaequede apevũre jáicõjeiyubevu maja. Que baru cuitótecajeare doivũbu, cũmarajivũ diede. ²⁴Ûbenita apede maje baju cūvaequede die pũeno ye cũmamevu maja. Jũmenijicũrecabe epevu báciu maje baju cūvaede, maje me járajyere ayũ pũeno baju iye maje baju cūvaequede, maje ãmeina jájũroede. ²⁵Que ðayũ báciu Jũmenijicũ, maje baju

baquiyépe ayũ cūinárora, aru caiye maje baju cūvaeque cadatequiyere ayũ ne baju coavabevũva. ²⁶Maje baju cūvaecarõ cūináro ijidu majare, caino maje baju ijivũ majare. Aru apecũ ñi pueparu maje baju cūvaecarõ cūinárore, maja torojurivũbu caino maje bajuque. Quédeca cūináciu Jesũre jũ aipõescu ñi ñájiyede, caivũ maja Jesũre jũ aipõeva ñájivũbu. Aru apevu ne pueðaiyede cūináciu Jesũre jũ aipõescupe, caivũ maja Jesũre jũ aipõeva ne pueðaimaratamu.

²⁷Jévari coyũyũbu majare. Majatamu yópe Cristo ñi bajupe. Aru majatamu coapa ñi baju cūvaeque. ²⁸Caivũ maja Jesũre jũ aipõevare coapa Jũmenijicũ epeibi, maje memecarãjiyere ayũ majevũ cójijivavũre. Mamarũmũcavũbu ñi epeimara Jesũs ñi yávaiye méne beorĩ coyũicõjeimara. Mamarũmũcavũ ne yóbocavũbu ñi epeimara ñi yávaiyede coyũcaipõeva. Ne yóbocavũbu ñi epeimara bueipõeva. Ne yóbocavũbu ñi epeimara põeva ne ðarĩ majibede ðaipõeva. Ne yóbocavũbu ñi epeimara ijimarare meaðaipõeva. Ne yóbocavũbu ñi epeimara cadateipõeva, jipocateipõeva, aru apecamua yávaicamua ne majibecamuare yávaiipõeva máre. ²⁹Jãve caivũ maja ãmevu Jesũs ñi yávaiye méne beorĩ coyũicõjeimara. Aru jãve caivũ maja ãmevu Jũmenijicũ yávaiyede coyũcaipõeva. Jãve caivũ maja ãmevu bueipõeva. Jãve caivũ maja ãmevu põeva ne ðarĩ majibede ðaipõeva. ³⁰Jãve caivũ maja ãmevu ijimarare meaðaipõeva. Jãve caivũ maja ãmevu apecamua yávaicamua ne majibecamuare yávaiipõeva. Aru jãve caivũ maja ãmevu coyũipõeva aipe aiyũede iye apecũ ñi yávaiyede apecamua yávaicamua ñi majibecamuaque. ³¹Apeno Jũmenijicũ majiécarõque pũeno baju cadateivũbu maja apevũre. Que baru pare ñjarã mũje cvarãjiyede iye pũeno baju bojecue majiéde.

Maje ñe apevũre

(Mt 17.20, 21.21; Mr 11.23; 1 Jn 3.2)

Ñai Espĩritu Santo mũjare majide ðayũreca, caride majicayũbu yũ mũjare aipe ðaiye jaurõre pũeno baju parũrõre.

13 ¹Maja yávaivũ majijũvũ caiye ijáravũque yávaiyede buebevũva diede. Aru yávaivũ majijũvũ ángeleva ne yávaiyede máre. Ëbenita maje ùbedu arevũ pòevare, ye baju ámevũ caiye iye maje yávarí majijũroede. Arevũre ùbedu, caiye iye maje yávaiye jápuraivũ yópe bujíepe táuque ðaiyede, pare ámeina jápuraede aru cãrijovaiyede máre. ²Aru maja Jũmenijicũ yávaiyede soyũcaijũvũ parúeque. Jũmenijicũ dápiaiino jádovameno mácarõre jipocamia ùbenita jádovainore caride jápiarí eaijũvũ. Caiyede me coreóvaujũvũ. Me ju aijũvũ Jũmenijicũre, jëniari úre ùi nũicõjequiyepere aivũ cũracũare apenoita aru majini dicũá nũquicũare. Ëbenita maje ùbedu arevũ pòevare, ye baju ámevũ caiye iye maje majijũroede. ³Aru maja jãjũvũ caiye maje cũvaede cũve cũvabevũre. Pũ maje bajure juarí boarí jarũvaicõjeijũvũ máre. Ëbenita maje ùbedu arevũ pòevare, ye baju ámevũ caiye iye maje ðájũroede.

⁴Maja arevũre urivũ, napivaivũbu náre. Aru mearore ðarí cõmajivaivũbu, caðatenajivũ náre. Maja arevũre urivũ, ye jorojĩmevaivũbu náre. Aru, “¿Meara márica mũje pũeno?” ye arí soyũbevaivũbu náre. Aru, “¿Meara márica mũje pũeno?” ye arí dápriabevaivũbu náre máre. ⁵Maja arevũre urivũ, pueðavaivũbu náre. Aru, “Vaijáðeni me yure”, arí dápriabeni quénora “Vaijáðeni me arevũre”, arí dápriarí, memecavaivũbu arevũre boje, caðatenajivũ arevũre maje baju pũeno. Maja arevũre urivũ, ye jarabevaivũbu. Aru arevũ ne ámeðaiyede majare, maumena árumetevaivũbu diede. ⁶Maja arevũre urivũ, ye torojũbevaivũbu arevũ ne ámeina teiyede, ne soyũiyede jáve ámene máre, aru ne ámeðaiyede arevũre, ne soyũiyede jáve ámene arevũ borore máre. Quénora torojũvaivũbu arevũ ne mearo teiyede, ne soyũiyede jávene máre, aru ne mearo ðaiyede arevũre, ne soyũiyede jávene arevũ borore máre. ⁷Maja arevũre urivũ, ñájivaivũbu caiye ámene arevũ

ne ðaiyede majare, ámenore ðabevũva náre copũ. Aru ju ávaivũbu caiye méne maje jápiaiye arevũ borore. Ëbenita aiye ámene maje jápiaiye arevũ borore ju ávabevũbu. Maja arevũre urivũ, dajocabevũva corevaivũbu ina ámeðavũre, ne oatvarí mearore ðarãjiyepere aivũ. Aru napivaivũbu caiye ámene arevũ ne ðaiyede majare dajocabevũva maje ùede náre.

⁸Cainũmũa arevũre ñe jauquiyebu majare. Iye majié Jũmenijicũ ùi Espiritu Santore majide ðaiye majare cũiquiyebu. Cũiquiyebu pòeva ne soyũcaiyé Jũmenijicũ yávaiyede arevũre. Cũiquiyebu pòeva ne yávaiye apecamua yávaicamua ne majibecamua. Cũiquiyebu pòeva ne majicaiye arevũre Jũmenijicũ majide ðaiye báquede náre, arevũ ne coreóvarãjiyepere aivũ diede. ⁹Jũmenijicũ coreóvaicõjeimi majare quénora quíjino ùi majiécarõre. Aru coreóvaicõjeimi majare quénora quíjino ùi yávaiyede. ¹⁰Ëbenita Cristo ùi majide ðaquiyede caivũ majare caiyede, maje curãjiyede úque cavarõ mearo Jũmenijicũ curõ, ñai Espiritu Santo ùi majide ðaiye báque quíjje majare cũiquiyebu. Dinũmũ maquinóre caivũ majare ye majié jaubequiyebu.

¹¹Yũ juedocũ cãreja soyũvayũ barejacácũ yópe juedova ne soyũiyepere. Aru corevayũ barejacácũ méne aru ámene máre yópe juedova ne corevaiyepere. Aru dápriavayũ barejacácũ yópe juedova ne dápriayepere máre. Ëbenita yũ bucũcũ caride, caiye ji ðaiye báquede juedova ne ðaiyepere dajocarejacacũ. Quédeca ji cũe ijáravũ juedocũre páyũbu yũ, ji coreóvaiye boje quíjino Jũmenijicũ jiede. Ëbenita ji cũquiyede cavarõ mearo Jũmenijicũ curõ bucũcũre páyũ bacũyũmu yũ, ji coreóvaiye boje urarõ Jũmenijicũ jiede. ¹²Caride Jũmenijicũ jiede jáivũbu maja yópe maje jáiyepere jivarũ javecarũque. Que baru jáve majibevũ aipe árojaene caiyede. Ëbenita apejãravũ daquijãravũ baquinóre járajaramu Cristo bajure. Caride quénora majié jápiarí eaiivũbu

maja Jūmenijicu jiede. Que baru ũ jiede coreóvayie pare javvu majare. Ŭbenita apejāravu daquijāravu baquinóre coreóvarājaramu caiyede jaubevuva, yópe Jūmenijicui coreóvayiepe majare.

¹³Ŭbenita yóbecue Jūmenijicui darī majide đaiye majare ye cūiméquiyeu. Cainumua Jūmenijicure ju aiye javvu majare. Aru cainumua Jūmenijicui mearo đacaquiyede majare yópe ũi aiye báquipedeca napini coreiye javvu majare. Aru cainumua Jūmenijicure aru arevure máre ũe javvu majare. Ŭbenita yo cūinárorecabu iye yóbecuecarō jaurō ape pueno, maje ũe Jūmenijicure aru arevure máre.

**Ape Espíritu Santo ũi majide
đaiye javé ape pueno**

14 ¹Đajarā muja caino muje oainope, urājivu Jūmenijicure aru arevure máre. Aru pare ularā Jūmenijicui Espíritu Santo ũi majide đaquiyere aivu mujare Jūmenijicu ũi majiéquede, muje cadatenajiyere ayu arevure. Aru pueno baju ularā ũi majide đaquiyere aivu muje coyucarājiyere ayu pōevare Jūmenijicui yávayiede paruéque. ²Ácu pōecu yávayu baru apecamua yávaicamua ũi majibecamuare, Jūmenijicure arī yávayube. Ŭbenita pōevare ye arī yávabebi ũ. Ŭi yávayie boje ũi ũmeque pōeva ne majibede aru ne jáđovamene máre, ñame ye jápiarī eabejebu ũi yávariduiyede. ³Ŭbenita ácu pōecu coyucayu baru Jūmenijicui yávayiede paruéque, cadatejebu apevu Jesúre ju aipōevare, ne parure nurajiyere ayu ne ũmei. Náre parure đajebu ne ũmei. Aru chōivunque, náre orī cadatejebu máre. ⁴Ñai yávayu apecamua yávaicamua ũi majibecamuare ũi baju quécura parure nujebu ũi ũmei, ũi nópe yávayie boje. Ŭbenita ñai coyucayu Jūmenijicui yávayiede paruéque apevu Jesúre ju aipōevare parure nure đajebu ne ũmei, ũi nópe coyuiye boje. ⁵Ŭvu yu caivu mujare muje yávarājiyere ayu apecamua yávaicamua muje

majibecamuare. Ŭbenita pueno baju uvu yu muje coyucarājiyere ayu Jūmenijicui yávayiede paruéque. Pōecu ũi yávaru apecamua yávaicamua ũi majibecamuare ũbenita pōecu ũi cubedu coyuiye majicu aipe aiyuede iye yávayiede, Jesúre ju aipōeva ye parure nuiye majibejebu, ne jápiarī eabe boje diede. Que baru me bojecue bajubu pōecu ũi coyucayie pōevare Jūmenijicui yávayiede paruéque pōecu ũi yávayie pueno apecamua yávaicamua ũi majibecamuaque.

⁶Muja, jivu, ji eaquiyede muje yebai yávayu baru apecamua yávaicamua ji majibecamuare, ye cadatejebu mujare, coyubecu baru máre aipe aiyuede. Ŭbenita coyuyu baru mujare ape coyuiyede Jūmenijicui jáđovayie báquede yure, o apepe, ñai Espíritu Santo ũi majide đaiye báquede yure, ji majicaquiyere ayu mujare, muje coreóvarājiyere ayu, o ape coyucayiede Jūmenijicui yávayiede paruéque, o ape bueiye máre, cadatejebu mujare. ⁷Jēvari coyuiyeque coyuyubu mujare. Maje pedubare japuiyede aru maje biabeibore bujide đaiyede máre pōeva ne uparājiyere aivu, maje japuiyede o maje bujide đaiyede nurié āmenu, ina upaiyuriduvu ye majibejebu aipe upajuroede. ⁸Aru quédeca, churarava ne coreiyede jápiarājivu apesu ũi japuiyore japuiyede náre coedaicōjeinore, náre āradaicōjeinore, aru náre ādamatenanucōjeinore máre, nurié āmenu iye japuiye, ina churarava ye meadabejebu ne baju ādamatenanurajivu. ⁹Nopedecabu majare máre. Maje yávaru apecamua yávaicamuaque, caivu pōeva ne majibecamuaque, ñame jápiarī eaiye ye majibejebu maje yávariduiyede. iŬbenina yávaridujebu maja!

¹⁰Ŭrebebu ijāravucavu ne yávaicamua. Aru caivu pōeyajuboacavu jápiarī eadama ne baju yávaicamuare. ¹¹Ji coyuriduru apesque ũbenita jápiarī eabedu ũi yávaicamuare, “Ñujacacu ātemi”, ũcarūravu ajebu yurā, aru yu

máre, “Ñujacacú ãmemi”, ajebu úra.

¹²Que baru mña cuvayuvivu pare ñai Espíritu Santo ñi majide ñaiyede, pueno baju ñjarã mña iye Jñmenijicui majiéquede, cadatenajivu apevu Jesúre ju aipðevare, ne parure nrajiiyere aivu ne ñmei.

¹³Que baru ñai yávayv apecamua yávaicamua ñi majibecamuare jñeniacurí Jñmenijicue, ñi coyuiye majide ñaquiyepe ayv aipe aiyuede iye yávaiyede apecamua yávaicamua ñi majibecamuaque. ¹⁴Yv jñenianñ maru Jñmenijicue apecamua yávaicamua ji majibecamuaque, jãve jñeniajebu ji decocue. Ñbenita dápiabecvna majibejebu yv ji ñmei aipe aiyuede.

¹⁵Que baru yópe ñaiye javv yvre. Jñmenijicue jñenaiye javv yvre dápiayvre ji decocue aru ji ñmeque máre, ji jãpiarí eaquiyepe ayv aipe ji jñenaiyede. Aru yvriaiye javv yvre dápiayvre ji decocue aru ji ñmeque máre, ji jãpiarí eaquiyepe ayv aipe ji yvriaiyede. ¹⁶Muje mearore jídu Jñmenijicure dápiabevvna quénora muje decocue, apevu nore curivu jãpiarí eabevvna muje yávaríduiyede, “Jãvemv ne aiyede”, ye aivu buojabejebu ne coreóvabe boje aipe aiyuede diede. ¹⁷Muje mearore jíye me baju javv. Ñbenita ina mujare jãpiaríduivv ne coreóvabedu aipe aiyuede muje coyuríduinore, náre cadatebejebu mña. Nácapuravv ye parure ñmejebu ne ñmei muje nópe coyuiye boje. ¹⁸Torojede jíyvbv yv Jñmenijicure ñi Espíritu Santo ñi yávarí majide ñaiye boje yvre apecamua yávaicamua ji majibecamuare. Aru dicamuare yávavavv yv caivv muje pueno. ¹⁹Ñbenita ji cójjiivaiyede apevu Jesúre ju aipðevaque, náre ji coyuru cñinápvrpe paicamua yávaicamua ne majidicamuaque, buescv yv náre, meajebu ji coyuríduiye pueno caiprcarvvrpe paivil baju yávaicamua ne majibecamuaque.

²⁰Muja, jívv, ñbejarã mña yópe jueðova dápiabevv ne ñaiyere. Muje

apevvre jáicðjeniduiyede mujare, ñai Espíritu Santo ñi majide ñaimara mae boje, jueðovape teivvbv mña. Quénora ñajarã yópe bucvna dápiavv ne ñaiyere. Muje apevvre cadateiyede, ñai Espíritu Santo ñi majide ñaimara mae boje, bucvvape teivvbv mña. Ñbenita yópe jueðova majibevv ñmeno ñaiyeque, mña máre majibevvpe tejarã ñmeno ñaiyeque.

²¹Javede yópe arí, toivaicðjenejaquemavv Jñmenijicv ñi yávaiyede: “Apevu pøeva, apeyajubo pøeyajubocavvre coycaicðjescvymv yv ji yávaiyede ji pøevare apecamua yávaicamua ne majibecamuaque. Ñbenita yv náre nópe coyucaríduyvrecv, ye yvre jãpiarí adabede nrajarama na”, arejaquemavv maje jabocv Jñmenijicv. ²²Que baru Jñmenijicui coyucðjeiyede pøevare apecamua yávaicamua ne majibecamuaque, ne jãpiarí eabe boje diede, jãðovañvme náre ju abevvre úre aru ñi cadatebemarare máre. Ñbenita ñi coyucðjeiyede úre coycaipðevare ñi yávaiyede paruéque, ne jãpiarí eaiye boje diede, jãðovañvme ina ju aivvre úre aru ñi cadateimarare máre. ²³Caivv mña Jesúre ju aipðeva, muje cójjiivaiyede, caivv ina yávaipðeva ne yávaru apecamua yávaicamua pøeva ne majibecamuaque quénora, aru Jesúre ju abecv o apecv ecoyv baru muje cójjiñami, jãve “¿Árvmv bária?” ajebu ñ. ²⁴Ñbenita caivv mujacavv yávaipðeva ne coyrcarv Jñmenijicui yávaiyede paruéque, aru Jesúre ju abecv o apecv ecoyv baru muje cójjiñami, coreóvaje bu ñmeina teyvre. Caivv mña yávaipðeva muje coyuiye boje Jñmenijicui yávaiyede, “Ji ñaiyede oatvviye javv yvre”, arí dápijebu ñ. ²⁵Coreóvaje bu Jñmenijicv majicvre caiye ñi dápiayede ñi ñmei. Ñvatutarí, pueðarí, mearore jíjebu Jñmenijicure. Aru, “Jãve Jñmenijicv cubi mñaque”, ajebu ñ.

Jesúre ju aipðeva ne cójjiivaiye javró pueðavv aru coðobobevvna

²⁶Muja, jívv, que baru yópe ñaiye javv mujare. Muje cójjiivaiyede ñajarã

caiyede, parure n̄rajiv̄u caiv̄u m̄ja m̄je ũmei. Apev̄u m̄jacav̄u Salmos āmic̄ue ȳriaiyede ȳriaiȳr̄ajarama. Aru apev̄u m̄jacav̄u bueiyȳr̄ajarama. Apev̄u m̄jacav̄u soȳuȳr̄ajarama ape soȳuyede, J̄menijic̄ui j̄đovaiye b̄aquede, n̄re coapa. Apev̄u m̄jacav̄u ȳvaiyȳr̄ajarama apcamua ȳvaicamua ne majibecamuaque. Aru apev̄u m̄jacav̄u soȳuȳr̄ajarama aipe aiyyede iye ne ȳvaiyede apcamua ȳvaicamua ne majibecamuaque.

²⁷ M̄jacav̄u ȳvaiyȳr̄iv̄u baru apcamua ȳvaicamua ne majibecamuaque, ȳvajar̄ari p̄sar̄ā o ȳbecur̄ā qūv̄ura, c̄iñác̄u c̄iñác̄u, ũbenita c̄iñát̄uru āmev̄u. Aru soȳuȳe j̄av̄u apesu aipe aiyyede ne ȳvaiyede. ²⁸ ũbenita p̄escu ũi cubedu soȳuȳe majicu aipe aiyyede p̄eva ne ȳvaiyede apcamua ȳvaicamua ne majibecamuaque, ñame n̄pe ȳvabejar̄ari. Qūnora ina n̄pe ȳvajuroriv̄u bi ajar̄ari nore m̄je c̄ojij̄iñami j̄iv̄ui. Qūdata ar̄i d̄apijar̄ari na coapa ne ȳvajuroede ne baju aru J̄menijic̄uque.

²⁹ Nopedeca m̄jacav̄u soȳucaiȳr̄iv̄u baru p̄evare J̄menijic̄ui ȳvaiyede par̄éque, soȳujar̄ari p̄sar̄ā o ȳbecur̄ā qūv̄ura. Aru soȳuȳe j̄av̄u apesu n̄re coapa ina ȳvaiv̄u b̄acav̄u ȳpe Esp̄ritu Santo ũi ȳvaic̄ojeȳe n̄re. ³⁰ J̄menijic̄u ape soȳuyede ũi majide đaru apesu m̄jacacu nore dobacure, ñai soȳup̄escu soȳur̄i dajocajacur̄i, apesu ũi buoquiȳere aȳu soȳuȳ ũi m̄re. ³¹ N̄pe đar̄i, caiv̄u m̄jacav̄u soȳucaiȳr̄iv̄u p̄evare J̄menijic̄ui ȳvaiyede par̄éque buojar̄ajarama soȳuȳv̄u, c̄iñác̄u c̄iñác̄u, ũbenita c̄iñát̄uru āmev̄u, caiv̄u m̄je bueni majinajiȳere aiv̄u aru parure đar̄ajiȳere aiv̄u m̄je ũmei m̄je baju. ³² J̄menijic̄ui ȳvaiyede soȳucaip̄evarecabu soȳur̄i majidiv̄u ȳpe iye J̄menijic̄ui đaic̄ojeȳe ji majicaiyede m̄jare caride. ³³ J̄menijic̄u ye ũbebi p̄eva ne c̄ar̄ijovaiyede ne baju. ũbebi ne codoboboiyede. ũbebi ne ȳvaiyede caiv̄u c̄iñát̄uru.

Que baru đajar̄ā m̄ja ȳpe apenoa ĩmaroacav̄u J̄menijic̄ui p̄eva ne đar̄i c̄omajiȳere ne c̄ojij̄ivaiyede. ³⁴ M̄je c̄ojij̄ivaiyede mearore j̄inajiv̄u J̄menijic̄ure, nomiva ȳvaic̄ojememaratamu. Que baru bi ajar̄ari ina nomiva. Ȳpe J̄menijic̄ui đaic̄ojeȳede ũi soȳuȳe b̄aquepe Moisés b̄acure, j̄u aye j̄av̄u nomivare aru jipocatebejar̄ari na. ³⁵ Nomió ōi ȳvaru Jes̄ure j̄u aip̄eva ne c̄ojij̄ivaiyede, c̄uyojar̄otamu. Que baru ina nomiva majiȳr̄iv̄u baru apede ne j̄apiar̄i eabede, j̄eniari j̄ajarari n̄marepacure ne c̄urami.

³⁶ Coreóvajar̄ā m̄ja iyede. P̄eva soȳur̄i b̄abedejaquemav̄u J̄menijic̄ui ȳvaiyede m̄jare. M̄ja mamarc̄ucav̄urecabu āmev̄u j̄apiaiv̄u b̄acav̄u J̄menijic̄ui ȳvaiyede soȳuyede. Aru m̄ja qūv̄urecabu āmev̄u j̄apiaiv̄u b̄acav̄u diede. Que baru, “Maje c̄ojij̄ivaiyede mearore j̄inajiv̄u J̄menijic̄ure, ȳpe maje ũp̄e đar̄ajarev̄u”, ũbenina ar̄i d̄apiar̄idubejar̄ā m̄ja. ³⁷ Ācu p̄escu “J̄menijic̄ui ȳvaiyede soȳucaip̄escubu ȳu”, ar̄i d̄apiaȳu baru, coreóvac̄uȳme maje jabocu J̄menijic̄ui đaic̄ojeȳe b̄aquede iye ji toivaic̄ojeȳede apesure m̄jare. Aru Ācu p̄escu “J̄menijic̄ui Esp̄ritu Santo majide đabi ȳre”, ar̄i d̄apiaȳu baru, coreóvac̄uȳme maje jabocu J̄menijic̄ui đaic̄ojeȳe b̄aquede iye ji toivaic̄ojeȳede apesure m̄jare. ³⁸ Ācu p̄escu ũi j̄apiar̄i adabedu iye đaic̄ojeȳede, apes̄u m̄re ũi soȳuyede j̄apiar̄i adabejar̄ari.

³⁹ M̄ja, j̄iv̄u, que baru ȳpe đaiye j̄av̄u m̄jare. Pare ũjar̄ā J̄menijic̄ui Esp̄ritu Santo ũi soȳucare đaquiȳere aiv̄u m̄jare ũi ȳvaiyede par̄éque p̄evare. Aru, “Ȳvabejar̄ā”, abejar̄ā ina ȳvaiyȳr̄iv̄ure apcamua ȳvaicamua ne majibecamuaque. ⁴⁰ ũbenita caiye m̄je đaiyede m̄je c̄ojij̄ivaiyede, mearore j̄inajiv̄u J̄menijic̄ure, đajar̄ā m̄ja ȳpe p̄eđaiyȳere aru codobobobev̄u m̄re.

**Pablo ùi coyũino Cristoi nacajaino
mácarõra yainore jarũvarĩ**

(Mt 12.40, 28.16-17; Mr 16.14; Lc 24.34,
36; Jn 20.19; Hch 2.24-32, 8.3, 9.3-6)

15 ¹Mũja, jĩvũ, caride mũjare ãrũre ðaiyvũ yũ iye Jesús ùi yávaiye méne ùi meadaiyena põevare, ji coyũiyeye báquede mũjare. Iye coyũiyede ju ávũ mũja. Aru caride máre ju are nuñavu mũja. ²Mũja jáve ju are nuivũ baru Jesús ùi yávaiye méne, meadaimara marajáramu mũja. Ùbenita mũja jáve ju abevũ baru, meadaimara ámenajaramu mũja.

³Mamarũmũre Jesucristovacari coreóvare ðarejame yũre iye yávaiye paruéde caiye ape yávaiye pũeno. Aru quédeca nópe ùi coreóvare ðaiye báquepedeca, yúcapũravũ coreóvare ðacacu mũjare. Iyebu ùi yávaiye me. Cristo yaicárejameða maje ámeina teiye boje, yópe Jũmenijicũi toivaicõjeiye báquepedeca ùi yávaiyede. ⁴Apevu jarũvarejaimaða ùi baju bácarõre põe jarũvaino cũracobe jĩvũ. Aru yóbecurijãravũa yóboi Jũmenijicu nacovarejaquemavũ ùre yainore jarũvarĩ, apũcũyũre bediõva, yópe ùi toivaicõjeiye báquepedeca ùi yávaiyede máre. ⁵Jũmenijicu ùre nacovarĩburu yóboi, majecu Pedro járejameða Jesũre. Aru no yóboi, ina caipũcapũrũape paivũ apevu ùi yávaiye méne beorĩ coyũicõjeimara máre járejaimaða ùre. ⁶No yóboi, apevu quinientos paivũ baju majacavũ ùre ju aipõeva járejaimaða ùre cũinátũru. Iyebu nácavu jave yaivũ bácvũreca, ùbenita obedivũ nácavu apũrivũbu caride. ⁷No yóboi, Santiago aru ùi yóboi caivũ Jesús ùi yávaiye méne beorĩ coyũicõjeimara máre járejaimaða ùre.

⁸Aru buojainũmũre caivũ apevu ne yóboi, ùre jámejũrocũ, ùre járejacacu yũ. Que baru majivũ ñũja Cristore Jũmenijicũi nacovaimũ mácũre yainore jarũvarĩ. Ùre jámejũrocũbu yũ ùi oatũvaiye boje yũre. Ùre ju aipõevare boarĩ jarũvaiyũcũ bácu caivũ pũeno

oatũvarejame, pu ùi yávaiye méne beorĩ coyũicõjeimũva corebecũva, yópe juedocu ùi põeteiyepe põeva ne corenajiye jipocamia. ⁹Yũrecabu caivũ Jesús ùi yávaiye méne beorĩ coyũicõjeimara ne cãchinocacũpe páyu baju. Ji cujurĩ, boarĩ, ñãjine ðaiye báque boje Jesũre ju aipõevare, Jesús beobejebu yũre, ji coyũiquiyepe ayũ ùi yávaiye méne. ¹⁰Ùbenita Jũmenijicũi mearo ðacaiye boje yũre, caride apēcũpe páyvũbu yũ. Ñai põevare boarĩ jarũvaiyũcũ bácvũpe páyu ámevu yũ caride. Jũmenijicũi me boje, epedejaquemavũ yũre, ji memecaquiyepe ayũ ùre. Aru ùi nópe epeiye báque ámepeda ámevũ. Quénora memevũ yũ pũeno urarõ baju caivũ apevu ùi yávaiye méne beorĩ coyũicõjeimara pũeno. Ùbenita yávacari ji baju paruéque mememevũ. Quénora Jũmenijicũvacari cadateni, parũre ðaibi yũre, ùi me boje bojecũbeda, ji memecaquiyepe ayũ ùre. ¹¹Caivũ ñũja Jesús ùi yávaiye méne beorĩ coyũicõjeimara cũinátũrũra ñũje yávaiyede coyũicarã ñũja. Que baru ye baju ámevũ yũ coyũyũ bácu baru o apevu coyũivũ bácvũ baru Jesús ùi yávaiye méne mũjare. Cũinátũru coyũvaiyũbu Jesũi nacajaiye báquede ne boarĩ jarũvarĩburu yóboi ùre. Aru mũjavacari ju adavũ diede.

**Jesũre ju aipõeva ne nacajarajiye
yainore jarũvarĩ**

(Mt 22.44; Ro 5.12-18)

¹²Caivũ maja Jesũre ju aipõeva coyũvaiyũbu Jũmenijicũi nacovaiye báquede Jesucristore yainore jarũvarĩ, apũcũyũre cojedeca. Que baru apevu mũjacavũ yópe arĩ, “Yaivũ bácvũre ye nacovamecũyũme Jũmenijicu yainore jarũvarĩ, ne apũrãjiyepe ayũ bediõva cojedeca”, ùbenina arĩduyama na. Nópe ne arĩduiye jáve ámevũ. Árũmevũre coyũyama ina, nópe aivũ. ¹³Jũmenijicũi nacovamenu yaivũ bácvũre yainore jarũvarĩ, ne apũrãjiyepe ayũ cojedeca, Cristo yaivyũ bácu ùi nacovaimũ mácu

ámejebu yainore jaruvarí. ¹⁴ Aru Jūmenijicui nacovamenu Cristo yaiyú bácure yainore jaruvarí, ũi aruquiyepe ayu cojedeca, iye ñuje soyuiye úra bojecubejebu. Aru muje ju aiye máre úre bojecubejebu. ¹⁵ Pueno ámeno baju bájebu ñuje soyuiye yópe arí: “Nacovarejaquemavu Cristore yainore jaruvarí, ũi aruquiyepe ayu cojedeca”, ñuja borocujebu Jūmenijicurá. Jáve maru yaivu bácavu nacajamevure yainore jaruvarí, Cristo máre, yaiyú báciu, nacajari buojabedejaume. Que baru, “Cristore nacovarejaquemavu Jūmenijicu”, ñuje arí soyuiyede, borocujebu ñuja.

¹⁶ Jūmenijicui nacovamenu yaivu bácavure yainore jaruvarí, ne arurājiyepe ayu cojedeca, Cristo yaiyú báciu máre ũi nacovaimu mácu ámejebu yainore jaruvarí. ¹⁷ Aru Jūmenijicui nacovamenu Cristo yaiyú bácure yainore jaruvarí, ũi aruquiyepe ayu cojedeca, muje ju aiye bájebu ámededa. Aru bojecubejebu mujare. Que baru Jūmenijicu arumetebejebu cāreja muje ámeina teiyede. Que baru bǐjare ñujebu muja coatejuronivu Jūmenijicure jaruvarí. ¹⁸ Aru ina Jesúre ju aipōeva yaivu bácavu máre, coatejuronivu bácavu Jūmenijicure jaruvarí bǐjajebu javede. ¹⁹ Maja “Yaivu bácavure ye nacovamecūbe Jūmenijicu yainore jaruvarí Cristoi yaicáiyē boje majare boje” āri dāpiaivu baru, aru maja coreviv baru Jūmenijicu jáve mearo đacacuyure majare, maje cue boje Jesucristoque cūinávure, maje cuede ijāravni quédada, cōmaje ārojajebu maja caivu apevu pōeva pueno.

²⁰ Ūbenita jáve baju Jūmenijicu nacovarejaquemavu Cristore yainore jaruvarí, ũi aruquiyepe ayu cojedeca. Ūrecabe mamarumucacu caivu apevu yaivu bácavu jipocai arucuyu cojedeca, yaibécuyu bediōva cojedeca. Aru ũi nacajaiye báque boje, jáve majidivubu maja úre ju aipōevare máre Jūmenijicui nacovaimara mārājivure yainore jaruvarí ũi yóboi. ²¹ Cūináciu

ūmu ũi đaiye báque boje, caivu pōeva yaiváivubu. Quédaca apecu ũmu cūináciu ũi đaiye báque boje, pōeva majidivubu nacajarajivu yainore jaruvarí, arurājivu cojedeca.

²² Javede cūináciu ũmu mácu, ñai mamarumucacu báciu, ũi amíá Adán, coateyu báciu ũi baju Jūmenijicure jaruvarí yaidéjaquemavu, ũi ámeina teiye boje. Que baru caivu pōeva máre, ũi mácu pāramena, ũi mácupedeca yaiváivubu maje ámeina teiye boje. Quédaca, cūináciu ũmu, ñai Jesucristo, yaiyú báciu, Jūmenijicui nacovaimu mácu barejaquemavu yainore jaruvarí, arucuyu cojedeca. Que baru caivu úre ju aipōeva máre, úque curivu cūinávure, ũpedeca Jūmenijicui nacovaimara marajáramu maja yainore jaruvarí, arurājivu cojedeca. ²³ Majare nacovaijāravna cūvu yópe Jūmenijicui cōjeiyepe. Mamarumu cūinájāravure, Cristore nacovarejaquemavu Jūmenijicu yainore jaruvarí, ũi aruquiyepe ayu cojedeca. Aru apejāravure, Cristo ũi copaidaquijāravu baquinóre, caivu maja Cristo jinare nacovacuyume Jūmenijicu yainore jaruvarí, maje arurājiyepe ayu cojedeca.

²⁴ Dinumu maquinóre ijāravu cūiquiyebu. Caivu ina cōjeivure, caivu ina parurivure, aru caivu ina purucvarivure máre, ũi mavure, vaini tucuyume Cristo, náre jaruvarí. Aru jípacu Jūmenijicure, ũi mearore jímure, jaboteicōjecuyume caivu ũi jaboteimarare. ²⁵ Jaboteiye jaavu Cristore pu Jūmenijicui epeieta caivu ũi mavure ũi cuboba cāchinoi. Que teni Jūmenijicu jáđovacuyume ũi vaini ture đaiyede Cristore náre jaruvarí. ²⁶ Caivu pōevare yaiye jaavu. Yópe pōecu ũi maucu ũi vaini tuiyepe úre jaruvarí, nopedeca yaiyebu pōeva ne maucupe paiye, náre vaini turí. Ūbenita buojainumure, Jūmenijicui nacovaiye báque boje Cristore, yaiyú bácure, aru ũi nacovaiye boje maja ũi pōevare máre, ye yaibénamu maja bediōva cojedeca.

²⁷ Jūmenijicu toivaicōjenejaquemavu ũi yávaiyede Cristore vaini turí

jaboteicōjecuure caivure, caiyede máre. Ëbenita majidivubu maja ùi nópe cōjeiyede Cristore, ye jaboteicōjemecuyure jípacure. Que baru Jūmenijicure jaboteicōjeipōecu cubebi. ²⁸Cristo caivure, caiyede máre ùi vainí turí jabotequiyede, ùvacari, Jūmenijicui mácu “Mū, ji ju aimū, jabotejacu yure aru ji jaboteimarare máre”, acuyume Jūmenijicure. Que teni Jūmenijicu, ñai Cristore vainí turí jaboteicōjeñu macuyú caivure, jabotecuyume caivure, caiyede máre.

²⁹Apevu pōeva Jūmenijicuque jádovaicōjedama ne baju ocoque yaivu bācavure boje. Ëbenita Jūmenijicui nacovamenu yaivu bācavure yainore jaruvarí, bojecubejebu apevu ne jádovaiye Jūmenijicuque na māvavure boje ocoque.

³⁰Aru ñaja máre yaijurorivubu jāravua coapa, ñiye ñájiye boje ñiye coyurānuiyede Jesús ùi yāvaiye méne. Ñiye ñájiye máre bojecubejebu. ³¹Muja, jívū, iyede coyūquijivū yū mujare, ji torojue boje maje cuede maje jabocu Jesucristoque cūinávure. Pōeva boarí jaruvaiyuma yure jāravua coapa, ji coyūiye boje Jesús ùi yāvaiye méne. ³²Ji cuede Éfeso āmicurīmaroi, pare ñájiacacu yū, nócavu ne maucūvae boje yure yópe āimara jijecurivū ne maucūvaepe. Die ye bojecubejebu yure, jáve maru yaivu bācavu nacajamevure yainore jaruvarí. Majare ðaiye jaujebu yópe ne aiyepe, “Javena yainájichuvū maja. Que baru āri ūcuri torojurājarevū”, adama.

³³Que baru muje bajumia apesure jujoaicōjemejara. Ārūjara apesu ùi yópe arí coyūiyede: “Āmena pōevaque yóvayu baru, mearo ðarí cōmajiyede ārumetecuyume”, aquemavu.

³⁴Ārumevure tebejarā muja. Dajocajarā muje āmeina teiyede. Apevu mujacavu coreóvavevu cāreja aipe ārojacure Jūmenijicure. Coyūyubu diede, muje cūyoje tenajiyepe ayū muje ðaiyede.

Pablo ùi coyūino nacovarajimara ne baju mamabaju baquinóra

(1 Ts 4.15-17)

³⁵Apesu, yópe arí, jēniari jáquijichubi yure: “¿Aipe ðarí nacajarajidi maja,

yainájivu bācavu?” Aru, “¿Aipe ārojaquidi maje baju baquinó?” arí jēniari jáquijichubi. ³⁶Pōecu nópe jēniari jáñū maru, ye majibecutame. Jēvari coyūiyeque buequijivū mujare. Maje oteiyede jioi, pīaquíye jipocamia, oteiyabede pojeiye javvu. Oteiyabe pojeniburu yóboi, pīaquíyebu. ³⁷Trigo āmicue oteiyabede o apeyabe oteiyabede máre maje oteiyede, iye pīaquíye oteiyabepe paiye āmevu. ³⁸Maje oteniburu yóboi, Jūmenijicu píaré ðalbi caiye oteiyede coapa yópe “Que baquiyébu” ùi arí ðápiaye báquepedeca, ùi cuedaiye báquede caiyede.

³⁹Cūináturu āmevu caivu ne bajuá. Pōeva ne jiarua baju, aru āimara ne jiarua baju, mǐjina ne jiarua baju, aru moa máre ne jiarua baju, caivu coapa ne jiarua apabajure cuvama na. ⁴⁰Nopedeca cavarōcavu aru joborōcavu máre ne bajuá cūináturu āmevu. Cavarōcavu ne baju métamu, ne cuede cavarōi. Aru joborōcavu ne baju métamu, ne cuede joborōi. ⁴¹Ñai avía jāravucacu meacu bajube. Aru ñai avía ñamicacu máre meacu bajube. Ëbenita ñai ñamicacu jāravucacupe pēomemi. Aru ina abiácova máre meara bajuvacari, ùbenita aviávape paivu pēomema. Aru ina abiácova coapa apede pēodama na. Cūináturu āmevu cavarōcavu ne pēoiyeque.

⁴²Yópe vaiyepes oteiyabede, nopedeca vaiquíyebu Jūmenijicui nacovaquiyede yaivu bācavure yainore jaruvarí. Maja yainájivu bācavu maje baju bācarō, ne yuarí jaruvaibaju bācarō, pojequiyebu. Ëbenita maje baju mamabaju baquinó, maje nacajariburu yóboi yainore jaruvarí, ye pojebequiyebu. ⁴³Maja yainájivu bācavu maje baju bācarō, ne yuarí jaruvaibaju bācarō, bojecubentamu. Ëbenita maje baju mamabaju baquinó, maje nacajariburu yóboi yainore jaruvarí, bojecurō maquiyébu. Maja yainájivu bācavu maje baju bācarō, ne yuarí jaruvaibaju bācarō, parubentamu. Ëbenita maje mamabaju baquinó, maje nacajariburu yóboi yainore

jaruvarī, paruḡo maquiýebu. ⁴⁴Maja yainájivu bácvu maje baju bácarō, ne yuarī jaruvaibaju bácarō, mearo mateávū, maje cuede ijāravū. Ūbenita maje baju mamabaju baquinó mearo maquiýebu, maje curājiyede mamajāravu cūiméjāravū, maje nacajariburu yóboi yainore jaruvarī. Maje ijāravuquebaju cūe boje, majidivūbu maja mamajāravu cūiméjāravuquebaju máre cuquiyebu. Baju cubedu, arué máre cubevū.

⁴⁵Caride maja cvarivūbu maje baju yópe Adán mácuī baju bácarōpe, Jūmenijicūi iye báquede ū mácure. Yópe arī, toivaicōjenejaquemavū Jūmenijicū ūi yávaiyede: “Mamarumūcasū, ūi āmiá Adán, Jūmenijicūi cuedaimū marejaquémanū, arucūy ūi bajuque”, arī toivaicōjenejaquemavū. Ūbenita Adán mácuī yóbocasū, Cristo, maja mamajāravu cūiméjāravucavū maje mamarumūcasū, arure dayūbe majare maje ūmei. Que baru jícūyūme majare mamabaju, maje curājiyepe ayu jāravu cūiméjāravu baquinóre. ⁴⁶Aru maje arué máre quédecabu. Mamarumūre mamajāravu cūiméjāravuquebaju cūvabevū. Quénora mamarumūre ijāravuquebaju cvarivūbu. Aru no yóboi, maje nacajariburu yóboi yainore jaruvarī, mamajāravu cūiméjāravuquebaju cvarājaramu.

⁴⁷Ūnai Adán mácu, maje mamarumūcasū bácu, Jūmenijicūi cuedaimū mácu barejaquémanū joboque. Que baru joborōcasū barejaquémanū ū mácu. Ūbenita ūi mácuī yóbocasū, Cristobe cavarō mearo Jūmenijicūi curōcasū. ⁴⁸Caivū joborōcavū cvarivūbu maje bajure yópe ūai jobore jocarī dayū bácu ūi baju bácarōpe painore. Aru caivū cavarō mearocavū bárājivū cvarājaramu maje bajure yópe ūai cavarō mearore jocarī dayū bácu ūi bajupe painore. ⁴⁹Yópe caride maje cūvaepe maje bajure ūai jobore jocarī dayū bácu, Adán mácu, ūi baju bácarōpe painore, nopedeca cvarājaramu maja maje bajure ūai cavarō mearore jocarī dayū bácu, Cristo, ūi bajupe painore.

⁵⁰Muja, jívū, jāve soyūyūbu mujare iyede. Maja curivū buojabenajaramu no Jūmenijicūi jaboteinoi ijāravuquebajuque, maje cūvaede caride. Maje ijāravuquebaju cūiméjāravu āmevū. Quénora pojequiyebu. Que baru maja curivū buojabenajaramu no Jūmenijicūi jaboteinoi ijāravuquebajuque. ⁵¹Caride mujare soyūyūbu yū Jūmenijicūi yávaiyede jāvene, ūi jádovameno mácarōre jipocamia ūbenita jádovainore caride. Caivū maja, Jesúre ju aipōeva, yaibénajaramu. Ūbenita Jūmenijicūi oatūvacūyūme caiye maje bajuáre. ⁵²Maumejiena, yópe pōecu ūi mimiyepe, iye Jūmenijicūi japuicōjequiye japuino bubaino maquinóre jápuraquiye, Jūmenijicūi oatūvacūyūme maje bajuáre. Aru dīnūmū maquinómiarega maja Jesúre ju aipōeva yainájivu bácvūre nacovacūyūme Jūmenijicūi yainore jaruvarī, maje yaibénajiyere ayu cojedeca. ⁵³Oatūvaiye jauvū maje baju pojejuroribajure, maje cvarājiyere aivū arebaju cūiméjāravu. Oatūvaiye jauvū maja yaijūrorivūre, maje yaibénajiyere aivū.

⁵⁴Maja yaibénajivūre, maje curājiyede maje cūiméjāravuque, vaiquiyebu yópe Jūmenijicūi arī toivaicōjeiye báquepedeca ūi yávaiyede: “Caride pōeva yaibénajarama bediōva cojedeca. Jūmenijicūi buojaiibi vainī tūyū caivūre, caiyede máre, ūre maucvarīduivūre jaruvarī. ⁵⁵Pōeva vainī tuimara mácvūpe paivū ne yaijūroe boje, vainī tuimare paivū āmevū caride. Pōeva ūājine ūaimara mácvūpe paivū ne yaijūroe boje, ūājine ūaimare paivū āmevū caride”, arī toivaicōjenejaquemavū. ⁵⁶Ūbenita pōeva āmeina teivū ūājinajarama ne yainájiyede, ne āmeina teiye boje. Aru Jūmenijicūi ūaicōjeiyede ūi soyūiye báqueque Moisés bácvūre coreóvaivūbu maja ina pōeva āmeina teivūre ūājine ūarājimarare, ne āmeina teiye boje. ⁵⁷Ūbenita torojuede jīnajarevū Jūmenijicūre. Ūrecabe maje jabocu Jesucristore vainī ture ūare dayū majare

ãmeina teiyede jaruvãrĩ, maje cœ boje maje jabocu Jesucristoque cüinávũpe.

⁵⁸Que baru mũa, jívũ, ji umara, parũre nũjara mũa mũje ũmei, dajocabevũva mũa je aiyede maje jabocu Jesucristore. Me majidivubu mũa caiye mũa memecaiyede ũre bojecũede, mũa cœ boje ũque cüinávũpe. Que baru cainũmua pũeno urarõ baju ũre memecajarã.

Pablo ũi jícõjeino Jesúre ju aipõevare, ne cadatenajiyere ayũ névũ cũve cũvabevũre

(Ro 15.25-26; 2 Co 8-9)

16 ¹Caride coyũquijivũ iye jẽniari jáiyede mũa jínajiyena ina Jesúre ju aipõeva, cũve cũvabevũre, mũa toivaiye báquede yure paperayocaque. Đajarã mũa yõpe ji đaicõjeiye báquepe ina Jesúre ju aipõevare, cõjijivavũre Galacia ãmicurijoborõi. ²Sumana coapa domingo jãravũ, caivũ mũa coapa ãni epejarã tãutũrare, cadatenajivũ cũve cũvabevũre. Mũa ĩye báquede no sumana baji ãni epejarã mũa yõpe mũa ĩye báquepe. Que teni ji eaquiyede mũa yebai, tãutũrare vorĩdurĩ, ãni, jícõjeiye jaubequiyebu mũjare. ³Ji eaquiyे jipocamĩa, beojarã mũjacavũre, ina nũvarajivũre iye tãutũrare, mũa jĩcarãjiyede, Jerusalén ãmicurĩĩmaroita. Aru ji eaquiyede mũa yebai paperayocare jĩcũyũmu náre, ne nũvari jãdovarajiyere acũyũ Jerusalécavũ Jesúre ju aivũre coreipõevare, ne majĩnajiyepe ayũ ñamejare na aru yéde ne nũvaiyede. ⁴Dinũmũ maquinõre mearu ji dãpiainoi, yũ máre náque nũri, yũre yõvarãjarama.

Pablo ũi coyũino ũi đájũroede

(Hch 19.8-10, 21; 1 Co 4.17)

⁵Ji etaquiyede yore jocarĩ, vaicũyũmu Macedonia ãmicurijoborõi. No yõboi, eacũyũmu mũa ĩmaro Corintoĩ. ⁶Mautequijichvũ mũa yebai obediaviava baju. Yũ eayũ baru, mautescũyũmu mũaque nracogo

baede. Dinũmũ maquinõre que tedu, mũacapũravũ yũre cadateivũ buojarãjaramu, ji nũre nũquiyere aivũ áro ji nũquino apenoita.

⁷Obebejãravũa baju jãcũnũiyũbevũ yũ mũjare. Maumena vaiyũbevũ yũ mũa ĩmarore jocarĩ. Quénora mauteiyvũ yũ mũaque obediaviava baju, maje jabocu yure mauteicõjenu. ⁸⁻⁹Ūbenita obedivũ yõcavũ jãpiayũrivũbu Jesús ũi yávaiye méne. Náre bueiye javũ yure. Aru apenvũ obedivũ máre maucũvarĩduivũbu maje jabocu Jesucristore. Náre cãrijovaicõjeiyũbevũ ina Jesúre ju ájurorivũre. Que baru mautescũyũmu yore Éfeso ãmicurĩĩmaroi, pũ Pentecostés jãravũ, judíoiva nũa torojave teijãravũita.

¹⁰Timoteo máre, yũre páyũ, maje jabocu Jesucristore memecayũbe. Que baru ũi earu mũa yebai, me torojũcu cũre đajarã ũre. ¹¹Ūre ãmeina jámejara mũa. Quénora pueđajarã ũre. Aru cadatejarã ũre, ũi nũre nũquiyere aivũ cãrijimenoque. Yũ coreyũbu ũ copaidacũyũre ji yebai apenvũ majevũque.

¹²Caride coyũquijivũ iye jẽniari jáiyede majescu Apolorã mũa toivaiye báquede paperayocaque. Paredeca jẽniariducacu ũre, ũi yõvaquiyere ayũ majevũre ne jãranũiye báquede mũjare. Ūbenita dinũmũ mácarõre ũcarũravũ nũiyũbeteame. Apenvũmũ ũi buojaquinũmũ jãcũnũscũyũme mũjare.

Pablo ũi meaicõjeino Corintocavũre

(Hch 18.2; 1 Co 1.16)

¹³Me jãjara mũa. Ju are nũjara mũa maje jabocu Jesucristore. Jĩdũbejarã apenvũ ne ãmedãjũroede mũjare, mũa Jesúre ju aiyे boje. Aru parũre nũjara mũa mũa ũmei, mũa je aiyede Jesúre dajocabevũva. ¹⁴Caiye mũa đaiyeque ũjarã apevũre.

¹⁵Mũa, jívũ, me majidivũbu Estéfanas ũ jinaque ne borore. Nácarũravũ ju aima Jesucristore mamarũmũre, caivũ apenvũ Acaya ãmicurijoborõcavũ jipocai. Aru memecavaivũbu Jẽmenijĩcũĩ põevare, cadatenajivũ náre dajocabevũva. ¹⁶Ūvũ

yɛ mɛje ju aiyede náre. Náre aru apevu majevu nápe paivure, apevure cadateipõevare aru memecaipõevare máre, ju arí jaboteicõjejara mɛjare.

¹⁷Torojuvu yɛ ina Estéfanas, Fortunato, aru Acaico máre ne edaiye báquede yore. Nácapũravu cadateivubu yure yópe mɛje cadatejuroepe yure, curivu buojaru yáque. ¹⁸Parure nure ðaivubu yure ji ũmei, yópe ne parure nure ðaiyepere mɛjare máre mɛje ũmei. Náre aru apevu nápe paivure máre “Meavu”, arí pueðajarã mɛja.

¹⁹Caivu ina Jesúre ju aipõeva cójjivaivu Asia ãmicurijoborõi meaicõjeðama mɛjare. Aquila aru Priscamaque aru ina Jesúre ju aipõeva

cójjivaivu ne cãrami jívni urarõ meaicõjeðama mɛjare, ne cɛe boje Jesucristoque cūinávure mɛjaque.

²⁰Caivu Jesúre ju aipõeva yore curivu meaicõjeðama mɛjare. Me jacyujarã mɛja mɛjevure mɛje jivare nuri, mɛje Jãmenijicu jina mae boje. ²¹Caride yávacari, Pablo, toivaivu, meaicõjeñu caivu mɛjare.

²²Ácu põecu ñi ũbedu maje jabocu Jesucristore, Jãmenijicu ñájine ðajacurí ũre toabo cūiméboi cainumna. iMu, maje jabocu Jesús, ðajacu! ²³Maje jabocu Jesucristo mearo ðacajacurí mɛjare bojecubeda ñi me boje. ²⁴Yɛ uvu caivu mɛjare curivure Jesucristoque cūinávure. Quénoramu.

2 Corintios

Mamabuinore coyuiyebu Pablo bácu ũi toivaicōjeiye báquede yóbocayoca paperayocare Corinto āmicuriimarocavu Jesúre ju aipōevare. Pablo bácu judíovacacu bácuvacari, Jesús ũi yávaiye méne beorí coyucōjeimū marejaquémavu, coyucuyū ũi yávaiye méne judíova āmevure, judíova ne ju abe boje ũi coyuiyede. Lucas bácu coyurejaquemavu Pablo bácu borore Hch 7:57-8:1, 9:1-31, 13:1-28:31, aru ũi cuede Corinto āmicuriimaroi 18:1-18. Javede Pablo bácu toivacaipōecu bácu toivaicōjenejaquemavu pucayoca ũi paperayocare Tesalónica āmicuriimarocavure aru ũi mamayoca paperayocare Corinto āmicuriimarocavure. Pablo bácu coyurejaquemavu ũre toivacaipōecu bácu aipe ũi toivacaquie báquede diyocare. Toivaicōjenejaquemavu diyocare āniuju bácarōre 55 d.C., yóbecu ũi cuscunuyede, coyucuyū Jesús ũi yávaiye méne. Majidivū ne dápiayepe, curejaquemavu Filipos āmicuriimaroi ũi toivaicōjeiyede diyocare (Hch 20:1-2).

Diyocaque Pablo bácu coyurejaquemavu aipe Jūmenijicu “Yópe đajarā muja boropatenbenajivū ji jáinore”, ũi yóboque coyuiye báquede pōevare. Aru coyurejaquemavu aipe ũvacari Jesús ũi yávaiye méne beorí coyucōjeimūre, bueirpōeva borocurivū ne cue báque boje Corinto āmicuriimaroi Jesúre ju aipōeva jēneboi. Ina bueirpōeva borocurivū ũbenina coyurejaquemavu ape yávaiyede, Jūmenijicu “Yópe đajarā” ũi yávaiye jāve āmene. Aru “Pablo āmemi Jesús ũi yávaiye méne beorí coyucōjeimū” ũbenina arí coyurejaquemavu. Diyoca coricai Pablo bácu Jesúre ju aipōevare jícōjenejaquemavu jecubevūva ne cuvaequede cuevubevure, ne cadatenajiyepe ayū náre (caps. 8-9).

Pablo ũi meaicōjeino Corintocavure

(Hch 18.1)

1 ¹Yū, Pablo, toivaicōjeivū apesure iyoca paperayocare. Meaicōjeivū muja cōjijivaivū Corinto āmicuriimarocavu Jūmenijicui pōevare aru caivū apevū Acaya āmicurijoborōcavu Jūmenijicui pōevare máre. Jūmenijicu beorí epeibi yure Jesucristoi yávaiye méne beorí coyucōjeimaracacure. Timoteo máre, majesu ũi ju aipe boje Jesúre majapedeca, meaicōjeimi mujare. ²Majepacu Jūmenijicu, maje jabocu Jesucristomaque, mearo đacajacurí mujare bojecubeda ũi me boje. Aru torojurí cure đajacurí mujare máre cārijimevūva.

Maja cadateimara maje nājijyede

(1 Co 15.32)

³Jínajarevū mearore Jūmenijicure, maje jabocu Jesucristoi mearore jímure,

jípacure máre. Majepacu Jūmenijicu cōmaje āroje jáimi majare cainumua. Aru cadateibi majare cainumua, ũi parure đaiye boje majare maje ũmei. ⁴Cainumua maje nājijyede, majepacu Jūmenijicu parure đarí maje ũmei, cadateyube majare, majacapuravū maje cadatenajiyepe ayū apevū nājivure. Yópe ũi parure đaiyepa majare, nopedeca maja parure đavivū apevure máre. ⁵Yópe Cristoi urarō nājijye báquepe, nopedeca maja máre urarō nājivūbu. Aru yópe Jūmenijicui urarō cadateiye báquepe ũre, nopedeca urarō cadateyube majare, maje cue boje Jesucristoque cūinávure. ⁶Nūja nājivūbu, buojarājivū cadateivū mujare, muje parurājijyepa aivū muje ũmei aru muje meadaimara marajijyepa aivū máre. Jūmenijicui cadateiyede nūjare ũi parure đaiyede nūje ũmei, coreóvare đalbi nūjare aipe đaiye jaurōre nūjare, nūje cadatenajiyepa ayū mujare,

parure ðarí mujare muje úmei. Que baru muja máre muje ñájiyede napini buojarájivubu muje ñájinajijárvavu baquinói yópe ñuje napiyepedeca ñuje ñájiyede. ⁷Majivu ñuja muje ñájiyede yópe ñuje ñájiyepedeca, Jümenijicu cadateni parure ðacuyure mujare máre muje úmei, yópe üi cadateni parure ðaiyepedeca ñujare ñuje úmei. Que baru jáve napini coreivubu ñuja me baju vaiquiyepa aivu mujare.

⁸Muja, ñujevu, uvu ñuja muje majinajiyede ñuje napiye báquede ñájiño uraró bajure no Asia ámicurijoborói. Pare ámeno ñuje ñájiye boje, ye napini majibetecará ñuja. “¿Jáve yainájivu bária?” arí dápiaríducará ñuja. ⁹Jümenijicu nópe arí dápiacójeñume, ñuje napini corebenajiyepa ayu ñuje baju cadatenajiyede. Quénora jáve napini coreiye jauteavü ñujare Jümenijicure, ñai nacovañu ina yaivu bávavure yainore jaruvarí, üi cadatequiyepa ayu ñujare, yaijörorivu bávavure. ¹⁰Aru Jümenijicu jáve meadame ñujare iye ñuje yaijöroró mácaróre jocarí. Aru ñujare meadacuyume ñuje ñájiyede jaruvarí. Que baru jáve napini coreivubu ñuja úre. Majivu ñuja jáve meadacuyure ñujare ñuje ñájiyede jaruvarí cainumua. ¹¹Que baru uvu ñuja muje cadatenajiyepa aivu ñujare muje jëniaiyede Jümenijicunque ñujare boje. Obedivu pöeva ne jëniaiyede Jümenijicunque ñujare boje, mearo ðacacuyume ñujare. Aru ne jáiyede üi mearo ðacaiyede ñujare, obedivu pöeva torojuede jínajarama úre.

**Aipe teni Pablo üi jácunumeno
mácaró Corintocavure yópe üi aiyepedeca
báquedepedeca**
(Hch 18.5, 19.21; Ef 1.4)

¹²Apevu mujacavu übenina arí coyuríduyama ñujare borocurivure. Übenita ne que aiyepedeca jáve ámevu. “Ðadavü maja yópe ðaiye jauróre majare Jümenijicui jáinore”, ñuje arí dápiayepa torojurivubu ñuja. Coreóvaivubu ñuja cainumua ðarí

cómajivure jujovabevüva aru ámeno cubevüva máre pöeva Jesúre ju abevüque aru püeno baju muja Jesúre ju aipöevüque. Übenita nópe ðarí buojabevü ñuja ñuje majiéque. Quénora Jümenijicu nópe ðarí majide ðaibi ñujare bojecubeda üi parué majiéque. ¹³⁻¹⁴Cainumua ñuje paperayocare, ñuje toivaicójeiyede apesure mujare, jári boroteni coreóvarí buojajebu muja. Übenita caride caiye ñuje toivaicójeiyede apesure coreóvabevüreca cáreja, jáve napini coreyubu yu, muje coreóvarájiyepa ayu caiye iye ñuje toivaicójeiyede apesure mujare. Que baru maje jabocu Jesú copaidaquiyede caivu maja torojurájaramu. Mujacapuravu torojurájaramu ñuje bueiye báque boje mujare Jesús üi yávaie méne. Aru ñujacapuravu torojurájaramu muje ju aiyepedeca boje üi yávaie méne.

¹⁵⁻¹⁶Ji coreóvaie boje diede, arí dápiaríducacu jácunucuyure muje yebai mamarumü, ji nuiyede Macedonia ámicurijoborói aru ji copaiyede nore jocarí máre, muje cadatenajiyepa ayu yure nure nucuyure pu Judea ámicurijoboróita. Püque ji jácunuiyede mujare, püque Jümenijicu mearo ðacajebu mujare. ¹⁷Yu nópe arí dápiaríduyu bávavacari, ape borore ji jápiaríburu yóboi, oatuvacacu ji dápiainore. Que baru numetevü muje yebai cáreja. Ji nume boje cáreja, apesü mujacavu yópe borocuma yure. “Pablo jujovaibi majare. Ijáravüvavu Jesúre ju abevü, übenina coyüibi. Üi dápiayede üi ðaquiyede üi baju cadateiyurí, apesüre ye cadateiyubebi. Maumena üi ju aiyepedeca báquede oatuvaibi, bi acuyü. Que baru pücaümea cubi ü”, übenina adama yure. ¿Ju aivurü muja ne nópe arí coyüinore yurá? ¹⁸Ne nópe arí coyüiye yurá jáve ámevu. Jümenijicui jáinore jáve coyuyubu mujare. Jümenijicu pücaümea cubecu, oatuvabecu, ye übenina arí coyubebi. Jümenijicu “Yópe ðacuyumu” ayu baru, jáve ðayu apa. Aru ñuja máre pücaümea cubevü, oatuvabevü,

ye ũbenina arĭ coyũbevu. Ñũja “Yópe ðarājaramu” aivu baru, jāve ðaivu apa. Que baru yũ jũ ayũ baru apede, ye oatuvabevũ. ¹⁹Jāvetamu no, ji ðaiye boje yópe Jũmenijicui mácu Jesucristoi ðaiyepe. Javede Silvano, Timoteo, aru yũ máre coyũcarā mujare Jesús ũi yávaiye méne. Jesúrecabe pũcaũmea cubecu, oatuvabecu, ye ũbenina arĭ coyũbecu. Cainũmua “Yópe ðacũyũmu” arĭ coyũyũ, jāve ðayũbe yópe ũi aiye báquepedeca. Jũ ayũ baru, ye oatuvabebi.

²⁰Jesucristorecabe jũ ayũ caiye Jũmenijicu “Yópe ðacacũyũmu pœvare”, ũi aiye báquede. Ũrecabe ðayũ caiyede yópe Jũmenijicui aiye báquepedeca, mearo ðacacũyũ caivu majare ũre jũ airœvare. Que baru cainũmua maje mearore jýyede Jũmenijicure, “Cristoi ðaiye báque jāvemu. Quédecabu”, arĭ coyũvaivũbu Jesucristoi paruéque. Aru Jũmenijicu torojubi dieque.

²¹Jũmenijicurecabe parũre ðayũ ñũjare aru mujare máre maje ũmei, maje cuede Jesucristoque cũinávũpe. Ũrecabe beoyũ báciu majare ũ jinava. ²²Ũrecabe ðaroyũ báciu majare ũi Espiritu Santore, ũi cuquiyepe ayũ majaque, jáðovacũyũ majare Jũmenijicu jinava. Aru ũrecabe majide ðayũ majare ðacacũyũre caiye iye méne yópe ũi aiye báquepedeca, ũi daroiye báque boje ñai Espiritu Santore.

²³Caride yũ toivaicœjecuquijivũ apesũre mujare, coyũcũyũ aipe teni oatuvayũ básũre “Yópe ðacũyũmu”, ji arĭ dápiaiye báquede. Jũmenijicuvacari majibi jāve ji coyũiyede. Ũrecabe majicũ caiye ji dápiaiye de ji ũmei. Yũ nũmetevũ cäreja mujere ĩmaro Corinto, ji jaraiyũbe boje mujare. ²⁴Ñũja jaraiyũ baru mujare mujere ðaiye boje, yópe jabova parũrivũ ne cœjeiyepe, ñũja jũ aicœjeiyũbevu mujare aipe jũ aiye jauřore mujare. Mũja me coreóvaivũbu aipe mujere jũ aiyede Jesúre ðajocabevũva, parũrivũ mujere ũmei. Quénora jaraiyũ baru mujare, cadateiyũrivũbu mujare, mujere torojurájiiyepe aivu mujere ũmei.

2 ¹Yũ nũñũ maru mujere yebai caride, jarajebu mujare. Aru

jararu mujare, chĩojebu mujere. Ũbenita nũiyũbevu yũ mujere yebai, mujare chĩore ðacũyũ bediáva cojedeca. Que baru copainũmetevũ yũ cäreja nore. ²Mũjarecabu torojũre ðaivu yũre. Que baru yũ chĩore ðayũ baru mujare, yũ máre chĩojebu. Caivu maja chĩojebu, yũ nũñũ maru mujere yebai caride. ³Que baru toivaicœjecacu apesũre mujere apesũre paperayoca bácarõre, jaracũyũ mujare, mujere meadarájiiyepe ayũ mujere ðaiyede ji nuquiye jipocamia, ji jaraiyũbe boje mujere mujere jivateinoi. Ji jaraiyede mujere, torojubevu yũ. Ũbenita mujarecabu yũre torojũre ðajũrorivũ baju. Que baru yũre chĩore ðaiye jaubevu mujere. Me coreóvaivũ yũ iyede. Mujere torojubedu, yũ máre torojubevu. ⁴Chĩõñũ baju ji oriye toivaicœjecacu apesũre no paperayoca bácarõre. Parẽ ñájicacu yũre jaraiye jauẽ boje mujere. Ũre toivaicœjemetecacu, chĩore ðacũyũ mujere. Quénora ũre toivaicœjecacu, mujere majinajiiyepe ayũ pare ji ũede mujere.

**Pablo ũi ārũmetecœjeino
Jesúre jũ airœvare apesũ ũi
ãmecoroino mácarõre ũre**

⁵Ñai mujere yebai cücü amecoroyũ básũ yũre chĩore ðabeteame yũre cũinácũva. Quénora mujere máre chĩore ðaquemavũ ũ. O, “Apevu mujacavũre chĩore ðaquemavũ”, aiye jauvũ yũre, ji cõmaje aroje jáiye boje ũre. ⁶Iye mujacavũ obedivũ mujere ñájine ðaiye báque ũre, ũi amaina teiye boje, ũarõ bajubu. Ape ñájiiye jaubevu ũre. Quénora ðajocajará mujere ñájine ðaiyede ũre. ⁷Que baru caride ārũmetejarã ũi amaina teiyede. Ũre cadateni, parũre ðajarã ũi ũmei. Que ðaru, ũ ðajocabecũyũme ũi jũ aiyede Jesúre, ũi pare chĩoiye boje mujere ñájine ðaiyede ũre. ⁸Parũřoreca jēniaivũ mujere mujere coyũiyede aru mujere jáðovaiyede máre bediáva cojedeca ũre mujere ũmũre. ⁹Toivaicœjecacu apesũre no paperayoca bácarõre, majiacacũyũ mujere ñájine ðaiye jauřore ñai ũmũre. Mũja cainũmua jũ

aivure yure majiyutecacu yu. Torojavu yu, majicu mije daiye báquede yópe ji majicaiye báquipedeca. ¹⁰Muje arumetedu ñi ámeina teiyede, yu máre arumetecuyumu ñi ámeina teiyede. Yure arumeteiye jauéde apecui ámeina teiyede, arumeteyubu diede mujare boje, caivu mija mije curájiyepe ayu me mije baju, aru Cristore boje, ñi jáiye boje caiye ji daiyede, aru ji dápiayede máre. ¹¹Maje arumetedu apecui ámeina teiyede aru cadatedu úre, ñai abujuvai jabocu, Satanás, majare ye buojabebi dápiacójeñu aru ñaicójeñu máre, yópe ñi dájueroepe maje arumetebedu apecui ámeina teiyede aru cadatebedu úre. Me majivu maja aipe árojae ñai jujovayu ñi daiyede.

Pablo ñi cãrijino ñi cuede Troai
(Hch 20.1)

¹²Ji coyucunuiyede Cristoi yávaiye méne, eacacu Troas ámicurriimaroí. Obedivu nócavu jápiayuriduima diede. Que baru maje jabocu Cristore memecayu buojariducacu. ¹³Ubenita pare cãrijinũ batecácu mujare. Majecu Titore, ji jaroimu mácure mije yebai, “Úre sorucuyumu yui”, arí dápiariduyũ batecácu. Ubenita úre eabtecacu nore. Que baru, “Nũñũmu” ji aríburu yóboi nócavure, etacacu nore jocarí, vocunucuyũ Titore Macedonia ámicurijoboróí.

Cristo ñi vainí ture ñaino
majare maje mauvare

¹⁴Torojuede jínajarevu Jümenijicure. Maje cue boje Jesucristoque cünávũpe, cainũma majare vainí ture ñayube Jümenijicu maje mauvare, ina majare coyucójemenudivure Jesús ñi yávaiye méne. Coyure ñayube Jesús ñi yávaiye méne caino maje nuino, obedivu pöeva ne coreóvarájiyepe ayu úre, yópe pöescu bicovaiyepe mumijuede, eaquiyepe ayu cainoi. ¹⁵Jümenijicu me baju jáñũme maje coyuiyede Jesús ñi yávaiye méne cainoi. Yópe caivu pöeva ne víyepe mumijuede ne bicovaiyede, nopedeca

caivu pöeva jápiaivu maje coyuiyede Jesús ñi yávaiye méne coreóvaivubu diede. Apevu diede jápiaivu meadare nuivubu cavaró mearo Jümenijicui curóí, aru apevu bíjare nuivubu Jümenijicure jocarí toabo cüiméboi. ¹⁶Ina Jesús ñi yávaiye méne jápiarí ju abevũ ubema maje coyuiyede yópe pöeva ne víyũbere áme corajuede. Maje coyuiye boje, nácapüravu coreóvaivubu ne baju yaináivure aru bíjare nurajivure Jümenijicure jocarí toabo cüiméboi. Ubenita ina Jesús ñi yávaiye méne jápiarí ju aivu uma maje coyuiyede yópe pöeva ne víyũbere mumijuede. Maje coyuiye boje, nácapüravu coreóvaivubu ne baju apuráivure aru meadare nurajivure cavaró mearo Jümenijicui curóí. Pöescu cubebi ñi baju coyuiye majicu iye yávaiyede, yaidé ñayũ apevure aru apure ñayũ apevure máre. Quénora maja coyuvubu diede, Jümenijicui cadateiye boje majare. ¹⁷Obedivu pöeva coyuvubu Jümenijicui yávaiyede, ñajivu táuturare yópe cuede jíní bojeaipöevare. Apevu mujacavu ubenina arí coyuriduyama ñjare nápe paivure. Ubenita ne que aiye jáve ámevu. Quénora ñjia Jümenijicui daroimaramu. Uí coyucójeimaramu ñi yávaiyede ámeno cubevũva ñi jáinore, ñjje cue boje Jesucristoque cünávũpe.

Pablo ñi coyüino Jümenijicu “Yópe ñajará mija, boropatebenajivu ji jáinore”, ñi yóbocaró coyüino mácaró pöevare Cristoque
(Ro 8.29; Gá 4.19; Fil 3.10)

3 ¹Apevu pöeva ámecororájiçũma ñjare bedióva cojedeca, ñjje nópe aiye boje. “Pablojá ‘¿Meara márica?’ aivubuya”, ubenina aivureca, ne nópe ámecoroíye ñjare jáve ámevu. Javeita ñjare coreóvañavũ mija. Que baru apevure paperayocare toivacaicójeiye jaubevu ñjare, mije coreóvarájiyepe aivu ñameja ñjare aru ye paruéde cvarivure. Iyere paiyoca paperayocare toivacaicójeiye

jaunu arevu pōevare. Ūbenita mujare jádovaiye jaubevu ñujacapuravure paperayocare, muje majinajiyeye aivu ñujare Jūmenijicui daroimarare. Aru mujare toivacaicōjeiye máre jaubevu ñujacapuravure paperayocare, arevu ne majinajiyeye aivu ñujare Jūmenijicui daroimarare. ²Mujavacari iyepe paiyoca paperayocape paivubu. Que baru jaubevu ñujare paperayocare, ñameja ñujare aru ye paruéde cvarivure coyuiyocare. Caivu pōeva mujare jáivu majinajarama jáve ñujare Jūmenijicui daroimarare aru ñi paruéde cvarivure, muje oatuvaiye báque boje muje ðaiyede, ñuje coyuiye báquede mujare Jesús ñi yávaiye méne. Mujare pare unu ñuja. Que baru mujarecabu paperayoca Cristo toivaino mácarōpe paivu ñuje ūmei, ñuje ārumetebenajiyeye aivu mujare. ³Cristo ūbi pōevare ne járajiyeye ayu caiye iye ñi mearo ðacaiyede mujare, ñi oatuvare ðaiye báquede mujare, muje ju aiye boje ñi yávaiye méne, ñuje coyuiye báquede mujare. Que baru mujarecabu paperayoca “Mearatamu na”, ñi arí toivaino mácarōpe mujare aru ñi jícōjeinope paivu ñujare, ijārvucavu ne coreóvarājiyeye ayu ñi paruéde. Ūbenita toivabeteame ñeminicoroque paperayocarā, aru buraiyoque cūravearā máre. Quénora oatvaicōjequemavu ñai Espiritu Santore mujare, muje ūmene aru muje ðaiyede máre.

⁴Jāve majidivubu ñuja me nuriéna coyuvure Jesús ñi yávaiye méne, Jūmenijicui daroiye báque boje ñujare aru Cristo beorí coyucōjeiye báque boje ñujare. ⁵Ñujavacari Jesús ñi yávaiye méne nuriéna coyurí ye majibevu ñuje baju majiéque. Quénora Jūmenijicurecabe coyurí majide ðayu ñujare diede me nuriéna. ⁶Jūmenijicūvacari majide ðarejame ñujare, ūre memecaivure, ñuje coyurājiyeye ayu “Yópe ðajarā muja, boropatebenajivu ji jáinore”, ñi yóbocarō coyūino mácarōre pōevare Cristoque. Toivacaino mácarō āmenejaquemavu iye ñi yóbocarō coyūino mácarō

Cristoque, pōeva maje majinajiyeye ayu aipe ðaiye jaurōre majare. Quénora ñi yóbocarō coyūino mácarōque Cristoque Jūmenijicui Espiritu Santo majide ðayu aipe ðaiye jaurōre majare. Jūmenijicui ðaicōjeiye ñi toivacaicōjeiye báqueque Moisés bácare pōeva yaivu bácvupe ne ūmei coateimara májebu Jūmenijicure jaruvarí, maje ðaiye majibe boje yópe ñi ðaicōjeiye. Ūbenita Jūmenijicui Espiritu Santoi ðaicōjeiyeque pōeva apurivubu maje ūmei, ñi ðare ðaiye boje majare yópe ñi ðaicōjeiye.

⁷Javede “Yópe ðajarā muja, boropatebenajivu ji jáinore”, Jūmenijicui arí coyurejaquemavu pōevare, ñi coyuiye báquede ñi ðaicōjeiye Moisés bácare. Iye ðaicōjeiye toivaicōjenejaquemavu cūravearā. Dinumu mácarōre paredca Jūmenijicui meacu baju ñi parué pēorejaquemavu. Que baru Moisés bácu jiva máre pēorejaquemavu. Iye pēoiye bíjare nuiyedeca, ānina Israel bácu pāramena mácvu ye jáivu buojabedejaquemavu ñi jivare, pare pēoiyeque boje. Que teni Jūmenijicui jádovarejaquemavu meacu bajure ñi parué pēoiyeque, ñi majide ðaiye báquede pōevare aipe ðaiye jaurōre náre ñi ðaicōjeiyeque, iye coatede ðaiye pōevare ūre jaruvarí. ⁸Que baru pūeno baju jádovarejaquemavu meacu bajure ñi parué pēoiyeque, ñi majide ðaiyede pōevare aipe ðaiye jaurōre majare ñi Espiritu Santoque, ñai arupe ðayu majare maje ūmei, maje curājiyeye ayu Jūmenijicūque cainumca.

⁹Jūmenijicui, ñi javecarō coyūino mácarōque Moisés bácuque, pōevare boropateivure jári, ñajicōjenejaquemavu náre. Ūbenita ñi yóbocarō coyūino mácarōque Cristoque, pōevare boropatebevure jári, meadarejaquemavu majare. No ñi javecarō coyūino mácarōque Moisés bácuque, jádovarejaquemavu meacu bajure ñi parué pēoiyeque. Ūbenita yo ñi yóbocarō coyūino mácarōque Cristoque,

pueno baju jádovarejaquemavu meacu bajure ñi parué pëoiyeque. ¹⁰ Ñi yóboque coyuquiye jipocai, no ñi javecarõ coyuino mácarõ parurejaquemavu. Ñbenita yo ñi yóbocarõ coyuino mácarõ Cristoque pueno baju parurõtamu. Que baru yóboquede ñi coyrĩburu yóboi, no javecarõ ye parubevu. ¹¹ Jümenijicui coyuíyede no javecarõre Moisés bácuque, “Cüiquíyebu”, arí dápiarejaquemavu. Ñbenita ñi yóboque coyuíyede Cristoque, “Cüiméquiye”, arí dápiarejaquemavu. No ñi coyuino mácarõ cüiquínoque jádovarejaquemavu meacu bajure ñi parué pëoiyeque. Ñbenita yo ñi coyuino mácarõ cüiméno maquinóque pueno baju jádovarejaquemavu meacu bajure ñi parué pëoiyeque.

¹² Ññje jáve napini coreíye boje Jümenijicu jádovare nucuyure meacu bajure ñi parué pëoiyeque, ññje coyuíyede Jesús ñi yávaiye méne, jidubevuva coyvavuvu diede.

¹³ Moisés bácu, ñai cümañu mácu ñi jivare cuitótecajeque ñnina judíova, Israel bácu páramena mácvu, ne jámenajiyere ayu iye pëoiyede bíjare nuíyede ñ mácvure jocarí, coyrejaquemavu Jümenijicui yávaiyede jávene avenu pëovare obebeñuare. Ñbenita ññjacarüravu coyvuvubu Jümenijicui yávaiyede jávene caivu pëovare cainumua. ¹⁴ Ñnina judíova ye coreóvaivu bujabedejaquemavu ne jári boroteiyede Moisés bácu coyuíye báquede Jümenijicu “Yópe ñajarã muja, boropatebenajivu ji jáinore”, ñi javecarõ coyuino mácarõre.

Aru quédecabu caride máre. Ye coreóvaivu bujabema ina judíova, yópe ne cümaiyepe ne ümene cuitótecajeque. Pu ne cuiyeta Jesucristoque cüinávure, coreóvaivu bujarãjarama na. Cristo quécara majibi yópe cümaicajede ñni jaruvaiyepe. ¹⁵ Pu carita ne jári boroteiyede Moisés bácu coyuíye báquede Jümenijicui javecarõ coyuino mácarõre ye coreóvaivu bujabema ina judíova, yópe ne cümaiyepe ne ümene cuitótecajeque. ¹⁶ Ñbenita pöescu

ju aiyepe maje jabocu Jesucristore, coreóvaivu bujoaiibi Jümenijicui javecarõ coyuino mácarõre, yópe icaje cümaicajede ñni jaruvaiyepe. ¹⁷ Maje jabocu Cristo cüinávure ñai Espíritu Santo. Aru ácu pöescu cuvacu ñai Espíritu Santore, abujuvai jabocui cöjeimu ñmemi. ¹⁸ Caivu maja curivubu yópe cuvarepe maje jiva cümamejivare, maje coreóvaíye boje Jesucristore. Yópe jivaru cümamedu jádovaiyepe ñai jáñu nore, nopedeca maja jádovavubu avenu maje jabocu Cristo meacu baju ñi parué pëoiyede maje cuvarede, maje cue boje éque cüinávure. Maje coreóvare návaiyede ére cainumua, oatuvare návavubu maja, épe tenajivu. Járvua coapa pueno baju jádovare návavubu ñi parué pëoiyede maje ñaiyeque. Nópe ñare ñayube maje jabocu Cristo. Érecabe ñai Espíritu Santo.

4 ¹ Jümenijicu ñi cömaje ñroje jáíye boje, ére memecacöjeimi ññjare, ññje coyrãjiyepe ayu Jesús ñi yávaiye méne. Que baru ñetubevuva diede coyure nurajaramu ññja. ² Ññje coyuíyede, ye ñabevu meatenajivu ññje baju avenu pueno yópe ññjare ñmecororíduivu ne aiyepe. Ye cuyoje tede ñabevu ññja. Yavenina máre yéde ñabevu ññja. Jujovabevu pëovare. Aru oatuvabevu Jümenijicui yávaiye méne. Quénora caiye Jümenijicui yávaiye méne coyvavuvubu yéde yavebevuvu, oatuvabevuva, aru jujovabevuva máre. Nópe ñari Jümenijicui jáinore jádovavubu caivu pëovare ñameja ññjare aru ye paruéde cuvavuvure, ne mearo dápiarãjiyepe aivu ññjare.

³ Avenu pöeva coreóvaivu bujabema ññje coyuíyede. Ñbenita nárecabu quévura ina bíjare nuívu Jümenijicure jocarí toabo cüiméboi. ⁴ Ññje coyuíyede Jesús ñi yávaiye méne, náre jápiarí eabede ñai ñai abujuvai jabocu Satanás, ñai jaboteyu ijárvucavu Jümenijicure coreóvabevure. Pöeva ne jápiarí earí ju aiye iye yávaiye méne yopedecabu ne jájuroe Cristo meacu

baju ñi parué pëoiyede, ñuje coyuiyede diede. Ëbenita yópe jári eabecu ñi jámepe pëoiyede, nopedeca ina pöeva diede ju abevu coreóvabema Cristo, ñai cūináturu jípacu Jūmenijicuque, meacu baju, ñi parué pëoiyede, yópe ne jári eabepe diede. ⁵Ñuja coyubevu ñuje borore, pöeva ne pueðarājiyepe aivu ñujare ne jabovava. Quénora coyuvaivubu maje jabocu Jesucristore. Ñujacapūravu quénora memecavaivubu mujare, ñuje ðaiyue boje yópe Jesucristoi urópe. ⁶Mamarumare, Jūmenijicui cuedaiye báquede caiyede, ñeminijāravu bácaröre, “Miadājaro” ayu bácu, miadāre ðarejaquemavu Jūmenijicu. Ërecabe, yópe miadāre ðaiyepe maje ũmene, coreóvare ðayu meacu baju ñi parué pëoiyeque. Maje coreóvaiyede Cristore, coreóvaivubu Jūmenijicu meacu baju ñi parué pëoiyede, yópe maje jájuroepe Cristo meacu ñi jiva pëoiyede Jūmenijicui paruéque.

**Jesúre ju aipöeva ne ðaino ñi
paruéque
(Ro 14.10)**

⁷Iye Jūmenijicu meacu baju ñi parué pëoiyebu püeno bojecue baju. Ëbenita ñuja coreóvaivubu cvarivare iye parué pëoiyede parubevure ñuje ũmei, ñuje bojecube boje, yópe jobojorobu parubebure aru bojecubebure. Que baru Jūmenijicurecabe parure ðayu ñujare ñuje ũmei, jáðovacuyu caivu pöevare ũre parucure caivu püeno. ⁸Apenumua apevu ñujare cārijovavureca, Jesús ñi yávaiye méne coyurí ye dajocabevutamu ñuja. Apenumua aipe ðaiye jauröre ñujare, ye majibevureca, apevu ye vainí turí jaruvaivu buojabevutamu ñujare. ⁹Apenumua apevu ñujare ñājine ðaivureca, Jūmenijicu ye coatebebi ñujare jaruvarí. Apenumua apevu ñujare ñameðaivuvacari, ñujare ye bíjare ðabevutamu na. ¹⁰Caino ñuje nuinoi, ñuje coyuiye boje Jesús ñi yávaiye méne pöeva boarí jaruvaivuríduivubu

ñujare, yópe apevu ne boarí jaruvaive báquepe Jesúre. Ëbenita ñuja apurivu cāreja jáðovaivubu Jesúre, ne boarí jaruvaimu mácure, apucure bediöva cojedeca caride, ñujare cadateyure.

¹¹Cainumua ñuje cuede ijāravure, pöeva jēni jñiduvaivubu ñujare apevure ne boarí jaruvarídurājiyepe aivu ñujare, ñuje coyuiye boje Jesús ñi yávaiye méne. Aru ñuja apurivu cāreja jáðovaivubu Jesúre, ne boarí jaruvaimu mácure, apucure bediöva cojedeca caride, ñujare cadateyure. ¹²Que baru pöeva ne boarí jaruvaivureca ñujare, ñujacapūravu coyure núvaivubu Jesús ñi yávaiye méne, muje curājiyepe aivu cainumua muje diede ju aiyede.

¹³Ye baju āmevu pöeva ne boarí jaruvaivure ñujare. Cainumua ju aivubu Jūmenijicure. Yópe arí, apecure toivaicōjenejaquemavu Jūmenijicu ñi yávaiyede: “Yu ju aivu Jūmenijicui yávaiyede jāvene. Que baru coyuyubu diede”, arí toivaicōjenejaquemavu. Aru quédeca ñuja máre ju aivubu Jūmenijicui yávaiyede jāvene. Que baru diede coyuvaivubu ñuja. ¹⁴Coreóvaivubu ñuja ñi yávaiyede jāvene, ñi nacovaiye báque boje maje jabocu Jesúre yainore jaruvarí, apure ðacuyu ũre bediöva cojedeca. Que baru coreóvaivubu ñuja nacovacuyure ñujare máre yainore jaruvarí, ñuje apurājiyepe ayu bediöva cojedeca, ñuje cue boje Jesucristoque cūinávure. Aru ñuja mujaque, caivu majare nuvacuyume ñi curó, maje curājiyepe ayu ũque cainumua. Que baru jidubevuvu coyuvaivubu diede. ¹⁵Ñuja vaivubu caiye iye ñājiyede mujare boje, cadatenajivu mujare. Püeno baju obedivu pöeva ne ju aiyede Jesús ñi yávaiye méne, ñuje coyuiyede, Jūmenijicu meaðaibi náre ne āmeina teiyede jaruvarí, ñi mearo ðacaiye boje pöevare bojecubeda ñi me boje. Que baru ina püeno baju obedivu pöeva torojuede jínajarama Jūmenijicure. Aru úcapūravu püeno baju ne pueðaimu macuyúme, ne püeno baju mearore jíye boje ũre.

¹⁶Que baru ñetubevva Jesús ñi yávaiye méne coyure nurajaramu ñña. Jāravva coapa vainíburu, parubede ñivuvacari ñña baju, maje úme parure ñuri, mamaeva oatuvare ñivubu maja. ¹⁷Ñájivureca maje cuede ijāravure, maumena vaiquiyebu maje ñájiyede. Que baru quíjino dápiavubu diede. Aru maje curājiyede cavarō mearore Jūmenijicūque, coreóvarājaramu jāve quíjino bajura iye maje ñájiyede ijāravure. Ūbenita maje ñájije boje pñeno ñrarō mearo baju cvarājaramu maja cainmua, jāravu cūimējāravu baquinóre. Que baru ñrarō dápiavubu diede. ¹⁸Maja dápiare ñmevu maje ñájiyede, iye maje jāri buojaiyede. Quénora dápiare ñivubu iye mearo bajure maje cvarājiyede, cavarō mearo Jūmenijicūi curōi, iye maje jāri buojabede cāreja. Iye maje jāri buojaiye cūiquiyebu. Maumena vaiquiyebu. Ūbenita iye maje jāri buojabe cūimēquiyebu. Cainmua cuquiyebu.

5 ¹Maje baju ijāravucarō yópebu cūrami maje úme curiñamipe. Majidivubu pojequibaju baquinóre maje yayede. Ūbenita no pojeiyede, maja Jesúre ju aipóeva cūvavu apebaju, maje úme curiñamipe. Ūbenita cūrami pōeva ne ñaiñamipe āmevu. Quénora Jūmenijicūrecabe cuedayū apebaju mamabajure majare. No baju pojebequiyebu. Quénora cuquiyebu cainmua cavarō mearo Jūmenijicūi curōi. ²⁻³Ūtuivubu maje cuede yo baju ijāravucarōque. Pare napini coreivubu añijāravu, Jūmenijicūi jíquijāravu baquinóre apebaju mamabajure majare. Yópe baquiyébu maje ecoiyepe mamađami cūrami aru maje doiyepe cuitótecaje mamacajede máre, maje cubequiyere ayū yópe pōescu cuitótecaje cubesupe. Que baru maje úme baju cuquiyebu cainmua. ⁴Maje cuede yo baju ijāravucarōque, pare ñājini, napini coreivubu maje cvarājiyede apebaju mamabajure. Yópe pōescu ūbebi cūcu cuitótecaje cubesupe, nopedeca maja ūbevū curivū maje úme baju cubevva.

Quénora ūvu maja Jūmenijicūi oatuvaiyere aivu maje bajure maja yaibévva. Que teni maje baju ijāravucarō pojequibajure oatuvajebu Jūmenijicū, maje cvarājiyere ayū mamabaju pojebequibaju cavarō mearocarōre. ⁵Jūmenijicūrecabe ñai majare meadayū bācu, maje baju oatuvaiyere ayū. Que baru iye maje baju oatuvaiye jāvetamu. Ūrecabe majide ñayū majare, ñacacayure caino mearo yópe ñi aye báquedepedeca, ñi daroiee báque boje ñai Espiritu Santore.

⁶Que baru ye jidubevva aru chōmevva máre napini corevavubu maje cuede cainmua, yo baju ijāravucarōque cubevū cāreja, maje jabocu Cristoi curōi. ⁷Majidivubu aipe ñaiye jaurore majare, maje ju aye boje ūre, majare majide ñayure. Ūbenita ūre jāmevu cāreja. ⁸Jidubevva aru chōmevva máre napini corede ñivubu maja. Pñeno baju yayivuvubu maja, curājivū maje jabocu Cristoi curōi. ⁹⁻¹⁰Ūbenita caiyede jocarī, yópe maje jabocu Cristoi ūrópe ñaiyivuvubu maja. Maje cuede ijāravure aru maje cuede ñi curōre máre quénora ñi ūrópe ñaiyivuvubu maja, caivū maja maje nūrajije boje Cristoi coyquiyede maje ñaiye báquede méne o āmene ñi jáinoi. Bojedacayūme caivū majare yópe maje ñaiye báquedepedeca ijāravure. Maje mearo ñaiye báque boje, mearo ñacacayūme majare. Ūbenita maje āmeno ñaiye báque boje, ñājine ñacayūme majare.

Jūmenijicū ñi cārijimene ñaino majare

(Jn 3.3-7; Hch 16.23; Ro 14.10; Gá 6.15)

¹¹Maje jabocu Cristoi bojedaiyere boje caivū pōevare, ūre pueñaiye jaūvu majare. Que baru pōevare ju are ñaiyurīdivubu ñña Jesús ñi yávaiye méne. Ūbenita coyubevū ñña diede, cvarājivū ñña boje méne. Quénora diede coyivubu, pōeva ne ñājimenajiyere aivu ne ju abe boje. Jūmenijicūcapūravū me coreóvayube

ñujare, ñuje dápiayede ñuje ùmei. Que baru majibi ñujare ñujovabevure aru mearo ðaivure. Napini coreivü yu mujare máre nopedeca me majidivüre aipe ãrojarivüre ñujare. ¹²Bedióva cojedeca ubenina arí dápiabejará muja jí nópe aipe boje mujare coreóvare ðaiyucure ñameja ñujare aru ye paruéde cuvavivüre. Quénora mujare torojure ðaiyuríduivübu ñuje ðaiye boje, muje majinajiyepe ayu me ina bueipóeva ãmecorojorurivü ñujare ne coyuiyede. Æmecoroivüriduivübu ñujare, ne ube boje ne jáiyede aipe ãrojarivüre ñujare. Ubenita majibema aipe ãrojarivüre ñujare ñuje ùmei. ¹³Apevu “Pablojá ãrumevutamu”, ubenina adama. Ubenita ãrumevu ãmevu ñuja. Ærumevüre ãrojaru, ye baju ãmevu. Ðaivübu ñuja yópe Jümenijicui urópe, mearore jínavivü úre. Ubenita jáve ãrurivübu ñuja, memecarãjivü mujare. ¹⁴Memecaivübu mujare Cristoi ure ðaiye boje ñujare, üi ue boje caivu póevare.

Maja coreóvavübu cüinácu ümü, maje jacobu Cristo, yaicáyu bácu caivu póevare boje. Caivu póeva yaijororivüreca ne ãmeina teiye boje, Cristorecabe yaicáyu bácu majare boje. Que baru caivu úre ju aivu yópe yaivu bácvupebu maje cuede úque cüinávüre. ¹⁵Cristo yaicárejaquemavu caivu póevare boje, maja úre ju aivu, maje dajocarãjiyepa ayu maje ðaiyede, torojure ðarãjivü maje baju quévura, ubenita quénora maje ðarãjiyepa ayu caiyede, maje torojure ðarãjiyepa aivu úre. Úrecabe yaicáyu bácu aru Jümenijicui nacovaimü mácu máre majare boje. ¹⁶Ñuje ju aipe báquemata Cristore, “Que baibi”, arí dápiabevü aipe ãrojacure póecure ñuje jáiye boje úre, yópe ijãravücvü Jesúre ju abevü “Que baibi”, ne arí dápiayepa. Ñuja nápe paivu “Que baibi”, arí dápiavü bácvüvacari Cristore javede, caride nápe paivu “Que baibi”, arí dápiabevü. ¹⁷Que baru maja Cristore ju aivu curivübu úque cüinávüre. Jümenijicui oatvaimaratamu

maja. Yópe mamarümvüre póteivü bácvupebu. Maje dápiayede, maje ðarí cõmajiyede, maje ju arãjiye jívocai Cristore dajocadavü maja caride. Quénora maje cuvæ boje mamaümene, maje dápiayede, maje ðarí cõmajiyede, oatvüvadavü maja caride. Majarecabu dajocavü bácvü javede maje ðarí cõmajiyepa báquede maje ju arãjiye jívocai. Quénora ðarí cõmajiyavü mamaene caride.

¹⁸Jümenijicürecabe ðare ðayü caiye iyede majare boje. Cristoi ðaiye báque boje, Jümenijicü cãrijimene ðarejaquemavu majare úque, maja úre maucüvarivü bácvü, maje yóvarãjiyepa ayu úre. Aru ñujare cãrijimene ðare ðaicójeneyame apevu póevare máre úque, na úre maucüvarivü, ne yóvarãjiyepa ayu úre. ¹⁹Yópe ayübu yu. Cristoi ðaiye báque boje, Jümenijicü cãrijimene ðaiyuríduibi caivu ijãravücvüre úque, ina úre maucüvarivü, ne yóvarãjiyepa ayu úre. Coyurí ñájine ðabebi ne vainí tuiye báquede üi ðaicójeiyede jocarí. Aru ñujare coyucójeimi náre üi yávaiye méne üi cãrijimene ðaiyena. ²⁰Cristoi daroimaramu ñuja, coyucarãjivü üi yávaiye méne. Ñuje arí coyuiyede póevare “Maucüvabejará muja Jümenijicüre. Quénora úre cãrijimene ðare ðaicójejara mujare úque” arí, yopedecabu Jümenijicüvacari üi que jëniájuroe náre. Ñuja paruróreca jëniacavübu mujare Cristore boje. Yópe arí, “Maucüvabejará muja Jümenijicüre. Quénora úre cãrijimene ðare ðaicójejara mujare úque”, Cristo ñujare jëniacójeimi mujare. ²¹Maja curivü Jesucristoque cüinávüre Jümenijicui cãrijimene ðaimaramu caride. Cristovacari ye ãmenore ðabedejaquemavu cainümvü. Ubenita Jümenijicü járejaquemavu úre yópe üi jáiyepa ãmenore ðayüpe majare boje, meadacuyü majare. Que baru Jümenijicü jáñüme majare curivüre Jesucristoque cüinávüre, yópe üi jáiyepa boropatebevüre.

6 ¹Aru ñuja memecaivü Jümenijicüre mujaque paruróreca

jēniavaivubu mɔjare, mɔje ju are nɔrajipeye aivu Jūmenijicui urarō mearo đacaiyede, ũi meadaquiyepe aivu mɔjare. ²Jūmenijicuvacari, yópe arí, toivaicōjenejaquemavu ũi yávaiyede:

Mɔje órejarājiyede yure, ji cadatequiyepe aivu mɔjare, jápiarí cadatecuyumu mɔjare. Yo jāravu baquinó ji meadaquijāravure, meadacuyumu mɔjare, arejaquemavu Jūmenijicu.

Jápiarā mɔja. Caridecaba Jūmenijicui mɔjare cadatejurorijāravu. Cari jāravurecaba Jūmenijicui mɔjare meadajurorijāravu. Mɔjare cadateni meadaiyubi Jūmenijicu cari jāravu baju. ³Cainumua ñuje memecaiyede Jūmenijicure, ye āmeina teiyubevu ñuja aru apevure máre ye āmeina tede đaiyubevu ñuja, ñame ne āmeina yávarí buojabenajiyepe aivu ñujare aru ju abevu āmenajiyepe aivu Jūmenijicui yávaiye méne, “Diede coyucaipóeva āmeina teivubu aru āmeina tede đavubu apevure máre” aivu. ⁴Quénora caiye ñuje đaiyeque jáđovaiyurivubu đavũ me, yópe memecaipevare jauépe Jūmenijicure.

Que baru napiyurivubu cainumua ñuje ñájiyede, ñujare jauéde, aru ñuje cārijiyede máre. ⁵Póeva ñujare jara popeivu bācavuvacari, ñujare jēni jacoivu bācavuvacari āmeina teivure jēni jacoĩnami jívui, aru ñujare maucvarí, cārijovari boaiyurivũ bācavuvacari máre, caiye ñuje đaiyeque jáđovaiyurivubu đavũ me, yópe memecaipevare jauépe Jūmenijicure. Ñuja urarō memeiũ bācavuvacari pu uetuiyeta, aru ñuja cāmevu bācavuvacari ñuje memeiye boje, aru ñuja āiyede āmevu bācavuvacari máre ñuje memeiye boje, cainumua jáđovaiyurivubu đavũ me, yópe memecaipevare jauépe Jūmenijicure. ⁶Que baru āmeina tebevuva đare nuiyurivubu me Jūmenijicui jáĩnore. Jūmenijicui yávaiyede jávene majide nuiyurivubu. Aru napine nuiyurivubu póeva ne đaiyede. Cadatede nuiyurivubu

póevare. Cũre nuvaiyurivubu ñai Espiritu Santore aru ure nuiyurivubu póevare cainumua. ⁷Jūmenijicui yávaiyede jávene coyũre nuiyurivubu. Aru Jūmenijicui parúeque ñuje cavaede memecare nuiyurivubu. Cainumua mearore đaiyurivubu, meatenajivu maucuvaburí āmenore, yópe churarava ne meateiyepe, ne maucvarājiyepe aivu ne mavare.

Que teni majidivubu ñuja aipe đaiye jauróre, vainí turí jaruvarājivu āmenore aru vainí tubenajivu ñuja máre. ⁸Apenumua apevu póeva pueđadama ñujare. Aru apenumua pueđabena ñujare. Apenumua apevu póeva āmeina yávadama ñujare. Aru apenumua me yávadama ñujare. Apenumua “Borocurivubu”, ubenina arí dápiađama ñujare, ñuja borocubevuva yávaiyede jávene coyuvavureca. Ubenita ye baju āmevu ñujare. ⁹Ñuja obedivu ne me coreóvaimarareca, apenumua “Caivu ne coreóvabemaratumu”, ubenina arí dápiađama ñujare. Apevu “Náre ne boaicōjeimara márājima”, ubenina arí dápiaivureca ñujare, ñuja arurivubu. Ñujare urarō ñájine đavuvacari, ñujare boarí jaruvabema. ¹⁰Apenumua chíovuvacari ñujare āmeno vaiye boje, torojurivubu ñuje ũmei cainumua. Ijāravuque cũve cuvabevuvacari, apevure cũve cvarivupe tede đavubu ne ũmei urarō Jūmenijicui mearo đacaiyede ñuje cũvare đaiyede náre Jūmenijicui yávaiye méne. Aru ñuja ijāravuque cuvabevuvacari, caiye iye méne Jūmenijicui cũvare đaiyede ũ jinare cvarivubu ñuja.

¹¹Mɔja, jívũ, Corintocavu, jidubevuva coyivubu mɔjare nuríe, ñuje dápiaiyede ye yavebevuva. Jáđovavubu pare ñuje ũede mɔjare. ¹²Joi āmevu ñuje ũme mɔjare jocarí. Ñujacapuravu yóvaiyubevu āmevu mɔjare. Quénora joi ũme cũvu ñujare jocarí. Mɔjacapuravurecaba yóvaiyubevu ñujare. ¹³Que baru yu jēniaivu mɔjare paruróreca, yópe népacui jēniaiyepe ũi márare. Yópe ji pare ũepe mɔjare, quédecu țjarā yure.

**Pablo ñi majicaino Jesúre ju
aipõevare, ne yóvabenajiyere ayu
Jesúre ju abevuque
(1 Co 3.16, 6.19)**

¹⁴ Ñbenita ji ñedeca muje yóvarãjiyere ayu yure, yóvabejarã muja ina Jesúre ju abevuque, uparivu teiyede náque aru ñanjivu tãtuturare aru purubuoiyede náque máre. Põeva mearore ðaivu ye buojabenama yóvaivu ina ñmenore ðaivuque. Aru põeva mãdãroi cuivupe, ne mearore ðare nuiye boje, ye buojabenama yóvaivu náque, ina ñeminoi cuivupe, ne ñmenore ðare nuiye boje. ¹⁵ Cristo ye buojabebi yóvayu ñai abujuvai jabocuque. Aru Jesúre ju aipõecu ye buojabebi yóvayu Jesúre ju abevuque, ne dãpiarĩ cõmajibe boje cünáturu. Nácapũravu pẽpeimarare mearore jívaivubu. Ñbenita majacapũravu Jũmenijicure mearore jívaivubu. ¹⁶ Aru pẽpeimara ye buojabenama yóvaivu ñai Jũmenijicu arucu ñi mearore jíñami jívu. Maja Jesúre ju aipõevavacari ñai Jũmenijicu arucu mearore jíñamipebu. Yópe arĩ, toivaicõjenejaquemavu Jũmenijicu ñi yáva iyede:

Ji põevaque sucuyutu yu. Yópe ji cuiyere ne jẽneboi yóvasuyutu yu náque. Ne mearore jímu macuyutu yu. Aru nácapũravu ji põeva marajárama, arejaquemavu Jũmenijicu.

¹⁷ Que baru Jũmenijicu yópe máre arĩ toivaicõjenejaquemavu ñi yáva iyede, ñi põeva ne majinajiyere ayu aipe ðaiye jauõre pẽpeimarare mearore jívu:

Náre dajocarĩ, etajarã muja náre jocarĩ. Que teni náque yóvabeni, coatejarã muja náre jaruvarĩ. Ye tũbejarã muja caiye ne cõvaede, ne ñmeina ðaiyeque cõvaede. Que ðaru, mujare me coru etacuyutu yu. ¹⁸ Yu bacuyutu mujerasu. Aru muja jímara marajáramu, arejaquemavu maje jabocu Jũmenijicu, ñai parucu caivu pũeno.

7 ¹ Jãve Jũmenijicu ðacacuyume majare caiye iye mearo ðacaiyede yópe ñi aiye báquepedeca. Que baru muja, jívu, ji umara, yópe põevai jaruvaiyere docucuede ne joaiyede, nopedeca jaruvaiye javu majare maje ñmeina teiyede. Iye maje bajure ñmedaiyede aru maje umene máre ñmedaiyede coatenajarevu diede jaruvarĩ. Jũmenijicure memecaiye matuiyeda javu majare, maje pũedaiye boje ñre.

**Corintocavu Jesúre ju aipõeva ne
jaruvaino ne ñmeina teiyede
(2 Co 2.13)**

² Ujarã ñujare. Jãpiarĩ adabejarã ina ñmeina yávaivure ñujare. Ñamene ñmeina ðabetecarã ñuja. Ñamene ñmeina tede ðabetecarã ñuja. Aru ñamene jujovabetecarã ñuja. ³ Caiye iye ji toivaicõjeiyede apere mujare toivaicõjemevu ñmecomocuy mujare. Yópe ji toivaicõjeiye báquepedeca apere mujare jipõicai, pare urivubu mujare. Ñuje urarõ ue boje mujare, yóvaiyurivubu mujare maje cuede ijãravu. Aru apevu ne mujare boarĩ jaruvaiyuru, mujaque yaiyurivubu ñuja. ⁴ Jidubecava cõvu mujare nurie ji dãpiayede ye yavebecava. Muja torojare ðadvũ yure. Que baru apevu põevare cõuyubu muje borore. Caiye maje ñãjiyedeca, muja cadatedavũ ñujare, muje parure ðaiye boje ñuje ñmei, aru muje torojare ðaiye boje máre ñuje ñmei. ⁵ Ñuje eaiyede yui Macedonia ñmicurijoborõ, pu caride máre ye jabuvabevu ñuja cãrijivu. Cainũña ñãjivaivubu ñuja, apevu ne maucõvae boje ñujare aru ñuje cãriye boje põeva ne dãjuoede aru muja máre, muje dãjuoede. “Dajocarãjichũma ne ju aiye de Jesús ñi yáva iye mẽne”, arĩ dãpiarĩ mujare, cãrijivubu ñuja. ⁶ Ñbenita Jũmenijicurecabe, ñai cadateyu ina cõmaje ñrojarivure, cadateyu bácu ñujare. Parure ðáme ñujare ñuje ñmei, Tito edaiyede yore. ⁷ Parure ðaibi ñujare ñuje ñmei, ñi

edaiye báque boje, cꝛꝛꝛꝛꝛ ññaque. Æbenita pꝛeno baju parure ðaibi ññjare ññje ùmei, ùi coyuiyede muje parure ðaiyede ùre ùi ùmei. Pare ññjare jáiyurivubuya. Chõivubuya muje àmeina teiyede. Cãrijivubuya ji ñájiyede mujare boje. Que baru pꝛeno baju torojuvu yu ji ùmei.

⁸Mamarumure ji jaroiyede mujare no paperayoca ji toivaicõjeino mácarõre apecure, jaracꝛꝛꝛ muje ãmeina teiye boje, pare cãrijĩnu matecãcu yu. “¿Chõire ðaquijichuri yu náre?” arĩ dápíaru batecãcu. Aru muje jári boroteiyede no paperayoca bácarõre, chõiquemavu muja. Yu mujare chõire ðayu bácvacari, “Nore apecure toivaicõjeiye jaubeteavũ yure”, arĩ dápíabevũ yu. Chõivũ batequémavu muja obebejaravure. ⁹Caride torojuvu yu, ji toivaicõjeiye báque boje apecure no paperayoca bácarõre. Ji chõire ðaiye báquede mujare torojubevũ yu. Æbenita me torojuvu yu, muje chõiri oatuvaiye boje muje ðaiyede. Muja jáquemavu muje àmeina teiyede yõpe Jũmenijicui jáiyepe diede, muje oatuvaiye báque boje muje ðaiyede. Que baru mujare àmedabetecacu yu, ji toivaicõjeiye báque boje apecure, majiacacꝛꝛ muje. Quénora mujare cadatecacu yu.

¹⁰Ñai jáñũ ùi àmeina teiyede yõpe Jũmenijicui jáiyepe diede chõiri oatuvayube ùi ðaiyede. Que baru Jũmenijicu meadayube ùre, ùi àmeina teiyede jaruvarĩ. Aru chõimecube cainumua. Æbenita ñai jáñũ ùi àmeina teiyede yõpe põeva Jũmenijicure coreóvabevũ ne jáiyepe diede chõõñme, ùi cꝛꝛꝛꝛ teiye boje põeva ne jáiyede, ùbenita oatuvaiyubecube ùi ðaiyede. Que baru ñaine Jũmenijicu coavayube ùre jaruvarĩ cainumua. ¹¹Dápíajará muja caiye iye mearo vaiyede mujare, muje chõiri jáiye báque boje muje àmeina teiyede yõpe Jũmenijicui jáiyepe diede. Maumena corebevũva iye àmeina teiyede dajocaquemavu. Coyucaquemavu ji borore, cadatenajivu yure ji maucu ùi àmecoroiyede yure.

Jaraqemavu muje bajumia muje àmeina teiye báque boje. “¿Nõpe àmeina tenajichuri maja cojedeca?” arĩ dápíarĩ jidutequemavu muje ñájijuroede die boje. Jáiyurĩduquemavu yure cojedeca. Cãrijivu yure boje ji ñájiyede mujare boje, yure ju aiyutequemavu. Aru ñai ji maucure ñájine ðaquemavu. Caiye iye muje ðaiye báqueque jáðovaquemavu muje baju boropatebevũpe caride.

¹²Jáðovaiyubetecacu ñai àmedayũ boropateyure, ùi àmeina teiye boje aru yu, ùi àmedaimu mácu, boropatebecure quédada, no paperayoca ji toivaicõjeino mácarõre apecure mujare. Quénora jáðovaiyutecacu mujare Jũmenijicui jáinore muje chõoiyede, ññje ñájiye boje, muje pare urĩ cadateiyue boje ññjare.

¹³Que baru ññjare me cadatedavũ muja, parure ðarĩ ññje ùmei, muje me jápiarĩ ju aiyede boje yure.

Torojuvu ñña, muje nõpe cadateiye boje ññjare. Æbenita pꝛeno baju torojuvu ñña, ññje jáiyede majecu Tito ùi torojue boje, caivu muja muje cadateiye báque boje ùre, ùi parure ðaquiyepere ayu ùi ùmei, ùi cue báquede muje yebai. ¹⁴Titoi etaquiye jipocai, jácũncꝛꝛꝛ muje yebai, muje torojure ðaiye boje yure, “Ññjare me jápiarĩ ju arãjarama majevũ Corintocavu”, arĩ coyucacu ùre muje borore. Aru muje me jápiarĩ ju aiyede boje, cꝛꝛꝛꝛ yu, ji nõpe coyuiye báque boje ùre. Yõpe caiye ññje coyuiyepere mujare jávepe, quédaca ji coyuiye báque boje borore Titore máre jávetamu. ¹⁵Caride pꝛeno baju ubi mujare, ùi àruéne muje me jápiarĩ ju aiyede ùre, aru muje me jacopuiye báquede ùre máre, ùre pueðarĩ yõpe muje pueðajuroepe jabocu jidojacure. ¹⁶Pare torojuvu yu. Jidubecuvu aru chõimecuvu máre majivu yu mujacapuravu ðaivure caiyede yõpe mujare jauéde, ye jaubeda.

**Jesúre ju aipõeva ne jĩno jecũbevũva
cũve cũvabevũre
(Ro 12.17, 15.26)**

8 ¹Muja, jívu, caride mujare coreóvare ðaiyurivubu ñña

ina Macedonia āmicurijoborōcavu Jesúre ju aipōeva ne mearo đaiyede Jūmenijicui mearo đacaiye boje náre bojecubeda ũi me boje. ²Návacari pare nájivaivubu. Ūbenita nájivuvacari, jádovadama Jesúre ju aivure jáve. Nájivuvacari, cainmna me torojma ne ũmei. Aru návacari ure cve cūvabevutamu. Ūbenita cve cūvabevuvacari, jecubevuva jívaivubu ina Judea āmicurijoborōcavu Jesúre ju aipōeva cve cūvabevure yōpe cve cūvarivū ne jjúroep. ³Jāve coyūivū yu mujare. Caino ne oainope jíma na. Aru pueno baju yōpe ne jíye buojabejúroep jíma na. Jíbeteima ne cūvaequede náre jaubede quénora. Ūbenita náre jauéquede máre jíma na. Aru pōescu cubeteame jícōjeñū mácu náre. Quénora návacari “Jínajarevu, cadatenajivū ina cve cūvabevure”, aquemavu.

⁴Parurōreca nūjare jēniaivū bateima, nūje ĩni nūvarajiyep aivū ne tātūrare ina Judeacavu Jūmenijicui pōeva cve cūvabevure. ⁵Nūje coreiye báque pueno baju, jíma na. Mamarūmure “Yōpe mi urōpe đarājaramu nūja”, aquemavu maje jabocu Cristore. Aru no yóboi, “Yōpe nūje urōpe đarājaramu nūja”, aima nūjare, Jūmenijicui nópe aicōjeiye báque boje náre. ⁶Nūje jáiye boje ina Macedoniacavu Jesúre ju aipōeva ne pare cadateiyūede ina cve cūvabevure, Titore jēniacarā nūja paredeca, ũi copainūquiyep aivū nūje yebai. Javede Tito cójjjovarī búquemavu nūje jíyede. Que baru jēniacarā ũi cadatequiyep aivū mujare, nūje cójjjovarī buojarājiyep aivū tātūrare, nūje jínajiyede ina cve cūvabevure.

⁷Muja ju aivubu Jesúre arevū pueno. Muja coyūivubu Jesús ũi yávaiye méne arevū pueno. Muja coreóvaivubu iye yávaiyede jávene arevū pueno. Maumena corebevūva muja memecaiyūrivūbu arevūre arevū pueno. Muja ũrivūbu pōevare yōpe nūje ũepe arevū pueno máre. Que baru quédeca pueno baju jjarā nūje cūvaequede máre, cadatenajivū cve cūvabevure.

⁸Ji coyūiyede mujare diede, jícōjemevū mujare. Quénora coreóvare đayūbu mujare arevū Jesúre ju aipōeva ne ũrarō jíyena, ne pare ũe cadateiyūe boje cve cūvabevure, nūje jádovarajiyep aivū muja máre jáve ũrī cadateiyūrivūre náre nūje jíyepue jecubevuva. ⁹Muja me coreóvaivūbu iyede. Maje jabocu Jesucristo, ũi pare ũe boje majare, pueno baju mearo đacarejaquemavu majare bojecubeda. Nai cve cūvacavacari caivū pueno, ũi cūvae boje caiye majepacu Jūmenijicui parūéde, pōescupe teni cve cūvabescupe caivū pueno tedejaquemavu ũ. Aru ũi nópe teiye báque boje, cve cūvarivūrebu maja, maje cūvae boje caiye iye Jūmenijicui méne. Que baru ũi nópe cadateiye báque boje majare, arevūre cadateiye jauvu majare máre.

¹⁰Yū jícōjeiyūbecūvacari, majicaiyūvu mujare. Ji dápíaru, meavu mujare nūje buojaru iye tātura cójjjovaiye nūje buiye báquede apejūji barede. Mujarecavu jīni buivū bācavu caivū arevū jívu ne jínajiyep jipocai. Aru pueno baju mujarecavu “Jínajarevu” aivū bācavu máre caivū arevū “Jínajarevu”, ne arājiyep jipocai. ¹¹Que baru maumena corebevūva buojajarā iye nūje buiye báquede. Muja pare buiyūrivū bācavu iye tātura cójjjovaiyede, cójjjovarī buojajarā máre maumena corebevūva. Jjarā yōpe nūje oainope, nūje cūvaeacarōque. ¹²Maje jáve jíyuru, cadatenajivū arevūre, Jūmenijicu torojcu me jāñūme maje jíyede. Jūmenijicu ũbi maje jíyede yōpe maje oainope, maje cūvaeacarōque. Jēniamecube majare maje jíyede maje cūvabede. ¹³Yū ũbevū nūje jínajiyep aivū arevūre jauéde, pū nūje cūvabeta mujare jauéde. ¹⁴Quénora ũvu yū caivū ne cūvarājiyep aivū cūinátūru. Que baru caride mujacarpūravū, cūvarivū caiye mujare jauéde aru mujare jaué pueno máre, jjarā, cadatenajivū ina cūvabevure. Aru arevūmure nácarpūravū, cūvarājivū caiye náre jauéde aru náre jaué

püeno máre, jínajarama, cadatenajivu mña cuvabenajivüre. Que teni caivu cüináturu cüvaräjivübu. ¹⁵Quédeca yópe arí, toivaicōjeneaquemavu Jūmenijicu ũi yávaiyede: “Ñai űrarō ññu mácu puruiyede cuvabedejaquemavu. Aru ñai quijino ññu mácuare jaubedejaquemavu”, arí toivaicōjeneaquemavu.

Nópe ayu, Jūmenijicu jíyüre ũi pōevare náre jauéde cainumua aiyuerejaquemavu.

**Tito aru pucarā ũi yóvaimara
ne nurajino Corinto**

¹⁶Jūmenijicu Titore cadateiyüre ðaibi mujare yópe ũi cadateiyüre ðaiyepe yüre. Que baru torojuede jívu Jūmenijicure. ¹⁷Tito pare cadateiyubi mujare. Apecu copaicōjemecuva űre muje yebai, űvacari “Corinto copaiyvuvu yu”, áme. Que baru ji jēniaye báquede űre paredeca, ũi copainuquiyere ayu muje yebai, maumena corebecuva ju áme yüre.

¹⁸Que baru jácunucuyume mujare bediōva. Aru űque jarocuyumu yu apecu majecure, majape ju ayure Jesúre. Caivu Jesúre ju aipōeva me pueðadama űre, ũi coyuiye boje Jesús ũi yávaiye méne, ũi meaðaiyede pōevare. ¹⁹Obedivu ne pueðaimvacari ũi coyuiye boje Jesús ũi yávaiye méne, püeno baju ne pueðaimume Macedonia āmicurijoborōcavu Jesúre ju aipōeva cójjivaivu, ne beoie báque boje űre, ũi yóvaquiyere aivu ñujare, ñuje nuvarajiyede iye tauturare Judea āmicurijoborōi. Cadatecuyume ñujare, ñuje jári corenajiyepe ayu me iye muje jíyede. Me jári coreiyurivubu ñuja diede, pōeva ne mearore jínajiyepe ayu maje jabocu Jesucristo ne pueðaimure aru jáðovarajivu maja Jesúre ju aipōeva maumena corebevva cadateiyurivüre majevu cüve cuvabevüre. ²⁰űre yóvaicōjeivubu ñujare, ñame ne āmeina yávarājiiyepe aivu ñujare, ñuje nuvaiye boje iye űre tauturare, muje jíyede. Ñamene ye āmeno jáicōjeiyubevu ñujare yópe ne jáiyepe āmeina teivüre.

“Ñuje tauturare ñavaivubebu”, ubenina arí coyubejarári pōeva. ²¹Que teni urivubu ñuja pōeva ne járajiiyepe aivu mearo ñuje ðaiyede cainumua, yópe Jūmenijicui jáiypedeca mearo ñuje ðaiyede. Jūmenijicu coreóvayube ñuja jínajivüre caiye iye tauturare ina cüve cuvabevüre. űbenita urivubu ñuja pōeva máre coreóvaivüre diede.

²²Aru náque jarocuyumu yu apecu majecure, majape ju ayure Jesúre. Ñuja buojaivubu majidivu űre pare cadateiyucure apevüre, ñuje jáiye boje aipe ðarí cómajiyüre. űi jápaiye boje muje borore, jáve napini coreyube maja jínajivüre jecubevva, cadatenajivüre me ina cüve cuvabevüre. Que baru püeno baju jácunuiyucube mujare.

²³Pōecu ũi jēniari járu ñamejare aru ye paruéde cüvarivüre, yópe arí, coyujarā mña: “Titobe Pablöre yóvayu, Jesúre memecayu aru majare Jesúre ju aipōevare cadateyu”, arí coyujarā Tito ũi borore. Aru apevu ina pucarā űmva ne borore, yópe arí, coyujarā: “Macedoniacavu Jesúre ju aipōeva cójjivaivu ne jaroimaramu, nuvarajivu ne jíye báquede Judeacavu Jesúre ju aipōeva cüve cuvabevüre, pōeva ne mearore jínajiyepe aivu maje jabocu Jesucristo ne pueðaimure”, arí coyujarā mña. ²⁴Náre me copu etarí, pueðarí, cadateni, jáðovajara náre aru náre daroivu bācavüre máre jávene ji coyuiye báquede náre muje borore. Ñujare torojure ðaivubu mña.

**Jesúre ju aipōeva ne jino,
cadatenajivu apevüre**

9 ¹⁻²Apecure mujare toivaicōjene nuíye jaubevu yüre, iye muje jínajiyepe ayu jecubevva, muje cójjovaiye boje tauturare apecu bācarōre pu caride máre. Yu majivu mña cadateiyurivüre. Que baru mña Acaya āmicurijoborōcavu Jesúre ju aipōeva muje borore, yópe arí, coyuvaivu yu ina Macedonia āmicurijoborōcavu Jesúre ju aipōevare: “Majevu Acayacavu cójjivaivubuya

iyе ne jínajiyede ina cуve cуvabevure areyju bácaröre pа caride máre”, arí соуvаivу yу. Aru mуje maumena corebevуva jýуe boje, obedivу ina Macedoniacavу máre maumena corebevуva jýуrivubu. ³⁻⁴Ina yóbecurá majevу Jesúre ju aipóevare jarocууmтu yу mуje yebai, ne cadatenajiyere ayу mуjare, mуje cójijovarí buojarájiyere ayу mуje táuturare. Que teni mуja jáđovarajaramu jávene iye ji соуиye báquede mуje borore apevu majevу, Macedoniacavу, ne eaiyede yáque. “Majevу Acayacavу cójijovaiвbuya ne jínajiyede javede”, arí соуre nuivу yу. Ñuje earájiyede mуje yebai, mуje cójijovabedu cáreja mуje jínajiyede, pare cуyejebu yу, ji соуrídуйe báque boje ubenina mуje borore. Aru mуja máre cуyejebu pare. ⁵Que baru jéniaivу ina yóbecurá majevure, ne nurajiyere ayу mуje yebai ji nuquie jipocai. Cadatenajarama mуjare, mуje cójijovarí buojarájiyere ayу mуje jínajiyede, yópe “Jínajaramu”, mуje aiye báquepedeca jipocamia. Que teni jáđovarajaramu mуja ji jícójememarare, quénora jýуrivure jecubevуva.

⁶Árurajara mуja iyede. Mуje majióvaró mearore daru apevure, Jümenijicucapüravу mearo đacacуyume mуjare majióvaró baju. Ubenita mуje uraró mearore đaru apevure, Jümenijicucapüravу mearo đacacуyume mуjare uraró baju. Jévari соуиyeque oteipóescu üi đaiyede соуquijivу yу. Oteipóescu obebeyabea oteiyabeare oteyу baru, ícуyume majióvaróra jéijaravу baquinói. Ubenita obediabea oteiyabeare oteyу baru, ícуyume uraróra jéijaravу baquinói. ⁷Caivу mуja coapa jíjará mуje cуvaecaröre yópe “Quéno baju jícуyumu yу”, mуje arí dápaiyepedeca mуja coapa mуje ümei. Chíori jecurivу jýуbevure yéde jíbejará mуja. Apecui jícójeimarape máre yéde jíbejará. Quénora torojurí jecubevуva jíjará mуja, Jümenijicui ne boje ñai torojurí jecubecvа jýуre. ⁸Jümenijicu jýу majibi üi mearo

đacaiyequede, ijárvуquede, mуjare uraró baju, ye jaubequiyere ayу mуjare. Aru caiye mуjare jauéde jíniburu yóboi, uraró pуpуquiyebu mуjare. Que baru cуvarájaramu mуja mearo đacaiyequede, ijárvуquede, cadatenajivу apevure. ⁹Yópe arí, toivaicójenejaquemavу Jümenijicu üi yávaiyede ñai póescu meacu üi borore:

Üi cуvaecaröre jívayube jecubecvа ina cуve cуvabevure. Aru üi mearo đacaiyede árurajarama cainмua, arí toivaicójenejaquemavу.

¹⁰Bedióva cojedeca jévari соуиyeque соуquijivу yу. Yópe oteiyе pírari buojari aru bucari buojari, oteipóescu íyere üi áquiyeva aru üi otequiyeva máre, nopedeca mуja mearore đavу baru mуje cуvaeque, cуvarájaramu mуjare jauéde aru mуje jínajiyede máre pueno baju, mearore đarájivу aru cadatenajivу apevu póevare. Jümenijicurecabe jýу oteiyabeare ñai oteipóescu aru áiyede póeva ne árajiyeva. Urecabe mearore đare đayу mуjare máre. ¹¹Que baru üi mearo đacaiyequede, ijárvуquede, uraró cуvarájaramu mуja cainмua, jínajivу apevure jecubevуva. Aru obedivу póeva, ina majevу Judeacavу Jesúre ju aipóeva cуve cуvabevу, torojuede jínajarama Jümenijicure, iye jýe boje mуje jarorájiyede náre ñujaque. ¹²Mуje jýyede apevure, mearore đavubu, mуje cуvare đaiye boje náre jauéde. Ubenita pueno baju mearore đavubu, obedivу póevare mуje jíde đaiye boje uraró torojuede Jümenijicure. ¹³Mуje memecaiyede náre iye jýyede mуje jarorájiyeque, jáđovarajivubu mуja ju aivure jáve đajocabevуva Cristoi yávaiye méne, aru mуja jívure jecubevуva, cadatenajivure náre aru apevure máre. Que baru mearore jínajarama ne puedaimure Jümenijicure. ¹⁴Mуjare pare urivу jéniarajarama Jümenijicucque mуjare boje, üi pare mearo đacaiye boje mуjare bojecubeda üi me boje. ¹⁵Torojuede jínajarevу Jümenijicure, üi jýyе báque boje majare pueno baju

méne. Põeva ne yávaicamuaque ye buojabenama coyuivü diede.

**Pablo ñi majicaino Jesús ñi yávaie
méne beorí coyuicõjeimara ne
ðaiyena
(1 Co 1.31)**

10 ¹Caride yávacari, Jesús ñi yávaie méne beorí coyuicõjeimaracacu, coyuuvu mujare, ãmecoroivure yure. Yópe Cristoi coyuiepe põevare, náre cadateni aru pueðarí meacu põescupe, nopedeca coyuivuvu mujare. Que baru mujare pueðarí meacu põescupe aru mujare cadateiyurí, paredeca jëniaivu mujare, muje dajocarãjiyepe ayu muje ãmecoroiyede yure. “Pablo jiducu jararí buojabebi ñi cuede majaque. Æbenita ñi cuede joai majare jocarí, jidubecvã jararí buojaibi ñi toivaicõjeiyede apescure paperayocare majare”, ÷benina aríduivubuya muja. ²Yurecabu jararí buojayu mujare ji cuede mujaque máre. Que baru jëniaivu mujare. Jarare ðabejarã yure ji eaquiyede muje yebai. Mujacavu yópe arí, “Pablojã dápiarí cõmajivubu yópe ijãravucavu Jesúre ju abevu, Espíritu Santore cuvabevu, ne dápiarí cõmajiyepe. Que baru nápe ðarí cõmajivubu Pablojã”, ÷benina aríduivubuya. Ina nópe aríduivure jaracuyumu yu jãve.

³Jãve ñjãtatamu ijãravni curivu. Æbenita ijãravni curivuvacari, maucuvabevu ñuje mavare yópe ijãravucavu Jesúre ju abevu, ne maucvãepe. ⁴Yópe churarava ne maucvãepe ne mavare boaicaroveaque, nopedeca ñuja maucvãarivubu ñuje arí dápiarí coyuieque. Æbenita arí dápiarí coyurí majibevu ñuja põeva ne arí dápiarí coyuieque. Quénora Jümenijicu ñujare majide ðaibi ñi paruéque, ñuje coyurãjiyepe ayu ina úre maucvãarivure ñi yávaiyede jãvene, ne majinajiyepe ayu ÷benina ne arí dápiayede. Ñuja, Jümenijicui parure ðaimara ñi majiéque, jáðovaivubu borocuede ñuje mauva ne

ãmecoroiyede ñujare. ⁵Cainũna ina mujacavu “¿Meara márica apenvu pũeno?” aríduivu, “Jãve ãmevu”, ÷benina ne aríduiyede Jümenijicui yávaie ména, põeva ne coreóvabenajiyepe aivu Jümenijicui majiéde, ñuja coyvãvuvu Jümenijicui paruéque, jáðovarajivu ÷benina ne arí dápiayede. Que teni yópe churarava ne vainí turí jëni jacoiepe ne mavare, ju are ðarãjiyepe aivu náre ne baju jabocure, ñi cõjequiepe aivu náre, nopedeca maje jabocu Cristore dápiacõjene ðaivubu ñuja ñuje mavare, ne ju arãjiyepe aivu úre ñuje coyvãiyede Jümenijicui paruéque. ⁶Muje jáðovarajiyede me ju aiyurivure Jümenijicure jaubevvã, ñãjine ðarãjaramu ñuja mujacavu caivure muje ju abedu.

⁷Muja jáivubu aipe ãrojarivure ñuje bajure. Æbenita majibevu aipe ãrojarivure ñujare ñuje ñmei. Cüinácu mujacacu “Jãve yábu Cristo jicu” ayu, coreóvajacurí ñujare máre Cristo jinare. ⁸Ji coyuiede ñuja Jesús ñi yávaie méne beorí coyuicõjeimarava ñuje parué cãvaede, yópe “¿Meara márica?” aivupe coyvuvacari, yópe yure coyuiepe jaubepe, ye cãyebecubu yu. Maje jabocu Cristo ñujare coyuicõjememi mujare ñi yávaie méne, ñuje dajocare ðarãjiyepe ayu mujare muje ju aiyede úre. Quénora ñujare coyuicõjeimi mujare diede, ñuje parure ðarãjiyepe ayu mujare muje ju aiyede úre. Que baru cãyebecubu yu ji coyuiede. ⁹Mujare cuavaiyubevu yu yo paperayocare ji toivaicõjeiyede apescure mujare parurõreca. ¹⁰Cüinácu muje jëneboi cucu, “Pablo paruéque majicayube majare yópe majicupe ñi paperayocare, ñi toivaicõjeiyede apescure. Æbenita ñi cuede majaque parubecu majicarí buojabecube majare. Quénora coyvube yópe majibecupe”, ÷benina aríduibuya. ¹¹Æbenita ñai que aríduyu coreóvajacurí iyede. Yácapürãvu cüináturnreca coycuyumu mujare ji cuquiyede mujaque, yópe ji toivaicõjeiyepe apescure paperayocaque ji cuede joai mujare jocarí.

¹²Jáve ñija cūináturpe teiyubevu ina mñje jēneboi cūrivu “¿Meara mática maja arevu pñeno?” arí dápiaivupe. Aru nápe raivu máre jēvari coyuiyubevu ñija. Nácarūravu majibevutam. Corevaicōjeivubuya ne ñaiyede yópe ne urōpe. Aru jēvari coyuiyubu ne baju. ¹³Ūbenita ñijacarūravu “¿Meara mática?” aivu baru, coyujebu ñije ñaiyede Jūmenijicūi parúeque no joborōre quéno, árore ñijare memecaicōjeame úre. Ñijare úre memecaicōjeino mácarōre jocarí, ye arí coyubejebu, yópe arevu ne coyuiyere. Aru no joborō jívui cūrivubu mñja, ñijare memecaicōjeino úre. ¹⁴Jūmenijicu ñijare coyucōjeame mñjare Cristo yávaiye méne mamarumpe caivu ne jípcai. Que baru ñabetecarā ñija yópe úi memecaicōjemenope ñije copaiyede mñje yebai. ¹⁵Ñija “¿Me ñaivu bática maja?” arí coyubevu arevu ne ñaiyena, yópe ñije dájueroepe o ne Jūmenijicure memecaicōjeijoborō ñije memecaicōjejurorōpe úre, yópe arevu ne ñaiyere. Quéno ñija napini coreivubu mñjare pñeno baju ju arājivure Jesúre, memecarājivu Jūmenijicure pñeno baju mñje yebai, yópe úre memecaicōjeino mácarōpe ñijare. ¹⁶Nópe ñaríburu yóboi, ñija napini coreivubu, coyurí bujarājivu Jesús úi yávaiye méne úi meadaiyena pōevare apenoa ímaroai Corinto aperūravui, ároa pōeva ne jápiabenoai cāreja diede. No joborótamu máre Jūmenijicure memecaicōjeijoborō mácarō ñijare. Que teni, “¿Me ñaivu bática maja?” arí coyubenamu apesu úi ñaiyena yópe ñije dájueroepe, yópe arevu ne arí coyuiyere.

¹⁷Que baru yópe arí, toivaicōjenejaquemavu Jūmenijicu úi yávaiyede: “Ácu pōesu ‘¿Jūmenijicure memecayū meacu bática?’ arí coyuiyucu baru úi baju, nópe arí coyubejacurí. Quénoa ‘Meacu bajube maje jabocu cavarō mearocacu’, arí coyujacurí úi”, arí toivaicōjenejaquemavu

Jūmenijicu. ¹⁸Ñai “¿Jūmenijicure memecayū meacu bática?” ayure úi baju, Jūmenijicucarūravu “Yure memecayū meacubu”, arí coyubecebe. Ūbenita ñai “Jūmenijicu yure cadateibi ji memecaiyede úre” ayure, Jūmenijicucarūravu, “Yure memecayū meacubu”, arí coyucayume.

**Pablo úi coyūino ina borocūrivu
Jesús úi yávaiye méne beorí
coyucōjeimarape teivure
(Fil 4.15-18)**

11 ¹Jápijarā ji coyūquiyede mñjare caride. Ūvu mñje napinajiyere ayū yure ji coyūquiyede. Yū majicūvacari ñai “¿Meacu bática?” ayū úi bajuma árumecu bajure, nópe arí jauquiyebu yure, mñje dajocabenajiyere ayū ji coyūiye báquede mñjare Jesús úi yávaiye méne mñje pñeno baju jápiaiye boje ape yávaiyede. Que baru napijara yure ji coyūquiyede. ²Jūmenijicu yure tebutede ñaibi mñjare, yópe úmu úi tebuteyere mamaco bojnyore, “Mū cūvacayūmu óre mimarepacova” úi aríburu yóboi cūináu úmure. Jípacu me jári coreibi mamacore, ói cūbecojiyere ayū apesu úmūque, jícyū óre meaco bajure ámeno cūbecova Jūmenijicūi jáinore jímarepacu bacuyáre ne pūcūbuojjáravu baquinói. Aru ói járu apesu úmure, jípacu jarajebu óre. Nopedeca mñjare coreóvare ñacacu yū Cristore, mñje curājiyere ayū úque cūinávure. Que baru mñjare jíyūvu yū úre ámeno cūbevūva Jūmenijicūi jáinore. ³Jidvū yū vaiquiyede mñjare yópe vaiye báquepe Eva bácore. Yópe ñai áða majicu úi jujovaiye báquepe ó mácore, ói dápiabecojiyere ayū nurié, ói ámeina tecojiyere ayū, nopedeca arevu jujovaiyūrivubu mñjare, mñje dápiaabenajiyere ayū nurié, mñje ámeina tenajiyere ayū, dajocarū mñje ju aiyede Cristore aru mñje memecaiyede úre máre. Que baru jidvū yū.

⁴Mñja torojarivu napivubuya arevu coyūpōeva eaiyure mñje ímaroi. Me jápiaiuyūrivubuya ne coyūiyede Jesúrā,

coyúivureca apede úra ji coyúie báquede jarúvarí. Jacorúyuvubuya apesu decocure ne daroiyúmure, daroiyúvureca apesure, ñai Espíritu Santo ji darore ðaimu mácure jarúvarí. Ju aiyúvubuya ne bueiye Jesús úi yávaiye méne, ne que aiyede úbenina, bueivureca apede ji bueiye báquede jarúvarí. ⁵Nácapúravu yópe Jesús úi yávaiye méne beorí coyúicójeimarape teniduvubu. Aru úbenina arí dápiavubu mearare ji rueno. Úbenita yúcapúravu coreóvaivu iyede. Ne cáchinocacu ámevu yu. Aru ji rueno meara ámema na. Úbenita nárecabu mujare jaboteivu. ⁶Yu yávayu majibecúvacari meacama yávaicamaque, jáve me majivu yu Jesús úi yávaiye méne. Mujavacari me diede coreóvaivubu, muje jápaiye báque boje ji coyúie báquede aru muje jáiye báque boje ji ðaiye báquede obedinúma. ⁷Apevu póeva “Pablo ámeina teyube, úi jacorúyube boje muje táuturare, úi bueiye boje yópe apevu bueipóeva ne ðaiyepe”, úbenina aivubuya. Úbenita ye ámeina tebevu yu, ji jacorube boje táuturare, ji bueiye boje Júmenijicú yávaiye méne. Quénora yópe muje cáchinocacupe teni, memecacu ji ruuáque, íni bojedacuyu yure jauéde. Que teni coreóvare ðacacu mujare bojecubeda Jesús úi yávaiye méne, úi meadaiyede mujare muje úmei bojecubeda. Que teni mujare yópe ji ruenocavupe tede ðacacu, mujare meimeiye jaube boje, muje jíbenajiyere ayu yure jauéde. ⁸Aru ji sue báquede muje ímaroi, buesuyu mujare, jacorúcasu apesu Jesúre ju aipóevare, apeno ímaroi cójivivaivure, ne táuturare, íni bojedacuyu yure jauéde. Náre bojedacójecacu yure, náre memecabecúvacari, memecacuyu mujare bojecubeda. ⁹Ji sue báquede mujaque, apenúma yure jauteavú. Úbenita ye apejéne jéniametecacu mujacacu cúinácure. Quénora Macedonia ámicurijoborócanu majevu, ne ju aie boje Jesúre, ne daroimara

mácanu edaivu bácanu muje ímaroi, jima yure ne jiyede, ji íni bojedacuyiyepe aivu yure jauéde. Que baru dinúmu mácaróre cárijovametecacu mujare, yure jaué boje. Aru mujare ye cárijovamesuyumu apenúma máre, yure jaué boje. ¹⁰Meavu ji dápiaru ji coyure muiyede bojecubeda Jesús úi yávaiye méne cainoa ímaroa, Acaya ámicurijoborócaróare. Yu coyuyubu mujare yávaiyede jávene. Yu Cristo jicubu. Que baru borocubevu yu. ¹¹Ji que coyúie boje, “Pablo ñjare úbebi” úbenina arí dápiabejará muja. Jáve avu mujare. Júmenijicu me coreóvaibi yure pare usure mujare.

¹²Yúcapúravu ðare nuquijivu yópe ji ðarí cómajie báquepe, muje coreóvarájiyepe ayu borocurivure ina muje táuturare jacorúvure, ne bueiye boje “Pablo memenu me ñjapedeca”, úbenina ne aiyede. ¹³Nárecabu “Ñjatumu Jesús úi yávaiye méne beorí coyúicójeimara” úbenina aivu. Úbenita Jesús úi yávaiye méne beorí coyúicójeimara jáve ámema. Quénora póevare jujovaivubu. Ne bajumia jáðovariduvubu yópe Jesús úi yávaiye méne beorí coyúicójeimarape. ¹⁴Ne que teiyede, cuavaiye jaubevu majare, Satanás úi teiye boje. Satanávacari úi baju majibi jáðovañu meacupe, yópe ángelepe. ¹⁵Que baru cuavaiye jaubevu majare Satanáre memecaipóeva, ina “Ñjatumu Jesús úi yávaiye méne beorí coyúicójeimara” úbenina aivu, ne jáðovaiyede yópe mearo ðaivupe. Úbenita Júmenijicu ñájine ðacuyume ina jujovavure yópe náre ñájine ðaiye jauépe, ne que ðaiye báque boje.

Pablo “¿Meacu bária?” úi aino árumecupe, Corintocavu ne coreóvarájiyepe ayu Jesús úi yávaiye méne beorí coyúicójeimarape teivure
(Hch 9.23-25, 14.5, 19, 16.22-23)

¹⁶Bedióva cojedeca jéniaivu mujare, muje arí dápiabenajiyere ayu yure árumecure. Úbenita “Pablo árumecubevu” arí dápiavu baru,

jápiajarā ji soyuqiyede. Yure máre, yópe ina “Ñujatamu Jesús ñi yávaiye méne beorí soyuicōjeimara” ũbenina aivũ, arí dápiavũ ji puenocavũ ne soyuiyere soyuicōjeyara yure, “¿Meacu bárica?” ji bajuma ji aquiyepe aivũ.

¹⁷Maje jabocu Jesucristo iyepe paiye soyuiyede ye soyubejebu. Aru yure máre soyuicōjememí. Quénora yávacari soyuyubu yópe ãrũmecu ñi soyuiyere. ¹⁸Nore muje yebare, “¿Meara márica?” arí soyuivubuya ne bajumia, pōeva ne coreóvarãjiyere aivũ ñamejare aru aipe ne ðaiyede ijáravui. Que baru yũ máre quédeda arí soyuyubu. ¹⁹Mujarecabu me majidivũ muje dápiaru. Que baru torojurivũ jápiadavũ ãrũmevere. Aru ne soyuiyede napiyavũ muja. ²⁰Muja napiyavũ ina mujare ðaicōjeivure yópe ne cōjeimara majurórivure paivure. Napiyavũ ina ívure muje cavaede, aru ina jujovaivure mujare. Napiyavũ ina ãmeina jáivure mujare, “¿Parurivũ bárica ñuja ne pueno?” arí dápiavure mujare yópe ne cãchinocavure. Aru napiyavũ ina jara boaivure muje jijecamure máre. ²¹Ji parube boje, ne nópe ðaiyere ðabetecacu mujare. ũbenita ji pueno náre me jápiadavũ muja. Que baru cuyevũ yũ, ji parube boje.

Pōeva “¿Meara márica?” aivũ ne bajumia ãrũmevereca Jũmenijicui jáinore, ina jidũbevũva nópe aru, yũ máre jidũbecũva nópe soyuyubu. ²²Návacari “Hebreovatamu ñuja. Que baru judíova bajutamu aru hebreo ãmicuricamua yávaicamuare yávaivubu” aivũreca, yũ máre napedecabu. Návacari “Israel bácuí pãramenacavubu ñuja” aivũreca, yũ máre napedecabu. Návacari “Abraham mácuí pãramenacavubu ñuja” aivũreca, yũ máre napedecabu. ²³Aru návacari “Cristore memecavubu ñuja” aivũreca, yũ ne pueno memecayubu Cristore. ũbenita yópe ãrũmevere yávayubu, que ayũ.

Memecacu yũ ne pueno. Jabova jēni jacoima yure ãmeina teivure jēni jacoĩnami jívui obedinũmuare,

ne pueno. Jabova jara popeicōjeima yure obedinũmuare, ne pueno. Yainíducacu yũ obedinũmuare ne pueno.

²⁴Soyuyubu mujare iye ji yainíduiye báquede. Cũinárũrũre painũmua baju ina judíovai jabova jara popeicōjeima yure ne treinta y nueve baju jara popeiyede ne boaime ãmacajeque ðaimeque. ²⁵Yóbecurĩnũmua baju ina Roma ãmicurõ jaborõcavui jabova jara popeicōjeima yure jaradoque. Cũinára pōeva cãraboaque ðavari boarí jaruvaiyurĩduima yure. Yóbecurĩnũmua baju jiadocũ uracũ ji nuicũ mácarõ corí bíjyaiye báque boje, cãtecacu yũ jia uradai, aru cũinára jorí, nurí coreni, maotecacu cũinãñamine aru cũinájãravure máre. ²⁶Apenũmuare cuscũncacu yũ joai, soyũcuy Jesús ñi yávaiye méne obediĩmaroai. Aru ji cuscũniyede, ñájicacu pare. Apenũmuare bejarí bíjarĩducacu ji jatarĩduiyede jia yaboiyede. Apenũmuare tatorí ñavaipōeva ji cavaede ñni ñavariduiima. Apenũmuare apevũ ji pōeva, judíovacavũ, ãmedaima yure. Aru apenũmuare ina judíova ãmevercavũ ãmedaima yure. Apenũmuare ji cuede ĩmaroai, apenũmuare pōescubenoí, aru apenũmuare jia uradai máre ñájicacu yũ. Aru pōeva ũbenina “mũ, ñujecu”, borocurivũ arí, Jesúre ju aipõevape teni, na máre ãmedaima yure. ²⁷Apenũmuare pare memecacu yũ pu uetuyũ baju, eacuyũ tãuturare, bojedacuyũ yure jauéde. Obedinũmuare cãmetecacu, ji memeiye boje. Avné ijiteavũ yure aru cũinóavũ yure máre. Apenũmuare ãiyede cuvabotecacu. Apenũmuare ji curĩñamine cuvabotecacu. Aru apenũmuare cuitótecaje jauveavũ yure. ²⁸Aru apede máre ñájicacu yũ. ũbenita caiye iye pueno, jãravua coapa ñájivaivũ yũ, ji cãrijiiye boje cainoa ĩmaroacavũ Jesúre ju aipõeva cójjijivaivure. ²⁹Cũinãcu nácacu ñi parũbedu ñi ju aiyede Jesúre, chĩori vaivũ yũ pare. Aru cũinãcu nácacu apescui jujovaimũ mácu ãmeina tedu, yávacari cãrijini ñájivũ pare.

³⁰“¿Meacu b́arica?” yure aiye jauru ji bajuma, arí soyuiyubevu yóre parucupe. Qué Nora soyuiyuvu, muje majinajiyere ayu yure parubecure ji bajuma. ³¹Maje jabocu Jesucristoi mearore jímu, jípaçu máre, majibi jáve ji soyuiyede. Úre mearore jíye javu majare cainuma. ³²Javede J́umenijicu j́adovame yure parubecure ji bajuma. Damasco ámicuríimaro no joborocaróre ñai jabocu Aretas ne aimu jaboteame. Apecure jaboteicójequemavu ina Damascovure. Ñai jabocu, Aretai epeimu, coreicójequemavu j́aipóevare ímaro jedevacobeai, ne j́eni jacoríduráj iyere ayu yure. ³³Úbenita ji yóvaimara, yure cadateipóeva, epeima yure pue urapue jívuí. Aru no biaido tarabu j́aicobei émeóvaima yure pu joboróita biaido asepurvái, ji dupini nuqiyere aivu ñai jabocure jocarí.

**Pablo úi jáino mácaró
yóre decoboainope**

12 ¹Póecu “¿Meacu b́arica?” ayu bojecubecupe páyube úre aru arevure máre. Úbenita muje jápaiye boje ina j́ujovaiyu ne soyuiyede yáviyede jáve ámene ji soyuiye pueno Jesús úi yáviyede jávene, ji bajuma soyuiye javu yure. Ina buaipóeva borocurívu “¿Meara márica ñija arevu pueno?” adama, ne jáiye boje yóre decoboainope. Que adama na. Que baru yu máre soyuijivuvu mujare maje jabocu Jesucristoi járe ðaiye báquede yure yóre decoboainope aru úi coreóvare ðaiye báquede yure máre, úi majiéquede. ²Cúinácuvu úmu, ji coreóvaimu, Cristoque cucu cúinávure, jáme yóre decoboainope catorce paíjvua jírocamiá. Yóre apecu bajarócupe soyuyubu ji bajuma, ji suyeyiye boje. Dinumu mácaróre J́umenijicu nuvame yure pu cavaró mearo úi curó, yóbecuriticubvuita, míjina ne vuitucubu aru aviávai curiticubu puenoi. Yure nuvañu mácu baru ji bajucue o ji úmeque, majibevu yu. J́umenijicu cúinácuvu majibi. ³⁻⁴Majivu

yu yure úi nuvaimu mácure pu Paraíso ámicuró cavaró mearocaróita. Nore járiacacuvu yu yávaiye me bajure, maja póeva maje yávaicamuaque ye yávarí buojabevu diede, aru J́umenijicu yure yávaicójemeteame diede. Bedióva soyuyubu mujare, yure úi nuvaimu mácure majicvucarí, ji bajucue o ji úmeque majibevu yu. ⁵“¿Meacu b́arica?” arí soyuijivuvu no boje, ji jáino mácaró decoboainope boje. Úbenita ape vaiye báquede yure ji bajuma “¿Meacu b́arica?” arí soyubequijivuvu. Ji bajuma arí soyuijivuvu ji parubede. ⁶“¿Meacu b́arica?” arí soyure nuuyucuvu baru ji bajuma, ji apede jáiye boje yóre decoboainope, árucucupe tebejebu, caiye ji soyujuroe jáve boje. Úbenita diede soyubequijivuvu. Mujare me j́aicójeniduiyubevu yure, ji jáiye boje yóre decoboainope.

Qué Nora mujare me j́aicójeiyuvuvu yure, muje jáiye boje ji ðaiyede aru muje jápaiye boje ji soyuiyede. ⁷Ji arí ðápiabequiyere ayu meacure caivuvu pueno, caiye iye me bajure J́umenijicui coreóvare ðaiye báque boje yure, J́umenijicu yure ñai abujuvai jabocu Satanára ñájine ðaicójeimi. Satanás ñájine ðarí ćarijovavaibi yure yóre miyuoye j́eyere ji bajui. ⁸Yóbecurínvua j́eniacacuvu maje jabocu Cristore, úi ðajocare ðaquiyere ayu iye úi ñájine ðaiyede yure. ⁹Úbenita yóre arí, soyuáme: “ðajocare ðabecubu yu mi ñáj iyede iye parubede ðaiyede mure. Qué Nora cainuma parure ðacuymu mure ji mearo ðacaiyequo bojecubeda ji me boje. Que teni ye j́aubequiyebuvu mure cainuma. Mítamu cucu ye parubecuvu, yéde ðaiye majibecuvu. Dinumvumareca yávacarí j́adovávumu ji parué majiéde, cadatecuvu mure”, áme maje jabocu Cristo. Que baru yu torojucu baju “¿Meacu b́arica?” arí soyure nuqijivuvu pueno baju, ji parube boje ji bajuma, cuvucuvu Cristoi parué majiéde, arevu ne járaj iyere ayu diede. ¹⁰Aru, “Meavuvu ayubu, torojucu máre yure jíiéde, arevu yure ne ámeina yáviyede, yure

jauéde, apevu yure maucuvári ne ñájjine ðaiyede yure, aru ji cárijiyede. Caiye iye ámeno vaiyede yure Cristo jicu bae boje, “Meavu yure” ayu, torojavu yu. Ji parube boje, majivu Cristo cadateyure yure ji ðaiyede ùi parué majiéque.

**Pablo ùi cárijino Corintocavu
Jesúre ju aipðevare boje**

¹¹ Ji nópe toivaicðejiye boje apecure, árumecupe teivu yu. Ùbenita jauteavũ yure, muje jápaiaye boje ina Jesús ùi yávaiye méne beorí coyucðeimarape teniduvu ne borocurí coyuiyede Jesús ùi yávaiye ména aru yurá máre. Ñamene yure aru yéde ji paruéde coyuiye jauřiduavũ mujare. Ùbenita muje coyube boje, coyuiye jauteavũ yure ji bajuma. Na “Pablo bojecubecube”, ùbenina ávaivubuya. Ùbenita yu bojecubecuvacari, ye ne cãchinocacu ámevu yu. Aru ji rueno meara ámema na. ¹² Ji cue báquede mujaque Jümenijicu yure ðare ðáme pøeva ne jámene, ne ðarí majibede, aru ape paruéque ðaiyede máre, jáðovacuyu yure jáve Jesús ùi yávaiye méne beorí coyucðejeimu bajure. Caiye iye ji ðaiyede napini ðacacu yu. ¹³ Yu ámevu apevu ne cãchinocacu. Quédeca mujacarpuravu máre ámevu apevu Jesúre ju aipðeva cójjivaiyu ne cãchinocavu ji jáinore. Mearo ðacaiyede ye ðabetecacu yu rueno baju apevure boje muje rueno. Jáve jëniametecacu muje táuturare, yópe ji jëniayepere apevu Jesúre ju aipðeva cójjivaiyure. Ùbenita, “Pablo ñujare ámeina jáñumebu”, ùbenina arí ðápiabejará muja. Muje ubedu ji jëniame máquede muje táuturare, chíori jëniañumu muje árumenajiyepere ayu diede.

¹⁴ Javede ruque jácunucacu mujare. Aru caride meadáyubu ji cuvede, jácunucuyu mujare bedióva cojedeca. Aru yópe jipocai ji ðaiye báqueredeca, jëniamescuyumu muje táuturare. Muje cuvade cuvaiyubevu yu. Quénora cuvaiyuvu yu mujare Cristo jinava. Mujarecabu yópe jímarape

yure. Ùbenita mamara ámevurecabu bojedacaiyu nébucuvare ne árajiveva. Quénora nébucuvarecabu bojedacaiyu némarare ne árajiveva. Que baru yu jacopuiyubevu muje táuturare. ¹⁵ Yu torojucu baju jícuymu caiye ji cuvade aru ji bajure máre, cadatecuyu mujare, ji ue boje mujare. Ùbenita mujare rueno baju ure nuñureca yu, mujacarpuravu ji jáinore quíjjino baju ure nuivubu yure.

¹⁶ Apevu mujaque curivu, yópe arí, ámecorovaivubuya yure: “Jáve Pablo jëniame mi ñuje táuturare. Ùbenita jujovarí iñume ñuje táuturare majibeñva”, ávaivubuya. ¹⁷ ¿Aipe ðarí mujare jujovarí, iñu buojari yu muje táuturare? ¿Muje dápiaru, ina ji jaroimara mácavure jujovaicðeiarí mujare? ¹⁸ Titore jëniacacu parurðeca, ùi nuquiyepere ayu muje yebai. Aru jarocacu apecu majecu Jesúre ju aipðecure éque. ¿Muje dápiaru, Titojá jujovarí mujare? Muja me majidivubu jáve Titojá jujovabevu bácvure mujare. Me majivu yu náre, yuredeca, cainnuma mearore dápiavure aru mearore ðavure máre. Que baru ñuja ye jujovabevu mujare.

¹⁹ Caiye iye ji toivaicðejiyede apecure mujare jári boroteivu bácvu dápiabejará muja coyuyure ñuje ðaiyede, muje arí coyurájiyepere ayu “Meavu” o “Meamevu”. Muja ámevurecabu coyurájivu méne o meamene ñuje ðaiyede. Quénora Jümenijicurecabe coyucuyu diede ñujare. Ùbenita caiye iye ji toivaicðejiyepere apecure coyuyubu yu Jümenijicui jáinore, ji cue boje Cristoque cünávure, muje parure nurajiyepere ayu muje ùmei. Que baru muja, jívu, caiye ñuje ðaiyeque cadateiyurivubu mujare. ²⁰ Jidavu yu ji copaidaquiyede muje yebai, apevu mujacavu ðabevu bárájjivure yópe mujare jauépe. Apevu jararí pare áðamateiyurájjichuma. Aru apevu tebutenajjjichuma. Apevu jijatenaajjjichuma ùbenina. Apevu ðarájjichuma ne baju urópe dápiabeñva mearore o ámenore apevure. Apevu coyurájjichuma

ãmenore caivũ ne jápiaiye de apevũ borore. Apevũ yávarãjichũma jápiabenoi ãmenore apevũ borore. Apevũ “¿Meara márica apevũ pũeno?” arĩ dápíarãjichũma. Aru apevũ maucũvarĩ, cãrijovari, boaiyũrãjichũma apevũre.

Mũjacavũ ne nópe ðaru, ji copaidaquiyede torojubecũyũmu yũ. Aru mũja máre torojubenajaramu, ji jararĩ ñãjine ðaquiyede boje mũjare, mũje nópe ãmeina teiye boje. ²¹Jidũvũ yũ ji copaidaquiyede mũje yebai Jũmenijicu ji mearore jĩmu cũyoje tede ðacũyũre yũre bediõva cojedeca mũje jáĩnore. Apevũ mũjacavũ curivũbuya mũje ãmeũmeque. Apevũ mũjacavũ ãmeina ðarĩ curivũbuya apevũque némarebũcũva ãmevũque. Aru apevũ mũjacavũ caino ãmenore ðaivũbuya. Nópe teni ãmeina teima javede. Aru chiõmeni oatũvabenama cãreja ne ðaiyede. Quénora ãmeina tede nuivũbuya. Chiõmeni oatũvabedu ji ðaquiyede jipocai, chiõri ocũyũmu yũ pare, náre boje.

**Pablo ãi majicaino aru meaicõjeino
Corintocavũre
(Mt 18.16)**

13 ¹Ji eaquiyebu cari yóbecũe ji eaiye jácũniyede mũje yebai. Yópe arĩ, toivaicõjeneaquemavũ Jũmenijicu ãi yávaiyede: “Ñai põescu apevũ ne boro coyũrĩ ðaaimũ maru, ‘Ãmeina ðayũbe’ aivũ baru ãi borore, pũsarã o yóbecũrã o apevũ máre majidivũ bácavũ ãi ãmeina ðaiye báqueda boro coyũiye jaũvũ náre ãi borore”, arĩ toivaicõjeneaquemavũ. ²Ji eaquiyede jipocamia mũje yebai bediõva cojedeca, parũrõreca coyũiyũvũ mũjare yo paperayocaque ji cũede joai mũjare jocarĩ. Ji cari eaquiyede napimescũva jáve jararĩ ñãjine ðacũyũmu caivũ mũjacavũ ãmeina ðare nuivũre. Javede, ji pũque cũe báquede mũjaque, quédeca coyũcasũ parũrõreca mũjare. Coyũcasũ mũjacavũ ãmeina ðaivũre ji eaquiyede jipocamia aru caivũ apevũre máre. ³Mũjarecabu jẽniaivũ ji jádovaquiyepere aivũ yũre Cristoi coyũicõjeimũ

bajure. Ji eaquiyede jádovacũyũmu jáve baju ji cũvaede Cristoi parũéde. Ûrecabe parũbecũ ãmesũ. Quénora parũcũ bajutame. Que baru parũre ðacũyũme yũre mũje jẽneboi, ji ñãjine ðaquiyepere ayũ úre ju aipõeva ãmeina ðarĩ cõmajivũre. ⁴Cristo jádovamecũ bácũvacari ãi parũéde ne pẽvari boarĩ jarũvaiye báquede úre jocũcũjaravena, caride apũcũ cũbi Jũmenijicũi parũéque. Ûpedeca ñũja ãi yávaiye méne beorĩ coyũicõjeimara, úque curivũ cũinávũpe, parũbevuvacari, jádovarajaramu ãi parũéde ñũje cũvaede, ñũje ñãjine ðarãjiiyede mũjacavũ úre ju aipõeva ãmeina ðarĩ cõmajivũre.

⁵Jãri corevajarã mũja coapa mũje baju, jádovarajivũ ju are nuivũre maje jabocũ Jesucristore ðajocabevũva o úre ju aiyede ðajocavũre. Me dápíarĩ corevajarã mũje bajumia. Que teni coreóvarãjaramu curivũre Jesucristoque cũinávũpe, úre ju aivũ baru. Ûbenita úre ju abevũ baru, coreóvarãjaramu cubevũre úque cũinávũpe. ⁶Mũje coreóvarãjiiyede curivũre Jesucristoque cũinávũpe, coreóvarãjaramu ñũjare, mũjare coreóvare ðaivũ bácavũre, ãi yávaiye méne beorĩ coyũicõjeimara bajure. ⁷Ñũje earãjiiyede, mũjacavũ ãmeina ðarĩ cõmajivũ baru, mũja coreóvarãjaramu ñũjare Jesús ãi yávaiye méne beorĩ coyũicõjeimara bajure, ñũje ñãjine ðarãjiiye boje náre Cristoi parũéque. Ûbenita ñũja jẽniaivaivũ Jũmenijicũque, mũje ãmeina ðabenajiiyepere aivũ. Mũje ãmeina ðarĩ cõmajibedu, ñamene ye ñãjine ðabenajaramu ñũja parũéque. Ñũje parũéde jádovamenu, “Jesús ãi yávaiye méne beorĩ coyũicõjeimara ãmema”, ùbenina arĩ dápíarãjichũvũ mũja ñũjare. Ye baju ãmevũ ñũjare. Pare urivũbu ñũja caiye pũeno, mũje mearore ðarãjiiyepere aivũ.

⁸Põeva ne mearore ðaiyede, ðaivũbu yópe Jũmenijicũi ðaicõjeiyepe ãi yávaiye jáveque. Aru Cristo ñũjare jádovaicõjememũ ãi parũéde, ñũje ãmeina ðarãjiiyepere ayũ ina yávaiyede

jāvene đaipōevare. Quénora ñujare jádovaicōjeimi ñi paruéde, ñuje cađatenajiyeye ayu náre. ⁹Muje mearore đaiyede, parure ñuivubu muje ũmei. Aru mujare ñájine đaiye jaubevu ñujare. Que baru ñuja buojabenamu jádovaivu iye paruéde, Cristoi cāvare đaiyede ñujare. Aru parubevupe teivubu muje jáinore. Ũbenita parubevuvacari, torojuvu ñuja, muje parure ñuiye boje muje ũmei. Aru cainumua jēniavaivubu Jūmenijicuque, ñi parure nure đaquiyeye aivu mujare muje ũmei, pñ mujare ye jaubeta.

¹⁰Yo paperayocare toivaicōjeivu apescure mujare ji cuede joai mujare jocarī, muje meatenajiyeye ayu muje đaiyede, ji equiyeye jipocamia muje yebai. Que tedu, mujare ñájine đaiye jaubequiyebu yure, yópe Cristoi đaicōjeiyeye yure caivu ũre ju aipōevare āmeina đarī cōmajivure. Ũrecabe parure đabecu ñujare, ñuje chīore đarī, đajocare đarājiyeye ayu

pōevare ne ju aiyede ũre. Quénora parure đaiibi ñujare, ñuje torojure đarī, parure đarājiyeye ayu náre ne ju aiyede ũre.

¹¹Muja, jivu, quénoramu caride. Meatejarā muje đaiyede. Aru cainumua pueno baju mearore đare mujara muja. Me jápiarī ju ajarā ji coyuyede mujare. Cūináturu muje ũme me cujarā caivu muja cūináturu. Cārijimenoque me cujarā muja. Que đaru, Jūmenijicu, ñai majare ucu aru majare cārijimenoque cure đayū, cuscuyume mujaque. ¹²Me jacyujarā muja mujevure muje jivare nuri, muje Jūmenijicu jina mae boje. ¹³Caivu Jesúre ju aipōeva yore curivu meaicōjedama mujare. ¹⁴Maje jabocu Jesucristo mearo đacajacurī mujare bojecubeda ñi me boje. Majepacu Jūmenijicu, mujare ucu, ure đajacurī mujare. Aru ñai Espiritu Santo yóvajacurī mujare cūinávupe. Quénoramu.

Gálatas

Mamabuinore coyuiyebu Pablo bácu ùi toivaicõjeiye báquede paperayocare Galacia ãmicurijoborõcavu Jesúre ju airõevare. Pablo bácu judíovacacu bácvacari, Jesús ùi yávaiye méne beorí coyucõjeimv marejaquémavu, coyucuy ùi yávaiye méne judíova ãnevare, judíova ne ju abe boje ùi coyuiyede. Lucas bácu coyurejaquemavu Pablo bácu borore Hch 7:57-8:1, 9:1-31, 13:1-28:31, aru ùi cuede Galacia ãmicurijoborõi Hch 13-14, 16:1-7. Apevu ne dápiayepe, Pablo bácu toivaicõjenejaquemavu iyoca paperayocare ãniuju bácarõre 48 d.C. ùi cuede Antioquía ãmicurimaro Siria ãmicurijoborõcarõi. Ùbenita apevu ne dápiayepe, ù mácu toivaicõjenejaquemavu diyocare ãniuju bácarõre 52 d.C. pñque ùi cucunuiyede, coyucuy Jesús ùi yávaiye méne, ùi cuede Corinto ãmicurimaro. Aru apevu ne dápiayepe, ù mácu toivaicõjenejaquemavu diyocare ãniuju bácarõre 56 d.C. yóbesue ùi cucunuiyede, coyucuy Jesús ùi yávaiye méne, ùi cuede Éfeso ãmicurimaro. Pablo bácu coyurejaquemavu ùre toivacaipõecu bácvre aipe ùi toivacaquiye báquede diyocare (Gá 6:11).

Diyocaque Pablo bácu jáðovarejaquemavu ù baju Jesús ùi yávaiye méne beorí coyucõjeimvure. Aru coyurejaquemavu pøeva ne boropatebenajiy majibede Jãmenijicui jáinore ne ðaiye boje yópe ðaicõjeiyepe. Coyurejaquemavu pøeva yópe boropatebevure Jãmenijicui jáinore ne ju aiyequé Jesucristoi ðaiye báquede ùi yayiede jocucujaravena náre boje. Coyurejaquemavu pøecu cubecure ðaiye majicu yópe boropatebecupe ùi bajure Jãmenijicui jáinore.

Pablo ùi meaicõjeino Galaciavure

(Mt 20.28; Mr 10.45; 1 Ti 2.6; Tit 2.14)

1 ¹Yv, Pablo, Jesús ùi yávaiye méne beorí coyucõjeimvutamu. Põecu ãmemi beorí daroyv yure epecuyv Jãmenijicui yávaiye méne coyupõecvva. Quénora Jesucristorecabe, majepacu Jãmenijicvque, ñai nacovañv mácu Jesucristore yainore jarvvarí, epeyv bácu yure coyucuyvva ùi yávaiye méne. ²Yv aru caivv majevv, Jesúre memecaivv yáque curivvque, meaicõjeivvbu mjavare, Jesúre ju airõeva cójijivaivvure cójijivvãmiai Galacia ãmicurijoborõi. ³Majepacu Jãmenijicv, maje jabocu Jesucristomaque, mearo ðacajacurí mjavare bojecubeda ùi me boje. Aru torojurí cure ðajacurí mjavare cãrijimevva. ⁴Jesucristo, ju arí majepacu Jãmenijicvure, ðarejaquemavu yópe Jãmenijicui vgrõpe. Que teni ùi bajuma yaidéjaquemavu, maje boropatebenajiyepe ayv maje ãmeina

teiy boje, meadacuyv majare, maje ãmeina tebenajiyepe ayv yópe apevu ijãravvcavvpe. ⁵Que baru mearore jínajarevva Jãmenijicvure cainvva. Quédecabu.

Cünárorã Jãmenijicui meadaino pøevare

(1 Ts 2.4)

⁶Cuecumari jáivv yv mjev ðaiyede. Maumejiena dajocavvbuya mjavã Jãmenijicvure, ñai cutuyv bácvre mjavare ù jina mãrajivvva Cristoi mearo ðacaiye báquede mjavare ùi yayiede majare boje. Ùre dajocarí, ju aivvbuya mjavã ape yávaiyede, Jãmenijicui yávaiye méne jarvvarí. ⁷Ùbenita ape yávaiye me cubevv. Cünároramu cvv: Jesucristo majare meadayvbe. Coyuyvbu mjavare diede, apevu pøeva ne bueiy boje apeno bueinore. Que teni cãrijovavvbuya mjavã. Aru oatvvaivvurídivvbuya iye yávaiye méne, Cristoi meadayede majare. ⁸Ùbenita ácu pøecu coyvru

mujare ape yávaiyede iye yávaiye méne ñuje mujare mamarumure coyuiye báquede jaruvari, aru “Coyuyubu mujare Cristoi yávaiye méne” ñi aru ÷benina, Jūmenijicu ñájine ñajacurī ÷re toabo cūiméboi cainumua. Ye baju ãnevū yávacari ji coyuru o ángele cūinácu Jūmenijicui curōcacuvacari ñi coyuru ape yávaiyede, ñájine ñajacurī Jūmenijicu ñujare máre. ⁹Javede coyucacu mujare diede. Aru caride máre coyuyubu diede mujare, Jesucristore ju aivure, cojedeca: Ácu pōescu coyuru yávaiye ape yávaiyede, iye Cristoi yávaiye méne jaruvari, Jūmenijicu ñájine ñacuyume ÷re toabo cūiméboi cainumua. ¹⁰Ji nópe coyuiye boje, coreóvaivubu mija jáve pōeva ne me jáiyede vobecure. Quénora jáve voyubu Jūmenijicu ñi me jáiyede yure. Jáve buebevū yópe pōeva ne ñrōpe. Quénora bueivū Jūmenijicui ñrōpe. Yu bueyū baru pōeva ne ñrōpe, memecabejebu Cristore.

Pablo ñi coyūino Jesúí coyucōjeiyede ÷re ñi yávaiye méne

(Hch 8.3, 9.3-6, 26-30, 11.30, 15.2, 22.3-10, 26.9-11, 13-18)

¹¹Muja, jívu, uvu yu mije coreóva iyede iye Jesús ñi yávaiye méne ji coyuiyede pōeva ne dápiayē ãmene. ¹²Pōescu cubebi coyuyū bácu yure diede. Aru pōescu cubebi bueyū bácu yure diede. Quénora Jesucristovacari coreóvare ñarejame yure. ¹³Javede mujavacari jápiadavū ji borore, ji ñaiye báquede yópe caivu judíovape, ji ju aquíye jíprocamia Jūmenijicure. Jūmenijicui pōeva Jesúre ju aivure cujurī, boarī, ñájine ñayū barejacácu yu cōmaje ñroje jámecuva. Coavaiyuríduyū barejacácu yu ne cójijiyede, ne ñajocarājiyēpe aríduyū ne ju aiyede Jesúre. ¹⁴Aru ji mearore jíye báquede Jūmenijicure yópe caivu judíovape, ñare ñarejacacu yu arevū judíova pueno, ina pōeteivū bácvare yáque. Que baru ne pueno ju arī, ñare cuyū barejacácu iye ñaicōjeiyede

ñujeñecuva mácvu ne bueiye báquede ñemarare aru ñepāramenare máre.

¹⁵÷benita nópe ñayū bácvareca, Jūmenijicucapūravū yópe ñacarejaquemavu yure. Beorejaquemavu yure ji pōetequiye jíprocamia. Aru cuturejaquemavu yure, ñi pare ñe boje pōevare, ji memequiyēpe ayū ÷que. ¹⁶Coreóvare ñarejaquemavu yure mamacure, Jesucristore, ji coyucuiyēpe ayū ñi yávaiye méne ina judíova ñevure. Que baru Jūmenijicui coreóvare ñaríburu yóboi yure mamacure, ñamene jēniari jámenejacacu aipe ñaiye jaurore yure. ¹⁷Cūiná Jerusalén ñamicuríimaroí jácunūmenejacacu yu ina ji jíprocái Jesús ñi yávaiye méne beorī coyucōjeimarare, buescuyū náque. Quénora cūiná ñarejacacu yu Arabia ñamicuríjorōí, copaidacuyū cojedeca nore jocarí Damasco ñamicuríimaroí.

¹⁸÷benita yóbecuriyūva vainíburu yóboita, ñarejacacu yu Jerusaléí, Pedrora jácuñū. ñarejacacu ÷que pūcasumana bajura. ¹⁹Aru arevū ina Jesús ñi yávaiye méne beorī coyucōjeimarare jámenejacacu yu dinumure. Quénora járejacacu yu ñai Santiagore, maje jabocui yócvare. ²⁰Iye ji coyuiye jávetamu. Borocubecvā coyūivū yu diede mujare Jūmenijicui jáinoí.

²¹Aru ji ñaríburu yóboi Jerusaléne jocarí, ñarejacacu yu Siria aru Cilicia ñamicuríjorōí. ²²Ina Jesúre ju aipōeva cójijivaivū ímaroa coapa Judea ñamicuríjorōcavū jámenejaquemavu yure cáreja dinumure. ²³Quénora jápiarejaquemavu ji borore, yópe aiyede: “Ñai cujurí boarí ñájine ñayū bácu Jesúre ju aipōevare javede, ne ñajocarājiyēpe aríduyū ne ju aiyede Jesúre, caride coyuyūbe Jesús ñi yávaiye méne, pōeva ne ju arājiyēpe ayū ÷re”, arejaimada náre yurā. ²⁴Que baru mearore jídejaquemavu na Jūmenijicure, ñi mearo ñare ñaiye boje yure.

Arevū Jūmenijicui yávaiye méne beorī coyucōjeimara ne me jáino Pabloí memeinore

2 ¹Catorce paíyūva vainíburu yóboi, ñucacu yu cojedeca Jerusaléí.

Bernabé yóvame yure. Aru nuvacarã Titore máre. ²Nucacu yu Jūmenijicui jáđovaiye boje nuiye jaurõre yure noi. “Ji bueiye báque, aru caride ji bueiye, pōevare ũbenina bíjaquijichavu, jabova ne ũbedu ji bueiye”, arí dápiacacu yu ji baju. Que baru cójjicacu yu Jesúre ju aipōevai jabovaque, coyucayu náre Jesús ũi yávaiye méne ji bueiye de judíova āmevure, majicayu méne o āmene ji bueiye. ³⁻⁴Aru apevu pōeva buraiçōjeiyurĩduquemavu ji yóvaimu Titore ũi cajede judiovape, ũi bucava judíova āmevureca. Ũbenita ina jabova ye buraiçōjemeteima úre. Ina buraiçōjeiyurĩduivu Jesúre ju aivupe teivu yavenina darí cójjijima ñujaque, majinajivu aipe ñuje ðaiyede. Boro coyurí ðaiyurĩduima ñujare, ñuje ðabe boje caiye Jūmenijicui ðaiçōjeiyede, ũi coyuiye báquede Moisés bácuere. Caiye diede ðaiye jaubevu ñujare caride, ñuje cūe boje Jesucristoque cūinávupe, ũi boropatebede ðaiye boje majare Jūmenijicui jáinore. Ũbenita nácapūravu yebacavupe tede ðaiyurĩduima ñujare, “Ðajarã caiye iye Jūmenijicui ðaiçōjeiyepere ũi coyuiye báquede Moisés bácuere”, ne ainoque. ⁵Ũbenita ñujacapūravu ye ðabeteçarã yópe ne urõpe. Ñuja ðaivu baru yópe ne urõpe, buebejebu iye yávaiye méne jávene, Jesucristoi meadaiyede majare. Que baru ðabeteçarã yópe ne ðaiçōjeniduiyepere, oatuvabenajivu Jesús ũi yávaiyede jávene. ⁶Aru ina Jesúre ju aipōevai jabovavacari ju arí ñujare, ye apejēne oatuvaicōjemeteima ji bueiye de Jesús ũi yávaiye méne.

Ina jabovabu Jesúre ju aivu ne aimara parurivū, ne cūe báque boje Jesúque. Ũbenita Jūmenijicuvacari jáimi caivu pōevare cūináturu. Que baru ye baju āmevu yure ina jabova ne parué pōeva ne jáiyede. ⁷Oatuvaicōjemeteima yure ji bueiye de. Quénora, “Jāve coreóvaivubu caride”, aima na. “Jūmenijicui epeimumu mu, bueyu Jesús ũi yávaiye méne judíova āmevure yópe ũi epeiye báquepe Pedrorre bueyu diede

judiovare”, aima yure ina jabova. ⁸Aru Jūmenijicuvacari epedejaquemavu yure Jesús ũi yávaiye méne beorí coyucōjeimu judíova āmevure, yópe ũi epeiye báquepe Pedrorre Jesús ũi yávaiye méne beorí coyucōjeimu judiovare. ⁹Que baru ina Jesúre ju aipōevai jabova parurivū pōeva ne jáiyede; Santiago, Pedro, aru Juan máre; coreóvaima dinumure Jūmenijicu yure memecare ðayure úre, ũi mearo ðacaiye boje bojecubeda. Que baru caivu ñuja, ina yóbecurã aru yu Bernabémaque, purujēcarã ñuje baju, jáđovarajivu ne ju aiyede ñuje memecaiyede Jūmenijicure. Que teni ñuje ũme cūináturu, “Pablo Bernabémaque buenajarama Jesús ũi yávaiye méne judíova āmevure. Aru Santiago, Pedro, aru Juan máre buenajarama Jesús ũi yávaiye méne judiovare”, acarã ñuja. ¹⁰Que aiyede, cūináro apejĩnore ina jabova coyūima ñujare. Jēniaima ñuje ðajocabenajiyepere aivu ñuje cadateiyede ina cōmaje ārojarivure. Aru yúcapūravu pare cadatete nuiyucu batecácu náre.

**Pablo ũi yávarí meadaino Pedrorre
Antioquíai
(Hch 11.2-17)**

¹¹Ũbenita ji cuede Antioquíai āmicurĩmaroi, Pedro edame noi Jesúre ju aipōevai cójjijĩnami. Apejāravua vainĩburu yóboi, āmeina dáme ũ. Dinumu yávacacu yu úre copu Jesúre ju aipōeva ne jápiainoi, ũi ména ðabe boje ũi ðaiyede. ¹²Mamarumure Pedro mearo ðayu bateáme. Āñu mateáme ina Jesúre ju aipōevacavu judíova āmevūque. Ũbenita apejāravua vainĩburu yóboi, apevu ũmūva, Santiagoi daroimara mácavu, ne edaiyede Antioquíai, Pedro yóvabeteame ina Jesúre ju aipōevacavu judíova āmevure. Ðajocame ũi āiyede náque. Aru coateni buame ũi baju náre jarurari. Nópe dáme ũi jidué boje ina edaivu bácvu ne buraiçōjeiyepere boje caivu Jesúre ju aipōeva ũmūvare ne cajede judiovape. ¹³Pedro majicuvacari Jūmenijicu me jáñure Jesúre ju aipōeva

judíova ãmevure, aru majicuvacari coateiye jaubenore ina Jesúre ju aipõevacavũ judíova ãmevure jaruvãrĩ, coateame ãi bajuma. Aru apevu Jesúre ju aipõevacavũ judíova máre, ãpe ðarĩ buima. Que teni na máre majidivuvacari coateiye jaubenore Jesúre ju aipõevacavũ judíova ãmevure jaruvãrĩ, coateima ne bajumia. Aru Bernabé máre náque nũame ã. ¹⁴Ji jáinore ne nópe ðaiyede ye ubetecacu yũ. Que baru yópe arĩ, coyucacu Pedrore caivu ne jápiainoi: “Múvacari judíotamu. Ubenita ðabevũ mu judíova ne ðaiyepe. Quénora ðaivu mu judíova ãmevu ne ðaiyepe. Que baru, ðaibe teni ðare ðaiyurĩduyurũ mu ina judíova ãmevure judíova ne ðaiyepe? Mi dajocaiye boje náre, na yóvayurivũ baru mure, ðaiye jaujebu náre judíovape. Que baru meamevu mi ðare ðaiyurĩduiye náre”, acacu yũ Pedrore.

**Jũmenijicu ãi meadaino judíovare
aru judíova ãmevure máre ne ju
aiyede Cristore
(Ro 3.20, 22; Fil 1.21)**

¹⁵Põetedejacadã ñũja judíova. Que baru judíova bajubu ñũja. “Judíova ãmevu ãmeina teivũbu ne cuvabe boje Jũmenijicui ðaicõjeiyede Moisés bácuĩ toivaiye báquede”, arĩ ðãpiaivũbu ñũja. ¹⁶Ubenita põecu cubebi Jũmenijicu “Boropatebevũ mu ji jáinore”, ãi aimũ, ãi ðaiye boje yópe Jũmenijicui ðaicõjeiyede Moisés bácuĩ toivaiye báquede. Quénora Jũmenijicu “Boropatebevũ muja ji jáinore”, aibi põevare ne ju aiyede Jesucristore. Diede me majidivũbu ñũja judíova Jesúre ju aivu. Aru ñũja judíovavacari ju aivũbu Jesucristore, Jũmenijicu “Boropatebevũ muja ji jáinore”, ãi aquiyepe aivu ðabevũva yópe Jũmenijicui ðaicõjeiyede Moisés bácuĩ toivaiye báquede. Que baru põeva cubema boropatebevũpe Jũmenijicui jáimara, ne ðaiye boje yópe ðaicõjeiyede. ¹⁷Que baru ñũja napini coreivũ Jũmenijicui jáiyede ñũjare boropatebevũpe ñũje ju aiyede boje Jesucristore, dajocadavũ ñũje

ðaiyurĩduiyede yópe Moisés bácuĩ ðaicõjeiyede báquede. Aru apevu ne jáiyede ñũja nópe teivũre, “Jũmenijicui ðaicõjeiyede vainĩ tuivũbu na yópe judíova ãmevũpe”, arãjichũma na. Aru, “Cristo vainĩ ture ðaibi põevare Jũmenijicui ðaicõjeiyede jaruvãrĩ”, arãjichũma na. iAipinũmua nópe abejarãri! Ne que aru jáve ãmevũtamũ.

¹⁸Que baru yópe bueyũbu yũ: “Põevare boropatebevũpe Jũmenijicui jáquiyepe aivu, ne ju aiyede Jesucristore javũ náre”, arĩ bueyũbu. Ubenita, “Mũje me curãjiyepe aivu Jũmenijicuque, ðaiye javũ mujare yópe Moisés bácuĩ ðaicõjeiyede”, abevũ yũ mujare. Aru nópe cõjeñũ maru, vainĩ tũjebu yũ Jũmenijicui ðaicõjeiyede. ¹⁹Aru javede Jũmenijicui ðaicõjeiyede ãi coyuiye báquede Moisés bácuĩre ðarĩdurejacacu yũ, boropatebevũyũ Jũmenijicui jáinore. Ubenita nópe ðarĩduyũvacari, cainũmua boropateyũpe barejacácu. Ubenita caride ji cuede Jesucristoque cũinávũpe, boropatebecutamũ yũ Jũmenijicui jáinore. Que baru caride Moisés bácuĩ ðaicõjeiyede báquede quénora ðabecutamũ yũ. ²⁰Maje jabocu Jesucristo yayiýú bácu jocusujaravena oatũvarejaquemavũ ji ãmene. Que baru caride jipocai ji cue báquede ãmevu yũ. Cristo cucu yáque ðare ðaibi yópe ãi urõpe. Que baru javede ji ðaiye báquede ðabevũ cojedeca. Quénora ðaivu Cristo jiede. Ji ãmeina teiye boje, yaidéjaquemavũ. Que baru ãre ju arĩ, ãi ðaicõjeiyede ðayutamũ yũ. ²¹Que baru jaruvabevũ yũ Jũmenijicui jíye bojecubede ãi me boje, iye Jesucristoi mearo ðacaiyede yũre, ji ðarĩduiyequede yópe Moisés bácuĩ ðaicõjeiyede. Jũmenijicui járu põevare boropatebevũpe ne ðaiyede yópe ãi ðaicõjeiyede, Jesucristoi yaino mácarõ jaubejebu. Yayjébu ã ubenita.

**Pablo ãi bueino põeva boropatebevũ
ãmevure Jũmenijicui jáinore ãi
ðaicõjeiyede Moisés bácuĩ toivaiye
báquede**

(Hch 3.25; Ro 1.17, 4.3, 16, 10.5)

3 ¹Muja, Galacia ãmicurijoborõcavũ Jesúre ju aivu, ãrũmevũpe nuríe

dápiabevu mɔja. Muje jáiyede nurié coyucacu mɔjare Jesucristoi yaiye báquede ne pɛvaimure jocusujaravena maje ámeina teiye boje. Ëbenita mɔjamu arevu ne mujovaimara. ²Que baru muje ju aiyede iye yávaiyede jávene, ji coyuiye báquede mɔjare, dajocaivubuya mɔja. Quénora Ëbenita dápiari býavũ boropateni buojaivu Jũmenijicu jáinore muje ðaiyeque yópe iye ðaicõjeiyepe Moisés bácu toivaiye báquede. Ëbenita Jũmenijicu jáve darobedejaquemavu mɔjare ñi Espiritu Santore maje ðaiye boje yópe ñi ðaicõjeiyepe Moisés bácu toivaiye báquepe. Quénora jáve darorejaquemavu ùre maje jápiari ju aiye boje Jesús ñi yávaiye méne. ³Jũmenijicu Espiritu Santo apure ðari búquemavu mɔjare mamaũmene. Que baru buojaiyue jaubevu mɔjare iye muje cavaede mamaũmene muje majiéqueda. Nópe ðaivu baru, árumevure ðajebu mɔja.

⁴¿Caiye iye vaiye báque bojecubedi mɔjare? Jáve dápiari coreóvadavũ aipino bojecuede iye mɔjare vaiye báquede. ⁵Jũmenijicu jáve darobebi mɔjare ñi Espiritu Santore aru ðabebi pøeva ne ðari majibede muje jêneboi, muje ðaiye boje yópe ñi ðaicõjeiyepe Moisés bácu toivaiye báquepe. Quénora jáve daroibi ùre aru ðaibi diede muje jêneboi, muje jápiari ju aiye boje Jesús ñi yávaiye méne. ⁶Aru caride dápiajarã Abraham mácure. Yópe arí, Jũmenijicu toivaicõjenejaquemavu ñi yávaiyede: “Abraham ju arejaquemavu Jũmenijicu ðaquiye yópe ñi aiye báquepedeca. Que baru Jũmenijicu coyurejaquemavu ùre, ‘Boropatebecubu mu ji jáinore’, ñi ju aiye báque boje Jũmenijicure”, arí toivaicõjenejaquemavu.

⁷Que baru coreóvaiye jaavu mɔjare iyede: Ina pøeva ju aivu Jũmenijicure, nárecabu Abraham mácu páramena baju. ⁸Javede Jũmenijicu toivaicõjenejaquemavu ñi yávaiyede, pøeva ne coreóvarãjiyepe ayu boropatebede ðacuy ñi jáinore ina judíova ámevure ne ju aiyeque

ùre. Jũmenijicu coyurejaquemavu Abraham mácure mearo ðacacuyure ñi mácure ñi mearo ðacaquiye jipocai yópe arí: “Mu ju aivu yure. Que baru mure ji mearo ðacaiye báquepedeca ijárvucavu arevu, caivu yure ju aivure máre, mearo ðacacuyumu yu”, arí toivaicõjenejaquemavu Jũmenijicu. ⁹Abraham mácu ju aiye boje Jũmenijicure, ñi mearo ðacarejaquemavu ñi mácure. Que baru Jũmenijicu mearo ðacaibi caivu pøeva ju aivure ùre yópe ñi mearo ðacaiye báquepedeca Abraham mácure.

¹⁰Caivu ina pøeva ðaiyurĩduivu yópe Jũmenijicu ðaicõjeiyepe Moisés bácu toivaiye báquepe Jũmenijicu jáquiyepe arĩduivu náre boropatebevure, jáve Jũmenijicu ñájine ðaimara marajárama na, ne ámeina teiye boje. Coreóvaivubu maja die jávene, Jũmenijicu toivaicõjeiye báque boje, yópe arí, ñi yávaiyede: “Ácu pøecu ðabecu baru cainmua yópe caiye Jũmenijicu ðaicõjeiyepe Moisés toivaiye báquepe, jáve ñájicuyume ñi, ñi vainí tuiye boje diede”, arí toivaicõjenejaquemavu Jũmenijicu.

¹¹Aru coreóvaivubu maja iyede: Pøecu cubebi boropatebecu Jũmenijicu jáinore, ñi ðaiye boje yópe Jũmenijicu ðaicõjeiyepe Moisés bácu toivaiye báquepe. Jũmenijicu toivaicõjeiye báque boje, yópe arí, ñi yávaiyede: “Ina Jũmenijicu boropatebede ðaimara mácavu, ne ju aiye boje ùre, apurãjivubu cainmua. Que baru coatede ðabemara marajivubu na Jũmenijicure jaruvari”, arí toivaicõjenejaquemavu Jũmenijicu. ¹²Ñai Jũmenijicure ju ayu, “Jũmenijicurecabe boropatebede ðacuy yure”, aibi. Ëbenita ñai ðarĩduyu yópe iye ðaicõjeiyepe Moisés bácu toivaiye báquepe, “Yurecabu boropatebede ðacuy ji bajure ji ðaiyeque iye ðaicõjeiyepe”, arĩduibi. Ëbenita ùrecabe boropatecuy, ñi ðari buojabe boje caiye iyede. Coreóvaivubu maja die jávene, Jũmenijicu toivaicõjeiye báque boje, yópe arí, ñi yávaiyede: “Ñai

ðarī buojayn caiye iye Jūmenijicui ðaicōjeiyede cūcūyume ũ aru coatede ðabemū macūyúme ũ Jūmenijicure jarūvarī”, arī toivaicōjenejaquemavū Jūmenijicu.

¹³ Æbenita Cristorecabe cadateyū bācū majare. Jūmenijicui ñājine ðaiye jauřidurejaquemavū majare, maje ðabe boje caiyede yópe Jūmenijicui ðaicōjeiyepe. Æbenita Cristovacari ñājicarejaquemavū yayú, ne pēvaimū mácu jocūcūjaravena, majare boje. Que teni bojedarejaquemavū maje vainí tuiyede, maje ñājimenajiyeye ayū maje baju āmeina teiye boje. Coreóvaivūbu maja jāvene Cristoi ñājicaiye báquede jocūcūjaravena majare boje. Jūmenijicu toivaicōjenejaquemavū, yópe arī, ũi yávaiyede: “Caivū ina ne pēvaimara jocūcūrā Jūmenijicui ñājine ðaimaramu na, ne āmeina teiye boje”, arī toivaicōjenejaquemavū Jūmenijicu.

¹⁴ Cristo ñājiñū yaicārejaquemavū mūja judíova āmevūre boje máre, mūje cūvarājiyeye ayū iye mearo ðacaiyede, yópe Jūmenijicu “Mearo ðacacūyumu yū mūjare”, ũi aiye báquepedeca Abraham mácure, aru maje corū etarājiyeye ayū ñai EspírITU Santore yópe Jūmenijicu “Cadateyūre darocūyumu yū mūjare”, ũi aiye báquepedeca.

Jūmenijicu ũi coyūino “Yópe mearo ðacacūyumu” ũi coyūquiyē jipocare ũi ðaicōjeiyede
(Ro 4.14)

¹⁵ Mūja, jívū, caride coyūquijivū mūjare maja pōeva maje ðarī cōmajiyena mūje coreóvarājiyeye ayū. Pūcarā ũmūva “Yópe ðarī memenajare”, ne arī toivaru ne āmiáre diena, ñame buojabebi jarūvayū aru oatūvayū diede, ina ũmūva ne jū abedu. Quédeca Jūmenijicu “Yópe ðarājare”, ũi aiye báquede ñame buojabebi jarūvayū aru oatūvayū diede máre. ¹⁶ Jūmenijicu “Yópe mearo ðacacūyumu yū mūjare”, ávarejaquemavū Abraham mácure aru ũi pāramenacacū bacūyūre máre. Æbenita Jūmenijicu toivaicōjemenejaquemavū

ũi yávaiyede “mipāramena márājivū”, obedivū ainore. Quénora toivaicōjenejaquemavū ũi yávaiyede “mipāramenacacū bacūyū”, cūinácū ainore. Aru Cristorecabe ñai cūinácū. ¹⁷ Ji coyūiyede mūjare yópe aiyrōtamū: “Yópe ðarājaramu maja”, arejaquemavū Jūmenijicu Abraham mácure. Aru que arīburu yóboi, Jūmenijicu “Jāve ðacūyumu yū yópe ji aiye báquepedeca mūre”, arejaquemavū Abraham mácure. Que baru Jūmenijicu ũi aiye báquede cuatrocientos treinta paiūjūa jipocai ye jarūvabedejaquemavū aru oatūvabedejaquemavū ũi ðaicōjeiyeque, Moisés bācūi toivaiye báqueque cuatrocientos treinta paiūjūa yóboi. Jāve Jūmenijicu ðaibi yópe ũi aiye báquepedeca. ¹⁸ Pōevai boropatebeni buojaru Jūmenijicui jāinore ne ðaiyeque yópe iye ðaicōjeiyepe Moisés bācūi toivaiye báquede, Jūmenijicu “Yópe mearo ðacacūyumu pōevare”, ũi aiye báque bojecubejebu. Æbenita pōeva boropatebevū buojabema ne ðarīduiyeque yópe Jūmenijicui ðaicōjeiyepe. Que baru Jūmenijicu “Yópe mearo ðacacūyumu pōevare”, ũi aiye báque bojecūvū. Aru Jūmenijicu mearo ðacayū pōevare, jāimi náre boropatebevūpe yópe ũi aiye báquepedeca Abraham mácure: “Caivū pōeva yūre jū aivūre yópe mi jū aiyepe yūre mearo ðacacūyumu yū”, arejaquemavū.

¹⁹ Jāve Jūmenijicu coyūrejaquemavū ũi ðaicōjeiyede Moisés bācure, “Yópe ji ðaicōjeiyepe ðajarā mūja”, arīduyū judío vare. Jūmenijicu coyūrejaquemavū diede, pōeva ne coreóvarājiyeye ayū vainí tuivūre ne āmeina teiye boje. Abraham mácūi pāramenacacū Jesucristoi daiyede, iye ðaicōjeiyepe ðaiye cūinéjaquemavū. Que baru Jesucristoi daiyede, Jūmenijicu mearo ðacarejaquemavū pōevare yópe ũi aiye báquepedeca. Iye Jūmenijicui ðaicōjeiyede Jūmenijicu yávarejaquemavū ángelevare. Aru na yávarejaquemavū Moisés bācure.

Aru ñ mácu toivarejaquemavu diede, pōeva ne majinajiyere ayu. Que teni Jūmenijicu coreóvare ðarejaquemavu pōevare ñi ðaicōjeiyede ñi coyūiyequere arevure, ina ángelevare aru Moisés bácure máre. ²⁰ Ñbenita Jūmenijicu coyubedejaquemavu “Yópe mearo ðacacuyumu”, ñi aiyede Abraham mácure apecuque. Quénora Jūmenijicuvacari cūinácura coyurejaquemavu diede ñ mácure apecui cubeda.

Jūmenijicu ñi ðaiyurō iye ñi ðaicōjeiyequere

(Ro 4.13, 8.15-17; Col 2.8, 20)

²¹ ¿Jūmenijicu bojecubede ðarejaquemari iye “Yópe mearo ðacacuyumu”, ñi ávaiye báquede Abraham mácure ñi ðaicōjeiyequere, ñi coyūiyere báquede Moisés bácure? ¡Bi, ye que ámevu! ¡Aipinumu vaibéjarōri nópe! Jūmenijicu ye jámecube pōevare boropatebevure maje ðaiye boje yópe ñi ðaicōjeiyere. Maja ye meareo ðaiye majibevu, Jūmenijicui cure ðaquiyepe aivu majare járavu cūiméjáravu baquinóre. Cainumua maje mearo ðaiye javu Jūmenijicui jáinore. Que baru ðaicōjeiyere ðaríduivvacari, caivu pōeva eabenajarama járavu cūiméjáravu baquinóre. Ye boropatebevure bñojabenajaramu maja Jūmenijicui jáinore maje mearo ðaiyuríduiyequere. ²² Jūmenijicu toivaicōjenejaquemavu ñi yávaiyede, coreóvare ðacuyu majare caivu ijáravucavu ðaicōjeimarave ne baju ámeina ðaiyueque. Que baru pōeva ne ju aiyede Jesucristore, Jūmenijicu jáimi náre boropatebevure “Yópe mearo ðacacuyumu”, ñi aiyere báqueredeca. Aru ina pōeva ju aivu Jesucristore quénurabu Jūmenijicui jáimara boropatebevure.

²³ Jesucristoi daquiye jipocare caivu pōeva ðaicōjeimarape paivu barejaquemavu, maje ðaríduiyere boje yópe Jūmenijicui ðaicōjeiyede ñi coyūiyere báquere Moisés bácure. Nópe barejaquemavu pu Jesucristoi

ðaiyeta. Cristo ñi ðaiyede, Jūmenijicu jáðovarejaquemavu majare boropatebevure ñi jáinore maje ju aiyede Jesucristore. ²⁴ Que baru Jesucristoi daquiye jipocare, caivu pōeva juedova coreimarape paivu barejaquemavu. Aru Jūmenijicui ðaicōjeiyere ñi coyūiyere báque Moisés bácure majare coreipōescure paiye barejaquemavu. Yópe coreipōescui coreóvare ðaiyere juedovare ñájinajivure ne mearo ðabedu, nopedeca iye ðaicōjeiyequere coreóvarejaquemavu ñájinajivure, maje ámeina teiyere boje. Nópe barejaquemavu pu Jesucristoi ðaiyeta, maje boropatebenajiyere aiyere Jūmenijicui jáinore maje ju aiyequere Jesucristore. ²⁵ Caride Jūmenijicu jáimi majare, Jesucristore ju aivure, boropatebevure. Ñña Jesucristore coreóvaivu, úre ju aivu, coreimarape ámevutamu iye ðaicōjeiyequere.

²⁶ Aru caivu muja Jūmenijicui máramu muje ju aiyequere Jesucristore, úque curí cūinávure. ²⁷ Muja jáðovaimara mácavu Jesucristoque ocoi curivubu úque cūinávure. Que baru caride cuvü muja Jesucristope árojarivu. ²⁸ Que baru caride ye baju ámevu judío o judío ámevu, yebacacu o yebacacu ámevu, aru ñmü o nomío máre. Caivu cūinávure paivubu maja, maje cue boje Jesucristoque cūinávure. ²⁹ Muja Cristo jina mae boje, Abraham mácui pāramena bajubu muja. Que baru Jūmenijicu mearo ðacacuyume mujare yópe ñi aiyere báqueredeca.

4 ¹ Yópe coyūquijivu mujare cojedeca maje cuede Jesucristoque ñ jinava, ðaicōjeimara ámevu. Mamacu, bucüríburu yóboi, cuvacuyume jípacu jiede. Ñbenita juedocu cāreja, jabocu bacuyávacari, yebacacure páyu arevüi cōjeimure ñ. ² Juedocu cāreja, arevü jári coreivubu úre aru ñ jie baquiyéde máre pu añijáravu, jípacui beoijáravu baquinóita, ne ðajocarājiyere aivu ne jári coreiyede úre aru ñi cuvaede máre. ³ Nopedeca vaidéjaquemavu majare máre maje majibede cāreja

Jūmenijicui yávaiye méne. Yópe jueđova ne cōjeimarape, maja máre yebacavu barejaquémavu, iye đaicōjeiyeque, majeñecuva ne đarī cōmajiye báqueque.

⁴Ūbenita majare nápe paivu b́acavure ānijāravu, Jūmenijicui beojāravu b́acarōi, Jūmenijicu darorejaquemavu mamacure ijāravu. Ū máre caivu apevu pōevape, cuvarejaquemavu jípacore. Aru pōetedejaquemavu judíovacacu. Que baru ju arī Jūmenijicui đaicōjeiye đī coyuiye báquede Moisés b́acure curejaquemavu ū, mamacu. ⁵Ūi daiye boje Jūmenijicui đaicōjeimure páyvacari, bojeđayu buojarejaquemavu ina đaicōjeimara ḿacavure iye đaicōjeiyeque, ne ńajimenajiyeye ayu ne vainí tuiye báque boje diede. Aru ūi nópe đaiye báque boje, buojalbi cure đayu majare Jūmenijicui ḿarape. ⁶Muje Jūmenijicui ḿara teiye boje, ū daroibi mamacui Esṕiritu Santore, ūi cuquiyepe ayu muje ūmei, j́adovacayu jāve Jūmenijicui ḿarare muja. Aru ūi Esṕiritu Santo “mu, jípacu”, arī j́eniari buojare đalbi caivu majare Jūmenijicuque. ⁷Jūmenijicui nópe đaiye boje, caride yebacavure, apevu i đaicōjeimarape paivu āmevu muja. Quénora Jūmenijicui ḿaramu muja, ūi jāve mearo đacaiye boje mujare yópe ūi aiye báquepedeca. Caiye iye ūi cavaede ūi jíquiyede ūi ḿarare jícyume mujare.

Pablo ūi d́apiaino aipe nuquinore Galaciavure

(Hch 16.6; Ro 8.29; 2 Co 3.18;
Fil 3.10; Col 2.8, 20)

⁸Javede muje coreóvabede cāreja Jūmenijicure, ijāravure cōjeivu ne yebacavure paivu barejaquémavu muja. “Jūmenijinamu na”, arī d́apiarđiuvu barejaquémavu muja. Ūbenita ye jūmenijina āmema na. Nái Jūmenijicu cūinácura, caiyede cuedayu b́acure coreóvabeni mearore jíbedejaquemavu muja. ⁹Ūbenita caride muja coreóvaivubu Jūmenijicure, ūi coreóvaiye báque boje mujare mamarumure. Que baru, đaipe teni

dajocaiyurivurū muja muje cuede jocarī Jesucristoque cūinávure, yebacavure tenajivu bediáva cojedeca iye đaicōjeiyeque, majeñecuva ḿacavu ne đarī cōmajiye báqueque? Iye đaicōjeiye parubetamu. Que baru muja ye cadatebemaramu iye đaicōjeiyeque. Aru cure đabejarā muje baju yebacavure cojedeca muje đarī buiyeque yópe judíovape. ¹⁰Muja d́apiarđiuvubu muje đaiyede judíovape, Jūmenijicui mearo đacaiyepe aivu mujare. Que baru torojuve teivubu yópe judíovape apejāravuai, apevu aviávai, aru apejuai máre. ¹¹Muje que đaiye boje chíoiyu yu mujare. Que baru, “¿Ye bojecubedi ji bueiyé báque náre?” arī d́apiaivu yu.

¹²Muja, jívu, parurōreca j́eniavu mujare, muje đarājiyepe ayu yópe ji đaiyepe. Yu judíovacari, đabevu yópe Jūmenijicui đaicōjeiyede Moisés b́acui toivaiye báquepe. Que baru yu máre đaiyu yópe muje đaiyepe. Mujape teyubu yu. Diede dajocarejacacu yu. Ameno đabeteavū muja yure. Quénora mearo đávū muja yure. ¹³Coreóvaivubu muja yure ijimu ḿacure. Aru ji ijeteiye boje mamarumure coyucunucacu Jesús ūi yávaiye méne muje yebai. ¹⁴Aru yure ijíé báque boje, copu etaiyubejebu muja yure. Ūbenita āmeina jāmevava jaruvabeteavū yure. Quénora me copu etavū yure yópe muje copu etajuroepe cūinácu ángele, Jūmenijicui daroimure, aru yópe muje copu etajuroepe Jesucristore máre. ¹⁵Mamarumū ji bueiyede mujare Jesús ūi yávaiye méne, torojurivu bateávū muja. ¿Aipe teni torojubevurū muja caride? Ýavacari majivu aipe muje đaiyede dinumure. Caijīene đajebu muja, cadatenajivu yure, ívu muje yacoruaré, j́inajivu yure. ¹⁶Ūbenita caride j́aivubu muja yure yópe muje maucure, ji coyuiye boje yávaiyede jāvene mujare.

¹⁷Apevu, ina bueivu ape yávaiyede, torojure đaiyurivubu mujare, muje me pueđarājiyepe aivu náre. Ūbenita ne đaiyurđiuiye meamejebu mujare. Maucavure đarđiuvubu mujare yáque,

mujе jи arājiyepe айvи ne bueiyeде.
¹⁸Pōeva ne cadateiyue apevure mému cainumua, ne cadatedu náre ne baju dápiano mearoque. Ёbenita meamevu ne cadateiye mujare ji cuede mujaque ubenita ne cadatebe mujare ji cubede mujaque. Que baru cadatejarāri mujare ne dápiano mearoque cainumua, ji cuede aru ji cubede máre. ¹⁹Muja, jímajinape paivи, bediόva cojedeca nājivи yи mujare boje yόpe ico jueducuvacođo oī nājiiyepe. Nājivи yи, jácnyи mujare Cristope ārojarivure. ²⁰Pare cārijivи yи mujare boje. “¿Aipe đarī Galaciacavure cadateje bārica yи?” arī dāpiavи yи. Que baru cuiyurīduivи yи mujaque caride, oatuvacyи ji coyuiyede mujare.

Pablo ũi jēvari coyūino đaicōjeiyede đarīduivи ne đaiyena aru Jūmenijicui mára ne đaiyena máre pucarā nomiva ne cue báqueque

²¹¿Caivи muja đaiyurīduivи yόpe Jūmenijicui đaicōjeiyede Moisés bācui toivaiye báquepe, jāpiarī eabenaru muja iye đaicōjeiyede? Jāve jāpiarī eabevи muja diede. ²²Jāpiajarā caride Moisés bācui toivaiye báquede Abraham mācui borore. Abraham mācu ina pucarā mamarumи pōeteivи bācavure cūvarejaquemavи pucarōmiva nomivaque. Cūinācu Abraham mācui márepacoі yebacacoі mācu barejaquémavи. Aru apecu Abraham mācui márepaco bajui mācu barejaquémavи. ²³Ńai yebacacoі mācure jueducūvarejaquemavи yόpe caivи apevи pōevape. Que baru jíbucu pōetedejaquemavи yόpe caivи apevи jueđovape. Ёbenita Ńai jímarepaco bajui mācure jueducūvarejaquemavи Jūmenijicui coyuiye báque boje cūvarājivure mamacure. Que baru ĩmacu pōetedejaquemavи Jūmenijicui pōeva ne đarī majibede đaiyeque, jípacoi pare bucūco bae boje.

²⁴Maje coreóvaiye Agar bācoі borore aru Sara bācoі borore máre jáđovaivи majare ape yāvaiyede

jāvene. Yόpe vaiye báquepedeca ina pucarōmiva nomivare, vaivи pōevare ne voiyede Jūmenijicui me jáquiyepe айvи náre. Apevu đaiyurivubu yόpe Jūmenijicui đaicōjeiyеpe ũi coyuiye báquede Moisés bācure, Jūmenijicui me jáquiyepe arīduivи náre. Aru apevи jи айvubu “Yόpe mearo đacacuyumu mujare”, Jūmenijicui айe báquede, ũi me jáquiyepe айvи náre. Ico yebacaco Agar āmicurejaquemavи. Aru o máco jáđovaimico majare ne đaiyede, ina voivure Jūmenijicui me jáquiyepe arīduivи ne đaiye boje. Nápe paivubu caivи đaiyurivи yόpe Jūmenijicui đaicōjeiyede Moisés bācui toivaiye báquepe Sinai āmicuricū cūracūi. Que baru yebacavure paivubu na, ũpe Agar bācoі mācure. ²⁵Aru Agar bāco jáđovaimico majare pucarōa cūrōare, Sinai āmicuricū cūracūre, Arabia āmicurījorborōcacūre, aru Jerusalén āmicurīimarore ijārvancarōre, judiόvai ĩmaro urarōre. Aru ina judiόva đarīduivubu yόpe Jūmenijicui đaicōjeiyеpe. Que baru Agar bāco népacope pādobe aru opedeca yebacavure paivubu na. ²⁶Ёbenita Sara bāco jáđovaimico majare apeno ĩmaro Jerusalén āmicurīimarore, cavarō mearo Jūmenijicui cūrōre, Jūmenijicure jи айvи ne ĩmaro mearore. Aru maja jи айvubu Jūmenijicure. Que baru Sara bāco majepacope pādobe aru opedeca yebacavure paivи āmevutamu maja. ²⁷Que baru Jūmenijicui mára, caivи Jesucristore jи айvи, obedivи barājaramu maja. Ёbenita ina đarīduivи yόpe Jūmenijicui đaicōjeiyеpe ũi coyuiye báquede Moisés bācure, obebejīna marajárama na. Nópe arī Jūmenijicui toivaicōjenejaquemavи ũi yāvaiyede:

Mи, jueducuvabeco, torojajaco mи mi ũmei. Mи, nājimeco cāreja jueducuvaede, codobobojaco mи mi torojue boje. Que baru ico nomió jímarepacui jaruvaimo máco, ũmucucodome cojedeca. Que baru mamara cūvacodome ico ũmucucoco puepo,

arī toivaicōjēnejaquemavū
Jūmenijicu.

²⁸ Aru mūja, jīvū, yōpe Abraham
mácui mácū Isaac bácui pōeteiye
báquepe Jūmenijicu “Yōpe baquiyébu”
ūi aiyē báquepe, nopedeca mūjamu
Jūmenijicui mára yōpe ūi aiyē báque
boje. ²⁹ Javede Abraham mácui mácū
mamarumū pōeteyū bācu, Agar bácoi
mácū, űai ne juēdocuvamū mácū yōpe
caivū apevū pōeva ne juēdocuvaere,
űájine dayū barejaquémavū imacu
bácure, Sara bácoi mácure, űai ne
juēdocuvamū mácure Jūmenijicui
Espíritu Santoi parure đaiyeque ūi
bucva bācavure. Aru quēdecabu
caride máre. Ina đare đaicōjeiyūriđivū
yōpe Jūmenijicui đaicōjeiyepe űájine
đaiyūbu majare máre. ³⁰ Ūbenita yōpe
arī, toivaicōjēnejaquemavū Jūmenijicu
ūi yáva iyede: “Ico yebacacoi mácū
cuvabecuyūme jípacui cūvaede.
Quénora ico ūi márepaco bajui mácū
cuvacuyūme caiye jípacui cūvaede. Que
baru jaetovajacu ico mi yebacacore
aru mamacure máre yore jocarī”, arī
toivaicōjēnejaquemavū Jūmenijicu.
³¹ Mūja, jīvū, que baru maja yebacacoi
márape paivū āmevū maja. Quénora
majamu majepacu márepaco bajui
márape paivūbu. Que baru mearore
cūvarājaramu maja, majepacu
Jūmenijicui jíquiyede majare.

Yebacavupe tebejarā mūja cojedeca

(Mt 19.19, 20.26; Jn 8.32-
36; Ro 13.8-10; 1 Co 5.6)

5 ¹ Maja yebacavupe paivū bācavure
majeñecuva ne đarī cōmajiye
báqueque jave meadaibi majare
Jesucristo. Ūrecabe bojedacayū bācu
maje āmeina teiyede, maje curājiiyepe
ayū me Jūmenijicūque. Que baru
maja, Jūmenijicui mára, ju ávaivūbu
Jesucristore. Que baru jápiarī adabejarā
ina đare đaicōjeiyūrivure yōpe
Jūmenijicui đaicōjeiyepe ūi coyūiye
báquede Moisés bācure.

² Jápiarā yure. Yávacari, Jesús ūi
yáva iye méne beorī coyūicōjeimaracacu,

coyūivū mūjare. Mūje buraicōjenu mūje
cajede Jūmenijicure me jáicōjenidivū
mūjare yōpe ina đare đaicōjeiyūrivū ne
đaicōjeiyepe, Jesucristoi yaiye báque
bojecubequiyebu mūjare. ³ Bedióva
cojedeca parūrōreca coyūivū mūjare.
Ácu pōecu buraicōjeñū maru ūi cajede
đaiye jaujebu ūre yōpe caijie Jūmenijicui
đaicōjeiyepe ūi coyūiye báquede Moisés
bācure. ⁴ Mūjacavū vorī eaiyūriđivū
Jūmenijicui jáquiyeye aivū mūjare
boropatebevūpe, mūje đaiye boje yōpe
ūi đaicōjeiyepe ūi coyūiye báquede
Moisés bācure, jave coatedavū maja
Cristore jarūvarī. Mūjacapūravū
jave ūbeni jarūvadavū mūjare
jarūvarī Jūmenijicui jíyede pōevare
bojecubeda ūi me boje. ⁵ Ūbenita
majacapūravū napini coreivūbu aru jāve
coreóvaivūbu Jūmenijicui jáquiyede
majare boropatebevūpe ūi Espiritu
Santoi parūéque maje ju aiyede ūre.
⁶ Que baru maje cuede Jesucristoque
cūinávūpe ye baju āmevū buraicōjenu
o buraicōjemenu maje cajede. Ūbenita
maje ju aiyede Cristore apevū pōevare
urī, mearo đacaivūbu maja, cadateivū
náre. Aru diedecabu bojecue majare.

⁷ Mamarumūre me nūre nūrejavū
mūja mūje cuede Jesucristoque
cūinávūpe. ¿Name matedí dajocare
đaiyū mūjare mūje ju aiyede iye
yáva iyede jāvene? ⁸ Ácu pōecu
Jūmenijicu āmeme. Jūmenijicu mūjare
cutuyūbe ū jina mārājivūva. Que baru
ucube mūje ju are nūrajiiyepe ayū
Jesucristore. ⁹ Yōpe pōeva ne quíjie
páure bucure đaiyeque bucúóvainope
caino jívaibore, nopedeca obebe bueiye
jāve āme meamene đarī bujoaivū
obedivū pōevare. ¹⁰ Mūja aru yū máre
curivūbu Jesucristoque cūinávūpe. Que
baru majivū yū Jesucristo cadatecuyūre
mūjare, mūje dápiare nūrajiiyepe ayū
ji dápiaiyepe. Aru yácapūravū majivū
Jūmenijicu űájine đacuyūre űai mūjare
cārijovañūre, ye baquinó āmevū ácu
pōcure.

¹¹ Mūja, jīvū, yácapūravū “Ūmūvare
ne cajede buraicōjeiye javū mūjare”,

ji arí coyũre nũru, ina judíova cãrijovamejebu yure. Aru ji buraiçõjenu ãmũvare ne cajede, ina judíovacapũravũ cãrijimejebu ji coyũie boje Jesucristoi yaiye báquede jocũcũjaravena. Ûbenita na cãrijivutamu, ji põevare ju aicõjeiye boje Jesucristore, ne curãjiyere ayũ me Jũmenijicũque. Que baru cãrijovadama yure ãmeno ji vaiquĩyere aivũ. ¹²Ina mũjare cãrijovare cuivũre, buraiçõjeiyũrivũre mũje cajede, nãcapũravũre cũiná burarĩ jarũvaicõjejara ne cajede.

¹³Mũja, jĩvũ, mũjarecabu Jũmenijicũ cutuimara mácvũ ã jina mãrajivũ, ðabenajivũ iye ðaicõjeiyede yebacavũpe. Ûbenita me jãjara diede, yebacavũpe tede ðaiyede. Mũjare ðaiye jaube boje iye ðaicõjeiyede, “Caiye maje ãmeina ðaiyũede ðarĩ buojavũbu maja”, arĩ dãpiabejarã. Quénora dãpiajarã mũje baju yópe yebacavũpe, caðatenajivũ mũjacavũ Jesũre ju aipõevare, mũje ue boje caivũ Jesũre ju aivũre. ¹⁴Caiye iye Jũmenijicũ ðaicõjeiye ãi coyũie báque Moisés bãcũre aru caiye ape ðaicõjeiye máre cũebu cũináromia yópe: “Mũja coapa ãjarã mũjevũre yópe mũje ãpedeca mũje bajure”, aiyũebu iye. ¹⁵Ûbenita mũja jijatede nũivũ baru mũje bajumia aru boavũ baru mũje bajumia yópe ãimara jijecũrivũpe, me jãjara mũja, bíjare cuiye mũje me cuede mũje bajumia.

Põeva ne ãmeina ðaiyũe aru Jũmenijicũ Espĩritu ãi mearo ðaicõjeiye

(Ro 6.3-14, 7.15-23; Gá 2.20, 6.14)

¹⁶Yópe coyũiyũvũ yũ mũjare. Ñai Espĩritu Santoi ðaicõjeiyepe ðaivũ cũjarã mũja ãi urõpe. Dabejarã yópe mũje baju ãmeina ðaiyũere. ¹⁷Maje baju ãmeina ðaiyũe Espĩritu Santoi mearo ðaicõjeiyepe ãmevũ. Quédeca Espĩritu Santoi mearo ðaicõjeiye maje baju ãmeina ðaiyũerepe ãmevũ. Maucũvarõreca painotamu no. Ûbenita maje ju aiyede ñai Espĩritu Santore, ðarĩ buojabevũ yópe maje ãmeina

ðaiyũere. ¹⁸Mũja ðaivũ baru yópe ñai Espĩritu Santoi mearo ðaicõjeiyepe, ðaicõjeimarape paivũ ãmevũ mũja Jũmenijicũ ðaicõjeiyeque ãi coyũie báquede Moisés bãcũre. Que baru ðarĩduiye jaubevũ mũjare diede, mũje curãjiyere aivũ me Jũmenijicũque.

¹⁹Caivũ majima aipe ãrojae ne ðaiyede ina ne baju ãmeina ðaiyũeque ðaivũ. ãmeina ðaivũbu apenvũque nẽmarebũcũva ãmevũque, curivũbu ãmeũmeque, aru caino ãmenore ðaivũbu. ²⁰⁻²¹Meareore jĩvũbu pẽpeimarare, aru yaviéde ðaivũbu. Maucũvarivũbu ne baju, jaraivũbu, tebutivũbu, jijateivũbu ãbenina, aru ðaivũbu ne baju urõpe dãpiabevũva meareore o ãmenore apevũre. Jarare ðaivũbu apevũre, yajuboa tede ðaivũbu maucũvarãjivũ apeyajubocavũque, aru jorojĩvũbu. Pacoteivũbu, bujiéque ãcuri aru urarõ arĩ torojũve teivũbu, aru apeno nópe paino urarõ ãmenore ðarĩ cõmajivũbu na. Parurõreca coyũivũ mũjare diede, nópe ji coyũie báquepedeca mũjare javede, mũje majinajiyere ayũ Jũmenijicũ jabotebecũyũre ina nópe ðaivũre.

²²Ûbenita ðaivũ maja yópe ñai Espĩritu Santoi mearo ðaicõjeiyepe, yópe ãrojaetamu maje ðaiye. Ûrivũbu apevũre. Torojũrivũbu maje ãmei. Cũrivũbu me cãrijimevũva. Aru napivũbu. Mearo ðaivũbu apevũre. Caðateivũbu apevũre. Aru jãvene ðaivũbu yópe “ðarãjare”, maje aye báquepedeca. ²³Meare põevape curivũbu me. Aru maje bajure curĩ majidivũbu. Nópe ðaiyede caiye ðaicõjeiye bíjarorĩ buojabevũ. ²⁴Jesucristo ãi yaiyede jocũcũjaravena jarũvarejaquemavũ maje ãmeina teiyede. Que baru maje cuede Jesucristoque cũinávũpe, dajocavũbu maje ãmeina teiye báquede aru jãve ðabevũ yópe maje ãmeina ðaiyũere. ²⁵Ñai Espĩritu Santo apure ðaibi majare mamaũmeque. Que baru ãre coreicõjeiye jaũvũ majare caiye maje ðaiyede, maje dãpiayede máre. ²⁶“¿Meare mãrica apenvũ pũeno?” arĩ dãpiaye jaubevũ majare. Majacavũre

jarare ðaiyue jaubevu majare. Aru jorojĩne ðaiye máre jaubevu majare.

Caðatejarã muje baju

(2 Ts 3.13)

6 ¹Muja, jívu, cūinácu mujacacu ũi vaini turu ãmeina ðayu, muja ñai Espírítu Santoi ðaicõjeimara caðatejarã úre, ũi ðajocaquiyeye aivu ũi ãmeina teiyede. Ména meadarĩ, caðatejarã úre. Aru me jájara, muja máre vaini tubenajivu úpe. ²Muje baju caðatejarã, apecu ũi ñájimequiyeye aivu. Nópe ðaivu baru, ðaivubu muja yópe Cristoi ðaicõjeiyeye.

³Ácu põecu “Mearo ðaivu yu”, arĩ dápiayu baru mearore ðabecuvacari, ũi bajuma jujovayube ũ. ⁴Caivu jári corevajarãri ne baju ðaiyede, coreóvarãjivu mearore o ãmenore. Aru ñai mearore ðayu torojajacurĩ ũi nópe ðaiye boje. Ũbenita jámecuva apevu ne ðaiyede, “¿Name pũeno mearore ðari?” arĩ jẽniari jámejacurĩ ũ. ⁵Que baru muja coapa me jári corevaiye javvu mujare muje ðaiyede.

⁶Ñai bueyu Jũmenijicui yávaiye méne jíjacurĩ úre bueipõecure apejĩe ũi me cũvaede, que ðari caðatecyu ũre bueipõecure jauéde.

⁷Muje bajumia apẽcure jujovaicõjemejara. Jũmenijicu bojedacnyume caivu põevare yópe ne ðaiyepedeca. Que baru põecu cubebi jujovarĩ buojayu Jũmenijicure. ⁸Ñai ðayu yópe ũi baju ãmeina ðaiyere ũi baju ãmedarĩ coatecyume Jũmenijicure jaruvarĩ aru ñájicnyume cainũna. Ũbenita ñai ðayu yópe ñai Espírítu Santoi mearo ðaicõjeiyeye cuvacyume jaravu cūiméjaravu baquinóre Cristoque. ⁹Que baru ũetubevũva mearo ðarãjarevu, Jũmenijicui bojedaquiyeye aivu majare me añijãravu, ũi beojãravu baquinói. Majare me bojedacnyume, maje ũetubevũva ðajocabedu maje ðaiye méne, caðatenajivu apẽcure. ¹⁰Que baru mearo ðarãjarevu caivu põevare cainũna. Aru pũeno mearo ðarãjarevu majacavu Jesúre ju aivure.

Pablo ũi majicaino aru meaicõjeino Galaciavũre

(Jn 3.3-7; 2 Co 5.17)

¹¹Jájara muja caride yo ji toivacainore mujare urarõa toivaivu ji bajui. ¹²Ina põeva buraicõjene ðaiyurĩduivu mujare muje cajede nópe ðaivubu, judíova ne me járajiyeye aivu náre. Ũbenita nópe ðaivubu, ina judíova ne ñájine ðabenajiyeye aivu náre yópe ne ñájine ðaiyeye ina corevũre Jũmenijicui meadaquiyede náre Cristoi yaiye báque boje jocusujaravena. ¹³Ina buraicõjeivũvacari ne cajede ðabenama yópe Jũmenijicui ðaicõjeiyede ũi coyuyiye báquepe Moisés bácare. Ũbenita buraicõjene ðaiyurĩvubu mujare, yópe torojurĩ “Ina põeva ju arĩ, buraicõjedama ne cajede yópe ñuje ðaicõjeiyeye náre”, arĩ coyurãjivu. ¹⁴Ũbenita ye baju ãmevu yũre yópe ne ðaicõjeiye. Quénora torojũvu yu ji ũmei yo boje: Jesucristo yaidéjaquemavu jocusujaravena yũre boje. Que baru caride ũbevu yu caiye iye ãmeina teiyede ijãravũcavu ne ðaiyede. Yu ye dápiabevu yópe ijãravũcavu ne dápiaiyeye. Aru na máre ũbenama yũre caride. ¹⁵Que baru ye baju ãmevu põecui buraicõjenu ũi cajede o buraicõjemenu. Quénora bojecũvu majare maje cũede mamarũvu põteivũre meaũmeque. ¹⁶Jũmenijicu torojurĩvu me cũre ðajacurĩ cãrijimevũva aru cõmaje ãroje jájacurĩ caivu ina ðaivure yópe ji bueiyeye Jesucristoi ðaicõjeiyede. Ina nópe ðaivu jáve Jũmenijicui põevatamu na.

¹⁷Yũrecabu cuvacu ji churiá báquede ji bajui, ji memecaiye boje Jesúre. Que baru yo jípcare ina Jesucristore ju aivure cãrijovaiyu chíore ðabejarãri yũre.

¹⁸Muja, jívu, maje jabocu Jesucristo mearo ðacajacurĩ mujare muje ũmei bojecubeda ũi me boje. Quédecabu. Quénoramu.

Efesios

Mamabuinore coyuiyebu Pablo bácu ùi toivaicōjeiye báquede paperayocare Éfeso àmicuriiमारocavũ Jesúre ju aipðevare. Pablo bácu judíovacacu bácvacari, Jesús ùi yáviaye méne beorí coyuiçōjeimũ marejaquemavũ, coyucyũ ùi yáviaye méne judíova ànevũre, judíova ne ju abe boje ùi coyuiyede. Lucas bácu coyurejaquemavũ Pablo bácu borore Hch 7:57-8:1, 9:1-31, 13:1-28:31, aru Éfeso àmicuriiमारocavũ ne borore Hch 18:19-20:1, 20:17-38. Javede Pablo bácuve toivacaiðecu bácuve toivaicōjenejaquemavũ pũcayoca ùi paperayocare Tesalónica àmicuriiमारocavũre, aru pũcayoca ùi paperayocare Corinto àmicuriiमारocavũre, ùi paperayocare Galacia àmicurijiborōcavũre, aru ùi paperayocare Roma àmicuriiमारocavũre máre. Apevũ ne dápiayepe, javede toivaicōjenejaquemavũ ùi paperayocare Filipos àmicuriiमारocavũre. Toivaicōjenejaquemavũ yóbecuriyoca ùi paperayocare àniyũ bácarōre 60 d.C., ùi cuede àmeina teivũre jēni jacoiñami Roma àmicuriiमारoi, cūináyocare Éfeso àmicuriiमारocavũre, apeyocare Colosas àmicuriiमारocavũre, aru apeyocare Filemón mácuve. Tíquico bácu nũvarejaquemavũ iyoca yóbecuriyocare cūináuru ùi nũiyede Roma àmicuriiमारore pũ Asia àmicurijiborōi. Pablo bácu coyurejaquemavũ ùre toivacaiðecu bácuve aipe ùi toivacaquiye báquede diyocare.

Diyocaque Pablo bácu coyurejaquemavũ Jūmenijicui coreóviaye báquede ùi cuedaquiye jipocamia caivũre aru caiyede máre, epecyũre caivũ Jesúre ju aipðeva márajivũre, judíova aru judíova ànevũre, yópe cūináyajubocavũre aru Jesucristo maje jabocvũ. Pablo bácu jáðovarejaquemavũ maje cuede Jesucristoque cūinávuve yóbecue ùi jēvari coyuiyeque: maja yópe cūramipe aru Cristo yópe cūravape cūramitōbui (2:20-22); maja yópe pōecu bajupe aru Cristo yópe maje jipobũre (4:15-16, 5:23); aru maja yópe jímarepacore aru Cristo yópe majemarepacũre (5:27-32). Aru Pablo bácu maucvũaicōjenejaquemavũ Jesúre ju aipðevare abujucyũque jēvari coyũyũ yópe churara ùi curinũma bácarōcacu bácu ùi cvũvaere (6:11-17).

Pablo ùi meaicōjeino Éfesocavũre

(Hch 18.19-21, 19.1)

1 ¹⁻² Yũ, Pablo, meaicōjeivũ mũjare, Éfeso àmicuriiमारocavũre Jūmenijicui pðevare. Yũbu Jesucristoi yáviaye méne beorí coyuiçōjeimaracacu. Yũ toivaicōjeivũ apecure iyoca paperayocare mũjare, Jesucristore ju aivũre ðajocabevũva aru curivũre úque. Majepacu Jūmenijicũ, maje jabocu Jesucristomaque, mearo ðacajacurĩ mũjare bojecũbeda ùi me boje. Aru torojũrĩ cũre ðajacurĩ mũjare carijimevũva.

Cristo ùi mearo ðacaino maje ũmene

(Mr 10.45, 14.24; Lc 24.49; Jn 14.26, 16.13-15; Hch 1.4, 2.33, 9.12-14; 2 Co 1.22; Col 1.14)

³ Jínajarevũ Jūmenijicure mearore, maje jabocu Jesucristoi mearore jímũre, jípacure máre. Úrecabe mearo ðacayũ majare, maje cve boje Cristoque cūinávuve. Maje ũmene mearo ðacaibi ù caive méque, ùi jaboteiye boje majare. ⁴ Javede Jūmenijicui cuedaquiye jipocamia jjáravũre, beorejaquemavũ majare ùi pðeva márajivũva, maje curãjiye boje Cristoque

cūinávure. Majare beorejaquemavū, maje curājīyepē ayū pueno meara baju aru ye āmeno cubevū ūi jāinore.

⁵ Jūmenijicūi ūe boje majare, jipocamia majidejaquemavū epecuyūre majare ūi mārāpe paivū bārājīvūre Cristoi đaquiye boje. Ūi ūrōpe đaiyūcu, “Que đacuyūmu yū”, arī dāpiarejaquemavū Jūmenijicu.

⁶ Jīdevū Jūmenijicūre mearore, ūi ūrarō mearo đacaiye boje majare. Ūi daroiye bāque boje mamacūre, pare ūi ūmūre, ūrarō mearo đacarejaquemavū majare. ⁷ Jesucristoi jive meīye bāque boje ūi yayīede, bojēdaibi majare, jōđecuyū. Que baru Jūmenijicu ārūmeteibi maje vainī turī āmeina teiyede. Que đaibi Jūmenijicu ūi ūrarō mearo đacaiye boje. ⁸ Pueno ūrarō baju mearo đacaibi majare ūi majiēque, maje me coreóvarī đarājīyepē ayū. ⁹ Jūmenijicu majide đaibi majare ūi ūrōre yo jāđovameno mácarōre jipocamia ūbenita jāđovainore caride. Que đaibi majare yōpe ūi ūrōpe, maje majinajīyepē ayū caiye iye ūi mearo đacaquiye de majare, Cristoi đaiye bāque boje. ¹⁰ Iye ūi đaiyūede đacuyūme Jūmenijicu ānijāravū, ūi beoijāravū baquinói. Cójijovacuyūme caivū ūi cuedaimarare, cavarōcavūre aru joborōcavūre máre, Cristoi jabotequiyepe ayū caivūre.

¹¹ Jūmenijicu beorejaquemavū űjare judíova Jesúre ju aivūre, epecuyū ūi pōevare Cristoque cūinávure. Jipocamia Jūmenijicu majidejaquemavū nōpe đacuyūre yōpe ūi dāpiarī đaiyūrōpe. Jūmenijicūrecabe űai vaidé đayū caiyede yōpe ūi ūrōpe. ¹² Que baru caivū űjare, mamarūmūcavū napini coreivūre Cristoi međaquiye de űjare, Jūmenijicu mearore jícōjeimi űjare ūre, űje mearore jīmu macuyū cainūmua, űje cuede cāreja. Mearore jíye jaūvū űjare Jūmenijicūre, ūi me boje caivū pueno. ¹³ Aru űjare máre epedejaquemavū Jūmenijicu ū jinare Cristoque cūinávure. Mūje jápiāye bāquede iye yāvāyede jāvene, Jesucristoi yāvāye méne, ju arejaquemavū űja diede. Que

baru dinūmūre űai Espírītu Santore darorejaquemavū űjare Jūmenijicu yōpe “Đacuyūmu”, ūi aīye bāquepedeca. Ūre darorī, jāđovarejaquemavū űjare ū jinare. ¹⁴ űai Espírītu Santoi cūe boje űjare, majivū maja jāve cūvarājīvūre caiye iye méne Jūmenijicu “Jīcuyūmu” ūi aīye bāquepedeca. Que baru majivū maja Jūmenijicu meara baju đacuyūre majare, caivū ū jina mārājīvūre, yōpe ūi ūrōpe. Que baru jīnajarevū mearore ūre.

Pablo ūi jēniaino Jūmenijicūque ūi majide đaquiyepe ayū Jesúre ju aipōevare

(Mt 22.44; 1 Co 15.27; Col 1.18)

¹⁵⁻¹⁶ Jūmenijicūi mearo đaiye boje caiye iyede, torojuede jívu yū ūre. Jápiāivū yū űje borore, ju aivūre maje jabocu Jesúre aru ūrivūre caivū Jūmenijicūi pōevare máre. Diede ji jápiainūmū mácarōre pu caride máre, đajocabecūva jívu yū torojuede Jūmenijicūre űjare boje. Cainūmua ārūvū űjare ji jēniāye coapa Jūmenijicūque. ¹⁷ Jēniāivū yū maje jabocu Jesucristoi mearore jívūre, űai majepacu meacu bajure, ūi majide đaquiyepe ayū űjare űje ūmei, űje coreóvarājīyepē ayū Jūmenijicūi jāđovāyede űjare jāvene. Que jēniāivū yū, űje coreóvarī nurajīyepē ayū Jūmenijicūre pueno baju me.

¹⁸ Jēniāivū yū Jūmenijicūre, ūi dāpiare đaquiyepe ayū űjare me nurié, űje majinajīyepē ayū ūi mearo đacaquiye de űjare. űjarecabu ūi cutuimara mácavū, napini corenajivū ūi mearo đacaquiye de űjare. Ūvū yū űja coreóvaivūre iye űje napini coreiyede. űjavacari cūvarājaramu ūi ūrarō mearo đacaquiye de űjare yōpe “Jīcuyūmu” ūi aīye bāquepe caivū ūi pōevare. Ūvū yū űja coreóvaivūre iye űje cūvarājīyede. ¹⁹⁻²⁰ űjarecabu cūvarivū ūi parūéde pueno ūrarō bajure. Iye ūre parūé cūiméque Jūmenijicu cadateibi majare, caivū Jesucristore ju aivūre. Ūvū yū űja coreóvaivūre iye űje parūé cūvaede.

Yópe iye Jūmenijicui majié parúéque ũi nacovaiye báquepe Cristore yainore jaruvarí aru yópe iye ũi dobare ðaiye báquepe máre úre ũi meapūravu yebai cavarō mearoi, quédecabu iye ũi majié parúéque. Dieque cadateibi majare Jūmenijicu. ²¹ Aru ñai Cristorecabe jaboteyu caivu jabova pūeno. Caivu cōjeivure, parurivure, purucunarivure, aru jabovare máre pūeno jaboteyube Cristo, cavarōcavure aru joborōcavure máre. Que baru caivu náre me puedaiye javvu úre. Quédecabu caride ijāravui. Aru quédeca baquiyébu mamajāravu, Jūmenijicui ðaquijāravui máre, ijāravu cūiníburu yóboi. ²² Majepacu Jūmenijicu epeibi Cristore ne jabocūva caivure. Caivu pōeyajuboacavu Jesúre ju aivure ijāravui, Jūmenijicu epeibi úre maje jabocūva. ²³ Maje cue boje Cristoque, jaubevu úre. Yópe ũi majaque cūcu buojaiyere ijāravui, buojaibi ũ. Nopedeca Cristoi cue boje cainore, ijāravure aru cavarō mearore máre, jaboteyube caiyede.

Jūmenijicu ũi meadaino majare ũi mearo ðacaiye bojecubeda
(Ef 6.11-12; Col 1.13, 2.13, 3.6)

2 ¹ Javede majarecabu yaivu bácvape maje ũmei coateimara mácvu maja Jūmenijicure jaruvarí, maje vainí tuiye báque boje aru maje āmeina ðaiyue báque boje máre. ² Dinūmu mácarōre maja curivu barejaquémavu āmeina ðaivu yópe ijāravūcavu ne cūere āmeina ðaivu. Maja ju aivu barejaquémavu ñai āmecu, abujuvai jabocūre. Úrecabe buoyu ina pōeva Jūmenijicure ju abevure. ³ Javede maja caivu, ina Jūmenijicure ju abevure, curivu barejaquémavu, āmeina ðaivu. Maje āmeina ðaiyūere ðarí, maje baju urōpe ðarí, aru maje ũme dápiayere máre ðaivu barejaquémavu maja. Que baru majare Jūmenijicu āmeina jári, ñájine ðacūyu barejaquémavu caivu apevu pōevape maje āmeina teiye boje. ⁴ Maja Jūmenijicui ñájine ðarājimara majarórivūvacarí, pare cōmaje āroje

jáimi majare ũ, ũi urarō baju ue boje majare. ⁵ Que baru ũ jáñu mácvvacari majare yaivu bácvape paivure maje āmeina teiye boje, apūre ðaibi majare apué mamaeque yópe ũi nacovaiye báquepe Cristore yainore jaruvarí. Nopedeca jáimi majare Cristoque cūinávure. Que baru curivūbu maja apué mamaeque. Jūmenijicui mearo ðacaiye bojecubedecabu meadaiye majare.

⁶ Maje cue boje Cristoque cūinávure, yópe Jūmenijicui nacovaimara mácvape yainore jaruvarí curivūbu maja caride. Aru Jūmenijicu jáimi majare yópe ũi jaboteimarape, ñai abujuvai jabocūi buobe boje majare caride. Jūmenijicu jáimi majare yópe ũi dobare ðaimara mácvape Cristoque cavarō mearoi. ⁷ Nōpe ðaibi, jáðovacūyu caivu pōevare cainūmu pūeno urarō mearo ũi cōmaje āroje jáiyede mearo ðacayure bojecubeda majare, Cristoque curivure cūinávure. ⁸ Jūmenijicui mearo ðacaiye bojecubedecabu ũi meadaiye majare maje āmeina teiyede jaruvarí, maje ju aiyé boje úre. Maja meadārí oabevu maje bajumia. Jūmenijicurecabe meadayu majare. ⁹ Ūbenita meadabebi majare maje mearo ðaiye boje. Maje mearo ðariduiye quíjie bajutamū. Que baru urarō jarūrōtamū. Ye meadaiye majibevu maje bajumia. Quéñora Jūmenijicu meadāibi majare ũi mearo ðacaiye bojecubeque. Que baru pōecu cubebi “¿Meacu bárica yu?” arí buojayu. ¹⁰ Jūmenijicurecabe ñai cuedayu majare. Apué mamaeque cure ðaiyurejaquemavu majare, maje mearo ðarājiiyere ayu caivu pōevare cainūmu. Que ðarejaquemavu ũi cutuiye báque boje majare, maje ju arājiiyere ayu Cristore. Jipocamia “Ðajarārí na mearo matuiyeda”, arí dápiarejaquemavu Jūmenijicu maja curājivurā Cristoque cūinávure.

Maje cue cārijimenoque Cristoi ðaiye báque boje

(Mt 21.42; Jn 14.27; 1 Co 3.16-17; Col 1.20, 2.14; 1 P 2.4-5)

¹¹ Muja, judfova āmēvu, dápiajarā aipe muje cue báquede javede. Muje

põeteiye báquede ijāravui, Jūmenijicui pōeva āmenejaquemavu mūja. Ņūja ūmva judíoiva buraicōjeivū űuje cajede, coreóvare đarājivū űuje baju Jūmenijicui pōeva, āmeina járejaquemavu mūja buraicōjemevure. “Jūmenijicure coreóvabevū”, aivū barejaquémavu mūjare. Ūbenita iye buraiye ūmuvai bajure pōeva ne đaiyedecabu ne bajumia quénora. ¹²Dinmū mácarōmiareca cūrivū barejaquémavu mūja Cristore cuvbevūva. Jūmenijicui pōeva ūi beoimara mácavu āmenejaquemavu mūja. Que baru cubevū barejaquémavu mūja Jūmenijicui pōeva. Jūmenijicu “Mearo đacacūyumu yū mūjare”, ūi arī coyūiye báque boje ūi pōevare, “Yurecabu mūje jabocu. Aru mūjarecabu ji jaboteimara”, arī coyurejaquemavu na mácavure. Ūi nópe coyūiye báquede, ye coyūbedejaquemavu mūjare. Ijāravui cūrivū barejaquémavu mūja Jūmenijicure coreóvabevūva. Que baru, “Ye meadaimara āmenajaramu maja”, arī dāpiarejaquemavu mūja. ¹³Ūbenita caride cūrivūbu mūja Cristoque cūinávure. Mūja Jūmenijicui pōevacavu āmenejaquemavu javede. Ūbenita caride cójjovaimaramu űūjaque. Que đaiibi mūjare Jūmenijicu, Jesucristoi jive meiyē báque boje ūi yayiede.

¹⁴Jesucristorecabe cure đayū majare cārijimenoque. Javede maucavarivū barejaquémavu maje baju, judíoiva aru judíoiva ānevūque. Maje baju coateivū barejaquémavu maja. Ūbenita Jesucristo ūi yainoque jarūvarejaquemavu majare coatede đaino mácarōre, cure đacūyū majare yópe cūináyajubopeda, judíoivare aru judíoiva ānevure máre. ¹⁵Cristoi yayiye báque boje, coreóvaivūbu maja buojabenajivure boropatebevū Jūmenijicui jāinore maje đariduiye boje yópe ūi đaicōjeiyepe ūi coyūiye báquede Moisés bácare. Aru Cristoi űājicaiye báque boje caivure iye đaicōjeiyepe đabevure, coreóvaivūbu maja Jūmenijicui űājine đabenajimarare, maje đabe boje yópe ūi đaicōjeiyepe. Que baru ina pūcayajuboa

pōeyajubocavu bācavu Jesúre ju aivure, cūináyajubo mamayajubo pōeyajubocavure cuedarejaquemavu ū, ne curājiyepe ayū ūque cūinávure. Que baru cārijimenoque cūvū maja caride. ¹⁶Ņūja judíoivare aru mūja judíoiva ānevure máre, Jūmenijicu jāimi majare cūináturura boropatebevure. Cristoi yayiye báque boje jocūcūjaravena, buojarejaquemavu ina pūcayajuboa pōeyajubocavu ne maucūvae báquede ne baju. Que teniburu yóboi, cójjiovaibi majare cūináyajubo pōeyajubocavure, cārijimevūva cure đaiibi majare Jūmenijicuque ūi yayiye báque boje jocūcūjaravena.

¹⁷Que baru darejaquemavu, coyūicōjecūyū iye yávaiye méne pōevare cārijimena cure đaiyede Jūmenijicuque. Diede coyūicōjecudaibi mūjare, judíoiva ānevure, Jūmenijicui pōeva ānevū bācavure. Aru űūjare máre, judíoivare, cainmūva Jūmenijicui pōevare, coyūicōjecudaibi ū iye yávaiye méne. ¹⁸Cristorecabe jēniare đayū caivū majare majepacu Jūmenijicuque. Ūi yayiye báque boje, cure đaiibi majare ūque cūinávure. Ņai Espiritu Santo cūinácu cadateibi caivū majare, judíoivare aru judíoiva ānevure máre, maje jēniarajiyepē ayū majepacu Jūmenijicuque.

¹⁹Que baru caride mūja, judíoiva ānevū, Jūmenijicui pōeva ānevure cubevū mūja. Ijāravūcavu Jūmenijicure ju abevure paivū cubevū mūja caride. Quénora Jūmenijicui pōevatamu mūja. Cavarō mearocavure paivūtamū mūja. ²⁰Maja Jūmenijicui pōeva ūi cūramipebu. Cūravaque đaiñamipebu diñami cūrami. Ņūja Jesúre ju aivū ne daroimara coyurājivū Jesús ūi yávaiye méne aru Jūmenijicui yávaiyede coyūcaipōeva mamarūmure ju arejacařā űūja Jesucristore. Aru buenī búrejacařā iye ūi yávaiye méne.

Que baru űūjatamu yópe cūrava Jūmenijicui mamarūmū epeivare cūrami cāchinore. Aru mūjatamu yópe apeva cūrava ūi epeivare

ñuje puenora, mñje ju aye boje ére ñujapedeca. Aru Jesucristorecabe yópe cūravape cūramitōbui, paruriva apeva pueno. ²¹Yópe ñai cūramine ñaipōecu caiva cūravare ñi tuoipepe ároi tuoipe jaurōi, nopedeca Cristorecabe epeyu majare ároi majare cue jaurōi. Yópe ñai cūramine ñaipōecu vorī, cójijovarī tuore ñuipepe apeva cūravare buojacuyū diñami ñi ñaiñami cūramine, nopedeca Cristorecabe ére ju are ñure ñaivu tenajipepe ayu Jūmenijicure memecaivure. Yópe cūramine ñaipōecu meadami cūramine ñaipepe pōeva ne Jūmenijicure mearore jínajīñamine, nopedeca Cristorecabe pueno meara baju ñayu ére memecaivure, maje cue boje éque cūinávure. ²²Que baru mñja judíova ámevu máre curivū éque cūinávure, Jūmenijicui cójijovaimaramu caivu apevu Jesucristore ju aipōevaque. Aru ñai Espíritu Santo cubi mñjaque máre. Que teni apevu majare jári, Jūmenijicure pueðarī jínajarama mearore majare boje.

Pablo Jesús ñi bueicōjeimū ñi yávaiye méne judíova ámevure

(1 Co 15.9; Gá 1.12; Col 1.25-27, 3.12-13)

3 ¹Mñja judíova ámevu, mñje Jūmenijicui pōeva teiye boje, jēniaivu yu éque mñjare boje. Yu, Pablo, buoimūtu ámeina teivure jēni jacoñami jívui, ji coyūipe boje Jesús ñi yávaiye méne. Jesucristore memecayūbu yu mñja judíova ámevure boje. ²Jāve majidivūbu mñja Jūmenijicu epeyu bácare yure, ji memecaquiyepe ayu ére mñjare boje, ñi mearo ñacaiye bojecubeda. Que teni yure coyure ñaibi mñjare iye ñi mearo ñacaiye bojecubeda. ³Jūmenijicu majide ñaibi yure ñi dápiaiye báquede javeita Cristorā, yo jáðovameno mácarōre jipocamia ũbenita jáðovainore caride. Que baru obebecamuaque toivaicōjeivū mñjare diena.

⁴⁻⁶Yópebu ñi dápiaiye báquepe jipocamia: Mñje jápiaiye boje Jesucristoi yávaiye méne, mñja judíova ámevu

Jūmenijicui meadaimaramu ñuja judíovaque. Ññjaque jacopurājaramu mñja caiye iye Jūmenijicui mearo ñacaiyede, ñi jíquiyede ñi pōevare. Ññjaque cūináyajubo pōeyajubocavūbu mñja. Que baru ññjaque mearo ñacacuyūme mñjare Jūmenijicu yópe ñi aye báquepe. Caiye iye mñjetamu, mñje cue boje Jesucristoque cūinávure. Iye ji toivaicōjeiye báquede jáivu baru coreóvarājaramu mñja yure me majicure Jūmenijicu urōre yo jáðovameno mácarōre jipocamia ũbenita jáðovainore caride. Javede ácu pōecure Jūmenijicu jáðovamenejaquemavu diede, ñi dápiaiī jáðovame máquede. Que baru javede, “Judíova quénvratamu Jūmenijicui meadarājimara”, arī dápiaiīrdurejaquemavu. ũbenita caride ñai Espíritu Santore majide ñaibi Jūmenijicui dápiaiuyōre, ññja Jesús ju aivure ne daroimarare coyurājivure Jesús ñi yávaiye méne aru Jūmenijicui yávaiyede coyucaipōevare, ére memecaivure.

⁷Yurecabu Jūmenijicui beorī epeimū ére memecacuyūva. ũi majide ñaipe bojecubeda yure, bueyūbu yu Jesús ñi yávaiye méne. Majide ñaibi yure ji ũmei ji buequiyepe ayu ñi urarō majiéque.

⁸Yurecabu caivu ina Jūmenijicui pōeva ne cāchinocacupe páyu baju. ũbenita Jūmenijicu urarō mearo ñacaibi yure, bueicōjeñū mñja judíova ámevure iye yávaiye méne, mñje coreóvarājipepe ayu aipe baju meacure ñai Cristore aru aipe urarō mearo cūiménore ñacayure ére ju aivure. ⁹Jūmenijicu ñi dápiaiñore jáðovameno mácarōre coreóvare ñaicōjeimi yure pōevare cūináturura beobecuva. Ñai cuedayū bácu caiye ijāravuquede yópe ñi ñaiyuepe ñaibi ũ ñi cuedarīburu yóbore pu carita. ¹⁰Que ñaibi Jūmenijicu caivu cōjeivure aru parurivure máre, ángelevare aru abujuvare máre, ne coreóvarājipepe ayu caride ũ majicure caiyede aru caiye ñi dápiaiye me matuiyede. Diede coreóvarājarama ne jáiyede Jūmenijicui ñaiyede ũ jinare caivu Jesucristore ju aivure.

¹¹ Que baru Jūmenijicu đarejaquemavu yópe ũi dápíarí đaiyurópe, “Que đacuyumu” ũi aino mácarōpedeca, ijāravure ũi cuedaquíye jipocamia. Maje jabocu Jesucristoi đaiye báque boje, Jūmenijicu đarejaquemavu caiyede ũi urópe. ¹² Maje cūe boje Jesucristoque cūinávure aru maje ju aiye boje úre jidubevuva jēniaivubu Jūmenijicuque. Majidivubu jidué jaubede majare ũi jáinore. ¹³ Que baru parurōreca jēniaivu mujare. Uetubevuva chíomejara mūja Ji nájíyede ji bueíye báque boje mujare. Ji nájíyede mujare boje, mujarecabu Cristoi meadaimara. Jáve urarō mearo cađateino cūvarivubu mūja caride.

**Pablo ũi jēniaino Éfesocavure
Jūmenijicuque**

¹⁴ Mūja, judíova āmevu, mūje Jūmenijicui pōeva teíye boje, majepacu Jūmenijicure nūatutari torojuede jívū yū ũi jáinore. ¹⁵ Majepacu Jūmenijicurecabe cuedayū bācu caivu cavarō mearocavure aru caivu ijāravucavure máre. Caivu náre ne yajuboa coapa epedejaquemavu ũ. Que teni népacupe páyū curí, coreóvare đaiibi náre coapa aipe meacu ārojajurocure pōescu pacure. Que baru jēniaivu Jūmenijicuque mujare boje. ¹⁶ Urarō mearo bajutamu Jūmenijicui parué. Que baru jēniaivu yū úque, ũi pueno ju are nure đaquíyepere ayū mujare ũi majiéque yópe ũi parué cūimépe. Nai Espiritu Santorecabe pueno ju are nure đayū mujare ũi majiéque. ¹⁷ Jēniaivu yū Cristo cūcyure mūjaque mūje ũmei. Que đacuyume ũ, mūje ju aiye boje úre. Jēniaivu yū ueque dápíarājívure mūja aru đarājívure caiye mūje đarājíyede, mūje ue boje apevu Jesúre ju aipōeva.

¹⁸ Que baru mūja caivu, apevu Jūmenijicui pōevaque, coreóvaivu buojarājaramu aipe Jūmenijicu urarō meacure. Yópe mearo đacaiyubi ũ jabovare aru jabova āmevure máre. Cainoa joborōacavure mearo đacaiyubi cainumua, Cristoi ue boje pōevare. ¹⁹ Iye Cristoi uede pōevare ye jápiarí eaiivu buojabenamu maja. Ubenita

maja coreóvarí buojabevureca caiye ũi uede, jēniaivu yū mūje urarō coreóvare nurajíyepere ayū. Uí uede coreóvarí tenanurajaramu mūja yópe Jūmenijicu bajure.

²⁰ Mearore jjarāri caivu majepacu Jūmenijicure. Uí majié paruéque urarō mearo đare đacaibi majare, maje úre jēniajuroe pueno aru maje dápíajuroe pueno máre. ²¹ Caivu pōeyajubocavu Jesúre ju aivu ne cūe boje aru Jesucristoi cūe boje máre, mearore jjarāri caivu majepacu Jūmenijicure đajocabevuva cainumua, jáđovarajivu úre meacu bajure. Quédecabu.

**Espiritu Santo ũi cójjovaino
caivu Jesúre ju aipōevare
cūináyajubocavure
(Col 2.19, 3.12-13)**

4 ¹ Caiye iye ji toivaicōjeyede apecure mujare dápíarí caride, parurōreca jēniaivu yū, mūje đarājíyepere ayū yópe đaiye jauépe mujare. Yúbu buoimū āmeina teivure jēni jacoĩnami jívui, ji memecaiye boje Jesucristore. Đajarā mūja yópe Jūmenijicu “Que đajarāri” ũi arí dápíaino mácarōpedeca, ũi cutuíye báquede mujare ũ jina marajíyepere ayū. ² “¿Meara mārīca apevu pueno?” abejarā mūja. Aru ména meadarí cadatejarā apevure. Napijara apevure. Aru jorojímevuva náque jáđovajara mūje uede náre. ³ Nai Espiritu Santo cārjímemoque cure đaiibi mujare. Cójjovaibi mujare cūináyajubocavure cūináturu mūje ũmei. Que baru đajarā caiyede mūje oainope, meadarājívū iye mūje cūede cūináturu mūje ũmei.

⁴ Cūináyajuborabu maja Jesucristore ju aipōeva. Cūinácurecabe nai Espiritu Santo. Cūinároramū yo maje napini coreino Jūmenijicui mearo đacaquíyede majare, ũi cutuimara mácvure, maje cūvarājíyepere ayū diede. ⁵ Cūinácurecabe maje jabocu Cristo. Cūináenamū iye yávaiye me, maje ju aiye. Cūinácurecabe nai maje jáđovaimū ocoque.

⁶ Cūinácurecabe majepacu Jūmenijicu, maje mearore jímū, caivu Jesúre ju

ai pōeva majepacu. Caivu Jesúre ju ai pōeva maje jabocube ũ. Caivu Jesúre ju ai pōevare memecōjeimi úre maje ðaiyeque majare coapa. Aru caivu Jesúre ju ai pōeva que cubi ũ.

⁷Majare coapa ðare ðaibi Cristo ũi majide ðaiye bojecubeda. Yópe ũi urópe mearore ðare ðaibi majare coapa. ⁸Cristoi que ðare ðaiyede, yópe arí, Jūmenijicu toivaicōjenejaquemavu javede ũi yávaiyede:

Vaidéjaquemavu ũi mauva mácvare. No yóboi, copaini muri nurejaquemavu ũmui. Que baru na obedivure, ũi buoimarare, nūvarejaquemavu ũi yóboi. Que teni emuriburur yóboi, darorejaquemavu pōevare ũi majide ðaiyede náre, arí toivaicōjenejaquemavu Jūmenijicu.

⁹¿“Copaini muri nurejaquemavu ũmui”, Jūmenijicu yávaiyede coyucaipōescu báciu aino mácarō, aipe ai yurōma no? Yópe ai yurōmu: Cristo ũi muri nūquiye jipocai, javede emeñu mácu ijārvui, corejaquemavu joborō jívui, yaivu bávavu ne curōi. ¹⁰Aru ñai emeñu mácvarecabe muri nūñ cojedeca pu cavarō mearo Jūmenijicu curōita, cūcu cainore caride aru cūcūy cainore cainūma máre. ¹¹Ñai Cristorecabe jíyu úre ju ai pōevare majide ðaiyede, maje mearo ðaivu buojarājiyepe ayu yópe ũi urópe. Epeibi apévure ũi yávaiye méne beorí coyucōjeimara márajivūva, aru apévure Jūmenijicu yávaiyede coyucaipōeva márajivūva. Epeibi apévure ũi yávaiye méne coyupōeva márajivūva, aru apévure úre ju aivure ne coreipōeva márajivūva, aru náre bueivu márajivūva máre. ¹²Que ðaibi meadacūy caivu Jūmenijicu pōevare, maje memecaivu buojarājiyepe ayu úre.

Que teni pueno baju ðare ðaibi caiyajuboa pōeyajubocavu Jesúre ju ai pōevare Jūmenijicu urópe yópe pōescu baju bucuiyepe. Majamu Cristoi bajupe paivu. ¹³Jūmenijicu urópe pueno ðare nurajaramu maja, pu maje

eaiyeta curājivu cūináturu maje ju aiyede Jesucristore, Jūmenijicu mácvare, aru cūináturu maje coreóvayiede máre aipe ārojacure úre. Bucūvape paivu barājáramu maja maje ũmei. Que baru buojarājaramu curivu Cristo bajupedeca. Aru Jūmenijicu ju arí coreóvarājaramu maja ye jaubeda. ¹⁴Que baru juedovape paivu maje cubenajiyeye ayu, Cristo jíbi majare ũi méne. Juedova pucaūmea curivubu. Napedeca ina Jesúre ju ai pōeva pucaūmea curivu baru, oatūvayivubu ne dápiayede cainūma, ape bueiyeide jápaivūva. Ina bueipōeva borocurivu me majidivubu aipe ju are ðarājivu apévure ne borocueque. Que baru bucūvape paivu baríjarajarevu maje ũmei, jujovaimara āmenajivu yópe juedovape. ¹⁵Ūbenita coyurājarevu Jesús ũi yávaiyede jávene. Maje yópe coyuiyede jádovarajarevu maje uede maje bajumia, aru náre maje coyumarare máre.

Que ðaivu baru, Jūmenijicu urópe ðare nurajaramu maja, maje cue boje Cristoque cūinávure. Maja úre ju aivu caiyajuboa pōeyajubocavu ũi bajupe paivubu. Aru évacari maje jabocube, majare ðaicōjeñu. ¹⁶Ūi ðaicōjeiye boje, maja caivu ðarí majidivubu yópe majare jauépe ũi uróre. Cristoi bajucarōpebu maja coapa. Pōescu cūvacu baru caiye ũi bajuquede ári die cue jaurói, ðaquiyepe ayu yópe ðaiye jauépe, me cubi ñai pōescu. Quédecabu maje cuede Cristoque. Cristoi bajure bucúvayiepebu, maje ðaiyede ðare nūmuri yópe ũi majide ðaiyepe, aru maje cadateiyede apévure, náre urí.

Apué mamae jauró majare, Jesúre ju ai pōevare

(Ro 1.21-25, 12.5; Col 3.9-10, 13; Stg 1.19-20)

¹⁷Ji cue boje Jesucristoque cūinávure, coyucuijivu mujare paredeca. Dabejarā mija yópe ina Jūmenijicu ju abevu ne ðaiyepe. Iye ne ðaiyepe paiyede dajocajarā mija. Námu ũbenina dápaivu. ¹⁸Que baru

jápiarí coreóvabema na. Iye apué mamaene, Jūmenijicui cūvare daiyede ũ jinare, cūvabema na. Ũi yávaiyede jápiaiyubema. Que baru Jūmenijicure coreóvabema. ¹⁹Ye chíomema ne ámeina daíye boje, ne dápiaino mearo cube boje. Torojurivú ñadama caino ámenore. Ũrarō baju ámenore ñadama dajocaiyubevva. ²⁰Nópe ne daiyedeca mujacapuravú buebedequemavú Jesucristore ju aivú ne daíyepé jauróre. ²¹¿Jáve jápiabedecarārú muja Jesús ũi yávaiye méne? ¿Buebedecarārú muja diede? ²²Que ñaivú baru, dajocajarā aipe ārojæe máquede muje ámeina daíyueque. Ñare nuivú barejaquémavú ámenore muje ámeina daíyue boje. No boje, jujovaimaratamu muja. Que baru pūeno ámenore ñaivú baru aru dajocabevú baru muje javeque daíye báquede, bíjarājaramu muja coateivupe Jūmenijicure jaruvarí. ²³Muje cūe boje apué mamaeque caride, Jūmenijicure oatuvaicōjeara muja, cūvarājivú muje mamaūmene aru muje dápiaino mamarore máre. ²⁴Ñajarā muja yópe ina apué mamaene cūvarivure daíye jauépe. Jūmenijicú ũbi mujare curivure yópe ũi cūpedeca. Que baru cūre ñaibi mujare apué mamaeque aru mamaūmeque máre. Que baru meara májara Jūmenijicui jáinore aru mearo ñajarā apévú pōeva ne jáinore máre, yópe ũi yávaiyede jávene coyuiyepé.

²⁵Que baru borocūbejarā muja caride. Quénora caivú muja coapa borotejarā jávene muje baju. Cūináyajubo pōeyajubope paivubu maja. Cristoque cūinábajupe paivubu. Que baru jáve borotejarā muja. ²⁶Jaraiivú baru, ámeina ñabejarā muja muje jaraiye boje. Quénora vaidé ñajarā muje jaraiyede maumena, dijāravumareca. ²⁷Muje jaraiye boje, jujovaicōjemejara ñai abujuvai jabocure, ámenore ñabenajivú muje baju. ²⁸Cūinácu mujacacu ñavacucu baru, dajocajacurí ũi ñavaiyede. Quénora memeicōjeara ũre memeino mearore, ũi bojeñaiyepé aivú ũre jauéde aru ũi cadatequiyepé

aivú ina cōmaje ārojarivure máre. ²⁹Muje yávaiyeque ámeina ñabejarā apévure. Quénora me cadatejarā náre dieque. Muje yávaiyeque pare ju are nure ñajarā náre Jesucristore. Coyujarā me yópe náre jauépe. Que ñarí cadatenajaramu náre, ina jápiaivure mujare. ³⁰Chíore ñabejarā muja ñai Espiritu Santore, Jūmenijicú jicure. Ũrecabe jádovañú majare Jūmenijicú jinava. Ñai Espiritu Santoi cūe boje majaque, majidivubu jáve cūinájaravú daquijāravú baquinóre meara baju jaubeda ñacuyure majare yópe Jūmenijicui uróre. ³¹Ñájine ñabejarā pōevare muje yávaiyeque. Jorojīmejara náre. Aru jarabejarā náre. Jararí codobobejarā máre. Coyubejarā ámenore caivú ne jápiaiyede apévú borore. Aru ámeina dápiabejarā apévure máre. ³²Quénora cōmaje āroje jári, cadatejarā muje bajumia. Aru ārumetejarā apévú ne ámeina daiyede mujare yópe Jūmenijicūvacari ũi ārumeteiye báquepe muje ámeina teiyede, diede jaruvarí, muje cūe boje Cristoque cūinávupe.

Aipe daíye jaurō Jūmenijicui mārare
(Col 3.16-17, 4.5)

5 ¹Majamu Jūmenijicui mára pare ũi ũmara. Que baru me ñarí járajarevú, ñarājivú yópe Jūmenijicui daíyepé. ²Caiye maje daiyede ñarājarevú maje ũe boje Jūmenijicure aru apévure máre. Cristovacari ũcu majare, boarí jaruvaicōjenejaquemavú ũi bajure majare boje. Ũi nópe daíye báque cojurejaquemavú Jūmenijicure, yópe cojuépe ũre pōeva ne cūvaequede jíye aru ne áimarare boarí juarí jíye máre. Yópe iye jíye me corajavú ũre mumijūere, nopedeca Cristoí yaiye báque majare boje me cojurejaquemavú Jūmenijicure. Yópe Cristoí daíye báquepe ũrarō baju ũi ũe boje majare, nopedeca ũrarō ũre nuíye javvú majare máre.

³Majamu Jūmenijicui pōeva, ũre memecaivú. Que baru ámeina daíye

jaubevu majare. Aru âmeina ðaiyede apevuque mujemarebucava âmevuque ye dápiabejarã muja. Aru muja ãmva nomivaque âmenore ðaiyurĩ dápiabejarã muja. Aru muja nomiva máre ãmvaque âmenore ðaiyurĩ dápiabejarã muja. Aru muje cuae pueno baju cuvaiyurĩ dápiabejarã muja. Caiye diepe paiye muje dápiaru, meamenotamu. ⁴Aru apejĩene máre ðaiye jaubevu mujare. Que baru coyubejarã âmene cuye tede ðaiyede. Aru yávabejarã ârumevupe máre. Yurivupeda yávabejarã âmeina baju yávaiye máre. Meamevu diepe paiye yávaiye. Quénora pueno baju torojuede jíjarã Jümenijicure. ⁵Me majíjarã muja iyede jáve: Pöeva ðaivu baru âmenore apevuque némarebucava âmevuque aru pöeva âmeina ðaivu baru ãmva nomivaque aru nomiva ãmvaque, ina pöeva nópe ðaivu curãnumenajarama Jümenijicure aru Cristoque máre. Ye ne jaboteimara âmenajarama na. Aru pöeva urivu baru pueno baju ne cavaede Jümenijicure jaruvarĩ, pëpeimarare mearore jívupe paivubu na. Que baru pöeva nápe paivubu cubenajivu Cristoque cavarõ mearo Jümenijicui curõ. ⁶Jümenijicu jorojĩni jári, ñájine ðacuyume pöevare diepe paiyede ðaivure, ùre ju abevure, ne âmeno ðaiye boje. Que baru ñamene jujovaicõjemejara muja ubeni cæque, “Ye baju âmevu ñuje ðaru âmenore”, ne aiyé. ⁷Ye ðabejarã nápe ina âmenore ðaivupe.

⁸Mujarecabu ñeminoi cuivu bácvupe javede, muje âmenore ðare nuíye báque boje. Ubenita caride, muje ju aiyé boje maje jabocu Jesucristore, miadároi cuivupebu muja caride. Que baru mujare ðaiye javu yópe ina miadárijárvui cuivu ne ðaiyepe. ⁹Que teni meara marajáramu muja Jümenijicui jáinore. Caino mearore ðarãjaramu muja apevu pöeva ne jáiyede. Aru yávaiyede jávene coyurãjaramu muja máre. ¹⁰Me ðarĩ járajarevu, ðarãjivu mearore yópe Jümenijicui urõpe. ¹¹Mujacapuravu

ðabejarã yópe ina pöeva ñeminoi cuivupe. Ina âmenore ðaivubu ñeminocavu. Iye ne ðaiye bojecubetamu. Que baru iye ne âmeina ðaiyede coreóvare ðajarã náre. ¹²Iye âmene ne ðaiye pöeva ne jámene urarõ baju cuyojetamu die. Que baru ye coyuiye jaubevu pöevare diena. ¹³Ubenita ne ðaiyede muje coreóvare ðarĩburu yóboi, majinajarama Jümenijicu âmeina jáñure ne que ðaiyede. ¹⁴Muje coreóvare ðaiyede náre diena yópe ñeminore pëoiyepebu. Que baru pöeva, yópe arĩ, yuriaivubu diepe paiyede ðaivurã:

Mu, Jümenijicure coreóvabecu, cáñupe páyu, coedajacu, coreóvacuyu ùre. Nacajajacu yainore jaruvarĩ. Aru Cristo cure ðacuyume mære miadároi, arĩ coyuvubu.

¹⁵Que baru me matuiyeda ðajarã apejĩe muje ðaiyede. ðabejarã yópe ina coreóvabevu, Jümenijicure ârumevu, ne ðaiyepe. Quénora ðajarã muja yópe ina coreóvaivu, Jümenijicure ârurivu, ne ðaiyepe. ¹⁶Caride ijárvucavu Jümenijicure ju abevu urarõ âmene ðaivubu. Que baru cainmua muje oainope Jümenijicure memecaiye javu mujare. ¹⁷Que baru ðabejarã coreóvabevupe. Quénora me ðarĩ jájara, coreóvarãjivu maje jabocu Cristoi urõre, muje ðarãjiiyepe ayu yópe ñi urõpe. ¹⁸Ucumejara pacotebeburĩ muja. Pacoteivu baru, âmeðarãjaramu muja, muje ðaicõjeme boje muje bajure. Quénora mujacapuravu ðaicõjeara ñai Espiritu Santore ñi majiéque. ¹⁹Muja que ðaivu baru, torojurãjaramu. Que baru coyujarã mujevure iye Salmos âmícæque. Aru mearore jíjarã Jümenijicure yuriainoque, aru ñi Espiritu jino yuriainoque máre. Yuríjarã mearore jíyede aru Salmore máre maje jabocu Cristore. Yópe ðaivu mearore jíyeque yuriaivubu muja muje ùmei. ²⁰Que baru caiye ñi vaidé ðaiyede, torojuede jíjarã majepacu Jümenijicure cainmua maje jabocu Jesucristoi parúeque, muje cæ boje

éque cūinávure. ²¹ Puedarī jápiajarā mūja mūje bajumia, mūje pueđaiye boje Cristore.

Mearo đaiye jauřō cūramicavūque aru memeiñvūque máre

(Mt 15.4, 19.5; 2 Co 11.2; Col 3.18-25, 4.1; 1 P 3.1, 7; Ap 21.2, 9)

²² Mūja, ũmūcurivū, ju ajarā mūjemarepacure yópe mūje ju aiyere mūje jabocu Cristore. ²³ Nomicucu jaboteyube jímarepacore yópe Cristoi jaboteiyere caivū majare, ũre ju aivūre. Cristorecabe ñai meadayū majare, caivū ũre ju aivūre. Ũvacari maje jabocube, majare đaicōjeñū. Que baru ũtame maje jipobūre páyū. ²⁴ Aru majamu ũi bajupe paivū. Que baru yópe maje ju aiyere jauépe Cristore cainumua, nopedeca ũmūscure ju aiyere jauvū jímarepacure cainumua.

²⁵ Mūja, nomicurivū, jecujarā mūjemarepacore yópe Cristoi jecúere caivū majare, ũre ju aivūre. Cristo pare ũcu mūjare, boarī jarūvaicōjenejaquemavū ũi bajure. ²⁶ Que đarejaquemavū maje ámeina teiyede jarūvarī, meadacūyū majare aru coavacūyū majare ũ jinava. Majare, ũre ju aivūre, meadarī joarejaquemavū majare maje ju aiyere báquede aru maje jáđovaiye báquede Jūmenijicure ocoque.

²⁷ Caiye iyede đaiibi, cūvacūyū ũ jinava majare. Yópe pōescu cūvaiyūere jímarepaco bacođore meaco bajure, nopedeca Cristo cūvaiyūbi majare. Ico pūcūbuocođo bojuyo baju, ye ámeno cubecore, opedeca barājáramu maja, Jesucristore ju aivū máre. Pūeno meara bajure aru ye ámeno cubevūre cūvacūyūme Cristo majare, ũi baju đaiye báque boje. ²⁸ Ina nomicurivūre coreiye jauvū némarepacore, ye jaubequiyere aivū óre, yópe ne coreiyere ne bajuáre náre coapa. Ñai coreyū jímarepacore coreyūbe ũi bajure. ²⁹⁻³⁰ Pōescu cubebi cōenícū ũi bajure. Quénora javateni me cubecube. Aru cūinábajupe paivūbu maja Cristoque. Que baru ũrecabe coreyū majare.

³¹ Jūmenijicu toivaicōjenejaquemavū ũi yávaiyede, yópe arī: “Que baru caride ácu pōescu jímarepaco bacođo cūvacūyū, ũi bucūvare đajocacūyūme. Aru jímarepaco cūvarī ómaque cūinávūpetamu Jūmenijicūi jáinore”, arī toivaicōjenejaquemavū Jūmenijicu. ³² Iye yávaiye Jūmenijicūi toivaicōjeiye báque maiyójaevacari majare diede jápiaarī coreóvajurorivūre jávetamu iye. Ji đápiaru, iye yávaiye coreóvare đaiivū majare aipe árojaene Cristoi cuede majaque, ũre ju aivūque.

³³ Ũbenita mūjare máre coyūivū die. Mūja nomicurivū, mūja coapa jecujarā mūjemarepacore. Aru mūja ũmūcurivū, mūja coapa pueđajarā mūjemarepacure.

6 ¹ Mūja, juedova, ju ajarā me mūjebucūvare ne coyūiyede mūjare, mūje ju aiyere boje Jesucristore. ²⁻³ Nópe đaiye jauvū mūjare. Nopedeca đaicōjenejaquemavū Jūmenijicu ũi coyūiye báquede Moisés bácare iye caipūcarūguape paiye đaicōjeiye pūeno me bajure. Jūmenijicu ũi coyūiye báquede yo đaicōjeinore, “Yópe mearo đacacūyūtu yū”, arejaquemavū máre: “Mipacure aru mipacore máre urī ju ajarā. Que đaiivū baru, me curājáramu obediūjua ijárvūi”, arī coyūrejaquemavū Jūmenijicu.

⁴ Mūja, nébucūva, jorojīne đabejarā mūjemarare. Quénora buejarā náre aru majicajarā náre aipe đaiye jauřōre, ne torojure đarājīyere aivū Jūmenijicure ne đaiyeque.

⁵ Mūja, memecaivū, ju ajarā me mūje jabova ijárvūcavūre ne coyūiyede mūjare. Mūjamu náre memecaivū. Que baru pueđajarā náre me. Mūjovabevūva memecajarā náre yópe mūje Cristore memecajūorepe. ⁶ Cainumua ju ajarā náre me mūje ũmeque. Ju aivū ámejara náre quénora ne jáiyede mūjare, “Mearo đaiivūbu” ne arājīyere aivū mūjare. Yópe Jūmenijicūi urōpe memecajarā mūja, mūje memecaiye boje Cristore. ⁷ Torojurivū memecajarā mūja. Yópe mūje pōevare memecajūorepe ánevū. Quénora yópe maje jabocu

Cristore mŷje memecajuroepe đajarā mŷja. ⁸Coreóvajarā me maje jabocu Jesucristovacari bojedacuyure caivu pōevare náre coapa yebacavure aru memecaivure máre, ne mearo đaiye báque boje.

⁹Mŷja, ne jabova, quédeca mŷjare memecaivu ne đaiyepe me, mŷja máre đajarā me. Cainŷmŷa “Bojedabequijivu mŷjare”, abejarā náre. Coreóvajarā mŷja me űnai cavarō mearocacu caivu mŷje jabocure. Mŷjare memecaivure aru mŷjare máre, cūinácŷrabe űnai mŷje jabocu. Űtame jáñŷ caivu pōevare cūináturu. Que baru caivu náre coapa bojedacuyume me yópe ne đaiye báquepe.

Jesúre ju aipōeva ne maucŷvarō abujuvai jabocure

(Ro 13.12-14; Col 4.2-4; 1 Ts 5.8; He 4.12)

¹⁰Caride bŷojaivu yu iye ji toivaicōjeiyede apesure mŷjare. Parŷre đajarā mŷja mŷje űmei, mŷje cue boje Jesucristoque cūinávure űni parŷé pŷeno ŷrarō bajuque. ¹¹Cainŷmŷa meateivu bájara mŷja, maucŷvarājivu copŷ ina āmenaque ijāravŷi. Yópe Romacacu churara űni doiyepes meatecŷyŷ űni bajure, meatejarā mŷja iye Jŷmenijicui jíye báquei mŷje űmene űni meadaiyeque. Que teni abujuvai jabocu ye vainí tŷyŷ bŷojabecube mŷjare űni jujovaiyeque. ¹²Pōevare copŷ maucŷvarivŷ āmevŷ maja. Quépora ijāravŷcavŷ abujuvare copŷ maucŷvarivŷbu maja. Ina cōjeivŷ, ina parŷrivŷ, aru ina jabova máre, nárecabu ijāravŷcavure jaboteivŷ. Ijāravŷ āmejāravŷ űnamipe paijāravŷbu, ina abujuva ne jaboteiye boje yore. ¹³Que baru iye Jŷmenijicui jíye báquei majare, maje meatenajiyepes ayŷ maje űmene, ĩni cŷvajarā mŷja. Diede cŷvarivŷ cainŷmŷa abujuvai jujovaiyurinumŷre náre copŷ maucŷvarivŷ bŷojarājaramu mŷja. Vainí tŷbenajarama mŷjare. Aru maucŷvarĩburu yóboi, cŷrājaramu mŷja ijāravŷi parŷrivŷ mŷje űmei.

¹⁴Que baru cainŷmŷa meateivŷ bájara, maucŷvarājivŷ. Yópe űnai churara űni

bŷoiyepes űni jārĩcĩcāvare, nopedeca bŷojarā mŷje bajure Jŷmenijicui yávaiyede javene mŷje majiéque. Yópe űnai churarai taoiyepes űni bajure jājaricajes doicajeques, nopedeca taojarā mŷje bajure mŷje mearo đaiyeque. ¹⁵Yópe curaidoare űni doiyepes tutué nŷcŷyŷ, aru nurié cŷcŷyŷ máre, nopedeca tutué nŷjara mŷje űmei aru nurié coyŷjarā Jŷmenijicui yávaiye méne, cārĩjimenoque cŷre đaiyedes pōevares űique. ¹⁶Yópe űnai churara űni jēiyepes űni taovares ēomesŷyŷ űni mauvai tāvŷya uruiyoares, nopedeca cainŷmŷa jējara mŷja mŷje Cristore ju aiyedes, abujuvai jabocu āmecŷu baju űni āmedabequiyepes aivŷ mŷjares űni jujovaiyueques. ¹⁷Yópe űnai churara űni cŷvares moibo jājaribores taocŷyŷ űni jipobŷre, nopedeca cŷvajarā mŷja Jŷmenijicui meadaiyedes űni jíyes báquedes mŷjares bojecubedes, mŷje meatenajiyepes aivŷ mŷje dāpiaiyedes. Aru yópe űnai churara űni vainí tŷiyepes űni mavares jarŷvarĩ űni boicaroveques, nopedeca vainí tŷjarā mŷja ina mŷje űmene copŷ maucŷvarivŷre Jŷmenijicui yávaiyeques, űnai Espĩritu Santoi jíyeques mŷjares.

¹⁸Cainŷmŷa dajocabejarā mŷje coyuiyedes Jŷmenijicupes. Caiyepes mŷjedes coyŷjarā ŷre űnai Espĩritu Santoi cadateiyepes. Torojŷedes jíjarā ŷre űni mearo đacaiyepes bojes majares. Aru jēniajara Jŷmenijicupes caiyepes mŷjares jauédes. Űetubevŷva me dāpijarā mŷje coyuiyedes Jŷmenijicupes. Jēniare űjara caivŷ Jŷmenijicui pōevares bojes dajocabevŷva. ¹⁹Aru mŷje coyuiyedes jēniajara Jŷmenijicupes yŷre máre. Jēniajara űni majides đaquiyepes aivŷ yŷre aipe yávaiyepes jauŷrōres yŷre pōevaque, ne jápiarĩ coreóvarājiyepes ayŷ Jŷmenijicui yávaiyepes méne ne jápiabes báquedes cārejas. Jēniajara ji buequiyepes aivŷ diedes jidubecŷva. ²⁰Ji coyuiyepes báques bojes iye yávaiyepes méne Cristoi borores, āmeina teivŷre jēni jacoiñami jívŷi cŷvŷ yŷ tāvŷmeaque carides. Cristoi daroimŷmu yŷ, coyŷcacŷyŷ űni yávaiyepes méne ārōi ji cŷrōi. Jēniajara Jŷmenijicupes, űni

yávayn bnojare ðaquiyere aivn yure,
ji coynquiyere aivn diede jidabecvna
caivn ne járiaiyede yópe yure jauére.

Pablo ñi meaicōjeino Éfesocavure
(Hch 20.4; Col 4.7-8; 2 Ti 4.12)

²¹ Caiye iye vaiyede yure ñai
Tíquico coynsuyume majare. Úrecabe
majecn, maje unu, aru maje jabocu
Jesucristore memecayn yúque
ðajocabecvna. Múje coreóvarājiyere
ayn ji borore, coynsuyume aipe
sucure, ðayure máre. ²² Darocnyumu

úre yo paperayocaque múje yebai, ñi
coynquiyere ayn aipe vaiyede ñujare,
ñi torojure ðaquiyere ayn mujare múje
úmei.

²³ Majepacu Jūmenijicu, maje
jabocu Jesucristomaque, cure ðajacurí
caivn majevn Jesucristore jn aivure
cārijimevna. Úre ðajacurí caivn
majare maje bajumia, maje jn aiye boje
úre. ²⁴ Mearo ðacajacurí caivn maja
urivn maje jabocu Jesucristore maje
ne cūiméque, ñi mearo ðacaiye boje
pōevare bojescubeda. Quénoramu.

Filipenses

Mamabuinore coyuiyebu Pablo bácu ùi toivaicõjeiye báquede paperayocare Filipos ãmicuriiमारocavũ Jesúre ju aipõevare. Pablo bácu judíovacacu bácvacari, Jesús ùi yávaiye méne beorí coyucõjeimu marejaquémavu, coyucuyũ ùi yávaiye méne judíova ãnevure, judíova ne ju abe boje ùi coyuiyede. Lucas bácu coyurejaquemavu Pablo bácu borore Hch 7:57-8:1, 9:1-31, 13:1-28:31, aru ùi cuede Filipos ãmicuriiमारoi Hch 16:11-40, 20:1-6. Pablo bácu toivaicõjeneaquemavu iyoca paperayocare ùi cuede ãmeina teivure jēni jacoĩnami. Apevu ne dápiayepe, toivaicõjeneaquemavu diyocare ãniũju bácarõre 55 d.C., ùi cuede ãmeina teivure jēni jacoĩnami Éfeso ãmicuriiमारoi. Ūbenita apevu ne dápiayepe, toivaicõjeneaquemavu diyocare ãniũjua báquede 60-63 d.C., ùi cuede ãmeina teivure jēni jacoĩnami Roma ãmicuriiमारoi. Que baru javede Pablo bácu teivure toivacaipõecu bácu teivure toivaicõjeneaquemavu pucayoca ùi paperayocare Tesalónica ãmicuriiमारocavũre, aru pucayoca ùi paperayocare Corinto ãmicuriiमारocavũre, aru ùi paperayocare Galacia ãmicurijoborõcavũre. Aru apevu ne dápiayepe, javede toivaicõjeneaquemavu ùi paperayocare Roma ãmicuriiमारocavũre, aru Éfeso ãmicuriiमारocavũre, Colosas ãmicuriiमारocavũre, aru Filemón mácu máre. Pablo bácu coyurejaquemavu ùre toivacaipõecu bácu aipe ùi toivacaquie báquede diyocare.

Diyocaque Pablo bácu torojuede jídejaquemavu ina Filipos ãmicuriiमारocavũ Jesúre ju aipõevare ne daroiye báquede táuturare ùre (2:25, 4:14-19). Pablo bácu jabova ne buoimnvacari torojurejaquemavu (1:12-26, 2:17-18, 3:20-4:1, 4:10-13). Aru diyocaque jáðovarejaquemavu Jesúre ju aipõeva torojurivure ye baju ãmevu ne cuede, ne cuede méne o ãmene máre ijãravũ, yópe Jesucristoi ðaiye báquede (2:5-11). Coyurejaquemavu Timoteo bácu borore (2:19-24), aru Epafrodito bácu borore (2:25-30), ùi baju ùi ðaiyede (1:3-8, 12-26, 3:4b-14), aru aipe ðaiye jaurõre Jesúre ju aipõevare (1:9-11, 27-2:4, 2:12-16, 3:1-4a, 4:2-9).

Pablo ùi meaicõjeino Filipocavũre (Hch 16.12)

1 ¹Yũ, Pablo, aru ñai Timoteo máre Jesucristore memecaivũ, meaicõjeivubu mujare, Filipos ãmicuriiमारocavũ Jũmenijicũi põevare, Jesucristore ju aivure. Yũ toivaicõjeivũ aperecu iyoca paperayocare mujare, Jesúre ju aivure coreipõevare, aru náre cadateipõevare máre, aru caivũ muja Jũmenijicũi põeva curivure Jesucristoque cüinávũpe. ²Majepacu Jũmenijicũ, maje jabocu Jesucristomaque, mearo ðacajacurĩ mujare bojecubeda ùi me boje. Aru torojurĩ cure ðajacurĩ mujare cãrijimevũva.

Pablo ùi jēniaino Jũmenijicũque Jesúre ju aipõevare

³Cainũmua ji ãruéne mujare, torojuede jívu yũ Jũmenijicũre, ji jabocure aru ji mearore jímvure, mujare boje. ⁴Aru cainũmua ji jēniacaiyede Jũmenijicũque caivũ mujare boje, torojũvu yũ ji ũmei. ⁵Yũ torojurĩ jívu torojuede Jũmenijicũre, muje cadateiye boje yũre ji coyuiyede Jesús ùi yávaiye méne muje mamarũmũ Jesúre ju aijãravũ bácarõmiareca pũ caride máre. ⁶Dijãravũ, muje mamarũmũ ju aijãravũ bácarõi, Jũmenijicũ mearo ðacarĩ búrejaquemavu mujare. Aru coreóvaivũ yũ mearo ðacare nucũyũre mujare pũ Jesucristoi copaidaquijãravũ baquinõita. Dijãravũ baquinõre muja

meara márajivubu yópe Jāmenijicui aiyé báquepedeca ūi đaquiyede yópe ūi urópe. ⁷Jāmenijicu ūi meacu baju boje memecare đabi caivu majare Jesucristore. Que baru āravu yu mujare, ji umarare, ji ūmei. Aru ji que ārúé métamu, caivu mija muje cadateiye boje yure. Mija cadateivubu yure caride buoimū cūcure, aru ji jáđovaiyede jāvene Jesús ūi yávaiye méne aru ji ju are đaiyede pōevare diede.

⁸Jāmenijicuvacari majibi jāve ucure caivu mujare uraroreca, yópe Jesucristo ūi ūepedeca mujare.

⁹⁻¹¹Yópe arí, jēniacaivu yu Jāmenijicuque mujare boje: “Ŋujepacu Jāmenijicu, pūeno baju nūre đajacu náre, ju aivure ne ūede ne bajumia, aru ne majiéde mi yávaiyede jāvene, aru ne coreóvaiyede aipe đaiye jauróre náre”. Yópe arí jēniavu, muje beorājiyepe ayu iye pūeno baju mearo đaiye jauróre mujare. Que teni āmeno cūbequiyebu mujaque aru boropatebenajivubu muja Jesucristoi copaidaquijāravu baquinóre, pōeva ne pueđarājiyepe aivu Jāmenijicure aru ne jínajiyepé aivu mearore ūre. Que đarājivubu na, muje mearo đaiye boje. Aru Jesucristorecabe cūinácura no mearo đare đayū mujare.

Pablo “Yácapūravu cūvu ijāravui memecacūyu Cristore” ūi yávaino
(Hch 16.19-40, 28.30; Gá 2.20; Col 3.4)

¹²Muja, jívū, coreóvare đaiyūvu mujare apevu obedivu jápiaivure Jesús ūi yávaiye méne iye vaiye boje yure.

¹³Que baru caivu ina churarava, jabocui cūramine coreivu, aru caivu apevu máre, coreóvaivubu yure jabovai buoimūre, ji memecaiye boje Cristore. ¹⁴Aru obedivu ina majevū Jesús ju aipōeva, ne jáiyede yure buoimūre, parure nuñama ne ju aiyede Jesucristore. Que teni caijāravūa pūeno baju parūrōreca coyūivubu Jesús ūi yávaiye méne jidūbevūva.

¹⁵Apevūcapūravu jorojīñama yure, pōeva ne pueđaiye boje yure, ji coyūiye boje Jesús ūi yávaiye méne. Que baru coyūyama Jesús ūi yávaiye méne pūeno

baju parūrōreca, pōeva ne pueđarājiyepe aivu me náre, yure ne pueđaiye pūeno. Que teni ne jorojīni maucūvaiyue boje yure, coyūivubu Jesús ūi yávaiye méne. Ūbenita apevūcapūravu coyūivubu Jesús ūi yávaiye méne, ne mearo đaiyue boje aru ne cadateiye boje yure. ¹⁶Aru ina coyūivubu Jesús ūi yávaiye méne ne ūe boje yure. Coreóvaivubu na Jāmenijicu cure đayure yure buoimūre, ji coyūquiyepé ayu “Jāvemū” Jesús ūi yávaiye ména. ¹⁷Ūbenita apevu coyūivubu Jesús ūi yávaiye méne, ne jorojīye boje yure ne āmeno dāpiayequé. Coyūbema na meāmeque. Quénora coyūyama meara nūre đarājivū apevu pūeno. Nópe đaiyūvu pūeno baju chíori nājine đaiyūrīduivu yure, ji jápiaiyede ne đaiyede ji buoimū cūede. ¹⁸Ye baju āmevu ne nājine đarīduiyede yure. Quéda meavu ne coyūiye Cristorā. Ye baju āmevu ina coyūipōeva ne coyūino ne dāpiaino mearoque o ne dāpiaino āmenoque. Quédata torojūvu yu ji ūmei, caivu náre ne coyūiye boje Cristorā.

Aru torojure nuquijivū ji ūmei. ¹⁹Yu me majivu jodeñajivure yure āmeina teivure jēni jacoñamine jocarí, muje jēniacaiye boje yure Jāmenijicuque aru Jesucristoi Espírītu Santoi cadateiye boje yure. ²⁰Pare ūvu yu caiye vaiquiyede yópe ji coreiyepe, cūyoje tebecūyu cainūmūa ji đaiyeque. Quénora đaiyūvu yu cainūmūa yópe đaiye jauépe yure. Que baru caride aru cainūmūa jidūbecūva coyūquijivū Cristorā. Que teni pueđaquijivū Cristore caiye ji đaiyeque, pōeva ne majinajiyepé ayu ū pūeno meacu bajure. Que đaquijivū yu arūcu baru o yaiyú baru máre.

²¹Yácapūravu cūvu memecacūyu Cristore ijāravui, pōeva ne mearore jínajiyepé ayu ūre. Aru ji yaiyede pūeno baju meaquiyebu yure, ji cūquiyé boje Cristoque. ²²Ūbenita curí jaroyū baru ijāravui, apevu pōevare ju are đayū buojaquijivū Jesucristore. Que baru ye majibevū yu aipe beoiye jauróre yure. ²³Pūcaūmeamu ji ūme. Pare yaiyūvu yu, cūcūyu Cristoque. Que baru ji

yaidú, pueno mearo baju meajebu yure. ²⁴ Ëbenita pueno baju jaunu mujare ji cwe cãreja ijãravui, cadatecuyu mujare.

²⁵ Que baru yu me majivu aipe ji beoquiyede. Beocuyumu cuscuyu cãreja ijãravui, cadatecuyu caivu mujare, mije ju arãjiyepe ayu pueno baju Jesucristore, aru torojure ðacuyu mujare mije ũmei, pueno baju mije ju aipe boje ũre.

²⁶ Que teni ji cuede mijaque cojedeca pueno baju mearore jinajaramu mija Jesucristore yure boje.

²⁷ Yo cūinãrore ðarí cõmajide nurajino jaunu mujare. Cainumua ðajarã mija yõpe Jesús ũi yãvaiye me ðaicõjeiyepe. Que baru yu nuñu maru o numecu baru mije yebai, jápiacuyumu mije borore mija ju aivure parurõreca iye yãvaiye méne, dajocabevuva diede, cūinãturu mije ũmei aru cūinãro mije urõre máre. Que teni jápiacuyumu mija memevure parurõreca cūinãvure, põeva ne ju arãjiyepe ayu Jesús ũi yãvaiye méne.

²⁸ Cuavaicõjemejara ina maucvarivure mujare. Jidubejarã náre. Que teni mija jáðovarajaramu náre, nácapũravu bíjarãjivure Jũmenijicure jocarí. Ëbenita mujacapũravu jáðovauvubu mije ðaiyeque meaðarãjimarare. Jũmenijicu meadacuyume mujare. ²⁹ Que baru mujarecabu Jũmenijicui mearo ðaimara, mije memecarãjiyepe ayu Jesucristore mije ju aiyede ũre aru no puenoreca mije ñãjiyede máre, ũi yãvaiye méne coyuiye boje. ³⁰ Aru caride mija yupedeca cūinãturu ñãjini memevubu maja, coyurãjivu iye yãvaiye méne. Javede mija jávu ji ñãjiyede. Aru caride máre ji ñãjiyede jápiaivubuya mija.

Cristo, Jũmenijicu baju, ũi põesupe teino aru ũi jaboteino caivure
(Mt 26.39; Jn 1.1-3, 10.18; Col 1.15; He 2.9, 5.8, 12.2)

2 ¹ Jesucristorecabe parure ðayu mujare mije ũmei. Ëi ue boje mujare cãrijimene ðaibi mujare mije ũmei. Ëi Espiritu Santo cubi mijaque mije ũmei. Aru ure ðaibi mujare, mije cadatenajiyepere ayu aru mije cõmaje

ãroje járajiyepe ayu mjevure. ² Que baru parurõreca jeniaivu mujare, mije torojure ðarãjiyepe ayu yure ji ũmei pueno baju, cūinãturu mije dãpiaiyequé, cūinãturu mije ueque mjevure, cūinãturu mije ũmeque, aru cūinãturu mije urõque máre. ³ ðabejarã mije ðaiyede, meara nure ðarãjivu apevu pueno. Aru ðabejarã mije ðaiyede “¿Meara márica apevu pueno?” aivu. Quénora dãpiaibejarã mije baju mearape apevu pueno. Cainumua “Apevu ji pueno mearamu na”, arí dãpijarã. ⁴ Aru vobejarã quénora mije baju pueno meara nuivure. Quénora ðajarã apevure máre, ne meara nurajiyepere aivu pueno baju.

⁵ Dãpijarã mije baju yõpe Jesucristoi dãpiaiyé báquepedeca ũi baju, ðarãjivu yõpe ũi ðaiye báquepedeca.

⁶ Cainumua Jũmenijicu bajurecabe ũi. Ëbenita “Jũmenijicui paruepedeca cuvavu yu”, abedejaquemavu. ⁷ Quénora ũi baju ue boje dajocarejaquemavu iye ũi parueðe, põevare memecacuyu. Que teni põetedejaquemavu põesupe. Cuetedejaquemavu põescu ãrojacu. ⁸ Dãpiabedejaquemavu ũi baju meacupe apevu pueno. Quénora parurejaquemavu ũi baju apevu cãchino. Que teni ju arejaquemavu jípacu Jũmenijicure pu ũi boarí jaruvaicõjeiyeta ũi mauvare ũi baju. Aru cuyoje ðarí, boarí jaruvarejaquemavu ũre, ne pẽvaimu mácure jocsucjaravena. ⁹ Que baru Jũmenijicu epedejaquemavu ũre caivu ne jabocuva. Aru amidorejaquemavu ũre yo amíã mearo bajure caivu ne pueðaiãmia pueno. ¹⁰ Que baru caivu cavarõ mearo Jũmenijicui cãrõcavu, aru caivu ijoborõcavu, aru caivu joborõ jívcavu máre ne jápiaiyede Jesúsí amíãre ñuatutarãjarama, pueðarãjivu ũre. ¹¹ Aru caivu ju aivu, “Jesucristo

maje jabocube”, arí coyrãjarama caivũ ne jápiaiyede. Que teni caivũ mearore jínajarama majeracu Jũmenijicure.

Maje boropatebeno Jũmenijicui jáinoi

¹²Muja, jívu, ji umara, que baru yópe ðajarã. Muje ðarí cõmajiyepi ji cõjeiyede yópe ji bueiye de javede ji cuede mujaque, nopedeca pũeno baju yũre ju arí, ðajarã ji bueiyepe caride, ji cuede joai mujare jocarí. Muja Jũmenijicui meadamaratamu. Que baru pueðajarã Jũmenijicure me. Aru cainũma memene nujara muje ðaiyeque, curãjivu me aru cuvabenajivu pũcaũmea máre. ¹³Jũmenijicurecabe ãrũre ðayu mujare muje ũmei iye mearo ðaiye jauřõre mujare, muje torojurí ðaiyrãjiyepe ayũ mearo ðaiyede. Aru ũrecabe cadateyu iye mearo ðaiye jauřõre yópe ũi urõpe.

¹⁴Caiye muje ðaiyede ðajarã torojurí ãmeina yãvabevũva aru jarabevũva muje baju máre. ¹⁵Que baru boropatebenajaramu muja. Aru muje ãmeno ðaiye cubequiyebu. Aru Jũmenijicui mára, ãmeno cubevũva, barãjãramu muja. Muje cuede ijãravucavu jujovaiũ aru pũeno ãmeno ðaiyu ne jẽneboi, muje cadateiye jauũvũ náre, ne jãrajiiyepe aivũ ne ãmeina teiyede aru muje mearo teiyede yópe abiãcovai cadateiyepe põevare cojiéque, ne jãrajiiyepe aivũ ñamine. ¹⁶Nopedeca muja cadateivũbu ijãravucavũre muje coyuiyede náre iye yãvaiye méne, ne coreõvarãjiyepe aivũ aipe cõvarãjivu jãravũ cũiméjãravũ baquinõre. Muje que ðaru, jáðovarajivũbu ji mememeniduiye báquede muje yebai ji bueiye báquede mujare. Que baru torojucũyũtu yũ ji ũmei mujaque Cristoi copaidaquijãravũ baquinõi, ji coreõvaiye boje ji cõe báque aru ji memecaiye báque máre bojecube ãmene. ¹⁷Jũmenijicu me torojubi muje ju aiyede Cristore. ũi nõpe torojuede coreõvaiyu yũ. Apevu yũre boarí jarũvaiyũma, ji bueiye boje mujare Cristo jiede. ũbenita yũre boarí jarũvarureca, torojucũyũtu yũ.

¹⁸Quédeca muja máre torojujarã muje ũmei. Aru ujarã ji torojuede ji ũmei máre mujaque. Que teni caivũ maja torojurãjaramu maje ũmei cũinãturũ.

Timoteo aru Epafrodito ne curãnuino

Filipoi

(Hch 16.1-3)

¹⁹Maje jabocu Jesús ũi uru, jaroivũvũ yũ Timoteore muje yebai, ũi cadatequiyepi ayũ mujare. Que teniburu yõboi, ũi copaidaquiyede ji yebai cojedeca, torojucũyũtu yũ ji ũmei ji jápiaquiyede muje borore. ²⁰Ñai Timoteo cũinãcurabe cõmaje ãroje dápiayu mujare ji dápiayepedeca. ũrecabe jáve cadateiyũcu mujare. ²¹Caivũ apevu ye dápiabema aipe ðarí cadateni buõjarãjivũre iye memecaiyede Jesucristore ðarãjivũre yópe ũi urõpe. Quénora ne bajumia cadateiyurí ðaðama ne urõpe. ²²Aru mujavacari coreõvaiyũbu jáve cadateyũre iye memecaiyede Jesucristore. ũi ðaiye báquede jáðovaimi memecayũ meacũre. ũ coyũibi Jesús ũi yãvaiye méne yũque, apevu põeva ne jápiarãjiyepe ayũ diede, yópe juẽdocu ũi memeiyepe jípacũque cadateyu ũre. ²³Que baru ũrecabe ji jaroquimũ muje yebai, cũiná ji majiquiyepi ayũ aipe yõcavũ ne jabova ne ðarãjiyede yũque. ²⁴Aru maje jabocu Jesús ũi uru, yũ máre maumena jácũnũiyũvũ muje yebai.

²⁵Ji dápiaru jaroivũre jauũvũ yũre muje yebai majecu Epafroditore, muje daroimũ mácure ji yebai, ũi cadatequiyepi ayũ yũre. ũ memeiimi yũque ñuje memecaiyede Jesucristore, apevu ne maucũvaedeca ñujare. ²⁶ũ jácũnũiyũbi caivũ mujare pare. ũrarõ cãrijimi ũi ũmei ũi jápiarĩburu yõboi muje jápiaiyi báquede ũi borore ijimũre. ²⁷Jãve ijimũ mateáme. Pare ñãjiame pu ũi yainĩduiyeta. ũbenita Jũmenijicu cõmaje ãroje jáquemavũ ũre, quénora ũ matũiyeda ãnevũ, yũre máre. Que baru Jũmenijicu ũmedavaquemavũ ũre, ji chĩomequiyepi ayũ pũeno baju. ²⁸Que baru pũeno baju jaroivũvũ yũ

êre muje yebai, muje torojurãiyepere ayu muje ùmei cojedeca, muje jáiyede êre bediôva, ji chïoye cûiquiyepere ayu. ²⁹Que baru torojurivû copû etajarã êre me, yôpe Jesúre ju aipôeva ne copû etaiye jauépe apevu névure. Puedajará caivû êre paivure. ³⁰Ûrecabe yainíduyû bâcu, ùi memecaiye boje Jesucristore. Jidûbeteame ùi baju yaijuroede, cadatecuyû yure, muje cadateivû buojabe boje yure.

Pôeva ne boropateiye cubeno ne daiyeque

(Hch 8.3, 9.1-2, 22.4, 23.6, 26.5, 9-11; Ro 2.28-29, 6.11-13, 8.29, 11.1; 2 Co 3.18; Gá 4.19, 6.14-15; Col 2.11-13)

3 ¹Muja, jívu, cujarã torojurã maje jabocu Jesucristoque cûinávure. Ûtûbevu toivaicôjeivû yu apecure bediôva cojedeca iye majié jauéde mujare, muje curãjiyepere ayu me Jesucristoque. ²Me jájara ina apevu pôeva ne âmeina jáimarare, aru âmeina ðaivure, aru ùmûva ne baju ne cajede buraicôjeivure máre. Ne cajede buraicôjeiye boje, “¿Jûmenijicûi pôeva márica maja?” arí dápiaríduyama. Que teni nácapûravû napini coreniduivûbu Jûmenijicûi meadaquiyede náre, ne nôpe ðaiye boje. ³Ûbenita majacapûravû jáve Jûmenijicûi pôevatamu. Que baru majarecabu mearore jívu Jûmenijicûre jáve, Espírítu Santoi buojare ðaiye boje majare. Aru majarecabu torojurã curivû Jesucristoque cûinávure. Aru majarecabu “¿Jûmenijicûi meadaquidica majare maje ðaiye boje?” arí dápiabevû.

⁴Ácu pôecûi napini coreni buojaru Jûmenijicûi meadaquiyede êre ùi ðaiye boje, yávacari ùi pûeno napini coreyû buojajebu diede. ⁵Yurecabu ne buraimû mácu ji cajede ocho pajáravûa ji pôeteniburu yóboi, yôpe ne ðaiyepere caivû ùmûva judíovare. Aru yurecabu Israecacu, aru pôeyajubo Benjamín âmicuríyajubocacu. Jipacu aru jipaco máre judíovabu. Judíovai yávaicamuare yávaivû yû. Aru yávacari, fariseo bâcu, ðarí cômajidejacacu Jûmenijicûi

ðaicôjeiyede ùi coyuiye báquede Moisés bâcure yôpe apevu fariseovape. ⁶Ûrarô ji memecaiyuríduiyede Jûmenijicûre, yávacari ñájine ðarejacacu ina Jesúre ju aipôevare. Aru ùrarô ji ðaiyuríduiyede yôpe caiye iye ðaicôjeiyepere meacu bacuyú, pôecu cubedejame âmeina yávarí buojayu yure.

⁷Jipocamia caiye diede corevarí durejacacu bojecûere yure. Ûbenita caride corevayûbu caiye diede ye bojecubede yure, Jesucristoi mearo ðacaiye boje yure. ⁸⁻⁹Aru pûeno bajutamu caijie ji cuvajúroe. Corevayûbu bojecubede yure. Bojecûvû yure caiye pûeno ji coreóvaiye ji jabocu Jesucristore. Que baru dajocavû caiye iye ji ðaiye báquede, aru ji cuvæe báquede, aru ji napini coreiye báquede máre, memecacuyû Cristore. Caiye iye báquede ji coreóvaiyede jarûvaiyepere paiyebu caride, Cristo jicu bacuyáre aru cuvûyure êque cûinávure. Que baru caride yû ðabevû yôpe Jûmenijicûi ðaicôjeiyepere, ùi jáquiyepere aríduyû yure meacupe yôpe ji ðaríduiye báquedepedeca. Quénora caride Jûmenijicûi jáimi yure meacupe, ji ju aiye boje Cristore. Que teni Jûmenijicûrecabe meacu ðayu yure ùi jáinoi ji ju aiyede Cristore.

¹⁰Que baru cûinároratamu ji urô caride. Coreóvayûvû yû Cristore me, coreóvacuyû iye parúede nacovaiye báquede êre yainore jarûvarí, ñájicuyû ùi ñájiye báquedepedeca, aru árojacuyû êre ùi yaiye báquede. ¹¹Que baru napini coreivû yû Jûmenijicûi nacovaiyepere ayu yure máre yainore jarûvarí, ji cuvûiyepere ayu járavû cûiméjâravû baquinóre.

Jûmenijicû ùi pôevare bojedaquino

(1 Co 4.16, 11.1)

¹²Yôpe arí, abevû yû: “Jave buojavû yû caiye iye yure ðaiye jauéde, meacu bacuyú yôpe Jûmenijicûi urôpe”, abevû yû. Javû yure cãreja ji meacu baquiyépe yôpe Jûmenijicûi urôpe. Javede Jesucristo beorí ñejaquemavû yure ù jicûva, ji cuvûiyepere ayu êque

cavarō mearoi meacu baju yópe Jūmenijicui urōpe. Aru cainamua memecaivū yū Jesucristore caiye ji majiéque aru caiye ji paruéque máre, eacuyū ji cūquinore úque cavarō mearo Jūmenijicui curōi. ¹³Muja, jívu, yácarūravū corevabevū jave eayū bácure diede. Que baru cūinároramu ji ñaino: Ārūmevū yū iye ji ñaiye báquede; quénora ārūvū yū iye ji ñaquiye, yūre jaūquiye. ¹⁴Yópe yajūipōescui cúyaiyepe nurié, pū cúyaima turūvaita, pōpedeca yávacari nūñūmu nurié pū buojayuta ji memecaiyede Jesucristore, cūcuyū úque cavarō mearoi jāravū cūiméjāravū baquinóre, yópe Jūmenijicui urōpe ūi cutuiyede ina curājivure Jesucristoque cūinávūpe.

¹⁵Nópe dápaiye jaūvū caivū majare, coreóvaivure aipe maje jū aiye de Jesúre. Que baru cūináturu maje ūme dápiarājarevū maja. Ūbenita apevū mujacavū “Jave meara matūivūbu maja yópe Jūmenijicui urōpe”, ūbenina ne arí dápiaru, Jūmenijicui coreóvare ñacuyūme ne que dápaiye jave āmene. ¹⁶Cūinároramu ji coyūino mujare caride. Maje dápaiye aru maje eaiye máre ñaiye jaūvū majare coapa, yópe iye Jūmenijicui yávaiyede jāvene, maje coreóvaiyepe.

¹⁷Muja, jívu, ñare nūjara yópe ji ñaiyepe. Yóvajarā apevūre ina ñaivure ji ñaiyepedeca. Aru me jájara ina curivure nūje cūepedeca. ¹⁸Obedijāravūa javede yū coyūcacu mujare iye coyūiye, chíore ñaiyede yūre. Aru coyūquijivū caride bedióva cojedeca ji orique, ji urarō chíoiye boje. Obedivū pōeva cuma maucūvarivū iye yávaiye méne Cristoi yaiye báquede jocūcūjaravēna. Ne cūede ijāravūi jádovavūbu, “Ye baju āmevū Cristoi yaino mácarō jocūcūjaravēna”, ne arí dápaiyede. ¹⁹Nárecabu bíjaroimara márajivū Jūmenijicure jocarí. Que ñaimara, nūrajarama na toabo cūiméboi. Nárecabu mearore jíbevū Jūmenijicure. Ūbenita jíyama mearore ne baju urōpe. Que teni ne āiye ne jūmenijicure paiyebu. Cūyoje

tebenama ne āmeina ñaiyede. Quénora, “¿Meara márica maja?” adama ūbenina. Nárecabu dápiabevū cavarō mearo Jūmenijicui curōquede. Quénora dápiadama ijāravūquede. ²⁰Ūbenita majacarpūravū ijāravūcavū āmevū. Quénora cavarō mearo Jūmenijicui curōcavūtamū maja. Que baru torojurí maje ūmei napini coreivūbu, urarō jáiyūrivū majare meadaipōescure, maje jabocū Jesucristore, ūi ñaquiye de ijāravūi cojedeca, cūarō mearo ūi curōre jocarí. ²¹Ūi ñaquiye, oatūvacuyūme maje bajuá parūbejajua yainájibajuare, maje cūvarājiyepe ayū maje bajuá cūiméjajua majare coapa ūi baju cūiméjajupe. Nópe ñacuyūme ūi majié paruéque. Iye ūi majiéque purūcūvabi caiye ijāravūquede aru caivū ijāravūcavūre máre. Que teni caiye vaiquiyebu yópe ūi urōpe.

Torojurarā mūje ūmei mūje cūe boje

Jesucristoque cūinávūpe

(Col 4.2-7; 1 Ts 5.16-18)

4 ¹Muja, jívu, ji ūmara, pare jáiyūvū mujare. Torojurí ārūvū mujare. Mūje jū aiye boje ji bueiye de, yū cūvacuyūmu mearore cavarō mearo Jūmenijicui curōi. Paredeca jū are nūjara Jesús ūi yávaiye méne. Jarūvabejarā diede. Quénora cūjarā cūinávūpe Jesucristoque, yópe mūje cūepe caride.

²Parūrōreca jēniavū ico Evodiare aru ico Síntiquede máre. Ne Jesúre jū aiye boje, curivūbu úque cūinávūpe. Que baru cūináturu dápiarārī na ne ūmei. ³Aru jēniavū mure, ji yóvaimūre, jāve cañateyūre yūre. Cañatejacū ina purarōmiva nomivare, ne cārjijimene ñarājiyepe ayū ne bajure. Nárecabu memevū bācavū paredeca yúque, pōeva ne jū arājiyepe aivū Jesús ūi yávaiye méne. Que baru mi cañateiye jaūvū náre caride. Memedama Clementeque aru apevū Jesucristore memecaivūque máre. Aru ne āmiá cūvū toivaiye curōita, Jūmenijicui paperatucubo, caivū ina jāravū cūiméjāravū baquinóre cūvarivū úque ne āmiáre toivaitucubo jívūi.

⁴Çujarã torojurĩ muje ũmei cainũmua muje cuede maje jabocu Jesucristoque cūinávũpe. Que baru coyũivũ mujare cojedeca: Torojujarã muje ũmei.

⁵Caivũ pōeva coreóvajarãri mujare cadateiyurivure apevũ pōevare. Maje jabocu Jesucristo ñi copaidaquino maquinó joabenotamu. Que baru cadatejarã caivũre. ⁶Aru caiye iye mujare vaiyede, cãrijimejara mũa. Ũbenita caiye iye mujare vaiyede, torojuede jĩni Jũmenijicure, coyujarã ũre mujare jauéde. Aru jėniajara ũre muje jėniaiyede máre.

⁷Que teni mũa curãjaramu me cãrijimevũva Jesucristoque cūinávũpe. Jũmenijicurecabe cãrijimene ðayũ mujare nópe, jári corecũyu muje ũmene aru muje dápiayede máre. Aru yo cãrijimeno Jũmenijicui jíyede ye jápiari eaiyvũ buojabenama na, pōeva ũre ju abevũ.

Dápiajarã mũa mearore

⁸Mũa, jívũ, caride buojaivũ yũ iye ji toivaicójeiyede apecure mujare. Yópe dápiajarã mũa: Arujara caiye iye yávaiyede jávene, aru caiye iye pōeva ne pueðaiyede máre. Ārũjara caiye iye méne, aru caiye iye me Jũmenijicui jáinore máre. Arujara caiye iye pōevare ure ðaiyede. Aru arũjara caiye iye pōeva ne me yávaiyede máre. Dápiajarã caiye iye pũeno baju méne aru caiye iye pōeva ne mearore jíyede máre. ⁹Ðajarã mũa yópe ji coyũiye báquepe mujare, aru yópe ji ðaicójeiye báquepe mujare. Ðajarã yópe muje jápiayie báquepe ji coyũiyede, aru yópe muje jáiye báquepe ji ðaiyede máre. Que ðaru, ñai Jũmenijicũvacari, cãrijimenoque cũre ðayũ majare, cũcũyũme mũaque.

Filipocavũ ne cadateino Pablore

(Hch 17.1; 2 Co 11.9)

¹⁰Pare torojvũvũ yũ ji ũmei ji cuede cūinávũpe maje jabocu Jesucristoque, muje cadateivũ buojaiye boje yure. Mũje coreniburu yóbo joe baju, cadateivũbu yure caride. Coreóvaivũvũ yũ dinũmureca

mũje coreiyede, cadatenajivũvũ yure cojedeca. Ārumetebetevũ mũa yure. Quénora cadateni majibeteavũ mũa.

¹¹Yávacari torojvũvũ ji ũmei, ji majiéde cũvae boje. Que baru ñájimevũ muje cadatebede yure. ¹²Yurecabu coreóvayũvũ cũcũre ji cũvae ureque, aru cũcũre yure jauéque máre. Que baru cainũmua aru ári ji curõi máre torojvũvũ yũ ji ũmei. Yũ ji ãquiyede cũvacũ baru aru ji ãquiyede cũvabecũ baru máre, torojurĩ majivũvũ yũ ji ũmei. Aru pũeno ure ji cũvae baru aru pũeno yure jaué baru máre, torojurĩ majivũvũ yũ ji ũmei.

¹³Cristoi cũe boje yúque cūinávũpe, parũre ðaibi ji ũmei. Que baru caijĩe vaiyede yure, ðaiye majivũvũ yure jauéde yópe ñi urópe. ¹⁴Ũbenita meateavũ muje cadateiyede yure ji ñájiyedeca.

¹⁵Mũa, Filipocavũ, mũjavacari coreóvaivũbu me ji etaiye báquede Macedonia ãmicũrõre jocarĩ, apenoa ĩmaroacavũ Jesũre ju aipōeva cójijivaivũvũ cadatebevũvũ bácvũre yure. Dinũmũi ji buiye báquede bueyvũ Jesũs ñi yávaiye méne mujare, mũa quevũra, Jesũre ju aivũ cójijivaivũvũ Filipoi, javũvũ yure tãtũrũre, bojedarãjivũvũ ji bueiye báquede mujare. Que teni jĩni aru jacopũrĩ máre buavũ mũa maje baju. ¹⁶Ji cũe báquede Tesalónica ãmicũriĩmaroi cūinárũmũ aru apenũmua máre mũa jaroávũvũ yure tãtũrũre, yure jaué boje. ¹⁷Torojvũvũ yũ ji ũmei muje jíyede yure. Ũbenita pũeno baju torojvũvũ yũ ji ũmei, Jũmenijicui me jáiye boje mujare muje yópe ðaiye boje, muje cadateiye boje yure. ¹⁸Jacopũvũvũ yũ caiye muje daroiye báquede yure Erafroditoque. Ũre cũvaede davacũbe yure, muje jíye báquede. Que baru caride pũeno baju cũvavũvũ yũ. Aru ye jaubevũvũ yure. Yure muje jíye báque cojvũvũ Jũmenijicure yópe pōeva ne juaiye mumijuede ne jíye cojuépe ũre. Nopedeca muje jíye báque máre me cojvũvũ ũre. ¹⁹Aru majepacũ Jũmenijicũ, ji memecaimũ, ure cãve cũvabi. Que baru jícvũyũme caiye mujare jauéde, muje ju aiye boje Jesucristore.

²⁰Jínajarevñ maja mearore majepacñ Jñmenijicure cainñmña. Quédecabu.

Pablo ñi meaicōjeino Filipocavñre

²¹Meajarari na, caivñ ina Jñmenijicñi pñeva, ina cñrivñ Jesucristoque cñinávñre. Ina Jesúre ja aipñeva yáque cñrivñ caride meaicōjedama mñjare.

²²Caivñ ina Jñmenijicñi pñeva yócvñ meaicōjedama mñjare. Caivñ pñeno meaicōjedama mñjare ina Jñmenijicñi pñeva ñai jabocñ ijāravñcascñ pñeno bajñ parñcñi cñramicavñ. ²³Maje jabocñ Jesucristo mearo ñacajacñi mñjare bojecñbeda ñi me boje. Quéñoramñ.

Colosenses

Mamabuinore coyũiyebu Pablo b́acu ũi toivaicõjeiye báquede paperayocare Colosas āmicurĩimarocavũ Jesũre ju aipõevare. Pablo b́acu judíovacacu b́acũvacari, Jesũs ũi yávaiye méne beorĩ coyũicõjeimũ marejaquémavũ, coyũcũyũ ũi yávaiye méne judíova ānevũre, judíova ne ju abe boje ũi coyũiyede. Lucas b́acu coyũrejaquemavũ Pablo b́acũ borore Hch 7:57-8:1, 9:1-31, 13:1-28:31. Ŭbenita Pablo b́acu aipiyede nũmecũvacari Colosas āmicurĩimaroi, toivaicõjeiyurejaquemavũ ũre toivacairõescu b́acũre náre, ũi ũe boje náre (2:1-5) aru Épafra b́acũ coyũiyebáque boje Pablo b́acũre Colosacavũ ne borore (1:7-8). Javede toivaicõjeneaquemavũ pũcayoca ũi paperayocare Tesalónica āmicurĩimarocavũre, aru pũcayoca ũi paperayocare Corinto āmicurĩimarocavũre, ũi paperayocare Galacia āmicurĩijoborõcavũre, aru ũi paperayocare Roma āmicurĩimarocavũre máre. Apevũ ne dápiyaiyepe, javede toivaicõjeneaquemavũ ũi paperayocare Filipos āmicurĩimarocavũre. Toivaicõjeneaquemavũ yõbecurĩiyoca ũi paperayocare āniũju b́acarõre 60 d.C., ũi cuede āmeina teivũre jēni jacoĩnami Roma āmicurĩimaroi, cũináyocare Éfeso āmicurĩimarocavũre, apeyocare Colosas āmicurĩimarocavũre, aru apeyocare Filemón mácũre. Tíquico b́acu nãvarejaquemavũ iyoca yõbecurĩiyocare cũináturũ ũi nũiyede Roma āmicurĩimarore pũ Asia āmicurĩijoborõi. Pablo b́acu coyũrejaquemavũ ũre toivacairõescu b́acũre aipe ũi toivacaquiyebáquede diyocare.

Diyocaque Pablo b́acu daicõjeneaquemavũ Jesũre ju aipõevare yõpe náre jauéde ne cũe boje Jesucristoque cũinávũpe (3:1-4:6). Coyũrejaquemavũ náre Cristorã, caiyede cuedayũ b́acũre aru cũre ñayũre máre, que baru paũcũre caivũ pũeno (1:15-23) aru cũinácũra meadaiye majicũre ũre ju aivũre ñabevũva yõpe buaipõeva borocurivũ ne daicõjeniduiyepere (2:6-23).

Pablo ũi meaicõjeino Colosacavũre

1 ¹⁻² Ŭũ, Pablo, aru majescu Timoteo máre ũi ju aiyebõje Jesucristore meaicõjeivũbu mũjare, Colosas āmicurĩimarocavũ Jũmenijicũi põevare. Yábu Jesucristoi yávaiye méne beorĩ coyũicõjeimaracacu. Ŭũ toivaicõjeivũ apescũre iyoca paperayocare mũjare, ñũjevũre, Jesucristore ju aivũre, ũi ũrõpe ñaivũre, aru cũrĩvũre ũique ñajocabevũva cũinávũpe. Majeracũ Jũmenijicũ, mearo ñacajacũrĩ mũjare bojecũbeda ũi me boje. Aru torojũrĩ cũre ñajacũrĩ mũjare cãrijimevũva.

Pablo ũi jēniaino Jũmenijicũque Jesũre ju aipõevare

(Ef 1.7, 6.12; Col 4.12; Flm 23)

³ Torojuede jĩvũbu ñũja Jũmenijicũre, ñai maje jabocũ Jesucristoi paũcũre,

cainũtũna ñũje jēniyaiye coapa Jũmenijicũque mũjare boje. ⁴ Jápiavũbu ñũja mũje ju aiyede Jesucristore aru ũrĩvũre máre caivũ ina Jũmenijicũi põevare. Que baru torojuede jĩvũbu Jũmenijicũre mũjare boje. ⁵ Javede mũja jápiarejaquemavũ iye yávaiyede jávene, Jesũs ũi yávaiye méne. Mũje jápiaiyede diede, jápiarejaquemavũ iye borore Jũmenijicũi mearo ñacaquiyede mũjare cavarõ mearo ũi cũrõi. Mũje napinĩ coreiyebõje iye Jũmenijicũi mearo ñacaquiyede mũjare, mũja ju aivũbu Jesucristore aru ũrĩvũbu caivũ ina Jũmenijicũi põevare. ⁶ Yõpe mũje jápiaiyepere iye Jesũs ũi yávaiye méne, nopedeca obedivũ põeva apenoa joborõcavũ máre jápiañama diede. Que baru caijãrvũva apevũ põeva ju adama diede. Aru pũeno baju mearo ñañama, ne ju aiyebõje diede. Aru quédeca vaidéjaquemavũ mũjare. Mamacũtũre

mujé jápiaiye de iye Jesús ñi yávaiyede jávene p̄ caride máre, coreóvaivubu mujá jáve Jūmenijicu mearo ñacayure bojecubeda, ñi p̄eno meacu baju boje. Que baru caijāravna arev̄n̄ mujacav̄n̄ j̄ adama diede. ⁷Diede bueibi ñuje um̄ Épafras. Ñai Épafrarecabe, memecaȳn̄ Jesucristore ñujaque, coreóvare ñaȳn̄ bácu mujare iye Jūmenijicui mearo ñacaiyede p̄evare bojecubeda. Que teni cađateȳn̄ ñujare memecaibi Jesucristore. ⁸Û coȳibi ñujare aipe ñai Esp̄ritu Santo ure ñaȳure mujare caiv̄n̄ Jūmenijicui p̄evare.

⁹Que baru ñuje jápiaiye boje mujé borore, coȳivubu mujare Jūmenijicūque máre. Ñuje jápiaiye de mujé borore coȳit̄ búcarā mujare Jūmenijicūque. Aru caride máre coȳure ñuivubu mujare Jūmenijicūque. Jēniaivubu é̄que ñi coreóvare ñaiyede mujare jáve caino yo ñi ur̄ore, mujé ñarāj̄iyere aiv̄n̄ yóre ñi ur̄ore. Que baru jēniaivubu Jūmenijicūque, mujé c̄varāj̄iyere aiv̄n̄ majié caiyede aru coreóvaiye méne mujé úmeque. ¹⁰Jēniaivubu diede, mujé ñarāj̄iyere aiv̄n̄ yóre ina Jūmenijicu jina ne ñaiyere, Jūmenijicui toroj̄uquiyere aiv̄n̄ mujaque cain̄m̄na. P̄eno baju jēniaivubu Jūmenijicūque mujé mearo ñarāj̄iyere aiv̄n̄ yóre ñi ur̄ore aru mujé coreóvarāñarāj̄iyere aiv̄n̄ Jūmenijicure p̄eno baju caijāravna. ¹¹Aru p̄eno baju jēniaivubu Jūmenijicūque, ñi par̄ure ñacuiyere aiv̄n̄ mujare mujé úmei ñi majié p̄eno baju par̄éque ñi jáđovaiyede p̄evare, mujé ñarāj̄iyere aiv̄n̄ mujé ñáj̄inaiyede cain̄m̄na toroj̄iv̄n̄ mujé úmei. ¹²Aru p̄eno baju jēniaivubu Jūmenijicūque, mujé toroj̄uede j̄inaiyere aiv̄n̄ majeracu Jūmenijicure, ñi c̄vare ñaiye boje mujare iye mujé c̄varō coapa, ñi mearo ñacuiyede ñi p̄evare cavarō mearo ñi c̄rō miadároi.

**Maje c̄e c̄arj̄imev̄na Jūmenijicūque
Jesúí yaiye báque boje**

(Jn 1.1-3.18; Hch 26.23; Ef 1.22-23,
2.16, 4.15, 6.12; He 1.2-3; Ap 1.5)

¹³Jūmenijicu meadaibi majare ñai abujuvai jabocui jaboteino ñeminore

jocarī. Que baru epeibi majare maje jaboc̄va mamac̄re, ñi um̄re. ¹⁴Ñai mamac̄re bojedare ñaibi majare, ñi jina maraj̄iyépe aȳn̄. Que baru ārumeteibi maje āmeina teiyede. ¹⁵Ñai mamac̄ c̄uinát̄rube j̄iracu Jūmenijicūque. Aru p̄eva j̄ari b̄ojarejaquemav̄n̄ Jesucristore. Ûbenita j̄ari b̄ojabenama Jūmenijicure. Ñai mamac̄ par̄acu caiv̄n̄ p̄eno c̄rejaquemav̄n̄ j̄iracuque caiyede c̄eđacuiyere j̄ipocare. ¹⁶Ûrecabe Jūmenijicui caiyede c̄eđare daim̄ mácu. Ûrecabe c̄eđaȳn̄ bácu caij̄iene cavarō mearo ñi c̄rōquede, aru j̄oborōquede máre, aru caij̄iene maje jáiyede aru maje jámene máre. Que baru c̄eđarejaquemav̄n̄ caiv̄n̄ ina jabovare, aru par̄uc̄variv̄ure, c̄oj̄eiv̄ure, aru par̄uriv̄ure máre cavarō mearo ñi c̄rōcav̄re. Que teni Jūmenijicu é̄re c̄eđare ñarejaquemav̄n̄ caiyede. Aru c̄eđare ñacarejaquemav̄n̄ caiyede é̄re boje, ñai mamac̄ caiv̄n̄ ne mearore j̄im̄ maquiyépe aȳn̄. ¹⁷Cristorecabe caiv̄n̄ ne j̄ipocacac̄n̄. Ûrecabe c̄acu caiyede c̄eđacuiyere j̄ipocare. Aru é̄recabe Jūmenijicui caiyede mautede ñare daim̄, caiye c̄uquiyere aȳn̄ me. ¹⁸Maja é̄re j̄u aiv̄n̄ caiyajuboa p̄eyajubocav̄n̄ ñi bajure paiv̄bu. Aru é̄vacari, maje j̄ipob̄ure páȳn̄, maje jaboc̄ube, majare ñaic̄oj̄eñ̄. Ûrecabe c̄ure ñaȳn̄ jáve caiv̄n̄ ina é̄re j̄u aiv̄n̄ ne bajure aru ne úmene máre, ñi nacajaiye báque boje yainore jar̄varī caiv̄n̄ j̄ipocai, jabotec̄uñ̄ par̄acu caiv̄n̄ arev̄n̄ p̄eno cain̄m̄na.

¹⁹Jūmenijic̄vacari beorejaquemav̄n̄ c̄uc̄ure mamac̄que yóre ñi baju ur̄ore. Que baru Cristorecabe jáđovañ̄ jáve aipe āroj̄ac̄re j̄iracu Jūmenijicure. Aru Jūmenijicure páȳn̄ mat̄uiye coj̄m̄n̄ j̄irac̄re. ²⁰Jūmenijicu c̄arj̄imene ñaȳurejaquemav̄n̄ caiv̄n̄ é̄que. Aru ména c̄ure ñaȳurejaquemav̄n̄ caiyede máre. ñaȳurejaquemav̄n̄ diede mamac̄que, caiv̄n̄ ne mearore j̄im̄ maquiyépe aȳn̄. Que baru mamac̄ni jive meiyé báque boje ñi yaiye báquede j̄oc̄uc̄jaravena, Jūmenijicu

cārijimene ðarejaquemavṅ caivṅre úque, caivṅ ijāravṅcavṅre aru caivṅ cavarō mearocavṅre máre. Aru caiye ijāravṅcavede aru caiye cavarō mearoquede máre ména cṅre ðarejaquemavṅ Jūmenijicṅ.

²¹Aru mṅjacapūravṅ javede āmeina dápiaivṅ barejaquémavṅ aru āmenore ðaivṅ barejaquémavṅ. Que baru Jūmenijicṅre coreóvabevṅva maucṅvarivṅ barejaquémavṅ mṅja. ²²Ḑbenita caride Jūmenijicṅ cārijimene ðarī yóvare ðaibi mṅjare úque. Nópe ðarejaquemavṅ mamacṅi yaiye báquede úi baju. Nópe ðacarejaquemavṅ mṅjare, ðacṅyṅ meara yópe úi ṅrópe, ye āmeno cṅbequino mṅjare, aru pōeva ne boro coyurī adarī bṅojabenajino mṅje borore, úi ecovaquiyede mṅjare úi yebai. ²³Nópe vaiquiyebu mṅje ðaiye boje yópe ðaiye jauépe. Jauvṅ mṅjare mṅje jṅ are nṅiye Jesús úi yávaiye méne, “¿Jāve márica?” arī dápiabevṅva. Aru jauvṅ mṅjare mṅje napini corede nṅiye maje cṅrājīyede Jūmenijicṅque caipṅmṅa yópe mṅje napini coreni buiye báquepe mṅje mamarṅmṅ jápiaiyede iye Jesús úi yávaiye méne. Iye yávaiye méne obedivṅ pōeva cainoa joboróacavṅ jápiaḑama. Aru yávacari, Pablo, Jūmenijicṅre memecayṅ, coyṅvṅbu diede.

Pablo Jesús úi memecaicójeimṅ úre jṅ aipōevare

(Ef 3.2; Ap 3.14-22)

²⁴Caride torojvṅ yṅ jī úmei jī ṅájīyede mṅjare boje. Que teni bṅojaiṅ yṅ jī ṅájīquiyē jauróre yṅre jī baju, caḑatecṅyṅ ina caiyajuboa pōeyajuboaacavṅ Jesúre jṅ aivṅre. Jī ṅájīyebu yópe Cristoi ṅájīye báquepe ina caiyajuboaacavṅ úre jṅ aivṅre boje. Jesucristoi bajupe paivṅbu na. ²⁵Yṅrecabu Jūmenijicṅi epeimṅ, coresṅyṅ aru caḑatecṅyṅ mṅjare. Que baru memecayṅrecabu ina caiyajuboa pōeyajuboaacavṅ Jesúre jṅ aivṅre, coreóvare ðacṅyṅ mṅjare caiye iye Jūmenijicṅi yávaiye méne. ²⁶Javede Jūmenijicṅi jáðovamenejaquemavṅ iye

yávaiye méne, caivṅ ina pōeva javecavṅ bácvṅ ne majibenajiyere ayṅ. Ḑbenita caride jáðovaimi diede úi pōevare, ne majinajiyere ayṅ. ²⁷Jūmenijicṅi úbi mṅje majinajiyere ayṅ mṅja judíoṅva āmevṅ úi pṅeno baju mearo ðacaimara márajivṅre ṅrarō úi pṅeno baju mearo ðaiyeque. Que baru jáðovaimi diede. Iyebu yávaiye jáðovame máque pōevare jipocamia: Cristo cṅbi cūinávṅpe mṅjaque. Que baru torojṅrī maje úmei napini coreivṅbu maja yo mearo maje cṅvarājīnore cavarō mearo Jūmenijicṅi cṅrōi.

²⁸Que baru ṅṅja coyṅivṅbu Cristoi borore caivṅre. Coyṅivṅbu caivṅre parṅróreca aipe ðaiye jauróre náre. Aru caivṅre majicaivṅbu úi majiéque. Nópe ðacavṅbu ṅṅja caivṅ cṅrivṅre Jesucristoque cūinávṅpe, ne cṅrājīyere aivṅ meara baju jaubeda yópe Jūmenijicṅi ṅróre, ṅṅje eare ðarājīyere aivṅ náre Jūmenijicṅi yebai. ²⁹Que baru yṅ pṅeno baju memeiṅmṅ pṅ ṅetṅyṅvacari. Que ðare ðaibi yṅre Cristo úi majié paruéque.

2 ¹Coreóvare ðaiyṅvṅ mṅjare pṅeno baju jī memeyede pṅ ṅetṅyṅvacari, caḑatecṅyṅ mṅjare aru ina Jesúre jṅ aivṅ Laodicea āmicṅrīmarocavṅre, aru arevṅ Jesúre jṅ aivṅre máre, yṅre jámevṅ bácvṅre. ²Yópe memeiṅvṅ, parṅre ðacṅyṅ caivṅ mṅjare mṅje úmei, mṅje cṅe boje cūinávṅpe mṅje ṅede mṅje bajumia. Aru yópe memeiṅvṅ, mṅje járiarī coreóvarājīyere ayṅ jāve caiye iye Jūmenijicṅi majiéde úi meadaiyede mṅjare. Que teni jāve coreóvarājaramu mṅja Cristoi borore. Ḑrecabe Jūmenijicṅi jáðovamemṅ mácvṅ cāreja javede. ³Cristo cūinávṅrabe majicṅ pṅeno baju caiye iye pōeva ne majibede aru ne coreóvabede máre. Majibi caiyede. Aru úi majiébu pṅeno baju me, yópe pṅescṅi bojescṅede yaveiyere paiye. ⁴Caiye diede toivaicójeivṅ apescṅre mṅjare, arevṅ ne jṅjovabenajiyere ayṅ mṅjare borocṅeque. ⁵Jī cuedeca joai mṅjare jocarī āṅvṅ yṅ mṅjare caipṅmṅa. Coreóvaivṅ yṅ mṅjare

curivare Jesucristoque cūinávure aru ju aivure úre parurõeca. Que baru torojvnu yu ji úmei.

Arúe mamae jauřõ majare, Jesúre ju aipõevare

(Ro 6.4; Gá 4.3, 9; Ef 2.1-5, 15)

⁶Muje ju aye báque boje iye maje jabocu Jesucristoi yávaiyede, ðajarã mja cainmua yópe ne ðaiye jauřõpe ina curivã Jesucristoque cūinávure. ⁷Que teni ju are nujara Jesucristore, aru ðare nujara yópe ñje bueiyepe mujare úi yávaiye méne mamarumure. Caijãravna pueno baju ðare nujara yópe úi urõpe. Aru, “Jesucristoi yávaiye me jãvetamu”, are nujara. Nopedeca buedejaquemavũ mujare mamarumure. Aru pare torojvede jíde nujara majepacu Jūmenijicure cainmua.

⁸Me jãjara mja. Mje bajumia apenvre jujoivaicõjemejara ne bueiye bojecubeque aru borocueque máre, ne ðabenajiyere aivũ mujare ne buemarare. Iye ne bueiye pøeva nēnecuva mácvũ ne ðarĩ cõmajiyebu. Iye ne bueiye pøeva ne majiébu. Aru iye ne bueyedecabu Cristoi yávaiyede, “Jãve ãmevũ” aiyey. Que baru jãve ãmevũ aru bojecubevũ iye ne bueiye.

⁹Jūmenijicũvacari cūbi Cristoque. Úi bajurecabe ári Jūmenijicu cūcũ jãðovañũ jãve aipe ãrojacure. Que baru maje jãiyede Cristore, majivũ aipe ãrojacu bajure Jūmenijicure. ¹⁰Jūmenijicu jãve cure ðaibi mujare mje úmei, mje cūcũ cūinávure Cristoque, ñai jaboteyũ caivũ jabovare aru cõjeivure máre. Que baru ye jaubevũ mujare mje úmei.

¹¹Yópe ãmva ne buraicõjeiyere ne cajede, ãurajivũ ne baju Jūmenijicu jinava, nopedeca Cristo ðaibi mujare Jūmenijicu jinare, mje cūcũ boje úque cūinávure. Úbenita ú burarĩ ñni jaruvabebi mje cajede. Quénora ðaiyubede ðaibi mujare ãmeina teiyede, mje ãmeina teiye ðaiyue cõjeimara ãmenajiyere ayũ.

¹²Muje jãðovaiye báquede Jūmenijicure ocoque yaivũ bácvure

tedejaquemavũ mja Cristoque, aru ne pøe jaruvainoi epeiye báquepe mujare úque, aru Jūmenijicũ nacovaiye báquepe mujare úque máre yainore jaruvarĩ. Que ðacarejaquemavũ Jūmenijicu mujare úi majié parúeque mje ju aiyede úre, “Jãve Jūmenijicu nacovarejaquemavũ Cristore yainore jaruvarĩ”, mje aiyede. ¹³Mja yaivũ bácvure mje úme coatede ðaimara marejaquémavũ Jūmenijicure jaruvarĩ, mje vaini tuiye boje aru mje ðaicõjeiye boje mje ãmeina ðaiyueque. Dinumure Cristo epebedejaquemavũ mujare cãreja Jūmenijicu jinava.

Úbenita caride Jūmenijicu apure ðaibi mujare arúe mamaeque Cristoque. Que teni ãrumeteibi caiye maje ãmeina teiyede. ¹⁴Jūmenijicũ toivaicõjeiye báque boje úi ðaicõjeiyede, ðaiye jaurejaquemavũ majare. Úbenita maje ðabe boje diede, bojecube ðaiye curvarejaquemavũ Jūmenijicue. Mja ðabevũ bácvureca iye ðaicõjeiyede, ye boropateivure jãmenoraquemavũ majare Jūmenijicu. Quénora Cristoi yaive báqueque jocucjaravena jaruvarejaquemavũ maje bojecube ðaiye báquede úre. ¹⁵Que ðayũ Jūmenijicu pueno baju vaini turejaquemavũ caivũ ina jabovare aru cõjeivure úi cãchinoi. Náre cõyoje tede ðarĩ, jãðovaimi parucure caivũ apenvũ pueno Cristo úi ðaiyeque. Que ðaibi Jūmenijicu caivũ pøeva ne jãiyede.

Ijãravuque buobevũ Jesúre ju aipõeva

(Mt 15.9, 22.44; Ro 6.4-11, 14.1-6; Gá 2.19-20; Ef 1.22, 4.15-16; Fil 1.21; Col 2.21; He 1.3)

¹⁶Que baru jãpiarĩ adabejarã mja ácu pøecu ãmeina yávayure mujare, mje ãiye boje aru mje úcuiye boje máre, aru mje torojvne tebe boje úpe úi torojvne teijãravure caijua coapa, caivũ aviáva coapa, aru sãbadore máre caisumana coapa. ¹⁷Iye javeque ðaicõjeiyeque ãiyeda coyuiyede, aru torojvne teiyeda coyuiyede, aru apejiena coyuiyede máre Jūmenijicu epebedejaquemavũ, buescyũ

ñujare. Iye ðaicõjeiyeque Jñmenijicũ jãðovañũ marejaquémavũ aipe ùi ðaquiyede yóbore. Cristo cõcuyũã máre jãðovañũ marejaquémavũ ù. “Yópe ùre vaiquíeyebu”, arí jãðovañũ marejaquémavũ. Que baridurejaquemavũ iye ðaicõjeiye. ¹⁸ Aru jápiarí adabejarã mũa ácu põescu ãmeina yávyure mujare, mujere mearore jíye boje Jñmenijicure ùre ãmevũ. Que teni apescu ùi cãchinocavũpe tebejarã mũa. Aru mearore jíbejarã ángelevare máre, yópe ùi ðaiyere. Ùrecabe ariduyũ ùbenina “Jãvemũ jí coyuiye, jí jáiye báque boje apõcu yópe decoboainope”. Ùbenita jámemi iyede, ùi coyuiye borore. Aru, “¿Meacu bárica apenvũ pũeno?” ùbenina aríduibi. Nópe aríduibi ùi ðaicõjeiye boje ùi dápiainore ùi ãmeina ðaiyueque. ¹⁹ Ùrecabe ðajocayũ bácu ùi cuede Cristoque cüinávũpe. Que baru majibebi iye bueiye jávene Cristo borore. Cristo maje jabocube. Que baru ðaicõjeimi caivũ ina caiyajuboa põeyajubocavũ ùre jú aivũre, ne pũeno baju ðare nũrajíyere ayũ yópe Jñmenijicũ ãrõpe. Que baru caijãravũ pũeno baju majide nũñama na, ùre jú aivũ caivũ, me cũrãjivũ ne ùmei yópe Jñmenijicũ ãrõpe.

²⁰⁻²¹ Mujere cõcye boje Cristoque cüinávũpe, yaivũ bãcavũpe paivũbu ùque. Aru jaubevũ ina yaivũ bãcavũre ne jú aiyede ðaicõjeiyede. Que baru jaubevũ mujere mujere jú aiyede iye ðaicõjeiyede põeva ne majiéque coyuiyede. Que barureca apenvũre ðaicõjeiye jaubevũ mujere. Jaubevũ mujere cãreja mujere jú aiyede põeva ne ðaicõjeiyede, yópe ne aiyede: “Jẽmejara apejĩene. Aru ãmejara apejĩene. Aru tũobejarã apejĩene máre”, ne aiyede. ²² Quénora iye ijãravũque cüiquiyede coyuyama põeva ne ðaicõjeiyede coyuiyeque. Aru diedecabu põevavacari ne ðaicõjeiye aru ne bueiye máre. ²³ Põeva iye ðaicõjeiyede ðaivũ Jñmenijicure pueðaivũpe árojariduvũbu. Aru jáðovariduvũbu ne baju apenvũ ne cãchinocavũre. Nájine ðarí ne bajure,

Jñmenijicure pueðaivũpe teniduvũbu na. Iye ne ðaiyede yópe ne ðaicõjeiyepe majidivũpe teniduvũbu. Ùbenita iye ðaicõjeiyede ðaivũvacari, ye ðajocabema ne baju ãmeina ðaiyede. Que baru iye ðaicõjeiye ne cãvae bojescubevũ náre.

3 ¹ Mũjarecabu yópe Jñmenijicũ nacovaimara mácavũpe Cristoque yainore jarũvarí. Que baru Cristo jinatamu mũa. Que baru mujere ãmeina teiyede mujere javeque ðaiyede ðajocarí, oatuvadavũ mũa, mearo ðarãjivũ. Oatuvaimara mácavũ mũa, cainũmũã ãre nũjara yo cavarõ mearo Jñmenijicũ cũrõcarõre. No cavarõ mearotamu Cristo ùi cũrõ, dobacu ùi dobarõ mearo Jñmenijicũ mearpũravũ yebai, ùi parúe cãvae boje.

²⁻³ Caride mũa ðabevũ yópe mujere ðaiye báquepe, mujere yaivũ bãcavũpe paíye boje Cristoque. Que baru coatede ðaimaratamu mũa mujere cõcye báquede jarũvarí. Quénora cũrivũbu mũa mujere ùmei Cristoque cüinávũpe Jñmenijicũ jáinore. Ùbenita apenvũ põeva jámema cãreja iye mujere jáve cuede Cristoque. Quénora Jñmenijicũ yaveimarapebu mũa caride. Que baru cainũmũã dápiare nũjara yo cavarõ mearo Jñmenijicũ cũrõcarõre. Dápiabejarã iye ãmene ijãravũquede ijãravũcavũ ne ðaiyede. ⁴ Cristorecabe jáve cõcye ðayũ mujere mujere ùmei. Ùi copaidaquiyede ijãravũ cojedeca caivũ ne jáiyede, mũa máre cũrãjaramu ùque. Dinũmũ maquinóre meara marajáramu mũa ye jaubeda yópe Jñmenijicũ ãrõpe.

Aipe ðaiye jarũ Jesúre jú aipõevare
(Ef 2.3, 10, 4.2, 22, 24, 32, 5.19-20)

⁵ Coatejarã mujere baju mujere ãmeina ðaiyede jarũvarí. ãmeina ðabejarã apenvũque mujemarebucãva ãmevũque, aru ãmeina ðabejarã ùmũva nomivaque aru nomiva ùmũvaque máre. Caiye iye ãmene ðaiyũbejarã mũa. Mujere baju ãmeina ðaiyere ðabejarã mũa. Ùbejarã pũeno baju mujere cãvae. Que ðaivũ baru, ðajebu mujere cãvae yópe jñmenijinape. ⁶ Aru Jñmenijicũ

jorojīni jári ina úre jápiabevure, nájine ðacuyume náre, ámene ne ðaiye boje. ⁷Muja máre javede ámenore ðarejaquemavũ napedeca muje jápiabede cáreja Jūmenijicure. ⁸Ūbenita caride mujacapuravu ðajocajarā caiye ámene. Que baru jarabejarā apévure. Aru jorojīmejara náre máre. Ámeina dápiabejarā apévure. Aru coyubejarā ámenore caivũ ne járiaiyede apévũ borore. Ámeina yávabejarā apévure ne járiaiyede máre. ⁹Que baru borodabejarā muje bajumia. Muja aipe árojarivũ bávavure muje ámeina ðaiyueque aru muje ðare nuiye báquede ámenore ðajocadavũ muja.

¹⁰Caride mearape árojarivũbu muja. Aru caijāravua Jūmenijicu p̄eno baju meara n̄re ðaibi mujare, muje árojarajiyere ayũ úre, ñai mujare cuedayũ bávure mamaúmeque, muje coreóvarájiyere ayũ úre jáve. ¹¹Que baru caride ye baju ámevũ p̄ocũ judío o judío ámecũ, aru buraiçõjeñũ ùi cajede o buraiçõjemecũ diede, aru yávayũ griego ámicricamua yávaicamuare o yávabecũ diede, aru ímarocacũ o ũbeni curijicũ, aru apescũ yebacacũ o apescũ yebacacũ ámecũ máre. Quénora Cristorecabe cūinácura parucũ caivũ apenvũ p̄eno cainũmua. Aru caivũ ùi jinaque cubi ùi.

¹²Muja Jūmenijicu ùi beoimaramu, ùi jinatamu, aru ùi ũmaramu máre. Que baru yópe paivũ bájara muja. Cōmaje ároje jájara mujevure. Aru caðatejarā náre. Dápiabejarā muje baju mearape apenvũ p̄eno. Puedajarā mujevure meara p̄evare. Aru napijara náre. ¹³Jarabejarā muje bajumia. Aru apescũ mujescũ ùi ámeina yávaru o ámeina ðaru mujare, árumetejarā ùi ámeina ðaiyede. Yópe maje jabocũ Jesucristo ùi árumeteiye báquere muje ámeina teiyede, muja máre árumetejarā mujevũ ne ámeina teiyede. ¹⁴Aru paruébu caiye die p̄eno muje ũe muje baju. Muje ũede apévure, curájaramu cūinávure yópe Jūmenijicũ urópe. Que baru újarā apévure.

¹⁵Cristo cārijimene ðaibi mujare. Aru Jūmenijicu caturĩ epeibi mujare, muje

curájiyere ayũ cūinávure cārijimevũva. Que baru cārijimena cure mujara muja. Aru cainũmua torojuede jíde mujara Jūmenijicure. ¹⁶Coreóvare mujara caiye iye yávaiye méne Cristoi borore. Yópe ðajarā muje bueiye de aru muje coyuiyede paruróreca mujevure máre ũre majiéque. Majicajarā aru coyujarā paruróreca Salmos ámicueque, aru mearore jíjarā Jūmenijicure yurriainoque, aru ùi Espiritu jino yurriainoque máre. Que teni yurriajarā Jūmenijicure, torojuede jínajivũ úre muje úmeque.

¹⁷Que baru caiye muje coyuiyede aru caiye muje ðaiyede máre, ðajarā yópe ina Jesucristore jũ aivure jauépe, ina jēniaivũ ùi paruéque. Aru cainũmua Cristoi caðateiyeque torojuede jíjarā majepacũ Jūmenijicure.

Mearo ðaiye jauřõ curamicavũque aru memevũque máre

(Ef 5.16, 22, 25, 6.1, 4-9, 18-20; Fil 4.6; 1 P 3.1, 7)

¹⁸Muja, ũmcurivũ, jũ ajarā mujemarepacure ùi coyuiyede mujare. Jũ aiyे jauvũ mujare úre, muje c̄e boje maje jabocũ Cristoque cūinávure. ¹⁹Muja, nomicurivũ, jecujarā mujemarepacore. Jarabejarā óre.

²⁰Muja, jueðova, cainũmua jũ ajarā me mujebucavare ne coyuiyede mujare. Jūmenijicu torojurĩ jáimi muje jũ aiyede náre. ²¹Muja, nébucvua, jorojīne ðabejarā mujemare, ne chīomenajiyere aivũ.

²²Muja, memecaivũ, cainũmua jũ ajarā me muje jabova ijāravucavure ne coyuiyede mujare. Cainũmua jũ ajarā náre me muje úmeque. Jũ aivũ ámejara náre quénora ne jáiyede mujare, “Mearo ðaivũbu” ne arájiyere aivũ mujare. Jũ ajarā náre, muje pueðaiye boje maje jabocũ Cristore. ²³Torojurivũ memecajarā muja.

Yópe muje p̄evare memecajuroepe ámevũ. Quénora yópe maje jabocũ Cristore muje memecajuroepe ðajarā muja. ²⁴Cristorecabe muje jabocũ jáve. Úrecabe muje memecaivũ jáve.

Que baru coreóvaivubu mɔja maje jabocavacari Cristo bojedacɔvure mɔjare yópe Jūmenijicui aiye báquepedeca, ũi mearo đacaquiyede mɔjare. ²⁵Ūbenita ácu mɔjacacu ũi ámeina đare nuru, Jūmenijicu, jáñu caivu pòevare cūináturara, ñájine đacɔvume úre ũi ámeina đaiye báquepedeca. Que teni Jūmenijicurecabe bojedayɔ caivu pòevare yópe ne đaiye báquepedeca.

4 ¹Mɔja, ne jabova, đajarā me mɔjare memecavure yópe mɔjare jauépe Jūmenijicui jáinore, mɔje coreóvaive boje mɔje jabocu cavarò mearocacu cɔvure, mɔje coyrājimure aipe mɔje đaiye báquede.

²Ūtɔbevɔva coyrarā Jūmenijicɔque. Mɔje coyiyede úque, me đápijarā mɔje coyiyede aru torojuede jíjarā úre. ³⁻⁴Aru mɔje coyiyede jēniajara Jūmenijicɔque yure boje máre, cɔvure ámeina teivure jēni jacoñami jívni, ji coyiyede báque boje iye yávaiye méne, Cristoi borore, jáđovameno mácaróre jipocamia ũbenita jáđovainore caride. Jēniajara Jūmenijicɔque ũi yávayɔ buojare đaquiyere yure, ji coyrquiyere aivu diede caivu ne járiaiyede yópe yure jauépe.

⁵Coyrarā mɔja Jesús ũi yávaiye méne ina úre ju abevure. Cainɔmɔva mɔje cuede náque me majiéque đajarā náre.

⁶Coyrarā náre, me coyrquiyere aivu náre aipe árojarore mɔje coyninore. Que teni coreóvarājaramu mɔja aipe árojae jauóre mɔjare mɔje coyiyede náre ne jēniari jáiyede mɔjaque.

Pablo ũi meaicójeino Colosacavure
(Hch 12.12, 25, 13.13, 15.37-39, 19.29, 20.4, 27.2; Ef 6.21-22; Col 1.7; 2 Ti 4.10-12; Flm 2, 10-12, 23-24; Ap 3.14-22)

⁷Caiye iye vaiyede yure ñai Tíquico coyrɔvume mɔjare. Úrecabe majecu, maje mɔv, yure cadateyɔ dajocabecɔva, aru maje jabocu Cristore memecayɔ yúque máre. ⁸Đarocɔvume úre mɔje yebai, ũi coreóvare đaquiyere ayɔ aipe vaiyede ñjare, ũi torojure đaquiyere ayɔ mɔjare mɔje ũmei. ⁹Aru

ñɔvɔvume ñai Onésimore úque, majecu dajocabecure, maje mɔvure, mɔje imarocacure. Na pɔsarā coyrarājarama mɔjare caiye vaiyede ñjare yebare.

¹⁰Ñai Aristarco, ámeina teivure jēni jacoñami cɔcu yúque, meaicójeimi mɔjare. Aru ñai Marcos máre, Bernabé ũi chimacu, meaicójeimi mɔjare. Javede coyrɔcacu mɔjare ũi borore. Que baru ũi earu mɔje yebai, me coyr etajarā úre. ¹¹Aru ñai Jesús máre, arepɔmɔv ne aimɔv Justo, meaicójeimi mɔjare. Ina yóbecurā quévura judíovacavɔ Jesucristore ju aivurecabu memeyɔ yúque caride, pòeva ne jaboteicójenajiyere aivu Jūmenijicure náre. Na cadateivɔ yure me torojure đadama ji ũmei. ¹²Aru ñai Épafra máre, mɔje imarocacu, aru Cristore memecayɔ, meaicójeimi mɔjare. Úrecabe cainɔmɔva pueno baju jēniñu mɔjare Jūmenijicɔque. Jēniñume mɔje meara marajiyépe ayɔ mɔje ũmei ye jaubeda yópe Jūmenijicui urópe aru mɔje coreóvarājiyere ayɔ aipe caino Jūmenijicui uróre, “¿Jáve márica?” arí đápibevɔva. ¹³Pueno baju ũbi mɔje curājiyere ayɔ me Jūmenijicui jáinore, aru náre máre, ina Jesucristore ju aivure Laodicea ámicuríimarocavure aru Hierápolis ámicuríimarocavure máre. Que baru parurórea jēniaimi Jūmenijicɔque mɔjare boje. Yúvacari coreóvaivɔ die jávene. ¹⁴Aru ñai Lucas, majare juoiróecu, maje mɔv, aru Demas máre, meaicójedama mɔjare.

¹⁵Meajarari na Jesús ju aipòeva Laodiceacavɔ. Aru meajarari Ninfa aru ina Jesús ju aipòeva cójijivaiivɔ òi cūrami jívni. ¹⁶Jári boroteicójejara iyoca paperayocare mɔje cójijinoi caivɔ ne járiaiyede. Aru mɔje járiaríburu yóboi, jári boroteicójejara diyocare ina Laodiceacavɔ Jesús ju aipòeva ne cójijinoi caivɔ ne járiaiyede máre. Aru areyoca paperayocare máre, ji toivaino mácaróre, Laodiceacavure mɔja máre jári boroteicójejara diyocare mɔje cójijinoi caivɔ ne járiaiyede. ¹⁷Yópe arí, coyrarā ñai Arquipore: “Me jájacu mɔv, buojacayɔ yo mi memeyɔvure maje jabocu

Jesucristo ñi epeiye báquede mure mi
cæ boje cūinávure úque”. Que ajará úre.

¹⁸Yúvacari, Pablo, toivaivæ jì pæruque
caride. Meaicõjeivæ caivæ mæjare.

Åræjara yære ne bnoimære tåumeaque,
ãmeina teivære jëni jacoĩñami sæsure.
Jũmenijicæ mearo ðacajacæĩ mæjare
bojecæbeda ñi me boje. Quénoramu.

1 Tesalonicenses

Mamabuinore coyuiyebu Pablo bácu ùi toivaicõjeiye báquede mamayoca paperayocare Tesalónica ãmicuriiमारocavũ Jesúre ju aipõevare. Pablo bácu judíovacasũ bácuvacari, Jesús ùi yávaiye méne beorí coyucõjeimũ marejaquémavũ, coyucũyũ ùi yávaiye méne judíova ãnevure, judíova ne ju abe boje ùi coyuiyede. Lucas bácu coyurejaquemavũ Pablo bácu borore Hch 7:57-8:1, 9:1-31, 13:1-28:31, aru ùi cuede Tesalónica ãmicuriiमारoi Hch 17:1-10, 20:1-5. Caiye iyoca, Pablo bácu toivaicõjeiyoca báque curiyoca Majepacu Jũmenijicũ yávaiye mamaene coyuitucubo jívuĩ, mamarũmũre úre toivacaipõescu bácuve toivaicõjeneaquemavũ iyoca paperayocare ùi toivaicõjeiquye jipocare apeyocare. Pablo bácu coyurejaquemavũ úre toivacaipõescu bácuve aipe ùi toivacaquye báquede diyocare. Toivaicõjeneaquemavũ diyocare ãniũjũa báquede 50-51 d.C. puque ùi cucũnuiyede, coyucũyũ Jesús ùi yávaiye méne, ùi cuede Corinto ãmicuriiमारoi.

Pablo bácu toivaicõjeneaquemavũ diyocare ùi cucũnuiye eabe boje Tesalónicacavũ ne yebai aru Timoteo bácu coyuiye boje ne borore ùi mácuve (2:17-3:6). Coyurejaquemavũ náre méne ne parũre nuiye boje Jesucristoque, dajocabevũva ne ju aiyede aru ne ñaiye boje yópe ùi urõpe (1:2-10, 3:7-9). Coyurejaquemavũ náre aipe ñare nuiye jaurõre náre yópe Jũmenijicũ urõpe (4:1-12, 5:12-22), aru ne majibeno mácarõre Jesucristoi copaidaquino maquinõra aru úre ju aivũre ne yainĩburu nacajarajiyeda (4:13-5:11). Aru ãrũre ñarejaquemavũ ina Tesalónicacavũre aipe ùi ñaiye báquede ne jẽneboi, ne ju abenajiyepẽ ayũ apẽvũ borocuede coyurĩduivũre Pablõjã ne borore (2:1-16).

Pablo ùi meaicõjeino Tesalónicacavũre (Hch 17.1)

1 ¹Yũ, Pablo, toivaicõjeivũ apẽcuve iyoca paperayocare. Silvano aru Timoteoque yũ meaicõjeivũ mujare, Tesalónica ãmicuriiमारocavũ Jesucristore ju aipõeva cójijivavũre. Mũja majepacu Jũmenijicũ aru maje jabocu Jesucristo jinatamu mũja. Majepacu Jũmenijicũ, maje jabocu Jesucristomaque, mearo ñacajacurĩ mujare bojecũbeda ùi me boje. Aru torojurivũ cũre ñajacurĩ mujare carijimevũva.

Tesalónicacavũ ju aipõevape ne jãdovaino (Hch 17.5-9)

²Torojũede jívũbu ñũja Jũmenijicũre cainũmũa jẽniaiye coapa caivũ mujare, mũje ju aiyẽ boje Jesúre. ³Ñũje

coyuiyede majepacu Jũmenijicũque, ñũja ãrũrivũbu mũje memẽinore, mũje ju aiyẽ boje Jesúre. Ñũja ñápiavũbu mũje memecainore apẽvũre, mũje ne boje Jesúre aru náre máre. Ñũja ãrũrivũbu mũje napini ñãjiyede, mũje coreiye boje maje jabocu Jesucristoi copaidaquijãravũre. ⁴Mũja, ñũjevũ, coreóvaivũbu ñũja mujare Jũmenijicũ umarare. Ñũja majivũ mujare Jũmenijicũ beoimarare, ùi jivũ bãrãjivũre. ⁵Jesús ùi yávaiye méne coyũcarã mujare. Ubenita buebetecarã mujare diede quẽnora yávaiyeque. Quẽnora jãdovacarã ñai Espiritu Santo ùi parũede põeva ne ñarĩ majibede ñaiyeque. Jãdovacarã ñũje majiẽde máre yavebeda Jesús ùi yávaiye méne jãvene. ãrũjara ñavũre me ñũje cuede mũje jẽneboi, aru ñũje caũateiyede mujare.

⁶Mũjacapũravũ ñavũ me ñũjape aru maje jabocu Jesucristope máre. Yópe ñũje ñaiyepẽ me ñãjivũreca, nopedeca

mujá máre ñájivavacari ðaðavũ me. Mujé ju aye boje Jesús ùi yávaei méne, apevu ñájine ðaíma mujare urarõreca. Ëbenita ñájiye cuedeca jacopuavũ mujá Jesús ùi yávaei méne torojurí. Aru ñai Espíritu Santorecabe torojure ðayu mujare iye torojueque. ⁷Que baru caivu ina Jesúre ju aipõeva Macedonia aru Acaya âmicurijoborõacavu, jápiaivu mujé borore, ðaivubu me mujape. ⁸Mujavacari majide ðaivubu põevare maje jabocu Jesucristo ùi yávaei méne. Que baru nora jápiaðama mujé borore ina Macedoniacavu aru ina Acayacavu máre. Ëbenita obedivu apenoacavu máre majidivubu mujá ju aivure Jümenijicure caride. Que baru coyüye jaubevu ñujare apevure mujé borore, jave ne majié boje. ⁹Quénora caivu ina põeva coyuyama mujé jacopüiyede ñujare me, ñuje eaiyede mujé ïmaroi. Coyuyama mujé dajocaiyede mujé pëpeimarare, memecaräjivü ñai Jümenijicu apucure aru jávene máre. ¹⁰Coyuyama mujé napini coreiyede máre uetubevüva Jümenijicui mácure, copaidacuyure ijäravui cavarõ mearo Jümenijicui curõre jocarí. Ñai Jesúrecabe Jümenijicui mácu. Ëi yainíburu yóboi, Jümenijicu nacovarejaquemavu ùre yainore jaruvári. Ñai Jesús meadayu majare, maje ñájimenajiyeye ayu Jümenijicui ñájiovaquijäravu baquinóre põevare, ne ãmeina teiye boje.

Pablo Tesalónicai ùi memecaino

(Hch 9.23, 29, 13.45, 50, 14.2, 5, 19, 16.19-24, 17.1-9, 13, 18.3, 12; Gá 1.10; 2 Ts 3.8)

2 ¹Mujá, ñujevü, mujavacari coreóvaivubu ñuje daiyede mujé ïmaroi, me jápiaivure ñuje coyüiyede. Que baru ñuje ðaiye mujé yebai bojecube ãmeteavũ. ²Aru mujavacari coreóvaivubu javede ñuje cuede Filipos âmicuríïmaroi, nócvu ne jabova ne ðaiyede ñujare. Ñájine ðaíma ñujare. Aru ãmeina yávaíma ñujare máre. No yóboi, ñuje eaiyede mujé ïmaroi,

obedivu põeva maucuvateima ñujare. Ëbenita Jümenijicu coyüicõjeame ñujare jidubevüva. Aru ne maucüvade ñujare, coyucarã mujare ùi yávaei méne, Jesús meadayure põevare. ³Ñuja buebevü mujare jáve ãmene. Aru buebevü ãmeümeque máre. Aru jujovabevü põevare ñuje bueiyequé. ⁴Quénora Jümenijicui me jáiye boje ñujare, ù beoibi ñujare, ñuje buenajiyeye ayu põevare Jesús ùi yávaei méne. Que baru cainüma bueivubu yópe Jümenijicui bueicõjeiyeye. Buebevü ñuja, põeva ne me járajiyeye aivu ñujare. Quénora bueivubu ñuja, Jümenijicui me jáquiyeye aivu ñujare. Jümenijicurecabe majicu maje dápiayede. Que baru Jümenijicu jáimi põeva ne ðaiyede aru ne dápiayede máre.

⁵Mujavacari coreóvaivubu ñuje ðaiye báquede mujé jëneboi. Cainüma yávabecarã, jujovaräjivü mujare, mujé ðaräjiyeye aivu yópe ñuje urõpe. Buebetecarã mujare quédata ïnajivü mujé ãtuturare. Jümenijicüvacari majibi ñuje ðaiye báquede mujé jëneboi. ⁶Põevare pueðaicõjemetecarã ñujare. Vobetecarã ñuja mujare aru apevure máre, mearore jíyede ñujare. ⁷Ñujamu Jesús ùi yávaei méne beorí coyüicõjeimara. Que baru ñuja ðaicõjeni buoiaivubu apevure. Ëbenita ðaicõjemetecarã mujare. Quénora meara põevape cütecara mujé jëneboi. Yópe népacoí meðaiyeye mamarare meadacarã mujare. ⁸Ñuje urarõ jecué boje mujare, torojurí buecarã Jümenijicui yávaei méne. Aru caiyede ðaiyutecarã, caðatenajivü mujare pu ñuje yainümita. Que baru ñuje pare jecumaramu mujá. ⁹Mujá, ñujevü, mujavacari ãrurivubu ñuje pare memeni voinore ñujare jauéde. Ñuje cuede mujé jëneboi memecarã ñuja jàravure aru ñamine máre, mujé ñájimenajiyeye aivu, bojeðaivu ñujare jauéde ñuje bueiyede Jümenijicui yávaei méne mujare. ¹⁰Mujavacari jáivubu, aru Jümenijicu máre majibi ñuje ðaiye báquede mujá Jesúre ju aipõevaque. Caiye ñuje ðaiye

báquede mujare đacarã mearoque yópe Jūmenijicure memecaivupe. Aru caiye ñuje đaiye báquede mujare meatevu Jūmenijicui jáinore. Que baru ñame buojabema boropađaivu ñujare ñuje đaiye báquede muje jēneboi. ¹¹Mujavacari coreóvaivubu ñuje đaiye báquede mujare coapa yópe népacu ñi đaiyepe mamarare. Bueivu batecárã mujare, muje torojure đarājiyepe aivu. Cadateivu batecárã mujare, muje chīomenajiyepa aivu. ¹²Aru đaicójeivu batecárã mujare yópe ina Jūmenijicu jina ne đaiye jaurópe, Jūmenijicui torojūquiyepa aivu mujaque. Jūmenijicurecabe cutuyū mujare meara mārājivure aru ñi jaboteinocavū bārājivure máre.

¹³Ñuja jívubu torojuede Jūmenijicure cainumua muje jápaiye báque boje ñujaque Jūmenijicui yávaiye méne. Dápiabeteavū muja pōeva ne yávaiyepe iye yávaiyede ñuje bueiye. Quéhora ju ávū muja diede Jūmenijicui yávaiyepe. Aru jāvetamu ñuje bueiye Jūmenijicui yávaiyede. Que baru Jūmenijicu oatuvayūbe mujare me, muje ju aiyede ñi yávaiye méne.

¹⁴Muja, ñujevu, muje ímarocavū ñájine đávū mujare nópe ina judíova ñájine đaiye báquepedeca ina Jesúre ju aivure Judea āmicarijborócavure. Cūináturu vaivu mujare máre. ¹⁵Ina judíova, nárecabu boarí jaruvaivu bācavū maje jabocu Jesucristore. Javede ina judíovavacari boarí jaruvarejaquemavu ina Jūmenijicui yávaiyede coyūcaipōeva mácavure máre. Aru caride máre ina judíovavacari ñájine đarí jaetovađama ñujare máre. Ne que đaiyeque jorojīne đaiivubu na Jūmenijicure. Aru maucūvarivubu caivu apevu pōevare máre. ¹⁶Ina judíovavacari ñujare coyūcōjemenidivubu Jūmenijicui yávaiye méne ina judíova āmevure, ne meatebenajiyepa aivu. Que teni buojaiivubu caiye ne āmeina teiyede. Que baru caride űetuii Jūmenijicu jáñū đavūre āmeno. Que baru ñájine đacūyūme náre.

**Pablo ñi jácūnuiyurō
Tesalónicacavure cojedeca**
(Hch 17.5, 18.5)

¹⁷Muja, jívū, ñujare coatede đaima ñuje mauva mujare jaruvarí. Cūicōjeteima ñujare mujaque. Ŭbenita ārūicōjemeni buojabema na ñujare. Que baru cainumua ārūrivubu mujare. Maje coateniburu yójiboi, ñuja chīori ārūtecarã mujare. Járadaiyuríducarã mujare. ¹⁸Ñuja copainuiyuríducarã muje yebai, jārājivu mujare cojedeca. Cainumua yāvacari, Pablo, mujare jácūcopaiyuríducacu. Ŭbenita ñai abujuvai jabocu, Satanás, nūicōjetequemavu ñujare. ¹⁹Ŭbenita ñuja torojurājaramu mujare boje maje jabocu Jesucristo ñi copaidaquiyede. Mujarecabu napini corede đaiivu, ñuje cūvarājiyepe aivu mearore. Mujarecabu torojure đaiivu ñujare. Aru mujarecabu ñuje jáđovaimara mearore ñuje bueinore, ñuje bueiye boje muje jēneboi. ²⁰Jāve mujarecabu ñuje mearore jímara aru ñuje torojumara máre.

3 ¹Ŭbenita ñuja napini buojabetecarã jámevu mujare. Que baru cūináturu ñuje űme majitecarã ñuje đarājiyede. Ñuja pucarã mauteclarã Atenas āmicarímaroi. ²⁻³Aru jarocarã ñai majecu Timoteore muje yebai. Ŭ yóvaibi ñujare memecayū Jūmenijicure, coyūyū Jesús ñi yávaiye méne. Que baru jarocarã űre cadatecūyure mujare, aru parure đacūyure mujare máre muje űmei, muje ju ainore Jesúre pueno baju parurō nure đacūyure, muje dajocabenajiyepa aivu muje ju aiyede Jesúre, pōeva ne ñájine đaiye boje mujare. Mujavacari coreóvaivubu me majare ñájīye jauróre. ⁴Javede ñuje cuede mujaque, coyūcarã maje ñájinajiyede. Aru mujavacari coreóvaivubu me jave vaivu majare yópe ñuje aiyepa báquepedeca. ⁵Que baru yácapūravū napini buojabetecacu coreni majibecu cāreja muje borore. Que baru jarocacu ñai Timoteore, coreóvacūyū aipe curivure muja yópe iye yávaiye

méne coyuiyepa muje ju aiyede. “Ñai abujuvai jabocu jujovaiyucubebu náre. Aru ñuje bueiye báque náre bojecubejebu”, arí dápiacacu yu.

⁶Caride Timoteo copaidaibi mujare jocarí. Ñi coyuiyede ñujare muje borore torojure ñaibi ñujare pare. Coyuibi aipe ju aivure Jesúre aru aipe urivure muje bajumia máre. Coyuibi aipe torojurí arurivure ñujare cainumua aru aipe jáiyurivure ñujare máre, quédeca ñuja máre járanuyuvu muje yebai. ⁷Que baru muja, ñujevu, iye ñi coyuiyede muje borore parure ñaibi ñujare ñuje ñmei, caiye iye ñáine ñaiye cuedeca yui ñuje jéneboi. ⁸Caride ñuja coreóvaivubu jáve ju aivure muja Jesúre. Muja dajocabenajivubu maje jabocu Jesucristore. Que baru me curí torojurivubu ñuja. ⁹Uraró torojuede jívubu ñuja Jümenijicure mujare boje. Ñuje coyuiyede Jümenijicure pueno baju torojurivubu, muje ju aipe boje Jesúre paruróreca. ¹⁰Jaravure aru ñamine máre paruró jéniaivubu ñuja Jümenijicure, mujare ñi járanure ñaiyepa ayu ñujare, buenajivu cojedeca mujare iye muje coreóvabede cáreja. Jéniaivubu diede, muje me majinajiyepa aivu aipe ñaiye jauróre muje cuede yópe Jümenijicui uróre.

¹¹Jéniaivubu majepacu Jümenijicure aru maje jabocu Jesúque máre, ne nure ñaiyepa aivu ñujare muje yebai. ¹²Aru maje jabocu Jesús pueno baju uraró nure ñajacurí mujare muje uede muje bajumia aru apevure máre, muje uburí apevure me yópe ñuje uere mujare. ¹³Que teni parure ñajacurí mujare muje ñmei, ñame ne buojabenajiyepa aivu boropadaivu mujare muje meara mae boje majepacu Jümenijicui ñi jáinoi maje jabocu Jesús ñi copaidaquijaravu baquinói ñi jivu mearaque. Quédecabu.

Pablo “Jümenijicure torojure ñaiyurivu, yópe ñajará” arí, ñi coyuíno

4 ¹Muja, ñujevu, maje jabocu Jesús ñujare bueicójeimi mujare

cojedeca yópe ñuje bueiyepe mujare javede. Coyuivubu mujare, muje me majinajiyepa aivu aipe jauróre muje ñaiyede, Jümenijicui me jáquiyepa aivu mujare. Caride ñadavú muja yópe Jümenijicui uróre. Que baru paruróreca jéniaivubu ñuja mujare, muje ñarajiyepa aivu yópe Jümenijicui uróre pueno baju cainumua. ²Mujavacari coreóvaivubu bueivure ñuja mujare yópe maje jabocu Jesús ñi bueicójeiyepe. ³Yópe ñi ñai Jümenijicui: Muja coapa ñajará mearore cainumua. Meara májara muja, ñi jina muje teiye boje. Que baru cubejará muja apevunque mujemarebucava ámevunque. ⁴Me curará muja coapa mujemarepacoque Jümenijicui jánore aru póeva ne jáiyede máre. Puedajará muja coapa mujemarepacore. ⁵Ñabejará nápe ina Jümenijicure coreóvabevure. Ñadama na ámenore, Jümenijicui ubenore, ne puedeiye majibe boje nomivare. Ñadama ámenore náque. ⁶Que baru jujovabejará muja apecu mujecure, ámeno ñaiyu jímarepacoque. Javeita ñuja coyucará mujare paruróreca aipe maje jabocu Jümenijicui ñáine ñaiyure caivu ina nópe ámeno ñaiyure. ⁷Jümenijicui cutuibi majare ñi jina márajivuva. Que baru buojabevu maja curivu ámeümeque. Quéhora maje meara mae jayvu majare, maje curajiyepa aivu me Jümenijicui jánore, ñi jina mae boje. ⁸Aru ácu póecu ju abecu baru iye ñuje bueiyede, ju abenidui ñi apecu póecu bueiyede. Quéhora ju abebi ñi Jümenijicui yáviyede, ñai daroyu mujare ñai Espiritu Santore. ⁹Iye muje uede muje bajumia toivabenajivubu ñuja. Muja me urivubu muje bajumia. Que baru diede toivaiye javevu ñujare. Javede Jümenijicuvacari majicaibi mujare, Jesúre ju aipóevare, jauróre muje bajumia uede. ¹⁰Nopedeca mujacapuravu cainumua urivubu ina Jesúre ju aipóevare, caino Macedonia ámicurijoborócvure. Paruróreca jéniaivubu ñuja mujare, muje urajiyepa aivu yópe Jümenijicui uróre pueno baju cainumua. ¹¹⁻¹²Caiye muje ñaiyeque

püeno ðajarã, cãrijimevüva curãjivü apevüque. Ðaicõjemejara apevüre aipe ðaiye jaurõre náre ne ðaiyede. Memejara müja coapa, cuvãrãjivü müje ãiyede, müje curiñamiare, aru caiye apede müjare jauéde máre. Yópe iye ñuje ðaicõjeiyepe müjare caride, nopedeca ðaicõjecarã müjare jipocamia, ina Jesúre ju abevü ne pueðarãjiiyepe aivü müjare me, müje corebe boje apevü ne jíyede müjare jauéde, aru ye jaubequiyepe aivü müjare.

Maje jacobu Jesús ñi copaidaquino

(Mt 24.30-31, 43; Mr 13.26-27; Lc 12.39; Ro 13.12; 1 Co 15.51-52; Ef 6.13-17; 2 P 3.10)

¹³Müja, ñujevü, huvü ñuja müje majinajiyede jáve aipe vaivüre ina Jesúre ju airõeva yaivü bácvüre. Chïomejara müja müjevü ju airõeva yaivü bácvü boje yópe ina ju abevü ne chïoiyepe, ne napini corebe boje jãravü cüiméjãravü baquinóre. ¹⁴Coreóvaivübu maja yaivü bácvüre Jesús, aru nacajañü mácvüre yainore jarvãri. Que baru coreóvaive javü müjare nacovacvüre Jümenijicüre ina Jesúre ju airõeva yaivü bácvüre Jesús ñi copaidaquiyede ijãravü.

¹⁵Que baru caride ñuja covüiyüvübu müjare me iye Jesús ñi bueiye báquepe ñujare. Jesúre ju airõeva arvüvü ijãravüi maje jacobu Jesús copaidaquijãravü baquinóre covü nmenajaramu ñre ne jipocamia ina Jesúre ju airõeva yaivü bácvüre jocarí.

¹⁶Põeva jápiarãjarama covobobori cõjeiyede; aru ángelevai jacobu yávainore; aru Jümenijicüi japuiyore, trompeta ámicvüiyore, japuiye pare bujiéde máre. Dinümüiareca maje jacobu Jesús vacari étesvüme cavarõ mearo Jümenijicüi curõre jocarí. Aru ina Jesúre ju airõeva yaivü bácvü nacajarajarama yainore jarvãri.

¹⁷No yóboi, maumena Jümenijicüi cõjjjovacvüme ina Jesúre ju airõeva arvüvüre cãreja ina ñi nacovaimara mácvüque. Aru cüinátvü caivü maja

covü nuri jacoburãjaramu maje jacobu Jesúre ñmüi oopeniboa yebai. Que teni curãjaramu maja maje jacobu Jesús que cainümüa. ¹⁸Que baru chïomejara müja. Covüjarã iye borore, torojüre ðarãjivü müje bajumia.

5 ¹Müja, ñujevü, põescu cubebi majicu airijãravüa jaurõre aru aipe vaiquiyede maje jacobu Jesús ñi daquiyede jipocare. Que baru toivaive javüvü ñujare diede. ²Müjavacari coreóvaivübu me maje jacobu Jesús copaidacvüre ijãravüi põeva ne corebede, ñi copaidaquinvüre majibedeca yópe ñavaipõescu daiyepe ñamine põeva ne corebedeca. ³Põeva, yópe arí, covüridurãjarama ne bajumia: “Caino cãrijimene ðaivü. Yéde jidübevü maja”, aridurãjarama. Aru ne nópe covüriduiyedeca, cüinã bíjarãjarama na. Ñájini búrãjarama maumejiena. Aru dupini majibenajarama na diede jocarí. Ñájinajarama na yópe ico juedocovacodo maumejiena ámei ijíede ñájiiyepe põedare ðacodo mamajicüre.

⁴Ubenita müja, ñujevü, müjacavüvü Jümenijicüre coreóvavüvü ámevü müja. Aru ámeina teivü ámevü müja nápe, Jesúre ju abevü, ñeminoi curüvüre. Que baru müje coreóvaive boje maje jacobu Jesús dacvüre, ñ cuavabecvüme müjare ñi copaidaiyede ijãravüi, yópe ñavaipõescu ñi cuavaivepe cãramicavüre. ⁵Caivü müja Jesúre ju aivü majidivüre ðaivübu cainümüa põeva ne jáinoi müje ðaiyede, müje coreóvaive boje Jümenijicüre. Que baru caivü müja miadãroi curüvü jãravüvüpebu. Maja Jesúre ju aivü ðabevü cainümüa majibevüre, ne coreóvabe boje Jümenijicüre põeva ne jáiyede maje ðaiyede. Que baru ñamicavü aru ñeminocavü máre ámevü maja. ⁶Que baru dápiabenajarevü maja nápe, Jesúre ju abevüre. Cãivüpebu na. Quénona dápiarãjarevü maja me arvüvüre, me oaburí coreivü maje bajure. ⁷Naminocabu ina caivü ne cãiyede. Aru ñaminocabu ina pacoteivü ne pacoteiyede. ⁸Ubenita majacavüvü

coateivubu ina ñamicavure jaruvãrĩ. Aru ñeminoi cubevu maja. Quénora járavucavutamu maja. Aru miadároi cuivubu maja.

Que baru me ñaicõjeiye javvu maje bajure. Maje ju aye Jūmenijicure javvu majare aru maje ue apevure máre. Yópe ñarĩ taoivubu maja nópe churarava ne taoiyepe ne bajure járariçaje doicajeque. Aru javvu majare maje napini coreiye Jūmenijicui meadaquiyede. Nópe ñarĩ taoivubu maja yópe churarava ne taoiyepe ne jipobure járaribo moiboque. ⁹Que baru Jūmenijicu epebebi majare ñájine ñacuyu. Quénora epeibi majare maje jabocu Jesucristoi meadaquiyeye ayu, ñájimemuri ámenaque. ¹⁰Jesús yaidéjamedã majare boje, maje curãjiyepe ayu úque cainumua. Ina apurivũ cãreja aru ina yaivũ bãcavu máre ñi copaidaquiyede caivũ maja cūináturu curãjaramu úque cainumua. ¹¹Que baru parure ñajarã muja pũeno baju cainumua, muje baju ju aiyede Jesúre parurõ nure ñaquiyepe aivũ. Aru cañatejarã cainumua muje bajumia, nopedecca muje ñare ñuiyepe caride.

Pablo ñi majicaino Jesúre ju aipõevare aipe ñaiye javurõre náre
(Fil 4.4, 6; Col 4.2-7)

¹²Muja, ñujevu, ñuja jēniaivubu parurõrecca mujare, muje pueñarãjiyepe aivũ ina memecaivure maje jabocu Jesúre muje jēneboi. Nárecabu maje jabocu Jesúí epeimara, jabetenajivũ aru majicarãjivũ máre. Aru buenajivubu mujare aipe ñaiye javurõre, muje ñarãjiyepe aivũ mearo maje jabocu Jesús ñi jáinoi. ¹³Que baru pueñarã náre. Aru pare urã náre, ne cañateiye boje mujare. Cujarã muja cãrijimevũva mujevũque.

¹⁴Muja, ñujevu, ñuja jēniaivubu parurõrecca, muje ñarãjiyepe aivũ yópe mujare javéde. Majicajarã ina memeiubevure, ne memenajiyeye

aivũ. Torojure ñajarã ina jidubevure, ne jidubenajiyeye aivũ. Cañatejarã ina chõivure, ne torojure ñarãjiyepe aivũ ne ũmei. Aru napijara caivure.

¹⁵Аресу ñi ámeno ñaru cūinácũ mujacacure, ñabejacurĩ ámeno úre copũ. Quénora cainumua napini dápijarã muje ñarãjiyede mearore muje bajumia aru caivũ põevaque máre.

¹⁶Torojjarã muja muje ũmei. ¹⁷Aru uetubevũva coyujarã Jūmenijicũque.

¹⁸Aipe vaiye vajjarõri mujare.

Cainumua torojuede jjarã Jūmenijicure. Jūmenijicu ũbi maje nópe ñaiyede, maje ju aye boje úre.

¹⁹Ñai Espiritu Santore maucuvabejarã muja ñi ñaiyurõre mujaque.

²⁰Jūmenijicui yáviyede coyucayiedeca jãpiayubevure tebejarã muja. ²¹Caiyede me jãri coreõvajarã muja. Aru coreõvarĩburu yóboi, ñajarã caiye méne. ²²Ubenita ñabejarã caiye ámene.

²³Jūmenijicuvacari, cãrijimenoque cure ñayu põevare, cure ñajacurĩ mujare caivũ meara baju. Aru corejacurĩ mujare coapa caivũ, muje decocure, muje ũmene, aru muje bajure máre, muje boropatebenajiyeye aivũ maje jabocu Jesucristoi copaidaquijaravũ baquinói. ²⁴Jūmenijicu cutuibi mujare ũ jina mãrajivũva. Aru cainumua ñayube yópe ñi aye báquepedeca. Que baru úvacari mearo ñacacuyume mujare.

Pablo ñi meaicõjeino Tesalónicavure

²⁵Muja, ñujevu, jēniajara Jūmenijicũque ñujare. ²⁶Meaicõjeivubu ñuja caivũ muja Jesúre ju aipõevare. Me jacoyjarã muja mujevure, muje jivare nuri, muje Jūmenijicu jina mae boje. ²⁷Maje jabocu Jesús ñi jáinoi yu jãri boroteicõjeivũ mujare iyoca paperayocare caivũ mujevũ Jesúre ju aipõevare. ²⁸Me cujarã muja maje jabocu Jesucristo ñi mearo ñacaiye bojecubeda ñi me boje. Quénoramu.

2 Tesalonicenses

Mamabuinore coyuiyebu Pablo bácu ùi toivaicõjeiye báquede yóbocayoca paperayocare Tesalónica ãmicuriiमारocavũ Jesúre ju aipõevare. Pablo bácu judíovacasũ bácvacari, Jesús ùi yávaiye méne beorí coyucõjeimũ marejaquémavũ, coyucũyũ ùi yávaiye méne judíova ãnevure, judíova ne ju abe boje ùi coyuiyede. Lucas bácu coyurejaquemavũ Pablo bácu borore Hch 7:57-8:1, 9:1-31, 13:1-28:31, aru ùi cuede Tesalónica ãmicuriiमारoi Hch 17:1-10, 20:1-5. Javede Pablo bácvure toivacaipõescu bácvure toivaicõjenejaquemavũ ùi mamayoca paperayocare Tesalónica ãmicuriiमारocavũre, aru obebeaviava yóbore toivaicõjenejaquemavũ diyocare, ãniũjua báquede 50-51 d.C. máre, pũque ùi cuscũniyede, coyucũyũ Jesús ùi yávaiye méne, ùi cuede Corinto ãmicuriiमारoi. Pablo bácu coyurejaquemavũ ùre toivacaipõescu bácvure aipe ùi toivacaquiye báquede diyocare.

Pablo bácu toivaicõjenejaquemavũ diyocare napicõjescũyũ ina Tesalónicacavũre ne ñájiyede ne ju aipe boje Jesúre (1:3-12, 2:13-3:5), aru coyucũyũ nuríe Jesucristoi copaidaquino maquinóra, ne dápiabenájiyere ayũ javede copaidayũ bácvure yópe apevũ borocũrivũ ne ùbenina arí coyuiye báquere (2:1-12), aru memecõjescũyũ Jesúre ju aipõevare (3:6-15).

Pablo ùi meaicõjeino Tesalónicacavũre (Hch 17:1; 1 Ts 1.1)

1 ¹Yu, Pablo, toivaicõjeivũ iyoca paperayocare. Silvano aru Timoteoque yũ meaicõjeivũ mũjare, Tesalónica ãmicuriiमारocavũ Jesucristore ju aipõevare. Mũja majeracu Jũmenijicu aru maje jabocu Jesucristo jinatamu mũja. ²Majeracu Jũmenijicu maje jabocu Jesucristomaque mearo ñacajacũrĩ mũjare bojecũbeda ùi me boje. Aru torojũrĩ cure ñajacũrĩ mũjare cãrijimevũva.

Jũmenijicu ùi ñájiine ñaquino ãmeina teivũre Cristoi copaidaiyede

³Mũja, ñũjevũ, torojũede jivũbu ñũja Jũmenijicure mũjare cainũmũ. Ñũje nópe ñaiye jaũvũ ñũjare. Aru mearomu. Mũja coreóvaivũbu aipe ñaiye jaũrõre mũjare mũje cuede yópe Jũmenijicũ ùrõpe, caride jave báque pũeno. Aru caivũ mũja coapa ùrivũbu mũjevũre caride jave báque pũeno. ⁴Que baru ñũjacapũravũ torojũrĩ coyũivũbu

mũje borore apeno ñmaroacavũ Jesúre ju aipõevare. Coyũivũbu mũje pare napiyede aru mũje ju aiyede Jesúre, apevũ ne maucũvaede mũjare aru ne ñájiine ñaiyede máre mũjare.

⁵Mũja ñájiivũbu mũje ju aipe boje Jesúre. Aru mũje ñajocabe boje mũje ju aiyede ùre ùetũbevũva, Jũmenijicu cure ñacũyũme mũjare ùi jaboteinoi. Yópe acũyũme mũjare coapa: “Bojedacũyũme mũre mi ñájiyede, mi ju aipe boje Jesúre”, acũyũme Jũmenijicu. Que teni jãðovacũyũme meacure ùi ñacaiyede põevare yópe ùre jaũépe. ⁶Que baru Jũmenijicu ñacũyũme yópe jaũépe. Ñájiine ñacũyũme ina caride ñájiine ñaivũre mũjare. ⁷Aru mũja caride ñájiivũre, aru ñũjare máre, Jũmenijicu ñajocare ñacũyũme maje ñájiyede. Nópe ñacũyũme Jũmenijicu maje jabocu Jesús ùi copaidaquijãravũ baquinóre. Ëmecũyũme cavarõ mearo Jũmenijicũ curõre jocarĩ ùi ñngeleva ùi parũede cũvarivũque. Aru darãjarama toa uruiye jẽneboi. ⁸Ñájiine ñacũdacũyũme ina Jũmenijicure coreóvabevũre aru ina ju abevũre máre maje jabocu

Jesús ùi yávaei méne. ⁹Nácapūravu ñájinajarama ñájinu cūiménoi. Maje jabocu Jesús, meacu baju, jaruvacuyume náre úre jocarí, ne jámenajiyeye ayu ùi urarō paruéde. ¹⁰Caiye iye vaiquíyebu ánijāravu, maje jabocu Jesúí copaidaquijāravu baquinóre. Copaidacuyume ijāravui, ù jina meara ne jínajiyeye ayu mearore úre. Que baru caivu ina ju aivu me pueðarājarama úre dijāravu baquinói. Aru muja máre náque curājaramu, muje ju aye báque boje ñuje coyúye báquede mujare Jesús ùi yávaei méne.

¹¹Que baru jēniavaivubu ñuja mujare ñuje coyúiyede Jūmenijicue cainumua, “Muja, Tesalónicacavu Jesúre ju airōeva, bojedacuyumu yu mujare muje curājino mearoque, ji cutuiye báque boje mujare”, ùi aquíyeye aivu. Jūmenijicu mujare ðare ðajacurí caiye méne yóre muje ðaiyūere ùi paruéque. Aru mujare buojare ðajacurí caiye muje mearo ðacaiyede, muje ju aye boje Jesúre ùi paruéque. ¹²Que teni pōeva pueðarājarama maje jabocu Jesúre, ùi mearo ðacaiye báque boje mujare. Aru mujare máre pueðacuyume majepacu Jūmenijicu maje jabocu Jesucristomaque bojecubeda ùi me boje.

Pablo ùi coyurí meadaino Jesúí daquinore

(Mt 24.24; 1 Ts 4.15-17)

2 ¹⁻²Muja, ñujevu, coyurājivubu mujare maje jabocu Jesucristo ùi copaidaquiyede aru maje cójijnajiyede úque. Jēniavubu ñuja mujare, apesu ùi coyuru mujare, yóre arí: “Ñai Espiritu Santo aibi: ‘Maje jabocu Jesucristoi copaidaijāravu eaivu jave’”, o “Pablojā aima: ‘Maje jabocu Jesucristoi copaidaijāravu eaivu jave’”, o muja jacopuivu baru paperayoca toivaiyede ñuja Pablojā ñujapeda teivu: “Maje jabocu Jesucristoi copaidaijāravu eaivu jave” arí, ju abejarā diede. Maumejiena oatuvabegarā muje dápiayede. Aru cuavare ðabegarā muje ūmene, apesu coyúiyeye boje o no paperayoca

toivaiye boje máre. ³Quéda apesure jujovaicōjemejara mujare.

Dijāravu baquinó, Jesúí copaidaquijāravu, eabequíyebu pu obedivu pōeva ne urarō maucūvaeta Jūmenijicue. Dinumu maquinó ñai ūmu ámesu, bíjacuyu yóboi, cuetecuyume Jesúí copaidaquiyeye jipocai. Jūmenijicu ñájinu ðacuyume úre, ñai ūmu ámesure, toabo cūiméboi cainumua. ⁴Ñai ūmu ámesu maucūvacuyume caivu pōeva ne pēpeimarare, aru ne jūmenijinare, caivu apēva ne mearore jīmarare, aru Jūmenijicue máre. Yóre arí, ñai ūmu ámesu “Yūrecabu parūcu caivu apēvu pūeno”, acuyume. Que teni ecosuyume Jūmenijicui cūrami, dobacuyu yóre jabocupe. Aru, “Yūrecabu Jūmenijicu”, acuyume caivure.

⁵Caiye iyede jave coyure cucasu yu mujare ji cuede cāreja mujaque. ¿Ārumenaru muja?

⁶Muja coreóvaivubu cūinācu cūcure caride, ñai ūmu ámesu ùi járobequíyede cāreja. Ūbenita yóboi, Jūmenijicui beoijāravu baquinói, ñai ūmu ámesu cuetecuyume. ⁷Jipocamia Jūmenijicu jáðovamenejaquemavu aipe ùi ðaquiyede pōeva ámeina ðaivure. Ūbenita caride jáðovacuyume aipe ùi ðaquiyede náre. Cūinācu mauyaibi ñai ūmu ámesure. Ūbenita Jūmenijicu ícuyume ñai mauyayure úre jocarí.

⁸Dinumu maquinóre cuetecuyume ñai ūmu ámesu. Ūbenita maje jabocu Jesucristo ùi copaidaiyede boarí jaruvacuyume úre ùi yávaei paruéque. Que baru copaidayu pūeno meacu baju bíjarocuyume úre.

⁹Ñai ūmu ámesu cuvacuyume ñai abujuvai jabocu, Satanás, ùi paruéde. Jáðovacuyume ùi urarō paruéde ùi ðaquiyede caijīene pōeva ne jámene aru ne ðarí majibede máre, “¿Jūmenijicu bárica ū?” pōeva ne arājiyeye ayu ūbenina. ¹⁰Ū jujovacuyume caiye ùi ámeina ðaiyeque ina bíjarājivure Jūmenijicue jocarí. Ū jujovarí buojacuyume náre, ne jacopūbeni ube boje Jūmenijicui yávaeiyede

jāvene. Aru ne jarāvaiye boje ũi yāvaiyede, Jūmenijicu meadabecuyume náre. ¹¹ Que baru Jūmenijicuvacari jujovaiçōjecuyume náre, ne ju arājiiyepe ayu borocuede. ¹² Que baru nājine ðacuyume caivu ina urivure ne āmeina teiyede aru ũi yāvaiyede jāvene ju abevure máre.

Pablo ũi aino “Jūmenijicu beoibi meadacuyu mujare”

¹³ Muja, ñujevu, Jūmenijicure jíye jauvu ñujare torojuede cainmua, muja Jūmenijicui umarare boje. Javede ũi cuedaquie jipocai caiyede, Jūmenijicu beorejaquemavu meadacuyu mujare, ñai Espiritu Santoi ðaiye báque boje mujare Jūmenijicu jinava, aru muje ju aiye báque boje Jūmenijicui yāvaiyede jāvene. ¹⁴ Ñuje bueiye báquede mujare iye Jūmenijicui yāvaiye méne, ũi cuturejaquemavu mujare, muje jabotenajiiyepe ayu maje jabocu Jesucristoque ũi jabotequiyede.

¹⁵ Que baru, ñujevu, parurōreca ju ajarā cainmua iye ñuje bueiye jāvene, ñuje coyuiye báquede mujare aru ñuje toivaiye báquede paperayocaque máre. Aru cainmua dajocabegarā diede.

¹⁶ Jēniaivubu ñuja maje jabocu Jesucristore majepacu Jūmenijicumaque, majare ucure. Majare cadateyube, ũi me boje dajocabecuva. Aru majare napini corede ðayube ũi mearo ðacaquiyede majare. ¹⁷ Ðajacurī mujare parurivū muje ũmei aru jidubevū muje coyuiyeque aru muje ðaiyeque máre, me maquiyépe cainmua.

Pablo ũi aino “Jēniajara ñujare Jūmenijicunque”

3 ¹ Muja, ñujevu, jēniajara ñujare Jūmenijicunque, arevū obedivū pōeva ne jápiarājiiyepe aivu maje jabocu Jesucristoi yāvaiye méne maumena, ne ju arājiiyepe aivu diede, aru ne jínajiiyepe aivu mearore Jūmenijicure, nópe vaiye báquepedeca mujaque. ² Aru jēniajara ñujare Jūmenijicunque, ũi meadaquiyepa aivu ñujare ina pōeva āmena, ne

āmeno ðabenajiiyepe aivu ñujare. Pōeva obebevū ju aivubu Jūmenijicui yāvaiye méne. Que baru ina āmeina ðaivu aru arevure máre āmeno ðare ðaivu āmeno ðaiyurivubu ñujare.

³ Ūbenita maje jabocu Jesucristo cainmua ðayube yópe ũi aiye báquepedeca. Que baru jāve parure ðacuyume mujare muje ũmene. Aru jári corecuyume mujare ñai abujuvai jabocu, ũi āmeno ðabequiyepa ayu.

⁴ Ñuja coreóvaivubu maje jabocu Jesucristo cadateyure mujare, muje ju aiye boje ũre. Que baru coreóvaivubu muja ðaivure yópe ñuje bueiye báquepe mujare, aru ðarājivure máre yópe ñuje bueiyepe iyocaque caride. ⁵ Ñuja jēniaivubu maje jabocu Jesucristoque, ũi napine ðaquiyepa aivu mujare parurōreca yópe ũi baju napino mácarōpe, aru muje urājiiyepe aivu pōevare yópe majepacu Jūmenijicu ũi uepe majare.

Memeiye jaurō

(Hch 18.3; Gá 6.9; 1 Ts 2.9)

⁶ Muja, ñujevu, yóvaicōjemevū ñuja mujare, maje jabocu Jesucristoi parurēque, ina mujacavu jūracurivure aru ðabevure máre yópe ñuje bueiye báquepe. ⁷ Mujavacari coreóvaivubu aipe ðaiye jaurōre mujare, ðarājivū nópe ñuje ðarī cōmajiiye báquepe muje jēneboi curivū cāreja. Memeiyubevū āmetecarā ñuja. Quénora jūracubevūva urarō memecarā. ⁸ Jacopubecarā ñuje āiyede mujaque bojecubeda. Quénora cainmua bojedacarā mujare muje jíye báquede ñujare. Urarō memeivu batecarā jāravure aru ñamine máre, muje ñájimenajiiyepe aivu ñujare jaué boje. ⁹ Ñuja jēniari buojajebu ñujare jauéde, ñuje bueiye boje Jesús ũi yāvaiye méne. Ūbenita quéda jēniametecarā mujare. Jáðovacarā mujare ñuje ðaiyeque aipe ðaiye jaurōre mujare. Que baru ðajarā muja yópe ñuje jáðovaiye báquepe. ¹⁰ Javede ñuje cúvaquede muje jēneboi, yópe arī, “Ñai memeiyubecure jíbejarā āiyede”, ðaicōjeivu batecarā mujare.

¹¹Nópe arí, soyuivubu ñija mujare, ñije jápiaie boje ne borore, apevu mujacavu jíracuivure. Nácapūravu mememema, bojedarájivu náre jauéde. Quédata cārijovadama náre ina memeivure ména.

¹²Que baru, ina mujevu memeyubevure soyuivubu ñija caride. Maje jabocu Jesucristo ũi paruéque memecōjeivubu náre. Aru parurōreca jēniaivubu náre, ne memenajiyepe aivu cārijovamevūva apevure, ne cuvarājiyepa aivu ne āiyeva.

¹³Ūbenita mija, ñujevu, uetubejarā mearo ñaivu.

¹⁴Apecu mujacacu ũi ju abedu ñije soyuivude yo paperayocaque, ũre coreóvarí caivu mija yóvabejarā ũre, ũi cayoje tequiyepa aivu. ¹⁵Ūbenita jámejara ũre yópe muje jáiyepa muje

maucure. Quéhora soyujarā aipe ñaie jaurōre ũre yópe muje majicaiyepa mujeyocure.

**Pablo ũi meaicōjeino
Tesalónicacavure**

¹⁶Maje jabocu Jesucristovacari cārijimenoque cure ñayu pōevare, cure ñajacurí mujare cārijimevūva cainūma. Maje jabocu Jesucristo cujacurí caivu mujaque. ¹⁷Yávacari, Pablo, toivaivu ji puraque caride. Meaicōjeivu caivu mujare. Caiyoca ji paperayocare toivaivu yu yópe, jáðovacuyu mujare jáve ji toivaicōjeiye báquede. Que toivaivu yu. ¹⁸Ūrarō mearo ñacajacurí mujare maje jabocu Jesucristo bojecubeda ũi me boje. Quénoramu.

1 Timoteo

Mamabuinore coyuiyebu Pablo bácu ùi toivaicōjeiye báquede mamayoca paperayocare Timoteo bácu. Pablo bácu judíovacacu bácuvacari, Jesús ùi yávaiye méne beorí coyucōjeimu marejaquemavu, coyucuy ùi yávaiye méne judíova ánevare, judíova ne ju abe boje ùi coyuiyede. Lucas bácu coyurejaquemavu Pablo bácu borore Hch 7:57-8:1, 9:1-31, 13:1-28:31, aru Timoteo bácu borore Hch 16:1-3, 17:13-16, 18:5, 19:22, 20:4. Pablo bácu toivaicōjeiyede ùre toivacaipōecu bácu diyocare, javede toivaicōjeneaquemavu apanyoca caipucapuruape paivyoca ùi paperayoca curiyocare Majepacu Jūmenijicui yávaiye mamaene coyutucubo jívui. Diyocare toivaicōjeniburu yóji'boi, toivaicōjeneaquemavu Tito bácu, aru no yóbove yoca buojaiyocare yóbocayocare Timoteo bácu. Pablo bácu coyurejaquemavu ùre toivacaipōecu bácu aipe ùi toivacaquiyé báquede diyocare. Toivaicōjeneaquemavu diyocare añiñju bácarōre 63 d.C., ùi cuede Macedonia ámicurijoborōi.

Pablo bácu toivaicōjeneaquemavu diyocare parure ñacuy Timoteo bácu ùi ùmei (1:12-19, 4:1-16, 6:11-21), aru ñajocare ñaicōjecuy ùi mácu Éfesocavare ne bueino jáve ámene (1:3-11, 6:3-10), aru coyucuy ùi mácu aipe ñaiye jaurore Jesúsre ju aivare coreipōevare aru náre cañateipōevare máre (3:1-16, 5:1-6:2), aru aipe ñaiye jaurore Jesúsre ju aipōevare ne mearore jývede Jūmenijicure (2:1-15).

Pablo ùi meaicōjeino Timoteore

(Hch 16.1-3)

1 ¹Yu, Pablo, toivaicōjeivu apere iyoca paperayocare. Yábu Jesús ùi yávaiye méne beorí coyucōjeimaracacu. Jūmenijicu meadaibi majare. Aru Jesucristo napini corede ñaibi majare caiye iye ùi mearo ñacaquiyede. Ne coyucōjeimumu yu Jesús ùi yávaiye méne. ²Mu, Timoteo, yu meaicōjeivu mure. Jáve jímacure páyubu mu, mi ju aipe boje Jesúsre. Majepacu Jūmenijicu, maje jabocu Jesucristomaque, mearo ñacajacurí mure bojecubeda ùi me boje. Aru cōmaje ñroje jājacurí mure. Aru torojurí cure ñajacurí mure cārijimecava.

Pablo ùi bueicōjemeno boro ámene

³Ñajacu mu yópe ji coyuiye bácupe mure ji nuiyede Macedonia ámicurijoborōi. Yu mauteicōjecacu mure Éfeso ámicurímaroi, mi ñajocare ñaquiyere ayu apevu nócavare ne bueiyede jáve ámene maje bueiyede jocarí. ⁴Coyucōjemejacu náre ne

coyuno mácarōre aru ne áruuidiyede néñecuva mácavu ne ámiá coapa. Ne nópe ñaiyede, jēniari jádama ne bajumia ye majibevva cainmua. Ne nópe ñaiyede, coreóvaivu buojabema na Jūmenijicui urōre náre ne ñarājiyede, yópe jaurore náre ju aivu baru Jesúsre.

⁵Ñaicōjecacu náre ji coyuiyere, ne urājiyere ayu apevare me ne dápiayequé “Boropatebevva yu”, ne arí dápiayequé aru jáve ne ju aiyequé Jesúsre. ⁶Ubenita ina pōeva yópe ñabema na. Quéhora coyuvabu ubenita. ⁷Bueiyurivabu na Jūmenijicui ñaicōjeiyede ùi coyuiye báquede Moisés bácu. Ubenita coreóvabema ne baju ne coyuiyede aru aipe aiyuede ne bueniduyede máre majidivupe.

⁸Coreóvaivabu maja méne Jūmenijicui ñaicōjeiyede ùi coyuiye báquede Moisés bácu, pōeva ne coreóvaru aipe teni Jūmenijicui coreóvare ñaiye báquede diede. ⁹Coreóvaiye javvu pōevare aipe teni Jūmenijicui coreóvare ñaiye báquede iye ñaicōjeiyede. Jūmenijicu coyurejaquemavu iye ñaicōjeiyede

Moisés bácare, jádovacuyú dieque pöeva ne ámeina teiyede. Que baru ina pöeva boropatebevure Jümenijicui jáinore, ne ju aipe boje Jesúre, jaubevu náre iye ðaicöjeiye. Quéhora ina ámeina teivure iye ðaicöjeiyeque Jümenijicu jádovaimi ne ámeina teiyede.

Ámeina teivu ne ðaiye nópe paiye bu. Námu Jümenijicui ðaicöjeiyede ju abeni ðabevu. Puedabevubu Jümenijicure, ámeina ðaivu. Námu Jümenijicui ubemara aru yurivu Jümenijicure máre. Námu boarí jaruvaivu népacure, aru népacore, aru aprevure máre. ¹⁰Námu curivu aprevuque némarebucúva ámevuque, aru úmúva ámeina ðaivu ne baju aprevu úmúvaque. Námu návaiivu pöevare, jínajivu náre yebacavure. Námu borocurivu aru “Сочу́счүму jáve”, ne aríburu yóbove borocurivu. Jümenijicu jádovaimi úi ðaicöjeiyeque caiye iye ðare ðaiyede copu ámenore iye buעיye méne jocarí.

¹¹Aru bueivu yu iyede jávene, сочу́у Jümenijicui yávaiye me püeno baju méne, pöeva ne majinajiyere ayu aipe Jümenijicu meadayure náre. Ñai Jümenijicu meacu baju jári coreicöjeimi yure aru bueicöjeimi yure úi yávaiye méne.

Pablo úi torojuede jínu Jümenijicure úi cómaje ároje jáiye boje
(Hch 8.3, 9.4-5)

¹²Yu torojuede jýubu maje jabocu Jesucristore, úi jáiye boje yure yópe úi uróre ðayure. Que baru epeibi yure, ji memecaquiye ayu úre. Aru parure ðaibi yure, ji buequiyere ayu úi yávaiye méne.

¹³Yópe mearo ðacaibi yure javede, ámeina úre yávayú bácareca, cujurí ñájine ðayú bácareca úre ju aivure, aru maucuvacu bácareca úre. Úbenita Jümenijicu cómaje ároje járejaquemavu yure, ji que ðaiye boje caiye iyede coreóvabecupe, ji ju abe boje Jesúre cáreja. ¹⁴Aru Jümenijicu püeno uraró mearo baju ðacarejaquemavu yure. Úi mearo ðacaiye boje yure bojecubeda, caride yu ju ayubu Jesucristore aru uvu yu úre.

¹⁵Jávetamu iye. Que baru ju aipe javu caivure iyede. Jesucristo darejaquemavu ijárvai, meadacuyú ámeina teivure. Aru yurecabu ámeina teivucacu bácu ámecu baju caivu püeno. ¹⁶Úbenita Jümenijicu cómaje ároje járejaquemavu yure, Jesucristo úi jádovaquiye ayu aipe úi napino uraró pöevare. Napinejaquemavu yure, ámecu bajure caivu aprevu ámeina teivu püeno, ji ju aquiye ayu úre. Que teni jádovaimi úi uraró papinore ina ji yóbocavu úre ju aivu, ne cuvarájiye ayu járvu cuíméjávavu baquinóre, ne jáiyede úi meadaiye báquede yure, ámecu bajure.

¹⁷Ñai maje jabocu, cainumúa jaboteyure caivure, puedarájarevu úre aru mearore jínajarevu úre máre. Úrecabe arucu cainumúa. Úrecabe maje jámemu. Aru úrecabe Jümenijicu cúinácúra. Quédecabu.

¹⁸Mú, Timoteo, jímacupe páyubu mú. Mure сочу́icöjeivu yu pöevare ji bueiyede mure. Árajacu aprevu ne сочу́caiye báquede múra aipe vaiquíyede mure. Arucu diede, parure ðajacu mi úmene, memecacuyú Jümenijicure yópe úi uróre, aprevu ne maucúvadedca mure, nopedeca ñai churara úi me ádamateiye boainoi. ¹⁹Cainumúa ju ajacu Jesús úi yávaiyede méne jávene. Aru, “Boropatebevú yu”, arí dápiari, cujacu mú. Aprevu pöeva meateiyubema ne boropateiyede. Quéhora ju adama apeno bueino jáve ámenore. Aru dajocadama ne ju aipe báquede Jesúre. ²⁰Púcará úmúva cúma nópe ðaivu, ne ámiá Himeneo aru Alejandro. Jáve jícacu náre ñai abujuvai jabocu Satanáre, ne coreóvarájiye ayu ámeina yávaiye jaubede náre Jümenijicure.

Pablo úi bueino aipe jëniainore Jümenijicuque
(Mt 20.28; Mr 10.45; Gá 1.4; 2 Ti 1.11; Tit 2.14; 1 P 3.3)

2 ¹Mamarumure yu сочу́iyuvu mure iyede. Caivu Jesúre ju aipöeva сочу́jarári Jümenijicure náre javéde, aru aprevure javéde máre. Yópe ðarí

jíjarári torojuede máre Jūmenijicure aru jēniajarari na Jūmenijicuque caivũ pōevare boje máre. ²Jēniajarari Jūmenijicuque jabovare aru caivũ ina cōjeipōevare máre, maje curājiyepe aivũ me, maucuvabevũva aru carijimevũva máre. Que teni mearore jīni Jūmenijicure aru pueđarī ajevũ pōevare curājaramu maja me. ³Maje jēniaiye Jūmenijicuque meavũ ajevũre, aru cojvũ Jūmenijicure, majare meadayure. ⁴Ūre cojvũ ũi ne boje caivũ pōeva ũi meadaimara mārājivure aru coreóvarājivure máre ũi yāvaiyede jāvene.

⁵Cūinácũrabe ñai Jūmenijicu. Aru cūinácũrabe ñai pōevare meara cure đayũ Jūmenijicui jāinore. Ñai meadāipōescu ũrecabe Jesucristo. Ūvacaribe ũmũ. ⁶Boarī jarũvaicōjenejaquemavũ ũi bajure, pōeva ne āmeina teiye boje, bojedacacũyũ caivũre, Jūmenijicu jina marājiyépe ayũ. Ūi que đaiye báque boje Jūmenijicui beoijāravũ bācarōi, jáđovarejaquemavũ Jūmenijicu meadāiyũcure caivũ pōevare.

⁷Aru Jesús epedejame yũre ũre coyũcaipōescũva aru ũi yāvaiye méne beorī coyũcōjeimũva máre, jī coyũquiyepe ayũ ũi yāvaiye méne. Ūi bueicōjenejame yũre ina judíova ānevũre iye yāvaiyede jāvene, ne ju arājiyepe ayũ ũre. Coyũvũ mũre jāve. Yũ borocubevũ.

⁸Yũ vũvũ ũmũva ne jēniarājiyepe ayũ Jūmenijicure cainoa ne cōjijinoai, jāmũorī ne purũáre āmenore đabevũva. Quénora memecajarāri Jūmenijicure. Jarabejarāri ajevũre. Aru jāve napini corejarāri Jūmenijicui ju aquinore ne jēniaiyede.

⁹Aru yũ vũvũ nomiva ne dorājiyepe ayũ ne doiyede yópe nomiva meara ne doiyepere. Dobejarāri yópe āmenape, ajevũ ne jārājiyepe aivũ náre. Quénora doarāri ne cuitótecajearre yópe Jūmenijicure cojuépe. Que teni đabejarāri ne pođaque cāoidũ āmeno baju. Aru adabejarāri cámuca

yuyuiyede aru āmuyo adaitarabuarre máre cūrājiboa bojecurijiboaque aru úruque máre. Dobejarāri cuitótecajearre bojecuricajearre máre, ajevũ ne jārājiyepe aivũ náre. ¹⁰Ūbenita đajarāri yópe nomiva Jūmenijicure urivũre, ajevũ ne jārājiyepe aivũ náre ne cadateiye boje me ajevũre.

¹¹Jūmenijicui yāvaiyede bueiyedeca, caivũ nomiva me jāpiarī, majijarāri iye bueiyede bídeca coyũbevũva. Aru pueđajarāri caivũ náre cōjeivure máre. ¹²Yũ nomivare bueicōjemevũ ũmũvare. Aru yũ nomivare máre jaboteicōjemevũ ũmũvare. Quénora bi ajarāri na, nomiva. ¹³Yũ đaicōjevũ náre nópe, Jūmenijicui cuedāiye báque boje Adán mácure mamarũmũre aru Eva bácore ũi yóboi. ¹⁴Aru yũ máre đaicōjevũ náre nópe, Adán mácure abujuvai jabocui jujovabe báque boje. Ūbenita Eva báco abujuvai jabocui jujovaimo máco barejaquemavũ ō. Que baru ico nomió vainí tũrejaquemavũ Jūmenijicui đaicōjeiye báquede. ¹⁵Ūbenita nomiva meadaimara mārājivũbu, me ne bucúováiye boje némarare yópe Jūmenijicui urópe, na cainũmua ju aivũ baru Jūmenijicui yāvaiye méne, aru urivũ baru ajevũre máre, aru memecaivũ baru Jūmenijicure me.

Aipe đaiye jaũrō Jesúre ju aivũre coreipōevare

(Tit 1.6-9)

3 ¹Jāvetamu iye. Ñai pōescu coreiyũcũ baru Jesúre ju aipōevare, ũ memecaiyũbi me Jūmenijicure. Que baru mearomu ũi đaiyũrō. ²Ñai coreiyũcũ Jesúre ju aipōevare đaiye jaũvũ ũre cainũmua yópe pōeva “Āmecube ñai”, ne boro coyũrī adāivũ bũojabenājiyepe aiye ũi borore. Aru đaiye jaũvũ ũre cainũmua yópe pōeva ne jáđovamenājiyepe aiye ũi āmeina teiyede. Jaũvũ ũre máre ũi cũvaquiyepe jĩmarepaco cūinácũra. Coreiye jaũvũ ũre me ũi đaiyede. Aru đaiye jaũvũ ũre majiéque. Đaiye jaũvũ ũre yópe pōeva ne pueđaimũre. Me corũ etarī

jacouyiye jaunu úre ina curádaivure. Aru me bueiye jaunu úre úi coreimarare máre. ³Úcumejacurí pacotede ðaiyede. Aru ádamateiyubejacurí. Quéhora meacu pōesu bajacurí. Aru jarabecurí. Tātuturare jecubeni, diede pare urí vore nūmejacurí. Aru áujimejacurí apevu ne cūvaede. ⁴⁻⁵Ñai ūmu buojabecu baru jaboteyu ūi cūramicavure, jāve buojabecube coreyu Jūmenijicui cūramicavure, Jesúre ju aipōevare. Que baru jaunu úre ūi jaboteiye me ūi cūramicavure, mamara ne ju arājiyepe aipe úre aru ne pueðarājiyepe aipe máre cainūma. ⁶Cūinācu ūmu mama ju ayu Jesúre corebejacurí apevu Jesúre ju aipōevare, “¿Meacu bārica yu apevu pūeno?” arí dápiabecu. Úi que aru, Jūmenijicu “Ñájicuyumu mu”, ajebu úre nópe “Ñájicuyumu mu”, ūi aipe báquepedeca ñai abujuvai jabocure. ⁷Aru ñai Jesúre ju aivure coreipōevare ðaiye jaunu cainūma yópe ina Jesúre ju abevu ne me yávarājiyepe aipe úra. Úi ména ðabedu ina ju abevu ámeina yávarājarama úra. Que teni vainí tucuyume úre ñai abujuvai jabocu ūi jujovaiyeque. Ñai abujuvai jabocu jēcuyume úre popedeca doriñu jēiyepe moacure.

Aipe ðaiye jauro Jesúre ju aivure caðateipōevare

⁸Quédeca ina Jesúre ju aivure caðateipōeva máre, jaunu náre ne mearo ðaiye cainūma. Jaunu náre ne ðaiye yópe pōeva ne pueðaimarape, aru ne yávaiye máre jāve caivure jujovabevu. Úrarō ūcuiyede ūcumejararí na pu ne pacotede ðaiyeta. Aru vorí eabejararí na tātuturare ámei dápiaiyeque. ⁹Jaunu náre ne ju aipe jāve “Boropatebevu yu”, ne arí dápiaiyeque iye bueiye ðavene, Jūmenijicui jáðovameno mácarōre jipocamia ūbenita jáðovainore caride. ¹⁰Apevu járajarama ne cuede. Aru náre ámeina teiyede jámenu, memecajararí na Jesúre ju aivure caðateipōevape. ¹¹Quédeca ina nomiva Jesúre ju aipōevare caðateinomiva

máre, jaunu náre ne mearo ðaiye cainūma, yópe pōeva ne pueðaimarape. Yávabejararí borocuede apevu borore. Corejararí me ne ðaiyede máre. Jaunu náre máre ne buojaiye me caipe ne memeiye. ¹²Jaunu ina Jesúre ju aivure caðateipōevare ne cuvarājiyepe némarepacova cūinācora. Aru jaunu náre ne jaboteiye me némarare aru caivu ne cūramicavure máre. ¹³Que teni ina Jesúre ju aivure caðateipōeva ne memecaru me, pōeva pueðarājarama náre. Que baru nácapūravu buojarājarama coyuivu jidubevu aipe ne ju aiyede maje jabocu Jesucristore.

Jūmenijicu ūi jáðovameno mácarōre jipocamia coyuino

¹⁴⁻¹⁵Jáscuyuyuvu yu mure maumena. Úbenita caride toivaicōjeivu apesure mure yo paperayocare, ji járobedu mi majiquiyepe ayu aipe ðaiye jauro ne bajumia Jūmenijicui pōevare, Jesúre ju aipōevare, ñai Jūmenijicu apucu jinare. Nácapūravu coyuuyama Jūmenijicui yávaiyede ūi toivaicōjeiye báquede ne bajumia. Aru buedama apevure parurōreca diede máre. ¹⁶Jāve pūeno métamu iye bueiye jāve, Jūmenijicui jáðovameno mácarō jipocamia ūbenita jáðovaino caride, maje majinaiyepe aipe aipe ðarí carājivu meara Jūmenijicui jáinore. Yópe arí, coyuivubu maja:

Cristo járorejaquemavu ijāravni pōesure. Aru ñai Espiritu Santo jáðovarejaquemavu úre pūeno meacu bajure. Ina ángeleva járejaquemavu úre. Pōeva coyurejaquemavu ūi borore caivu joborōcavure. Ijāravucavu ju arejaquemavu úre. Aru Jūmenijicu mūvarejaquemavu úre cavarō mearo ūi curōi, arí coyuivubu maja.

Ina dajocavū ne ju aipe báquede Jesúre

4 ¹Ñai Espiritu Santo jāve coyuibi buojaijāravucare apevu Jesúre ju aipōeva mácavu ðajocarājivure ne ju

aiye báquede. Que teni jápiarājarama na abujuvare ne bueiye, ina jujovaiyurivure pōevare ne bueiye jāve āmeque. ²Buede đarājarama pōeva borocurivure. Que teni jujovarājarama pōevare ne bueiye jāve āmeque. Ina buei pōeva coreóvarājarama ne bueiye jāve āmene. Ūbenita ye chīomenajarama ne jujovaiyede, “Boropatebevu yu”, ne arī dāpiabe boje. ³Yópe arī, buenajarama na: “Purubnobejarā mja” aru “Āmejara mja apejīe āiyede”. Ne nópe bueiye meamevu. Caiye maje āiyede cuedarejaquemavu Jūmenijicu, Jesúre ju aipōeva, ūi yávaiyede jāvene majidivu, torojuede jíni ūre, ne ārajipe ayu diede. ⁴Que baru caiye iye Jūmenijicui cuedaiye báquede maje āru, mearotamu. Maje torojuede jídu ūre maje jacopuiyede ūi cuedacaiyede majare, jaruvaiye jaubevu diede majare cainmua. ⁵Jūmenijicui yávaiyede ūi toivaicōjeiye báque boje aru maje jēniaiye boje ūque máre, jívubu mearore ūre. Jūmenijicu me jáñme diede.

Aipe đarī Jesucristore memecayu me

⁶Mu coyuy baru yópe ji toivaicōjeiye apecure ina Jesúre ju aipōevare, mi baju máre bueiye deca iye yávaiye méne mi ju arīburu yóboi Jesúre aru caride máre, meacu memecapōecu bacuyumu mu Jesucristore. ⁷Ūbenita jápiabejacu iye ijāravuque coyuiyede pueđabede Jūmenijicure aru ārumene máre. Quépora buejacu mi baju, pueđacuy Jūmenijicure pueno baju mi đaiyeque cainmua. ⁸Pōecu ūi parure đaru ūi bajure, qujino mearomu ūre. Ūbenita pōecu ūi parure đaru ūi ūmene, urarō mearomu ūre. Ūi bajui paruru, mearomu ūre ijāravumiata. Ūbenita ūi ūmei paruru, urarō mearomu ūre ijāravure aru daquijāravu baquinóre máre. ⁹Jāvetamu iye. Que baru ju aiye javvu diede caivure. ¹⁰Que baru memeivubu maja pu ūetivuvacari, maje napini coreiye boje Jūmenijicui cađatequiyede majare. Yópe coreivubu Jūmenijicui apue boje aru ūi buojaiye

boje meadayu caivu pōevare máre. Que baru Jūmenijicu meadacuyume caivu ina ju aivure Jesúre. ¹¹Iye ji coyuiyede mure, nopedeca buejacu aru đaicōjejacu.

¹²Pōevare pueđabede đabejacu mi bojué boje. Quépora yávajacu me. Mearo đajacu máre. Aru ūjacu arevure. Ju ajacu Jesúre máre. Aru āmeno đabejacu. Que teni pōevare pueđare đajacu mure, mi jáđovaiye boje náre aipe đaiye jaurore caivu Jesúre ju aipōevare. ¹³Caride aru pu ji eaiyeta ūetubecvu jári borotejacu pōevare Jūmenijicui yávaiyede ūi toivaicōjeiye báquede. Coyujacu aipe đaiye jaurore náre. Aru buejacu náre máre. ¹⁴Ārujacu Jūmenijicui majiéde, ūi jíye báquede bojecubeda mure javede, ina Jesúre ju aivure coreipōeva ne coyucaiye báquede mura aipe vaiquiyede mure, aru ne tuiyede báquede mi jipoburā ne puruáque. Āruri dajocabejacu dayu yópe mi majiéque Jūmenijicui jíye báquede mure.

¹⁵Me dāpiajacu caiye iye ji coyuiyede mure. Caijāravu pueno đajacu yópe ji coyuiyede, pōeva mure jári ne majinaiyere ayu dayure yópe mi coyuiyede. ¹⁶Me jájacu mi đaiyede. Aru buejacu yávaiyede jāvene máre. Nópe đajacu cainmua. Que teyu mi baju meadacuyumu mu. Aru meadacuyumu mu ina jápiaivure mi bueiye de máre.

Aipe đaiye jauro Jesúre ju aipōevaque

(Mt 10.10, 18.16; Lc 10.7; 1 Co 9.9)

5 ¹Jarabejacu mu ina ūmva bucuvare. Quépora coyujacu me aipe đaiye jaurore náre, nopedeca mipacure mi coyuiyede. Ina ūmva bojvure máre, coyujacu nopedeca míyovare mi coyuiyede. ²Ina nomiva bucuvare máre, coyujacu nopedeca mipacore mi coyuiyede. Ina nomiva bojvure máre, coyujacu nopedeca míyorovare mi coyuiyede. Aru cainmua āmeno đabejacu náque.

³Pueđajacu ina nomípeva cūinacova curivure némara aru népāramena máre cubevure. Jáve cōmaje ārojarivubu na. Que baru cađatejacu náre javéde.

⁴Ûbenita ico nomiópecoi mamara curivü baru o jípāramena máre curivü baru, jaüvü náre ne cadateiye óre. Que baru napini corebejarāri ina Jesúre jü aipõevare ne cadatenajiyeye aivü népacore o néñecore máre. Quénora jíjarāri na óre jauéde. Oi me jári coreiye boje náre jueðovare cāreja, ò bucúco caride, óre jári coreiye jaüvü náre. Que teni Jümenijicu me jáññume ina põeva jári coreivüre me nébucüvare. ⁵Ûbenita ico nomiópeco cüináxico cucó, óre jári coreipõecu cuvabeco, napini coreibico ò Jümenijicu cadatecüyure óre. Que baru jēniadome úre cainumua, üi cadatequiyeye ado óre jārāvüre aru ñamine máre. ⁶Ûbenita ico nomiópeco torojüve teiyede vodore, cadatebejacu óre. Que teni ò arüibico òi baju. Ûbenita yayió bácope páðobe òi ümene Jümenijicui jáinore. ⁷Ðaicõjejacu mü ina Jesúre jü aipõevare yópe ji coyüiyeye. Que teni ajevü buojabenama ámeina yávaivü ne borore. ⁸Ina jü abevüvacari jüma ne bucüvare jauéde. Que baru cüinácu Jesúre jü aipõecu jíbecu baru ü jivüre aru üi cüramicavüre máre náre jauéde, úcapüravü ámecü bajube jü abevü püeno.

⁹Mi toivarí cüvarõre ne ámiäre ina nomiópevare, toivajacu ico nomiópeco sesenta paijüna püeno cuvacore jári baju, aru cüinácura ümücúco bácore ðajocabecova úre, Jesúre jü aipõeva ne cadatenajiyeye ayü. ¹⁰Põeva ne pueðaimo majacóri ò. Coyüjarāri na òi borore, “Ico nomiópeco mearo ðaibico ò”. Jaüvü óre òi bucúóvaíye báque me mamarare, aru òi copü etaiye báque curádaivüre, òi joaiye báque Jümenijicui põevai cubobare, aru òi cadateiye báque cõmaje árojarivüre máre. Que teni jaüvü óre òi mearo ðacaiye ajevüre cainumua.

¹¹Ûbenita toivabejacu ne ámiäre, Jesúre jü aipõeva ne cadatebenajiyeye ayü ina nomiópeva bojurõmivare. Ina pürübuoiyürivü baru ajevüque, ðajocarājarama ne memecaiyede Jesucristore. ¹²Que teni ðabenajarama yópe “Yü bácojivü memecado”, ne

aiye báquepe Jesucristore. ¹³Aru ina nomiópeva bojurõmiva jüracurivü, cure cuyama cüramia coapa. Borore coyürí jioðama na. Cārijovaðama põevare. Aru borotedama boroteiye jaubede máre. ¹⁴Que baru yü üvü ina nomiópeva bojurõmivare ne pürübuoi jüedocüvarājiyeye ayü jári coreivüva ne cüramiare. Que teiyede maje maucu buojabecübe ámeina yávaivü Jesúre jü aipõeva ne borore. ¹⁵Javede ajevü nomiópeva ðajocaquemavu ne jü aiye báquede Jesúre. Que teni memecadama ñai abujuvai jabocu Satanáre. Que baru que aivü yü müre.

¹⁶Cüináco nomió Jesúre jü ado cuvaco baru nomiópevare ò jivü jēneboi, cadateiye jaüvü óre, ina Jesúre jü aipõevare cadateiye jaubequiyeye aiye náre. Nópe ðaiyede ina Jesúre jü aipõeva jáve cadatenajarama ina nomiópevare, ñame ne cadatebemarare jáve cõmaje árojarivüre.

¹⁷Ina Jesúre jü aipõeva urarõ pueðajarāri náre ina coreipõevare, ne jaboteiye boje náre. Aru ina Jesúre jü aivüre coreipõeva bueivüre aru coyüivüre máre Jümenijicui yávaiye méne püeno baju pueðajarāri aru bojedajarāri náre ména.

¹⁸Que baru yópe arí Jümenijicu toivaicõjeneaquemavu üi yávaiyede: “Ñai oteiáimacu uracu memecayüre müjare, buobekarā úre üi jijecamure, üi ámequiyeye aivü úre üi cüocaiyedeca müjare müje oteiyaabeare, üi curaiyede diede”. Que baru üi áiye memeiye bojepebu. Aru, “Memecaipõecüre bojedaiye jaüvü üi memeinore”, arí toivaicõjeneaquemavu. Que baru me bojedajarā müja ina müjare bueivüre.

¹⁹Cüinácu põecu üi boro coyürí adaru cüinácu Jesúre jü aivüre coreipõecüre, jápiarí adabejacu mü üi coyüiyede. Ûbenita pücarā o yóbecurā majidivü bácvü üi ámeina teiye báqueda ne boro coyürí adaru úre, jápiarí adajacu mü ne boro coyüiyede. ²⁰Aru jarajacu úre caivü ajevü Jesúre jü aipõeva ne jáinoi, ne jidurājiyeye ayü ðarājivü ámeno

úpe. ²¹Iye ji toivaicōjeiyede apesure mure Jūmenijicu, aru Jesucristo, aru ina ángeleva meara baju máre majima. Que baru ne jáinoi ju aicōjeivū mure ji ðaicōjeiyede. Que baru arī dápíabejacu mi baju apesu ámeina ðayure ũi coyūquiye jipocai. Aru jámejacu ũbenina apesu measure apesu pueno.

²²Dápíabescuva, mi puruáque tñorī, epebejacu apesure Jesucristore memecaipōescure. Mu que ðayu baru, aru ũi ámeina tedu, múvacari ju ajebu ũi ámeina teiyede. Que baru apévare ámeno ðare ðabejacu mu. Aru múvacari ámenore ðabejacu cainnuma.

²³Apennuma mure yapibu ijié boje, ũcumejacu oco matuiyeda. Quénora ũcujacu apesoro vino úyaicorore, juocuyū mi bajure.

²⁴Apevu pōevare, ne nájinajiye jipocamia, caivu javede jádama ne ámeina teiyede. ũbenita apavu pōeva ámeina tedama yavenina. Que teni pu ne nájinajijáravu baquinó eaiyeta apavu jámenama ne ámeina teiyede. ²⁵Quédeca apavu pōeva mearo ðadama caivu ne jáiyede. Aru caivu coreóvadama aipe ne mearo ðaiyede. ũbenita apavu pōeva mearo ðadama yavenina. ũbenita yaveni ðaivu buojabenama na cainnuma. Quénora cūinájáravu baquinó apavu coreóvarājarama aipe ne mearo ðaiyede.

6 ¹Caivu Jesúre ju aipōeva memecaivare pueðaiye javu ne jabocure cainnuma, apavu ne ámeina yávabenajiyepe aivu Jūmenijicure aru maje bueiyede máre. ²Aru apavu memecaivu baru Jesúre ju aipōevare, ðajocabejarāri ne pueðaiyede náre, ne ju aiye boje nápe. Quénora pueno mearo baju memecajarāri náre, ne ju aiye boje Jesúre aru Jūmenijicui ne boje náre.

Maje bojecue jáve
(He 13.5)

³Maje jabocu Jesucristo bueibi majare jáve, maje majinajiyepe ayu aipe ðaiye javrōre majare, maje curājiyepe ayu yópe Jūmenijicui urōpe.

ũbenita apavu curivubu, ju abevu Jesús ũi bueiyede. Quénora bueivubu na ape bueiyede jáve ámene. ⁴Ina pōeva dápíavubu ne baju mearape apavu pueno. ũbenita ye majibema na. Jēniari jáiyurivubu ũbenina ne bajumia. Aru jaraivubu ne bajumia aipe aiyurōre ne yávaicamuaque. Ne que ðaiye boje, pōeva jorojivubu, aru jaraivubu, yávaivubu borocuede apenvi borore, aru “Ámeina ðaiyubi yure”, arī dápíavubu apenvi borore. ⁵Que teni ina ne dápíaino ámenoque carijovavubu ne bajumia aru ðajocabevu ne jaraiyede ne bajumia, ne jaruvaiye boje iye bueiyede jávene. Ina pōeva bueiyurivubu Jūmenijicui yávaiyede, inajivu urarō ne bojeva. Coatejacu náre jaruvarī. ⁶Jáve Jūmenijicui yávaiyede bueiyepare bojecuebu pōevare, ũbenita ina torojurivure ne cuvaequeda. ⁷Davabedejaquemavu maja maje cūeva ijárvare. Aru buojabenamu nūvaivu maje cūeva ijárvare jocarī. ⁸Que baru maje cavaru maje áiyeva aru maje cuitótecajeva máre, meaquiyebu majare. ⁹ũbenita apavu urivubu ne cūeva. Que baru nāi abujuvai jabocu jujovayube náre, ne ámeina tenajiyepe ayu, cvarājivu cūvede. Que teni ũ jēñume náre yópe nñoibo jēiyepe ámacure. Árumevure vore cuivubu cūvede. Que teni ámeno ðaivubu ne baju aru apévare máre. Bjárre ðaivubu ne baju Jūmenijicure jocarī. Aru nájinajivubu na. ¹⁰Pōeva ne ne boje tātuturare, ðadama caiye ámenoquede, cvarājivu diede. Apavu pōeva cuma, ne ju aiye báquede Jesúre jaruvaivu bācavu, cvarājivu tātuturare. Aru caride chīori nájina na.

Jūmenijicu jiede ðajarā ámene
ðabevuva
(Jn 18.37)

¹¹Mu Jūmenijicui pōescubu. ũre memecayubu mu. Que baru ðabejacu caiye iye ámeina teiyede yópe ji coyuiyepe. Pueno baju ðajacu cainnuma, mearo ðacuyū Jūmenijicui jáinoi, pueðacuyū ũre, ju acuyū Jesús ũi

yávaiye méne, ucuyu pōevare, napiscuyu mi ñájiyede, aru meacu pōescupe scucuyu apenvūque. ¹²Jūmenijicu cutuquemavū mure, mi scūquiyere ayū me ũi űrōpe aru mi scūquiyere ayū jāravū cūiméjāravū baquinóre. Dijāravū bācarō, Jūmenijicūi mure cutuijāravū bācarōi, mávacari ũre ju ávū obedivū ne jáiyede. Que baru pūeno baju đajacu, scucuyu yópe mi ju aiyepe Jesúre, aru scūvacuyu jāravū cūiméjāravū baquinóre máre.

¹³Caride yū đaicōjeivū mure Jūmenijicu, cure đayū caivure, aru Jesucristo máre, coyuyū bācu Jūmenijicūi yávaiye méne Poncio Pilato bācure, ne jápiayede.

¹⁴Jū aicōjeivū mure iye ji đaicōjeiyede. Đaiye javūvū mure caiyede yópe ji coyuiyere. Apejiene ārūmetebajacu mū. Aru oatvabebajacu mū iye ji đaicōjeiyede mure. Que teni ñame buojabecube āmeina yávayū mure mi đaiyede. Nópe đajacu mū cainūmūa pū maje jabocu Jesucristoi copaidaiyeta. ¹⁵Jūmenijicu jārore đacuyūme Cristore meajāravū ũi beojāravū baquinóre. ũ parucu pūeno baju cūinácūra jaboteyūbe caivure aru caiyede máre. Que baru meacu bajube Jūmenijicu. ũrecabe jaboteyū caivū apenvū jabovare. Aru ũrecabe cōjeñū caivū apenvū cōjevūre máre. ¹⁶ũrecabe cūinácūra yaiđécū ũi baju. ũ scūcū miadáro mearoi, noi pōeva joabeno i nūri buojabema. ũrecabe pōevai jámemū javede aru caride máre. ũame buojabecube jáñū ũre cainūmūa. Caivū pueđajarāri Jūmenijicūre aru jabotejacurī ũ cainūmūa. Quédecabu.

¹⁷Aru ina cūve scūvarivū ijaravūquede yópe arī, coyūjacū náre: “Đápiabegarā mūja mearape apenvū pūeno”, ajacu náre. Aru, “ũñje cūve scūvae boje, napini coreivūbu ñūja”, arī đápiabegarāri na. Que baru ijaravūque cūve cūiquiyebu. Aru ñame buojabebi majicu aipino joe scūquiyede diede. Quénora náre ũapini coreicōjebacu Jūmenijicūre. ũrecabe jíyū majare űrarō baju caiyede, maje torojurājiyere ayū. ¹⁸Ina cūve scūvarivūre đaicōjebacu me apenvūre. Jecūbevūva jícōjebacu náre ne scūvaequede, ne coapavarājiyere ayū cōmaje ārojarivūre, cadatenajivū náre. ¹⁹Nópe ne cadateiye boje apenvūre, scūvarājarama na coapa ne bojedarájiyede daquijāravū baquinóre cavarō mearo Jūmenijicūi curōi. Jáve torojurivū ne ũmei scūvarājarama na jāravū cūiméjāravū baquinóre.

Pablo ũi cōjeino Timoteore yóbocarō baju

²⁰Mū, Timoteo, Jūmenijicu epeibi mure, mi coyūquiyere ayū iye Jesús ũi yávaiye méne. Jápiabebacu iye coyuiyede pueđabenore Jūmenijicūre aru ārūmenore máre. Jápiabebacu iye bueiyede jáve āmene. Ina pōeva borocurivū bueniduyama majidivūre. “Me majivū ñūja. ũñje bueiyē javemu”, arīduyama. ũbenita majibema na. ²¹Aru apenvū yópe bueivū, javede đajocađama ne ju aiye báquede Jesúre. Jūmenijicu mearo đacajacurī caivū mūjare bojecubeda ũi me boje. Quénoramū.

2 Timoteo

Mamabuinore coyuiyebu Pablo bácu ùi toivaicōjeiye báquede yóbocayoca paperayocare Timoteo bácu. Pablo bácu judíovacacu bácuvacari, Jesús ùi yávaiye méne beorí coyucōjeimu marejaquémavu, соууууу ùi yávaiye méne judíova ámevare, judíova ne ju abe boje ùi coyuiyede. Lucas bácu coyurejaquemavu Pablo bácu borore Hch 7:57-8:1, 9:1-31, 13:1-28:31, aru Timoteo bácu borore Hch 16:1-3, 17:13-16, 18:5, 19:22, 20:4. Caiye apoyoca doce paiyoca Pablo bácu toivaicōjeiyoca úre toivacaipōecu bácu ùi paperayoca curiyocare Majepacu Jūmenijicui yávaiye mamaene coyuitucubo jívui javede toivaicōjenejaquemavu ùi toivaicōjeiquyede jipocare diyoca ùi buojaiyocare. Pablo bácu coyurejaquemavu úre toivacaipōecu bácu aipe ùi toivacaquiyé báquede diyocare. Toivaicōjenejaquemavu diyocare ániñju bácarōre 64 d.C., ùi cuede ámeina teivure jēni jacoñami Roma ámicuriimaroí, ùi yaiquíye jipojīcai. Dinumure Lucas bácu quécū dajocabedejaquemavu Pablo bácu (4:11).

Pablo bácu toivaicōjenejaquemavu diyocare ùi coreóvayede maume jabova ne boarí jaruvaquimure. Parure ðaiyurejaquemavu Timoteo bácu ùi úmei aru ðaicōjenejaquemavu aipe ðaiye jaurore ùi mácu (1:3-14, 2:1-13, 3:14-4:2, 5). Jári coreicōjenejaquemavu ùi mácu apavu ne bueiye jáve ámene (1:15-18, 2:14-3:9, 4:3-4). Coyurejaquemavu aipe vaiye báquede ùi mácu (3:10-13, 4:6-8, 14-18). Aru ðaicōjenejaquemavu Timoteo bácu Marcos bácu ùi yebai ùi cuveque (4:9-13, 21).

Pablo ùi meaicōjeino Timoteore

(Hch 16.1; 1 Ti 1.2)

1 ¹Yu, Pablo, toivaicōjeivu apecure iyoca paperayocare. Yábu Jesús ùi yávaiye méne beorí coyucōjeimaracacu. Jūmenijicu ùbi ji coyuiyede pōevare, ne majinajiyepa ayu ùi cure ðacuyure caivu ina Jesúre ju aipōevare Jesucristoque járavu cūiméjáravu baquinóre. ²Mu, Timoteo, yu meaicōjeivu mure, ji umure, jímacupe páyure. Majepacu Jūmenijicu, maje jabocu Jesucristomaque, mearo ðacajacurí mure bojecubeda ùi me boje. Aru cōmaje ároje jájacurí mure. Aru torojurí cure ðajacurí mure cārijimecūva.

Pablo ùi coyūino pōevare Cristorā

(Hch 16.1; 1 Ti 2.7)

³Yu torojuede jívu Jūmenijicure, ji memecaimure, “Boropatebevu yu”, ji arí ðápaiyeque, nópe jíñecūva mácu máre ne úre memecaiye báquedepeda. Ji jēnaiyedeca Jūmenijicūque járavure aru ñamine máre ágvu mure caipumna.

⁴Ágvu mi oiye báquede. Que baru uraró jáiyvu mure cojedeca, torojucuyu ji baju. ⁵Ágvucu yu mi ju aiye báquede Jesúre jáve. Mamamure míñeco Loida aru mipaco Eunice máre ju arejaima Jesúre. Aru jáve majivu yu mure máre ju ayure úre.

⁶Que baru áruicōjeivu mure Jūmenijicui jíye báquede bojecubeda ji tuiyede mure ji puruáque mi jipoburā, mi ðaiyepa ayu yópe Jūmenijicui urópe. ⁷Aru Jūmenijicu daroibi majare ñai Espiritu Santore. Ú jidure ðabecube majare. Quénora parure ðaibi majare, maje úmei memecarājiyepa ayu me Jūmenijicure. Úre ðaibi majare Jūmenijicure aru pōevare máre. Aru majide ðaibi majare maje oaburí coreivu maje bajure coreóvaivuva me.

⁸Que baru cūyebajacu mu iye maje coyuiyede maje jabocu Jesucristorā. Aru cūyebajacu yure máre, buoimu cūcureca úre boje. Quénora yávacari ñájuybecu ámevu ji coyuiye boje Jesús ùi yávaiye méne, mu máre ñájuybecu cūyebajacu

mi coyuiye boje Jesús ùi yávaiye méne. Napijacu mi ñájiyede Jūmenijicui paruéque. ⁹Jūmenijicui meadaibi majare aru cutuibi majare máre, maje meara baju barájiyépe ayu. Òbenita die boje maja memecabevu úre. Quénora Jūmenijicui mearo ðacaibi majare bojecubeda nópe ùi ðaiyue boje. Javede ijáravu báquiye jipocai, Jūmenijicui majidejaquemavu meadacuyure majare Jesucristoi ðacaquiye boje. ¹⁰Aru ñai meadaipóescu Jesucristo ùi daiye báquede ijáravui, Jūmenijicui jádovaimi ùi mearo ðacaiye bojecubeda majare. Jesucristo ámei vaibéde ðaibi majare maje yaijuroede. Que baru yaidé ðainore jidué jaubevu majare. Aru Jūmenijicui jádovaimi maje ju aiyede Jesús ùi yávaiye méne cvarájiyure járavu cūiméjāravu baquinóre aru apebaju pojebebajure máre.

¹¹Yúvacari Jūmenijicui epeimumu, soyucuyu Jesús ùi yávaiye méne aru buescuyu pōevare diede máre. Que baru Jesús ùi yávaiye méne beorí soyucōjeimumu yu. ¹²Que baru ñájiyū yu caride buoimure. Òbenita cuyojarō cubevu yure. Que baru coreóvaivu yu ñai Jesucristore, ji ju aimure. Aru jáve bíjaroicōjemescuyume ù iye ji memecaiye báquede úre cainumna. Que majivu yu jáve.

¹³Cainumna soyujacu mu iye yávaiyede jávene cūináturu ji soyuiyere mi jápaiye báquede. Ju ajacu Jesúsre. Aru újacu Jūmenijicure, pōevare máre, mi cne boje Jesucristo que cūinávure. ¹⁴Jūmenijicui soyucōjeimi mure iye yávaiye méne, apevu ne oatvabenajiyere ayu diede. Ñai Espiritu Santo múque cūcu cadatecuyume mure, me mi soyuquiye ayu Jūmenijicui yávaiye méne.

¹⁵Mu coreóvaivu caivu ina Jesúsre ju aipōeva Asia ámicurijoborōcavu javede ðajocavure yure, aru pucarā nácavu ne ámiá Figelo aru Hermógenes máre. ¹⁶⁻¹⁷Òbenita Onesíforocapūravu ùi edaiyede Roma ámicurímaroi, cūiná vore cuquemavu ñetvbecuva pu yure

earita. Aru obedijāravua torojure ðáme yure, cuyojarō cure ðabecu ji cuede ne buoimure. Que baru cōmaje āroje jájacurí maje jabocu Jesucristo Onesíforo jivure. ¹⁸Múvacari coreóvaivu me aipe Onesíforo ùi cadateye báquede urarō majare, curivu bācavure Éfeso ámicurímaroi. Que baru ánijāravu, Jūmenijicui ñájiyoaquiājavu baquinóre pōevare, ne ámeina teiye boje, cōmaje āroje jájacurí Onesíforore máre.

Jesucristoi churara meacu

(Mt 10.33; Lc 12.9; 1 P 5.1)

2 ¹Mu, jímacureca páyu, parure ðajacu mi baju mi úmei Jesucristoi mearo ðacaiye boje mure bojecubeda. ²Aru iye ji coyuiyede mi jápaiinoi obedivu pōeva ne jápaiyede bueicōjejacu mu úmava mearare, mi majimarare aru buení majidivure máre, ne buenajiyere ayu apevu pōevare máre.

³Napijacu yúpe ñuje ñájiyede Jesucristore boje yópe churara meacu ùi ñájiyede napiyere. ⁴Ðajacu yópe churape. Ñai churara ðaibi yópe ùi jabocu, úre órejayu bācu, ùi urōpe. Que baru ù memecayuvacari ùi jabocure memecayurídubebi churara ámecure. Quédeca mu Jesúsre memecayuvacari memecabejacu apescure mi jabocure. ⁵Aru ðajacu yópe cuyayure. Nopedeca ñai yajuipóescu máre eabebi yo ùi yajuino bojede ména, ðabecu baru yópe yajuipōevare ne cōjeiyere. Quédeca mu ðayu baru yópe Jesucristoi ðaicōjeiyere, cūvacuyumu no bojede. ⁶Aru ðajacu yópe jiore máre memeyure. Ñai memeyuresure íye javvu caivu jipocamia die ùi oteiye báque jéinumure ù jie baquiye, ùi urarō memeyere báque boje. Quédeca mu memecayū baru Jesucristore ñetvbecuva, cūvacuyumu mi bojede. ⁷Me dápijacu mu caiye ji coyuiyede. Mi me dápiaru diede, maje jabocu Jesús jápiarí eare ðacuyume mure caiyede.

⁸Arujacu mu ñai Jesucristore, Jūmenijicui nacovaimu mácure yainore jarvvarí aru ñai jabocu David

bácuí pāramecure máre. Ëi yávaiye méne coyuyubu yu pōevare. ⁹Aru iye yávaiyede ji coyuiye boje nájivu yu. Carita arevu maucunarivubu yure buoiyeta tāumeaque yui āmeina teivure jēni jacoñami jívui āmeina dayure. Ëbenita nāme buojabecube buoyure dayu Jūmenijicui yávaiye méne. ¹⁰Que baru napivu yu caiye iye nájiyede náre boje, ina Jūmenijicui beoimarare, Jesucristo Ëi meadaquiyepe ayu náre máre, ne curājiyepe ayu éque Ëi curō pueno mearo cavarōi cainmua.

¹¹Jāvetamu iye.

Dabevu maja yópe maje daiye báquepe maje ju arājiye jipocare Jesúre. Que teni yaivu bácanvpebu maja Cristoque. Que baru curājaramu maja éque. ¹²Aru napivubu maja maje nájiyede. Que baru jabotenajaramu maja éque. Ëbenita maje ju abedu ére, Ë máre ju abecuyume majare coapa. ¹³Aru maje ju abedu ére, écarūravu éacuyume majare yópe Ëi aiye báquepedeca, éacuyu ina ére ju abevure. Que baru Ëi baju, “Que āmevu”, arī buojabebi Ë.

Jāvetamu die.

Метепрѳесу меасу

(Jn 10.14; 1 Co 8.3)

¹⁴Ārure éare éajacu mu ina bueipōevare iye ji coyuiyede mure. Coreóvare éajacu náre Jūmenijicui jáinoi, ne jarabenajiyepere ayu ne baju aipe aiyurōre ne yávaicamuaque. Bueipōeva ne jaraiye boje, cūbejebu die. Quénora ne jaraiyeque āmedadama ina jápiaivure náre. ¹⁵Méneca éarī jájacu, cūcuyu Jūmenijicui jáinore ére memecayū Ëi ju aimure. Que teni cūyebecubu mu mi bueieye boje me Jūmenijicui yávaiyede. Aru buejacu pōevare yávaiyede jāvene.

¹⁶Ëbenita buebejacu iye ijāravuque coyuiyede pueđabede Jūmenijicure aru ārūmene máre. Ina nópe buevu pueno

āmenape baju nuivubu na. ¹⁷Aru ne bueieyeque āmeina éaivubu apevure nópe Ëi ijimu pojeieyeque pueno āmecu baju Ëi nuieyepere. Pucarā nópe buedama, ne āmiá Himeneo aru Fileto máre.

¹⁸Ina dajocadama ne ju aiye báquede iye yávaiyede jāvene. Borocurī, yópe arī, “Javeta Jūmenijicui nacovaquemavu pōevare yainore jarūvarī”, Ëbenina arī coyuvubu na. Que teni cārijovaiyubu apevure, ne arājiyepere aivu, “Majibevu nūja aipe jaurōre nūje ju aiyede”.

¹⁹Ëbenita nāme buojabema oatvaivu iye Jūmenijicui yávaiyede jāvene. Que baru nāme buojabema bíjare éaivu Jūmenijicui éaiyede. Jūmenijicui parure éaibi Ëi pōevare ne ūmei. Aru jádovaimi diede Ëi toivaicōjeieye báquede Ëi yávaiyede, yópe arī: “Maje jabocu Jesús majibi Ë jinare. Que baru caivu ina aivu, ‘Jesucristobe ji jabocu’, dajocajarāri na ne āmeina teiyede”, arejaquemavu Jūmenijicui.

²⁰Cūrami uradāmi jívure jororua ure cūvu. Apeđua úruque éaidua aru plataque éaidua máre, Ëbenita apeđua jocuque éaidua aru joboque éaidua máre cūvu. Diduáre úruque, plataque máre, éaidua bojecuridua, Ëi cūrami upacu epeicōjeñume Ëi yebai curādaivure. Ëbenita diduáre jocuque aru joboque máre, éaidua bojecubedua, epeicōjeñume cūramicavure. ²¹Que baru Ëi pōecu dajocayū baru Ëi āmeina teiyede, memecacuyume me maje jabocure. Ëi mearo éaiye boje, pōeva pueđarājarama maje jabocure, nopedeca diduá bojecuriduaque Ëi cūrami upacu pueđaiyepere Ëi ére jácūdayure. Que teni Ëi Jūmenijicure memecayū me, coreibi éacuyū caino memecaino mearore cainmua. ²²Que baru éabejacu mu āmenore yópe arevu bojūvu ne éaiyepere ne baju urōpe. Quénora mearo éarī jájacu, éacuyū mearore Jūmenijicui jáinoi cainmua, aru ju acuyū Jesús Ëi yávaiye méne, ucuyū Jūmenijicure aru pōevare máre, aru cārijimecuyū náque, ina jēniaivu maje jabocure, Ëi cađatequiyepe ayu náre aru curivure ne dápiaino mearoque máre.

²³Jápiarī adabejacu mu apevu ne coyuiyede bojecubede aru arumene máre. Nácapūravu me coreóvabevubu. Ëbenita múcapūravu coreóvaivu pōeva yópe coyuvure, jararī búrājívure.

²⁴Ëbenita ñai memecayu Jūmenijicure jaraiye jaubevu úre apevuque. Quénora caivuque pōecu meacupe bajacárī. Aru buejacurī me. Napijacurī jarabecuva pōevaque máre. ²⁵Que teni buejacurī dūibareca pōecu meacupe ina maucvarivure Jūmenijicu yávaiye méne. Que daru, Jūmenijicu náre oatvare dacuyume ne dápiainore, ne ju arājiyepere ayu ñi yávaiyede jávene. ²⁶Que teni nácapūravu dupini nujebu ñai abujuvai jabocure jocarī. Ëme náre jēñu mácu yópe doriñu jēiyepere moare. Ëi jujovaiye báque boje, cuvabi náre ámeina teivupe, náre dare dacuyu ñi urōpe.

**Aipe pōeva ne ðarājino
buojaquijāravua baquiyéde**

3 ¹Coreóvajacu mu iyede. Ñijāravua buojaquijāravua baquiyéde, Cristoi copaidaquijāravu baquinó jipocai, pōeva ámena maiyójare ðarājarama apevure. ²Yópe ðarājarama na, ina ámena. Ne baju urājarama. Aru jecurājarama tauturare. Dápiarājarama ne baju mearape apevu pueno. Arājarama, “Mearamu ñuja apevu pueno”. Aru ámeina yávarājarama. Juedova ju abenajarama nébucuvai coyuiyede. Jíbenajarama torojuede. Aru pueðabenajarama Jūmenijicure máre. ³Jecubenajarama névure. Aru cōmaje ároje jámenajarama apevure. Yávarājarama borocuede apevui borore. Oarī corebenajarama ne baju ðaiyuede. Jijecurājarama. Aru ùbenajarama caino mearore máre. ⁴Jēni jínajarama pōevare ne mavare. Aru ðarājarama árumevupe. Dápiarājarama ne baju majidivupe caiyede apevu pueno. Jūmenijicui urōpe ðabenajarama na. Aru cojubenajarama úre. Quénora ðarājarama cojurājivu ne baju yópe ne baju urōpe. ⁵Apevu pōeva ne jáiyede náre ðarājarama

yópe ina mearore jívu Jūmenijicure ðaiyepere. Ëbenita Jūmenijicure parure ðaicōjemenajarama ne úmene ðarājivu yópe ñi urōpe.

Dupini nujacu mu nápe paivure jocarī. ⁶Apevu nácvu dūibajieneca ecoicōjene ðaivubu náre apevu ne cūramiai, jujovarājivu nomiva árumevure. Ina nomiva, ne dápiayie ámeque ðaiye boje, ðaiyurivubu ámenore urarō. ⁷Cainumua jápiaivubu obedivu pōeva ne bueiye mamaene. Ëbenita ye buojabema coreóvaivu áde yávaiyede jávene. ⁸Yópe ina yaviva bácvu ne ámiá Janes aru Jambres ne maucvave báquepe Moisés bácvure, nopedeca na máre, ina jujovaiyu nomivare, maucvarivubu iye yávaiyede jávene. Dápiavubu ámenore cainumua. Aru Jūmenijicui jaruvaimaramu na, ne ju abe boje iye yávaiyede jávene. ⁹Ëbenita obedivu pōeva coreóvarājarama aipe árojarivure náre. Járjarama náre árumevupe, yópe ne jáiyepere ina pucarā Moisés bácvu mauva mácvupe paivure.

**Pablo ñi cōjeino yóvocarō baju
Timoteore**

(Hch 13.14-52, 14.1-20)

¹⁰⁻¹¹Ëbenita múcapūravu coreóvaivu aipe ji bueiye báquede, aru ji ðaiye báquede, ji ðaiyue báquede, ji ju aiye báquede Jūmenijicure, ji napiye báquede, ji ùe báquede pōevare, aru ji ñájiye báquede máre. Mu coreóvaivu aipe ina Antioquía, Iconio, aru Listra ámicurīmaroacavu ne ñájiye ðaiye báquede yure. Ne ñájiye ðaiyedeca yure, cainumua napinejacacu yu. Aru maje jabocu Jesucristovacari meadarejame yure cainumua. ¹²Jáve caivu ina meara maiyurivu Jūmenijicui jáinoi curivu Jesucristoque cūinávupe ñájinajarama na. ¹³Ëbenita ina pōeva ámena aru ina jujovaiyu máre pueno ámena nurajarama na. Jujovarājarama apevure. Aru náre máre jujovarājarama pueno baju.

¹⁴Ëbenita múcapūravu ðajocabejacu mi ju aiyede caiye iye mi bueiye

báquede. Majivu mu jáve diede. Que baru mu coreóvaivu ina mure bueivu b́acavure iye ýavaiyede jávene. ¹⁵Aru mu coreóvaivu juedocu ćareja, caride máre, majicure iye J́umenijicui toivaicójeiye báquede úi ýavaiyede, mi majiquiyepe ayu J́umenijicu meadacuyure mure, mi ju aiye boje Jesucristore. ¹⁶Caiye iye J́umenijicui ýavaiyede úvacari toivare ðarejaquemavu ina úre toivacaivu b́acavure. Que baru úi ýavaiye bojecavu majare, maje buenajiyeye aiye iye ýavaiyede jávene, aru maje coreóvarájiiyepe aiye maje ámeina teiyede, aru maje oatúvarájiiyepe aiye maje ðaiyede, aru maje majinajiyeye aiye aipe ðaiye jauřore, curájivu meara J́umenijicui jáinore. ¹⁷Ñai J́umenijicure memecayube nópe ðarı me majini, napini coreyu, ðacyu caiye méne.

4 ¹Caride majepacu J́umenijicu, maje jabocu Jesucristomaque, jápiaibi iye ji coyuiyede mure. Jesucristo copaidacuyume ijáravui. Nájine ðacyume ṕeva apurivure aru yaivu b́acavure máre, ne ámeina teiye boje. Aru jabotecuyume caivu ṕevare. Que baru parurórecu ðaicójeivu yu mure yópe ji coyuiyere. ²Coyujacu Jesús úi ýavaiye méne ṕevare. Me jári coreni buejacu náre cainmua, ne jápiaiyuru aru ne jápiaiyubedu máre. Coyujacu mu ṕevare aipe ne ámeina teiyede. Aru dajocaicójejacu náre diede. Buejacu aipe ðaiye jauřore náre máre. Aru buejacu napiyeque. ³Eaquiye bu arejáravua ámejáravua. Ánjáravua baquiyéde ṕeva jápiabenajarama bueiye méne. Quénora ne baju urópe vorájarama obedivu bueiṕevare, ne buenajiyeye aivu náre yópe ne baju jápiaiyere, ne ðarájiiyepe aivu ámeina teiyede yópe ne baju urópe. ⁴Que teni jápiabenajarama iye bueiyede jávene. Ubenita jápiarájarama néñecuva mácvui coyuiye báquede. ⁵Aru parurórecu ðaicójeivu yu mure cojedeca. Mácapúravu ðaicójejacu me mi baju, coreóvayure cainmua. Napijacu mi

ñájiiyede. Aru coyujacu Jesús úi ýavaiye méne ṕevare máre. Que teni mi memecaiyede maje jabocu Jesucristore ðajacu caiyede yópe mure ðaiye jauřore.

⁶Aru ýacapúravu joabejinotamu ji yaiquino. Maumena yure boarı jarúvarájarama, ji memecaiye boje Jesucristore. ⁷Iye Jesús úi ýavaiye méne coyuiyede coyuvu yu oabecúvacari. Que teni ðaivu yu yópe ñai cúyayu arevúque úi cúyaiyere oabecúvacari. Aru iye J́umenijicui urópe ðaiyede ðaivu yu oabecúvacari. Que baru buojaivu yu yópe ñai cúyayu arevúque úi cúyarı buojaiyere turúvaita. Aru iye maje ju aiyede Jesucristore dajocabevu yu. Quénora ju aivu yu úre cainmua. ⁸Que baru yópe ñai cúyayu úi jacoruiyepedeca úi cúyaiye bojede eayu arevu jipocai, yure máre jícuyume maje jabocu Jesucristo úi daquijáravu baquinóre, ji mearo ðaiye báque boje. Aru yu cúnácura ámevu, quénora jícuyume caivu ina úre urivu napini coreivure úi daquijáravu baquinóre.

Pablo úi ðaicójeino Timoteore

(Hch 12.12, 25, 13.13, 15.37-39, 20.4, 6; Ro 2.6; 2 Co 8.23; Gđ 2.3; Ef 6.21-22; Col 4.7-8, 10, 14; Tit 1.4, 20; Flm 24)

⁹Caride meatejacu, jácdacuyu maumena ji yebai. ¹⁰Áñu Demas dajocame yure úi ne boje ijáravúquede aru nuamedu Tesalónica ámicuriiımaroi. Crescente nuamedu Galacia ámicurijoborói. Aru Tito máre nuamedu Dalmacia ámicurijoborói. ¹¹Ñai Lucas quécúgabe cucu yúque caride. Vorı davajacu múque Marcure, úi coreóvaiye boje cadateiyede ji memeinore. ¹²Jarocacu yu Tíquicore Éfeso ámicuriiımaroi. ¹³Mu dayu, davacajacu yure ji puenocacaje cuitótecajede, ji dajocaino mácarore Troas ámicuriiımaroi, Carpoi cúrami. Aru davacajacu ji paperatucuboare aru ji toivaiyocare máre. Uvu yu iye toivaiyocare pueno baju.

¹⁴Ñai Alejandro, táure memei ṕescu, ðarejame uraró ámeno yure. Maje

jabocu Jesucristo ñájjine ðacuyume ére ñi nópe ðaiye báque boje. ¹⁵Que teni mávacari máre me jájacu ére, ñi maucuvae boje parurõreca maje yávaiye méne.

¹⁶Mamarumure ji nuiye báquede jabova ne ámeina teivure jëniari jáiñami, coyucuy ji ðaiye báquede ne boro coyurí adaiye báque boje yure, põescu cubeteame yóvayü yure. Quénora caivü dajocaima yure. Jëniaivü Jümenijicuque ñi árumetequiyere ayü yo ne ámeno ðaino mácarõre yure. ¹⁷Ûbenita maje jabocu Jesucristo caðateame yure aru parure ðáme yure, ji coyüquiyere ayü caiye iye ñi yávaiye méne. Aru cainoa joborõacavü nore curivü bácvü jápiaima diede. Que teni maje jabocu Jesucristo meaðame yure urarõ ámenore jaruvãrĩ, yópe jëni íyere põescure yavide jocarĩ. ¹⁸Que baru jáve coreóvaivü yu maje jabocu Jesucristo meaðacuyure yure cainumua. Aru cure

ðacuyume yure ñi meaðaimure ñi jaboteinumure cavarõ mearo ñi curõi. Que baru mearore jínajarevü éreca cainumua, jáðovarajivü ére meacu bajure. Quédecabu.

Pablo ñi meaicõjeino Timoteojãre

(Hch 18.2, 18, 19.22, 20.4, 21, 29; Ro 16.23; 2 Ti 1.16-17)

¹⁹Meajarari Prisca, aru Aquila, aru caivü ina Onesíforo ñi cüramicavü máre. ²⁰Ñai Erasto mauteamedã Corinto ámicurĩmaroi. Aru ñai Trófilmo ijimure dajocacacu Mileto ámicurĩmaroi. ²¹Me ðarĩ jájacu, dacuyü ji yebai uracoro jipocamia. Eubulo, Pudente, Lino, Claudia, aru caivü apevü Jesúre ju aipõeva meaicõjeðama mure.

²²Maje jabocu Jesucristovacari cüjacurĩ máque. Aru Jümenijicu mearo ðacajacurĩ caivü mujare bojecubeda ñi me boje. Quénoramü.

Tito

Mamabuinore coyuiyebu Pablo bácu ñi toivaicōjeiye báquede paperayocare Tito bácu. Pablo bácu judíovacacu bácuvacari, Jesús ñi yávaiye méne beorí coyucōjeimū marejaquémavu, соуцнун ñi yávaiye méne judíova ánevure, judíova ne ju abe boje ñi coyuiyede. Lucas bácu coyurejaquemavu Pablo bácu borore Hch 7:57-8:1, 9:1-31, 13:1-28:31. Pablo bácu coyurejaquemavu Tito bácu borore ñi paperayocaque ñi toivaicōjeiye báquede ñre toivacaipōescu bácu Galacia ámicurijoborōcavure aru yóbocayocaque Corinto ámicuríimarocavure, aru yóbocayocaque Timoteo bácu máre. Javede toivaicōjenejaquemavu areyoca once paiyoca ñi paperayoca curiyocare Majeracu Jūmenijicui yávaiye mamaene coyuitucubo jívu. Diyocare toivaicōjeiquiye jipojicai toivaicōjenejaquemavu mamayoca ñi paperayocare Timoteo bácu. Pablo bácu coyurejaquemavu ñre toivacaipōescu bácu aipe ñi toivacaquiyē báquede diyocare. Toivaicōjenejaquemavu diyocare ániñju bácarōre 63 d.C. Majidivū ne dáríaiyere, curejaquemavu Macedonia ámicurijoborōi ñi toivaicōjeiyede diyocare. Diyocaque Pablo bácu coyurejaquemavu Tito bácu aipe ñaiye jañōre Jesúre ju aivure coreipōevare (1:5-9). Majide ñarejaquemavu ñi mácu aipe bueiye jañōre Creta ámicurijivavacavure (2:1-15, 3:8) aru aipe ñaiye jañōre Jesúre ju aipōevare (1:10-16, 3:1-2, 9-11, 14). Áñre ñarejaquemavu ñi mácu Jesús ñi yávaiye méne (1:1-3, 3:3-7). Ñi mácu arevure cadateicōjeni, daicōjenejaquemavu ñi yebai (3:12-13).

Pablo ñi meaicōjeino Titore (2 Co 8.23; Gá 2.3; 2 Ti 4.10)

1 ¹Yu, Pablo, toivaicōjeivū apesure iyoca paperayocare mure. Jūmenijicure memecayubu yu. Aru Jesucristo ñi yávaiye méne beorí coyucōjeimaracacubu yu máre. Nōpe ñayubu, Jūmenijicui beoimara mácu ne ju arājiyere ayu Jesús ñi yávaiye méne aru ne majinaiyere ayu caiye iye bueiye ñavene aipe ñarí Jūmenijicu ucure pōeva ne ñaiyede. ²Maja Jesúre ju aipōeva napini coreivubu Jūmenijicu jícuñre jāravu cūiméjāravu baquinóre majare. Javede, ijāravu búquiye jipocai, Jūmenijicu arejaquemavu jícuñ pōevare jāravu cūiméjāravu baquinóre. Aru Jūmenijicu borocubecube cainmua. Que baru ñacuñme yóre ñi aipe báquepedeca. ³Aru Jūmenijicui beoijāravu bácarōre coyucōjenejaquemavu ñi yávaiye méne, coreóvare ñacuñ diede majare. Aru yávacari Jūmenijicui epeimūmu,

coyucnyn ñi yávaiye méne. Que baru Jūmenijicu, majare meadapōescu, yure coyucōjenejaquemavu pōevare diede. ⁴Mu, Tito, yu toivaicōjeivū diyoca paperayocare mure. Jáve jímacupe ráyubu mu, maje ju aipe boje Jesúre cūináturra. Majeracu Jūmenijicu, maje jabocu Jesucristomaque, mearo ñacajacurí mure bojecubeda ñi me boje. Aru torojurí cure ñajacurí mure cārijimecva.

Tito ñi memecaino Cretacavure (1 Ti 3.2-7)

⁵Yu ñajocacacu mure nore, Creta ámicurijivavū, mi ñaquiyere ayu caiye iye ñaiye buojabede cāreja ina pōcavu Jesúre ju aipōevare. Que baru ímaroa coara epejacu mu ina Jesúre ju aivure coreipōevare yóre ji cōjeiye báquepe mure. ⁶Ácu pōescu mi epeimū macuyére, corecuñre Jesúre ju aipōevare, ñaiye jañvū ñre cainmua yóre pōeva “Ámecube ñai”, ne boro coyurí adaivu buojabenaiyere aipe ñi borore. Aru

ðaiye jaunv ùre cainmua yópe pøeva ne jáðovamenajiyepe aye ùi àmeina teiyede. Jaunv ùre máre ùi cunvaquiyepe jímarepaco cùinácora. Jaunv mamarare máre ne jv aye Jesúre. Aru jaunv ne ðaiye cainmua yópe pøeva “Àmenamu na”, aru “Ne bucuvare jv abema na”, ne boro coyurí adaivu buojabenajiyepe aye ne borore. ⁷Ñai Jesúre jv aipøevare coreipøecu Jūmenijicure memecayube. Que baru pøeva boro coyurí adaivu buojabejarāri ùre. Jaboteiyubejacurí jápiabecua aprevure. Aru jijecubejacurí. Ūcumejacurí pacotede ðaiyede.

Āðamateiyubejacurí. Aru vorí eabejacurí tauturare àmei dápiayequé máre.

⁸Quénora jaunv ùre ùi copv etarí jacyuyiye me ina curādaivure. Aru mearo ðacaiyue jaunv ùre aprevure cainmua. Ðaiye jaunv ùre majiéque. Mearo ðaiye jaunv ùre Jūmenijicui jáinoi. Jūmenijicure cùinácura memecaiye jaunv ùre. Aru ùi bajure curí majié jaunv ùre máre. ⁹Jaunv ùre ùi jv aye jáve iye Jūmenijicui yávaiyede jávene, ne bueiye báquede ùre, ùi cadateni buojaquiyepe aye aprevure ne buenajiyede iye bueiye jávene, ne jáðovari buojarájiyepa aye ina Jūmenijicui yávaiye méne maucvarivure ne àmeina ðaiyede.

¹⁰Que baru obedivv pøeva curivv, ye jápiabema. Quénora ðaivubu yópe ne baju urøpe. Coyuvubu ūbenina. Que baru ne coyūino bojecubevuvu caivv jápiavure náre. Aru jujovavubu pøevare máre. Judíova obedivv náre paivv cuma. Buede cuivubu, yópe arí: “Ūmva Jesúre jv aipøevacavv ne cajede buraicøjeiye jaunv náre coapa”, are cuivubu na. ¹¹Bueivubu na yópe bueiye jaubepe náre, àmei dápiayequé vorí earājivv pøeva ne tauturare. Que ðarí cārijovavubu apedāmia cūramiacavure, ne dajocarājiyepa aivv Jūmenijicui yávaiye méne. Que baru bi aicøjeyacu mv náre. ¹²Cūinácū cācoé namúipøecu Creta āmicurijivavucacu bácu arejaquemavv ùi joborøcavvrā: “Cretacavv borocurivubu cainmua.

Āimara jijecurivure paivubu. Múivubu. Aru juracurivubu máre”. Que arejaquemavv ù mácu.

¹³⁻¹⁴Aru ne borore coyurejaquemavv jávene. Que baru majicajacu paredaca ina bueivure yávaiyede jáve àmene, jáðovacuyv náre ne àmeina ðaiyede, ne coreóvarājiyepa ayv bueiye jávene, aru ne jápiarí aðabenajiyepa ayv ina judíovai coyuyiye báquede, aru ne jápiarí aðabenajiyepa ayv ina pøeva dajocavv bācavv yávaiyede jávene ne ðaicøjeiyede máre. ¹⁵Pøeva “Boropatebevuvu yv”, ne arí dápiaru, caino ne ðaino máre mearotamu. Ūbenita pøeva “Boropateivv yv”, ne arí dápiaru, aru ne jv abedu Jesúre máre, caino ne ðaino máre àmenotamu. Quénora dápiadama na àmeno matuiye. Que baru “Boropateivv yv”, aye jaunv náre cainmua. Que teni ne àmeina ðaiyede chīomenama na. ¹⁶Yópe arí, “Jūmenijicure coreóvavubu ñva”, ūbenina aivubu na. Ūbenita ne ðaiyeque jáðovavubu coreóvabevure Jūmenijicure. Ámena bajubu na Jūmenijicui jáinore. Aru jápiabeni jv abevubu ùre. Que baru ye mearo ðaiye majibema na.

Pablo ùi coyūino Titore bueiye méne

(Mt 20.28; Mr 10.45; Gá 1.4;
1 Tí 2.6; 1 P 2.9; 2 P 1.1)

2 ¹Ūbenita múcapūravv coyujacu pøevare iye bueiye jávene. ²Ina ūmva bucva corejarāri me ne ðaiyede. Aru ðajarāri yópe pøeva ne puedaimarape. Ðajarāri majiéque. Jv ajarāri parurøreca iye bueiye jávene. Jūmenijicure ūjarāri aru pøevare máre. Aru napijarari ne ñājiyede máre. ³Quédeca ina nomiva bucūrōmiva ðajarāri yópe nomiva Jūmenijicure jv aivure. Yávabejarāri borocuede aprevv borore. Aru ūcumejarari na pv ne pacotede ðaiyeta. Quénora jáðovajarari aprevure mearo ðaiyede ne baju ðaiyeque. ⁴Que teni majide ðajarāri ina nomiva bojurōmivare aipe ðaiye javrøre, ne urājiyepa aivv némarapacvva aru némarare máre. ⁵Majide ðajarāri

náre aipe ðaiye jaurõre, ne ðarãjiyepe aivũ majiéque, aru ne ðabenajiyepe aivũ ámenore, ne memenajiyepe aivũ me ne cûramiai, ne cadatenajiyepe aivũ apevũre, aru ne ju arãjiyepe aivũ torojurivũ némarepacure. Que ðaiye jaurũ náre põeva ne ámeina yávabenajiyepe aivũ Jesús ùi yávaiye méne.

⁶Quédeca coyũjacũ parurõreca ina ùmũva bojũvũre, ne ðarãjiyepe ayũ majiéque máre. ⁷Jáðovajacu náre cainũmua mi baju mearo ðaiyeque aipe ðaiye jaurõre náre. Mi bueiyede náre buejacũ caiye iye yávaiyede jávene. Árumetebejacũ aru oatuvabejacu apejiene. Que baru mi bueiye bajadéni nurié cainũmua. Aru buejacũ ina mure járiaivũ ne pueðarãjiyepe ayũ mure aru mi bueiyede máre. ⁸Coyũjacũ náre iye yávaiyede jávene, põeva “Ámecube ñai”, aru “Ámene buebi ù”, ne arĩ buojabenajiyepe ayũ. Que teni apevũ maucũvarivũ baru maje bueiyede, cũyoje tenajarama, ne boro coyũrĩ aðarĩ buojabe boje majare.

⁹Quédeca coyũjacũ ina memecaipõevare, ne ju arãjiyepe ayũ ne jabovare cainũmua. Ðajarãri ina memecaipõeva yópe ne jabovai urõpe, cojuquiyepere náre. Aru ámeina yávabejarãri ne jabovare. Quéñora pueðajarãri náre cainũmua. ¹⁰Aru ñavamejarari ne jabovai cũvaede. Quéñora jáðovajarari ne jabovare ne mearo ðacaiyede cainũmua. Que teni ina memecaipõeva me járe ðarãjarama apevũ põevare iye Jũmenijicui yávaiyede, majare meadayũ, ùi bueicõjeiyede majare.

¹¹Que baru Jũmenijicũ meacũ baju jáðovaimi ùi mearo ðacaiye bojecubeda majare. Que teni Jũmenijicũ buojare ðayube caivũ põevare ùi meaðaiyũrĩduimara márãjivũre. ¹²Que baru majidivũbu maja majare jaurõre maje ðajocaiye maje ámeina teiyede iye Jũmenijicui ubede, aru maje ðajocaiye maje ðaiyũede yópe Jesús ju abevũ ne ðaiyepe máre. Quéñora

maje cuede ijãravũ jaurũ majare maje ðaiye majiéque, maje mearo ðaiye Jũmenijicui jáinoi, aru maje memecaiye máre Jũmenijicure ùi urõpe. ¹³Que ðaiye jaurũ majare maje napini coreiyede torojurivũ iye jáve vaiquýyede: Jesucristo, majare meadayũ, maje ju aimũ pũeno meacũ baju, copaidacuyũme ijãravũ. ¹⁴Jesucristo boarĩ jarũvaicõjenejaquemavũ ùi bajure ùi mauvare, meaðacuyũ majare maje ámeina teiyede jarũvarĩ. Que ðaicõjenejaquemavũ, meara ðacuyũ majare, maje torojurĩ memecarãjiyepe ayũ ùre me ù jinape.

¹⁵Que baru buejacũ mũ caiye iyede. Coyũjacũ parurõreca ina Jesús ju aipõevare, ne ðarãjiyepe ayũ caiye iyede. Jáðovajacu ina põeva nópe ðabevũ cãreja aipe ðaiye jaurõre náre. Aru buejacũ náre paruéque. Que teni ámeina jáicõjemejacũ põevare mure.

**Aipe ðaiye jaurõre Jesús ju
aipõevare
(Ef 5.26)**

3 ¹Árure ðajacu mũ ina Jesús ju aipõevare jaurõre náre ne ju aipe ina jabovare aru cõjeipõevare máre. Ðajarãri yópe ina jabova ne ðaicõjeiyepe. Aru napini corejarãri, mearo ðarãjivũ cainũmua. ²Ámeina yávabejarãri apevũ borore. Jarabevũva cãrijimene ðajarãri põevare. Aru duibareca meara põevape pueðajarãri caivũ põevare cainũmua.

³Javede maja máre árumevũ dápiabevũ barejávũ. Aru ju abevũ barejávũ Jũmenijicure. Pũeno ámeno nũivũ barejávũ, ina bueivũ yávaiyede jáve ámene ne jujovaiye boje majare. Buojabedejavũ ðajocavũ maje ámeina ðaiyũede, cojuquiyepere majare. Dápiare cuivũ barejávũ ámeina ðaiyede cainũmua. Aru jorojivũ barejávũ. Apevũ ubedejaima majare. Aru majavacari ubedejavũ majevũre máre. ⁴Ûbenita Jũmenijicũvacari, majare meaðaipõecũ, jáðovaimi ùi baju meacure aru ucure põevare máre. ⁵Que baru meaðaibi majare. Ûbenita meaðabebi majare,

maje mearo ðaríduiye boje. Quénora meadaibi majare ùi baju cõmaje ãroje jáiye boje. Maje ãmeina teiyede jaruvaiibi, meadacuyũ majare. Que teni ñai Espíritu Santo apũre ðaibi majare, maje apurãjiyepere ayũ apué mamaeque. ⁶Jesucristo, majare meadaipõecu, cure ðaibi ñai Espíritu Santore maje ùmei. Que baru Jũmenijicu daroibi ñai Espíritu Santore maje ùmei, ùi caatequiyepe ayũ majare urarõreca. ⁷Que teni Jũmenijicu meadaibi majare, ùi coavaiyede majare maje ãmeno ðaiyede jaruvári. Òi mearo ðacaiye bojecubeda ùi me boje, “Boropatebevu muja ji jáinoi”, arí coyũibi majare. Que baru caride maja Jũmenijicui máramu. Aru jáve cuvarãjaramu járavu cũiméjãravu baquinõre. Que baru napini coreivũbu ðiede.

⁸Jãvetamu die. Que baru uvũ yũ mi coyũquiyede caiye iyede parurõreca, ina Jũmenijicure ju aipõeva ne mearo ðarãjiyepere ayũ cainumua. Iye bueiye jáve métamu. Aru bojecuetamu máre. Que baru caivu põeva majima aipe ðaiye jaurõre náre, iye bueiye jáveque. ⁹Ubenita jarabejacu ubenina apenvũque. Aru ãrũre ðabejacu põevare néñecuva mácavũ ne ãmiã coapa. Coyũbejacu náque, ina aivũre, “Mu coreóvabevu aipe aiyurõre Jũmenijicui ðaicõjeiyede ùi coyũiye báquede Moisés bácare”. Náque jarabejacu mu. Caiye iye bojecubevũ aru caatebevu máre. ¹⁰Ácu põecu Jesúre ju ayũ ùi maucũvaríduru apenvũ Jesúre ju

aipõevare, ðajocacõjejacu ùre ùi que ðaiyede. Òi ðajocabedu, ðajocacõjejacu ùre cojedeca, ùi ðabequiyepe ayũ ðiede. Aru ùi ðajocabedu cãreja, ye yóvabejacu ùre. ¹¹Òi que ðaiye boje, coreóvaivu mu ñai ùmu ãmecũ bajure. Óvacari majide ðaibi apenvũre, ùi ãmeina teiye ðajocabe boje. Órecabe ñãjicuyũ.

Pablo ùi ðaicõjeino Titore
(Hch 18.24, 20.4; 1 Co 16.12; Ef 6.21-22; Col 4.7-8; 2 Ti 4.12)

¹²Yũcapũravu cuquijivu Nicópolis ãmicurĩimaroĩ uracorore. Que baru jaroquijivu mi yebai Ártemare o Tíquicore. Ñai ùmu ùi eaquiyede nore, meatejacu jácũncũyũ Nicópoli, yũre corũcũyũ noi. ¹³Aru meatejacu caatecũyũ ñai ðaicõjeiyede bueipõecure ùi ãmiã Zenas aru Apolore máre. Jíjacu náre caiye náre jauéde, ne buõjarãjiyepere ayũ ne curãnuiyede. Ye apeljẽ jaubejadeni náre. ¹⁴Aru caivu apenvũ ina Jesúre ju aipõeva quédeca buejarãri, na máre mearo ðarãjivu aru caãatenajivu ina cõmaje ãrojarivũre náre jauéde. Que teni mearo ðarãjarama ne cuede ijãravui.

Pablo ùi meaicõjeino Titojãre

¹⁵Caivu ina Jesúre ju aipõeva yãque curivũ meaicõjedama mure. Meajarari caivu ñũjevũ, Jesúre ju aipõeva nócavũ, ñũjare urivũ. Aru Jũmenijicu mearo ðacajacurĩ caivu mujare bojecubeda ùi me boje. Quénoramũ.

Filemón

Mamabuinore coyuiyebu Pablo bácu ùi toivaicõjeiye báquede paperayocare Filemón mácuere, Colosas ámicuríimarocacure. Pablo bácu judíovacacu bácuvacari, Jesús ùi yávaiye méne beorí coyucõjeimã marejaquemavu, соучсyу ùi yávaiye méne judíova ámevure, judíova ne ju abe boje ùi coyuiyede. Lucas bácu coyurejaquemavu Pablo bácu borore Hch 7:57-8:1, 9:1-31, 13:1-28:31. Javede toivaicõjenejaquemavu pucayoca ùi paperayocare Tesalónica ámicuríimarocavure, aru pucayoca ùi paperayocare Corinto ámicuríimarocavure, ùi paperayocare Galacia ámicurijoborõcavure, aru ùi paperayocare Roma ámicuríimarocavure máre. Apevu ne dápiayepe, javede toivaicõjenejaquemavu ùi paperayocare Filipos ámicuríimarocavure. Toivaicõjenejaquemavu yóbecuriyoca ùi paperayocare ániãju bácarõre 60 d.C., ùi cuede ámeina teivure jëni jacoĩnami Roma ámicuríimaroi, cüináyocare Éfeso ámicuríimarocavure, apeyocare Colosas ámicuríimarocavure, aru apeyocare Filemón mácuere. Tíquico bácu nuvarejaquemavu iyoca yóbecuriyocare cüináuru ùi nu iyede Roma ámicuríimarore pu Asia ámicurijoborõi. Pablo bácu coyurejaquemavu ùre toivacaipõecu bácuere aipe ùi toivacaquie báquede diyocare.

Onésimo mácu, Filemón mácu yebacacu, dupini nuñu mácu ùi jabocure jocarí, earejaquemavu Roma ámicuríimaroi. Nore ùi jápiayede Pablo bácu coyuiyede Jesús ùi yávaiye méne, ju arejaquemavu diede. Pablo bácu ùre toivacaipõecu bácuere toivaicõjenejaquemavu diyocare, jëniacuyu Filemón mácuere ùi copu etaquiyepere ayu Onésimo mácuere yõpe ùi copu etajuroepe Pablo bácu bajure.

Pablo ùi meaicõjeino Filemóre

(Col 4.17)

¹ Yu, Pablo, buoimu ji coyuiye báque boje Jesucristoi yávaiye méne, toivaicõjeivu apecure iyoca paperayocare mure, Filemóre. Yu aru Timoteo, majecu ùi ju aipe boje Jesús, meaicõjeivubu mure, ñuje umure ñujape memẽure. ² Meajarari ina Jesús ju aipõeva cójjivaivu mi cãrami. Aru Apia máre, ñajeco õi ju aipe boje Jesús meajacorí õ. Aru Arquipo máre meajacorí ù. Ñujape coyuii Jesús ùi yávaiye méne apevu ne maucãvaedeca ñujare. ³ Majepacu Jãmenijicu, maje jabocu Jesucristomaque, mearo ñacajacorí mujare bojecubeda ùi me boje. Aru torojurí cure ñacajacorí mujare càrijimevãva.

Filemón ùi urõ põevare aru ùi ju aino Jesucristore

⁴⁻⁵ Mũ, jícu, Filemón, ji coyuiyede jipacu Jãmenijicucue torojuede jívaivu

mure boje cainũmã. Jápiavu mi borore mi uede Jesús ju aipõevare aru mi ju aiyede maje jabocu Jesús. Que baru jívaivu mearore Jãmenijicure. ⁶ Aru ina põevare, mi ju are ñaimara Jesús, mi coyuiye boje náre ùi yávaiye méne, yu Jãmenijicucue náre máre jëniavaivu, ne coreóvarãjiyepere ayu me caiye iye Jãmenijicui mearo ñacaquiyede majare, maje cue boje Jesucristoque cüinávupe. ⁷ Mũ, jícu, caride torojavu yu. Mũ torojure ñaivu yure mi me caateiyede ina Jesús ju aipõevare, mi ue boje náre.

Pablo ùi jëniaino Filemóre ùi caatequiyepere ayu ñai yebacacure, Onésimore

(Col 4.9)

⁸ Que baru jëniavu mure mi caatequiyepere ayu. Yu caateicõjeiyubevu mure ji paruéque, Cristoi parure ñaive báquede yure. ⁹ Quénora jëniavu mure, mi

cađatequiyepre maje ue boje, Cristoi cure đaiye báquede majare. Bwucubw yu. Aru ji bueiye boje Jesús ũi yávaiye méne bwoimwmu caride.

¹⁰Jēniaivw mure mi cōmaje āroje jáquiyepre ayw ñai Onésimore. Ũi jápaiaye báquede ji coyuiye báquede Jesús ũi yávaiye méne ji cwedeca yui āmeina teivure jēni jacoñami, ju āme Jesúre. Que baru jímacupe páyube ũ. ¹¹Javede ũi yebacawe báquede mure, ñai Onésimo cađatebetequemaww mure. Ũbenita caride cađateibi mure aru yure máre. ¹²Jacopaiyovaquijivw ũre mi yebai cojedeca. Copw etajacu ũre yópe mi copw íjuroepedeca yure. ¹³Yúcapūravw bwoimwmu caride ji coyuiye báque boje Jesús ũi yávaiye méne. Aru yw coreóvaivw iyede: Mw cwcw baru yui, cađatejebu yure. Ũbenita mw cubev w yui. Que baru mautede đaiyuríduvw Onésimore, ũi cwquiyepre ayw yore ji yebai, ũi cađatequiyepre ayw yure yópe mi baju cađatejuroepe yure.

¹⁴Ũbenita yw mautede đabevw ũre ji yebai, mi ju aye jawé boje yure cāreja. Que baru ũbev w cađatecwure yure ji cōjeiye boje mure. Quénora wv w cađatecwure yure mi baju ue boje. ¹⁵Ñai mi yebacaw Onésimo apenw coateyw bácw bateichwame mure jarwvarí, mi cwaquiyepre ayw ũre bedióva cojedeca aru cainwma. ¹⁶Caride yebacaw bacwú ámemi ũ. Ũ máre, majape, ju aibi Jesúre. Que baru majecupe, maje umwme ũ. Ũ pare cađateibi yure. Ũbenita pweno baju cađatecwure mure.

¹⁷Que baru mw coreóvaw baru majare cwurivure Jesucristoque cūinávure, copw

etajacu Onésimore nopedeca mi copw íjuroepe yure. ¹⁸Ũi cue báquede máque, mure āmedaru, meadacwumw yw mure ũre boje. Aru ũi cue báquede máque, mure bojecube đaru, bojedacwumw yw mure ũre boje. ¹⁹Yávacari toivaivw ji pwruque. Jáve bojedacwumw mure. Ũbenita ārure đaiyubev w mure mi baju bojecube đayure yure, ji coyuiye báque boje Jesús ũi yávaiye méne mure. Que baru múvacari bojecube đavw yure mi cwaquiyede jāravw cūiméjāravw baquinóre. ²⁰Mw, jícw, maje ju aye boje cūináturw maje jabocw Jesucristore, cađateni, torojure đajacu yure.

²¹Yw toivaicōjeivw apesure iyoca paperayocare mure, ji majié boje đacwure jáve yópe ji jēniainope, aru ji jēniainore máque pweno baju máre. ²²Aru meadacajacu yure cūinátucubure, ji cwquitucubv w ji jácwquiyede mi yebai. Mwja jēniadavw Jūmenijicwque, ũi etavaquiyepre aivw yure āmeina teivure jēni jacoñamine jocarí. Que baru mujare jácwuiyurí, napini coreyubu yw.

Pablo ũi meaicōjeino Jesúre ju aipōevare

(Hch 12.12, 25, 13.13, 15.37-39, 19.29, 27.2; Col 1.7, 4.10, 12, 14; 2 Ti 4.10-11)

²³Épafas meaicōjeimi mure. Ũ máre bwoimwme yáque, ũi coyuiye boje Jesús ũi yávaiye méne. ²⁴Ina apeww máre, Marcos, Aristarco, Demas, aru Lucas máre meaicōjedama mure. Caivw ina yáque memecaivabu Jesúre. ²⁵Maje jabocw Jesucristo mearo đacajacurí mujare bojecubeda ũi me boje. Quénoramw.

Hebreos

Mamabuinore coyuiyebu iyoca paperayocare cūinácu pōescu ũi toivacaino mácarō ina judíoiva Jesúre ju aivu Hebreos āmicurivu bācavure. Caivu majibevu ũamene toivacayu bācure diyocare. Ũbenita iyede majivu: Nai toivacayu bācu diyocare jápiabedejaquemavu Jesúre, quénora jápiarejaquemavu Jesús ũi yávaiye méne coyuirpōeva mácavure (2:3). Ũi toivacaimara ne cójijinocacu āmenejaquemavu (13:7). Copaiyurejaquemavu ũi toivacaimara ne yebai (13:19). Pablo bācuí yóvaimaracacu bācu barejaquémavu (13:23). Italia āmicurijoborōcavu Jesúre ju aipōeva mácavu ne yóvaimu marejaquémavu (13:24). Obedivu majidivu ne dápiyaiyepe, Apolos bācu toivacarejaquemavu diyocare (Hch 18:24-28). Apevu ne dápiyaiyepe, Lucas bācu toivacarejaquemavu diyocare, diyoca ārojariyoca boje apeyoca pucayoca Lucas bācuí toivacaiye báquepe. Apevu ne dápiyaiyepe, Bernabé bācu toivacarejaquemavu diyocare (Hch 11:22-26, Gá 2:11-21). Áimarocavu bācavure mamarumure eaiyoca bācarō diyocare máre, aru āimaro ũai toivacayu bācu ũi curiimaro ũi toivacaiyede diyocare máre caivu majibevu. Apevu “Jerusalén āmicuriimarocavure” arī, aru apevu “Antioquia āmicuriimarocavure” arī, apevu “Roma āmicuriimarocavure” arī, aru apevu “Alejandría āmicuriimarocavure”, arī dápiaiyubu. Toivacarejaquemavu Jūmenijicui cūrami Jerusalén āmicuriimarocadāmi mácarōre churarava ne tuvarī jaruvarājiye jipocai, que baru āniyū bācarōre 70 d.C. jipocare. Majidivu ne dápiyaiyepe, toivacarejaquemavu āniyū bācarōre 66 d.C.

Nai toivacayu bācu diyocare toivacarejaquemavu ina judíoiva Jesúre ju aivu bācavure, ne dajocabenajiyeye ayu ne ju aiyede. Dápiaridivuvu barejaquémavu oatvarājivu, mearore jínajivu Jūmenijicure yópe ne jíye báquepedeca ne Jesúre ju arājiye jipocare. Toivacarejaquemavu coyuyu na mácavure yópe ne oatvaiyeye majibeve, Jūmenijicui bojecubede đaiye báque boje javede, Jesúí yainfburu nacajaiye báquede, āniñami javedadāmi ũre mearore jíñami mácarōre, aru ānina ũre jícaiyeđe jipōeva, sacerdoteva bācavure, aru ānina āimara ũre jícaimara mácavure máre. Aru ũi bojecubede đaiyede caiye iyede epedejaquemavu Jesúre cūinácura majare jícaiyeđe jiyure, aru epedejaquemavu Jesúí jivede cūinárora ũre jícaiyeđe, aru epedejaquemavu cavarō mearore cūinárora maje ũre mearore jíñamine. Que baru ũai toivacayu bācu jádovarejaquemavu Jūmenijicu “Que đarājare”, ũi aino pōevare Jesúque mearore ũi aino mácarō Moisés bācuque pūeno, aru Jesúvacari meacu bajure caivu Jūmenijicure coyucaipōeva mácavu pūeno.

Jūmenijicu ũi coyūino mamacuque pōevare

(Mt 22.44; Jn 1.1-3; Col 1.15-17)

1 ¹Javede Jūmenijicu ũi yávaiyede coyucaipōeva mácavure coyucōjenejaquemavu. Majeñescuva mácavure coyurejaquemavu. Obedinuma yávorejaquemavu. Apecu Jūmenijicui yávaiyede coyucaipōescu apede coyurī aru apecu máre apede, obedivu coyurejaquemavu. Que teni Jūmenijicu pōevare jádovari búrejaquemavu aipe ārojacure. ²Ũbenita

caride, ijāravu buojaijārvavure, maje curijārvavure, Jesucristoi darīburu yóbore, Jūmenijicu yávari jebeibi majare mamacuque. Ũrecabe Jūmenijicui cuedaicōjeimū mácu ijārvavure aru caiye ijārvavquede. Ũrecabe Jūmenijicu pūrucuvaicōjeimū mácu caiyede, ũi cuedaquiye jipocamia. ³Ũrecabe jádovañu Jūmenijicu meacu bajure. Coreóvaivubu aipe ārojacure Jūmenijicure mamacuí đaiyeque aru ũi coyuiyeque máre. Ũrecabe cūináturu jípacu Jūmenijicuque. Ũrecabe caiyede cure đayū, ũi cōjeiyeque, ũi yávaiye

paruéque, caiye n̄quiyere ayu yópe Jūmenijicui n̄rópe. Ėrecabe jaruvayu bácu maje ámeina teiyede, Jūmenijicui ārumetequiyere ayu diede, maje curājiyere ayu yópe docucubevure maje ūmei. Que teniburu yóboi, ėrecabe dobacu bácu jípacu Jūmenijicu parucu caivu p̄eno ūi meap̄uravui cavarō mearoi, ūi c̄vae boje caiye jípacui paruéde ėpe, jabotecuyu caiyede. Aru nore cubi caride. ⁴Jūmenijicu mamacure parure ðarejaquemav̄u caivu ángeleva p̄eno, ūi jaboteicōjeiyede ėre caiyede. Aru quédeca Jūmenijicu āmidorejaquemav̄u mamacure “jímacu”, jáðovacuyu ėre parucure ina ángeleva p̄eno.

Jūmenijicui mácu parucu caivu ángeleva p̄eno

(Mt 22:44; Mr 12:36; Lc 20:42-43)

⁵Ácu ángele cubebi ėre, yópe arī, Jūmenijicui toivaicōjeino mácarōre: Jímacurecabu m̄. Caride caivu ne jápiainoi yávacari jaboteicōjeiv̄u mure, arejaquemav̄u Jūmenijicu mamacure.

Quédeca ácu ángele cubebi ėra, yópe arī, bedióna apeno Jūmenijicui toivaicōjeino mácarōre:

Yu bacuyámu ūi pacu. Aru ū macuyáme jímacu, arejaquemav̄u Jūmenijicu, ūi daroquiyede mamacure.

⁶Aru Jūmenijicu ūi daroquiye jírocamiareca mamacu parucure, caivu ne p̄edarājimure, bedióna ij̄aravui, yópe arī, coyucuyume:

Caivu ina ji ángeleva mearore jíjarāri ėre, Jūmenijicu mamacurā acuyume.

⁷Que baru ángelevacap̄urav̄u ne borore yópe arī, toivaicōjenejaquemav̄u Jūmenijicu:

Jūmenijicu ūi daroimara ángeleva ūnevure paivure ðaibi náre. Náre, ėre memecav̄ure, toa uruinope paivure ðaibi ū, ne n̄raiyē boje ne memecaiyede ėre, arī coyurejaquemav̄u.

Que arī, jáðovarejaquemav̄u ángeleva oatuvav̄ure aru ðajocav̄ure ne memecaiyede ėre. ⁸Ėbenita mamacucap̄urav̄ure yópe arī, toivaicōjenejaquemav̄u Jūmenijicu:

M̄, Jūmenijicu baju, cain̄mua p̄evare jabotecuyumu m̄. Mútamu meacu baju. Que baru cain̄mua p̄evare jabotecuyumu m̄ ména. Aru náre mearore ðare ðacuyumu yópe mi n̄rópe. ⁹Mearo ðaiyede ðaiyuv̄u m̄. Cain̄mua ðaiv̄u m̄ yópe ji ðaicōjeiyere. Aru ámeno ðaiyede ðaiyubev̄u m̄. Cain̄mua ðabev̄u m̄ yópe ji ðaicōjemere. Que baru yu, Jūmenijicu, mi mearore jímu, beoiv̄u mure, caivu ne p̄edaimu macuyáre, mi jaboteiyede náre. Yu epeiv̄u mure parucure caivu mi yóvaimara, ina ángeleva p̄eno. Aru mure ne p̄edarājimu mae boje pare torojure ðaiv̄u yu mure aru ina ángeleva mi yóvaimarare máre, Jūmenijicu arī coyurejaquemav̄u mamacure.

¹⁰Bedióna cojedeca Jūmenijicu, yópe arī, coyurejaquemav̄u mamacure:

M̄, caivu ne jabocu yáque, mamar̄mure mávacari c̄edarejav̄u yo p̄evai curijoborōre. Aru mávacari c̄edarejav̄u cavarōre máre. ¹¹Caiye iye mi c̄edaiye báque c̄iiquiyebu. Ėbenita múcap̄urav̄u cain̄mua c̄imécubu. Quéhora sc̄uyumu cain̄mua. Caiye iye mi c̄edaiye báque yópe cuitótcaje javcacajere pojequiyebu. ¹²Yópe p̄eva ne p̄epeiyepedeca ne cuitótcaje javcacajede, ne doiyede mamacaje cuitótcajede, nopedeca mávacari p̄epejene ðacuyumu caiye mi c̄edaiye báquede, mi epeiyede joborō mamarore aru cavarō mamarore máre. Yópe p̄eva ne oatuvaiyere ne cuitótcajede, nopedeca mávacari oatvacuyumu

caíye mi cuédaiye báquede.
 Ûbenita mácapūravu
 oatuvabecubu cainumua.
 Bucutebecubu. Aru yaibécubu
 mu, arí toivaicōjeneaquemavu
 Jūmenijicu.

¹³Aru ácu ángele cubebi úre, yópe arí,
 Jūmenijicui toivaicōjeino mácarōre:

Dobajacu ji meapūravu, mi cavae
 boje paruéde yūpedeca. Aru
 yu epecuyumu mi mauvare mi
 cuboba cāchinoi. Que teni mure
 vainí jaruvare đacuyumu yu náre,
 mi jabotequiyepa ayu náre, arí
 coyurejaquemavu Jūmenijicu
 mamacure.

¹⁴Ûbenita caivu ina ángelevacapūravu
 torojurivu memecaivubu Jūmenijicure
 aru mearore jívubu úre. Nāmu
 Jūmenijicui daroimara, pōeva ne
 jámemara, cadatenajivu maja ũi
 meadaimara márajivure, cvarājivure
 caiye iye méne Jūmenijicui đacaquiyede
 majare.

**Jūmenijicu ũi meadaino majare me
 baju**

(Hch 2.22; 2 Co 12.12)

2 ¹Caride coreóvaivubu maja
 Jūmenijicui mácu parucure caivu
 ina ángeleva pueno. Que baru pueno
 baju me jápiarí adaiye javvu majare
 iye ũi yáva iyede javene maje jápiaiye
 báquede, maje nájimenajiyepa aiyepa
 maje jápiarí adabe boje. Diede ju arí,
 đaiye javvu majare yópe maje jápiaiye
 báquedepedeca. Que đavv baru, ju are
 nuri, árūmetebenajivubu aipe đaiye
 javrōre majare, maje bíjabenajiyepa aivu
 maje ũmene. Ûbenita maje ju aiyede
 đajocarí buivu baru, bíjare nurajivubu
 maja maje ũmene.

²Javede Jūmenijicu ũi ángelevare
 coyucōjeneaquemavu ũi đaicōjeiyede
 Moisés bácu, ũi toivarí epequiyepa
 ayu diede majeñecuva mácvare, ne
 majinajiyepa ayu diede. Iye ángeleva
 ne coyuiye báque Jūmenijicui
 yáva iye javē marejaquémavu. Que
 baru caivu vainí tuivu bācvu diede

nájinejaquemavu ne vainí tuíye báque
 boje, yópe Jūmenijicu “Ina vainí tuivu
 ji đaicōjeiyede nájinajarama”, ũi aiyepa
 báquedepedeca. Aru caivu diede ju abevu
 bācvu máre nájinejaquemavu ne ju
 abe báque boje, yópe Jūmenijicu “Ina
 ju abevu yure nájinajarama”, ũi aiyepa
 báquedepedeca. ³Que baru coreóvaivubu
 maja javē nájivu bācvure ina jápiarí
 adabevu bācvu ángelevai yáva iyede.
 Pueno baju coreóvaivubu maja javē
 nájinajivure majare, jápiarí adabevu
 baru Jūmenijicui yáva iye mamaene,
 ũi coyuiyede caiye iye ũi mearo
 đacaquiyede majare, ũi meadaiyede
 majare me.

Yópe epedajaquemavu majare
 ũi yáva iye mamaene. Maje jabocu
 Cristovacari mamamucacu
 coyurejameda Jūmenijicui meadaiyede
 pōevare me baju. Aru ina úre jápiaiye
 bācvu coreóvare đarejaima majare
 Cristoi yáva iyede javene ne coyuiyede
 diede majare. ⁴Aru Jūmenijicu
 máre coreóvare đabi majare Cristoi
 yáva iyede javene ũi đare đaiyeque
 diede coyūipōevare caijīe pōeva ne
 đarí majibede, ne jámene, aru ũi đaiye
 paruéde máre, aru ũi jini coavaiyeque ũi
 Espiritu Santoi majiécārōre ũi pōevare
 yópe ũi urōpe, ne cadatenajiyepa ayu
 apevure.

Jesucristo pōevare meadapōecu

(Fil 2.6-11; He 12.2)

⁵Jápiarí adaiye javvu majare iye
 Jūmenijicui yáva iye mamaene, ũi
 coyucōjeiyepa báquede Cristore, maje
 jabotenajiyepa boje Cristoque. Ángeleva
 āmenejaquemavu Jūmenijicui
 jaboteicōjeimara ũi jaboteinocavure
 mamajāravu edaquijāravu baquinóre,
 ijāravu ji mujare yávaijāravure. ⁶Quénora
 maja pōeva marejaquémavu Jūmenijicui
 jaboteicōjeimara ũi jaboteinocavure
 mamajāravu edaquijāravu baquinóre.
 Yópe arí, toivaicōjeneaquemavu
 Jūmenijicu ũi yáva iyede:

Mu, Jūmenijicu, pōeva
 parubevureca mi jáinoi aru

ãrué jaubenovacari mure náre, ãruri dápiayubu mu náre. Põeva parubevureca mi jáinoi aru coreiye jaubenovacari mure náre, coreyubu mu náre. ⁷Obebenumua epeivũ mu põevare quíjino parucu ángeleva cáchijinomía. Ëbenita que ñayuvacari, epeivũ mu ina põevare meara baju caivũ ne jáinoi. Aru caivũ pueðaðama náre. ⁸Que teni jabotede ðaivũ mu ina põevare caiye mi cuedaiye báquede, arí toivaicõjenejaquemavũ Jũmenijicu.

Que arí, Jũmenijicu põevare jaboteicõjenejaquemavũ caiyede. Ye jaboteino cubeno aiyurõtamu no. Ëbenita caride jámevũ maja põevare caiyede jaboteivure. ⁹Quénora coreóvaivubu maja Jesúrã. Obebenumua Jũmenijicu epedejaquemavũ ùre quíjino parucu ángeleva cáchijinomía. Nópe ðarejaquemavũ Jũmenijicu ùi ue boje caivũ põevare, Jesús ùi yaicáquiyepe ayũ majare boje. Ëbenita caride coreóvaivubu maja Jesúre Jũmenijicui epeimure meacu bajure aru maje pueðaimure máre, ùi ñájiye báque boje ùi yayiede.

¹⁰Jũmenijicu ye jaurõ cubecu ðarejaquemavũ Jesúre, ùi ñájiyede earí buojare ðacuyũ obedivũ põevare Jũmenijicui mára máravivũva, maje curãjiyepe ayũ meara baju Jũmenijicuque cavarõ mearo ùi curõi. Meavũ Jũmenijicu, ñai cuedayũ bácu caiyede ùi cuvaiyue boje diede, ùi eavare ðaiye majare ùi yebai ùi mára máravivũva. Aru Jesúrecabe yópe ùi jipocateni nuvaiyepe ùi mái, majare meðarí eare ðayũ caiye iye Jũmenijicui mearo ðacaquiyede majare. ¹¹Majare meðarí, Jũmenijicu jina tede ðaibi Jesús. Ñai jipocateyũ põevare Jũmenijicu yebai aru maja ùi jipocateimara máre cūináturu cvarivũbu majepacu Jũmenijicure. Que baru Jesúvacari “mũja, jívũ” ayũ majare,

cũyebebi ù. ¹²Yóbesue ùi coyũiyede, Jesús “jívũ”, arí coyũrejaquemavũ maje borore, ùre ju aipõevare. Apenũmu yópe arejaquemavũ jípacu Jũmenijicure:

Coyũcuyũmu mi borore jívure.

Ne cójjiyede, mearore jínajivũ mure, yuríacuyũmu yũ, mearore jícyũ mure, arejaquemavũ jípacu Jũmenijicure.

¹³Yópe máre arejaquemavũ:

Yúvacari ju acuyũmu jípacu

Jũmenijicure jáve, yópe ina jívũ ne ju aiyepe ùre, arejaquemavũ ù.

Aru cojedeca yópe máre arejaquemavũ:

Yui cuvũ yũ jívũque, ina põeva Jũmenijicui jímara mácavũque, arejaquemavũ ù, coyũyũ maje borore, ùi eavarãjimarare Jũmenijicu yebai.

¹⁴Maja põevatamu. Que baru Jesúvacari “Põecu tecuyũmu” aríburu, majape páyureca tedejaquemavũ ù. Põevape ãrojarejaquemavũ ù. Que tedejaquemavũ parubede ðacuyũ ñai abujuvai jabocure, ñai cuvacu ùi cõjeimarape caivũ põeva jidurivũ ne yainájiyede, ne boropateiyede, ne ãmeina teiye boje. Jesús ùi yayiede parubede ðarejaquemavũ ñai abujuvai jabocure. ¹⁵Que teni meaðaibi põevare. Javede maje cœe báquede abujuvai jabocui cõjeimara curjavũ maja, maje jidúe boje yainore. Ëbenita yópe ne jodeiyepẽ cõjeimarare, nopedeca Jesús ñejaquemavũ majare abujuvai jabocui paruéde jocarí, maje jidubenajiyepẽ ayũ yainore. Ëi bojedaiye báque boje caiye maje ãmeina teiyede ùi jiveque, boropatebevũbu maja caride. Que baru jidubevũbu maje yainájinore.

¹⁶Me coreóvaivubu maja iyede: Jesús põetebedejaquemavũ, cadatecacuyũ ángelevare. Quénora põetedejaquemavũ, cadatecacuyũ maja põevare, Abraham mácui pãramenare, maje ju aiye boje Jũmenijicure. ¹⁷Nópe ðacuyũ baru, cūináturu teiye jaurejaquemavũ Jesúre yópe ù jivũ Jũmenijicure ju aivũpe. Cūináturu majapedeca tebecu baru, sacerdotevare jaboteipõecu teni

buojabejebu ñ, Jūmenijicui cōjeiyepe ñacayū pōevare boje, ñi me jāquiyepē ayū majare. Cūináturureca majape páyū teni, cōmaje āroje jāri, aru dajocabecūva ñari ũre ñaiye jauéde, sacerdotevare jaboteipōescu teni buojarejaquemavū ñai Jesús. Memecarejaquemavū Jūmenijicure, ñi ārumetequiyepe ayū maje āmeina teiyede aru ñi me jāquiyepē ayū majare, Jesúi jācaiye báque boje ñi bajure Jūmenijicure. ¹⁸Jesúvacari abujuvai jabocui jujovaiyūmā maridurejaquemavū. Aru ñājinejaquemavū diede. Que baru caride ũrecabe cadateni buojayū majare, abujuvai jabocui jujovaiyūmarare.

Jesús parucu Moisés bācu pueno

3 ¹Caiye iye ji coyūiye mūjare jāvetamu. Que baru mūja, jīvū, Jesúre ju aivū aru Jūmenijicu jina, yápe paivūbu mūja máre Jūmenijicui cutuimara mácavū ñ jina mārājivū, cavarājivū caiye iye Jūmenijicui mearo ñacaquiyede majare. Me ārūjara mūja Jesúre, coreóvarājivū me aipe ārojacure aru aipe ñayure. ũrecabe Jūmenijicui daroimū mácu, ũre coyūcaipōescu, majide ñacayū majare Jūmenijicu “Que ñarājare” ñi aino mácarōre majare. Aru sacerdotevare jaboteipōescube ñ, cadatecayū majare, maje ñarājīyepe ayū yópe maje aiyepepedeca, maje ju aiye boje Jūmenijicure. ²Jūmenijicu beorejaquemavū Jesúre ũre memecaipōescu.

Aru Jesús memecaibi Jūmenijicure dajocabecūva yópe ũre ñaiye jauōre, yópe Moisés bācui memecaiye báquepe Jūmenijicure dajocabecūva, ñi jaboteiyede Jūmenijicui pōeva Israecavū bācavure. ³Ūbenita Jesúre pueñaiye jauvū Moisés bācure pueñaiye pueno. Moisés bācu cūinācu Jūmenijicui pōevacacu barejaquemavū. Ūbenita Jesús, caiyede cuedayū bācu, Jūmenijicui pōevare máre ñarejaquemavū. Nopedeca pōescui cūramine ñarīburu yóboi, pueno baju, “Ñai pōescu cūramine ñaiyede majibi

me”, pōeva adama. Ūbenita majiéda, “Cūrami meadānimu”, adama na. Que baru, ñai ñayū bācu ne pueñaimume ñi ñaiye báque pueno. Aru ñai cuedayū ne pueñaimume ñi cuedaimara pueno. ⁴Cūrami cubevū pōescu ñinamine ñayū cubedu. Ūbenita Jūmenijicurecabe caiye ijāravūquede cuedayū bācu.

⁵Moisés bācu, Jūmenijicui pōevacacu. Jūmenijicure memecarejaquemavū, coreyū ñi pōevare. ũre memecaiyūrejaquemavū. Que baru dajocabecūva ñarejaquemavū yópe ũre ñaiye jauōre. Moisés bācucapūravū ñi coyūiyeque aipe ñaiye jauōre Jūmenijicui pōevare, coreóvare ñarejaquemavū náre jāvene iye Jūmenijicui coyūquiyede aipe ñaiye jauōre obedījūna yóboi Jesucristoque. ⁶Ūbenita Cristocapūravū Jūmenijicui mácube. Aru jabocui mácube parucu ũre memecaipōescu pueno. Que baru Cristobe parucu Moisés bācu pueno. Caride Cristorecabe dajocabecūva coreyū Jūmenijicui pōevare, yópe ũre ñaiye jauōre. Aru majamu Jūmenijicui pōeva, jidubevūva aru torojurī dajocabecūva napini corede nuivū baru iye ñi mearo ñacaquiyede majare.

Jūmenijicui pōeva ne cārijimequino (Ef 6.17)

⁷⁻⁸Mujamu Jūmenijicui pōeva. Que baru me jājara mūja, yópe Jūmenijicui coyūcaicōjeiye báquepe ñai Espiritu Santore:

Caride mūje jāpaiyede Jūmenijicui coyūiyede, jāpaiyūbevūpe tebejarā mūja, yópe mūjeñecūva mácavū ne teiye báquepe. Na mácavūcapūravū ju abedejaquemavū Jūmenijicure ne cuede pōescubeno. ũre ju abeni, ñi urōre majidivū bācavūvacari ñabedejaquemavū na mácavū. “Ñājine ñabecube Jūmenijicu majare, ũre maje ju abedu”, arī dāpiarīdurejaquemavū ūbenina na mácavū, arejaquemavū ñai Espiritu Santo.

⁹Jūmenijicu, yópe arī,
toivaicōjenejaquemavu ũi soyuiye
báquede:

No pōescubenoí mufeñecuva mácavu
yure ju abeni, ji urōre majidivū
bácavuvacari đabedejaquemavu.
Pare maucuvarejaima yure,
járividivū bácavuvacari caiye ji
đaiyede pōeva ne đarī majibede
cuarenta paiçjua baju. ¹⁰Que
baru jorojīni járejacacu na
mácavure. Yópe arī đápiarejacacu
nára: “Cainũa ina pōeva
jápaiyubema yure. Que
baru ji urōre aru ji đaiyede
coreóvabenama na”, arī
đápiarejacacu yu. ¹¹Que baru
pare baju jorojīni jáñu, yópe
arī đápiarejacacu yu: “Yábu
Jūmenijicu. Que baru yópe
soyuyubu jáve. No joborō ji náre
cārijimene đájurorijoborōre ye
eabenama na”, arī đápiarejacacu
yu, na mácavure jarayu, arī
soyurejaquemavu Jūmenijicu.

¹²Que baru mja, jivū, Jesúre ju
aivu, me đajarā, mujacacu cūinácu ũi
ámeina dápíabequiyere aivu ũi ũmei,
đajocaiyucu ũi ju aiyede ñai Jūmenijicu
arucure. ¹³Quénora parure đajarā mja,
cadatenajivū mujacavure, parurō nure
đarājivū mje ju aiyede Jūmenijicure.
Nópe đajarā mja, “Jesúre ju are
nũivū bájara”, caijārvua mje cuede
cāreja “caride”, Jūmenijicui yávaiyede
soyuiye báquere. Mujacacu cūinácu
yávaiyede jávene jápaiyubecupe
tebejacurī, abujuvai jabocui jujovaiye
báque boje ũre ũi borocuede
soyuiyeque Jūmenijicurā. Nópe đayu
baru, ámeina tejebu. Aru ámeina teyū
baru, đajocajebu ũi ju aiyede Jesúre.

¹⁴Cainũa maje cuede cāreja ijārvūi
đajocabevūva ju are nũiye jaũvū
majare Jesúre parúeque, yópe maje
mamarũmure ju aye báqueredeca
ũre. Nópe đaiye jaũvū caivū majare,
yóvarājivure Cristore, memenajivure
ijārvūi ũque, aru curājivure cavarō
mearo Jūmenijicui curōi. ¹⁵Que baru

yópe arī, toivaicōjenejaquemavu
Jūmenijicu:

Caride mje jápaiyede Jūmenijicui
soyuiyede, jápaiyubevure
tebejarā mja, yópe mjeñecuva
mácavu ne teiye báquere. Na
mácavucapūrvū Jūmenijicure ju
abedejaquemavu, arejaquemavu ũ.

¹⁶Caivū ina majeñecuva mácavu,
Moisés bácui jipocateimara
mácavu Egipto ámicurijoborōre
jocarī, Jūmenijicui soyuiye
jápaiivū bácavuvacari ju abeni
maucuvarejaquemavu ũre. ¹⁷⁻¹⁸Aru
caivū ina ju abevū bácavure ũi
cōjeiyede yópe pare baju arejaquemavu
Jūmenijicu: “Yábu Jūmenijicu. Que baru
yópe soyuyubu jáve. No joborō ji náre
cārijimene đájurorijoborōre ye
eabenama na”, arejaquemavu. Aru Jūmenijicu
ámeina jorojīnejaquemavu na mácavūque
ne ámeina teiye boje cuarenta paiçjua
baju. Que baru yaidé đarejaquemavu
na mácavure no pōescubenoí. ¹⁹Que
baru coreóvaivūbu maja aipe vaiye
báquede na mácavure. No joborō ne
cārijimejurorijoborōre eabedejaquemavu
na mácavu, ne jápaiyubeni ju abe báque
boje Jūmenijicure.

4 ¹Aru Jūmenijicu “Que đacacũũũ
yu jáve” arī, cārijimene đaiyubi
majare máre ũque, yópe ũi cārijimene
đaiyurīdiviye báquere majeñecuva
mácavure. Que baru me jáiye jaũvū
majare Jūmenijicu ũi eaicōjemequiyere
aiye cūinácu mujacacure ũi cārijimene
đaiyede yópe “Jáve đacacũũũ”, ũi
aiye báqueredeca. ²Yópe majeñecuva
mácavu ne jápaiye báquere iye yávaiye
méne Jūmenijicui cārijimene đaiyuede
pōevare, nopedeca maja máre jápaiivū
bácavūbu iye yávaiye méne. Ũbenita
na mácavu diede jápiarīdivuvacari, ju
abedejaquemavu diede. Que baru na
mácavu barejaquémavu Jūmenijicui
cadatebemara. ³Ũbenita maja Jesúre
ju aivurecabu Jūmenijicui cārijimene
đaimara. Jūmenijicurecabe cārijimene
đaiye majicu. No cārijimene đaiyede
Jūmenijicu, yópe arī, soyurejaquemavu:

Jorojini jáññ pare baju, yópe arí dápiarejacacu: “Yábu Jūmenijicu. Que baru yópe coyuyubu jáve. No joborō ji náre cārijimene dájurorijoborōre ye eabenama na”, arí dápiarejacacu yu, na mácvure jarayu, arí coyurejaquemavu Jūmenijicu.

Nópe arejaquemavu Jūmenijicu, majicu bácu ũi caiyede cuedaquiyede jipocamia, caiyede ũi dāquiyede, cārijimene dācuyu majare úque. Aru cuedarí buojarí, ũi memeinore buojarejaquemavu Jūmenijicu. ⁴Jūmenijicui yávaiyede, yópe arí, toivaicōjeneaquemavu no járavu ũi cuedarí buojaijáravu bácarōra.

Seis pajjáravua vaiyede, cuedarí dajocarí buojarejaquemavu Jūmenijicu, cārijimecu, arí toivaicōjeneaquemavu ũ.

⁵Yópe ji coyuiyede báquepe mujare jipocamia, iye ũi cārijimene dāiyede, yópe arí, toivaicōjeneaquemavu Jūmenijicu:

“No joborō ji náre cārijimene dájurorijoborōre ye eabenama na”, arí toivaicōjeneaquemavu ũ, Jūmenijicu.

⁶Ina majeñecuva mácvu, mamarumu jápiaivu bácvu iye yávaiyede méne Jūmenijicui cārijimene dāiyede pōevare, cārijimene daimara āmenejaquemavu na mácvu, ne diede jápiaridurí ju abe báque boje. Ũbenita apenu pōeva cuma caride, Jūmenijicui cārijimene daimara. ⁷Diede coreóvaivubu maja Jūmenijicui beojáravure, “carí járavu” ũi aijáravure. Que baru obediñua vainburu yóbore, yópe ji coyuiyede báquepe mujare jipocamia, yópe arí, David bácvure toivaicōjeneaquemavu Jūmenijicu cūináro yuríainore:

Caride muje jápiaiyede Jūmenijicui coyuiyede, jápiaiyubevupe tebejarā muja, arí coyurejaquemavu David bácu.

⁸Ũi que aye báque boje, coreóvaivubu maja Jūmenijicu cārijimene dāiyevure apenuncavure, Josué bácu

yóbocavure. Josué bácu jaboteiyede majeñecuva mácvure, ne mauva mácvure boarí, vainí turejaquemavu. Aru dinumre yópe Jūmenijicu “Jáve dācayumu”, ũi aye báquepedeca, cārijimene dārejaquemavu na mácvure. Ũbenita Jūmenijicu ũi coyucōjeiyede David bácvure bedióva apejáravurá, “caride” arí, maje cārijimenajiyede coyurejaquemavu.

⁹Caiye iye jávetamu. Que baru Jūmenijicui pōeva eavubu curivu ijáravu cārijimenoque maje ũmei. Yópe Jūmenijicui cuedarí dajocaiye báquepedeca cuedayu bácu seis pajjáravuai, nopedeca maja ũi pōeva máre dajocavubu maje āmeina teni dāiyede, maje ju aiyede Jesúsre.

¹⁰Caivu maja dajocavú bácvu maje dāiyede báquede cārijimenoque maje ũmei curivubu caride, dārajivu yópe Jūmenijicui urōpe, yópe Jūmenijicu cārijimecu ũi cuere ũi cuedaríburu yóbore caiye ijáravunque, die nuquiyepe aivu yópe ũi urōpe.

¹¹Que baru caino maje oainope dāiyede javu majare, earājivu maje cuede Jūmenijicucue cārijimenoque. Nópe dāiyede javu majare, majacacu cūinácu ũi cubequiyepe aivu eabecu ũi cuede Jūmenijicucue cārijimenoque, ũi dajocaiye boje ũi ju aiyede Jesúsre, yópe majeñecuva mácvu ne eabe báquepe ne cuede Jūmenijicucue cārijimenoque, ne jápiabeni ju abe báque boje ũi yávaiyede. ¹²Jūmenijicu ũi yávaiyeque coyuyube pōevare ũi dāpiainore. Que baru ũi yávaiyebu apuere. Aru ũi majide dāyube pōevare ũi urōre ũi yávaiyeque. Que baru ũi yávaiyebu parué. Yópe carove upujidive caipucapūravua burarí coavaiyepe me, nopedeca aru pñeno baju me coavaiyebu Jūmenijicui yávaiye. Yópe carove cotuvaiyepe pōecu bajure, nopedeca Jūmenijicui yávaiye cotuvaiyebu pōecu jívui pu ũi ũmeita aru pu ũi decocuita máre. Que baru maje buiyede Jūmenijicui yávaiyede coreóvarí eavubu méne o āmene maje urōre aru maje dāpiainore máre.

¹³Põescu cubebi apejēne yaveiye majicu Jūmenijicure jocarī. Caiye iye maje dāpiayede jāri majibi Jūmenijicu. Aru ūrecabe maje coyurājimu caiye maje đaiyede ijāravui.

Jesús sacerdotevare jaboteipõescu parũcu caivũ pũeno majare boje
(Mt 26.36-46; Mr 14.32-42; Lc 22.39-46; Jn 10.18; Fil 2.8; He 1.5)

¹⁴Caride coyũquijivũ mujare bediõva cojedeca Jesucristo Jūmenijicu mǎcure, sacerdotevare jaboteipõescu parũcure caivũ pũeno. Nai sacerdotevare jaboteipõescu coyũcaibi Jūmenijicure majare boje. Jesucristorecabe ecoyũ bǎcu cavarõ mearo Jūmenijicu curõ bajui. Que baru majare parure nũiye jaũvũ maje ũmei, đarājivũ yõpe maje aiyepedeca maje ju aiye boje Jūmenijicure. ¹⁵Nai sacerdotevare jaboteipõescu majare boje jāve cõmaje āroje jāñũme majare maje ñājyede, maje parube boje maje ũmei. Nai abujuvai jabocu ũi jujovaiyede majure, ñājĩnavũ maja. Jesũre mǎre, majapedeca, jujovarĩdurejaquemavũ ñai abujuvai jabocu. Que baru Jesús me coreõvaibi maje ñājyede. Caino ũi oainope ñai abujuvai jabocu jujovarĩdurejaquemavũ Jesũre. Ūbenita ye jujovarĩ obedejaquemavũ ũre. Aru Jesũcapũravũ ye āmeina tebedejaquemavũ cainũmũa. ¹⁶Que baru, yõpe maje joabejĩnoi nũiyepe ũi yebai, jēniarajarevũ jidubevũva Jūmenijicu parũcu bajure. Nõpe đarājarevũ, ũi cõmaje āroje jāquiyepa aivũ majare, ũi ārũmetequiyepa aivũ maje āmeina teiyede, aru ũi jíquiyepa aivũ bojecũbeda majare jauéde, ũi cadatequiyepa aivũ majare.

5 ¹Caride ārũre đaquijivũ mujare aipe ārojarivũre ina sacerdotevare jaboteipõeva mǎcavũre. Jūmenijicu beorejaquemavũ caivũ sacerdotevare jaboteipõeva mǎcavũre nǎcavũ ne jēneboi. Aru epedejaquemavũ na mǎcavũre, ne memecarājyepa ayũ ũre põevare boje. Ūre memecarejaquemavũ

jícaivũ Jūmenijicure āimara ne boaĩmara mǎcavũre juaiyede, nǎcavũ aru ne baju mǎre ne āmeina teiye boje, ũi ñājine đabequiyepa aivũ nǎre die boje, aru ape jícaiyede mǎre, puedarĩ Jūmenijicure, torojuede jĩnajivũ, ũi cadateiye bǎque boje nǎre.

²Sacerdotevare jaboteipõescũvacari parũbedejaquemavũ ũi ũmei, yõpe apyvũ põevape. Que baru cõmaje āroje jāñũ coreõvarejaquemavũ ina āmeina teivũre coreõvabevũva, ne majibe boje yéde āmeina teiyede. ³Aru ũvacari ũi parube boje ũi ũmei, Jūmenijicure jícaiyepa jaurejaquemavũ ũre āimara boaĩmara mǎcavũre juaiyede, põeva ne āmeina teiye boje aru ũi baju āmeina teiye boje mǎre.

⁴Sacerdotevare jaboteipõescu bǎcu barejaquémavũ põeva ne pueďaimũ, ũi memecaiye boje Jūmenijicure parũéque. Aru põescu cubebi ũi bajure beorĩ epeyvũ sacerdotevare jaboteipõescũva. Quénora Jūmenijicurecabe cũinǎcura beorĩ, cuturĩ, epeyvũ sacerdotevare jaboteipõescũva. Quédeca barejaquémavũ Aarón mǎcu, põeva ne pueďaimũ mǎcu, Jūmenijicu beorĩ, cuturĩ, epeiye bǎque boje ũ mǎcure sacerdotevare jaboteipõescũva.

⁵Aru nopedeca vaidéjaquemavũ Cristore. Ūvacari ũi bajure beorĩ epebedejaquemavũ sacerdotevare jaboteipõescũva. Quénora Jūmenijicũvacari ũre beorĩ, epeni, yõpe arejaquemavũ ũre:

Jĩmacurecabu mũ. Caride caivũ ne járiaianoi yǎvacari jaboteicõjeivũ mũre, arejaquemavũ Jūmenijicu matascũre.

⁶Aru apeno Jūmenijicu coyũino mǎcarõre Cristore, yõpe arĩ, toivaicõjeneaquemavũ:

Cainũmũa sacerdotepõescu mũ dajocabescũva, yõpe Melquisedec ũi sacerdotepõescu teiye bǎquepedeca dajocabescũva, arejaquemavũ Jūmenijicu.

⁷Cristo ũi cuede cǎreja ijāravui coyũvarejamedã Jūmenijicũque, aru

jēniarejamedā úque, ũi cadatequiyepe ayu. Orique codoboborī jēniavarejamedā Jūmenijicure, ñai meadaíye majicure úre ũi yaijūrōre jocarī. Aru Cristoi pueđarī ju aye boje, ũi jēniayede Jūmenijicure, “Mi urōpe đajacu mu” arī, Jūmenijiccapūravu Cristoi jēniayede jápiarī ju arejaquemavu, ũi cadateiyede Cristoi đaquíyepē ayu yópe ũi urōpe. ⁸Cristo, Jūmenijicui mácu, jípacure ju aye majicūvacari, ñájiñu majini jebedejaquemavu aipe ārojaene Jūmenijicure jápiarī ju aiyede aru ũi urōpe đaiyede. ⁹Cristoi đaiye báquede caiye iye úre jauéde yópe Jūmenijicui urōpe, pōevare meadaipōescu tedejaquemavu. Que baru caivu maja úre jápiarī ju arī đaivure yópe ũi urōpe meadayube ũ, maje cūvarājiyepē ayu caiye iye Jūmenijicui mearo đacaquíyede majare, aru maje jabotenajiyepē ayu Cristoque cainūma. ¹⁰Aru Jūmenijicu epedejaquemavu úre sacerdotevare jaboteipōescu cainūma, yópe ũi epeiye báquepedeca Melquisedede sacerdotevare jaboteipōescu.

Dajocabearā muje ju aiyede Cristore
(1 Co 3.2)

¹¹Toivacaiyurīduivu mujare urarō iye Cristoi sacerdotevare jaboteiyede. Ūbenita mujacapūravu jūracurivu tedavū. Que baru ji coyuru mujare Cristoi sacerdotevare jaboteiyede, jápiabejebu muja. Que baru maiyójavu yure diede ji coyuyurīduiyede mujare. ¹²Javede majivu muja iye yávaiye méne Cristorā. Aru úre ju aivubu obediuare. Que baru parurivu baru muje ũmei, mujavacari buejebu apévure, ne jápiarī ju arājiyepē aivu diede. Ūbenita quénora pu caride máre mujavacari me jápiarī eabevu. Jauvu mujare apévū ne bueiye bediōva cojedeca no bueino maiyójabenore, yópe mamarumu muje bueino mácarōpe Jūmenijicui yávaiyequede.

Mujavacari juedojinape paivu tedavū. Juedojinā opeco matuiyeda úcuñaima. Ūbenita bucūva āiyede āiye

majima. Quédecā pōeva juedojinape paivu ne ũmei quénora Jūmenijicui yávaiye maiyójabede jápiarī eadama na. Ūbenita pōeva bucūvape paivu ne ũmei Jūmenijicui yávaiye maiyójaede máre jápiarī eadama na. ¹³Caivu ina āri majibevu aru opeco matuiyeda ũcuivu juedojinatamu. Bucūva āmevatamu cāreja. Pōeva majibevu yéde đaiye méne aru āmene máre juedojinape paivubu ne ũmei. Dápiarī majibevu cāreja iye maiyójaede Jūmenijicui yávaiyequede. ¹⁴Ūbenita ina āri majidivu bucūvatamu. Pōeva majidivu aipe đaiye méne aru āmene máre bucūvape paivubu ne ũmei, ne dápiarī cōmajiyepē boje caiye ne đaiyede mearo maru o āmeno maru. Dápiarī majidivubu iye maiyójaede Jūmenijicui yávaiyequede.

6 ¹Que baru bueiye jauvu majare Jūmenijicui yávaiye maiyójaede ũi yávaiye méne Cristorā, yópe ina bucūvape ne ũmei ne bueiypedeca, maje đarājiyepē aipe járavua coapa yópe Jūmenijicui urōpe Cristoi parúeque. Buebenajaramu bediōva cojedeca Jūmenijicui yávaiye maiyójabede ũi yávaiye méne Cristorā, yópe maje mamarumu bueiye báquepe, yópe ina juedojinape ne ũmei ne bueiypedeca. Que baru mujare buebequijivu cojedeca iye muje mamarumu bueiye báquede. Maja buebenajaramu pōeva ne chíoiyede ne āmeina teiyede aru ne đajocaiyede diede, oatvarājivu ne đaiyede, Jūmenijicui jaravuaiyepē aivu diede, náre coavajuroede úre jaravari. Aru pōeva ne ju aiyede Jūmenijicure buebenajaramu maja. ²Mujare buebequijivu cojedeca iye bueiyede pōeva ne Jūmenijicueque jádovaiyede ocoque aru ne apévure tuoiyede ne pūruáque, Jūmenijicui mearo đacaquíyepē ayu ina tuoimarare. Mujare buebequijivu cojedeca iye bueiyede pōeva ne nacajarajiyede yainore jaravari, cūrājivu cainūma mamabaju cūimébajuque, aru Jūmenijicui jaroquíyede caivu pōevare ne cūrājinoi járavu cūiméjáravu baquinóre, apévure

cavarō mearo ũi curōi aru apεvure toabo cūiméboi, na coapa ne ðaiye báque boje ne cuede ijāravui. ³Quénora bueiye javuv majare Jūmenijicui yāvaiye maiyójaede ũi yāvaiye méne Cristorā bucuvape tenajivu maja maje ũmei ye jaubeda. Bucuvape teiyuru maje ũmei, Jūmenijicu buiecōjecuyume majare ũi yāvaiye maiyójaede. Aru Jūmenijicui nópe buiecōjenu majare, coreóvarājivubu Cristore ye jaubeda.

⁴⁻⁶Ūbenita nópe bueni buojabevu apεvu pōeva. Pōecu ūbenina bueyu bácu Jūmenijicui yāvaiyede aru ju arīduyu bácu Cristore, ũi ju abeni dajocarū ũi ju arīduiye báquede Cristore, pōecu cubebi majicu chíore ðayu, ũi dajocaquiyeye ayu ũi ámeina teiyede aru ũi oatvaquiyeye ayu ũi ðaiyede. Pōeva ũpe paivurecabu cūinára coreóvaivu bácvu Jūmenijicui yāvaiye méne jāvene Cristorā, aru cvarivuv bácvu Jūmenijicui mearo ðacaiyede náre ũi meadaiye báquede náre aru ũi cure ðaquiyede náre jāravv cūiméjāravv baquinóre ũque, aru cvarivuv bácvu Jūmenijicui Espírítu Santoi majiécarōre, aru majidivv bácvu Jūmenijicu ðayure cainumua yópe ũi aiyε báquepedeca ũi yāvaiyeque, aru jáivu bácvu Jesúre ju aipōeva ne ðaiyede Jūmenijicui paruéque, yópe Jūmenijicu ðacuyure ũi jaroquiyede apεvu pōevare ũi curōi aru apεvu pōevare toabo cūiméboi. Caiye diede majidivv bácvuvvacari, nárecabu dajocavv bácvu ne ju aiyε báquede Cristore. Que ðarī yópe pēvaiyεpe Jūmenijicui mácvre cojedeca jocucjaravena, ne ũbe boje ũre, pōeva ne yurinajiyεpe aivu, ðaðama na.

⁷Que baru jēvari coyurī, pōevamu yópe joborōpe. Jūmenijicu ocare ðaibi joborōi. Nore ne jiore pōeva ne memeniburu yóbore aru ne oteiyε báque pīarīburu yóbore, ũre jēiyε méne ñnama ina memepōeva. Que baru Jūmenijicu mearo ðacaibi no joborōre, pōeva ne memeiye boje. ⁸Ūbenita no joborōre pōeva ne mememenu, miunenejaiye aru ámecōriámenejaiye máre quéda píaiyavv

nore jiorojai. No joborō bojecube boje, jēiyε cube boje nore, pōeva ne juarīburu yóbore caiye iye miunenejaiyede aru iye ámecōriámenejaiyede máre dajocaðama no jiorojare jocarī. Que baru Jūmenijicu ámedaibi no joborōre, pōeva ne mememe boje. Quédeca Jūmenijicu mearo ðacaibi ũre ju aivure aru ñájine ðaibi ũre ju abevure.

Maja dajocabevu maje ju aiyede Cristore maje napini coreiye boje Jūmenijicui me ðacaquiyede majare

⁹Muja, jívu, ji umara, yu toivacayuvvacari nópe paruéque ji coyuiyede, majicacuyv mujare, ūbenita cārijimevv yu mujare boje. Quénora coreóvaivu yu ðare nuivure yópe javépe mujare, Jūmenijicui pōevare, ũi meadaiye báque boje mujare. Ðaðavū yópe mujare javépe muje memecaiyede Jūmenijicure aru muje caðateiyede apεvu pōevare. ¹⁰Cainumua Jūmenijicu mearo ðaibi, yópe ũre javépe. Que baru jāve árucuyume muje memecaiyede ũre. Muja caðateðavū apεvu majevv Jesúre ju aipōevare javede aru caride máre. Que teni muje uede Jūmenijicure jáðovavv. Diede Jūmenijicu árumetebecuyume cainumua. ¹¹Ūrarōreca ũvv yu mujare coapa muje memecare nurajiyεpe ayu Jūmenijicure torojurivv, muje caðateiyεque apεvure cainumua muje cuede ijāravui. Que ðaivu baru, caiye iye Jūmenijicui mearo ðacaquiyede mujare, muje napini coreiyede, earājaramu muja. ¹²Ūbevū yu mujare júracurivv tede nuivure muje jápiayede Jūmenijicui yāvaiyede. Quénora ina ũi yāvaiyede jápiarī ju aivure tejarā muja. Ina dajocabevure ne ju aiyede Jūmenijicure aru napivure ne ñájiyede tejarā muja. Náre paivurecabu earājivv caiye iye Jūmenijicui mearo ðacaquiyede náre yópe ũi aiyε báquepedeca.

¹³⁻¹⁴Nápe páyurecabe majeñecu mácu Abraham mácu. Javede yópe arejaquemavv Jūmenijicu ũ mácvre: “Yūbu Jūmenijicu. Que baru yópe

coyuyubu mure jāve. Mure mearo baju đacacuyumu yu. Aru mipāramena mārājivū obedivū baju tenajarama ina mārājivū”, arejaquemavū Jūmenijicū. Jūmenijicūi nōpe aiyē bāquede Abraham mácure, “Jāve baju đacuyumu yu nōpe ji aiyē bāquepedeca”, arejaquemavū. Apesu ũi cube boje parucu Jūmenijicū pñeno, “Yúvacari jáđovacuyumu jāvene ‘Jāve baju đacuyumu’, ji aiyē bāquepedeca”, arejaquemavū ũ. ¹⁵ Abraham mácucapūravū napini corede nūrejaquemavū Jūmenijicūi đacaquiyede yōpe ũi aiyē bāquepedeca. Aru Jūmenijicū vaidé đarejaquemavū ũi mácure yōpe ũi aiyē bāquepedeca.

¹⁶ Pōeva “Jāve đacuyumu yu” ne aiyede, ne baju pñeno baju parucure cainmua jēniavaivubu, ũi jáđovaquiyepē aivū jāvene ne aiyē bāquede. Apesu cubebi yāvare nūri majicū, pōesu que aru. Quénora caivū “¿Đacuyū bārica yōpe ũi aiyepē?” abevūva, coreóvaivubu jāve đacuyure caino ũi oainope. ¹⁷ Aru quédeca “Jāve đacuyumu”, arejaquemavū Jūmenijicū, jáđovacuyū parūrōre ũi coyūino mácarōre. Jūmenijicūcapūravū ye oatuvabebi ũi dāpiainore ũi đaiyuede. Diede coreóvare đaiyurejaquemavū ina ũi mearo đacaímara mārājivūre yōpe ũi aiyē bāquepe. Que baru, “Yúvacari jáđovacuyumu jāvene ‘Jāve baju đacuyumu’, ji aiyē bāquepedeca”, arejaquemavū Jūmenijicū.

¹⁸ Jūmenijicū “Jāve đacuyumu yu”, ũi aiyē ye oatuvaiye buojabevū cainmua. Aru, “Yúvacari jáđovacuyumu jāvene ‘Jāve baju đacuyumu’, ji aiyē bāquepedeca”, ũi aiyē máre ye oatuvaiye buojabevū cainmua. Diena ye borocurī buojabebi Jūmenijicū. Que baru maja Jūmenijicūi pōevatamu, cūiná đajocaiivū bācavū caiye maje āmeina teni đaiyuede aru ũi meadaimara curivū maje āmeina teiyede jarūvarī. Aru torojueque napini corede nuivubu, earājivū Jūmenijicūi mearo đacaquiyē jāve bajure majare. ¹⁹ Maja napini coreivū diede, parurivubu maje ũmei aru ye đajocabevū maje

ju aiyede Jūmenijicūre. Que baru āmedaimara tebevū maje ũmei. Yōpe sacerdotevare jaboteipōesu bācūi ecoiye bāquepe no Jūmenijicūi cūramicacaje ũracaje bācarō aperūravure, nopedeca ũai maje napini corenajimū ecorejaquemavū cavarō mearo Jūmenijicūi curōita. ²⁰ Úrecabe Jesús. Cadatecuyū majare, ecorejaquemavū Jūmenijicūi curō mearoi maje jipoca. Aru sacerdotevare jaboteipōesu teibi yōpe Melquisedei sacerdote teiye bāquepedeca.

**Jesús ũi sacerdotevare jaboteino
Melquisedec ũi sacerdote teino
mácarōpe
(He 5.6)**

7 ¹ Ārure đaquijivū mūjare ũai Melquisedede, ũamene aru aipe ũi đaiye bāquede. ũai Melquisedec Salem āmicurīmarocavū bācavū ne jabocu barejaquemavū. Aru Jūmenijicū caivū pñeno parucure memecarejaquemavū sacerdotepē. Majeñecu Abraham mácūi copaiyede ũi jivū bācavūque ne boarī, vainī turīburu yóbore apēvū jabovacavūjā mácavūre, Abraham mácure copū nūri, jēniarejaquemavū Jūmenijicūre, ũi mearo đacaquiyepē ayū Abraham mácure. ² Aru caiye iye cūvede ũi íye bāquede ũi boarī, vainī tūimara mácavūre jocarī, caipurcapurūape paiyede coavarīburu yóbore, cūináro iye coavaiye bāquecarōre jídejaquemavū Melquisedede Abraham mácū. Nōpe đarejaquemavū Melquisedec ũi sacerdote teiye bāque boje. No āmiá Melquisedec “jabocu méne đayū” aiyūrōtamu. Aru no āmiá Salem “cārijimeno” aiyūrōtamu. Que baru jabocu méne đayū aru cārijimene đayū barejaquemavū ũai Melquisedec. ³ Pōesu cubebi yéde coreóvayū Melquisedei pacū bācūi borore, aru ũi paco bācoi borore, aru ũi ñecuva mácavū ne borore máre. ũame majibema ũi pōeteino mácarōra aru ũi yaino mácarōra máre. Que baru Jūmenijicūi mácupe páyū sacerdotebe cainmua, ũai Melquisedec.

⁴Me majivũ maja ñai Melquisedec maje puedaimure majeñecu Abraham mácu pueno. Abraham mácu barejaquémavũ majeñecu mamacu bácu, maja Israecavũ maje pøeyajuboare báyu bácu. Que baru ù mácu maje puedaimũme. Ñbenita ù mácuvacari Melquisedede jídejaquemavũ no cüináro iye coavaiye báquecarõ mearo bajure, ùi íye báquede caipũcarũgũape paiye coavaiye báquede ùi boarí, vainí tuimara mácavure jocarí, ùi jíquiyepe ayũ diede Jũmenijicu.

⁵Aru me majivũ maja apevũ ina Abraham mácuĩ pãramescu bácu Leví ãmicucu bácuĩ pãramenacavũ Jũmenijicure memecaipõeva mácavure sacerdotevape. Na mácavurecabu Jũmenijicui jacorpõcõjeimara mácavũ caivũ apevũ Israecavũ bácvũ, majeñecuva mácavure cüináro iye caipũcarũgũape paiye ne cũvae coavaiyecarõre, yõpe Jũmenijicui ñaicõjeiyepe ùi coyũie báquede Moisés bácvure. Ina Israecavũ bácvũ névũ bácvũvacari, Abraham mácuĩ pãramena mácvũvacari, ina sacerdoteva bácvũ cũvaede jacorpũrejaquemavũ na mácavure.

⁶Ñbenita Melquisedecapũravũ Leví bácuĩ pãramescu ãmescuvacari, Abraham mácvure, ñai Jũmenijicu “Jãve mearo ñacacũyũtu yũ mure”, ùi aimũ mácvure, jacorpũrejaquemavũ no cüináro iye caipũcarũgũape paiye ùi cũvae coavaiye báquecarõre, Abraham mácuĩ jíye báquede Melquisedede. Aru Melquisedec jẽniarejaquemavũ Jũmenijicure, ùi mearo ñacacũquiyepe ayũ Abraham mácvure. ⁷Caivũ põeva coreóvaivũbu iyede: Puedaimũtame ñai jẽniañũ Jũmenijicui mearo ñacacũquiyepe ayũ apescure ùi jẽniacaimũ pueno.

⁸Apede máre me majivũ maja. Caivũ ina sacerdoteva Leví bácuĩ pãramenacavũ bácvũ barejaquémavũ yainájivũ. Ne cũede ijãravũ Jũmenijicure memecarí jacorpũrejaquemavũ névũ bácvũví jíye coapa na mácavure cüináro

iye caipũcarũgũape paiye ne cũvae coavaiyecarõre. Ñbenita caivũ ina sacerdoteva bácvũre dajocaiye jaũrejaquemavũ ne memecaiyede, ne yaiye boje. Caivũ ina sacerdoteva bácvũ ne bucuteni yainíburu yóbore, apevũta ne memecaino mácarõre memecarejaquemavũ. Ñbenita Jũmenijicu ùi yãvaiyede toivaicõjemenejaquemavũ Melquisedei yaiye báque borore. Que baru Melquisedecapũravũ yaibécupe páyũbe. ⁹Ina sacerdoteva bácvũ Leví bácuĩ pãramenacavũ bácvũ jacorpũrejaquemavũ névũ bácvũví jíye coapa na mácavure cüináro iye caipũcarũgũape paiye ne cũvae coavaiyecarõre. Aru Leví bácu Abraham mácuĩ pãramescu barejaquémavũ. Que baru Abraham mácuĩ jíye báquede no cüináro coavaiye báquecarõre iye caipũcarũgũape paiye iye cũve ùi íye báquede ùi boarí, vainí tuimara mácavure jocarí, yõpe barejaquémavũ Leví bácu máre ùi jíye báquepe.

¹⁰Melquisedei copũ nuíye báquede Abraham mácvure, Leví bácu Abraham mácuĩ pãramescu bacũyũ boje, yõpe barejaquémavũ Leví bácu põtebecu bácvũvacari cãreja, aru caivũ apevũ Abraham mácuĩ pãramena márajivũ máre, ne cũepe néñecu mácvũque Jũmenijicui jáinoi.

¹¹Jũmenijicu coyũrejaquemavũ ùi ñaicõjeiyede Moisés bácvure, Israecavũ bácvũ ne majinajiyere ayũ aipe ñaiye jaũrõre na mácavure, boropatebenajivure Jũmenijicui jáinoi. Que teni Jũmenijicu epedejaquemavũ Aarón mácvure aru ùi pãramena mácavure, Leví bácuĩ pãramenacavũ bácvũre, ne jínajiyere ayũ úre põeva ne jícaiyede ne ãmeina teiye boje. Ñbenita ina sacerdoteva bácvũ, Aarón mácvũjã, ñamene ye boropatebevũ teni jebeni oabedejaquemavũ. Que baru caiye iye Jũmenijicui mearo ñacacũyũede põevare ye ñabedejaquemavũ Jũmenijicu ina sacerdoteva bácvũ, Aarón mácvũjãque. Ne boropatebevũ teni jebedu põevare,

apescu sacerdote ñi daiye jaubejebu. Ñbenita apescu sacerdote, Aarón mácsupe páyũ ãmescu quénora Melquisedepe páyũ, ñi daiye jaurejaquemavũ, ñi boropatebevũ teni jebequiyepe aiye pöevare.

¹² Aru apescu sacerdote ñi daiye jaué báque boje, oatuvaiye máre jaurejaquemavũ iye ñaicöjeiyede, iyeque pöeva ne majinajiyepe aiye aipe ñaiye jaure ñáre, boropatebenajivure Jümenijicu jáinoi. ¹³ Ñai apescu sacerdote ñi bororã toivaicöjenejaquemavũ Jümenijicu ñi yáviyede. Ñrecabe maje jabocu. Leví bácsu pãramescu ãmemi. Quénora apējajubo pöējajubocacube ñ. Aru ye pöescu cubebi diyajubocacu sacerdotete Jümenijicure memecayũ. ¹⁴ Me majivũ maja maje jabocu Jesucristore Judá bácsu pãramescure. Que baru Judá ãmicuriyajubocacu pöetedejaquemavũ ñ. Ñbenita Moisés bácsu, ñi coyuiyede sacerdotevãrã, ye coyubedejaquemavũ diyajubocavũ Judá ãmicuriyajubocavãrã.

¹⁵ Me majivũ maja iye ñaicöjeiyede oatuvaiye jauéde apescu sacerdote ñai Melquisedepe páyũ ñi daiye báque boje. ¹⁶ Jümenijicu ñre sacerdoteva epedejaquemavũ. Ñbenita nópe ñabedejaquemavũ no ñaicöjeino mácarõ parúeque, Aarón mácsure aru ñi pãramena mácsavure memecaicöjeino mácarõ parúeque. Quénora ñi cainũmua sne parúeque, ñi yaibé boje, Jümenijicu ñre sacerdoteva epedejaquemavũ. ¹⁷ Que baru Jümenijicu ñi yáviyede, yópe arí, toivaicöjenejaquemavũ:

Cainũmua sacerdote tecũyũtu mũ dajocabescuva, yópe Melquisedec ñi sacerdote teiye báquepedeca dajocabescuva, arejaquemavũ Jümenijicu.

¹⁸ Que teni Jümenijicu oatuvarejaquemavũ “Yópe ñarãjare”, ñi aino mácarõre pöevare. Iye ñaicöjeiyequẽ ñi coyuiye báquede Moisés bácsure pöeva boropatebeni buojabenama na. Diedecabu parube aru bojecube máre. Que baru

iye javeque ñaicöjeiyede dajocarí jaruvarejaquemavũ Jümenijicu. ¹⁹ Pöeva ne cuede Jümenijicueque yópe náre jauépe eabenama na iye ñaicöjeiyequẽ. Ñrarõ jauvũ náre, ne ñaiye majibe boje caiye diede. Ñbenita iye napini coreniduiye báquede iye mearore maje cuvajuroede Jümenijicueque dajocarí, caride püeno baju napini coreivũbu maja iye mearore maje cuvãrãjiyede Jümenijicueque. Jümenijicu napini corede ñaibi majare, maje curãjiyepẽ ayũ úque yópe majare jauépe. Que baru yópe maje joabejinoi nuiyepẽ ñi yebai, ñre jëniari eaivũbu maja jidũbevũna.

²⁰ Aru Jümenijicu epeiye báquede ñai apescu sacerdoteva, “Jãve ayũbu. Ji aiye báquepedeca dacũyũtu”, arejaquemavũ ñ. Ñbenita ñi epeiye báquede apenvũ sacerdotevava Leví bácsu pãramenacavũ bácsavure “Jãve ayũbu”, abedejaquemavũ ñ. ²¹ Jesucristorecabe Jümenijicu epeimũ mácsu sacerdoteva, “Jãve ayũbu”, ñi arí coyuiye báqueque. Yópe arí, toivaicöjenejaquemavũ:

Maje jabocu Jümenijicu “Jãve baju dacũyũtu yũ yópe ji aiye báquepedeca”, aibi ñ. Aru ye oatuvabescube ñ, “Dacũyũtu”, ñi arí dápiayede. Yópe arí, coyuibí: “Cainũmua sacerdote tecũyũtu mũ”, arejaquemavũ Jümenijicu Jesucristore.

²² Jümenijicu “Jãve ayũbu”, ñi aiye báque boje ñi epeiye báquede Jesúre maje sacerdoteva, mearo bajubu yo ñi “Yópe ñarãjare”, ñi aino mácarõ yóbocarõ no ñi “Yópe ñarãjare”, ñi aino mácarõ javocarõ püeno. Que baru Jesúrecabe jãve ñayũ caiyede yópe ñre jauépe, maje curãjiyepẽ ayũ me Jümenijicueque.

²³ Aru ñi javocarõ aino mácarõque, ina sacerdoteva bácsavũ Leví bácsu pãramenacavũ bácsavũ obedivũ barejaquémavũ, ne yaiye boje. Caivũ ina sacerdoteva bácsavũ ne bucuteni yainĩburu yóbore, apenvũta ne memecaino mácarõre memecarejaquemavũ. Ne yaiye boje, ye

memecare nuivü buojabedejaquemavu na mácavu caivü. ²⁴Ûbenita Jesúcapüravu cubi cainumua, üi yaibé boje bedióva cojedeca. Apecu ye memecabecube üi memecaiyede üi baju memecare nuive boje cainumua. ²⁵Que baru cainumua jaubecüva meadayu buojaibi caivü maja vorí eaiyürivüre maje curäjiyede me Jümenijicüque yópe majare jauépe, Jesúí cadateiye boje majare, maje cüvaräjiyepe ayu caiye iye Jümenijicüi mearo ðacaqiyede majare. Jesús cubi cainumua, jëniacacüyu Jümenijicüque majare boje.

²⁶Que baru Jesúrecabe ñai sacerdotevare jaboteipöescu majare jaumü baju. Ûrecabe ðayu caiye üre jauéde, cadatecüyü majare. Ûrecabe meacu baju Jümenijicüi jáinoi aru ye ðabecu ámenore, Jümenijicüi übenore. Ûrecabe ye ámeno cubecu aru cücu bácvacari ijärvüi ámeina teipöevaque ye ámeina tebecu cainumua. Ûrecabe Jümenijicüi jánuóimü mácu pu cavaró mearoi üi curóita aru üi parüre ðaimü caivü püeno. ²⁷Apevu sacerdotevare jaboteipöevape páyu ámemi ü. Üi ámeina tebe boje, jícaiyé jaubevü üre jícaiyede Jümenijicüre üi baju ámeina teiye boje järvüa coapa yópe apevü sacerdotevare jaboteipöeva bácvü ne ðaiye báquepe. Na mácvücapüravü, apenüma jícarí aru apenüma jícaicöjени apevü sacerdoteva bácvüre, jícarejaquemavu ne jícaiyede Jümenijicüre järvüa coapa. Mamarümüre ne baju ámeina teiye boje aru no yóbore caivü pöeva névü bácvü ne ámeina teiye boje, áimara ne boaimara mácvüre juarí jícarejaquemavu na mácvü. Ûbenita Jesúcapüravu cüinára jícarejaquemavu üi jícaiyede Jümenijicüre caivü pöeva maje ámeina teiye boje. Üi bajure jícarejaquemavu ü, üi yaive báquede majare boje.

²⁸Ûmüva parübevü bácvürecabu ne ümei, ne ðaiye majibe boje yópe Jümenijicüi uröpe, Jümenijicüi epeimara mácvü sacerdotevare jaboteipöevava üi

ðaicöjeiyeque üi coyüiye báquede Moisés bácvüre. Na mácvüre jaurejaquemavu cáreja, ne ðaräjiyepe aive yópe na mácvüre jauépe. Ûbenita obediüjua yóbore iye ðaicöjeiyede dajocarí jarüvacüyü, Jümenijicu “Jäve baju ðacüyümu yu yópe ji aive báquepedeca”, üi aino mácaröque, epedejaquemavu mamacüre sacerdotevare jaboteipöescüva. Aru ñai mamacüre ye jaubevü, üi ðaquiyepe aive yópe üre jauépe. Que baru ürecabe cücu yópe üre jauépe, aru ðayu caiyede yópe Jümenijicüi uröpe cainumua.

Jümenijicu “Que ðaräjare”, üi aino pöevare Jesúque püeno mearo üi que aino mácaröre Moisés bácvüque
(He 1.13)

8 ¹Caiye iye ji toivacaiye müjare yópe aiyürötamu: Maje sacerdotevare jaboteipöescu cubi, nópe ji coyüiye báquepedeca javede. Ûrecabe dobacu bácu, jabotecüyü cavaró mearo Jümenijicüi curóí, jípacu Jümenijicu parücu caivü püeno üi dobaró mearo meapüravüi. Que baru maje sacerdotevare jaboteipöescu Jesús máre jaboteibi Jümenijicüque.

²Majeñecüva mácvü ne cuede pöescubenoí cüvarejaquemavu náque ðiñami cürami ne áimacajeaque ne ðaiñami mácaró, iveá cüravea báque Jümenijicüi ðaicöjeiye üi coyüiye báquede Moisés bácu toivainoque ne curíñami mácaró, ne Jümenijicüre mearore jíñami mácaröre. Ûbenita Jesúcapüravu Jümenijicüre memecabebi ðiñami, pöeva ne ðaiñami mácaró jívüi. Quénora ürecabe sacerdotevare jaboteipöescu Jümenijicüre memecayü cavaró mearo Jümenijicüi curóí. Nore cüvü Jümenijicüre mearore jíñami baju, Jümenijicüvacari üi ðaiñami. Diñami jívüita Jümenijicüre memecaibi Jesucristo.

³Jümenijicu epedejaquemavu caivü sacerdotevare jaboteipöeva bácvüre, ne memecaräjiyepe ayu üre pöevare boje. Üre memecarejaquemavu jícaivü

Jūmenijicure āimara ne boaimara māvavure juaiyede, nācavu aru ne baju märe āmeina teiye boje, ũi nājiye đabequiyepa aivū na māvavure die boje, aru ape jīcayede märe, pueđarī Jūmenijicure torojuede jīnājivū, ũi cađateiye bāque boje na māvavure. Que baru Jesucristore märe, maje sacerdotevare jaboteipōecure, jīcayē jauvu Jūmenijicure ũi jīcayēde. ⁴Ūi cue boje cavarō mearo Jūmenijicui curōi, nore memecaibi Jūmenijicure majare boje. Ūbenita ũ cūcū baru ijāravui, ye sacerdote āmejebu, Jūmenijicui epeiye bāque boje apevu ijāravūcavu sacerdotevare, ne jīcarājiyepa ayū caiye iye jīcayēde, yōpe Jūmenijicui đaicōjeiyepe Levī bācui pāramenacavu bācavure, ũi coyūiye bāquede Moisés bācure.

⁵Nācapūravu Jūmenijicure memecarejaquemavu ijāravūcađāmi, Jūmenijicure mearore jīnāmi mārārō jīvui. Ūbenita ne memecaiye bāquebu quénora majiēda ārojaepe pāriduiye Jesūi memecaiyepa cavarō mearo Jūmenijicui curōi. Cūināturu āmevu. Yōpe bótaiyede pōescui decocū jāve āmepe, nopedeca ijāravūcađāmi Jūmenijicure mearore jīnāmi mārārō jāve āmenejaquemavu. Coreóvaivūbu maja caiye cavarō mearo Jūmenijicui curōque jāvene aru ye jābede, ũbenita caiye ijāravūque jāve āmene aru jauēde, Jūmenijicui yōpe coyūiye bāque boje Moisés bācure. Moisés bācu barejaquemavu đīnāmi Jūmenijicure mearore jīnāmi mārārōre đaicōjecūyū. Aru ũi đaicōjequiyē jipocamia, Jūmenijicu, yōpe arī, coyūrejaquemavu ũ mārācure: “Me đajacu mū. Caiye mi đaicōjequiyēde memeipōevare yūre mearore jīnāmine đaicōjējacu yōpe ārojaepe pa iyēde iye ji jāđovaiye bāquede mure no cūrācū Sinai āmicuricū pūenoī”, arejaquemavu Jūmenijicu.

⁶Ūbenita caride Jesúcapūravu, Jūmenijicui epeimū mārācū sacerdoteva, me baju memecaibi apevu sacerdoteva

bācavu ne memecaiye bāque pūeno. Ūi memecaiyebu parūē baju ne memecaiye bāque pūeno. Quēdeca iye Jūmenijicu “Que đarājare” arī, ũi yóboque coyūiye bāquebu pōevare Jesúque, me baju āniē “Que đarājare” arī, ũi mamarūmūque coyūiye bāque pūeno Moisés bācūque. Jūmenijicu “Que đarājare” arī, ũi coyūiye bāquede Jesúque “Yōpe đacacūyūmu yū mūjare”, ũi aiye bāquebu me baju “Yōpe đacacūyūmu yū mūjare”, ũi aiye bāque pūeno āniē “Que đarājare”, ũi coyūiye bāquede Moisés bācūque. Moisés bācūque “Mūje āmeina teiyēde jarūvācūyūmu yū, mūje đaru yōpe ji đaicōjeiyepe”, arejaquemavu. Ūbenita Jesúque “Mūje āmeina teiyēde jarūvarīburu yóboi, ye ārūmecūbu yū die, mūje ju aru Jesucristoi đacaiye bāquede mūjare boje”, arejaquemavu. Que baru ũi yóboque coyūiye bāque me bajutamu ũi mamarūmūque coyūiye bāque pūeno.

⁷Āniē Jūmenijicui mamarūmūque coyūiye bāque Moisés bācūque jāvedu, ape ũi yóboque coyūiye bāque Jesúque jāvejebu. ⁸Ūbenita Jūmenijicu jārejaquemavu Israecavu bācavure boropateivūpe ne đabe boje yōpe “Que đarājare” arī, ũi mamarūmūque coyūiye bāquere na māvavure. Que baru na māvavure, yōpe arī, toivaicōjēnejaquemavu Jūmenijicu:

Yōpe aibi maje jabocu Jūmenijicu:

“Jápijarā. Apejāravua edaquijāravua baquiyēde bediōva cojedeca ‘Que đarājare’, acūyūmu yū ape coyūiye mamae coyūiyēde caivū ji pōevare, Judá āmicurijabocavūre aru apevu Israel bācui pāramena ne yajuboacavure märe. ⁹Nēñecūva māvavure ‘Que đarājare’ arī, coyūrejacacu yū no jāravu bācarōre ji nūvaiye bāquede na māvavure Egipto āmicurijaborōre jocarī. Yōpe nēpacui nūvaiyepa mamarare đūibāje, ne pūuāre jēni, nopedeca na māvavure nūvarejacacu yū no ocofenibo bācarōque. Ūbenita ye đabedejaima na māvavu yōpe ‘Que

darājare’ arī, ji aiyē bāquepe. Que baru ne mácavure āmeina jārī dajocarejacacu yu. Iye ji yóboque soyūiye ‘Que darājare’ arī, ānié ji mamarumūque soyūiye bāquepe cūináturu āmequiyebu. Nópe ayūbu yu, Jūmenijicu. ¹⁰Que baru yópe ‘Que darājare’ arī, soyucuyumu yu caivu Israel bācui pāramena mārājivu ne yajuboacavure”, aibi Jūmenijicu. Aru yópe are nuimi maje jabocu Jūmenijicu: “Apejāravua edaqijāravua baquiyéde ne mārājivure dápiare đacuyumu ji đaicōjeiyeda yópe ji epejuroepedeca diede ne ūmei. Aru me coreóvare đacuyumu diede máre yópe ji toivajuroepedeca diede ne ūmedurā, torojueque ne darājīyepē ayu diede. Yūrecabu ne jabocu bacuyú. Aru nárecabu ji jaboteimara mārājivu. ¹¹Dinumu maquinóre caivu pōeva me majinajarama yūre ne jabocuva. Ina parubevu aru ina parūrivu máre majinajarama yūre ne jabocuva. Que baru űnamene bueiye ye jaubequiyebu űi ĩmarocavure aru ű jinare máre, ne coreóvarājīyepē ayu yūre ne jabocuva. Pōecu cubecube yūre coreóvabecu yūre cāreja. ¹²Náre cōmaje āroje jārī, jarūvacuyumu yu ne āmeno đaiyede apēvure. Aru ye dāpiabecubu diede cojedeca. Aru ārumetecuyumu yu caiye ne āmeina teiyede máre”, aibi Jūmenijicu.

¹³Jūmenijicu “Ape soyūiye mamae soyūiyede soyūyubu mūjare” ayu, aiyyurejaquemavu űi jipocaque soyūiye bāque javeque bajure aru bojecubede máre. Aru apejīe javeque tedu aru bojecubedu máre, maumejiena oatvaquiyebu.

Jūmenijicure mearore jīñami cavarō mearoi meadami űre mearore jīñami mácārō pueno ijāravui
(Mt 26.28, 27.45)

9 ¹Mamarumūre Jūmenijicu “Que darājare”, űi soyūiye bāquede majeñecuva mácavure Moisés bācucue

đaicōjēnejaquemavu ne mácavure, ne coreóvarājīyepē ayu aipe đaiye jaūrōre, ne jīnājīyepē ayu mearore Jūmenijicure yópe űi űrōpe. Aru đarejaquemavu ne Jūmenijicure mearore jīñami mácārōre ijāravui, jīnājivu mearore űre nore, yópe űi đaicōjeiye bāquepe. ²Mūja coreóvaivubu aipe ārojariñami đīñami cūrami mácārōre. Đīñami cūrami ne đaiñami mácārō āimacajeaque aru cuitótecajeaque đaiñami mácārō marejaquémavu. Pucatucubua curiñami mácārō marejaquémavu. Đīñami cūrami mácārōre japoporī dabūborī jocuyoaque taitōrī núvarejaquemavu majeñecuva mácavu. Cūinátucubu, űratucubu, ne mamarumū ecoitucubu, “meatucubu sacerdoteva ne Jūmenijicure memecaitucubu” āmicuriticubu bācarō marejaquémavu. Ditucubu bācarō jīvui ānijarabo cūinājarabo pēoibua tūoijarabo bācarō curejaquemavu. Aru cūináva tūoiva bācarōra āniboa pāuboa doce paiboa bāque Jūmenijicure ne jīye bāque sacerdoteva bācavu ne ārajīye curejaquemavu. ³Ditucubua pucatucubua coricōpavaitucubua bāque barejaquémavu cuitótecaje bācarōque. Dicaje bācarō ānipūravui apetucubu quījiticubu bācarō curejaquemavu. “pūeno baju meatucubu sacerdotevare jaboteipōecu Jūmenijicure memecaitucubu” āmicuriticubu bācarō marejaquémavu.

⁴Ānitōcu mumijuede juaitōcu úruque cūmaitōcu mácārō curejaquemavu, meatucubu ne aitucubu bācarō jīvui. Ūbenita pūeno meatucubu bācarōcatōcu mácārō marejaquémavu. Ānitōcu adaitōcu jocutōcu úruque cūmaitōcu mácārō jīvure aru pūenore máre, Jūmenijicu “Que darājare”, űi soyūiye bāquede majeñecuva mácavure ne ārūritōcu mácārō curejaquemavu ditucubu quījiticubu pūeno baju meatucubu ne aitucubu bācarō jīvui. Ditōcu mácārō jīvui ānibu jorobu úruque cūmaibu bācarō curejaquemavu. Ānié āiye bāque, maná āmicue, Jūmenijicui jīye bāque majeñecuva

mácvure ne cve báquede pōecubeno
ne ārājiye curību b́acarō curejaquemav̄.
Aru āniyo abojīyo, Aarón mácv̄i
tuturiteiyo b́acarō, Jūmenijicv̄i pīaré
đaiyo b́acarō, curejaquemav̄ ditōcu
ḿacarō j́ivv̄i. Aru ānivea pvcavea
cūravea Jūmenijicv̄i đaicōjeiyeque
toivaivea báque máre curejaquemav̄
ditōcu ḿacarō j́ivv̄i. ⁵Ditōcu ḿacarō
pvenora pvcarā pēpeimara mácv̄u
querubín āmicuriv̄u ārojariv̄u, pōeva ne
úruque đaimara mácv̄u curejaquemav̄.
Ina querubín āmicuriv̄u caveá curiv̄u
b́acav̄u, Jūmenijicv̄u cūriv̄u
cainv̄m̄u. Caipvcaturv̄vai ditōcu
moaino ḿacarō pvenora curejaquemav̄
na coapa, ne ārurajiyepe aipe
Jūmenijicv̄i miadáro mearo curōre. Ne
caveáque taorejaquemav̄ ditōcu moaino
ḿacarōre, sacerdotevare jaboteipōecu
b́acv̄i bojedacaino Jūmenijicv̄u
pōeva ne āmeina teiye boje. Ditōcu
moaino ḿacarō pvenora sacerdotevare
jaboteipōecu b́acv̄i ēi epeino ḿacarō
curejaquemav̄ āimara ūi boaimara
ḿacav̄u ne jive báquede, bojedacacv̄u
Jūmenijicv̄u pōeva ne āmeina teiyede.
Ūbenita caride m̄jare cov̄iye javbev̄u
yv̄re apej̄ene diñamique báquede.

⁶Diñami cūrami ḿacarō nōpe
barejaquémav̄. Que baru caijārav̄u
coapa ditucubv̄u v̄ratucubv̄u ne
mamav̄m̄u ecoitucubv̄u b́acarōre
ecovarejaquemav̄ ina sacerdoteva
b́acav̄u, memecarājiv̄u Jūmenijicv̄u
yōpe javépe na mácvure. ⁷Ūbenita
ditucubv̄u quíj̄itucubv̄u j́iv̄vcatucubv̄u
b́acarō j́ivv̄i ecorejauquemav̄ n̄ai
sacerdotevare jaboteipōecu b́acv̄u
quécv̄ra. Aru v̄j̄uá coapa cūináj̄rav̄u
quénora ecorejauquemav̄ ūi ḿacv̄. Aru
ūi ecoiyede nore, nv̄varejaquemav̄
jivede, āimara ūi boaimara mácv̄u ne
jive báquede, j́icv̄u Jūmenijicv̄u. Ūre
j́idejaquemav̄ iye jive báquede ūi baju
āmeina teiye boje aru pōevare boje máre,
ne āmeno đaiye báquede, majibev̄v̄a ne
baju āmeina teiv̄re.

⁸Caiye dieque n̄ai Esp̄ritu Santo
coreóvare đarejaquemav̄ pōevare

iyede: Ānitucubv̄a pvcatucubv̄a
cve báquede Jūmenijicv̄u mearore
j́iv̄v̄ami ḿacarō j́ivv̄i, apenv̄ pōeva
sacerdotevare jaboteipōecu āmev̄u
bv̄ojabedejaquemav̄u ecoiv̄u ditucubv̄u
pvenno baju meatucubv̄u b́acarō j́ivv̄i.
⁹Caiye dieque, yōpe j́adovainope,
coreóvav̄v̄u maja aipe vaiyede caride.
Sacerdoteva b́acav̄u caiye iye ne j́icaiye
báqueque Jūmenijicv̄u āimara ne
boaimara mácvure ne juaiye báquede
aru apej̄e ne j́icaiye báquede máre,
ye j̄ave baju cadatebedejaquemav̄u
pōevare. Caiye dieque ye “Boropatebev̄u
yv̄”, ar̄i d́apiar̄i bv̄ojabedejaquemav̄u
ina Jūmenijicv̄u mearore j́ivv̄u b́acav̄u.
¹⁰Na mácv̄ncapūrav̄u quénora
ju arejaquemav̄u iye đaicōjeiyede,
Jūmenijicv̄i cov̄iye báquede Moisés
b́acv̄re, pōeva ne j́ar̄i bv̄ojaiyede, aipe
ne āiyede, aipe ne ūcuiyede, aipe
ne joaiyede ne cv̄vede, aru aipe ne
cuyaiyede ne bajure máre. Dieque
curejaquemav̄u pōeva Jūmenijicv̄uque p̄v̄
“Que đarājare” ar̄i, ūi yóboque cov̄iyyeta.

¹¹Ūbenita javede Cristo
darejaquemav̄u. Maje sacerdotevare
jaboteipōecube ūi, maje cv̄varāj̄iyep̄e
av̄u caiye iye Jūmenijicv̄i mearo
đacaiye javene. Yōpe ij̄rav̄vcacv̄u
sacerdotevare jaboteipōecu b́acv̄u
ūi vaiye báquepe no meatucubv̄u
sacerdoteva b́acav̄u ne Jūmenijicv̄u
memecaitucubv̄u b́acarōre, ecosv̄u no
pvenno baju meatucubv̄u sacerdotevare
jaboteipōecu b́acv̄i Jūmenijicv̄u
memecaitucubv̄u b́acarōre, nopedeca
vaidéjaquemav̄u Cristo apetucubv̄u
meatucubv̄u baji. Ūbenita ditucubv̄u
parv̄ritucubv̄u ij̄rav̄vcatucubv̄u pvenno
baju meatucubv̄u b́acarō pvenno. Aru
javbetucubv̄u ij̄rav̄vcatucubv̄u pvenno
baju meatucubv̄u b́acarō pvenno. Ditucubv̄u,
Cristoi memecaitucubv̄u, pōeva ne
đaitucubv̄u āmev̄u. Aru cv̄edaitucubv̄u,
ij̄rav̄vcatucubv̄u máre āmev̄u. ¹²Cristo
ecorejauquemav̄u no tucubv̄u pvenno
baju meatucubv̄u. Ūbenita cabrava
b́acav̄u ne jive báqueque aru oteiv̄ecu
mamajina mácv̄u ne jive báqueque

máre ecobedejaquemavũ ã. Quénora ecorejaquemavũ ãi jive bajuque, jícasũyũ diede Jũmenijicũre pœvare boje. Que teni cũinára quénora ecorejaquemavũ. Aru yópe pœcũ bojedacarĩ jodeni meadaiyepe buoimara mácavũre, nopedeca Cristo bojedacarĩ jodeni meadarejaquemavũ majare, maje ãmeina teiyeque buoimarape tede ðaiye báquede jocarĩ ãi jiveque.

¹³ Majeñecua mácavũ ne jēni jáiye báquede yaiyú báciu baju búcarõre aru apede ne ðaiye báquede máre Jũmenijicũi ubede, na mácavũ ecoicõjememara marejaquémavũ Jũmenijicũre mearore jíñami mácarõ jívũi. Ne que ðarĩburu yóboi, sacerdoteva báciuvũ jajiédejaquemavũ na mácavũre cabrava báciuvũ ne jive báquede apenũmũa, aru oteivecũva báciuvũ ne jive báquede apenũmũa, aru apenũmũa oteivecũco ne boarĩ juaimo mácoi ũapena máquede ocoque. Que teni ina sacerdoteva báciuvũ majeñecua mácavũre buojare ðarejaquemavũ jívũ mearore Jũmenijicũre bediõva cojedeca. Ne baju puenomia boropatebevũ barejaquémavũ Jũmenijicũi jáinore. Ŭbenita ne ũmei boropateivũ barejaquémavũ cãreja. ¹⁴ Ŭbenita Cristoi jive meiyē báque boje ãi yainũmũ mácarõre majare boje, pũeno baju caðateibi majare Jũmenijicũi jáinore. Me jáñũme majare Jũmenijicũ Jesúi jiveque ãi jáiye báque pũeno majare ãimara ne boaimara mácavũ ne jive báqueque. Ñai Espĩritu Santo cainũmũa cũcũ parũre ðarejaquemavũ Cristore, ãi boarĩ jarũvaicõjequiyepe ayũ ãi mauvare ãi bajure. Que baru Jũmenijicũre jícaiyepe tedejaquemavũ ã. Ye ãmeno cubecũva aru jaubecũva ãi baju jícarejaquemavũ Jũmenijicũre majare boje. Yópe joaiyepe docũcũede ocoque, nopedeca Cristo joaiyepe ðaibi maje ãmeũmene aru maje dápiaino ãmenore maje ãmeina teiye boje, “Boropatebevũ yũ” maje arĩ dápiarĩ buojarãjiyepe ayũ. Iye maje ãmeina teiye boje maja coavajũromaramu Jũmenijicũre jarũvarĩ.

Nópe ðacarejaquemavũ Cristo majare boje, maje mearore jíni memecarãjiyepe ayũ ñai Jũmenijicũ arũcũre.

¹⁵ Cristoi yaicáiye báque boje pœvare, Jũmenijicũ coyũrejaquemavũ “Que ðarãjare” arĩ, ãi yóboque coyũiye báquede Cristoque. Que baru Jũmenijicũ mearo ðacacũyũme caivũ maja ãi cutuimara mácavũre ã jina márajivũva. Ina yaivũ báciuvũre Cristoi yaiquĩye jípcacĩ máre mearo ðacacũyũme ã. Na mácavũ ãi mearo ðacaimara marajãrama cainũmũa yópe “Jãve mearo ðacacũyũme yũ mũjare”, ãi aiye báquepedeca na mácavũre. Pœva ne cũe báquede Jũmenijicũ “Que ðarãjare” arĩ, ãi mamarũmũque coyũiye báqueque, boropateivũ barejaquémavũ Jũmenijicũi jáinore ne ãmeina teiye boje. Ŭbenita Cristoi yaiye báquede, yópe bojedacarĩ jodeni meadaiyepe tedejaquemavũ pœvare maje ãmeina teiyeque buoimarape tede ðaiye báquede jarũvarĩ, Jũmenijicũi ãrumetequiyepe ayũ diede.

¹⁶ Yópebu apenũ pœva ne ðaiye: Cũinácũ pœcũ pœva ne jáipaiyede coyũru ne ãmiãre ina cũvarãjivũre ãi cũvaede ãi yainĩburu yóbore, náre jáðovaiye javũvũ yaiyú báciu, ne cũvarãjiye jípcacĩ ãi cũvaede. ¹⁷ Ñai coyũyũ báciu yaibécũ cãreja, ãi coyũiye báque bojecũbevũ ina ne ãmiãre coyũimara mácavũre. Quénora ãi yainĩburu yóboita náre bojecũvũ ãi coyũiye báque die.

¹⁸ Quédecabu Jũmenijicũ “Que ðarãjare” arĩ, ãi coyũiyeque. Que baru ãnié “Que ðarãjare” arĩ, ãi mamarũmũque coyũiye báquede pœvare Moisés báciuque máre, ãimara ne boaimara mácavũ ne jive báqueque búrejaquemavũ. Aru iye jive cũbe báque baru, búbejebu die báque.

¹⁹ Mamarũmũre Moisés báciu coyũrejaquemavũ majeñecua mácavũre caiye iye ðaicõjeiyede Jũmenijicũi toivaquino mácarõ diveá cũravea báqueda. No yóbore oteivecũva báciuvũ ne jive báquede ãni, aru cabrava báciuvũ ne jive báquede máre ãni ocoque jõmeni jívarĩ buojarĩ jajiédejaquemavũ ãniyoca paperayoca ãmũjũriyoca cãriáiyoca iye

ðaicõjeiyeque toivacaiyoca bácarõra aru põvara máre. Hisopo ãmicuricu jocujicu cavabua báquede puyorí buojari, cuitótemea jūarimea lana ãmicurimea máqueque buorí, ãnié jive báque ocoque jõmeni jivaiye báquede jajiédejaquemavu ù mácu. ²⁰ Aru yópe arejaquemavu: “Jūmenijicu mujare ju aicõjeimi ‘Que ðarājare’ arí, ùi coyuiye báquede, muje ðarājiiyepe ayu caiye iye ðaicõjeiyede. Iye jiveque jádovañumu yu yópe ùi coyuiye báquepedeca ðaiye jaurõre caivu mujare. Aru ù máre ùi coyuiye báquepedeca ðacuyume ù”, arejaquemavu Moisés bácu. ²¹ Quédeca diñami cūrami ne Jūmenijicure mearore jíñami mácarõra aru caiye ãnié diñamique ne mearore jíyeque báqueda máre ãimara ne boaimara mácavu ne jive báquede jajiédejaquemavu Moisés bácu. ²² Jāvetamu yópe coyuiye Jūmenijicui ðaicõjeiye ùi coyuiye báque Moisés bácu. Ûre cuve ne Jūmenijicure mearore jíyeque báquede ina sacerdoteva bácavu mearore ðarejaquemavu Jūmenijicui jáinore ne jive báquede jajiéiye báqueque, Jūmenijicure jínajivu mearore dieque bediõva cojedeca. Aru pñeno baju jive meiyé javvu. Jive memenu, Jūmenijicu ye jaruvabeni ãrumetebecube põeva ne ãmeina teiyede.

Jūmenijicu ùi jaruvari ãrumeteino põevai ãmeina teiyede Cristoi yaiye báque boje
(He 1.13)

²³ Die ijāravuque Jūmenijicure mearore jíñami mácarõque cuve báquede mearore ðare ðaiye jaurējaquemavu majeñecuva mácavu ne ecorí buojarājiyepe aiye no mácarõre, nópe ji jave coyuiye báquepe. Diedecabu quénora majiéda ãrojaepe párdiuiye iye cavarõ mearo Jūmenijicui curõque ùre mearore jíñamique. Cūináturu ãmevu. Que baru pñeno baju me jícaiye javvu die cavarõ mearo Jūmenijicui curõque cuvede, mearore ðaquiiyepe aiye, põeva maje ecorí buojarājiyepe

aiye nore. ²⁴ Ûbenita Cristocapūravu ecobedejaquemavu diñami cūrami Jūmenijicure mearore jíñami põeva ne ðaiñami mácarõ. Diñami cūrami mácarõ jáve baju ãmenejaquemavu. Quénora majiéda ãrojaepe párdiuiye báquebu ãniñami cūrami Jūmenijicure mearore jíñami jáve baju cavarõ mearo curiñamiye. Quénora ecorejaquemavu cavarõ mearo Jūmenijicui curõ baju. No Jūmenijicu yebai caride cubi, jēniacacuyu Jūmenijicupe maje boje, ùi cadatejiyepe ayu majare. ²⁵ Caiñua coapa maja judfova maje sacerdotevare jaboteipõecu bácu ecorejaquemavu ditucubu pñeno baju meatucubu ùi Jūmenijicure memecaitucubu bácarõ jívu ãimara ùi boaimara mácavu ne jive báqueque, ùbenita ùi baju jive báque ãmeque. Ûbenita Cristocapūravu ecovabedejaquemavu pñeno baju meatucubure obedinmua jícyu ùi bajure. ²⁶ Que teyu bácu baru, Cristo yaijébu obedinmua Jūmenijicui ijāravure cuéðaiye báquemiata. Quénora caride, ijāravure buojaijāravuare, maje curijāravuare, Cristo darejaquemavu ijāravui cūinára, jaruvacuyu ãmeina teiyede, Jūmenijicui ãrumetequiyepe ayu diede, Cristo ùi bajure ùi boarí jaruvaicõjeiye báquede ùi mauvare.

²⁷ Jáve caivu põeva yainjaramu cūinára. Aru jáve maje yainfburu yóboi, Jūmenijicu coyucuyume ãrore maje curājínore jāravu cūiméjāravu baquinóre majare coapa, maje ðaiye boje maje cuede ijāravui. Apevu curājaramu cavarõ mearo Jūmenijicui curõ aru apevu curājarama toabo cūiméboi. ²⁸ Aru quédeca jáve ñai Cristo máre yaidéjaquemavu cūinára. Ûi bajure boarí jaruvaicõjēnejaquemavu cūinára, jaruvacuyu obedivu põeva, caivu Jūmenijicure ju aivu, maje ãmeina teiyede, Jūmenijicui ãrumetequiyepe ayu diede. Aru jáve dacuyume ù ijāravui bediõva cojedeca. Ûbenita maje ãmeina teiyede jaruvacudabecuyume, diede ùi jaruvacudaiye báque boje javede. Quénora meadacudacuyume caivu

majare, úre napini coreivure, úi cuvare ðaiyede majare caiye iye Jūmenijicui mearo ðacaquiye ðe úi pōevare.

10 ¹Coуққийиву мўјаре аpede, мўје мајинајийеpe ауу айе teni јауé бáқuede Jesucristoi yaiye бáқuede. Jūmenijicui ðaicōjeiye úi coyuiye бáқue Moisés бáцуре ye јáve бajú ámevu. Que бару iye јáve бajúpe cūináturu ámevu. Quénora yópe бótaiye pōecui decocu јáve ámepe, nopedeca iye ðaicōjeiye máre јáve ámevu. Majiéda árojaepe páriđuiyebu caiye iye Jūmenijicui mearo ðacaquiye јáve, iye maje cуvaquiye. Cūinátururecabu sacerdoteva бáцаву ne јícaiye бáқue Jūmenijicure áimara ne boaimara máцавуре ne ámeina teiye boje јáравуа coapa, ұжуá coapa, caиnмта. Ёbenita majeñecuva máцаву ne Jūmenijicure јícaiye бáқuede yópe úi ðaicōjeiyepe, yópe нури earí бuojabepe Jūmenijicu yebai, ye boropatebevupe teni бuojabedejaquemavu, na máцавуре јаубede tebe бáқue boje.

²Ina pōeva Jūmenijicure mearore јívu бáцаву boropatebevу бáцаву бару Jūmenijicui јáinore cūináра, cūináro iye јícaiycarō mácarōque, boropatebejebu na máцаву. Aru caiye iye ne јícaiye бáқuede Jūmenijicure dajocajebu na máцаву. ³Ёbenita quénora árure ðaimara máцаву barejaquémavu ne ámeina teiyede iye јícaiye бáқueque ұжуá coapa. ⁴Oteivecуva бáцаву ne jiveque aru cabrava бáцаву ne jiveque máre Jūmenijicu ye јарувabeni árumetebecube pōeva ne ámeina teiyede. Que бару diepe paiye јícaiyeque, pōeva boropateivу cуma cāreja.

⁵Que бару Cristore úi daiye бáқue ijáравуi јаurejaquemavu, úi јícaquiyepe айе úi bajure pōeva ne ámeina teiye boje. Aru mamarumu úi daquiye јipocare ijáравуi, yópe arejaquemavu јípacу Jūmenijicure:

Pōeva áimara ne boaimara máцавуре ne јícaiyeде муре aru ape ne јícaiyeде муре úbevу му. Ёbenita уüre pōecui бajúque pōetede ðaquijivу му, јi

јícaquiyepe ауу јi bajure муре.

⁶Caride pōeva муре ye torojure ðabema ne јícaiyeде муре áimara ne boaimara máцаву јуарí јарувaimara máцавуре, pueðarāјivу муре, aru ape ne јícaiyeде máre, ne ámeina teiye boje. ⁷Aru que aríburu yóboi, arejacacу уу: “Му, јipacу, Jūmenijicu, јáјacу. Yui cуvu уу, ðacacууу yópe mi urōpe. Javede nópe arí, toivaicōjenejavū му јi borore ániyoca paperayoca úmјuriyoca cāriáiyoca mi yávaiyeque toivacaiyoca бácarōque”, arejaquemavu Cristo.

Nópe arí, toivaicōjenejaquemavu Jūmenijicu.

⁸Mamarumure Cristo arejaquemavu јípacу Jūmenijicu úbecure pōeva ne јícaiyeде úre áimara ne boaimara máцавуре, aru ape ne јícaiyeде úre, aru ne јícaiyeде úre áimara ne boaimara máцаву јуарí јарувaimara máцавуре, ne pueðarāјiyepe ауу úre, aru ne јícaiyeде úre ne ámeina teiye boje máre. Caiye dieque pōeva ye torojure ðabema úre. Que arejaquemavu Cristo Jūmenijicurā, Jūmenijicu јícaicōjeñу máцуреca caiye iye јícaiyeде úre úi ðaicōjeiyeque úi coyuiye бáқuede Moisés бáцуре. ⁹Que aríburu yóboi, yópe arí, Cristo arejaquemavu јípacу Jūmenijicure: “Jáјacу. Yui cуvu уу, ðacacууу yópe mi urōpe”, arejaquemavu. Que бару Cristo úi yaiye бáқue boje caiye ape јícaiyeде Jūmenijicure парубеpe јаure ðarí, bojecubede ðarejaquemavu. Quénora Cristo úi yaiye бáқueмиата, Jūmenijicure јícaino cūinároratamu парурō bojecurō Jūmenijicui јáinore. ¹⁰Jesucristoi yaiye бáқue boje yópe Jūmenijicui urōpe, caivу maja úre јu айву, boropatebevу Jūmenijicui јáinore, yópe нури eaiyepe бuojaiвубу maja Jūmenijicu yebai ye јаубede ðaimara. Yópe joaiyepe docуcuede ocoque, nopedeca Cristo јарувarejaquemavu maje ámeina teiyede, úi bajure úi boarí јаруvaicōjeiye бáқuede úi mavure cūináра.

¹¹ Maja judíova maje sacerdoteva bácvacapuravú coapa núrvú bácvú ðarejaquemavú ne memecaiye báquede Jūmenijicure járavua coapa. Aru ye buojabedejaquemavú memevú cainumua. Obedinumua cūináturua ne jícaiye báquede Jūmenijicure jícarejaquemavú na mácvú coapa bedióva cojedeca. Ūbenita caiye iye ne jícaiye báqueque Jūmenijicú ye jaruvabeni ārūmetebedejaquemavú pōeva ne āmeina teiyede. ¹² Ūbenita Cristocapuravú cūinára ūi bajure jícarejaquemavú Jūmenijicure, maje āmeina teiye boje. No ūi jícaino mácarō cūinároque, Jūmenijicú cainumua jaruvarī ārūmetecuyume maje āmeina teiyede. Aru ūi bajure jícarīburu yóboi, ūi buojaiyede caino ūi memeiño mácarōre, Cristocapuravú dobrejaquemavú jípacú Jūmenijicú meapuravú, ūi cuvae boje caiye jípacú parūéde ūre, jabotecuyú caiyede. ¹³ Caride noi napini coreibi, pū jípacú Jūmenijicú epeiyeŧa ūi mauvare ūi cuboba cāchinoi, náre vainí turī jabotecuyú. ¹⁴ Que baru cūinára ūi bajure jícaino mácarōque cainumua ye jaubede ðarejaquemavú caivú maja ūi boropatebede ðaimarare Jūmenijicú jáinore, ūi jipocateimarare Jūmenijicú yebai.

¹⁵ Aru ūai Espírītu Santo máre, yópe arī, diede ju arī, toivaicōjenejaquemavú:

¹⁶ Yópe aibi maje jabocú Jūmenijicú: “ ‘Que ðarājare’, arī coucuyumú yú Israel bácvú pāramena márjavú ne yajubocavure apejáravua edaquijāravua baquiyéde. Na márjavure me coreóvare ðacuyumú yú ji ðaicōjeiyede yópe ji epejuropedeca diede ne ūmedurā. Aru na márjavure ðápiare ðacuyumú diede yópe ji toivajuropedeca diede ne ūmei”, aibi Jūmenijicú.

¹⁷ Aru que arīburu yóboi, yópe are nurejaquemavú maje jabocú Jūmenijicú: Jáve ārūmetecuyumú yú caiye ne āmeina teiyede. Aru

jaruvacuyumú yú ne āmeno ðaiyede apevure. Aru ye ðápiabecubu diede cojedeca, aibi Jūmenijicú, arejaquemavú ūai Espírītu Santo.

¹⁸ Que baru Jūmenijicú ūi ārūmeteiye boje maje āmeina teiyede aru maje āmeno ðaiyede apevure, ye jaubevú bedióva cojedeca sacerdotevare ne jícaiye ūre. Āimara ne boaimara mácvure o apejēne máre ye jaubebu caride, maje āmeina teiye boje.

**Jūmenijicú yebai yópe nuri eaiyepe
maje napini coreiyede maje baju
parure ðarī maje ūmei nure nrajare**
(Mt 27.51; Mr 15.38; Lc 23.45;
Ro 12.19; He 13.20)

¹⁹ Jesucristo jáve memecaibi Jūmenijicure cavarō mearoī majare boje. Que baru mūja, jívú, Jesúre ju aivú caride jidubevúva buojaivúbu boroteivú maja Jūmenijicú bajuque, yópe maje ecoiyepe no curō pūeno mearo, cavarō mearo Jūmenijicú curōi. Nópe buojaivúbu Jesúi jaruvaiye báque boje caiye maje āmeina teiyede ūi jive meiyé báque boje ūi yainumú mácarōre. ²⁰ Yópe ūai sacerdotevare jaboteipōescu bácvú ūi ecoiye báquepe no pūeno baju meatucubú bácarō jívúi ānicaje coricōpavaicaje bácarōre ūi vaiye báque boje, nopedeca Jesúi yaiye báque boje ecoivure teivúbu maja Jūmenijicú yebai. Que baru dicaje bácarō corica bají jađeni nurejavúya Jesúi yainumú mácarōre. Que teni Jesucristo nuimape tedejaquemavú, yópe maje nuri earī buojarājiyepe ayú Jūmenijicú yebai. Jipocare ūi yebai ye nuri eaiyepe buojabedejavú maja. Ūbenita caride Jesucristo yópe nuri earī buojare ðaibi majare Jūmenijicú yebai. Que baru, “¿Nuri earī buojarājídica?” abevúva, jáve majivú maja boroteni buojaivure Jūmenijicú bajuque. ²¹ Aru Jesucristorecabe maja Jūmenijicú pōeva maje sacerdotevare jaboteipōescu, majare jári coreyú yópe cūrami upacú jári coreiyepe ūi cūramicavure. ²² Ūi

yaiye báque boje majare boje, yópe joaiyepe docucuede ocoque, nopedeca maje ámeũmene, maje dápiaino ámenore, aru maje ðaiye ámene máre joaimara mácavure paivubu maja, boropatebevu Jũmenijicui jáinore. Que baru Jũmenijicueque borotenaquarevu pucaũmea cubevuva aru maje ju aiyede úre dajocabevuva.

²³Coreóvaivubu maja Jũmenijicu jáve ðayure yópe úi aiyede báquepedeca cainũna. Que baru parúeque Jesúre ju are nũrajarevu yópe maje ju aiyede báquepedeca mamarũmure. Aru ye “Jũmenijicu ðabecube yópe úi aiyede báquepe” abevuva, napini corenajaquarevu Jũmenijicui ðacaquiyede caiye iye mearore yópe “Jáve mearo ðacacũyumu yũ mujare”, úi aiyede báquepedeca.

²⁴Torojarivũ ðaiyurájarevu yópe majare jauũore pueno méne nũre ðare nũrajivu maje baju maje úmei, caðatenajivu majacavure, aru urájivu majacavure, mearo ðarájivu náre máre. ²⁵Apevu mujacavu dajocadama ne cójijivaiye báquede apevu Jesúre ju aipóvaque. Úbenita nópe ðaiye meamevu náre. Quéno ra cójijinaquarevu maja, parure ðarájivu majacavu ne ju aiyede Jesucristore. Joabejĩnotamu añijáravu baquinó maje jabocu Jesucristoi coyũquiyede árore maje curájinore járavu cũiméjáravu baquinóre, cavaró mearoi o toabo cũiméboi, maje ðaiye boje maje cuede ijárvui. Que baru pueno baju parure ðarájarevu majacavu ne úmene.

²⁶Parure ðabevu baru majacavu ne úmene, bediõva cojedeca ámeina tévarãnvajebũ maja. Ámeina tede nuivũ baru, coreóvaivũvacari Jũmenijicui yáviyede jávene, ye Jũmenijicure jícaiyede cuvabejebũ maja, maje ámeina teiye boje. ²⁷Quéno ra coreiye jaujebũ majacavu ámeina tede nuivure Jũmenijicui ñájine ðaquiyede náre. Jũmenijicu ñájine ðacũyume caivũ úi mauvare, ina náre jaboteicõjemevũ úre, ne bĩjarájipepe ayũ úre jocarĩ no toabo urabo ámebo cũiméboque. ²⁸Ácu

põecu Jũmenijicure pueðabecuva ju abecu bácu úi ðaicõjeiyede úi coyũiyede báquede Moisés bácuve jáve ñájinejaquemavu. Pũcarã o yóbecurã majidivũ bácvũ apesui ju abe báquede Jũmenijicui ðaicõjeiyede ne boro coyurĩ adaiyede úre, cómaje ároje jámevũva boarĩ jarũvarejaquemavu ñai ju abecu bácuve. ²⁹Que baru pueno uraró baju ñájicũyume ñai ámeina jáũũ Jũmenijicui mácuve.

Úre pueðabecuva ju abedu, “Jũmenijicui mácu ámemi” ayũ, põeva ne jápiaiyepe, yópebu jarũvayipepe úre. Pueno uraró baju ñájicũyume ñai “Ye baju ámevu. Ye bojecubevũ” ayũ, Jũmenijicui mácuve jive meiyede úi yaiye báquede, Jũmenijicui coyũquiyepes ayũ põevare apeno “Que ðarájare”, úi coyũiyede yóboquede. Jesucristoi jiveque joaimara mácavure paivubu caivũ úre ju aivũ boropatebevu Jũmenijicui jáinore. Úbenita ñai “Úi jivebu caivũ apevu ne jivepe” ayũ, joaimure ámemi aru boropateyũve. Que baru pueno uraró baju ñájicũyume. Aru pueno uraró baju ñájicũyume ñai ámeina yávyũ ñai Espĩritu Santore, “Abujucui parúeque põeva ne ðarĩ majibede ðarejaquemavu Jesús” ayũ, Jũmenijicui mearo ðacare ðaimure bojecubeda ú jinare, úi ue boje náre.

³⁰Coreóvaivubu maja jáve ñájicũyure maje jabocu Jũmenijicu úi yópe aiyede báque boje: “Yurecavu ñájine ðacũyũ ina ámeina ðaivũ bácvure apevure. Yávacari bojedare ðacũyumu náre no boje yo ámeno ne ðaino mácarõre”, arejaquemavu. Aru yópe arĩ, toivaicõjenejaquemavu: “Maje jabocu Jũmenijicu coyũcũyume úi põevare ñájipe jauũore o ñájipe jaubede náre coapa ne ðaiye báque boje ijárvui”, arĩ toivaicõjenejaquemavu ú. ³¹Ñai Jũmenijicu apucu “Ñájicũyumu mu”, úi coyũimũ mácuve curu, jidojaró baju bájebũ úre. Que baru pueno baju parure ðarájarevu majacavu ne úmene.

³²Arũmetebejarã muja aipe muje cue báquede javede muje coreóvarĩburu

yóji boi Jūmenijicui yávaiye méne jāvene Cristorā, ūi meadaiyede majare. Dinumu mácarōre urarō nājínore napini nuavvya muja. Ūbenita dajocabevvya ye vainí turí nūmeteavvya muja. ³³ Apenumua mujacavunque nūri yóvanvya muja náre, pōeva Jesúre ju abevu ne āmeina yávaiyede náre caivu ne jápiayede aru ne āmeno đaiyede náre caivu ne jáiyede máre. Aru apenumua mujare máre āmeina yávavvya caivu ne jápiayede aru āmeno đávūya caivu ne jáiyede máre. ³⁴ Mujacavu javova ne buoimarare cōmaje āroje jári, cadateivu bateávūya muja, muje jíyede náre jauéde. Náque nājívu bateávūya muja. Muje ju aiye boje Jesúre, ina muje mauva jēni nūvari muje cūvaede, muja ne icaimaravacari napívu bateávūya chíomevva. Quénora torojure nuivu bateávūya, muje coreóvayie boje cūvarívure caiye iye mearore Jūmenijicui jíquiyede mujare cavarō mearo ūi curōi, yópe ūi aiye báquepedeca. Aru iye Jūmenijicui mearo đacaiye bojecue bajubu ijāravunque pūeno aru cūimétamu máre.

³⁵ Que baru yópe muje ju aiye báquepedeca Jesúre ju are nūjara muja jídvbevva. Aru urarō mearo bojedainore earājaramu muja. ³⁶ Muje nājíyede, napiye jauédecabu mujare, muje ju arājíyepē aiye Jesúre yópe Jūmenijicui urōpe. Que teni earājaramu iye mearore ūi đacaquiyede mujare yópe ūi aiye báquepedeca. ³⁷ Yópe arí, Jūmenijicui toivaicōjēnejacquemavu Cristorā:

Maumejiena nāi dacvuy dacvuy me. Joe corebecube ū. ³⁸ Aru ina ji boropatebede đaimara mácvu ne ju aiye boje yure, apurājívubu cainumua. Que baru coatede đabemara mārājívubu na yure jaruvarí. Ūbenita apescu nácacu ūi dajocarū ūi ju aiye báquede yure, ye torojubecubu yu ūque, arejaquemavu Jūmenijicu.

³⁹ Ūbenita majarecabu ye dajocavū āmevu maje ju aiyede. Que baru coatede đaimarape bíjabenamu Jūmenijicure

jocarí. Quénora Jūmenijicure ju are nūri ūi meadaimaratamu maja, cūvarājívū caiye iye mearore ūi đacaquiyede majare.

Pōeva ne ju aiye Jūmenijicure

(Ro 4.17-22; He 13.14)

11 ¹ Jūmenijicure ju aivurecabu jāve majídivu eare đaimara mārājívure iye maje napini coreiyede, maje cūvarājíyede méne Jūmenijicue, cūvabevvavacari cāreja diede. Me majídivubu iye maje jāmeve cāreja jāve bajure, aru vaiquíyede jāmevavacari cāreja diede. ² Jūmenijicu me járejaquemavu majeñecuva mácvure ne ju aiye báque boje ūre. Aru cadatedejacquemavu na mácvure ūi đaiye báquede pōeva ne đarí majibede.

³ Maje ju aiye boje Jūmenijicure, coreóvavubu cūedayu bācvure ijāravure aru caiye ijāravunque ūi yávaiye parúeque. Que baru caiye iye maje jári buojaiyede cuedarejaquemavu ū maje jári buojabeque.

⁴ Abel bācu ūi ju aiye báque boje Jūmenijicure, jídejaquemavu ānié jícaiye mearore Jūmenijicui jáinore Caín mácu jícaiye pūeno. Mearore jídejaquemavu Jūmenijicure Caín mácu yópe ūi urōpe. Ūbenita mearore jídejaquemavu Jūmenijicure Abel bācu yópe Jūmenijicui urōpe. Que baru Jūmenijicu “Boropatebecubu mu ji jáinore”, arejaquemavu Abel bācvure. Aru jacopurejaquemavu ūi jícaiye de ūre. Abel bācu yayú bācvavacari, majare coreóvare đaibi caride aipe đaiye jauřōre majare maje mearore jíyede Jūmenijicure, ūi ju aiye báque boje ūre.

⁵ Enoc ūi ju aiye báque boje Jūmenijicure, yaibédejaquemavu ū. Quénora apucureca ūre nuvarejaquemavu Jūmenijicu Paraíso āmicurōi. Que baru Enoc cūbedejacquemavu cojedeca ijāravui. Aru Jūmenijicu ūi nuvaquiyē jípcocai Enore, yópe arejaquemavu ūi borore: “Yure torojure đayube ū” arejaquemavu Jūmenijicu, yópe

Moisés b́acui toiwaquiye báquepedeca obediujua yóbore. ⁶Põescu ju abecu baru Jūmenijicure, ye buojabebi torojure ðayū ũre. Ácu põescu yópe nuri eaiyuere Jūmenijicu yebai, cuiyucu me ũque, borotecuyū ũre, ñai põescure ju aiye jauvu Jūmenijicu cūcure aru me bojedayure caivu ina ũre voivure, ũi caðatequiyepe aiye náre ne jēniaiyede ũque.

⁷Noé mácu ũi ju aiye báque boje Jūmenijicure, jiadocū uracū cūrami curicūre ðarejaquemavu yópe Jūmenijicui coyuiye báquepedeca ũ mácure, meadacuyū ũ jina mácavure muiváibore jocarī. Jūmenijicu coreóvare ðarejaquemavu ũ mácure ānié āmene vaiquíye báquede, ānié jáme máquede cāreja. Aru Noé máscapūravu jápiarī adarī ju arejaquemavu ũre. Ũbenita ijāravucavu Jūmenijicure ju abevu b́acavu Noé mácure jápiarī adabeni ju abedejaquemavu ũ mácure. Que baru Jūmenijicui ñájine ðarājimara marejaquémavu na mácavu. Ũbenita Noé mácure “Boropatebecubu mu ji jáinore”, arejaquemavu Jūmenijicu, ũi ju aiye báque boje ũre.

⁸Abraham mácu ũi ju aiye báque boje Jūmenijicure, etarejaquemavu ũi joborõre jocarī, nucuyū apejoborõita, yópe Jūmenijicui coyuiye báquepedeca ũ mácure. Jūmenijicu ũ mácure cuturī ũ jicu bacuyáva, “Mi apeno curõ mi cūquinore mure jáðovacuyumu yu”, ũi aiye báquede ũ mácure, ārore ũi nuquinore majibecuvacari, ju arī etarī nurejaquemavu ũ, Abraham mácu.

⁹Ũi ju aiye báque boje Jūmenijicure, curejaquemavu no joborõ Jūmenijicui jíquijoborõi ũi pāramena mārājivure, yópe dijaborõcavu āmevu ne cūepe. Abraham mácu ũ jinaque, cuivu b́acavu, ũi mácu, Isaac b́acu, aru ũi pāramecu, Jacob b́acu máre, curejaquemavu āniñamia cūramia āimapodaque ðaiñamia máque jívui. Aru na mácavu máre, Isaac b́acu aru Jacob b́acu, Jūmenijicu “Mearo ðacacuyumu yu mure”, ũi coyumara marejaquémavu na

mácavu coapa. ¹⁰Abraham mácu napini coredejaquemavu ũi cūquiyede no ĩmaro cūiméno Jūmenijicui cainumua curiĩmaroi. Jūmenijicurecabe dápiayū b́acu aipe ārojaro maquinóre diĩmarore aru ðayū b́acu máre diĩmarore.

¹¹Abraham mácu ju aiye báque boje Jūmenijicure, parure ðarejaquemavu Jūmenijicu ũ mácure ũi jueðocuvayuiyepe ayū. Bucucu baju b́acuvacari ũ mácu aru jímarepaco Sara b́aco jueðoeabeco b́acovacari õ máco, na mácavure jueðocuvare ðarejaquemavu Jūmenijicu. Abraham máscapūravu “Jāve Jūmenijicu ðacuyume yópe ũi aiye báquepedeca”, arī dápiarejaquemavu ũi ju aiye Jūmenijicure ðajocabecuva.

¹²Que baru ũi jueðocuvajurorore jueðocuvari buojabecu b́acu yayú b́acui bajupe cuvacu b́acuvacari, obedivu baju ũi pāramena cuma caride. Abiáovape obedivu teni, ēpayabeape obedivu máre tedama na, Abraham mácu pāramena.

¹³Caivu ina põeva mácavu ju arejaquemavu Jūmenijicure, pu ne yayieta ðajocabecuva. Eabedejaquemavu cāreja ānié Jūmenijicui jíquiye báquede yópe ũi aiye báquepedeca na mácavure. Obediujua Jūmenijicui mearore jíquiye jipocai, coreóvarejaquemavu na mácavu Jūmenijicu jāve jícyure. Que baru torojurejaquemavu iye vaiquíye boje yópe Jūmenijicui aiye báquepedeca. Coreóvarejaquemavu aipe paiye na mácavu ne cuede.

“Apenoacavu curivubu maja. Maje joborõre jocarī ðajocavubu maja”, are nuivu barejaquémavu na mácavu.

¹⁴Põeva diepe paiyede aivu jāve vore nuivubu, earājivu apeno curõre, ne curājimore. ¹⁵Na mácavu ārurivū baru ne curõ mácarõre, copainuivu buojajebu na mácavu nore. ¹⁶Ũbenita quénora apeno curõ pueno mearo curõ cavarõ mearo Jūmenijicui curõre, ne pueno torojurājiye boje nore, urī, vorī, napini coredejaquemavu na mácavu. Jūmenijicu no ĩmaro mearore meadacarejaquemavu na mácavure. Que teni jáðovarejaquemavu cūyebecuva

jaboteyũ na mácavũre. Aru ne mearore jímu cuyebedejaquemavũ ñ.

¹⁷⁻¹⁸ Abraham mácũ ñi ju aye báque boje Jũmenijicũre, ñvarejaquemavũ mamacu Isaac bácũre juarĩ jícarĩducuyũ ñ mácũre Jũmenijicũre. Jũmenijicu Abraham mácũre juarĩ jícaicõjenejaquemavũ ñi mácũ baju cũinácũre, Jũmenijicũi majiyũe boje aipe ãrojaene Abraham mácũi ju aiyede ñre. Abraham mácũi jádovaquiyepe ayũ aipe ãrojaene ñi ju aiyede Jũmenijicũre, “Quévũra ina Isaai pãramena marajãrama mipãramena baju”, Jũmenijicu ayũ bácũvacari, Abraham mácũ Isaac bácũre juarĩ jícasuyũ barĩdurejaquemavũ Jũmenijicũre. ¹⁹Yópe arĩ, “Ímacũre ji boarĩ jarũvarũ, Jũmenijicu nacovañũ buoiaibi ñre yainore jarũvarĩ”, arĩ dápiarejaquemavũ Abraham mácũ. Isaac bácũ jípacũ bácũi boarĩ jarũvajuromũ mácũ barejaquémavũ. Que baru yópe nacovaimũpe páyu barejaquémavũ yainore jarũvarĩ. Aru caiye dieque coreóvare ñaibi majare Jũmenijicu nacovañũre yaijũrorivũre yainore jarũvarĩ.

²⁰Isaac bácũ ñi ju aye báque boje Jũmenijicũre, ñi yaiquíye jipocamia jẽniarejaquemavũ Jũmenijicũi mearo ñacaquiyede mamara pũcarãre, Jacob bácũre aru Esaú bácũre máre.

²¹Jacob bácũ ñi ju aye báque boje Jũmenijicũre, ñi yaiquíye jipojĩcai, jẽniarejaquemavũ Jũmenijicũi mearo ñacaquiyede mamacu José bácũi mára pũcarãre. No jipocai tutayu bácũvacari ñi tuturiteiyorã ñi parũbe boje, mearore jícsuyũ Jũmenijicũre, parũéque jẽniarejaquemavũ iye mearo ñacaquiyede ímacũ bácũre jíbcũ bácũ pũeno, José bácũ oatũvaiyũrĩduyũ bácũvacari ñi nópe ñaiye báquede.

²²José bácũ ñi ju aye báque boje Jũmenijicũre, coyũrejaquemavũ Israel bácũi pãramena marajivũ ne etarãjiyede Egipto ñmicurijoborõre jocarĩ. Aru ñvavaicõjenejaquemavũ ñi cúa máquede, ne jarũvarãjiyepe ayũ diede

cũracobei ne copainũrajijede Canaán ñmicurijoborõi.

²³Moisés bácũi bucũva bácavũ ne ju aye báque boje Jũmenijicũre, yavedejaquemavũ ñ mácũre ne cũrami jívũi yóbecurã aviávare ñi põeteniburu yóboi. Nópe ñarejaquemavũ ñai juedocũ meajicu baju boje aru na mácavũ ne jidũbe boje Egipto ñmicurijoborõcavũ ne jabocũ bácũ Faraón mácũre. Jidũbedejaquemavũ ñi ñãjine ñajũroede na mácavũre, ne ñabe báque boje yópe ñi boarĩ jarũvaicõjeiye báquede jipocare Israel bácũi pãramena ne juedova ñmũvare.

²⁴Moisés bácũ ñi ju aye báque boje Jũmenijicũre, bucũcũ teyũre ubedejaquemavũ põeva “Ñai jabocũ Faraón ñi mácoi bucũóvaimũme ñ, Moisés”, ne aiyede ñra. ²⁵Quénora ina Egiptocavũ ne yebacavũ, ñi põeva, Jũmenijicũi põeva, ina judíovaque, ñãjiyũrejaquemavũ Moisés bácũ. Egiptocavũ ne jẽneboi torojucũ me cucũ bácũ baru ijãrvavũque ureque, Jũmenijicũi urõpe ñabejebu. Quénora coateni Jũmenijicũre jarũvarĩ, ñmeina tejebu. Aru obebenũmuara torojũjebu ñ mácũ. ²⁶Ëi dápiainope pũeno baju bojecurõ marejaquémavũ ñãjicũyũre põeva ne ñmeina yávaiyede ñ mácũre, ñi coreóvaiye boje Jũmenijicũi daroquimũre, Cristore, ñi põeva, ina yebacavũcavũ ne pãramecũ bacuyũre. Que baru ina yebacavũ bácavũque ñãjini, cadateni, meadaiyũrejaquemavũ Moisés bácũ. Aru caiye ñnié cãvaede, Egiptoque me bajure, ubeni jarũvarejaquemavũ. Nópe ñarejaquemavũ ñi napini coreiye boje caiye iye mearore Jũmenijicu jícsuyũre ñ mácũre.

²⁷Moisés bácũ ñi ju aye báque boje Jũmenijicũre, etarejaquemavũ Egipto ñmicurijoborõre jocarĩ. Ñai jabocũ bácũ Faraón mácũi jaraimũ mácũvacarita etarĩ ñurejaquemavũ Moisés bácũ, jidũbecũva. Ë mácũ yópe jãñũpe barejaquémavũ ñai Jũmenijicũre, põeva ne jãmemũre. Que baru ñi ju aiyede ñre ñajocabecũva, etarĩ ñurejaquemavũ.

²⁸ Ți ju aiye báque boje Jūmenijicure, ina Israel bácu pāramena mácvure jajiécōjēnejaquemavū ovejava mamajina ne boaimara mácvū jivede ne jedevacobeá pñenora aru caipñcapñravuai, ángele boarí jarvabequiyēpe ayū diñamia cūramiacavure. Nāi ángele Jūmenijicūi daroimū mácvū barejaquémavū, boarí jarvavacvū caivū ūmva ina mamarvū pōteivū cūrivure Egipto, jivede cuvabevva ne jedevacobeá yebai. Ūbenita ina Israel bácu pāramena mácvū ye ámedabemara marejaquémavū. Aru Moisés bácu ju aiye báque boje Jūmenijicure, Pascua ámicurō torojvū teinore búrī, oveja jiarvare búcvure đaiye cube páuque āri torojvū teicōjēnejaquemavū ina Israel bácu pāramenare ūjá coapa cainvū.

²⁹ Ina Israel bácu pāramena mácvū etavū bácvū Egiptore jocarí Moisés bácvū ne ju aiye báque boje Jūmenijicure, joborōi vaivārī jaterejaquemavū no Jūariya ámicuriya jia vradá curō mácarō coricare. Ūbenita ne yóbore ina Egiptocavū jatayuríduivū bácvū nápe, ina Israecavū bácvūpe, corí nūri yaidéjaquemavū na mácvū.

³⁰ Israel bácu pāramena mácvū ecoivū bácvū Canaán ámicurijoborōi ne ju aiye báque boje Jūmenijicure, Jūmenijicū ture đarejaquemavū Jericó ámicurīimaro biaido parurido bácarōre. Siete pajjārvavū baju na mácvū ne tarabuteni jacoturíburu yóbore diimaro jedevare turejaquemavū no biaido parurido bácarō.

³¹ Rahab bácu, nomió ōi baju bojedado ūmvare ámenore đado bácu náque, ōi ju aiye báque boje Jūmenijicure, yaibédejaquemavū ina Israecavū bácvū ne boarí jarvaviyede arevū ōi curōcavū bácvū Jūmenijicure ju abevure. Ne meadaimo mácu barejaquémavū ōi torojvū me jacyurí cađateiye báque boje ina Israecavū bácvū pñcarā ne jabocūi daroimara mácvū jārī coreóvarājivure yavenina aipe ārojarore diimaro mácarōre.

³² Coynrī buojajebū yū arevū obedivū Jūmenijicure ju aipōeva mácvure. Apejārvavū yūre curí cojióru, na mácvū ne borore coyñjebū mñjare. Coyñjebū Gedeón mácu đaiye báquede, Barac bácu đaiye báquede, Sansón mácu đaiye báquede, aru Jefté bácu đaiye báquede; aru David bácu Samuel mácvū ne đaiye báquede; aru arevū ānina Jūmenijicūi yāvaiyede coyñcaipōeva mácvū ne đaiye báquede máre, ne ju aiye báque boje Jūmenijicure. ³³ Nācvū bácvū aru arevū Jūmenijicure ju aivū bácvū máre pōeva ure ne đarí majibede đarejaquemavū, ne ju aiye báque boje Jūmenijicure. Nācvū bácvū boarí, vainí turejaquemavū apenoa joborōacavū, áđamatenanvū bácvure na mácvūque. Nācvū bácvū me jabotedejaquemavū pōevare, ne đarājiyēpe aivū mearo ne baju. Nācvū bácvū jēniarejaquemavū Jūmenijicūque, ūi cađatequiyēpe aivū na mácvūre. Aru ū cađatejaquemavū caivū ina mácvūre, yópe ūi aiye báquepedeca. Nācvū bácvū biede đarejaquemavū āimara jijecurivū, león ámicurivū, yavipe paivū ne jijecamure, ne āmenajiyēpe aivū na mácvūre. ³⁴ Nācvū bácvū jabova ne jarvavaicōjeimara mácvūvacari toabo vrbabo āmebo jívūi, éimara āmenejaquemavū. Dupini nūrejaquemavū, arevū ne totarí boarí jarvabenajiyēpe aivū nácvū bácvūre boaicaroveque. Nācvū bácvū parvbevū bácvūre parure đarejaquemavū Jūmenijicū. Churavavū parurivū tedejaquemavū nácvū bácvū. Aru nácvū bácvū apenoa joborōacavū bácvū ne ñavaranviyede ne oteiye báquede jēiyede aru ne oteiāimarare máre, ina ñavaivū bácvūre cuvurí copaide đarejaquemavū ne joborōita. Nópe đarejaquemavū na mácvū ne ju aiye báque boje Jūmenijicure. ³⁵ Aru nácvū nomiva mácvū máre jacopñrejaquemavū arurivure cojedeca névū yavivū bácvū

Jūmenijicui nacovaimarare. Apevu nácavu bácavu jabova ne buoimara mácavu barejaquémavu, ne ju aiye báque boje Jūmenijicure. Ina jabova bácavu churarava bécavure pare jara popeicōjenejaquemavu na mácavure. Que teni, “Muje ju abedu Jūmenijicure, jaetovarājaramu mujare”, aridurejaquemavu na mácavure ina jabova bécavu. Ubenita ina Jūmenijicure ju aivu bécavu ye ju abevuva tedejaquemavu cainumua. Quéhora ina jabova bécavure boarí jaruvaicōjenejaquemavu na mácavure, nacajarajivu yainore jaruvarí arurivu cojedeca aru curājivu pueno baju me cavarō mearo Jūmenijicui curōi. ³⁶Apevu nácavu bécavure yurini, jara popedejaquemavu. Aru apevu bécavu pueno baju nājivure täumeaque buorí nūvarejaquemavu āmeina teivure jēni jacoīñami. ³⁷Apevu bécavure cūraboaque dūvarí boarí jaruvarejaquemavu. Apevu bécavure jocuburaiveque coriburarí boarí jaruvarejaquemavu. Aru apevu bécavure boaicaroveque totarí boarí jaruvarejaquemavu. Nópe darejaquemavu, na mácavure ju abevuva teni daridurājivu Jūmenijicure. Nácavu bécavu cuitótecajea cubevuva dorejaquemavu oveja pođaque đaicajede o cabra pođaque đaicajede. Aru na mácavu cūramia cuvabevuva vaivárejaquemavu apenoita apenore jocarí, ne curijoborōre cuvabevuva. Cūve cuvabevu baju, āiyede ye cuvabedejaquemavu. Pare nājivu baju barejaquémavu. Aru apevu ne āmeno đaimara marejaquémavu. ³⁸Caivu na mácavu, Jūmenijicure ju aivu, meara baju barejaquémavu apevu ijārvucavu pueno. Nácavu bécavu ne curō cuvabedejaquemavu. Que baru vaivárejaquemavu pōecubenoí aru cūracūai máre. Cārejaquemavu cūracobeá jívui aru jobocobeá jívui máre.

³⁹Jūmenijicu me járejaquemavu caivu na mácavure ne ju aiye báque

boje úre. Ubenita me jáñu mácuvacari na mácavure, ne yainájiye jipoca nácavu cūinácu ye eabedejaquemavu caiye iye mearore yópe Jūmenijicu “Jāve đacacuyumu mujare”, ūi aiye báquepedeca. ⁴⁰Jūmenijicui dápiaiye boje majare máre, pueno baju métamu ūi dápiaií đacaiyue majare, ūi yóboque “Que đarājare” ūi coyuiye báqueque, ūi yópe nuri earí buojare đaiyepe ūi yebai majare aru na mácavure máre. Que baru na mácavure ye jaubede đacuyume ū majaque. Aru jaubede đabecuyume na mácavure maje cubeda.

Đaiye jauřō majare Jesúi đaiyepe yópe Jūmenijicui urōpe maje napinajiyeye aiye

(1 Co 11.31-32; Fil 2.6-11; He 1.13, 2.9)

12 ¹Maje cūebu ijārvui yópe cūyavuvu ne cūyaiyepe. Obedivu pōeva jáđama ne cūyaiyede. Aru ina cūyavuvu cuitótecajeare dođama obebecajea ūmujubede, aru ducuéde jocarí nūvamenama, cūyarājivu maumejiena. Quédecabu majare máre. Majare jáđama ina obedivu pōeva napivu bécavu nājiyede pu ne yaiyeta, ne ju aiye báque boje Jūmenijicui yávaiyede jāvene. Que baru napedeca napinajarevu maja maje nājiyede dajocabevuva. Dajocarājarevu majare jocarí caiye iye đaicōjemene majare yópe Jūmenijicui urōpe aru caiye maje āmeina teiyede, maje đaiye cōmajiyede. Maje āmeina teiyebu yópe cuitótecaje ūmujuricaje āradoare buojmoricaje ina cūyavuvu ne dajocarí jaruvaiye báquepe ne cūyarājiye jipocare. Aru iye đaicōjememu majare yópe Jūmenijicui urōpe yópe ducué ina cūyavuvu ne dajocarí jaruvaiye báquepe ne cūyarājiye jipocare.

²Cainumua dápiaiřarevu Jesúre yópe maje jáimupe. Úrecabe majare ju are đayv Jūmenijicure aru jaubede đayv maje ju aiyede Jūmenijicure máre, majare meadarí eare đayv caiye iye Jūmenijicui mearo đacaquiyede majare. Jesúvacari ūi nājiyede

napini dajocabedejaquemavũ, yaiyú bácuvacarita jocsucjaravena. Põescu yaiye jocsucjaravena urarõ âmeno cuyojarõtamu, põeva ne dápaiyede. Quénora Jesúcápũravũ ùi dápaiye boje iye urarõ mearo torojuede cuvacyure ùi yainĩburu yóbore, âmeina jámenejaquemavũ ùi yaiquíyede jocsucjaravena. Que baru ye baju âmenejaquemavũ ùre iye cuyoje tede ðaiye. Aru caride dobacube, jabotecuyũ, jípacu Jũmenijicu ùi dobarõ mearo meapũravũ. ³ Que baru me ārũjara mũja Jesúre, coreóvarãjivũ me aipe ñãjiĩũ mácure. Põeva âmeina teivũ ùre ubeni maucũvarivũ “ ‘Jũmenijicui daroimũmu yũ’, borocurĩ aibi Jesús”, ne aipe báquede, ne ure ñãjine ðaiye báquede ùre jáve napinejaquemavũ ù. Ùre ārũri chĩori parubetebejarã mũja mũje ùmei. Dajocarĩ jaruvabejarã mũje jũ aiyede Jũmenijicure.

⁴ Põeva âmeina teivũ mũjare boarĩ jaruvabenama cãreja, mũje napiyedeca ne ñãjine ðaiyede mũjare, mũje âmenore ðabe boje yópe ne ðaiyepe. ⁵ ¿Aru ārũmetenaru mũja iye Jũmenijicui majicaiyede majare yópe mamarape? Yópe arĩ, toivaicõjenejaquemavũ:

Mũ, bucũ, me jápiarĩ adajacu maje jabocu Jũmenijicu majicayure mũre aipe ðaiye jauřõre. Chĩori parubetebejacu mi ùmei ù coreóvare ðayure mi âmeina teiyede. ⁶ Que teni maje jabocu Jũmenijicu caivũ ùi umarare majicaibi. Aru caivũ ùi jacopuimara mamarape ñãjine ðaibi ù, arĩ toivaicõjenejaquemavũ.

⁷ Napijara mũje ñãjiyede ijãravũ yópe juedova ne napiyepe ne ñãjiyede népacui majicaiyede náre. Mũja ñãjivũ baru, coreóvaivũbu Jũmenijicu ðayure mũjare mamarape, mũje ðarãjiyepe ayũ yópe ùi urõpe. Caivũ majivũ mamacu cubecure jípacui ñãjine ðabemũ, majicacuyũ ùre. ⁸ Aru Jũmenijicu majicayube caivũ ina mamarare. Que baru mũja ùi ñãjine ðabemara maru ùi majicaiyede

mũjare, mamara baju âmevũtamu mũja. Quénora eaimarape paivũbu mũja. ⁹ Coreóvaivũbu maja majebucũva ùmũvare coapa, majare urivure, ne ðaiye cõmajiyede majare. Nácapũravũ ñãjine ðaivũ barejáima maja juedovare cãreja, majicarãjivũ majare. Aru náre, põevareca, jũ arĩ puedãivũ barejãvũ maja. Que baru pũeno baju jũ arĩ puedãiyeye jauvũ majare ñai majepacu cavarõ mearocacũre, Jũmenijicu bajure, maje curãjiyepe aivũ me ùque jãravũ cũiméjãravũ baquinóre. ¹⁰ Majebugũva ùmũva coapa ijãravũcavũcapũravũ majare ñãjine ðarejaima, majicarãjivũ majare yópe náre me jauépe ne dápiarũ obebejuare maje cuede juedova cãreja. Ubenita majepacu Jũmenijicucapũravũ majare ñãjine ðaibi majicacuyũ majare, cadatecuyũ majare maje pũeno meara baju barãjiyépe ayũ yópe ù bajupe.

¹¹ Jáve põescu cubebi ñãjiyũcu. Que baru maje ñãjinũmure ye torojubevũbu maja. Quénora chĩoivũbu maja ñãjivũ. Ubenita ñãjivũcapũravũ Jũmenijicui majide ðaimaramu, maje ñãjiye báque boje. Que baru maje ñãjiniburu yóbore, cãrijimenoque curivũbu mearore ðarĩ yópe Jũmenijicui urõpe majare jauépe. ¹² Que baru yópe cúyaivũ ne parure ðaiyepe ne âmuvede aru ne ñũaboare máre, parure ðajarã mũja mũje ùmei. ¹³ Yópe ne voyepe cúyaima nurinimare nácacu ijinoque cúyayũ ùi meadaquiyepe aivũ aru nácacu cuiye majibecu ùi cúyarĩ majiquiyepe aivũ máre, nopedeca mearore ðajarã mũja yópe Jũmenijicui urõpe mũjare jauépe, mũje dajocabenajiyeye aivũ mũje jũ aiyede Jesúre aru mũje cadateni parure ðarãjiyepe aivũ ne ùmei mũjacavũ parubevure cãreja ne ùmei, na máre ne dajocabenajiyeye aivũ ne jũ aiyede Jesúre.

**Me bajure maje ðaru yópe
Jũmenijicui urõpe ubenita âme
bajure maje ðabedu yópe ùi urõpe
(Mt 3.12; 2 Ts 1.7-8)**

¹⁴ Caino mũje oainope cadatejarã mũjevure, ne curãjiyepe aivũ

cārijimevva. Aru caino mñje oainope cadatejarā mñjevure, ne curājīyepe aivn mearore ðaivn yópe Jūmenijicui mōpe cainumna. Nópe ðabecu baru, pōecu cubebi cuscuy maje jacobu Jesucristoque. ¹⁵ Caino mñje oainope me ðajarā mñja. Mñjacacu cūinácū ye ðajocarī jaruvabecarī iye Jūmenijicui jījuroede mearore bojecubeda, ñi ju abeque Jesúre, ñai Jūmenijicui ðaroimn mácure, ñi meadaquiyepe ayu pōevare. Mñjacacu cūinácū ye ãmedabecarī yópe ijede ãmene oteiyepete oteiyepete me máquede. Cūinácū mñjacacu bueyū baru jāve ãmene aru que teni coateyū baru Jūmenijicure jaruvarī, apevñ mñjacavure máre coatede ðacuyūme ũ, Jūmenijicure ðajocarī jaruvayū básū. ¹⁶ Mñjacacu cūinácū ye ãmeina ðabecarī, ũmu nomióque aru nomió máre ũmñque. Aru ye Jūmenijicure ũbeni yuribejarī ũre máre. Nópe ðarejaquemavñ Esaú básū. Ũ mácu cuvacyū cūinárū jorogñ ãiyeque jorogñre imacu básure bojedarejaquemavñ mamarumñ pōeteyū ñi cuvajuroe báquede, Jūmenijicui mearo ðacajuroe báquede ũ mácure. ¹⁷ Mñja coreóvaivñbu aipe vaiye báquede ũ mácure. Ũ bojedarīburu yóbo diede, mñidurejaquemavñ jípacu básū jēniacaiye báquede Jūmenijicūque, ñi mearo ðacacuyepete ayu ũ mácure. Ũbenita ũ mácu ñi mñiduiyede ye eabedejaquemavñ. Pare oyū básūvacari, ye buojabedejaquemavñ oatvayū iye ñi ðaiye báquede.

¹⁸ Majacarpūravñ nūmenamū Jūmenijicu yebai yópe ãnina Israecavñ básavñ ne nñiye báquepe ñi yebai. Na mácavñcapūravñ járī jēni majidejaquemavñ no curō, ne Jūmenijicure vorānñinore, ñi coyūyepe báquede na mácavñre “Que ðarājare”, ñi aino mácarōre Moisés básūque. No curō, Sinaí ãmicuricū cūracū, toabo uruinoque énejaquemavñ. Nemitedejaquemavñ. Oopenibo dicūre taorejaquemavñ. Aru ãmei ũmevñ parurō japurejaquemavñ dicū

cūracūre. ¹⁹ Na mácavñcapūravñ jápiarejaquemavñ japuiyo, trompeta ãmicuriyo, bujīé báquede aru Jūmenijicui yávaino mácarōre máre. Ũi yávaiyede jápiarī, cūcumaiyvñ jēniarejaquemavñ Jūmenijicui yávabequiyepe aivñ na mácavñre ne jídué boje. ²⁰ Cūcumarejaquemavñ na mácavñ Jūmenijicu, yópe arī, ñi coyūyepe báque boje na mácavñre: “Ñai járī curayū bajarōcūre icū cūracū turuvare, boarī jaruvajarā mñja. Pōecu baru u oteíāimacu baru, cūraboaque o táuyoque ðucarī boarī jaruvajarā mñja ũre”, arejaquemavñ Jūmenijicu. Ũi nópe coyūyepe báquede ye jápiarī napimenejaquemavñ na mácavñ. ²¹ Caiye ãnié nópe vaiye báque pare jídojae boje, Moisés básūvacari, “Jídūcu bidini jáiyubevñ yu”, arejaquemavñ. Que baru majeñecuva mácavñ ye nñri eabedejaquemavñ Jūmenijicu yebai.

²² Ũbenita majacarpūravñ maje jēniayede Jūmenijicūque yópe nñri earī buojadavñ apēcū cūracū, Jūmenijicui cūracū, Sióñ ãmicuricū cūracū. No curō Jūmenijicu apēcū ñi imaro, Jerusalén ãmicurīimaro, cavarō mearoi, yópe nñri earī buojadavñ maja, maje jēniayede Jūmenijicūque. Diimaro ángeleva obedimillones baju ne imaroi yópe nñri earī buojadavñ maja, maje jēniayede Jūmenijicūque. Ina ángeleva torojurivñ cójijidama mearore jínajivñ Jūmenijicure.

²³ Aru caivñ ina Jūmenijicui mára ñi mamarumñ pōeteivape paivñ, na máre torojurivñ cójijidama, mearore jínajivñ Jūmenijicure. Nárecabu ina ne ãmiá toivaino mácarōre cuvavivñ cavarō mearo Jūmenijicui curōi, jádovaquiyepe aivñ ne curājīnore. Na torojurivñ baju ne cójijinoi yópe nñri earī buojadavñ maja, maje jēniayede Jūmenijicūque. Jūmenijicūvacari, ñai coyūcyū caivñ pōevare árore maje curājīno coapa, cavarō mearore o toabo cūimébore, maje ðaiye báque boje maje cuede ijāravñi, ñi yebai yópe nñri earī buojadavñ maja, maje jēniayede

Jūmenijicuque. Ina pōeva meara mácavu Jūmenijicui jáinore, ina ũi jaubede ðaimara mácavu ne ũmene, ne yebai yópe nuri earī buojadavū maja, maje jēniaiyede úque. ²⁴Aru Jesúvacari, úque Jūmenijicu ayu bācu “Que ðarājare” arī, ũi yóboque coyūiye báquede, ũi yebai yópe nuri earī buojadavū maja, maje jēniaiyede Jūmenijicuque. Jesúi jive meiyē báque boje, boropatebede ðaibi majare Jūmenijicui jáinore. Nai Abel bācu ũi jive meiyē báque boje jībucu bācu boarī jaruvaiye báquede ũ mácure, Jūmenijicu ñájine ðarejaquemavu úre boarī jaruvayu bācure. Ũbenita Jesúi jive meiyē báque boje, Jūmenijicu meadayube pōevare. Que baru Jesúi jivebu bojecue baju Abel bācu jive pñeno.

²⁵Que baru me ðajarā muja. Me jápiarī aðajarā Jūmenijicui yávaiyede mujare. Úre jápiaiyubeni ju abevu tebejarā muja. Jūmenijicui coyucaicōjeiye báquede ijāravucacu Moisés bācure Israecavu bācavure, ina jápiabeni ju abevu bācavu ye dupivu majibedejaquemavu Jūmenijicui ñájine ðaiyede jocarī, ne ju abe boje. Que baru jāve pñeno baju dupivu majibenajivubu maja, jápiabeni ju abevu baru Jūmenijicu ũi coyucaicōjeiyede majare cavarō mearocacu Jesúre. ²⁶Dinumu mácarōre Jūmenijicui coyucaicōjeiye báquede Moisés bācure ina Israecavu bācavure, cújiovarejaquemavu caino joborōre. Ũbenita caride yópe aibi Jūmenijicu: “Cúináro bedióva cojedeca caino joborōre cújiovacuyumu yu urarō baju. Aru caino cavarōre máre cújiovacuyumu yu urarō baju. Jāve ðacuyumu”, aibi Jūmenijicu. ²⁷“Cúináro bedióva cojedeca” ũi aiyē báque boje, coreóvare ðaibi majare caiye iye ũi cuedaiye báquede cújiovarī bíjarocuyume Jūmenijicu. Que teniburu yóboi, quéda iye ũi cújiovabeno, ũi jaboteinoque, cūquiyebu.

²⁸Cújiovaino buojabenotamu no curō Jūmenijicui jaboteino. Majarecabu ũi epeimara, jabetenajivu úque nore.

Que baru maje curājiye boje úque cainumua ũi imaro cavarō mearoi úre memecarājarevu ũi mearore jíyeque majare bojecubeda. Aru, “Jūmenijicure ye jarare ðabenajarevu ñūjaque”, arī dápiarī cücumari, aru úre pueðaivu máre ũi parué boje, mearore jínajarevu úre, torojure ðarājivu úre. ²⁹Ũbenita yópe toa bíjaroiyepē cüvede, nopedeca Jūmenijicu, maje mearore jímū, bíjarocuyume ina ũi yávaiyede jápiaiyubeni ju abevure. Que baru iye ũi yávaiyede me jápiarī ju arājarevu maja.

Torojure ðarājiyepē aiyē Jūmenijicure maje ðaiye maje ue boje

(Mt 25.35-46; Lc 15.4-5; Jn 10.1-16; Ro 12.13; Fil 4.11-13; 1 Ti 6.6-10; He 10.29; 1 P 4.9)

13 ¹Úre nujara apevu Jesúre ju aivure dajocabevuva, yópe jauépe ũ jinare. ²Cainumua torojurivu me copu etarī jacoyujarā muja ina curāðavure muje cūramia coapa. Nópe ðaiyede dajocabejarā muja. Apevu majeñecuva mácavu ne nópe ðaiyede, coreóvabevuva copu etarejaquemavu Jūmenijicui daroimara ángelevare.

³Dápiare nujara muja náre, ámeina teivure jēni jacoñami jívui curivure, cadatenajivu náre yópe muje újuroepe apevu ne cadateiyede mujare, jabova ne buoimara maru. Dápiare nujara muja ina ñájivure, cadatenajivu náre máre yópe muje újuroepe apevu ne cadateiyede mujare, ñájivu baru.

⁴Caivu pōeva pñubuoivu ne pñubuoiyede, ne cuede yópe cúinávure, pueðajarāri ne baju. Que teni ũmva nomicurivu cubejarāri apocoque aru nomiva ũmucurivu máre cubejarāri apocoque, némarebucavare jaruvarī. Caivu ina pñubuoivu apevuque curivu baru, némarebucavare jaruvarī, Jūmenijicui ñájine ðaimara mārājivubu na. Aru caivu ina nomicubevu nomíoque curivu baru aru ũmucubevu máre ũmuque curivu baru, Jūmenijicui ñájine ðaimara mārājivubu na máre.

⁵Täuturare jecubeni, diede pare urĩ, vore nũmejara muja. Quénora torojurivũ cujarã muja quéda muje cunvaeque, Jũmenijicui yópe aipe báque boje: “Cainũmua jícuũmu mũre jauéde. Aru cainũmua dajocabecũyũmu mũre”, arejaquemavũ Jũmenijicu. ⁶Que baru jidũbevũva yópe arãjarevũ:

Maje jabocu Jũmenijicurecabe yũre cađateyu. Que baru jidũbecubu yũ. Põescu cubebi ãmedarĩ buojayũ ji ùmene, arãjarevũ maja.

⁷Arũjara muja ina muje jabova bácvũre, Jũmenijicui yávaiye méne yávacaímara mácvũre mujare. Dápijarã aipe ne ñaiye báquede yópe Jũmenijicui urõpe pũ ne yayieta. Na mácvũ Jesúre ju aivũ bácvũre paivũ bãjarã muja. Aru ne ñaiye báquepedeca ñajarã muja. ⁸Que baru Jesucristorecabe oatũvabecu cainũmua. Ë cũináturũrecabe põevare meadayu bácu javede, aru põevare meadayu caride, aru põevare meadayu bacũyũ cainũmua máre. ⁹Jũjovaicõjemejara apenvũ põevare ne ape bueiyeque, Jũmenijicui yávaiye méne jãve ãmeque mujare. Iyepẽ paiye bueiye de jãpiarĩ ju abejarã. Métamu parũre ñaru muje ùmei Jũmenijicui mearo ñacaiyeque mujare bojecubeda. Bojecubeda Jũmenijicu cađateibi majare ùi mearo ñacaiyeque. Ëbenita põeva ju aivũ baru apenvũ ne ñaicõjeiye de, “Apede ãjara. Ëbenita apede ye ãmejara muja” arĩ, ye cađatebematamu na. Que baru maje ju aiyequẽ iyepẽ paiye ñaicõjeiye de maje ùmei parũre ñariduiye jaubevũ majare.

¹⁰⁻¹¹Maja judío va maje sacerdoteva bácvũ ãivũ barejaquémavũ jiarũare ãimara ne boaimara mácvũquede, majeñecuva mácvũ ne jícaiye báquede, ne ãmeina teiye boje jãrvũva coapa. Ëbenita ãnijãravũ cũinãjãravũ bácarõ ujuá coapa, ñai sacerdotevare jaboteipõescu bácuĩ nũvayiede ãimara ùi boaimara mácvũ jivede ditucubu pũeno baju meatucubu bácarõ jívuĩ, jícu yũ diede Jũmenijicure põevai ãmeina teiye boje, ye ãmenejaquemavũ

sacerdoteva bácvũ jiarũare, ina ãimara ùi boaimara mácvũquede. Que baru ye mearore ãmenejaquemavũ ina sacerdoteva bácvũ ina ãimara ne boaimara mácvũre. Quédeca caivũ ina põeva mearore jíyũrĩduivũ Jũmenijicure yópe “Que ñarãjare” ùi aino mácarõpe Moisés bácuque, ye mearore ãmeni, meadabemaramu na. Ëbenita maja mearore jívu Jũmenijicure yópe “Que ñarãjare” ùi aino mácarõpe Jesúque, ùi meadaimaramu maja. Jesú yaiye báquebu jocũcujaravena põeva ne ãmeina teiye boje yópe ne jícaiye báquepe ãimara ne boaimara mácvũre põeva ne ãmeina teiye boje. Ëbenita Jesú yainĩburu yóbore cũináro, Jũmenijicu ye ubebi caiye ape jícaiye de. Aru ñai sacerdotevare jaboteipõescu bácu juarĩ jarũvaicõjeneaquemavũ ina ãimara ùi boaimara mácvũre ne ãmaro jedevai, põeva ne ube boje na, ãimara mácvũre. ¹²Quédeca Jesús máre ñãjini yaidéjaquemavũ ãmaro jedevai, põeva ne ube boje ùre. Yópe joaiyepẽ docũñede ocoque, nopedeca Cristo joaiyepẽ ñaibi põevare maje ãmeina teiye de jarũvarĩ, ùi jive meiyẽ báque boje, maje curãjiyepẽ ayũ yópe Jũmenijicui urõpe. ¹³Que baru yópe Jesú yaiye báquepe põeva ne cũyõjeda ñaimũ mácu ùi yayiẽ báque boje ãmaro jedevai, nopedeca maja máre dajocarãjarevũ maje mearore jíyede Jũmenijicure yópe “Que ñarãjare” ùi aino mácarõpe Moisés bácuque, judío vai mearore jíyepẽ. Aru põevare cũyõje teicõjenajarevũ majare máre yópe ne ñaiyepẽ Jesúre. Maje dajocaiye judío vai bueiye de, yópebu Jesú etaiye báque judío vai ãmaro urarõre jocarĩ, yaicũyũ.

¹⁴Ye ãmaro cubevũ majare ijãravũ, ãmaro cainũmua curĩĩmaro. Quénora vore nuivũbu, earãjivũ apeno ãmarore, maje curãjinore. ¹⁵Que baru cainũmua mearore jíñajarevũ Jũmenijicure. Maje mearore jíyede cabu ùre maje jícaiye ùre. Aru Jũmenijicure mearore jíni buojavũbu maja, Jesú yaiye báque boje ùi jarũvaquiyepẽ aivũ maje

ãmeina teiyede aru ñi jëniacaiye boje Jümenijicuque majare boje cainumua. Maje torojuede jíyebu, yópe arí, “Ñujepacu, Jümenijicu, meacu bajubu mi daroiye báque boje Jesúre, ñi meadaquiyepe ayu ñujare”, maje jícaiye úre. ¹⁶Aru maje mearore ðaiyebu maje jícaiye máre Jümenijicure. Que baru maje cadateiyebu apévure maje jíyede náre maje cuvaequede, ne cuvarájiyepe aivu náre jauéde, maje jícaiye úre. Caiye dieque úre me torojure ðaivubu maja. Que baru árumetebejará mija mearore ðaiyede aru pöevare cadateiyede máre.

¹⁷Me jápiajará mija, Jesúre ju aipöeva, mujare coreipöevare. Náre pueðarí, ne coyuiyede ju arí, ðajará yópe ne ðaicöjeiyere. Cainumua mujare urí, jári coreðama ye jabuóvabevuva. Aru nópe ðaðama, ne coreóvaiye boje coyurájiyvure Jümenijicure aipe ne ðaiyede iye ñi náre coreicöjeiyede mujare. Mija ne coyuiyede ju arí, diepe mije ðaru, torojarivu coyurájarama Jümenijicure mije ju aiyede. Ubenita mija ne coyuiyede ju abeni, diepe mije ðabedu, chíoiyu coyurájarama Jümenijicure mije ju abede. Aru chíoiyu coyuru, ye meamejebu mujare. Jümenijicu ñájine ðajebu mujare, mije ju abe boje náre.

¹⁸Cainumua ðaiyurivubu ñija caiyede yópe mearope Jümenijicui jáinore ñi cadateiyequede. Que baru, “Boropatebevü yu”, arí ðápiarí buojaiivubu ñija. Que baru jëniacare ñujara mija Jümenijicuque ñujare boje, ñi cadatede nuquiyepe aivu ñujare. ¹⁹Paredeca jëniaivu yu mujare, mije jëniacarájiyepe ayu Jümenijicuque ñi copaini nuicöjequiyepe ayu yure, cucunujivari mije yebai püeno maumejiena.

²⁰Jümenijicurecabe cãrijimenoque cure ðaiye majicu pöevare. Úrecabe

nacovañu mácu maje jabocu Jesúre yaivu bácvu ne curöre jocarí. Maje jabocu Jesús caivu maja úre ju aivüre jári coreyube me baju apévü majare coreivü püeno. Yópe ovejavare coreipöescu jári coreiyere, nopedece maje jabocu Jesús jári coreyube majare. Úi jive meiyede báque boje ñi yaiye báquede, Jümenijicu “Que ðarãjare” arí, ñi yóboque coyuiye báque pöevare jáve jaubedejaquemavu. ²¹Mujare mearore ðarí jaubede ðajacurí majepacu Jümenijicu, ñai cãrijimene ðayu, mije ðaiye majinajiyere ayu caiyede mearo bajure yópe ñi uröpe. Aru majepacu Jümenijicu Jesucristore mearore ðare ðajacurí majare, maje torojure ðarãjiyepe ayu úre. Que baru mearore jínajarevu Cristore cainumua, jáðovarajivu úre meacu bajure. Quédecabu.

Meaicöjeino

²²Mija, jívu, Jesúre ju aivu, paredca jëniaivu mujare, mije napinajiyere ayu iye ji toivaiye báquede aipe ðaiye jauöre mujare. Uraró ji toivacajuroede yu toivabecuvacari, toivacavü mujare parure ðacuyü mije úmei, cadatecuyü mujare. ²³Majecu Timoteoi borore jaroivu mujare. Ñai jabova ne buoimü mácu, ne jodeimüme caride. Maumejiena ji yebai ñi earu, cünáturu nurajaramu ñija mije yebai. ²⁴Meajarari caivu mujevü, Jesúre ju aivüre coreipöeva, aru caivu apévü Jümenijicui pöeva máre. Italia ámicuríjorocavu ñijaque curivü meaicöjedama mujare. ²⁵Aru Jümenijicu mearo ðacajacurí caivu mujare bojecubeda ñi me boje. Quédecabu. Quénoramu.

Santiago

Mamabuinore coyuiyebu Santiago bácu ñi toivacaiye báquede paperayocare doce paiyajuboacavu Israecavu Jesúre ju aipõevare, ne joborõare jocarí dajocaiyu bácvure, curãjivure apenoa joborõai. Santiago bácu judfovacacu barejaquémavu. Jesucristoi yócu barejaquémavu. Majidivú ne dápiayepe, toivacarejaquemavu diyocare ãniñjua báquede 40-60 d.C. Aru apenvú ne dápiayepe Santiago bácu toivacarejaquemavu diyocare caiyoca areyoca Majepacu Jümenijicui yávaie mamaene coyuitucubo jívui curiyoca jipocai ãniñjua báquede 40-50 d.C.

Diyocaque napicõjenejaquemavu ina judfova Jesúre ju aipõevare ne ñájiyede (1:2-4, 12-18). Aru coyurejaquemavu Jesúre ju aipõevare aipe ñaiye jaurore (1:5-11, 19-27, 2:14-26, 3:13-18, 5:7-20) aru aipe ñaiye jaubenore (2:1-13, 3:1-12, 4:1-17, 5:1-6).

Santiago ñi meaicõjeino Jesúre ju aipõevare

(Mt 13.55; Mr 6.3; Hch 15.13; Gá 1.19; 1 P 1.1)

1 ¹Yú, Santiago, toivacaiyu mujare. Majepacu Jümenijicure aru maje jabocu Jesucristore máre memecayubu yu. Meaicõjeivu mujare, jívure, doce paiyajuboacavu Israecavure, muje joborõare jocarí dajocaiyu bácvure, curãjivure apenoa joborõai.

Põevare Jümenijicu majide ñi jino

(Mt 7.7-11; Jn 16.23-24; Stg 3.13-17; 1 P 1.24-25)

²Muja, jívú, torojujarã muja muje ñmei muje ñájiyede apejẽ ãmeque. ³Que baru coreóvaivubu muja ñájiyu baru dajocabevava muje ju aiyede Jesucristore, püeno baju napinajivure muje ñájiyede. Que teni jári corevaivubu muja muje ju aiyede. ⁴Me napijara muje ñájiyede, curãjivú meara matuiye yópe Jümenijicui urõpe aru ye jaubequiyepa aivú mujare Jümenijicui jáinore.

⁵Apecu majacacu majibecu baru aipe ñaiye jaurore ñre, jëniyacurí Jümenijicunque ñi cadatequiyepa ayu ñre. Aru Jümenijicu majide dacuyume ñre aipe ñaiye jaurore. Que baru

cadateiyubi põevare jecubecava aru jarabecava náre, ne jëniayepa boje ñre.

⁶Ûbenita ñai jëniãñure, “Jãve yure cadatecuyume Jümenijicu. Dacacuyume ji jëniainore ñque”, arí dápiayepa jaenvú, ñi ju aipe boje Jümenijicure, “Jümenijicu cadatequijichubi yure”, abecava.

Yópe pãcaiboa nãraiyepe ñmevunque, nopedeca ñai põecube arí dápiayú apenüma “Majivu yu Jümenijicu cadatecuyure yure”, aru apenüma “Majibevú yu Jümenijicu ñi cadatedu yure”, arí dápiayú. Û nópe dápiayú cüináro ñi dápiaino, Jümenijicu ñre majide dacuyure, ye dápiabebi ñ. Que baru pãcaiboapebu ñi dápiayepa. ⁷Ñai põecu nópe dápiayú ñi jëniayepa Jümenijicunque, maje jabocu Jümenijicu ñacabecube ñre yópe ñi jëniainope. ⁸Ñai põecu nópe dápiayú pucáümea cubi. Que baru coreóvaino ñmevú aipe ñaiye jaurore ñre cainüma.

⁹Jesúre ju ayu cãve cãvabecu, apenvú ne coyüimú, “cõmaje ãrojacu aru bojecubecu”, bojecubi Jümenijicui jáinore. Que baru torojujacurí ñ ñi ñmei. ¹⁰Ûbenita Jesúre ju aipõecu cãve cãvacu torojujacurí ñi ñmei coreóvayú ñi cãve bojecubede Jümenijicui jáinore. ñi baju cüiquiyebu yópe cõvua cüiyepa.

¹¹Aviã ñi cõari, bõrí, popovaibi cõriãre.

Que teni cóvua poporí, turí yaiye bu. Nopedeca ñai cüve cüvacu bíjacüyüme, ñi vorí earíduiyepedeca püeno baju cüvede. Que baru yópe cóvua bíjaiyepe córiáre, nopedeca ñi cüve bíjaquiyebu cüve cüvacure.

Maje ñájiye aru ámeno ñaiyue

(1 P 1.23)

¹²Torojúbi ñi úmei ñai pöescu napiñu caiye iye ñi ñájiyede. Úi ñájiniburu yóboi dajocabecüva ñi ju aiye de Jesucristore, Jümenijicu bojedacüyüme úre me. Cüvare ñacüyüme úre járavu cüiméjáravu baquinóre. Que ñacüyüme yópe “Ñacacüyümu yu müjare”, ñi aiye báquepedeca ina urívure úre. ¹³Ácu pöescu ámeno ñaiyede dápiayu bácu, yópe aridurí, “Jümenijicu jüjovaibi yure”, abejacurí. Jümenijicu jüjovaimu ámemi, ñacüyü ámenore. Aru Jümenijicu ye jüjovabebi pöescure, ñi ñaquiyepe ayu ámenore. ¹⁴Quénora ácu pöescu jüjovaimu ñacüyü ámenore, ñi baju jüjovaibi. Úi baju ámeina ñaiyede ñainomu úre yópe moacu ñi jáiyepe cü piaváinore, aru no yóboi nore ñi vorí nüiyere, pöescu ñi jajovarí boaquiyepe aiye úre. ¹⁵Aru yópe juedoearíburu yóboi juedocure pöeteiye jauépe, aru ñi bucüríburu yóboi úre yaiye jauépe, nopedeca pöescu ñi dápiaríburu yóboi ámenore ámeina teibi, aru ámeina teniburu yóboi coatecüyüme ñi baju Jümenijicure jarüvarí.

¹⁶Müja, jívu, ji umara, jápiajará. Müje bajumia apescure jüjovaicójemegara. Dápiabejará úbenina Jümenijicu ñayure müje ámeno ñaiyede. ¹⁷Quénora me matuiyede ñayübe Jümenijicu. Caiye méne aru jaubede máre maje cüvaede jacopüivübu maja cavaró mearo Jümenijicui cüröre jocarí, majepacu Jümenijicui jíyede majare. Jümenijicu cüedarejaquemavu ina cavarócavu miadáre ñaiyure. Aru nácapüravu oatüvaivu bujadama aru bótainore ñadama. Úbenita Jümenijicucapüravu ye oatüvabebi ú. Cainumua cüináuru cubi. Aru ñi yávaiyede máre oatüvabebi

cainumua. ¹⁸Jümenijicurecabe cure ñayu majare apué mamaeva yópe ñi uróre ñi yávaiye jáveque. Que teni yópe jéidua mama júaidua püeno mearüape, nopedeca maja máre Jümenijicui pöeva mama cürivübu aru mearamu máre caivu ñi cüedaimara püeno.

Ju aiye Jümenijicure jáve

¹⁹Müja, jívu, ji umara, coreóvajará iyede: Caivu pöeva yaué jápiajará me. Úbenita duibareca yavarí bájará me dápiarí adaivu ne yávaiyede. Aru duibareca jarajará. ²⁰Pöescu jarayu baru, mearore ñayu buojabebi yópe Jümenijicui uróre. ²¹Que baru dajocajará caiye ámeina teiyede müjare jarüvarí. Aru ñabejará ámenore. Meara pöevape ju ajará iye yávaiyede jávene, iye coiye báquede müje úmei yópe oteiye coiyepe joboró. Iye yávaiye parué boje, meadaimara marajáramu müja.

²²Úbenita jüjovabejará müje baju. Ina jápiaivu iye yávaiyede jávene quéda, ñabevüva yópe iye ne bueiye báquepe, jüjovadama ne baju. Que baru ñajará müja yópe müje bueiye báquepe iye yávaiyede jávene. ²³Ñai jápiayu diede quéda, ñabecüva yópe ñi bueiye báquepe, úrecabe ñai pöescu jáñupe páyu ñi jivare jivarüque. ²⁴Aru ñi járíburu yóboi, cüiná copedini nurí jivarure jocarí árumetecüyüme ñi jáino mácaröre. Nopedeca cüinácu jáñume ñabecüva aru apescu jápiayu ñabecüva. Ne ñabe boje, árumetedama cüinácu ñi jáino mácaröre aru apescu ñi jápiaino mácaró. Que teni cüinácu ñi jáino mácaró aru apescu ñi jápiaino mácaró bojecübevu náre. ²⁵Úbenita ñai me dápiarí buede nüñu Jümenijicui ñaicójeiyede aru árumetebecu ñi jápiaino mácaröre diede, quénora ñayu yópe ñi bueiye báquepe, úrecabe torojucu bacüyú ñi úmei ñi ju aiyeque diede. Aru Jümenijicui ñaicójeiye métamu aru jaubebu. Que baru ñai pöescu ñi ñaiyue boje diede cójeimure ámemi.

²⁶Ácu pöescu dápiayu baru ñi baju ju ayu Jümenijicure me, úbenita ámeina

yávaicōjeñu maru ñi baju, úrecabe jujovayu ñi baju. Úrecabe ubenina ju arĩduyu Jūmenijicure. ²⁷Ubenita ñai ju ayu Jūmenijicure jāve, aru meacu, aru āmeina tebecu majepacu Jūmenijicu ñi jáinore, úrecabe cadateyu ina tēumarare aru ina nomiópeware máre. Aru úvacari đabebi āmenore yópe ijāravucavu Jūmenijicure ju abevu ne đaiyepe.

Jámejara apevu pōevare me apevu pueno

(Mt 5.21, 27, 19.19)

2 ¹Muja, jívũ, maje jabocu meacu baju Jesucristore ju aivu, jámejara apevu pōevare me apevu pueno. ²⁻³Ecoyu baru muje cójijiñami cūinácũ ũmu cve cuvacu, āmuyo adaitarabua úruque aru meacaje cuitótecajede máre doyu, aru ecoyu baru muje cójijiñami apesu ũmu máre, cve cuvabecu, cōmaje ārojacu, aru meamecaje javecacaje cuitótecajede doyu, ne ecoiyede, muja me jári ñai cve cuvare aivu baru úre, “Dobajacu mu yo dobarō mearore”, ubenita āme jári ñai cve cuvabecure aivu baru úre, “Nújacu mu nore o dobajacu joborōi ji cuboba yebai”, muje nópe đaru, meamejebu no. ⁴Que đaiivu baru, mujavacari pusaūmea cuvũ. Apevũre jáivũ baru me baju apevu pueno, beoivũbu apevu bojecũrivũre muje járu aru jarũvaivũbu apevu bojecũbevũre muje járu. Que dápíaru, āmenotamu.

⁵Muja, jívũ, ji umara, jápijarā. Javede Jūmenijicu beorejaquemavu ina ijāravucavu cōmaje ārojariyvũ cve cuvabevũre, ne ju arājiiyepe ayu úre cve cvarivũre bārājivũ ne Jūmenijicui jaboteinocavu bae boje yópe ñi aive báquepedeca. Jūmenijicu “Mearo đacacũyũtu yũ mujare”, arejaquemavu ina urivũre úre jāve. ⁶Ubenita mujacarpũravũ cũyoje đaiivũbu ina cve cuvabevũre. Ina cve cvarivũrecabu ñájine đaiivu mujare. Nárecabu jabuboivu mujare jabova ne āmeina teivũre jēniari jáiñami. ⁷Mujavacari “Jesucristo jinamu maja”, aivũbu, muje ju

aive báque boje úre. Ubenita nárecabu āmeina yávaivũ Jesucristore, muje pueďaimure.

⁸Jūmenijicu toivaicōjenejaquemavu ñi yávaiyede ñi đaicōjeino mácarō pueno parurō cōjeinore, yópe arĩ: “Ujacu mícure yópe mi ñepe mi baju”, arĩ toivaicōjenejaquemavu. Muja đaiivu baru jāve yópe yo cōjeinope, mearo đaiivũbu muja. ⁹Ubenita muja jáivũ baru apevu pōevare me apevu pueno, ye jecubevũ caivure cūináturura. Que teni āmeno đaiivũbu muja, muje ju abe boje Jūmenijicui đaicōjeiye báquede aru muje vaini tuiye boje diede. ¹⁰Pōecu ju arĩ đaiyũrĩduyu baru Jūmenijicui đaicōjeiye matuiyede, ubenita quéno cūinájino cōjeinore đabecu baru, boropateibi ũ Jūmenijicui jáinore ñi ju abeni, vaini tējuroepe caiye diede. ¹¹Jūmenijicũvacari “Cũbejarā apevũque mujemarebũcũvare jarũvarĩ”, arejaquemavu. Aru ũ máre “Boarĩ jarũvabejarā pōevare”, arejaquemavu. Que baru muja cubevũ baru apevũque mujemarebũcũvare jarũvarĩ, ubenita boarĩ jarũvaivũ baru pōevare, mujarecabu ju abeni, vaini tuivũ Jūmenijicui đaicōjeiyede. ¹²Muja coreóvaivũbu Jūmenijicu jári coyũcũyũre méne o āmene muje đaiyede. Jácsũyũme aipe ārojaene diede, yópe ñi đaicōjeiye me, aru ye jaũbe, aru bũoimarare đabepe máre. Que baru me yávajarā aru me đajarā máre yópe Jūmenijicui urōpe. ¹³Jūmenijicu cōmaje āroje jámecũ ñájine đacũyũme ñai pōecu cōmaje āroje jámecure ũ jicure. Ubenita jidué jaũbequiyebe ina cōmaje āroje jáivũre apevũre Jūmenijicui ñájiovaquijāravũ baquinói pōevare, ne āmeina teiye boje.

Pōeva ne đaiye me bojecũrō ne yávaive pueno

(Ro 4.3)

¹⁴Muja, jívũ, jápijarā. Ñai pōecu coyũyũ “Ju aivu yũ Jesucristore”, ubenita mearore đabecũvacari, ubenina coyũrĩduibi ũ ju ayũre. Ye baju

ãmevũ no ju aino jãve ãmeno. Põescu ãi ju aino nõpe painoque meadãimũ macuýú buojabebi. ¹⁵⁻¹⁶Cũinãcu mujacacu o cũinãcu mujacaco cuvabedu cuitótcejade aru ãiyede máre, aru náre “Me nujara mũa. Cũmajara mũa me aru me javatejarã máre” mũa aru, ubenita mujavacari ye jíbedu náre ne doiyeva aru ne ãiyeva máre, meamejebu no. Ye baju ãmevũ mũa que ðaiye. ¹⁷Quédecabu ñai põescu ayũ “Ju aivũ yũ Jesucristore”, ubenita mearore ðabecũva. Ñai ju ayũ jãve ãmemi.

¹⁸Aru apescu ãi aru: “Mũ ju ayũbu Jesucristore aru yũ mearore ðayũbu”, yópe arĩ, coyũjebu yũ: “Jãðovajacu yũre mi ju aiyede Jesucristore mearore ðaiye cuvabecũva. Aru yúcapũravũ jãðovaquijivũ mure ji ju aiyede úre ji mearore ðaiyeque”. Que ajebu yũ. ¹⁹Mũ coreóvayũbu Jũmenijicu cũinãcura cũcure. Mearotamu no mi coreóvaino. Abujuva máre coreóvadama Jũmenijicu cũinãcura cũcure. Aru úre jidũrivũ bidiyama na. Ubenita ne coreóvaiyede úre cadatebevũ náre.

²⁰Mũ, ãrũmescu, jãðovaquijivũ mure põescu ãi ju aiyede mearore ðabecũva ju aiyे jãve ãmene aru cadatebede úre. ²¹Jũmenijicu járejaquemavũ majeñecu mácure, Abraham mácure, boropatebecũre, ãi buoiye báquede mamacure, Isaac bácure, ãi boarĩ, juarĩ jãcaquiyepе ayũ úre Jũmenijicure, yópe Jũmenijicui ðaicõjeino mácarõpedeca úre. ²²Que teni coreóvayũbu mũ Abraham mácui jãðovaiye báquede ãi ju aiyе báque Jũmenijicure javene ãi ðaiye báqueque. Aru ãi ðaiye báqueque jãðovarejaquemavũ ãi ju aiyе báque ye jaũbede. ²³Que teni vaidéjaquemavũ yópe Jũmenijicui aiyе báquepedeca. Abraham mácũrã Jũmenijicu toivaicõjenajaquemavũ ãi yãvaiyede, yópe arĩ: “Abraham ju arejaquemavũ Jũmenijicu ‘Yópe ðacũyũmũ’, ãi aiyе báquede úre. Que baru Jũmenijicu coyũrejaquemavũ úre, ‘Boropatebecũbu mũ ji jáinore’”, arĩ toivaicõjenajaquemavũ. Aru Abraham

mácu, “Jũmenijicui yóvaimũme”, ne aimũ marejaquémavũ.

²⁴Que baru coreóvayũbu mũa Jũmenijicu coyũyũre, “Boropatebevũ mũa ji jáinore”, ina põeva mearore ðaivũre. Ubenita põescu quénora coyũyũ baru “Ju aivũ yũ Jũmenijicure”, jaũvũ úre Jũmenijicui jáinova. ²⁵Quédecabe ico nomió máco, õi baju bojedãdo ãmũvare ãmenore ðãdo báco náque, õi ãmiã Rahab. Jũmenijicu járejaquemavũ õ mácore boropatebecupe õi ðaiye báqueque. O máco corũ etarejaquemavũ ina Josué bácuĩ jaroimara mácavure. Aru cadatedejaquemavũ na mácavure máre, ne dupini nurajiyepе ado õi jãðovaiye báquede na mácavure apema, ne dupini nuima mácarõre. ²⁶Que baru yópe põescu úme cubecu, yaiyú bácupe, nopedeca ñai põescu mearo ðabecu ju ayũ Jũmenijicure jãve ãmemi. Cadatebebi ã. Aru ãi ju aiyе bojecũbevũ.

Maje jemedo yãvaino

3 ¹Mũa, jívu, jápijarã. Maja, bueipõeva, bueivũ apevũre Jũmenijicui yãvaiyede ãi toivaicõjeiye báquede maje buedu jãve ãmene, Jũmenijicu ñãjine ðacũyũme majare apevũ pũeno baju. Que baru obedivũ mujacavũre bueiye jaũbevũ apevũre. ²Caivũ maja vainĩ turĩ ãmeno ðaivũbu obedinũmũ. Põescu cũcu baru vainĩ turĩ ãmeno ðabecu cainũmũ ãi yãvaiyeque, ñai põescu meacu baju bájebu. Úi baju me matuiyeda ðaicõjejebu. ³Quijjiyo cõjeiyo táuyore epeivũbu maja caballore ãi jijecamui, nuicõjenajivũ úre cõjeimeaque ári maje nuivũrõi. Que teni ju are ðaivũbu úre aru ãi baju me matuiyeda ðaicõjeivũbu maja. ⁴Quédecabu jiadocũ uracũque. Uracũ bajubu. Aru úmevũ parũrõ corũ japuivũ. Ubenita jipocateipõescu nuicõjeimi dicũre quijjiye japuvaiveque ári ãi nuivũrõi. ⁵Quédecabu maje jemedoque. Quijjinomu maje jemedo. Ubenita maje quijji yãvaiyeque urarõ ðaivũbu maja. Nopedeca quijjiño toaque macarõ urarõ éiyavũ. ⁶Aru

maje jemedo toapebu. Yópe toa éiyepe caino macarõre, nopedeca maje jemedo ãmedaivũ maje baju matuiyede. Aru ñai abujuvai jabocuvacari iye ãmeina ðaiye ðare ðayube. Maje yávaiyeque ãmeina ðaivubu aru ñájine ðaivubu máre yópe abujuvai curõ, toabo cüimébo, ãmeina ðaiyepe aru ñájine ðaiyepe máre.

⁷Maja, pøeva, ðaicõjeni buojaivubu caiyajuboa ãimayajuboacavure: macarõcavũ jjecurivure, aru mǎjinarẽ, papeivure, aru jiacavure máre. ⁸Ûbenita pøecu cubebi ðaicõjeni buojayũ ñi jemedore. ãmeina yávaiyede dajocarĩ majibevũ maja. Yópe ãða jĩmaque ñi ijetede ðaiyepe ñi cüiyede, nopedeca maja máre ijie ðaivubu maje yávaiyeque. ⁹Maje jemedoque mearore jívubu majeracũ Jũmenijicure. Aru no jemedomiareca ãmeina yávaivubu maja pøevare, ina Jũmenijicui cuedaimara mácavure épe paivure. ¹⁰Cüinácamu jjecamuque yávaivubu méne aru ãmene máre. Maja, jívũ, que ðaru meamevũ. ¹¹Macajia cubevũ oco me aru oco jũme máre piapóri cüináturara. ¹²Aru mja, jívũ, higueracure olivoruã jéiye buojabevũ. Aru úyaimure máre higueraruã jéiye buojabevũ. Quédeca oco yuquiraque aru oco me etarĩ buojabevũ cüináro oco piapóinore jocarĩ.

Majie jãve
(Stg 1.5)

¹³Mujacacũ apesũ cuscũ baru majicũ aru jápiarĩ eayũ, jádovajacurĩ ñi majiéde aru ñi jápiarĩ eaiyede ñi mearo ðaiyeque, “¿Meacũ bárica yũ arevũ pũeno?” arĩ dápiabecuvã. ¹⁴Ûbenita mujacacũ apesũ cuscũ baru ãmei jorojĩñũ ñi ñmei aru cadateiyuscũ ñi baju arevũ pũeno, “Me majivũ yũ”, borocueque arĩ dápiabecurĩ. Épe páyube ñbenina ayũ, jávene majibecũ. ¹⁵Ûi majie jãve ãmevũ. Jũmenijicui jíye ãmevũ. Quéñora iye majie ijãravũquebu. Aru pøeva ne urõpe yópe ãimara dápiabevũpebu. Aru abujuvai dápiaiyequebu máre. ¹⁶Pøeva jorojivũ baru aru cadateiyurivũ baru ne baju arevũ pũeno, cãrijovãdama ne

bajumia aru ðãdama caino ãmenore máre. ¹⁷Ûbenita Jũmenijicũ majide ðayube pøevare majie jãveque. Mamarumure ina pøeva majidivũ me Jũmenijicũ jiede caino mearo ðaivubu. Aru cãrijimene ðaivubu. Cadateivubu arevure. Jjecubevũva curivubu arevure. Cõmaje ãroje jáivubu arevure. Puedaivubu arevure. Jáivubu caivure cüináturara, jámevũva arevure me arevũ pũeno. Pũcaũmea cubevũbu. Aru mearore ðaivubu. Québu ina pøeva majidivũ Jũmenijicui majiéque. ¹⁸Na cãrijimene ðaivubu caivũ arevureque, curãjivũ ðaivũ me.

Maje yóvãiye ijãravũcavũque jaubevũ majare

(Mt 6.24, 23.12; Lc 16.13; 1 P 5.5-6)

4 ¹¿Aipe teni boaivũba mja mje baju? Aru, ¿aipe teni ãdamateivũba mja mje baju? Mje ãmeina ðaiye yópe maucvãrepebu mje dápiaiyeque. ²Mja urivũ baru apejĩene aru eabevũ baru diede, boarĩ jarãvaiyurivubu pøevare, cvãaridurãjivũ diede. Aru mja ãujivũ baru apejĩene aru cvãarivũ buojabevũ baru diede, maucvãarĩ boaivũbu, cvãaridurãjivũ diede. Mja cvãabevũtamũ, mje jẽniame boje Jũmenijicũque. ³Mje jẽniariduiyede Jũmenijicũque, jẽniariduivubu yópe jaubenope mujare mje dápiãiye ãmeque. Quéða jẽniariduivubu Jũmenijicũque, cojquiyepẽ aivũ mje ãmeina ðaiyede. Que baru mja jacorubenamũ mje jẽniariduiye báquede. ⁴ãmena bajutamũ mja. Jũmenijicure jarãvarĩ dajocaiyurivubu mja yópe nomio ãmecoi dajocaiyepẽ jĩmarepacure jarãvarĩ. Ina yóvaivũ ijãravũcavure ne ãmeina teiyeque yópe ne baju urõpe maucvãarivubu Jũmenijicure. ¿Coreóvabenaru mja diede? Jáve mja me coreóvaivubu diede. Que baru ácu pøecu yóvaivũcũ ijãravũcavure ne ãmeina teiyeque yópe ne baju urõpe, úrecabe maucvãcũ Jũmenijicure. ⁵¿Dãpiaivũrũ mja Jũmenijicui toivaicõjeiye báquede ñi yávaiyede

ubenina? ¡Que ãmevu! Yópe arĩ, toivaicõjeneaquemavu ñi: “Jũmenijicu cuedabedejaquemavu põeva jorojĩnajivũre. Maje ùmene Jũmenijicui epeiye báquede majare, maucuvare ñabevũ arevũre”, arĩ toivaicõjeneaquemavu. ⁶ Aru Jũmenijicu pũeno baju cañateibi majare ñi me boje. Que baru yópe arĩ, Jũmenijicu toivaicõjeneaquemavu ñi yávaiyede: “Jũmenijicu maucũvaibi ina ‘¿Meara mática apevu pũeno?’ aivũre. Ûbenita ñi me boje cañateibi ina ‘Apevu cãchinotamu maja’, aivũre”, arĩ toivaicõjeneaquemavu.

⁷ Ju ajarã mũa Jũmenijicure, mũje ñarãjiyepe aivũ yópe ñi ñrõpe. Maucuvajarã ñai abujuvai jabocure, mũje ñabenajiyeyepe aivũ yópe ñi ñrõpe. Aru que ñaru, ñi dupini nucũyũme mũjare jocarĩ. ⁸ Pũeno baju coreóvayujarã Jũmenijicure. Aru que ñaru, Jũmenijicu mũjare coreóvare ñacũyũme ùre. Mũa, ñameina teivũ, ñajocajarã mũa ñameina teiyede. Mũa, ñucaũmea cũrivũ, oatũvajarã mũa ñápiayede, mũa ñede cũinãrora Jũmenijicure aru ijãravũquede märe. ⁹ Mũa que ñápiayeye boje, ñãjjijara, ojarã, aru chõjara mũa. Yũrivũ baru, ñajocajarã mũa yũriyede aru ojarã. Aru torojurivũ baru, ñajocajarã mũa torojũede aru chõjara. ¹⁰ Que baru, “Apevu cãchinotamu yũ”, ajarã mũa Jũmenijicure, ñi cañatequiyeyepe aivũ mũa ñi pãrũeque. Que teni Jũmenijicu mearore jicũyũme mũa.

**Coũyũye jaũbevũ majare
apevũre ne ñaiyede**

¹¹ Mũa, jivũ, yávabejarã ñamenore caivũ ne jãpiayede apevũ borore. Ñai coũyũ ñamenore ñi jicui borore aru “Ñameina teivũ mũa” ayũ ùre, ùrecabe yávayũ ñamenore Jũmenijicui ñaicõjeiyede. Ñai que ayũ, “Ñametamu Jũmenijicui ñaicõjeiye”, ayũbe. Mũa yávavũ baru ñamenore Jũmenijicui ñaicõjeiyede, mũa ju abevũ diede. Quẽnora mũa ñaivũbu yópe mũa

baju ñrõpe. ¹² Ûbenita Jũmenijicu cũinãcũrabe ñaicõjeũ majare. Aru Jũmenijicu cũinãcũrabe coũyũ maje ñaiye mène o ñamene märe. Que baru ùrecabe cũinãcũra meadavũ bũojaibi põevare, ne ñãjimenajiyeye ayũ ne ñameina teiye boje. Aru ùrecabe cũinãcũra jarũvayũ bũojaibi põevare, ne ñãjinajiyeye ayũ ne ñameina teiye boje. Ûbenita mũacapũravũ ye ñamenore coũyũ bũojabevũ apevũ borore.

**Põeva aipe vaiquýyede
javenare ne majibeno**

¹³ Caride me jãpiajarã mũa yópe arĩ ñápiavũ: “Caride o javenare ñurajarevũ maja apeno ñmaroi. Mautenajarevũ nore cũinãjũ memeni, bojedari, earãjivũ ùre tãutũrare aru cũvede märe”, aivũbu. ¹⁴ Mũa ye coreóvabevũ aipe vaiquýyede javenare. Coreóvabevũ aipiyede mũa yainãjjijãravũ baquinóre. Mũa apũrõ yópe painomu abobicope. Yópe abobico jãrorĩ, maumena bĩjaiyepe, nopedecabu maje apũrõ märe maumena cũino. ¹⁵ Que baru yópe arĩ ñápiayeye javũ mũa: “Jũmenijicui ñru, cũrĩ, memeni, ñarãjarevũ apejĩene”. Que aiyeye javũ. ¹⁶ Ûbenita mũacapũravũ boroteivũbu mũa baju majiéque, Jũmenijicui majiéde jarũvarĩ. Ûbenina “Jũmenijicu jaũbebi majare”, arĩ ñápiarĩdivũbu mũa. Que ñaru ñamenomu. ¹⁷ Ñai coreóvayũ ñayũ mène, ñabecu baru mène yópe ñi coreóvayeyepe, ñameina ñayũbe ñi, ñi ñabe boje yo mearore ñayũ majicupe.

**Majicaino cũve cũvarivũre
(Mt 6.19)**

5 ¹ Caride jãpiajarã mũa, cũve cũvarivũ. Coñoboborĩ ojarã mũa mũa ñãjinajinore. ² Mũa cũve pojeiyebu. Aru mũa doiye bocomiva ne ñiyebu. ³ Aru mũa tãutũratũrava, úru aru plata märe, cũra etaiyebu. Iye cũra etaiye jãñovavũ mũa cañatebe báquede ina cõmaje ñrojarivũre mũa cũveque. Que baru mũa ñãjinajivũbu yópe põecui ñãjiyepe toa ñiyede ñi bajure. Mũa jẽivũbu mũaeva ñrarõ

cavede ijāravua, buojaijāravuare, Jūmenijicui nājiovaquijāravu baquinó jipocai pōevare, ne āmeina teiye boje. ⁴Jārijide apa. Ina memecaivu mujare muje jioai chōioivū cođoboboivūbu, muje jíbe boje iye bojedaiye jauéde náre, ne memecaiye báque boje. Ina muje mujovaimara, muje bojedabemara, ne boro coyurí adaiyede jápiaibi nai Jūmenijicu, caivu ijāravucavu ne jabocu. ⁵Ijāravui torojurí curivūbu muja muje ure cveque. Urabucuvabu muje āiye boje méne. Que baru yópe oteiāimacu coreóvabecupe pōevai jíyede úre urarō ānore, đarājivu jiacucure ne boarājiye jipocai úre, nopedeca muje nājinajijāravu baquinó edaquiyebu mujare, corebevure. ⁶Mujacapuravu āmenore coyurí nājicōjeivūbu aru boarí jaruvaivūbu máre ina cōmaje ārojarivū mearare. Ubenita nácapūravu maucuvabema mujare.

Pōeva ne napiyeque ne jēniaino

Jūmenijicūque

(Mt 5.34-37; Mr 6.13; Lc 10.34)

⁷Muja, jívu, caride napini corejarā muja maje jabocu Jesucristoi copaidaquiyede. Dápijarā nai oteyure. Napini coreibi icuyū iye jēiye bojecuede. Napini coreibi mama ocainore aru ocaino yóboçarōre máre. Aru no yóboi, jēiyede iñu buojaibi. ⁸Quédeca muja máre napini corejarā. Parure đajarā muje ūmene. Caijāravua vainūburu yóboi, Cristoi copaidaquino pueno joabenotamu.

⁹Muja, jívu, boro coyurí adabejarā mujevure muje nājiye boje. Que đaru, mujavacari nājine đaimara mārājivūbu. Jūmenijicurecabe nājine đayū pōevare ne āmeina teiye boje. Aru ūi náre nājine đaquino joabenotamu. ¹⁰Muja, jívu, dápijarā ina Jūmenijicui yávaiyede coyucaipōeva mácvure. Ne nājiye báquede napini coredejaquemavu na mácvu. Napedeca napini corejarā muja. ¹¹Torojurivutamu maje jáinoi ina napivū caiye iye ne nājiyede. Javede jápiadavū muja Job bácu borore. Coreóvadavū

muja urarō nājiye báquede napiñu mácvure Job bácvure. Aru Jūmenijicui cōmaje āroje jáiye boje aru ūi mearo đacaiyue boje pōevare Job bácu nājiniburu yóboi, Jūmenijicu mearo đacarí buojarejaquemavu ū mácvure.

¹²Muja, jívu, caiye mujare jaué pueno yo cūináro jaurótamu. Muje yávaiyede jēniamejara cavarō mearo Jūmenijicui curōcavure aru ijāravucavure máre, ne đare đarājiyere aivu mujare yópe muje jēniaiyepedeca. Quénora cainūma borocubevūva coyujarā yávaiyede jávene, jaubequiyere aiyē mujare cavarō mearocacui āmiáque aru ijāravucacui āmiáque máre, pōeva ne majinajiyere aivu muja yávaiyede jávene coyūivure. Muje yávaiyede, nurié ju aiyurivū baru, ju ajarā, aru bi aiyurivū baru, bi ajarā quénora, Jūmenijicui nājine đabequiyere aivu mujare.

¹³Apecu mujacacu nājiñu maru, jēniajacurí ū Jūmenijicūque. Aru apecu mujacacu torojucu baru, yuriajacurí, jícyu mearore Jūmenijicūre. ¹⁴Aru apecu mujacacu ijimu maru, cutujacurí ina Jesúre ju aivure coreipōevare, ne jēniarajiyere ayū úre maje jabocu Jesucristoque ne yuayyede úra olivo āmicuricu jēidua córoque. ¹⁵Aru ne jēniaiyede “Jesucristo meadarí majicutame”, ne arí dápiaru, nai ijimu meadaimū macuyūme. Maje jabocu Jesucristo meadacuyūme úre. Aru ijimu mácu baru ūi āmeina teiye báque boje, Jūmenijicu ārumetecuyūme diede. ¹⁶Que baru coyujarā mujevure muje āmeina teiyede. Aru jēniajara Jūmenijicūque mujevure, ūi meadaquiyere aivu mujare. Nai pōescu meacu Jūmenijicui jáinoi, ūi jēniaiyede Jūmenijicūque, jáve Jūmenijicu jápiaibi aru cadateibi úre yópe ūi jēniaiyere. ¹⁷Nai Jūmenijicui yávaiyede coyucaipōescu Elías majape páyu barejaquémavu. Paruéque jēniarejaquemavu ū Jūmenijicūque, ocabequiyere ayū. Que baru ocabedejaquemavu ū joborōi yóbecurijua coricai. ¹⁸Aru bediōva cojedeca jēniarejaquemavu

Jūmenijicūque, ocaquiyere ayu. Que baru ocarejaquemavu. Aru pōeva ne oteye báque bucurejaquemavu.

¹⁹⁻²⁰ Mūja, jívū, jápiajarā. Apesu mūjacacu ũi dajocarū ũi ju aiyede iye yávaiyede jāvene, aru apesu ju are dayu baru ũre diede cojedeca, ũai oatūvare dayu apesure ũi dápiainore, ũi dajocaquiyere

ayu ũi āmeina teiyede jaruvarī, ũi ju aquiyere ayu iye yávaiyede jāvene cojedeca, meadaibi ũre, ũi ũájimequiyere ayu ũi āmeina teiye boje. Que baru Jūmenijicu jaruvacuyme caiye ũi āmeina teiye báquede. Aru arumetecuyume diede máre. Coreóvajarā mūja diede. Quénoramu.

1 San Pedro

Mamabuinore coyuiyebu Pedro bácu ùi toivacaiye báquede paperayocare judíova Jesúre ju aipðevare, ne joborðare jocarí dajocaivu b́acavure, curájivure apenoa joborðai, die ámiá Ponto, aru Galacia, Capadocia, Asia, aru Bitinia máre (1:1). Pedro bácu judíovacacu barejaquémavu. Jesús ùi yávaiye méne beorí coyucójeimu marejaquémavu. Lucas bácu toivarejaquemavu Pedro bácu borore Hch 1:12-5:42 aru 9:32-12:19 aru cap. 15. Majidivu ne dápiayepe, toivacarejaquemavu diyocare ániujua báquede 63-64 d.C. ùi cue báquede Babilonia ámicurímaroi (5:13).

Toivacarejaquemavu árure ðacuyu ina judíova Jesúre ju aipðevare napini coreivure J́umenijicui mearo ðacaquiyede náre ne ju aiyे boje Jesucristore (1:2-12), aru Jesucristoi ńájyie báquede náre boje (2:18-25), aru Esṕritu Santoi oatvayiyede náre (4:1-11). Coyurejaquemavu Jesúre ju aivure ne ńájyiyede ij́aravui (3:8-22, 4:12-19). Aru coyurejaquemavu máre aipe ðaiye jaurðore náre meara bajupe (1:13-2:3), ne memecaiyede úre (2:11-17), purubuoivure (3:1-7), aru Jesúre ju aivure coreipðevare (5:1-11). J́evari coyurejaquemavu Jesúi jaboteiyede ùi pðevare yópe ćarava apurivape paiyede (2:4-10).

Pedro ùi meaicójeino Jesúre ju aipðevare (Stg 1.1)

1 ¹Yábu Pedro, Jesucristoi yávaiye méne beorí coyucójeimaracacu. Toivacaiyu mujare, mýje joborðare jocarí dajocaivu b́acavure, curivure caride apenoa joborðai die ámiá Ponto aru Galacia, Capadocia, Asia, aru Bitinia máre. ²Majepacu J́umenijicu beorejaquemavu mujare, ùi majié boje aipe vaiquiyede. Aru ńai Esṕritu Santo epede ðarejaquemavu mujare J́umenijicui pðevare, mýje ju arájyiyepe ayu Jesucristore aru mýje meadaimara marajiyépe ayu mýje ámeina teiyede jaruvarí, ùi jive meiyе báque boje, ùi yaiye báquede majare boje. J́umenijicu mearo ðacajacurí mujare bojecubeda ùi me boje. Aru torojurí me cure ðajacurí mujare caríjimevava pueno baju.

Jáve maje napini coreino
(Jn 3.3-7, 20.29; Ro 6.4-13; 1 P 1.22)

³J́inajarevu J́umenijicure mearore, maje jabocu Jesucristoi mearore j́imure,

j́ipacure máre. Úi ćomaje ároje jáiye boje, cure ðaibi majare apué mamaeque ùi nacovaiye báquede Jesucristore yainore jaruvarí. Que baru torojurí napini coreivubu maja J́umenijicui ðacaquiyede majare, maje coreóvayie boje J́umenijicui jáve mearo ðacacuyure. ⁴Iye J́umenijicui cuvare ðaquiye majare yaibébu. Que baru pojebequiyebu. Ámedabequiyebu. Aru javecarðpe tebeni b́jabequiyebu máre. Caiye iye mearore J́umenijicui ðacaquiyede napini coreivubu maja. J́umenijicuvacari corecayube diede mujare nore, cavarð mearo ùi curói. ⁵Mýje ju aiyede J́umenijicure, meadaibi mujare ij́aravui ùi paruéque. Aru buojaquij́aravu baquinóre jáðovacuyume mujare meara baju yópe ùi urðpe. Que teni buojacuyume meadacayu mujare, mýje cvarájyiyepe ayu caiye iye ùi mearo ðacaquiyede mujare.

⁶Caride torojurá mýja mýje úmei caiye iye J́umenijicui mearo ðacaquiyede mujare. Apenumua ch́iorajaramu mýja, mýje ńájinajiye boje ure ńájyiyede. ⁷Mýja ńájinajaramu, J́umenijicui jáðovaquiyepe aivu mýje ju

aiyede Jesucristore jāvene. Yópe pōeva ne juaiyepē úrure, ne majinaiyepē aivū jāve maru, nopedeca Jūmenijicu ñájine ñayube mujare, jáðovacuyū mujē jū aiyede Jesucristore jāvene. Aru yo úru me bojecurōvacari buojari bíjaivū. Ëbenita mujē jū aiyē Jesucristore pueno bojecavū Jūmenijicui jáinore aru cūiméquiyebe. Que baru Jūmenijicu me jácuyūme mujare, mearape ñacuyūme mujare, aru puedacuyūme mujare máre añijāravū Jesucristoi jáðovaquijāravū baquinóre. ⁸Ñai Jesúrcabe mujē umū jámevūva úre cāreja. Aru úrecabe mujē jū aimū jámevūva úre caride. Que baru torojurivūbu mujā urarō torojue méque. Pōeva ne yāvaiyeque coyūñi majibema die torojuede, pueno baju me boje. ⁹Torojurivūbu mujā Jūmenijicui meadaiyē boje mujare. Aru mujā jū aivūbu Jesucristore, Jūmenijicui meadaquiyepē aivū mujare.

¹⁰Iye Jūmenijicui meadaiyede pōeva úre jū aivūre, ina Jūmenijicui yāvaiyede coyūcaipōeva mácavū me majiyurejaquemavū, coreóvarājivū caiye iye yāvaiyede pōevare meadaiyena. Coyūcarejaquemavū Jūmenijicui ñacaquiyede mujare bojecubeda ñi me boje. ¹¹Ne bueiyeque iye Jūmenijicui yāvaiyede coyūcaiyede majinidurejaquemavū ñame cūcuyū Jūmenijicui meadaipōecūre aru aipiyede dacuyūre máre. Ñai Espiritu Santo jáðovañū marejaquemavū añijāravū baquinóre ñi Jūmenijicui yāvaiyede coyūcare ñaiye báquede ina Jūmenijicui yāvaiyede coyūcaipōeva mácavūre. Jūmenijicui yāvaiyede coyūcarejaquemavū iye napiye jauquinore ñi ñájiqiyede Jesucristore aru yo urarō mearore Jūmenijicu ñacacuyūre úre ñi ñájiniburu yóboi. Jesucristovacari darorejaquemavū ñai Espiritu Santore, ñi Jūmenijicui yāvaiyede coyūcare ñaquiyepe ayū na mácavūre. ¹²Jūmenijicu coreóvare ñarejaquemavū ina ñi yāvaiyede coyūcaipōeva mácavūre ne coyūiye caðatebequiyede náre. Ëbenita mujare

caðateiye baquiyébu. Ne coyūiyede coreóvabevūva, diedecabu iye Jesús ñi yāvaiye méne mujē jápaiye caride. Ñai Espiritu Santo, Jūmenijicui daroimū mácu cavarō mearo ñi cūrōre jocarī parure ñaibi ne úmei ina Jesús ñi yāvaiye méne coyūipōevare, ne coyūrājiyepē ayū diede paruéque. Aru ángeleva máre coreóvaivūñidivū caiyē iyede.

Maje memecaino Jūmenijicūre jaurōre

(Jn 3.3-7; Stg 1.10-11, 18; 1 P 1.3)

¹³Caiye iye méne Jūmenijicui ñacaibi mujare boje. Que baru me dápijarā mujē ñarājiyede aru me ñajarā caiye mujē ñaiyede majidivūpe. Que teni napini corejarā cūinārora caiye iye Jūmenijicui mearo ñacaquiyede mujare, ñi jáðovaquiyede Jesucristore.

¹⁴Jū ajarā Jūmenijicūre yópe mamara meara ne jū aiyepē nébucūvare. Aru ñabejarā yópe mujē ámeina ñaiyūrepe, yópe mujē ñaiye báquepe coreóvabevūva cāreja Jūmenijicui yāvaiye méne. Que baru ñabejarā yópe mujē ñaiye báquepe javede, mujē jū arājiye jipocare Jesucristore. ¹⁵Ëbenita méne ñajarā mujācapūravū caiye mujē ñaiyede, Jūmenijicu, mujare cutuyū bácu ñi jina márājivūva, ñi me boje caivū pueno. ¹⁶Yópe arī, toivaicōjēnejāquemavū Jūmenijicu ñi yāvaiyede: “Meara baju bájarā mujā. Yúbu meacu baju caivū pueno. Que baru mujā máre, ji pōeva, meara baju bájarā mujā”, arejaquemavū Jūmenijicu.

¹⁷Mujē jēñaiyede Jūmenijicūque, “mū, jipacu” aivūbu úre. Aru Jūmenijicūrecabe ñai jáñū caivū pōevare cūináturu, coyūyū majare coapa, mearo ñayūre o ámeno ñayūre máre, maje ñaiye báque boje ijāravūre. Que baru puedajarā úre mujē cuedeca yore ijāravūi. ¹⁸Me majidivūbu mujā ñajocare ñaimara mácavūre mujē cūe báquede jocarī yópe apesu ñmūi bojeñaiyepē ñi yebacavūre. Die cūe báquebu yopedeca mujēñecūva mácavū

ne cœe báquepe. Ne majicaiye báquede aru ne jádovaiye báquede mujare ye cadatebedejaquemavu mujare. Que teni mŭja mearore đarídurejaquemavu aru torojurídurejaquemavu máre. Ũbenita mŭja buoimarape paivu barejaquémavu die cœe báque boje. Mujare bojedaiye báque bŭjabequiyebu aru pojebequiyebu máre, yópe bojedaiyepe úrure aru platare máre. ¹⁹Ũbenita mŭja bojedaimara mácavubu Jesucristoi jive bojecœeque, ũi yaino mácaróque, yópe uraró bojecœróre jícaiyepe Jŭmenijicœre. Que teni ñai Jesucristo ovejajícœpe barejáme ye ámeno cubecœva, jaubecœva, quénora pœeno meacu baju, ne jínajiyepe aivu ũre ne juaimœpe Jŭmenijicœre.

²⁰Jŭmenijicui cuedaquiye jipocamia ijárvure majidejaquemavu darocœyũ mamacœre, ũi yaicáquiyepe ayũ majare, jarœvacœyũ maje ámeina teiyede. Que teni Jŭmenijicu beorejaquemavu Jesucristore meadaipóescu bacœyúre javede. Aru jádovarejame ũre ijárvui buojaquijárvuai. ²¹Muje coreóvaiye boje Jesucristore caride, ju aivubu Jŭmenijicœre nacovañũ mácœre Jesúre yainore jarœvarĩ aru epeyũ bácœre ũre meacu baju caivu pœeno. Que baru mŭja ju aivubu Jŭmenijicœre aru napini coreivubu iye ũi mearo đacaquiyede mujare yópe ũi aiye báquepedeca.

²²Muje ju aiye báque boje iye yávaiyede jávene muje jápaiye báquede diede, dajocavubu mŭja muje ámeina teiye báquede caride. Yópe teni jáve buojaivubu mŭja arivu apœvure Jesúre ju aipóevare. Que baru pare ũjará mŭja muje baju caiye muje ũme méque. ²³Muja curivubu caride yópe mamarœmũ póeteivœpe cojedeca juešovape népacu yaibécu quénora arœcu cainœmœa. Jŭmenijicui yávaiye arœœpe paiyebu aru oatœvabebu máre. Aru dieque Jŭmenijicu cœvare đaiibi mujare mamaũmene. ²⁴Yópe arĩ, Jŭmenijicu toivaicójenejaquemavu ũi yávaiyede:

Caivu póeva cœriápe paivubu.

Que baru ne majié cœvœape

paiyebu. Iye cœriá popoiyavũ.

²⁵Aru iye cœvœa tuiyavũ.

Ũbenita Jŭmenijicui yávaiye cœquiyebu cainœmœa, arĩ toivaicójenejaquemavu.

Iye Jŭmenijicui yávaiye mému.

Diedecabu Jŭmenijicui yávaiye méne coyœipóeva ne coyœiye báque mujare.

2 ¹Caride dajocajará mŭja caiye muje ámeina teiyede. Aru borocœbejará mŭja. Mušovabejará apœvure, jorojĩmejara apœvure, aru ámeina yávabejará apœvure máre. ²Yópe mamajina mamarœmũ póeteivũ pare nuivœpe népacoĩ opecore, nopedeca mŭja máre pare buejará Jŭmenijicui yávaiyede jávene. Que teni yópe mamajina ne opecore nuivœ boje me bucœiyepe, nopedeca mŭja máre, muje pœeno baju me jápiarĩ aru ju arĩ nuivœ boje Jŭmenijicui yávaiyede, me jápiarĩ earájaramu mŭja diede. Que teni muje ũmene me parœre đarĩ, meadaimara márãjivubu mŭja. ³Nópe đajará, muje coreóvaiye boje aipe Jŭmenijicu ũraró mearore đacayœre mujare.

Jesucristo cœrava arœrivape páyũ

(Mt 21.42; Ro 9.25-26, 33, Tit 2.14)

⁴Pueno baju majinadajará Jesucristore. Ũrecabe jaboteyũ ũi póevare. Ñai Espiritu Santoi đacaiye boje, náre cójjivoabi, ne cœrãjyepœ ayũ ũque cœinávœpe. Jesucristorecabe yópe cœrava arœriva Jŭmenijicui mamarœmũ epeivape ũi đainore yópe cœramipe. Apœvœcapŭravũ jarœvarejaquemavu diva cœravare. Ũbenita Jŭmenijicœvacari beorejaquemavu diva cœrava meava bajure, epecœyũ ũi đaiñamine. ⁵Aru mujacapŭravũ yópe bájará cœrava arœrivape, Jŭmenijicui đaquiyepœ mujaque ũi đaiñamine yópe cœramine đaipóescu ũi đaiyepœ cœramine cœravaque. Aru Jŭmenijicui đaiñami ũi Espiritu Santoi cœquino maquiyébu. Noi mŭja memecarájaramu nápe, sacerdotevape, jínajivũ Jŭmenijicœre jícaiye muje ũmequede aru méne ũi jáinoi. Aru Jesucristo cadateibi mujare,

mujje jínajiyepere ayu mujje ùmeque aru Jūmenijicui jáquiyepere ayu me. ⁶Jāvemu no Jūmenijicui toivaicōjeiye báque boje ùi yávaiyede, yópe arī:

Beoivū yu cūináva cūrava bojecuriva bajure. Divare epeivū yu ji ímaroi, Jerusalén āmicurīímaroi, yópe cūramitōbui cūravape ji ðaquíñami. Ácu pōescu ju ayu baru maje jabocure, ñai divape páyure, cainumua chīomecube ùi ju aye boje ñai jabocure. Quénora cainumua torojucuyame ùi ju aiyeye úre, arejaquemavu Jūmenijicu.

⁷Aru muja ju aivubu Jesucristore. Que baru úrecabe meacu baju mujjare. Ûbenita ina ju abevure úre, yópe arī Jūmenijicu toivaicōjenejaquemavu ne borore:

Iva cūrava ina cūrami ðaipōeva ne jaruvaiva bácarō apeva cūrava bojecuriva cubevū diva pueno. Quénora diva Jūmenijicui epeivabu cūramitōbui yebai. Que baru parurivabu apeva cūrava pueno, arejaquemavu Jūmenijicu.

⁸Aru arenumu Jūmenijicu, yópe arī, toivaicōjenejaquemavu ùi yávaiyede:

Iva cūrava boje, pōeva torī turídurājarama. Aru iva cūrava boje, pōeva turājarama máre, arī toivaicōjenejaquemavu.

Que baru pōeva ne ju abede Jūmenijicui yávaiyede jāvene vaivū náre yópe pōescu torī turíduiyepere. Que teni ina pōeva ðaivubu yópe Jūmenijicui majié báquepedeca ina pōeva ne ðarājiyede.

⁹Ûbenita mujjacapūravu Jūmenijicu jinava, ùi beoimaramu. Mujjarecabu ñai jabocure memecaivū ùi sacerdotevape. Mujjama pōeyajubocavu Jūmenijicui coatete ðaimara āmenore jaruvarī ù jina mārājivū. Mujjama Jūmenijicui pōeva ùi beoimara, mujje coyurājiyepere ayu iye yávaiye méne Jūmenijicui pueno mearore ðacaiyede pōevare. Ûvacarī cuturejaquemavu mujjare, mujje ðajocarājiyepere ayu āmeina teiyede jaruvarī yópe etaiyepere ñeminore

jocarī, mujje cue báquede Jūmenijicure coreóvabevū cāreja. Jūmenijicu cuturejaquemavu mujjare, mujje ðarājiyepere ayu meatede ðaiyede yópe ecoiyepere ùi pueno mearo miadároi. Que baru muja coreóvaivubu Jūmenijicure caride. Aru āmeina tebevubu. ¹⁰Javede Jūmenijicui pōeva āmenejaquemavu muja. Ûbenita caride ùi pōevatamu muja. Javede Jūmenijicui cōmaje āroje jáiyede majibedejaquemavu muja. Ûbenita caride cōmaje āroje jáimi mujjare. Que baru majidivubu úre pare cōmaje āroje jáñure.

Maje memecaino Jūmenijicure

¹¹Muja, ji umara, parurōreca jēniaivū mujjare. Muja ijāravucavure paivū ānevū. Quénora cavarō mearo Jūmenijicui curōcavu barājaramu muja. Muja curivubu ijāravūi obebejiēna. Mujje āmeina ðaiyue yópe maucuvaerebu mujje ùmeque. Que baru ðabejarā yópe mujje āmeina ðaiyuepe. ðaicōjemejara muja mujje dāpiaino āmenore meje bajure. ¹²Quénora mearo ðarī me curārā muja ina Jesucristore ju abevū ne jēneboi. Que teni ne āmeina yávaiyede mujjare āmeina teivure, návacari, mujje mearo ðaiyede jári, yópe arī, “Ámeina teivū āmema na. Me ðadama na”, arī coyurājarama mujjara. Que baru mearore jínajarama na Jūmenijicure ùi ðaquijāravū baquinóre, ñájine ðacuyu pōevare, ne āmeina teiye boje.

¹³Muja ðaiyurivū baru yópe Jūmenijicui urōpe, ju ajarā caivū mujje jabovare. Ju ajarā ñai jabocu ijāravucascu pueno baju parucure.

¹⁴Aru ju ajarā caivū apevū jabovare ùi cāchino parurivure. Nāmu ùi daroimara, ñájine ðarājivū ina āmeno ðaivure aru jínajivū mearore ina mearo ðaivure. ¹⁵Que baru Jūmenijicu ubi mujje bi are ðarājiyepere ayu ina pōeva ārumevure ne āmeina yávaiyede mujjare, ne coreóvabe boje. Mujje mearo ðaiyeque ðarājivubu muja diede. ¹⁶Caride jaubevū mujjare mujje ðaiye yópe caiye iye Jūmenijicui ðaicōjeiye

báquepe pöevare Cristoi daquiye jipocai. Que baru mña yebacavupe paivu ãmevutamu. Òbenita dápiabegarã mña ãmeina teni buoiaivure, mñe cue boje yebacavu ãmevupe. Quénora javvu mñjare mñje ðaiyede yópe Jñmenijicure memecaivupe. ¹⁷Puedajarã caivu pöevare. Újarã apevu Jesucristore ju aipöevare. Jñmenijicure puedarĩ, mearore jíjarã úre. Aru puedajarã ñai jabocu ijãravucacu pñeno baju parucure.

Cristoi ñájiye báquede coreóvare ðaino majare aipe ðaiye jauróre

¹⁸Mña, memecaipöeva, ju ajarã mñje jabovare aru puedajarã me náre. Nópe ðajarã ina jabova jjecubevure aru ina jjecurivure máre. ¹⁹Jñmenijicu me jáimi aru mearo ðacaibi mñjare mñje napiyede ñájiyede ãmeina ðabevuva. Mñje coreóvaye boje Jñmenijicui uróre, mña napivubu ãmeina ðabevuva. ²⁰Mñje napinu ne jara popeiyede mñjare, mñje ãmenore ðaiye báque boje, meamejebu mñjare. Òbenita mñje napinu ñájiyede mñje mearore ðaiyede, Jñmenijicu me jácuyume aru mearo ðacacuyume mñjare. ²¹Que baru mña Jñmenijicui cutuimaramu, ñájinajivu. Cristovacari ñájicarejame mñjare boje, cadatecuyu mñjare. Que teni jáðovarejame mñjare úi ðaiye báqueque aipe ðaiye jauróre mñjare, mñje majinajiyepu ayu aipe ðarĩ ñájinajivure úi ñájiye báquepe. ²²Ye ãmenore ðabedejame ú. Aru ye borocurĩ jujovabedejame ú. ²³Pöeva ne ãmeina yávaiye báquede úre, úcapüravu ãmeina yávabedejame náre copu. Aru pöeva ne ñájiye ðaiye báquede úre, úcapüravu “Ñájiye ðaquiivu mñjare”, abedejame náre. Quénora yópe arejaquemavu Jñmenijicure: “Mu, jipacu, cadatejacu yure. Napini coreivu mure”, arejaquemavu Jesús. Que teni napini coredejaquemavu Jñmenijicure, ñai meacu bajure, bojedacuyure caivu pöevare yópe ne ðaiye báque javépe náre.

²⁴Jesucristovacari ne pëvaimu mácu jocusujaravenu yaicárejame maja

ãmeina teivure boje. Yópe sacerdotei nuvaiyepu úi jícaiyede juainoi, nopedeca Jesucristo nuvarejaquemavu maje boropateiyede maje ãmeina teiye boje úque úi yayiye báquede. Que teni jaruvarejaquemavu maje ãmeina teiyede. Que baru majarecabu coatede ðaimara caride maje ãmeina ðaiyuede jaruvarĩ. Aru curivubu, ðarãjivu mearore. Mñjarecabu meaðaimara caride Jesucristoi churiá boje. ²⁵Javede coatedejaquemavu mña Jñmenijicure jaruvarĩ yópe ovejava mamateivupe nuvevu náre coreipöecuque. Òbenita caride mña oatuvarĩ curivubu yópe Jñmenijicui uróre, yópe ovejavare vorĩ earĩburu yóboi ne jacopaiyovaiyepu náre coreipöecu yebai. Que baru Jñmenijicu jári coreyube mñjare aru meaðayube mñje úmene.

Aipe ðaiye javró purubuoivure
(Ef 5.22, 25; Col 3.18-19; 1 Ti 2.9)

3 ¹Mña úmucurivu máre, ju ajarã mñjemarepacure nopedeca ina memecaivu ne ju aiyepu ne jabovare. Que teni apevu nácvu ne ju abedu Jñmenijicui yávaiyede, mña yávabevuva ju are ðarãjaramu náre, mñje mearo ðaiye boje. Jaubequiyebu mñje coyurãjiye náre, ne ju arãjiyepu aivu Cristore. ²Quénora ne jáiyede mñjare mearo ðaivure pñcaúmea cubevuvu aru puedaivure máre, ju arãjarama Cristore. ³Mñje meaðaiyede mñje bajure, ðabegarã jáicójenajivu apevure mñjare. Que baru mñje vaivéiyequu mñje poðare, aru mñje aðaiyequu códeimeare máre, aru mñje doiyeque cuitótecajere máre, jáicójemejara apevure. ⁴Quénora meara májara mña, mñje meaúme boje. No mearo oatvabenotamu aru cúiménotamu, mñje úme jjecubeque aru cãrijimeque máre. No mearo bojecuvu me Jñmenijicui jáinore. ⁵Quédecabu ina nomiva mácvu javede Jñmenijicure mearore jívu bécavu. Napini coredejaquemavu na mácvu Jñmenijicure, úi mearo ðacaquiyepe aivu náre. Aru ju arejaquemavu

némarebucava b́acavure. Que teni meara đarejaquemavu ne bajure.

⁶Quédecabe cūináco nácaco, Sara báco. Ő máco ju arejaquemavu jímarepacu Abraham mácure. “mu, ji jabocu”, ado barejaquemavu. Aru mujavacari ópe paivubu buojaivu, mearore đaiivu baru jidubevava.

⁷Aru muja nomicurivu máre, me coreóvarā aipe đaiye jaurore mujare mujemarebucavare. Na muje cāchino parurivubu. Que baru pueđarā náre. Aru na cvarājarama j́aravu cūiméjaravu baquinóre cūináturu mujaque. Que baru pueđarā náre. Me cvarā náque, muje j́eniari buojarājiyepe aivu J́umenijicque yópe mujare jauépe.

**Jesúre ju aivu ne mearo đaiye boje
nájijede coyūino
(Mt 5.10)**

⁸Quénora coyuyubu mujare die borore. Dápijarā caivu muja muje ũmei cūináturu. Apevu ne chíoru, chíojara náque. Aru apevu ne torojuru, torojjarā náque. Ujarā mujevure yópe muje uepe mujeyovare. Cadatejarā ina cōmaje ārojarivure. “¿Meara márica apevu pueno?” arí dápiabejarā. ⁹Apevu ne āmeno đaru mujare, copu āmeno đabejarā náre. Apevu ne āmeina yávaru mujare, copu āmeno yávabejarā náre. Quénora j́eniajara J́umenijicque, ũi mearo đacaquiyepe aivu caivu náre, muje coreóvaiye boje J́umenijicu cutuyu b́acure mujare, muje mearo đarājiyepe ayu yópe ũi mearo đacaquiyepe mujare. ¹⁰Yópe arí, J́umenijicu toivaicōjenejaquemavu ũi yávaiyede:

Ácu pōecu torojuiyucu baru aru cuiyucu baru me ij́aravui, āmeina yávabejacurí, aru dajocajacurí ũi bogocuede máre. ¹¹Dajocajacurí ũi āmeno đaiyede. Aru đajacurí mearo. Uetubecava pueno baju vorí eajacurí ũi ũmeque cārijimene đacuyu apevure.

¹²Maje jabocu j́ari coreyube ina mearo đaivure. Jápiayube ne j́eniaiyede. Ubenita maucuvacube

ina āmeno đaivure, arí toivaicōjenejaquemavu.

¹³Ñame āmeno dabename majidivu mujare muje ũmei, muje torojurí đaru mearo. ¹⁴Ubenita muja nájivu baru, muje mearo đaiye boje, uraró torojurājaramu muja. Jidubejarā ina nájine đaivure mujare. Aru cucumamejara. ¹⁵Quénora mearore jíjarā Cristore muje ũmei. Aru pueđarā ũre, muje jabocure. Ñame ne j́eniari mujare, muje coyurājiyepe aivu iye muje napini coreiyede Cristoque, maumena coyurí majjarā me iye borore muje napini coreimure. ¹⁶Aru coyjarā náre jijecubevava aru pueđaiivu náre. Cainmua mearo đajarā, yópe muje majiépe, “Boropatebevū yu”, muje arí dápiainoque. Que teni apevu āmeina yávaivu baru mujare, mearo đaivureca muje ju aiye boje Jesucristore, návacari cuyoje tenajivubu ne āmeina yávaiye báquede muje borore. ¹⁷Que baru J́umenijicu nájicōjenu mujare, yópe ũi urópe, muje nájijye meavu, muje mearo đaiye boje. Ubenita meamevu, muje āmeno đaiye boje.

¹⁸Cristocapūravu nájini yaidéjame cūinára, pōevare maje āmeina teiye boje, maje boropatebenajiyeye ayu diede. Nai meacu nájinejame āmeina teivure boje, meara đacuyu majare J́umenijicu j́ainoi aru cūiné đacuyu maje coateiye báquede J́umenijicure jaravarí, maje J́umenijicu jina tenajiyeye ayu. Cristobe pōeva ne boarí jaruvaimu mácu ũi bajure, ubenita J́umenijicu ũmedavaimu mácu ũi ũmene.

¹⁹Aru decocupe ũi baju cubecava, coyucunurejaquemavu ina yáivu b́acavu buoimarape paivure. ²⁰Na mácavu arurivu cāreja ju abedejaquemavu J́umenijicu yávaiyede ānijaravua báquei, Noé mácu ũi đaiye báquede jiađocū uracure. Dinumure J́umenijicu napini coreyu barejaquemavu, na mácavu ne ju arājiyepe ariduyū ũre. Ubenita obebejina baju, ocho paivu quévura, na mácavu meadaimara marejaquemavu dicūque muiváibore

jocarí. Ocoi jorí, ocoque meadaimara marejaquémavu. ²¹ Quédecabu iye mije jáđovaiye Jūmenijicure ocoi. Yópe Jūmenijicui meadaiye báquepe Noéja mácvare ocoque, nopedeca caride Jūmenijicu meadaibi mujare máre ocoque mije jáđovaiyede úre Jesucristoi nacajaiye báque boje yainore jaravari. Aru maja jáđovamevu Jūmenijicure ocoi, joarājivu maje docure. Quénora jáđovaiyabu Jūmenijicure ocoi, jēniarajivu úre, “Boropatebevu yu” ūi arí dápiare đaquiepe aivu majare. Aru boropatebevu maja, ūi ārūmeteiye báque boje maje āmeina teiyede. ²² Javede űai Jesucristo nūrejaquemavu cavarō mearo Jūmenijicui curōi. Caride cubi Jūmenijicui meapūravui, ūi paruéde cūvae boje. Jaboteyube caivu ina ángelevare, aru cavarōcavu jabovare aru parurivure máre.

**Maje memecaino Jūmenijicure
Espíritu Santoi majide đainoque
majare coapa**
(Ro 12.13; 1 Co 13.7)

4 ¹ Jesucristo űájinejame ūi baju ūi cuede ijāravui. Que baru mija máre, dápiarí ūi dápiaye báquepedeca, jidubejarā mije űájinajiyede. Ácu pōecu űájiñu, āmeina teiyede đajocaibi. ² Que baru caride mije cuede ijāravui đaicōjemejara mije bajure yópe mije baju urōpe. Quénora đaicōjeara Jūmenijicure mije bajure yópe ūi urōpe. ³ Ina Jūmenijicure ju abevu đavū ne baju urōpe. Javede mija máre nápe đavū barejaquémavu obedijūa. Que teni mija āmeno đavū barejaquémavu. Mije āmeina đaiyuepe đavū barejaquémavu. Pacoteivu barejaquémavu. Bujiéque ūcuri torojūve teivū barejaquémavu. Ūcuri upaivu barejaquémavu. Aru āmeno đavū barejaquémavu mearore jivu pēpeimarare Jūmenijicure ūbevūva. ⁴ Aru caride coreóvabema na mije náre yóvabe boje ne urarō āmeno đaiyede. Que baru arí dápiarí, “¿Aipe teivū bārica yóvabevū majare?” arí, āmeina

yávadama mujare ne bajumia. ⁵ Ūbenita návacari nūrajarama, coyurājivu ne baju ne borore caiye ne đaiye báquede, aru ne yávaiye báquede, aru ne dápiaye báquede máre Jūmenijicui jivateinoi, ūi űájine đaquiyede caivu pōevare ne āmeina teiye boje, yaivu bācvare aru apurivure máre. ⁶ Ne majinajiyepe ayu diede, javede iye Jūmenijicui yávaiye méne coyurejaquemavu ina yaivu bācvare caride. Que baru űájine đaimara mácvavacari ne yaiye báquede yópe caivu pōevare ne bajure, apurivū curivū bujarājarama ne ūmene yópe Jūmenijicure.

⁷ Caijāravū vaivu, pūeno joabenotamu ijāravū cūiquino. Que baru me đaicōjeara mije dápiayede aru mije đaiyede máre, me jēniamuri Jūmenijicūque yópe ūi urōpe. ⁸ Caiye mujare jaué pūeno, yo cūináro jauřótamu: Ūjarā apevure parurōreca. Ūrivū baru apevure, ārūmeteiyrājivūbu ne āmeina teiyede. ⁹ Torojurivū copū etajarā mujevure me. Jecubejarā ne āiyede, “Ūbevū yu náre copū etarí”, abevūva. ¹⁰ Jūmenijicui Espiritu Santo majide đaiibi mujare coapa, mije đarājiyepē ayu apeno memeinova, cadatenajivu apevu mujevure. Me đajarā iye ūi majide đaiyede yópe coreipōecui me đaiyepē iye ūi jabocui cūvae de ūi coreicōjeiye báquede úre. ¹¹ űai coyūyū, coyūiye jauvū úre Jūmenijicui yávaiyede jāvene. Aru űai memecayū, memecaiye jauvū úre iye paruéque Jūmenijicui jiyede úre. Que baru caiye mije đaiyēque Jesucristo mearore jide đaiibi Jūmenijicure, mearore aru paruéde máre cūvacu cainūmūa. Quédecabu.

Jesucristore ju aivu ne űájinajino
(Ro 8.17; 1 P 4.1)

¹² Mija, ji ūmara, cuicumamejara ne űájine đaiyede mujare. Mije űájiyeque jáđovarajivūbu mije ju aiyede Jūmenijicure jāve, yópe ne jáđovaiyepē tāure jāve toaque. Que baru caivu Jesucristore ju aivu űájinajaramu. ¹³ Que baru cuicumamejara. Quénora

torojujarā muxe ũmei muxe nájijede yópe Jesucristo ũi nájije báquepe. Que baru pueno baju torojurājaramu caivu ne járarijyede Cristo meacu bajure.

¹⁴Pōeva ne āmeina yávaru mujare, muxe ju aye boje Cristore, torojujarā muxe muxe ũmei. Caivu muxe ne āmeina yávaimara Cristore boje, mujarecabu cuvarivu Jūmenijicui Espiritu Santore, nái Espiritu pueno baju meacure. Aru ũ cubi muxeque. ¹⁵Muxe nájivū baru, nájimejara yópe pōevare boarí jaruvavūpe, aru navaipōevare, aru apevu āmeno daipōevare máre. Aru nájimejara yópe ina “Yópe ji coyuiyepē daie jaovu mujare”, coyuvūpe apevure. ¹⁶Ūbenita muxe nájivū baru muxe ju aye boje Cristore, cūyoje tebejarā muxe ju aiyede ũre. Quénora mearore jfjarā Jūmenijicure muxe Cristo jina mae boje.

¹⁷Joabejinoi Jūmenijicu bācuyume ũi nájine daquiyede pōevare, ne āmeina teie boje. Mamarumure Jūmenijicu nájine daquyume ũ jinare. Aru Jūmenijicui nájine daie boje ũ jinare, ina ju aivure ũi yávaiye méne, jāve pueno urarō nájine daquyume ina ju abevure ũi yávaiye méne. ¹⁸Yópe arí Jūmenijicu toivaicōjenejaquemavu ũi yávaiyede: “Ina pōeva meara meadaríduimara maru, pueno baju meadaríduimaramu ina pōeva āmena, āmeina teivu”, arí toivaicōjenejaquemavu. ¹⁹Iye ji coyuiyede yópe aiyurōtamu: Ina pōeva nájivū Jūmenijicui urōpe mearore dare cuiye jaovu náre cainumua. Aru ju aye jaovu náre Jūmenijicure, náre cuedayū bācure aru cainumua dayure yópe ũi aye báquepedeca, ũi meadaquiyepē aivu ne ũmene.

Jesucristore ju aivure majicaino

(Mt 6.25-34, 23.12; Lc 14.11; Jn 21.15-17; He 13.20; Stg 4.6, 10)

5 ¹Caride coyuiyuvū yu mujevure, Jesúre ju aivure coreipōevare. Yu máre Jesúre ju aipōevare coreyubu. Yúvacari járejacacu Jesúí nájije báquede.

Aru Jūmenijicui jádovaquiyede Jesús meacu bajure, yu máre meacu baju cuscuyumi.

²Yu jēniaivu mujare, coreipōevare, muxe corenariyepē ayu me ina Jesúre ju aipōevare cōjijivavure muxe yebai, yópe ovejavare coreipōeva ne me coreiyepē ne ovejavare. Corebejarā náre parurōque. Quénora corejarā náre muxe ũe boje. Aru memecabejarā Jūmenijicure ne jíye boje tātuturare mujare. Quénora memecajarā ũre muxe cadateiyue boje apevure. ³Aru jabova parurivu ne cōjeiyepē cōjimejara muxe ina muxe coreimarare. Quénora cūjarā me ne jáiyede, jádovarajivu náre aipe daie jaurōre ne curājiyede me Jūmenijicui jáinoi. ⁴Que teni nái Cristo, caivu maja coreipōevare maje jabocu, majare coreyu, jícuyume mujare bojedaino pueno baju mearore cūiménore ũi jádovaquiyede.

⁵Aru muxe, bojuvū, ju ajarā ina Jesúre ju aivure coreipōevare. Aru caivu muxe dápiabejarā muxe baju meara apevu pueno. Quénora memecajarā muxe bajumia yebacavūpe, jabocupe tebevūva. Yópe arí Jūmenijicu toivaicōjenejaquemavu ũi yávaiyede:

Jūmenijicu maucvavibi ina dápiavure ne baju pueno meara apevu pueno. Ūbenita ũi pueno meacu baju boje, cadateyube ina “¿Meara márica?” abevure, arí toivaicōjenejaquemavu.

⁶Que baru yebacavūpe tejarā muxe, Jūmenijicu ũi cadatequiyepē aivu mujare ũi paruéque. Que teni ũi beoijāravū baquinóre Jūmenijicu mearare epecuyume mujare.

⁷Jūmenijicu mujare pare ũcu coreibi me. Que baru cārijimejara muxe. Quénora coyujarā Jūmenijicure caiye iye cārijovaiyede mujare. Aru yópe pōeva ne epeiyepē náre dūscuéde, nopedeca epejarā muxe iye cārijovaiyede mujare Jūmenijicurā.

⁸Me jájara. Apurivūpe, coreivūpe, me daicōjejarā muxe dápiayede.

Yópe yavi jijesucu ouy bujiléque
 ñi vorí ãre cuiyere ñi ãquimure,
 nopedeca muxe maucu, ñai abujuvai
 jabocu, vorí bįjaroiyucu cuibi
 pōevare, ne dajocarājiyere ayu
 ne ju aiyede Cristore. ⁹Ëbenita
 dajocabejarā muxe ju aiyede
 úre. Quénora maucuvajarā ñai
 abujuvai jabocure, muxe coreóvaiye
 boje caino joborōacavu ijāravni
 Jesúre ju aivn, na máre ñájiñama
 muxe ñájiyere. ¹⁰Obebejāravna
 ñájinajaramu mja. Muxe ñájiniburu
 yóboi, Jūmenijicuvacari ye jaubede
 darí, nurié dāpiare darí, parure
 darí, bįjabede đacuyume mjure.
 Ñai Jūmenijicu pñeno meacu baju,
 úrecabe cutuyu básu mjure, muxe
 cūvarājiyere ayu mearo cūiménore,
 muxe cūe boje Jesucristoque
 cūinávure. ¹¹Paruède cūvacube
 Jūmenijicu cainuma. Quédecabu.

**Pedro ñi meaicōjeino Jesúre ju
 aipōevare**

*(Hch 12.12, 25, 13.13, 15.22,
 37-40; Col 4.10; Flm 24)*

¹²Toivacaivu mjure iyoca paperayoca
 quįjiyocare Silvano cadateiyequé.
 Ërecabe Jesúre ju ayu dajocabecava
 ji jáinoi. Parure đaiyvnu mjure muxe
 ũmei. Aru majide đaiyvnu mjure jāve
 iye ji toivacaiyede Jūmenijicui mearo
 đacaiyede mjure ñi pñeno me boje. Que
 baru dajocabejarā muxe ju aiyede úre.

¹³Ina Babilonia āmicuriimarocavu
 Jesúre ju aipōeva, Jūmenijicui beoimara
 mjure paivu, meaicōjedama mjure.
 Aru Marcos máre, jímacure páyu,
 meaicōjeimi mjure. ¹⁴Me jacyujarā
 mja mjevure, muxe jivare nuri, muxe
 Jūmenijicu jina mae boje. Caviu mja
 curivu Jesucristoque cūinávure me
 cųjarā cārijimevva. Quénoramu.

2 San Pedro

Mamabuinore coyuiyebu Pedro bácu ùi toivacaiye báquede yóbocayoca paperayocare. Apevu ne dápiayeye, toivacarejaquemavu judíova Jesúre ju aipòevare, ne joborðare jocarí dajocaivu bácvure, curájiyure apenoa joborðai, die ámiá Ponto, aru Galacia, Capadocia, Asia, aru Bitinia máre (1 P 1:1). Ùbenita obedivu ne dápiayeye, toivacarejaquemavu caivu Jesúre ju aipòevare. Pedro bácu judíovacacu barejaquémavu. Jesús ùi yávaiye méne beorí coyucòjeimu marejaquémavu. Lucas bácu toivarejaquemavu Pedro bácu borore Hch 1:12-5:42 aru 9:32-12:19 aru cap. 15. Majidivu ne dápiayeye, toivacarejaquemavu diyocare ániyu bácarðre 64 d.C. Ùbenita áimaro Pedro bácu ùi curiimaro ùi toivacaiyede diyocare caivu majibevu. Apevu “Babilonia ámicuriimaro curejaquemavu” arí, aru apevu “Roma ámicuriimaro curejaquemavu”, arí dápiavubu.

Toivacarejaquemavu Jesúre ju aipòeva, ne me járajyeye ayu Jūmenijicure ju abevu ne jujobabenajyeye ayu náre ne bueiye jáve ámeque, ne vainí turí bíjabenajyeye ayu ne ju aiyede jaruvarí (3:17). Coyurejaquemavu aipe árojae jauðre Jesúre ju aipòevare (1:1-15), aru aipe árojae máquede Jesúí jáðovaiye báquede meacu bajure aru Jūmenijicure coyucaipòeva mácvu ne yávaiye jávene (1:16-21), aipe árojaene borocuede bueiivu ne coyuiyede (cap. 2), aru aipe árojaene Jesucristoi copaidaiyuede (cap. 3).

Pedro ùi meaicòjeino Jesúre ju aipòevare (Tit 2.13)

1 ¹Yúbu Simón Pedro, Jesucristore memecayū aru ùi yávaiye méne beorí coyucòjeimaracacu. Toivacaivu yu mujare, ju aivure cúináturu ñujaque Jūmenijicure, majare meadaiðecu pueno meacu baju Jesucristore.

²Jūmenijicu mearo ðacajacurí mujare bojecubeda ùi me boje. Aru torojurí me cure ðajacurí mujare cārijimevva pueno baju muje majiéque maje jabocure.

Jesúre ju aipòeva ne mearo ðaino (Jn 21.18-19)

³Jūmenijicu coreóvare ðaibi majare Jesucristore, ñai cutuyū bácvure majare, maje ù jina marajyépe ayu. Cutuibi majare, maje cuvarájiyeye ayu me úpe aru maje ðarájiyeye ayu mearore ùi ðaiyeye. Caride maje coreóvaiye boje Jesucristore, Jūmenijicu cuvare ðaibi majare caiye jauéde majare,

maje curájiyeye ayu me ùi jáinoi, úre memecaivu ùi paruéque. ⁴Ijáravucavu ámena ámeina dápiadama aru ámedadama ne ámeina ðaiyuepe. Que teni bíjare nuñama na. Ùbenita Jūmenijicu pueno meacu baju me dápiailbi aru me ðaibi máre. Que teni cubi me cainumua. Aru Jūmenijicu “Mearo ðacacuyumu yu mujare”, ùi uraró mearo aino mácarðque, bíjabede ðaibi mujare, yópe ne buoimarare dupini nure ðaiyeye, muje curájiyeye ayu me úpe. Que baru muja meara, me dápiavū, me ðavū máre buojarájiyabu. ⁵Que baru jauvu mujare muje memenajyeye, muje curájiyeye aivu me Jūmenijicui jáinoi. Javede ju adavū Jesucristore. Ju arí, meara tejarā muja. Meara teni, coreóvajarā mearore aru ámenore máre. ⁶Mearore aru ámenore máre coreóvarí, ðaicòjejara me muje dápiayede aru muje ðaiyede máre. ðaicòjени muje baju me, napijara muja. Napini, me cujarā muja yópe Jūmenijicui urðpe úre memecaivu. ⁷Me curí yópe Jūmenijicui urðpe úre memecarí, ujarā muja apevu

Jesúre ju aivure yópe mñje ñepe mñjeyovare. Aru urí apevu Jesúre ju aivure, ñjarã mñja caivure máre.

⁸Mñja ñaivu baru diede, aru caijãravna pñeno baju ñaivu baru diede, jũracubenamu mñja. Aru mñje ñaive bojecube ñemequiyebu. Quénora ñetubevva memecarãjivubu mñja, mñje coreóvaive boje me maje jabocu Jesucristore. ⁹Ûbenita ñai ñabecu baru diede aru die jaũru ñre, yópe pñecupe joarõ jãri eabecu mimini quĩjino jãñu joabenoĩ, nopedeca jãpiarĩ eabecu cavarõ mearoquede, Jũmenijicu jinore coreóvabebi. Quénora jãpiarĩ eayũ ijãravuquede, coreóvaibi diede. Ûrecabe ñrũmeteyũ Jũmenijicui ñrũmeteyi bãquede ñi ñeina teiye bãquede aru Jũmenijicui jarũvaive bãquede ñi boropatejuroe bãquede. ¹⁰Mñja, jĩvu, que baru mñje memecaiye méque, mñje ñaive mearoque máre, coreóvare ñajarã jãve Jũmenijicui beoiye bãquede mñjare, ñi cutuiye bãquede máre. Que ñaivu baru, mñja ye vainĩ turĩ bñjabenamũ Jũmenijicure jocarĩ. ¹¹Que baru torojũri copũ etaimara mãrajivubu mñja maje jabocu Jesucristo, majare meadayũ, ñi jaboteino cũiménoi.

¹²Que baru ñrũre cure ñaiyvũ yũ mñjare cainũmũ iye yãvaive ji coyuiyede. Javede mñja coreóvarejaquemavũ diede aru ju arejaquemavũ iye yãvaivede jãvene ne bueiye bãquede mñjare. ¹³Meavũ ñrũre ñayũ mñjare ji cuede cãreja ijãravui iye yãvaive méne ji coyuiyede, mñje dápiare nũrajiiyepe ayũ diede. ¹⁴Maumejie yaicáyũmu yũ yópe maje jabocu Jesucristo ñi majide ñaive bãquepe yũre. ¹⁵Que baru ñaquijivũ yũ caiyede ji oainope, mñje ñrũri buojarãjiiyepe ayũ caiye iye yãvaive méne ji yainĩburu yóbore máre.

**Ina Jesucristo meacũ bajure jãivu
bãcavũ ne coyũino**

(Mt 17.1-5; Mr 9.2-7; Lc 9.28-35)

¹⁶Borocubedejaccarã mñjare ññje bueiye bãquede maje jabocu Jesucristoĩ

paruède. Aru borocubedejaccarã mñjare ññje bueiye bãquede dacuyũre cojedeca ijãravui. Ññje bueiye bãque ññje baju dápiave ñmevũ. Quénora ññjavacari jãrejaccarã ññje baju ññje yacorũaque Cristoĩ urarõ paruède. ¹⁷Majepacu Jũmenijicuvacari pueðarejame Jesúre aru mearore jíðejame ñre ñi aive bãquede ñi yãvaino mearoque: “Ñaime jímacũ, ji umũ. Torojvũ yũ ñre”, arejame. ¹⁸Aru ññjavacari jãpiarejaccarã ññje baju ññje cá mucobeaque iye yãvaino mácarõre cavarõ mearore jocarĩ ññje cue bãquede Jesucristoque dicũ cũracũ meacũ bajui, Jũmenijicui cue bãque boje nore.

¹⁹Ññje jãino mácarõ aru ññje jãpiaino mácarõ máre nopedecabu iye Jũmenijicui yãvaivede coyũcaive bãquepe javede. Que baru iye Jũmenijicui yãvaivede coyũcaive bãqueque ñ jãðovaimi jãvene ññje coyuiyede iye vaive bãquede ññjare. Jãpiarĩ aðajarã mñja iye Jũmenijicui yãvaivede coyũcaive bãquede. Yópe pñoi buaque pñeva ne quĩjino jãri eaiyepe ñeminõ pũ miadãe tuiyeta aru aviã ñi boiyeta ne jãrajiiyepe aivũ me, nopedeca iye Jũmenijicui yãvaivede coyũcaive bãqueque ñ coreóvare ñaibi mñjare quĩjino pũ Jesucristoĩ copaidaiyeta, ñi coreóvare ñaquiyede mñjare me caiyede mñje ñmei. ²⁰Mamarũmũ coreóvajarã mñja iyede: Pñecu cũbebi ñi baju coyũri buojayũ aipe aiyũrõre Jũmenijicui yãvaivede coyũcaino mácarõre ñi toivaicõjeino mácarõre ñi yãvaivede. ²¹Que baru ñi yãvaivede coyũcayũ bãcu cũbedejaquemavũ coyũyũ bãcu ñi baju dápiainore yópe ñi baju urõpe. Quénora caivũ ina Jũmenijicui yãvaivede coyũcaivũ bãcavũ memecarejaquemavũ ñre. Aru coyũrejaquemavũ ñi dápiavede yópe ñi urõpe. Jũmenijicui Espĩritu Santo coyũicõjenejaquemavũ na mácavũre.

Ina borocũede bueivũre coyũino

(Mt 12.45; Lc 11.26; Jn 8.34;

Ro 6.6, 16; Jud 4-13)

2 ¹Javede Israecavũ bãcavũ ne jñeboi cãrejaquemavũ Jũmenijicui

yávaiyede coyũcaipõeva ũbenina. “Jũmenijicui yávaiyede jãveneca yávaivũbu ñũja”, borocurĩ arejaquemavu na mácavu. Nopedeca bueipõeva ũbenina curãjivũbu muje jẽneboi. “Jũmenijicui yávaiyede jãveneca bueivũbu ñũja”, borocurĩ arãjivũbu na. Ũbenita yavenina bueni bárãjivũbu ne yávaiyede jãve ãmene. Aru ju abevũvacari maje jabocu Jesucristore, ñai meadayũ bãcure náre, “Maje jabocu ãmemi ũ”, arãjivũbu na. Yópe põecu ũi bojedaiyepe ũi urõre bojedainoi ũ jino maquiýepe ayũ, nopedeca Jesucristo ũ jinare ðaibi náre ũi meipe bãque boje ũi jivede. Aru ne yávaiyede jãve ãmene bueipe boje, maumejiena bíjare ðarãjarama ne baju. ²Obedivu põeva náre ju arĩ, yóvarĩ nurĩ, napedeca urarõ ãmeno ðarãjivũbu. Ne ðaiye boje nópe, ãmeina yávarãjarama ina ju aivure Jesucristore. ³Ãujinajivũbu na apevui cãvede, tãutũrare máre. Que teni jujovarãjivũbu mujare ne bueipe borocueque, ñajivu muje cuvaede. Ũbenita javede Jũmenijicu “Ina borocuede bueivũ ñãjinajarama”, arejaquemavu. Que teni bíjarãjarama na Jũmenijicure jocarĩ.

⁴Ina ángeleva ãmeina teivũ bãcavure Jũmenijicu ãrumetebedejaquemavu ne ãmeina teipe bãquede. Quénora darorĩ jarũvarejaquemavu náre ñeminitucubui, ina ñãjinajivure ne coreinoi. Nore nárecabu buoimara tãumeaque coreivũ pu Jũmenijicui ñãjiovaquijãravũ baquinóita.

⁵Quédecã ina ijãravũcavu javecavu bãcavure máre, Jũmenijicu ãrumetebedejaquemavu ne ãmeina teipe bãquede. Quénora ocare ðarĩ, muivári yaidé ðarejaquemavu caivũ ina ãmeina ðaivũ bãcavure. Ũbenita meaðarejaquemavu Noé mácure, ñai coyũre curĩduyũ bãcure põevare ne mearore ðaiye jauquiepe arĩduyũ bãcure. Aru apevũ siete paivũ bãcavure quévũra Noé mácuque Jũmenijicu meaðarejaquemavu muivãibore jocarĩ.

⁶Quédecã Sodoma aru Gomorra máre ãmicurĩmaroacavu bãcavure

Jũmenijicu ãrumetebedejaquemavu ne ãmeina teipe bãquede. Quénora cãrbova uruibova darorĩ ocainopedeca, éni bíjare ðarejaquemavu caivũ diĩmaroacavu bãcavure. Que teni diĩmaroã quédãta ũapena teni cũinéjaquemavu. Que ðarĩ, Jũmenijicu coreóvare ðaibi caivũ ijãravũcavu curãjivure ãmeina ðaivũ bárãjivure ũ ñãjine ðacũyure na márãjivure ne ãmeina teipe baquieýe boje. ⁷Ũbenita meaðarejaquemavu Lot bãcure, ñai meacu bãcure. Ũrarõ chíõũ marejaquemavu Lot bãcu ũi ũmei ina Jũmenijicure ju abevũ bãcavure ne ãmeina teipe bãquede. ⁸Ñai ũmu meacu cũcu barejaquemavu ne jẽneboi. Aru ñãjiũ marejaquemavu ũi ũmei ũi jáiyepe aru ũi jápiaiyede máre ne vainĩ tuiyede jãravũã coapa.

⁹Maje jabocu Jũmenijicu majibi meadayũ ina ũre ju arĩ mearo ðaivure yópe ũi urõpe, jujovãivure jarũvarĩ. Aru ũ majibi coreyũ ina ũre ju abeni ãmeno ðaivure, ñãjinajivure pu ũi ñãjiovaquijãravũ baquinóita. ¹⁰Jũmenijicu ñãjine ðacũyure ina torojurĩ ðaivure ãmeina ne baju urõpe aru ju abeni ãmeina jáivure ũre apevũ pũeno.

Puedãbenama ina borocuede bueivũ. Ðãðãma yópe ne baju urõpe. Aru jidũbevũva ãmeina yãvãðãma ina pũeno parũrivure. ¹¹Que teivũreca ina ángelevacãpũravũ, ne pũeno parũrivũ aru ne pũeno cõjeivũ máre, pũedarĩ ãmeina yãvãbenama ina pũeno parũrivure Jũmenijicui jáinoi ñãjine ðarãjivũ náre. ¹²Ũbenita ina borocuede bueivũ coreóvãbenama ina pũeno parũrivure ne ãmeina yãvãimarare. Que baru ãimãra ãrumevũpe dápiãbevũva ðãðãma yópe ne baju urõpe. Yópe põeva ne jẽiyepe ãimarare boarãjivũ náre, nopedeca na máre bíjaroimãra márãjivũbu, ne bíjare ðaiye boje apevũre. ¹³Ãmeina ñãjinajivũbu na yópe ne baju ãmeina ñãjine ðaiyepe apevũre, ne ñãjiye ðaiye boje apevũre. Torojũve teðãma ũbenina jãravure aru ñãmine máre. Que teni ðãðãma yo ãmenore,

cuyoje tenajivũ ne baju pœva ne cuyorjeda jãiyede. Aru ne yóvarãniyede muxe torojũve teinoi cuyoje tede ðaðama mujare ne torojurĩ jujovaiyede mujare.

¹⁴Áco nomió ne jáimore ãmenore ðaiyurĩ dápiavũbu óque. Uetubevũa ãmeina ðarĩ ne ãmeina teiyede ðajocaiye majibema na. Vainĩ ture ðaðama ina ju aivũre Jesucristore parubevũa cãreja ne ju aiyede úre. Náre jujovaðama yópe moa boaipõecu ùi jajovaiyepe moacure cúvaque. Cainũua dápiadama ne cãvaiyede caiye ne jáiyede. Que baru uraró ãujiñama na. Nárecabu Jũmenijicui ñájine ðaimara márajivũ. Que baru ùi coavaimara márajivũbu úre jarũvarĩ. ¹⁵Dajovaðama ne ju aiyede Jũmenijicui yávaiyede jávene. Que tenĩ mamateðama ne baju yópe põecu mái nurĩ macarõĩ ùi mamateiyere ùi ðajocaiyede ðimare jocarĩ. Ðaðama yópe Balaam mácupe. Ñai Balaam mácu Beor bácuĩ mácu barejaquémavũ. Jũmenijicui yávaiyede coyũcaipõecu bácuvacari, borocũcu barejaquémavũ. Úi ãmeina teiye báque boje, bojede vorĩ eaiyurĩdurejaquemavũ ùi mácu.

¹⁶Ubenita ùi tubamũ, ãimacu yávabecu bácu, jararejaquemavũ ùi mácupe. Yávarejaquemavũ úre ape yávaiyeque yópe põecuĩ yávaiyepe, ðajocare ðacũyũ ñai Jũmenijicui yávaiyede coyũcaipõecu bácupe ùi ðaiye báquede ãrumecupe.

¹⁷Yópe pœva ocore earĩ coreniduivũ ne chíoiyepe ococobe pĩapóri popoiye boje, nopedeca pœva chíodama ina bueiõeva borocurivũ ne bueiyeque, ne jujovaiye boje. Aru yópe oopenibo ùmevũque japurĩ jaroiyepe pœva majibevũa, nopedeca ina bueiõeva borocurivũ ne bueiyede majibenama, ne jujovaiye boje. Que tenĩ ne bueiye báque bojecũbevũ. Que baru Jũmenijicui meadaibi náre ne curãjino pũeno baju ñeminore, ne ñájinajinore. ¹⁸Yávaðama paruéque yópe majidivũ ne yávaiyepe. Ubenita quéda ubenina yávaðama na. Apevũ pœva ðajovaðama ne bueiye jáve ãmene jarũvarĩ, yópe buoimũ ùi dupini ñuiyepe. Ðaicõjeivũbu náre, ne

ðarãjiyepe aivũ cojedeca no ãmenore yópe ne ðajocarĩduino mácarõpe. ¹⁹Yópe arĩ, coyũvũbu náre: “Muxa yebacavũ ãmevũ. Que baru ðajarã caiyede yópe muxe baju urõpe”, adama na. Ubenita ne que aiyedeca, nárecabu yebacavũpe paivũ. Ne ãmeina ðaiyuede ðaicõjeiye boje náre, bíjarãjarama na. Ñai ðaicõjeñũ aprevũre, úrecabe ne jabocu. Aru apevũ ùi yebacavũbu. Nopedeca põecu apejiene ðaicõjeimũ maru, úrecabe yebacacupe páyũ. ²⁰Ina pœva jarũvaivũ bácvũ ijãravũcavũ ne ãmeno ðaiyede, ne coreóvaiye boje maje jabocu Jesucristore, majare meadaipõecupe, oatvavivũ baru ne ùmene, ãmeina tenajivũ cojedeca, buojarãjarama na ãmena ne mamarũmũre ãmeno ðaino mácarõ pũeno. ²¹Ne jarũvaru Jũmenijicui ðaicõjeiye méne ùi coyũiye báquede náre, pũeno baju meajebu náre, ne majibedu iye bueiyede aipe ðarĩ pœva curĩ buojarãjivũ mearare Jũmenijicui jáinoi. ²²Ðaðama na yópe majidivũ ne coyũno mácarõpe: “Yavimi copedini ãñũme ùi baju bijoiye báquede. Aru várico ne cuyavaimo máco copainuri paraðobe yaoburã”, adama na.

Maje jabocu ùi copaidaquinore coyũno

(Mt 24.43; Lc 12.39; 1 Ts 5.2; 2 Ti 3.1-5; Jud 18; Ap 16.15, 21.1)

3 ¹Muxa, ji umara, caride toivacavũ mujare cojedeca. Javede toivacacũ mujare apeyoca paperayocare. Diyoca pũcayocaque ãrũre ðaiyũvũ mujare iye bueiyede jávene muxe jápaiye báquede, muxe ðapiarãjiyepe ayũ nurie. ²Árũjara ina Jũmenijicui yávaiyede coyũcaipõeva mácvũ, Jũmenijicure memecaivũ bácvũ, ne bueiye báquede mamarũmũre. Árũjara maje jabocu Jesucristo, majare meadaipõecu, ùi ðaicõjeiye báquede máre ùi yávaiye méne beorĩ coyũicõjeimara ñuxe bueiye báquede mujare.

³Mamarũmũre coreóvajarã muxa iyede: Ánijãravũ buojaquijãravũ baquiyéde, Cristoi copaidaquijãravũ

jipocare, darājarama pōeva Jūmenijicure ju abevu, yurivū, aru ne āmeina daiyuere ðaivu. Yurinajarama Jūmenijicure aru Jesucristore ju aipōevare máre. ⁴Yūrini, yópe arājarama na: “Mūja aivū, ‘Copaidacuyumu yū ijāravū’, arejamedā Cristo, aivūbu mūja. Jāve maru no, ¿Ári curi ū? Obediujua vaivū majeñecuva mácavū ne yainiburu yóbore. Aru ne curinūmure, caride máre, caiye vaivū cūináturu iye vaiye báquedeca Jūmenijicui ijāravūre cuedainūmū yóbore”, arī yurinajarama na. ⁵Ūbenita nácapūravū coreóvayūbenama Jūmenijicui cuedaiye báque caijīene. Mamarūmure Jūmenijicu cuedarejaquemavū cavarōre aru joborōre máre ūi yāvaiyeque. Cuedarejaquemavū ijāravūre ocoque aru oco jēneboi. ⁶Aru ocoque máre jarūvarī bījare ðarejaquemavū ānijāravūcavū bācavūre muiváiboque. ⁷Aru caride máre meadayūbe ijāravūre, cavarōre aru joborōre máre, ūi yāvaiyeque. Meadayūbe ijāravūre pū ūi nājiovaquijāravū baquinóita, ūi nājine ðaquiyede caivū āmenare, ne coatenajiyere ayū ūre jarūvarī. Dinūmū maquinóre cūiné ðacuyūme ijāravūre toaque.

⁸Mūja, ji ūmara, ārumetebejarā iyede: Jūmenijicu jāñūme cūinājāravū vainore yópe maje jāiyere mil paiujua vainore. Aru Jūmenijicu jāñūme mil paiujua vainore yópe maje jāiyere cūinājāravū vainore. ⁹Maje jabocu Jesucristo “Copaidacuyumu yū” arejame. Ūbenita apevu pōeva ne majiēpe, ne jāravūare corevaiyere, ðuibajīemu ūi daiyūrīduino. “Dabebi cāreja. Que baru dabecuyūme”, arī dápiadama ūbenina. Ūbenita daiyūbecū āmemi. Quénora napīñūme mūjare. Jūmenijicu ūbi caivū pōevare meadaimara marajiyēpe ayū. Que baru ūbebi ū cūinācu ūi coateiyede ūre jarūvarī toabo cūiméboi.

¹⁰Yópe nāvaipōecui daiyere ñamine, pōeva ne majibede, nopedeca ðacuyūme Jesucristo, pōeva ūre ne corebede. Dinūmū maquinóre yo cavarō

cūiquíyebu ūrarō jidojarō bujinoque. Aru caiye iye ijāravūi cue báque me éni cūiquíyebu toaque pū ne bījarī cūiyeta. Aru maje curijoborō máre, caiye ijāravūque máre, Jūmenijicui cuedaiye báque, pōeva ne ðaiye báque máre, me éni cūiquíyebu.

¹¹Que teni caiye bījarī cūiquíyebu. Que baru me curjarā mūja meara teni Jūmenijicui jāinoi ūre memecaivū. ¹²Napini corejarā maje jabocu Jesucristoi copaidaquiyede. Aru ðajarā mūja caiye iye jauéde mūjare cāreja ūi ðaquiyē jipocare. Que teni ðaicōjenajivūbu mūja ūre maumena. Dijāravū ūi copaidaquijāravū baquinóre, yo cavarō me éni cūiquíyebu toaque pū bījarī cūiyeta. Aru caiye iye ijāravūi cue báquede toaijiquiyebu toaque pū ēnuricoro teni cūiyeta. ¹³Ūbenita cuquiyebu cavarō mamaro aru joborō mamaro máre. Jūmenijicu aibi majare, “Apejāravū mamajāravū meajāravū baquinó cuquiyebu jāve”. Aru caivū dinūmū maquinóicavū meara curājarama cainūmū Jūmenijicui jāinoi.

¹⁴Mūja, ji ūmara, mūje napini coreiyedeca diede ðajarā caiyede mūje oainope, maje jabocui eaquiyere aivū mūjare āmeno cubevūre. Quénora eajacurī mūjare pūeno baju mearare aru me curivūre cārijimevūva.

¹⁵⁻¹⁶Coreóvajarā iyede: Maje jabocu Jesucristo napini coreibi pōevare, ne meadārājiyere ayū. Quédeca caiyoca ūi paperayocaque toivaicōjequemavū diede majecu, maje ūmū, Pablo. Apeyoca ūi paperayocare apevu pōeva jāpiarīduyama. Ina majibevū aru ina ju aivū Jesucristore parūbevūva cāreja coyūrīduyama aipe aiyūrōre iye ūi toivaicōjeiye báquede aru ape toivaiye báquede máre, Jūmenijicui toivaicōjeiye báquede ūi yāvaiyede. Ūbenita ūbenina coyuyama na. Que baru ne baju coatedama Jūmenijicure jarūvarī.

¹⁷Mūja, ji ūmara, javede majivū mūja diede. Que baru me jājara ina pōeva Jūmenijicure ju abevūre, ne jūjovabenajiyere aivū mūjare ne

bueiye jāve āmeque, mʉje vainí turí
 bʉjabenajiyepɛ aivʉ mʉje ju aiyede
 jarʉvarí. ¹⁸Quénora pʉeno baju nʉjara
 mʉja, Jʉmenijicʉi mearo ɔacaimara
 bojecʉbeda ũi me boje. Aru pʉeno baju

coreóvajarā maje jabocʉ Jesucristore,
 majare meadaipōecʉre. Mearore
 jʉnajarevʉ ũreca caride aru cainʉmʉa,
 jʉɔovarajivʉ ũre meacʉ bajure.
 Quédecabu. Quénoramu.

1 San Juan

Mamabuinore coyuiyebu Juan mácu ùi toivacaiye báquede iyoca mamayoca ùi paperayocare. Juan mácu barejaquémavu judíovacacu, Galilea ámicurijoborócacu, aru Jesús ùi yávaiye méne beorí coyucójeimaracacu. Ùi mamicu Santiago bácuque moa boaipóescu bácu barejaquémavu, Jesúí órejaquiye jípcare ùi mácu. Lucas bácu coyurejaquemavu Juan mácuí borore Hch 3:1-4:22. Majidivú ne dápiayeye, toivacarejaquemavu diyocare ùi mácu cücü bácu Éfeso ámicuríimari, ne coreóvayeye boje ùi mácu Éfesocavu Jesúre ju aipóevare coreipóescu bácu. Apevu ne dápiayeye, toivacarejaquemavu Partia ámicurijoborócavu bácvure. Póescu cubebi majicu ye ujú ùi toivacaiju bácaróre diyocare, ùbenita obedivú ne dápiayeye ániujua báquede 87-90 d.C. baji, ùi toivaquiye jípcare ùi coyuiyede Jesucristorá aru Jesucristoi jádovaiye báquede ùi mácu.

Bueipóeva borocurivú bácvu “Jesús ámemi Jūmenijicúí mácu” arí, buenidurejaquemavu Juan mácuí toivacaimara mácvure. Que baru ùi mácu toivacarejaquemavu na mácvure, Jesúre ju aipóevare, ne majinajiyeye ayu jáveneca Jesúre Jūmenijicúí mácu, aru ne torojuráiyeye ayu ne ju aiyequé úre, aru ne majinajiyeye ayu caivú úre ju aivure jáveneca meadaimara mácvu aru járavú cūiméjáravu baquinóre cuvavure úque (1:1-4, 2:18-3:3, 4:1-6, 5:1-15). Na mácvure buedejaquemavu diyocaque caiye pueno jauróre ne uede Jūmenijicure aru Jesúre ju aivure máre (2:9-17, 3:11-24, 4:7-21), aru aipe ðaiye jauróre Jesúre ju aipóevare ne ámeina teniburu yóbore (1:5-2:8, 3:4-10, 5:16-21).

Nai Jūmenijicúí dápiainore coyucudayú

(Jn 1.1, 4, 14, 18, 6.68; 1 Jn 2.13-14)

1 ¹Toivacavú mujare Jesucristorá. Ñai cücü bácu caiyede ùi cuedaquiye jípcamia, aru caride máre ùi cubi. Ùvavari apure ðayube póevare apué mamaeque. Majide ðayube apué jávene. Que baru ùi majare Jūmenijicúí dápiainore coyucudayube. Ùi cuede ijáravú, ñjavavari jápiarejacadá ùi coyuiyede aru járejacadá úre. Aru úre jáve jári coreóvari jēnejacadá ñuja. ²Ñai apure ðayú póevare apué mamaeque cūetedejame ijáravú. Aru ñuja járejacadá úre. Que baru coyuvubu ñuje jári majié boje. Coyuvubu mujare ùi borore, ñai apucure cainuma. Ùi curejaquemavu majepacu Jūmenijicúque cavaró mearoi. Ùbenita darejaquemavu nore jocarí pu ijáravú, cūetecuyú yui. ³Ùrivubu ñuja muje yóvaráiyeye aivú ñujaque cūinávure cūináturu maje úmei,

majepacu Jūmenijicúque aru mamacu Jesucristoque máre. Que baru ñuja coyuvubu mujare ñuje jáiye báquede úre, aru ùi bueiye báquede máre. ⁴Que baru toivacavú yu mujare iye coyuiyede, maje mearo torojuráiyeye aivú maje úmei.

Jūmenijicú ámeina ðaiyue cubecu

⁵Iye yávaiyede Jesucristo coyurejame ñujare. Aru caride ñuja coyuvubu iye yávaiyede mujare máre. Jūmenijicú miadórope páyube. Que baru meacube ù. Jūmenijicure ñeminijino cubevú. Que baru ámeno cubecube ù. Miadóroque póeva jáivubu aipe árojarore ijárvure. Nopedeca Jūmenijicú jádovaiyubi póevare ne majinajiyeye ayu ù meacure. ⁶Maja ámenore ðaivuvavari, “Majepacu Jūmenijicúque yóvaivubu maja cūinávure cūináturu maje úmei” aivú baru, ðabevuvavari mearore, borocurivubu maja. Ùbenita jáve ñeminoi curivupe ðaivubu maja ámenore. ⁷Ùbenita maja ðaivú baru

mearore Jūmenijicupe, aru yópe miadároi curivupe baru, jáve maja curājaramu cūinávupe cūináturu maje ūmei. Aru Jūmenijicui mácu Jesús bojedarejame maje yóvayede Jūmenijicuque ūi jiveque, ūi yaicáiyē báquede majare maje ámeina teiye boje. Que baru Jūmenijicu árumeteibi maje ámeina teiyede, Jesúi đacaiye báque boje majare.

⁸Maja aivū baru “Ámeno cubevu majare”, jujovaiuvu maje bajuma. Que aru, maje aiyē jáve ámevu aru Jūmenijicui jáve coyuiye cubevu majare. ⁹Ūbenita maje coyuru Jūmenijicure aipe maje ámeina teiyede, Jūmenijicucapūravu árumeteni jaruvacuyume diede. Nópe đacuyume ūi đaiye boje cainumua yópe “Đacacuyumu yu mujare”, ūi aiyē báquepe, ūi đaiye boje mearore quéda. ¹⁰“Ámenore đabevu maja” aivū baru, Jūmenijicure borocucupe dápaiuvu maja aru jáve ju abevu maja ūi yávaiyede.

Cristo majare me coyucayu

(Jn 14.15, 21, 23; Ro 6.11-14; 1 Jn 4.10)

2 ¹Muja, jímajinape paivū, toivacaivū mujare diede, muje đabenajiyēpe ayū ámenore. Ūbenita ácu pōecu ámenore đarīburu yóbore, apecu cubi majare coyurī cadateni coyucacuyū me majeracu Jūmenijicuque maje borore. Aru ñai majare cadatecuyū, úrecabe Jesucristo, ñai meacu baju Jūmenijicui jáinore. ²Aru ñai Jesucristovacari yaidéjame majare boje. Ūi yaiye boje, Jūmenijicu árumeteibi maje ámeina teiyede. Que baru maje meateimūme ū majeracu Jūmenijicuque, maja aru caivū ijāravucavū máre.

³Maja đaivu baru yópe Jūmenijicui đaicōjeiyēpe buođadvū maja coreóvaivū Jūmenijicure. ⁴Ūbenita ñai pōecu “Yu coreóvaivū Jūmenijicure” ayū baru, đabecuvacari yópe Jūmenijicui đaicōjeiyēpe, borocucube ū. Que teni Jūmenijicui jáve coyuiye cubevu úre. ⁵Ūbenita ñai đayū yópe Jūmenijicui đaicōjeiyēpe, úrecabe jáve coreóvayū me

aipe đarī uscū Jūmenijicure. Que teivū maja coreóvaivūbu curivū Jūmenijicuque cūinávupe, cūináturu maje ūmei. ⁶Aru ácu pōecu “Yu yóvaivū Jūmenijicure cūinávupe” ūi aru, úre cue javū yópe Jesucristovacari ūi cue báquepedeca.

Đaicōjeino mamaro

(Jn 13.34, 15.12; Ro 13.12-14; Stg 1.27)

⁷Muja, jívu, ji umara, yo đaicōjeino, ji toivacaino mujare caride, đaicōjeino mamaro ámevu. Quéhora cūináturūbu no đaicōjeino yo muje ju aino mácarō mamarumure ju aivu Jesúre. Que baru javede muja jápiarejaquemavu yo đaicōjeino javecarōre. ⁸Ūbenita yo ji toivacaino mujare đaicōjeino mamarotamu máre. Aru yo mamaro jávemu. Cristo ūi đaiye jáđovaivū nore jáve, aru muje đaiye máre. Pōeva ne Jūmenijicui yávaiye méne majibede, ñeminoi curivupe paivūbu. Aru ne majiéde diede, miadároi curivupe paivūbu. Que baru Cristo daiyede yópe miadáre đaiyēpe ijāravūi yo ñemino mácarō bíjare nuivu caride. ⁹Ñai pōecu “Cuvū yu miadároi, đayū mearore yópe Jūmenijicui cōjeiyēpe” ayūvacari ūbecu baru ū jicure, ñeminoi cubi ū cāreja. Que baru đabebi ū mearore. ¹⁰Ñai uscū ū jicure cubi ū yópe miadároi cucupe. Que baru đaiibi mearore. Aru ye ámei vainí turī đare đabecube apecure ámenore. ¹¹Ūbenita ñai ūbecu ū jicure cubi ū yópe ñeminoi cucupe. Que baru đaiibi ámenore. Que teni ye coreóvabebi aipe đaiye jaurōre úre. Ūi ámeno đaiye boje, buojabebi dápaiyū coreóvayupe. Que baru ūi dápaiino ñeminomu yópe pōecu jári eabecu ñeminoi coreóvabēpe ári ūi nuinore.

¹²Muja, jímajinape paivū, yu toivacaivū mujare Cristo ūi yaicáiyē báque boje mujare, bojedacuyū muje ámeina teiyede. Que baru Jūmenijicu árumeteibi muje ámeina teiyede. ¹³Aru muja, jíbcuvare paivū, yu toivacaivū mujare muje coreóvaiye boje ñai cucupe caiyede ūi cuedaquiye jipocamia. Aru muja, vojūvū, yu toivacaivū mujare máre muje vainí tuiye boje ñai abujuvai jabocure.

Aru m̄ja, j́m̄ajinape paiv̄u, yu toivacaiv̄u m̄jare m̄je coreóv̄aiye boje majepacu J́menijicure. ¹⁴ Aru m̄ja, j́buc̄vape paiv̄u, yu toivacaiv̄u m̄jare m̄je coreóv̄aiye boje ñai c̄cure caiyede ñi cuedaquiye jipocamia. Aru m̄ja, boj̄v̄u, yu toivacaiv̄u m̄jare máre m̄je c̄vae boje J́menijicui yávaei méne m̄je ūmei, aru m̄je ju aiyē boje diede par̄r̄oque, aru m̄je vainí tuiye boje ñai abujuvai jabocure.

¹⁵ Ūbejarā m̄ja iyede, ij̄arav̄ucav̄u J́menijicure ju abev̄u ne uede. Aru ūbejarā yo ij̄arav̄ucarō cūiquinore máre. Ñai ūc̄u baru ij̄arav̄ure aru ij̄arav̄uquede máre, ñai b̄ojabebi ūc̄u majepacu J́menijicure. ¹⁶ Que baru ina ij̄arav̄ucav̄u ne dápiaino, ne ur̄o, aru ne c̄varō máre J́menijicui jino ānev̄u. Quénora ij̄arav̄ucav̄uacari jinomu no. Aru ñai abujuvai jabocu jinomu no. Ðaiȳuriv̄u yópe ne āmeina Ðaiȳere. Aru c̄vaiȳuriv̄u caiye iye āmene ne jáiyede. Aru, “¿Meara márica caiv̄u arev̄u p̄eno?” arí cuiȳuriv̄u. ¹⁷ Ūbenita ij̄arav̄ucav̄u bíjare nuiv̄u ne āmeina Ðaiȳere. Quénora ñai Ðaȳu yópe J́menijicui ūr̄ope c̄vac̄ȳume j̄arav̄u cūiméj̄arav̄u baquinóre.

Jāve aiyē aru boroc̄e
(1 Co 2.10-16)

¹⁸ M̄ja, j́m̄ajinape paiv̄u, joabenomu ij̄arav̄u cūiquino. Javede jápiadav̄u m̄ja cūinác̄u dac̄ȳure, ñai Cristoi mauc̄u bac̄ȳare. Aru caride obediv̄u mauc̄variv̄u Cristore. Que baru coreóv̄aiv̄u maja joabenore ij̄arav̄u cūiquinore. ¹⁹ Ina Cristore mauc̄variv̄u maje j̄eneboi c̄teima. Ūbenita majev̄u āmema. Que baru etadama na majare jocarí. Majev̄u baru, c̄jebu na majaque. Ūbenita ne etaiye báque boje majare jocarí, majidiv̄u maja majev̄u ānev̄ure.

²⁰ M̄jareca Cristo daroibi Esp̄ritu Santore. Que teni ñai Esp̄ritu Santo majide Ðaibi m̄jare yávaeide jāvene aru jāve āmene máre. Que baru caiv̄u majidiv̄utamu m̄ja. ²¹ Yu toivacabev̄u

m̄jare m̄je majibe boje iye yávaeide jāvene. Quénora yu toivacaiv̄u m̄jare m̄je majié boje diede, aru m̄je majié boje iye boroc̄bede, iye jāve coȳuiye.

²² Ácu p̄oc̄e “Jesús J́menijicui mácu Cristo āmemei” ayu baru, ūrecabe boroc̄c̄u. Ñai nópe ayu mauc̄vaibi Cristore. Que teni ju abebi J́menijicure aru Cristore máre. ²³ Ácu p̄oc̄e “Jesús J́menijicui mácu Cristo āmemei” ayu baru, yóvabec̄be majepacu J́menijicure. Ūbenita ñai “Jesús J́menijicui mácu Cristobe” ayu baru, ūrecabe yóvaȳu majepacu J́menijicure máre.

²⁴ Que baru ār̄ujara iye J́menijicui yávaei méne m̄je jápaiye báquede m̄je ju aiyē báquede Jesúre mamarum̄re. Me dápiarā iye yávaeide jāvene m̄je ūmei. M̄ja me dápiav̄u baru iye m̄je jápaiye báquede, m̄jacap̄urav̄u yóvar̄ajaramu J́menijicui mácu Jesucristore, aru J́menijicure máre cūináv̄upe, cūináturu m̄je ūmei. ²⁵ Aru yorecabu Jesús “Yu c̄vare Ðac̄ȳumu m̄jare j̄arav̄u cūiméj̄arav̄u baquinóre”, ñi aino mácarō.

²⁶ Yu toivacaiv̄u m̄jare m̄je majinajiyēpe ayu arev̄u ne borore, ina m̄jare juovaiȳuriv̄ure. ²⁷ Ūbenita m̄jacap̄urav̄u javede jacor̄quemav̄u ñai Esp̄ritu Santore, c̄cure m̄jaque, Jesucristo ñi daroim̄u mácure m̄jare. Aru ñai Esp̄ritu Santo bueibi m̄jare caiyede. Aru ñi bueiye m̄jare jāvetamu. Boroc̄betamu die. Que baru apec̄u jaubebi m̄jare majicac̄ȳu iye yávaeide jāvene. Que baru yóvar̄arā m̄ja Jesucristore cūináv̄upe cain̄m̄a, cūináturu m̄je ūmei.

²⁸ Aru m̄ja, j́m̄ajinape paiv̄u, quédata yóvar̄arā m̄ja Jesucristore cūináv̄upe, cūináturu m̄je ūmei caride aru p̄u ñi copaidaquij̄arav̄uita, maja númuri aiv̄u ñi jipocai jid̄bev̄u aru c̄yojarō máre c̄beda. ²⁹ Coreóv̄aiv̄u m̄ja Jesucristore meacu bajure J́menijicui jáinore. Que baru coreóv̄aiye jāv̄u m̄jare iyede máre: Caiv̄u Ðaiv̄u mearore, nárecabu J́menijicui mára.

Jūmenijicui mára

(Jn 1.12, 29; He 2.14-15)

3 ¹“Jímaratamu mŷja”, aibi majepacu Jūmenijicu majare. Que baru coreóvaivubu maja aipe Jūmenijicu urarō ucure majare. Aru jāve ūi mǎratamu maja. Ūbenita apevu pōeva ijārvacavu coreóvabema majare. Jūmenijicure aru Jesucristore máre coreóvabema na. Que baru majare máre coreóvabema na.

²Mŷja, jívu, jí ūmara, caride Jūmenijicui mǎratamu maja. Ūbenita coreóvabevu maja cǎreja aipe ārojarajivu bǎrǎjivure yóbore. Quédata coreóvaivubu maja Jesucristoi daquiyede ūpe tenajivu, maje jári majinajije boje ūre aipe ārojacure.

³Aru caivu maja napini coreívubu Jūmenijicui oatvaquiyede majare maje Cristope barǎjijyéde, ċare numemuri āmeina teiyede. Qué Nora mearore ċaiyurivubu yópe Cristovacari mearore ċaiyepe cainumma, ūi me boje.

⁴Caivu ina āmeina teivu ju abema Jūmenijicui ċaicōjeiye báquede. Que teni maucvadamama Jūmenijicure. Que baru āmeina teiye cūináturubu ju abepedeca Jūmenijicui ċaicōjeiye báquede. ⁵Jesucristo cūetedejame ijārvai jaruvacvu āmeina teiyede. Aru ūcapūravu meacu bajube. Que baru ye āmeina teiye cubevu ūre.

Javede coreóvaivubu mŷja diede. ⁶Que baru caivu maja yóvaivu Jesucristore cūinávpe, cūináturu maje ūmei, āmeina tévabevu. Ūbenita caivu ina āmeina tévaivu ye jápiarí eabema Jesucristore aru coreóvabema ūre.

⁷Mŷja, jímajinape paivu, jápiabejará ina jujovaiyurivure mujare. Ūnai ċayu mearore cainumma ċaibi mearore yópe Jesucristovacari ūi ċaiyepe mearore cainumma. ⁸Ūbenita ūnai ċayu āmeina teiyede, ūnai abujuvai jabocu jícube. Mamarumure ūnai abujuvai jabocu maucvarejaquemavu Jūmenijicure. Que teni mamarumure aru pu caride máre, cainumma āmeina teiyede ċaibi ū. Que barureca darejame Jūmenijicui mácu, jaruvacvu ūnai abujuvai jabocui

ċaiyede. ⁹Caivu maja Jūmenijicui mára Jūmenijicui apure ċaiyede mamaene cuvavu maja. Que baru cūinácu cubebi Jūmenijicui mǎracacu cōmajije ċayu āmeina teiyede cainumma. Aru āmeina tévavu buojabebi ū. ¹⁰Ácu pōecu mearore ċaiyubecu baru, Jūmenijicu jícu āmemi ū. Aru ácu pōecu ū jícu máre ubecu baru, Jūmenijicu jícu āmemi ū. Que baru coreóvaivubu maja ūamene Jūmenijicui mǎrare aru ūamene abujuvai jabocui mǎrare máre.

Ūrǎjarevu maja majevure

(Jn 5.24, 13.34, 15.12-13)

¹¹Jápiavubu mŷja iye yávaiyede muj ju aiye báquede Jesúsre mamarumure aru caride máre. Ūe javvu majare majevure. ¹²ċaiye javbevū majare yópe Caín mácu ūi ċaiye báquepe. Ū mácu ūnai abujuvai jabocu jícu barejaquemavu, aru boarí jaruvarejaquemavu ímacu bǎcure. ċAipe teni boarí jaruvarejaquemari ū mácure? Caín mácu ċare nurejaquemavu āmenore Jūmenijicui jáinore. Ūbenita ímacu bácu ċare nurejaquemavu mearore Jūmenijicui jáinore. Que baru Caín mácu boarí jaruvarejaquemavu ímacu bǎcure ūi baju jorojínina.

¹³Mŷja, jívu, cūcumamejara mŷja ina ijārvacavure Jūmenijicure ubevu ne ubede mujare máre.

¹⁴Jipocamia maja yaivu bǎcavupe paivvacari, apurivupe barejávū. Ūbenita caride apué mamaene cvarivubu maja. Aru coreóvaivubu maja apurivure jāve caride, maje ūe boje majevure. Ūbenita ūnai ubecu ū jícu apucvacari caride, jāve yaivú bǎcure páyube ū. ¹⁵Ácu pōecu ubecu ū jícu, boaipōecure páyube ū. Aru coreóvaivubu mŷja boaipōecu cubecure apué mamaeque. Que baru cuvabecube ū jǎravu cūiméjǎrvu baquinóre.

¹⁶Jesucristo jáđovarejame majare aipe ċarí maje urǎjínore majecure, yaicávu majare boje. Quédecá ċaiye javvu majare máre, jívu maje bajure yaicáivu majevure boje. ¹⁷Ácu pōecu cūve cuvacu baru aru jáñu maru ū jícu cūve cuvabecure ūre javéde, ūbenita yéde

jíbecu ñai cõmaje ãrojacure cadatebebi úre. Jáve “Yũ uvu Jũmenijicure ji úmeque”, arí buojabebi ù. Quénora ñai cõmaje ãroje jámecu ubebi Jũmenijicure jáve. ¹⁸Muja, jímajinape paivu, quéda “Úvu yu jícare” abenajarevu. Quénora jádovarajarevu urivu majevure maje ðaiyeque. Que baru cadatenajarevu náre.

Jidubevva Jũmenijicui jáinore
(Jn 13.34, 15.12, 17)

¹⁹Maja urivu baru majevure jáve, coreóvaivubu maja ðaivure yópe Jũmenijicui yávaiye jávepe. Que teni cãrijimevva maje úmei jidubevu maja Jũmenijicui jáinore. ²⁰Úbenita maja jidurivu baru maje dápiaye bojedabevu yópe Jũmenijicui yávaiye jávepe, cãrijiyi jaubevu majare. Que baru maja ñájine ðabenajaramu maje bajure maje dápiaye boje. Quénora Jũmenijicu ñájine ðacuyume majare ùi majié boje caiyede. ²¹Muja, jívu, ji umara, maja jidubevu baru maje dápiayeque, ména curivubu maja Jũmenijicui jáinore, jëniarajivu úre maje uede. ²²Aru Jũmenijicu ðacacuyume majare caiyede yópe maje jëniayepere úre, maje ju aye boje ùi ðaicõjeiye báquede aru maje ðaiye boje yópe ùi urõpe. ²³Jũmenijicu ðaicõjeimi majare, maje ju arãjiyepere ayu mamacu Jesucristore, aru maje urãjiyepere ayu majevure, yópe Jesúi ðaicõjeiyepe. ²⁴Caivu maja ju aivu Jũmenijicui ðaicõjeiye báquede yóvaivubu Jũmenijicure cüinávure, cüináturu maje úmei. Coreóvaivubu maja Jũmenijicui cuede majaque, maje cuvae boje ñai Espiritu Santore, Jũmenijicui daroimu mácure majare.

Jũmenijicui Espiritu Santo aru ñai Cristore maucuvacu
(Mt 7.15; Jn 8.47, 15.19; 2 Jn 7)

4 ¹Muja, jívu, ji umara, ju abejarã muja caivu ina “Jũmenijicui Espiritu coyucõjeimi yure” aivure. Úbenita cainumua cüinácü põecu “Que aibi Jũmenijicu” ùi arí coyuru, jári coreóvajarã muja ùi coyuyede, majinajivu jáve Jũmenijicui Espiritu

dápiacõjeñure úre. Que ðajarã muja, obedivu Jũmenijicui yávaiyede coyucõpõevape teniduvu ne ðaiye boje. Coyure cuivubu “Jũmenijicui yávaiyede coyucõpõecubu yu” aríduivu. Úbenita borocurivubu na. ²Coyucõjivuvu mujare aipe ðarí coreóvarí buojarãjivure cüinácü põecu dápiayure yópe Jũmenijicui Espiritu ùi cõjeiyepe. Caivu ina aivu “Jesucristo, Jũmenijicui mácu, jáve ðaibi põecupe ijãravui”, dápiavubu na yópe Jũmenijicui Espiritu ùi dápiacõjeiyepe. ³Úbenita ñai jáve dápiabecu yópe Jũmenijicui Espiritu ùi dápiacõjeiyepe, dápiaibi yópe Cristoi maucu ùi dápiayepere. Javede jápiadavũ muja ñai Cristoi maucu dacuyure. Aru caride curivubu ijãravui ina Jũmenijicui yávaiyede coyucõpõevape teniduvu, úbenita borocurí. Yópe Cristoi maucu ùi dápiayepere dápiavubu. Que baru borocueque coyuvubu na.

⁴Muja, jímajinape paivu, mujacuruvu Jũmenijicu jinatamu. Que baru Jũmenijicui Espiritu Santo dápiacõjeimi mujare. Ijãravucavu Jesúre ju abevu ñai abujuvai jabocu jinatamu. Aru ñai abujuvai jabocu dápiacõjeimi náre. Úbenita parucube ñai dápiacõjeñu mujare, ñai náre dápiacõjeñu pueno. Que baru muja vainí tuivubu ina Jũmenijicui yávaiyede coyucõpõevape teniduvu borocurivure. ⁵Nácacuruvu ijãravucavu Jesúre ju abevu névutamu. Que baru cainumua coyuvubu na ijãravuquede. Aru ina jápiaivu náre máre ijãravucavu Jesúre ju abevutamu na. ⁶Úbenita majacuruvu Jũmenijicu jinatamu. Ñai coreóvayv Jũmenijicure torojucu jápiaibi maje bueiyede. Úbenita ñai coreóvabecu Jũmenijicure jápiaibebi maje bueiyede. Que ðarí coreóvaivubu maja ñamene coyuyure yávaiyede jávene aru ñamene yávaiye borocuede.

Jũmenijicu ubi põevare
(Mt 5.44-45; Mr 12.29-31; Jn 1.18, 3.16-17; Ro 8.9; 1 Jn 3.24)

⁷Muja, jívu, ji umara, Jũmenijicu ure ðaibi majare majevure. Que baru ue

jaunu majare majevure. Caivu urivu arevure Jūmenijicui maramu maja. Aru coreóvaivubu maja Jūmenijicure máre. ⁸Jūmenijicu ubi caivu pōevare. Que baru ñai ubecu ũ jivure, Jūmenijicure coreóvabebi ũ. ⁹Jūmenijicu jáđovarejaquemavu ũi urōre majare daroyu bācu mamacure cūinācura yui ijāravui, maje cūvarājiyepe ayu jāravu cūimējāravu baquinóre, mamacui yaiye báque boje majare. ¹⁰Maja buojari urivubu Jūmenijicure quíjinora. Ūbenita Jūmenijicu buojari ubi majare pñeno urarō baju. Yópebu Jūmenijicui ue jāve: Jūmenijicu darorejaquemavu mamacure ijāravui, jícuu ũre ũi yaicáquiyepe ayu majare boje, Jūmenijicui ārumetequiyepe ayu maje āmeina teiyede.

¹¹Maja, jívu, jí ũmara, nópe urarō baju ubi Jūmenijicu majare. Que baru nopedeca ue jaunu majare máre maje baju. ¹²Ácu pōecu Jūmenijicure jáñu mácu cubebi ũ. Ūbenita maje uru majevure, Jūmenijicu yóvaibi majare cūinávure, cūináturu maje ũmei. Que teni coreóvaivubu me aipe đarí buojari urivu Jūmenijicure jāve. ¹³Jūmenijicu darorejaquemavu ñai Espiritu Santore, ũi cuquiyepe ayu majaque, maje majinajiyeye ayu jāve Jūmenijicui yóvaiyede majare aru maje cūvaede ũre máre cūinávure, cūináturu maje ũmei. ¹⁴Aru ñujavacari jářejacará Jūmenijicui mácure. Que baru coyivubu majepacu Jūmenijicui daroie báquede mamacure ijāravui. Pōevare coyivubu majepacu daroie báquede mamacure, ũi meadaquiyepe ayu ijāravucavure abujuvai jabocui paruéde jaruvári. ¹⁵Ácu pōecu “Jesucristo Jūmenijicui mácube” ayu, ũ jāve yóvaibi Jūmenijicure aru Jūmenijicu máre yóvaibi ũre cūinávure, cūináturu ne ũmei.

¹⁶Que baru maja coreóvaivubu Jūmenijicu ucure majare. Aru ju aivubu maja diede jāve. Jūmenijicu ubi caivu pōevare. Ñai ucu Jūmenijicure aru arevure máre cainmua, ũrecabe yóvaYu Jūmenijicure aru Jūmenijicu

máre yóvaibi ũre cūinávure, cūináturu ne ũmei. ¹⁷Coreóvaie jaunu majare aipe đarí maje urōre Jūmenijicure jāve, jidubenajivu ũi ñájiovaquijāravu baquinóre āmeina teivure. Jesucristoi pacu Jūmenijicube. Aru maja máre, ijāravu cūrivui pacube ũ. ¹⁸Ñai ucu Jūmenijicure jāve jidubecube ũre ũi ñájiovaquijāravu baquinóre. Ū majibi Jūmenijicu ñájine đabecuyure náre, ina urivure ũre jāve, ne āmeina teie boje. Que baru jidubecube ũ. Ūbenita ácu pōecu jiducu baru, buojabebi ucu Jūmenijicure jāve cāreja.

¹⁹Jūmenijicucapūravu urejaquemavu majare mamarumure. Que baru maja máre uvu Jūmenijicure caride. ²⁰Ñai “Jūmenijicure uvu yu” ayu baru, aru que ayuvacari ubecu baru ũ jicure, ñai pōecu borocubi ũ. Ñai ubecu baru ũ jicure, ũi jáimure, jāve buojabebi ucu Jūmenijicure, ũi jámemure. ²¹Que baru đaicōjeimaramu maja. Ñai ucu Jūmenijicure, ujacurí ũ jicure máre.

Maje vainí tuino ijāravucarō āmenore
(Mt 11.30; Jn 14.15; 2 Jn 6)

5 ¹Caivu “Jesúrecabe Jūmenijicui mácu Cristo” aivu, Jūmenijicui maramu maja. Cūinācu ucu baru apecui pacure, mamacure máre ubi ũ. ²Que baru maja urivu baru Jūmenijicure aru đaivu baru yópe ũi đaicōjeie báquepe, coreóvaivubu urivu Jūmenijicui mārare máre. ³Ñai ucu Jūmenijicure đayube caiyede yópe ũi đaicōjeie báquepe. Aru caiye iye Jūmenijicui đaicōjeie báque maiyójabevu ñai pōecure ũi đaiyede. ⁴Caivu ina Jūmenijicui mára vainí tuivubu caino no ijāravucarō āmenore. Jesucristo javede vainí turejaquemavu ijāravucarō āmenore. Que baru maje ju aie boje ũre maja máre vainí tuivubu nore. ⁵Ñai ju ayu Jesucristore, Jūmenijicui mácure, ũrecabe vainí tuyu ijāravucarō āmenore.

Jūmenijicui mácurā jāve coyūino
(Jn 3.36, 5.32-37, 8.18)

⁶Ñai Jesucristorecabe dayu bácu ijāravui. ũrecabe jáđovaimu mácu

Jūmenijicui mácu ocoque, Juan Bautista bácu ũi jáđovaiye báquede úre Jūmenijicūque ocoque. Ūbenita quéda ocoque jáđovaimū mácu Jūmenijicūque āmeme ũ. Quénora úrecabe jáđovaimū mácu Jūmenijicui mácu jiveque máre, ũi yaiye báquede jocusjaravena aru ũi nacajaiye báquede yainore jaruvarí. Nāi Espírítu Santovacari cainumua borocubecu ju aibi diede jāve. ⁷⁻⁸Maja coreóvaivubu Jesucristore Jūmenijicui mácure jāve bajure yóbecue jáđovaiye cue boje. Mamarumure nāi Espírítu Santo coreóvare đayube diede. Aru maja coreóvaivubu diede Jesús ũi jáđovaiye báque boje Jūmenijicūque ocoque. Aru coreóvaivubu diede máre, Jesús ũi jive meiyé báque boje ũi yaiyede. Caiye iyeque coreóvaivubu maja Jesucristore Jūmenijicui mácure jāve bajure. ⁹Pōeva “Jāvemū no” ne aiyede, maja ju aivubu náre. Ūbenita apenumua pōeva borocuma na. Ūbenita Jūmenijicucapūravu borocubecube cainumua. Que baru pūeno baju jāvu majare maje ju aiyé úre. Aru Jūmenijicuvacari “nāi jímacu”, arí coyūibi Jesucristorā. ¹⁰Nāi ju ayu Jūmenijicui mácu Jesúre, majibi ũi ũmei Jūmenijicui coyūiye báquede jāvene. Ūbenita nāi ju abecu Jūmenijicui mácu Jesúre, yópe borocucupe dápiaibi Jūmenijicure, ũi ju abe boje Jūmenijicui coyūiye báquede mamacurā. ¹¹Iye Jūmenijicui coyūiye báquebu ũi cūvare đaiye majare jāravu cūiméjāravu baquinóre. Aru Jūmenijicu cūvare đaibi majare diede maje ju aiyede mamacure. ¹²Nāi yóvayū Jūmenijicui mácure cūvabi jāravu cūiméjāravu baquinóre úque máre. Ūbenita nāi yóvabecu Jūmenijicui mácure cūvabebi jāravu cūiméjāravu baquinóre úque.

Toivarí buojarí majicaino

(Mt 7.7-11; Lc 11.9-13; Jn 15.7, 16, 16.23-24, 17.3, 20.31; 1 Jn 3.21-22)

¹³Caiye iyede yu toivacaiyu mujare, Jūmenijicui mácure ju aivure, mūje

majinaiyere ayu cūvarivure jāravu cūiméjāravu baquinóre úque.

¹⁴Coreóvaivubu maja maje jēniaiyede Jūmenijicūque yópe ũi ũrōpe járiayure majare. Que baru jēniaivubu úre jidubevuva. ¹⁵Aru yópe maje majiépedeca járiayure maje jēniaiyede, quédeca majivu maja maje jēniaiyede Jūmenijicūque jacorūivure diede.

¹⁶Cūinácu pōecu jāñu maru ũ jicure āmeina teyure aru majicu baru Jūmenijicu ārumeteni buojayure no āmeina đainore, jēniacaiye jāvu nāi pōecure ũ jicure boje, ũi cūvaquiyere ayu jāravu cūiméjāravu baquinóre. Aru Jūmenijicu ārumeteni majicu baru, cūvare đacūyume úre jāravu cūiméjāravu baquinóre úque. Ūbenita cūinácu pōecu āmeina đayū baru Jūmenijicui ārumeteni buojabede, nāi pōecu nājicūyume, coateyu Jūmenijicure jaruvarí. Yu coyūbevu mujare mūje jēniacaiyede Jūmenijicūque nāine. ¹⁷Caiye pōeva ne āmeina đaiye, diedecabu āmeina teiye. Ūbenita ape āmeina teiye coatede đabevu pōevare Jūmenijicure jaruvarí. Quénora Jūmenijicu ārumeteibi diede.

¹⁸Majidivubu maja caiyu ina Jūmenijicui mārare đare numevure āmeina teiyede caride. Jūmenijicui mácu coreibi náre, abujuvai jacobu ũi ĩmequiyere ayu náre. Que baru āmeina đare numema na. ¹⁹Coreóvaivubu maja Jūmenijicui mārare. Ūbenita caiyu apēvu ijāravacavu cūma abujuvai jacobu đaicōjeimara. ²⁰Aru majidivubu maja Jūmenijicui mácure đayū bācure ijāravui, ũi coreóvare đaquiyere aivū majare nāi Jūmenijicure jāve. Maja curivubu úque, Jūmenijicu jāveque. Aru curivubu maja Jūmenijicui mácu Jesucristoque máre. Jesucristo Jūmenijicutame. Aru cūvare đaibi majare jāravu cūiméjāravu baquinóre úque. ²¹Mūja, jímajinape paivū, jíbejarā mūja mearore pēpeimarare. Quénoramū.

2 San Juan

Mamabuinore coyuiyebu Juan mácu ñi toivacaiye báquede iyoca mamayoca yóbocayoca ñi paperayocare. Juan mácu barejaquemavu judíovacacu, Galilea ámicurijoborócacu, aru Jesús ñi yávaiye méne beorí coyucójeimaracacu. Ñi mamicu Santiago bácuque moa boairóecu bácu barejaquemavu, Jesús órejaquiye jipocare ñi mácu. Lucas bácu coyurejaquemavu Juan mácu borore Hch 3:1-4:22. Majidivú ne dápiayepere, toivacarejaquemavu diyocare ñi mácu cücü bácu Éfeso ámicurímaroi, ne coreóvayie boje ñi mácu Éfesocavu Jesúre ju aipóevare coreipóecu bácu. Apevu ne dápiayepere, ico ju aipóeco báco aru ói mára mácavu, ñi toivacaimara mácavu, Partia ámicurijoborócacu barejaquemavu. Póecu cubebi majicu ye uju ñi toivacaiju bácaróre diyocare, ñbenita obedivú ne dápiayepere ániuju báquede 87-90 d.C. baji, ñi toivacaiye jipocare ñi coyuiyede Jesucristorá aru Jesucristoi jádovayie báquede ñi mácu, ñbenita ñi toivacaríburu yóbore ñi mamayoca paperayocare.

Toivacarejaquemavu Jesúre ju aipóevare, ne urájiyepere ayu Jümenijicure aru apevu Jesúre ju aipóevare máre, aru ne majinajiyepere ayu aipe ñaiye jauróre jujovaiñuque, ina Jesúre ju aivupe tenidivñuque.

Bueiye jáve aru jáve ñe máre

(Jn 13.34, 14.15, 23-24, 15.12, 17; 1 Jn 5.3; 3 Jn 3)

¹Yú, búccu, Jesucristore ju aivure coreipóecu, toivacaiñu mure, jíco, Jümenijicui beoimare aru mímarare máre. Meaicójeivú mujare. Yávacari jáve ñvu mujare, maje coreóvayie boje Jümenijicui yávaiyede jávene. Aru yu cüinácura ámevu ñcu mujare. Ñbenita caiñu ina coreóvaiñu Jümenijicui yávaiyede jávene, na máre urivúbu mujare. ²Ñuja urivúbu mujare, ñuje majié boje Jümenijicui yávaiyede jávene. Que baru caiñu maja curivúbu majidivú iye yávaiyede jávene caride. Aru cainñu cürájaramu maja dieque.

³Maje cuede ijárvai cürájaramu maja me, coreóvaiñu Jümenijicui yávaiyede jávene aru urivú mujavure. Majepacu Jümenijicu, mamacu Jesucristomaque, mearo ñacacuyume majare bojecubeda ñi me boje, ñi cómaje ároje jáiyede aru ñi cárijimene cure ñaiyede máre.

⁴Majivú yu apevu mímaracavure curivúre ju arí Jümenijicui yávaiyede

jávene yópe majepacu Jümenijicu ñi ñaicójeiyepere majare. Que baru pare torojvú yu ji úmei. ⁵Aru mu, jíco, ji mo, caride yu jéniaivú mure. Urájavé mujavure, caiñu maja Jesúre ju aivú. Yu toivacabevú mure apeno ñaicójeino mamarore. Quénora ji toivacaiye mure cüináturubu no ñaicójeino mácaró, maje ju aiyé báque Jesúre mamarñmure. ⁶Aru maja urivú baru Jümenijicure, ñarájivúbu caiyede yópe ñi ñaicójeiyepere. Ñaicójeimi ñi majare apevure urí curivúre. Múja jápiaivúbu no ñaicójeino mácaróre, múje ju aiyé báquede Jesúre mamarñmure. Aru caride máre ju aivúbu nopedeca.

Ina jujovaiñu póevare

(Mt 7.15; 1 Jn 2.18, 22-23, 4.1-3, 15)

⁷Obedivú jujovaiñu cuivúbu yore ijárvai. Nárecabu ju abevú Jesucristore jáve dayu bácu póecu ijárvai. Ácu póecu que ayu baru, úrecabe jujovayú póevare aru maucñvacu Cristore máre. ⁸Me jájara múja, múje bíjabenajiyepere aivú yo bojedaino jauróre mujare, múje memecaiye boje. Quénora me ñajará

m̄ja, c̄varājiv̄ caino no bojedaino
jaur̄ore m̄jare.

⁹Aru ácu p̄oc̄u buebec̄u yópe
Jesucristo ñi bueiye báquepedeca
quénora bueȳu baru ape bueiyede
Jesúí bueiye báquede jar̄var̄í, úrecabe
yónabec̄u J̄menijic̄ure. Ëbenita ácu
p̄oc̄u bueȳu baru yópe Jesucristo ñi
bueiye báquepedeca, úrecabe yónaȳu
J̄menijic̄ure aru J̄menijic̄uí mácuere
máre. ¹⁰Ácu p̄oc̄u bues̄daȳu baru
m̄je yebai ape bueiyede Jesúí bueiye
báquede jar̄var̄í, ñaine cop̄u etabejar̄á
m̄je c̄ramiai aru jacoýbejar̄á úre.

¹¹Que teni úre jacoýiv̄u baru, j̄u aiv̄u
ñi bueiye boroc̄ede, yónaiv̄ubu úque
ámeina ðaiv̄u.

Meaic̄ojeino

(3 Jn 13-14)

¹²Apeno urar̄ó coȳinore coȳiȳuv̄u
m̄jare. Ëbenita yore toivaiȳubev̄u ȳu.
Quénora napini coreiv̄u ȳu j̄ác̄dac̄uȳu
m̄je yebai, yávac̄uȳu ji bajumiareca,
maje bujar̄ájiyere aȳu toroj̄ariv̄u maje
úmei. ¹³Mimamicoi mára, J̄menijic̄uí
beoimo mácoi mára, meaic̄ojeidama
m̄re. Quénoram̄u.

3 San Juan

Mamabuinore coyuiyebu Juan mácu ñi toivacaiye báquede iyoca ñi buojaiyoca paperayocare. Juan mácu barejaquémavu judíovacacu, Galilea ámicurijoborócacu, aru Jesús ñi yávaiye méne beorí coyucójeimaracacu. Ñi mamicu Santiago bácuque moa boaipóecu bácu barejaquémavu, Jesúí órejaquiye jipocare ñi mácure. Lucas bácu coyurejaquemavu Juan mácuí borore Hch 3:1-4:22. Majidivú ne dápiayepe, toivacarejaquemavu diyocare ñi mácu cucu bácu Éfeso ámicurímaroi, ne coreóvaiye boje ñi mácu Éfesocavu Jesúre ju aipóevare coreipóecu bácu. Apevu ne dápiayepe, ñai Gayo bácu, Jesúre ju aipóecu bácu, ñi toivacaimu mácu, Partia ámicurijoborócacu barejaquémavu. Póecu cubebi majicu ye ujú ñi toivacaijü bácaróre diyocare, ñbenita obedivu ne dápiayepe ániujua báquede 87-90 d.C. baji, ñi toivaquiye jipocare ñi coyuiyede Jesucristorá aru Jesucristoi jádovaiye báquede ñi mácure, ñbenita ñi toivacaríburu yóbore apanyoca pucayoca ñi paperayocare.

Toivacarejaquemavu “Torojvú yu mujaque”, coyucuy ñai Gayo bácu aru Demetrio bácu máre, ne ñaiye boje yópe jaurópe Jesúre ju aipóevare. Ñbenita coyurejaquemavu ñi ñbede ñai Diótréfes bácu ñaiyede.

Gayo mearore jímu

(Hch 19.29; Ro 16.23; 1 Co 1.14; 2 Jn 4)

¹Yú, bucucu, Jesucristore ju aivure coreipóecu, toivacaivu mure, ji yóvaimu, ji umu, Gayo. Yúvacari jáve uvu mure, maje coreóvaiye boje Jümenijicui yávaiyede jávene.

²Mu, ji yóvaimu, ji umu, yu Jümenijicucque jénicaivu mure, ñi cadatequiyepe ayu mure caiye mi ñaiyede, aru ñi me cure ñaiyepere ayu mi bajure duica ijiéde jaruvarí yópe mi úme cüepe me ámeina teiyede jaruvarí.

³Pare torojvú yu ji úmei apevu majevú Jesúre ju aipóeva ne coyuiyede, ne járiburu yóboi mure, aipe mi cüede Jümenijicui yávaiyede jávene ju ayu.

⁴Yúcapúravu püeno baju torojvú majicu muje borore jímajinape paivure, curivure ju arí Jümenijicui yávaiyede jávene, yópe ñi urópe. Ye apejé cubevú torojure ñaiye yure die püeno.

⁵Mu, ji yóvaimu, ji umu, cainumua mearo ñaivu mu yópe ñaiye jauépe mure mi cadatevaiyede majevure Jesúre ju aipóevare mi majibemara

mácvureca. ⁶Ina copaivu bácvu mure jocarí coyuyama mi borore yui Jesúre ju aipóeva ne jápiayede. Coyuyama aipe mi cadateiyede náre mi ue boje.

Aru ne copaiyede mi yebai, cadatejacu náre cojedeca náre jauéde. Que teni mu me buojare ñaiquijivú náre yópe Jümenijicui urópe, ne curánuiyede. ⁷Na etaima coyurájivú Jesús ñi yávaiye méne ina Jesúre ju abevure cáreja. Aru náque yéde jacopubeteimada apejéne.

⁸Que baru cadateiye jauvu majare máre ina Jesúre ju aivure ina coyuvure iye yávaiyede jávene, ne memecarájiyepere aivu Jümenijicure jáve.

Diótréfes ñi ámeno ñaino aru

Demetrio ñi mearo ñaino

(1 Jn 2.29, 3.6, 9-10)

⁹Apanyoca paperayocare toivacavu yu caivu Jesúre ju aipóevare mi yebai. Ñbenita Diótréfes, ñai caivure jaboteiyucu, jápaiyubebiya ji coyuiye báquede aru ju abebiya yure. ¹⁰Que baru ji ñaiyede mi yebai coreóvare ñaiquijivú yu caivure aipe ñi ñaiye báquede.

Borocucu ámeina yávaibiyá ñujare. Aru

pueno ameno daibiya. Évacari copu etabebiya majevure curānuivure. Pueno ameno dayu, náre copu etaicōjememiya ina curānuivure Jesúre ju airōevacavu copu etaiyurivure náre. Pueno ameno dayu, ina curānuivure copu etaiyurivureca ecoicōjememiya Jesúre ju airōeva ne cójjiñami jivui. Que daibiya ñai Diótfes.

¹¹ Mu, ji yóvaimu, ji umu, dabecacu mu náre, ameina daivure. Quéhora dajacu mu náre, ména daivure. Ñai pōecu ména dayu Jūmenijicu jicube ũ. Ubenita ñai pōecu ameina dayu coreóvabebi Jūmenijicure. ¹² Demetriocapūravu caivu ne me yóvaimume. Évacari cubi me ũi

majié boje Jūmenijicui yávaiyede jāvene. Ñuja máre coyuvubu ñuje jáiye báque boje aipe ũi mearo daiyede. Aru majivu mu ñuje yávaiyede jāvene.

Meaicōjeino

(2 Jn 12)

¹³ Apeno urarō coyūnure coyūyuvu mure. Ubenita yore toivaiyubevu yu.

¹⁴ Quéhora napini coreivu yu jácudacuyu mi yebai maumejiena, yávaburí maje baju ména. ¹⁵ Cārijimenoque cūjacu mu. Caivu mi yóvaimara yócvu meaicōjedama mure. Meajarari na, caivu ñuje yóvaimara coapa pócvu. Quénoramu.

San Judas

Mamabuinore coyuiyebu Judas bácu ùi toivacaiye báquede paperayocare Jesúre ju aipõevare (1-3). Ùbenita árocavù ùi toivacaimara mácvare aru ári ùi cuede ùi toivacaiyede diyocare máre caivù majibevù. Judas bácu judíovacacu barejaquémavù. Jesucristoi yócu barejaquémavù. Majidivù ne dápiayepe, toivacarejaquemavù diyocare ániujua báquede 66-90 d.C.

Toivacarejaquemavù Jesúre ju aipõeva, ne me járajipeye ayù, Jùmenijicure ju abevù ne jujovabenajipeye ayù náre ne bueiye jáve ámeque, ne vainí turí bíjabenajipeye ayù ne ju aiyede jaravari (4-16). Coyurejaquemavù náre aipe ðaiye javrõre Jesúre ju aipõevare (17-23). Aru ùi toivacari buojaiyede, jídejaquemavù mearore Jùmenijicure, majare meadayure Jesucristoi ðaiye báque boje (24-25).

Judas ùi meaicõjeino Jesúre ju aipõevare

(Mt 13.55; Mr 6.3)

¹Yúbu Judas, Santiagoi yócu, Jesucristore memecayù. Toivacaivù yù mujare, Jùmenijicui cutuimara mácvare. Majepacu Jùmenijicui jecumaramu muja. Aru Jesucristoi coreimaramu muja máre. ²Jùmenijicu pueno baju cõmaje ároje jájacurí mujare, me cure ðajacurí mujare carijimevùva, aru jecujacurí mujare.

Ina borocuede bueivare coyuiño

(He 11.4; 2 P 2.1-7; 1 Jn 3.12; Ap 2.14, 12.7)

³Muja, ji umara, yu toivacarídivù mujare iye ména maje cvaede caride, Jùmenijicui meadaye báque boje majare maje ámeina teiyede jaravari. Ùbenita javùvù yure ji jèniayepa paréque mujare, muje corenajipeye ayù iye yávaiye méne maje ju aiyede, Jùmenijicu cùinára ùi jíye báquede ùi põevare. Que baru apevù ne ámeina yávaru diede aru apevù ne oatuvaiyuru diede, parurõreca coyujarã muja iye yávaiyede jávene. ⁴Apevù jujovaiyù curivùbu maje jèneboi, yavenina ecoivù bácvù maje cójijíñamia jívù. Ina yópe

teivù ùbenina dápiare ðaiyuríduyama mujare. Ùbenita Jùmenijicure ju abevù, ámeno ðadama. Jùmenijicui mearo ðacaiyedeca ina põevare bojecubeda ùi me boje, urarõ ámenore ðaiyù, “Jùmenijicu árumetecuyame caiye iyede”, arí dápiaríduyama na. Aru ju abenama Jesucristore, majare upacure aru maje jabocure cùinácura. Que baru yópe arí, “Jesucristo jabocu cùinácura ámemi”, borocurí adama na. Javede Jùmenijicu toivaicõjenejaquemavù ùi yávaiyede, põeva nópe aivù ñájinajivure, ne ámeina teiye boje.

⁵Iye ji coyuiyede mujare caride jave majivù muja. Ùbenita árvure ðaiyuvù mujare Jùmenijicu ñájine ðayure ámeina teivure, ne ámeina teiye boje. Ina Israecavù bácvare, maje jabocu Jùmenijicu ùi etavaríburu yóboi meadacuyù na mácvare Egipto ámicuríjoborõre jocarí, bíjare ðarejaquemavù nácvù bácvù ju abevù bácvare úre. ⁶Aru ina ángelevare máre, ðabevure iye ne memeiye Jùmenijicui ðaicõjeiye báquede náre, Jùmenijicure ne ùbeni jaravariyuru yóboi aru ne curõ mearore jocarí etaríburu yóbore máre, Jùmenijicu buorí epedejaquemavù náre ñeminitucubui. Noi buoimara mautenajarama táumeaque cainumua pù

dijaravũ Jũmenijicũ ñájiovaquijãravũ baquinõita. ⁷ Aru quédeca ina Sodoma aru Gomorra ãmicurĩĩmaroacavũ bãcavũre, aru apenoa ĩmaroa joabenoacavũ bãcavũre mãre, Jũmenijicu ñájine ðarejaquemavũ na mãcavũre toabo cũimẽboque, ne urarõ ãmeno ðaiye bãque boje ne bajumia. Dajocarejaquemavũ na mãcavũ ne ðaiye bãquede ne baju yõpe Jũmenijicũ cuedãiye bãquepedeca põevare ñi urõpe, ne ðarãjiyepe ayũ urarõ cuyõjarõ ne ðaiye bãquede ne baju ñmũva matũivũ bãcavũ. Jũmenijicu êicõjenejaquemavũ na mãcavũre, apenvũ ne majĩnãjiyepe ayũ aipe vaiquĩyede põeva nõpe ãmeno ðaivũre.

⁸ Aru napedeca ina jujovãivũ, borocuede bueivũ, maje jẽneboi jujovãdamã ne baju. “Jãvemũ nõ” aru “Mearomũ yo”, arĩ dãpiarĩduyama na. ðbenita ãmeina ðãdamã ne bajumia. Ju abenama jabovare. Aru ãmeina yãvadama ina pũeno parurivũre mãre. ⁹ ðbenita Miguevacari, ñai ángelevai jabocũ, ñi jaraiye bãquede ñai abujuvai jabocure ne jĩjateiye bãquede ñi ĩye bãqueda Moisés bãcũ baju bãcarõre pueðayũ ãmeina yãvabedejaquemavũ ãre. “Nãjicuyũmũ mũ”, abedejaquemavũ, ñi pueðaiye boje ãre. Quẽnora “Jũmenijicu ñájine ðajacurĩ mũre”, arejaquemavũ Miguecapũravũ. ¹⁰ Ina jujovãivũ, borocuede bueivũ, ãmeina yãvadama iye ne coreóvabede. Aru iye ne coreóvãiyede coreóvabenama ne majiẽque yõpe põeva dãpiãivũre. Quẽnora coreóvãdamã diede ne dãpiãiyequẽ jĩcua yõpe ãimara dãpiãbevũre. Aru bĩjarãjaramã na nõ boje.

¹¹ iChĩorãjaramã na! ðãdamã yõpe Caĩn mãcure, ñai ĩmacũ bãcure boarĩ jarũvayũ bãcure. Aru ãmeina teðamã, earãjivũ tãuturãre yõpe Balaam mãcure. ðbenita bĩjarãjaramã, ne ju abe boje jabovare yõpe Coré bãcure. ¹² Yõpe cuitótecajede mũje docũ jacorĩ ãmeðaiyepe, nopedeca ina jujovãivũ, borocuede bueivũ, ãmetede ðãdamã

mãjacavũre, ne cuyõje tede ðaiye boje pueðabevũva apenvũre mũje ãranũiyede torõjuve teinoã. Yõpe ovejavare coreipõeva ne baju me ãiyepe ðbenita jĩbevũva ãiyede ovejavare, nopedeca ina jujovãivũ ãri ũcuñamã apenvũ pũeno. Aru yõpe ocopenĩboa ũmevũque japuino ðbenita ocabenĩ cadatebenõpe põevare ne ocainõre coreniduiyede, nopedeca ina borocuede bueivũ, cadatebenamã põevai ũmene ne bueiyeque. Aru yõpe jocũcũ jẽidua cubeca jẽijãravũre meamecure, nopedeca ina jujovãiyede bueivũ baju bãcavũre paivũbu na, ne meame boje. Aru yõpe pũeno baju meamecure dicure ĩnĩburu yõbore caino mũoque jobore jarũvarĩ, nopedeca pũeno baju meamemã na. ¹³ Aru yõpe pãcaĩboa urãboa jia urãðai jarũvaĩboape êcarũ caivũ ne jãĩnoĩ yaore aru pojeĩyede mãre, ãme ũrojuede, nopedeca ina jãicõjeðamã caivũre ne ðaiye cuyõjeda. Aru yõpe abĩãcova tuivũ bãcavũre ne mũimare jocarĩ pũ ñeminitucubũ, nopedeca ina jujovãivũ curãjaramã caĩnũmã ñeminitucubũ pũeno baju ñeminoĩ, nõ Jũmenijicũ nãre ðacaino mãcarõĩ.

¹⁴ Ina jujovãivũre, borocuede bueivũre, Enoc Jũmenijicũ yãvãiyede coyũcarejaquemavũ javede nãpe paivũ ne borore. Ñai Enoc yaibéscũ, Jũmenijicũ mũvãimũ mãcũ arũcũra ĩjãravũre jocarĩ, Adãn mãcũ pãramescũ bãcũ pãramescũ bãcũ pãramescũ barejaquémavũ ñi, Enoc. Yõpe arĩ, Jũmenijicũ yãvãiyede coyũcarejaquemavũ ñi: “Me jãjara. Maje jabocũ Jũmenijicũ ðacuyũme. Aru obedivũ baju ñi ángelevã mearã baju ðarãjaramã ĩque. ¹⁵ Bojedacuyũme caivũ põevare, ne ðaiye bãque boje ĩjãravũ. Ñájine ðacuyũme caivũ ina ãmeno ðaivũre ne ãmeina teiye bãque boje ne ju abe bãquede ãre, aru ne ãmeina yãvãiyẽ bãque boje copũ ãre”, arejaquemavũ Enoc. ¹⁶ Ina jujovãivũ, borocuede bueivũ, ãmeina yãvadãmã caiyede. Ye apeno ne jãĩno ye baquinõ ãmevũ nãre. Aru ãmecoroðamã caivũ apenvũre mãre. Ne ãmeina ðaiyũrepe ðãdamã na. Ne baju

“Ñija apa mearo ðaivubu apevu pñeno”,
 ðbenina arĩ coyuyama. Aru “Muja
 máre mearo ðaivubu apevu pñeno”,
 borocurĩ coyuyama apevure. Que arĩ,
 mamagumure vorĩ eadama náva méne
 apevu pñeno.

**Judas ði majicaino Jesúre ju
 aipõevare**

(2 Ti 3.1-5; 2 P 3.3)

¹⁷Muja, ji umara, arujara iyede
 Jesucristoi yávaiye méne beorĩ
 coyucõjeimara ne coyuiye báquede
 mujare jipocamia. ¹⁸Coyuivu
 barejaquémavu mujare, yópe arĩ:
 “Ñijárvava buojaquijárvava baquiyéde,
 Cristoi copaidaquijárvavu jipocare,
 darájarama põeva Jūmenijicure ju
 abevu, yurivu, aru ne ãmeina ðaiyere
 ðaivu”, arĩ coyurejaquemavu na. ¹⁹Ina
 jujovavivu, borocuede bueivu, nárecabu
 coatede ðaiyurivu mujacavure muje
 baju. ðaivubu ne ãmeina ðaiyere yópe
 ãimara dápiabevure. Aru curivubu ñai
 Espiritu Santore cuvabevuva.

²⁰Ûbenita muja, jívu, ji umara, parure
 ðajarã muje ũmei muje Jesucristore ju
 aiyequé me, Jūmenijicui majide ðaiye
 báquede majare ði yávaiye méne, maje
 meara marajiyépe ayu jaubevuva ði
 jáinoi. Aru jēniajara Jūmenijicure
 ñai Espiritu Santoi caðateinoque.

²¹Cainumua ðajarã muja yópe
 Jūmenijicui urõpe ði ue boje mujare,
 muje napini coreiyedeca Jesucristoi
 cuvare ðaquiyede járavu cūiméjáravu
 baquinóre, ði cõmaje ãroje jáiye boje.

²²Cõmaje ãroje jájara muja ina
 ju abevure cãreja yávaiyede jávene.
²³Apevure meadajarã maumena yópe
 muje íyepé põecure toabore jocarĩ.
 Corebevuvu coyujarã náre Cristoi
 yávaiye méne. Aru apevure cõmaje ãroje
 jájara, ne ãmeina teiye boje. Coyujarã
 náre máre Cristoi yávaiye méne.
 Ûbenita me ðajarã, muje ðabenajiyepé
 aivu ãmenore nápe. Nácapuravu ne
 pare ãmeina teiye boje cuitótecaje
 docucricajede doivure paivubu na.
 Que baru ubejarã ne ãmeina teiyede
 yópe muje ubepe dicajede.

Mearore jíni buojaino

²⁴⁻²⁵Jūmenijicu cūinacurabe majicu
 aru parucu meadacuyu mujare, muje
 vainí tubenajiyepé ayu ye ãmeno
 cubevuva. Ûvacari núre ðaibi mujare
 ði jáinoi torojurivure muje ũmei.
 Jūmenijicu meacu baju meadaibi majare,
 Jesucristoi ðaiye báque boje. Mearore
 jínajarevu úre. Útame meacu baju,
 majicu urarõ, pñeno parucu, aru caivu
 pñeno jabocu járavu jipocare aru caride
 aru cainumua. Quédecabu. Quénoramu.

Jesucristoi jáđovaiye báque

Apocalipsis

Mamabuinore coyuiyebu Juan mácu ũi toivacaiye báquede Jesucristoi jáđovaiye báquede ũi mácure. Juan mácu barejaquémavu judíovacacu, Galilea ámicurijoborócacu, aru Jesús ũi yávaiye méne beorí coyucójeimaracacu. Ũi mamicu Santiago bácuque moa boaipóecu bácu barejaquémavu, Jesús órejaquiye jipocare ũi mácure. Lucas bácu coyurejaquemavu Juan mácu borore Hch 3:1-4:22. Éfeso ámicurímarocavu Jesúre ju aivure coreipóecu barejaquémavu. Iye jáđovaiye báquede járejaquemavu ũi cue báquede jabova ne buoimu Patmos ámicurijivavi (1:9). Apevu ne dápaiyepe, toivacarejaquemavu iyoca paperayocare ũi cuede nore. Ũbenita apevu ne dápaiyepe, toivacarejaquemavu diyocare ũi cuede Éfeso ámicurímaroi o apeno ímaroi, ũi mácure ne jaetovaríburu yóbore no jivavure jocarí. Toivacarejaquemavu Jesúre ju aipóeva cójijivavure siete paiñamia cójijíñamiai Asia ámicurijoborói (1:4). Póecu cubebi majicu ye uju ũi toivacaiyu bácaróre diyocare, ũbenita obedivu ne dápaiyepe ániyu báquede 94-98 d.C. baji. Caiye ape toivaiye Majepacu Jümenijicui yávaiye mamaene coyuitucuboque toivaiye báquede ne toivaríburu yóbore, Juan mácu toivacarejaquemavu diyocare.

Juan mácu coyurejaquemavu diyocaque ũi jáino mácaróre Jesucristo meacu bajure, ñai toivaicójeñu mácu ũi mácure caiye iye ũi jáđovaiye baquiyéde ũi mácure (cap. 1). Ina coreipóeva mácavure Jesúre ju aipóevare siete painoa ímaroacavu bácvure toivacarejaquemavu paperayocare (caps. 2-3). No yóboi, toivacarejaquemavu parure dacuy Jesúre ju aipóeva ñájivure ne ju aiye boje, ne majinajiyepa ayu aipe vaiquiyede ijárvavi buojaijávavure, Jesucristoi vainí taquiyede abujuvai jabocure jaruvarí aru mamajárvavu báquiyede máre.

Juan ũi coyurí buino

1 ¹Iye coyuiyebu Jesucristoi coreóvare ðaiyue póevare. Jümenijicu coreóvare ðaicójequemavu Jesucristore iyede ũre memecaivure, ne coreóvarájiyepa ayu iye vaiquiyede maumena. Que baru ũi daroquemavu cüinácu ũi ángelede ji yebai, ũi jáđovaiyepa ayu yure, Jüare, ũre memecayure, aipe tequinore ijárvavi. ²Yu coyucuijivü mujare caiye ji jáiye báquede, Jesucristo ũi coyüino mácaró jáve bajure yure Jümenijicui yávaiyede.

³Torojucuyume ñai jári boroteyu ji toivaiye báquede iye Jümenijicui yávaiyede coyucuiyede apévure. Aru torojurájarama ina jápiaivu diede aru ju arí ðaivu yópe iye toivaiye ðaicójeiyepe. Maumena vaiquiyebu caiye iye.

Juan ũi meaicójeino ina Jesúre ju aipóeva cójijivavure

(Mt 24.30; Mr 13.26; Lc 21.27; Jn 19.34, 37; Hch 26.23; Col 1.18; 1 Ts 4.17; Ap 1.17, 4.5, 5.10, 20.6, 22.13)

⁴Yu, Juan, toivacaiyu iyoca paperayocare mujare, siete paiyajuboare Jesúre ju aipóevare Asia ámicurijoborói. Jümenijicu mearo ðacajacurí mujare bojecubeda ũi me boje aru torojurivü mije ũmei me cure ðacajacurí mujare ũque cárijimevüva. Que ðacajacurí mujare Jümenijicu, ñai cücü caride, aru cücü bácu javede, aru dacuy apejávavure. Aru que ðacajarári mujare ina siete paivu decova curivü Jümenijicu jabocui dobaró mearo jipocai. ⁵Que ðacajacurí mujare Jesucristo, ñai coyuyü

bácu yávaiyede jävene Jümenijicurã pũ ne yaváiyeta úre, aru mamarũmũ nacajañũ mácu yainore jarũvarĩ, aru cõjeñũ caivu ina ijãravucavu jabovare. Ñai Jesucristorecabe ucũ majare. Majarecabu ñajijurorivũ maje ãmeina teiye boje. Ubenita ñi ue boje majare, úrecabe boarĩ jaruvaicõjeñũ mácu ñi bajure, bojedacuyũ majare ñi jiveque, maje ãmeina teiyede jarũvarĩ. ⁶Úrecabe epeyũ majare ñi jaboteimara marájivũva aru sacerdoteva bárãjivũva máre, maje memecarãjiyepe ayũ ñi mearore jímure, jípacure. Mearore jíjarãri caivu Jesucristore, ñai parucũ caivu pũeno cainũmũa. Quédecabu.

⁷Jájara. Cristo dacuyũme ocopeniboaque. Caivu põeva jãrajarama úre, ina úre pẽvaivũ bácvũ jocucũjaravena. Aru caiyajuboa põeyajubocavu Jesúre jũ abevũ chĩori orãjarama ne jidúe boje, ne jáiyede úre ãmeñũre cavarõre jocarĩ. Quédecabu.

⁸Maje jabocũ Jümenijicu, yõpe arĩ, coyuyũbe, “Yürecabu býyũ bácu aru yõbocacũ máre. Que baru cũvũ yũ cainũmũa”, arĩ coyuyũbe Jümenijicu, ñai parucũ caivu pũeno. Que baru ñi cubi caride, aru currejaquemavũ javede, aru dacuyũme apejãravũ baquinõre máre.

Juan ñi jáino Cristo meacũ bajure
(Ap 1.8, 2.8, 22.13)

⁹Yũ, Juan, mũjecubũ, maje jũ aiye boje Jesucristore. Cũrivũbu maja úque cüinãvũpe. Yũ máre ñãjivũ mũjapedeca. Aru Jesucristo parure ñaibi yũre máre yõpe ñi parure ñaiyepe mũjare, maje napinajiyepẽ ayũ maje ñãjiyede. Aru jabotede ñacuyũme majare úque. Cútecacũ yũ jablova ne bũoimũ Patmos ãmicurijjavũ, ji coyuiye báque boje Jümenijicui yávaiyede Jesucristorã.

¹⁰Nore ji cuedẽ ñai Espĩritu Santo dápiãicõjeame yũre. Aru jápiacacũ ji yõboi yávaino bũjinore, yõpe trompeta ãmicuriyo japuiyore japuiyepẽ. ¹¹Ñai yávayũ yure coyúame, yõpe arĩ:

—Toivajacũ caiye mi jáiyede caride pãpãrayoca ñimũjuriyoca cãriáiyocaque.

Aru toivarĩburu yõboi jarojacũ diyocare diyajuboa siete paiyajuboa Jesúre jũ aipõevare Asia ãmicurijoborõi. Diyajuboa põeva cũrivũbu Éfeso, Esmirna, Pérgamo, Tiatira, Sardis, Filadelfia, aru Laodicea ãmicurĩmaroai.

Nõpe arĩ, toivaicõjeame yũre.

¹²Copedicacũ, jácuyũ úre, ñai yávayũre yũre. Copedini jácacũ siete paijaraboa pẽoibũa tuoijaraboa úruque ñaijaraboare. ¹³Aru dijaraboa coricai cúteame cüinãcu ñmũ. Maja, põevape páyũ bateáme ñ. Doame ñimũjoricaje cuitõtecaje ñi cubobaita eaicajede aru bũoáme úruque ñaicãvare ñi ñareba cüinãturu baji. ¹⁴⁻¹⁵Ûi podã boe matuiye bateãvũ yõpe oveja podã lana ãmicuripodape, aru abobico jujurõpe máre. Ûi yacorũa cojiteavũ yõpe toa uruiyepẽ, aru ñi cuboba cojidiba bateãvũ yõpe tãure toajide ñarĩburu yõbope. Aru ñi yávaino jápurateavũ yõpe cũratãcuve uratãcuve bũjinore. ¹⁶Cuvateame ñi pũrũ meapũravucãpũrũi siete paivũ abiãcovare. Ûi jijecamure jocarĩ etavũ cüinãve boaicarove caipũcãpũravũa mũpũjivẽpe. Aru ñi jiva pẽoãvũ yõpe aviã pẽoiyepẽ jãravũ coricare.

¹⁷Ji jáiyede úre, tucacũ yũ ñi cuboba yebã yõpe yaiyã bácupe.

Quénora tuoáme yũre ñi pũrũ meapũravucãpũrũque. Aru áme yũre:

—Jidubejacũ mũ. Yürecabu býyũ bácu aru yõbocacũ máre. Que baru cũvũ yũ cainũmũa. ¹⁸Yürecabu apucũ cainũmũa. Yãvacari yaidéjacacũ. Ubenita apũvũ yũ cojedeca. Aru apũcũyũmũ cainũmũa. Quédecabu. Yürecabu llavede cãvcacũ yaivũ bácvũ ne cũrõre máre. Que baru yürecabu bũojayũ nũicõjeñũ põevare toabo cüiméboi. ¹⁹Que baru toivajacũ caride mi jáiyede aru aipe vaiquíyede yõbore máre. ²⁰Que baru coyũquijivũ mũre caride aipe aiyũrõre ina siete paivũ abiãcovare, mi jáimara cũrivũre ji pũrũ meapũravucãpũrũi, aru ijaraboa siete paijaraboa pẽoibũa tuoijaraboa úruque ñaijaraboare máre. Diebu aru námu Jümenijicui jáðovameno

jipocamia ũbenita jáđovaino caride. Jēvari coyũivũ ina siete paivũ abiacovape paivũre. Nárecabu yópe ina siete paivũ coreipõevape, Jesúre jũ aipõeva cójjivaivũ diĩmaroai siete paiĩmaroacavũ ne coreipõevape.

Aru jēvari coyũivũ ijaraboa siete paijaraboare. Dijaraboarecabu yópe siete paiyajuboape Jesúre jũ aipõeva ne yajuboa cójjivaivũ diĩmaroa, siete paiĩmaroai.

Que arĩ, coyũáme yure.

Juan ũi toivacaino Éfesocavũ Jesúre jũ aipõevare

(Ap 22.2)

2 ¹Que arĩ, toivaicõjeame yure.

—Toivajacu ũre, ñai

coreipõecũre Jesúre jũ aipõeva cójjivaivũre Éfeso āmicũriĩmaroi. Yópe arĩ, toivajacu mũ: “Yópe arĩ, coyũibi ñai cũvacũ ina siete paivũ abiacovare ũi pũũ meapũravũcapũũ, ñai cũcũ ijaraboa siete paijaraboa pēoibua tũoijaraboa jēneboi. ²Coreóvaivũ yũ mi memēinore, memecayũre ũetũyũreca, aru mi napini ñájijyede máre. Coreóvaivũ yũ ye buojabecũre napiñũ pōeva āmenare, aru jári coreóvayũre ina, ‘Ñũjamu Jesúre jũ aivũre ne daroimara coyũrājivũ Jesús ũi yáviye méne’, mi majiquiyepere aivũre ũbenina jáve maru ne coyũino. Que teniburu, coreóvaivũ mũ Jesúre jũ aivũre ne daroimara ānevũre. Quénora borocũrivũ na. ³Coreóvaivũ yũ ũetũbecũva napiñũre mi ñájijyede yũre boje dajocabecũva.

⁴Ūbenita cũináro mi đainore āmeina jáivũ yũ. Quĩjino bajuta ũvũ mũ yure caride. Mamarũmũre ũteavũ mũ yure pare mi ũmei. Ūbenita caride dajocavũ mũ mi ũede yure. ⁵Caride ārũjacũ yũre javede mi pare ũe báquepe. Chĩori jarũvajacu mi āmeina teiyede. Aru oatũvajacu mi đaiyede, đacũyũ yópe mi đaiye báquepe mamarũmũre mi coreóvaivũre yure. Pare ũteavũ mũ. Ūbenita que đaiyũbecũ baru, ũbecũ bacũyũmũ mũ yure. Que baru mi

yebai darĩ, mi pēoibua tũoijarabore ĩni, nũvacũyũmũ đijarabore mũre jocari.

⁶Ūbenita cũináro mi đainore me jáivũ yũ, mi āmeina jáiyede ina nicolaĩta āmicũriyajubocavũ ne đaiyede. Yũ máre āmeina jáivũ ne đaiyede.

⁷Caivũ me jápiajarā ñai Espĩritu Santoi coyũiyede Jesúre jũ aipõeva cójjivaivũre: ‘Ina mũjacavũ vainĩ tũivũre āmenore jarũvarĩ āicõjecũyũmũ yũ Jũmenijicũ jioba coricacacũ jocũcũ jēidũare, apũre đaijocũcũ dicũ āmiá’, arĩ coyũyũbe ñai Espĩritu Santo’, arĩ toivaicõjeame yure.

Juan ũi toivacaino Esmirnacavũ

Jesúre jũ aipõevare

(Ap 1.17, 20.14, 21.8, 22.13)

⁸Bedióva cojedeca yópe āme yure.

—Toivajacu ũre, ñai coreipõecũre Jesúre jũ aipõeva cójjivaivũre Esmirna āmicũriĩmaroi. Yópe arĩ, toivajacu mũ: “Yópe arĩ, coyũibi ñai búyũ bácu aru yóbocacũ máre, ñai yaiyá bácu nacajañũ mácu apũcũ cojedeca. Que baru cũvũ yũ cainũmũ. ⁹Coreóvaivũ yũ mi ñájijyede yure boje. Coreóvaivũ mũre cũve cũvabecũre máre. Ūbenita jáve ũre cũve cũvavũ mũ Jũmenijicũ cũve méne. Aru coreóvaivũ yũ caiye iye ne āmeina yáviyede mi borore ina ‘Judĩovabu ñũja’ ũbenina aivũre. Ūbenita judĩova baju āmema na. Quénora nárecabu Satanás jina. Aru cójjivaivũbu, memecarājivũ ũre.

¹⁰Jidũbejacũ mi ñájiquinore. Jájacũ. Ñai abujuvai jacobũ buore đacũyũme apevũ mũjacavũre āmeina teivũre jēni jacoĩñami, jári coreóvacũyũ mũje jũ aiyede yure. Cairũcapũũre paijāravũba baquiyéde ñájinajaramu mũja. Jũ ajacu yure pũ mi yaiyeta. Que teyũre, yũ bojedacũyũmũ mũre me. Mũre cũre đacũyũmũ jāravũ cũiméjāravũ baquinóre yũque.

¹¹Caivũ me jápiajarā ñai Espĩritu Santoi coyũiyede Jesúre jũ aipõeva cójjivaivũre: ‘Ina mũjacavũ vainĩ tũivũre āmenore jarũvarĩ numenajarama toaboi cũiméboi’, arĩ

coyuyube ñai Espíritu Santo”, arí toivaicōjeame yure.

**Juan ñi toivacaino Pérgamocavũ
Jesúre jũ aipōevare
(Jn 6.48-50)**

¹²Bedióva cojedeca yópe áme yure.

—Toivajacu ére, ñai coreipōecure Jesúre jũ aipōeva cójijivaivure Pérgamo ámicuríimaroí. Yópe arí, toivajacu mu: “Yópe arí, coyuyibi ñai cuvacu ive boaicarove cairucapūravua upujidivede.

¹³Coreóvaivu yu mi curōre. Mu cuvũ nore Satanás ñi jaboteinore, ñi jaboteimara jēneboi. Ūbenita nore cuvucvacari, me jũ ayubu mu yure. Ānijāravũ bácarō Satanás jina ne boarí jaruvaiye báquede Āntipas bácare, ðajocabeteavũ mi jũ aiyede yure. (Ñai Āntipas bácu coyuyi barejáme yáviyede jāvene yurã pu ne boarí jaruvaiyeta ére.) Boarí jaruvaima ũ mácure no mi ímaro, Satanái curōí.

¹⁴Ūbenita apejie mi ðaiyede āmeina jāivu yu. Apevu mujacavũ curivu ðaivubu yópe Balaam mácu ñi bueiye báquepe. Javede ñai Balaam mácu majicarejaquemavũ Balac bácare ñi āmeina ðare ðaquiyepe ayũ ina Israecavũ bácare.

Āicōjenejaquemavũ na mácare aiyede pépeimarare ne jíye báquede. Aru āmeina ðaicōjenejaquemavũ na mácare apevuque némarebucava āmevuque máre. Nópe Balac bácare ðaicōjenejaquemavũ Balaam mácu.

¹⁵Quédeca apevu mujacavũ ðaivubu yópe ina nicolaíta ámicuríyabucavũ ne bueiyepe.

¹⁶Que barureca chīori jaruvajacu mi āmeina teiyede. Aru oatuvajacu mi ðaiyede. Ūbenita mi que ðaiyubedu, maumena dacuyumu yu mi yebai, ādamatecuyũ náre, ina Balaam mácu ðaiyepe ðaivure aru ina nicolaítava ne ðaiyepe ðaivure máre, ive boaicarove etaiyeque ji jjecamure jocarí.

¹⁷Caivu me jápiajarã ñai Espíritu Santoi coyuyiede Jesúre jũ aipōeva cójijivaivure: ‘Ina mujacavũ vainí

tuivure āmenore jaruvarí āicōjecuyumu yu āiye me cavarō mearo Jūmenijicui curōquede, iye āiye yaveiyede ijāravucavure jocarí. Aru jícuymu náre coapa cūinájibo curajibo borijibore. Dijiborã toivaino cuvũ cūináro āmiá mamaro āmiáre. Aru ina jacopurājivu quévura coreóvarājarama no āmiáre. Apecu cubecube coreóvayũ no āmiáre’, arí coyuyibi ñai Espíritu Santo”, arí toivaicōjeame yure.

**Juan ñi toivacaino Tiatiracavũ Jesúre
jũ aipōevare
(Mt 16.27)**

¹⁸Bedióva cojedeca yópe áme yure.

—Toivajacu ére, ñai coreipōecure Jesúre jũ aipōeva cójijivaivure Tiatira ámicuríimaroí. Yópe arí, toivajacu mu: “Yópe arí, coyuyibi Jūmenijicui mácu, ñai yacorua cojididua cuvũ aru ñi cuboba máre cojidiba yópe tāure toaijide ðarĩburu yóbope. ¹⁹Coreóvaivu yu mi ðainore. Aru majivu ucure yure aru apevure máre, jũ ayure yure, memecayure Jūmenijicure, aru napiñure mi ñájiyede máre. Coreóvaivu mi ðaino mearore. Mearo ðaivu mu caride mamarumu jũ ayũ yure mi ðaino mácarō pueno.

²⁰Ūbenita cūináro mi ðainore āmeina jāivu yu. Mu jaetovabevu nomióre ōi āmiá Jezabel. Ō muje jēneboi ‘Jūmenijicui yáviyede coyucapōecobu yu’, ũbenina aibico ō. Ōi bueiyeque jujovaibico ina yure memecavure. Que baru āmeina ðare ðaibico náre apevuque némarebucava āmevuque. Aru āre ðaibico náre aiyede pépeimarare ne jíye báquede máre. ²¹Joe coreniduivu yu ōi chīori oatuvacojiyepe ayũ ōi ðaiyede, ōi jaruvacojiyepe ayũ náre ōi āmeina tede ðaiyede jaruvarí. Ūbenita oatuvaiyubebico ō. ²²Que baru ñájine ðacuyumu óre pare. Aru ijimo macoðome ō, paraðo ōi parainoi. Aru ina óque āmeina ðaivu bácare ne chīori oatuvabedu ne āmeina ðaiyede ópe, paraicōjecuyumu náre máre ōpedeca, pare ne ñájinajiyepa ayũ. ²³Aru boarí

jaruvacuyumu caivu ina òi jajovaimara mácavure, mamara majarórivure paivure.

¹Que ñariburú caivu Jesúre ju aipóeva cójjiivaivu coreóvarājarama. Yurecabu coreóvayú caivu pōevare caiye ne dápiayede aru caiye ne uede máre. Que baru bojedacuyumu mujare coapa yópe mujé ñaiye báquepedeca. ²⁴Ëbenita mujacarpuravú Tiatiracavú ñabevú yópe òi bueiyepe. Coreóvayúbevu muja iye Satanái majié yaveiyede apevu ne ñaiyepe. Cúbevu apeno ji ñaicójeino mujare copu. ²⁵Quénora ñajará yópe ji coyuiyepe ji yávaiye méne pu ji copaidaiyeta.

²⁶⁻²⁷‘Ina mujacavú vainí tuivure ámenore jaruvarí aru ñaiyure yópe ji urópe pu ne yayieta, jabotede ñacuyumu náre cainoa joboróacavure iye parúéque yópe jipacuí jabotede ñaiye báquepe yure. Jabotenjarama náre parúéque. Que baru cainoa joboróacavú ne ju abedu, ñarājarama náre yópe jobojorure boarí yavaiyepe abodo táuque ñaiyure. ²⁸Aru cuvare ñacuyumu náre ñai abíacorú pēoñú miadáre ñaiyede.

²⁹‘Caivu me jápijará ñai Espiritu Santoi coyuiyede Jesúre ju aipóeva cójjiivaivure’, arí toivaicójeame yure.

Juan ñi toivacaino Sardicavú Jesúre ju aipóevare

(Mt 10.32, 24.43-44; Lc 12.8, 39-40; Ap 16.15, 20.12)

3 ¹Bedióva cojedeca yópe áme yure. —Toivajacú ñre, ñai coreipóecure Jesúre ju aipóeva cójjiivaivure Sardis ámicuríimaroí. Yópe arí, toivajacú mu: ‘Yópe arí, coyuíbi ñai daroyú Espiritu Santore Jesúre ju aivu ne cójjiñamiai siete paíimaroái aru cuvacu ina siete paivu abíacovare máre. Coreóvayú yu aipe ñayure mure. Ëbenina arí, ‘Ñayube Jūmenijicú urópe ñi parúéque’, coyúivubu mura. Ëbenita coateyú bajubu mu Jūmenijicure jaruvarí. ²Jūracucu, jabónvayú buojabevú mu mi memecaiyede jocarí Jūmenijicure.

Que baru Jūmenijicú ámeina jáimi mure. Que baru cāñure ámejacú mu. Pueno parure ñarí ju are nure ñajacú mívure ne ũmei, ina coatebevure cāreja Jūmenijicure jaruvarí, ne coateni bñjabenajiyepere ayú ñre jaruvarí. ³Que baru áñure ñajacú caiye iye Jūmenijicú yávaiye méne ne bueiyede mi jápiayé báquede. Diede jápiarí, ju arí, chíori oatuvajacú mi ñaiyede, jaruvacuyú mi ámeina teiyede. Ëbenita nópe mi ñabedu, dacuyumu yu mi yebai yópe ñavaipe ñi ñaiyepe. Aru ji daquinumure ye majibecuyumu mu.

⁴Ëbenita obebeñina curivubu no Sardis ámicuríimaroí ámene ñabevú, yópe pōeva docutede ñabepe ne cuitótecajeare, ne ñaiye boje yópe Jūmenijicú urópe. Nárecabu dorājivú cuitótecajea boricajeare aru curājivú yúque. Que ñarājarama me, ne napini coreiye boje Jūmenijicú jíye báquede náre.

⁵Ina mujacavú vainí tuivú ámenore jaruvarí nápe paivu cuitótecajea boricajeare dorājarama. Ne ámiá toivaino mácaróre ánitucubo Jūmenijicú paperatucubo, caivu ina jaravú cúiméjaravú baquinóre cuvrajivú yúque ne ámiáre toivaitucubore túreni jaruvabecuyumu yu ne ámiáre. Quénora, ‘Ji pōevatamu na’, arí coyucuyumu jipacuí jáinore aru ñi ángeleva máre ne jáiyede.

⁶‘Caivu me jápijará ñai Espiritu Santoi coyuiyede Jesúre ju aipóeva cójjiivaivure’, arí toivaicójeame yure.

Juan ñi toivacaino Filadelfiacavú Jesúre ju aipóevare

(Ap 21.2)

⁷Bedióva cojedeca yópe áme yure. —Toivajacú ñre, ñai coreipóecure Jesúre ju aipóeva cójjiivaivure Filadelfia ámicuríimaroí. Yópe arí, toivajacú mu: ‘Yópe arí, coyuíbi ñai meacu baju, memecayú Jūmenijicure, aru javene bueyú máre. Ërecabe cuvacu llavede, ñai jabocu David bácu jino mácaróre. Yópe pōecuí voaiyepe

bieivede aru bieicōjemepe apevure dive, nopedeca ũi ðaicōjeiyede pōevare ape, ñame buojabenama ðaicōjemevu náre diede. Aru yópe pōescu bieniburu yóbore dive máre, voaicōjemepe apevure dive, nopedeca ũi ðaicōjemene pōevare ape, ñame buojabenama ðaicōjeivu náre diede.

⁸Coreóvaivu yu aipe ðayure mure. Coreóvaivu yu obebejina mívu curivure memecarājivure yure. Ju aivu mu ji yávaiyede. Aru 'Jesucristobe' ji jabocu', ju arí soyuivu mu. Que baru jēvari soyurí, yópe pōescu apescure ecoicōjeiyepede jedevacobe bieivede voarí aru apescure bieicōjemepe dive, nopedeca mure memecaicōjeivu yure. Aru pōescu cubebi mure memecaicōjemeni majicu.

⁹Soyuivu mure ne borore ina 'Judíovabu ñuja' aivure, ũbenita judíova baju amema na. Quénora Satanás jinatamu cójijivaivu memecarājivure ũre. Náreca ñuatutare ðacuyumu yu mi cuboba yebai, ne coreóvarājiyepede ayu ji baju ũcure mure. ¹⁰Napivu mu mi ñájiyede yópe ji ðaicōjeiyepede báquepe mure. Que baru jári coresuyumu yu mure mi ñájine ðaiyede. Caivu ijárvacavu Jesucristore ju abevu ne ñájinajiyepede javvu náre. ũbenita mure caðatecuyumu yu, mi ñájimequiyepede ayu iye ñájiovaiyeque. ¹¹Maumena ðacuyumu yu. Ðajacu yópe mi bueiyepede ji yávaiyepede méne apescu ũi ímequiyepede ayu mi bojede mure.

¹²Ina mujacavu vainí tuivure amonore jaruvarí epescuyumu jabova parurivuna Jūmenijicuí cūrami jívui yópe bucporarua parure ðaiyepede cūramine. Aru etabenajarama na nore jocarí cainumua. Aru toivacuyumu yu nára Jūmenijicuí amíare, aru Jūmenijicuí ímaro amíare máre. No mamaro ímaro Jerusalén amicūrótamu. Ēmequiyepede cavarō mearo Jūmenijicuí curóre jocarí. Aru toivacuyumu nára ji amía mamarore máre.

¹³'Caivu me jápiajará ñai Espíritu Santoi soyuivude Jesúre ju aipōeva cójijivaivure', arí toivaicōjeame yure.

Juan ũi toivacaino Laodiceavnu

Jesúre ju aipōevare

(Jn 1.3, 16.33; Col 1.15, 18;

He 12.6; Ap 5.5)

¹⁴Bedíova cojedeca yópe áme yure.

—Toivajacu ũre, ñai coreipōescure Jesúre ju aipōeva cójijivaivure Laodicea amicūrímaroi. Yópe arí, toivajacu mu: "Yópe arí, soyuibi ðajocabescuva, ñai soyuyu yávaiyede javene Jūmenijicūrā pu ne boarí jaruvaiyeta ũre. Ũrecabe Jūmenijicuí caiyede cuedare ðaimu mácu. ¹⁵Coreóvaivu yu aipe ðayure mure. Coreóvaivu yu maucuvabescure yure yópe jujuteyure. Aru coreóvaivu yu memecabescure mi ũmei yópe toaijiteyure. Mu ju ayuvacari yure, majiéda quénora ju ayubu. Yópe oco avia ũi boiyequede toaijide ðaiocore ũcuiyubepe maja, nopedeca mi majiéda ju aiyede yure ũbevnu yu. Mi me ju arí memecaru yure, yópe toaijiteyure meajebu. Mi ju abeni maucuvaru yure, yópe jujuteyure, meamejebu. ũbenita mi ju aipe boje yure majiéda quénora, pueno baju meamevnu. Que baru coavajacu mi baju yure jaruvarí o memecajacu yure mi ũmei. ¹⁶ũbenita mi ðabe boje yópe ji uróre majiéda toaijicupebu mu. Que baru jaruvacuyumu mure yure jocarí yópe ji jēcutuivyepede oco majiéda toaijiede ji jijecamure jocarí.

¹⁷'Múcapūravnu 'Ũre cūve cūvavnu yu', aríduivnu mu. Aru 'Apejīe ye jaubevnu yure', aríduivnu mu. Aru 'Caiye cūinátarū me naivnu yure ji majié boje', aríduivnu mu. ũbenita ye coreóvabescubu mu mi baju chíõñure, yópe cōmaje ārojacupe, cūve cūvabescupe, jári eabescupe, aru cuitótecaje cūvabescupe máre. Yópe jári eabecu ũi jári eabepe ijárvavquede, nopedeca majide eabevnu mu Jūmenijicuí jiede. Aru yópe cuitótecaje cūvabecu ũi cūyepede, nopedeca cūyevnu mu mi amaina teiye boje Jūmenijicuí jáinore.

¹⁸Que baru majicayubu mure aipe ðaiyepede javróre mure. Yópe pōescu bojedaiyepede ũrure mearo baju toaijide ðaino

mácaröre, mü jäve cüve cüvaiyücsü baru, ijácsü yure iye méne ji cüvaede. Dinümü maquinóre jäve cüvacüyütmü mü ıgarō méne Jūmenijicü jiede. Aru yóre pōescü ĩni bojedaiyere cuitótecaje boricajede üi doquiyepe üi bajure cüyoje tebecüyü, yóre ämeina teiyede joaimü mácspe bájacü mü ji yaiye boje, cüyoje tebecüyü mi ämeina teiye boje. Aru yóre pōescü ĩni bojedaiyere yaco taiyóiyede, üi me jári eaquiyepe ayü üi epequiyepe, me jápiarī adajacu iye bueiyepe Jūmenijicü yávaiyede, me majicüyü diede. ¹⁹Yürecabu coreóvare ðayü caivu ji ımarare ne ämeina teiyede aru nájine ðayü náre die boje máre. Que baru püeno baju ðaiyüjacü Jūmenijicü ıgōpe. Chiori jarüvajacü mi ämeina teiyede. Aru oatüvajacü mi ðaiyede.

²⁰Jájacu. Yóre pōescü núcsü cūrami bieñamine jedevai ecoiyücspe, mautescüyü diñamicavüque, nopedeca yü mauteiyüvü müque. Yóre üi órejaiyere diñamicavüre, ne majinajiyere ayü cücspe, aru ne voaräjiyere ayü bieivede, nopedeca mi coreóvaiyede yü mauteiyücspe müque, mauteicōjejacü yüre. Dinümümica jícsü bájacü mü. Mi mauteicōjeiyede yüre müque, mautescüyütmü müque. Aru yóre pōeva ne torojüere cójijini äivü, nopedeca me cüräjaramü maja. Yü mi yóvaimü macüyütmü. Aru mü ji yóvaimü macüyütmü.

²¹Ina müjacavü vainí tüivüre ämenore jarüvarī dobaicōjescüyütmü yúque jabocü ji dobarō mearoi, mi jabotenajiyere ayü yúque. Quédeca vainí türejacacü yü ämenore jarüvarī. Aru caride dohavü yü jipascüque jabocü üi dobarō mearoi, jaboteyü úque.

²²'Caivü me jápiarä nāi Espiritu Santoi coyüiyede Jesüre jü airōeva cójijivaivüre", arī toivaicōjeame yüre.

Juan üi coyüino cavarō mearocavü ne mearore jíyede Jūmenijicüre
(Ap 1.4, 8.5, 11.19, 16.18)

4 ¹No yóboi jácsacü yü cojedeca jedevacobe bieivede voaicobe

bácaröre cavarō mearo Jūmenijicü cürōi ecoicobede. Jápiacacü cojedeca iye yávainore, ji mamarümü jápaiye báquede bujiépe yóre trompeta ämicürüyo japuiyore japuiyere. Nāi yávayü yüre coyüáme, yóre arī:

—Dajacü yo cavarō mearoi. Mure jádovacüyübu iye vaiquíye jané yóbore, arī coyüáme yüre.

²Dinümümiareca nāi Espiritu Santo dápiacōjeame yüre. Jácsacü cūináro jabocü dobarō mearore no cavarō mearo Jūmenijicü cürōi. Aru jácsacü cūinácu dobacüre noi. ³Nāi dobacü noi yóre cūrajiboa pare bojecürrijiboa cojidijiboape ärojacü cojiteame. Jaspe ämicürrijibo pare cojidijiboape aru cornalina ämicürrijibo jüarijiboape ärojacü cojiteame ü. Aru jabocü dobarō mearo tarabuteni náme cūteame. Nāi náme cojiteame yóre apebo cūrajibo pare bojecürrijibo esmeralda ämicürrijiboape. ⁴Jabocü dobarō mearo yebai apenoa jabovai dobarōa mearoa veinticuatro painoa yóre meatarabu dobarī jápürino mateävü. Aru die coapa dobateima veinticuatro paivü bucüva, doivü cuitótecajea boricajeare aru ne jipobü cüvateima úruque ðaitarabuare máre. ⁵No jabocü dobarō mearo coricacaröre jocarī yaroino, yávaino büjino, aru öpo tüino máre etavü. No jabocü dobarō mearo coricacarō jipocai cūteavü siete paivea cāmavea pēoivea cojiéque. Diedecabu ina siete paivü Jūmenijicü decova. ⁶Aru no jabocü dobarō mearo coricacarō jipocai cūteavü apeða yóre jia urada jivarupe paiya, übenita me jári javaiyoiya bateävü diya.

No jabocü dobarō mearo coricacarō tarabuteni yóvaicüvaitöbuacarpüravüai cūteima yóvaicüvaivü arürivü. Aru ina arürivü cūteima yacorüa caipücapüravüa jipocare aru yóbore máre. ⁷Cūinácu nácsacü yavi jüacüpe ärojateame. Apescü yóre oteivescüre ärojateame. Apescü arücsü ütmüre ärojateame üi jiva. Aru apescü yóre míyavipe, águila ämicücsü vüyüre, ärojateame. ⁸Ina yóvaicüvaivü arürivü

cuvavivũ seis paicavea ne caveá náre coapa. Aru cuvateima yacorua caino ne caveái, pñenocapũravni aru cãchinocapũravni máre. Jãravure aru ñamine máre dajocabevũva yópe aivũ bateima:

Meacube, meacube, meacube maje jabocu Jũmenijicu. Êrecabe parucu caivũ pñeno. Êrecabe cucu bácu javede, cucu caride, aru dascũy aprejãravũ baquinóre, aivũ bateima na.

⁹Ina arũrivũ mearore jivũ, pueðaivũ aru torojuede jivũ bateima ñai dobacure no jabocui dobarõ mearo coricacarõ, ñai cũcure cainũmua.

¹⁰Ne nópe ðaiyedeca, ina veinticuatro paivũ bucũva pueðarĩ ñuatutaima êre dobacure no jabocui dobarõ mearo coricacarõ ñi jipocai. Mearore jĩma êre, cũcure cainũmua. Duvaima ne jipobũ adaitarabũare jabocui dobarõ mearo jipocai. Aru yópe aima êre:

¹¹Mũ, ñũje jabocu Jũmenijicu, mũrecabu caiyede cuedayũ bácu. Caiye iye mi cuedaiye báque cuvũ yópe mi urõpe. Que baru mi meacu baju boje, ñũje mearore jíye aru ñũje pueðaiye máre javũvũ mure aru ñũje coreðvãrãjijye mi parueðe máre, arĩ coyũima na.

Juan ñi coyũino iyoca paperayoca ñmũjũriyoca cãriáiyocarã aru Cristorã, ovejajicure ne aimura, máre
(*Jn 1.29, 16.33; 1 Co 5.7; Ap 1.6, 3.21, 8.3, 20.6*)

5 ¹Jãcacũ ñai dobacure jabocui dobarõ mearo coricacarõra ñi pũrũ meapũravũcapũrũ cũináyoca paperayoca ñmũjũriyoca cãriáiyocare. Caipũcapũravũva toivaiyoca bateávũ. Aru diyoca jedeva tũrvãvi bieino mãcarõ mateávũ yópe jũturijoboyabea jãjariyabea siete paiyabeaque. ²Aru jãcacũ yũ cũinácũ ángele parucure jẽniari jãñure yãvãino bujinoque, yópe arĩ:

—¿Namema meacu baju burarĩ majicu iyabea siete paiyabea jãjariyabeare,

voascũy iyoca cãriáiyocare? arĩ jẽniari jáme.

³Ûbenita cũinácũ cubeteame buõjarĩ voayũ diyabeare. Cavarõ mearocacu cubeteame. Ijãravũcacũ cubeteame. Aru yaivũ bácvũ ne cũrõcacũ máre cubeteame. Cũinácũ cubeteame buõjarĩ voayũ diyabeare, jácũyũ diyocare.

⁴Que baru yũcapũravũ ocacu pare, ne eabe boje cũinácũ meacu bajure, ñi voaquiyepe ayũ diyabeare, jácũyũ diyocare. ⁵Ûbenita cũinácũ ina veinticuatro paivũ bucũvacacu, yópe arĩ, coyũame yure:

—Obejacũ mũ. Ñai parucu Judã ãmicũriyãjubocacu leõn ãmicũcũ yavipe páyũ daibi. Ñai jabocu David bácuĩ pãrãmecũ meacu bajube ñi. Êrecabe javede vainĩ tuyũ bácu ãmenore jarũvarĩ. Que baru ñi macũyũme burarĩ buõjayũ iyabea siete paiyabea jãjariyabeare aru voarĩ buõjayũ diyoca cãriáiyocare, arĩ coyũame yure.

⁶Dinũmũ jácacũ cũinácũ ovejajicure no jabocui dobarõ mearo coricacarõ yebai ina yóvaicũvaivũ arũrivũ aru ina veinticuatro paivũ bucũva ne jẽneboi. Boarĩ jarũvaimũ mãcũpe ãrojãcũvacari núteame ñi nore. Cũteame siete pajjavãroa aru siete paidũa ñi yacorua. Diedecabu ina siete paivũ Jũmenijicui decova ñi dãroimãra mãcvũ cãinoã jorbõrõai. ⁷Ñai ovejãjicũ nrũĩ ñame diyoca cãriáiyocare ñai dobacure ñi pũrũ meapũravũcapũrũre jocarĩ. ⁸Ûi nore íyedeca, ina yóvaicũvaivũ arũrivũ aru ina veinticuatro bucũva máre pueðarĩ ñuatutaima ñai ovejãjicui jipocai. Cuvateima biabeiboare arpa ãmicũriboare ne pũrũĩ náre coapa. Aru cuvateima jorõruã úruque ðãidũare mumijue buididũare máre náre coapa. Jẽvarĩ coyũrĩ diedecabu yópe Jũmenijicui põeva ne boroteiyepe paiye êque. ⁹Aru yópe arĩ, yũriaima cũinãro yũriaino mamarore:

Mũrecabu meacu baju. Que baru iyoca cãriáiyocare ñi, jãjariyabeare burarĩ buõjaivũ mũ. Meacu bajubũ, mure ne

boarí jaruvaiye báque boje. Murecabu bojedayu bácu pōevare mi jiveque ne vainí turí ãmeina teiyede jaruvarí, Jūmenijicui pōeva marajiyépe ayu. Bojedarejaquemavu mū náre, caiyajuboa pōeyajuboacavure, aru caicamu yávaicamuacavure, cainoa ñmaroacavure, aru caijaborōacavure máre. ¹⁰Epeivū mū náre, ne jabotenajiyere ayu máque aru ne memecarājiyere ayu majeracu Jūmenijicure sacerdotevape. Aru nárecabu jabotenajivū ijāravucavure, arí yūriaima na.

¹¹Bedióva cojedeca jácacu. Aru jápiacacu obedivū ángeleva ne yávaivede. Jabocui dobarō mearo coricacarō tarabuteni ina yóvaicuvaiivū apurivure aru ina veinticuatro paivu bucūvare máre ne dobarōa yóbore cūteima ina ángeleva, tarabuteni. Obedimillones baju bateima na. ¹²Aru yópe arí, cođoboboima:

Ñai ovejajicu, ne boarí jaruvaimū mácūvacari, meacu bajube. Que baru caivure mearore jíye javuvū úre. Yópe arí, coyujarāri na: “Úrecabe caiye parúede cuvacu, aru caiye cue upacu, caiyede coreóvayū, aru caiyede ñaiye majicū máre”. Que baru caivū pueđajarāri úre, mearore jíjarāri úre, aru torojuede jíjarāri úre máre, aima na.

¹³Aru jápiacacu yū obedivū yūriavure. Caivu cavarō mearo Jūmenijicui curōcavū, aru caivū ijāravucavū, caivū yaivū bácvū ne curōcavū, aru caivū jia urāđacavū máre, caivū Jūmenijicui cuedaimara yūriaima, yópe arí:

—Ñai dobacure jabocui dobarō mearo coricacarōra aru ñai ovejajicure máre, caivū mearore jínajarevū, aru náre pueđarājarevū cainūmua. Nárecabu pūeno meara baju aru parurivū baju caivū pūeno cainūmua, arí yūriaima na.

¹⁴Ina yóvaicuvaiivū apurivū, “Quēdecabu”, aima na. Aru ina

veinticuatro paivu bucūva ñuatutaima, mearore jínajivū ñai cūcure cainūmua.

Juan ñi coyūino iye siete paiyabea jājariyabearā

(Mt 24.29; Mr 13.24-25; Lc 21.25, 23.30; Ap 11.13, 16.18, 20)

6 ¹No yóbore, jácacu Cristore, ovejajicu ne aimure, burayure cūináyabede iye siete paiyabea jājariyabeaque. Aru jápiacacu cūinácu ina apurivucacure ayure ñi yávaino bujinoque yópe oño tūinope. Yópe arí, “Dajacu”, áme ũ. ²Jácacu cūinácu caballo bocure. Ñai tubacu úra cuvacu ñi témutarabure ñi purui. Jímū mateáme cūinátarabū jipobū adaitarabure yópe ne jíyere ñai vainí tuyure. Etame vainí tuyū apevure jocarí, aru vainí tucūyū máre.

³Ñai ovejajicu ñi buraiyede apreyabe jājariyabede, jápiacacu apescu ina apurivucacure, “Dajacu” ayure. ⁴Que aiyeda, etame apescu caballo, júacu. Ñai tubacu úra adamatēde ñaicōjeimū mateáme ijāravucavure, ne boarí jaruvarājiyere ayu ne baju. Que teni cārijimenore cūiné ñaicōjeimū mateáme. Cuvateame cūináve boaicarove ũmujurivede.

⁵No yóboi, ñai ovejajicu ñi buraiyede apreyabe jājariyabede, jápiacacu apescu ina apurivucacure, “Dajacu” ayure. Jácacu cūinácu caballo ñemicure. Ñai tubacu úra cuvateame cūináro ducúede corevainore ñi purui. ⁶Jápiacacu apeno yávainore yópe. Jápurateavū ina yóvaicuvaiivū apurivū jēnebore. Yópe arí, coyuávū:

—Cūiná kilo quénora trigo ámicue páu ñaiye bojedarí eaino mávū pōescu cūinájaravure ñi memeiye báque bojeque. Aru yóbecurikilos quénora cebada ámicue páu ñaiye bojedarí eaino mávū pōescu cūinájaravure ñi memeiye báque bojeque. Ubenita ámedabejacu olivo ámicuricu jēidua córore aru vino úyaicorore máre, arí coyuávū.

⁷No yóboi, ñai ovejajicu ñi buraiyede apreyabe jājariyabede, jápiacacu apescu

ina arurivuscasure, “Dajacu” ayure.

⁸Jácacu cūinácu caballo cūrajumescure. Ñai tubacu éra Yaino ámicucu. Aru ñi yóbore dáme cūinácu, Toabo cūimébo ámicucu. Boarí jaruvaicōjeimara mateima ina obedivu pōeva ijāravucavu. Caivu ijāravucavu yópe yóvaicuvaiavu yajuboa teni, yópe cūináyajubocavu boarí jaruvaicōjeimara mateima na boainoque, aru ávnéque, duica ijéque, aru áimara jjesurivunque máre.

⁹No yóboi, ñai ovejājicu ñi buraiyede areyabe jājariyabede, jácacu apevu yaivu bācavu ne ūmene. Caivu ina boarí jaruvaimara mácavure ne coyuiye báque boje Jūmenijicui yāvaiyede, ne ūmene jácacu yu Jūmenijicure jícaiyede juaiva cāchinoi. Dajocabevuva “Jāvemū” arí coyurejaquemavu Jesucristoi yāvaiye méne. ¹⁰Bujíe cođoboborí, yópe aima:

—Mu, ñuje jabocu, caivure cōjeñu, meacu baju, aru jāveque coyuyubu.

¿Joe baju corede đacuyurū mu ñujare “Boropateivubu muja”, mi aiyeta ijāravucavure Jesucristore ju abevure? ¿Aru joe baju corede đacuyurū mu ñujare mi ñájine đaiyeta náre ne boarí jaruvaiye báque boje ñujare? cođoboborí aima na.

¹¹Ina yaivu bācavu jímara mateima ne cuitótecajea boricajeare. Aru coyuímara mateima iye yāvaiyede:

—Jabuóvarā cāreja pu ne boarí jaruvaiyeta caivu ina mujevu memecaivure Jūmenijicure. Boarí jaruvaimara marajárama mujape, Jūmenijicui yāvaiyede coyuiye boje, jápiaima na.

¹²No yóboi, jácacu ñai ovejājicu ñi buraiyede areyabe jājariyabede. Pare cújivavū caino joborō. Avia ñemiteame yópe pōeva ne doiyepe ñeminicajede, orājivu yaivu bācavure. Aru avia ñamicacu júacu bajura bateáme yópe jivepe. ¹³Ina abiacova tuima cavarōre jocarí, yópe jocucu jéidua tuiyepe jocucure jocarí ūmevu pare japuiyede. ¹⁴No cavarō bjavū, yópe toivaiye báque bñaiyepere paperayocare cāriáriburu yóboi. Aru caicúa cūracúa, caiye

jiavua máre jaruvavū die curōre jocarí.

¹⁵Dinumure caivu jabova, aru cōjeivu, churaravai jabova, cūve cūvarivu, parurivu, yebacavu, aru yebacavu ámevu máre dupinanūima cūracobeá jívui aru cūracúa uracúa cūraboá jēneboi máre. ¹⁶Cođoboborí órejaima cūracúa uracúare aru cūraboare máre, yópe arí:

—Tujacūari ñujare. Yavejacūari ñujare ére jocarí, ñai dobacure jabocui dobarō mearo coricacarōra, ñi jámequiyepe aino ñujare. Yavejacūari ñujare ére jocarí, ñai ovejājicu jorojini jāñure. ¹⁷Jave eavū ijāravu parurijāravu, caivu Jūmenijicure ju abevu ne ñájijāravu. Ñame buojarí númenama náre copu, ñai jabocui dobarō mearo coricacarōi dobacure aru ñai ovejājicure máre, arí cođoboboima na, jidurivu.

Juan ñi coyuíno ina ciento cuarenta y cuatro mil paivu Israecavurá

7 ¹No yóboi, jácacu yóvaicuvaiavu ángelevare núrivure maje curijoborō turuvai yóvaicuvaiturava yebai na coapa. Japucōjemeteima náre coapa iye yóvaicuvaiye ūmevure ijāravuquede. Que teni japucōjemeteima joborōre copu, jia uradare copu, aru apecu jocucure copu máre. ²Aru jácacu apecu ángelede muri dayure avia dainocapūravure jocarí. Cuvateame ñi purui ñai Jūmenijicu apucu ñi jáđovare đainore ū jinare. Ñai ángele codoboboame, majicacuyu apevu yóvaicuvaiavu ángelevare, ina Jūmenijicui paruéde jímara mácavure, ne ámedare đarājyepere ayu joborōre aru jia uradare máre. ³Yópe arí, cođoboboame:

—Ámedabejarā cāreja yo joborōre, jia uradare, aru jocucure máre. Yéde ámedabejarā pu ñuje jáđovaiye baquiyéta ina maje jabocu Jūmenijicure memecaivure ne tūtvarā náre coapa, jáđovarajivu náre ū jinare, cođoboborí áme ñai ángele.

⁴Aru jápiacacu aipivu ina obedivu jáđovaimara mácavure ne tūtvarā

Jūmenijicu jinape. Caiyajuboa doce paiyajuboa Israecavure jocarī ciento cuarenta y cuatro mil paivu baju cūteimada. ⁵Judá bācui pāramenacavu doce mil paivu jáđovaimara mateimada. Aru Rubén mācui pāramenacavu doce mil paivu jáđovaimara mateimada. Gad bācui pāramenacavu doce mil paivu jáđovaimara mateimada. ⁶Aser bācui pāramenacavu doce mil paivu jáđovaimara mateimada. Neftalí bācui pāramenacavu doce mil paivu jáđovaimara mateimada. Aru Manasés bācui pāramenacavu doce mil paivu jáđovaimara mateimada. ⁷Simeón mācui pāramenacavu doce mil paivu jáđovaimara mateimada. Leví bācui pāramenacavu doce mil paivu jáđovaimara mateimada. Isacar bācui pāramenacavu doce mil paivu jáđovaimara mateimada. ⁸Aru Zabolón mācui pāramenacavu doce mil paivu jáđovaimara mateimada. José bācui pāramenacavu doce mil paivu jáđovaimara mateimada. Aru Benjamín mācui pāramenacavu doce mil paivu jáđovaimara mateimada máre. Caivu ina jáđovaimara Jūmenijicu jinape ciento cuarenta y cuatro mil paivu baju bateimada na.

**Juan ũi coyūino ina obedivu
Jūmenijicu jina boricajeare doivurā**
(Mt 24.1; Mr 13.19; Jn 1.29, 4.10,
7.37, 10.1-16; 1 Jn 1.7; Ap 21.4)

⁹No yóboi, jácasu obedivu baju pōevare. Ne obedivu cue boje, ñame buojarī corevabejebu náre. Caijaborōacavu, aru caiyajuboa pōeyajuboacavu, caicamua yávaicamuacavu, aru caiimaroacavu máre cūteima na. Núteima no jabocui dobarō mearo coricacarō jipocai aru Cristo, ovejajicu ne aimu, ũi jipocai máre. Caivu ina doima ne cuitótecajea boricajeare. Aru ũjumedua paiyede cūvateima náre coapa ne pūruái. ¹⁰Yópe arī, bujiié codoboboima:

Maje jabocu Jūmenijicu, ñai
dobacu jabocui dobarō mearo

coricacarōra, meadayube
majare. Aru ñai ovejajicu máre
meadayube majare, aima na.

¹¹Caivu ina ángeleva núrivu ina veinticuatro paivu bucava ne yóboi, ina yóvaicuvaivu arurivu ne yóboi, no jabocui dobarō mearo coricacarō yebai, mori tuima ne jivare, mearore jínajivu Jūmenijicure. No jabocui dobarō mearo coricacarō jipocai mearore jima Jūmenijicure. ¹²Yópe arī, mearore jima ũre:

Quédecabu. Maje jabocu
Jūmenijicurecabe caivu ne
mearore jímū, aru ne torojure
đaimu máre. ũrecabe caiyede
coreóvayu. Caivu torojuede
jijjarāri ũre aru puedajarāri ũre.
ũrecabe caiye paruéde cuvacu
aru caiye méne đaiye majicu
máre cainmua. Quédecabu,
aima na.

¹³Aru cūinácu nácasu, ina veinticuatro paivu bucavacacu, yópe arī, jēniari jáme yure:

—¿Ñamema ina pōeva doivu ne cuitótecajea boricajeare? ¿Árocavuba na? jēniari jáme yure.

¹⁴Yópe arī, soyucacu ũre:

—Mū, ji jabocu, majibevu yu.
Murecabu coreóvayu náre, acacu yu.
Aru soyúame yure:

—Nárecabu napivu bācavu ne ñájiye báquede pueno urarō baju. Joquemavu ne cuitótecajeare, bore đarājivu dicajeare ñai ovejajicui jiveque. ¹⁵Que baru núrivu bu Jūmenijicu jabocui dobarō mearo jipocai. Memecavubu ũre ũi cūrami jívuí jāravure aru ñamine máre. Ñai dobacu jabocui dobarō mearo coricacarōra jári coresuyume náre ũi cue boje náque. ¹⁶Aipinumu ñájimenama na ávúena. Aru aipinumu cūñómebu náre máre. Aipinumu aviá bóri émecube náre. Aru aipinumu toaijino máre cārijovamebu náre. ¹⁷Nópe baquiyébu ñai ovejajicu cuvacu jabocui dobarō mearo coricacarō yebai dobacu ũi jári coreiye boje náre. Jipocatecuyume náre oco arure đaioco piaróino curōi.

Tĩrecuyme caiye oride ne yacorware.
Aru torojure ñacuyame náre cainumua,
arĩ coyúame ñai bucucu yure.

**Juan ñi coyũino piniducayabe
jãjariyabena**

(Ap 5.8, 11.19, 16.18)

8 ¹No yóboi Cristo, ovejãicu ne aimu,
burame apeyabe piniducayabe
jãjariyabede diyoca cãriáiyocare jocarĩ.
Ëi buraiyede diyabede, ye yávaino
jãpurabeni, caivu bi aimo no cavarõ
mearo Jũmenijicui curõ coricaorare.
²Aru jãcacu ina siete paivu ángeleva
núrvure Jũmenijicui jipocai. Jímara
mateima siete paiyoa japuiyoare
trompeta ãmicuriyoare náre coapa.
³Apecu ángele dáme. Cuvateame ñi
pũrui cũináru jororu úruque ñaidure
mumijuede adaidure. Darĩ, núteame
Jũmenijicure jãcayede juaiva jipocai.
Jímu mateáme ñi ure mumijuede, ñi
jãcaquiyepa ayu caivu Jũmenijicui põeva
ne boroteiyede úque. Que teni jiame
diede Jũmenijicure iva juaiva úruque
ñavarã Jũmenijicu jabocui dobarõ
mearo jipocai. ⁴Iye mumijue éiyede, bico
muavu Jũmenijicu jipocai ñai ángelei
pũrure jocarĩ. Muavu Jũmenijicui põeva
ne boroteiyede úque. ⁵Aru ñai ángele
nũvari buiváme idu jororure toatũchia,
ñi ñno mãcarõre Jũmenijicure jãcayede
juaivare jocarĩ. Buivãrĩburu yóboi,
dũvame didure joborõi. Ëi dũvayede
didure õpo tuavũ, yávaino bujino
jãpurateavũ, yaroino cojiteavũ, aru
joborõ máre cũjãvũ.

**Juan ñi coyũino iye siete paiyoa
japuiyõa trompeta ãmicuriyoarã**

⁶Dinũmure ina siete paivu ángeleva
cũvarivu siete paiyoa japuiyoare
trompeta ãmicuriyoare meadãima,
japurãjivu diyõare.

⁷Cũinácu ángele nãcacu
mamãrũmũcacu japuáme mamãrũmu
ñi japuiyore. Ëi japuiyede, ocavũ jãjaro
yõpe cũrajiboape, aru toabo jiveque
ocainope tuavũ joborõi. Yõpe yõbecue
coavaiyepa caino joborõre, cũináro

iye yõbecuecarõ éni bĩjavũ. Caiye
yõbecuricua jocucua curĩ, cũinácu éni
bĩjavũ. Aru yõpe yõbecue coavaiyepa
caiye cõriá jũmenicõria máre, cũináro
iye yõbecuecarõ, éni bĩjavũ.

⁸Aru cũinácu yõbocacu ángele
japuáme ñi japuiyore. Ëi japuiyede,
cũinácu cũracũ uracũpe paicũ, éicũ
toaque dũvaicũ mateávũ jia urãðai.
Yõpe yõbecue coavaiyepa caiya jia
urãðare, cũináro iye yõbecuecarõ
jiveteavũ. ⁹Caivu yõbecurã apurivu jia
urãðacavu curĩvu, cũinácu yaiáme. Aru
caiye yõbecuricua jiaðocũ uracũa cœ,
cũinácu bĩjavũ.

¹⁰Aru pũcarãi yõbocacu ángele
japuáme ñi japuiyore. Ëi japuiyede,
cũinácu abiãcoru uracu uruyu tuame
yõpe cãmavepe cavarõre jocarĩ. Caiye
yõbecuriya jia curiyare, cũináðare tuame
ñai abiãcoru uracu. Aru cainoa yõbecurã
oco pãpõino curõare máre, cũinárore
tuame ñi. ¹¹Jũmecu ãmicũteame ñai
abiãcoru. Yõpe yõbecue coavaiyepa caiye
oco ùcuicore, cũináro iye yõbecuecarõ
jũmetavũ. Obedivu põeva yaima, ina
ũcuivu bãcavu die oco jũmene.

¹²Aru yõbecurãi yõbocacu ángele
japuáme ñi japuiyore. Ëi japuiyede ñai
aviá yõbecue coavaiyepa ùre, cũinára
iye yõbecuecarõ ãmedãino mateávũ.
Quéðeca vaiávũ ñai aviá ñamicacure
aru ina abiãcovare máre. Cũináro
ne yõbecuecarõ ãmedãino mateávũ
náre coapa. Que baru caivu ina yõpe
yõbecue coavaiyepa náre, cũináro
iye yõbecuecarõ ñemiteavũ náre
coapa. Yõvaicũvaiora jãrvure ñai aviá
bõbeteame. Aru yõvaicũvaiora ñamine
ina ñamicavu máre pẽometeima.

¹³Aru jãcacu cũinácu mĩyavipe páyure,
águila ãmicũcure. Vuyu bateáme pare
ũmũ, cavarõ corica bajui, aviá ñi curõi
jãravu corica baji. Jãpiacacu ñi yõpe
ainore yávaino bujinoque:

— ãmeno bajutamũ. Ina apenvũ
yõbecurã ángeleva ne japurãjiyede
ne japuiyoare ãmeno baju vaiquĩyebu
ijãravucavu Jesũre ju abevure, arĩ
coðoboboame ñi.

9 ¹Aru yóvaicuvaiuvi yóbocacu ángele japuáme ñi japuiyore. Ñi japuiyede, jácacu cūinácu ángele abiacórupe árojacu tuyu bácure cavarõre jocarí pu joborõita. Jímu mateáme llavede, voacuyu ecoino ñmujuricobede abujuva ne napini coreinoi ecoinore. ²Ñai abiacoru voame no ñmujuricobe ecoinore. Ñi voaiyede nore, toabico etavũ dicobede jocarí. Yópe toabo urarõ uruiyede bico urarõ etaiyepete bateávũ die toabico. Aru die toabico ñemié ture dávu avía ñi boiyede aru ñmevure máre. ³Aru no toabico jocarí mujuñuva darí ñmeima joborõita. Ina mujuñuva paruéde jímara mateima, dorenajivu yópe muriva joborócvape. ⁴Ámedaicójememara mateima caiye cõriáre, caicua jocucvare, aru caiye ape píaiyede máre. Quénora ina jádovamemara mácvure ne tütuvará Jñmenijicu jinape quévura ñájine ñaicójeimara mateima ina mujuñuva. ⁵Ëbenita boarí jaruvaicójememara mateima ina ne dorenajimarare. Quénora ñájine ñaicójeimara mateima náre cūinárupe paiaviava baju. Ina ne doreimara ñájima yópe pōescu ñájiyepete muri doreiyede. ⁶Ina ne doreimara ñájinajarama pare añijāravua baquiyéde. Ne ñamei ñájiye boje, yayurājarama na. Ëbenita yaino jēmequiyebu náre. ⁷Ina mujuñuva ārojateima yópe caballova meadaimara mácvu boarānrajivupe. Ne jipobũ cvateima náre coapa apede yópe jipobũ adaitarabua úruque ñaitarabvape. Aru ne jiva náre coapa ñmuvai jivape ārojateavũ. ⁸Ne poða náre coapa nomivai poðape ārojateavũ. Aru ne cõpiá máre león āmicucu āimacu yavipe páyui cõpiápe ārojateavũ. ⁹Ne ñarebare cvateima náre coapa apede yópe cūmaicajea táucajeape paiyede. Ne caveá máre bujiteavũ yópe pōeva boarānruvũ jāturuicūa caballovaque cūyavũ bujiépe. ¹⁰Ne pícomua náre coapa muri pícomupe ārojateavũ. Aru doreima yópe muri ñi doreiyepete. Ne pícomuaque ñájine ñarí majiteima

pōevare cūinárupe paiaviava baju.

¹¹Ina mujuñuva ne jabocu cūteame.

Ñi mateáme ñai ángele jári coreyu dicobe ñmujuricobede. Hebreovai yávaicamuaque Abadón āmicubi. Aru griegovai yávaicamuaque Apolión āmicubi. Que aino pōevare, ñájine ñayũ aiyrótamu.

¹²Que teiyede, cūináro ñájiovaino vaiávũ. Ëbenita pucarõa javu cāreja.

¹³No yóboi, cūinárupe paivui yóbocacu ángele japuáme ñi japuiyore. Ñi japuiyede, jápiacacu yu cūinácu ñi yávainore. No yávaino etavũ Jñmenijicure jícaiyede juaiva úruque ñaivare jocarí. Diva Jñmenijicu jipocai curivai yóvaicuvaitõbuare jocarí etavũ no yávaino. ¹⁴Yópe arí, coyuvávu no yávaino ñai ángele ñi japuiyore cvacure:

—Jodejacu ina yóvaicuvaiuvi ángelevare buoimara mácvure jia urada Éufrates āmicuriya yebai, arí coyuvávu.

¹⁵Que baru ina yóvaicuvaiuvi ángeleva jodeimara mateima. Meadaimara mácvu batequémavu, boarí jaruvārājivu obedivu pōeva ijāravvcavure. Caivu yajubo curivupe yóbecurāque cūinácu boarí jaruvārājivu bateima na. Meadaimara mácvu batequémavu nópe ñarājivvua cūináora beoiorare, cūinájavu beoijāravure, cūinácu avía beoiviare, aru cūináju beoijure máre. ¹⁶Jápiacacu yu aipivu churarava caballovarā tubarivu ñaivure. Caivu ne obeno doscientos millones paivu cūteimaða na.

¹⁷Yópe decoboinope jácacu ina caballova aru nára tubarivure máre. Ne ñarebare cvateima náre coapa cūmaicajea táucajeare. Jūaro baju toape, jñmeno cavarõre, aru cūrajñmeno azufrepe máre jácacu yu ne cūmaicajeare. Ina caballova ne jipobvua yópe león āmicucu āimacu yavipe páyui jipobvape bateávũ. Aru ne jijecamuare jocarí etavũ toa, bico, aru azufrede máre. ¹⁸Iye toa, bico, aru azufreque

máre boarí jaruvaima na obedivü pöeva ijárvavcavüre. Caivü yóbecurá curivu, cüinácu nácacure boarí jaruvaima ina caballova. ¹⁹Ne boarí jaruvaiye parué cúteavü ne jijecamui aru ne pícomui máre. Ne pícomua yópe ádavape bateávü. Ne pícomuaque cüima pöevare yópe ádavaí cüiyepe, ijide ðarájivü náre.

²⁰Caiye iye vainíburu yóbore, ina pöeva ijárvavcavu yaibévu bávavu cáreja ye jaruvaiyubeteima na ne pèpeimara mácvure. Quénora dajocabeteima ne mearore jíyede abujuvare. Aru dajocabeteima ne mearore jíyede pèpeimara mácvure. Ina pèpeimara mácvü pöeva ne ðaimara mácvübu úruque, aru plataque, bronzeque, cüraboaque, aru jocscuaque máre. Nárecabu yéde jári majibevü aru jápiarí majibevü. Aru cuivü máre buojabema. ²¹Aru chíomevü, ne ámeina teiyede jaruvaiyubevü, oatuvabeteima ne ðaiyede. Dajocabeteima ne boarí jaruvaiyede pöevare, ne yavié teiyede, ne ámeina ðaiyede apévüque némarebücava ánevüque, aru ne ñavaiyede máre.

**Juan ñi coyuíno ángelena ñai
cuvacurá quíjyoca paperayoca
cáriáiycare**
(Hch 4.24)

10 ¹No yóboi, jácasu apescu ángele paruscure, émeñure cavarō mearo Jūmenijicui curōre jocarī. Cūinábo oopenibo cūmavü úre. Cūinácu náme cáteame ñi jírobü pñenoí. Ũi jiva peóávü yópe aviaí pñoiyepe. Aru ñi áraðoa yópe edivea uruiyepe toaque árojae mateávü. ²Cuvateame ñi pñrñi cūináyoca quíjyoca paperayoca cáriáiycare. Diyoca voaiyoca bácarō mateávü. Núteame ñi cuboba mearpūravcascubobaque jia uraðai aru ñi cuboba cācorpūravcascubobaque jaborōi. ³Coðoboboame yávaino bujinoque yópe león ámicscu áimacu yavipe páyui codoboiyepe. Ũi coðoborīburu yóbore, jápiacacu siete painoa ðo tuinoare. ⁴Ōpo

turīburu yóboi, toivajurocu batecácu ne yávainore. Ũbenita jápiacacu apeno yávaino cavarō mearo Jūmenijicui curōre jocarī. Yópe arī, coyúávü yure:

—No yávainore, siete painoa ðo tuinoa coyuíno mácarōre mure toivabejacu mü. Yavejacu caivüre jocarī ne coyuíno mácarōre, arī coyúávü yure.

⁵Dinumure ñai ángele, ji jáimü mácu núcure jia uraðai aru jaborōi máre, jámuóame ñi pñrñ mearpūravcapurñure cavarō mearo Jūmenijicui curōi. Aru yópe arī, coyúáme:

⁶—Jūmenijicurecabe apscu cainmua. Ũrecabe cuedayü bácu cavarōre aru caivü cavarōcavüre aru caiye cavarōquede máre, aru jaborōre aru caivü jaborōcavüre aru caiye jaborōquede máre, aru jia uraðare aru caivü jia uraðacavüre aru caiye jia uraðaquede máre. Ñai Jūmenijicu ðare ðajacurī yópe ji aiyepe: Napini corequiye cubejadeni. Járavu cūiquíyebu.

⁷Quénora apescu ángele, ina siete paivü piniducacu, ñi japurí buiyede ñi japuíyore, Jūmenijicu ðacuyame yópe ñi dápaiye báquepedeca. Ðacuyame yópe ñi jáðovameno mácarōre jírocamia ñi coyuíye báquede ina ñi yávaiyede coyucaipöeva mácvü úre memecaivü bávavüre, arī coyúáme ñai ángele.

⁸Dinumure jápiacacu bediöva cojedeca no yávainore, ji jápaiye báquede cavarō mearo Jūmenijicui curōre jocarī. Yópe arī, coyúávü yure:

—Ícññajacu diyoca quíjyoca paperayoca cáriáiycaya voaiycare ñai ángele núcu jia uraðai aru jaborōi máre ñi pñrñre jocarī, arī coyúávü yure.

⁹Que baru ñai ángele yebai nñri jēniacacu, ñi jíquiyere ayü yure diyoca quíjyocare. Aru úcapūravü áme yure:

—Iycare ñni ájacu. Jūmetequiye bu mi yapibui. Ũbenita mi jijecamure mumícorope émiñquiyebu, áme yure.

¹⁰Diyoca quíjyocare ícscu ñi pñrñre jocarī. Aru ácasu yu. Mumícoro émiññere dápurateavü ji jijecamure. Ũbenita járvóriburu yóboi jámeteavü ji yapibure.

¹¹Dinumure coyuíma yure, yópe arī:

—Jaunv mure mi Jūmenijicui yávaiyede soyucaquiyepe cojedeca ina obedivn ĩmaroacavurã, aru pōeyajuboacavurã, yávaicamuacavurã, aru jabovarã máre, arĩ soyuima yure.

Juan ũi soyuino ina pucarã soyucaipōvara

(Lc 21.24; Ap 6.12, 8.5, 13.5-7, 16.18-21, 17.8)

11 ¹Maje jabocu jiame yure cūinádo corevaiyore yópe abojíoyope paiyore. Aru soyuáme yure, yópe arĩ: —Corevacunujacu mu Jūmenijicui cūramine, aru ũre jícaiyede juaivare aru ina mearore jívure ũre nore máre. ²Ūbenita corevabejacu táibure Jūmenijicui cūrami jedevare, judíova ámevure jíno mácaróre. Ina judíova ámevu bíjarorãjarama no ĩmaro Jūmenijicu jinore cuarenta y dos paiaviava baju. ³Aru yu jarocuyumu pucarã ũmuvare, ne soyucarãjiyepe ayu yurã arevure mil doscientos sesenta paijaravna baju pu arevu náre boarĩ jaruvaiyeta. Ina pucarã dorãjarama cuitótecajearo yópe pōeva ne doiyeye orãjivn yaivn b́acavure, arĩ soyuáme yure.

⁴Ina pucarã soyucaivn ũra, jēvari soyurĩ nárecabu icuá pucasna jocsuca olivo ámicuricua ijāravncavni jabocu jipocarã curicuarpe paivn. Aru jēvari soyurĩ nárecabu ijaraboa pucararaboa pēoibna tuojaraboa ijāravncavni jabocu jipocarã curijaraboape paivn máre. ⁵Ácu pōecu ũi nájine ðaiyurĩduru náre, toa etarĩ ne jijecamure jocarĩ éni bíjaroquiyebu ne mavure. Que baru nópe yainãjarama ñame nájine ðaiyurĩduivn ina pucarãre. ⁶Ina pucarã parué cvarivnbu ocabede ðarĩ buojarãjivn ne soyuiyedeca cãreja Jūmenijicurã. Aru parué cvarivnbu jivetede ðaivn buojarãjivn oco p̄aróinoare. Aru duica ijie cure ðaivn buojarãjivnbu máre ijāravncavure aipino ne uróre. ⁷Ina pucarã ne buojaiyede ne soyuiyede, ñai áimacu jijecucu ámesu muñ ũmujuricobede jocarĩ

ádamatecuyume náre. Ádamateni, vaini turĩ, boarĩ jaruvacuyume náre.

⁸Yaivn b́acavn ne bajuá báque cuquiyebu uraró ĩmarocamara, ne Jesucristore boarĩ jaruvaiĩmaroi, ne pēvaiye báquede ũre jocsucjaravena. Diĩmarore pōeva adama “Sodoma” aru “Egipto” máre, ne jádovarajiyepe aivn aipe ámeno ārojarore no ĩmarore. ⁹Cainoa ĩmaroacavn, aru caiyajuboa pōeyajuboacavn, caicamua yávaicamuacavn, aru caijaborðacavn máre járarama ina yaivn b́acavn ne bajuá báquede yóbecurijāravna corica bajureca. Yuarĩ jaruvaiçójemenajarama na ne bajuá báquede. ¹⁰Ijāravncavn Jesucristore ju abevn torojurãjarama ina pucarã ne yaiye boje. Ina pucarã Jūmenijicui yávaiyede soyucaipōeva mácavn ne ñájine ðaiye báque boje pare ijāravncavn pōevare, nácapuravn torojuve teni jınajarama ne bojecubeda jíyuede ne baju.

¹¹Ūbenita yóbecurijāravna corica bajureca cãreja nore curĩburu yóboi, Jūmenijicu náre nacovari yainore jaruvarĩ, arure ðaquemavn náre cojedeca. Que baru nacajaima ina pucarã. Aru caivn ina jáivn b́acavn nacajaivure cucsumaima pare.

¹²Dinũmure ina pucarã Jūmenijicui yávaiyede soyucaipōeva járiaima apeno yávainore bujinoque, yópe ainore cavaró mearo Jūmenijicui curóre jocarĩ:

—Muri dajarã yui, ávũ náre.

Ne mavai jáiyedeca náre, muri nuima ina pucarã ocopeniboque pu cavaró mearo Jūmenijicui curóita. ¹³Aru dinũmũmiareca joboró cújiavũ pare. Yópe caipucarũuarpe paiye covaiyeye caino no ĩmarore, cūináro iye caipucarũuarpe paiyecaró bíjavũ. Aru siete mil baju pōeva yaima no joboró cújiye boje. Caivn arevn diĩmarocavn aruvivn cãreja cucsumaima pare aru mearore jíma ñai Jūmenijicu cavaró mearocacure.

¹⁴Que teniburu yóbore, pucarõa nájiovainoa vaiávũ caride. Ūbenita cūináro jaunv cãreja. Maumejiena vaiquiyebu no.

**Juan ñi coyũino siete ángeleva
piniducacui japuiyena ñi japuiyo
trompeta ámicuriyore**

¹⁵No yóboi, apesu ángele, ina siete paivu piniducacu, japuáme ñi japuiyore. Ñi japuiyede, yópe arí, coyũima obedivu cavarō mearo Jũmenijicui curōcavu bujiéque:

Caride maje jabocu Cristoque jaboteivubu caivu ijāravucavure. Aru úrecabe jabotecuñu cainũna, arí coyũima na.

¹⁶Dinũmure ina veinticuatro paivu bucava dobarivu jabovai dobarōa mearoai Jũmenijicui jipocai joborōita mori turí mearore jíma úre. ¹⁷Que teni yópe arí, coyũima:

Mũ, ñuje jabocu Jũmenijicu, parucu caivu pueno, cucu caride aru cucu bácu javede, torojuede jívu bu mure. Murecabu jaboteni báyu caivu pōevare mi parué ureque. Que baru torojuede jívu bu mure.

¹⁸Eaivu yo jāravu mi jáđovaijāravu mi jorojini jáiyede pōeva ne ãmeina teiye boje. Eaivu yo jāravu mi jári corevaijāravu caivu ina yaivu bácvure ne ñaiye báquede. Que baru caivu ijāravucavu mure ju abevũ jijateima pare. Caride eaivu yo jāravu mi bojedaijāravu pōevare ne ñaiye báque bojede. Me bojedacuñũmu mũ caivu mure memecaivure, ina mi yávaiyede coyũaipōevare aru mi pōevare, ina mure pueđaiivure máre, quíjinare aru bucavare máre. Aru bíjaroquijivu mũ caivu ina ijāravucavu arevure ñájine ñaiivure, arí coyũima na.

¹⁹No yóboi, Jũmenijicui cũrami, cavarō mearo ñi curōi curiñami voavũ. Nore jáino mateávũ ãnitōcu ina judfovai adaitōcure iveá cũravea Jũmenijicu “Yópe ñacacuyũmu yu mũjare”, ñi arí toivaiye báque curitōcure. Aru yaroino cojiteavũ, yávaino bujino jápurateavũ, oþo tuavũ, joborō cújivavũ, aru ocaino jájaro yópe cũrajiboape tuavũ máre.

**Juan ñi coyũino nomióra aru
ãijuacurã máre
(Lc 10.18; Jud 9)**

12 ¹No yóboi, cũináro jáđovaino urarō jároteavũ cavarōi. Jároteaco cũináco nomió cũmaimo máco aviáque yópe cuiótotecajede cũmaiyepe. Núteaco aviá ñamicacu puenora. Ñi jipobui cúteavũ jipobu adaitarabu doce paivu abiácovaque. ²Micaco, jueđocuvacodo bateáco maumejiena. Que baru pare odo bateáco, óre ijíe boje. ³Aru jácacu. Apeno jáđovaino urarō jároteavũ cavarōi. Jároteame cũinácu ãijuacu uracu baju. Siete paibua jipobua cucu bateáme caipucapũruape pajavaroaque. Cúteavũ ñi jipobua coapa cũinátarabu jipobu adaitarabu. ⁴Ñi pícomuque jabũboame obedivu abiácovare cavarōre jocarí pu joborōita. Caivu yóbecurã abiácova curivu, cũinácuere jabũborí ture dáme ñ joborōita. Ñai ãijuacu mauteame ico nomió jipocai, acũyu ñi jueđocuvacojimure mama pōteyũra. ⁵Ico nomió jueđocuvateaco mamacu ñmũjicure, jabotecuyure caivu pōevare paruéque, yópe ñi cuvajuroepe abođo táuque ñaiyore. Que baru ñame ñabejebu yópe ñi cōjeiyepe. Ubenita ñai jueđocu ñni nuvaimũ mateáme pu Jũmenijicu yebaita, jabocui dobarō mearoita. ⁶Aru ico nomió dupini nuaco pōecubenoí, Jũmenijicui óre meadacaino mácarōi. Nore ñiye jímo macodóme o mil doscientos sesenta pajjáravu baju.

⁷No yóboi, áđamateino mateávũ cavarō mearo Jũmenijicui curōi. Ángelevai jabocu ñi ãmiá Miguel ñi ángelevaque áđamateame ñai ãijuacure. Aru ñai ãijuacu máre ñi ángelevaque áđamateniduame Miguejäre copũ.

⁸Ubenita ãijuacujácupũravu ye vainí tubeteima na, Miguejácupũravure. Que baru ãijuacujäre cavarō mearo Jũmenijicui curōre mauteicōjememara mateima na cãreja. ⁹Que baru ñai ãijuacu uracu ne jaetovaimũ mateáme cavarō mearo Jũmenijicui curōre jocarí.

Érecabe añu ãijuacu javecaçu ñi ãmiá Satanás, abujuvai jabocu. Érecabe jujovayu caivu ijáravucavure. Ñi ñi ángelevaque, nárecabu ñi jaetovaimara mácavu cavarõ mearo Jñmenijicui curõre jocarí pñ joborõita.

¹⁰Dinũmure jápiacacu apeno yávainore bujinoque, yópe ainore cavarõ mearo Jñmenijicui curõre jocarí:

—Caride jave eavũ Jñmenijicui meadaijáravũ põevare. Jñmenijicu jádovaimi ñi paruéque ñi jaboteiyede. Cristo máre jádovaimi ñi paruéde. Caride jaetovaimume cavarõ mearo Jñmenijicui curõre jocarí abujuvai jabocu, ñai boro coyurí adaipõescu bácu majevũ Jesucristore ju aipõevare. Jipocamia ñai núcu bateáme Jñmenijicu jipocai, boro coyurí adacuyũ náre járavure aru ñamine máre. ¹¹Cristo, ñai ovejájicu ne aimũ, ñi jive meiyebáqueque bojedarejaquemavũ majevũ Jesucristore ju aipõevare ne ãmeina teiyede. Ne ju aiyequo vainí tuyama ñai abujuvai jabocure. Aru coyũima Jñmenijicui yáviayede dajocabevũva “Jávemu” ne aiyede Jesucristo yáviaye méne. Aru iye ne yáviaye méne coyũiyequo máre vainí tuyama ñai abujuvai jabocure. Boarí jarũvarájimaravacari ne nópe bueiyebõje Cristo jiede, nácapũravũ buede nuivũ bateima ñi jiede dajocabevũva. Que baru jecubeni ne baju apuéde ijáravũ, jidũbevũva napini coreima ne yainájinore. Que baru boro coyurí adaino cubevũ náre corũ caride. ¹²Que baru torojue cuquiyebu cavarõ mearo Jñmenijicui curõi. Torojujará muja cavarõ mearo Jñmenijicui curõcavũ. Ñbenita pare chiorajarama ijáravucavũ, ina joborõi curivũ aru ina jia uradaí curivũ máre. Ñai abujuvai jabocu ãmeimi muje yebai jarayũ baju, ñi coreóvayibe boje maumejiẽna ñájicuyure.

Nópe jápiacacu yu.

¹³Ñai ãijuacu ñi coreóvayibede ñi baju ne jaetovaimũ márcure joborõita, cujuáme ico nomióre, mamacure juecõcuvaco bácore. ¹⁴Ñbenita

ócapũravũ jĩmo mateáco pũcacavea, míyavipe águila ãmicũcui caveáre, vũcõdo põescubenoĩ, Jñmenijicui óre jĩno mácarõre õi curõita ãijuacure jocarí joaita. Nore ãiye jĩye jauquiye bateávũ óre yõbecuriujua aru arejũ corica baji. ¹⁵Dinũmure ñai ãijuacũcapũravũ jẽcuturi japurí jaroáme urarõ ocure ñi jijecamure jocarí yópe jiapere, õi mũicojiiyepere arĩduyũ óre, õi bíjacojiiyepere arĩduyũ. ¹⁶Ñbenita yo joborõ cadateavũ óre. Yo joborõ járuõiyepere dāvũ iye urarõ ocure, ñai ãijuacu jẽcuturi japurí jaroibe báquede. ¹⁷Que baru ñai ãijuacu pare jijateyũ óre, ãdamatecũũname caivũ arevũ õi páramenaque corũ. Nárecabu caivũ ina ju aivũ Jñmenijicui ãaicõjeiyede aru dajocabevũva coyũivũ Jesús ñi yáviayede jávene pñ arevũ náre boarí jaruvaiyeta. ¹⁸Aru ñai ãijuacu núscũũname ãpacũra jia urada écarui.

Juan ñi coyũino ina pũcará ãimara jijecurivũrã

(Mt 24.24; 2 Ts 2.9-10; Ap 3.5, 17.3, 7-12)

13 ¹Dinũmure jácacu cũinácu ãme ãimacu jijecũcure mũri dayure jia uradare jocarí. Siete paibua jipobua cũcu bateáme caipũcapũũpũre pajjavaroaque. Cáteavũ ñi javaroa coapa cũinátarabũ jipobũ adaitarabũ aru ñi jipobua coapa ãmiá ãmeãmiare toivaino mácarõ. No ãmiá cojubeteavũ Jñmenijicure. ²Ñai ji jáimũ yópe ãrojateame: Yavipe páyũ bateáme ñi baju. Ñi cuboba miei cubobape bateávũ. Aru ñi jijecamu ãimacu jijecũcũ leõn ãmicũcui jijecamure bateávũ. Ñai ãijuacu jiame ñi paruéde ñai ãimacure. Dobaicõjeame jabocui dobarõ mearora. Aru jaboteicõjeame ãre obedivũ põevare. ³Ñai ãimacure, cũinábu ñi jipobuacabu yaivájũrorichuri bácarõ curõ ãrojateavũ. Ñbenita no churi bácarõvacarí paparí meateavũ. No churi meateinore jáivũvata, caivũ ijáravucavũ Jesúre ju abevũ pare cuezumaima. Aru mũima na ñai ãimacu yóboi, ne ju aiyebõje ñi bueiyede. ⁴Coreóvaima na ñai ãijuacu jĩyũ bárcure ñi paruéde ñai ãimacure.

Que baru mearore jíma ñai ãijuacure.
Aru mearore jíma ñai ãimacure máre.
Yópe arí, mearore jíma na:

—Apecu cubebi parucu ñai ãimacupe páyu. Ñame maucubarí, ãdamateni vainí tuiyu buojabenama úre, aima na.

⁵Ñai ãimacu coyuicójeimũ mateáme, “¿Meacu bária yu apecu pueno?” acuyu aru ãmeina yávacyu Jümenijicure máre. Aru jaboteicójeimũ mateáme cuarenta y dos paiaviava baju. ⁶Que baru ãmeina yávame Jümenijicurã, aru ñi cüramina, aru caivu ina cavarõ mearo Jümenijicui curõi curivurã máre. ⁷Ádamateicójeimũ mateáme Jümenijicui pöevare copu ñi vainí tuiyeta. Aru jaboteicójeimũ mateáme caiyajuboa pöeyajubocavure, aru caimmaroacavure, caicamua yávaicamuacavure, aru caijaboröacavure máre. ⁸Ñai ãimacure mearore jínajarama caivu ijãravucavu Jesúre ju abevu. Námu ne ãmiäre toivabemara mácavu ãnitucubo paperatucuboi, caivu ina jãravu cüiméjãravu baquinóre cvarãjivure ne ãmiäre toivaitucuboi. Ditucubo Cristo, ovejajicu ne aimu, ñi tucubobu. Ñai ovejajicu ne boarí jaruvaimu macuyúre Jümenijicu majidejaquemavu ñi cuedaquie jipocai ijãravure.

⁹Caivu me jápiajarã. ¹⁰Ina buoimara marajivu, jáve buoimara marajárama na. Aru ina boarí jaruvaimara marajivu, jáve boarí jaruvaimara marajárama na.

Que baru caivu Jümenijicui pöevare jáve ne napiye jauquiyebu caye ne ñãjiyede. Aru jáve ne ju aye jauquiyebu náre dajocabevuva Jümenijicui coyuie báquede ñi mearo ñacaquiyede náre.

¹¹No yóboi, jácacu apecu ãme ãimacu jijecucure muri dayure joboröre jocarí. Pucarõa javaroa cuvateame yópe ovejai javaroape. Ubenita yávame yópe ãijuacui yávaiyepu. ¹²Ñai ãimacu jia uradare jocarí dayu bácu cuvateame ure paruéde. Caiye ñi paruéde cuvateame ñai ãimacu joboröre jocarí dayu bácu. Ñai jia uradare dayu bácu jáinoi ñai joboröre dayu bácu jaboteame ure

paruéque. Caivu ijãravucavu Jesúre ju abevure mearore jíde ñame ñai jia uradare dayu bácu, ñai churi meateino mácaröre cuvacure. ¹³Aru ure pöeva ne ñarí majibede máre ñame ñi. Toabore jödaicójeame cavaröre jocarí pu joborõita caivu pöeva ne jáinoi. ¹⁴Pöeva ne ñarí majibede ñaicójeimũ mateáme ñi ñai jia uradare dayu bácu jáinoi. Yópe ñarí jujovame caivu ijãravucavu Jesúre ju abevure. Ñaicójeame náre, ne pöeimure ne puedarãjiyepu ayu ñai ãimacu apucure cãreja, buraimu mácureca boaicaroveque. ¹⁵Ne pöeimure ñaríburu yóboi, ñai joboröre dayu bácu ñmene jauicójeimũ mateáme pöeimure, yávayu ñi buojaquiyepu ayu aru boarí jaruvaicójeñu ñi buojaquiyepu ayu caivu ina mearore jyubevure úre.

¹⁶Toivaicójeame caivu pöevare ne puru meapüvarã o ne tütvarã. Quíjinare aru bucuvare máre, cuve cvarivure aru cuve cuvabevure máre, yebacavure aru yebacavu ãnevure máre, caivure toivaicójeame ñi. ¹⁷Acu pöecu cuvabecu baru no toivainore, bojedarí ñnu aru jni bojedayu máre buojabeteame. No toivaino mateávũ ñai jia uradare dayu bácu ñmiá o yo número ñi ñmiáque curõ. ¹⁸Majie javu ñi coreóvayucure nore. Ñai coreóvayu corevajacurí ñai ñme ãimacu jijecucui número. Yo númerobu pöecu número. Yo númerobu seiscientos sesenta y seis.

Juan ñi coyuino ina ciento cuarenta y cuatro mil paivu baju yuriaivurã
(Stg 1.18; Ap 7.3)

14 ¹No yóboi, jácacu cojedeca. Jácacu Cristore, ovejajicu ne aimu, núcure Sión ñmicuricü cãracüi. Aru úque cúteima obedivu pöeva, ciento cuarenta y cuatro mil paivu baju. Nárecabu cvarivũ ñi ñmiäre aru jípacui ñmiäre máre toivaino mácaröre ne tütvarã náre coapa. ²Que teni jápiacacu cüináro bujinore cavarõ mearo Jümenijicui curõre jocarí. Jápurateavũ yópe cãratãcuvu uratãcuvu bujinope aru yópe öpo tuino pueno baju

bujinope. Yópe obedivü biabeiboare arpa ámicuriboare ne upaiye bujiépe jápurateavü no bujino. ³Ina ciento cuarenta y cuatro mil paivü baju pöeva yúriaima yo yúriaino mamarore no jabocüi dobarö mearo coricacarö jipocai, ina yóvaicüvaivü arüvü aru ina veinticuatro paivü bucüva ne jáinoi. Ina ciento cuarenta y cuatro mil paivü baju ijárvücvü Cristoi meadaimara mácvü quévüra yúriarí majiteima no yúriaino mamarore. Apescu cubebi yúriarí buojayü nore. ⁴Inarecabu ámetebevü bácvü nomivaque. Nomivaque cubeteima na. Nárecabu nüvü ñai ovejajücvü yóboi ári üi nüinoi. Nárecabu bojedaimara mácvü caivü ijárvücvü jéneboi, jínajimara márajivü Jümenijicü aru ñai ovejajicü máre yópe jéidua mamarücvü bucüidua püeno mearüa jíyere. ⁵Nárecabu ye borocübevu aru ye ámeno cubevü máre cainücvü.

Juan üi coyüino yóbecurá ángeleva ne coyüiyena

(Ap 10.6, 16.19, 18.2)

⁶No yóboi, jácacu apescu ángele, vüvüve pare ümüi, cavarö coricai aviá üi curöi járvü corica bají. Coyüáme iye coyüiye cüiméne cainücvü caivü ijárvücvü ne járiaiyede. Coyüáme caijaboröacavüve, aru caiyajuboa pöeyajuboaacavüve, caicamua yávaicamuacavüve, aru caímaroacavüve máre. ⁷Yópe arí, coyüáme yávaino bujinoque:

—Puedajará Jümenijicüve. Mearore jíjará üre üi püeno majié boje. Eaiüvü iora pöevare üi ñájiovaquiora ne ámeina teiye boje. Que baru mearore jíjará ñai dayü bácvüve cavaröre, aru joboröre, jia uradare, aru oco píaróinoare máre, arí coyüáme ñai ángele.

⁸Apescu ángele dáme üi yóboi, yópe arí coyüvü:

—Jave bíjaiüvü no ímaro urarö Babilonia ámicurö. No ímarocavü ne pare ámeina ðaiye báque boje aru ne pare ámeina ðare ðaiye báque boje

caivü ijárvücvü Jesucristore ju abevüve caijaboröai, bíjare ðaimaramu na, arí coyüáme ñai ángele.

⁹⁻¹⁰Apescu ángele dáme ina pücará yóboi, yópe arí, yávaino bujinoque coyüáme:

—Pare ñájinajarama caivü ina mearore jívü ñai áme áimacü jijecücvü jia uradare dayü bácvüve aru üi pépeimüve máre, aru ina toivare ðaicöjeivü ne tütüvará náre coapa aru ne pürürá máre üi ámiáque o üi númeroque máre. Ne que ðaiye boje, Jümenijicü pare jorojüni jáñü náre, ñájine ðacüvüve náre pare yópe üi aiyé báquepedeca. Que tení éocüvüve náre azufre ámicüve täu uruino jívüi, üi ángeleva meara baju aru Cristo, ovejajicü ne aimü, máre ne jáiyede. ¹¹Ibo toabo náre ñájiovaibore jocarí bico porí müivü cainücvü. Que baru cüiméquiyebo ne ñájíye. Quénora jabüóvabevüva ñájinajarama járvüve aru ñamine máre caivü ina mearore jívü ñai jia uradare dayü bácvüve aru üi pépeimüve máre, aru ina toivare ðaicöjeivü ne bajure üi ámiáque, arí coyüáme ñai ángele.

¹²Que baru Jümenijicüi pöeva, ina ju aivüve üi ðaicöjeiyede aru ju aivü Jesúve máre ðajocabevüva ne ju aiyede ére cainücvü, nácapüravüve jáve ne napiye jauquiyebo ure ne ñájíyede.

¹³Dinücvüve jápiacacü cüináro yávainore cavarö mearo Jümenijicüi curöre jocarí. Yópe arí, coyüávü yure:

—Yópe arí, toivajacü mü: “Caride aru cainücvü torojurájarama caivü yainájivü curivü Jesucristoque cüinárvüve”, toivaicöjeame yure.

Aru ñai Espíritu Santo ju arí coyüáme:

—Jävemu. Cüivü ne ñájíye. Quénora jabüóvarájarama. Dajocarájarama ne pare memecaiyede. Aru cüvarájarama ne memecaino mácarö boje méne, arí coyüáme ñai Espíritu Santo.

Juan üi coyüino Jümenijicüi ðaquinora ijárvücvüve yópe pöeva ne ðaiyepe ínajivü ne oteiye báquede

(Ap 19.15)

¹⁴Dinücvüve jácacü cojedeca. Cúteavü cüinábo ocopenibo boribo. Aru díborá

dobateame cūinácū. Maja, pōevape ārojacu bateáme ũ. Cuvateame cūinátarabū jipobū adaitarabū úruque đaitarabure ũi jipobūi. Aru đuruáme cūináve táuve oteiyede buraive jevucurivede ũi purui. ¹⁵Dinumure apescu ángele etame Jūmenijicui cūramine jocarī. Yópe arī, yávaino bujinoque coyúame ñai dobacure ocopeniborā:

—Jave eaivū iye oteie jējīaravū. Iye oteie ijāravūi bucuiyebu. Que baru burarī ijacu mū iye oteie bucuiyede, arī coyúame ñai ángele.

¹⁶Ūi que aiyeda, ñai dobacu bácu ocopeniborā burarī íame caiye iye oteie bucuiyede ijāravure jocarī.

¹⁷No yóboi, apescu ángele etame Jūmenijicui cūramine jocarī no cavarō mearo ũi curōi. Ū máre cuvateame cūináve táuve jēidure buraive jevucurivede ũi purui. ¹⁸Dinumure apescu ángele, ñai toare jārī coreyū, etame Jūmenijicure jícaiyede juaivare jocarī. Yópe arī, yávaino bujinoque coyúame ñai ángele ive táuve oteiyede buraive jevucurivede cuvacure:

—Iboá vino úyaiboa ijāravucaboa ñemiboabu caride. Que baru burarī ijacu mū iboá vino úyaiboa ñemiboare, arī coyúame ñai ángele.

¹⁹Ūi que aiyeda, ñai ángele ive táuve oteiyede buraive jevucurivede cuvacu burarī íame caiboa iboáre nēmure vino úyaimure jocarī. Burarī íniburu yóboi, đuvame iboáre pipoino jívu. Yópe đarī Jūmenijicu, pare jorojīni jāñū, ñájine đacuyume obedivū pōevare, ne ámeina teiye boje. Que aiyurōtamū no. ²⁰Yópe vino úyaiboare pipoicorore yuaiyepē, nopedeca Jūmenijicui ñájine đaimara ñájima ímaro jedevai. Aru ne jive etaiyede yuarī yabovaiyepē ñuavū pū trescientos paikilometros joaita aru eavū caballovare cōjeimeita.

Juan ũi coyūino iye siete paiye ñájiovaiye yóboquede

15 ¹Dinumure jácacu apeno jáđovaino urarōre cavarōi.

Cuecumacacu ji jáiyede nore. Cáteima siete paivū ángeleva cuvavivū náre coapa siete paiye ñájiovaiye yóboquede. Iye siete paiye ñájiovaiye vainíburu yóboi, Jūmenijicu ye ñájine đabecūbe pōevare cojedeca. Iye siete paiye ñájiovaiyeque Jūmenijicu buojacuyume ũi jáđovaiyede ũi jorojīni jáiyede.

²Aru jácacu apedare yópe jia urada jivarupe ũbenita me jārī javaiyoia bateávū. Aru toaque jívainope ārojateavū diya jívu. Diya écarūi núteima ina vainí tuiyvū bācavū ñai áme aimacu jíjecucu jia uradare dayū bācure. Vainí tuima úre ne mearore jíbe báque boje úre aru ũi pēpeimure máre. Vainí tuima úre ne toivaicōjeme máque boje ne bajurā yo número ũi ámiáque curōre. Ina vainí tuiyvū bācavū cuvateima biabeiboare arpa ámicuriboare, Jūmenijicui jíboare, ne purui cuvavivū náre coapa. ³Yūriaima na yo yūriaino Moisés bácu Jūmenijicure memecayū bácu yūriaino mácarōre aru Cristo, ovejajīcu ne aimū, ũi yūriainore máre. Yópe arī, yūriaima na:

Mū, ñuje jabocu Jūmenijicu, parucu caivū pūeno, caiye mi đaiye ũrebu aru cuavaiyebu máre. Mū jaboteyūbu caivū pōevare, caijaborōacavure. Caiye mi đaiye mému aru javemu máre. ⁴Mū, ñuje jabocu, caivū pōeva pueđarājaramū ñuja mure jáve. Caivū pōeva mearore jínajaramū ñuja mure jáve. Mū cūinácuvurū meacu. Caivū pōeva caijaborōacavū mure mearore jínadarājarama ne jáiye boje mi đaiye méne, arī yūriaima na.

⁵No yóboi, jácacu Jūmenijicui cūramine, cavarō mearo ũi curōi curiñamine voaiñamine. Diñamimū iveá cāravea Jūmenijicui đaicōjeiyeque epeiñami. ⁶Dinumure ina siete paivū ángeleva cuvavivū náre coapa iye siete paiye ñájiovaiyede etaima diñamine jocarī. Doima ne cuitótecajea docucubecajea, cojídicajeare, boricajea lino ámicuricajeare. Aru buoima

jārióicāva úruque ðaicāvare ne ñareba cūináturu baji. ⁷Aru cūinácu ina yóvaicvavaivü arurivucacu jīame ina siete paivü ángelevare siete paidua jororua úruque ðaiduare náre coapa. Diduá jívui cúteavü iye Jūmenijicui ñájiovaquiyē pōevare, ũi jorojīni jāiye boje ne āmeina teiyede. Nai Jūmenijicu cūbi cainūma. ⁸Aru Jūmenijicu meacu ũi cūe boje, aru ũi parué cūvae boje máre, bico porí mūri buiávü diñami ũi cūramine. Que baru ñame buojabeteima ecoivü diñami Jūmenijicui cūramine pu ne buojaiyeta iye siete paive ñájiova iyede ina siete paivü ángeleva ne davarājiyede.

Juan ũi coyuino iduá jororuarā ñájiova iyede

(Mt 24.43-44; Lc 12.39-40; Ap 3.3, 6.14, 8.5, 11.13, 19, 14.10)

16 ¹Dinūmure jápiacacu apeno yávaino bujino etaiyede Jūmenijicui cūramine jocarī. Bujiéque yópe arī, coyuávü ina siete paivü ángelevare.

—Iduá siete paidua jororua mujē cūvariduaquede jayuárī jebenanujara mūja ijāravui. Jūmenijicu ñájine ðacuyume ijāravucavu Jesucristore ju abevure iye siete paive ñájiova iyede ũi jorojīni jāiye boje ne āmeina teiyede, arī coyuávü.

²Que arīburu yóboi, cūinácu ángele, nácacu mamarūmūcacu, jayuárī jebecūnūame ũi jororui cūe báquede joborōi. ũi que ðaiyede, obedivü pōevare etavü churiá āmechuria. Caivü ina toivaicōjeivü bācavure ne bajurā ñai āme āimacu jijecūcu jia ũradare jocarī ðayü bācui toivaiyequede aru mearore jívü bācavure ũi pēpeimure máre etavü náre churiá āmechuria aru āmeina ijíé máre.

³Aru cūinácu yóbocacu ángele jayuárī jebeáme ũi jororūquede jia ũradai. ũi que ðaiyede, caiye oco jia ũradare jiveteavü yópe yayíyú bācui jivepe. Aru caivü ina arurivü curivü jia ũradai yaima na.

⁴Aru pūcarāi yóbocacu ángele jayuárī jebeáme ũi jororūquede caiye jiare aru cainoa oco pīapóinoare máre. ũi que ðaiyede caiye iye oco máre jiveteavü. ⁵Dinūmure jápiacacu apacu ángelede, ñai ocore jári coreyure, yópe arī coyuayure:

—Mū, Jūmenijicu meacu baju, cūcu caride aru cūcu bācu javede, mi yópe ñájine ðaiye báque pōevare métamu caride. ⁶Ne boarī jarūvaiye báque boje mi pōeva mácavure aru mi yáva iyede coyucaipōeva mácavure máre, ne jivede mene ðaiye báque boje ne ñájiye métamu. Que baru caride murecabu bojedayü náre, ne nópe ðaiye báque boje. Murecabu ũcure ðayü náre jivede yópe náre jauépe, arī coyuáme ñai ángele.

⁷Dinūmure jápiacacu cojedeca apeno yávaino jápuraede Jūmenijicure jicaiyede juavare jocarī. Yópe arī, coyuávü:

—Mū, ñūje jabocu Jūmenijicu, parūcu caivü pūeno, mi ñájine ðaiye pōevare mému aru jávemū máre, arī coyuávü.

⁸Aru yóbecurāi yóbocacu ángele jayuárī jebeáme ũi jororūquede aviárā. ũi que ðaiyede, ñai avia bórī, éni, juaicōjeimū mateáme pōevare yópe toa éiyepē. ⁹ũi ũrarō éiye boje, caivü pōeva ijāravucavu Jesucristore ju abevü juaimara mateima na. ũbenita juaimara mácavūvacari, chíomevü ne āmeina teiyede oatūvabeteima na ne ðaiyede. Aru ye mearore jíbeteima na Jūmenijicure máre. Quénona pūeno baju āmeina yávare ñuima Jūmenijicure, ñai paruéde cūvacu ðayure iye ñájiova iyede.

¹⁰Aru yóvaicvavaivü yóbocacu ángele jayuárī jebeáme ũi jororūquede ñai āme āimacu jijecūcu jia ũradare jocarī ðayü bācui jabocui dobarō mearora. ũi que ðaiyede ñemié tuavü caino ñai āimacu ũi jaboteinore. Aru caivü ũi jaboteimara cūivü bateima ne baju ne jemedoare, pare ne ñájiye boje.

¹¹ũbenita ñájivūvacari aru āmechuriare cūvarivūvacari, dajocabeteima ne āmeina ðaiyede. Quénona ne ñájiye boje aru ne churiáre cūvae boje máre pūeno

baju ámeina yávere nuima Jūmenijicure, cavarō mearocacure.

¹²Aru cūinápurupe paivni yóbocacu ángele jayuárī jebeáme ũi jororūquede iya Éufrates ámicuriya jia uradarā. Ũi que daiyede, diya jia popoávū, ina aviá dainocavū jabova ne jatarājiyepa aino diyare. ¹³Dinumure jácacu yóbecurā abujuvare yópe momavape ārojarivure. Cūinácu abujucu etame ũai āijuacu ũi jijecamure jocarī. Apecu etame ũai áme áimacu jijecacu jia uradarā jocarī dayu bácu ũi jijecamure jocarī. Aru apecu etame ũai Jūmenijicui yávaiyede coyūcaipōdescupe teyū, borocueda coyūyū, ũi jijecamure jocarī. ¹⁴Ina abujuva pōeva ne đarī majibede đaiye majiteima na. Etaivū bateima cójijovarānurajivū caivū ijāravucavū jabovare, ne áđmatenajiyepa aivū Jūmenijicūque, ũai parūcure caivū pueno, ānijāravū, ũi pōevare pueno baju ũājiovere buojaquijāravū baquinóre, ne ámeina teiye báque boje. ¹⁵Yópe arī, coyúáme Jesucristo:

—Muje yebai dacuyūmu muje majibedeca yópe ũavaipōdescui daiyepa cūrami upacui majibedeca. Torojuycuyūme ũai apūcu jári coreyū yure. Aru yópe pōescui meadaiyepa ũi cuitótecajeda cūyoje tebecuyū ũi cuitótecaje cube boje, nopedeca torojuycuyūme ũai meadayū ũi daiyede cūyoje tebecuyū ji daiyede, áme Jesucristo.

¹⁶Ina jabova, abujuva ne cójijovaimara, cójijima na apeno curōi, hebreovai yávaicamuaque Armagedón ámicurōi.

¹⁷Aru apecu ángele, ina siete paivū piniducacu, jayuárī jebeáme ũi jororūquede ũimevurā. Ũi que daiyede etavū apeno yávaino bujinoque no jabocui dobarō mearo coricacarō yebai Jūmenijicui cūramine jocarī. Yópe arī, coyúávū:

—Quénoramū, arī coyúávū.

¹⁸Dinumumia yaroino cojiteavū, yávaino bujinoque jápurateavū, ōpo tnavū, aru urarō joborō cújivū máre. No joborō cújino ámeno

mateávū cainoa apenoa joborō cújinoa pueno, Jūmenijicui pōevare cuedainumū mácarōmiata. ¹⁹Que teni no uraīmaro mácarōre bururī, bururī yóbecurōcarōape mauteavū no mácarō. Caiye ĩmaroa ijāravūque bújainoa mateávū. Aru Jūmenijicū ārūtequemavū no ĩmaro urarō Babilonia ámicurōre. Que baru bojedame nócavure ne ámeina đaiye boje. Pare jorojīñū, ũājine đáme náre pare. ²⁰Caiye jiaivū aru caicūa cūracūa máre bújavū. ²¹Aru cavarōre jocarī tnavū ocaino jájaro urarō baju yópe cūraboape. Diboá coapa cuarenta paikilos đucurīboa bateávū. Tnavū pōevara, ijāravucavū Jesucristore ju abevure. Ũbenita nácapūravū, ũājivūvacari diboá tuiye boje, pueno ámeina yávere nuima na Jūmenijicure, iye ũājiovaiye pare ũājine đaiye boje náre.

**Juan ũi coyūino ico nomió ámece
baju ōi ũājiyena**

(Ap 3.5, 11.7, 13.1, 8, 19.16)

17 ¹No yóboi, cūinácu ina siete paivū ángeleva iduá siete paidua jororūare cūvarivū bácvucacu coyūcudame yure. Yópe arī, coyúáme:

—Dajacu. Jáđovacuyūbu mure aipe ũājicođore ico nomió ōi bajure bojedáđo ũmūvare urarō ámenore đacođo náque. Órecabe dobaco obediya jia puenora.

²Caivū ina jabova ijāravucavū ōi đaiyepedeca đaiyurivū bateima, yópe ne ámeina đájuroepe óque. Jūmenijicū jiede ubeteima. Yópe ōi pacotede đájuroepe ijāravucavū Jesucristore ju abevure aru yópe ōi ámeina đare đájuroepe náre máre, nopedeca náre pare baju ámeina đaiyure đáco ō. Que baru náre ámeina đare đáco ō, áme ũai ángele.

³Dinumure ũai Espiritu Santo jáicōjeame yure. Que teiyede ũai ángele nūvame yure pōescubenoī. Noi jácacu cūináco nomióre. Ō tubaco bateáco áme áimacu jijecacu júacurā. Ũi baju caibaju toivaino mateávū ámiá ámeina yávaiámiaque Jūmenijicure copū. Siete

paibua jipobua cúteame caipucapũruape pajavaroaque. ⁴Ico nomió doaco bateáco òi cuitótecaje jũaricaje aru ñemijuaricajede. Òi bajure meatedo báco bateáco úruque, aru quíjiboa cũrajiboa cojidijiboa bojecurijiboaque aru perla ámicurijiboaque máre. Cuvateaco òi purui cúináru jororu úruque ðaidure. Didu jívure buiávũ caiye ámeina ðaiye, aru caiye òi bajuque pũeno ámene ðaiye báque máre. ⁵Òi tũtũvará toivaino cúteavũ cúináro ámiá: “No urarò ìmaro ámiá Babilonia aino, yópe aiyurò mateávũ no. Caivu ina ne bajure bojedaivu ámeina ðaräjivũ apevuque népacope páðobe. Caivu ijãravũcavũ Jesucristore ju abevũre cainoa joborõai urarò ámeina ðare ðadobe”, ainore toivaino mateávũ òi tũtũvarã.

⁶Dinumũre coreóvacacu ico nomió boarí jaruvado bácore obedivu ina Jũmenijicui põevacavũre. Yópe òi torojũjũrope pacoco baru, nopedeca torojuteaco ò òi mene ðaiyede ne jivede òi boarí jaruvaiyede náre. Náre boarí jaruvaco, ne coyũiyede báque boje Jũmenijicui yávaiyede ðajocabevũna ne “Jãvemũ” aiyede Jesucristoi yávaiyede méne. Que baru pare cuecumacacu yũ.

⁷Dinumũre ñai ángele, yópe arí, jẽniari jáme yũre:

—¿Aipe teni cuecumãũru mu?

Coyũquijivũ mũre aipe aiyuede mi jáiyede. Coyũquijivũ ne borore, ico nomióre aru ñai áimacu òi tubamũ cuvavũre siete paibua jipobuare caipucapũruape pajavaroaque.

⁸Ñai áme áimacu jijecucu mi jáimũ mácu cúteame javede. Aru cubebi caride. Ubenita mũri dacũyũme icobe ãmũjũricobede jocarí ãi bĩjacũũquiyede jipocai. Aru caivu ijãravũcavũ Jesucristore ju abevũ pare cuecumarajarama, ne jáiye boje ñai áimacu cũcu bácvũre javede, cubecũre caride, ubenita dacũyũre cojedeca. Ina cuecumarajivũrecabu ne ámiáre toivabemara mácvũ ánitucubo Jũmenijicui paperatucuboi, caivu ina jaravũ cúiméjaravũ baquinóre

cũvaräjivũ ne ámiáre toivaitucuboi. Ditucubo toivaino marejaquémavũ Jũmenijicui cuedaquiyede jipocai ijãravũre.

⁹Majíe javũvũ úre coreóvayũcũre nore. Jẽvari coyũrĩ ibuá siete paibua jipobua, diedecabu siete paicũa cũracũa ico nomió ámecco òi dobae. Aru jẽvari coyũrĩ ibuá siete paibua jipobua diedecabu, siete paivũ jabova. ¹⁰Cũinápurũpe paivũ nácvũ yaiquémavũ javede. Cũinácu nácvũ jaboteyũbe caride. Aru apecu ðabecũbe cãreja. Ubenita ãi jabotecudaquiyede obebejaravũa jabotecũyũme ã. ¹¹Ñai áme áimacu jijecucu cũcu bácvũ javede aru cubecu caride, ã macũyũme apecu jabocu, ina siete paivũ ne yóbocacu. Ubenita cúinácu ina siete paivũcavũcaribe máre. Úrecabe bĩjacũyũ baju bĩjaiye baji.

¹²Caipucapũruape pajavaroa mi jáiye báque, jẽvari coyũrĩ diedecabu caipucapũruape paivũ jabova báräjivũ, jaboteni búbevũ cãreja. Ubenita cúináora baju jaboteicõjeimara marajárama ñai áme áimacu jijecucũque. ¹³Caivu ina caipucapũruape paivũ jabova ne ãme cúinátrũbu. Que baru cúinárotamu ne ðaiyurò. Caðatenajarama ñai áme áimacu jijecucũre ne paruéque aru ne cõjeiyequede máre. ¹⁴Áðamatenajarama na Cristore, ovejajicũ ne aimũre copũ. Ubenita úcapũravũ jaboteyũbe caivũ apevũ jabovare aru cõjeũme caivũ apevũ cõjeivũre. Que baru vaini tũcũyũme ina úre maucũvarivũre. Uĩ áðamatecũdaiyede yóvarãjarama ina Jũmenijicui beorí cutuimara mácvũ ðajocabevũ cainũmũa ne ju aiyede úre, áme yũre ñai ángele.

¹⁵Aru ñai ángele, yópe arí, coyũre nũame yũre:

—Jẽvari coyũrĩ iya obediya jia ico nomió ámecco òi dobae, diedecabu ìmaroacavũ, aru põeyajubocavũ, obedivu yávaicamuacavũ, aru jaborõacavũ máre. ¹⁶Ñai áme áimacu jijecucu aru ina caipucapũruape paivũ jabova, jẽvari coyũrĩ yópe ãi javaroape, mi jáimara mácvũ jáiyũbenajarama

ico nomió ãmecore. Caiye õi cõvade ñajarama õre jocarĩ, ñajocarãjivũ õre cuitõtecaje cubecore. Ñajarama õi bajure. Aru bĩjare ñarãjarama õre toaboi. ¹⁷Jũmenijicũvacari ñápiacõjecũyũme ina caipũcarũyũape paivũ jabovare. Que baru cũinãturũ baquiyẽbu ne ãme. Cadatenajarama ñai ãme ãmacũ jijecũcũre, ñarãjivũ yõpe Jũmenijicũ ãrõpe pũ ne ñaiyede bũojaiyeta caiye iye ãi ñaiyũe báquede yõpe ãi aiyẽe báquedepedeca. ¹⁸Aru jẽvari coyũrĩ ico nomió ãmeco mi jãimo máco, õrecabe yõpe no ñmaro ñaicõjeĩmarope caivũ ina ñjarãvũcãvũ jabovare, ãme yũre ñai ãngele.

**Juan ãi coyũino Babilonia
ãmicũriĩmaro bĩjainora**

(Mt 22.2-3; Ef 5.23-32; Ap 7.14, 14.8)

18 ¹No yõboi, jãcacũ apescu ãngele ãmeñũre cavarõ mearo Jũmenijicũ cũrõre jocarĩ. Parũéque cõjeãme. Aru ãi mearoque miãdãre ñame cainore. ²Bũjiéque yõpe arĩ, coðoboboame ã:

—Jave bĩjaivũ no ñmaro urarõ Babilonia ãmicũrõ. Diĩmaro mácarõ abujvũ ne cũrõ teivũ. Obediyãjuba ãimara vũivũ põeva ne ubemara máre ne cũrõ teivũ no ñmaro mácarõ. ³No ñmaro mácarõcãvũ urarõ ãmeina ñare ñaima caivũ ñjarãvũcãvũ Jesucristore ju abevũre cainoa joborõai. Aru caivũ ina jabova ñjarãvũcãvũ ãmeina ñaima diĩmaro mácarõcãvũque. Aru caivũ ñjarãvũcãvũ bojeãipõeva cũve cũvarivũ bateima diĩmarocãvũ ne urarõ ãmeina ñaiye boje. Que baru bĩjaivũ no ñmaro mácarõ, ãme ñai ãngele.

⁴Aru jãpiacãcũ apeno yãvãinore cavarõ mearo Jũmenijicũ cũrõre jocarĩ. Yõpe arĩ, coyũãvũ:

—Mũja, jĩ põeva, etajarã diĩmarore jocarĩ, mũja ãmene ñabenãjivũ nõcãvũque, mũje ñãjimenãjiyẽpe aivũ náque. ⁵Diĩmarocãvũ ãmene ñare ñũivũ bateima, yõpe cainiyutubope teni ne ãmenoque pũ cavarõ mearo Jũmenijicũ cũrõita. Urarõ baju ãmene ñaima na.

Que baru Jũmenijicũ ãrũmi caiye iye ne ãmeina ñaiyede. ⁶Nõcãvũre ñajarã yõpe ne ñaiyẽpe apẽvũre. Yõpe ne apẽvũre ñãjine ñaiyẽpe, ñãjine ñajarã náre pũquedeca. Aru yõpe ne apẽvũre ãmeno ñaiyẽpe, ãmeno ñajarã náre pũque. ⁷Yõpe urarõ mearore aru ãre cũve bojecũede máre ne ãye báquepe ne baju, nopedeca ñcãvãjarã náre ñãjiyede ãre aru chõioyede máre ãre cũinãturũra. Yõpe arĩ ñápiarĩduyama na ne ãmei: “Yui jabotenãjivũ dobarivũbu ñũja. Apejĩe ye jaubevũ ñũjare. Cõmajẽ ãrojarãvũ ãmenãjaramu ñũja cainũmũa. Aru chõio menãjaramu, ñãjimenãjaramu máre cainũmũa”, arĩ ñápiarĩduyama nõcãvũ, “¿Meara márica apẽvũ pũeno?” aivũ. ⁸Que baru cũinãjarãvũ baquinõmiãreca urarõ ãmeno ñaquiyẽbu diĩmarocãvũre. Maumẽjiena nõcãvũ chõiori, ãvũẽ ñãjini, yainãjarama na. Aru ne ñmarore juarĩ bĩjaino maquiyẽbu. Yõpe vaiquiyẽbu, maje jabocu Jũmenijicũ parũcũ baju “Ñãjijara” ãi aiyẽ boje.

Nõpe jãpiacãcũ apeno yãvãinore cavarõ mearo Jũmenijicũ cũrõre jocarĩ.

⁹Caivũ ina jabova ñjarãvũcãvũ ãmeina ñaiyẽe bácvũ diĩmaro mácarõcãvũque bũjiéque coðoboborĩ, ñarebare totarĩ orãjarama na, ne jãiyede toabico porĩ mũinore no ñmaro mácarõre ãiyede.

¹⁰Jidũrivũ ne ñãjiyũbe boje diĩmarocãvũ bácvũpe, joai mautenãjarama. Aru yõpe arĩ, orãjarama na:

—¡Ayu, ayu, mũjare pare meamevũ Babilonia ãmicũriĩmarocãvũre! Pare chõioivũbu mũja. Maumẽjiena no ñmaro urarõ, parũẽ cũrõ mácarõ bĩjaivũ, orĩ coðoboborãjarama.

¹¹Caivũ ñjarãvũcãvũ bojeãipõeva máre bũjiéque coðoboborĩ, ñarebare totarĩ orãjarama diĩmarocãvũ bácvũre boje. Que baru ñame cũbenama caride ne cũvede bojeñarĩ ãvũ. ¹²Põescu cubecũbe bojeñarĩ ñũ ñare ne úrũre, ne platare, ne cũrajiboa bojecũrijĩboare, ne perla ãmicũrijĩboare bojecũrijĩboare máre, ne cuitõtecajea meacãjea lino aru seda ãmicũricãjeare, aru ne

cuitótecajea bojecuricajea jūaricajeare aru ñemijuaricajeare máre. Põecu cubecube bojedari ññ náre caiye jocusua me mumijuricare, ne cūve bojecuricūvede āimacūi javaro marfil āmicurijavaroque ðaiyede, aru jocusua bojecuricūaque ðaiyede, bronce āmicūe tūaque ðaiyede, hierro āmicūe tūaque ðaiyede, aru cūrabo boribo mármol āmicuriboque ðaiyede máre. ¹³Põecu cubecube bojedari ññ náre ne canela āmicūe mumijuede aru ape mumijuede máre, ne juarājinore mumijūrõre ðaquiyepa aivū, aru ape mumijuede mirra āmicūe aru olfbano āmicūede máre. Põecu cubecube bojedari ññ náre ne vino úyaicorore, ne neo carorājiyepa aivū neore, ne pāure ðaiyede harina āmicūe, aru ne trigo āmicūe oteiyede máre. Põecu cubecube bojedari ññ náre ne oteiāimarare ducūede ūmaivure, ne ovejavare, ne caballovere, ne jāturucūare, aru ne yebacavure máre, ina dāpiaivure. ¹⁴Ina bojedaiivū bācavū, yópe arī, coyurājarama diimaro mācarōcavure:

—iAyu, ayu, jave cūivú mujare iduá jocusu jēidua mearua pare cojūteavū mujare! Jave bījaiivū mujare jocarī caiye mūje cūve bojecuede aru mūje tātūrare máre. Que baru diede ye cūvabenajaramu mūja bediōva cojedeca, arī coyurājarama na, chíoiivū.

¹⁵⁻¹⁶Ina caiye iyede bojedaiivū bācavū cūve cūvateima ne bojedaiye bāque boje diimaro mācarōcavū bācavūque. Ina bojedaiivū bācavū joai mautenajarama, ne jāiyube boje diimaro mācarōcavū ne ñājiyede. Aru bujiéque coðoborī, ñarebare totarī orājarama, yópe arī:

—iAyu, ayu, pare meamevū no imaro urarō mācarō! Nomió cūve cūvcope paino mateávū no imaro mācarō. Diimarcavū bācavū cuitótecajea meacajea lino āmicuricajeare, jūaricajeare aru ñemijuaricajeare máre doivū bateima na. Aru úrure, aru perla āmicurijīboa bojecurijīboare, aru apejīboa cūrajīboa cojidijīboa bojecurijīboare máre adaiivū bateima na.

¹⁷Maumejiena caiye iye ure cūve bāque me cūivú, arājarama ina bojedaiivū bācavū, chíoiivū.

Caivū ina jiadocūa uracūare jarūvairpõeva aru caivū ina curānūivū jiadocūa uracūaque, caivū ina jiadocūa uracūa memeipõeva aru caivū jia uraðai memeipõeva máre joai mautenajarama na. ¹⁸Ne jāiyede toabico porī muri no imaro mācarō éiyede, yópe arī, coðoborājarama:

—Apeno imaro urarō, ári nópe paino cubteavū cainūmua, arājarama na.

¹⁹Que arī, dūvarājarama jobore ne baju jipoburā ne chíoiye boje. Bujiéque coðoborī, ñarebare totarī orājarama na, yópe arī:

—iAyu, ayu, pare meamevū no imaro urarō mācarō! Caivū ina cūvarivū bācavū jiadocūa uracūare jia uraðai cūve cūvarivū bateima diimarcavū bācavū ne bojedaiye bāque boje na mācavure ure cūvede. Maumejiena caiye iye me bījarī cūivú. ²⁰Mūja, cavarō mearo Jūmenijicūi cūrōcavū, torojūjarā mūja no imaro mācarōcavū bācavū ne ñājiye boje. Mūja, Jūmenijicūi põeva, Jesucristoi yāvaiye méne beorī coyucōjeimara aru Jūmenijicūi yāvaiyede coyucapõeva máre torojūjarā mūja Jūmenijicūi ñājine ðaiye boje nócavū bācavure. Ū ñājine ðaiyede, bojedaii na mācavure yópe ne āmeno ðaiye bāquepedeca mujare, arājarama na.

²¹Dinūmure cūinācu ángele parūcu cūinābo cūrabo urabore, oteiyabeare cūoibope paibore, ñni dūvarī jarūvame jia uraðai. Yópe arī, coyūame:

—Yópe bījaino maquiyébu no imaro urarō Babilonia āmicurō. Vnojarī jāmenamu cojedeca cainūmua. ²²Ye jāpurabequiyebu cojedeca no imaro mācarōre ne yūriaiye bāque arpaque, flautaque, aru trompetaque máre. Ye cūbenama cojedeca memeipõeva no imaro mācarōre. Ye jāpurabequiyebu cojedeca no imaro mācarōre ne cūoiye oteiyabeare cūoiboque, ne pāure ðarājivū. ²³Ye pēoibū cojibequiyebu

cojedeca no ĩmaro m acar ore. Que baru  emiquiyebu nore. Ye p r buobenama cojedeca no ĩmaro m acar ore. Que baru j purabequiyebu cojedeca nore ne torojuve teiye b que p eva ne p r buoiyede. N pe vaiquiyebu di maro m acar cavure ne bojedaip eva par rivu b cavu caivu apavu ij ravucavu bojedaip eva p eno. N pe vaiquiyebu di marocavure j jovaiyu b cavure caivu ij ravucavu Jesucristore ju abevure ne yavi  daiye b queque,  me  nai  ngele.

²⁴Ina Babilonia  micr iimaro m acar cavu b cavu   jima ne boar  jar vaiye b que boje caivu ina J menijicui y vaiyede coy caip eva m cavure, ina J menijicui p eva m cavure, aru caivu ij ravucavu boar  jar vaimara m cavure m re.

19 ¹No y boi, j piacacu yu bujino  rar re y pe c in yajubo obedivu p eva ne y vaiye buj pe. Cavar  mearo J menijicui cur re jocar  j piacacu n re, y pe ar  codoboiyede:

iAlel ya! Mearore j najarevu J menijicure.  vacari j ve meadaibi p evare. Aru j ve meacu bajube. P eno par cube m re. J ve majepacu J menijicube  . ²Caiye  i daiye m tamu. Aru caiye  i coy iye j vetamu m re.   jine  aibi ico nomi   i baju bojedado b core  m vare  rar   menore  acodo n que.    meina  are n no mate co caivu ij ravucavunque, cainoa jobor ai Jesucristore ju abevure  i  rar   meina  aiyeque. J menijicu   jine  aibi bojedayu  re,  i boar  jar vaiye b que boje  re memecaivure. Que baru mearore j najarevu J menijicure, aima na.

³Bedi va cojedeca codobor  aima:

—iAlel ya! Mearore j najarevu J menijicure. No ĩmaro  rar   ni dajocabevu cain m a. Que baru toabico por  m ivn nore jocar  cain m a, aima na, mearore j vu J menijicure.

⁴Ina veinticuatro paivu b cava aru ina y vaic vaivu ap rivu mor  tuima

jobor ita mearore j najivu J menijicure,  nai dobacure jabocui dobar  mearo coricacar ra, y pe ar :

—Qu decabu. iAlel ya!

Mearore j najarevu J menijicure.

J menijicurecabe maje mearore j m, aima na.

⁵Dinumure j purateav  apeno y vaino no dobar  mearo coricacar  yebare jocar . Y pe ar , coy av :

Mearore j jar  majepacu J menijicure. Caivu  re memecaivu aru caivu apavu p eva m re, ina qu jina aru b cava m re, caivu  re puedaivu, mearore j jar ri  re, ar  coy av .

Juan  i coy ino ne torojuve teinora Cristo, ovej icu ne aimu,  i p r buoiyede

⁶No y boi, j piacacu yu bujino  rar re y pe c in yajubo obedivu p eva ne y vaiyepe y pe c rat cave  rat cave bujinope aru y pe  po tuino p eno baju bujinope. J piacacu n re, y pe ar  codoboiyede:

iAlel ya! Mearore j najarevu J menijicure. Maje jabocu J menijicu par cu caivu p eno jaboteni b yube caride. Que baru mearore j najarevu  re. ⁷⁻⁸Eaivu caride Cristo, ovej icu ne aimu,  i p r buoij ravu. J marepaco baco o meadaibico  i baju. Maje jabocu doic jeimi  re meacaje lino  micuricaje docucubeni cojidicajede. Aru j vari coy ri dicajedecabu y pe J menijicui p eva ne  aiye m pe. Que baru torojur jarevu maja. Torojurivu maje  mei mearore j najarevu maja J menijicure, aima na.

⁹Dinumure  nai  ngele, y pe ar , toivaic jeame yure:

—Toivajacu mu iyede: “Torojur jarama caivu ina cutuimara m cavu ne  raj yepe ayu  nai ovej icu p r buoiyede torojuve teinoi”,  me  nai  ngele.

Aru y pe ar , cutur  jaro me:

—Iye ji coyuiye mure caride
Jūmenijicui yávaiye jāvetamu, áme ũ.

¹⁰Ji jápiaiyede ũi nópe aiyede,
ñnatutacacu yu ũi cuboba yebai,
mearore jíyuríduyu úre. Ũbenita yópe
arí, mearore jícōjemeteame ũ yure:

—Que ñabejacu mu. Yu máre
memecayubu Jūmenijicure mupedeca
aru mívure páyu máre, ina coyuvu
Jesús ũi yávaiyede jāvene dajocabevuva
pu arevu náre boarí jaruvaiyeta. Que
baru mearore jíjacu mu maje jabocu
Jūmenijicure cūinácureta, áme yure.

Ñai Espiritu Santo majide ñaibi
caivu ina Jūmenijicui yávaiyede
coyucapōevare, ne coyurājiyere ayu
Jesús ũi yávaiyede jāvene.

**Juan ũi coyūino ñai caballo bocurā
tubacurā**

(Jn 1.1, 14; Ap 13.1-18, 14.20, 17.14)

¹¹Dinūmure jácacu yu cavarō mearo
Jūmenijicui curō voainore. Aru nore
járóteame cūinácu caballo bocu. Ñai
tubacu ũra bojeñabi pōevare méque.
Aru ádamateibi méque ũi mauvare máre.
Que baru útame jāve yávayū aru méne
ñayū máre cainūma. ¹²Ũi yacorua
cojíteavū yópe toa uruiyere. Cuvateame
obeditarabua jipobu adaitarabua
ũi jipoburā, ũi jaboteiye boje
obediyajuboacavure. Aru cūináro amía
toivaino mácarōre cuvateame. Ũbenita
ũ cūinácua majibi nore. ¹³Doame
ũi cuitótecaje puenocacajede jiveque
ēnuicaje bácarōre. Ũrecabe “Jūmenijicui
dápianore coyucadacuyū” ne aimu.
¹⁴Ũi yóboi daima ina cavarō mearo
Jūmenijicui curōcavu ádamateipōeva
tubarivu caballova borivurā na coapa.
Aru doaima meacajea lino amicuricajea
cuitótecajeare. ¹⁵Ñai ne jabocure
etavū ũi jijecamure jocarí cūináve
boaicarove upujidivepe. Diveque boarí
vainí tucuyume caivu ijāravucavu
Jesucristore ju abevure. Ũrecabe
jabotecuyū náre paruéque. Aru ũvareca
ñájine dacuyume náre yópe pōeva ne
vino úyaboare piporí córore yuaiyere
Jūmenijicui jorojini jáiye boje náre, ne

ámeina teiye boje. ¹⁶Ñai ne jabocu ũi
cuitótecajena aru ũi toarurā máre yópe
arí toivaino mateávū: “Jaboteyube caivu
arevu jabovare aru cōjeñume caivu
arevu cōjeipōevare máre”, arí toivaino
cúteavū.

¹⁷Aru jácacu cūinácu ángele núcure
aviarā. Yópe arí, coðoboboame
paruéque caivu ina cavavape paivure,
ina vuivu cavarō coricai, aviá ũi curōi
jāravu corica baji:

—Áradajarā. Cójijjarā amuri
yo javateino urarō Jūmenijicui
meadacaquinore mujare. ¹⁸Ina jabovare,
aru churaravai jabovare, ũmūva
parurivure, caballovare, aru caballovārā
tubarivure, yebacavure, yebacavu
ānevure, quíjinare, aru bucavure máre,
caivu ne jiaruare áradajarā, áme ñai
ángle.

¹⁹Aru jácacu ñai áme aimacu
jijecucure aru caivu ina jabovare
ijāravucavu boaipōevaque cójijivure
ne boarídurājiyere aivu ñai caballo
bocurā tubacure aru ina ũque curivure
máre. ²⁰Ũbenita ñai áme aimacu
jijecucu ne jēimū mateáme. Aru ñai
Jūmenijicui yávaiyede coyucapōescupe
teyu, borocuede coyuyū, máre ne
jēimū mateáme. Ũrecabe pōeva ne
ñarí majibede ñayū bácu jipocamia
ñai áme aimacu jijecucui jáinoi. Iye
pōeva ne ñarí majibede ũi ñaiyēque
jujovame obedivu pōevare jipocamia.
Ina cūvarivu bácvure ñai áme aimacu
jijecucui toivaino mácarōre aru ina
mearore jivu bácvure ñai áme aimacu
jijecucui pēpeimure máre jujovame ũ.
Ina pucarāre jēni, jaruvaimara mateima
arurivura cāreja toabo azufreque
cūiméboi. Noi ñai áme aimacu
jijecucu aru ñai Jūmenijicui yávaiyede
coyucapōescupe teyu, borocuede
coyuyū, éñajarama cainūma. ²¹Aru
caivu arevu náque nuivrecabu ũi boarí
jaruvaimara mácvu ñai caballo bocurā
tubacu ive boaicaroveque cuvacu ũi
jijecamui. Aru caivu ina cavavape paivu
javateni yapima na mácvu ne jiarua
báquede.

**Juan ñi coyũino mil paiũjua baju
Cristo ñi jaboteiyena**

(Mt 19.28; Lc 22.30; Ap 1.6,
5.10, 6.9, 13.16-17, 14.9)

20 ¹Jácacu cūinácu ángele òmeñure cavarō mearo Jñmenijicui curōre jocarī. Cuvateame ñi purui no llavede, ñi voaquinore aru biequinore máre no ñmũjuricobe ecoinore. Aru cūináme tãume ñucurimene máre cuvateame ù. ²Jẽame ñai ãijuacu cõcure mamarũmũre pũ caride máre. Ñai ãijuacube abujuvai jabocu. Diablo ãmicubi ù. Aru Satanás máre ãmicubi ù. Ñai ãijuacure jẽñi buoáme ùre mil paiũjua baju. ³Ûre buorĩburu yóbore, ñai ángele jarũvame ùre no ñmũjuricobe jĩvui. Ûre jarũvarĩburu yóbore nore, dicobe ecoinore bieáme llaveque. Jãjaro ðáme dicobe ecoinore ñai ángele. Nópe ðáme ñai abujuvai jabocure, ñi jujovabequiyere ayu ijãravucavũre bediõva cojedeca pũ mil paiũjua vainĩburu yóboita. Dinũmu maquinóre jodeimu macũyũme obebejãravua bajura. ⁴Aru jácacu jabovai dobarõa mearoare. Ina dobarivũ iye dobarõara maje jabocui ñãjine ðaicõjeimara mateima põevare, ne ãmeina teiye boje. Aru ina yaivũ bãcavũ ne coyũiye báque boje Jesús ñi yãvaiye méne aru Jñmenijicui yãvaiyede máre dajocabevũva ne ùmene jácacu yu. Na mácavũrecabu mearore jíbevũ bãcavũ ñai ãme ãimacu jijecõcure, aru ñi pẽpeimũre máre. Aru ñi toivaino mácarõre máre cuvabeteima na mácavũ ne tũtũvarã aru ne purũarã máre. Nacajari yainore jarũvarĩ, apurivũ teni jaboteima na Cristoque mil paiũjua bajureca. ⁵Nómu põeva ne mamarũmu nacajaiye yainore jarũvarĩ. Ûbenita arevũ ina yaivũ bãcavũ nacajameteima cãreja pũ ðiũjua mil paiũjua vainĩburu yóboita. ⁶Torojũrãjarama ina Jñmenijicui nacovaimara yo mamarũmu nacovaino yainore jarũvarĩ. Námu Jñmenijicui põeva. Sacerdoteva barãjarama na, memecarãjivũ ùre

aru Cristore máre. Jabotenajarama na Cristoque mil paiũjuaareca. Que baru numenajarama na toabo cũiméboi.

**Juan ñi coyũino Cristo ñi vainĩ
tũiyena abujuvai jabocure**

⁷Que baru mil paiũjua vainĩburu yóboi, ñai Satanás jodeimu macũyũme. ⁸Etacũyũme dicobe ñmũjuricobede jocarĩ, jujovacũnũcũyũ põevare, cainoa joborõacavũre. Jujovacũnũcũyũme ina Gog ãmicũrõcavũre aru ina Magog ãmicũrõcavũre máre. Ina põeva obedivũ barãjarama yóre ãpayabea cõere jia uraða ãcarũrã. Náre cójijovacũyũme Satanás, ne ðdamatenajiyere ayu. ⁹Ina põeva obedivũ cainoa joborõare jocarĩ darĩ, cójijini, nuri jacoturãjarama Jñmenijicui põevare, ina boacãivũre, aru Jñmenijicui imarore, ñi jecurõre. Ûbenita toa ocainope turĩ cavarō mearo Jñmenijicui curōre jocarĩ éni bĩjaroquiyebu náre. ¹⁰Aru ñai abujuvai jabocu, náre jujovayũ bãcu, jarũvaimũ macũyũ toabo azufreque cũiméboi máre. Que teni vainĩ tuquiyebu ùre yóre ñai ãme ãimacu jijecõcure ñi vainĩ tũiye báquepedeca aru ñai Jñmenijicui yãvaiyede coyũcaipõecõre teyũ, borocuede coyũyure, máre. Noi ñãjinajarama na jãravũre aru ñamine máre cainũmua.

**Juan ñi coyũino Jñmenijicui
bojedaiyena yaivũ bãcavũre ne ðaiye
báque bojede**

(Mt 25.41; Ap 2.11, 3.5, 21.8)

¹¹Dinũmũre jácacu jabocui dobarō mearo cūináro, urarō borō dobarōre aru ñai dobacure nora. Joborō aru cavarō máre bĩjavũ. Jãrobeteavũ cojedeca. ¹²Aru jácacu ina yaivũ bãcavũ caivũre, quĩjinare aru bũcũvare máre, nũrivũre no jabocui dobarō mearo urarō jipocai. Paperatucuboa voaino mateávũ. Aru apetucubo paperatucubo máre, Jñmenijicui paperatucubo caivũ ina jãravũ cũiméjãravũ baquinóre cuvãrãjivũ ùque ne ãmiãre toivaitucubo voaino mateávũ. Aru ina yaivũ bãcavũ

ñájiçõjeimara mateima yópe ne ðaiye báquepedeca aru iye toivaiye cøpedeca ditucuboa paperatucuboi. ¹³Caivu ina yaivu bávavu jia uraðai cúteima no jabocui dobarõ mearo urarõ jipocai. Aru caivu ina yaivu bávavu coreivu bávavu ne curõi máre cúteima no jabocui dobarõ mearo urarõ jipocai. Que baru caivu ina yaivu bávavu cúteima nore. Aru caivu ina ñájiçõjeimara mateima yópe ne ðaiye báquepedeca. ¹⁴Caride ina yaivu bávavu yainájarama cojedeca. Na mácvare coreino mácarõ jaruvaino mateávũ toabo cūiméboi. Ina yaivu bávavu yainájarama puque, mamarumu ne bajuque ijárvuvi aru no yóboi ne ũmeque toabo cūiméboi. No toabobu yópe jia uraða uruinope urarõ baju. Nore ñájinajarama cainnuma. ¹⁵Caivu ina ne ãmiá toivaino cvavevu bávavu ditucuboi, Jūmenijicui paperatucubo caivu ina járvavu cūiméjárvavu baquinóre cvarājivũ úque ne ãmiáre toivaitucuboi, nárecabu jaruvaimara mácvavu dibo toabo cūiméboi.

**Juan ũi coyũino cavarõ mamarora
aru joborõ mamarora**

(Mt 25.41; Jn 4.10, 14, 7.37; Gá 4.26; 2 P 3.13; Ap 2.11, 3.12, 7.17, 19.7-8, 20.14)

21 ¹No yóboi, jácacu cavarõ mamarore aru joborõ mamarore máre. No cavarõ javecarõ mácarõ aru no joborõ javecarõ mácarõ máre bíjaiye bateávũ. Aru diya jia uraða máre bíjaiya bateávũ. ²Aru jácacu no ĩmaro pueno mearo Jūmenijicui ĩmarore, mamaro Jerusalén ãmicrĩĩmarore. No ĩmaro ěmene dávũ Jūmenijicui jivateino cavarõ mearo ũi curõre jocarĩ. Yópe nomiõ purubucodo õi meadaiyepe torojure ðacodo jímarepacu bacuyúre, popedeca no ĩmaro meadaino mateávũ torojure ðaquiyepe aino Cristore. ³Aru jápiacacu apeno yávaino bujino etaiyede no jabocui dobarõ mearo coricacarõre jocarĩ. Bujiéque yópe arĩ, coyúávũ:

—Caride Jūmenijicui cubi pøevaque. Cøcuyume náque. Aru nácarúrvavu ũi pøeva marajárama. Jūmenijicuvacari

cøcuyume náque. Ne mearore jímu macuyúme ũ. ⁴Tūrecuyume caiye oride ne yacurare. Torojure ðacuyume náre cainnuma. Caiye javede cøe báque jave bíjavũ cari. Que baru pøeva ye yaibénajarama. Chĩomenajarama. Obenajarama. Aru ijibequiye bu náre máre, arĩ coyúávũ.

⁵Dinumure ñai dobacu jabocui dobarõ mearora, yópe arĩ, coyúáme:

—Caride caiyede mamae ðayubu yu, áme.

Aru yópe arĩ, toivaicõjeame yure cojedeca:

—Iye yávaiye métamu aru jávetamu máre. Que baru toivajacu mu iye ji yávaiyede, áme yure.

⁶Aru ñai dobacu jabocui dobarõ mearora, yópe arĩ, coyúáme:

—Quénoramu. Yurecabu mamarumucacu aru yóbocacu máre.

Yurecabu báyu bácu, bubayu máre. Que baru cvuvu yu cainnuma. Ácu pøecu ũi ũcuiyuru, úre jícvuyumu yu oco bojesubede no oco píarõpino arure ðaiocore jocarĩ. ⁷Yópe mearo ðacacuyumu yu ñai vaini tøyure ámenore jaruvarĩ. Ũi mearore jímu macuyúmu yu. Aru jímacu bacuyúme ũ. ⁸Ũbenita caivu ina ñájiyubevu yure boje ne jídué boje, aru ina dajocavũ ne ju aiyede yure, ina caijie ámene ðaivũ, ina pøevare boarĩ jaruvavũ, ina ámeina ðaivũ apenúque némarebucava ámenúque, ina yaviéde ðaivũ, ina mearore jívu pøeimarare, aru ina borocurivũ máre, caivu ina nurajarama ne curājinoi, no toabo azufreque cūiméboi. Que baru jēvari coyurĩ yópe ne yaiepe puque nurajarama na.

**Juan ũi coyũino mamaro Jerusalén
ãmicurõra**

(Mt 5.8; Jn 8.12; Ef 2.20; 1 Jn 3.2; Ap 16.1, 21.23)

⁹No yóboi, cūinácũ ina siete paivu ángeleva iduá siete paidua jororua ñájiõvaiye buidídua jororuarẽ iye siete paie ñájiõvaiyeque cvarivũ bávavucacu coyucudame yure. Yópe arĩ, coyúáme:

—Dajacu. Jáđovacuyubu mre ico nomió parubucodore Cristo, ovejajicu ne aimque, áme yure ñai ángele, áme.

¹⁰Aru ñai Espíritu Santo dápaicōjeame yure. Que teni ñai ángele n̄vame yure cūracu ūmujaricū puenoita. Noi curivuta, jáđovame yure no ĩmaro mearo baju, Jūmenijicū ĩmaro Jerusalén āmicurīĩmarore. No ĩmaro ěmene daino mateávū Jūmenijicū jivateino cavarō mearo ūi curōre jocarī. ¹¹Jūmenijicū cue boje nore, urarō p̄oávū no ĩmaro. Yópe cūrabo cojidibo pare bojecuribore jári javaiyoibo jaspe āmicuribope p̄oávū no ĩmaro. ¹²Pare ūmujarido biaido cūteavū no ĩmaro yóbore. Dido biaido cuvateavū doce paicobeá jedevacobeá. Dicobeá jedevacobearā toivaino mateávū ne āmiá ina doce paiyajuboa Israecavū ne yajuboa āmiá coapa. Aru doce paivū ángeleva jári coreivū bateima dicobeá jedevacobeá coapa. ¹³Yóbecuricobeá jedevacobeá cūteavū caiyovaicuvairūvavai coapa. Aviá dainocapūravū yóbecuricobeá jedevacobeá cūteavū. Aviá daino meapūravū yóbecuricobeá jedevacobeá cūteavū. Aviá daino cācopūravū yóbecuricobeá jedevacobeá cūteavū. Aviá doinocapūravū máre yóbecuricobeá jedevacobeá cūteavū. ¹⁴No biaido me jājaro núvari đaido bateávū cūrava urava parurivarā. Doce paiva cūrava cūteavū. Diva cūravarā toivaino mateávū ñuje āmiá ñuja doce paivū ñai ovejajicū yávaiye méne beorī coyucōjeimara ñuje āmiá coapa. ¹⁵Ñai ángele yávayū yure cuvateame cūinádo corevaiyo úruque đaiyore, corevacuyū no ĩmarore, dicobeá jedevacobeare, aru biaidore máre. ¹⁶No ĩmaro yóvaicuvaitōbua cūteavū. Caiye yóvaicuvaitōbua cūináturu bateávū. Ūmujurō vaibóque cūináturu bateávū. Ūi corevaiyede corevame no ĩmarore pucamil doscientos paikilometros baju ūmujurōre, pucamil doscientos paikilometros baju joarōre, aru pucamil doscientos paikilometros baju urarōre

máre. ¹⁷No yóboi, corevame no biaidore máre. Yópe p̄oeva ne corevaiyep̄e sesenta y cinco paimetros baju corevame no biaidore.

¹⁸No biaido đaino mateávū jaspe āmicuriva cūrava bojecurivaque. Aru no ĩmaro đaino mateávū úru me baju docucubeque. Que baru jivarupe paino ūbenita jári javaiyoino mateávū. ¹⁹No ĩmaro jājaro núvari đaino mateávū cūrava urava parurivarā. Aru divarā cūteavū apeva bojecuriva meava baju. Doce paiva cūrava bojecuriva cūteavū. Diva mamarumucava ĩmaro nūrivarā jaspe āmicuriva bateávū. Apeva cutuiva ĩmaro nūrivarā zafiro āmicuriva bateávū. Apeva cutuiva ágata āmicuriva bateávū. Apeva cutuiva esmeralda āmicuriva bateávū. ²⁰Apeva cutuiva ónice āmicuriva bateávū. Apeva cutuiva cornalina āmicuriva bateávū. Apeva cutuiva crisólito āmicuriva bateávū. Apeva cutuiva berilo āmicuriva bateávū. Apeva cutuiva topacio āmicuriva bateávū. Apeva cutuiva crisoprasa āmicuriva bateávū. Apeva cutuiva jacinto āmicuriva bateávū. Aru diva piniducava ĩmaro nūrivarā amatista āmicuriva bateávū. ²¹Dicobeá doce paicobeá jedevacobeá đaino mateávū perla āmicuriva bojecuriva cūravaque. Caicobeá jedevacobeá coapa cūináva perla āmicurivaque đaino mateávū. Aru đima no ĩmaro urama đaino mateávū úru me baju docucubeque. Que baru jivarupe paima, ūbenita jári javaiyoima, mateávū.

²²No ĩmaroi jámetecacū Jūmenijicū cūramine. Caino no ĩmarore Jūmenijicū cūrami cubeteavū. Maje jabocū Jūmenijicū parucū caivū p̄ueno cubi caino no ĩmaroi. Aru Cristo, ñai ovejajicū, máre cubi caino no ĩmaroi. Que baru Jūmenijicū cūrami jaubevū nore. ²³Aru jaubevū aviá aru aviá ñamicacū máre ne p̄oiye nore. Jūmenijicū cue boje nore, urarō p̄oávū no ĩmarore. Aru ñai ovejajicū p̄oibupe p̄oñume nore. Que baru aviá aru aviá

ñamicacu máre jaubema na nore.
 24 Caivu pøeva cainoa joborðacavu
 vaivárãjarama no ïmaro miadáeque.
 Aru caivu jabova davarãjarama caiye
 ne cavaede, ne tãuturare máre no
 ïmaroita. 25 Caijãravua no ïmaro
 jedevacobeá voaicobeá baquiyébu. Aru
 ñami cubequiyebu nore. Que baru
 no ïmaro jedevacobeá ye biebecobeá
 baquiyébu cainuma. 26 Caivu pøeva
 cainoa joborðacavu davarãjarama
 caiye ne cavaede, ne tãuturare
 máre no ïmaroita. 27 Ñbenita ye
 ámeno cubequiyebu nore. Ye pøeva
 cuyojeda teivu aru borocurivu máre
 ecobenajarama nore. Quénora caivu
 ina cavarãjivu jãravu cãméjãravu
 baquinóre Jũmenijicuque ne ámiãre
 toivaiye báque boje ánitucubo, ñai
 ovejãicui paperatucuboi, ecorãjarama
 nore.

22 1 No yóboi, cojedeca ñai ángele
 jádovame yure cünáda jiare.
 Diya jia meada cojidiya etaivu no
 jabocui dobarõ mearore, Jũmenijicui
 dobarõre aru ñai ovejãicu máre ñi
 dobarõre jocarí. Diya jia apure ðaivu
 pøevare mamaũmeque. 2 Diya jia
 bejaivu ma urama coricai no ïmaro
 Jũmenijicui ïmaroi. Aru diya écaruai
 caiprcarũrvuai jocucua apure ðaicua
 cuvũ. Caaviava jẽjãravua eaivu. Que
 baru doce paitvaboa caijua coapa
 jẽidũare jivu dicuá jocucua. Aru
 dicuá jocucua yoca meadaivu caivu
 pøevare cainoa joborðacavure. 3 No
 ïmaroi ye cubequiyebu caiye iye
 jorojini járe ðaiye Jũmenijicure. Que
 baru ye ámeno ñãjine ðaino pøevare
 cubequiyebu nore. No jabocui dobarõ
 mearo, Jũmenijicui dobarõ aru ñai
 ovejãicui dobarõ máre, cuquiyebu
 no ïmarore. Aru Jũmenijicure
 memecaipøeva mearore jínajarama
 úre. 4 Ñi jivare járajarama na. Aru
 ñi ámiãre toivaino maquiyébu ne
 tãtvãrã. 5 Ñami cubequiyebu nore.
 Maje jabocu Jũmenijicu miadáre
 ðacacuyume nócavure. Que baru
 jaubequiyebu náre pøoibua aru aviã

máre. Aru nócavu jabotenajarama
 jãravu cãméjãravu baquinóre.

**Juan ñi coyũno Jesucristo
 copaidacuyure ijãravui bediõva
 cojedeca**

(Jn 4.10, 14, 7.37; Ap 1.8, 17, 2.8)

6 Dinũmure ñai ángele, yóre arí,
 coyũáme yure:

—Iye ji yãvaiye métamu aru jávetamu
 máre. Maje jabocu Jũmenijicu, ñai
 majide ðayu bácu ina ñi yãvaiyede
 coyũcaipøevare, daroáme yure ñi
 ángelede, ñi jádovayuiyere ayu úre
 memecaivure iye vaiquíye jauéde
 maumejiena, áme ñai ángele yure.

7 Aru Jesúvacari yóre aibi:

—Jãjacu. Maumejiena dacuyumu
 yũ. Torojurãjarama caivu me jápiarí jũ
 aivu caiye iye Jũmenijicui yãvaiyede
 coyũcaiyede toivaiye báquede itucubo
 paperatucuboi, aibi Jesús.

8 Yũ, Juan, jápiacacu aru jácacu caiye
 iye ji toivaiye báquede. Diede jápiarí
 aru járiburu yóboi, ñatutacacu yũ ñai
 ángele ñi cuboba yebai, ñai jádovauũ
 mácu yure caiye iyede, mearore
 jíyurĩduyu úre. 9 Ñbenita yóre arí, yure
 mearore jícojemeteteame úre:

—Que ðabejacu mũ. Yũ máre
 memecayũbu Jũmenijicure mupedeca
 aru mívũpe páyu máre, ina Jũmenijicui
 yãvaiyede coyũcaipøeva, aru nápe
 paivu máre, caivu ina me jápiarí jũ
 aivu caiye iye toivaiye báquede itucubo
 paperatucuboi. Que baru maje jabocu
 Jũmenijicure cünácũra mearore jíjacu
 mũ, áme yure.

10 Aru yóre arí, coyũáme yure
 cojedeca:

—Joabejĩnotamu vaiquino yóre
 iye toivaiye báquepedeca ditucubo
 paperatucuboi. Que baru yavebejacu
 pøevare jocarí caiye iye Jũmenijicui
 yãvaiyede coyũcaiyede toivaiye báquede
 itucubo paperatucuboi. 11 Dinũmure caiye
 iye nópe vaiquĩnũmũre, ácu pøescu ámesu
 baru, ámenore ðare nuíye javũ úre. Aru
 ácu pøescu ámesu baju baru, ámeno bajure
 ðare nuíye javũ úre. Ácu pøescu meacu

baru, mearore ðare nuiye jāvũ úre. Aru ácu pōescu meacu baju baru Jūmenijicure ũi memecaiye boje, mearo bajure ðare nuiye jāvũ úre, áme yure ñai ángele.

¹²Bedióva cojedeca Jesús, yópe arī, соуáме:

—Jájacu. Маумеjiена дасчүмү ун. Davacчүмү caivũ pōevare ne bojede, bojedacчү caivũre yópe ne ðaiye báquepe náre coapa. ¹³Yñrecabu mamarчүмүсacчү aru yóbocacчү máre. Yñrecabu cсүcү bácu caiyede cuedaquiye jipocai aru cсүcү caiye cūinfburu yóbore. Aru yñrecabu býуcү bácu, bubaycү máre. Que baru cсүcү yу cainчүмү.

¹⁴Torojurājarama caivũ ji meaðaimara ne ámene jarчүvaiye báque boje yópe ne jarчүvaiyepе docure ne joaiyede ne cuitōtecajearе. Nárecabu áicōjeimara mārājivũ dicү jocсүcү apure ðaicү jēiduarе. Aru nárecabu ecoicōjeimara mārājivũ no ĩmaro jedevacobeai. ¹⁵Ūbenita no ĩmaro jedevai mautenajarama caivũ ina ámena baju, ina yaviéde ðaivũ, ina ámeina ðaivũ apenvuque némarebucчүva ánevũque, ina pōevare boarī jarчүvaivũ, ina mearore jīvũ pēpeimarare, aru ina borocurī jujovaiyurivũ apenvure máre, áme Jesús.

¹⁶Aru yópe arī, соуáме Jesús cojedeca:

—Yч, Jesús, darocacчү ñai ángelede, ũi соучқuiyepе ayу caiye iyede mujare, yure ju aivũre, mujе cōjjinoai. Yñrecabu ñai jabocчү David bácuī pāramecчү. Aru yñrecabu ñai abiacorчү pēoñчү miadáre dayч, áme Jesús.

¹⁷Ñai Espírиту Santo “Dajacu”, ayube Jesúre. Aru ico ovejajicүī márepaco

“Dajacu”, adobe Jesúre. Aru caivũ ina jápiaivũ diede “Dajacu”, ajarāri na máre. Yópe cūiñóimara ne pare ũcuiyũpе ocore, nopedeca mujа nuivũrivũ baru Jūmenijicүī cчүrōi, pare ujarā Jesúre. Ūtame yópe oco apure ðaiocope. Caivũ úre urivũ Jūmenijicүī cчүre ðaimara marajárama ũi cчүrō mearoi cainчүмү bojecubeda.

¹⁸Yч, Juan, mearo ðaicōjeivũ paredeca caivũ ina jápiaivũre caiye iye Jūmenijicүī yávaiyede соучқaiyede toivaiye báquede itucubo paperatucuboi. Pōescu ũi toivaru apējiene epescчүy iyeque, Jūmenijicү pчүeno baju ñájine ðacчүүme úre iye ñájiovaiyеque, соучқiye báquede ditucubo paperatucuboi. ¹⁹Aru pōescu ũi tũreni jarчүvaru apējiene itucubo paperatucuboquede, iye Jūmenijicүī yávaiyede соучқaiyede toivaiye báquede, Jūmenijicү úre áicōjemecчүүme apure ðajjocсүcү jēiduarе. Que baru me cчүrī byojabescчүүme Jūmenijicүque cainчүмү. Aru Jūmenijicү cчүicōjemecчүүme úre no ĩmaro mearo bajure. Dicү jocсүcүrā aru diīmarora máre соучқino mateávũ itucubo paperatucuboi.

²⁰Ñai caiye diede соучқуч aibi:

—Маumena дасчүмү, aibi.

Que bajaróri. Mч, maje jabocчү Jesús, dajacu.

²¹Maje jabocчү Jesucristo mearo ðacajacчүrī mujare bojecubeda ũi me boje. Quédecabu. Quénoramu.

Aipe aiye apesamua ñaradaviva yávaicamua Majerasu Jūmenijicui yávaiye mamaene coyuitucuboque cámu

ágata Cūináva cūravabu no ĩmaro mamaro Jerusalén āmicurĩĩmaro jājaro núvari ðaiva, boriva aru ñeminiva máre, yópe mevamevarivape. (Ap 21.19)

águila Míyavipe páyube, ũbenita p̄eno uracu. Pare j̄jesucube ũ. (Ap 4.7, 8.13, 12.14)

amatista Cūináva cūravabu no ĩmaro mamaro Jerusalén āmicurĩĩmaro jājaro núvari ðaiva, ñemijuariva. (Ap 21.20)

Areópago Cūracū Atenas āmicurĩĩmaro coricacacūmu, 115 paimetros ũm̄j̄uricū, Atenacavu b́acavu ne cójijino mácarō, borotenaiv̄. (Hch 17.19, 22)

Armagedón Joborō āmiá ũbenita p̄eva ne majibeno nore coȳiyebu Apocalipsis 16.16. Nore cójijinajarama caiv̄ ina jabova ij̄arav̄cavu āðmatenaiv̄ copu Jesucristoque.

arpa P̄eva aru ángeleva toroj̄uve teiv̄u ne biabeibobu, cuarenta y seis paimea biabeimea c̄v̄v̄, yóbecurivea joc̄vea j̄iv̄ui. (Ap 5.8, 14.2, 15.2)

Artemisa P̄epeimo máco nomiópe ārojaco Éfesocavu b́acavu aru ap̄ev̄u Asia āmicurijoborōcavu b́acavu máre ne mearore j̄imo marejaquémav̄. Ne dápiayepe

ō aviá ñamicac̄re cōjeip̄eco barejácoða. Aru nomiva micava j̄uedoc̄var̄ajiv̄ure cadateðo barejácoða. Que baru óre mearore jídejaquemav̄. (Hch 19.23-41)

azufre Tāu cūraj̄umemu. P̄eva ne éiyede diede, ēnuricoro teiyav̄ ũ yópe jia uruiyape. (Ap 9.17-18, 14.9, 19.19-20, 20.10, 21.8)

Baal Cananeo āmicurij̄ubocavu b́acavu Jūmenijic̄re j̄u abev̄u ne mearore j̄im̄me. (Ro 11.4)

Babilonia ĩmaro urarō mácarō marejaquémav̄ jia Éufrates āmicuriya écarui. Ap̄ev̄u Israel b́acui p̄aramena mácavu ne eaiĩmaro mácarō marejaquémav̄ ne mauva mácavu ne b̄or̄i ñv̄vaiye báquede na mácv̄re. (Mt 1.11, 17; Hch 7.43; 1 P 5.13) Aru ĩmaro urarō maquinó maquiyebu ij̄arav̄ cūiquíye j̄ipoj̄icai, āmeina teip̄eva Jesucristore j̄u abev̄u ne c̄r̄aj̄iĩmaro. (Ap 14.8, 16.19, 17.5, 18.2, 10, 21)

Beelzebú Cūináro āmiá abujuvai jabocui āmiámu. Ape ũi āmiámu Diablo aru Satanás. (Mt 10.25, 12.24; Mr 3.22, Lc 11.15)

berilo Cūináva cūravabu no ĩmaro mamaro Jerusalén āmicurĩĩmaro jājaro núvari ðaiva, ap̄ev̄m̄ua jūmeniva yópe córiápe, aru

apenũma jũmeniva yópe cavarõpe,
 aru apenũma boriva. (Ap 21.20)

bronce Tãu joborõ jívni cãvũ, ne
 íye úrupe ãrojae, ũbenita majiéda
 cãrajũme, aru jũae maque ãrojae.
 Diemareca Israecavũ bÁCavũ
 ðarejaquemavũ ne Jũmenijicũre
 mearore jíñamiqũe cãvede. (Jn 3.14;
 Ap 9.20, 18.12)

burra, burro Põeva ne tubamũme aru
 ne cãvede ũmañũme. Oteĩaimacũbe
 caballope ãrojacũ, ũbenita quíjicũ.
 (Mt 21.2-7; Mr 11.2-7; Lc 13.15,
 19.29-34; Jn 12.14-16)

camello Põeva ne tubamũme aru ne
 cãvede ũmañũme. Oteĩaimacũbe
 caballope ãrojacũ, ũbenita pũeno
 ũracũ aru yapitũma cainidũ cũcũ.
 (Mt 3.4, 19.24, 23.24; Mr 1.6, 10.25;
 Lc 18.25)

canela Jocũcũ curiájĩe
 jũaricuriájĩemu. Ũbenita ěmijũebu.
 Apẽvũ põeva ne ãiyede ěmijũe ne
 ðaiyebu. (Ap 18.13)

Cástor aru Pólux Griego
 ãmicũriyajubocavũ bÁCavũ aru
 Roma ãmicũrõ jaboteinocavũ
 bÁCavũ pũcarã ne obedivũ
 jũmenijinacavũ bÁCavũ barejáimada.
 Pẽjava marejáimada. Jia ũradai
 nũicũa jiadocũa ũracũa máquena
 memeipõeva mÁCavũ ne mearore
 jímara marejáimada. (Hch 28.11)

cebada Cainijicũa jẽiyebu
 quíjichĩajiboa. Judíova aru apẽvũ
 põeva máre cũve cãvabevũ ne pãu
 ðaiye. Apenũma judíova bÁCavũ
 jícarejaquemavũ Jũmenijicũre
 ne pãu cebadaque ðaiye báquede.
 Aru caballova, camellova máre
 ne ãiyebu. Octubre baji, ocorũmu
 yóboi otedaima diede, aru jẽiyede
 ñnaima abril baji. (Jn 6.9, 13; Ap
 6.6)

celote Põecũ cũinácũ ina
 judío ãmicũriyajubocacũbe.
 Celote ãmicũriyajubo
 oatũvaiyũrejaquemavũ ina
 Romacavũre ne jaboteiyede.
 Ũbedejaquemavũ César bÁCũ ũi

jaboteiyede judío vare. Quénora
 nÁCavũvareca ne jaboteiyede
 ũrejaquemavũ ina celote
 ãmicũriyajubocavũ. (Mt 10.4; Mr
 3.18; Lc 6.15; Hch 1.12)

cobre Tãu jãjãe joborõ jívni ne íye jũae
 ãrojae aru mecarĩjĩepe paiyebu. (Mt
 10.9)

cornalina Cũináva cũravabu
 no ĩmaro mamaro Jerusalén
 ãmicũriĩmaro jãjaro núvari ðaiva,
 jũariva. (Ap 4.3, 21.20)

crisolito Cũináva cũravabu no ĩmaro
 mamaro Jerusalén ãmicũriĩmaro
 jãjaro núvari ðaiva, cũrajũmeniva.
 (Ap 21.20)

crisoprasa Cũináva cũravabu
 no ĩmaro mamaro Jerusalén
 ãmicũriĩmaro jãjaro núvari ðaiva,
 jũmeniva yópe cõriápe. (Ap 21.20)

Cristo Griego ãmicũricamua
 yávaicamuaque aiyũrõmu
 Jũmenijicũi daroimũ mÁCũ.

Diablo Cũináro ãmiá abujuvai jabocũi
 ãmiámu, Borocũcũ aiyũrõmu griego
 ãmicũricamua yávaicamuaque. Ape
 ũi ãmiámu Beelzebú aru Satanás.
 (Ap 20.2)

epicúreo Põecũ bueyũbe cũinácũ
 bueipõecũ bÁCũi bueiye báquede,
 ũi ãmiá Epicúreo (341-271 a.C.). Ũ
 mÁCũ buedejaquemavũ põeva ne
 torojũe jaũrõre náre caiye pũeno.
 (Hch 17.18)

esmeralda Cũináva cũravabu
 no ĩmaro mamaro Jerusalén
 ãmicũriĩmaro jãjaro núvari ðaiva,
 jũmeniva yópe cõriápe. (Ap 4.3,
 21.19)

estoico Põecũ bueyũ cũinácũ
 bueipõecũ bÁCũi bueiye báquede, ũi
 ãmiá Zenón (335-263 a.C.). Ũ mÁCũ
 buedejaquemavũ põevare ye baju
 ãmene ne torojũe aru ne chõioye
 aru ne ñãjiye máre. (Hch 17.18)

eunuco Põecũ parũcũ jabocũre
 o jabocore cadateipõecũ
 barejaquémavũ. Jaborõcarõre
 cãvede o tãutũrare coreipõecũ
 barejaquémavũ. Aru ũi baju

nomicubecu barejaquémavu. (Hch 8.27)

fariseo Judíovacacu Moisés báciu ñi toivaiye ðaicõjeiye báquede bueivucacu barejaquémavu. Aru ape ðaicõjeiyede máre, ne baju ðarí cõmajiyede, bueivucacu barejaquémavu. Fariseova ãmicurivũ Moisés báciu ñi toivaiye báquede bueivũ barejaquémavu aru jũ aivũ barejaquémavu nópe die ðaicõjeiyepe.

flauta Tãraiyo bu jãpuiyo. (Ap 18.22)

Genesaret Apeãmiamu Galilea ãmicurijitabu macajitabu urabu. (Mt 14.34; Mr 6.53; Lc 5.1)

Gog Gog ãmicurõcavu maucũvarãjarama Jesucristore ñi copaidaquiyede ijãravũ. (Ap 20.8)

griego Grecia ãmicurijoborõcacube aru dijoborõcavu ne yávaicamuamu. (Hch 6.1, 9.29, 36, 13.8, 21.37; Col 3.10)

hebreo Israel báciu pãramenacacube aru ñi máciu pãramena ne yávaicamuamu. (Jn 20.16; Hch 6.1; 2 Co 11.22)

Hermes Cũináyajubo põeyajubo griego ãmicurijajubocavu obedivũ pẽpeimara mácavũre cũvarejaimada. Ne pẽpeimaracacu báciu Zeus ãmicucui máciu Hermes ãmicurejamedã. Ne dãpiaiyepe ñi, Hermes, cõjenejamedã põeva ne yajuiyede, ne bojedaiyede ne mároare, aru arevũ pẽpeimara mácavũre boro ñvacaipõecu barejãmedã. (Hch 14.12)

higuera Cũinácu jocucubu 4 pũ 7 paimetros ãmũjũricũ. Jẽidũa mearũa cũricubu aru bótaicubu. (Mt 21.17-21, 24.32; Mr 11.11, 13, 19-20, 13.28; Lc 13.5-9, 21.29; Jn 1.48; Stg 3.12)

higo Higuercacu ãmicuricũ jocucũ jẽidũabu. Pũque ñjũã coapa jẽiyebu. Ocorũmũre jẽidũabu quĩjĩdũa aru jãjaridũa. Ubenita mearũa jẽiyebu ñjũgũmũre. (Mt 7.16; Mr 11.13; Lc 6.44)

hisopo Jocũjĩcũ pare jãjariyoca cũrijĩcubu. Que baru icũ jocũjĩcũ cavabũaque judíova sacerdoteva bácavu ne ðarí cõmajiyede ne memecaiyede Jũmenijicũre jajiẽdejaquemavu ãimara ne boaimara mácavu ne jivede. (Jn 19.29; He 9.19)

Israel Apeãmiamu Jacob báciu ãmiã, Isaac báciu máciu báciu ãmiã. Que baru ñi máciu pãramena “Israecavu” o “israeva” ãmicũma arepũmũa. Aru arepũmũa ãmicũma “judíova”, aru arepũmũa “hebreova”.

italiano Italia ãmicurijoborõcacube. (Hch 10.1)

jacinto Cũináva cũravabu no ñmaro mamaro Jerusalén ãmicurĩĩmaro jãjaro núvari ðaiva, jũmeniva yópe cavarõpe. (Ap 21.20)

Janes aru Jambres Pũcarã yaviẽde ðaipõeva mácavu barejaquémavu, ina maucũvarivũ bácavu Moisés báciure aru Aarón máciure dijãravũ, ne oatuvaijãravũ bácãrõ ne tuturiteiyoa báquede ãdava arũrivũ ðarí. (2 Ti 3.8)

jaspe Cũináva cũravabu no ñmaro mamaro Jerusalén ãmicurĩĩmaro jãjaro núvari ðaiva, jũmeniva yópe cõriãpe. (Ap 4.3, 21.11, 18-19)

Jerusalén Judíova ne ñmaro urãrõmu, ne cũrijoborõcarõ. Aru mamaro ñmaro maquinó máre, Jũmenijicui põeva ne cũrãjino maquiyẽbu.

judío Cũináyajubo põeyajubocacubu, Israel báciu pãramenacacu. Ina judíovare arepũmũa “Israecavu” o “israeva” adama náre, aru arepũmũa “hebreova”.

lana Oveja o cabra ãmicurivũ oteiãimara põdaque ne ðaime cuitõtemepebu. (He 9.19; Ap 1.14)

laurel Jocucubu. Dicũ yocaque ðarejaquemavu jipobũ adaitarabũare, yajuipepeva ne yajuiye me boje. (1 Co 9.25)

león Macarõcacu yavi jũacũpe pãyube, ubenita pũeno urãcu aru pũeno jijecũcũ. (He 11.33; Ap 5.5, 9.8, 17, 10.3, 13.2)

levita Jacob b́acni mácsu barejaquémavũ Leví b́acũ. Leví b́acni ṕaramena levita ámicurejaquemavũ. Na mácavũ barejaquémavũ J́umenijicũ ćuramine memei ṕoẽva, oeivũ b́acavũ aru joaivũ b́acavũ diñamine aru diñamiquede. (Lc 10.32; Jn 1.19; Hch 4.36)

lino Cónva ćurichíabobu. Yobedoque yoca ćurichíabobu. Yobedoque n̄omuare ñni, cuitótemea cuitótécajea ðaimeare ðaiye bu. (Mt 27.59; Mr 14.51, 15.46; Lc 23.53, 24.12; Jn 19.40; Ap 15.6, 18.12, 16, 19.7-8, 14)

lobo Macayavimipe árojacube. Ubenita p̄eno uracũ, pare jijecũcũbe. Joborõ j̄ajurõĩ curiáimacũbe. Que baru poða urarõ cũcũbe. (Mt 7.15; Jn 10.12)

Magog Magog ámicurõcavũ mauc̄varájarama Jesucristore ñi copaidaquiyede ijáravni. (Ap 20.8)

maná Áiye barejaquémavũ J́umenijicũ ñi jíye báque israeva b́acavũre ne cuiyede p̄ocũbenoi cuarenta paic̄jua baju. Maná ámicũe quíjijabea boriyabea étayabeape, ubenita em̄ijue mumipe barejaquémavũ. (Jn 6.31, 49; He 9.4)

marfil Elefante ámicũcũ áimacũ miepe árojacube ubenita p̄eno uracũ p̄ucajavaroa cũcũ. Dijaravoa borijavaroa marfil ámicũvũ. Pare j̄ajarijavaroa aru pare bojecũvũ. (Ap 18.12)

mármol C̄ravapebu pare j̄ajariva, aru boriva, aru bojecũriva. (Ap 18.12)

Mesías Hebreo ámicũricamua yávaicamuaque aiyũrõmu J́umenijicũ daroimũ mácsu. (Jn 1.41, 4.25)

mirra Jocũjicũ yoca p̄oẽva ne mumijue ne ðaiye bu. P̄oẽva yaivũ b́acavũre judíova ne jarũvarájiye bu. Aru juoie ðaiye bu máre. Die p̄oẽvare ijinore ðápiabede ðaiye bu.

(Mt 2.11, 27.34; Mr 15.23; Jn 19.39; Ap 18.13)

Moloc C̄ináyajubo p̄oẽyajubo amonita ámicũriyajubocavũ b́acavũ ne mearore jímu marejaquémavũ. J́umenijicure ne mearore jíyere aimũ marejaquémavũ, ubenita J́umenijicũ ámecureca. Uí p̄eimeũ mácsu p̄ocẽpe árojurejaquemavũ ubenita jipobũque yópe otevecũ jipobũpe. (Hch 7.43)

mostaza Cainicũ quíjijabe biapemepe paityabeque oteicũbu. Ubenita bucũrĩ mucũbu yóbecurimetros baju. Dicũ j̄eiyabeabu yópe betacajídoape c̄rajũme árojae. Aru majíeda ijiébu bia c̄chijino. Israeva aru arevũ p̄oẽva ne ánore j̄ivari áiye bu. (Mt 13.30-31, 17.20; Mr 4.31; Lc 13.17, 19, 17.6)

nardo Cainichíabobu yoca curĩ, miu curĩ, aru cónva boricovũabu. Cainiñũ aru n̄omuare mumijue ne ðaiye bu. Ubenita pare bojecũebu, dichíabobu p̄aiye boje p̄ocũbenoi, c̄racũa um̄juricũa p̄enoĩ. Me mumijue bu. (Mt 26.6; Mr 14.3; Jn 12.3)

nazareno P̄ocẽ jũ ayũ barejaquémavũ Jesús Nazarecacũ ñi buieyede arep̄m̄ua p̄oẽva ne aimũ nazareno. (Hch 24.5)

nicolaíta P̄ocẽ p̄eimarare mearore jíyũ barejaquémavũ aru ámeina ðayũ barejaquémavũ nomivaque jímarepacõ ámevũque. (Ap 2.6, 15, 16)

olíbano Jocũjicũ mumijue curijicũbu. Jocũjicũ Asia ámicũrijoborõcascũbu. Boe cuidõ jutué curicũ me mumijue bu. (Mt 2.11; Ap 18.13)

olivo C̄inácũ jocũcũbu j̄eidua curicũ dicũ j̄eidua ámiámu olivorũa. Ure cavabũa curicũbu. Aru quíjie yoca curicũbu. Pare j̄ajaricũ, ubenita judíova pare bojecũrivũbu. (Mt 21.1, 24.3, 26.30; Mr 6.13, 11.1, 13.3, 14.26; Lc 10.34, 16.6, 19.29, 37, 21.37, 22.39; Jn 8.1; Hch 1.5, 11; Ro 11.17; Stg 3.12, 5.14; Ap 11.4)

ónice C̄ináva c̄ravabũ no ímaro mamaro Jerusalén ámicũriímaro

jājaro núvari ðaiva, arenumna ñeminiva aru arenumna boriva. (Ap 21.20)

oveja Oteiáimacu cámuca yuyuica cusu, ñi poða mecaríjie cusu, aru ye jijecubecube. Obedivu ovejavare boarí juarí jídejaquemavu judíova bávavu Jümenijicure, ne ámeina teiye báque boje.

Paraíso Pöeva Jümenijicure ju aivu bávavu yaivu bávavu Jesucristoi daquie jipocai ijáravu ne coreino mácarömu pu Jesucristoi nuvajáravu bácaröita cavarö mearoi ñi yainíburu yóbore. (Lc 4.25, 23.43; 2 Co 12.4; He 11.5)

Pascua Aiyurö ángele ñi vaino mácarö aiyurömu ina israeva bávavu ne cuede Egipto ámicurijoboröi. Ángele vaidéjaquemavu israeva bávavu ne cüramia pñenora, boacáyu caivu mama juédova ñmuvare. Nópe ðarejaquemavu Jümenijicu Faraón mácu ñi jaetovaquiyepa ayu ina israeva bávavure Egipto ámicurijoboröre jocarí, ne yebacavure ne curö mácaröre jaruvarí. Pascua judíoiva ne torojüve teinomu, dijáravu bácaröre ávuri, torojüede jívu Jümenijicure. (Lc 2.41, Jn 2.13, 23, 6.4, 11.55, 12.1, 12, 13.1; Hch 12.4; 1 Co 5.7; He 11.28; Mt 26; Mr 14; Lc 22; Jn 18-19)

Pentecostés Cüináro torojüve teinomu, judíoiva ne yóbecue paré baju torojüve teiye çjúa coara. Yo torojüve teinomu siete paisumana o cincuenta pajáravua Pascua torojüve teijáravu yóboi, ne oteiye de jéijárvavare. Que baru torojüede jíyaima Jümenijicure aru jícaðaima üre ne páure, mamarumu ne ðaiyede mamaçu jéiyeque. (Hch 2.1, 20.16; 1 Co 16.8)

perla Cürajibo quíjibobu pare bojecurijíbo, cavarure páyu ñi jécuque ðajíbo borijíbo. (Mt 7.6, 13.45-46; Ap 17.4; 18.12, 16, 21.21)

querubín Cavarö mearocasü Jümenijicure memecarí aru mearore

jíni majibi caivu pñeno. Pñcará pñeimara mácavu nápe árojarivu curéjaquemavu ánitöcu judíoiva bávavu ne cüve meacüvede adaitöcu mácarö pñenora. (He 9.5)

Ramá Cüináimaro Benjamín ámicurijabocavu bávavu ne ímaro mácarö ocho paikilometros Jerusalén ámicuríimaro joaröi aviá daino meapüravui. Diímaro mácarö joabenoí cüracobe jívu jaruvarejaquemavu Raquel bácore, Jacob básüi márepaço bácore. (Mt 2.18)

Refán Arevu ne pñeimaracasü básü ámiá ne mearore jímu marejaquemavu ñi, Refán. Arevu Israevavu mearore jídejaquemavu üre ne Egipto ámicurijoboröi cuede, ne ju abe boje Jümenijicüi cöjeiyede. (Hch 7.43)

sacerdote Jacob básüi mácu Leví básüi páramena levita ámicurejaquemavu. Cüinácu nácacu básü, Aarón ámicusu, aru caivu ñmüva ñi páramena mácavu sacerdoteva barejaquemavu. Áimara ne boaimara mácavure aru ape jícaiyede máre jícarejaquemavu Jümenijicure judíoiva pöeva ne ámeina teiye boje.

saduceo Judíovacasü quénora buedejaquemavu Moisés básü ñi toivaiye báquede. Apede buebedejaquemavu. Que baru cüináuru ámenejaquemavu ne dápiaino fariseova aru saduceovaque. Saduceovacaruvavu ju abedejaquemavu yainore jaruvarí nacajainore aru ángeleva ne cuede, aru decova máre ne cuede.

Satanás Cüináro ámiá abujuvai jabocüi ámiámu, Maucu aiyurömu hebreo ámicuricamua yávaicamuaque. Ape ñi ámiámu Beelzebú aru Diablo. (Mt 4.3, 10, 16.23; Mr 1.13, 8.33; Lc 4.2, 10.18, 22.3, 31; Jn 13.27; Hch 26.18; Ro 16.20; 1 Co 5.5, 7.5; 2 Co 2.11, 4.4, 11.14-15, 12.7; 1 Ts 2.18; 2 Ts 2.9;

- 1 Ti 1.20, 5.15; Ap 2.9, 13, 24. 3.9, 12.9, 20.2, 7-8)
- seda** Cuitótecaje meacaje bajubu, ācūriova o júva ne jēcumeaque ne ðaicaje. (Ap 18.12)
- sicómoro** Cūinácu jocūcūbu higeracape paicū. Ėre yoca curicūbu. (Lc 19.14)
- Sión** Cāracūmu Jerusalén āmicūriīmarocacū. Jesucristo űi copaidaquiyede ijāravūi nūcūyūme dicūi. (He 12.22, Ap 14.1)
- Tiberias** Apeāmiamu Galilea āmicūrijitabu macajitabu űrabu. (Jn 6.1, 23, 21.1)
- topacio** Cūináva cūravabu no ĩmaro mamaro Jerusalén āmicūriīmaro jājaro nūvari ðaiva, cūrajūmeniva. (Ap 21.20)
- trigo** Cainijicūa jēiyebu quíjichīajiboa. Judíova aru arevū pōeva máre ne páu ðaiye. Octubre baji, ocorūmu yóboi otedaima diede, aru jēiyede ĩñaima junio baji. (Mt 13.24, 30, 38; Lc 16.7; Hch 27.38; 1 Co 15.37; Ap 6.6, 18.13)
- trompeta** Japuiyobu tūaque ðaiyo, japuru bujidiyo. (Mt 24.31; 1 Ts 4.16; He 12.19; Ap 1.10, 4.1, 8.2, 6, 18.22)
- vino** Ėyaimu jēidūare ne córo ðaiyebu. (Mt 9.17, 26.28, 27.34, 47; Mr 2.20, 14.25, 15.23, 35; Lc 1.15, 5.37-38, 10.34, 22.18; Jn 2.3, 9, 19.29; 1 Ti 5.23; Ap 6.6, 14.17-19, 18.13, 19.4)
- zafiro** Cūináva cūravabu no ĩmaro mamaro Jerusalén āmicūriīmaro jājaro nūvari ðaiva, jāmeniva yópe cavarōpe. (Ap 21.19)
- Zeus** Cūináyajubo pōeyajubo griego āmicūriyajubocavū obedivū pēpeimara mácvūre cūvarejaimaða. Cūinácu ne pēpeimaracacū bācu Cronos āmicūscūi mácvū Zeus āmicūrejameða. Ne dápiayepe ű, Zeus, pūrcūvarejameða caivū cavarōcavūre aru cavarōquede máre. Nópe dápiarejaquemavū na mácvū Jūmenijicu jāve arūcūre aru cūcūre máre ne majibe boje. (Hch 14.12-13)